


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiõxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

872f7754-0986-5ecd-a059-925a708a6939

Contents

SAN MATEO . . .	1
SAN MARCOS . . .	104
SAN LUCAS . . .	167
SAN JUAN . . .	264
LOS HECHOS . . .	329
ROMANOS	418
1 CORINTIOS . . .	459
2 CORINTIOS . . .	501
GÁLATAS	528
EFESIOS	542
FILIPENSES	557
COLOSENSES . . .	566
1 TESALONI- CENSES	575
2 TESALONI- CENSES	583
1 TIMOTEO	588
2 TIMOTEO	600
TITO	608
FILEMÓN	613
HEBREOS	615
SANTIAGO	648
1 PEDRO	657
2 PEDRO	668
1 JUAN	675
2 JUAN	684
3 JUAN	686
JUDAS	688
APOCALIPSIS . . .	692

TNÚHU NÍ CHÍDÓ TNÛNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gǎ Xítóhó Jesucrístú

(Lc. 3:23-38)

1 Te ñaní tnáhá Xítóhó Jesucrístú ní cuu ndíi Dàvíi ndíhi ndíi Àbrahám, cue téé ní xíndecu ndéé sanaha vîhi-gǎ ñuyíú-a. Te duha ndúu cuendá dava-gǎ cue téé ní cuu ñaní tnáhá-gǎ ní xíndecu ndéé sanaha.

2 Ndíi Àbrahám ní xóo ìⁿ déhe ndíi, te ndíi-áⁿ ní xínani ndíi Isàác. Te déhe ndíi Isàác-áⁿ ní cuu ndíi Jàcób, te déhe ndíi Jàcób-áⁿ ní cuu ndíi Jùdá, te diu-ni ndíi Jàcób-áⁿ ní cuu tǎtá dava-gǎ cue ñaní ndíi Jùdá-áⁿ. 3 Te déhe ndíi Jùdá-áⁿ ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-áⁿ ní cuu ndíi Èsróm, te déhe ndíi Èsróm-áⁿ ní cuu ndíi Àrám.

4 Te déhe ndíi Àrám-áⁿ ní cuu ndíi Aminàdáb, te déhe ndíi Aminàdáb-áⁿ ní cuu ndíi Nàsón, te déhe ndíi Nàsón-áⁿ ní cuu ndíi Sàlmón. 5 Te ñadìhí ndíi Sàlmón-áⁿ ní xínani-aⁿ Ràháb, te ní xóo ìⁿ déhe-yu ní xínani-dě Bòóz. Te ñadìhí ndíi Bòóz-áⁿ ní xínani-aⁿ Rùt, te ní xóo ìⁿ déhe-yu ní xínani-dě Òbéd, te déhe ndíi Òbéd-áⁿ ní cuu ndíi Isàí. 6 Te déhe ndíi Isàí-áⁿ ní cuu ndíi Dàvíi téé ní xíndaha ñàha xii cue ñáyiú isràél. Te déhe ndíi Dàvíi-áⁿ ndíhi ñadìhí ndíi ní cuu ndíi Salòmón. Te díhna-gǎ ndíi

Ùriás ní cándeca ndíi ñadìhí-áⁿ te dàtnùní ní naqueheⁿ ñaha ndíi Dàvíi-áⁿ.

7 Te déhe ndíi Salòmón ní cuu ndíi Ròboám, te déhe ndíi Ròboám-áⁿ ní cuu ndíi Àbiás, te déhe ndíi Àbiás-áⁿ ní cuu ndíi Àsá. 8 Te déhe ndíi Àsá-áⁿ ní cuu ndíi Josàfát, te déhe ndíi Josàfát-áⁿ ní cuu ndíi Jòrám, te déhe ndíi Jòrám-áⁿ ní cuu ndíi Ùziás. 9 Te déhe ndíi Ùziás-áⁿ ní cuu ndíi Jòtám, te déhe ndíi Jòtám-áⁿ ní cuu ndíi Àcáz, te déhe ndíi Àcáz-áⁿ ní cuu ndíi Ezèquiás. 10 Te déhe ndíi Ezèquiás-áⁿ ní cuu ndíi Manàsés, te déhe ndíi Manàsés-áⁿ ní cuu ndíi Àmón, te déhe ndíi Àmón-áⁿ ní cuu ndíi Jòsiás. 11 Te déhe ndíi Jòsiás-áⁿ ní cuu ndíi Jecòniás. Te diu-ni ndíi Jòsiás-áⁿ ní cuu tǎtá nchaa dava-gǎ cue ñaní ndíi Jecòniás-áⁿ. Te dàvá-áⁿ ní quide yica cuè téé ñuú Babiloniá ndécá-güedě ñáyiú isràél cuáháⁿ ñuú-güedě cuendá yàcáⁿ cundecú-yu.

12 Te sátá ní yáha ducaⁿ ní cuu, te ndíi Jecòniás ní xóo ìⁿ déhe ndíi ndíhi ñadìhí ndíi, te téé-áⁿ ní xínani-dě Salàtiél. Te déhe ndíi Salàtiél-áⁿ ní cuu ndíi Zorobàbél. 13 Te déhe ndíi Zorobàbél-áⁿ ní cuu ndíi Àbiúd, te déhe ndíi Àbiúd-áⁿ ní cuu ndíi Eliàquím, te déhe ndíi Eliàquím-áⁿ ní cuu ndíi Àzór. 14 Te déhe ndíi Àzór-áⁿ ní cuu ndíi Sàdóc, te déhe ndíi Sàdóc-áⁿ ní cuu ndíi Àquím, te déhe ndíi Àquím-áⁿ ní cuu ndíi Èliúd. 15 Te déhe ndíi Èliúd-áⁿ ní cuu ndíi Eleàzár, te déhe ndíi Eleàzár-áⁿ ní cuu ndíi Mátán, te déhe ndíi Mátán-áⁿ

nĩ cuu ndii Jàcób. ¹⁶ Te déhe ndii Jàcób-án nĩ cuu ndii Chèé tée ní cuu yii tá Màriá xíchí nĩ cuu nǎná Jèsús Yaá ní tendaha Dütú Ndiöxí ní quixi ñuyíú-a.

¹⁷ Te sa ní cuu úxúú tnàhá cue tée cùu ñani tnàhá ndii Àbrahám ndécú dàvá-án, te dàtnùní ní cacu ndii Dàvií diu-ni ñani tnàhá ndii. Te núú tnàhá méé ndii Àbrahám ndihi ndii Dàvií ní cuu úxícúmí tnàhá-güedé. Te ducaⁿ te sa ní xínu úxícúmí-gǎ tucu-güedé ní cacu, te dàtnùní ní tñii ñaha cuè tée ñuú Babiloniá xii ñáyiú isràél ndécá ñaha-güedé xii-yu cuáhán ñuú-güedé cuèndá yàcáⁿ cundecú-yu. Te sátá nĩ yáha sá dúcáⁿ nĩ cuu, te ní cacu úxúní tucu cue tée ní cuu ñani tnàhá ndii Àbrahám ndihi ndii Dàvií, te dàtnùní ní cacu Xítohó Jesucristú ñuyíú-a. Te núú tnàhá méé-gǎ ní cuu úxícúmí tnàhá-güedé.

*Ní cacu Jèsús
(Lc. 2:1-7)*

¹⁸ Te duha ní cuu cùtnàhá ní cacu Xítohó Jesucristú, chi dàvá-án nĩ xíndecu ìⁿ xíchí cuéchi nĩ xínani Màriá. Te xíchí-án sa ní cundáá tnúhu sá tnándaha-xi ndihi ìⁿ tée nani Chèé. Te cùmání-gǎ tnándaha-xi ndihi tée-án te Espíritú Yǎ Ndiöxí ní quide ní ngúhuⁿ déhe-xi. ¹⁹ Te té Chèé tée cùníní candeca ñaha xii xíchí-án nĩ cutnùní iní-dé sá ñúhú dèhe-xi. Te cùu-dé ìⁿ tée quide ndáá, núú xiǎⁿ duuⁿ duuⁿ ní sanj iní-dé sá vǎ tnándaha-gǎ-dé ndihi-xi, te dicó-ni sá ñà túú ní cǎháⁿ-dé chi ní cuiní-dé sá vǎ cǎháⁿ cuèhé cǎháⁿ duha ñáyiú cuèndá-xi. ²⁰ Te sátá

dúcáⁿ nĩ sani iní-dé te ní ngáva-dé ní xídí-dé, te núú sàní-dé ní sáhán ìⁿ espíritú xínu cuèchi núú Yǎ Ndiöxí ní xáhaⁿ-xi xii-dé:

—Yohó té Chèé tée cùu ñani tnàhá ndii Dàvií, yúhú cǎchí tnúhu-í xii-n sǎ ñà túú nǎ cani iní-n, tnándaha nahi-ni-n ndihi tá Màriá cuèi ñúhu déhe-xi, chi mee Espíritú Yǎ Ndiöxí ní quide-xi ducaⁿ ní ngúhuⁿ déhe-xi. ²¹ Te na cǎcu déhe-xi-án te danàni-n-dé Jèsús. Te ducaⁿ cùnani-dé, chi tée-án cada-dé cuèndá sá vǎ cùndecu-gǎ cue ñani tnàhá-dé ñáyiú isràél ichi cuèhé ichi duha —duha ní xáhaⁿ espíritú-án xii té Chèé-án núú sàní-dé.

²² Te ducaⁿ nĩ cuu chi ní quee ndáá-xi nǎcuáa ní xáhaⁿ Yǎ Ndiöxí xii ìⁿ tée ní cǎháⁿ tnúhu-gǎ ndéé sanaha. Te tée-án nĩ chídó tnùníní-dé núú tütú-gǎ nǎcuáa ní xáhaⁿ-gǎ xii-dé, te duha ní xáhaⁿ-gǎ:

²³ Cundecu ìⁿ xíchí cuéchi ndéé cuèé-gǎ.

Te òré ndécú ìⁿ-xi vátá ñihí-gǎ yii-xi te ngúhuⁿ déhe-xi.

Te òré ná cǎcú dèhe-xi te danàni ñahá-yu Emànuél.

Duha ní xáhaⁿ-gǎ xii tée-án ní chídó tnùníní-dé núú tütú-gǎ. Te tnúhu Emànuél-án quée-xí: Yǎ Ndiöxí ndécú ndihi-o. Núú xiǎⁿ ducaⁿ nĩ cuu vitna.

²⁴ Te òré ní ndiquíú iní té Chèé-án te ní quide-dé nǎcuáa ní xáhaⁿ espíritú-án xii-dé chi ní tnándaha-dé ndihi tá Màriá. ²⁵ Dico ndi díⁿ ní xíndecú-yu ndéé ní sáá nduu nĩ cacu déhe-xi. Te òré ní cacu déhe-xi-án te ní dánání ñaha-dé Jèsús.

2

Cue tée cuángoto ñaha xii Jesús

1 Te Jèsús ní cacu-gá ìⁿ ñuú nání Bèlén, te ñuú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndàha-dé ñáyiu. Te ñuú Jerusàlén ní quexio cue tée véxi ndàa xio nacuáa quène nchíanchii, cue tée túha dàcuaha cuendá nchaa sá ndèé andiu. ² Te ndùcu tnúhu-güedé núú ñáyiu ñuú-áⁿ, te xàhaⁿ-güedè:

—¿Vá cündèe iní-ndó càchí tnúhu-ndo ndèé ndécú tée quindaha ñaha xii ñáyiu isràél-áⁿ? Chi ní xiní-ndí ní quene chódíní-dé ndàa xio nacuáa quène nchíanchii, núu xiáⁿ véxi-ndí chi cuíní-ndí quíní-ndí-dé te chiñuhu-ndí-dé —càchí-güedé xàhaⁿ-güedé xii-yu.

³ Te òré ní níhí tée cùnùu naní Herodés tnúhu sá ndùcu tnúhu cue tée-áⁿ ndèé ndécú tée quindaha ñaha xii ñáyiu isràél, te ñá túú tnàhí ní cùu váha iní-dé, te diu-ni ducaⁿ ñà túú ní cùu váha iní tnàhá nchaa ñáyiu ñuú-áⁿ.

⁴ Te ní cana-dé cue tée cùu dútú cùnùu, ndihí cue tée dàcuaha ñaha xii ñáyiu nchaa tnúhu ní chídó tnùnì ndí Moisés, te ní xicáⁿ tnúhú-dé núú-güedé núu xiní-güedé ndèé cacu Crístú tée tendaha Yá Ndiöxí quixi ñuyú-a. ⁵ Te ní xàhaⁿ-güedé xii-dé:

—Ìⁿ ñuú yíndèhu distritú Jùdeá cacu-dé, te ñuú-áⁿ nání-xí Bèlén, chi quee ndáá-xi nàcuáa ní xàhaⁿ Yá Ndiöxí xii ìⁿ tée ní xóo cáháⁿ

tnúhu-gá ndéé sanaha. Te duha ndùu tnúhu ní chídó tnùnì-dé núú tütú-gá:

⁶ Ñuú Bèlén cúu-xí ìⁿ ñuú líhli yíndèhu distritú Jùdeá, te ío-gá cùnùu-xi dacúúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ tée ío cùnùu.

Te tée cunuu-áⁿ quindaha-dé ñáyiu cùu cuendá-í ñáyiu isràél.

Duha ní xàhaⁿ-gá xii tée ní xóo cáháⁿ tnúhu-gá, te ducaⁿ ní chídó tnùnì-dé núú tütú-gá —càchí-güedé xàhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu ní cana-dé cue tée ndùcu tnúhu núu ndèé ní cacu tée quindaha ñaha xii ñáyiu isràél, te ní xicáⁿ tnúhú-dé núú-güedé ná nduu cùu-xi nduu díhna nuu ní xiní-güedé chódíní. ⁸ Te sátá dúcáⁿ te ní xàhaⁿ-dè xii-güedé:

—Chí cuáháⁿ ñuú Bèlén te nducu tnúhu váha-ndo núu ndèé ní cacu tée ducaⁿ quindaha ñaha xii ñáyiu isràél. Te òré ná nàníhí-ndó-dé te quixi-ndo càchí tnúhu-ndo cuendá quíhíⁿ-í tnàhá-í chiñuhu-í-dé —càchí-dé xàhaⁿ-dè xii-güedé.

⁹ Te sátá dúcáⁿ ní xàhaⁿ té Hèrodés-áⁿ te ní xica-güedé cuáháⁿ-güedé. Te chódíní ní xiní-güedé ní quene ndàa xio nacuáa quène nchíanchii-áⁿ yòdo nuu-di núú-güedé cuáháⁿ. Te ní ngúíñí chódíní-áⁿ, te núú ní ngúíñí-di-áⁿ yíndáá núu ndécú Jèsús. ¹⁰ Te

òré ní xíní cue téé-áⁿ nǐ ngüíñí chódíní-áⁿ núú yíndáá ndécú-gǎ, te ní cudíí víhí ìní-güedé. ¹¹ Te ducaⁿ te ní quexìo-güedé ndéé núú cáá vehe ndecu Jesús. Te òré cuánguìhu-güedé xítí vehe te ní xíní-güedé Jèsús ndécú-gǎ ndihi nǎná-gǎ Màriá. Te ní ngüíñí xítí-güedé, te ní ngüíta-güedé ní cachí-güedé sá ìo càhnu cuu Jesús. Te dàtnùní ní nacaáⁿ-güedé càjá xìnehe-güedé, te ní tava-güedé díhúⁿ cuááⁿ, ndihi dúsa sá ìo váha sàháⁿ tnámí nàni insiensú, ndihi yúcú sǎ nání mìrrá ní taxi ndecu-güedé núú Jèsús cuèndá cuu-xi ìⁿ táhú sǎ cúú-xí-gǎ. ¹² Te Yá Ndiòxí ní cáháⁿ-gǎ núú sàní-güedé, te xáhaⁿ-gǎ xii-güedé sá vǎ náyáha-gǎ-güedé cáháⁿ ndihi-güedé té Hèrodés. Núu xiǎⁿ cue téé-áⁿ cuánuhú-güedé ìngá ichi, te ñá túú-gǎ ní náyáha-güedé núú ndécú tǎ Hèrodés.

Cuáháⁿ-yu ndihi Jèsús nàcióⁿ Ègíptú

¹³ Te sátá nǐ yáha cuánuhú cue téé ní sángoto ñaha xì Jesús, te ní quexìo ìⁿ espíritú xínú cuèchi núú Yá Ndiòxí núú sàní té Chéé, te xáhaⁿ-xi xii-dé:

—Véxi-í càchí tnúhu-í xii-n sǎ ndácóo-n, te ndee-n ñuú-a ndihi Jèsús, ndihi nǎná-gǎ cunu-ndo quíhíⁿ-ndó nàcióⁿ Ègíptú, chi té Hèrodés tendaha-dě cue téé quixi nanducu ñaha xii Jesús cuèndá cahni ñaha-güedé. Te yácáⁿ

cundecu-ndo ndéé cachí tnúhu-í xii-n ndùu ndixi-ndo —cachí espíritú-áⁿ xáhaⁿ-xi xii té Chéé núú sàní-dé.

¹⁴ Te té Chéé-áⁿ nǐ ndácóo-dé, te niú ní xica-dé ndihi tá Màriá ndécǎ-yu Jèsús cuáháⁿ nàcióⁿ Ègíptú. ¹⁵ Te nàcióⁿ Ègíptú-áⁿ ndécú-yu ní xíhí té Hèrodés. Te ducaⁿ nǐ cuu chi ní quee ndáá-xi nàcuáa ní cachí ìⁿ téé ní xóo cáháⁿ tnúhu Yá Ndiòxí ndéé sanaha ní quide-dé núú-gǎ ní cáháⁿ-dé yuhu-gǎ, te duha ní xáhaⁿ-gǎ ní cáháⁿ-dé: “Nàcióⁿ Ègíptú ndécú Dèhe-í ní cuu, te ní xáhaⁿ-í xii-dé sá ndéé-dě ñuú-áⁿ vǎ cùndecu-gǎ-dé”, duha ní xáhaⁿ-gǎ xii téé ní cáháⁿ tnúhu-gǎ ní quide-dé núú-gǎ.

Té Hèrodés ní táuchíuⁿ-dě cahni-güedé cue landú

¹⁶ Te cue téé ní sángoto ñaha xì Jesús ní dándàhú-güedé té Hèrodés, chi ñá túú ní náyáha-güedé cúñaha-güedé sá nǐ naníhí-güedé Jèsús. Te sátá nǐ cutnùní ìní té Hèrodés sá nǐ dándàhú ñáhá-güedé xii-dé te ní cudééⁿ víhí-dě, te ní tendaha-dě cue téé cuáháⁿ ñuú Bèlén, ndihi nchaa dava-gǎ ñuú cáá yàtni xiáⁿ cuèndá cahni-güedé mee-ni cuè landú téé. Te ndéé cue landú íchí nǐ cacu, ndihi ndéé cue landú sa ní nútnahá úú cuíá-xi nchaa-güexi cahni-güedé ní xáhaⁿ-dé. Te ducaⁿ nǐ quide-dé chi ní quide cuèndá-dé nàcuáa ndùu tnúhu ní xáhaⁿ cuè téé ní sángoto ñaha xii Jesús nduu ní xíní-güedé chódíní, núu xiǎⁿ ducaⁿ nǐ táuchíuⁿ-dě ní quide

cue téé-án. ¹⁷ Te ducaⁿ nǐ cuu chi ní quee ndáá-xi nàcuáa ní cachí ndíi Jeremiás téé ní xóo cáháⁿ tnúhu Yá Ndiǒxí ndéé sanaha, te duha ní cachí ndíi:

¹⁸ Ní tecú ndàhí víhí ñǎyiu ñuú Ràmá sá ndihú iní-yu, te ñǎyiu xǐndáhyú-án cúŷ-yu ñaní tnáhá tǎ Ràquél, te ndàhyú-yu cuèndá sá nǐ xíhí déhe-yu.

Te ñǎyiu-án ñà túú ní cuìní-yu dàñá-yu sá ndihú iní-yu cuèndá sá nǐ xíhí déhe-yu.

Duha ní cachí ndíi Jeremiás.

¹⁹ Te sátá nǐ xíhí té Hèrodés te ní sáháⁿ tucu espíritú xínú cuèchi núú Yá Ndiǒxí núú sàní té Chèé òré ndécú-dé nàcióⁿ Ègíptú, te ní xáhaⁿ-xi xii-dé:

²⁰ —Véxi tucu-í cǎchí tnúhu-í xii-n sǎ ndácóo-n, te núhú-n ndihí Jesús ndihí nǎná-gǎ ñuú cue ñaní tnáhá-n ñǎyiu isràél cundecu-ndo, chi sa ní xíhí cue téé cuìní cahni ñaha xii Jesús ní cùu —cachí espíritú-án xáhaⁿ-xi xii té Chèé núú sàní-dé.

²¹ Te té Chèé-án nǐ ndacóo-dé, te ní ndee-dé ndihí Jesús ndihí nǎná-gǎ cuánuhú-yu ñuú cue ñǎyiu isràél ñǎyiu cùu ñaní tnáhá-yu.

²² Te té Chèé ní níhí-dé tnúhu sá tǎ Arquelaú ní nucúnutnǐ-dé núú tǎtá-dé té Hèrodés distritú Jùdeá yíndàha-dé ñǎyiu. Te ní yùhú té Chèé-án, te ñá túú ní cuìní-dé quíhíⁿ-dé cundecu-dé distritú-án. Te Yá Ndiǒxí ní cáháⁿ-gá núú sàní-dé, te ní xáhaⁿ-gá xii-dé sá quíhíⁿ-dé distritú Galileá,

núu xǎáⁿ yàcáⁿ cuáháⁿ-yu. ²³ Te òré ní quexió-yu distritú Galileá, te ní sáháⁿ-yu ñⁿ ñuú nání Nàzarét ní xíndecú-yu. Te ducaⁿ nǐ cuu chi ní quee ndáá-xi nàcuáa ní cachí cue téé ní xóo cáháⁿ tnúhu Yá Ndiǒxí ndéé sanaha sá Jèsús cuu-gá téé ñuú Nazarét.

3

Té Juàá téé dàcuandute ñaha xii ñǎyiu cǎháⁿ-dé tnúhu Yá Ndiǒxí xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ nǐ cuu, te téé nàni Juaá téé dacuandute ñaha xii ñǎyiu ní quexió-dé yucu distritú Jùdeá cǎháⁿ-dé tnúhu Yá Ndiǒxí núú ñǎyiu xití yucu-án. ² Te xáhaⁿ-dǎ xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiǒxí xii-ndo —cǎchí-dé xáhaⁿ-dǎ xii-yu.

³ Te diu cuèndá té Juàá-án nǐ chídó tnùní ndíi Chàíá téé ní xóo cáháⁿ tnúhu Yá Ndiǒxí ndéé sanaha, te duha nduu tnúhu ní chídó tnùní ndíi cuèndá-dé:

Tècú cǎháⁿ níhi ñⁿ téé yìhi xití yucu, te cǎchí-dé:

“Chí dáñá nchàa ichi cuehé ichi duha ndècu-ndo, te tní-ndo ìchi váha,

Te ducaⁿ càda-ndo cuèndá cundecu túha-ndo chi véxi Yaá ío cùnuu”, duha quesaha tǎe-án.

Duha nduu tnúhu ní chídó tnùní ndíi Chàíá-án cuèndá té Juàá.

4 Te té Juàá-án nǐ xóo cuihnu-dé dóó idi càméyu, te ìí nǐ ní cuu pànú xití-dé, te ní xóo caxi-dé tíca làngóstá ndihi ndudí ñúñú cuéchi. ⁵ Te ñáyu ñúú Jerusàlén, ndihi ñáyu nchaa ñúú yíndèhu distritú Jùdeá, ndihi ñáyu nchaa ñúú cáá yàtni yúte Jòrdán ní sáhán-yu ní xíndedóho-yu nàcuáa ní cáhán té Juàá. ⁶ Te ní ngúita-yu ní náhmá-yu nchaa cuéchi-yu núú Yá Ndióxi. Te òré ducaⁿ nǐ náhmá-yu te ní dácúandute ñaha té Juàá xií-yu yúte Jòrdán.

⁷ Te vài cue tée cùu fariséu ndihi cue tée cùu saducéu cuáhán-güedé núú ndécú tǔ Juàá cuìní-güedé dácúandute ñaha-dé xii-güedé. Te òré ní quexìo-güedé núú ndécú-dě, te ní xáhaⁿ-dě xii-güedé:

—¡Nchaa nchòhó cùú-ndó dàtná ìí còó dǎéⁿ chi ío cuihna iní-ndó! ¿Te nása ní cuu núu tñahá nchòhó ndúcú-ndó nàcuáa cada-ndo càcu ni-hnu-ndo núú tñundòho cahnu vihi ta cuyatni ñaha xii-ndo véxi-i? ⁸ Te chí cáda vǎha vitna cundecu-ndo cuèndá ducaⁿ cùtnuní sá nǐ dáñá-ndó nchaa ichi cuehé ichi duha ndècu-ndo. ⁹ Te vá càchí-ndó sǎ ío càhnu cuu-ndo cuendá sá cùú-ndó ñaní tñahá ndíi Àbrahám. Chi cuèi ndéé yúú te ndacu Yá Ndióxi ndada-gá ñáyu te cuú-yu ñaní tñahá ndíi Àbrahám. ¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávidí-xi-án, chi nchaa yutnu-án tèhndé-xi te cuágee-xi núú ñùhú càyú-xi.

Te duha sǎtnahá-xi ndoho nchaa ñáyu ñà túú quide váha-án chi nchaa ñáyu ñà túú quide váha cùú-yu dàtná nchaa yutnu sá ñà túú càváha sávidí-xi. ¹¹ Te na càchí tñuhu ndáá-í xii-ndo sǎ yùhú dácúandute-í mee-ni ñáyu ní dáñá nchaa ichi cuehé ichi duha. Dico nchicúⁿ tucu ingá téé véxi, te téé-án taxi-dé Espiritú Yá Ndióxi cundecu ndihi-ndo. Te cùu-xi datná ìí ñùhú, chi ndada ndoo ndada nine-xi iní-ndó. Te téé-án ío-gá cùnùu-dé dácúúxi yùhú, chi yùhú cùú-í ìí téé duuⁿ duuⁿ ñà túú tàú cuita nehe ní chàú-dé dico quide-í chiúⁿ-dé. ¹² Te téé-án sa véxi túha-dé sá cáda dǐíⁿ ñaha-dé xii-o dàtná quidé ñáyu ndàda ndoo triú, chi ñáyu-án sa nèhe túha-ná-yu yaxíⁿ-yu òré náñani cuèndá ndada ndoo-yu. Te òré ndádá ndoo-yu triú-án te dàquee dǐíⁿ-yu mihi-xi, te tàxúha-yu mee-nǎ triú-án te sǎhmí-yu mihi-xi-án. Te dàtná quidé-yu mihi triú-án ducaⁿ sǎtnahá-xi cada ñaha téé-án xii nchaa ñáyu ñà túú quide váha, chi daquihíⁿ ñahá-dě xií-yu núú ñùhú núú càyú, te ñùhú-án ñà túú tñahí ndàhvá —càchí-dé xáhaⁿ-dě xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galileá cuáhán-gá yúte Jòrdán núú ndécú tǔ Juàá cuèndá dácúandute ñaha-dé xii-gá. ¹⁴ Te òré ní quexìo Jesús núú ndécú tǔ Juàá, te ñà cuìní-dé dácúandute ñaha-dé

xii-gá ní cùu, te ní xáhaⁿ-dě xii-gá:

—Yúhú tàú-í sá dácuaⁿndute ñaha-n xii-í, te ñá díú dà yúhú dácuaⁿndute ñaha-í xii-n — cächí-dé xáhaⁿ-dě xii-gá.

¹⁵ Te Jèsús ní xáhaⁿ-gã xii-dé:

—Queheⁿ dañá, chi dacuití xini ñuhu-xi ducaⁿ cada-o nacua^a cundáá-ó nũú Yã Ndiõxí —cächí-gá xáhaⁿ-gã xii-dé.

Te té Juáá-áⁿ ñí sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dácuaⁿndute-dé Jèsús. Te òré ní nene-gá xití ndute te ní xiní-gá nchí andiú, te ní quee Espiritú Yã Ndiõxí véxi cuuⁿ-xi ngúndecu ndihi ñaha-xi xii-gá, te dàtná cáá ìⁿ lómá cáá Espiritú-áⁿ véxi cuuⁿ-xi. ¹⁷ Te òré-áⁿ ñí tecú ní cáháⁿ Yã Ndiõxí ndéé andiú, te xáhaⁿ-gã xii Jèsús:

—Yòhó cúú-n Dèhe-í tée ío cùu iní-í te ío cùdí iní ñáhà-í xii-n —cächí-gá xáhaⁿ-gã xii Jèsús.

4

Sácuíhná quidé yìca-xi cada Jesús sá ñà túú tàú-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yã Ndiõxí ndécá-xí Jèsús cuáháⁿ ìⁿ xití yucu cuèndá yàcáⁿ cundecu tnaa-gá, te yàcáⁿ quexìo sácuíhná coto ndéé ñáhá-xí xii-gá te núu ndisa sá vã cádá-gã ìⁿ sá ñà túú tàú-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnúⁿ ní xicáⁿ iní-gá caxi-gá. ³ Te sátá dúcáⁿ te ní

quexìo sácuíhná quidé yìca-xi cada Jesús ìⁿ sá ñà túú tàú-gá cada-gá, te xáhaⁿ-xi xii-gá:

—Te núu ndisa sá cúú-n Dèhe Yã Ndiõxí te cùñaha xii yúú-a na nduu-xi paá — cächí-xi xáhaⁿ-xi xii-gá.

⁴ Te Jèsús ní xáhaⁿ-gã xii-xi:

—Núú tütú Yã Ndiõxí cächí-xi: “Ñá díú mèe-ni paá candeca-xi iní ñáyiú ñuyúú, chi tñhá nchaa tnúhu cáháⁿ Yã Ndiõxí candeca-xi iní-yu”, duha cächí-xi núú tütú-gá — cächí-gá xáhaⁿ-gã xii-xi.

⁵ Te dàtnúⁿ sácuíhná-ãⁿ ndécá ñaha-xi xii-gá cuáháⁿ ñuu Jerusálén, te yàcáⁿ ní xáhaⁿ-xi xii-gá cuásaá-gá díquí véñúhu càhnu sá ío cùnuu núú ñáyiú israél, ⁶ te dàtnúⁿ ní xáhaⁿ tucu-xi xii-gá:

—Te núu ndisa cúu-n Dèhe Yã Ndiõxí te cuandèe ndava núú ñuhú cuèndá quee ndáá-xi nacua^a cáháⁿ-xi núú tütú-gá núú cächí-xi: “Yã Ndiõxí tendaha-gã cue espiritú xínú cuèchi núú-gã quixi-xi cuèndá coto ñaha-xi xii-n, te núú ndáhá-xí càundodo-n cuèndá sá vã dánicuèhé yúú sáhá-n”, duha cächí-xi núú tütú-gá —cächí sácuíhná-ãⁿ xáhaⁿ-xi xii Jesús.

⁷ Te Jèsús ní xáhaⁿ-gã xii-xi:

—Te cächí tucu-xi núú tütú Yã Ndiõxí: “Vã cání iní-n còto ndeé-n Dùtú Ndiõxí Yáá cúú Ndiõxí-n cuèndá-ni sá cùiní-n sá dácäcu nihnu ñaha-gã xii-n ìⁿ sá sání iní-n càda-n”, duha cächí-xi núú tütú-gá — cächí-gá xáhaⁿ-gã xii-xi.

⁸ Te sácuíhná ndécá tucu-xi Jesús cuáháⁿ ìⁿ núú tündúú dùcúⁿ, te uuⁿ-ni ní dánèhé núú

ñáhá-xí xii-gá nchaandi túhú nacióⁿ cáá ñúyú, ndihí nchaa sá vaha ío ñⁿ ñⁿ nacióⁿ-án. ⁹ Te ní xáhaⁿ-xi xii-gá:

—Te núu yòhó ngüñí xítí-n nùú-í chiñuhu ñaha-n xii-í ñá, te taxi cuendá-í nchaa sá ní dánèhé ñáhà-í-a cuu cuendá-n —càchí-xi xáhaⁿ-xi xii-gá.

¹⁰ Te Jèsús ní xáhaⁿ-gã xii-xi:

—Xocuñí yòhó sácuihná núu ndécù-í-a, chi vá cúu càda-í nacuáa càchí-n, chi núu tütú Yá Ndiõxí càchí-xi; “Chiñuhu-ndo Dütú Ndiõxí Yaá cúu Ndiõxí-ndó, te diu-ni-gá cada-ndo nchaa nacuáa càháⁿ-gá”, duha càchí-xi núu tütú-gá —càchí-gá xáhaⁿ-gã xii-xi.

¹¹ Te dātnūnī sácuihná ní dáñá-xí Jèsús ní xica-xi cuáháⁿ-xi. Te sátá dúcáⁿ te ní quexio cue espíritú xínú cuèchi núu Yá Ndiõxí ní xinu cuechi-xi núu Jèsús.

Distritú Galileá ní chisaha Jèsús chiūⁿ ní táhú Tātá-gã Dütú Ndiõxí cada-gá

(Mr. 1:14-15; Lc. 4:14-15)

¹² Te òré ní níhí Jèsús tnúhu sá ní ngava té Juáá téé dàcuandute ñaha xii ñáyi uvecaá, te ní xica-gá cuáháⁿ-gá distritú Galileá. ¹³ Te ní ñà túú ní xíndecu-gá ñuú Nazàrét, chi ní yáha-gá cuáháⁿ-gá ndéé ñuú Capèrnaúm yacáⁿ ní xíndecu-gá, te ñuú-án cáá yàtni yuhu lagúná, te yatni xiáⁿ cáá ñuhu nani Zabulón, ndihí ñuhu nani Neftalí. ¹⁴ Te ducaⁿ ní cuu chi ní quee ndáá-xi nacuáa ní chídó tnùní ndíi Chàíá téé ní xóo cáháⁿ tnúhu Yá Ndiõxí ndéé sanaha núu tütú-gá núu càchí-xi:

¹⁵ Ñuhu nani Zabulón, ndihí ñuhu nani Neftalí, ñuhu-án yíndèhu-xi distritú Galileá,

te xiáⁿ xíndecu cue ñáyi u ñá túú cùu ñáyi u isràél,

te càa-xi yatni yuhu lagúná te ndàa ingá xio yúte Jòrdán cúu-xí.

¹⁶ Te cue ñáyi u-án ndécü-yu ñⁿ núu néé chi ndécü-yu ichi cuèhé ichi duha, te sáá nduu te cada iní-ndó sã ñáyi u-án queé-yu núu dító chi vá cúndecu-gá-yu ichi cuèhé ichi duha.

Te diu-ni ñáyi u-án cúu-yu ñáyi u ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tnùní ndíi núu tütú-gá.

¹⁷ Te dàvá-án ní ngüíta Jèsús ní dánèhé-gá ñáyi u, te ní xáhaⁿ-gã xií-yu:

—Chí dāndixi túu iní sá ñà túú quide váha-ndo ndécü-ndo te dañá-ndo nchaa ichi cuehé ichi duha, chi sa ní cuyatni nduu ndíhu ndaha ñàha Yá Ndiõxí xii-ndo —càchí-gá xáhaⁿ-gã xií-yu.

Jèsús càháⁿ-gá cúmí tnàhá cue téé tnèi chácá

(Mr. 1:16-20; Lc. 5:1-11)

¹⁸ Te Jèsús ñúhú-gá ichi cuáháⁿ-gá tá yáha-gá yuhu lagúná Galileá, te ní xiní-gá úu tnàhá cue téé xídáquèe-güedé ñunu-güedé xítí ndute tnèi-güedé chácá, chi quití tnàhí-án cúu chiūⁿ-güedé tnèi-güedé-di. Te ñⁿ-dé nání-dě Xímú, àdi Pelú

chi úú ðiù-dé, te ñaní-dé cúú ìngá téé ndihi-dé te téé-án nání-dě Ndríxí. ¹⁹ Te Jèsús ní xáhaⁿ-gã xii-güedé:

—Chí dáña chiùⁿ quide-ndo-áⁿ te quixi-ndo chitnahá ñáhá-ndó xii-í, te taxi-í ìngá núú chiùⁿ cada-ndo chi quíhíⁿ-ndó dàcaháⁿ-ndó ñáyiú cuèndá tuha ñàhá-yu xii-í — càchí-gá xáhaⁿ-gã xii-güedé.

²⁰ Te òré-ni-áⁿ ñí dáña cuè téé-án ñunu-güedé, te ní tuha-güedé Jèsús.

²¹ Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnahá cue téé tñi chácá. Te ñⁿ téé-án nání-dě Jàcobó, te ñaní-dé cúú ìngá téé ndihi-dé te téé-án nání-dě Juáá, te ndi ndúú-güedé cúú-güedé déhe té Zebèdeú. Te xixínucóo-güedé ndihi tátá-güedé xití bàrcú xinatícu-güedé ñunu-güedé, te Jèsús ní cana ñaha-gã xii-güedé.

²² Te òré-ni-áⁿ ñí dándóo-güedé bàrcú-güedé, ndihi tátá-güedé, te ní tuha ñaha-güedé xii-gá.

Jèsús dánèhé-gá cuéhé víhí ñáyiú

(Lc. 6:17-19)

²³ Te Jèsús tá xica ndodo-gá ñihí distritú Galileá cuáháⁿ tá dánèhé-gá ñáyiú tñuhu váha tñuhu sá sánú ìchi ñaha xii-yu nàcuáa ndíhu ndaha ñaha Yá Ndióxi xii-yu. Te ndi tnahá ñⁿ ñⁿ ñuú sàá-gá te ducaⁿ cuãnguihu-gá xití veñúhu dánèhé-gá ñáyiú tñuhu-áⁿ. Te ndi ðííⁿ ndi ðííⁿ núú cuéhé tnahá ñⁿ ñⁿ ñáyiú dico nchaa-ní-yu ta quide

tátna-gá cuáháⁿ. ²⁴ Te ndéé nchaa ñáyiú yìndehu distritú Sìriá ní ñíhí-yu tñuhu nchaa nàcuáa quide Jèsús. Te ní queé-yu ñuú-yu te ndècá-yu nchaa ñáyiú tnahá ndi ðííⁿ núú cuéhé cuáháⁿ núú ndécú Jèsús. Te cuéi ñáyiú xiyíhí, ndihi ñáyiú ñá túú-gã càndá nihnu, ndihi ñáyiú yíhi ñaha espíritú cùndihi yucu ñávãha ndècá-yu cuáháⁿ núú-gã, te ncháá-yu ní quide tátna ñaha-gã xii-yu. ²⁵ Te ío vãi ñáyiú ní chinchícúⁿ ñáhá xii Jèsús, chi ní chinchícúⁿ ñáhá ñáyiú distritú Galileá, ndihi ñáyiú nchaa ñuú xíndáa Dècápolis, ndihi ñáyiú ñuú Jerusalén, ndihi cue ñáyiú nchaa ñuú yìndèhu distritú Júdeá, ndihi ñáyiú xíndecu yatni yúte Jòrdán ndàa xio quene nchícanhii.

5

Jèsús núcõo-gá ñⁿ núú tìndúú dánèhé-gá ñáyiú

¹ Te sátá ní xiní Jèsús sá cuéhé víhí ñáyiú nchicúⁿ ñáhá xii-gá, te ní xica-gá cuásaá-gá ñⁿ núú tìndúú te xíáⁿ ñí ngóo-gá, te cue téé xica cuu ndihi-gá ní nadúcúⁿ ndéé ñáhá-güedé xii-gá. ² Te ní ngüíta-gá dánèhé ñáhá-gã xii-güedé ndihi cue ñáyiú-áⁿ, te xáhaⁿ-gã:

Cuèndá ñáyiú ío váha táhú-xi (Lc. 6:20-23)

³ —Váha táhú nchaa ñáyiú cùtnuní iní-xi sá ío-gá cùmãñi-yu cudíu-yu núú Yã Ndióxi, chi ñáyiú-áⁿ nduu

táhũ-yu ndíhu ndaha ñàha-gá xií-yu.

4 'Váha táhú nchaa ñáyiú ndàhyú sá ndíhú iní-yu, chi Yá Ndiõxí cuañaha-gã tnúhu ndee iní cundecu ndihí-yu.

5 'Váha táhú nchaa ñáyiú ndàhú iní-xi, chi ñáyiú-áⁿ nduu táhũ-yu cundecú-yu ñⁿ xichi núu cuañaha Yá Ndiõxí xií-yu.

6 'Váha táhú nchaa ñáyiú ío cuiní cada nchaa nàcuáa càháⁿ Yá Ndiõxí, chi ñáyiú-áⁿ ío nduu vétú iní-yu.

7 'Váha táhú nchaa ñáyiú cundahú iní tnàha ñáyiú-xi, chi ñáyiú-áⁿ ñiú-ni ducaⁿ càda ñaha Yá Ndiõxí xií-yu cundahú iní ñáhá-gã.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-áⁿ nduu táhũ-yu cundecú-yu ndihí Yá Ndiõxí.

9 'Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-áⁿ cuú-yu déhe Yá Ndiõxí.

10 'Váha táhú nchaa ñáyiú ío ndòho ndecu ñuyíú-a sá cuèndá sá quidẽ-yu nàcuáa càháⁿ Yá Ndiõxí, chi ñáyiú-áⁿ nduu táhũ-yu ndíhu ndaha ñàha-gá xií-yu.

11 'Te cùu-ndo ñáyiú ío váha táhũ-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi daciaa díquí ñáhã-yu nándi cuéchi neñùú xii-ndo sã cuèndá-í. 12 Te òré ducaⁿ na càda ñahá-yu xii-ndo te cudíí víhí-ní iní-ndó cundecu-ndo,

chi ío váha càa sá ndécú àndiú nduu táhũ-ndó cundecu ndihí-ndo nduu na saa-ndó yàcáⁿ cundecu-ndo, chi ñiú-ni ducaⁿ ní xóo cada ñaha cuè ñaní tnàhá-yu xii cue téé ní xóo càháⁿ tnúhu Yá Ndiõxí ní xíndecu ndéé sanaha.

Cuèndá ñíí ndihí cuèndá ñuhú

(Mr. 9:50; Lc. 14:34-35)

13 'Te nchòhó cada iní-ndó sã cúu-ndó dàtná ñíí cuèndá ñuyíú-a. Te ñíí chi nàndihí-xi dico núu na nduu víxiⁿ-xi, te ñá túú-gã nándihí-xi chi dǎngoyo-ná-ó, te yáha ñáyiú xèihnú-yu. Te ducaⁿ sǎtnahá-xi cùu nchohó chi cùu-ndo datná ñíí vǎha te núu na càda váha-ndo, te núu vá càdá vǎha-ndo te quee tíhú-ndó.

14 'Te nchòhó cada iní-ndó sã cúu-ndó dàtná ñíí sá dáyéhé ndécú ñuyíú-a, chi sànu ichi-ndo ñáyiú ichi váha. Te nchòhó xini-ndó sã ñúu ñíí ñúú cáá ñíí núú tìndúú te vá cúú càchí-ó sã nguivǎha-xi.

15 Te ñá túú xini-ó ñíí ñáyiú teñuhú-yu ñíí linterná te chiváha-yu xití ñíí càjá, chi tàxi ndecú-yu núú ñíí cuèndá cutnùní núú nchàa ñáyiú ndècu vehe. 16 Te ducaⁿ càda nchohó cada váha-ndo dàtná quidé ñíí ñuhú dayèhe-xi núú ñáyiú, te ducaⁿ quini ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiõxí Yaá cúú Tǎtá-ndó ndècu àndiú chi quini-yu sá quidé vǎha-ndo ndècu-ndo.

Cuèndá tnúhu ní chídó tnùní ndíí Moisés

17 'Te vá cáni ínî-ndó sã yũhú véxi-í xocàni-í tnúhu ní chídó tnùnî ndîi Moisés, te ni vá cáni ínî-ndó sã véxi-í xocàni-í tnúhu ní chídó tnùnî cue téé ní xóo cáháⁿ tnúhu Yá Ndiõxí ndéé sanaha, chi yúhú véxi-í sá cádá-í nãcuáa cáháⁿ nchaa tnúhu-áⁿ. 18 Te na cãchí tnúhu ndáá-í xii-ndo sã tnúhu ní chídó tnùnî ndîi Moisés ío ndáá cáháⁿ-xi, chi dacuití cùu nchaa nacuáa cáháⁿ-xi. Te yáchí-gá naa andiũ ndîhi ñuyíú dàcúúxí sã quëe cáva ìⁿ tnúhu-áⁿ. 19 Núu xíãⁿ nchaa ñáyíu na cãchí sá dává tnúhu ní chídó tnùnî ndîi Moisés ñá túú xini ñuhu-xí chi ñá túú cùnũu-xi, te ñáyíu-áⁿ diu-ni ducaⁿ dànehé-yu nchaa dava-gá tnàha ñáyíu-yu, te sá dúcáⁿ quide-yu te vá cùnũu vihi-yu núú ndécú Yã Ndiõxí táxí tnùnî-gá, chi cuú-yu dàtná ìⁿ ñáyíu nchícúⁿ cuii-nã. Dico nchaa ñáyíu nchícúⁿ nihnu quide nchaa nacuáa cáháⁿ nchaa tnúhu-áⁿ, te diu-ni ducaⁿ dànehé-yu nchaa dava-gá tnàha ñáyíu-yu, te ñáyíu-áⁿ ío cunúú-yu núú ndécú Yã Ndiõxí táxí tnùnî-gá. 20 Te na cãchí tnúhu-í xii-ndo sã ío xini ñuhu-xí cada-ndo nchaa nacuáa cáháⁿ Yã Ndiõxí, te vá cádá-ndó dàtná xiquide cue téé dànehé ñáhá xii ñáyíu nchaa tnúhu ní chídó tnùnî ndîi Moisés, ndîhi dàtná xiquide cue téé cùu fariséú, chi núu na cada-ndo datná xiquide cue téé-áⁿ ñá, te vá ndúú tãhú-ndó ndîhu ndaha ñàha Yá Ndiõxí xii-ndo.

Jesús cáháⁿ-gá cuendá ñáyíu

cudééⁿ

(Lc. 12:57-59)

21 'Te nchòhó sa xini-ndó sã ncháá ñáyíu ní cuu ñani tnáhá-ndó ñí xindecu ndéé sanaha ñí ñíhi-yu tnúhu sá vá cúú càhni-yu tnàha ñáyíu-yu, chi núu ducaⁿ na cádá-yu te nacháhu-yu cuéchi-yu. 22 Dico vitna na cãchí tnúhu-í xii-ndo sã núu ndédani càa-ndo na cudééⁿ-ndó núú tnàha ñáyíu-ndo, te nacháhu-ndo sá dúcáⁿ quide-ndo, àdi núu na cùcuèhé-ndó-yu te núú chítú núú tàcá cundáá cuéchi-ndo te núu ducaⁿ na cáda-ndo, àdi núu nà cúu-ndo tnàha ñáyíu-ndo ìⁿ tnúhu véé vihi, te cucuéchi vihi xii-ndo chi quíhiⁿ-ndó núú ùhú núú ndáhú.

23 'Te xíãⁿ núu nchòhó òré ndécú ndîhi-ndo ìⁿ sá cuiñi-ndó cuãha-ndo Yã Ndiõxí nduu tãhú-gã, te òré cuáháⁿ-ndó cuãñaha-ndo xii-gá, te òré ní quexio-ndo núú dúcáⁿ cuãñaha-ndo xii-gá sá ndúú tãhú-gã, te ní ndacu inî-ndó sã ndécú ñáyíu ñá túú cùu váha iní ñáhá xii-ndo cuendá ìⁿ sá ñí cumání núú tnáhá-ndó. 24 Te dándóo-ndo sã dúcáⁿ nèhe-ndo cuáháⁿ nduu tãhú Yã Ndiõxí, te díhna-gá quíhiⁿ-ndó nãcáháⁿ cáhnú iní tnáhá-ndó ndîhi ñáyíu ñá túú cùu váha iní ñáhá xii-ndo-áⁿ, te dàtnùnî ducaⁿ te quíhiⁿ-ndó cuãha-ndo Yã Ndiõxí sá ndúú tãhú-gã.

25 'Te núu ío ìⁿ-ndo ñí sáháⁿ ñáyíu núú tãe cùchiuⁿ ní sacáⁿ cuéchi-yu cuendá-ndó cuendá ìⁿ sá ñí quide-ndo, te òré ní naníhi tnáhá-ndó ndîhi-yu cuáháⁿ-ndó núú

těe cùchiuⁿ-áⁿ, te nacáháⁿ cáhnú ìní tnáhá-ndó ndihí-yu cuëndá sá vǎ cuǎha cuëndá ñáhá-gǎ-yu xii-ndo núú tě cùchiuⁿ, chi núu ducaⁿ na càdá-yu te tée cùchiuⁿ-áⁿ cuǎha cuëndá ñáhá-dě xii-ndo núú cuè tée cùu poleciá, te cue tée-áⁿ chihi ñaha-güedě vecaá xii-ndo. ²⁶ Te na cǎchí tnúhu ndáá-í xii-ndo sǎ vǎ cǎcu-ndo te núu na ngáva-ndo vecaá ndéé nacháhu-ndo nchǎa sá tǎu-ndó.

Cuëndá cue ñáyiú ñá túú quide váha

²⁷ 'Te nchòhó sa xìní-ndó nǎcuáa ndùu tnúhu ní cǎháⁿ cue tée ní xíndecu ndéé sanaha, te duha ní cachí-güedé: "Nchaa cue tée vá cúú cǎháⁿ ndihí-güedé ñadihí te núu ñá díú ñadihí-güedé cúu-yu, te diu-ni ducaⁿ tucu nchaa cue ñáyiú dihí vá cúú cǎháⁿ ndihí-yu tée te núu ñá díú yíi-yu cùu-güedé", duha ní cachi-güedé. ²⁸ Dico yúhú cǎchí tnúhu-í xii-ndo sǎ nděda-ni cǎa cue tée na cùndehe ìⁿ ñadihí te núu na cǎni iní-güedé cundecu díi ìní-güedé ndihí-yu te cada iní-ndó sǎ dàtná sá sǎ ní cǎháⁿ ndihí ñaha-güedě xii-yu sá dúcáⁿ ñi sani iní-güedé.

²⁹ 'Te núu ìⁿ xio tinùu-ndo quide-xi quide-ndo nǎndi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yìqui cuñú-ndó quíhíⁿ-xi núú ùhú núú ndàhú. ³⁰ Te núu ìⁿ xio ndaha-ndo quide-xi quide-ndo nǎndi sá cuèhé sá dúhá te quehdé-ndó,

chi váha-gá sá ná cuíta ìⁿ xio ndaha-ndo te ñá díú sǎ ñihí ní ndúú yìqui cuñú-ndó quíhíⁿ-xi núú ùhú núú ndàhú.

Jesús cǎháⁿ-gá cuëndá cue ñáyiú dàña tnaha

(Mt. 19:9; Mr. 10:11-12; Lc. 16:18)

³¹ 'Te nchòhó sa nàha tucu-ndo nǎcuáa ní cǎháⁿ tucu cue tée ní xíndecu ndéé sanaha, te duha ní cachí-güedé: "Te núu ìⁿ tée na dàña tnaha-dé ndihí ñadihí-dé, te xini ñuhu-xi cadúha-dé ìⁿ tutú cuañaha-dé núú cǎháⁿ-xi sǎ ní dáña ñaha-dé", duha ní cachí-güedé. ³² Dico yúhú cǎchí tnúhu-í xii-ndo sǎ cúú dàña ìⁿ tée ñadihí-dé, te núu cùtnuní ndáá iní-dé sǎ cǎháⁿ ndihí-aⁿ ingá tée. Dico núu ñá túú dùcaⁿ quide-aⁿ te ñá túú ndùu váha-xi dàña ñaha-dé. Te núu ñá túú dùcaⁿ quide ñadihí-dé, te cada iní-ó sǎ mée-dě ní sanu ichi ñaha-dě xii-aⁿ cǎháⁿ ndihí-aⁿ ingá tée te núu na dàña ñaha-dé. Te tée na nàqueheⁿ ñaha xii ñaha ní dáña ñaha yíi-xi-áⁿ, te diu-ni ñá túú ní quide váha-dé sǎ dúcáⁿ ñi nàqueheⁿ-dě ñaha-áⁿ.

Ñáyiú cǎcunehe ñaha xii Yá Ndiòxí cuëndá cutnùní iní tnaha ñáyiú-yu sǎ ndáá cada-yu ìⁿ sǎ sǎní iní-yu cada-yu

³³ 'Te sa nàha tucu-ndo nǎcuáa ní cǎháⁿ tucu cue tée ní xíndecu ndéé sanaha, chi cue tée-áⁿ ñi cachí-güedé: "Te núu cǎcunehe-ndo Yá Ndiòxí núú tnaha ñáyiú-ndo nǎcuáa cutnùní iní-yu sǎ ndáá cada-ndo ìⁿ sǎ

sání iní-ndó càda-ndo, te cada-ndo”, duha ní cáháⁿ dóho tnàha-güedé. ³⁴ Dico yúhú cächí tnúhu-í xii-ndo sã ñà túú nã cacunehe-ndo sã ndàa cada-ndo ìⁿ sá sání iní-ndó càda-ndo. Te ni vã cácu nèhe-ndo andiü chi yacáⁿ cúu-xí núú núcõo Yá Ndiõxí táxí tnùnigá. ³⁵ Te ni vã cácu nèhe-ndo ñuyíu-a, chi tnàhá ñuyíu-a ndècu-gá, te ni vã cácu nèhe-ndo ñuú Jerusàlén chi ñuú-áⁿ cúu cuendá-gá, te diu-gá cúu-gã Yaá ío cùnuu. ³⁶ Te ni vã cácu nèhe-ndo díquí-ndó chi nàha-ndo sá nì ìⁿ idi díquí-ndó ñã ndácú-ndó ndàda cuixí-ndó àdi ndada tnuu-ndo. ³⁷ Te vãha-gá sá núu ìⁿ sá sání iní-ndó càda-ndo, te cachí-ni-ndo: “Cuu cada-ndí, àdi vá cúu càda-ndí”, cachí-ni-ndo. Chi nchaa dava-gá sá chídó-ndó càháⁿ-ndó òré ducaⁿ sàni iní-ndó càda-ndo ìⁿ sá cáda-ndó cùu-xí sá dácàhu iní ñáhá yùcu ñávãha.

Cuendá ñáyiu nàchinaa sá quidé ñàha tnaha ñáyiu-xi

(Lc. 6:29-30)

³⁸ Te sa nàha tucu-ndo nacuaá ní cáháⁿ tucu cue téé ní xíndecu ndéé sanaha, chi cue téé-áⁿ nì cachí-güedé: “Ñáyiu na càda ñaha tnaha ñáyiu-xi ìⁿ sá ñà túú vãha, te nanchòcáva-yu nachinaá-yu sá nì quide ñaha tnàha ñáyíu-yu”, duha ní cachí-güedé. ³⁹ Dico yúhú cächí tnúhu-í xii-ndo sã ñà túú nã cada-ndo nchaa cue ñáyiu cuihna iní-xi te núu quide ñahá-yu ìⁿ sá ñà túú

vãha xii-ndo. Te núu ní canihá-yu ìⁿ xito te cuini tucú-yu canihá-yu ingá xito te dañà-ndo na cànihá-yu. ⁴⁰ Àdi ní sacáⁿ cuéchi-yu núu cuè téé cùchiuⁿ cuendá-ndó, te cuini-yu quendeé-yu dúhnú-ndó te dañà-ndo na cànehé-yu quíhíⁿ, te tnàhá-ni dóó ndíxí ndòdo-ndo dañà-ndo na canehé-yu quíhíⁿ. ⁴¹ Te núu quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núu ío ìⁿ sá xicáⁿ-yu núu-ndó te cuañaha-ndo, àdi ío ìⁿ sá sánúu-yu núu-ndó te cuañaha nùu-ndo.

Cuu iní-ó nchaa ñáyiu cùu úhú iní ñáhá xii-ó

(Lc. 6:27-28, 32-36)

⁴³ Te sa nàha tucu-ndo nacuaá ní cachí tucu cue téé ní xíndecu ndéé sanaha, chi cue téé-áⁿ nì cachí-güedé: “Cuu iní-ndó cuè ñáyiu ndècu ndihi vãha-ndo, te cuu úhú iní-ndó cuè ñáyiu cùu úhú iní ñáhá xii-ndo”, duha ní cachí-güedé. ⁴⁴ Dico yúhú cächí tnúhu-í xii-ndo sã cúu iní-ndó cuè ñáyiu cùu úhú iní ñáhá xii-ndo, te cáháⁿ vãha-ndo cuendá cue ñáyiu càháⁿ úhú ñáhá xii-ndo, te cada-ndo sã vãha sá cúu-xí cuè ñáyiu cùu úhú iní ñáhá xii-ndo, te cáháⁿ ndihi-ndo Yá Ndiõxí cuendá cue ñáyiu xícuehé ñáhá xii-ndo, ndihi cuendá cue ñáyiu quide úhú ñáhá xii-ndo. ⁴⁵ Te núu na càda-ndo nchaa nacuaá càháⁿ-í-a, te ducaⁿ te cutnùní sá cúu-ndó dèhe Tátá-ndó

Dütú Ndiöxí Yaá ndécú àndiu. Te ñu-gá cúú-gã Yaá quidé quène nchíanchii, te ñu-ni-gá cúú-gã Yaá dácúuⁿ dáú ñuyíu-a, te ducaⁿ quide-gá cuendá cuu-xi sá vãha sá cúú-xí cuè ñáyiu quide váha, ndihi sá cúú-xí cuè ñáyiu ñá túú quide váha. ⁴⁶ Te núu nchòhó ná cúú iní-ndó mèe-ni ñáyiu na cùu iní ñáhá xii-ndo, te vá càchí-ndó sã Yã Ndiöxí taxi-gá sá ndúú tãhú-ndó sã dúcáⁿ quide-ndo, chi cuèi cue tée cuihna iní-xi quide cobrá ñáhá xii cue ñáyiu cuendá impuèstú ducaⁿ xiquide-güedé. ⁴⁷ Te núu mee-ni ñáyiu ndècu ndihi váha-ndo ïo váha cáháⁿ ndihi-ndó-yu, te vá càchí-ndó sã ïo váha quide-ndo sá dúcáⁿ quide-ndo, chi cuèi ndéé nchaa ñáyiu ñá túú xini ña cuendá Yã Ndiöxí ducaⁿ xiquidé-yu. ⁴⁸ Te duha ndüu tnúhu càháⁿ-í cuendá sá nchòhó cada ndáá-ndó cundecu-ndo datná quidé ndáá mée Tãtá-ndó Dütú Ndiöxí Yaá ndécú àndiu — duha ní dánèhé ñáhá Jèsús xii cue tée xica cuu ndihi-gá ndihi nchaa ñáyiu.

6

Jèsús dánèhé-gá ñáyiu nàcuáa cadá-yu sá vãha

¹ Te Jèsús ndécú-ni-gá dánèhé-gá cue tée xica cuu ndihi-gá ndihi nchaa ñáyiu, te xãhaⁿ-gã:

—Te òré quidé-ndó sã vãha te vá cadá-ndó núu ñáyiu cuendá-ni sá cuini-ndó cáháⁿ váha-yu cuendá-ndó, chi núu núú ñáyiu ducaⁿ na càda-ndo te Dütú Ndiöxí Yaá

cúú Tãtá-ndó vã táxi-gã sá ndúú tãhú-ndó. ² Te xíãⁿ núu nchòhó òré chindèe-ndo ñáyiu ndàhú, te vá cũñaha-ndo xii cue ñáyiu sá chindèe-ndo cue ñáyiu ndàhú-áⁿ dàtná xiquide cue ñáyiu dandahú mée-xí sã quidé ndáá te ñá ndáá sá quidé ndáá-yu, chi ñáyiu-áⁿ ducaⁿ xiquidé-yu òré sãháⁿ-yu veñúhu, chi datécú tnúhu-yu nchaa ñáyiu òré ducaⁿ chindee-yu ñáyiu ndàhú. Te ñu-ni ducaⁿ quidé-yu xãháⁿ-yu xii cue ñáyiu sá chindèe-yu cue ñáyiu ndàhú-áⁿ nchaa núú xicá cùu-yu, te ducaⁿ xiquidé-yu cuendá cuini-yu cáháⁿ váha ñáyiu cuendá-yu. Te yúhú na càchí tnúhu ndáá-í xii-ndo sã ñà túú ñá nduu tãhú ñáyiu-áⁿ núú Yã Ndiöxí sá dúcáⁿ quidé-yu chi mee-ni núú tnàha ñáyiu-yu cùdiú-yu. ³ Te nchòhó òré chindèe-ndo ñáyiu ndàhú, te cuèi ñáyiu ío-gá váha ndècu ndihi-ndo dico vá cũñaha-ndo sã dúcáⁿ chindee-ndo cue ñáyiu ndàhú-áⁿ, te ni cuèi dava-gá ñáyiu vá cũñaha-ndo. ⁴ Chi váha-gá sá iní mée-ni-ndó ná cùhuⁿ sá dúcáⁿ chindee-ndo cue ñáyiu ndàhú-áⁿ. Te núu ducaⁿ na càda-ndo ña, te Dütú Ndiöxí Yaá cúú Tãtá-ndó taxi-gá sá ndúú tãhú-ndó chi ñu-ni mee-gã ndéhé-gã nàcuáa quide-ndo ndecu-ndo.

Jèsús dánèhé-gá ñáyiu nàcuáa cáháⁿ ndihi-yu Yã Ndiöxí

(Lc. 11:2-4)

⁵ Te nchòhó òré càháⁿ ndihi-ndo Yã Ndiöxí, te vá cadá-ndó dàtná xiquide

cue ñáyiú dándahú méé-xí cächí sá quidé ndää te ñá ndää sá quidé ndää-yu, chi ñáyiú-áⁿ tnàhá iní-yu cunutnîi-yu càháⁿ ndihí-yu Yá Ndiöxí òré yihí-yu veñúhu. Te ñu-ni ducaⁿ xíquidé-yu nchaa núú xicá cùu-yu, te ducaⁿ quidé-yu cuèndá sá cuìní-yu quini ñáyiú nàcuáa xíquidé-yu. Te na cächí tnúhu ndää-í xii-ndo sã ñà túú nã nduu táhu ñáyiú-áⁿ núú Yá Ndiöxí sá dúcáⁿ quidé-yu chi mee-ni núú tnàha ñáyiú-yu cùdiú-yu. ⁶ Te nchòhó òré cuìní-ndó cãháⁿ ndihí-ndo Yá Ndiöxí, te ndíhu ndedí nihnu-ndo xití vehe-ndo, chi ñu-gá cùú Tãtã-ndó te ndècu ndihí ñaha-gá xii-ndo, te ñu-ni mee-gã ndéhé ñaha-gá xii-ndo nàcuáa quide-ndo, te núu ducaⁿ na càda-ndo te taxi-gá sá ndúú táhu-ndó.

⁷ Te òré cãháⁿ ndihí-ndo Yá Ndiöxí te vá súúni cuèndá-ni dacaá-ndó tnúhu cãháⁿ ndihí-ndo-gã dàtná xíquide cue ñáyiú ñá túú xini tnúhu-gá, chi ñáyiú-áⁿ sání iní-yu sá tédòho ñaha vîhi-gá Yá Ndiöxí xii-yu sá dúcáⁿ súúni dàcaá-yu tnúhu cãháⁿ ndihí ñàhá-yu xii-gá dico ñáhá. ⁸ Dico nchòhó, vá cáda-ndó dàtná xíquide cue ñáyiú-áⁿ, chi mee Tãtã-ndó Dütú Ndiöxí sa naha-gá ná cùú nchàa sá xini ñùhu-ndo cuéi òré vátá càcãⁿ-gã-ndó núú-gã. ⁹ Te duha cãháⁿ-ndó òré cãháⁿ ndihí-ndo Yá Ndiöxí:

Yòhó Tãtã-ndí Dütú Ndiöxí
Yáá ndécú àndiú,

nchaa ñáyiú na cãháⁿ-yu sá cùú-n Yáá ío yíñùhu.

¹⁰ Te xicáⁿ táhu-ndí núú-n sã ná sàá nduu ndíhu ndàhá-n-yu.

Te cada-n dàtná cächí iní-n ñùyiú-a dàtná quidé-n àndiú.

¹¹ Te xicáⁿ táhu-ndí núú-n sã táxi-n sã cóhó-ndí sá cãxi-ndí ñⁿ nduu ñⁿ nduu.

¹² Te cada cãhnu iní-n nchàa yicá cuèchi-ndí, chi tnàhá nchúhú quidé cãhnu iní-ndí nchaa sá quidé ñàha tnaha ñáyiú-ndí.

¹³ Te vá dáñá-n dàcaháⁿ ñáhá yùcu ñávãha xii-ndí cada-ndí sá ñà túú vãha, chi coto ñaha-n xii-ndí cuèndá sá vá dúcáⁿ càda ñaha-xi.

Te ñu-n cùu-n Yáá ío cùnuu nchaa nduu nchaa quíú, te ío cãhnu cuu-n, te ñu-ni-n quindaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dãnehé ñàhá-í xii-ndo cãháⁿ ndihí-ndo Yá Ndiöxí.

¹⁴ Te núu nchòhó quidé cãhnu iní-ndó nchàa sá quidé ñàha tnaha ñáyiú-ndo, te ducaⁿ te Tãtã-ndó Dütú Ndiöxí Yáá ndécú àndiú cada cãhnu iní-gá nchaa sá ñà túú vãha quide-ndo tucu. ¹⁵ Dico núu nchòhó vá cáda cãhnu iní-ndó nchàa sá quidé ñàha tnaha ñáyiú-ndo ña, te ni Dütú Ndiöxí Yáá cùú Tãtã-ndó vá cáda cãhnu iní-gá nchaa sá quidé-ndó tucu.

Cuendá ñáyiú ñá túú tnàhí ná xéxí ãma càháⁿ ndihí-yu Yá Ndiöxí

16 "Te nchòhó, nduu ñá túú tnàhí ná xéxí-ndó càháⁿ ndihí-ndo Yá Ndiöxí, te vá cùndiyí-ndó dàtná xíquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chí ñáyiú-áⁿ ducaⁿ xíquidé-yu cuendá sá cuiní-yu cutnùní iní ñáyiú sá ñá túú tnàhí ná xéxí-yu càháⁿ ndihí-yu Yá Ndiöxí. Te yúhú càchí tnúhu-í xii-ndo sá sà dúcáⁿ quidé-yu te ñá túú nã chindee ñàha-xi xií-yu cuendá níhí-yu ìⁿ sá ndúú tãhú-yu núú Yá Ndiöxí. 17 Dico nchòhó, nduu dùcaⁿ quide-ndo ñá túú tnàhí ná xéxí-ndó càháⁿ ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cùcá 18 cuendá sá vá cutnùní iní ñáyiú sá ñá túú nã xéxí-ndó ndúu ducaⁿ caháⁿ ndihí-ndo Yá Ndiöxí. Te Dútú Ndiöxí Yaá cúú Tãtá-ndó ndècu ndihí-ndo ñu-ni mee-gã ndéhé-gã nãcuáa quide-ndo ndecu-ndo, te ñu-gá taxi-gá sá ndúú tãhú-ndó.

Cuendá nchaa sá váha nduu tãhú-ó
(Lc. 12:33-34)

19 "Te vá cání ìní-ndó cùu-ndo ñáyiú cuica nãndi sá cùndècu ndihí-ndo ñuyíú-a chí vá cùdii-xi, chí dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedë. 20 Te váha-gá chí ndúcú nãcuáa cada-ndo cuendá ducaⁿ ngündecu sá ndúú tãhú-ndó

àndiú, te xíáⁿ cudii-xi cundecu ndihí-ndo ñi caa ñi quíhíⁿ, chí yacáⁿ vá queé-gã tíquidi, te ñi vá caxí-gã cudi ñùhu, te ñi vá quini-gá-ndó ñadúhú duhu-güedë ndachìuⁿ-ndo. 21 Te núu cùu-ndo ñáyiú cuica ndècu ñuyíú-a, te ñu-ni nchaa sá ndécú ndihí-ndo ñuyíú-a ñùhu iní-ndó. Àdi cuu-ndo ñáyiú quide nacuáa ngündecu sá ndúú tãhú-ndó àndiú, te ñu-ni sá ndúú tãhú-ndó ndècu andiú-áⁿ ñùhú ìní-ndó.

Núú-ó cùu-xi datná ìⁿ ñuhú
(Lc. 11:34-36)

22 "Te cada iní-ndó sá núú-ndó cùu-xi datná ìⁿ ñuhú. Te núu núú-ndó càváha te cutnùní iní-ndó nã cúú sá ndécú núú-ndó. 23 Dico núu cùhú núú-ndó ñá túú cutnùní cundehe-ndo ña, te ñá túú cutnùní iní-ndó nã cúú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó dàtná ìⁿ núú néé. Te ñuha ndúu tnúhu càháⁿ-í chí núu sàni váha iní-ndó cuendá Yá Ndiöxí ñá, te cùu vii cùu váha iní-ndó ndècu-ndo. Áⁿ te núu ñá túú sàni váha iní-ndó cuendá-gá ñá, te ñá túú tnàhí cùu váha iní-ndó ndècu-ndo. Te sá dúcáⁿ ñá túú sàni váha iní-ndó cuendá-gá te cada iní-ndó sá ndécú-ndó dàtná ìⁿ núú néé.

Vá ndácú ìⁿ téé cunu cuechi-dë núú úú pãtróóⁿ
(Lc. 16:13)

24 "Te ñi ìⁿ téé xínu cuechi vá ndácú-dë cunu cuechi-dë núú úú pãtróóⁿ, chí téé-áⁿ cuu váha iní-dé núú ìⁿ pãtróóⁿ-dë te tnii-dé nchaa tnúhu càháⁿ pãtróóⁿ téé cùu váha iní-dé núú-xi-áⁿ. Te núú ìngá

tucu pàtróoⁿ-dě vá cúú vâha iní-dé, te ni vâ tñíⁿ-dě tñúhu càháⁿ ingá téé-áⁿ. Te ducaⁿ sãtnahá-xi cùu nchóhó chi vá ndácú-ndó cùnu cuechi-ndo núú Yã Ndiõxí te cuhuⁿ iní-ndó nchàa sá ío ñuyíu-a.

Yá Ndiõxí xító-gã nchaa ñáyiu cùu déhe-gá
(Lc. 12:22-31)

²⁵ Te na cãchí tñúhu-í xii-ndo sã vá ío cani iní-ndó nñu nása níhí-ndó sã cóhó sã cãxí-ndó, te ni vâ ío cani iní-ndó nñu nása níhí-ndó dõó cuhnu-ndo, chi cùnuu-gá méé-ndó dàcúúxí sã nchító-ndó, te ducaⁿ cùnuu-gá yiqui cùñú-ndó dàcúúxí dõó sãcũñhu-ndo. ²⁶ Te chí cãdá cuèndá sá ncháá quiti ndava ñá túú tñàhí ná xítú-güedi, te ni ñà túú ndèé cuáháⁿ-güedi nàtahu-güedi, te ni ñà túú nã nãtãxúha-güedi, te ni ñà túú ndèé cáá yãcã-güedi, chi mee Tãtã-ó Dütú Ndiõxí Yáá ndécú àndíu xito ñaha-gá xii-güedi níhí-güedi sá xéxí-güedi. Te núu cue quiti-áⁿ ducaⁿ xito ñaha-gá xii-güedi, ðte uuⁿ-gá xító ñaha-gá xii nchóhó, chi nchòhó ío-gá cùnùu-ndo dàcúúxí cuè quiti-áⁿ! ²⁷ Te cuèi nãndi sá sání vñhi iní-ndó ndècu-ndo, dico ñã ndácú-ndó càda-ndo nacuaá cuehnu-ndo cuèdicó ðⁿ yiqui-gã.

²⁸ Te vá ío cani iní-ndó nñu nása níhí-ndó dõó cuhnu-ndo. Te chí cãdá cuèndá nãcuáa sãhnu nchaa itá ío yucu, chi nchaa itá-áⁿ ñà túú quide chiuⁿ-xi, te ni ñà túú quèheⁿ-xi idi. ²⁹ Te na cãchí tñúhu-í xii-ndo sã ndíi Salómón cuèi ío vii ní

xínduu dõó ñí xóo cuhnu ndíi, dico ñã túú nũtnahá-xi nãcuáa càa nchaa itá, chi ío-gá vii càa nchaa itá. ³⁰ Te nchaa itá ío yucu tnaa-ni cùdíi-xi, te yìchí-xi te sãhmi ñáyiu. Te cuèi ducaⁿ dico mee Yã Ndiõxí quidé-gã ío vii sãcũnduu-xi. Te núu nchaa itá-áⁿ ducaⁿ quide-gã xító-gã sãcũnduu vii-xi, te xíãⁿ cùtnùní sá ío-gá coto ñaha-gã xii-ndo, dícó-ni sá ñà túú sãndáá váha iní-ndó-gã. ³¹ Te xíãⁿ nñu ñã túú xini ññhu vihi-xi cani iní-ndó nñu nása níhí-ndó sã cóhó sã cãxí-ndó, àdi nása níhí-ndó dõó cuhnu-ndo. ³² Chi nchaa ñáyiu ñã túú xini nãcuáa càháⁿ tñúhu Yá Ndiõxí mee-ni nchàa xíãⁿ ññhú iní-yu. Dico nchòhó chi mee Tãtã-ndó Dütú Ndiõxí sa nãha-gá ná cúú sã xini ññhu-ndo. ³³ Te xíãⁿ nñu ío xini ññhu-xi sá cùhúⁿ iní-ndó sã Yã Ndiõxí yíndãha ñaha-gã xii-ndo, te ducaⁿ càda-ndo nchaa nacuaá cuini-gá, te ducaⁿ te taxi-gá nchaa sá xini ññhu-ndo. ³⁴ Núu xíãⁿ vá ío cani iní-ndó nása cundecu-ndo nduu tneé, chi cani iní-ndó nãcuáa cada-ndo cundecu-ndo vitna, chi nduu tñéé-áⁿ te òré-nã te cutnùní nñu nása cada-ndo cundecu-ndo. Chi nchòhó sa nãha-ndo sá ío titní núú sã quidé-xi ðⁿ nduu ðⁿ nduu — duha ní dãnèhè ñãhá Jèsús xii cue téé xica cuu ndíhi-gá ndíhi nchaa ñáyiu.

7

Vá càháⁿ cuèhé-ó cuèndá tñaha ñáyiu-o

(Lc. 6:37-38, 41-42)

1 Te Jèsús nděcuu-ni-gá dánèhé-gá cue téé xica cuu ndihi-gá ndihi nchaa ñáyiú, te xãhaⁿ-gã:

—Vá càháⁿ cuèhé-ndó cuendá tnàha ñáyiú-ndo, te ducaⁿ te Yá Ndiöxí ñá túú nã tnúhu cúñaha-gã xii-ndo.

2 Chi núu na càháⁿ cuèhé-ndó cuendá tnàha ñáyiú-ndo, te Yá Ndiöxí íó ìⁿ sá cádá ñaha-gá xii-ndo. Te núu nchòhó ná càháⁿ cuèhé víhí-ndó cuendá tnàha ñáyiú-ndo te Yá Ndiöxí ío-gá dandòho ñaha-gá xii-ndo. 3 ¿Te ná cuendá

ndéhé-ndó ìⁿ sá ñà túú vãha quide tnaha ñáyiú-ndo te mee-ndo víhi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núú tnàha ñáyiú-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó.

4 Te núu na nàcanu ichi-ndo tnaha ñáyiú-ndo cuendá sá ñà túú quide váha-yu ndècú-yu, te mee-ndo víhi-gá quidé-ndó ñá, te cada iní-ndó sã xãhaⁿ-ndo xii tnaha ñáyiú-ndo sã nátava-ndo mihi líhli ñùhu núú-yu sá dúcáⁿ quide-ndo, te mihi cahnu ñùhu núú méé-ndó ñà túú quide cuendá-ndó.

5 Te sá dúcáⁿ quide-ndo te ío dandahú-ndó mèe-ndo sá quidé ndää-ndó te ñà ndää sá quidé ndää-ndó, te xini ñùhu-xi díhna-gá daña-ndo nchaa sá ñà túú vãha quide-ndo, te dàtnùní ducaⁿ te cuu nàcanu ichi-ndo tnàha ñáyiú-ndo cuendá nchaa sá ñà túú vãha quidé-yu.

6 'Te nchaa ñáyiú ío sàá iní-xi, te vá cádá yica-ndó-yu

cundedóho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyiú-áⁿ cúú-yu dàtná iná chi quití-áⁿ núu na cuãñaha-o ìⁿ sá cuãñaha-o, te núu ñá túú cùtnuní iní-di ná cúú xĩãⁿ te tnã ñaha-di xii-o. Te cùu tucú-yu dàtná cùchí chi quití-áⁿ núu na chùcu-o núú-di yúú vãha sá ío vii càa nani pér lá, te dìcò-ni cùnu sáhã-di chi ñá túú cùtnuní iní-di sá cúú-xí yúú vãha.

Cácáⁿ-ó núú Yá Ndiöxí núu ná cuiní-ó

(Lc. 11:9-13; 6:31)

7 'Te na càchí tnúhu-í xii-ndo sã cácaⁿ-ndó núú Yá Ndiöxí te núu ná cuiní-ndó te taxi-gá, te vá dáña ndèe-ndó cácaⁿ-ndó núú-gã núu ná cuiní-ndó te ducaⁿ te níhí-ndó. Te cada iní-ndó sã ní quexìo-ndo vehe ìⁿ tnaha ñáyiú-ndo te ní càháⁿ-ndó, te ñáyiú-áⁿ ní tedóho ñahã-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gã xii-ndo, te taxi-gá sá ná cácaⁿ-ndó núú-gã.

8 Chi nchaa ñáyiú ducaⁿ xĩquide, te Yá Ndiöxí tédòho ñaha-gã xií-yu te níhí-yu sá cuiní-yu. Te ñu-ni ducaⁿ tùcu nchaa ñáyiú na cácaⁿ núú-gã ìⁿ sá cuiní-yu, chi sãñaha-gã sá xicáⁿ-yu núú-gã. Te ñu-ni ducaⁿ tùcu nchaa ñáyiú ñá túú dàña ndéé xicáⁿ núú Yá Ndiöxí sá cuiní-yu chi níhí-yu.

9 'Te nchòhó cue téé cùu tátá, ñá túú cùndee iní-ndó cuãñaha-ndo xii cue déhe-ndo ìⁿ yúú caxi-güexi

òré xìcáⁿ-güexi ìⁿ pàà nùú-ndó càxi-güexi. ¹⁰ Te ni ñà túú cùndee iní-ndó cuañaha-ndo ìⁿ cóó caxi-güexi òré xìcáⁿ-güexi ìⁿ chácá nùú-ndó càxi-güexi. ¹¹ Te nchòhó cuèi ndèè dau-na sàá iní-ndó dico sãha-ndo cuè déhe-ndo sã vãha xèxi-güexi oré ná cúú sã xìcáⁿ-güexi nùú-ndó càxi-güexi. Te nùu nchòhó ducaⁿ quìde-ndo, ìte uuⁿ-gá ducaⁿ quìde Tátá-ndó Dütú Ndiòxí Yaá ndécú àndiu, chi taxi-gá sã vãha sã cúú-xí-ndó te nùu na càcáⁿ-ndó nùú-gã!

¹² Te nchaa sã vãha cuiní-ndó càda tñaha ñáyiu-ndo, te cada-ndo tñahá-ndó ndìhí-yu, chi ducaⁿ sànu ichi ñaha tñuhu ní chídó tñuní ndíi Moisés, te ñu-ni ducaⁿ sànu ichi ñaha tucu nchaa tñuhu ní chídó tñuní cue téé ní xóo càháⁿ tñuhu Yá Ndiòxí ndéé sanaha.

Yuyèhe cuiñi
(Lc. 13:24)

¹³⁻¹⁴ Te xìni ñuhu-xi nducu-ndo nacuaá cada-ndo tñi-ndo ichi Yá Ndiòxí. Te ichi-gá-án cúú-xí dàtná ìⁿ ichi cuiñi, àdi datná ìⁿ yuyèhe cuiñi. Te duha càháⁿ-í chi ío úhú xínu iní-ndó tñi-ndo ichi Yá Ndiòxí, te sacú-ni nchòhó cue ñáyiu ndècu ñuyú-a tñi-ndo ìchi-gá. Te nchaa ñáyiu ndècu ichi cuehé ichi duha ta xíta nihnú-yu cuáháⁿ. Te ichi ndécú-yu-án cada iní-ndó sã cúú-xí ìⁿ ichi cahnu ichi quehéⁿ, àdi ìⁿ yuyèhe quehéⁿ. Te duha càháⁿ-í chi ío vãi ñáyiu ndécú-yu ichi-án.

Ndi dñiⁿ nùú yutnu xìní-ó nã yutnu cùu-xi cuendá sã sãvidí-xi

(Lc. 6:43-44)

¹⁵ Te càchí tñuhu-í xii-ndo sã ío quihí iní-ndó cùndecu-ndo cuendá sã vã dándahú ñáhá cuè téé càchí sã càháⁿ tñuhu Yá Ndiòxí te ñà ndáá sã càháⁿ-güedé tñuhu-gá. Chi cue téé-án sànuu sã quidé-güedé dàtná quidé mbèé quiti ío vãha iní-xi, dico ñà ndáá chi ñà túú ñuhu váha iní-güedé, chi quide-güedé dàtná quidé quiti dééⁿ quiti nàni yíhí. ¹⁶ Te òré quexio-güedé nùú ndécú-ndó te cada cuendá-ndó nàcuáa quide-güedé cuendá ducaⁿ cùtnuní iní-ndó nã ñáyiu cùu-güedé. Te nchòhó xìní-ndó sã ñà túú cùuⁿ ndéhé yoho yãha stilé tnu ñu, te ni ñà túú xìní-ndó cùuⁿ ngúxí ìⁿ tnu ñu. ¹⁷⁻¹⁸ Te xìní tucu-ndo sã ncháá yutnu váha cùuⁿ sãvidí váha, te nchaa yutnu váha-án ñà túú cùuⁿ sãvidí sã ñà túú váha. Te nchaa yutnu sã ñà túú váha ñà túú cùuⁿ sãvidí váha, chi mee-ni sãvidí sã ñà túú váha cùuⁿ. ¹⁹ Te nchaa yutnu sã ñà túú cùuⁿ sãvidí váha xèhndé-güedé, te cuánguee-xi nùú ñuhú càyú-xi. Te ducaⁿ sãtnahá-xi yãha nchaa cue téé dándahú ñáhá càchí sã càháⁿ tñuhu Yá Ndiòxí te ñà ndáá sã càháⁿ-güedé tñuhu-gá, chi quihíⁿ-güedé nùú ñuhú nùú càyú. ²⁰ Te nchòhó cutnùní iní-ndó nã ñáyiu cùu cue téé-án cuendá nchaa sã quidé-güedé.

Ñá ncháá ñáyiú ngúndecú-yu núú ndécú Yá Ndiòxí táxí tnùní-gá

(Lc. 13:25-27)

21 'Te na càchí tnúhu-í xii-ndo sá ío vâi ñáyiú cachí-yu sá yühú cùu-í Xítohó-yu, dico ñá ncháá-yu nduu táhü-yu cundecú-yu núú ndécú Tâtà-í Dútú Ndiòxí táxí tnùní-gá, chi mee-ni ncháa ñáyiú na càda ncháa nacuáa càháⁿ-gá ñáyiú-áⁿ nduu táhü-yu cundecú-yu núú ndécú-gã táxí tnùní-gá. 22 Te na sáá nduu càda ndáá Yá Ndiòxí cuéchi ncháa ñáyiú, te vâi-yu cúñàhá-yu xii-í: "Yòhó Xítohó Jesu-crístú nchúhú cùú-ndí ñáyiú ní cáháⁿ tnúhu-n nàcuáa ní cachí-n, te diu-ni-n ñí cacunehe-ndí te ní sándáá iní ñáhá ncháa espíritú cundíhi yucu ñávàha xii-ndí ní quee-xi yiqui cùñú ñáyiú, te diu-ni yòhó ní chindee ñàha-n xii-ndí ní ndacu-ndí ní quide-ndí titní núú sá vâ yòo tnàhí ndàcu cada", duha cúñàhá-yu xii-í dàvá-áⁿ. 23 Dico yúhú cúñaha-í xii-yu: "Ñá túú tnàhí xini ñàhá-í xii nchòhó núu ndéé ñáyiú cùu-ndo, te chí xócuñí ncháa nchòhó ñáyiú quide ncháa sá cuèhé sá dúhá núú ndécú-í-a", duha cúñaha-í xii-yu.

Íñ vehe ndècu cimientú-xi ndíhi íñ vehe ñá túú cimientú-xi (Mr. 1:22; Lc. 6:47-49)

24 'Te ncháa ñáyiú sàcúndedóho tnúhu càháⁿ-í te núu na tní-yu, te ñáyiú-áⁿ cúú-yu dàtná íñ téé ío váha

cùtnuní iní-xi. Chi téé-áⁿ ñí dácáá-dé íñ vehe, dico díhna-gá ní xete-dé ndéé ní tnahá-dé yúú cáxíⁿ te dàtnuní ní tava-dé cimientú-xi. 25 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, dico ñá túú ní ndàcu-xi cuido-xi. Te ní quene tucu táchí ñíhi dico ñá túú ní ndàcu-xi cuido-xi vehe-áⁿ, te ducaⁿ chi téé ní dácáá vèhe-áⁿ ñí tava-dé cimientú-xi núú yúú cáxíⁿ. Duha sàtnahá-xi cùu ncháa ñáyiú tní tnúhu càháⁿ-í. 26 Dico ncháa ñáyiú sàcúndedóho tnúhu càháⁿ-í te ñá túú cuñí-yu tní-yu, ñáyiú-áⁿ cúú-yu dàtná íñ téé ñá túú tnàhí cùtnuní iní-xi. Chi téé-áⁿ ñí dácáá-dé íñ vehe núú yúú mèe-ni ñuhu cùchí. 27 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, te ní quene táchí ñíhi te íí-ni ní xido-xi vehe-áⁿ cuèndá sá núú ñuhu cùchí ñí sáá. Duha sàtnahá-xi cùu ncháa ñáyiú sàcúndedóho tnúhu càháⁿ-í te ñá túú cuñí-yu tní-yu —duha ní dánèhé ñáhá Jèsús xii cue téé xica cuu ndíhi-gá ndíhi ncháa ñáyiú.

28 Te òré ní ndíhi Jèsús sá dúcáⁿ ñí cáháⁿ-gá, te ncháa ñáyiú ní xíndedóho ncháa tnúhu ní cáháⁿ-gá ío ní cuñúhu-yu nàcuáa ní dánèhé ñáhá-gã xii-yu. 29 Chi ní cáháⁿ-gá dàtná càháⁿ cue téé cùnuu, te cùnuu ndisa-gá, te ñá túú ní càháⁿ-gá dàtná càháⁿ ncháa cue téé dàcuaha ñaha xii ñáyiú ncháa tnúhu ní chídó tnùní ndí Moisés.

8

Jèsús quidé tātna-gá ìⁿ tée tnàhá cuéhé sǎ dátèhyú nihnu-xi yiqui cùñú-ó

(Mr. 1:40-45; Lc. 5:12-16)

1 Te Jèsús ní xica-gá cuánuu-gá diñi tindúú núú dúcáⁿ nǐ xíndecu-gá ní dánèhé-gá ñáyiú-áⁿ, te cuéhé víhí ñáyiú nchìcúⁿ ñáhá xì-gá cuánuu. 2 Te ní quexìo ìⁿ tée tnàhá cuéhé sǎ dátèhyú nihnu-xi yiqui cùñú-ó núú Jèsús, te ní ngüñí xítí-dě núú-gǎ, te xǎhaⁿ-dě xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tātna ñaha-n xì-í, chi cùtnuní iní-í sǎ ndácú-n —càchí-dě xǎhaⁿ-dě xii-gá.

3 Te Jèsús ní dácàá-gá ndaha-gá ní tendaha ñaha-gá xii-dé, te xǎhaⁿ-gǎ:

—Cuu cada tātna ñaha-í xii-n, te vitna ndúha-n —càchí-gá xǎhaⁿ-gǎ xii-dé.

Te òré-ni-áⁿ nǐ xócuñí cuéhé tnàhá-dé. 4 Te Jèsús ní xáhaⁿ tùcu-gá xii-dé:

—Te vitna cuanùhú te vá yõo ìⁿ cùñaha-n sǎ yùhú ní quide tātna ñaha-í xii-n, núú dütú-ni cuáháⁿ cuendá sǎ ná quíni ñáhá-dě xii-n sǎ nǐ ndúha-n, te cuáñaha-n sǎ ndúú tǎhú Yǎ Ndiõxí dàtná ní cachí ndíi Moisés. Te ducaⁿ càda-n cuendá cutnùní iní ñáyiú sǎ ní ndúha-n —càchí-gá xǎhaⁿ-gǎ xii tée ní quide tātna-gá-áⁿ.

Jèsús quidé tātna-gá ìⁿ tée xínu cuechi núú ìⁿ tée cùu capitáⁿ

(Lc. 7:1-10)

5 Te Jèsús ní xica-gá cuáháⁿ-gá ñuu Capèrnaúm. Te òré cuánguihu-gá ñuu-áⁿ te ní quexìo ìⁿ tée cùu capitáⁿ càháⁿ ndàhú-dé núú-gǎ, 6 te xǎhaⁿ-dě xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tātna-n ìⁿ tée xínu cuechi núú-í, chi cùhú-dé te càhú víhí tnàhá-dé, te ío ndòho-dé te ni ñǎ cùndèe-gá-dé candá nihnu-dé —càchí-dě xǎhaⁿ-dě xii-gá.

7 Te Jèsús ní xáhaⁿ-gǎ xii-dé:

—Te na quíhíⁿ-ó càda tātna-í-dé —càchí-gá xǎhaⁿ-gǎ xii-dé.

8 Te tée cùu capitáⁿ-áⁿ ní xáhaⁿ-dě xii-gá:

—Mèstrú, ñǎ túú tàú-í sǎ quíhu-n ndèe xítí vehe-í, chi cùu-í ìⁿ tée cùtexínu sǎ cùú-xí-n, te càháⁿ-ni sǎ ndúha tée xínu cuechi núú-í te ndúha-dé. 9 Chi yùhú ndècu cue tée tàxi tnuní ñáhá xì-í, te ducaⁿ yùhú tucu ndècu cue sandadú táxí tnùn-í. Te òré xǎhaⁿ-í xii ìⁿ-dè quíhíⁿ-dè ìⁿ chùuⁿ te cuáháⁿ-dé, te òré xǎhaⁿ-í xii ingá-dé quixi-dé te véxi-dé, te òré xǎhaⁿ-í xii ìⁿ tée xínu cuechi núú-í cada-dé ìⁿ chùuⁿ te quide-dé. Núu xǎⁿ yòhó càháⁿ-ni sǎ ndúha tée xínu cuechi núú-í te ndúha-dé —càchí-dě xǎhaⁿ-dě xii Jèsús.

10 Te Jèsús ío ní cuñúhu-gá sǎ dúcáⁿ nǐ càháⁿ tée cùu capitáⁿ-áⁿ, te ní xáhaⁿ-gǎ xii nchaa ñáyiú nchìcúⁿ ñáhá xì-gá:

—Na càchí tnúhu ndáá-í xii-ndo sǎ vǎtá quíni-gá-í ní ìⁿ ñáyiú isràél, ñáyiú súúni

ïo váha sándáá iní ñáhá xii Yá Ndiöxí dàtná sándáá iní ñáhá tée-a xii-gá. ¹¹ Te

na càchí tnúhu ndáá tucu-í xii-ndo sã ïo cuéhé ñáyyiu quixi ndàa xio nacuáa quène nchíanchii, te ñu-ni ducaⁿ ïo cuéhé tucu-yu quixi ndàa xio nacuáa quée tucu nchíanchii. Te nchaa ñáyyiu-áⁿ naníhí tnáhã-yu ndihí té Àbrahám, ndihí té Isàac, ndihí té Jàcób núú ndécú Yã Ndiöxí táxí tnùní-gá te yàcáⁿ cundecu ndihí ñáhá-yu xii-güedé.

¹² Te nchaa ñáyyiu tàú nduu táhú cundecu núú ndécú Yã Ndiöxí táxí tnùní-gá ní cùu, ñáyyiu-áⁿ quee tíhũ-yu, chi quíhíⁿ-yu ñⁿ xichi núú néé núú ïo ndohó-yu cundecu-yu, te yàcáⁿ ío ndáhí-yu, te dicó rúhñú-nã cuu núhu-yu sá sàtú iní-yu cuèndá sá ndóhõ-yu —càchí-gá xãhaⁿ-gã xii-yu.

¹³ Te Jèsús ní xáhaⁿ tùcu-gá xii tée cùu capitáⁿ-áⁿ:

—Yòhó tée ndècu ndihí tée cùhú cuanùhú vehe-n vitna chi ndúha-dé chi ní sándáá iní-n Yã Ndiöxí —càchí-gá xãhaⁿ-gã xii-dé.

Te ñu-ni òré ducaⁿ ñí xáhaⁿ Jèsús xii tée cùu capitáⁿ-áⁿ ñí ndúha tée xinu cuechi núú-dé.

Jèsús quidé tãtna-gá nãná ñadìhí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáháⁿ-gá vehe té Pèlú, te òré ní quexìo-gá vehe-dé te ní xiní-gá cáá nãná ñadìhí-dé cùhú-aⁿ ñùhu vihi-aⁿ cahni. ¹⁵ Te Jèsús ní tñi-gá ndaha ñaha cùhú-áⁿ, te òré-ni-áⁿ ñí nchíco-aⁿ cahni te ní

ndacóo-aⁿ ní xinu cuechi-aⁿ núú-güedé ndihí-gá.

Jèsús quidé tãtna-gá vãi ñáyyiu cùhú

(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexìo ñáyyiu núú ndécú Jèsús, te ndécá-yu vãi ñáyyiu yìhí ñaha espíritú cùndìhí yucu ñávãha ní sáá núú-gã te ndèca tucu-yu vãi ñáyyiu tnáhã dava-gá núú cuéhé. Te ñⁿ-ni tnúhu ní cáháⁿ Jèsús ní tenàá-gá nchaa espíritú cùndìhí yucu ñávãha yìhí ñaha xii nchaa ñáyyiu-áⁿ, te ní quee-xi yiqui cùñú-yu cuáháⁿ-xi. Te tnáhã nchaa dava-gá ñáyyiu cùhú-áⁿ ñí quide tãtna-gá. ¹⁷ Te ducaⁿ ñí cuu chi ní quee ndáá-xi nãcuáa ní cáháⁿ ndí Chàíá tée ní xóo cáháⁿ tnúhu Yã Ndiöxí ndéé sanaha, te duha ní cachí ndí: “Mee-gã cada tãtna ñaha-gã xii-o, chi ñu-ni xocani-gá nchaa sá quidé ùhú yiqui cùñú-ó”, duha ní cachí ndí.

Ñáyyiu cuini tuha ñaha xii Jèsús

(Lc. 9:57-62)

¹⁸ Te òré ní xiní Jèsús sã ïo cuéhé ñáyyiu xixúcu núú ndécú-gã, te ní xáhaⁿ-gã xii cue tée xica cuu ndihí-gá sã quée-gá ndihí-güedé bàrcú cuèndá téhndé-gá ndihí-güedé ndàa ingá xio yuhu làgúná.

¹⁹ Te mei òré-áⁿ ñí quexìo ñⁿ tée dàcuaha ñaha xii cue ñáyyiu nchaa tnúhu ní chídó tnùní ndí Moisés, te xáhaⁿ-dè xii-gá:

—Mèstrú, cuini-í canchicúⁿ ñáhã-í xii-n ndèni ní cuu na

quihíⁿ-n —càchí-dé xăhaⁿ-dě xii-gá.

20 Te Jèsús ní xáhaⁿ-gă xii-dé:

—Nchaa ñúcuui chi ndècu yaú cúú vèhe-güedi saquíhi-güedi, te nchaa cue quití ndàva caa tacá-güedi diquí yutnu. Dico yúhú Tée cùu ñaní tnáhá-ndó nchàa-ndo chi ñá túú ndèé cáá vèhe-í ñuyíú-a ndetatú-í —càchí-gá xăhaⁿ-gă xii-dé.

21 Te ìⁿ tée ní chitnahá ñáhá xii Jesús ní xáhaⁿ-dě xii-gá:

—Jèsús, daña na nùhú-í cundetu-í cuú tătà-í te chindúxi-í-dé dàtnùní quixi-í chitnahá ñáhá dùcaⁿ-ná-í xii-n —càchí-dé xăhaⁿ-dě xii-gá.

22 Te Jèsús ní xáhaⁿ-gă xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-áⁿ cúú-yu dàtná ñáyiú ní xihí cuéi ndècu-ní-yu núú ñuyíú-a, te yòhó canchicúⁿ ñáhá-ní xii-í —càchí-gá xăhaⁿ-gă xii-dé.

Jèsús ngání-gă táchí ndihi ndute làgúná

(Mr. 4:35-41; Lc. 8:22-25)

23 Te sátá dúcáⁿ te Jèsús cuánguee-gá bàrcú ndihi cue tée xica cuu ndihi-gá, te ní xica bàrcú-áⁿ cuáháⁿ-xi. 24 Te ñini ñùhu bàrcú-áⁿ ichi cuáháⁿ-xi núú ndute ní xidí Jesús, te ní ngúita-xi níhi vihi quene táchí, te ta nàdachitú-xi ndute xití bàrcú cuáháⁿ. 25 Te cue tée xica cuu ndihi-gá cuáháⁿ-güedé núú cáá-gă xidí-gá, te xăhaⁿ-güedé xii-gá:

—¡Mèstrú, ndiquíú iní chi dàcácu ñaha-n xii-o chi quée naa-o cuení-xi! —càchí-güedé xăhaⁿ-güedé xii-gá.

26 Te Jèsús ní xáhaⁿ-gă xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá iní ñáhá ndisa-ndo xii-í-áⁿ? —càchí-gá xăhaⁿ-gă xii-güedé.

Te Jèsús ní ndacóo-gá te ní tenáa-gá táchí-áⁿ ndihi ndute-áⁿ, te ní ngúíñí táchí-áⁿ te ní nucúndecu nahi-nă ndute làgúná-áⁿ. 27 Te nchaa cue tée ñùhu xití bàrcú-áⁿ ní cunúhu-güedé sá dúcáⁿ ní quide-gá ní xiní-güedé, te ní xitnàha-güedé:

—¿Te ná tée cùu tée-a núu duha ní cáhán-ni-dé te ní ngúíñí táchí te ní nucúndecu nahi-ni ndute làgúná-a-í? —càchí-güedé xitnàha-güedé.

Cue tée ñuú Gàdará cue tée yihí ñaha espíritú cundihí yucu ñávàha

(Mr. 5:1-20; Lc. 8:26-39)

28 Te òré ní quèxio Jesús ndàa ingá xio yuhu làgúná yucu cue tée ñuú Gàdará, te úú tnàhá cue tée quide vehe núú yíndüxi ndíyi ní quee-güedé cuáháⁿ-güedé núú ndécú Jesús, te ndi ndùú-güedé yihí ñaha espíritú cundihí yucu ñávàha xii-güedé, te ío màñá-güedé chi vá yòo tnàhí dàña-güedé yáha yatni núú ndécú-güedé. 29 Te cue espíritú yihí ñaha xii-güedé-áⁿ ní quide-xi níhi ní cáhán-güedé, te xăhaⁿ-güedé xii-gá:

—¿Ná cuendá véxi-ö Jèsús Déhe Dútú Ndiöxí chidácá ñáhá-n xii-ndí? ¿Áⁿ sàma véxi-n dándoho ñaha-n xii-ndí? Te vátá sàá-gá nduu dùcaⁿ cada-n —cachí-güedé xähaⁿ-güedé xii-gá.

30 Te yatni xiáⁿ xixica cuu vai cuchí xixexi-güedi. 31 Te cue espíritú cündìhi yucu ñávãha yìhi ñaha xii cue téé-áⁿ ní cáháⁿ ndàhú-xi núú Jèsús, te xähaⁿ-xi:

—Te núu vá dáñá-gã-n quìhi-ndí yiqui cùñú cue téé-a, te càháⁿ ndàhú-ndí núú-n sã dàña-n na quíhíⁿ-ndí quíhu-ndí yiqui cùñú nchaa cùchí-áⁿ —càchí cue espíritú-áⁿ xähaⁿ-xi xii-gá.

32 Te Jèsús ní xáhaⁿ-gã xii cue espíritú cündìhi yucu ñávãha-áⁿ:

—Chí táquèe yiqui cuñú cue téé-áⁿ te quíhíⁿ-ndó nüu ndèé ichi quíhíⁿ-ndó —càchí-gá xähaⁿ-gã xii nchaa espíritú-áⁿ.

Te cue espíritú cündìhi yucu ñávãha-áⁿ ní quee-xi yiqui cùñú cue téé-áⁿ, te cuáháⁿ-xi cuánguìhu-xi nchaa cùchí-áⁿ. Te cue quití-áⁿ ní xinu-güedi duha ní queé-güedi ndàa núú dèhvã yuhu làgúná-áⁿ, te ní ngaunihnu-güedi xití ndute, te ní ndìhi-güedi ní cáhá.

33 Te cue téé xitò ñaha xii nchaa cuchí-áⁿ ní yuhú-güedé te ní xinu-güedé, te ní sáháⁿ-güedé ní cani-güedé cuèndú núú cuè ñáyiu ndècu xití ñuu nchaa nàcuáa ní cuu cuendá cue téé ní xìhi ñaha nchaa espíritú cündìhi yucu

ñávãha-áⁿ. 34 Te nchaa ñáyiu ñuu-áⁿ ní quee-yu cuáháⁿ-yu núú ndécú Jèsús. Te òré ní quexió-yu núú ndécú-gã te ní cáháⁿ ndàhú-yu núú-gã sá ná quee-gá yucu ñuu-yu núhú-gá.

9

Jèsús quidé tãtna-gá ìⁿ téé cùhú ñã cùú-gã candá nihnu
(Mr. 2:1-12; Lc. 5:17-26)

1 Te sátá dúcáⁿ ní cuu te Jèsús cuánde-gá bàrcú cuáháⁿ-gá ní natehndé-gá ndàa ingá xio yuhu làgúná. Te xiáⁿ ní ndexio-gá ñuu núú quidé ñuu-gá. 2 Te xiáⁿ ndécú-gã ní quexio cue téé nchido-güedé ìⁿ téé cùhú ñã cùú-gã candá nihnu ñuhu-dé xitò, te Jèsús ní cutnùní iní-gá sá sàndáá ndisa iní ñáhá-güedé xii-gá nüu ní xáhaⁿ-gã xii téé cùhú-áⁿ:

—Yòhó téé cùhú vá ndìhú-gá iní-n, chi sa ní quide càhnu iní-í nchaa cuèchi-n —càchí-gá xähaⁿ-gã xii-dé.

3 Te sá dúcáⁿ ní cáháⁿ-gá nüu xiáⁿ cue téé dàcuaha ñaha xii ñáyiu nchaa tnúhu ní chídó tnùnì ndí Moisés ní sani iní-güedé: “Téé-a càháⁿ cuèhé-dé cuendá Yã Ndiöxí”, duha ní sani iní-güedé. 4 Te Jèsús ní cutnùní iní-gá nàcuáa sàni iní-güedé nüu ní xáhaⁿ-gã xii-güedé:

—¿Ná cuendá ducaⁿ sàni cuèhé sání duha iní-ndó? 5 Te sá dúháⁿ ní xáhaⁿ-í xii téé cùhú-a sá ní quide càhnu iní-í nchaa yíca cuèchi-dé, te xiáⁿ nchòhó ñã túú cutnùnì iní-ndó nüu ndáá càháⁿ-í àdi ñã ndáá. Dico núu cùu-í-dé

sá ndácõo-dé te caca-dé, te cutnùnì ndáá iní-ndó nõu ndáá càháⁿ-í àdi ñá ndáá, chi cundehe nõu-ndó nàcuáa cada-í. ⁶ Te vitna na càda-í nàcuáa cutnùnì iní-ndó nchàa-ndo sá yùhú Tée cùu ñaní tnàhá-ndó nchàa-ndo ndecu ndihi-í tnúhu ndee iní ñuyíú-a sá cáda càhnu iní-í nchaa cuéchi ñáyiú —càchí-gá xãháⁿ-gã xii-güedé.

Te sátá dúcáⁿ te ní xáháⁿ-gã xii té cùhú-áⁿ:

—Ndacóo, te ndocani-n xito ñùhu-n véxi-áⁿ te nùhú-n vehe-n —cachí-gá xãháⁿ-gã xii-dé.

⁷ Te òré-ni-áⁿ ñí ndúha té cùhú-áⁿ te ní ndacóo-dé te ní ndocani-dé xito ñùhu-dé ní quexio-áⁿ te ní xica-dé cuánuhú-dé vehe-dé. ⁸ Te nchaa ñáyiú xíndecu-áⁿ ïo ní cuñúhu-yu sá dúcáⁿ ñí quide Jèsús ní xiní-yu, te ní cachí-yu sá ïo càhnu cuu Yá Ndiõxí cuendá sá ñí sãñaha-gã xii Jèsús tnúhu ndee iní cada-gá nchaa sá vã yõo tnàhí ndàcu cada.

Jèsús càháⁿ-gá ñí tée nàni Mateú chitnahá ñáhá-dé xii-gá

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñùhu-gá ní xiní-gá núcõo ñí tée nàni Mateú quidé còbrá-dé ñáyiú chi cobràdór impuèstú cúu-dé, te ní xáháⁿ-gã xii-dé:

—Màteú, néhé chitnahá ñáhá-n xii-í —càchí-gá xãháⁿ-gã xii-dé.

Te té Màteú-áⁿ ñí ndacuñí-dé ní chitnahá ñáhá-dé xii-gá.

¹⁰ Te ñí xito ndècu Jèsús ñí vehe, te yìhi-gá mèsá ndihi cue té xica cuu ndihi-gá xéxí ndihi ñaha-gá xii-güedé. Te tnàhá cue té cuihna iní-xi quide cobrá ñáhá xii ñáyiú cuendá impuèstú yìhi ndihi-gá mèsá, te tnàhá tucu dava-gá cue té ndècu ichi cuehé ichi duha yìhi ndihi-gá mèsá. ¹¹ Te sá ñí xiní cue té cùu fariséu xéxí Jèsús ndihi nchaa cue té-áⁿ, te ní xicáⁿ tnúhú-güedé núu cuè té xica cuu ndihi-gá, te xãháⁿ-güedé:

—¿Ná cuendá ducaⁿ quide té cùu mestrú-ndó xéxi-dé ndihi cue té cuihna iní-xi quide cobrá ñáhá xii ñáyiú cuendá impuèstú, ndihi nchaa dava-gá cue té ndècu ichi cuehé ichi duha-í? —càchí-güedé xãháⁿ-güedé.

¹²⁻¹³ Te Jèsús ní tecú dóho-gá nàcuáa ndùu tnúhu ní xáháⁿ-güedé xii cue té xica cuu ndihi-gá, núu ní xáháⁿ-gã xii-güedé:

—Nchaa ñáyiú ñá túu cùhú chi ñá túu xiní ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yùhú véxi-í càháⁿ-í ñáyiú cùtnunì iní-xi sá ndécú cuéchi-xi cuendá dàñá-yu nchaa sá cuéhé sá dúhá quidé-yu, te ñá túu véxi-í càháⁿ-í ñáyiú càchí sá ñá túu ndècu cuéchi-xi. Te chí cáda cuendá váha nàcuáa càháⁿ Yá Ndiõxí núu tütù-gá núu càchí-xi: “Yùhú cuiní-í sá cùndáhú iní-ndó cuè tnaha ñáyiú-ndo, te ñá díú mèe-ni sá cáhni-ndó quiti nduu támù-í”,

duha càchí-gá núú tütú-gá —
càchí Jèsús xàhaⁿ-gã xii-güedé.

*Cue té ndücu tnúhu núú
Jèsús cuendá ñáyiú ñá túú tnàhí
ná xéxí áma càháⁿ ndihí-yu Yá
Ndiöxí*

(Mr. 2:18-22; Lc. 5:33-39)

14 Te cue té xica cuu
ndihi té Juáá tée dàcuandute
ñaha xii ñáyiú ní sáháⁿ-güedé
núú ndécú Jèsús, te xicáⁿ
tnúhú-güedé núú-gã, te
xàhaⁿ-güedé:

—Cuíní-ndí cachí tnúhu-n
ná cuendá nchúhú, ndihi
cue tée cùu farişéú ñá túú
tnàhí ná xéxí-ndí áma càháⁿ
ndihi-ndí Yá Ndiöxí, te cue tée
xica cuu ndihi-n ñá túú dùcaⁿ
quide-güedé —càchí-güedé
xàhaⁿ-güedé xii-gã.

15 Te Jèsús ní xáhaⁿ-gã
xii-güedé:

—Nchòhó xìní-ndó sã vã
cúú cñaha-o xii ñáyiú ñuhu
vico tnándaha sã vã cúú
cáxí-yu nini ndècu ndihi ñaha
té tñándaha xií-yu, dico
sáá nduu vã cündècu ndihi
ñaha-gã té tñándaha-áⁿ xii-yu,
te dàvá-áⁿ te cahni iní-yu
vá cáxí-yu cuendá sã ndihú
iní-yu.

16 Te ni vã yõo dàndée luha
dóó sáá ñⁿ dóó sa ní cuu tühú
víhí, chí dóó sáá-áⁿ nàndiyi-xi
te uuⁿ-gã ndata-xi dóó sã ní
cuu tühú-áⁿ. 17 Te ni vã yõo
chìhi ndidí sáá xití ñⁿ lamba
sa ní cuu tühú víhí, chí núu
yoo ducaⁿ na càda te ndava
lamba sa ní cuu tühú-áⁿ chí ío
níhi yóco ndidí-áⁿ, te cuíta-ni
ndidí-áⁿ te cuíta-ni lamba-áⁿ
te núu ducaⁿ na càdá-yu,
núu xíáⁿ xíní ñuhu-xi queé
ndidí sáá-áⁿ xití ñⁿ lamba saa

cuendá ducaⁿ ñá túú ná cuu
cováha-xi —càchí-gã xàhaⁿ-gã
xii-güedé.

*Cuendá déhe yoco té Jàirú
ndihi cuendá ñⁿ ñaha ní tnándeé
dóó Jèsús*

(Mr. 5:21-43; Lc. 8:40-56)

18 Te càháⁿ dúcáⁿ-ní Jèsús
ní quexìo ñⁿ té cùnno núú
ndécú-gã, ñⁿ té tãxi tnuní
veñúhu, te ní ngüíñí xití-dé
núú-gã càháⁿ ndàhú-dé, te
xàhaⁿ-dè xii-gã:

—Véxi-í càháⁿ ndàhú-í
núú-n nñu vã cündèe iní-n
quíhíⁿ-ó vèhe-í dandòto-n
déhe yoco-í chí ní xihí-xi
tnàvíí, te yúhú cùtnuní iní-í
sã nñu quíhíⁿ-n tëndaha-n
yiqui cuñú-xi te ndoto-xi —
càchí-dé xàhaⁿ-dè xii-gã.

19 Te Jèsús ní xica-gã
cuáháⁿ-gã ndihi-dé ndihi cue
té xica cuu ndihi-gã. 20 Te
ichi ñuhu-gã cuáháⁿ-gã ní
sáháⁿ ñⁿ ñadìhí ní tnándeé-aⁿ
yuhu dõó-gã ndàa sátá-gã,
te ñaha-áⁿ sa ní cuu úxúú
cuíá sã cùhú-aⁿ ngòyo ñaha
níñí xii-aⁿ. 21 Te ducaⁿ ní
quide-aⁿ chí ní sani iní-aⁿ
sã nñu ndacu-aⁿ tnándeé-aⁿ
cuèdicó luha yuhu dóó Jèsús
te ndúha-aⁿ ní sani iní-aⁿ.
22 Te Jèsús ní nchócótó-gã
ndàa sátá-gã te ní xiní-gã
ñadìhí-áⁿ, te ní xáhaⁿ-gã:

—Yòhó ñaha cùhú, vá
ndihú-gã iní-n vitna chí sa
ní ndúha-n, chí ní sándáá
iní ñáhá-n xii-í —càchí-gã
xàhaⁿ-gã xii-aⁿ.

Te òré-ni-áⁿ ní ndúha ñaha
cùhú-áⁿ.

23 Te òré ní quexìo Jesús
vehe té cùnno taxi tnuní

veñúhu-án, te ní xiní-gá xĩndáhí víhí ñǎyiu, te xĩndecu mũsicú. ²⁴ Te ní xáhaⁿ-gá xii-yu:

—Chí táquèe xití vehe-a, chi xíchí-a ñá túú ní xĩhí-xi chí dicó xidí-xi —càchí-gá xáhaⁿ-gá xii-yu.

Te ní sácú ndeé ñáhǎ-yu xii-gá sá dúcáⁿ ñĩ cáháⁿ-gá, chí sá cúú-xí mèe-yu te ní xihí ndisa xíchí-ǎⁿ. ²⁵ Te ñǎyiu-án ñĩ queé-yu te cuánguihu Jèsús núú cándòdo xíchí ñĩ xihí-án, te ní tñi-gá ndaha-xi te òré-ni-án ñĩ ndacóo-xi. ²⁶ Te nchaa ñuú cáá yàtni xiáⁿ ñĩ níhí ñǎyiu tnúhu nàcuáa ní quide Jèsús.

Jèsús quidé tǎtna-gá núú úũ tnàhá cue téé cuàá

²⁷ Te sátá dúcáⁿ ñĩ cuu te ní xica Jèsús cuánuhú-gá, te ichi ñùhu-gá ní chinchícúⁿ ñáhǎ úũ tnàhá cue téé cuàá xii-gá, te níhi cáháⁿ-güedé, te xáhaⁿ-güedé xii-gá:

—Yòhó Jèsús, téé cùu ñaní tnàhá ndíi Dàvíi, cundàhú iní ñáhǎ xì-ndí —càchí-güedé xáhaⁿ-güedé xii-gá.

²⁸ Te òré ní nasáá Jèsús núú quidé vèhe-gá, te cue téé cuàá-án ñĩ quexìo-güedé ndéé núú-gǎ, te ní xícáⁿ tnúhú-gǎ núú-güedé, te xáhaⁿ-gǎ:

—¿Sàndáá iní-ndó sǎ yùhú ndacu-í cada tǎtna-í núú-ndó-ǎⁿ? —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Sàndáá iní-ndí sǎ díú yòhó Jèsús ndacu-n càda tǎtna-n núú-ndí —càchí-güedé xáhaⁿ-güedé xii-gá.

²⁹ Te Jèsús ní dácàá-gá ndaha-gá ní tendaha-gǎ núú-güedé, te ní xáhaⁿ-gǎ xii-güedé:

—Te vitna, ndúha núú-ndó chí ní sàndáá iní-ndó sǎ díú yùhú ndacu-í cada tǎtna-í núú-ndó —càchí-gá xáhaⁿ-gǎ xii-güedé.

³⁰ Te òré-ni-án ñĩ ndúha núú-güedé, te Jèsús ní cáháⁿ víhí-gǎ dóho-güedé cuendá sǎ vǎ cáháⁿ-güedé nàcuáa ní cuu ní ndúha núú-güedé.

³¹ Te cue téé-án òré ní ndee-güedé núú ndécú Jèsús, te ní ngüíta-ni-güedé ní cani-güedé cuendú núú ñǎyiu nàcuáa ní quide ñaha-gǎ xii-güedé. Te nchaa dava-gá ñuú cáá yàtni xiáⁿ ñĩ sáháⁿ-güedé ní cani-güedé cuendú núú ñǎyiu nàcuáa ní quide ñaha Jèsús xii-güedé.

Jèsús quidé tǎtna-gá ñⁿ téé ñihí

³² Te íchí ñĩ ndee cue téé ní ndúha núú-xi-án núú ndécú Jèsús, te ní quexìo ñⁿ úú ñǎyiu ndécá-yu ñⁿ téé ñihí yíhí ñàha espíritú cündihí yucu ñávàha.

³³ Te Jèsús ní queñuhu-gá espíritú cündihí yucu ñávàha yíhí ñaha xii téé-án, te òré-ni-án ñĩ cuu ní nacáháⁿ-dé. Te nchaa ñǎyiu xĩndecu-án ño ní cuñúhu-yu, te ní xitnàhá-yu:

—Ñá túú tnàhí xini-ó ñⁿ téé duha cada ñuú nchoo cué ñǎyiu isràel ní cùu —cachí-yu xitnàhá-yu.

³⁴ Te cue téé cùu fariséú ní ngüíta-güedé xitnàha-güedé:

—Téé-a chí sácúihná chíndèe ñaha-xi xii-dé queñuhu-dé nchaa espíritú

yíhí ñàha xii ñáyiu te diu-ni sácuíhná-ǎⁿ táxí tñuní-xi nchaa espíritú-áⁿ — càchí-güedé xitnàha-güedé.

Jèsús cündàhú iní-gá ñáyiu

³⁵ Te Jèsús cuáháⁿ-gá nchaa ñuú náhnú ndihí nchaa ñuú líhli, te ndi tnahá ìⁿ ìⁿ ñuú sáá-gá te ducaⁿ cuǎnguihu-gá ìⁿ ìⁿ veñúhu càa nchaa ñuú-áⁿ dánèhé-gá ñáyiu tñuhu váha, tñuhu sá sánú ìchi ñaha xii-yu nàcuáa ndihu ndaha ñaha Yá Ndiöxí xii-yu. Te ducaⁿ-ni ta quide tátna-gá nchaa ñáyiu cùhú cuáháⁿ cuèi ndi dííⁿ ndi dííⁿ núu cuèhé tñahá-yu ìⁿ ìⁿ-yu. ³⁶ Te sá ñi xini Jèsús sá ìo vài ñáyiu nchicúⁿ ñáhá xii-gá, te ní cündàhú iní ñáhá-gá xii-yu chi ìo ndihú iní-yu, te vá yòo nèhe cuendá ñáhá xii-yu, te cùu-yu dàtná cue mbéé cue quití ñá túú tòli-xi. ³⁷ Te Jèsús ní xáhaⁿ-gá xii cue téé xica cuu ndihí-gá:

—Nchòhó xini-ndó sá òrè ná sáá nduu cùu nchaa sá xítú ñáyiu te ìo vài cuu. Te na càchí tñuhu ndáá-í xii-ndo sá dàtná ìo vài sá xítú ñáyiu cùu, ducaⁿ ìo vài ñáyiu cùmání cundedóho tñuhu-í, te ìo sacú ñáyiu dàcuaha ñaha xii-yu. ³⁸ Núu xíáⁿ xini ñuhu-xi cácaⁿ-ndó núu Yá Ndiöxí Yaá cúu Xitohó-ndó ndihí-yu cuendá sá ná dàcaháⁿ-gá iní-yu cáháⁿ-yu tñuhu-gá núu nchaa dáva-gá tñaha ñáyiu-yu cùmání cundedóho tñuhu-gá —càchí-gá xáhaⁿ-gá xii-güedé.

10

Jèsús sáñaha-gá tñuhu ndee iní xii ndi ùxúú cue téé xica cuu

ndihí-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue téé xica cuu ndihí-gá, te ní sáñaha-gá xii-güedé tñuhu ndee iní cundecu ndihí-güedé cuendá queñuhu-güedé nchaa espíritú cündihí yucu ñávàha yihí ñaha xii ñáyiu, ndihí cuendá sá cádá tátna-güedé nchaa dáva-gá ñáyiu cùhú cuèi nándi núu cuèhé tñahá-yu.

² Te duha xínani ndi ùxúú cue téé-áⁿ: téé cùnuu-gá nání-dě Xímú, àdi Pelú chi úú diu-dé, te ñaní-dé cúú tē Ndríxí, te tñahá téé-áⁿ cúú-dě téé xica cuu ndihí Jèsús, ndihí té Jàcobó ndihí ñaní té Jàcobó-áⁿ tēe nàni Juaá, te ndi ndùú cue téé-áⁿ cúú-güedé déhe té Zebèdeú.

³ Te tñahá té Lipé xicá cùu ndihí-gá, ndihí té Bartolómé, ndihí té Mǎxí, ndihí té Màteú téé cùu cobradór impuéstú ní cùu, ndihí té Jàcobó déhe té Àlfeú, ndihí té Lèbeú téé dānani-güedé Tàdeú, ⁴ ndihí té Xímú téé ní cündihí cue téé cananistá, ndihí té Júdás Iscarioté téé ní sáá nduu ñi sáha cuendá ñáhá xii Jèsús núu cue téé cùu úhú iní ñáhá xii-gá.

Jèsús téndàha-gá ndi ùxúú cue téé xica cuu ndihí-gá quihíⁿ-güedé cáháⁿ-güedé tñuhu-gá núu ñáyiu

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gá xii ndi ùxúú cue téé xica cuu ndihí-gá sá quihíⁿ-güedé cáháⁿ-güedé tñuhu-gá

núú ñǎyiu, te cùmání-gǎ caca-güedé quíhíⁿ-güedé, te ní xáhaⁿ-gǎ xii-güedé:

—Na càchí tnúhu-í xii-ndo sǎ méé-ní ñúú núú xíndecu cue ñáyiu isràél quíhíⁿ-ndó cǎháⁿ-ndó tnúhu-í, te vá quíhíⁿ-ndó nì ìⁿ ñúú yíndèhu dīstritú Sàmariá, te ni vǎ quíhíⁿ-ndó dàva-gǎ ñúú núú xíndecu ñáyiu ñá túú cùu ñáyiu isràél. Te cue ñáyiu isràél-áⁿ cúu-yu dàtná cue mbéé cue quitì ní xíta chí ta xíta nihnú-yu cuáháⁿ. ⁷ Te cúñaha-ndo xii-yu sǎ sà ní cuyatni nduu ndíhu ndaha ñaha Yá Ndiòxí xii-yu. ⁸ Te cada tátna-ndo nchàa ñáyiu cùhú cuèi ñáyiu tnahá cuéhé sǎ dátèhyú nihnu-xi yiqui cùñú-yu, te queñuhu-ndo nchàa espíritú cùndìhi yucu ñávǎha yìhi ñaha xii ñáyiu, te dandòto-ndo cue ñáyiu sa ní xíhí, te vá càcáⁿ-ndó yǎhu-ndo núú ñáyiu òré cada-ndo nchàa chiuⁿ-áⁿ, chí sa nàha-ndo sǎ dīcò ducaⁿ nì taxi-í tnúhu ndee iní ndécú ndìhi-ndo.

⁹ Te vá cǎnèhe-ndo dīhúⁿ cuu ichi-ndo, ¹⁰ te ni vǎ cǎnèhe-ndo ñunu cuhuⁿ ndachiuⁿ-ndo, te ni vǎ cǎnèhe-ndo ingá ichi dóó-ndó nàdáma-ndo, te ni vǎ cǎnèhe-ndo úú-gǎ chàu-ndó chí diu-ni chàu yíhí-ndó-ǎⁿ xǎⁿ-ni quíhi-ndo, te ni vǎ cǎnèhe-ndo tatnu, te ducaⁿ càda-ndo chí nchòhó sa nàha-ndo sǎ ncháá ñáyiu quide chiuⁿ te diu-ni cuèndá chiuⁿ quidé-yu nihí-yu sǎ xéxí-yu.

¹¹ Te ndi tnahá ñúú ná

quèxio-ndo te nducu-ndo ñáyiu cùtnuní iní-ndó sǎ cúu-yu ñáyiu váha, te vehe ñáyiu-áⁿ cundecu-ndo ndèé sǎá nduu ndèe-ndo ñúú-áⁿ. ¹² Te òré quèxio-ndo vehé-yu te cúñaha-ndo xii-yu: “Yá Ndiòxí chíndèe chitúu ñaha-gǎ xii-ndo ndècu-ndo”, duha cúñaha-ndo xii-yu. ¹³ Te núú ní cǎháⁿ váha ndìhi ñahá-yu xii-ndo, te cuu-xi sǎ vǎha sǎ cúú-xí-yu cuèndá tnúhu ní xáhaⁿ-ndo-ǎⁿ, dico núú ñá túú ní cǎháⁿ váha ndìhi ñahá-yu xii-ndo, te cúñaha-ndo xii-yu sǎ vǎ cúú-xí sǎ vǎha xii-yu tnúhu ní xáhaⁿ-ndo-ǎⁿ. ¹⁴ Te núú ní sǎá-ndó ìⁿ ñúú àdì ìⁿ vehe, te núú ñá túú ní cǎháⁿ ndìhi ñaha vǎha-yu xii-ndo te ni ñá túú ní cuimí-yu cundedóho-yu tnúhu cǎháⁿ-ndó te ndee-ndo ñúú-áⁿ àdì vehe-áⁿ, te naquidi-ndo tǐcǎ chùhmá nǐ tñii sáhá-ndó cuèndá ná cùtnuní iní-yu sǎ ñá túú quide váha-yu. ¹⁵ Te na càchí tnúhu ndáá-í xii-ndo sǎ sǎá nduu te ío-gǎ dandòho ñaha Yá Ndiòxí xii ñáyiu ducaⁿ na càda ñaha xii-ndo-áⁿ dàcúúxí ñáyiu ní xíndecu ñúú Sòdomá ndìhi ñúú Gòmorrá.

Ndoho tnahá-ó cùndecu-ó ichi Xítohó Jesucristú

¹⁶ Te cada iní-ndó sǎ cúú-ndó dàtná cue mbéé cue quitì cuáháⁿ núú ío yíhí. Te ducaⁿ sǎtnahá-xi cùu-ndo chí yúhú tendaha ñaha-í xii-ndo quíhíⁿ-ndó núú xíndecu cue ñáyiu cuihna iní-xi, te ío váha cuáha-ndo cuèndá nàcuáa cada-ndo dàtná quidé còó, dico cunduu váha iní-ndó ñá túú ná cada-ndo dàtná quidé

lómá. 17 Te quíhi iní-ndó chi cue ñáyiú na cùu úhú iní ñáhá xii-ndo, te cuáha cuendá ñáhá-yu xii-ndo núú cuè téé cùchiuⁿ, te caniha-güedě xii-ndo xití veñúhu-güedě. 18 Te dava tucu ñáyiú cuu úhú iní ñáhá xii-ndo can-deca ñahá-yu xii-ndo quíhiⁿ núú cuè téé cùnuu yindaha nacióⁿ, àdi núú dàva-gá cue téé cùnuu sá cuendá-í. Te nchòhó níhi-ndó nàcuáa cada-ndo cáháⁿ váha-ndo cuendá-í núú-güedě ndihi núú cuè ñáyiú ñá túú cùu ñáyiú isràél. 19-20 Dico òré cuáha cuendá ñáhá-yu xii-ndo núú nchàa cue téé-áⁿ, te vá cání iní-ndó núú nása cunduu tnúhu cáháⁿ-ndó núú-güedě, chi òré-nã te níhi-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chi mee Espíritú Yá Ndióxi Yáa cúú Tãtã-ndó dàcahú iní ñáhá-xí xii-ndo nacuáa cunduu tnúhu cáháⁿ-ndó.

21 'Te dava cue téé cuáha cuendá-güedě ñaní-güedě núú cuè téé cùchiuⁿ cuendá cahni ñaha-güedě, te dava cue téé cùu tátá ñu-ni ducaⁿ càda-güedě déhe-güedě, te ñu-ni ducaⁿ càda ñaha dava cue ñáyiú cùu déhe xii tãtã-yu ndihi nãñã-yu, chi cuáha cuendá ñáhá-yu núú cuè téé cùchiuⁿ cuendá cahni ñaha-güedě xii-yu. 22 Te nchòhó chi nchaa ñáyiú ngúita-yu cuu úhú iní ñáhá-yu xii-ndo sã cuendá-í. Te núú na càda ndee-ni iní-ndó cànchicúⁿ nihnu-ni-ndo ìchi-í cuèi nãndi sá ná càda ñahá-yu xii-ndo ndeé ná sãá nduu vã

cúndecu-gá-ndó ñùyiú-a ña, te nduu táhú-ndó cùndecu-ndo ni caa ni quíhiⁿ ndihi Yá Ndióxi. 23 Te núú ñuú cuení-güedě tñi ñaha-güedě xii-ndo càda úhú ñáhá-güedě sá cuendá-í, te cunu-ndo núú-güedě quíhiⁿ-ndó ñngá ñuú. Te na càchí tnúhu ndáá-í xii-ndo sã cùmání-gã quíhiⁿ-ndó nchàa dava-gá ñuú núú xíndecu ñáyiú isràél cáháⁿ-ndó tnúhu-í, te sa quixi tucu yúhú, Téé cùu ñaní tnáhá-ndó nchàa-ndo ñuyiú-a.

24-25 'Te nchòhó xini-ndó sã ni ñuú téé dàcuaha ñá túú cùnuu-dé dàcúxí mèstrú-dé, te núú mèstrú téé-áⁿ nãndi yãha-dé ndécú-dé te tàú-dé nduu vétú iní-dé te núú tnáhá-dé yãha-dé dàtná yãha mèstrú-dé-áⁿ. Te ñu-ni ducaⁿ sãtnahá tucu-xi cùu ñuú téé xinu cuechi, chi ñá túú cùnuu-dé dàcúxí pãtróóⁿ-dë, te nchaa sã yãha pãtróóⁿ-dë-áⁿ te tàú-dé nduu vétú iní-dé te núú tnáhá-dé yãha-dé dàtná yãha pãtróóⁿ-dë-áⁿ. Te núú yúhú Yáa táxi tnúni ñáhá xii-ndo cachí-yu sá cùu-í sácúíhná, te uuⁿ-gá ducaⁿ cññáhá-yu xii nchòhó cue téé cùndihi-í.

Vá yùhú-ó cuendá nchaa sá cáda ñaha ñáyiú xii-o

(Lc. 12:2-7)

26 'Te nchòhó vá yùhú-ndó núú ñáyiú. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sã quée túu-xi núú ñáyiú. 27 Te nchaa tnúhu sá càchí tnúhu-í xii-ndo núú méé núú ñuú-ó, cùu-xi tnúhu sá ndúú yùhu

ni cuu datúu-ndo núú cué ñáiyu cuéi núú chítú núú tãcá. ²⁸ Te xini ñuhu-xi sá vâ yùhú-ndó cué ñáiyu cuéi na cãhni ñahá-yu xii-ndo, chi ñu-ni yiqui cùñú-ndó ndacú-yu cahní-yu, dico ñá túú nãgá ndacú-yu cada ñahá-yu xii-ndo. Te tàú-ndó sã Yã Ndiõxí yùhú-ndó chi Yaá-áⁿ ndacu-gá danàa-gá yiqui cùñú-ndó, te ndacu-gá daquihíⁿ ñahá-gã xii-ndo núú ùhú núú ndàhú.

²⁹ 'Te nchòhó xini-ndó sã ndéé úú tnàhá tãlãá cùyãhu-di núú ííⁿ-ní dñhúⁿ, te ni ííⁿ-di ñá túú xihí cùtexínu-di chi ndéé núú mee Yã Ndiõxí Yaá cúú Tãtã-ndó ná càchí-gá te xihí-di. ³⁰ Dico nchòhó chi ío-gá néhé cuendá ñahá Yã Ndiõxí xii-ndo chi ndéé idi díquí-ndó yindehu. ³¹ Núú xiáⁿ càchí-í sá vâ yùhú-ndó chi cùnuu-gá-ndó dàcúúxí tãlãá cuéi vâi vihi-güedi.

Nchaa ñáiyu datúu núú tnàha ñáiyu-xi sá ndécú ndihí-yu Xitohó Jesucristú
(Lc. 12:8-9)

³² 'Te na càchí tnúhu-í xii-ndo sã ncháá ñáiyu na datúu núú tnàha ñáiyu-xi sá ndécú ndihí ñahá-yu xii-í, te ducaⁿ te tnàhá yùhú datúu-í núú Tãtã-í Dútú Ndiõxí Yaá ndécú àndiú sá ndécú ndihí-í-yu. ³³ Dico nchaa ñáiyu na cñhaha xii tnàha ñáiyu-xi sá ñà túú ndècu ndihí ñahá-yu xii-í, te ñu-ni ducaⁿ càda yùhú tucu chi cñhaha-í xii Tãtã-í Dútú Ndiõxí Yaá ndécú àndiú sá ñà túú ndècu ndihí-í-yu.

Ñá túú cùu ííⁿnuu ñáiyu
(Lc. 12:51-53; 14:26-27)

³⁴ 'Te na càchí tnúhu-í xii-ndo sã vâ cání ìní-ndó sã yùhú véxi-í ñuyiú-a te cuu ííⁿnuu-gã ñáiyu cundecú-yu, chi da ngüita-yu vâ cúú ííⁿnuu-gá-yu cundecú-yu, te ducaⁿ chi nchaa ñáiyu vâ quindáá ìní ñahá xii-í ñáiyu-áⁿ ngõo-yu cuu úhú ìní-yu nchaa ñáiyu quindáá ìní ñahá xii-í. ³⁵ Te ñava cue tée xñdecu tãtã-xi te ngõo-güedé cuu úhú ìní-güedé tãtã-güedé, te ñu-ni ducaⁿ càda cue ñáiyu dñhí xñdecu nãná-xi, chi ngõo-yu cuu úhú ìní-yu nãná-yu, te ñu-ni ducaⁿ càda tucu cue ñáiyu cùu sãnu, chi ngõo-yu cuu úhú ìní-yu nãná yíi-yu. ³⁶ Te ndi mèé-yu vehé-yu ngõo-yu vâ cúú ííⁿnuu-gá-yu cundecú-yu.

³⁷ 'Te na càchí tnúhu tucu-í xii-ndo sã ncháá ñáiyu ío-gá ná cùu ìní tãtã-xi àdi nãná-xi dàcúúxí yùhú, te ñáiyu-áⁿ ñà túú tàú-yu cundecu ndihí ñahá-yu xii-í, te nchaa ñáiyu ío-gá ná cùu ìní déhe ducuⁿ-xi, àdi déhe yoco-xi dàcúúxí yùhú, te ñu-ni ducaⁿ ñà túú tàú-yu cundecu ndihí ñahá-yu xii-í. ³⁸ Te nchaa ñáiyu vâ cáncñicúⁿ nihnu ñaha xii-í cuendá sá yùhú-yu ndohó-yu dàtná ndoho-í ñáiyu-áⁿ ñà túú tàú-yu cundecu ndihí ñahá-yu xii-í. ³⁹ Te cue ñáiyu na yùhú cúú sá cuendá-í te ñáiyu-áⁿ cuíta nihnú-yu, dico nchaa ñáiyu vâ yùhú cúú sá cuendá-í, te ñáiyu-áⁿ nduu táhú-yu

cundecú-yu ni caa ni quihín
ndihi Yá Ndiöxí.

Cuendá sá ndúú tǎhú-ó
(Mr. 9:41)

40^o Te nchaa ñáyiú na quèheⁿ
cuendá ñáhá xii-ndo te cada
iní-yu sá tnàhá yúhú ní
queheⁿ cuendá-yu. Te nchaa
ñáyiú na quèheⁿ cuendá ñáhá
xii-í, te cada inú-yu sá tnàhá
Tátá-í Dútú Ndiöxí Yá ní
tendaha ñàhá xii-í véxi-í
ñuyíú-a ní queheⁿ cuendá-yu.

41 Te nchaa ñáyiú na quèheⁿ
cuendá ñá té cǎháⁿ tnúhu Yá
Ndiöxí cuendá sá quidé-dé
chíuⁿ-gá, te dàtná-ni càa
táhú cuǎñaha-gǎ nduu táhú
tèe ducaⁿ cǎháⁿ tnúhu-gá-áⁿ,
diu-ni ducaⁿ cùnduu táhú
cuǎñaha-gǎ nduu táhú ñáyiú
ducaⁿ na quèheⁿ cuendá ñáhá
xii-dé. Te nchaa ñáyiú na
quèheⁿ cuendá ñá té quide
váha cuendá sá dúcáⁿ quide
váha-dé, te dàtná-ni càa táhú
nduu táhú tǎe-áⁿ diu-ni ducaⁿ
cùnduu táhú nduu táhú ñáyiú
na quèheⁿ cuendá ñáhá xii-dé.

42 Te nchaa ñáyiú na cuǎñaha
ñá yaxiⁿ ndute coho ñá ñáyiú
cùu cuendá-í cuendá sá ñí
tuha ñàhá-yu xii-í cuéi ñá túú
cùnuu vihi-yu, te ñáyiú ducaⁿ
na cuǎñaha ndùte-áⁿ ñíhi-yu
sá ndúú tǎhú-yu núú Yá
Ndiöxí —cǎchí Jèsús xǎhaⁿ-gǎ
xii-güedé.

11

Jèsús cǎháⁿ ndihi-gá cue tée
xica cuu ndihi té Juàá
(Lc. 7:18-35)

1 Te sáta ñí yáha ducaⁿ ñí
xáhaⁿ Jèsús xii ndi ùxúú cue
tée xica cuu ndihi-gá, te ní

xica-gá cuáháⁿ-gá nchaa ñuú
cáá yàtni xiáⁿ dánèhé-gá ñáyiú
tnúhu-gá.

2 Te té Juàá yíhi-dé vecaá te
ní níhí-dé tnúhu nchaa nàcuáa
quide Xítóhó Jesucristú. Te
sáta dúcáⁿ te ní tendaha-dé ñá
úú cue tée xica cuu ndihi-dé
cuáháⁿ-güedé núú ndécú
Jèsús. 3 Te òré ní quexiò-güedé
núú ndécú-gǎ, te xicáⁿ
tnúhú-güedé núú-gǎ nàcuáa
ní xáhaⁿ tǎ Juàá xii-güedé, te
xǎhaⁿ-güedé xii-gá:

—Véxi-ndí xicáⁿ tnúhú-ndí
núú-n núu sá díú-n cùu-n
Cristú Yá ní tendaha
Yá Ndiöxí véxi ñuyíú-a,
àdi sá cùndetu nahi-ni-ndí
mei Yáá-áⁿ —cǎchí-güedé
xǎhaⁿ-güedé xii-gá.

4 Te Jèsús ní xáhaⁿ-gǎ
xii-güedé:

—Chí cuánùhú te cani-ndo
cuendú núú tǎ Juàá nchaa
sá ñí xini-ndó quide-í, ndihi
nchaa nàcuáa ndúu tnúhu ní
cǎháⁿ-í ní xindedóho-ndo. 5 Te
cúñaha-ndo xii-dé sá quidé
tátna-í núú cue ñáyiú cuáá,
te quide tátna-í cue ñáyiú
yacua, ndihi cue ñáyiú tnàhá
cuéhé sǎ dátèhyú nihnu-xi
yiqui cùñú-yu, ndihi cue
ñáyiú doho, nchaa ñáyiú-áⁿ
quidé tátna-í, te ndúha-yu,
te ndéé tnàhá cue ñáyiú sa
ní xihí dándòto-í cúñaha-ndo.
Te cúñaha tucu-ndo xii-dé
sá ndécuu-í dánèhé-í nchaa
ñáyiú ndàhú, tnúhu sá sánú
ìchi ñàhá xii-yu nàcuáa naníhí
táhú-yu. 6 Te cúñaha tucu-ndo
xii-dé sá ìo váha táhú nchaa
ñáyiú ñá túú quide sáá iní-xi
nchaa tnúhu cǎháⁿ-í, duha

cúñaha-ndo xii-dé —càchí-gá xãhaⁿ-gã xii-güedé.

7 Te sátá ní yáha-güedé cuánuhú-güedé te ní ngüíta Jësús ní cáháⁿ-gá núú ñáyiú cuendá té Juáá, te xãhaⁿ-gã xii-yu:

—Nchòhó ní sáháⁿ ndéhé-ndó ìⁿ té ndècu xití yucu, te téé-áⁿ ñá túú sàni ìⁿ sani úú iní-dé, chi ñá túú quide-dé dàtná quidé nchàa ité náhnú cuáháⁿ-xi duha cuáháⁿ-xi dàcáⁿ òré quéné tàchí. 8 Te ni ñá túú ní sáháⁿ ndéhé-ndó ìⁿ téé nihnu dóó vãha dóó vii càa. Te nchòhó xini-ndó sã ncháá ñáyiú nihnu dóó vãha dóó vii càa xindecú-yu vehe cue téé cùnūu yindaha ñáyiú. 9 Dico nchòhó chi ní sándéhé-ndó ìⁿ téé càháⁿ tnúhu Yá Ndiòxí, te ndáá sá díú ìⁿ téé càháⁿ tnúhu-gá cúú-dé, te cùnūu-gá-dé dàcúúxí dává-gá cue téé càháⁿ tnúhu-gá. 10 Te ñu cuendá té Juáá-áⁿ càháⁿ-xi núú tütú Yá Ndiòxí nàcuáa ní xãhaⁿ-gã xii Crístú, te duha ní xãhaⁿ-gã:

Tendaha-ì ìⁿ téé càháⁿ-dé tnúhu-í codonūu-dé núú-n, cuendá dàtúha-dé ñáyiú cuendá quíndáá iní-yu tnúhu-n. Duha ní xãhaⁿ-gã, te ducaⁿ ní ngódó tnùnì núú tütú-gá. 11 Te na càchí tnúhu ndáá-í xii-ndo sã ñi ìⁿ cue téé ñuyíú-a ñá túú cùnūu-güedé dàtná cùnūu té Juáá téé dàcuandute ñaha xii ñáyiú. Te nchaa ñáyiú sa ta ndíhu ndaha ñaha Yá Ndiòxí vitna cuáháⁿ cùnūu-gá-ni tucú-yu dàcúúxí

tě Juáá cuěi cùú-yu ñáyiú ñá túú cùnūu dàcúúxí dává-gá ñáyiú yindaha-gá.

12 'Te ndéé cútñahá ní ngüíta té Juáá téé dàcuandute ñaha xii ñáyiú càháⁿ-dé tnúhu Yá Ndiòxí ñuyíú-a, ndéé dává-áⁿ ní ngüíta ñáyiú cuení-yu sá ndíhu ndaha ñaha Yá Ndiòxí xii-yu te ndùcu ndeé-yu quidé-yu nàcuáa ndíhu ndaha ñaha-gá xii-yu.

13 Te nchaa cue téé ní xóo càháⁿ tnúhu Yá Ndiòxí ndéé sanaha ní càháⁿ-güedé sá díú-gã ndíhu ndaha-gã cue ñáyiú, te ñu-ni ducaⁿ ní càháⁿ tucu ndíi Moisés ní ngódó tnùnì núú tütú ndíi. Te ñu-ni ducaⁿ cùnūu nchaa tnúhu-áⁿ càháⁿ-xi nàcuáa ndíhu ndaha Yá Ndiòxí ñáyiú ndéé ní sáa nduú ní ngüíta té Juáá càháⁿ-dé tnúhu-gá ñuyíú-a. 14 Te na càchí tnúhu-í xii-ndo sã cadá cuendá-ndó, chi núú tütú Yá Ndiòxí càchí-xi sá ndíxí tẽ Èliás, te ñu núú tẽ Èliás-áⁿ ní quide té Juáá. 15 Te nchaa nchòhó ñáyiú ndedóho nchaa tnúhu càháⁿ-í-a te ío vãha chí cuaha cuendá.

16 'Te na càchí tnúhu tucu-í xii-ndo nàcuáa sãtnahá-xi cùu ñáyiú ndècu vitna. Chi ñáyiú-áⁿ cúú-yu dàtná cue landú sácóo núú yãhu dàdiqui-güexi te níhi càháⁿ-güexi, te xitñaha-güexi ndi mee landú-güexi: 17 "Ní tiú-ndí yaá ndíhi vïlu te ñá túú ní cuení-ndó càta-ndo. Te ío yica iní ní xita yuhu-ndí te ñá túú ní ndãhyú-ndó", càchí-güexi xitñaha-güexi. Te ducaⁿ sãtnahá-xi cùu ñáyiú ndècu vitna, 18 chi té Juáá

ío ndàhú ní xóo caxi-dé, te ni ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te sá dúcáⁿ ní xóo cada-dé te ní cachí-yu sá ní xíndecu ndihí-dé espíritú cúndihí yucu ñávãha. ¹⁹ Te sátá ní quexìo yúhú Tée cùu ñaní tnáhá-ndó nchàa-ndo, te xèxi-í xìhi-í quidè-í, te càchí-yu sá yúhú cùu-í ìⁿ tée xèxi vihi te xìhi vihi, te càchí tucú-yu sá cùu-í tée xìca cuu ndihí cue tée cuihna ìmí-xi quide cobrá ñáhá xì-yu cuendá impuèstú ndihí nchaa dava-gá cue tée ndècu ichi cuehé ichi duha, duha càchí-yu. Te ñáyiu ní tnahá tnúhu ndihí Yá Ndiòxí, ñáyiu-áⁿ quidè-yu sá vãha nàcuáa cutnùní sá méé-gã ío ndècu ndihí-gá sá xìní tnùní-gá —càchí-gá xãhaⁿ-gã xii-yu.

Cuendá ñáyiu dava ñúú ñá túú sàndáá iní tnúhu Xítoho Jesucristú

(Lc. 10:13-15)

²⁰ Te Jèsús ní ngüíta-gá càháⁿ-gá dóho nchaa ñáyiu ñúú núú ío-gá vài núú sã vã yõo tnàhí ndàcu cada ní quide-gá, chi nchaa ñáyiu ñúú-áⁿ ñà túú cuiní-yu ndixi túú iní-yu sá ñà túú quide váha-yu ndècú-yu, te xãhaⁿ-gã xii-yu:

²¹ —¡Ndàhú nchòhó cue ñáyiu ñúú Coràzín! ¡Te ndàhú nchòhó cue ñáyiu ñúú Bètsaidá! Chi núú dicó ñúú Tírú ndihí ñúú Sídón ní quide-í nchaa sá vã yõo tnàhí ndàcu cada datná ní quide-í ñúú-ndó-á ní xiní-ndó ñá, te sá ndéé ama-gá cuihnú-yu

dóo ndàhú te cunu cóo-yu núú yàá cuendá sá ndíxí cuèchi iní-yu sá ñà túú quide váha-yu ní cùu. ²² Dico sáá nduu te ío-gá dandòho ñaha Yá Ndiòxí xii-ndo dàcúúxí ñáyiu ñúú Tírú ndihí ñáyiu ñúú Sídón. ²³ Te nchòhó cue ñáyiu ñúú Capèrnaúm ío quide cahnu-ndo mee-ndo, te quide iní-ndó sã sà cuándaa-ná-ndó àndíu, dico ñáhá chi núú ùhú núú ndàhú nduu táhú-ndó cùndecu-ndo. Te núú dicó ñúú Sòdomá ní quide-í nchaa sá vã yõo tnàhí ndàcu cada datná ní quide-í ñúú-ndó ní xiní-ndó ñá, te ñáyiu-áⁿ vã náã-yu chi cundecu-ní-yu ndéé vitna ni cùu. ²⁴ Te na càchí tnúhu-í xii-ndo sã sáá nduu te ío-gá dandòho ñaha Yá Ndiòxí xii-ndo dàcúúxí ñáyiu ñúú Sòdomá —càchí-gá xãhaⁿ-gã xii nchaa ñáyiu ñúú-áⁿ.

Jèsús cuiní-gá sá túhá ñàha ñáyiu xii-gá

(Lc. 10:21-22)

²⁵ Te sátá xãⁿ te Jèsús ní ngüíta-gá càháⁿ ndihí-gá Tãtá-gã Dútú Ndiòxí, te xãhaⁿ-gã:

—Yòhó Tãtà-í Dútú Ndiòxí, ío chĩñuhu ñaha-í xii-n chi ðíu-n tàxi tnùní-n àndíu ndihí ñuyíú-a, te dānehé-n cuè ñáyiu nchaa tnúhu váha, te ðíu-ni ñáyiu-áⁿ cùú-yu ñáyiu ñá túú cùtnuní iní-xi nchaa tnúhu càháⁿ cue tée càchí sá ío túha, te nchaa tnúhu váha-áⁿ ñà túú dàtúu-n núú ñáyiu càchí sá ío túha te ío váha sáá díquí-xi. ²⁶ Chi ducaⁿ cuiní-n cùnduu —cachí-gá xãhaⁿ-gã xii Tãtá-gã.

²⁷ Te xãhaⁿ-gã xii nchaa ñáyiu xíndecu-áⁿ:

—Mee Tātà-í Dútú Ndiöxí ní cachí-gá sá cúnùu-í núu nchàandi túhú sá íó. Te vá yòo ìⁿ-gá xìní nàcuáa sàni iní yúhú Déhe Dútú Ndiöxí, chi ìⁿdií díí-ni mee-gá xìní-gá nàcuáa sàni iní-í, te mee-í xìní-í nàcuáa sàni iní mee-gá. Te nchaa ñáyiú cächí iní-í sá quíní-yu nàcuáa sàni iní Tātà-í Dútú Ndiöxí te xítñùhu-í-yu, te vá yòo ìⁿ-gá xìní chi diu-ni ñáyiú ducaⁿ xítñùhu-í-áⁿ xìní-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú nihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tñi-ndo nchaa tñuhu càháⁿ-í, te ío dacuàha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cundecu-ndo. ³⁰ Te tñi-ndo nchaa tñuhu càháⁿ-í chi ñá túú cùu-xi ìⁿ sá vèe, chi cada iní-ndó sá cúu-xi dàtná ìⁿ chùuⁿ ñamá — cächí-gá xàhaⁿ-gá xii-yu.

12

Cue tée xica cuu ndihi Jesús sahñú-güedé yoco triú nduu ndetátú ñáyiú

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetátú ñáyiú ñùhu Jesús ichi ndihi cue tée xica cuu ndihi-gá, te ta yàha-gá ndihi-güedé ìⁿ xichi núu cáa triú te xixíhí-güedé docó nùu xíáⁿ ní ngüíta-güedé sahñú-güedé yoco triú-áⁿ, te ndihi ndaha-güedé quíⁿ-güedé quéé triú-áⁿ tá

xèxi-güedé cuáháⁿ. ² Te cue tée cùu fariséu ní xini-güedé nàcuáa quide cue tée xica cuu ndihi Jesús, núu ní xàhaⁿ-güedé xii-gá:

—¿Ná cuendá ducaⁿ quide cue tée xica cuu ndihi-n sahñú-güedé yoco triú, te vitna cùu-xi nduu ndetátú-í? Te ñá túú tàu-güedé ducaⁿ càda-güedé —cächí-güedé xàhaⁿ-güedé xii-gá.

³ Te Jèsús ní xàhaⁿ-gá xii-güedé:

—¿Náa ñá túú dàcuaha-ndo núu tütú Yá Ndiöxí núu càháⁿ-xi nàcuáa ní quide ndíi Dàvíí cútñahá ní xíhí ndíi docó ndihi cue tée ní xica cuu ndihi ndíi-áⁿ? ⁴ Chi ndíi-áⁿ ñí quíhu ndíi vehe Yá Ndiöxí ní queheⁿ ndíi pàá ní cuu íí ndécú-áⁿ ñí xexi ndíi ndihi cue tée ní xica cuu ndihi ndíi, te ñá túú tàu ndíi sá dúcáⁿ càda ndíi ndihi cue tée-áⁿ ní cùu, chi mee-ni cué dútú tàu-güedé caxi-güedé pàa-áⁿ ní cùu.

⁵ ¿Te náa ñá túú xini-ndó nàcuáa càháⁿ-xi núu tütú ndíi Moisés sá ncháá cué dútú vá ndetátú-güedé nduu cùu-xi nduu ndetátú-áⁿ? Te ñá díú ìⁿ cuéchi cùu-xi sá dúcáⁿ ñá túú ndetátú-güedé nduu cùu-xi nduu ndetátú. ⁶ Te na cächí tñuhu-í xii-ndo sá yúhú cùu-í tée ío-gá cúnùu ndecu ndihi-ndo dacúxí venñúhu sá ío cúnuu. ⁷ Dico nchòhó chi ñá təcú tñuni-ndó nàcuáa càháⁿ Yá Ndiöxí núu tütú-gá núu cächí-xi: “Yúhú cuení-í sá cündàhú iní-ndó cué tñaha ñáyiú-ndo te ñá díú mèe-ni sá cáhni-ndó quiti nduu táhù-í”, duha cächí-gá núu tütú-gá. Te núu dicó nchòhó təcú

tnùní-ndó ñá, te vá càháⁿ cuèhé-ndó, cuèndá nchaa ñáyiú ñá túú ndècu cuèchi-xi. ⁸ Te yúhú Tée cùu ñaní tnáhá-ndó nchaa-ndo, tnáhá-í ndécú ndìhi-í tnúhu ndee ìní sá cùu-í nchaa ñáyiú nàcuáa cadá-yu nduu ndetátú-ó-á — càchí-gá xáhaⁿ-gá xii-güedé.

Ìnⁿ tée ní yíchí ìnⁿ xio ndaha-xi

(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuánguihu-gá xití ìnⁿ veñúhu. ¹⁰ Te xiáⁿ ndécú ìnⁿ tée ní yíchí ìnⁿ xio ndaha-dé. Te dawa cue tée xĩndecu-áⁿ ndúcú-güedé nàcuáa cada-güedé cacáⁿ cuèchi-güedé cuèndá-gá núú cuè tée cùnuu, te ní xicáⁿ tnúhú-güedé núú-gá, te xáhaⁿ-güedé:

—Cachí tnúhu xii-ndí nùu cuu cada tátna-o ìnⁿ tée cùhú nduu cùu-xi nduu ndetátú-ó-á ñá ñáhá —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Te nchòhó òré ná ngàunihnu ìnⁿ mbéé-ndó ìnⁿ déhvá cùnú te nàtava-ndo-di cuèi cùu-xi nduu ndetátú-ó. ¹² Te ìnⁿ ñáyiú ío-gá cùnúú-yu dàcúúxí ìnⁿ mbéé, núú xiáⁿ tàú-ó sá cadá-ó sá vǎha sá cúú-xi-yu cuèi cùu-xi nduu ndetátú-ó —càchí-gá xáhaⁿ-gá xii-güedé.

¹³ Te dàtnùní ní xáhaⁿ-gá xii tée cùhú ndaha-xi-áⁿ:

—Ndacani ndaha-n —càchí-gá xáhaⁿ-gá xii-dé.

Te tée-áⁿ nǐ ndacani-dé ndaha-dé, te òré-ni ní ndúha ní nduu-xi dàtná cáá ìngá

xio ndaha-dé. ¹⁴ Te cue tée cùu fariséú ní ndee-güedé xití veñúhu, te ní ngúíta-güedé ndátnúhu-güedé nùu nása cada-güedé cahni-güedé Jèsús.

Nàcuáa sa ndèé tnuni cuèndá Jèsús

¹⁵ Te sáta nǐ cutnùní ìní Jèsús nàcuáa cuìní-güedé cada ñaha-güedé xii-gá te ní xica-gá cuáháⁿ-gá, te ío vǎi ñáyiú nchìcúⁿ ñáhá xii-gá cuáháⁿ, te tnáhá cue ñáyiú cùhú nchìcúⁿ ñáhá xii-gá cuáháⁿ, te ní quide tátna-gá cue ñáyiú-áⁿ. ¹⁶ Te ní xáhaⁿ-gá xii-yu sá vǎ càháⁿ-yu yoo cùu-gá. ¹⁷ Te ducaⁿ nǐ cuu chi ní quee ndáá-xi nàcuáa ní xáhaⁿ Yǎ Ndiòxí xii ndí Chàíá tée ní xóo cáháⁿ tnúhu-gá ndéé sanaha nǐ chídó tnùní ndí núú tütú-gá, te duha nduu tnúhu ní xáhaⁿ-gá:

¹⁸ Tée-a cùu-dé tée ní sani ìní-í sá cùnú cuèchi-dé núú-í,

te ío cùu ìní-í-dé, te cùdíí ìní-í-dé.

Te yúhú cuáñaha-í Espiritú-í cundecu ndìhi-dé,

te ðiu-dé cùñaha-dé xii nchaa ñáyiú ñuyíú sǎ yúhú ío ndáá quide-í.

¹⁹ Te vá dácáá-dé tnúhu cáháⁿ-dé ndìhi ñáyiú, te ni vǎ cáná sàa-dé òré cáháⁿ-dé,

te ni vǎ yóo níhí tnúhu nása cáháⁿ-dé cuhúⁿ-dé ichi.

²⁰ Te ní ñà túú nǎ cada-dé cue ñáyiú cùu datná ìnⁿ tnu ndóó sá cuìní-xi tnáhnú, te ðiu-ni ñáyiú-áⁿ cúú tucú-yu dàtná ìnⁿ mèchá càndíl sá ío quène ñúhmá te cuìní-xi ndahvá.

Te ducaⁿ sãtnahá-xi cùu ñáyiu-áⁿ chi ñá túú nihí ndéě-yu cundecú-yu sá cúú-xi-í, te mee-ni sã vãha cada ñaha-dě xii-yu,

te ñiu-ni ducaⁿ càda-dé ndéé sáá nduu cùtnuní iní nchaa ñáyiu sá ïo ndáá quidé-dě.

21 Te nchaa ñáyiu nihí ñuyú ïo cundee cùu cahnu iní ñáhã-yu xii-dé.

Duha ní xáhaⁿ-gã xii ndí Chàíá ní chídó tnùní ndí núú tütú-gá.

Càchí-güedé sá ndécú ndíhi Jesús espíritú cündíhi yucu ñávãha
(Mr. 3:20-30; Lc. 11:14-23; 12:10)

22 Te ní quexìo ìⁿ úú cue tée núú ndécú Jèsús, te ndèca-güedé ìⁿ tée ñíhí te cuàá-dé, te yìhi ñaha espíritú cündíhi yucu ñávãha xii-dé, te Jèsús ní queñuhu-gá espíritú cündíhi yucu ñávãha yìhi ñaha xii-dé, te òré-ni-áⁿ ñí cuu ní nacáhãⁿ-dé te ní ndúha núú-dě. 23 Te nchaa ñáyiu xĩndecu-áⁿ ïo ní cuñúhu-yu sá dúcãⁿ ñí quide-gá, te ní xítñahá-yu:

—Vãa tée-a cùu-dé ñani tnáhã ndí Dãvíí tée tendaha Yã Ndiõxí quixi ñuyú-a — cãchí-yu xítñahá-yu.

24 Te cue tée cùu fariséú ní tecú dóho-güedé nãcuãa ndùu tnúhu xítñahá-yu, núu xíãⁿ ní xítñaha-güedé:

—Tée-a ndèñuhu-dé nchaa espíritú cündíhi sãcuíhnã yìhí ñaha xii ñáyiu, chi ñiu-ni sãcuíhnã-ãⁿ chĩndèe ñaha-xi xii-dé te ñiu-ni-xi tàxi tnuní-xi

nchaa espíritú-áⁿ —duha ní xítñaha-güedé.

25 Te Jèsús ní cutnùní iní-gá nãcuãa ndùu tnúhu ní xítñaha-güedé, núu ní xáhaⁿ-gã xii-güedé:

—Te nchòhó xìní-ndó sã núu ìⁿ tée yĩndaha ìⁿ naciõⁿ vá cúú ìⁿnuu-dé ndíhi cue tée cündíhi-dé, te vá cúdíi-dé cunuu-dě. Te ñiu-ni ducaⁿ sãtnahá tucu-xi cùu tucu cue tée cùchiuⁿ ìⁿ ñúú, chi núu vá cúú ìⁿnuu-güedé cundecu-güedé, te vá cúdíi-güedé cundecu-güedé taxi tnùní-güedé. Te ñiu-ni ducaⁿ sãtnahá tucu-xi cùu cue ñáyiu xĩndecu ìⁿ-ni vèhe, chi núu vá cúú ìⁿnuú-yu cundecú-yu te vá cúdíi-yu cundecu càhnú-yu. 26 Te núu sãcuíhnã ducaⁿ quide-xi queñuhu-xi cue espíritú cündíhi-xi yìhi ñaha xii ñáyiu ña, te ñá túú cùu ìⁿnuu-xi ndecu-xi te núu ducaⁿ, te vá cúdíi sãcuíhnã-ãⁿ cundecu-xi taxi tnùní-xi te núu ducaⁿ quide-xi. 27 Te duha càháⁿ-í chi nchòhó cãchí-ndó sã chĩndèe ñaha sãcuíhnã xii-í queñúhu-í

nchaa espíritú cündíhi-xi yìhi ñaha xii ñáyiu. Te núu yúhú quidé cuendã-ndó sã sãcuíhnã chĩndèe ñaha-xi xii-í, te xìni ñuhu-xi cada cuendã-ndó yòo chĩndee ñaha xii cue tée xica cuu ndíhi-ndo queñuhu-güedé nchaa espíritú cündíhi yucu ñávãha yìhi ñaha xii ñáyiu. Te mee-güedě cãchí-güedé sã nchòhó ñá túú càháⁿ ndáã-ndó sã dúcãⁿ càháⁿ-ndó. 28 Dico yúhú chi Espíritú Yã

Ndiöxí chindèe ñaha-xi xii-í queññu-u-í nchaa espíritú cùndìhi sácuhlá yíhí ñaha xii ñáyi, te sá dúcáⁿ chindee ñaha Espíritú-gá xii-í, xíáⁿ cútnùní sá sà ní sáá nduu cuíní-gá ndíhu ndaha ñaha-gá xii-ndo.

²⁹ 'Te nchòhó xìní-ndó sã cuè ñadúhú chi vá ndácú-güedé cuendá-ni quíhu-güedé duhu-güedé vehe ìⁿ téé ío ndee, chi díhna-gá xíní ññu-xi tñi-güedé téé-áⁿ dacùtu ñaha-güedé xii-dé dātnùní ducaⁿ te ndacu-güedé duhu-güedé nchaa sá ndécú ndìhi-dé.

³⁰ 'Te nchaa ñáyi ñá túú cùndìhi ñaha xii-í, te cùu úhú iní ñáhā-yu. Te nchaa ñáyi ñá túú chindee ñaha xii-í, te dàquee tíhū-yu chiⁿ quide-í.

³¹ 'Te na cāchí tñuhu-í xii-ndo sã nchāá ñáyi quide nchaa sá cuéhé sá dúhá cuu cada cāhu iní ñáhā Yā Ndiöxí xii-yu, te diu-ni ducaⁿ cùu cada cahnu iní-gá nchaa tñuhu cuéhé tñuhu duha cāhāⁿ-yu. Dico cue ñáyi na cāhāⁿ úhú cuendá Espíritú-gá, te ñáyi-áⁿ vā cadá cāhu iní ñáhā tñahí-gá xii-yu. ³² Te nchaa ñáyi na cāhāⁿ úhú cuendá yúhú Téé cùu ñani tñahā-yu nchāá-yu, te cuu cada cāhu iní ñáhā Yā Ndiöxí xii-yu. Dico cue ñáyi na cāhāⁿ úhú cuendá Espíritú-gá te vā cadá cāhu iní ñáhā tñahí-gá xii-yu cuèi vitna ndècu vívū-yu, te cuèi na cùu-yu.

Ndi dñíⁿ nūú yutnu xìní-ó nã yutnu cùu-xi cuendá sá

*sāvídí-xi
(Lc. 6:43-45)*

³³ 'Te nchòhó xìní-ndó sã ndì dñíⁿ nūú yutnu xìní-ó nã yutnu cùu-xi cuendá sá sāvídí-xi, te xìní-ó sã nchāá yutnu váha cùuⁿ mee-ni sāvídí váha, dico nchaa yutnu sá ñà túú váha te cùuⁿ mee-ni sāvídí sá ñà túú váha. Te duha cāhāⁿ-í cuendá cada cuendá váha-ndo nācuāa ndūu chiuⁿ quide-ndo ìⁿ ìⁿ-ndo cuendá ducaⁿ cùtnuní ná ñáyi cùu-ndo. ³⁴ Dico nchòhó cúu-ndó dātná ìⁿ cóó dēéⁿ chi ío cuihna iní-ndó, te vā cāní iní-ndó sã ndácú-ndó cāhāⁿ-ndó ìⁿ tñuhu váha, chi ío cuihna iní-ndó. Te nchòhó xìní-ndó sã nchāá ñáyi cāhāⁿ-yu nāni véxi iní-yu. ³⁵ Te nchaa ñáyi váha iní-xi cāhāⁿ-yu tñuhu váha, chi diu-ni tñuhu váha-áⁿ ññúhú iní-yu. Te nchaa ñáyi cuihna iní-xi cāhāⁿ-yu tñuhu cuéhé tñuhu duha, chi diu-ni tñuhu cuéhé tñuhu duha-áⁿ ññúhú iní-yu. ³⁶ Te na cāchí tñuhu-í xii-ndo sã nā sáá nduu cada ndāá Yā Ndiöxí cuéchi nchaa nchòhó ñáyi ndècu ñuyíú-a, te nchaa tñuhu cuéhé tñuhu duha cāhāⁿ-ndó cāhāⁿ-gá sá ñà túú ní quide váha-ndo sã dúcáⁿ ní cāhāⁿ-ndó tñuhu-áⁿ, ³⁷ Te nācuāa ndūu tñuhu ní cāhāⁿ-ndó ìⁿ ìⁿ-ndo, te ducaⁿ cāhāⁿ Yā Ndiöxí te nūu ndècu cuéchi-ndo àdi ñà túú ndècu cuéchi-ndo. Te nūu ñà túú cuéchi-ndo te cácu-ndo, dico nūu ndècu cuéchi-ndo te vā cácu-ndo —cāchí-gá xāhaⁿ-gá xii cue téé cùu fariséú-áⁿ.

*Cue téé cuini sá cadá Jèsús ìⁿ sá vā yōo tñahí ndācu cada
(Mr. 8:12; Lc. 11:29-32)*

38 Te cue tée cùu fariséú, ndihi cue tée dàcuaha ñaha xii ñáyiú nchaa tnúhu ní chídó tnùní ndíi Moisés xáhaⁿ-güedě xii Jèsús:

—Mèstrú, cuíní-ndí cada-n ìⁿ sá vǎ yõo tnàhí ndàcu cada cuendá ducaⁿ cùtnuní iní-ndí sá Yǎ Ndiõxí chindèe ñaha-gá xii-n —càchí-güedé xáhaⁿ-güedé xii-gá.

39 Te Jèsús ní xáhaⁿ-gǎ xii-güedé:

—Ñáyiú ndècu ichi cuehé ichi duha ñá túú cuíní-yu tníⁿ-yu tnúhu càháⁿ Yǎ Ndiõxí, te ñáyiú-áⁿ cuíní-yu cada-í ìⁿ sá vǎ yõo tnàhí ndàcu cada nacuaá cutnùní iní-yu núu ndáá sá Yǎ Ndiõxí chindèe ñaha-gá xii-í. Dico yúhú chí ñá túú nǎgá cada-í quiní-yu, chí sa ñihí-yu tnúhu nàcuáa ní yáha ndíi Jònás tée ní xóo càháⁿ tnúhu Yǎ Ndiõxí ndéé sanaha, te ñu-ñi ducaⁿ yáha yúhú tucu. 40 Chí ndíi Jònás-áⁿ ñí xúhuⁿ ndíi úní nduu úní niú xití ìⁿ chácá cáhnú vîhi nani ballená. Te ñu-ñi ducaⁿ yáha yúhú Téé cùu ñaní tnàhá-ndó nchàa-ndo, chí úní nduu úní niú cuhuⁿ-í xití ñuhu. 41 Te na sàá nduu càda ndáá Yǎ Ndiõxí cuéchi nchaa ñáyiú ndècu ñuyíú-a, te dàvá-áⁿ cachí nchaa ñáyiú ñuú Nínivé sá ñá túú ní quide ndáá nchaa ñáyiú ndècu vitna, te ducaⁿ càháⁿ-yu chí mèe-yu ní dáñǎ-yu ichi cuehé ichi duha cùtnàhá ní sáháⁿ ndíi Jònás ñuú-yu ní càháⁿ ndíi tnúhu Yǎ Ndiõxí núú-yu. Dico vitna iha ndècu ndihi ñaha-ndo xii yúhú, te ñu-í ío-gá cùnùu-í dàcúúxí

ndíi Jònás. 42 Te nduu càda ndáá Yǎ Ndiõxí cuéchi nchaa ñáyiú, te dàvá-áⁿ quiní-ndó ìⁿ ñadihí ñaha ní xindaha ìⁿ nacióⁿ cáá ndàa xio datni núú quené nchicanhii, te ñaha-áⁿ ío xica ní xindecu-aⁿ te ní sáháⁿ-aⁿ ní xindedóho-aⁿ nchaa tnúhu ní càháⁿ ndíi Salòmón, chí ndíi-áⁿ ío ní sáá sá xini tnùní ndíi. Te tnàhá ñaha-áⁿ càháⁿ-aⁿ sá ñá túú ní quide ndáá nchaa ñáyiú ndècu vitna. Dico vitna iha ndècu ndihi ñaha-ndo xii yúhú, te ñu-í ío-gá cùnùu-í dàcúúxí ndíi Salòmón.

Espiritú cùndíhi yucu ñávǎha sá nánchòcáva xito cùu uú

(Lc. 11:24-26)

43 "Te òré ná queé ñaha ìⁿ espíritú cùndíhi yucu ñávǎha xii ìⁿ ñáyiú, te cuáháⁿ-xi ndècu-xi ìⁿ xichi núú cùndècu-xi te ñá ñihí-xi te ní sani iní-xi: 44 "Váha-gá núhú tucu-í núú ñí xindecu-í", duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyiú-áⁿ dàtná cáá-nǎ ìⁿ vehe ní ñatíhú ní nduu vií-ná te vǎ yõo-gá ndécú. 45 Te sátá dúcáⁿ te ní xica-xi cuáháⁿ-xi cuándúcú-xi úsá tnàhá espíritú cùndíhi-xi sá nèhé víhí-gǎ xíquide. Te òré ní níhí-xi cue espíritú-áⁿ te ndèca ñaha-xi cuáháⁿ cuendá ngùndecu ndihi-xi ñáyiú-áⁿ. Te ñáyiú-áⁿ uuⁿ-gá nándi yáha-yu dàcúúxí ndéé díhna. Te ñu-ñi ducaⁿ sǎtnahá-xi yáha nchaa ñáyiú cuíhna iní-xi ndècu ñuyíú-a vitna —càchí-gá xáhaⁿ-gǎ xii-güedé.

Cue ñaní Jèsús ndihi náná-gǎ

(Mr. 3:31-35; Lc. 8:19-21)

46 Te càháⁿ dúcáⁿ-ní Jèsús ní quexìo náná-gǎ ndihi cue ñaní-gá cuìní-yu càháⁿ ndihi ñàhá-yu xii-gá, te ní ngúnu tñí-yu ndàa quehé vehe núú ndécú-gǎ. 47 Te ñí cue ñáyiú xĩndecu-áⁿ ñí xáháⁿ-yu xii-gá:

—Ní quexìo náná-n ndihi cue ñaní-n xĩnutñí-yu quehé, te cuìní-yu càháⁿ ndihi ñàhá-yu xii-n —càchí ñáyiú-áⁿ xáháⁿ-yu xii-gá.

48 Te ní xáhaⁿ-gǎ xii ñáyiú ducaⁿ xáháⁿ xii-gá-áⁿ:

—Te cachí tnúhu yóndi-gá ñáyiú cùu datná nǎnà-í ndihi dàtná cue ñaní-í —càchí-gá xáháⁿ-gǎ xii ñáyiú-áⁿ.

49 Te ní dánèhé ñàhá-gǎ nchaa cue téé xica cuu ndihi-gá, te ní xáhaⁿ-gǎ xii ñáyiú-áⁿ:

—Cue téé-a cùu-güedé dàtná nǎnà-í, ndihi dàtná cue ñaní-í. 50 Te nchaa ñáyiú na càda nchaa nacuáa càháⁿ Tàtá-í Dútú Ndiòxí Yaa ndécú àndiú, te ñáyiú-áⁿ cùu-yu dàtná nǎnà-í, ndihi dàtná cue ñaní-í, ndihi dàtná cue cùu-í —càchí-gá xáháⁿ-gǎ xii ñáyiú ducaⁿ ñí dáyáha tnúhu núú-gǎ-áⁿ.

13

Nacuáa quide téé cuángacáⁿ triú

(Mr. 4:1-9; Lc. 8:4-8)

1 Te diu-ni nduu-áⁿ ní quee Jèsús vehe núú ndécú-gǎ, te ní xica-gá cuáháⁿ-gá ní ngóo-gá yuhu làgúná. 2 Te ío cuéhé ñáyiú ní tacá núú ndécú-gǎ.

Te sá dúcáⁿ ío cuéhé ñáyiú núu ní quée-gá xití ñí bàrcú nútní xití ndute làgúná-áⁿ, te núú xáháⁿ ní ngóo-gá, te nchaa ñáyiú-áⁿ xixúcu-yu yuhu làgúná-áⁿ. 3 Te Jèsús ní ngúita-gá ní caní-gá titní cuèndú núu-yu nàcuáa tecú tnùní-yu nchaa nàcuáa ndùu tnúhu-gá, te xáháⁿ-gǎ xii-yu:

—Íⁿ téé cuángacáⁿ-dé triú, 4 te òré ní ngúita-dé dǎngoyo-dé triú-áⁿ, te dava ní quene ndava ní ngava ndéé ichi, te ní xini cue tílaá te ní nadatàcá-güedi. 5 Te dava ní ngava ñuhu yadi núú yíhí vñhi yúu, te ndíhi-ni ní xínu-xi chí ñá túú càvñhi ñuhu. 6 Dico òré ní nayahé te ñá túú ní cùndee iní-xi chí ní yíchí-xi, chí ñá túú ní ñíhí quíhíⁿ cùnú yóho-xi. 7 Te dava ní ngava núú yúcu ndíquíⁿ tnu ññu, te ññnuu-ni ñí xínu-xi ndíhi tnu ññu. Te tnu ññu-áⁿ ñí sahnu-xi te ní dánáá-xi nchaa triú sá ñí xínu-áⁿ. 8 Dico dava-gá triú ní ngava núú ndécú ññu cocoⁿ te xáháⁿ ío váha ní cuu, chí núú ññ-ní triú-áⁿ te dava yoco-xi ní ngúihí ócú úxí triú-xi, te dava yoco-xi ní ngúihí únídico triú-xi, te dava yoco-xi ní ngúihí ññ cièndú triú-xi. 9 Te vitna nchaa nchòhó ñáyiú ní xíndedóho tnúhu ní càháⁿ-í-a, te ío váha chí cuáha cuèndá —càchí-gá xáháⁿ-gǎ xii-yu.

Cue téé xica cuu ndihi Jesús ndécú tnúhu-güedé núú-gǎ ná cuèndá caní-gǎ cuèndú núú ñáyiú

(Mr. 4:10-12; Lc. 8:9-10)

10 Te cue tée xica cuu ndihí Jesús ní sáháⁿ-güedé ndéé núú-gă, te xăhaⁿ-güedě xii-gá:

—Ndücu tnúhu-ndí núú-n nũu ná cuendá ducaⁿ mēe-ni cuendú cání-n nũú ñăyiu —căchí-güedé xăhaⁿ-güedě xii-gá.

11 Te ní xăhaⁿ-gă xii-güedé:

—Nchòhó chi sa căchí tnúhu Yá Ndiöxí xii-ndo ìⁿ sá vătă quíní-gá-ndó, chi căchí tnúhu-gá năcuáa quide-gá ndíhu ndaha-gă ñăyiu, dico dava-gă ñăyiu chi ñá túú nă xăhaⁿ-gă xii-yu. 12 Te nchaa ñăyiu sa təcú tnùní te uuⁿ-gá cuita tecú tnùní-yu quíhíⁿ, te nchaa ñăyiu ñá túú təcú tnùní te uuⁿ-gá vá təcú tnùní-yu. 13 Te xíăⁿ nũu duha cání-í mee-ni cuendú núŷ-yu, chi cuěi na quíní-yu nchaa năcuáa cuu dico ni vă cútnùní iní-yu ná cuendá ducaⁿ cùu, te cuěi na cùndedóho-yu dico ni vă təcú tnùní-yu. 14 Te dıu cuendá ñăyiu-áⁿ nı xăhaⁿ Yá Ndiöxí xii ndí Chàíá tée ní xóo cáháⁿ tnúhu-gă ndéé sanaha nı chídó tnùní ndí núú tütú-gă núú căchí-xi:

Nchaa nchòhó cund-
edóho-ndo tnúhu
cáháⁿ-í, dico ni vă təcú
tnùní-ndó,

te cuěi na quíní-ndó nchaa
năcuáa cada-xi, dico ni
vă cútnùní iní-ndó nă
cuendá ducaⁿ quide-xi.

15 Te ducaⁿ chi cùu-ndo ñăyiu
ío sàá iní-xi,

te cùu-ndo ñăyiu ñá túú təcú
tnùní tnúhu cáháⁿ-í,

te cùu tucu-ndo datná cue
ñăyiu cuáá chi ñá

túú cuíní-ndó cãda
cuendá-ndó tnúhu-í,
te ni ñă túú cuíní-ndó
cùndedóho-ndo,

te ni ñă túú cuíní-ndó təcú
tnùní-ndó,

te ni ñă túú cuíní-ndó nãtuha
ñaha-ndo xii-í cuendá
cada cãhu iní-í nchaa
yíá cuěchi-ndo năcuáa
ío váha cuu iní-ndó
cùndecu-ndo.

Duha ní xăhaⁿ Yá Ndiöxí xii
ndí Chàíá ní chídó tnùní ndí
núú tütú-gă.

16 'Dico nchòhó chi ío váha
táhú-ndó chi cùtnuní iní-ndó
nchaa năcuáa quide-í, te
cùtnuní tucu iní-ndó nchaa
năcuáa ndũu tnúhu cáháⁿ-í.
17 Te na căchí tnúhu ndáá-í
xii-ndo sã ío vãi cue tée ní
xóo cáháⁿ tnúhu Yá Ndiöxí
ndéé sanaha ndihí nchaa
dava-gă ñăyiu váha iní-xi ní
cuíní-yu cundehé-yu nchaa
sá ndéhé-ndó vitna quide-í
dico ñá túú ní xiní-yu, te ní
cuíní tucu-yu cundedóho-yu
nchaa tnúhu ndedóho-ndo
vitna cáháⁿ-í te ñá túú ní
xíndedóho-yu.

*Jesús cáháⁿ-gă năcuáa
quěe-xi cuendá tée cuángacáⁿ
triú*

(Mr. 4:13-20; Lc. 8:11-15)

18 'Te vitna cundedóho
váha-ndo na căchí tnúhu-í
xii-ndo năcuáa quěe-xi
cuendú tée cuángacáⁿ triú
ní caní-í núú-ndó. 19 Te

triú sá nı quene ndava ní
ngava ndéé ichi, xíăⁿ cúú-xí
dãtná ñăyiu ní xíndedóho
tnúhu sá cáháⁿ năcuáa ndíhu
ndaha ñaha Yá Ndiöxí xii-yu,
dico ñá túú ní cuíní-yu
tní-yu, chi sácúíhná cuáháⁿ-xi
nãdatuhú-xi iní-yu cuendá sá

vã cáncñícúⁿ nihnú-yu nàcuáa càháⁿ tnúhu-áⁿ. ²⁰ Te triú sá nĩ ngava ñuhu yadi nũu yihí vihi yúú-áⁿ, xiáⁿ cúú-xí dàtná ñáyiú ní xíndedóho tnúhu Yá Ndiõxí te díí ìní ní tñí-yu tnúhu-gá, ²¹ dico òré ná ngũita ñáyiú cúcuèhé ñáhã-yu xii-yu àdi nándi-gá sá yãha-yu sá cuendá tnúhu-gá, te ñá cundèe iní-yu chi dañã-yu tnúhu-gá cuendá sá ñà túú nihí ndéé-yu. ²² Te triú sá nĩ ngava núú yúú ndíquíⁿ tnu iñu-áⁿ, xiáⁿ cúú-xí dàtná ñáyiú ní tecú dóho-xi tnúhu Yá Ndiõxí dico cuèé cuèé ní nacuanaá-yu tnúhu-gá, chi cuendá mee-ni sã ío ñuyúú-a ñuhu iní-yu, ndihí cuendá sã ío sàni iní-yu cuu cuicá-yu, te mee-ni nchàa xiáⁿ ñúhú iní-yu te ñà túú ñuhu iní-yu tnúhu sá nĩ xíndedóho-yu-áⁿ nàcuáa cada váha-yu cundecú-yu. ²³ Dico triú sá nĩ ngava núú ndécú ñuhu cocoⁿ-áⁿ, xiáⁿ cúú-xí dàtná ñáyiú ní xíndedóho tnúhu Yá Ndiõxí te quidè-yu nàcuáa càháⁿ tnúhu-gá. Te cada iní-ndó sã ñáyiú-áⁿ cúú-yu dàtná triú sá nĩ nguíhi yoco-xi ócò úxí triú-xi, ndihí triú sá nĩ nguíhi yoco-xi únídico triú-xi, ndihí triú sá nĩ nguíhi yoco-xi ñⁿ ciendú triú-xi. Ducaⁿ sãtnahá-xi cúú-yu chi ío váha quidè-yu —càchí-gá xãhaⁿ-gã xii-güedé.

Cuendá nchaa cùhú sã ñà túú vãha xñu xití triú

²⁴ Te Jèsús ní cani-gá ñⁿ cuendú núú ñáyiú nàcuáa tecú

tnùní-yu tnúhu-gá, te xãhaⁿ-gã xii-yu:

—Te vitna na càni-í ñⁿ cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiú. ñⁿ tée ío váha triú ní sacáⁿ-dé núú ñúhú-dé. ²⁵ Dico xití níú ní sáháⁿ ñⁿ tée cùu úhú ìní ñáhá xii-dé, te ní dǎngoyo-dé ndíquíⁿ yúú sã ñà túú vãha núú nĩ sacáⁿ-dé triú-áⁿ. ²⁶ Te òré vitna váha váha ní ngũita-xi quène yoco nchaa triú-áⁿ, te ní xínu coyo nchaa yúú sã ñà túú vãha-áⁿ. ²⁷ Te cue tée xínu cuechi núú tée ní sacáⁿ triú-áⁿ nĩ xitnũhu ñaha-güedé xii-dé sá dúcáⁿ nĩ xínu cùhú sã ñà túú vãha-áⁿ núú triú-dé, te xãhaⁿ-güedé: “Pàtróon, ¿nása ní cuu núu ní xínu cùhú sã ñà túú vãha núú triú-n, te ío váha càa triú ní sacáⁿ-n ní cùu?” cachi-güedé xãhaⁿ-güedé. ²⁸ Te tée cùu patróon-güedé-áⁿ nĩ xãhaⁿ-dè xii-güedé: “Ñⁿ tée cùu úhú ìní ñáhá nàhi xii-í ducaⁿ nĩ quide-dé ní sáháⁿ-dé ní dǎngoyo-dé ndíquíⁿ cùhú sã ñà túú vãha-áⁿ núú triú-í nũu ducaⁿ nĩ xínu coyo-xi”, càchí-dé xãhaⁿ-dè xii-güedé. Te cue tée xínu cuechi núú-dé ní xãhaⁿ-güedé xii-dé: “Te núu cuini-n te quíhíⁿ-ndí tnuhu-ndí nchaa cùhú sã ñà túú vãha ní xínu núú triú-n”, càchí-güedé xãhaⁿ-güedé xii-dé. ²⁹ Te tée cùu xitohó triú-áⁿ nĩ xãhaⁿ-dè xii cue tée xínu cuechi núú-dé-áⁿ: “Ñáhá, vá quíhíⁿ-ndó tñuhu-ndo, chi òré tñuhu-ndo te tñahá-ni triú quene chi càa vihi cùhú-áⁿ. ³⁰ Vãha-gá chí

dáñá ná cuìhnu nahi ndéé ná cùu triú, te dātnùnì nducuí cue téé quíhíⁿ-güedé tnuhu-güedé nchaa cùhú sã ñà túú vāha-án, te dacùtu nuhní-güedé te cahmí-güedé, te dātnùnì nàquehndé-güedé triú nacani-güedé te nataxúha-güedé xití yacá-í”, cāchí-dé xāhaⁿ-dē xii-güedé —duha ní cani Jèsús cuèndú núú-yu.

Cuèndá ndíquíⁿ yutnu nàni mostázá

(Mr: 4:30-32; Lc. 13:18-19)

³¹ Te Jèsús ní cani tucu-gá ingá cuèndú núú ñāyiu nācuáa tecú tnùnì-yu tnúhu-gá, te xāhaⁿ-gã xii-yu:

—Na cāni-í ìⁿ cuèndú núú-ndó nācuáa tecú tnùnì-ndó nācuáa cada-xi òré ndíhu ndaha ñàha Yá Ndiòxí xii ñāyiu. ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dē. ³² Te ndíquíⁿ yutnu-án ìo chàhu, dico òré ná xīnu-xi te sàhnu-gá-xi dàcúxí nchàa cùhú, te cue quitì ndàva núú tàchí cādūha-güedi tacá-güedi núú dité-xi — cāchí-gá xāhaⁿ-gã xii-yu.

Nācuáa quide levadurá

(Lc. 13:20-21)

³³ Te Jèsús ní xāhaⁿ tùcu-gá xii ñāyiu:

—Te na cāchí tnúhu tucu-í xii-ndo nācuáa cada-xi òré ndíhu ndaha ñàha Yá Ndiòxí xii ñāyiu. ìⁿ ñadìhí ní chihi-aⁿ levadurá únì arròbá yuchi triú, te levadurá-án ñí quide-xi ní ndaa nihí yusaⁿ-án —cāchí-gá xāhaⁿ-gã xii-yu.

Mee-ni cuèndú ní cani Jèsús núú ñāyiu

(Mr: 4:33-34)

³⁴ Te mee-ni cuèndú ní cani Jèsús núú ñāyiu ndi tnahá òré ní dánèhé ñāhá-gã xii-yu tnúhu-gá. ³⁵ Te ducaⁿ ñí quide-gá chi ní quee ndáa-xi nācuáa ní chídó tnùnì ìⁿ téé ní xóo cāháⁿ tnúhu Yá Ndiòxí ndéé sanaha núú tùtú-gá núú cāchí-xi:

Mee-ni cuèndú cani-í núú ñāyiu òré danèhé-í-yu tnúhu-í cuèndá tecú tnùnì-yu,

te nchaa tnúhu sá vātá yóo-gá cundedóho danèhé-í-yu, te nchaa tnúhu-án ndúú yùhu-xi ndéé cùtnàhá ní ngáva ñuyíú.

Duha ní chídó tnùnì téé-án núú tùtú-gá.

Jèsús cāháⁿ-gá nācuáa quèe-xi cuendá cùhú sã ñà túú vāha càa xití triú

³⁶ Te Jèsús ní dāndácá-gã ñāyiu te cuánuhú-gá vehe, te cue téé xica cuu ndìhi-gá ní xāhaⁿ-güedé xii-gá:

—Cāchí tnúhu xii-ndí nása quèe-xi cuendá cùhú sã ñà túú vāha càa xití triú —cāchí-güedé xāhaⁿ-güedé xii-gá.

³⁷ Te Jèsús ní xāhaⁿ-gã xii-güedé:

—Téé cāchí-í ñí sacáⁿ triú cāvāha-án cúú yùhú Téé cùu ñani tnahá-ndó nchàa-ndo.

³⁸ Te nchaa núú ñí sacáⁿ téé-án triú cúú-xí ñuyíú. Te tatá vāha-án cúú-xí cuè ñāyiu yìndaha ñaha Yá Ndiòxí. Te nchaa cùhú sã ñà túú vāha-án cúú-xí ñāyiu yìndaha

ñaha sácuihná. ³⁹ Te téé ní dǎngoyo ndiquíⁿ cǔhú sǎ ñà túú vǎha núú triú-áⁿ cúú-dě mee sácuihná. Te nduu nàtehndé-nǎ triú-áⁿ cúú-xí ndùu ndihí nihnu-ná nchaa sá ío ñuyíú-a. Te nchaa ñáyíu nàquehndé triú-áⁿ cúú-yu mee-ni cuè espíritú xínú cuèchi núú Yǎ Ndiǒxí. ⁴⁰ Te dàtná cada cue téé quíhíⁿ tnuhu nchaa cúhú sǎ ñà túú vǎha-áⁿ dacùtu nuhní-güedé te cahmi-güedé, ducaⁿ sǎtnahá-xi yáha nchaa ñáyíu cùndihí yucu ñávǎha na sǎá nduu. ⁴¹ Te yúhú Téé cùu ñaní tnáhá-ndó nchaa-ndo tendaha-í nchaa espíritú xínú cuèchi núú-í quíhíⁿ-xi nadatácá-xi nchaa ñáyíu sǎnu ichi cue tnaha ñáyíu-xi ichi cuèhé ichi duha, ndihí nchaa dǎva-gǎ ñáyíu ñá túú quíde váha, te nchaa ñáyíu-áⁿ xíndecú-yu nchaa núú ndécú cuè ñáyíu yíndaha-í. ⁴² Te cue espíritú-áⁿ daquíhíⁿ-xi cue ñáyíu-áⁿ núú ñùhú núú cǎyú, te yàcáⁿ ío ndáhyú-yu te dícó rúhñú-nǎ cuu núhu-yu sá sǎtú iní-yu sá ndóhǒ-yu. ⁴³ Te nchaa ñáyíu quíde nchaa nacuaá cuíní Tǎtǎ-yu Dútú Ndiǒxí, ñáyíu-áⁿ ío cunúu-yu cundecú-yu núú ndécú-gǎ táxí tnùn-í-gǎ, chí cuú-yu dàtná nchícanhíi dayèhé-yu cundecú-yu núú ndécú-gǎ. Te nchaa nchòhó ñáyíu ndédóho nchaa tnúhu càhán-í-a, te ío váha chí cuǎhǎ cuèndá — càhí-gǎ xǎhaⁿ-gǎ xii-güedé.

Cuèndá ñá sá ío ndèyáhu

⁴⁴ Te Jèsús xǎhaⁿ tùcu-gǎ xii-güedé:

—Na càni tucu-í ingá cuèndú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yǎ Ndiǒxí xii ñáyíu. ñáⁿ téé ní naníhí-dě ñáⁿ sá ío ndèyáhu yíndúxi ñáⁿ xichí, te ní nachindúxi tucu-dé dǎu-ni núú ní naníhí-dě-áⁿ, te ío ní cudǎⁿ iní-dé sá dúcáⁿ ní naníhí-dě xǎⁿ. Te ní xica-dé cuánuhú-dé te ní nadico-dé nchaa sá ndécú ndihí-dé, te ní nacuaaⁿ-dé ñuhu núú dúcáⁿ ní naníhí-dě xǎⁿ.

Cuèndá ñá sá ío ndèyáhu nàni pèrlá

⁴⁵ Te na càni tucu-í ingá cuèndú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yǎ Ndiǒxí xii ñáyíu. ñáⁿ téé quíde ndáhú ndúcú-dě sá nání pèrlá sá ío ndèyáhu. ⁴⁶ Te ní naníhí-dě ñáyíu ndècu ndihí ñáⁿ pèrlá sá ío-gǎ ndèyáhu, te ní xica-dé cuánuhú-dé te ní nadico-dé nchaa sá ndécú ndihí-dé, te ní sáhán-dé ní saaⁿ-dé pèrlá sá ío-gǎ ndèyáhu-áⁿ.

Cuèndá ñunu tní-güedé chácá

⁴⁷ Te na càni tucu-í ingá cuèndú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yǎ Ndiǒxí xii ñáyíu. Cue téé tní chácá ní dáquèe-güedé ñunu-güedé xití ndute lámár tní-güedé chácá, te dàcá nuu dàcá nihnu chácá cuǎnguee-güedi xití ñunu-áⁿ. ⁴⁸ Te òré ní cutnùn-í iní-güedé sá ní chítú ñunu-güedé, te ní natava-güedé ní nene yuhu lámár, te ní ngúíta-güedé nácǎxi-güedé nchaa chácá-ǎⁿ. Te nchaa

chácá vǎha dàquée-güedé-di xití tídihi, te nchaa chácá nèhé dǎngoyo-güedé-di. ⁴⁹ Te dàtná ní quide cue tée-áⁿ ducaⁿ càda cue espíritú xínú cuèchi núú Yǎ Ndiöxí ná sàá nduu vǎ cündècu-gá nchaa sá ló ñuyíú-a, chi cue espíritú-áⁿ daquée diⁿ-xi nchaa ñáyiu ní quide váha tnuú nchaa ñáyiu ñá túú ní quide váha. ⁵⁰ Te nchaa ñáyiu ñá túú ní quide váha-áⁿ daquihíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dicó rúhñú-nǎ cuu núhu-yu sá sàtú iní-yu cuèndá sá ndóhō-yu —càchí-gá xǎhaⁿ-gǎ xii cue tée xica cuu ndihi-gá.

Cuèndá cue tée ndècu ndihi sá ní quee túu díhna ndihi sá ní quee túu saa

⁵¹ Te Jèsús ní xicáⁿ tnúhú-gǎ núú-güedé, te xǎhaⁿ-gǎ xii-güedé:

—¿Ní tecú tnùnín-dó nàcuáa ndùu nchaa tnúhu ní cáháⁿ-í-ǎⁿ? —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Ní tecú tnùnín-dí —càchí-güedé xǎhaⁿ-güedé xii-gá.

⁵² Te ní xáhaⁿ tùcu Jèsús xii-güedé:

—Te núu ìⁿ tée dàcuaha ñaha xii ñáyiu nchaa tnúhu ní chídó tnùnín ndíi Moisés ná cùtnuní iní-dé nàcuáa quide Yá Ndiöxí ndíhu ndaha-gǎ ñáyiu, te tée-áⁿ cúú-dé dàtná ìⁿ tée cùu xítóhó vehe. Te tée cùu xítóhó vehe-áⁿ ní queñuhu-dé nchaa sá ní quee túu díhna ndècu ndihi-dé, ndihi nchaa sá ní quee túu saa. Te ducaⁿ

sǎtnahá-xi cùu tée-áⁿ te núu na cùtnuní iní-dé nàcuáa quide Yá Ndiöxí ndíhu ndaha-gǎ ñáyiu —càchí-gá xǎhaⁿ-gǎ xii-güedé.

Jèsús ndécú-gǎ ñuu núu ní sahnú-gá

(Mr. 6:1-6; Lc. 4:16-30)

⁵³ Te sàtá ní yáha ducaⁿ ní cani Jèsús cuèndú núú-güedé, te ní xica-gá cuánuhú-gá. ⁵⁴ Te ní ndexio-gá ñuu núu cúú ñùú-gá, te cuánguihu-gá xití veñúhu càa ñuu-áⁿ te ní ngüíta-gá dánèhé-gá ñáyiu. Te nchaa ñáyiu ndèdóho nchaa tnúhu càháⁿ-gá xicuñúhu-yu, te xitnàhá-yu:

—¿Nása ní cuu núu ío váha cùtnuní iní tée-a nàcuáa cunduu tnúhu cáháⁿ-dé, te quide-dé nchaa sá vǎ yōo tnàhí ndàcu cada-i? ⁵⁵ Te dicó déhe tée cùu carpinterú ndihi tá Màriá cúú-dé, te ñaní-dé cúú tē Jàcobó, ndihi té Chèé, ndihi té Ximú, ndihi té Jüdás.

⁵⁶ Te cue cúha-dé ndécú ndihi ñahá-yu xii-o ñùú-a. ¿Te nása ní quide-dé ñuu ndéé dàcáⁿ ío váha cùtnuní iní-dé nàcuáa cunduu tnúhu cáháⁿ-dé-i? —càchí-yu xitnàhá-yu.

⁵⁷ Te ñá túú ní cuíní-yu cáháⁿ ndihi váha-yu Jèsús, dico mee-gǎ ní xáhaⁿ-gǎ xií-yu:

—Te núu ìⁿ tée càháⁿ tnúhu Yá Ndiöxí ná nàsáá-dé ñuu-dé, te nchaa ñáyiu ñuu-dé-áⁿ ndihi nchaa ñáyiu cùu ndimee-dé ñá túú nèhé-yu sá yíñùhu núú-dé, dico cue ñáyiu nchaa dava-gá ñuu chi nèhé-yu sá yíñùhu núú-dé —càchí-gá xǎhaⁿ-gǎ xií-yu.

58 Te ñá túú ní quide Jesús titní núú sã vã yõo tnàhí ndàcu cada ñuú-áⁿ, chi ñá túú ní cuíní-yu quindáá iní ñáhã-yu xii-gá.

14

Nàcuáa ní cuu ní xihí té Juàá tée dàcuandute ñaha xii ñáyiu

(Mr. 6:14-29; Lc. 9:7-9)

1 Te diu-ni dàvã-áⁿ ñí níhí tẽ Hèrodés tnúhu nchaa nàcuáa quide Jesús, te té Hèrodés-áⁿ cúú-dẽ tée tàxi tnuní distritú Galileá. 2 Te ní xáhaⁿ-dẽ xii nchaa cue tée ndècu ndihi-dẽ: —Tée dii cuèndú-xi níhí-ó-áⁿ cùu-dé té Juàá tée dàcuandute ñaha xii ñáyiu, tée ní xihí ní cùu tẽ ní ndoto-dé núu dácáⁿ ndácú-dẽ quidé-dẽ nchaa sã vã yõo tnàhí ndàcu cada —cachí-dé xãhaⁿ-dẽ xii-güedẽ.

3 Te ducaⁿ ñí cáháⁿ té Hèrodés chi mee-dẽ ní táuchíúⁿ-dẽ ní tñi ñaha-güedẽ xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te ducaⁿ ñí quide té Hèrodés-áⁿ sã cuèndá ñaha nani Herodiás, ñaha ní cándeca ñaní-dé té Lipé, te ní naqueheⁿ ñaha-dẽ xii-aⁿ ndèca ñaha-dé. 4 Te té Juàá ní xáhaⁿ-dẽ xii té Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñaní-n —duha ní xáhaⁿ té Juàá xii té Hèrodés.

5 Te sã dúcãⁿ ñí xáhaⁿ tẽ Juàá-áⁿ xii té Hèrodés, te ní cuíní té Hèrodés-áⁿ cahni-dé té Juàá-áⁿ, dico ñá túú ní cùyi-dé chi ní yuhú-dé núú cuè ñáyiu, chi nchaá-yu ní cutnùní iní-yu sã tẽ Juàá cúú-dẽ ñí tée cáháⁿ tnúhu

Yá Ndióxi. 6 Te ñí nduu ní quide té Hèrodés vico vehe-dé ní quide càhnu-dé nduu ní cacu-dé. Te ndècu ñí déhe yoco ñaha nani Herodiás-áⁿ, te xíchí-ãⁿ ñí quihu-xi xití vehe núú cúú vico-áⁿ ñí xita saha-xi. Te núcóo té Hèrodés ndihi cue tée ní cáháⁿ-dé ndéhé-güedẽ, te ío ní cudíi iní-dé nàcuáa ní xita xíchí-ãⁿ. 7 Te té Hèrodés-áⁿ ñí cacunehe-dé ndéé Yá Ndióxi nàcuáa cutnùní iní xíchí-ãⁿ sã ndáá cuañaha-dẽ núu ná cúú sã ná càcãⁿ-xi núú-dẽ, 8 Te xíchí-ãⁿ ñí dácáhú iní ñáhã nãná-xi xii-xi ná cúú sã càcãⁿ-xi núú tẽ Hèrodés, núu xíãⁿ ní xáhaⁿ-xi xii-dé:

—Cuíní-í quehndé-n díquí tẽ Juàá tée dàcuandute ñaha xii ñáyiu te taxi-n, dico na cùhuⁿ ñí xití cóhó taxi-n —càchí-xi xãhaⁿ-xi xii-dé.

9 Te sã dúcãⁿ ñí xáhaⁿ-xi, te ní cundiýí té Hèrodés, dico ñá túú ní níhí-dẽ nása cada-dé, chi ndèdóho ñáyiu òré ní cacunehe-dé Yá Ndióxi sã ndáá cuañaha-dẽ ñí sã ná càcãⁿ-xi núú-dẽ. Te ní quide-dé nàcuáa ní xáhaⁿ-xi. 10 Chi ní táuchíúⁿ-dẽ ní sáhãⁿ cue tée ní xehndé-güedé díquí tẽ Juàá òré yihí-dẽ vecaá. 11 Te ní chihi-güedé díquí-dẽ ñí xití cóhó te nèhe-güedé cuánuhú ní sãñaha-güedẽ xii xíchí-ãⁿ, te xíchí-ãⁿ ñí nacuáñaha-xi xii náná-xi.

12 Te cue tée xica cuu ndihi té Juàá-áⁿ ñí sáhãⁿ-güedé ní naqueheⁿ-güedé yiqui cùnú-dé ní chindúxi-güedé, te dàtnùní ní sáhãⁿ-güedé ní xáhaⁿ-güedé xii Jèsús nàcuáa ní cuu.

*Jèsús dácàxi-gá úhúⁿ mĩl cue
tée te ðĩⁿ ñáyiu ðĩhĩ ndihĩ landú*
(Mr. 6:30-44; Lc. 9:10-17;
Jn. 6:1-14)

13 Te Jèsús ní níhĩ-gă tnúhu nàcuáa ní cuu ní xíhĩ té Juàá. Te sátá xǎⁿ te cuánguee-gá ìⁿ bàrcú cuáháⁿ-gá ìⁿ xichĩ núú ñà túú ñáyiu ndècu, dico nchaa ñáyiu xĩndecu nchaa ñúú cáa yàtni xíaⁿ nĩ níhĩ-yu tnúhu sá cuáháⁿ-gá, te ní queé-yu ñúú-yu xica sahá-yu cuáháⁿ núú quídě-yu cuendá quexio Jesús. 14 Te òré ní quexio Jesús núú cuáháⁿ-gá, te ní quene-gá bàrcú, te ní xiní-gá cuéhé víhĩ ñáyiu xǎxúcu-yu xíaⁿ, te ní cundàhú iní ñáhá-gă xii-yu, te ní quide tátna-gá nchaa ñáyiu cùhú ndihĩ-yu. 15 Te sátá nĩ cuaa te ní sáháⁿ cue tée xica cuu ndihĩ Jesús núú-gă, te xáhaⁿ-güedě xii-gá:

—Sa ní cuu dandàca-n nchaa ñáyiu-a chi sa ní cuaa, te na quihĩⁿ-yu nchaa ñúú cáa yàtni iha cuaáⁿ-yu sá cáxĩ-yu, chi núú ndécú-ó iha ñà túú tnàhĩ ná ió —càchĩ-güedě xáhaⁿ-güedě xii-gá.

16 Te Jèsús ní xáhaⁿ-gă xii-güedě:

—Ñáhá, vá dándàca-í-yu, váha-gá mee-ndo chĩ cuñaha sã ná càxĩ-yu —càchĩ-gá xáhaⁿ-gă xii-güedě.

17 Te ní xáhaⁿ-güedě xii-gá:

—Ñá túú năgá ndécú ndihĩ-ndĩ, chi úhúⁿ duha-ná pàá ndihĩ úú-nă chácá ndécú ndihĩ-ndĩ —càchi-güedě xáhaⁿ-güedě xii-gá.

18 Te Jèsús ní xáhaⁿ-gă xii-güedě:

—Chĩ cánèhe paá-án ndihĩ chácá-ăⁿ táquixi iha —cachĩ-gá xáhaⁿ-gă xii-güedě.

19 Te Jèsús ní xáhaⁿ-gă xii nchaa ñáyiu sá ná ngõo-yu nchaa-yu núú ité cuíi càa xíaⁿ, te ní queheⁿ-gá ndi ùhúⁿ pàá-án ndihĩ ndi ndùú chácá-ăⁿ te ní ndacoto-gá andiu, te ní ndacáⁿ táhú-gă núú Yă Ndiõxĩ, te dătnùni ní táhú cuèchi-gá pàá-án te ní sãñaha-gă xii cue tée xica cuu ndihĩ-gá ní dácãhũ-güedě cue ñáyiu ní xexĩ-yu. 20 Te nchaa-yu ní xexĩ-yu ní ndahá xitĩ-yu. Te sátá nĩ túhú cóhõ-yu te ní nadatàcá-güedě nchaa sá nĩ quendóo, te ní chítú ùxúú tnàhá tídihi mee-ni sã nĩ quendóo. 21 Te nchaa ñáyiu ní xexi-án nĩ xínu úhúⁿ mĩl mee-ni cuè tée chĩ mee-ni cuè tée-án nĩ quíúndehu, te ðĩⁿ cue ñáyiu ðĩhĩ ndihĩ cue landú.

Jèsús xicá-gă núú ndute
(Mr. 6:45-52; Jn. 6:16-21)

22 Te òré-ni-án nĩ xáhaⁿ Jèsús xii cue tée xica cuu ndihĩ-gá sá quèe-güedě bàrcú téhndé-güedě ndàa ingá xio yuhu làgúná, te mee-gă quendóo-gá cada ndee iní tnáhá-gă ndihĩ cue ñáyiu. 23 Te sátá nĩ yáha ní quide ndee iní tnáhá-gă ndihĩ cue ñáyiu, te medli-gá ní xica-gá cuásaá-gá ìⁿ tindúú cáa yàtni xíaⁿ cuendá cáháⁿ ndihĩ-gá Yă Ndiõxĩ, te ðiu-ni medli-gá ndécú xíaⁿ nĩ cundiquiⁿ. 24 Te bàrcú sá ñũhú cuè tée xica

cuu ndihi-gá-áⁿ sa cuáháⁿ-xi ndéé cuádava xití lágúná-áⁿ, te níhi víhi quene táchí ndàa ichi cuáháⁿ-xi, te dàcandau ndeé-xi ndute nchaa dìñi-xi. ²⁵ Te tàcuíhndá váhi-gá tá xica Jesús núú ndute cuáháⁿ tá cùyatni-gá bàrcú-áⁿ. ²⁶ Te cue téé xica cuu ndihi-gá ní xiní ñáhá-güedé xii-gá tá xica-gá núú ndute cuáháⁿ, te ní yuhú-güedé te níhi ní cáháⁿ-güedé te xítnàha-güedé: —¡Híⁿ àlmá! —càchí-güedé xítnàha-güedé.

²⁷ Te Jesús ní cáháⁿ-gá, te xàhaⁿ-gá xii-güedé:

—Ñíí cunduu-ndo vǎ yuhú-ndó, chi yuhú cùú-í —càchí-gá xàhaⁿ-gǎ xii-güedé.

²⁸ Te té Pèlú ní xàhaⁿ-dǎ xii-gá:

—Mèstrú, te núú diu-n te tauchiuⁿ sá tnáhá-í ná càca-í núú ndute quixi tnáhá ñáhà-í xii-n —càchí-dé xàhaⁿ-dǎ xii-gá.

²⁹ Te Jesús ní xàhaⁿ-gǎ xii-dé:

—Taquixi —cachí-gá xàhaⁿ-gǎ xii-dé.

Te té Pèlú ní nuu-dé núú bàrcú, te ní ngüita-dé tá xica-dé núú ndute cuáháⁿ cuátnahá ñáhá-dǎ xii-gá. ³⁰ Te ní cutnùní iní-dé sá ïo níhi xico táchí, te ní ngüita-dé yuhú-dé. Te òré-ni-áⁿ tá quëe naa-dé xití ndute cuáháⁿ ní cùu, te níhi ní cáháⁿ-dǎ xàhaⁿ-dǎ xii Jesús:

—¡Mèstrú, vá dáñá-n quëe naa-í xití ndute! —càchí-dé xàhaⁿ-dǎ xii-gá.

³¹ Te òré-ni-áⁿ ní tñii Jesús ndaha-dé, te ní xàhaⁿ-gǎ xii-dé:

—¿Ná cuèndá ñá túú sàndáá ndisa iní ñáhá-n xii-í sàni ñⁿ sàni úú iní-n-í? —càchí-gá xàhaⁿ-gǎ xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ ní ngüíñi táchí. ³³ Te cue téé ñùhu xití bàrcú-áⁿ ní ngüíñi xití-güedé núú-gǎ, te xàhaⁿ-güedé xii-gá:

—Sá ndáá sá cuítí sǎ díú yòhò cùú-n Dèhe Dútú Ndiòxi —càchí-güedé xàhaⁿ-güedé xii-gá.

Jèsús quidé tǎtna-gá ñáyiu cùhú ñⁿ xichi núú nání Gènesarét
(Mr. 6:53-56)

³⁴ Te ní quexìo Jesús ndihi cue téé xica cuu ndihi-gá ndàa ingá xio yuhu lágúná, te núú ní quexìo-gá ndihi-güedé-áⁿ nání-xí Gènesarét. ³⁵ Te nchaa ñáyiu xíndecu xiáⁿ ní cutnùní iní-yu sá díú-gǎ ní quexìo, te ní dátècú tnùhu-yu nchaa dava-gá ñáyiu xíndecu yatni xiáⁿ sǎ ní quexìo-gá. Te ndècá-yu nchaa ñáyiu cùhú ndécú ndíhi-yu cuáháⁿ núú ndécú Jesús. ³⁶ Te nchaa ñáyiu cùhú-áⁿ ní ngüita-yu càháⁿ ndàhú-yu núú Jesús sá ná dàña-gá tnándeé-yu cuèdicó luha yuhu dǎo-gǎ cuèndá ndúha-yu, te cue ñáyiu cùhú, ñáyiu ní tnándeé yuhu dǎo-gǎ ní ndúha-yu.

15

Cuèndá nchaa sá quidé-xi ngündecu cuéchi ñáyiu
(Mr. 7:1-23)

¹ Te sáta dúcáⁿ te ñⁿ úú cue téé cùu fariséú ní quee-güedé

ñuú Jerusalén, ndihi cue téé dâcuaha ñaha xii ñáyiú nchaa tnúhu ní chídó tnùní ndíi Moisés ní quexìo-güedé núú ndécú Jèsús, te xâhaⁿ-güedě xii-gá:

2 —¿Ná cuendá cue téé xica cuu ndihi-n ñá túú nâquete-güedé ndaha-güedé òré caxi-güedé nâcuáa ní cachí cue ñaní tnáhá-ó nĩ xindecu ndéé sanaha-i? — cächí-güedé xâhaⁿ-güedě xii-gá.

3 Te Jèsús ní xâhaⁿ-gã xii-güedé:

—Te nchòhó tucu, ¿ná cuendá ñá túú quide-ndo nâcuáa ní cachí Yã Ndiõxí cada-ndo, núú da nâcuáa ta quide cue téé ñuyíú-a quide-ndo-i? 4 Te Yã Ndiõxí cächí-gá núú tütú-gá: “Canehe-ndo sã yíñùhu núú tãtã-ndó ndíhi núú nãná-ndó”, cächí-gá. Te cächí tucu-gá ingá xichi núú tütú-gá: “Nchaa ñáyiú na càháⁿ úhú tãtã-xi àdi nãná-xi te cahni ñaha-güedě xií-yu”, duha cächí-gá núú tütú-gá.

5 Dico nchòhó cächí-ndó sã cué ñáyiú chi cuu cúñahá-yu xii tãtã-yu àdi nãná-yu: “Vá cúú chindee ñaha-ndí xii-n, chi sã táxi-ndí xii-n ni cùu, xiáⁿ ní nduu cuendá Yã Ndiõxí”, cuu duha cúñaha ñáyiú xii tãtã-yu àdi nãná-yu cächí-ndó. 6 Te cächí-ndó sã cué ñáyiú ducaⁿ na cúñaha xii tãtã-xi àdi nãná-xi te ñá túú-gã táu-yu chindéé-yu ni tãtã-yu ni nãná-yu. Te ducaⁿ quide-ndo chi ní dáquéé tñú-ndó nâcuáa ní cachí Yã Ndiõxí cada-ndo, te mee-ni nâcuáa

ta quide cue téé ñuyíú-a véxi nchícúⁿ nihnu-ndo quide-ndo. 7 ¡Te nchòhó cúú-ndó ñáyiú ío dândahú méé-xí, chi cächí-ndó sã quidé ndää-ndó te ñá ndää sã quidé ndää-ndó! Te ní quee ndää-xi nâcuáa ní chídó tnùní ndíi Chàíá téé ní xóo càháⁿ tnúhu Yã Ndiõxí ndéé sanaha núú tütú-gã núú càháⁿ-xi nâcuáa ní càháⁿ-gã cuendá-ndó, te duha ní cachí-gá:

8 Ñáyiú-a cächí-yu sã ío càhnu cuu-í dico dicó-ni yuhu càháⁿ-yu,

chi duuⁿ duuⁿ ñá túú ñùhu iní ñáhã-yu xii-í.

9 Te àúⁿ nã cuu chñùhu ñahá-yu xii-í chi ñá túú vèdana ndéé nándíhi-xi, chi cue ñáyiú-a dàcuahá-yu cue tnàha ñáyiú-yu nâcuáa cundecú-yu, dico mee-ni tnùhu sã ní cahu iní cue ñáyiú ñuyíú-a càháⁿ-yu.

Duha ní chídó tnùní ndíi Chàíá núú tütú Yã Ndiõxí nâcuáa ní càháⁿ-gã cuendá-ndó —cächí-gã xâhaⁿ-gã xii-güedé.

10 Te ní xâhaⁿ-gã xii cue ñáyiú:

—Chí táquixi ndehe iha, te cundedóho váha-ndo tnùhu na càháⁿ-í, te ío váha cuáha-ndo cuendá. 11 Nchaa sã xéxi-ndó chi ñá túú nã quidé-xí iní-ndó, dico nchaa sã cuéhé sã dúhá sãmi iní-ndó càháⁿ-ndó nchaa xiáⁿ quidé-xí ndècu cuéchi-ndo —cächí-gã xâhaⁿ-gã xií-yu.

12 Te cue téé xica cuu ndihi-gã ní sãháⁿ-güedé ndéé núú-gã, te xâhaⁿ-güedě xii-gá:

—Véxi-ndí cächí tnúhu-ndí xii-n sã cue tée cùu fariséú ñá túú cùu váha iní-güedé cuendá tnúhu ní cãháⁿ-n —cächí-güedé xãhaⁿ-güedé xii-gá.

13 Te ní xãhaⁿ-gã xii-güedé:

—Nchaa ñáyiú ñá túú cùu cuendá Tãtà-í Dútú Ndiõxí cuíta nihnú-yu, chi ñáyiú-áⁿ cùú-yu dàtná nchaa cùhú sã ñà túú nàndíhi te tnúhu ñáyiú.

14 Te vá cãdá cuendá-ndó nãcuáa cãháⁿ cue tée-áⁿ, chi cùu-güedé dàtná cue ñáyiú cuáá sãcuíta nehe tnàha. Te nchòhó xini-ndó sã núu ìⁿ ñáyiú cuáa ná cuíta nèhe tucú-yu ingá ñáyiú cuáa, te ndi ndúú-yu quée-yu déhvã —cächí-gã xãhaⁿ-gã xii-güedé.

15 Te té Pèlú ní xãhaⁿ-dẽ xii-gá:

—Cachí tnúhu xii-ndí nãcuáa quèe-xi tnúhu ní cãháⁿ-n-ãⁿ —cächí-dé xãhaⁿ-dẽ xii-gá.

16 Te Jèsús ní xãhaⁿ-gã:

—¿Nãa tnàhá nchòhó ñá túú ní tècú tnùní-ndó nãcuáa ndúu tnúhu ní cãháⁿ-í núú ñáyiú-ãⁿ ñã? 17 Nchaa sã xéxi-yu cuánguee-xi xití-yu, te dàtnùní náyãha ñaha-xi xii-yu. 18 Dico nchaa tnúhu cuèhé tnúhu duha cãháⁿ-yu xiãⁿ véxi quene-xi iní-yu, te diu nchaa xiãⁿ quidé-xi ndècu cuéchi-yu. 19 Te iní-yu-áⁿ cãcú nihnu nchaa sã cuèhé sã dúhá, chi sãni cuèhé sãní dùha iní-yu, te sãhní-yu tnàha ñáyiú-yu, te cue tée cãháⁿ ndihí-güedé ñáyiú dihí te ñá díú ñàdihí-güedé cùú-yu. Te diu-ni ducaⁿ quide cue ñáyiú dihí cãháⁿ ndihí-yu

cue tée te ñá díú yíi-yu cùu-güedé, te cuèi tée te cuèi ñàdihí mee-ni ìchi díi ìní cùdíi iní-yu cundecú-yu, te dùhu ndachiuⁿ tnahá-yu, te dàcuandehndé-yu, te cãháⁿ cuèhé-yu cuendá tnàha ñáyiú-yu. 20 Te nchaa xiãⁿ quidé-xi ndècu cuéchi-yu, dico ñá díú sã ñà túú ndàhá-yu dàtná ní cachí cue tée ndéé sanaha, chi xiãⁿ ñá túú quide-xi cuendá ngúndecu cuéchi-yu —cächí-gã xãhaⁿ-gã xii-güedé.

Ìⁿ ñàdihí ñaha cùu ñaní tnàhá ñáyiú canàneá ní sãndãã iní-aⁿ Jèsús

(Mr. 7:24-30)

21 Te Jèsús ní xica-gã cuahãⁿ-gã ní sãá-gã yucu cue tée ñuú Tirú, ndihí yucu cue tée ñuú Sidón. 22 Te ìⁿ ñàdihí ñaha cùu ñaní tnàhá ñáyiú canàneá ndécú yãtni-aⁿ xiãⁿ, te níhi ta cãháⁿ-aⁿ ní quexio núú ndécú Jèsús, te xãhaⁿ-aⁿ xii-gã:

—¡Mèstrú, ñaní tnàhá ndíi Dàvií, cundàhú iní ñáhã xii-í cada tátna-n dèhe yoco-í! Chi yíhi ñaha espíritú cùndíhi yucu ñávãha xii-xi te ío dãndohò ñaha-xi —cachí-aⁿ xãhaⁿ xii-gã.

23 Dico Jèsús ñá túú tnàhi ní cãháⁿ-gã, te cue tée xica cuu ndihí-gã ní sãháⁿ-güedé núú-gã, te xãhaⁿ-güedé xii-gã:

—Cũnãha xii ñaha-áⁿ ná nùhú-aⁿ, chi ío níhi cãháⁿ-aⁿ nchicúⁿ ñáhã-áⁿ xii-o —cachí-güedé xãhaⁿ-güedé xii-gã.

24 Te Jèsús ní xãhaⁿ-gã xii-güedé:

—Yá Ndiöxí ní tendaha ñàha-gá xii-í véxi-í mee-ni ñúú núú xĩndecu cue ñáyi israél, chi ñáyi-aⁿ cúu-yu dàtná cue mbéé cue quiti ní xíta, chi ta xíta nihnú-yu cuáháⁿ —càchí-gá xàhaⁿ-gá xii-güedé.

25 Te ñadihí-aⁿ nĩ sáháⁿ-aⁿ ndéé núú Jèsús ní ngüíñi xití-aⁿ, te xàhaⁿ-aⁿ xii-gá:

—¡Mèstrú, chindee ñàha xii-í! —càchí-aⁿ xàhaⁿ-aⁿ xii-gá.

26 Te Jèsús ní xáhaⁿ-gá xii-aⁿ:

—Vá cúú chindee-í cue ñáyi ñá túú cùu ñáyi israél, chi ñⁿ-ni cùu-xi núu na quèheⁿ-o paá cúú cuèndá cue landú te cuáha-o ìná caxi-di —càchí-gá xàhaⁿ-gá xii-aⁿ.

27 Dico ñàha-aⁿ nĩ xáhaⁿ-aⁿ xii-gá:

—Ndáá càháⁿ-n, dico cue ìná chi nàdatacá-güedi sá ngóyó yùhu cóhó xĩtohó-güedi —càchí-aⁿ xàhaⁿ-aⁿ xii-gá.

28 Te Jèsús ní xáhaⁿ-gá xii-aⁿ:

—¡Yòhó ñàha cùhú déhe-xi, ío váha sàndáá ìní ñáhá-n xii-í! Te na càda-í nàcuáa cuìní-n —càchí-gá xàhaⁿ-gá xii-aⁿ.

Te òré-ni-aⁿ nĩ ndúha déhe-aⁿ.

Jèsús quidé tãtna-gá vài ñáyi cùhú

29 Te sátá dúcáⁿ nĩ cuu te Jèsús ní xica-gá cuáháⁿ-gá ní yáha-gá yuhu làgúná distritú Galileá, te cuásaá-gá ñⁿ tindúú te xíaⁿ nĩ ngóo-gá. 30 Te xíaⁿ núcõo-gá ní quexìo cuéhé víhí ñáyi, te ndécá-yu ñáyi yacua, ndihí ñáyi ní yíchí ñⁿ xio ndaha-xi, ndihí ñáyi

cuáá, ndihí ñáyi ñihí, te vài dava-gá cue ñáyi cùhú tñáhá

dava-gá núú cuéhé ndécá-yu ní quexìo núú ndécú-gá. Te ní taxi ndecu ñáhá-yu núú Jèsús te ní quide tãtna ñàha-gá xii-yu te ní ndúha-yu. 31 Te nchaa ñáyi xĩndecu-aⁿ ñⁿ ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyi ñihí, ndihí cuèndá sá nĩ ndúha nchaa cue ñáyi yacua, ndihí cuèndá sá nĩ ndúha cue ñáyi ní yíchí ñⁿ xio ndaha-xi, ndihí cuèndá sá nĩ ndúha núú cuè ñáyi cuáá. Te ncháa-yu ní cachí-yu sá ñⁿ càhnu cuu Yá Ndiöxí Yaá cúú Ndiöxí cue ñáyi israél.

Jèsús dácàxi-gá cúmí mĩl cue téte te ñⁿ ñáyi ñihí ndihí landú (Mr. 8:1-10)

32 Te Jèsús ní cana-gá cue téte xica cuu ndihí-gá, te ní xáhaⁿ-gá xii-güedé:

—Yúhú cùndàhú ìní-í nchaa ñáyi-a, chi sa ní cuu ùní nduu ndecu ndihí ñáhá-yu xii-o ñⁿ, te ñá túú tñahí-gá sá caxi-yu, te ñá túú cuìní-í nãtendaha-í-yu núhú tñámã-yu vehé-yu, chi ná ndèè cuáháⁿ cunee-yu docó ichi —càchí-gá xáhaⁿ-gá xii-güedé.

33 Te ní xáhaⁿ-güedé xii-gá:

—¿Te ndèè níhí-ó sã cuãñàha-o càxi nchaa ñáyi-a, te ío cuéhẽ-yu te ñá túú ñá ío ñⁿ chi cùu-xi xití yucu-i? —càchí-güedé xáhaⁿ-güedé xii-gá.

34 Te Jèsús ní xicáⁿ tñuhú-gá núú-güedé, te xáhaⁿ-gá:

—¿Ná daha-gá paá ndécú ndihí-ndo-i? —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tñàhá pàá ndihi ìⁿ úú-gá chácá —càchí-güedé xàhaⁿ-güedé ññuyíú-a. ² Te Jèsús ní xáhaⁿ-gá xii-gá.

³⁵ Te Jèsús ní xáhaⁿ-gá xii nchaa ñáyiú sá ná ngóo-yu nchaaⁿ-yu, te ní ngóo-yu.

³⁶ Te ní queheⁿ-gá ndi úsá pàá-áⁿ ndi ìⁿ úú-gá chácá-áⁿ, te ní ndacáⁿ táhú-gá núú Yá Ndiöxí, te dátñuní ní táhú cuèchi-gá pàá-áⁿ ndihi chácá-áⁿ te ní sáñaha-gá xii cue téé xica cuu ndihi-gá ní dácãhñu-güedé nchaa ñáyiú-áⁿ.

³⁷ Te nchaaⁿ-yu ní xexí-yu ní ndahá xití-yu. Te sátá ñí túhú cóhó-yu te ní nadatácá-güedé nchaa sá ñí quendóo, te ní chítú úsá tñàhá tídihi mee-ni sá ñí quendóo-áⁿ. ³⁸ Te núú nchaa ñáyiú ní xexi te ní xínu cúmí míl mee-ni cuè téé chi ñu-ni cue téé-áⁿ ñí quiúndehu, te ñíⁿ cue ñáyiú ñíⁿ ndihi cue landú. ³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñuú Màgdalá.

16

Cue téé cùu fariséu ndihi cue téé cùu saducéu xáhaⁿ-güedé xii Jèsús cada-gá ìⁿ sá vã yõ tñàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséu ndihi cue téé cùu saducéu ní sáá-güedé núú ndécú Jèsús xító ndèé ñáhá-güedé xii-gá, te xáhaⁿ-güedé sá ná cádá-gá ìⁿ sá vã yõ tñàhí ndàcu cada cundehe-güedé nàcuáa cutñuní iní-güedé ñuú

ndáá sá Yá Ndiöxí ní tñàhá ñàha-gá xii-gá véxi-gá ññuyíú-a. ² Te Jèsús ní xáhaⁿ-gá xii-güedé:

—Nchòhó chi òré tá cuáa cuáháⁿ te ndàcoto-ndo andiú, te càchí-ndó: “Ío váha cada-xi tneé chi càa vícò tícuèhé andiú”, duha càchí-ndó. ³ Te òré dátneé ndàcoto tucu-ndo andiú, te càchí-ndó: “Vá cádá vãha-xi nduu vitna chi tícuèhé andiú, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sá quidé ndáá te ñá ndáá sá quidé ndáá-ndó! Te cutñuní iní-ndó nàcuáa quide-xi andiú, dico ñá túú cutñuní iní-ndó nàcuáa quèe-xi nchaa sá quidé Yá Ndiöxí vitna. ⁴ Dico nchaa nchòhó ñáyiú ndècu ññuyíú vitna ío cuihna iní-ndó, te ñá túú cuini-ndó càda ndáá-ndó núú Yá Ndiöxí, te cuini-ndó càda-í ìⁿ sá vã yõ tñàhí ndàcu cada dico ñá túú ñágá cada-í, chi ñu-ni nàcuáa ní quide Yá Ndiöxí ndí Jónás ñu-ni ducaⁿ càda tucu-gá vitna —càchí-gá xáhaⁿ-gá xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuendá cue téé cùu fariséu ndihi cuendá cue téé cùu saducéu

(Mr. 8:14-21)

⁵ Te òré ní quexio ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá ñí cunaa-güedé canehe-güedé pàá quihíⁿ caxi-güedé. ⁶ Te Jèsús ní cáháⁿ-gá dóho-güedé, te xáhaⁿ-gá xii-güedé:

—Yòhó cúú-n Crìstú Yaa ní tendaha Yá Ndiòxí véxi ñuyíú-a, te diu Yá Ndiòxí cúú-gã Yaa ndécú nchaa nduu nchaa quiú, te yòhó cúú-n Dêhe-gá —càchí-dé xáhaⁿ-dê xii-gá.

17 Te Jèsús ní xáhaⁿ-gã xii-dé:

—Yòhó té Xímú déhe té Jónás, ío váha táhú-n chi mee Tãtá-í Dútú Ndiòxí ní dácáhú ìní ñáhá-gã xii-n nàcuáa cunduu tnúhu cáháⁿ-n, te ñá díú ìíⁿ ñáyiú ñuyíú-a ducaⁿ ni dàcahu ìní ñáhã-yu xii-n tnúhu-áⁿ. 18 Te yúhú xáhaⁿ-í Pèlú xii-n, te tnúhu-áⁿ quée-xí yúú, chi quèe ndáá-xi nàcuáa nàni-n, chi cuu-n ìíⁿ téé vá cání ìíⁿ caní úú ìní-xi canu ichi-n cuè ñáyiú nàcuáa cundecu ndihi ñáhá-yu xii-í. Te nchaa ñáyiú cùu cuendá-í vá ndácú yùcu ñávãha dacuíta nihnu ñaha-xi xií-yu. 19 Te yúhú taxi-í tnúhu ndee ìní cundecu ndihi-n cuendá cunuu-n núú cuè ñáyiú yindaha ñaha Yá Ndiòxí, te nchaa sá ná càháⁿ-n sã cúú-xí sã vãha, te diu-ni ducaⁿ cáháⁿ Yá Ndiòxí, te nchaa sá ná càháⁿ-n sã ñà túú cùu-xi sã vãha, te diu-ni ducaⁿ cáháⁿ tucu-gá, chi quide-n nacuáa cuíni-gá —càchí-gá xáhaⁿ-gã xii-dé.

20 Te sátá dúcáⁿ te ní xáhaⁿ Jèsús xii cue téé xica cuu ndihi-gá sá vã yòo cúñaha-güedê sá díú-gã cúú-gã Crìstú Yaa ní tendaha Yá Ndiòxí véxi ñuyíú-a.

*Jèsús càháⁿ-gá sá cáhni ñaha-güedê xii-gá
(Mr. 8:31-9:1; Lc. 9:22-27)*

21 Te ndée dàvá-áⁿ ní ngüíta Jèsús xáhaⁿ-gã xii cue téé xica cuu ndihi-gá:

—Dacuítií sã quihíⁿ-í ñuu Jerusálén, te yàcáⁿ cue téé cùu sacuéhé núú ñáyiú israél, ndihi cue dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnúni ndíi Moisés, nchaa cue téé-áⁿ ío dandòho ñaha-güedê xii-í, te cahni ñaha-güedê, dico nduu úní sá cùú-í te ndoto-í —càchí-gá xáhaⁿ-gã xii-güedê.

22 Te té Pèlú ní cana-dé Jèsús ìíⁿ xio, te ní ngüíta-dé ténáá ñáhá-dê xii-gá, te xáhaⁿ-dê:

—¡Sá vã càchí Ndiòxí sá dúcáⁿ ndòho-n chi ñá túú taú-n sã dúcáⁿ ndòho-n! —cachí-dé xáhaⁿ-dê xii-gá.

23 Te ndaa sátá Jèsús nútñi té Pèlú òré ducaⁿ xáhaⁿ-dê xii-gá núu ní nchócuñhu-gá, te xáhaⁿ-gã xii-dé:

—¡Xocuíñí yòhó yucu ñávãha núú-í-a chi dicó quidé tñèñu-n! Chi ñá túú sàni ìní-ò dàtná sání ìní Yá Ndiòxí chi ìíⁿ-ní sàni ìní-ò ndihi dava-gá cue ñáyiú ndècu ñuyíú-a —càchí-gá xáhaⁿ-gã xii-dé.

24 Te sátá dúcáⁿ te ní xáhaⁿ-gã xii nchaa cue téé xica cuu ndihi-gá:

—Nchaa ñáyiú cuíni chit-nahá ñáhá xii-í, te xini ñuhu-xi dañá-yu vá cádá-gã-yu sá sání ìní méè-yu, te ío cada ndee ìní-yu cundecu túha-yu ndohó-yu cuendá-í, te cuèi na ndohó-yu dàtná ndoho-í.

25 Te nchaa ñáyiú cuíni sá ñà túú tñahí ná yáha cundecu ñuyíú-a cuíta nihnú-yu, dico nchaa ñáyiú ñá túú

tnàhí yùhú cuèi nándi sá ná yãha-yu cundecú-yu ñuyíú-a sá cuèndá-í, te ñáyiu-áⁿ naníhí tãhú-yu. ²⁶ Te cuèi nchaandi túhú sá ío ñuyíú-a na nihí ñáyiu cundecu ndihí-yu, dico núu ñu nchaa xiãⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xiãⁿ. Te ni ñⁿ sá ío ñuyíú-a vá chíndèe ñaha-xi xii-yu cuèndá naníhí tãhú-yu. ²⁷ Te ndáá quée-xí tñùhu càháⁿ-í, chi na quèxi tucu yùhú Tée cùu ñaní tñáhã-yu nchaa-yu, te dàvá-áⁿ quini-yu sá ío càhnu cuu-í dàtná càhnu cuu Tàtá-í Dútú Ndiòxí, te quixi-í ndihí cue espíritú xínú cuèchi núú-gã, te dàvá-áⁿ cuãha-í nchaa ñáyiu sá ndúú tãhù-yu nàcuáa ndùu sá ñí quidé-yu ñⁿ ñⁿ-yu. ²⁸ Te na càchí tñùhu ndáá-í xii-ndo sã ío dàva nchòhó ñáyiu ndècu iha vitna vá cùu-ni-ndo, chi cundecu-ni-ndo ndèe quini-ndó quèxi tucu yùhú Tée cùu ñaní tñáhã-ndó nchaa-ndo taxí tñuni-í nchaa ñáyiu — càchí-gã xãhaⁿ-gã xii-güedé.

17

Ní nadáma dóo Jèsús ndihí núú-gã

(Mr. 9:2-13; Lc. 9:28-36)

¹ Te núú ññu nduu sá dúcáⁿ ñí cáháⁿ Jèsús, te ní xica-gã cuásaá-gã ñⁿ yucu dùcúⁿ, te ndèca-gã té Pèlú, ndihí té Jàcobó, ndihí té Juáá ñaní té Jàcobó-áⁿ cuásaá. Te úní tñáhí-ñi cue tée-áⁿ ndécá-gã cuásaá. ² Te yucu-áⁿ ndécú-gã ní nadáma núú-gã

ndihí dóo-gã, te núú-gã súuní dàtásaⁿ-xi dàtná quidé-xí núú nchicanchii, te dóo-gã súuní ñí nduu cuixíⁿ dàtná cáá ññhú cuixíⁿ. ³ Te òré-ni-áⁿ ñí xiní-güedé ndí Moisés ndihí té Èliás nútñi-güedé ndihí-gã ndátnùhu ndihí ñaha-güedé xii-gã. ⁴ Te té Pèlú ní xãhaⁿ-dè xii Jèsús:

—Mèstrú, jváha ní cuu sá ndécú-ó iha vitna! Te núu cuini-n, te na dàcaa-ndí úní tñáhá vehe tñuvixiⁿ, te ñⁿ cuu cuèndá-n, te ñⁿ cuu cuèndá té Moisés, te ñⁿ cuu cuèndá té Èliás —càchí-dé xãhaⁿ-dè xii-gã.

⁵ Te ñini dùcaⁿ cáháⁿ té Pèlú ní quexio ñⁿ vícò núú ndécú-güedé ní dáðahu ñaha-xi xii-güedé te súuní chàhnchí. Te xití vícò-ãⁿ ñí tecú ní cáháⁿ Yã Ndiòxí, te xãhaⁿ-gã xii-güedé:

—Tée-a cùu-dé Déhe-í tée ío cùu iní-í, te ío cùdí iní-í-dé, te cundedóho-ndo nchaa tñùhu càháⁿ-dè —duha ní xãhaⁿ-gã xii-güedé.

⁶ Te sá dúcáⁿ ñí cáháⁿ Yã Ndiòxí ní tecú dóho cue tée xica cuu ndihí Jèsús te ío ní yùhú-güedé, te ní ngüñí xití-güedé te ní nuu núú-güedé ndaa núú ññhú. ⁷ Te Jèsús cuáhãⁿ-gã núú xñdecu cue tée xica cuu ndihí-gã, te ní tendaha ñaha-gã, te xãhaⁿ-gã xii-güedé:

—Chí ndacuíñí, vá yùhú-ndó —càchí-gã xãhaⁿ-gã xii-güedé.

⁸ Te òré ní ndanehe núú-güedé, te ñá túú-gã ní xiní-güedé cue tée úú-áⁿ chi mee-nã Jèsús. ⁹ Te òré cuánuu

ndihi ñaha Jèsús xii-güedé tindúú-ǎⁿ, te ní xáhaⁿ-gǎ xii-güedé:

—Vá yǎo cúñaha-ndo nì ìⁿ sá nǐ xini-ndó nǔú nì sáá-ó-á, te cuu cáháⁿ-ndó dico ndéé ná yǎha ndoto yúhú Tée cùu ñani tnáhá-ndó nchaa-ndo sá cùú-í —càchí-gǎ xáhaⁿ-gǎ xii-güedé.

10 Te cue tée xica cuu ndihi-gǎ ní xáhaⁿ-güedé xii-gǎ:

—Cuini-ndí cachí tnúhu-n ná cuendá cue tée dàcuaha ñaha xii ñáyiu nchaa tnúhu ní chídó tnúni ndí Moisés càchí-güedé sá dǐhna-gǎ té Èliás quixi, te dàtnùní quixi Yaá tendaha Yǎ Ndiǒxí quixi ñuyíú-a —càchí-güedé xáhaⁿ-güedé xii-gǎ.

11 Te Jèsús ní xáhaⁿ-gǎ xii-güedé:

—Ndáá sá códó nùu ìⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nàcuáa cùu.

12 Te na càchí tnúhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáyiu ñá túú ní cùtnuní iní-yu sá díú-dé, te ní quide ñahá-yu xii-dé nchaa nàcuáa ní quixi iní méě-yu, te diu-ni ducaⁿ cada ñaha tucú-yu xii yúhú Tée cùu ñani tnáhǎ-yu nchaa-yu, chi dandòho ñahá-yu xii-í —càchí-gǎ xáhaⁿ-gǎ xii-güedé.

13 Te cue tée xica cuu ndihi-gǎ ní cutnùní iní-güedé sá cuendá ndí Juáá tée ní xóo dacuàndute ñaha xii ñáyiu ní cáháⁿ-gǎ.

Jèsús quidé tǎtna-gǎ ìⁿ tée quechi tnáhá cuéhé xiyìhí
(Mr. 9:14-29; Lc. 9:37-43)

14 Te Jèsús ní nasáá-gǎ ndihi cue tée ní sáá ndihi-gǎ tindúú-ǎⁿ núú xǐndecu vai ñáyiu, te ní quexio ìⁿ tée núú-gǎ ní ngüíñí xítí-dé, te xáhaⁿ-dé xii-gǎ:

15 —Mèstrú, cundàhú iní déhe-í chi tnáhá-dé cuéhé xiyìhí, te ío dandòho ñaha-xi xii-dé, te ní cuu vai xito daquée ñaha-xi nǔú ñùhú xii-dé, te ní cuu vai tucu xito dangauñihu ñaha-xi ndute xii-dé. 16 Te sa ndèca-í-dé ní quixi núú cué tée xica cuu ndihi-n dico ñá túú ní ndàcu-güedé cada tǎtna ñaha-güedé xii-dé —càchí-dé xáhaⁿ-dé xii-gǎ.

17 Te Jèsús ní xáhaⁿ-gǎ xii nchaa ñáyiu xǐndecu-áⁿ:

—Nchaa nchòhó ñáyiu ndècu ñuyíú-a, ío sáá iní-ndó chi ñá túú cuini-ndó quindáá iní-ndó Yǎ Ndiǒxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gǎ cada-ndo-i? Te chí cándeca tée cùhú-áⁿ táquixi iha —cachí-gǎ xáhaⁿ-gǎ xii-yu.

18 Te Jèsús ní tenàa-gǎ espíritú cùndihi yucu ñávǎha yìhí ñaha xii tée-áⁿ, te ní quee ñaha-xi xii-dé, te òré-ni-áⁿ ní ndúha-dé.

19 Te sátá dúcáⁿ te òré ndécú mèe Jesús ndihi cue tée xica cuu ndihi-gǎ, te ní xicáⁿ tnúhú-güedé núú-gǎ, te xáhaⁿ-güedé xii-gǎ:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cùndihi yucu ñávǎha yìhí ñaha

xii tée-ǎⁿ —càchí-güedé xǎhaⁿ-güedé xii-gá.

20 Te Jèsús ní xáhaⁿ-gǎ xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yǎ Ndiöxí. Te na càchí tnúhu ndáá-í xii-ndo sǎ nùu nchòhó quíndáá ndisa iní-ndó Yǎ Ndiöxí cuèdicó luha líí dàtná líhli ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ tindúú xocuñí-xi núú ndécú-xí te xocuñí-xi. Te nchaa núú sǎ vǎha ndacu-ndo càda-ndo te núu na quíndáá iní ndisa-ndo Yǎ Ndiöxí.
21 Te xini ñuhu-xi sǎ ío cáháⁿ ndihi-ndo-gǎ te ñá túú tnàhí ná caxi-ndo cáháⁿ ndihi-ndo-gǎ, te ducaⁿ te ndacu-ndo quèñuhu-ndo espíritú cúndíhi yucu ñávǎha yìhi ñaha xii ñáyiú, dàtná cúú espíritú sǎ yíhí ñàha xii tée-ǎⁿ ní cùu —cachí-gá xǎhaⁿ-gǎ xii-güedé.

Jèsús càháⁿ tucu-gá sǎ cáhni ñàha-güedé xii-gá

(Mr. 9:30-32; Lc. 9:43-45)

22 Te nini xica cuu Jèsús ndihi cue tée xica cuu ndihi-gá distritú Galileá, te ní xáhaⁿ-gǎ xii-güedé:

—Yúhú Téé cùu ñani tnáhá-ndó nchàa-ndo sǎá ìⁿ nduu te cuáha cuèndá ñáhá-güedé xii-í núú cuè téé cùu úhú iní ñáhá, 23 te cahni ñaha-güedé xii-í dico nduu úní sǎ cùu-í te ndoto-í —càchí-gá xǎhaⁿ-gǎ xii-güedé.

Te sǎ dúcáⁿ ñí xáhaⁿ-gǎ xii-güedé, te ío ní ndíhú iní-güedé.

Díhúⁿ cuèndá veñúhu

24 Te òré ní quexio Jèsús ndihi cue téé xica cuu ndihi-gá ñuú Capèrnaúm, te cue téé quide cobrá díhúⁿ cuèndá veñúhu ní sáháⁿ-güedé ní cáháⁿ ndihi-güedé té Pèlú, te xǎhaⁿ-güedé:

—¿Chǎhu mèstrú-ndó úú díhúⁿ sǎ nání drǎcmá cuèndá veñúhu ǎⁿ ñáhá? —càchí-güedé xǎhaⁿ-güedé xii-dé.

25 Te té Pèlú ní xáhaⁿ-dè:
—Chǎhu-dé —càchí-dé xǎhaⁿ-dè xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáháⁿ-gá, te xǎhaⁿ-gǎ xii-dé:

—Xímú, ¿nása sàni iní-n, ná cúú ñáyiú quide cobrá ñáhá cuè téé yìndaha ñáyiú ndècu ñuyíú-a cuèndá nchaa sǎ ndúú yǎhu ñuú-güedé ndihi cuèndá nchaa díhúⁿ sǎ ngàùtnàha, cue ñáyiú ñuú-güedé ǎⁿ cuè ñáyiú véxi xica quide cobrá-güedé? —càchí-gá xǎhaⁿ-gǎ xii-dé.

26 Te té Pèlú ní xáhaⁿ-dè xii-gá:

—Cue ñáyiú véxi xica quide cobrá-güedé —càchí-dé xǎhaⁿ-dè xii-gá.

Te Jèsús ní xáhaⁿ-gǎ xii-dé:
—Te núu ducaⁿ te cue ñáyiú ñuú-güedé ñá túú nǎ chǎhu-yu te núu ducaⁿ.
27 Dico cuèndá sǎ vǎ yõ dasátú-ó iní-xi, te cuáháⁿ làgúná te dàquée-n sǎ tní-n chǎcá xití ndute, te chácá díhnanuu na tàva-n te cundehe-n yùhu-dí, chi yìhi ìⁿ díhúⁿ cuèxíⁿ. Te díhúⁿ-ǎⁿ canehe-n quíhíⁿ cháhu-n

cuendá-í ndihi cuendá-n, chi díhúⁿ-ǎⁿ sa tnahá queyǎhu cuendá-ó ndì ndúú-ó — cǎchí-gǎ xǎhaⁿ-gǎ xii-dé.

18

Cue tée ndücu tnúhu núu Jësús yoo ío-gá cúnüu

(Mr: 9:33-37; Lc: 9:46-48)

¹ Te sátá dúcáⁿ te cue tée xica cuu ndihi Jësús ní sáháⁿ-güedé núú-gǎ, te xǎhaⁿ-güedé xii-gǎ:

—Cachí tnúhu xii-ndí, yoo ío-gá cúnüu núu cuè ñáyiü yindaha ñaha Yá Ndiöxí —cǎchí-güedé xǎhaⁿ-güedé xii-gǎ.

² Te Jësús ní cana-gá ïⁿ té lïhli te ní sanutnii ñaha-gǎ xii-dé cuádava tnuú-güedé.

³ Te xǎhaⁿ-gǎ xii-güedé:

—Na cǎchí tnúhu ndáá-í xii-ndo sǎ nüü vá dáñá-ndó ncháa sǎ ñá túú vǎha quide-ndo, te nduu ndàhú iní-ndó datná ndàhú iní té lïhli-a, te vá ndúú tǎhú-ndó ndíhu ndaha ñaha Yá Ndiöxí xii-ndo. ⁴ Te ñáyiü quide datná quidé tē lïhli-a ndàhú iní-yu, te ñá túú quide cahnú-yu mēe-yu, ñáyiü-áⁿ ïo cunüü-yu núú ndécú Yá Ndiöxí táxí tnùnigǎ.

⁵ Te ncháa ñáyiü na queheⁿ cuendá ïⁿ landú datná té lïhli-a cuendá sǎ cúú iní ñáhǎ-yu xii-í ñá, te cada iní-yu sǎ yǎhú ní queheⁿ cuendá-yu —cǎchí-gǎ xǎhaⁿ-gǎ xii-güedé.

Quihi iní-ó vǎ cündecu-o ichi cuehé ichi duha
(Mr: 9:42-48; Lc: 17:1-2)

⁶ Te Jësús xǎhaⁿ tùcu-gǎ xii-güedé:

—Te núu ïⁿ té na dàcaháⁿ-dé cue ñáyiü sándáá iní ñáhǎ xì-í cadá-yu nándi sǎ cuèhé sǎ dúhá, te váha-gǎ sǎ ná dàcutu ndeé-güedé ïⁿ yúú yödó dücúⁿ-dē, te dàquēe ñaha-güedé xii-dé xití ndute lámár, te ñá díú sǎ cündecu-dé ducaⁿ càda-dé. ⁷ ¡Te ndàhú ní cuu ncháa ñáyiü xǎndecu ñuyíú-a, chi coo cue tée dacàháⁿ ñáhǎ xì-yu cadá-yu nándi sǎ cuèhé sǎ dúhá te dacuití sǎ dúcáⁿ càda-xi! ¡Dico ndàhú ní cuu cue tée ducaⁿ na dàcaháⁿ ñáhǎ xì-yu cadá-yu nándi sǎ cuèhé sǎ dúhá!

⁸ Te núu ïⁿ xio ndaha-ndo àdi ïⁿ xio sáhá-ndó quide-xi quide-ndo nándi sǎ cuèhé sǎ dúhá, te quehndé-ndó ná cuíta, chi váha-gǎ sǎ nánihí tǎhú-ndó cuēi na cuíta ïⁿ xio ndaha-ndo àdi ïⁿ xio sáhá-ndó, te ñá díú sǎ quihíⁿ-ndó nihii ní ndúú-ndó nüü ñühú núú càyú. ⁹ Te núu ïⁿ xio tinüu-ndo quide-xi quide-ndo nándi sǎ cuèhé sǎ dúhá, te tava-ndo na cuíta-xi, chi váha-gǎ sǎ nánihí tǎhú-ndó cuēi na cuíta ïⁿ xio tinüu-ndo, te ñá díú sǎ ndì ndúú xio núú-ndó quihíⁿ-ndó nüü ñühú núú càyú.

Cuendá ïⁿ mbéé quiti ní xita
(Lc: 15:3-7)

¹⁰ Te vá dáquēe tihú-ndó cuè ñáyiü cüu cuendá-í cuēi cüü-yu ñáyiü ío ndàhú iní-xi. Te na cǎchí tnúhu-í xii-ndo sǎ cuè espíritú xínú cuēchi núu Yá Ndiöxí, cue espíritú néhé cuendá ñáhǎ xì-yu ñuyíú-a,

nchaa-ni nduu nchaa-ni òré ndécú-xí núú Tàtá-í Dútú Ndiòxí Yaá ndécú àndiú. ¹¹ Te ducaⁿ chi yúhú Tée cùu ñani tnáhá-ndó nchàa-ndo véxi-í ñuyíú-a dàcácu nihnu-í ñáyiú núú ùhú núú ndàhú, ñáyiú ta xíta nihnu cuáháⁿ.

¹² '¿Te nása sàni iní-ndó cuèndá ìⁿ tée ndècu ìⁿ ciendú mbéé-xi?, chi núú na cuíta ìⁿ-di te dàndóo-dé cúmídíco sáhúⁿ cúmí-di cundecu-di ìⁿ yucu te quihíⁿ-dé cúnúndúcú-dě quiti ní xíta-áⁿ. ¹³ Te núú na nàníhí-dě-di, te nchòhó sa cùtnuní iní-ndó sã ìo-gá cudí^í iní-dé cuèndá quiti ní xíta-áⁿ òré naníhí-dě-di dàcúúxí cúmídíco sáhúⁿ cúmí quiti ñá túú ní xíta-áⁿ. ¹⁴ Te ducaⁿ sãtnahá-xi quide Tátá-ó Dútú Ndiòxí Yaá ndécú àndiú, chi cuíní-gá sá vã cuíta ni ìⁿ cue ñáyiú cùu cuèndá-gá.

Cada càhnu iní-ó sã quidé ñàha tnaha ñáyiú-o

(Lc. 17:3)

¹⁵ 'Te núú ìⁿ ñáyiú ndècu ndihi-ndo ní quidé-yu ìⁿ sá ñà túú tàú-yu cadá-yu sá cúú-xí-ndó, te cáháⁿ-ndó dõho-yu núú méé núú ìⁿ-ndó ndihí-yu cuèndá sá ná ndixi cuéchi iní-yu sá ñà túú quide váha-yu. Te núú ní tñí-yu tnúhu ní xáhaⁿ-ndo xii-yu, te ní ndacu-ndo ñi nacanu ichi-ndõ-yu. ¹⁶ Te núú ñá túú ní cuíní-yu tñí-yu tnúhu xãhaⁿ-ndo xii-yu, te nducu-ndo ìⁿ àdi úú tnáhá cue tée canehe núú-güedé cuèndá cundedóho-güedé nãcuáa ndùu tnúhu ndàtnúhu-ndo

ndihí-yu. ¹⁷ Te tnáhá cue tée-áⁿ cãháⁿ-güedé dóho-yu, dico núú ni tnúhu cáháⁿ cue tée-áⁿ ñà túú ní cuíní-yu tñí-yu, te dàtúu-ndo núú dàva-gá ñáyiú ndècu ndihi-ndo ichi Xítóhó Jesucristú cuèndá cutnùní iní-yu nãcuáa quide ñáyiú-áⁿ. Te núú ñáyiú ndècuéchi-áⁿ ñà túú ní cuíní-yu tñí-yu tnúhu sá ñi xáhaⁿ dàva-gá cue ñáyiú ndècu ichi-gá, te cada-ná iní-ndó sã cúú-yu ñáyiú ñà túú ndècu ichi Yá Ndiòxí dàtná cue tée cuihna iní-xi quide cobrá ñáhá xii ñáyiú cuèndá impuèstú.

¹⁸ 'Te na càchí tnúhu ndáá-í xii-ndo sã núu nchòhó ná càchí-ndó sã ndécú cuéchi ñáyiú, te diu-ni ducaⁿ cãháⁿ Yá Ndiòxí, àdi cachí-ndó sã ñà túú cuéchi-yu te diu-ni ducaⁿ cãháⁿ tucu-gá, te ducaⁿ chi nchòhó quidé-ndó nãcuáa cáháⁿ-gá.

¹⁹ 'Te na càchí tnúhu-í xii-ndo sã núu úú tnáhá-ndó cùu ìⁿnuu-ndo cáháⁿ ndihi-ndo Tàtá-í Dútú Ndiòxí Yaá ndécú àndiú xicáⁿ-ndó núú-gã núu ná cúú sã cuíní-ndó, te taxi-gá núu ná cúú sã xicáⁿ-ndó núú-gã. ²⁰ Te núu úú tnáhá-ndó àdi úní tnáhá-ndó ñi natacá-ndó ìⁿ xichi cuèndá sá ñúhú iní ñáhá-ndó xii-í, te xiáⁿ ndécú ndihi ñaha-í xii-ndo — càchí-gá xáhaⁿ-gã xii-güedé.

²¹ Te té Pèlú ní sáháⁿ ndehe yatni-dé núú Jèsús, te xãhaⁿ-dẽ xii-gá:

—Mèstrú, cachí tnúhu xii-í ná daha xito cada càhnu iní-í tnàha ñáyiú-í te núu ìⁿ sá ná càda ñahá-yu xii-í.

¿Cuèdicó úsá xito-ǎn? —
càchí-dé xǎhaⁿ-dě xii-gá.

22 Te Jèsús ní xáhaⁿ-gǎ
xii-dé:

—Yúhú càchí-í sá ñà díú-ní
úsá xito cada càhnu iní-n-yu,
chí únídico úxí xito ndihí úsá
ndihí úsá xito cada càhnu
iní-n-yu —càchí-gá xǎhaⁿ-gǎ
xii-dé.

*Cuèndá téé ñá túú quide
càhnu iní tnàha ñáyíu-xi*

23 Te xǎhaⁿ tùcu-gá
xii-güedé:

—Na càni-í ìⁿ cuèndú
núú-ndó nàcuáa tecú
tnùní-ndó nàcuáa cada-xi òré
ndihú ndaha ñàha Yá Ndiòxí
xii ñáyíu. ìⁿ téé yìndaha ñaha
xii ñáyíu ní sani iní-dé sá
cádá ndǎá-dé ndihí cue téé
xìnu cuechi núú-dě cuèndá
nchaa sá tàú-güedé núú-dě.

24 Te òré sa ní ngúndecu
túha-dé te ní quexìo ìⁿ téé
xìnu cuechi núú-dě. Te
téé-án tàú-dé cuéhé víhí díhúⁿ
núú-dě, chí tàú-dé úxí mìl
díhúⁿ sá nání tàlentú. 25 Te téé
xìnu cuechi-án ñà túú díhúⁿ
ndécú ndihí-dé nacháhu-dé sá
tàú-dé núú pàtróoⁿ-dě-án, núú
xǎⁿ ní táuchíúⁿ téé cùu pa-
tróoⁿ-dě-án dico ñàha-güedé
xii-dé ndihí ñadìhí-dé ndihí
cue déhe-dé ndihí nchaa
sá ndécú ndihí-dé cuèndá
nchaa-yu cuú-yu ñáyíu ñà
túú tnàhí dàñá quee núú
chíúⁿ pàtróoⁿ-xi, te ducaⁿ
te ndéyǎhu sá tàú-dé núú
pàtróoⁿ-dě. 26 Te téé xìnu

cuechi-án ñì ngüíñí xítí-dě
núú pàtróoⁿ-dě, te xǎhaⁿ-dě:
“Pàtróoⁿ, càháⁿ ndàhú-í núú-n
sǎ ìo ndee ìo càhnu cada
iní-n sǎ dúhá tàú-í núú-n,
te ñà túú nǎ caní iní-n chí

nacháhu-í nchaa sá tàú-í
núú-n”, càchí-dé xǎhaⁿ-dě
xii pàtróoⁿ-dě. 27 Te téé cùu
pàtróoⁿ-dě-án ñì cundàhú iní
ñàhá-dě xii-dé, te ní quide
càhnu iní ñàhá-dě, te ní dàñá
ñàha-dé cuánuhú-dé. 28 Te téé
xìnu cuechi-án ñì naníhí-dé
ìⁿ téé xìnu cuechi ndihí-dé
ichi cuánuhú-dé, te téé ní
naníhí-dě-án tàú-dé sacú-ni
díhúⁿ núú-dě chí ìⁿ cièndú-ni
díhúⁿ denàriú tàú-dé. Te
ní tnì-dé téé tàú núú-dě-án
dàcuèhné ñàhá-dě xii-dé, te
xǎhaⁿ-dě: “Nacháhu sá tàú-n
núú-í”, càchí-dé xǎhaⁿ-dě.

29 Te téé tàú-án ñì ngüíñí
xítí-dě núú téé díi núú-xi
tàú-dě-án, te xǎhaⁿ-dě: “Càháⁿ
ndàhú-í núú-n sǎ cádá càhnu
iní ñàhá-n xii-í sá tàú-í núú-n,
te nacháhu cuèé-í nchaa
sá tàú-í núú-n”, càchí-dé
xǎhaⁿ-dě. 30 Dico téé díi
núú-xi tàú-dě-án ñà túú ní
cuìni-dé cada ndee iní-dé cun-
detu-dé nacháhu cuèé téé-án
sǎ tàú-dé, chí ní chíhí ñaha-dě
vecaá cuèndá yacáⁿ quíhí-dé
ndéé nacháhu-dé nchaa sá
tàú-dé. 31 Te dava-gá cue

téé xìnu cuechi ní xini-güedé
nàcuáa ní quide téé-án, te ní
cudééⁿ-güedé núú-dě, te ní
sáháⁿ-güedé ní xítñùhu-güedé
téé cùu pàtróoⁿ-güedé sá
dúcáⁿ ñì quide-dé. 32 Te
téé cùu pàtróoⁿ-güedé-án ñì
cana-dé téé ducaⁿ ñì quide-án,
te ní xǎhaⁿ-dě: “Yòhó cúú-n
ìⁿ téé ìo cuìhna ìní-xi xìnu
cuechi núú-í, chí yúhú ní
quide càhnu iní ñàhá-í xii-n
cuèndá nchaa sá tàú-n núú-í
òré ní càháⁿ ndàhú-n. 33 Te
tnàhá yòhó tàú-n dùcaⁿ
cada-n cada càhnu iní-n téé
xìnu cuechi ndihí-n núú-í
cuèndá nchaa sá tàú-dé

núu-n dàtná ní quide ñaha-ĩ xii-n ñi quide càhnu iní-í cuendá nchaa sá tau-n”, càchí tée cùu patrón-án xăhaⁿ-dë xii tée ducaⁿ ñi quide-án.
 34 Te tée cùu patrón-án ñi cudéⁿ víhí-dë sá dúcán ñi quide tée-án, te ní táuchíuⁿ-dë dandòho ñaha-güedé xii-dé ndéé nacháhu-dé nchaa sá tau-dé —duha ní cani Jèsús cuendú núu-güedë.

35 Te xăhaⁿ tùcu-gá xii-güedé:

—Dàtná ní quide tée cùu patrón-án ñi dándóhó-dë tée tau núu-dë-án ducaⁿ càda ñaha Tàtá-í Dútú Ndiòxí Yaá ndécú àndiu xii-ndo, te núu vá ní yùhu ñi iní-ndó càda cahnu iní-ndó sá quidé ñàha tnaha ñáyiu-ndo xii-ndo —cachí-gá xăhaⁿ-gă xii-güedé.

19

Jèsús càháⁿ-gá cuendá cue ñáyiu dàña tnaha

(Mr. 10:1-12; Lc. 16:18)

1 Te sáta ñi yáha ducaⁿ ñi càháⁿ Jèsús, te ní ndee-gá distritú Galiléa cuáháⁿ-gá ndàa ingá xio yúte Jòrdán yucu distritú Júdeá. 2 Te ío cuéhé ñáyiu nchícúⁿ ñáhá xii-gá cuáháⁿ, te yacáⁿ ní quide tátna-gá nchaa ñáyiu cùhú.

3 Te ní quexìo ìⁿ úú cue tée cùu fariséú núu ndécú Jèsús xító ndéé ñáhá-güedë xii-gá ñu nása cunduu tnúhu càháⁿ-gá, te xăhaⁿ-güedë xii-gá:

—Véxi-ndí xicáⁿ tnúhú-ndí núu-n, ¿cúu dàña ìⁿ tée ñadihí-dé ñu ndédani càa ìⁿ sá ñà túú cùndáá-yu-án?

—càchí-güedé xăhaⁿ-güedë xii-gá.

4 Te Jèsús ní xăhaⁿ-gă xii-güedé:

—Te nchòhó, ¿náa ñá túú dàcuaha-ndo núu tùtú Yă Ndiòxí, te diu núu tùtú-gá càháⁿ-xi sá cùtnàhá ní cadúha-gá ñáyiu, te tée ñadihí ní cadúha-gá-án? 5 Te duha càchí tucu-xi núu tùtú Yă Ndiòxí nàcuáa ní càháⁿ-gá: “Cue tée na ñihí ñadihí-xi te dèⁿ-ná cada-güedé tátá-güedë ndihi náná-güedë, chi ñadihí-ñá-güedé cuu cuu ndihi-güedé, te cada iní-ndó sá ìⁿ-ná yiqui cùñú cuú-yu cundecú-yu”, duha càchí Yă Ndiòxí núu tùtú-gá. 6 Te xíáⁿ ñu cada iní-ndó sá cuè ñáyiu úú-án ìⁿ-ná yiqui cùñú cúu-yu, te ñá túú-gă ndi dííⁿ ndi dííⁿ yiqui cùñú cúu-yu. Núu xíáⁿ ñá túú ndùu váha-xi dàña cuè tée ñadihí-güedé, chi mee Yă Ndiòxí ní cachí-gá sá cúú úú-yu cundecú-yu —càchí Jèsús xăhaⁿ-gă xii-güedé.

7 Te ní xăhaⁿ-güedë xii Jèsús:

—Te núu ducaⁿ, ¿te ná cuendá ndíi Moisés ní cachí ndíi sá ñu ìⁿ tée cuení-dé dàña-dë ñadihí-dé, te cuu cadúha-dé ìⁿ tutú núu càháⁿ-xi sá ñi dáñá-dé ñadihí-dé, te ducaⁿ te cuu dàña ñàha-dé ní cachí ndíi vāⁿ? —càchí-güedé xăhaⁿ-güedë xii-gá.

8 Te Jèsús ní xăhaⁿ-gă xii-güedé:

—Te ducaⁿ ñi cachí ndíi Moisés sá cúú dàña-ndo ñadihí-ndó, chi nchòhó ío sáa iní-ndó, dico ndéé díhna

chi ní tecú tnúhu nchaa cue téé sá vǎ dáñá-güedé ñadihí-güedé. ⁹ Dico yúhú cǎchí tnúhu-í xii-ndo sǎ núu ñⁿ téé na dáña-dé ñadihí-dé te naqueheⁿ-dé ingá ñadihí te ío nèhé quidé-dě, te núu ñá díú cuendá sá cǎháⁿ ndihí-aⁿ ingá téé ducaⁿ na dáña ñaha-dé. Te sá dúcáⁿ cuendá-ni na dáña ñⁿ téé ñadihí-dé, te ñⁿ-ni cuéchi cùu-xi ndihí cuéchi quide téé ndèca ñadihí te cǎháⁿ ndihí-dé ingá ñadihí — cǎchí-gá xǎhaⁿ-gǎ xii-güedé.

¹⁰ Te cue téé xica cuu ndihí-gá ní xǎhaⁿ-güedé xii-gá:

—Te núu ducaⁿ cùu cuendá cue téé ndihí ñadihí-güedé, te váha-gá sá vǎ cǎndèca cue téé ñadihí —cǎchí-güedé xǎhaⁿ-güedé xii-gá.

¹¹ Te Jèsús ní xǎhaⁿ-gǎ xii-güedé:

—Ñá ncháá ñǎyiu ducaⁿ nduu táhú-yu cundecú-yu, chi mee-ni ñǎyiu ní cachí Yǎ Ndiöxí sá dúcáⁿ tnàhí nduu táhú cundecu mee. ¹² Te ío cue téé ducaⁿ tnàhí ní nduu táhú-güedé ndéé òré ní cacu-güedé sá vǎ cǎndèca-güedé ñadihí. Te ío cue téé ñá ndácú-güedé candeca-güedé ñadihí cuendá sá ñí quide ñaha dàva-gá cue tnàha téé-güedé xii-güedé. Te dava-güedé ñá túú cǎndeca-güedé ñadihí chi cuení-güedé sá vǎ dáñá ndèé-güedé cunu cuechi-güedé núu Yǎ Ndiöxí. Te nchaa cue téé ducaⁿ ñí nduu táhú núu Yǎ Ndiöxí cundecu mee, te váha-ni te

núu na cùndecu mee-güedé — cǎchí-gá xǎhaⁿ-gǎ xii-güedé.

Jèsús xicáⁿ táhú-gǎ núu Yǎ Ndiöxí cuendá landú
(Mr. 10:13-16; Lc. 18:15-17)

¹³ Te ñⁿ úú ñǎyiu ndècá-yu landú líhli cuáháⁿ núu Jèsús, chi cuení-yu sá téndàha ñaha-gá xii-güexi, te cǎcáⁿ táhú-gǎ núu Yǎ Ndiöxí cuendá-güexi. Te cue téé xica cuu ndihí-gá ní ngüíta-güedé ténáá ñáhá-güedé xií-yu, te xǎhaⁿ-güedé sá vǎ dúcáⁿ cǎdá-yu. ¹⁴ Te Jèsús ní xǎhaⁿ-gǎ xii-güedé:

—Chí dáñá ná quixi nahi cue landú líhli-áⁿ núu-í-a, te vá cǎdí-ndó ichi-güexi, chi dàtná cúú vǎha iní cue landú líhli-áⁿ ducaⁿ cùu váha iní cue ñǎyiu yìndaha ñaha Yǎ Ndiöxí —cǎchí-gá xǎhaⁿ-gǎ xii-güedé.

¹⁵ Te ní tendaha ñàha-gá xii-güexi, te ní xicáⁿ táhú-gǎ núu Yǎ Ndiöxí cuendá-güexi, te sátá dúcáⁿ ñí quide-gá te ní xica-gá cuáháⁿ-gá.

Ñⁿ téé cuica cǎháⁿ ndihí-dé Jèsús
(Mr. 10:17-31; Lc. 18:18-30)

¹⁶ Te ñⁿ téé cuechi ñí quexio-dé núu ndécú Jèsús, te xicáⁿ tnúhú-dě núu-gǎ, te xǎhaⁿ-dě xii-gá:

—Yòhó Mèstrú, cùu-n téé ío váha iní-xi, te cuení-í núu vá cùndèe iní-n cǎchí tnúhu-n ñá cúú sǎ váha cada-í cuendá nduu táhú-í cundecu-í ndihí Yǎ Ndiöxí ñí caa ñí quíhíⁿ — cǎchí-dé xǎhaⁿ-dě xii-gá.

¹⁷ Te Jèsús ní xǎhaⁿ-gǎ xii-dé:

—¿Te cùtnuní iní-n nàcuáa ndüu tnúhu càháⁿ-n sã yühú váha iní-ãⁿ?, chi ñⁿdii díi-ni Yá Ndiöxí ío váha iní-gá. Te núu cuiⁿí-n nàníhí tãhú-n te tnⁿ-n nchãa tnúhu càháⁿ Yã Ndiöxí, tnúhu sã sánú ìchi ñaha xii ñáyiⁿu nàcuáa cadã-yu cundecú-yu —càchí-gá xãhaⁿ-gã xii-dé.

¹⁸ Te tée cuechi-ãⁿ ní xáhaⁿ-dẽ xii-gá:

—¿Te ndëndida càa tnúhu càháⁿ Yã Ndiöxí cada-í-í? —càchí-dé xãhaⁿ-dẽ xii-gá.

Te Jèsús ní xáhaⁿ-gã xii-dé:

—Te duha ní cachí Yã Ndiöxí cada ñáyiⁿu: “Vã cáhni-ndó tnàha ñáyiⁿu-ndo, vá càháⁿ ndiⁿhi-ndo ñàdihí te núu ñá díú ñàdihí-ndó cúu-yu, te ducaⁿ-ni nchòhó cue ñáyiⁿu dihí tucu vá càháⁿ ndiⁿhi-ndo tẽe te núu ñá díú yⁿ-ndo cuu-güedé, te vá dúhú-ndó sã ndécú ndiⁿhi tnaha ñáyiⁿu-ndo, vá dácacu-ndo cuéchi neñúú sã cúu-xí tnàha ñáyiⁿu-ndo. ¹⁹ Te canehe-ndo sã yíññuhu núu tãtã-ndó ndiⁿhi núu ñãná-ndó, te cundàhú iní-ndó tnàha ñáyiⁿu-ndo dàtná cundàhú iní-ndó mée-ndo”, duha ní cachí Yã Ndiöxí cada ñáyiⁿu —càchí-gá xãhaⁿ-gã xii-dé.

²⁰ Te tée cuechi-ãⁿ ní xáhaⁿ-dẽ xii-gá:

—Nchaa xiãⁿ ní ngüíta-í quidè-í ndéé cùtnahã cúu làndú-í, ¿te vitna nágã cúmãní cada-í-í? —càchí-dé xãhaⁿ-dẽ xii-gá.

²¹ Te Jèsús ní xáhaⁿ-gã xii-dé:

—Te núu cuiⁿí-n cùu-n ñⁿ tée ío váha cada ndáá, te cuaháⁿ dico-n nchãa sã ndécú

ndiⁿhi-n, te dihúⁿ-n cuãha tãhú-n cuè ñáyiⁿu ndàhú, te ducaⁿ te nduu tãhú-n ngündecu váha-n núú ndécú Yã Ndiöxí táxi tnùní-gá. Te sátá ná yãha ducaⁿ cadã-n te quixi-n chitnahã ñáhã-n xii-í —càchí-gá xãhaⁿ-gã xii-dé.

²² Te sã dúcãⁿ ní xáhaⁿ Jèsús xii-dé te ío ní cundiⁿyí-dé, chi ío cuica-dẽ, te ní xica-dé cuaháⁿ-dé.

²³ Te Jèsús ní xáhaⁿ-gã xii cue tée xica cuu ndiⁿhi-gá:

—Na càchí tnúhu ndáá-í xii-ndo sã ío úhú quindáá iní ñaha cuè ñáyiⁿu cuica xii Yã Ndiöxí cuendã ndíhu ndaha ñaha-gã xii-yu. ²⁴ Te na càchí tnúhu tucu-í xii-ndo sã yãchí-gá yãha ñⁿ caméyu yaú ñⁿ yiqui ticú dácúxí sã quindáá iní ñⁿ ñáyiⁿu cuica Yã Ndiöxí cuendã ndíhu ndaha ñaha-gã xii-yu —càchí-gá xãhaⁿ-gã xii-güedé.

²⁵ Te sã dúcãⁿ ní cáháⁿ Jèsús, xiãⁿ ío ní cuñúhu cue tée xica cuu ndiⁿhi-gá, te ní ngüíta-güedé xitnaha-güedé:

—¿Yoo naníhí tãhú te núu ducaⁿ vaiⁿ? —càchí-güedé xitnaha-güedé.

²⁶ Te Jèsús ní ndacoto-gã núu-güedé, te xãhaⁿ-gã xii-güedé:

—Nchaa ñáyiⁿu ñuyú-ã chi vá ndácũ-yu ná cadã-yu nàcuáa ndíhu ndaha ñaha Yã Ndiöxí xii-yu, dico mee-gã chi ndacu-gã ndíhu ndaha ñaha-gã xii-yu chi nchaandi túhú sã váha ndacu-gã quidé-gã —càchí-gá xãhaⁿ-gã xii-güedé.

27 Te té Pèlú ní xáhaⁿ-dě xii-gá:

—Nchúhú ní dándöo-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sá ñihí-ndí nduu táhú-ndí sá dúcáⁿ ñi quide-ndí-i? — càchí-dé xáhaⁿ-dě xii-gá.

28 Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sá ná sáá nduu, ndüu saa nchaa sá ío andüu ndihí ñuyíú-a, te dàvá-áⁿ cunucóo yúhú Tée cùu ñaní tnáhá-ndó nchaa-ndo ñi núú xilé váha, te nchaa ñáyüu quini-yu sá ío càhnu cuu-í, te nchòhó cue téé ní tuha ñaha xì-í tnáhá-ndó cùnucóo-ndo núú ñi caa xilé váha ndí ùxúú tnáhá-ndó, te xiáⁿ cunucóo-ndo càda ndáá-ndó cuèchi ndí ùxúú xichi cue ñáyüu isráél. 29 Te nchaa ñáyüu na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na càdá-yu sá cuendá-í te ío-gá cuéhé sá cuñaha Yá Ndióxi cundecu ndihí-yu, te ñá díú-ní xǎⁿ chi tnáhá nduu táhü-yu cundecú-yu ndihí-gá ñi caa ñi quíhíⁿ. 30 Te dava ñáyüu cùnuu ndecu ichi Yá Ndióxi vitna, ñáyüu-áⁿ sáá nduu te vá ío-gá cunúu-yu dàtná cùnúu-yu vitna, te dava ñáyüu nchícúⁿ ñá túú cùnuu vitna, ñáyüu-áⁿ sáá nduu te ío cunúu-yu —càchí-gá xáhaⁿ-gã xii-güedé.

20

Cuendá cue téé quide chiuiⁿ

1 Te xáhaⁿ tùcu Jesús xii cue téé xica cuu ndihí-gá:

—Na càni-í ñiⁿ cuendú núú-ndó cuendá tecú tnúni-ndó nàcuáa cada-xi òré ndíhu ndaha ñaha Yá Ndióxi xii ñáyüu. ñiⁿ téé ní xitu-dé yoho yàha stilé, te ñiⁿ nduu ní quee-dé nehé-ni cuándúcú-dé cue téé cada chiuiⁿ núú dúcáⁿ ñi xitu-dé yoho yàha stilé-áⁿ.

2 Te òré ní ñihí-dé cue téé cada chiuiⁿ-áⁿ, te ní quide ndáá-dé ndihí-güedé sá cháhu ñaha-dé xii-güedé ñiⁿ díhúⁿ denàriú ñiⁿ nduu. Te sátá dúcáⁿ te ní tendaha ñaha-dé xii-güedé cuáháⁿ-güedé cada chiuiⁿ-güedé núú dúcáⁿ ñi xitu-dé yoho yàha stilé-áⁿ.

3 Te dàtnúni ní xica tucu-dé cuáháⁿ-dé dàtná òré caá ñiⁿ dátneé cuándúcú-gã-dé cue téé cada chiuiⁿ núú ñi xitu-dé yoho yàha stilé-áⁿ, te ní xiní-dé xĩnutní ñiⁿ úú cue téé núú yáhu te ñá túú ñá chiuiⁿ xíquide-güedé. 4 Te ní xáhaⁿ-dè xii-güedé: “Ñá túú cùdana cuyáchí-ndó càda-ndo chiuiⁿ-í te cháhu ñaha-í xii-ndo nàcuáa tàú-xi cundu-áⁿ”, càchí-dé xáhaⁿ-dè xii-güedé. Te cue téé-áⁿ ñi sáha-güedé tnúhu cada chiuiⁿ-güedé te ní xica-güedé cuáháⁿ-güedé. 5 Te téé ní xitu yoho yàha stilé-áⁿ ñi xica tucu-dé dàtná òré cauxúú nduu cuándúcú-gã-dé cue téé cada chiuiⁿ-dé, te ní ñihí tucu-dé cue téé cada chiuiⁿ. Te ní quee tucu-dé dàtná òré caá úní sacuaa, te diu-ni ducaⁿ ñi quide tucu-dé. 6 Te ní quee tucu-dé dàtná òré caá úhúⁿ sacuaa cuándúcú-gã-dé cue téé cada chiuiⁿ-dé, te ní xiní-dé xĩnutní

̣n ǔú cue tée diu-ni núú yáhu-án te ñá túú nǎ chiún quide-güedé, te ní xáhaⁿ-dē xii-güedé: “Sānuu sá nchòhó ní cuu nchàca vitna ñá túú ñihí-ndó chiún cada-ndo”, cachí-dé xáhaⁿ-dē xii-güedé. ⁷ Te cue tée-án ñi xáhaⁿ-güedé xii-dé: “Ñá túú ñihí-ndí chiún cada-ndí chi vá yõ ndücu ñaha xii-ndí”, cächí-güedé xáhaⁿ-güedé xii-dé. Te ní xáhaⁿ-dē xii-güedé: “Yúhú taxi-í chiún cada-ndo, te quíhíⁿ-ndó núú ñi xitu-í yoho yaha stilé yacán cada chiún-ndo, te cháhu ñaha-í xii-ndo nàcuáa tàú-xi cundu”, cächí-dé xáhaⁿ-dē xii-güedé. ⁸ Te sátá ñi dáhu nchícanchii, te tée dii chiún-xi-án ñi xáhaⁿ-dē xii tée taxi tñuní ñáhá xii cue tée quide chiún-án: “Cúñaha xii ncha cue tée quide chiún-án ná quíxí-güedé te cháhu-n-güedé, te díhna-gá cue tée nchícúⁿ cuíⁿ-ná cuánguihu núú chíúⁿ ngúita-n cháhu-n, te ndéé núú ñi ndihí-ná cháhu-n cuè tée cuánguihu díhna nuu-gǎ núú chíúⁿ”, cächí-dé xáhaⁿ-dē xii tée taxi tñuní ñáhá xii cue tée quide chiún-án. ⁹ Te díhna-gá cue tée cuánguihu caá úhúⁿ sacuaa ní quexiò-güedé cuendá cháhu ñaha-dē, te ní cháhu ñaha-dē ̣n caa díhúⁿ denàriú xii ̣n ̣n-güedé. ¹⁰ Te sátá ñi cháhu-dé dava-gá cue tée ní quide chiún. Te ndéé núú ñi ndihí-ná ní cháhu-dé cue tée cuánguihu díhna nuu-gǎ núú chíúⁿ. Te cue tée-án ñi sani iní-güedé sá vái-gǎ cháhu ñaha-dē

xii-güedé, dico ñáhá chi ̣n caa-ni díhúⁿ denàriú ní cháhu ñaha-dē xii ̣n ̣n-güedé. ¹¹ Te cue tée-án ñi queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xáhaⁿ-güedé xii tée dii chiún-xi ní quide-güedé: “¿Ná cuendá cue tée nchícúⁿ cuíⁿ-ná cuánguihu núú chíúⁿ ̣n-ni ñi cháhu ñaha-n xii-ndí ndihí-güedé, te ̣nⁿdi oré duha ní quide chiún-güedé? Te nchúhú nchàca ncha ní sahi iní-ndí ní quide chiún-ndí, te ní ndoho-ndí cahni, te ̣n-ni ñi cháhu ñaha-n xii-ndí ndihí-güedé”, cächí-güedé xáhaⁿ-güedé xii tée dii chiún-xi ní quide-güedé. ¹³ Te tée dii chiún-xi ní quide-güedé-án ñi xáhaⁿ-dē xii ̣n tée-án: “Yòhó, ñá túú quide-í ̣n sá ña túú tàú-í cada-í sá cúú-xi-n, chi ní quide ndáá-ó sǎ díú-ni ̣n díhúⁿ denàriú cháhu ñaha-í xii-n ̣n nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuíⁿ-í sá ̣n-ni cháhu ñaha-í xii-n ndihí cue tée nchícúⁿ cuíⁿ-ná cuánguihu núú chíúⁿ. ¹⁵ Chi yúhú cuu-ni cada-í nani cuíⁿ-í ndihí díhúⁿ-í, ¿adi dico ñá túú quide váha-xi iní-n sǎ dúhá cundahú iní-í cue tée-án ducaⁿ cháhu-í-güedé?”, cächí tée cùu patróⁿ-án xáhaⁿ-dē xii tée-án. Duha nduu cuendú cáni-í núú-ndó. ¹⁶ Te duha cǎháⁿ-í chi dava ñáyiu cùnuu ndecu ichi Yá Ndiõxí vitna sáá nduu te vá cùnuu vihi-gá-yu dàtná cùnùú-yu vitna, te dava ñáyiu ñá túú cùnuu vitna sáá nduu

ïo cunúu-yu. Te ío cuéhé ñáyiú cáháⁿ ñáhá Yá Ndiöxí xii-yu dico sacú-ni-yu nduu táhü-yu cundecú-yu ndihi-gá —càchí-gá xáhaⁿ-gá xii-güedé.

Jèsús cáháⁿ tucu-gá sá cáhni ñàha-güedé xii-gá
(Mr. 10:32-34; Lc. 18:31-34)

17 Te ñùhu Jèsús ichi cuásaá-gá ñuú Jerusàlén ndihi cue téé xica cuu ndihi-gá, te ní cana ñaha-gá xii-güedé ní naníhí tnáhá-güedé ndihi-gá, te ta ndàtnúhu ndihi ñaha-gá xii-güedé cuáháⁿ, te xáhaⁿ-gá xii-güedé:

18 —Vitna ñùhu-o ichi cuásaá-ó ñuú Jerusàlén, te yàcáⁿ cuáha cuendá ñáhá-güedé xii yúhú Téé cùu ñaní tnáhá-ndó nchàa-ndo núú cuè téé cùu dútú cùnùu, ndihi núú cuè téé dàcuaha ñaha xii ñáyiú nchaa tnúhu ní chídó tnùní ndii Moisés. Te díu cue téé-áⁿ cùñaha-güedé xii dava-gá cue téé sá cáhni ñàha-güedé xii-í. 19 Te cuáha cuendá ñáhá-güedé xii-í núú cuè téé ñá túú cùu cue téé isràél, te cue téé-áⁿ cudíquí ndeé ñáhá-güedé xii-í, te caniha-güedé ndihi ñii, te dàtnùní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úní sá cùu-í te ndoto-í —càchí-gá xáhaⁿ-gá xii-güedé.

Náná té Jàcobó ndihi té Juàá cuini-aⁿ sá cùnùu-güedé ndihi Jèsús

(Mr. 10:35-45)

20 Te cue déhe té Zebèdeú té Jàcobó ndihi té Juàá ndecá ñaha náná-güedé xii-güedé

cuáháⁿ núú ndécú Jèsús, te òré ní quexìo-aⁿ ndihi-güedé núú ndécú-gá te ní ngüíñí xítí-áⁿ núú-gá cuendá cuini-aⁿ ndàtnúhu ndihi ñaha-aⁿ xii-gá cuendá sá cúu-xí cuè déhe-aⁿ, 21 Te cùmání-gá cáháⁿ-aⁿ te ní xicáⁿ tnúhú Jèsús núú-aⁿ, te xáhaⁿ-gá:

—¿Ná cuini-n? —càchí-gá xáhaⁿ-gá xii-aⁿ.

Te ní xáhaⁿ-aⁿ xii-gá:

—Véxi-í cáháⁿ ndàhú-í núu-n núu vá cündèe iní-n cùnucóo ñⁿ déhe-í-a xio cùha-n, te ingá-dé cùnucóo-dé xio dàtni-n na saá nduu cùnucóo-n núú táxí tnùní-n —càchí-áⁿ xáhaⁿ-aⁿ xii-gá.

22 Te Jèsús ní xáhaⁿ-gá xii úú cue téé-áⁿ:

—Nchòhó, ñá túú cùtnuní váha iní-ndó nàcuáa ndùu sá xicáⁿ-ndó núu-í. ¿Te náa cundee iní-ndó dándoho ñaha ñáyiú xii-ndo dàtná dándoho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa cáháⁿ-n-áⁿ —càchí-güedé xáhaⁿ-güedé xii-gá.

23 Te Jèsús ní xáhaⁿ-gá xii-güedé:

—Ndáá sá cündèe iní-ndó ndòho-ndo nchaa nàcuáa ndòho-í, dico sá dúcáⁿ cuini-ndó sá ñⁿ-ndó cùnucóo-ndo xio cuha-í, te ñⁿ-ndo cùnucóo-ndo xio datni-í, te xiáⁿ chi ñá díú yúhú tàu-í cachí-í núu sá cúu cùnucóo-ndo àdi sá vâ cúu cùnucóo-ndo, chi mee Tàtá-í Dútú Ndiöxí cachí-gá te núu

ná cúú ñǎyiu nduu táhú cunucóo diñi-í dàvá-áⁿ — cǎchí-gǎ xǎhaⁿ-gǎ xii-güedé.

24 Te òré ní níhí ùxi-gǎ cue tée xica cuu ndihi-gǎ tnúhu nàcuáa ndùu sá cuini cue tée úú-áⁿ, te ní cudééⁿ-güedé núú cuè tée úú-áⁿ. 25 Te Jèsús ní cana-gǎ nchaa cue tée xica cuu ndihi-gǎ, te ní xáhaⁿ-gǎ xii-güedé:

—Nchòhó xini-ndó sǎ cuè tée yindaha nacióⁿ quidé-güedé sá ìo cùnuu-güedé, te nchaa dava-gǎ cue tée cùnuu ndihi-güedé quidé-güedé tnàhá-güedé sá ìo cùnuu-güedé. 26 Dico nchòhó chi vá dúcáⁿ càda-ndo, chi núu dava-ndo cuini-ndó cùnuu-ndo, te xini ñuhu-xi cunu cuechi núú tnàhá-ndó te vá cǎdá-ndó sǎ cùnùu-ndo. 27 Te núu dava-ndo cuini-ndó quène cǎva-ndo, te cuu-ndo dàtná cue ñáyiu ñá túú tnàhí dàñá quee núú chíúⁿ pàtróⁿ-xi cunu cuechi núú tnàhá-ndó. 28 Te cada-ndo dàtná quidé yǎhú Tée cùu ñaní tnàhá-ndó nchàa-ndo, chi yúhú véxi-í ñuyúú-a dico ñá díú sǎ cúnú cuèchi ñáyiu núú-í chi véxi-í sá cúnú cuèchi-í núú-yu. Te cuú-í ñuyúú-a cuendá vai-yu cǎcu nihnú-yu núú ùhú núú ndàhú —cǎchí-gǎ xǎhaⁿ-gǎ xii-güedé.

Jèsús quidé tǎtna-gǎ núú úú tnàhá cue tée cuàá

(Mr. 10:46-52; Lc. 18:35-43)

29 Te òré ní quee Jèsús ñuu Jericó ndihi cue tée xica cuu ndihi-gǎ, te cuéhé víhí ñáyiu nchìcúⁿ ñáhá xii-gǎ cuáháⁿ. 30 Te yuhu ìchi cuáháⁿ-gǎ

xǎnucóo úú tnàhá cue tée cuàá, te cue tée-áⁿ ní cutnùni ìni-güedé sá Jèsús ñúhú-gǎ ìchi-áⁿ te ní ngúita-güedé níhi cǎháⁿ-güedé, te xǎhaⁿ-güedé xii-gǎ:

—ìYòhó Mèstrú, ñaní tnàhá ndíi Dàvíi, cundàhú ìni ñáhá xii-ndí! —cǎchí-güedé xǎhaⁿ-güedé xii-gǎ.

31 Te cue ñáyiu tēnaá ñáhǎ-yu xii-güedé, te xǎhǎⁿ-yu sá ná cǎdí-güedé yuhu-güedé, dico uuⁿ-gǎ níhi ní cǎháⁿ-güedé, te xǎhaⁿ-güedé xii-gǎ:

—ìYòhó Mèstrú, ñaní tnàhá ndíi Dàvíi, cundàhú ìni ñáhá xii-ndí! —cǎchí-güedé xǎhaⁿ-güedé xii-gǎ.

32 Te ní ngúíñí Jèsús te ní cana ñaha-gǎ xii-güedé, te ní xícáⁿ tnúhú-gǎ núú-güedé, te xǎhaⁿ-gǎ:

—¿Ná cuini-ndó càda ñaha-í xii-ndo-í? —cǎchí-gǎ xǎhaⁿ-gǎ xii-güedé.

33 Te ní xáhaⁿ-güedé xii-gǎ:

—Mèstrú, cuini-ndí sá cǎdá tǎtna-n núú-ndí cuendá cundehe-ndí —cǎchí-güedé xǎhaⁿ-güedé xii-gǎ.

34 Te Jèsús ní cundàhú ìni ñáhá-gǎ xii-güedé, te ní tendaha-gǎ núú-güedé. Te òré-ni ní ndúha núú-güedé, te nchìcúⁿ ñáhá-güedé xii-gǎ cuáháⁿ.

21

Jèsús cuánguihu-gǎ ñuu Jerusálén

(Mr. 11:1-11; Lc. 19:28-40; Jn. 12:12-19)

1 Te òré sa ta cùyatni Jesús ndihi cue tée xica cuu ndihi-gá ñúú Jerusàlén, te ní quexìo-gá ndihi-güedé yatni víi-nã ñúú Bèttagé, te xíáⁿ cáá yùcu nani Olívú. Te ní ndatnúhu-gá ndihi úú cue tée xica cuu ndihi-gá, 2 te ní xáhaⁿ-gã xii-güedé:

—Chí cuáháⁿ ñúú cáá yàtni yacáⁿ, te òré quexìo-ndo yacáⁿ te nanihí-ndó ñⁿ búrru dìhí ndètníi-di ndihi déhe-di, te nandaxi-ndo-güèdi te candeca-ndo-güèdi quixi. 3 Te núu ío ñáyiu dàdahaⁿ ñaha xii-güedi, te cúñaha-ndo xii-yu sá yùhú Yaá xicá cùu ndihi-ndo xini ñuhu-í-güedi, te ndíhi-ni natendaha-í-güedi núhú-güedi cúñaha-ndo — càchí-gá xáhaⁿ-gã xii-güedé.

4 Te ducaⁿ ñí cuu chí ní quee ndáá-xi nàcuáa ní chídó tnùní ñⁿ tée ní xóo cáháⁿ tnúhu Yá Ndiòxí ndéé sanaha núú tütú-gá núú càchí-xi:

5 Chí cúñaha cuè ñáyiu ñúú Sìón ná cáda cuèndá-yu, chí véxi tée yíndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido, te cùu-dé ñⁿ tée ío ndàhú iní-xi.

Duha ní chídó tnùní ñⁿ tée ní xóo cáháⁿ tnúhu Yá Ndiòxí ndéé sanaha núú tütú-gá.

6 Te cue tée xica cuu ndihi-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gã xii-güedé cada-güedé. 7 Te ní ndexìo-güedé ndécá-güedé ñⁿ búrru dìhí ndihi déhe-di, te ní sacáⁿ ndodo-güedé

dóo-güedé sátá-güedi, te dàtnùní cuásaá Jèsús sátá ñⁿ-di ní ngódó ñàha-gá xii-di. 8 Te ío cuéhé ñáyiu ta sàcáⁿ-yu dóo-yu ichi cuáháⁿ-gá cuèndá núú dõo-yu-áⁿ yáha-gá ndihi quiti yòdo-gá. Te davá-yu xèhndé-yu ndaha yùtnu ñúú tá sàcáⁿ-yu cuáháⁿ. 9 Te nchaa ñáyiu yòdonuu núu-gã ndihi nchaa ñáyiu nchìcúⁿ ndàa sátá-gã ní ngüíta-yu níhi càháⁿ-yu, te càchí-yu:

—Ío càhnu cuu Yaá cúú ñàní tnáhá ndi Dàvíí! ;Te Yá Ndiòxí ío na chìndee ñaha-gá chí cùu-gá Yaá ní tendaha Yá Ndiòxí véxi quide núu-gã! ;Te ndéé nchaa sá ío andíu na càchí-xi sá ío càhnu cuu-gá! — duha càchí-yu.

10 Te òré cuánguihu Jèsús ñúú Jerusàlén, te nchaa ñáyiu ñúu-áⁿ ñí ngüíta-yu xícuáa-yu, te davá-yu ní ngüíta-yu xitnàhá-yu:

—¿Yoo cùu tée-áⁿ? — càchí-yu xitnàhá-yu.

11 Te davá-yu xitnàhá-yu:

—Tée-áⁿ cúu-dé Jèsús tée càháⁿ tnúhu Yá Ndiòxí, te cùu-dé tée ñúú Nazàrét ñúú yíndèhu distritú Galileá — càchí-yu xitnàhá-yu.

Jèsús ñá túú tnàhá iní-gá nàcuáa xíquide ñáyiu xití veñúhu (Mr. 11:15-19; Lc. 19:45-48; Jn. 2:13-22)

12 Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu ñáyiu quide ndáhú nádìcò-yu, ndihi ñáyiu xísaaⁿ, te nchaá-yu ní queñuhu ñaha Jèsús xii-yu quehé, te ní dándüá-gá mèsá

nchaa ñáyiú dâma díhúⁿ, ndihí nchaa xilé sácõo nchihí ñáyiú dìco lómá xĩndecu xití veñúhu-áⁿ. ¹³ Te ní xáhaⁿ-gã xii-yu:

—Núú tütú Yã Ndiõxí cãháⁿ-xi nácuáa ní cãháⁿ-gã, te ní cachí-gá: “Vehe-í cúú-xí núú cãháⁿ ndihí ñaha ñáyiú xii-í”, duha ní cãháⁿ-gã cãchí-xi núú tütú-gá. Dico nchòhó quidé-ndó vehe-gá vehe ñadúhú —cãchí-gá xãhaⁿ-gã xii-yu.

¹⁴ Te xíaⁿ ndécú Jèsús ní quexio cue tée cuáa ndihí cue tée yacua, te ní quide tátna ñaha-gã xii-güedé te ní ndúha-güedé. ¹⁵ Te cue dútú cúnúu ndihí cue tée dàcuaha ñaha xii ñáyiú nchaa tnúhu ní chídó tnúni ndí Moisés ní xiní-güedé ní quide Jèsús sá vã yõo tnàhí ndàcu cada, te ndèdóho tucu-güedé níhi xicãháⁿ cue landú xití veñúhu cãhnu sá ío cúnúu-áⁿ, te cãchí-güexi: “Ío cãhnu cuu Yaá cúú ñàní tnáhá ndíi Dáví”, cãchí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nácuáa cãháⁿ cue landú-ãⁿ ñã? — cãchí-güedé xãhaⁿ-güedé xii-gá.

Te Jèsús ní xáhaⁿ-gã xii-güedé:

—Ndèdóho-í, te nchòhó náa ñá túú dàcuaha-ndo núú tütú Yã Ndiõxí núú cãháⁿ-xi cuendá cue landú-ãⁿ, te duha cãchí-xi:

Yòhó ní quide-n sã cuè landú vitna sàdi, ndihí cue dava-gá landú,

chiñuhu ñaha-güexi xii-n nácuáa tàù-xi cunduu. Duha cãchí-xi núú tütú-gá — cãchí-gá xãhaⁿ-gã xii-güedé.

¹⁷ Te xíaⁿ ní dándõo ñaha Jèsús xii-güedé, te ní xica-gá cuáhãⁿ-gã ñúú Bètaniá, yacáⁿ ní xĩndecu-gá niú-áⁿ.

Jèsús xãhaⁿ-gã xii yutnu ngüxí sá vã cúúⁿ-gã sávidí-xi (Mr. 11:12-14, 20-26)

¹⁸ Te nduu tnéé-áⁿ nehé-ni cuáhãⁿ tucu Jèsús ñúú Jerusalén, te ichi ñùhu-gá ní xihí-gá docó. ¹⁹ Te ní xiní-gá ïⁿ yutnu ngüxí nútní ïⁿ xio yuhu ìchi, te ní xica-gá cuáhãⁿ ndéhé-gã núu ndéé sávidí-xi, dico ñá túú ñã ndéé chi mee-ni ndàha-xi ndéé. Te ní xáhaⁿ-gã xii yutnu ngüxí-áⁿ:

—¡Vitna te vã ïⁿ ndúu-gá cuuⁿ sávidí-n! —cãchí-gá xãhaⁿ-gã xii-xi.

Te òré-ni-áⁿ ní yíchí yutnu ngüxí-áⁿ. ²⁰ Te sá dúcãⁿ ní cuu ní xiní cue tée xica cuu ndihí Jèsús, te ío ní cuñúhu-güedé, te ní xicãⁿ tnúhú-güedé núú-gã, te xãhaⁿ-güedé:

—¿Ná cuendá ndéé dàcãⁿ ío ndíhi ní yíchí yutnu ngüxí-ãⁿ-i? —cãchí-güedé xãhaⁿ-güedé xii-gá.

²¹ Te Jèsús ní xáhaⁿ-gã xii-güedé:

—Na cãchí tnúhu ndáá-í xii-ndo sã núu nchòhó quindáa ndisa iní-ndó Yã Ndiõxí, te vã cání ïⁿ cani úú iní-ndó, te ñá díú-ní sã ní quide-í-a ní xiní-ndó ndàcu-ndo cada-ndo, chi ndéé tĩndúú-a xocuñí-xi núú ndécú-xí te núu cúñaha-ndo sã xocuñí-xi te quihí-xi

qué-e-xi xití làmár. Te ñu ducaⁿ càda-xi te núu na quèndáá iní-ndó. ²² Te nchaa sá ná càcáⁿ-ndó núú Yá Ndiöxí òré càháⁿ ndìhi-ndo-gã te taxi-gá te núu sàndáá ndisa iní-ndó sã táxi-gã sá xicáⁿ-ndó núú-gã —càchí-gã xãhaⁿ-gã xii-güedé.

Jèsús ndécú ndìhi-gá tnúhu ndee iní

(Mr. 11:27-33; Lc. 20:1-8)

²³ Te Jèsús cuànguihu-gá xití veñúhu càhnu sá ño cùnnu danehé-gã ñáyiú, te xiáⁿ ndécú-gá ní quexio cue dútú cùnnu ndìhi cue tée cùu sacuéhé núú ñáyiú isràél, te xãhaⁿ-güedé xii-gã:

—Cuñí-ndí cachí tnúhu-n xii-ndí nása ndùu tnúhu ndee iní ndécú ndìhi-n núu quide-n nándi sá quidé-n, ¿te yoo ducaⁿ ñi taxi tnúhu ndee iní-án xii-n-i? —càchí-güedé xãhaⁿ-güedé xii-gã.

²⁴ Te Jèsús ní xãhaⁿ-gã xii-güedé:

—Yúhú tnàhá-í cuñí-í càcáⁿ tnúhu-í ñi sá càcáⁿ tnúhu-í iní-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee iní duha quide-í. ²⁵ Te chí càchí tnúhu xii-í yoo ní táuchíúⁿ ñi dácuándùte ndí Juáá ñáyiú, ¿Yá Ndiöxí áⁿ cue tée ñuyíú-a ní táuchíúⁿ dùcaⁿ ní quide ndí?, te chí càchí tnúhu —càchí-gã xãhaⁿ-gã xii-güedé.

Te ní ngüíta-güedé xitnàha-güedé:

—¿Nása cùñaha-o? Chi núu na cùñaha-o sã Yá Ndiöxí ní táuchíúⁿ dùcaⁿ ní quide ndí Juáá ñá, te quesaha-dé:

“¿Ná cuèndá ñá túú ní sàndáá iní-ndó tnúhu ní càháⁿ ndí váiⁿ?””, quesaha-dé. ²⁶ Te núu na cùñaha-o sã cue ñáyiú ñuyíú-a ní táuchíúⁿ dùcaⁿ ní quide ndí ña, te cudééⁿ ñáyiú núú-ó, chi nchaa-yu càchí-yu sá Yá Ndiöxí ní xãhaⁿ-gã xii ndí sá càháⁿ ndí tnúhu-gá núú ñáyiú —càchí-güedé xitnàha-güedé.

²⁷ Te ní xãhaⁿ-güedé xii Jèsús:

—Ñá túú xini-ndí yoo ní táuchíúⁿ dùcaⁿ ní dácuándùte ndí Juáá ñáyiú —càchí-güedé xãhaⁿ-güedé xii-gã.

Te ní xãhaⁿ-gã xii-güedé:

—Te núu ducaⁿ te ni yúhu vá càchí tnúhu-í xii-ndo yòo ní taxi tnúhu ndee iní duha quide-í —càchí-gã xãhaⁿ-gã xii-güedé.

Cuèndá ñi tée ndìhi úú déhe-dé

²⁸ Te Jèsús ní xãhaⁿ tucu-gã xii-güedé:

—Na càni-í ñi cuèndú núú-ndó nãcuáa tecú tnùn-ndó tnúhu càháⁿ-í. ñi tée ndècu úú déhe-dé, te ní xãhaⁿ-dè xii déhe-dé tée sacuéhé-gã: “Yòhó déhe-í, véxi-í càháⁿ ndàhú-í núú-n núu vá cùndèe iní-n cuànùndaha ñaha-n xii-í cada chiúⁿ-o núú ñi xitu-í yoho yaha stilé”, càchí-dé xãhaⁿ-dè.

²⁹ Te ní xãhaⁿ déhe-dé xii-dé: “Vá quíhiⁿ-í cada chiúⁿ-í núú chíúⁿ-n”, càchí-dé xãhaⁿ-dè xii tãtá-dè. Dico cueé ní nacani iní-dé te ní sãháⁿ-dé ní quide chiúⁿ-dé núú chíúⁿ tãtá-dè. ³⁰ Te tée-án ñi sãháⁿ tucu-dé ní xãhaⁿ-dè xii déhe-dé té lihli-gã núu vá cùndèe iní-dé cuànùndaha ñaha-dé, te ní

xáhaⁿ dēhe-dé-áⁿ xii-dé: “Cuu cuánundaha ñaha-í xii-n”, càchí-dé xāhaⁿ-dē. Dico ñá túú ní sǎháⁿ-dé cada chiúⁿ-dé. ³¹ Te vitna chí cǎháⁿ nūu ndédacǎa cue tée úú-áⁿ ní quide-güedé sá cuíní tǎtá-güedé —càchí-gá xāhaⁿ-gǎ xii-güedé.

Te ní xáhaⁿ-güedé xii-gá:

—Tée cùu sacuéhé-gǎ, tée ní cǎháⁿ ndihí-dé díhna —càchí-güedé xāhaⁿ-güedé xii-gá.

Te Jèsús ní xáhaⁿ-gǎ xii-güedé:

—Na càchí tnúhu ndáá-í xii-ndo sá ncháá cuè tée cuihna iní-xi quide cobrá ñáhá xii ñáyiú cuendá impuèstú, ndihí cue ñáyiú dihí xǐndecu ichi díí iní yáchí-gá ndíhu ndaha ñàha Yá Ndióxi xii cue tée-áⁿ ndihí cue ñáyiú dihí-áⁿ dàcúúxí nchòhó. ³² Chi ndí Juáá tée ní xóo dacuàndute ñaha xii ñáyiú ní cǎháⁿ ndí nàcuáa cadá-yu cundecú-yu, dico nchòhó chi ñá túú cuíní-ndó quíndáá iní-ndó nàcuáa ní cǎháⁿ ndíi, dico cue tée cuihna iní-xi quide cobrá ñáhá xii ñáyiú cuendá impuèstú, ndihí cue ñáyiú dihí xǐndecu ichi díí iní, chi sàndáá iní-güedé ndihí-yu tnúhu ní cǎháⁿ ndíi. Te nchòhó cuèi ndèhe-ndo sá sàndáá iní cue ñáyiú-áⁿ nchaa tnúhu ní cǎháⁿ ndíi, dico ñá túú cuíní-ndó ndíxi cuèchi iní-ndó cuendá nchaa sá cuèhé sá dúhá quide-ndo cuendá tñi-ndo tnúhu ní cǎháⁿ ndíi —càchí-gá xāhaⁿ-gǎ xii-güedé.

Cuendá cue tée cuihna iní-xi (Mr. 12:1-12; Lc. 20:9-19)

³³ Te xāhaⁿ tùcu Jèsús xii-güedé:

—Cundedóho-ndo na càni tucu-í ingá cuendú núú-ndó cuendá tecú tnúni-ndó tnúhu cǎháⁿ-í. Hⁿ tée ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vǎ cúú dàñú, te ní cadúha-dé núú quíhni-dé ndéhé yoho yàha stilé-áⁿ òré ná cùu, te ní cadúha-dé hⁿ xító dùcúⁿ núú cáundòdo cue tée coto nchaa yoho yàha stilé-áⁿ.

’Te ní sáá hⁿ nduu quèe-dé quíngaca cuu xica-dé te ní dándóo ndaha-dé sá ní xitu-dé-áⁿ xii hⁿ úú cue tée xini tnáhá ndihí-dé cuendá cada chiúⁿ-güedé, te ní ndatnúhu-güedé sá òré ná cúú te cuu cuendá dava-güedé, te ducaⁿ te ní quee-dé cuáháⁿ-dé. ³⁴ Te sáta ní sáá nduu ní cuu ndéhé nchaa yoho yàha stilé sá ní xitu-dé-áⁿ, te ní xáhaⁿ-dē xii hⁿ úú cue tée xinu cuechi núú-dé: “Chí cuáháⁿ cǎcáⁿ-ndó sá cúú cuendá-í núú cuè tée ní dándóo ndàha-í nchaa yoho yàha stilé sá ní xitu-í”, càchí-dé xāhaⁿ-dē xii-güedé. ³⁵ Te cue tée ní dándóo ndaha-dé nchaa yoho yàha stilé sá ní xitu-dé-áⁿ ní tñi-güedé cue tée xinu cuechi núú-dé-áⁿ, te hⁿ-dé ní caní-güedé, te hⁿ-dé ní sahni ñaha-güedé, te ingá-dé ní sǎñaha-güedé yúú. ³⁶ Te tée ní xitu yoho yàha stilé-áⁿ ní tendaha-dé titní-gá tucu cue tée xinu cuechi núú-dé cuáháⁿ-güedé cuángácáⁿ-güedé sá cúú cuendá-dé núú cuè tée ní dándóo ndaha-dé sá ní

xitu-dé-án, dico diu-ni ducaⁿ nĩ quide ñaha cuè téé-án xii cue téé xĩnu cuechi núú-dě-án.

37 "Te téé cùu xĩtohó nchaa yoho yàha stilé-án nĩ sani iní-dé: "Vàha-gá nũu tendaha-ĩ déhe-í-a nũhú-dé, chi òré quiní ñáhá-güedě xii-dé te canehe-güedé sá yĩñũhu núú-dě", duha ní sani iní-dé. Te ní tendaha-dě déhe-dé cuánuhú-dé. 38 Dico òré ní xiní cue téé quide chiuⁿ-án dẽhe téé cùu xĩtohó nchaa yoho yàha stilé-án, te ní xĩtnàha-güedé: "Téé-ãⁿ téé véxi nduu táhú ñũhu-a ndihi nchaa sá cáá nũú-xi, dico cahni-o-dě te mee-o ndũu táhú-ó sá ndũú táhú-dě", cächí-güedé xĩtnàha-güedé. 39 Te ní tñi-güedé téé-án te ndèca ñaha-güedé cuáhán ìⁿ xio yuhu ñũhu-án, te ní sahani ñaha-güedě xii-dé —duha cuáhán cuendú ní cani Jèsús núú-güedě.

40 Te ní xáhaⁿ tũcu Jèsús xii-güedé:

—¿Te nchòhó sa cùtnuní iní-ndó nãsa cada ñaha xĩtohó ñũhu-án xii cue téé-án ñã? — cächí-gá xáhaⁿ-gã xii-güedé.

41 Te cue téé-án nĩ xáhaⁿ-güedě xii-gá:

—Téé cùu xĩtohó ñũhu-án nũhú-dé, te vá cundàhú iní-dé cue téé cuihna iní-xi-án chi cahni ñaha-dě xii-güedé, te dándóo ndaha-dě ñũhu-dé xii cue téé cùtnuní iní-dé cada ndáá cuendá ndi tnahá cúúⁿ ndéhé nchaa yoho yàha stilé sá nĩ xitu-dé-án te cuañaha-güedě xii-dé sá cúú cuendá-dé —cächí-güedé xáhaⁿ-güedě xii-gá.

42 Te Jèsús ní xáhaⁿ-gã xii-güedé:

—Te nchòhó, náa ñá túú dàcuaha-ndo núú tütú Yá Ndiõxí núú cächí-xi:

Yúú sã nĩ dáquée tĩhú cue téé dàcaa vehe, ní cuu-xi yúú cùnũu vitna.

Chi mee Dütú Ndiõxí ducaⁿ nĩ cächí-gá cunduu, te cùu-xi ìⁿ sá ïo cùñũhu-o vitna.

Duha cächí-xi núú tütú-gá. 43 Te duha càháⁿ-í chi Yá Ndiõxí cada-gá te vá nihí-ndó tñũhu ndee iní cundecu ndihi-ndo cuendá ndihu ndaha ñaha-gá xii-ndo, chi tñũhu ndee iní-án cundecu ndihi cue ñáyiu cada ndáá cuendá ndihu ndaha ñaha Yá Ndiõxí xii-yu. 44 Te yúú sã cùnũu-án cúú-xí yũhú, te nchaa ñáyiu ñá túú tñi tñũhu-í cúú-yu dàtná ìⁿ ñáyiu ndúá núú yũú-ãⁿ te tñàhnú duúⁿ-yu, àdi núu na tàú ñáhá-xí xii-yu, te dacächi duuⁿ ñaha-xi —cächí-gá xáhaⁿ-gã xii-güedé.

45 Te sá dúcáⁿ ndũu cuendú ní cani Jèsús te cue téé cùu dütú cùnũu-án, ndihi cue téé cùu fariséú ní cutnùní iní-güedé sá cuendá-güedé ní cáháⁿ-gá. 46 Te ní cuiní-güedé tñi ñaha-güedě xii-gá òré-án dico ñá túú ní cùyi-güedé, chi ní yùhú-güedé cue ñáyiu, chi ní cutnùní iní-yu sá cúú-gã ìⁿ téé càháⁿ tñũhu Yá Ndiõxí.

22

Cuendá ìⁿ vico tñãndaha

1 Te Jèsús ní ngũita tucu-gá cání-gã ingá cuendú núú-güedě, te xáhaⁿ-gã:

2 —Na càni tucu-í ingá cuendú núú-ndó cuendá tecú tnùn-í-ndó nàcuáa cada-xi òré ndíhu ndaha ñàha Yá Ndiòxí xii ñáyu. 3 Te ní tendaha-dé dehe ducu-dé. 3 Te ní tendaha-dé cue téé xínu cuechi núú-dé cuáháⁿ-güedé cuángana-güedé cue ñáyu sa ní cáháⁿ-dé cuhuⁿ vico, dico ñáyu-áⁿ ñà túú ní cuín-í-yu quíhíⁿ-yu. 4 Te ní xáhaⁿ tucu-dé xii dava-gá cue téé xínu cuechi núú-dé: “Quíhíⁿ-ndó cñaha-ndo xii cue ñáyu sa ní cáháⁿ-í cuhuⁿ vico sá sà ní quide túha-í sá cáx-í-yu, te sa ní sahn-í ndicutu ndíhi nchaa dava-gá quití ní dánucíhnu-í, te nchaa sa ní quide túha-í, te na quixí-yu cuhúⁿ-yu vico cächí-í cñaha-ndo”, cächí-dé xáhaⁿ-dē xii cue téé xínu cuechi núú-dé-áⁿ. 5 Dico ní ñáyu ní cáháⁿ-dé-áⁿ ñà túú ní cuín-í-yu quíhíⁿ-yu cuhúⁿ-yu vico. Chi ñáyu ní sáháⁿ-yu ní quide chiúⁿ-yu núú ñúh-í-yu, te ingá-yu ní sáháⁿ-yu ní nadicó-yu núu nándi cùu ndáhú quidē-yu. 6 Te dava-gá-yu ní tñíⁿ-yu dava cue téé xínu cuechi núú téé quide vico-áⁿ, te ní canihá-yu ndéé ní sahn-í ñàhá-yu xii-güedé. 7 Te téé yindaha ñaha xii ñáyu quide vico-áⁿ ñí cudééⁿ víhí-dē sá dúcáⁿ ñí quidē-yu, te ní tendaha-dē cue sandadú-dé ní sáháⁿ-güedé ní sahn-í-güedé cue ñáyu ducaⁿ ñí quide-áⁿ, te ní sahm-í-güedé nchaa vehe càa ñuú-yu. 8 Te sáta dúcáⁿ te

ní xáhaⁿ-dē xii dava-gá cue téé xínu cuechi núú-dé: “Nchaa sa ndécu túha, te cue ñáyu ní cáháⁿ-í cuhuⁿ vico-a ñí cùu ñà túú-gá tau-yu sá cùhúⁿ-yu. 9 Te chí cuáháⁿ ndēni ní cuu te cáháⁿ-ndó nchaa ñáyu na nánihí-ndó ìchi na quixí-yu cuhúⁿ-yu vico-a”, cächí-dé xáhaⁿ-dē xii-güedé. 10 Te cue téé xínu cuechi-áⁿ ñí quee-güedé cuáháⁿ-güedé, te ní cáháⁿ-güedé nchaa ñáyu ní nanihí-güedé ìchi, te cuēi ñáyu váha iní-xi, te cuēi ñáyu cuíhna iní-xi, te ní chít-í-yu núú cúu vico-áⁿ.

11 Te sáta dúcáⁿ te téé yindaha ñáyu quide vico-áⁿ ñí quíhu-dé xití vehe ní xindéhé-dē cue ñáyu ñúhu vico-áⁿ, te ní xíní-dé ñí téé ñùtnahá tnuú-yu te ñà túú càa dóó-dē dàtná cáá dōó níhnú cuē ñáyu ñúhu vico-áⁿ. 12 Te ní xáhaⁿ-dē xii téé-áⁿ: “¿Táta, nása ní cuu cuánguñhu-ó iha, te ñà túú càa dóó-n dàtná cáá dōó níhnú cuē ñáyu ñúhu vico-áⁿ tñándaha-í?”, cächí-dé xáhaⁿ-dē xii téé-áⁿ. Dico téé-áⁿ ñà túú ní níhí-dē tñúhu cáháⁿ-dē. 13 Te téé yindaha ñáyu quide vico-áⁿ ñí xáhaⁿ-dē xii cue ñáyu xínu cuechi núú mèsá: “Chí tñíⁿ téé-áⁿ te dacùtu-ndo-dé, te queñuhu-ndo-dē ná quíhíⁿ-dē cundecu-dé ñí xichi núú néé núú ío ndoho-dé, te yacáⁿ ío ndáhyú-dé te dicó rúhñú-ná cuu núhu-dé sá sátú iní-dé sá ndóhó-dē”, cächí-dé xáhaⁿ-dē xii cue ñáyu xínu cuechi núú mèsá-áⁿ. 14 Te duha ndùu cuendú cáháⁿ-í chí ío cuéhé ñáyu cáháⁿ ñàhá Yá Ndiòxí xií-yu, dico sacú-ni-yu nduu

táhũ-yu cundecú-yu ndihí-gá
—càchí-gá xáhaⁿ-gã xii-güedé.

Cuendá impuèstú

(Mr. 12:13-17; Lc. 20:20-26)

15 Te cue tée cùu fariséú ní sáháⁿ-güedé ìⁿ xichì ní ndatnúhu-güedé nàcuáa cada-güedé daticánuu-güedé Jèsús núú tñúhu càháⁿ-gá cuendá ducaⁿ ñihí-güedé nàcuáa cada-güedé cacáⁿ cuéchi-güedé cuendá-gá. 16 Te ní tendaha-güedé ìⁿ úú cue tée cùndihí-güedé, ndihí cue tée cùndihí té Hèrodés cuáháⁿ-güedé núú ndécú Jèsús. Te òré ní quexìo-güedé núú ndécú-gã, te ní xáhaⁿ-güedé xii-gá:

—Mèstrú, ñihí-ndí tñúhu sá ìo ndáá càháⁿ-n, te càháⁿ ndáá-n nàcuáa càháⁿ Yã Ndiõxí cundecu-o ñùyíu-a, te cuèi nděda-ni càa ñáyiu ìⁿ-ni càháⁿ-n ndihí-yu chi ñá túú quide cuendá-n cuèi ná ñáyiu cùú-yu. 17 Te cachí tñúhu xii-ndí, núú váha-ni quide-ndí sá chãhu-ndí té Cèsár tée ío cùnuu cuendá impuèstú áⁿ ñáhá —càchí-güedé xáhaⁿ-güedé xii-gá.

18 Dico Jèsús ní cutnùni iní-gá sá xító ndèé ñáhá-güedé xii-gá, núú ní xáhaⁿ-gã xii-güedé:

—Nchòhó cue tée dàndahú mée-xí sá quidé ndáá te ñá ndáá sá quidé ndáá-ndó, ¿ná cuendá xító ndèé ñáhá-ndó xii-í? 19 Chí dánèhé ñáhá xii-í ìⁿ díhúⁿ sã chãhu-ndo cuendá impuèstú núú nása càa —cachí-gá xáhaⁿ-gã xii-güedé.

Te ní dánèhé ñáhá-güedé xii-gá ìⁿ díhúⁿ sã nání dènariú. 20 Te òré ní xiní-gá díhúⁿ-ãⁿ te ní xícáⁿ tñúhú-gã núú-güedé, te xáhaⁿ-gã:

—Chí càchí tñúhu yoo núú-xi ndèé ndihí yoo ñiú-xi ndèé —càchí-gá xáhaⁿ-gã xii-güedé.

21 Te ní xáhaⁿ-güedé xii-gá: —Núú tè Cèsár ndèé ndihí ñiú-dé —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Te núú ducaⁿ te chí nàcuáha té Cèsár sá cúú cuendá-dé, te sá cúú cuendá mée Yã Ndiõxí te xiáⁿ nacuáha-ndo-gã —càchí-gá xáhaⁿ-gã xii-güedé.

22 Te cue tée-áⁿ ìo ní cuñúhu-güedé sá dúcáⁿ ñí càháⁿ-gá, te ní natñi-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

23 Te ñiú-ni nduu-ãⁿ ñí quexìo ìⁿ úú cue tée cùu saducéú núú ndécú Jèsús. Te cue tée-áⁿ ñá túú sàndáá iní-güedé sá ndótó cuè ñáyiu ní xihí, te ní xáhaⁿ-güedé xii-gá:

24 —Mèstrú, ndíi Moisés ní cachí ndíi sá núu ìⁿ tée ndècu ñadihí-xi cuú-dé te quendóo ñadihí-dé, te núú ñá túú dèhe-dé ní xõo ndihí-aⁿ te tée cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá ñaní-dé tée ní xihí-áⁿ. 25 Te ñuú-ndí-a ní xindecu úsá tñahá cue tée mee-ni ndí ñaní-güedé. Te tée díhna ní

níhí ñadìhí-dé te ñá túú ní cùdí-dé cundecu-dé chi ní xíhí-dé, te ni ìⁿ déhe-dé ñá túú ní xõ ndihí ñadìhí-dé-áⁿ. Te tée cùu uú ní ñaqueheⁿ-dé ñaha ní quendóo quée-áⁿ.
 26 Dico ní xíhí tucu-dé, te ni ìⁿ tucu déhe-dé ñá túú ní xõ ndihí ñaha-áⁿ, te ñu-ni ducaⁿ ñí yáha tée cùu uní, te ní xínu ndi ùsá-güedé ní cándeca ñaha-güedé xii ñaha-áⁿ dico ñu-ni ducaⁿ ñí xíhí-güedé. 27 Te ndéé núú ñí ndihí-ná te ní xíhí tnàhá ñadìhí-áⁿ. 28 Te na sàá nduu ndòto-güedé ndihí ñaha-áⁿ, ¿te ndédacàa-güedé ñadìhí-güedé cuu-aⁿ-í? Chi ndi ùsá-güedé ní cándeca ñaha-güedé xii-aⁿ —càchí-güedé xàhaⁿ-güedé xii-gá.

29 Te Jèsús ní xáhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xíní-ndó ñacuáa càháⁿ Yá Ndiõxí núú tütú-gá, te ni ñá túú cùnuni iní-ndó sá díu-gá ndácú-gá quidé-gá nchaandi túhú sá vaha. 30 Te na càchí tnúhu-í xii-ndo sá òré ná sàá nduu ndòto nchaa ñáyiu ní xíhí, te dàvá-áⁿ vã yõo-gá dasaⁿ dèhe yoco-xi chi vá yõo-gá candeca tnàha, chi cuu-ná-yu dàtná cue espíritú xínu cuèchi núú Yá Ndiõxí. 31 ¿Te náa ñá túú quide cuendá-ndó ñacuáa càháⁿ Yá Ndiõxí núú tütú-gá núú càháⁿ-gá cuendá cue ñáyiu ní xíhí-áⁿ? Te duha càchí-gá: 32 “Yúhú cùu-í Ndiõxí tẽ Abrahám, ndihí tẽ Isàác, ndihí tẽ Jácób”, duha càchí-gá núú tütú-gá. Te cue tée-áⁿ chi cuèi

ní xíhí-güedé núú ñùyíú-a, dico sá cùu-xí Yá Ndiõxí chi ndècu vívú-ni-güedé. Chi ñu-gá cùu-gá Ndiõxí mee-ni cue ñáyiu xíndecu vívú, te ñá túú cùu-gá Ndiõxí cue ñáyiu ñá túú ndècu vívú —càchí-gá xàhaⁿ-gá xii-güedé.

33 Te sá dúcáⁿ ñí càháⁿ-gá ní xii-gá cue tée-áⁿ, te ío ní cuñúhu nchaa ñáyiu cuendá sá ío váha ndùu tnúhu ní càháⁿ-gá.

*Tnúhu sá ío-gá cùnùu
(Mr. 12:28-34)*

34 Te cue tée cùu fariséú ní xíní-güedé ní sadí Jèsús yuhu cue tée cùu saducéú, chi ñá túú ní ñihí-gá-güedé tnúhu cùñaha-güedé xii-gá, te cue tée cùu fariséú-áⁿ ñí natacá-güedé te cuaháⁿ-güedé núú ndécú Jèsús. 35 Te ìⁿ tée cùu fariséú-áⁿ ío váha cùnuni iní-dé ñacuáa nduu nchaa tnúhu ní chídó tnùní ndíi Moisés te xito ndeé-dé Jèsús, te xàhaⁿ-dẽ xii-gá:

36 —Mèstrú, cachí tnúhu ndédacàa tnúhu sá ñí chídó tnùní ndíi Moisés ío-gá cùnùu cada-o —cachí-dé xàhaⁿ-dẽ xii-gá.

37 Te Jèsús ní xáhaⁿ-gá xii-dé:

—Duha càháⁿ tnúhu sá ío-gá cùnùu: “Cuu iní-ndó Dütú Ndiõxí Yaá cùu Ndiõxí-ndó ñí yuhu ñí iní-ndó, te caní iní-ndó càda-ndo datná cùní mée-gá, te mee-ni tnúhu váha caní iní-ndó ñacuáa cuu víi cuu váha-ndo núú-gá”, 38 duha càháⁿ tnúhu sá ío-gá cùnùu. 39 Te duha càháⁿ tucu íngá tnúhu cùu uú sá ío cùnùu, te sa yatni ìⁿ-ni cùu-xi ndihí

tnúhu díhna nuu, te cächí-xi: “Cuu iní-ndó tnàha ñáyiu-ndo dàtná cúu iní-ndó mèe-ndo”, duha càháⁿ tnúhu cùu uú-áⁿ,
 40 Te cuendá úú tnúhu-a ní cáá nchaa tnúhu ní cáháⁿ ndíi Moisés nàcuáa cada ñáyiu, te ñu-ni cuendá úú tnúhu-a ní cáá tnúhu ní cáháⁿ nchaa cue téé ní xóo cáháⁿ tnúhu Yá Ndiõxí ndéé sanaha — cächí-gá xáhaⁿ-gá xii-güedé.

Yoo cùu Xítóhó Jesucristú

(Mr. 12:35-37; Lc. 20:41-44)

41 Te ndècu ducaⁿ-ni cue téé cùu fariséú núú ndécú Jèsús. 42 Te ní xícaⁿ tnúhú-gá núú-güedé, te xáhaⁿ-gá:

—Cuíní-í cachí tnúhu-ndo yòo déhe-xi cùu Cristú Yáá tendaha Yá Ndiõxí quixi ñuyíu-a —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Déhe ndíi Dàvíí cúu Yáá-áⁿ—cächí-güedé xáhaⁿ-güedé xii-gá.

43 Te Jèsús ní xáhaⁿ-gá xii-güedé:

—¿Te nása cächí-tu-ndo sã dèhe ndíi Dàvíí cúu Cristú Yáá tendaha Yá Ndiõxí quixi ñuyíu-a, te mee ndíi Dàvíí-áⁿ ní dácáhu iní ñáhá Espíritú Yá Ndiõxí xii ndíi, te ní cachí ndíi sá Cristú Yáá tendaha Yá Ndiõxí quixi ñuyíu-a cùu-gá Xítóhó ndíi? Te duha ní cachí ndíi:

44 Dútú Ndiõxí ní xáhaⁿ-gá xii Yáá cúu Xítóhó-í:

“Ngóo xio cùha-í, te yúhú cada-í te nchaa sá cúu ùhú iní ñáhá xii-n canehe-xi sá yíñuhu núú-n.”

Duha ní xáhaⁿ Dútú Ndiõxí xii Yáá cúu Xítóhó-í, cächí ndíi.

45 ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gá Xítóhó ndíi? — cächí Jèsús xáhaⁿ-gá xii-güedé.

46 Te ní ñiⁿ-güedé ñá túú-gá ní ñíhí-güedé tnúhu cúñaha-güedé xii-gá. Te ndéé nduu-áⁿ ñá túú-gá ní cùyíi-güedé ná tnúhu cácaⁿ tnúhú-güedé núú-gá.

23

Jèsús càháⁿ-gá cuendá cue téé cùu fariséú ndíi cuendá cue téé dàcuaha ñaha xii ñáyiu

(Mr. 12:38-40; Lc. 11:37-54; 20:45-47)

1 Te Jèsús ní cáháⁿ ndodo-gá núú nchaa ñáyiu, ndíi núú cuè téé xica cuu ndíi-gá, te xáhaⁿ-gá:

2 —Cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíi cue téé cùu fariséú ndécú ndíi-güedé tnúhu ndee iní cáháⁿ-güedé nchaa tnúhu sá ní chídó tnùní ndíi Moisés-áⁿ.

3 Te cada-ndo nàcuáa dànehé ñáhá-güedé xii-ndo, dico vá cáda-ndó dàtná xíquide-güedé, chi tucu ndúu tnúhu càháⁿ-güedé, te tucu quide-güedé. 4 Te quide-güedé dàtná quidé ñáyiu dàcuido ñiⁿ tnaha ñáyiu-xi ñiⁿ sá ño véé, te mèé-yu ni lùha ñá túú cuíní-yu cuidó-yu. Te ducaⁿ sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuíní-güedé cada-güedé nàcuáa dànehé ñáhá-güedé xii-ndo. 5 Te mee-ni ndúcu-güedé nàcuáa

quède-güedé cuendá quini ñáiyu sá ïo cùu cahnu-güedé. Te ndèé xindá sá ndèé ìⁿ ùú tnúhu Yá Ndiõxí tneé-güedé ndihí ndaha-güedé, te tnàhá iní-güedé sá ïo-gá cunduu quèhéⁿ xindá-áⁿ dàcúúxí xindá dava-gá ñáiyu. Te tnàhá tucu iní-güedé sá ïo-gá cunduu nàni núú dõó sácúihnu-güedé dàcúúxí dõó sácúihnu dava-gá-yu. ⁶ Te ndi tnahá òré sácõo vico, òré quíhu-güedé mèsá caxi-güedé te ío-gá cúdǎí iní-güedé cunucóo-güedé núú xilé núú sácõo cue téé cùnuu-gá, te ðiu-ni ducaⁿ quide tucu-güedé cuèi xití veñúhu. ⁷ Te nchaa núú xicá cùu-güedé cuiní-güedé sá ndihí tnúhu yñùhu cáháⁿ ndihí ñaha ñáiyu xii-güedé, te cuiní tucu-güedé sá cǔñàhá-yu xii-güedé mèstrú.

⁸ 'Dico nchòhó vá cǔñaha-ndo xii ñáiyu sá cǔñàhá-yu mèstrú xii-ndo, chi nchòhó ìⁿ-ni cùu-ndo ndecu-ndo, chi ducaⁿ ìⁿdii-ni yúhú Yaá ní tendaha Yá Ndiõxí véxi ñuyíú-a cùu-í Mèstrú ndécú ndihí ñaha-í xii-ndo. ⁹ Te ìⁿdii-ni Dútú Ndiõxí Yaá ndécú àndiu cuu-gá Tátá-ndó, núu xǎⁿ vá cáháⁿ-ndó sá dàva cue téé ñuyíú-a cùu-güedé tátá-ndó. ¹⁰ Te ni vá cání iní-ndó càda-ndo nacuáa cáháⁿ ñáiyu sá cúnùu-ndo, chi ìⁿdii-ni yúhú Crístú Yaá ní tendaha Yá Ndiõxí véxi ñuyíú-a cùnuu-í. ¹¹ Te ñáiyu ío-gá cúnùu ndecu ndihí-ndo, ñáiyu-áⁿ cúú-yu ñáiyu xìnu cuechi núú-ndó.

¹² Te nchaa ñáiyu quide cahnu mee-xi ñáiyu-áⁿ vǎ cúú-yu ñáiyu cùnuu, te nchaa ñáiyu ñá túú quide cahnu mee-xi ñáiyu-áⁿ cunúú-yu.

¹³ 'Te nchòhó cue téé dàcuaha ñaha xii ñáiyu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cùu-ndo cue téé ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndáhú ní cuu-ndo chi sǎdǎ-ndó ìchi ñáiyu ñá dáñá-ndó ndíhu ndaha ñaha Yá Ndiõxí xii-yu, te ni mèe-ndo ñá túú quide-ndo nacuáa ndíhu ndaha ñaha-gá xii-ndo, te ni dàva-gá cue ñáiyu cuiní sǎ ndíhu ndaha ñaha-gá xii-yu ñá dáñá-ndó.

¹⁴ 'Te nchòhó cue téé dàcuaha ñaha xii ñáiyu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndáhú ní cuu-ndo chi quèndeé-ndó vèhe cue ñáiyu quèé, te ío naha cáháⁿ ndihí-ndo Yá Ndiõxí cuendá cuiní-ndó sǎ vǎ yõo cutnùní iní-xi nàcuáa quide-ndo. Te sǎ dúcáⁿ quide-ndo te ío-gá ndoho-ndo nǔú ùhú núú ndáhú dàcúúxí dàva-gá ñáiyu.

¹⁵ 'Te nchòhó cue téé dàcuaha ñaha xii ñáiyu nchaa tnúhu ní chídó tnùní ndíi Moisés, ndihí nchòhó cue téé cùu fariséú, cúú-ndó cuè téé ío dándahú méé-xí sǎ quidé ndǎá te ñá ndǎá sǎ quidé ndǎá-ndó, te ndáhú ní cuu-ndo chi sǎhni

iní-ndó cuáháⁿ-ndó ndëni ní cuu dàcaháⁿ-ndó ñáyi cuendá cuiní-ndó tníⁿ-yu ichi ndècu-ndo. Te òré ná xínu iní-yu tniⁿ-yu ichi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

16 'Te nchòhó cúú-ndó datná cue ñáyi cuàá, chi ñá cutnùní iní-ndó nàcuáa canu ichi-ndo ñáyi, te ndàhú ní cuu-ndo chi càchí-ndó: "Híⁿ ñáyi na càcunehe veñúhu càhnu sá ïo cùnnu oré cuiní-yu cutnùní iní tnàha ñáyiú-yu sá ndàá cadá-yu ìⁿ sá sání iní-yu cadá-yu, te v́a cúú cuèchi xií-yu cuèi v́a cadá-yu. Dico núu na càcu nehé-yu díhúⁿ cuàáⁿ yíhí xítí veñúhu-áⁿ te cuu cuèchi xií-yu te núu v́a cadá-yu sá ní cachí-yu cadá-yu", duha càchí-ndó.

17 'Nchòhó cúú-ndó cuè téé ío ní dǐquí-xi, te cùu-ndo datná cue ñáyi cuàá chi ñá tècú tnùní-ndó! Te v́a càchí-ndó sá ïo-gá cùnnu díhúⁿ cuàáⁿ dàcúúxí veñúhu, chi ñu cuendá veñúhu-áⁿ ní cuu íí díhúⁿ cuàáⁿ-áⁿ. 18 Te càchí tucu-ndo: "Híⁿ ñáyi na càcunehe xító núú sácódó sá ndúú tǎhú Yá Ndiòxí òré cuiní-yu cutnùní iní tnàha ñáyiú-yu sá ndàá cadá-yu ìⁿ sá sání iní-yu cadá-yu, te v́a cúú cuèchi xií-yu cuèi v́a cadá-yu, dico núu na càcu nehé-yu sá ndúú tǎhú Yá Ndiòxí yódó núú xító-áⁿ te cuu cuèchi xií-yu te núu v́a cadá-yu sá ní sani iní-yu cadá-yu", duha càchí-ndó. 19 'Te cùu-ndo cuè téé ío ní dǐquí-xi, te cùu-ndo datná cue ñáyi cuàá chi ñá tècú

tnùní-ndó! Te v́a cání iní-ndó sá ïo-gá nándihí sá ndúú tǎhú Yá Ndiòxí sácódó núú xító núú sácódó tnàhí sá ndúú tǎhú-gá-áⁿ dàcúúxí mèe xító-áⁿ. 20 Chi nchaa ñáyi ducaⁿ càcunehe xító-áⁿ, te tnàhá-ni sá yódó núú-xi càcu nehé-yu òré ducaⁿ càháⁿ-yu. 21 Te nchaa ñáyi ducaⁿ càcunehe veñúhu càhnu sá ïo cùnnu te ñá díú mèe-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndiòxí Yaá cúú cuendá veñúhu-áⁿ cǎcú nehé-yu òré ducaⁿ càháⁿ-yu. 22 Te nchaa ñáyi càcunehe andíu cuendá cutnùní iní tnàha ñáyiú-yu sá ndàá cadá-yu ìⁿ sá sání iní-yu cadá-yu, te ñá díú mèe-ni andíu cacu nehé-yu chi tnàhá-ni núú núcóo Yá Ndiòxí táxí tnùní-gá cǎcú nehé-yu òré ducaⁿ càháⁿ-yu, te tnàhá mèé-gǎ cǎcú nehé-yu òré ducaⁿ càháⁿ-yu.

23 'Te nchòhó cue téé dàcuaha ñaha xii ñáyi nchaa tnúhu ní chídó tnùní ndí Moisés, ndihí nchòhó cue téé cùu fariséú, cúú-ndó cuè téé ío dándahú mèé-xí sá quidé ndàá te ñá ndàá sá quidé ndàá-ndó. Te cuèi núú ùxí xichí yúcú mǎntá nihí-ndó, te sǎñaha-ndo ìⁿ xichí xii Yá Ndiòxí, te ñu-ni ducaⁿ quide-ndo yúcú nání àní, ndihí yúcú nání còminú, dico ndàhú ní cuu-ndo chi ñá túú quide cuendá-ndó nàcuáa càháⁿ nchaa tnúhu sá ïo-gá cùnnu sanu ichi ñaha xii-ndo, te tnúhu-áⁿ càchí-xi sá ïo xini ñuhu-xi cada ndàá-ndó cùndecu-ndo, te cundàhú iní-ndó cuè tnaha ñáyi-ndo,

te quindáá iní-ndó Yá Ndiöxí, te cada-ndo nchaa nacuaá ndùu tnúhu cãháⁿ-ndó, te nchaa tnúhu-án cúu-xí tnúhu sá io cùnuu xini ñuhu-xi cada-ndo nacuaá cãháⁿ-xi, dico vá dáñá ndèé-ndó cada-ndo nchaa dava-gá nãcuáa cãháⁿ tnúhu sá sánú ichi ñaha xii-ndo. ²⁴ Te nchòhó cúu-ndó dàtná cue ñáyiú cuáá, chi ñá túú cùtnuní iní-ndó nãcuáa canu ichi-ndo ñáyiú, chi quide cuendá-ndó mèe-ni nchaa tnúhu sá ñà túú io cùnuu, dico nchaa tnúhu sá io-gá cùnùu xini ñuhu-xi cada cuendá-ndó ñà túú quide cuendá-ndó!

²⁵ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue téé cùu fariséú, cùu-ndo cue téé ío dándahú méé-xí sã quidé ndáá te ñã ndáá sã quidé ndáá-ndó. Te ndàhú ní cuu-ndo chi cùu-ndo datná cue ñáyiú nãquete sátá-ni tàsáⁿ ndíhi sátá-ni còhó te xití-xi càndehe caduha-ni. Te ducaⁿ sãtnahá-xi cùu-ndo chi mee-ni sã ndécú ndíhi tnaha ñáyiú-ndo ñuhu ini-ndó, te nãndi dándahú-ndó-yu te quèheⁿ-ndo sã ndécú ndíhi-yu. ²⁶ Te nchòhó cue téé cùu fariséú, cúu-ndó dàtná cue ñáyiú cuáá, chi ñá túú cùtnuní iní-ndó nãcuáa ndùu sã quidé-ndó. Te ío xini ñuhu-xi sã cádá-ndó nãcuáa nduu ndoo nduu nine iní-ndó cuendá ndacu-ndo cada-ndo sã vãha, te xiãⁿ nùu chí cádá dàtná xiquide ñáyiú nãquete ndaa xití tàsáⁿ ndíhi ndaa xití còhó.

²⁷ Te nchòhó cue téé dàcuaha ñaha xii ñáyiú nchaa

tnúhu ní chídó tnùní ndíi Moisés, ndíhi nchòhó cue téé cùu fariséú, cùu-ndo cue téé ío dándahú méé-xí sã quidé ndáá te ñã ndáá sã quidé ndáá-ndó. Te ndàhú ní cuu-ndo chi cùu-ndo datná núu yíndüxi ndíyi núu ní cuáha vii te ní nacáhyú sã cuixíⁿ, dico xití yaú-áⁿ chi càndehe caduha chi mee-ni yiqui ndíyi ñuhu. ²⁸ Te ducaⁿ sãtnahá-xi cùu-ndo chi sãnuu sã cúu-ndó cuè téé vãha dico ini-ndó chi mee-ni sã cuèhé sã dúhá ñuhu, te ío dándahú-ndó mèe-ndo sã quidé ndáá-ndó te ñã ndáá sã quidé ndáá-ndó.

²⁹ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue téé cùu fariséú, cúu-ndó cuè téé ío dándahú méé-xí sã quidé ndáá te ñã ndáá sã quidé ndáá-ndó. Te ndàhú ní cuu-ndo chi càdúha-ndo nchaa núu ní nguíndüxi cue téé ní xóo cáháⁿ tnúhu Yá Ndiöxí ndéé sanaha, te ío vii quide-ndo nchaa núu sã ní cuáha núu yíndüxi cue ñáyiú ní quide vãha ní xíndecu ñuyíú-a. ³⁰ Te càchí-ndó: “Te núu dícó nchoo ni xíndecu-o cùtnahá ní xíndecu cue ñaní tnáhá-ó ndéé sanaha, te vá chítnahá-ó-güedé cahni-o cuè téé ní xóo cáháⁿ tnúhu Yá Ndiöxí dàvá-áⁿ ní cùu”, duha càchí-ndó. ³¹ Te sã dúcáⁿ cãháⁿ-ndó, te xiãⁿ cùtnùní sã ñíⁿ-ní cùu-ndo ndíhi cue ñaní tnáhá-ndó cuè téé ní xíndecu ndéé sanaha, cue téé ní sahní ñaha xii cue téé ní cáháⁿ tnúhu Yá Ndiöxí dàvá-áⁿ. ³² Te núu ducaⁿ te chí dáxiú cava chiúⁿ

ní tausaha-güedě.

33 'iTe nchòhó cúú-ndó cuè téé ío cuihna iní-xi, chí cùu-ndo datná cóó dēēn! Te nchòhó vá ñihí-ndó nàcuáa cada-ndo cācu nihnu-ndo núú úhú núú ndàhú. 34 Te cuèndá xǎáⁿ núu tendaha-í cue téé càháⁿ tnúhu Yá Ndiǒxí quixi núú-ndó, ndihi cue téé ío mestrú danèhé ñáhá xii-ndo tnúhu-gá, ndihi cue téé ío váha cùtnuní iní-xi cuèndá càháⁿ-güedé tnúhu-gá núú-ndó. Dico nchòhó chí da cùu úhú iní-ndó-güedě, chí dava-güedé cahni-ndo-güedě, te dava-güedé cata caa-ndo-güedě núú cùrúxí, te dava-güedé cani-ndo-güedě xití veñúhu, te ndí tnahá ñuú ndí tnahá ñuú quihíⁿ-ndó nànducu-ndo-güedé cuèndá cada úhú iní-ndó-güedě. 35 Te sá dúcáⁿ ná càda-ndo, te ndadíquí-ndó cuè téé ní quide ndáá ní xíndecu ní xíhí ní sahani ñaha cuè ñaní tnahá-ndó. Te ndéé ndíi Àbél téé ío váha ní quide ndáá ní xíndecu ní sahani-güedé ndadíquí-ndó, ndihi nchaa dava-gá cue téé ní sahani-güedé, ndihi ndéé ndíi Zacàriá déhe ndíi Berèquiás téé ní sahani-güedé ndéé núú ní ndihi-ná ndadíquí-ndó, te ndíi-áⁿ ní sahani-güedé mei tnúú veñúhu càhnu sá ío cùnuu ndihi xito núú sácòdó sá ndúú tǎhú Yá Ndiǒxí, te nchaa cue téé-áⁿ ndadíquí-ndó chí datná tnúhu mee-ndo ní sahani-ndo cuè téé-áⁿ, chí ñu-ni ñaní tnahá mèe-ndo ducaⁿ ní sahani ñaha xii-güedě. 36 Te na càchí tnúhu ndáá-í xii-ndo sá nchàa cue

tée ní quide ndáá ní xíndecu ní sahani-güedé, nchaa cue téé-áⁿ ndadíquí nchaa ñáyiú ndècu vitna —cachí-gá xǎhaⁿ-gá xii-güedé.

Jèsús càháⁿ-gá cuèndá ñáyiú ñuú Jerusalén

(Lc. 13:34-35)

37 Te xǎhaⁿ Jèsús xii ñáyiú ñuú Jerusalén:

—Nchòhó ñáyiú ñuú Jerusalén sahani-ndo cue téé ní tendaha Yá Ndiǒxí véxi càháⁿ tnúhu-gá núú-ndó, te mee-ni ndihi yúú sáhní-ndó dáva-güedé. 'iTe yúhú titní xito ní cuiní-í coto ñaha-í xii-ndo datná quidé nchùxi xito-güedi déhe-güedi sàquíhi-güedi xití ndíxíⁿ-güedi, dico nchòhó ñá túú ní cuiní-ndó, te ñu-ni ducaⁿ sàni iní-í ndéé vitna! 38 Te na càchí tnúhu ndáá-í xii-ndo sá sáá nduu te ío ndàhú yáha ñuú-ndó, te vá cùndècu-gá-ndó. 39 Te na càchí tnúhu tucu-í xii-ndo sá vǎ quíní ñáhá-gá-ndó xii-í, dico sáá nduu quíní ñáhá tucu-ndo, te dàv-áⁿ cachí-ndó: “Ío càhnu cuu Yaá ní tendaha Dütú Ndiǒxí véxi”, duha cachí-ndó —càchí-gá xǎhaⁿ-gá xii-yu.

24

Jèsús càchí-gá sá ngóyó veñúhu

(Mr. 13:1-2; Lc. 21:5-6)

1 Te Jèsús ní quee-gá veñúhu càhnu sá ío cùnuu, te mei òré ní queheⁿ-gá ichi quihíⁿ-gá ñⁿ xichi, te ní sàndehe yatni cue téé xica cuu ndihi-gá ñíñi-gá, te xǎhaⁿ-güedě xii-gá:

—Cundehe veñúhu-a nã ío váha ní sáá —càchí-güedé xãhaⁿ-güedë xii-gá.

² Te Jësús ní xáhaⁿ-gã xii-güedé:

—Na càchí tnúhu ndáá-í xii-ndo sã ncháá sã ndéhé-ndó-á vitna saá nduu te vá cündüu-gá-xi dàtná cáá-xí vitna, chi ni ìⁿ-gá yúú vã códó nchìhi tnaha-xi chi ndìhi ngoyo —càchí-gá xãhaⁿ-gã xii-güedé.

Nàcuáa cada-xi nduu ta cùyatni naa ñuyíú-a

(Mr. 13:3-23; Lc. 21:7-24; 17:22-24)

³ Te Jësús ní sáá-gá ndìhi cue téé xìca cuu ndìhi-gá yucu Òlívú, te xíaⁿ nĩ ngóo-gá te núú núcõo-gá-áⁿ nĩ sáháⁿ cue téé xìca cuu ndìhi-gá, te dayuhu nĩ xáhaⁿ-güedë xii-gá:

—Cuìní-ndí cachí tnúhu-n nã nduu dùcaⁿ cada-xi ngoyo veñúhu càhnu sá ío cùnuu, ndìhi nándi cùu sá cádá-xí òré sa ta cùyatni nduu quixi tucu-n ñuyíú-a, ndìhi òré sa ta cùyatni naa-xi —cachí-güedé xãhaⁿ-güedë xii-gá.

⁴ Te Jësús ní xáhaⁿ-gã xii-güedé:

—Ío quìhi iní-ndó cùndecu-ndo¹³ cuendá sá vã yõo dandàhú ñáhá xii-ndo. ⁵ Chi ío cuéhé cue téé coo ñuyíú, te danàni-güedé méé-güedé dàtná nàni-í, te cachí-güedé:

“Yúhú cù-í Crìstú Yaa ní tendaha Yã Ndiõxí véxi ñuyíú-a”, duha cachí-güedé. Te sá dúcáⁿ cãháⁿ-güedé te ío vai ñáyiu dandàhú-güedé. ⁶ Te níhí-ndó tnúhu nàá-güedé ndëni ní cuu, dico vá yuhú-ndó chi dacuití

sã dúcáⁿ càda-xi, dico vátá sáá-gá nduu nàa ñuyíú òré ducaⁿ càda-xi. ⁷ Chi cue téé ìⁿ nacióⁿ nàá-güedé ndìhi cue téé ingá nacióⁿ, te titní ñúú ngúita-güedé nàá-güedé, te titní xichi ñuyíú coo tnamá, te titní tucu xichi ñuyíú quixi cuéhé, te titní tucu xichi ñuyíú ío níhi tnáa. ⁸ Te nchaa xíaⁿ cuu-xi tnúndòho sá vitná váha váha quèsaha sá cúú-xí cué ñáyiu xĩndecu ñuyíú.

⁹ Te cue ñáyiu na cùu úhú iní ñáhá xii-ndo cuáha cuendá ñáhá-yu núú cué téé cùchiuⁿ cuendá caniha-güedë xii-ndo, te dava-ndo càhni ñaha-güedé, te nchaa ñáyiu cuu úhú iní ñáhá-yu xii-ndo sã cuendá-í. ¹⁰ Te dàvá-áⁿ ío vai ñáyiu dàñá-yu sá sàndáá iní-yu Yá Ndiõxí, te ngóo-yu cuu úhú iní tnáhá-yu, te cuáha cuendá tnáhá-yu núú cué téé cùchiuⁿ. ¹¹ Te ío vai cue téé cachí-güedé sá cãháⁿ-güedé tnúhu Yá Ndiõxí te ñá ndáá sá cãháⁿ-güedé tnúhu-gá, te ducaⁿ ío vai ñáyiu dandàhú-güedé. ¹² Te dàvá-áⁿ cunuu mèe-ni nchaa sá cuéhé sá dúhá cádá-yu, te vai-yu vá cúú ìní-gá-yu tnàha ñáyíú-yu.

¹³ Dico nchaa ñáyiu na càda ndee-ni iní canchicúⁿ nihnu ñaha-ni xii-í, ñáyíú-áⁿ naníhí tãhú-yu. ¹⁴ Te nihí ñuyíú quíhíⁿ ñáyíú cãháⁿ-yu tnúhu váha, tnúhu sá cãháⁿ nàcuáa ndìhu ndaha ñaha Yá Ndiõxí xii ñáyíú, te sátá ná nihí nchaa ñáyíú tnúhu-áⁿ te naa ñuyíú.

¹⁵ Te ndíi Dàniél téé ní xóo cãháⁿ tnúhu Yá Ndiõxí ndéé sanaha nĩ chídó tnùní ndíi cuendá ìⁿ sá dáquèe tihú Yá

Ndiöxí cundecu ñⁿ xichi núú ní cuu íí, te xiǎⁿ cada-xi sá vǎ cúndècu-gá ni ñⁿ ñáyiu xiǎⁿ. Te cada cuendá váha-ndo nàcuáa ní cáháⁿ ndii, chi nduu na quini-ndó xiǎⁿ cundecu-xi núú dúcáⁿ ní cuu íí, ¹⁶ te dàvá-áⁿ nchaa ñáyiu xíndecu distritú Júdeá xini ñùhu-xi cunú-yu quihíⁿ-yu xití yucu. ¹⁷ Te nchaa ñáyiu ndáa ndódó ñiquí vehé-xi vǎ ndihu-gá-yu vehé-yu quehéⁿ-yu ñⁿ ndachíuⁿ-yu canehé-yu quihíⁿ. ¹⁸ Te nchaa ñáyiu cuáháⁿ yucu vá ñùhú-gá-yu vehé-yu cúnúquehéⁿ-yu dóo-yu. ¹⁹ Te ndàhú ní cuu nchaa ñáyiu ñihí ñùhú ñèhe-xi, ndihi cue ñáyiu ñihí xíndeca ñèhe vitna sàdi na saá nduu ñucaⁿ cada-xi! ²⁰ Te nchòhó, chí càcáⁿ tǎhú ñúú Yǎ Ndiöxí cuendá sá vǎ dúcáⁿ ndòho-ndo yóo quidé víxiⁿ-xi, te ni vǎ dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tnúndòho cahnu vihi ñuyíú, te vátá ñⁿ ndùu-gá coo tnúndòho cahnu vihi-áⁿ ndéé cúnáhá ní ngáva ñuyíú, chí ñiu-ni dàvá-áⁿ coo tnúndòho cahnu vihi-áⁿ, te ni ñúú cuáháⁿ núú véxi vá cóo-gǎ tnúndòho-áⁿ. ²² Te Yǎ Ndiöxí càchí-gá sá vǎ ño vai nduu coo tnúndòho cahnu vihi-áⁿ sǎ cuendá nchaa ñáyiu ní cáháⁿ-gá cundecu ndihi-gá. Chí núú vai nduu na coo tnúndòho-áⁿ te vá yóo cácu nihnu.

²³ Te núú ño ñáyiu càchí-yu xii-ndo: “Chí cúndèhe iha, chí iha ní quexio Cristú Yáa ní tendaha Yǎ Ndiöxí

véxi ñuyíú-a”, àdi cachí-yu: “Chí cúndèhe yacáⁿ chí yacáⁿ ndécú-gǎ”, càchí-yu ña. Te vá quindáá ini-ndó tnùhu càháⁿ-yu. ²⁴ Chí coo cue téé cachí-güedé sá cúú-güedé Yáa ní tendaha Yǎ Ndiöxí véxi ñuyíú-a, te dava-güedé cachí-güedé sá cúú-güedé cue téé càháⁿ tnùhu Yá Ndiöxí dico ñá ndáa sá cúú-güedé cue téé càháⁿ tnùhu-gá, te cada-güedé titní núú sǎ vǎ yóo tnàhí ndàcu cada cuendá dandàhú-güedé ñáyiu. Te cani ini-güedé dandàhú-güedé ndéé cue ñáyiu ní cáháⁿ Yǎ Ndiöxí cundecu ndihi-gá. ²⁵ Te ñuha ndùu tnùhu càháⁿ-í dátùha ñaha-í xii-ndo. ²⁶ Te núú càchí-yu xii-ndo: “Xití yucu-áⁿ ní quexio Yáa ní tendaha Yǎ Ndiöxí véxi ñuyíú-a”, càchí-yu. Te vá quindáá ini-ndó quihíⁿ-ndó, àdi cachí-yu: “Vehé-áⁿ ndécú Yáa ní tendaha Yǎ Ndiöxí véxi ñuyíú-a”, càchí-yu. Te vá quindáá ini-ndó tnùhu càháⁿ-yu. ²⁷ Chí dàtná xini nchaa ñáyiu quide-xi oré sǎa nduté dàyehé-xi ni càa xico ñuyíú ñucaⁿ càda-xi oré quixi tucu yúhú Téé cùu ñaní tnáhá-ndó nchaa-ndo chí ncháa-yu quini ñáhá-yu xii-í. ²⁸ Te nchòhó xini-ndó sǎ ncháa ñúú yúcu yiqui cuñú ní xihí te yacáⁿ tàcá nchaa ndixí xéxi-güedi.

Nàcuáa cada-xi ño quixi tucu Téé cùu ñaní tnáhá cue ñáyiu

(Mr. 13:24-37; Lc. 21:25-33; 17:26-30, 34-36)

29 'Te na yãha-ni coo tnúndòho cahnu vihi-án, te vá dáyèhé-gá nchícanhii, te ni vã dáyèhé-gá yóó, te ngoyo nchaa chódíní ndèé andiu, te quidi-xi andiu ³⁰ nàcuáa cutnùní iní ñáyiu sá sà véxi yúhú Tée cùu ñaní tnáhã-yu nchaá-yu. Te cue ñáyiu nihí ñuyíú ndãhyú-yu sá ndihú iní-yu òré ducaⁿ càda-xi, te nchaá-yu quini ñáhã-yu xii-í quee-í andiu quixi-í ichi xití vícò, te quini-yu sá ïo càhnu cuu-í, te quide-í nchaa sá vãha. ³¹ Te tauchìuⁿ-í cue espíritú xínú cuèchi núú-í níhi tiú-xi cútú nadatãcã-xi nchaa ñáyiu ní cáháⁿ-í chitnahã ñáhã xii-í xíndecu ni càa xico ñuyíú.

32 'Te nchòhó sa xìní-ndó nàcuáa quide yutnu ngúxí, chi yutnu-án ndúú yùte núú ditè-xi te nãtãhú ndaha-xi. Te òré ducaⁿ quide-xi te càchí-ndó sã sà ní cuyatni nuu cahni. ³³ Te ñu-ni ducaⁿ sãtnahã-xi càda-xi ñuyíú-a òré ná quini-ndó càda-xi nchaa nacuáa ní cáháⁿ-í, te cutnùní iní-ndó sã sà ní cuyatni víi-nã nduu nãa ñuyíú. ³⁴ Te na càchí tnúhu ndáá-í xii-ndo sã òré vátã cùú-gã nchaa ñáyiu xíndecu ñuyíú-a vitna, te càda-xi nchaa nàcuáa ní cáháⁿ-í. ³⁵ Te andiu ndihí ñuyíú-a chi ndihí nihnu-xi, dico tnúhu-í chi vá ndihí nihnu-xi chi cùu-xi tnúhu ndáá-cití.

36 'Dico ñã túú cùtnuní ná nduu quixi tucu-í, te ni ñã túú cùtnuní ná òré chi vá yõo xini, te ni cuè espíritú xínú cuèchi núú Yã Ndiõxí ñã túú

xini-xi ná nduu quixi-í, te ni mèe yúhú Tée cùu Déhe Dútú Ndiõxí ñã túú xini-í ná nduu quixi tucu-í, chi ñndii díi-ni mee-gã xini-gã núu ná nduu quixi-í.

37 'Te nduu na quixi tucu yúhú Tée cùu ñaní tnáhã-ndó nchãa-ndo ñuyíú-a te càda-xi dàtnã ní quide-xi cùtnahã ní xíndecu ndii Nõé. ³⁸ Chi nchaa ñáyiu ní xíndecu dàvã-án òré vátã ndáá-gã ndute ñuyíú, te xèxi-yu xihí-yu quidè-yu, te davã-yu ió-yu vico tnãndaha, te davã-yu dàsãⁿ-yu déhe yòcò-yu candeca ñaha tõe, te ducaⁿ-ni xíquidè-yu ndéé ní sáá nduu cuãnguee té Nõé xití bàrcú. ³⁹ Te ñã túú ní cùtnuní iní-yu nàcuáa càda-xi ñuyíú ndéé ní sáá nduu ñi ngúita-xi ní cuuⁿ dáú ñi ndaa ndute ñuyíú ñi dánáá ñaha-xi xii-yu. Te ñu-ni ducaⁿ sãtnahã tucu-xi càda-xi nduu na quixi tucu yúhú Tée cùu ñaní tnáhã-yu nchaá-yu ñuyíú-a, chi nduu ñã túú ñã yihí iní-yu te quixi tucu-í. ⁴⁰ Te dàvã-án núu úú tnáhã cue tée yihí-güedé xití yucu, te ñn-dé ndanchita te ñn-dé quendóo. ⁴¹ Àdi úú ñáyiu ñihí nchicõ-yu ñn-ni vèhe, te ñn-yu ndanchita te ñn-yu quendóo.

42 'Te duha nduu tnúhu càháⁿ-í cuendã nchòhó cundecu túha-ndo, chi ñã túú xini-ndó ñã òré quixi tucu yúhú Yaá cùú Xitohó-ndó. ⁴³ Te nchòhó xini-ndó sã núu ñn tée cùu xitohó vehe xini-dé ná òré cùú-xi niú quihu ñaduhú vehe-dé duhu-güedé, te quihí iní-dé

cundecu-dé cuendá sá vǎ dáñá-dě quihu ñadúhú-ǎⁿ vehe-dé duhu-güedě, dico ñá túú xini-dé. ⁴⁴ Te duha cǎháⁿ-í chi nchòhó xini ñùhu-xi cundecu túha-ndo, chi na cuáháⁿ òré ñá túú nǎ yǐhí ìní-ndó quèxio yúhú Tée cùu ñaní tnáhá-ndó nchàa-ndo.

Cuendá ñí tée xinu cuechi
(Lc. 12:41-48)

⁴⁵ Te na cǎni-í ñí cuendú núu-ndó. ñí tée xinu cuechi núu ñí patróónⁿ cúu-dě ñí tée ío váha təcú tnùní, te quide ndáá-dé ndécú-dě. Te ñí xito ní dándõ ndaha ñàha patróónⁿ-dě xii-dé nchaa cue ñáyiú ndècu vehe-dé cuendá coto ñaha-dě xii-yu cuáñaha-dě sá cǎxi-yu òré tàú-xi cǎxi-yu, te tée cùu patróónⁿ-áⁿ ní quee-dé cuáháⁿ-dé. ⁴⁶ Te váha táhú tée xinu cuechi-áⁿ te núu ndècuu-dé quidè-dě nchaa nǎcuáa ní xáhaⁿ patróónⁿ-dě cada-dé mei òré ní nasáá patróónⁿ-dě-áⁿ. ⁴⁷ Te na cǎchí tnúhu ndáá-í xii-ndo sǎ tée cùu patróónⁿ-dě-áⁿ cǎñaha-dě xii-dé sá quíndàha-dé nchaa sá ndécú ndíhi-dé. ⁴⁸ Dico núu tée xinu cuechi-áⁿ ní cùu-dé ñí tée cuihna ìní-xi, te ngóo-dé caní iní-dé sá cùyàa patróónⁿ-dě vá nasáá ndíhi-dé. ⁴⁹ Te ngüíta-dé caní-dé nchaa dava-gá cue ñáyiú xinu cuechi ndíhi-dé, te ngóo-dé cǎxi-dé coho-dé cada-dé ndíhi nchaa cue tée quihu. ⁵⁰ Te ñí nduu òré ñá túú yǐhi iní-dé nasáá patróónⁿ-dě, ⁵¹ te ío dandõho ñaha patróónⁿ-dě xii-dé, chi daquihíⁿ ñáhá-dě xii-dé núu xindecu cue ñáyiú ní cǎchí

sá ní quide ndáá te ñá ndáá sá ní quide ndáá-yu. Te ducaⁿ sǎtnahá-xi dandõho ñaha Yá Ndiõxí xii ñáyiú, chi daquihíⁿ ñáhá-gǎ xii-yu ñí xichi núú ío ndohó-yu te yácáⁿ ío ndáhyú-yu, te dicó rúhñú-nǎ cuu núhu-yu sá sǎtú iní-yu sá ndóhõ-yu — cǎchí-gá xáhaⁿ-gǎ xii-güedé.

25

Cuendá úxí ñáyiú dǐhí

¹ Te xáhaⁿ tucu Jesús xii-güedé:

—Na cǎni-í ñí cuendú núu-ndó nǎcuáa tecú tnùní-ndó nǎcuáa cada-xi òré ndíhu ndaha ñàha Yá Ndiõxí xii ñáyiú. Te úxí tnáhá ñáyiú dǐhí ñáyiú cuechi ní quehéⁿ-yu lintérmǎ-yu, te cuáháⁿ-yu ñí xichi núú cóo víco tnándaha cuendá cundetú-yu quexio tée tnándaha. ² Te úhúⁿ ñáyiú cuechi-ǎⁿ ío váha cùtnuní iní-yu, te úhúⁿ-yu ñáhá. ³ Te ndí ùhúⁿ ñáyiú cuechi dùcaⁿ ñá túú cùtnuní iní-xi-áⁿ ñá túú ní cǎnehé-yu sá ndèe lintérmǎ-yu. ⁴ Dico ndí ùhúⁿ ñáyiú cuechi cùtnuní iní-xi-áⁿ nehé-yu sá ndèe lintérmǎ-yu. ⁵ Te tée tnándaha-áⁿ cùyàa-dé quexio-dé núú ndétú ñáhá-yu-áⁿ, te ñíni dùcaⁿ cuyaa-dé ní tñí ñaha sàní xii-yu ní xidí-yu. ⁶ Te cùu-xi datná dava niú níhi ní cǎháⁿ dava-gá ñáyiú, te cǎchí-yu: “Sa véxi tée tnándaha, chí táquèe quehé queheⁿ cuendá-ndó-dě”, cǎchí-yu. ⁷ Te ndí ùxí ñáyiú cuechi-ǎⁿ ní ndacóo-yu quide

túha-yu lintérnă-yu. ⁸ Te ndi ùhúⁿ ñáyi cuечи ñà túú cùtnuní iní-xi-áⁿ ñí xáhăⁿ-yu xii cue ndi ùhúⁿ ñáyi cùtnuní iní-xi-áⁿ: “Chí táxi nùu luha sá ndëe lintérnă-ndó ná ndëe lintérnă-ndí chi ñá cuíní-xi cáyú mee-ni ndàhvá”, càchí-yu xáhăⁿ-yu. ⁹ Te cue ñáyi cuечи cùtnuní iní-xi-áⁿ ñí xáhăⁿ-yu: “Vá táxi nùu-ndí chi vá tnàhá canehe chiúⁿ mee-ndí, te váha-gá chí cuàháⁿ cuaaⁿ-ndo núú cuè ñáyi xídícó cuendá sá vâ cùmăní xii-ndo, te vá cùmăní xii nchúhú tucu”, càchí-yu xáhăⁿ-yu. ¹⁰ Te ñini cuàháⁿ ndi ùhúⁿ ñáyi ducaⁿ ñà túú cùtnuní iní-xi-áⁿ cuânguaáⁿ-yu sá ndëe lintérnă-yu ní quexìo téé tnándaha. Te ndi ùhúⁿ ñáyi cuечи cùtnuní iní-xi-áⁿ ñí queheⁿ cuendá ñáhă-yu xii-dé, te cuánguihu ndihi ñàhá-yu xii-dé núú cóo víco tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyi cuечи ñáyi ní sânguaaⁿ sá ndëe lintérnă-xi-áⁿ, te ní ngúíta-yu càháⁿ-yu xínutnîi-yu ndàa sátá yuyèhe ndaa quehé, te xáhăⁿ-yu xii téé tnándaha-áⁿ: “¡Tăta, nacaáⁿ yuyèhe na quihu-ndí!”, càchí-yu xáhăⁿ-yu xii-dé. ¹² Te téé tnándaha-áⁿ ñí xáhaⁿ-dê xii-yu: “Na càchí tnúhu ndáá-í xii-ndo sá nchòhó ñá túú tàú-ndó quihu-ndo víco-a, chi ñá túú tnàhá tnúhu ndihi ñaha-ndo xii-í”, càchí-dé xáhaⁿ-dê xii-yu —càchí Jesús xáhaⁿ-gă xii-güedé.

¹³ Te xáhaⁿ tucu Jesús

xii-güedé:

—Ío quihi iní-ndó cùndecu-ndo, chi ñá túú xini-ndó nă nduu, te ní ñà túú xini-ndó nă òré quixi tucu yúhú Téé cùu ñaní tnàhá-ndó nchàa-ndo —cachí-gă xáhaⁿ-gă xii-güedé.

Cuendá cue téé ní ndóo ndaha dîhúⁿ

(Lc. 19:11-27)

¹⁴ Te xáhaⁿ tucu Jesús xii-güedé:

—Na càni tucu-í ingá cuendú núú-ndó nàcuáa tecú tnuní-ndó nàcuáa cada-xi òré ndihu ndaha ñàha Yá Ndiöxí xii ñáyi. ñⁿ téé sa ñùhu ichi-ná-dé sá cáca-dê quíngaca cuu xica-dê, te ní cana-dé cue téé xinu cuечи núú-dê cuendá dándóo ndaha ñàha-dé dîhúⁿ-dê xii-güedé.

¹⁵ Te nàcuáa ndùu chiúⁿ quide ñⁿ ñⁿ-güedé te ducaⁿ dîhúⁿ ñí sáñaha-dê xii-güedé, te ñⁿ-dê ní sáñaha-dê úhúⁿ tnàhá dîhúⁿ sá ío yahu nàni talentú, te ingá-dé ní sáñaha-dê úú tnàhá dîhúⁿ-ăⁿ, te ingá-dé ní sáñaha-dê ñⁿ dîhúⁿ-ăⁿ, te dătnuní ní quee-dé cuáhă-dé. ¹⁶ Te téé ní queheⁿ cuendá úhúⁿ tnàhá dîhúⁿ sá nání talentú ní quide-dé ndáhú ndihi-xi te ní níhí tucu-dé úhúⁿ-gă tucu tnàhá dîhúⁿ-ăⁿ. ¹⁷ Te dîu-ni ducaⁿ ñí quide tucu téé ní níhí úú dîhúⁿ sá nání talentú-ăⁿ, chi ní quide-dé ndáhú te ní níhí tucu-dé úú-gă tucu tnàhá. ¹⁸ Dico téé ní níhí ñⁿ-ni dîhúⁿ-ăⁿ chi da ní chiváha-dé dîhúⁿ pàtróoⁿ-dê, chi ní xete-dé ñⁿ yaú te ní chindúxi-dé.

¹⁹ Te ní cuu cuéhé nduu sá ñí quee pàtróoⁿ-güedé-ăⁿ ní

sángaca cuu-dé, te ní nasáá-dé te ní ngüta-dé quidé ndáá-dé ndihi-güedé cuendá díhúⁿ sã nĩ dándõ ndaha ñaha-dé xii-güedé. ²⁰ Te téé ní quendóo ndaha úhúⁿ tnàhá díhúⁿ-ãⁿ nĩ xáhaⁿ-dë xii patróóⁿ-dë: “Patróóⁿ, náu úhúⁿ tnàhá díhúⁿ sã nĩ dándõ ndaha ñaha-n xii-í-a, te ní sáháⁿ-í ní quide-í ndihi-xi ndáhú te ní chídó-xí úhúⁿ-gá tucu tnàhá, te náu-a naqueheⁿ cuendá-n”, cächí-dé xáhaⁿ-dë xii patróóⁿ-dë. ²¹ Te téé cùu patróóⁿ-dë-áⁿ nĩ xáhaⁿ-dë xii-dé: “Ío váha ní quide-n, te vitna quide ñaha-í xii-n ñⁿ téé váha téé quide ndáá, te sá sácú díhúⁿ nĩ dándõ ndaha ñaha-í xii-n te ní quide ndáá-n, te sá dúcáⁿ nĩ quide-n te vãi-gá taxi cuendá ñáhà-í xii-n. Te vitna cuu cundecu-n nũú ndécù-í, te ío cudíí ìní-ó cùndecu ndihi tna-ha-o”, cachí téé cùu patróóⁿ-dë-áⁿ xáhaⁿ-dë xii-dé. ²² Te sátá dúcáⁿ te téé ní quendóo ndaha úú tnàhá díhúⁿ sã nání tàlentú-áⁿ nĩ xáhaⁿ-dë xii patróóⁿ-güedé: “Patróóⁿ, náu úú tnàhá díhúⁿ sã nĩ dándõ ndaha ñaha-n-a, te ní sáháⁿ-í ní quide-í ndihi-xi ndáhú, te ní chídó-xí úú-gá tucu tnàhá, te náu-a naqueheⁿ cuendá-n”, cächí-dé xáhaⁿ-dë xii patróóⁿ-güedé. ²³ Te ní xáhaⁿ tèé cùu patróóⁿ-áⁿ xii-dé: “Ío váha ní quide-n, te vitna quide ñaha-í xii-n ñⁿ téé váha téé quide ndáá, te sá sácú díhúⁿ nĩ dándõ ndaha ñaha-í xii-n te ní quide ndáá-n, te sá dúcáⁿ nĩ quide-n te vãi-gá taxi cuendá-í. Te vitna

cuu cundecu-n nũú ndécù-í, te ío cudíí ìní-ó cùndecu ndihi tna-ha-o”, cachí téé cùu patróóⁿ-áⁿ xáhaⁿ-dë xii-dé. ²⁴ Te téé ní ndóo ndaha ñⁿ-ni díhúⁿ-ãⁿ nĩ xáhaⁿ-dë xii téé cùu patróóⁿ-dë-áⁿ: “Patróóⁿ, yúhú sa ñaha-í sá yòhó cúu-n ñⁿ téé ndùcu mee-ni sá cúu-xí mèe-xi te tàhu-n chiuⁿ cuáháⁿ nchúhú cue téé xinu cuechi núu-n sácáⁿ-ndí triú, te òré ná nàtaxi tna-ha-ndí, te yòhó dícó-nã náqueheⁿ cuendá-n tàxúha-n. ²⁵ Te núu xiãⁿ ní yúhú-í cada-í ndáhú ndihi díhúⁿ-n, te ní sáháⁿ-í ní xete-í ñⁿ yaú te ní chindúxi-í, te náu díhúⁿ-n-áⁿ naqueheⁿ cuendá-n”, cächí-dé xáhaⁿ-dë xii téé cùu patróóⁿ-áⁿ. ²⁶ Te téé cùu patróóⁿ-áⁿ nĩ xáhaⁿ-dë: “Yòhó cúu-n ñⁿ téé cuihna ìní-xi xinu cuechi núu-í te cuhndu-n, te núu yòhó sání ìní-n sã cúu-í ñⁿ téé tàuchiuⁿ cuáháⁿ-ndó sácáⁿ-ndó triú te òré nàtaxi tna-ha-ndo, te yúhú dícó-nã náqueheⁿ cuendá-í nàtàxúha-í. ²⁷ Te núu sání ìní-n sã dúcáⁿ quide-í, te dasaⁿ nùu-n díhúⁿ-í te cúñaha-n chãhu-yu díquí-xi ni cùu, te òré ndexìo-í te sa ngódó lùha-gá díquí-xi naqueheⁿ-í ní cùu”, cachí-dé xáhaⁿ-dë xii téé xinu cuechi-áⁿ. ²⁸ Te téé cùu patróóⁿ-áⁿ nĩ xáhaⁿ-dë xii dava-gá cue téé ndècu ndihi-dé: “Chí quèndèé ñⁿ díhúⁿ sã nání tàlentú nèhé téé-áⁿ, te cuáha-ndo tèé nèhe úxí tnàhá ñⁿ-ni díhúⁿ-ãⁿ. ²⁹ Chì cue téé sa ndècu ndihi te níhí-gã-güedé cundecu ndihi-güedé, te ni vã nihí-gã-güedé ndèé cundecu nchaá sá cùndècu

ndihi-güedé. Te cue tée ñá túú nã ndécú ndihi vai, te nchaa sá ndécú ndihi-güedé vá cùndecu ndihi-gá-güedé. ³⁰ Te tée xìnu cuechi ñá túú vèdana nàndíhi-áⁿ, chí tnú-dě te daquìhíⁿ-ndó-dě ìⁿ xichi núú néé núú ìo ndoho-dé, te yàcáⁿ ndáhyú-dé, te dìcò rúhñú-nã cuu núhu-dé sá sàtú iní-dé sá ndóhó-dě”, càchí tée cùu patróon-áⁿ xãhaⁿ-dě xii-güedé. Duha sãtnahá-xi ndoho nchaa ñáiyu ñá túú quide váha — càchí-gá xãhaⁿ-gã xii-güedé.

Cuendá cue ñáiyu ní quide váha ndihi cuendá cue ñáiyu ñá túú ní quide váha

³¹ Te xãhaⁿ tucu Jesús xii-güedé:

—Te nduu na quìxi tucu yúhú Tée cùu ñamí tnáhá-ndó nchàa-ndo, te quixi-í ndihi nchaa cue espíritú xínú cuèchi núu-í, te nchaa ñáiyu quini-yu sá ìo càhnu cuu-í, te dává-áⁿ cunucóo-í núú táxi tnúni-í, te ìo cuñuhu ñáiyu sá ìo càhnu cuu-í. ³² Te dává-áⁿ nataká nchaa ñáiyu xíndecu ní cãa xico ñuyú cundecú-yu núu-í, te cada-í-yu dàtná quidé ìⁿ toli oré táú dèiⁿ-dé nchaa mbéé ndihi nchaa chivá chí dèiⁿ taxi ndecu-dé nchaa mbéé, te dèiⁿ taxi ndecu-dé nchaa chivá. ³³ Te ducaⁿ sãtnahá-xi cada-í chí nchaa ñáiyu ní quide ndáá núu-í ñáiyu-áⁿ taxi ndecu-í-yu xio cùha-í, te nchaa ñáiyu cuihna iní-xi ñá túú ní cuini cada ndáá núu-í ñáiyu-áⁿ taxi ndecu-í-yu xio dàtni-í. ³⁴ Te ducaⁿ te yúhú tée ìo cùnuu cuñaha-í xii

ñáiyu na cùndecu xio cuha-í: “Nchaa nchòhó ñáiyu ní quide váha ñaha Tãtã-í Dútú Ndiòxí, chí nèhé chí vitna ní sáá nduu cùndecu-ndo núú ndécú-gã táxi tnúni-gã, chí ndéé cùtnahá ní ngáva ñuyú sa ndècu túha tnàhí núú ndécú-gã-áⁿ sã nchòhó nduu táhú-ndó cùndecu-ndo. ³⁵ Te ducaⁿ chí òré xihí-í docó te ní taxi-ndo sá ní xexi-í, te òré yichí-í ndute te ní taxi-ndo ndute ní xihí-í, te òré ñúhù-í ichi te ní taxi-ndo vèhe ní ndetatú-í. ³⁶ Te òré xini ñuhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo ní quixi coto ñaha-ndo xii-í”, duha cuñaha-í xii nchaa ñáiyu-áⁿ. ³⁷ Te nchaa ñáiyu ducaⁿ ní quide ndáá-áⁿ cuñahá-yu xii-í: “Yòhó Yaá cúú Xitohó-ndí, ni ìⁿ xito ñá túú ní tàxi-ndí sá cáxi-n òré xihí-n dòcò, te ni ìⁿ xito ñá túú ní tàxi-ndí ndute coho-n òré yichí-n. ³⁸ Te ni ñá túú ní tàxi-ndí vehe ndetatú-n òré ñúhù-n ichi, te ni ñá túú ní tàxi-ndí dóo cuihnu-n òré xini ñuhu-n. ³⁹ Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xihí-n vecaá”, duha quesahá-yu cuñahá-yu xii-í. ⁴⁰ Te yúhú tée cùnuu cuñaha-í xii-yu: “Na càchí tnúhu ndáá-í xii-ndo sã ncháá sã váha ní quide-ndo sã cúu-xi nchãa ñáiyu xíndecu ichi-í cuèi ìo ndáhú xíndáa-yu, te sá dúcáⁿ ní quide-ndo sã váha sá cúu-xi-yu, te cada iní-ndó

sã mềe-í ducaⁿ nĩ quide-ndo nĩ xito ñaha-ndo xii-í”, duha cúñaha-ĩ xii-yu.

41 “Te dătnùní cúñaha-ĩ xii ñáyiu na cùndecu xio datni-í: “Nchaa nchòhó ñáyiu ní xíta nihnu chí xócuĩñí núú ndécù-í-a, chí nchòhó ní nduu táhú-ndó cùndecu-ndo núú ñùhú núú càyú, ñiu-ni núú nĩ quide túha-í cundecu sácuihná ndihí nchaa espíritú cùndihí-xi, te yàcáⁿ cundecu-ndo nĩ caa ni quihíⁿ. 42 Chi yúhú òré xihí-í docó te ñá túú ní tàxi-ndo sá cáxi-í, te ni òré yìchí-í ndute te ñá túú ní tàxi-ndo ndute coho-í. 43 Te ni òré ní xúhuⁿ-í ichi ñá túú ní tàxi-ndo vehe ndetatú-í, te ni òré xíní ñùhu-í dóo cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xihí-í vecaá te ñiu-ni ducaⁿ nĩ quide-ndo ñà túú ní quixi-ndo quixi coto ñaha-ndo xii-í”, duha cúñaha-ĩ xii-yu. 44 Te ñáyiu-áⁿ cúñahá-yu xii-í: “Yòhó Yaa cúú Xítohó-ndí ni ñⁿ xito ñá túú ní xíní-ndí òré xihí-n dòcò cuendá taxi-ndí sá cáxi-n, te ni ñⁿ xito ñá túú ní xíní-ndí òré yìchí-n ndute cuendá taxi-ndí ndute coho-n, te ni ñⁿ xito ñá túú ní xíní-ndí cuhuⁿ-n ichi cuendá taxi-ndí vehe ndetatú-n, te ni ñⁿ xito ñá túú ní xíní-ndí òré xíní ñùhu-n dóo cuendá taxi-ndí dóo cuihnu-n, te ni ñⁿ xito ñá túú ní xíní-ndí òré cùhú-n cuendá quixi coto ñaha-ndí xii-n, te ni ñⁿ xito ñá túú ní xíní-ndí quihí-n vècaá cuendá

quixi coto ñaha-ndí xii-n”, duha quesàhá-yu cúñahá-yu xii-í. 45 Te yúhú cúñaha-ĩ xii-yu: “Na càchí tnúhu ndáá-í xii-ndo sã sã cuendá sá ñà túú ní quide-ndo ñⁿ sá vãha sá cúú-xí cuè ñáyiu ndècu ichi-í cuèi ío ndàhú xĩndáa-yu, te sá dúcáⁿ nĩ quide-ndo ñà túú ní quide-ndo sá vãha sá cúú-xí-yu, te cada iní-ndó sã mềe-í ducaⁿ nĩ quide-ndo ñà túú ní quide-ndo sá vãha sá cúú-xí-í”, duha cúñaha-ĩ xii-yu. 46 Te nchaa ñáyiu-áⁿ quihíⁿ-yu núú ùhú núú ndàhú ni caa ni quihíⁿ. Te nchaa ñáyiu ní quide ndáá núú-í ní xíndecu ñuyúú-a, ñáyiu-áⁿ nduu táhú-yu ío váha cundecú-yu ni caa ni quihíⁿ — càchí-gá xãhaⁿ-gã xii-güedé.

26

Cue téé cùu úhú iní ñáhá xii Jesús ndúcú-güedé nácuaa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

1 Te sátá nĩ yáha ducaⁿ nĩ cáháⁿ Jèsús, te ní xãhaⁿ-gã xii cue téé xica cuu ndihí-gá:

2 —Nchòhó sa xíní-ndó sã cùmání úú-gá nduu te coo vico pàscuá, te càchí tnúhu-í xii-ndo sã yúhú Tée cùu ñaní tnáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-án cuú-í —càchí-gá xãhaⁿ-gã xii-güedé.

3 Te ñiu-ni òré cáháⁿ ndihí Jèsús cue téé xica cuu ndihí-gá

ní nataká cue tée cùu dútú cúnùu, ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi cue tée cùu sacuéhé núú ñáyiú isráel. Te mei quèhé vehe núú cúu vèchiuⁿ té Caifás tée cùu dútú ìo-gá cúnùu ní nataká-güedé. ⁴ Te xíaⁿ nĩ ndatnúhu-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. ⁵ Te ní xitnáha-güedé:

—Váha-gá sá vã tñí-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —càchí-güedé xitnáha-güedé.

Iⁿ ñadìhí chihí-áⁿ àciti díqui Jèsús

(Mr. 14:3-9; Jn. 12:1-8)

⁶ Te ndècu Jèsús ñuú Bètaniá vehe ìⁿ tée nàni Ximú, tée ní tnahá cuéhé sã dátèhyú ni-hnu-xi yiqui cùñú-ó. ⁷ Te xíaⁿ ndécú-gã ní quexìo ìⁿ ñadìhí néhé-áⁿ ìⁿ sá nĩ cuáha yúú vãha nàni alabastrú, te xití xíaⁿ ñúhú àciti sàháⁿ tnámí sã ìo ndèyáhu. Te yìhi Jèsús mèsá xéxi-gã, te ñaha-áⁿ nĩ sáháⁿ-aⁿ ní sódo-aⁿ àciti ñúhú xití xíaⁿ díqui-gã. ⁸ Te òré ní xiní cue tée xica cuu ndìhi Jèsús sá dúcáⁿ nĩ quide ñaha-áⁿ te ní cudééⁿ-güedé, te ní ngüíta-güedé xitnáha-güedé:

—Ñá túú quide váha ñaha-áⁿ dàcáⁿ quidé-áⁿ dacuíta-aⁿ acití-áⁿ. ⁹ Chi váha-gá núu cuyáhu acití-áⁿ ní cùu chi ío ndèyáhu, te díhúⁿ cuyáhu acití-áⁿ cuu cuendá cue ñáyiú

ndàhú ní cùu —cachí-güedé xitnáha-güedé.

¹⁰ Te Jèsús ní cutnùnì iní-gá nàcuáa ndùu tnúhu xitnáha-güedé, núu ní xáhaⁿ-gã xii-güedé:

—Vá dásatú-ndó ìní ñadìhí-a, chi sá nĩ quide ñaha-aⁿ xii-í cúu-xí ìⁿ sá vãha. ¹¹ Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, dico yúhú chi vá ncháá ndùu cundecu ndìhi ñaha-í xii-ndo ñuyíú-a.

¹² Te sá dúhá nĩ quide ñaha ñadìhí-a xii-í ní sódo-aⁿ àciti díqui-í, te xíaⁿ cada iní-ndó sã sã quide túha-aⁿ yiqui cùñú-í cuendá nguíndüxi-xi.

¹³ Te na càchí tnúhu ndáá-í xii-ndo sã ndèni ní cuu nihi ñuyíú ná càháⁿ ñáyiú tnúhu-í, te càháⁿ-yu tnahá cuendá ñadìhí-a cuendá quiní nchaa ñáyiú nàcuáa ní quide-aⁿ te ducaⁿ vã nàcuànaá-yu —càchí-gá xáhaⁿ-gã xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núu cuè tée cùu úhú iní ñáhá xii-gá

(Mr. 14:10-11; Lc. 22:3-6)

¹⁴ Te sátá dúcáⁿ te té Jùdás Iscarioté ní sáháⁿ-dé ní ndatnúhu-dé ndìhi cue tée cùu dútú cúnùu. Te núu tnahá té Jùdás-áⁿ cúu ùxúú cue tée xica cuu ndìhi Jèsús. ¹⁵ Te ní xáhaⁿ-dè xii cue tée cùu dútú cúnùu-áⁿ:

—¿Ndèdau cháhu ñaha-ndo xii-í te taxi cuendá-í Jèsús xii-ndo-i? —càchí-dé xáhaⁿ-dè xii-güedé.

Te cue dútú-áⁿ nĩ xáhaⁿ-güedé xii-dé sá cuañaha-güedé ócò úxí díhúⁿ

cuixín, te diu-ni ducaⁿ nĩ sãñaha-güedẽ xii-dé. ¹⁶ Te ndéé òré ní queheⁿ cuendá té Jüdás-án dñhún, te ní ngüíta-dé ndúcú-dẽ nàcuáa cada-dé cuáha cuendá-dé Jèsús núú-güedẽ.

Cùdini Jesús ndihi cue té xica cuu ndihi-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Te ní sáá nduu nĩ quesaha vico xexi ñáyiu pàá sá ña túú yìhi levadurá diu-ni vico pàscuá, te cue té xica cuu ndihi Jesús ní sãndehe yatni-güedé dññi-gá, te xãhaⁿ-güedẽ xii-gá:

—Mèstrú, véxi-ndí xicáⁿ tnúhú-ndí núú-n nũu ndéé cuíní-n càda túha-ndí cuendá cudini-o sacuaa nduu vico pascuá —càchí-güedé xãhaⁿ-güedẽ xii-gá.

¹⁸ Te Jèsús ní xãhaⁿ-gã xii-güedé:

—Chí cuaháⁿ xití ñuú-ãⁿ, te yacáⁿ naníhí-ndó ìⁿ téé cùnuni iní-ndó sã sã xiní ñáhá-dẽ xii-o, te cuñaha-ndo xii-dé: “Yáá cúú Mèstrú càchí-gá sá sá ní cuyatni nduu vã cundècu-gá ñuyíú-a, te vehe-n cuíní-gá cada-gá vico pàscuá ndihi cue té xica cuu ndihi-gá”, duha cuñaha-ndo xii téé-áⁿ —càchí-gá xãhaⁿ-gã xii-güedé.

¹⁹ Te cue téé xica cuu ndihi-gá-áⁿ nĩ xica-güedé cuaháⁿ-güedé, te ní quide-güedé nàcuáa ní xãhaⁿ-gã xii-güedé, te ní quide túha-güedé sá cùdini-güedé ndihi-gá sacuaa nduu vico pascuá-áⁿ. ²⁰ Te òré sa ní cundiçuⁿ te cuánguihu

Jèsús ndihi ndi ùxúú cue téé xica cuu ndihi-gá mèsá cuendá cudini-gá ndihi-güedé. ²¹ Te nini xèxi-gá ndihi-güedé ní xãhaⁿ-gã xii-güedé:

—Na càchí tnúhu ndáá-í xii-ndo sã díú ìⁿ nchohó cue téé xica cuu ndihi-í cuáha cuendá ñáhá-ndó xii-í núú cuè téé cùu úhú iní ñáhá —càchí-gá xãhaⁿ-gã xii-güedé.

²² Te sá dúcáⁿ nĩ xãhaⁿ-gã xii-güedé te nchaa-güedé ní ngüíta-güedé cùndiyí-güedé, te da ìⁿ da ìⁿ-güedé ní ngüíta-güedé xãhaⁿ-güedé xii-gá:

—Mèstrú, ¿ñá díú yùhú ducaⁿ sàni iní-n càda-í-u? —càchí-güedé xãhaⁿ-güedé xii-gá.

²³ Te ní xãhaⁿ-gã xii-güedé:

—Téé nacaxi ndihi-í ìⁿ-ni cóhó caxi-ndí, téé-áⁿ cuáha cuendá ñáhá-dẽ xii-í núú cuè téé cùu úhú iní ñáhá.

²⁴ Te yùhú Téé cùu ñani tnáhá-ndó nchàa-ndo ñuhu ichi-í cuaháⁿ-í yáha-í nàcuáa càháⁿ-xi núú tütú Yã Ndiòxi, dico ndàhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá, chi váha-gá sá vã cacú téé-áⁿ cundecu-dé ní cùu, te ñá díú sã nĩ cacú-dé te ducaⁿ càda-dé —càchí-gá xãhaⁿ-gã xii-güedé.

²⁵ Te sátá dúcáⁿ te ní cãháⁿ té Jüdás téé cuáha cuendá ñáhá xii-gá, te xãhaⁿ-dẽ:

—Mèstrú, ¿te náa sàni iní-n sã yùhú cuáha cuendá ñáhá-í xii-n nũu cuè téé cùu úhú iní ñáhá xii-n-áⁿ? —càchí-dé xãhaⁿ-dẽ xii-gá.

Te Jèsús ní xãhaⁿ-gã xii-dé:

—Diu-n —càchí-gá xãhaⁿ-gã xii-dé.

26 Te nini cùdini cue tée xica cuu ndihi Jesús ní queheⁿ-gá pàá, te ní ndacáⁿ táhú-gă núú Yă Ndiöxí, te dătnùní ní táhú cuèchi-gá te ní ngüíta-gá dácăhñu-gá cue tée xica cuu ndihi-gá-áⁿ, te xăhaⁿ-gă xii-güedé:

—Chí quéhéⁿ pàá-a caxi-ndo, te cada iní-ndó să yiqui cuñú-í cúú-xí —càchí-gá xăhaⁿ-gă xii-güedé.

27 Te ní queheⁿ-gá văsú ñúhú ndüdí ndéhé yoho yàha stilé, te ní ndacáⁿ táhú-gă núú Yă Ndiöxí, te dătnùní ní ngüíta-gá săñaha-gă xii-güedé cuëndá coho-güedé luha luha să ñúhú xití-xi, te xăhaⁿ-gă xii-güedé:

—Chí cóhó nchàa nchohó ndudí ndéhé yoho yàha stilé ñúhú xití văsú-a. 28 Te cada iní-ndó să cúú-xí dătná níñi-í sá cáti òré cahni ñaha-güedé xii-í, te sá dúcáⁿ cāti níñi-í xíáⁿ cutnùní ndáá sá Yă Ndiöxí cada-gá ingá núú să văha sá cúú-xí vâi ñăyiu dătná ní cachí-gá cada-gá, te ío vâi ñăyiu cada căhnu iní-gá cuèchi-yu. 29 Te na cächí tnúhu-í xii-ndo să vítná-nă duha xihí ndihi ñaha-í xii-ndo ndüdí ndéhé yoho yàha stilé-a, te vá cóhó ndihi ñaha-gá-í xii-ndo, dico na sáá nduu nănihí tnáhá-ó núú ndécú Tătà-í Dútú Ndiöxí táxi tnùní-gá te dăvâ-áⁿ cada iní-ndó să dătná sá cóhó ndihi ñaha tucu-í xii-ndo chí ío cudíí iní-ó —cächí-gá xăhaⁿ-gă xii-güedé.

Té Pèlú cúñaha-dě xii ñăyiu

sá ñà túú xini-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ìⁿ ndudú ndihi cue tée xica cuu ndihi-gá, te dătnùní ní xica-gá cuáháⁿ-gá ndihi-güedé yucu Òlívú. 31 Te yacáⁿ ní xăhaⁿ-gă xii-güedé:

—Na cächí tnúhu-í xii-ndo să nchăá-ndó dândóo ñaha-ndo xii-í niú vitna, chí quee ndáá-xi năcuáa cáháⁿ-xi núú tütú Yă Ndiöxí núú cächí-xi: “Yúhú cuáha-í tnúhu cahni-güedé tée cùu toli, te nchaa mběé-dě ndihi-güedi cuténuu”, duha cächí-xi núú tütú-gá. 32 Dico na ndòto-í te codonùu-í núú-ndó quihíⁿ distritú Galiléa —cächí-gá xăhaⁿ-gă xii-güedé.

33 Te té Pèlú ní xăhaⁿ-dě xii-gá:

—Te cuèi nchaa-güedé ná dândóo ñaha-güedé xii-n, dico yúhú chí vá dândóo ñaha-í xii-n —cächí-dé xăhaⁿ-dě xii-gá.

34 Te Jèsús ní xăhaⁿ-gă xii-dé:

—Na cächí tnúhu ndáá-í xii-n să niú vitna cùmání-gă cana ìⁿ lîhi, te úní xito cáháⁿ-n núú ñăyiu sá ñà túú xini ñáhá-n xii-í —cächí-gá xăhaⁿ-gă xii-dé.

35 Te té Pèlú ní xăhaⁿ-dě xii-gá:

—Cuèi na cùú ndihi ñaha-í xii-n dico vá cáháⁿ-í núú ñăyiu sá ñà túú xini ñáhá-í xii-n —cächí-dé xăhaⁿ-dě xii-gá.

Te nchaa dava-gá cue tée xica cuu ndihi-gá ñiu-ni ducaⁿ ní xăhaⁿ-güedé xii-gá.

Jèsús càháⁿ ndihi-gá Yá Ndiöxí ñⁿ xichi núú nání Gètsemaní (Mr. 14:32-42; Lc. 22:39-46)

³⁶ Te Jèsús ní quexìo-gá ndihi cue téé xica cuu ndihi-gá ñⁿ xichi núú nání Gètsemaní, te xiáⁿ nǐ xáhaⁿ-gǎ xii-güedé:

—Chí cúnúcoo iha cun-detu-ndo na quihíⁿ-í yacáⁿ cáháⁿ ndihi-í Yá Ndiöxí — cächí-gá xáhaⁿ-gǎ xii-güedé.

³⁷ Te ndéca-gá té Pèlú, ndihi ndi ndùú déhe té Zebèdeú cuáháⁿ, te ní ngüita-xi súúni ndihú iní-gá. ³⁸ Te ní xáhaⁿ-gǎ xii cue téé úní-áⁿ:

—Súúni ndihú iní-í dàtná sá cùú-í, te chí quéndöo nchòhó iha te vá cùdú-ndó chí yúhú vá cùdú-í —cächí-gá xáhaⁿ-gǎ xii-güedé.

³⁹ Te sa ñùnchíí luha ní xica ndehe Jèsús núú ndécú-güedé, te ní ngüíñí xítí-gǎ te ní nuu núú-gǎ ndàa núú ñùhú, te ní ngüita-gá cáháⁿ ndihi-gá Tǎtá-gǎ Dútú Ndiöxí, te xáhaⁿ-gǎ:

—Yòhó Tǎtá mée-í, cáháⁿ ndàhú-í núú-n nùu vá cündèe iní-n tàunihnu ñaha-n xii-í cuendá sá vá ndóhò-í ná sàá òré, dico vá cadá-n nàcuáa cächí iní mée-í, chí cada-n nàcuáa cächí iní mée-n — cächí-gá xáhaⁿ-gǎ xii Tǎtá-gǎ Dútú Ndiöxí.

⁴⁰ Te sátá nǐ yáha ní cáháⁿ ndihi-gá Tǎtá-gǎ Dútú Ndiöxí, te cuánuhú-gá núú nǐ dándöo-gá cue téé úní-áⁿ te xixidí-güedé òré ní nasáá-gǎ, te ní xáhaⁿ-gǎ xii té Pèlú:

—¿Náa ñá cündèe iní-ndó vá cùdú-ni-ndo cuèdicó ñⁿ òré nini cáháⁿ ndihi-í Yá

Ndiöxí-áⁿ? ⁴¹ Te chí quéndöo tucu te cuhuⁿ iní-ndó vá cùdú-ndó, te cáháⁿ ndihi-ndo Yá Ndiöxí cuendá sá vá dácàháⁿ ñáhá yücu ñávàha xii-ndo càda-ndo sá ñà túú tàú-ndó càda-ndo. Te xini ndáá-í sá nchòhó cuini-ndó càda-ndo nchaa nacuáa cáháⁿ-í dicó-ni sá ñà túú ñihí ndéé-ndó —cächí-gá xáhaⁿ-gǎ xii-güedé.

⁴² Te xito cùu uú cuáháⁿ tucu Jèsús cáháⁿ ndihi-gá Tǎtá-gǎ Dútú Ndiöxí, te xáhaⁿ-gǎ:

—Yòhó Tǎtá mée-í, te núu vá cündèe iní-n tàunihnu ñaha-n xii-í cuendá sá vá ndóhò-í, te cada nàcuáa cächí iní mée-n —cächí-gá xáhaⁿ-gǎ xii Tǎtá-gǎ Dútú Ndiöxí.

⁴³ Te òré ní yáha ní cáháⁿ ndihi-gá Tǎtá-gǎ Dútú Ndiöxí, te cuánuhú tucu-gá núú xíndecu cue téé úní xicá cùu ndihi-gá-áⁿ, te xidí-ni tucu-güedé òré ní nasáá-gǎ, te ducaⁿ nǐ quide-güedé chí súúni ñùhu saní núú-güedé.

⁴⁴ Te ní dándöo ñaha tucu Jèsús xii-güedé xiáⁿ, te cuáháⁿ tucu-gá xito cùu úní cáháⁿ ndihi tucu-gá Tǎtá-gǎ Dútú Ndiöxí, te diu-ni tnúhu sá sá ní xáhaⁿ-gǎ xii Tǎtá-gǎ Dútú Ndiöxí, diu-ni tnúhu-áⁿ nǐ xáhaⁿ tucu-gá. ⁴⁵ Te sátá nǐ yáha ní cáháⁿ ndihi-gá Tǎtá-gǎ Dútú Ndiöxí, te cuánuhú tucu-gá núú ndécú cuè téé xica cuu ndihi-gá-áⁿ, te òré ní nasáá-gǎ, te ní xáhaⁿ-gǎ xii-güedé:

—¿Te náa xidí-ni tucu-ndo? Te sa ní sáá òré cuáha cuendá ñáhá-güedé xii-í núú cuè téé ndècu ichi cuehé ichi duha.

46 Dico vitna chí ndácõo na quihíⁿ-ó, chi sa véxi téé cuáha cuèndá ñáhá xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

Ní tñi-güedé Jèsús ndéca ñaha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

47 Te càháⁿ dúcáⁿ-ní Jèsús ní quexìo té Jüdás. Te núú tnàhá téé-án cúú ùxúú tnàhá cue téé xica cuu ndihi-gá ní cùu te ducaⁿ ñi quide-dé. Te ndihi-dé vai cue téé ní quexìo te dava-güedé xínehe-güedé machití, te dava-güedé xínehe-güedé carrutí. Te cue téé-án ñi tendaha ñaha cue dútú cúnúu, ndihi cue téé cùu sacuéhé núú ñáyiú israhél. 48 Te té Jüdás téé cuáha cuèndá ñáhá xii-gá-án sa ní xítñuhu-dé cue téé-án nàcuáa cada-dé cuáha cuèndá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo tée na tøyuhu-í te téé-án tñi-ndo-dé chí téé-án cúú-dè téé ndèé iní-ndó —duha ní xáhaⁿ-dè xii-güedé.

49 Te sátá dúcáⁿ ñi xáhaⁿ-dè xii-güedé, te ní sándehe yatni-dé núú Jèsús, te ní xáhaⁿ-dè xii-gá:

—¡Ración Mèstrú! —
càchí-dé xáhaⁿ-dè xii-gá.

Te ní tøyuhu ñaha-dé xii-gá.
50 Te Jèsús ní xáhaⁿ-gã xii-dé:

—Yòhó téé ní chitnahá ñáhá xii-í, ¿ná cùnín-n núú véxi-n núú-í? —càchí-gá xáhaⁿ-gã xii-dé.

Te òré-ni-án ñi tñi ñaha cuè téé ndihi té Jüdás-án xii Jèsús,

te ndéca ñaha-güedé xii-gá cuáháⁿ.

51 Te ñi cue téé ndihi Jèsús ní tava-dé machití-dé, te ní xehndé-ni-dé ñi xio lóho ñi téé xínu cuechi núú dútú cúnúu te ní quendeé duuⁿ lóho-dé.

52 Te Jèsús ní xáhaⁿ-gã xii téé ducaⁿ ñi xehndé lóho téé-án:

—Nachihí machití-n ñi-xi, chí nchaa cue téé na nàa ndihi machití cahni-güedé tnàha ñáyiú-güedé te diu-ni ndihi machití cuú méé-güedé tucu. 53 Te na càchí tnúhu-í xii-ndo sã núu yúhú cùnín-í cácu-í te càháⁿ ndihi-í Tātá-í Dútú Ndiõxí, te tendaha-gã cuéhé víhí espíritú xínú cuèchi núú-gã quixi-xi dàcácu ñaha-xi xii-í. 54 Dico núu ducaⁿ na càda-í te vá quéé ndáá-xi nàcuáa càháⁿ-xi núú tütú Tātá-í Dútú Ndiõxí núú ndéé tnuní sã dàcuítí xini ñuhu-xi nándi ndoho-í —càchí-gá xáhaⁿ-gã xii-dé.

55 Te Jèsús ní xáhaⁿ-gã xii cue téé ducaⁿ ñi tñi ñaha xii-gá-án:

—Nchaa-ñi nduu ní xini-ndó ñi xóo cunucóo-í xití veñúhu càhnu sã ño cúnúu ní xóo danèhé-í ñáyiú, te ñá túú ní tñi ñaha-ndo xii-í, ¿te ná cuèndá vitna quide ñaha-ná-ndó xii-í dàtná quidé-ndó ñi ñadúhú, nèhe-ná-ndó màchití nèhe-ná-ndó càrutí ní quexìo ní tñi ñaha-ndo xii-í-í? 56 Dico dacuítí sã dúhá càda-xi nàcuáa quee ndáá-xi nàcuáa ní càháⁿ cue téé ní xóo càháⁿ tnúhu Yá Ndiõxí ndéé sanaha ñi ngódó tnuní núú tütú-gá —càchí-gá xáhaⁿ-gã xii-güedé.

Te nchaá cue téé xica cuu ndihi-gá ní xinu-güedé ní dándö ñaha-güedé xii-gá.

Jèsús ndécú-gǎ jündá

(Mr. 14:53-65; Lc. 22:54-55, 63-71; Jn. 18:12-14, 19-24)

57 Te cue téé ní tñi ñaha xii Jèsús ndécá ñaha-güedé xii-gá cuáháⁿ núú tē Caifás téé cùu dútú cúnùu-gá. Te núú ndécú dútú cúnùu-gá-áⁿ sa ní tacá cue téé dàcuaha ñaha xii ñayiu nchaá tnúhu ní chídó tnùní ndíi Moisés, ndihi cue téé cùu sacuéhé núú ñayiu isráel cuëndá cada-güedé jündá. 58 Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú téé cùu dútú cúnùu-gá-áⁿ, te xíaⁿ ñi ngóo-dé ndihi cue téé cùu poleciá cuëndá cuíní-dé quíní-dé nása cada ñaha-güedé xii Jèsús.

59 Te cue téé cùu dútú cúnùu, ndihi cue téé cùu sacuéhé núú ñayiu isráel, ndihi nchaá dava-gá cue téé xĩndecu jündá ndúcú-güedé nàcuáa cada-güedé dacàa-güedé ñⁿ cuéchi díquí Jèsús cuéi cùu-xi ñⁿ sá ñã ndáá cuëndá níhi-güedé nàcuáa cada-güedé cahni ñaha-güedé xii-gá. 60 Te vâi cue téé ní ngúita-güedé dacàa-güedé cuéchi díquí-gǎ, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sáta dúcáⁿ te ní quexìo tucu úú tnáhá cue téé dàcuandehnde-güedé, 61 te xáhaⁿ-güedé xii nchaá cue téé xĩndecu jündá:

—Véxi-ndí cächí tnúhu-ndí xii-ndo sǎ tē-a cächí-dé sǎ dāngòyo-dé veñúhu cǎhnu sǎ ïo cùnuu núú chíñúhu-o Yá Ndiöxí, te dandaa-dé ingá veñúhu saa, ñiu-ni núú cáá tnáhí veñúhu-ǎⁿ, te xiti úní-ni nduu sa nadaxĩnu-dé, duha cächí-dé —cächí-güedé xáhaⁿ-güedé.

62 Te téé cùu dútú cúnùu-gá-áⁿ ñi ndacuíñí-dé, te xáhaⁿ-dě xii Jèsús:

—¿Ná cuëndá duha ndùu tnúhu cǎháⁿ cue téé-a cuëndá-n? Te cáháⁿ núu nása cunduu tnúhu cáháⁿ-n —cächí-dé xáhaⁿ-dě xii-gá.

63 Dico Jèsús ñá túú tnáhí ñi cáháⁿ-gá. Te téé cùu dútú cúnùu-gá-áⁿ ñi xáhaⁿ tucu-dé xii-gá:

—Yúhú, cǎcú nèhe-í Yá Ndiöxí chi cuíní-í sǎ cächí tnúhu ndáá-n xii-ndí núu sǎ díú Cristú Déhe Yá Ndiöxí Yaá ñi tendaha-gǎ véxi ñuyíu-a cùu-n —cachí-dé xáhaⁿ-dě xii-gá.

64 Te Jèsús ní xáhaⁿ-gǎ xii-dé:

—Ñiu Yaá-áⁿ cùu-í dàtná cächí-n-ǎⁿ, te na cächí tnúhu-í xii-ndo sǎ sǎá nduu te quíní-ndó yúhú Téé cùu ñani tnáhá-ndó nchàa-ndo cunucóo-í xio cùha Dútú Ndiöxí Yaá ndácú quide nchaandi túhú sǎ vǎha. Te dàvá-áⁿ quíní ñáhá-ndó xii-í quee-í andíu quixi-í ichi xiti vícò —cächí-gǎ xáhaⁿ-gǎ xii-dé.

65 Te dútú cúnùu-gá-áⁿ ñi ndátá-dě dóó níhnú-dě cuëndá sǎ ñã túú ní tnáhá iní-dé nàcuáa ní cáháⁿ Jèsús, te ní xáhaⁿ-dě xii nchaá cue téé xĩndecu jündá:

—Tée-a cãháⁿ úhú-dé cuendá Yã Ndiõxí, te vitna ñá túú-gã xíní ñũhu-xi cue tée cãháⁿ ndáá nõu ndáá sã ndècuéchi-dé àdi ñá túú ndècuéchi-dé, chi sa ní tecú dóho-o nãcuáa ndùu tnúhu ní cãháⁿ-dé ní cãháⁿ úhú-dé cuendá Yã Ndiõxí. ⁶⁶ Te nchaa-ndo chí cãháⁿ vitna nõu nása sãni iní-ndó cundu cuendá tée-a —càchí-dé xãháⁿ-dẽ xii nchaa cue tée-áⁿ.

Te cue tée-áⁿ ñi xãháⁿ-güedẽ:

—Nchúhú cãchí-ndí sá tàú-xi cuú-dé chí ndècuéchi-dé —càchí-güedẽ xãháⁿ-güedẽ.

⁶⁷ Te ní ngüita-güedé ní tiú dí ñáhã-güedẽ xii-gã te ní caniha-güedẽ, te tnãhá núú-gã ní cani-güedẽ. ⁶⁸ Te ní cudíquí ndeé ñáhã-güedẽ xii-gã, te xãháⁿ-güedẽ:

—Yòhó Tée cãchí sá cúú Crístú Yaá ní tendaha Yã Ndiõxí véxi ñuyú-a, cãháⁿ ná còto yoo ní caniha xii-n —cãchí-güedẽ xãháⁿ-güedẽ xii-gã.

Té Pèlú xãháⁿ-dẽ xii ñáyiú sá ñà túú xíní-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te ñini nõcòo té Pèlú quehé, te ní sãháⁿ ñi xíchí xínú cuèchi vehe-áⁿ nõú-dé, te xãháⁿ-xi xii-dé:

—Yòhó tnãháⁿ-n cùu-n tée xica cuu ndihi Jèsús tée distritú Galileá —càchí-xi xãháⁿ-xi xii-dé.

⁷⁰ Te té Pèlú ñá túú ní nõnuu-dé, te ndèdóho nchaa ñáyiú xĩndecu-áⁿ ñi xãháⁿ-dẽ xii xíchí-ãⁿ:

—Yúhú, ñá túú cùtnuní iní-í nása ndùu tnúhu cãháⁿ-n —càchí-dé xãháⁿ-dẽ xii-xi.

⁷¹ Te ní xica té Pèlú cuáhãⁿ-dé ndãa nacuáa nchii yuyèhe vehe-áⁿ, te ní xini ñáhã túcu ingá xíchí xínú cuèchi vehe-áⁿ, te xãháⁿ-xi xii nchaa ñáyiú xĩndecu-áⁿ:

—Tée-a tnãháⁿ-dẽ xicá cùu-dé ndihi Jèsús tée nõú Nazàrét —càchí-xi xãháⁿ-xi xii-yu.

⁷² Te té Pèlú ní xãháⁿ-dẽ: —Nchãcuiti Yã Ndiõxí sá ñá túú xíní-í tée cãcunehẽ-ndo-áⁿ —càchí-dé xãháⁿ-dẽ xii-yu.

⁷³ Te tna tnaa-ni ní cuu, te dava ñáyiú xĩndecu xiáⁿ ní xãháⁿ túcú-yu xii té Pèlú:

—Ndáá sá tnãháⁿ-n xica cuu-n ndihi tée ndèca-güedé cuánguñhu-ãⁿ, chi ñáyúhú cãháⁿ-n —càchí-yu xãháⁿ-yu xii-dé.

⁷⁴ Te té Pèlú ní xãháⁿ-dẽ xii-yu:

—Nchãcuiti Yã Ndiõxí sá yúhú cãháⁿ ndáá-í sá ñá túú xíní-í tée cãcunehẽ-ndo-áⁿ —càchí-dé xãháⁿ-dẽ xii-yu.

Te òrè-ni-áⁿ ñi cana ñiⁿ líhi. ⁷⁵ Te ní ndacu iní té Pèlú nãcuáa ní xãháⁿ Jèsús xii-dé sá cùmání-gã cana ñiⁿ líhi te úní xito cãháⁿ-dé sá ñá túú xini ñáhã-dé xii-gã. Te ní quee-dé tnuú ñáyiú-áⁿ cuáhãⁿ-dé ñiⁿ xio ní ndáhyú víhí-dẽ ní ndixi cuèchi iní-dé.

27

Ndèca-güedé Jèsús cuáhãⁿ núú tẽ Pilatú

(Mr. 15:1; Lc. 23:1-2; Jn. 18:28-32)

¹ Te sáta ñi túndaá te nchaa cue tée cùu dútú cùnùu, ndihi cue tée cùu sacuéhé nõú ñáyiú isràèl ní ndatnúhu-güedé nãcuáa cada-güedé cahni-güedé

Jèsús. ² Te ní dácútú ñàha-güedé xii-gá, te ndèca ñàha-güedé cuáháⁿ núú tẽ Pilatú tée cùu gobiernú.

Ní xíhí té Jùdás

³ Te té Jùdás tée ní sáha cuendá ñáhá xii Jesús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcáⁿ ní quide-dé ní sáha cuendá ñáhá-dẽ xii-gá núú cuè tée cùu úhú iní ñáhá, te ní xica-dé cuáháⁿ-dé danchòcáya-dé ócò úxí díhúⁿ cuixíⁿ núú cuè dútú cùnùu-áⁿ, ndihi núú cuè tée cùu sacuéhé núú ñáyiú isràél, chi ñu cuè tée-áⁿ ní sáñaha-güedé díhúⁿ xii-dé. ⁴ Te òré ní quexìo té Jùdás-áⁿ núú ndécú-güedé, te xáhaⁿ-dẽ xii-güedé:

—Yúhú, ñá túú ní quide váha-í sá dúcáⁿ ní quide-í ní taxi cuendá-í ñá túú tñáhi cuéchi-xi cahni-ndo-dẽ —cachí-dé xáhaⁿ-dẽ xii-güedé.

Te cue tée-áⁿ ní xáhaⁿ-güedé xii-dé:

—Nchúhú, ñá túú nǎgá cuendú cuini-ndí cáháⁿ ndihi ñàha-ndí xii-n, te mee-n nàha núú nása sàni iní-n càda-ñ —cachí-güedé xáhaⁿ-güedé xii-dé.

⁵ Te té Jùdás ní dǎngoyo-dé díhúⁿ-ǎⁿ xití veñúhu càhnu sá ño cùnùu, te ní xica-dé cuáháⁿ-dé ní dácüehné-dé méé-dé.

⁶ Te cue dútú cùnùu ní naqueheⁿ-güedé díhúⁿ-ǎⁿ, te ní xitnàha-güedé:

—Díhúⁿ-a ní quéyáhu cuendá sá cùu ñáyiú, núú xíáⁿ vá cùú nàchihi-o xití càjá

núú ñúhú sǎ cùú cuendá Yá Ndiòxí —cachí-güedé xitnàha-güedé.

⁷ Te ní ndatnúhu-güedé te ní cuu ñánuu-güedé cuendá nacuaaⁿ-güedé ñá xichi núú cáá ñúhu danani-güedé Núú Cuáha Nchaa Sá Cuáha Ñuhu, te xíáⁿ ní saaⁿ-güedé cuendá xíáⁿ nguñdúxi nchaa ñáyiú véxi xica. ⁸ Te ní

nadáma ñu ñuhu-áⁿ, te vitna dǎnani-güedé Ñuhu Yáhu Níñí, duha dǎnani-güedé. ⁹ Te ducaⁿ ní cuu chi ní quee ndáá-xi nàcuáa ní cáháⁿ ndí Jeremiás tée ní xóo cáháⁿ tñúhu Yá Ndiòxí ndéé sanaha, te duha ní cachí ndí: “Cue tée isràél ní cachí-güedé sá ócò úxí díhúⁿ cuixíⁿ cháhu-güedé cuendá ñá tée queheⁿ cuendá-güedé. Te díhúⁿ-ǎⁿ nàqueheⁿ-güedé, ¹⁰ te cuaaⁿ-güedé ñá xichi núú nání Núú Cuáha Nchaa Sá Cuáha Ñuhu, te ducaⁿ càda-xi chi ducaⁿ ní cachí Yá Ndiòxí cunduu”, duha ní cachí ndí Jeremiás-áⁿ.

Jèsús ndécú-gǎ núú tẽ Pilatú (Mr. 15:2-5; Lc. 23:3-5; Jn. 18:33-38)

¹¹ Te Jèsús ndécú-gǎ núú tẽ Pilatú tée cùu gobiernú, te tée-áⁿ ní xíáⁿ tñúhú-dé núú-gǎ, te xáhaⁿ-dẽ xii-gá:

—¿Ndáá sá díú-n cùu-n tée yíndaha ñàha xii ñáyiú isràél-ǎⁿ? —cachí-dé xáhaⁿ-dẽ xii-gá.

Te Jèsús ní xáhaⁿ-gǎ xii-dé:

—Ñu-í yíndaha-í-yu —cachí-gǎ xáhaⁿ-gǎ xii-dé.

¹² Te cue dútú cùnùu ndihi cue tée cùu sacuéhé núú ñáyiú isràél sàcáⁿ cuéchi-güedé núú

tě Pilatú cuendá Jèsús, dico mee-gã ni ìnⁿ tnúhu ñá túú ní cãháⁿ-gá. 13 Te té Pilatú ní xáhaⁿ-dẽ xii-gá:

—Cáháⁿ, ná cuendá ñá túú cãháⁿ-n, te cundehe nã ndéé duha tĩtnĩ cuéchi dàcaa cue téa díquí-n —càchí-dé xãhaⁿ-dẽ xii-gá.

14 Dico Jèsús ñá túú tnàhí ní cãháⁿ-gá, te té Pilatú téa cùu gobiernú-áⁿ ìo ní cuñúhu-dé sá dúcãⁿ ñà túú tnàhí ní cãháⁿ-gá.

Ní quide ndáá-güedé sá cãhí-güedé Jèsús

(Mr. 15:6-20; Lc. 23:13-25; Jn. 18:38-19:16)

15 Te ndi tnahá nduu víco pascuá dáccacu té Pilatú téa cùu gobiernú-áⁿ ìnⁿ téa yìhì vecaá chí ducaⁿ tnàhí quide-dé, te mee ñãyiú cãháⁿ-yu te núu ndëdacàa téa yìhì vecaá-áⁿ cãcu-dé te téa-áⁿ dáccacu-dé.

16 Te dàvá-áⁿ yìhì ìnⁿ téa nàni Barrabás vecaá, te téa-áⁿ ìo cuendú-dé sá ìo nèhé ní quide-dé. 17 Te ní natacá nchaa ñãyiú, te té Pilatú ní xicáⁿ tnúhú-dẽ núŷ-yu, te xãhaⁿ-dẽ:

—¿Ndëdacàa núú ùú cue téa cuiní-ndó dàccacu-í-güedé-i? ¿Té Barrabás ãⁿ Jèsús téa nàni Cristú? —càchí-dé xãhaⁿ-dẽ xii-yu.

18 Te ducaⁿ ñi cãháⁿ té Pilatú, chí ní cutnùní iní-dé sá dícó sá cuèdú iní-güedé ducaⁿ ñi quide-güedé ní sãha cuendá ñãhá-güedé xii Jèsús núú-dẽ.

19 Te niní núcóo té Pilatú núú xèhndé-dé cuéchi ní tendaha ñãdihí-dé tnúhu cuáhãⁿ núú-dẽ, te duha ndùu tnúhu

ní tendaha-aⁿ: “Vá cãní iní-n ñã cada-n tãe ní taxì cuendá ñãhá-güedé xii-n, tãe ñã túú tnàhí cuéchi-xi, chí icuini ìo nèhé ní dácótó ñãha saní-í cuendá-dé”, duha ndùu tnúhu ní xáhaⁿ-aⁿ xii té Pilatú.

20 Dico cue téa cùu dútú cùnùu, ndihì cue téa cùu sacuéhé núú ñãyiú isràél ní xáhaⁿ-güedé xii ñãyiú sá ná cũñãhá-yu xii té Pilatú dàccacu-dé té Barrabás te cãhí-dé Jèsús, te ní quidé-yu nãcuáa ní xáhaⁿ-güedé. 21 Te té Pilatú-áⁿ ñi xáhaⁿ tũcu-dé xii-yu:

—¿Ndëdacàa núú ùú cue téa cuiní-ndó dàccacu-í? —càchí-dé xãhaⁿ-dẽ xii-yu.

Te ní xãhãⁿ-yu xii-dé:

—Té Barrabás dàccacu-n —càchí-yu xãhãⁿ-yu xii-dé.

22 Te té Pilatú ní xicáⁿ tnúhú-dẽ núŷ-yu, te xãhaⁿ-dẽ:

—¿Te ná cuiní-ndó càda-í Jèsús téa nàni Cristú téa càchí sá Yã Ndiòxí ní tendaha ñãha xii-dé véxi-dé ñuyiú-a-í? —càchí-dé xãhaⁿ-dẽ xii-yu.

Te nchaa-yu ní cãháⁿ-yu, te xãhãⁿ-yu:

—Cata caa-dé núú cùrúxí—càchí-yu xãhãⁿ-yu xii-dé.

23 Te té Pilatú ní xáhaⁿ tũcu-dé xii-yu:

—¿Te ná cúú cuéchi ní quide-dé núu ducaⁿ cuiní-ndó càda-í-dé-i? —càchí-dé xãhaⁿ-dẽ xii-yu.

Dico nchaa-yu uuⁿ-gá níhì ní cãháⁿ-yu, te xãhãⁿ-yu xii-dé:

—¿Cata caa-dé núú cùrúxí! —càchí-yu xãhãⁿ-yu xii-dé.

24 Te té Pilatú ní cutnùní iní-dé sá vã ñihí-dé nãcuáa cada-dé, chí uuⁿ-gá ní ngũita ñãyiú xicúáa-yu, te xãⁿ ní

xícáⁿ-dé ndute ní ndáhá-dě núú ncháa ñáyiú, te ní xáhaⁿ-dě xii-yu:

—Tée-a cùu-dé ìⁿ téé ñá túú tnàhí cuéchi-xi, te nchòhó cuìní-ndó sá cùu-dé, dico ñi-ni mee-ndo cuidó yáhu-ndo-dě chi yúhú vá cuidó yáhu-í-dé —càchí-dé xáhaⁿ-dě xii-yu.

25 Te nchaá-yu ní xáhãⁿ-yu xii-dé:

—¡Diu nchúhú ndihi cue déhe-ndí cuidó yáhu-ndí-dé! —càchí-yu xáhãⁿ-yu.

26 Te sátá dúcáⁿ te té Pilatú ní dácacu-dé té Barrábás, te ní táuchíúⁿ-dě ní cani-güedé Jèsús. Te sátá dúcáⁿ ñi quide ñaha-güedé xii-gá, te ní táuchíúⁿ-dě çandeca ñaha-güedé xii-gá quíhíⁿ cata caa ñaha-güedé xii-gá núú cùrúxí.

27 Te cue téé cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue téé cùu sandadú-áⁿ ñi cana-güedé dava-gá cue sandadú núú dúcáⁿ ndéca-güedé Jèsús cuánguihu-áⁿ. 28 Te xíaⁿ ñi taunuu-güedé dóo-gã, te ní dácuihnú ñaha-güedé xii-gá ìⁿ dóo tícuèhé víhí. 29 Te ní cadúha-güedé ìⁿ coróná iñu ní chihi-güedé díquí-gã, te ní chitnii-güedé ìⁿ carrutí ndaha cùha-gá, te ní ngüíñí xítí-güedé núú-gã cúdíquí ndeé ñáhá-güedé xii-gá, te xáhaⁿ-güedé:

—¡Ío càhnu cuu yohó téé yìndaha ñaha xii ñáyiú isráél! —càchí-güedé xáhaⁿ-güedé xii-gá.

30 Te ní tiú díí ñáhá-güedé xii-gá, te ní queheⁿ-güedé carrutí sá ñi sãñaha-güedé xii-gá te ní ducuⁿ-güedé díquí-gã. 31 Te sátá ñi yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé víhí sá ñi dácuihnú ñaha-güedé xii-gá, te ní dándíúnuu ñaha-güedé xii-gá dóo méé-gã, te dátñuní ndécá ñaha-güedé cuáháⁿ núú catá caa ñaha-güedé xii-gá núú cùrúxí.

Sàta caa-güedé Jèsús núú cùrúxí
(Mr. 15:21-32; Lc. 23:26-43; Jn. 19:17-27)

32 Te ñuhu-güedé ndihi-gá ichi, te ní naníhí-güedé ìⁿ téé ñuú Cirené naní-dě Xímú, te téé-áⁿ ñi quide yica-güedé ní xido-dé cùrúxí sá nchídó Jèsús.

33 Te ní sáá-güedé ndihi-gá ìⁿ xichi núú naní Gólgotá, te tnúhu-áⁿ queé-xí: Núú naní yìquí díquí ndíyi, duha quèe-xi tnúhu-áⁿ. 34 Te xíaⁿ sãñaha-güedé ndudí úa coho-gá ní cùu, te ñá túú ní xihí-gá chi dico-ñi ní xito ndéé-gã.

35 Te ní sata caa ñaha-güedé xii-gá núú cùrúxí, te sátá dúcáⁿ te cue téé cùu sandadú-áⁿ ñi xito ndéé-güedé núu ndédacàa-güedé cuu cuendá-güedé dóo-gã. Te ducaⁿ ñi cuu chi ní quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndiòxí ndéé sanaha yòdo tnuní núú tütú-gá, te duha càchí-xi: “Ní xito ndéé-güedé

nũu ndědacàa-güedé cuu cuendá-güedé dóó-gǎ”, duha ní cachí tée-áⁿ te ducaⁿ nĩ ngódó tñuní núú tütú-gá. ³⁶ Te sáta dúcáⁿ nĩ quide-güedé, te ní ngóo-güedé ndèé ñáhá-güedě xii-gá. ³⁷ Te

ní taxi ndecu-güedé ìⁿ sá ndèé lètrá ndàa díquí-gá. Te lètrá-áⁿ cǎháⁿ-xi ná cuendá ducaⁿ nĩ quide ñaha-güedé xii-gá, te duha cǎháⁿ lètrá-áⁿ:

“Tée-a cùu-dé tée yìndaha ñaha xii ñáyiú isràél”, duha cǎchí-xi. ³⁸ Te tñahá úú cue tée cùu ñadúhú nĩ sata caa-güedé ñu-ni núú cùrúxí tucu, te ìⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá. ³⁹ Te nchaa ñáyiú yǎha yatni núú tǎcàa-gá-áⁿ, te dàcuicó-yu díquí-yu ndèhe ñahá-yu xii-gá, te xǐcùehé ñáhǎ-yu.

⁴⁰ Te xǎhǎⁿ-yu xii-gá:

—Yòhó cǎchí-n sǎ dàngoyo-n veñúhu cǎhnu sá ìo cùnunu, te dandàa-n ingá veñúhu saa, te xití úní-ni nduu sa nadaxínu-n, te vitna tanùu núú cùrúxí-áⁿ dàcǎcu-n mèe-n te núu ndisa sá Dèhe Yá Ndiòxí cùú-n —cǎchí-yu xǎhǎⁿ-yu xii-gá.

⁴¹ Te ñu-ni ducaⁿ cùdíquí ndeé ñáhá cuè tée cùu dútú cùnùu xii-gá, ndìhi cue tée dàcuaha ñaha xii ñáyiú nchaa tñúhu ní chídó tñuní ndíi Moisés, ndìhi cue tée cùu fariséú, ndìhi cue tée cùu sacuéhé nũu ñáyiú isràél, te xǐtñàha-güedé:

⁴² —Tée-a ní ndacu-dé ní dàcǎcu-dé dava ñáyiú, te mee-dě ñǎ ndácú-dě dàcǎcu nihnu-dé mèe-dě.

Te núu ndisa sá cùú-dě tée yìndaha ñaha xii ñáyiú isràél, te na cùndehe-o nuu-dé núú cùrúxí-a cuendá quíndáá iní-ó-dě. ⁴³ Te

cǎchí-dé sá sàndáá iní-dé Yá Ndiòxí, te mee-gǎ ná dàcǎcu ñaha-gǎ xii-dé te núu cùndahú iní ñáhá-gǎ, chi mee-dě cǎchí-dé sá Dèhe-gá cùú-dě —cǎchí-güedé xǐtñàha-güedé.

⁴⁴ Te ndeé tñahá cue tée cùu ñadúhú tǎcàa xio xio díñi-gá xǐcùehé ñáhá-güedě xii-gá.

Ní xǐhí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee nihíi ñuyúú, te ducaⁿ-ni cǎa ní cuu caá úní sacuaa. ⁴⁶ Te òré sa ta cùyatni cuu caá úní sacuaa-áⁿ, te níhi ní cǎháⁿ Jèsús, te cǎchí-gá:

—Èlí, Èlí, ¿láma sabàctaní? —cǎchí-gá.

Te tñúhu-áⁿ quée-xí: Ndiòxí mèe-í, Ndiòxí mèe-í, ¿ná cuendá ní dáñá ñaha-n xii-í?, duha quèe-xi tñúhu-áⁿ.

⁴⁷ Te dava cue tée xǐndecu yatni núú tǎcàa-gá-áⁿ nĩ tecú dóho-güedé nàcuáa ní cǎháⁿ-gá, te ní xǐtñàha-güedé:

—Tée-a cǎna-dé té Èliás —cǎchí-güedé xǐtñàha-güedé.

⁴⁸ Te òré-ni-áⁿ nĩ quene cunu ìⁿ cue tée xǐndecu-áⁿ nĩ queheⁿ-dé luha cǎchí, te ní chindóyo-dé xití ndudí íá, te ní chinenu-dé díquí ìⁿ yutnu cǎni te ní ndocani-dé ní chihi-dé yuhu-gá. ⁴⁹ Te dava-güedé ní xǎháⁿ-güedě xii tée-áⁿ:

—Cundetú tnaa na cùndehe-o nacoto núu quixi

té Èliás dàcácu ñaha-dě xii-dé —càchí-güedé xãhaⁿ-güedě xii tée-áⁿ.

50 Te Jèsús níhi ní cana saa-gá, te ní xihí-ni-gá. 51 Te sátá dúcáⁿ te ní ndátá dǒó cúú còrtiná xití veñúhu càhnu sá ïo cùnunu ní quée dava ndáá, te ndáa núú ñinu ní ngúíta-xi ní ndátá, te ní tnáa, te dava cava nahnu ní táhú. 52 Te dava yaú núú yíndúxi ñáyiu ní xihí ní sándáá iní ñáhá xii Yá Ndiòxí ní nacaáⁿ te ní ndotó-yu. 53 Te sátá ñí yáha ní ndoto Jèsús, te cue ñáyiu ní ndoto-áⁿ cuãnguihú-yu xití ñúú Jerusalén, te cue ñáyiu ñúú-áⁿ ïo vai-yu ní xiní-yu cue ñáyiu ducaⁿ ñí ndoto-áⁿ.

54 Te sá dúcáⁿ nãndi ní quide-xi, ndihí sá dúcáⁿ ñí tnáa xĩáⁿ ïo ní yuhú tée cùu capitáⁿ ndihí nchaa dava-gá cue tée ndècu ndihí-dé ndèé-güedé yiqui cùñú Jèsús, te ní xitnàha-güedé:

—Sá ndáá ndisa sá díú tée-a cùu-dé Déhe Yá Ndiòxí ní cùu —cachí-güedé xitnàha-güedé.

55 Te xica xĩnutnĩhí vai ñáyiu dihí ndéhě-yu nchaa nàcuáa ní quide ñaha-güedě xii Jèsús, te ñáyiu-áⁿ cùú-yu ñáyiu ní chindèé-yu Jèsús, te ndéé distritú Galileá ní chinchícúⁿ ñáhã-yu xii-gá. 56 Te tnuú ñáyiu-áⁿ tnàhá tá Màriá Magdalèná, ndihí tá Màriá nãná tẽ Jàcobó ndihí té Chèé, ndihí nãná cue déhe té Zebèdeú.

Chindúxi-güedé Jèsús

(Mr. 15:42-47; Lc. 23:50-56; Jn. 19:38-42)

57 Te ndècu ñí tée cuica nani-dé Chèé te cùu-dé tée

ñúú Arimàtea, te tnàhá-dé ní tnàhá tnúhu-dé ndihí Jèsús. Te òré sa ní cuaa, 58 te ní sáhã-dé núú tẽ Pilatú, te xãhaⁿ-dé núu vá cùndèe iní-dé daña-dě chindúxi-dé yiqui cùñú Jèsús. Te té Pilatú-áⁿ ñí sáha-dé tnúhu, te ní táuchíúⁿ-dě sá cuãha cuendá-güedé té Chèé-áⁿ yiqui cùñú-gá. 59 Te té Chèé-áⁿ ñí queheⁿ cuendá-dé yiqui cùñú-gá, te ní chidúcúⁿnuu-dé ñíⁿ dóó cuixíⁿ dóó cándò. 60 Te sa nchĩí ñíⁿ yaú sáá ñí caáⁿ té Chèé-áⁿ ñíⁿ yiqui naha càva te xíáⁿ cúú cuendá-dé, te yaú-áⁿ ñí chihi-dé yiqui cùñú Jèsús, te dàtnùní ní sadí-dé ñíⁿ yúú cáhnú yúú quèhéⁿ yuhu yaú-áⁿ, te ní xica-dé cuãnuhú-dé. 61 Te tnàhá tá Màriá Magdalèná, ndihí ingá xíchí nání Màriá ní quexió-yu ní ngóo-yu yatni núú nchĩí yaú-áⁿ.

Cue tée ndèé yaú núú yihí yiqui cùñú Jèsús

62 Te sátá ñí yáha ní quide túha ñáyiu nchaa sá nãndĩhi-yu nduu tnèé nduu ndètátú-yu-áⁿ, te diu-ni nduu ndètátú-yu-áⁿ ñí sáhãⁿ cue dútú cùnùu, ndihí cue tée cùu fariséú ní cáháⁿ ndihí-güedé té Pilatú. 63 Te xãhaⁿ-güedě xii-dé:

—Yòhó tée cùnunu, véxi-ndí càchí tnúhu-ndí sá ñí ndacu iní-ndí sá tẽ ndehnde ñí xihí-ãⁿ càchí-dé òré ndécú-gã-dé sá nduu úní sá cùu-dé, te ndoto-dé. 64 Te tendaha-n cuè tée na quihíⁿ-güedé cundeé-güedé

yuhu yàú núú nǐ chihi-güedé yiqui cùñú-dé, chi na cuáháⁿ quíhíⁿ cue téé ní xica cuu ndihi-dé duhu-güedé yiqui cùñú-dé, te cùñaha-güedé xii ñáyiú sá nǐ ndoto-dé. Chi núú ducaⁿ na càda-güedé te ío-gá dandàhú-güedé cue ñáyiú dàcúxí dàtná ní quide mee tée ní xihí-áⁿ —càchí-güedé xàhaⁿ-güedé.

⁶⁵ Te té Pilatú ní xáhaⁿ-dè xii-güedé:

—Náu cue sandàdú-a can-deca-ndo-güedé quíhíⁿ, te cadí váha-ndo ndihi-güedé yuhu yàú-áⁿ nàcuáa tàú-xi cunduu, te na cùndeé-güedé nàcuáa sàni iní-ndó cunduu —cachí-dé xàhaⁿ-dè xii-güedé.

⁶⁶ Te cue téé-áⁿ nǐ xica-güedé cuáháⁿ-güedé, te ní tee-güedé ìⁿ sèñá yúú ndèdí yèhe yaú-áⁿ, te ní dándõo-güedé cue sandàdú-áⁿ ndèé-güedé yaú-áⁿ, te ducaⁿ nǐ quide-güedé cuèndá sá vǎ yõo quíhíⁿ nacaáⁿ yaú-áⁿ.

28

Ní ndoto Jèsús

(*Mr. 16:1-8; Lc. 24:1-12; Jn. 20:1-10*)

¹ Te sátá nǐ yáha nduu ndètatú ñáyiú, te ndumìngú nehé víhí-ní nǐ xica tá Màriá Magdalèná ndihi ingá xíchí nání Màriá cuángotó-yu yaú núú nǐ chihi-güedé yiqui cùñú Jèsús. ² Te uuⁿi níhi víhi ní tnáa, te òré ducaⁿ nǐ quide-xi chí ìⁿ espíritú xínú cuèchi núú Yǎ Ndiõxí ní quexìo-xi núú dúcáⁿ nchií yaú núú nǐ chihi-güedé yiqui cùñú

Jèsús, te ní xócání espíritú-áⁿ yúú ndèdí yèhe yaú-áⁿ te ní ngóo-xi núú yúú-áⁿ. ³ Te dàtná dátásaⁿ-xi òré sàá ndúté dùcaⁿ datásaⁿ-xi núú espíritú-áⁿ, te dóó níhnú-xí cuixíⁿ quiyí. ⁴ Te òré ducaⁿ nǐ quide-xi te cue sandàdú ndèé yaú-áⁿ nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xìní tnùnì-güedé. ⁵ Te espíritú-áⁿ nǐ xáhaⁿ-xi xii cue ñáyiú dìhí cuángoto yaú-áⁿ:

—Nchòhó ñáyiú dìhí véxi coto yaú-a, vá yùhú-ndó chí yùhú cùtnùnì iní-í sá nchòhó véxi-ndo nànducu-ndo yiqui cuñú Jèsús Yaá ní xihí núú cùrúxí. ⁶ Dico Yaá-áⁿ chí ñá túú-gǎ ndécú yiqui cuñú-gá iha, chí sa ní ndoto-gá, te diu ducaⁿ nǐ cachí-gá sá ndótó-gǎ cùtnàhá vátá cùú-gá, te chí táquixi cundehe-ndo núú nǐ sacáⁿ-güedé yiqui cùñú-gá ní cùu te quiní-ndó nǎ ñá túú-gǎ. ⁷ Te vitna ío ndíhi chí cuáháⁿ núú xǐndecu cue téé ní xica cuu ndihi-gá, te duha cùñaha-ndo xii-güedé: “Ní ndoto Jèsús Yaá ní xihí ní cùu, te codonuu-gá núú-ndó quíhíⁿ distritú Galileá te yàcáⁿ quiní-ndó-gǎ”, duha cùñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-áⁿ xàhaⁿ-xi xii cue ñáyiú dìhí-áⁿ.

⁸ Te cue ñáyiú dìhí-áⁿ nǐ natní-yu ichi, te súúnì ndíhi cuánuhú-yu núú xǐndecu cue téé ní xica cuu ndihi Jèsús cuèndá nacani tnúhu-yu núú-güedé nàcuáa ní xáhaⁿ

espíritú-áⁿ xií-yu, te cuéi ní yùhú-yu dico súúni cùdíi ìmí-yu. ⁹ Te ichi ñùhú-yu cuánuhú-yu, te na iní-yu ní quexio Jesús núŷ-yu ní dándácõo váha ñaha-gã xií-yu. Te ñáiyu-áⁿ ñi ngüñí xítŷ-yu núú-gã, te ní numi ñàhá-yu xii-gã, te ní chiñuhu ñàhá-yu. ¹⁰ Te ní xáhaⁿ-gã xií-yu:

—Vá yùhú-ndó, chí cuáháⁿ cúñaha-ndo xii cue téé ní xica cuu ndihí-í sá ná quihíⁿ-güedé distritú Galileá, te yacáⁿ quini ñàhá-güedé xii-í —càhí-gá xãhaⁿ-gã xií-yu.

Nàcuáa ndùu tnúhu ní nacani cue sandàdú

¹¹ Te ñini ñùhu cue ñáiyu òhí-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuú cuendá nacani tnúhu-güedé núú cue téé cùu dútú cùnùu nacuáa ní cuu. ¹² Te cue téé cùu dútú cùnùu-áⁿ ñi quide-güedé jündá ndihí cue téé cùu sacuéhé núú ñáiyu isràél, te ní ndatnúhu-güedé nàcuáa cada-güedé, te ní quide ndáá-güedé ndihí cue sandàdú-áⁿ sã cuãñaha-güedé vai díhúⁿ cuendá dacuàndehnde-güedé. ¹³ Te ní xáhaⁿ-güedé xii cue sandàdú-áⁿ:

—Cuini-ndí sá vã càháⁿ ndáá-ndó núú ñáiyu nàcuáa ní cuu, chí cúñaha-ndo xií-yu sá òré xidí-ndó ñi quixi cue téé ní xica cuu ndihí-dé ní dúhú-güedé yiqui cúñú-dé néhé-güedé cuáháⁿ, duha cúñaha-ndo xií-yu.

¹⁴ Te núu na ñihí té Pilatú téé cùu gobiernú tnúhu nàcuáa cúñaha-ndo xii ñáiyu, te nchúhú cada ndáá-ndí ndihí-dé cuendá sá ñà túú ñà cada ñaha-dé xii-ndo —càhí-güedé xãhaⁿ-güedé xii cue sandàdú-áⁿ.

¹⁵ Te cue sandàdú-áⁿ ñi queheⁿ cuendá-güedé díhúⁿ, te ní xica-güedé cuáháⁿ-güedé te ní càháⁿ-güedé nàcuáa ní xáhaⁿ cue téé-áⁿ càháⁿ-güedé. Te nchaa ñáiyu isràél ní ñihí-yu tnúhu ní càháⁿ-güedé-áⁿ, te òru-ñi tnúhu-áⁿ càháⁿ-yu ndéé vitna.

Jesús xãhaⁿ-gã xii cue téé ní xica cuu ndihí-gã nàcuáa ndùu chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndí ùxí ñiⁿ cue téé ní xica cuu ndihí Jesús ní xica-güedé cuáháⁿ-güedé ñiⁿ yucu càa distritú Galileá núú ñi xáhaⁿ-gã naníhí tnáhá-güedé ndihí-gã. ¹⁷ Te òré ní xiní-güedé Jesús te ní chiñuhu ñaha-güedé xii-gã, dico dava-güedé sàni ñiⁿ sàni úú iní-güedé núu òru-gã àdi ñà díú-gã. ¹⁸ Te Jesús ní sàndehe yatni-gã ndéé núú-güedé, te ní xáhaⁿ-gã xii-güedé:

—Yúhú ndécú ndihí-í tnúhu ndee ñi táxi tnùn-í cuéi andiⁿ te cuéi ñuyíu-a. ¹⁹ Te vitna tàuchiuⁿ-í sá quihíⁿ-ndó ñihí ñuyíu càháⁿ-ndó tnúhu-í núú ñáiyu cuendá tuha ñàhá-yu xii-í, te dacuàndute-ndó-yu. Te òré ducaⁿ càda-ndo, te cacunehhe-ndo tãtá-ó Dútú Ndióxi ndihí yúhú Yaá cúu Dèhe-gã ndihí Espíritú-gã.

20 Te cúñaha-ndo xii-yu sá
ná càdá-yu nchaa nàcuáa
sa ní dánèhé ñáhà-í xii-ndo
càda-ndo. Te na cächí tnúhu-í
sá cùndècu ndihí ñaha-ni-í
xii-ndo ñùyíú-a ndéé ná
sàá nduu nàa-xi —cachí-gá
xăhaⁿ-gă xii-güedé. Te ducaⁿ
na cùnduu.

TNÚHU NÍ CHÍDÓ TNÛNÍ TĚ MĂCÚ

Té Juàá tée dàcuandute ñaha xii ñáyiu càháⁿ-dé tnúhu Yá Ndiöxí xití yucu

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ nàcuáa naníhí tàhú-ó tnúhu Xítóhó Jesucristú Déhe Yá Ndiöxí.

² Te ndíi Chàíá tée ní xóo cáháⁿ tnúhu Yá Ndiöxí ndéé sanaha ñí chídó tnùní ndíi nàcuáa ní xáhaⁿ Yá Ndiöxí xii Déhe-gá, te duha ní xáhaⁿ-gá: Tendaha-í ñí tée codonúu-dé núu-n, te dàtúha-dé ñáyiu cuèndá tní-yu tnúhu-n.

³ Te tée-áⁿ quihi-dé xití yucu te níhi cáháⁿ-dé cúñaha-dě xii ñáyiu:

“Chí dáñá nchàa ichi cuehé ichi duha ndècu-ndo, te tní-ndo ichi váha, te ducaⁿ càda-ndo cuendá cundecu túha-ndo, chi véxi Yaá ío cùnúu”, duha cúñaha-dě xii-yu.

Duha ndúu tnúhu ní chídó tnùní ndíi Chàíá nàcuáa ní xáhaⁿ Yá Ndiöxí xii Déhe-gá.

⁴ Te tée dii cuèndá-xi ní ngódó tnùní-áⁿ nání-dě Juàá, te tée-áⁿ ñí xíhi-dé xití yucu ní cáháⁿ-dé tnúhu Yá Ndiöxí, te ní xóo dacuàndute-dé ñáyiu, te duha ní xáhaⁿ-dě xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te

Yá Ndiöxí cada càhnu iní-gá nchaa yíca cuèchi-ndo — duha ní xáhaⁿ-dě xii-yu.

⁵ Te nchaa ñáyiu distritú Jùdeá, ndíhi ñáyiu ñúú Jerusalén ní sáháⁿ-yu ndéé yúte Jòrdán núú ndécú tē Juàá ní xíndedóho-yu nchaa tnúhu ní cáháⁿ-dé. Te cue ñáyiu ní náhmá nchaa yíca cuèchi-xi te ní dácuàndute ñaha-dé xii-yu.

⁶ Te tē Juàá-áⁿ ñí xíhnu-dé dóo idi càméyu, te ñí ñí ñí cuu pàñú xití-dé, te ní xóo caxi-dé tíca làngóstá ndíhi ndudí ñúú cuéchi. ⁷ Te ní xáhaⁿ tùcu-dé xii ñáyiu:

—Nchícúⁿ ñí tée véxi, te tée-áⁿ ño-gá cùnúu-dé dàcúúxí yúhú, chi yúhú cúu-í ñí tée duuⁿ duuⁿ ñá túú tàú-í ngúnundeyí-í nandaxi cuèdicó ñí ñí ñíhnu chàu-dé dico quide-í chiuⁿ-dé. ⁸ Te yúhú dácuàndute ñaha-í xii-ndo, dico mee-dě taxi-dé Espiritú Yá Ndiöxí cundecu ndíhi-ndo —càhí-dé xáhaⁿ-dě xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ñí quee Jèsús ñúú Nazàrét ñí ñúú yíndèhu distritú Galileá cuáháⁿ-gá yúte Jòrdán. Te yàcáⁿ ní dácuàndute ñaha tē Juàá xii-gá. ¹⁰ Te òré ní nene-gá xití ndute, te ní xini-gá nchí andíu, te ní quee Espiritú Yá Ndiöxí véxi cuuⁿ-xi ngúndecu ndíhi ñaha-xi xii-gá, te dàtná cáá ñí lómá cáá Espiritú-áⁿ véxi cuuⁿ-xi. ¹¹ Te òré-áⁿ ñí tecú ní cáháⁿ Yá Ndiöxí ndéé andíu, te xáhaⁿ-gá xii Jèsús:

—Yòhó cúú-n Dēhe-í tée ío cúu iní-í te ío cùdíí iní ñáhà-í xii-n —càchí-gá xáhaⁿ-gá.

Sácuíhná quidé yíca-xi cada Jesús sá ñà túú tàú-gá cada-gá dico ñá túú ní quíde-gá

(Mt. 4:1-11; Lc. 4:1-13)

¹² Te Espíritú Yá Ndiòxí ndécá-xí Jèsús cuáháⁿ ìⁿ xití yucu. ¹³ Te xití yucu-áⁿ ío víhí quítì dééⁿ, te xíáⁿ ndécú Jèsús ní ngúíta sácuíhná quidé yíca-xi cada-gá ìⁿ sá ñà túú tàú-gá cada-gá dico ñá túú ní sàndáá iní-gá. Te cue espíritú xínú cuèchi núú Yá Ndiòxí ní xínu cuechí-xi núú-gá. Te ní xíndecu-gá údico nduu xití yucu-áⁿ.

Distritú Galileá ní chisaha Jesús chiúⁿ ní táhú Tátá-gá Dútú Ndiòxí cada-gá

(Mt. 4:12-17; Lc. 4:14-15)

¹⁴ Te sátá ñí ngava té Juàá vecaá, te Jèsús cuáháⁿ-gá distritú Galileá dànehé-gá ñáyíu tnúhu váha, tnúhu sá càháⁿ nàcuáa ndíhu ndaha ñaha Yá Ndiòxí xii-yu. ¹⁵ Te xáhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndiòxí xii-ndo, te chí dáñá nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá càháⁿ nàcuáa naníhí tàhú-ndó —càchí-gá xáhaⁿ-gá xii-yu.

Jèsús càháⁿ-gá cúmí tnàhá cue tée tnèí chácá

(Mt. 4:18-22; Lc. 5:1-11)

¹⁶ Te Jèsús ñúhú-gá ichi cuáháⁿ-gá tá yáha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí

xídáquēe-güedé ñunu-güedé xití ndute tnèí-güedé chácá, chí quítì tnàhí-áⁿ cúu chiúⁿ-güedé tnèí-güedé-di. ¹⁷ Te Jèsús ní xáhaⁿ-gá xii-güedé:

—Chí dáñá chiúⁿ quide-ndo-áⁿ, te quixi-ndo chítinahá ñáhá-ndó xii-í te taxi-í ingá núú chiúⁿ cada-ndo chí quíhíⁿ-ndó cáháⁿ-ndó ñáyíu cuéndá dacuáhá-yu tnúhu-í —càchí-gá xáhaⁿ-gá xii-güedé.

¹⁸ Te òré-ni-áⁿ ñí dáñá cué tée-áⁿ ñunu-güedé te ní tuha ñaha-güedé xii-gá.

¹⁹ Te cuáháⁿ-gá luha-gá, te ní xiní-gá té Jàcobó ndíhi ñaní-dé té Juàá ñúhú-güedé xití bàrcú-güedé nátícu-güedé ñunu-güedé, te ndí ndúú-güedé cúú-güedé déhe té Zebèdeú. ²⁰ Te ní cana ñaha-gá xii-güedé, te ní dándöo-güedé tátá-güedé ndíhi cue tée xínu cuechi núú-güedé xití bàrcú, te ní tuha ñaha-güedé xii-gá.

Íⁿ tée yíhi ñaha espíritú cúndíhi yucu ñávàha

(Lc. 4:31-37)

²¹ Te ní quexío Jesús ndíhi cue tée-áⁿ ìⁿ ñúú nání Càpernaúm, te yácáⁿ ndécú-gá ní tnahá nduu ndètatú ñáyíu, te cuánguìhu-gá veñúhu ñáyíu isràél dànehé ñáhá-gá xii-yu.

²² Te xícuñúhu víhí-yu nchaa tnúhu càháⁿ-gá, chí quíde-gá sá cúú-gá ìⁿ Yaá táxí tnùnì víhí, te ñá túú dàcuaha ñaha-gá xii-yu dàtná dácuaaha ñaha cue tée dàcuaha ñaha xii-yu nchaa tnúhu ní chídó tnùnì ndíi Moisés. ²³ Te xití veñúhu-áⁿ

ndécú tnàhá ìⁿ téé yìhi ñaha ìⁿ espíritú cúndìhi yucu ñávãha, te espíritú-áⁿ ní quide-xi níhi ní cáháⁿ téé-áⁿ, te xãhaⁿ-dẽ xii Jèsús:

24 —¿Te ná cuení yòhó Jèsús téé ñuú Nazàrét cada ñaha-n xii-ndí nũu véxi-n nũú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xìní ñáhà-í xii-n sã cúú-n ìⁿ téé ñá túú tnàhí cuéchi-xi, chi núú Yã Ndiòxí ní quee-n véxi-n ñùyíú-a —càchí-dé xãhaⁿ-dẽ xii-gá.

25 Dico Jèsús ní tenáá-gá espíritú cúndìhi yucu ñávãha-áⁿ, te xãhaⁿ-gã:

—¡Cadí yuhu-n, te taquèe yiqui cuñú téé-áⁿ! —càchí-gá xãhaⁿ-gã xii espíritú-áⁿ.

26 Te espíritú cúndìhi yucu ñávãha-áⁿ ní dácũyìhí ñáhà-xí xii téé-áⁿ, te ní dácáná sàa ñaha-xi, te ní quee-xi yiqui cuñú-dé cuáhàⁿ-xi. 27 Te nchaa ñáyiu xĩndecu-áⁿ ïo ní cuñúhu-yu, te ní xitnàhá-yu:

—¿Te nása ndũu-tu sá quidé tée-a? ¿Ndudú sá cáháⁿ-tu-dé sánũu? Te quide-dé dàtná quidé ìⁿ téé cunuú vihi, chi cáháⁿ-ni-dé te sàndáá iní ñáhà nchàa espíritú cúndìhi yucu ñávãha—càchí-yu xitnàhá-yu.

28 Te ïo ndìhi ní níhí nchaa ñáyiu dava-gá ñuú yĩndèhu distritú Galileá tnúhu nchaa nàcuáa cáháⁿ Jèsús ndìhi nchaa sá quidé-gã.

Jèsús quidé tãtna-gá nãná ñadìhí té Ximú
(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyiu isràél, te cuáhàⁿ-gá ndìhi té Jàcobó ndìhi té Juàá vehe té Ximú ndìhi té Ndrìxí. 30 Te nãná ñadìhí té Ximú cùhú-aⁿ ñũhu vihi-aⁿ cahni, te ndìhi-ni ní xãhaⁿ-güedẽ xii Jèsús sá cùhú-aⁿ. 31 Te ní sáhàⁿ-gá núú cáá ñaha cùhú-áⁿ te ní tñi-gá ndaha-aⁿ ní ndocani ñaha-gã xii-aⁿ. Te òré-ni-áⁿ ní nchico-aⁿ cahni, te ní ngüita-aⁿ xĩnu cuechi-aⁿ núú-güedẽ ndìhi-gá.

Jèsús quidé tãtna-gá vãi ñáyiu cùhú

(Mt. 8:16-17; Lc. 4:40-41)

32 Te òré sa cuení-xi cundiquiⁿ te ní quexio ñáyiu núú ndécú Jèsús, te nchaa ñáyiu cùhú ní dátacá-yu ndecá-yu ní sáá núú-gã, te tnàhá cue ñáyiu yìhi ñaha espíritú cúndìhi yucu ñávãha ndecá-yu ní sáá núú-gã. 33 Te nchaa ñáyiu ñuú-áⁿ ní chítú níhnũ-yu yuyèhe vehe núú ní quexio Jèsús. 34 Te Jèsús ní quide tãtna-gá nchaa ñáyiu cùhú cuèi ndi díⁿ ndi díⁿ núú cuèhé tnàhá-yu ìⁿ ìⁿ-yu, te ní queñuhu-gá nchaa espíritú cúndìhi yucu ñávãha yìhi ñaha xii ñáyiu, te ñá túú ní dàña-gá cáháⁿ cue espíritú cúndìhi yucu ñávãha-áⁿ ni ìⁿ tnúhu, te ducaⁿ ní quide-gá chi cue espíritú-áⁿ sa xìní-xi yoo cùu-gá.

Jèsús cáháⁿ-gá tnúhu Yá Ndiòxí distritú Galileá
(Lc. 4:42-44)

35 Te òré vátá tũndaá váha-gá ní ndacóo Jèsús

cuáháⁿ-gá ñⁿ xio yuhu ñúú núú ñà túú ñáyiú ndècu cuendá yàcáⁿ cáháⁿ ndihi-gá Yá Ndiöxí. ³⁶ Te té Ximú ndihi cue tée cündihi-dé nándücu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nànducu ñahá-yu xii-n —càchí-güedé xáhaⁿ-güedé xii-gá.

³⁸ Te ní xáhaⁿ-gá xii-güedé:

—Chí ná quíhíⁿ-ó nchaa ñuú xíndáa yatni-a, chi danèhé-í ñáyiú tnúhu Yá Ndiöxí chi diu chiúⁿ-án vèxi-í —càchí-gá xáhaⁿ-gá xii-güedé.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galileá dánèhé-gá ñáyiú, te ndi tnahá ñⁿ ñuú sàá-gá te ducaⁿ cuànguihu-gá veñúhu-yu dànehé ñáhá-gá xií-yu tnúhu Yá Ndiöxí, te cue ñáyiú yíhi ñaha espíritú cündihi yucu ñávaha ta quèñuhu-gá nchaa espíritú-án yiqui cùñú-yu cuáháⁿ.

Jèsús quidé tātna-gá ñⁿ tée tnahá cuéhé sã dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexìo ñⁿ tée tnahá cuéhé sã dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gá càháⁿ ndàhú-dé, te xáhaⁿ-dè xii-gá:

—Vèxi-í càháⁿ ndàhú-í núú-n núú vã cündèe iní-n càda tātna ñaha-n xii-í chi cùtnuní iní-í sã ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gá xii-dé te ní dácáá-gá

ndaha-gá ní tendaha ñàha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴² Te òré-ni-án ñí xócuíñí cuéhé tnahá-dé. ⁴³⁻⁴⁴ Te Jèsús ní cáháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yoo ñⁿ cúñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quíni ñáhá-dè xii-n sà ní ndúha-n te cuáha-n-dè sá ndúú tãhú Yá Ndiöxí dàtná ní cachí ndí Moisés cuendá ná quíni ñáyiú sã ndáa ní ndúha-n —càchí-gá xáhaⁿ-gá xii-dé.

⁴⁵ Te tée ní cuhú-án ñí xica-dé cuáháⁿ-dè, te ní ngüíta-dé xáhaⁿ-dè xii nchaa ñáyiú ta naníhí-dè nàcuáa ní quide Jèsús ní quide tātna ñaha-gá xii-dé. Te sá dúcáⁿ ñí xíté nuu tée-án cuèndú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíãⁿ núu dayuhu ñí xóo quíhu-gá dava ñuú núú ïo vãi ñáyiú ndèhe ñaha xii-gá, te ní xóo cundecu-gá xití yucu núú ñà túú ñáyiú ndècu. Te nchaa ñuú ní quee ñáyiú ní sáháⁿ-yu núú ndécú-gá ní cáháⁿ ndihi ñáhá-yu xii-gá.

2

Jèsús quidé tātna-gá ñⁿ tée cùhú ñã cùú-gá candá nihnu
(Mt. 9:1-8; Lc. 5:17-26)

¹ Te sátá ñí cuu ñⁿ úú nduu sã ñí quee Jèsús ñuú Capèrnaúm te ní nasáá tucu-gá, te cue ñáyiú ní níhí-yu tnúhu sã ñí ndexìo-gá

núú quidé vèhe-gá. ² Te ndìhi-ni ní tacá cuéhé víhì-yu, te ní chítú víhì-yu ndéé yuyèhe te ñá ní tnàhá-gá-yu. Te ní ngúita-gá ní dánèhé ñáhá-gá xii-yu tnúhu Yá Ndiöxí. ³ Te òré-án nǐ quexìo cúmí tnàhá cue téé núú ndécú-gã nchídó-güedë ìⁿ téé cùhú ñá cúú-gã candá nihnu-dé. ⁴ Dico ñá túú ní ndàcu-güedé sáá-güedé ndéé núú-gã chi ío cuéhé ñáiyu ndècu. Te xiǎⁿ núu ní sáá-güedé díquí véhé núú yíhí-gã-án nǐ caán-güedé, te ichi ndàa díquí véhé-ǎⁿ nǐ dáquëe-güedé téé cùhú-án, te ñùhu-dé ìⁿ xító ní dáquëe ñaha-güedé ndéé núú-gã. ⁵ Te Jèsús sa ní cutnùnì iní-gá sá sàndáá iní ñáhá-güedé xii-gá núu ní xáhaⁿ-gã xii téé cùhú-án:

—Yòhó téé cùhú, sa ní quide càhnu iní-í nchaa cuéchi-n — cächí-gá xǎhaⁿ-gã xii-dé.

⁶ Te xiáⁿ xǐnucóo ìⁿ úú cue téé dàcuaha ñaha xii ñáiyu nchaa tnúhu ní chídó tnùnì ndíi Moisés, te sá dúcáⁿ nǐ cáháⁿ Jèsús núú cue téé-án nǐ sani iní-güedé: ⁷ “Tée-a cáháⁿ cuéhé-dé cuëndá Yá Ndiöxí duha cáháⁿ-dé, chi vá yóo ìⁿ ndàcu cada cahnu iní nchaa yíca cuéchi ñáiyu chi ìⁿndìi díí-ni Yá Ndiöxí quidé càhnu iní-gá”, duha ní sani iní-güedé. ⁸ Dico òré-ni-án nǐ cutnùnì iní Jèsús nàcuáa sàni iní-güedé, núu ní xáhaⁿ-gã xii-güedé:

—¿Te ná cuëndá ducaⁿ sàni iní-ndó-í? ⁹ Te sá dúhá nǐ xáhaⁿ-í xii téé cùhú-a sá nǐ

quide càhnu iní-í nchaa yíca cuéchi-dé, te xiǎⁿ nchòhó ñá túú cutnùnì iní-ndó núu ndáá cáháⁿ-í àdi ñá ndáá. Dico núu cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùnì ndáá iní-ndó núu ndáá cáháⁿ-í àdi ñá ndáá chi cundehe núú-ndó nàcuáa cada-í. ¹⁰ Te vitna na cáda-í nàcuáa cutnùnì iní-ndó nchaa-ndo sá yúhú Tée cúu ñani tnàhá-ndó nchaa-ndo ndecu ndìhi-í tnúhu ndee iní sá cáda càhnu iní-í nchaa cuéchi ñáiyu ñuyú-a — cächí-gá xǎhaⁿ-gã xii-güedé.

Te sátá dúcáⁿ te ní xáhaⁿ-gã xii téé cùhú-án:

¹¹ —Ndacóo te ndocani-n xító ñùhu-n véxi-án, te núhú-n vèhe-n — cachí-gá xǎhaⁿ-gã xii-dé.

¹² Te òré-ni-án nǐ ndacóo-dé, te ní ndocani-dé xító ñùhu-dé ní quexìo-án, te ndèhe nchaa ñáiyu xǐndecu-án nǐ ndee-dé tnuú-yu cuáháⁿ-dé. Te sá dúcáⁿ nǐ quide Jèsús ní quide tátna-gá téé-án, xiǎⁿ ío ní cuñúhu nchaa ñáiyu, te ní xítñàhá-yu:

—Càhnu vihi cuu Yá Ndiöxí, chi ñá ìⁿ ndùu quini-ó dùha cuu datná ní cuu vitna — cächí-yu xítñàhá-yu.

Jèsús cáháⁿ-gá ìⁿ téé nàni Levi

(Mt. 9:9-13; Lc. 5:27-32)

¹³ Te Jèsús cuáháⁿ tucu-gá yuhu làgúná, te ío cuéhé ñáiyu ní sátnàhá ñáhá xii-gá, te ní dánèhé ñáhá-gã xii-yu tnúhu Yá Ndiöxí. ¹⁴ Te òré ní yáha ní dánèhé ñáhá-gã xii-yu, te ní naqueheⁿ-gã ichi, te ní yáha yatni-gá ìⁿ xichi núú

núcõo ìⁿ tée nàni Leví déhe ìⁿ tée nàni Alfeú quidé còbrá-dé ñáyiú cuendá impuèstú chi còbrádór cúú-dě. Te òrè ní xini ñáhá-gá xii-dé, te ní xáhaⁿ-gá:

—Néhe chitnahá ñáhá-ñ xii-í —càchí-gá xáhaⁿ-gá xii-dé.

Te té Lèví-áⁿ ñi ndacuíñi-dé, te ní tuha ñaha-dě xii-gá.

15 Te té Lèví-áⁿ cuáháⁿ-dé ndihi Jèsús vehe-dé. Te yìhi Jèsús mèsá xéxí-gá ndihi cue tée xica cuu ndihi-gá, te tnàhá vài cue tée cuihna ìni-xi quide cobrá ñáhá xii ñáyiú cuendá impuèstú, ndihi dava-gá cue tée ndècu ichi cuehé ichi duha núcõo ndihi ñaha-güedé xii-gá xéxí ndihi ñaha-güedé, te ducaⁿ chi ío vài ñáyiú nchìcúⁿ ñáhá xii-gá. 16 Te sá ñi xini cue tée dàcuáha ñaha xii-yu nchaa tnúhu ní chídó tnùnì ndíi Moisés, ndihi cue tée cùu fariséú xéxí Jèsús ndihi nchaa cue tée-áⁿ nùu ní xicáⁿ tnúhú-güedé núú cuè tée xica cuu ndihi-gá, te xáhaⁿ-güedé:

—¿Ná cuendá ducaⁿ quide tée cùu mestrú-ndó xèxi-dé ndihi cue tée cuihna ìni-xi quide cobrá ñáhá xii ñáyiú cuendá impuèstú, ndihi nchaa dava-gá cue tée ndècu ichi cuehé ichi duha-í? —càchí-güedé xáhaⁿ-güedé.

17 Te Jèsús ní tecú dóho-gá nàcuáa ndùu tnúhu ní xáhaⁿ-güedé xii cue tée xica cuu ndihi-gá, núu ní xáhaⁿ-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í

càháⁿ-í ñáyiú cùtnuní ìni-xi sá ndécú cuèchi-xi te ñá túú véxi-í càháⁿ-í ñáyiú càchí sá ñá túú ndècu cuèchi-xi —càchí-gá xáhaⁿ-gá xii-güedé.

Cuendá cue ñáyiú ñá túú tnàhí ná xéxí áma càháⁿ ndihi-yu Yá Ndiõxí

(Mt. 9:14-17; Lc. 5:33-39)

18 Te cue tée xica cuu ndihi té Juáá, ndihi cue tée xica cuu ndihi cue tée cùu fariséú ñá túú tnàhí ná xéxí-güedé áma càháⁿ ndihi-güedé Yá Ndiõxí. Te ìⁿ nduu ducaⁿ xiquide-güedé, te ní sáháⁿ ñáyiú ní xicáⁿ tnúhú-yu núú Jèsús, te xáhaⁿ-yu xii-gá:

—Cuini-ndí cachí tnúhu-n ñá cuendá cue tée xica cuu ndihi té Juáá, ndihi cue tée xica cuu ndihi cue tée cùu fariséú ñá túú tnàhí ná xéxí-güedé áma càháⁿ ndihi-güedé Yá Ndiõxí, te cue tée xica cuu ndihi-n ñá túú dùcaⁿ quide-güedé —càchí-yu xáhaⁿ-yu xii-gá.

19 Te Jèsús ní xáhaⁿ-gá xii-yu:

—Nchòhó xini-ndó sá vǎ cúú cùñaha-o xii ñáyiú ñuhu vico tnándaha sá vǎ cúú cǎxi-yu nini ndècu ndihi ñaha tée tnándaha xii-yu. 20 Dico sáá nduu te vǎ cùndècu ndihi ñaha-gá tée tnándaha-áⁿ xii-yu, te dàvá-áⁿ te cahni ìni-yu vǎ cǎxi-yu cuendá sá ndihú ìni-yu.

21 Te vǎ yõo ìⁿ dàndée luha dóó sáá ìⁿ dóó sa ní cuu tùhú víhí, chi dóó sáá-áⁿ nàndiyi-xi te uuⁿ-gá ndata-xi dóó sá ní cuu tùhú-áⁿ. 22 Te ní vǎ yõo ìⁿ chihí ndidí sáá xití ìⁿ lamba sa ní cuu tùhú víhí, chi núu

yoo ducaⁿ na càda te ndava lamba sa ní cuu tùhú-án, chi ío níhi yócó ndidí-án, te cuíta-ni ndidí-án te cuíta-ni lamba-án te núu ducaⁿ na càdá-yu. Núu xíáⁿ xíní ñùhu-xi quée ndidí sáá-ǎⁿ xití ìⁿ lamba saa — càchí-gá xáhaⁿ-gǎ xii-yu.

Cue téé xica cuu ndihi Jesús sahnú-güedé yoco triú nduu ndetátú ñáyiu

(Mt. 12:1-8; Lc. 6:1-5)

²³ Te ìⁿ nduu cùu-xi nduu ndetátú ñáyiu ñùhu Jesús ichi ndihi cue téé xica cuu ndihi-gá, te ta yáha-gá ndihi-güedé ìⁿ xichi núu cáá triú, te ní nguíta-güedé sahnú-güedé yoco triú-án. ²⁴ Te cue téé cùu fariséú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihi-n sahnú-güedé yoco triú vitna cùu-xi nduu ndetátú-i? Te ñá túú tau-güedé ducaⁿ càda-güedé —càchí-güedé xáhaⁿ-güedé xii-gá.

²⁵ Te ní xáhaⁿ-gǎ xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núu càháⁿ-xi nàcuáa ní quide ndíi Dávíi cútñahá ní xihí ndíi docó ndihi cue téé ní xica cuu ndihi ndíi-ǎⁿ? ²⁶ Te dàvá-án ñí xíndecu ìⁿ téé ní xínani Abiätár ní cuu-dé dútú cúnúu, te ndíi Dávíi ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-ǎⁿ ñí dácáñhu ndíi cue téé ní xica cuu ndihi ndíi ní xexi ndíi ndihi-güedé, te mee-ni cuè dútú tau-güedé caxi-güedé pàá-án ní cùu — cachí-gá xáhaⁿ-gǎ xii-güedé.

²⁷ Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndetátú ñáyiu, te ñá túú ní càchí-gá sá méé-yu nándi cani iní-yu cadá-yu canehe ñí-yu nduu ndetátú-yu-án. ²⁸ Te yúhú Téé cùu ñaní tnáhá-ndó nchàa-ndo, tnáhá-í ndécú ndihi-í tnúhu ndee ìní sá cùu-í nchaa ñáyiu nàcuáa cadá-yu nduu ndetátú-ó-án —càchí-gá xáhaⁿ-gǎ xii-güedé.

3

Èⁿ téé ní yíchí ìⁿ xio ndaha-xi

(Mt. 12:9-14; Lc. 6:6-11)

¹ Te Jèsús cuánguihu tucu-gá xití veñúhu, te xití veñúhu-án ndécú ìⁿ téé ní yíchí ìⁿ xio ndaha-dé. ² Te xíáⁿ ndécú cuè téé xito dayuhu ñaha xii-gá, te núu cada tátna-gá téé cùhú-án nduu cùu-xi nduu ndetátú-güedé ndihi ñáyiu, cuendá ducaⁿ te níhi-güedé nàcuáa cada-güedé cacáⁿ cuéchi-güedé cuendá-gá. ³ Te ní xáhaⁿ-gǎ xii téé cùhú ndaha-xi-án:

—Ndacuñí te ngúnutñi-n cuädava iha —càchí-gá xáhaⁿ-gǎ xii-dé.

⁴ Te ní xicáⁿ tnúhú-gá núu-güedé, te xáhaⁿ-gǎ:

—Chí càchí tnúhu ná cúú sǎ cúú càda-o nduu ndetátú-ó. ¿Sá vaha ñá sá cuèhé? ¿Sá cadá tátna-o ñáyiu cùhú ñá sá cáhni-ó-yu? —càchí-gá xáhaⁿ-gǎ xii-güedé.

Dico ni ìⁿ-güedé ñá túú tnáhí ni càháⁿ-güedé. ⁵ Te Jèsús ní xíndéhé vaha-gá núu

nchàa-güedé te ní cudéⁿ-gã, te ní ndihú iní-gá chi ío sàá iní-güedé, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n — càchí-gá xáhaⁿ-gã xii-dé.

Te ní ndocani-dé ndaha-dé, te òré-ni-áⁿ nǐ ndúha. ⁶ Te cue téé cùu fariséú ní xica-güedé cuáháⁿ-güedé ìⁿ xichi núú nǐ naníhí tnáhá-güedé ndihi cue téé cùndìhi té Hèrodés cuèndá ndatnúhu-güedé nása cada-güedé cahni-güedé Jèsús.

Cuéhé víhí ñáyiú ní quexìo yuhu lagúná

⁷ Te Jèsús ní xica-gá cuáháⁿ-gá ndihi cue téé xica cuu ndihi-gá yuhu làgúná distritú Galileá, te ío cuéhé ñáyiú distritú-áⁿ nchicúⁿ ñáhã-yu xii-gá cuáháⁿ. ⁸ Te núú nǐ quexìo-gá-áⁿ nǐ sáháⁿ ñáyiú distritú Júdeá, ñáyiú ñuú Jerusalén, ñáyiú distritú Idùmeá, ñáyiú xĩndecu ndàa ingá xio yúte Jòrdán, ndihi ñáyiú xĩndecu yatni ñuú Tírú ndihi ñuú Sídón, te ducaⁿ ío vai-yu ní sáháⁿ núú ndécú-gã chi ní níhí-yu tnúhu nchaa nàcuáa quide-gá. ⁹ Te Jèsús ní xáhaⁿ-gã xii cue téé xica cuu ndihi-gá sá cádá tũha-güedé ìⁿ bàrcú cuèndá caa-gá núú-xi cuèndá sá vã dádèhnde ñahá-yu xii-gá chi ío cuéhè-yu. ¹⁰ Te sá dúcáⁿ nǐ níhí-yu tnúhu sá quidé tãtna-gá ñáyiú cùhú, núú xíãⁿ nchaa dava-gá ñáyiú cùhú súuní dicó ngónchihí tnáhã-yu cuáháⁿ-yu núú ndécú-gã cuíní-yu tnándeé ñáhã-yu xii-gá cuèndá sá cuíní-yu

ndúha-yu. ¹¹ Te cue ñáyiú yìhí ñaha espíritú cùndìhi yucu ñávãha ní sanu xiti ñaha-xi xii-yu núú Jèsús òré ní xini ñáhã-xi xii-gá, te xíãⁿ ní quide níhi ní cáháⁿ-yu, te xáhãⁿ-yu xii Jèsús:

—Jòhó cúu-n Dèhe Yá Ndiòxí! —càchí-yu xáhãⁿ-yu xii-gá.

¹² Te Jèsús ní tenáa-gá nchaa espíritú cùndìhi yucu ñávãha-áⁿ, te ní xáhaⁿ-gã xii nchaa ñáyiú ní xíhi-xi-áⁿ sã vã càháⁿ-yu núú ñáyiú yoo cùu-gá.

Jèsús cãxi-gá úxúú tnáhã cue téé dacuáha ñaha xii ñáyiú tnúhu-gá

(Mt. 10:1-4; Lc. 6:12-16)

¹³ Te sáta dúcáⁿ nǐ cuu te Jèsús ní sáa-gá ìⁿ yucu, te xíãⁿ ndécú-gã ní cana-gá nchaa cue téé càchí iní-gá. Te òré ní quexìo nchaa cue téé-áⁿ núú-gã, ¹⁴ te ní cáxi-gá úxúú tnáhã cue téé caca cuu ndihi-gá, te diu-ni cue téé-áⁿ tendaha-gã quíhíⁿ-güedé cáháⁿ-güedé tnúhu-gá núú ñáyiú. ¹⁵ Te ní sãñaha-gã xii-güedé tnúhu ndee iní cundecu ndihi-güedé cuèndá cada tãtna-güedé ñáyiú cùhú, ndihi cuèndá queñuhu-güedé nchaa espíritú cùndìhi yucu ñávãha yìhí ñaha xii ñáyiú. ¹⁶ Te duha xĩnani ndi ùxúú cue téé-áⁿ: Ìⁿ-dé nání-dé Xímú, te mee-gã ní taudìu ñaha-gá xii-dé sá cúnàni-dé Pèlú. ¹⁷ Te ingá-dé nání-dé Jàcobó, te ingá-dé nání-dé Juáá, te ñaní té Jàcobó-áⁿ cúu tẽ Juáá te ndi ndúu-güedé cúu-güedé

déhe té Zebèdeú, te ndi ndùu cue téé-áⁿ nĩ dánání ñàha Jesús xii-güedé Boànergés, te tnúhu-áⁿ quée-xí: Cue téé ío yáchí cúdeéⁿ, duha quèe-xi tnúhu-áⁿ. ¹⁸ Te duha xĩnani dáva-gá-güedé: Té Ndrixí, té Lìpé, té Bartolòmé, té Mâteú, té Mǎxí, té Jàcobó déhe té Àlfeú, té Tàdeú, té Xímú téé ní cundihi cue téé canànistá ní cùu, ¹⁹ ndihi té Jùdás Iscarioté téé ní sáá nduu nĩ sáha cuendá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihi-gá.

Càchí-güedé sá ndécú ndihi Jesús yucu ñávàha dico ñá ndàá (Mt. 12:22-32; Lc. 11:14-23; 12:10)

Te sátá dúcáⁿ te cuáháⁿ-gá ndihi-güedé núú quidé vehe-gá. ²⁰ Te ío vài ñáyiu ní tacá-ni tucú-yu xíaⁿ, te ni ñă ní nĩhí-gă nása cada-gá caxi-gá ndihi cue téé xica cuu ndihi-gá cuendá sá ío vài-yu. ²¹ Te cue ñáyiu cùu ndi mee Jesús ní nĩhí-yu tnúhu nchaa nàcuáa cùu, te nchaa ñáyiu ñá cùnuni váha iní-xi ní cachí-yu sá nĩ nduu lùcú-gá nũu xiǎⁿ cuáháⁿ ñáyiu cùu ndi mee Jesús núú ndécú-gă cuendá candeca ñáhá-yu xii-gá núhú ní cùu.

²² Te cue téé dàcuaha ñaha xii ñáyiu nchaa tnúhu ní chídó tnùnì ndí Moisés véxi ndéé ñuú Jerusalén ní cáháⁿ cuèhé-güedé cuendá Jèsús, chi ní xitnáha-güedé:

—Tée-a ndècu ndihi-dé sácuihná, te diu xíaⁿ chindèe ñaha-xi xii-dé queñuhu-dé

nchaa espíritú cúndihí-xi yihí ñaha xii ñáyiu, te diu-ni-xi tàxi tnuní-xi nchaa espíritú-áⁿ — duha ní xitnáha-güedé.

²³ Te Jèsús ní cana ñaha-gă xii-güedé, te ní cani-gá ìⁿ cuendú núú-güedé nàcuáa tecú tnùnì-güedé tnúhu-gá, te xăhaⁿ-gă xii-güedé:

—¿Te nása cada sácuihná queñuhu-xi cue espíritú cúndihí-xi yihí ñaha xii ñáyiu-í? ²⁴ Te nchòhó xínì-ndó sǎ nũu ìⁿ téé yìndaha ìⁿ nacióⁿ vá cúú ìⁿnuu-dé ndihi cue téé cùndihí-dé, te vá cùdĩ-dé cunuu-dé. ²⁵ Te diu-ni ducaⁿ sátnahá-xi cùu tucu ñáyiu xindecu ìⁿ-ni vehe, chi núu vá cúú ìⁿnuú-yu, te vá cùdĩ-yu cundecu càhnú-yu. ²⁶ Te núu sácuihná ñà túú cùu ìⁿnuu-xi ndihi cue espíritú cúndihí-xi, te vá cùdĩ-xi cundecu-xi taxi tnùnì-xi te núu ducaⁿ quide-xi.

²⁷ Te nchòhó xínì-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vehe ìⁿ téé ío ndee, chi díhna-gá xínì ñuhu-xi tni-güedé téé-áⁿ dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndihi-dé.

²⁸ Te na càchí tnúhu ndáá-í xii-ndo sǎ ncháá sǎ cuèhé sá dúhá quide ñáyiu, ndihi nchaa tnúhu cuèhé tnúhu duha càháⁿ-yu cuendá Yǎ Ndiòxí cuu cada càhnu iní-gá. ²⁹ Dico cue ñáyiu na càháⁿ cuèhé cuendá Espíritú Yǎ Ndiòxí, ñáyiu-áⁿ vá cádá càhnu

iní ñáhá tnàhí-gá xii-yu, chi cundecu-ni cuéchi-yu núú-gă ni caa ni quíhíⁿ —càchí-gá xăhaⁿ-gă xii-güedé.

³⁰ Te ducaⁿ nî cáháⁿ-gá chi càchí-güedé sá ndécú ndîhi-gá espíritú cündîhi yucu ñávăha.

Năná Jèsús ndihi cue ñanı-gá

(Mt. 12:46-50; Lc. 8:19-21)

³¹ Te ní quexìo náná Jèsús ndihi cue ñanı-gá núú ndécú-gă xînutnîhi-yu quehé, te ní xáhăⁿ-yu xii ñⁿ ñáyiu xîndecu-áⁿ să dáyăha-yu tnúhu núú-gă cuendá quee-gá ndatnúhu ndihi ñaha-gă xii-yu. ³² Te cue ñáyiu xînucóo ni cándéé dîñi-gá ní xáhăⁿ-yu xii-gá:

—Năná-n ndîhi cue ñanı-n ndécú-yu quehé nándücu ñahá-yu xii-n —càchí-yu xáhăⁿ-yu xii-gá.

³³ Te Jèsús ní xáhaⁿ-gă xii-yu:

—Te cachí tnúhu-ndo yöndi-gá ñáyiu cùu datná nănà-í ndihi dàtná cue ñanı-í —càchí-gá xăhaⁿ-gă xii-yu.

³⁴ Te dătnùnî ní xíndéhé văha-gă núú nchăa ñáyiu xînucóo ni cándéé dîñi-gá-áⁿ, te ní xáhaⁿ-gă xii-yu:

—Nchaa ñáyiu-a cùu-yu dàtná nănà-í ndihi dàtná cue ñanı-í. ³⁵ Chi nchaa ñáyiu quide nacuáa càháⁿ Yă Ndiôxí, ñáyiu-áⁿ cùu-yu dàtná cue ñanı-í, ndihi dàtná cue cúha-í, ndihi dàtná nănà-í —càchí-gá xăhaⁿ-gă xii-yu.

4

Năcuáa quide tée cuángacáⁿ triú

(Mt. 13:1-9; Lc. 8:4-8)

¹ Te Jèsús ní ngüíta-gá dăcuàha tucu-gá ñáyiu yuhu làgúná. Te cuéhé víhî-yu ní tacá xiáⁿ nŭu cuásaá-gá núú ñⁿ bàrcú nútnîhi xití ndute làgúná-áⁿ, te núú xiáⁿ ní ngóo-gá te ní ngüíta-gá dánèhé ñáhá-gă xii-yu, te nchaa-yu xixúcu-yu yuhu làgúná-áⁿ. ² Te ní ngüíta-gá ní cani-gá titní cuendú núu-yu năcuáa tecú tnùnî-yu tnúhu-gá, te xăhaⁿ-gă xii-yu:

³ —Chí cündedóho văha ñⁿ cuendú ná cànî-í-a. ñⁿ tée cuángacáⁿ-dé triú. ⁴ Te òré ní ngüíta-dé dăngoyo-dé triú-áⁿ, te dava ní quene ndava ní ngava ndéé ichi, te ní xini cue tîlaá te ní nadatàcá-güedi. ⁵ Te dava ní ngava ñuhu yadi nŭu yíhî vîhi yúú, te ndîhi-ni ní xínu-xi cuendá sá ñà túú cāvîhi ñuhu. ⁶ Dico òré ní nayehé ñà túú ní cündee inî-xi chí ní yíhî-xi, chí ñà túú ní nîhî quíhîⁿ cùnú yóho-xi. ⁷ Te dava ní ngava núú yúcú ndîquîⁿ tnu îñu, te ñⁿnuu-ni nî xínu-xi ndihi tnu îñu, te tnu îñu-áⁿ nî sahnu-xi te ní dánáá-xí nchăa triú sá nî xínu-áⁿ. ⁸ Dico dava triú-áⁿ nî ngava-xi núú ndécú ñuhu cocoⁿ, te xiáⁿ ní xínu-xi te ní sahnu-xi te ío văha ní cuu, chí núú ñⁿ-ní triú-áⁿ te dava yoco-xi ní ngüihî ócô úxî triú-xi, te dava yoco-xi ní ngüihî únídico triú-xi, te dava yoco-xi ní ngüihî ñⁿ ciendú

triú-xi —càchí-gá xǎhaⁿ-gǎ xií-yu.

⁹ Te xǎhaⁿ tùcu-gá xií-yu:

—Nchaa nchòhó ñáiyu ní xíndedóho nchaa tnúhu ní cáháⁿ-í-a, te ío váha chí cuǎha cuèndá —càchí-gá xǎhaⁿ-gǎ xií-yu.

Jèsús càháⁿ-gá ná cuèndá ducaⁿ càni-gá cuèndú

(Mt. 13:10-17; Lc. 8:9-10)

¹⁰ Te sátá ñí ndaca ñáiyu-áⁿ te ní quendóo mee-nǎ Jèsús ndíhi cue téé xíca cuu ndíhi-gá, ndíhi ìⁿ úú-nǎ ñáiyu. Te ñáiyu-áⁿ ndíhi cue téé-áⁿ ñí xícáⁿ tnúhũ-yu ndíhi-güedé núú-gǎ, núu nása quèe-xi cuèndú ní cani-gá núú-yu ndíhi-güedé. ¹¹ Te ní xáhaⁿ-gǎ:

—Nchòhó chí sa càchí tnúhu Yá Ndiòxí xii-ndo ìⁿ sá vátá quíni-gá-ndó, chí càchí tnúhu-gá nàcuáa cada-gá ndíhu ndaha-gǎ ñáiyu, dico dava-gá ñáiyu càni-í mee-ni cuèndú núú-yu. ¹² Chí cuèi na quíni-yu nchaa nàcuáa cuu dico ñí vǎ cútnúni iní-yu ná cuèndá ducaⁿ cuu, àdi cuèi na cùndedóho-yu dico ñí vǎ tècú tnúni-yu. Te ducaⁿ ndòhó-yu cuèndá sá vǎ quíndáá iní-yu Yá Ndiòxí, ndíhi cuèndá sá vǎ cádá càhnu iní-gá nchaa yícá cuèchi-yu —càchí-gá xǎhaⁿ-gǎ xií-yu ndíhi-güedé.

Jèsús càháⁿ-gá nàcuáa quèe-xi cuèndá téé cuángacáⁿ triú

(Mt. 13:18-23; Lc. 8:11-15)

¹³ Te ní xáhaⁿ tùcu Jesús xii cue téé xíca cuu ndíhi-gá, ndíhi cue ñáiyu-áⁿ:

—Nchòhó, ñá túú ní tècú tnúni-ndó cuèndú ní cani-í núú-ndó, te núu ducaⁿ, ¿te nása tecú tnúni-ndó dáva-gá cuèndú cani-í núú-ndó-í? Te na càchí tnúhu-í xii-ndo nàcuáa quèe-xi cuèndú ní cani-í núú-ndó. ¹⁴ Te téé cuángacáⁿ triú-áⁿ cúu-dé dàtná ìⁿ téé cuáháⁿ càháⁿ tnúhu Yá Ndiòxí núú ñáiyu. ¹⁵ Te triú-áⁿ cúu-xí dàtná tnúhu Yá Ndiòxí, te triú sá ñí quene ndava ní ngava ndéé ichi, xǎⁿ cúu-xí dàtná ñáiyu ní tnahá iní-xi tnúhu Yá Ndiòxí, dico sácuíhná cuáháⁿ-xi xòcani-xi tnúhu-gá iní-yu cuèndá sá vǎ cǎnchícúⁿ nihnú-yu nàcuáa càháⁿ tnúhu-áⁿ. ¹⁶ Te triú sá ñí ngava ñuhu yadi núú yíhí vǐhi yúú, xǎⁿ cúu-xí dàtná ñáiyu ní xíndedóho tnúhu Yá Ndiòxí te díí ìni ní tñí-yu tnúhu-gá. ¹⁷ Dico òré ná ngüíta ñáiyu cúcuèhé ñáhǎ-yu xií-yu àdi nándi-gá sá yǎha-yu sá cuèndá tnúhu-gá, te ñá cùndèe iní-yu chí dàñá-yu tnúhu-gá cuèndá sá ñà túú ñihí ndéé-yu. ¹⁸ Te triú sá ñí ngava núú yúcu ndíquíⁿ tnu ññu xǎⁿ cúu-xí dàtná ñáiyu ní tecú dóho-xi tnúhu Yá Ndiòxí, ¹⁹ dico cuèé cuèé ní nacuanaá-yu tnúhu-gá, chí cuèndá mee-ni sǎ cúu-xí mèe-yu ññu iní-yu, ndíhi cuèndá sá ño sàni iní-yu cuu cuicá-yu, ndíhi cuèndá sá ño cùdíí ìni-yu nchaa sá ño ñuyíú-a, te ñá túú ññu iní-yu tnúhu sá ñí xíndedóho-yu-áⁿ nàcuáa cada váha-yu cundecú-yu. ²⁰ Dico triú sá ñí ngava núú ndécú ññu cocoⁿ,

xíáⁿ cúú-xí dàtná ñáyiú ní xíndedóho tnúhu Yá Ndiòxí te quidé-yu nchaa nàcuáa càháⁿ tnúhu-áⁿ. Te cada iní-ndó sá ñáyiú-áⁿ cúú-yu dàtná triú sá ñí nguíhi yoco-xi ócò úxí triú-xi, ndihi triú sá ñí nguíhi yoco-xi únídico triú-xi, ndihi triú sá ñí nguíhi yoco-xi ìⁿ cièndú triú-xi. Te ducaⁿ sátnahá-xi cúú-yu chí ío váha quidé-yu —càchí-gá xáhaⁿ-gá xii cue téé xica cuu ndihi-gá ndihi cue ñáyiú-áⁿ.

Cuèndá iti
(Lc. 8:16-18)

²¹ Te xáhaⁿ-gá xii nchaa ñáyiú:

—Ñá túú ñí ìⁿ ñáyiú tènñuhú iti te chiváha-yu ìⁿ xití quídi, àdi chiváha-yu ìⁿ caha càamá, chí tàxi ndecú-yu ìⁿ núú dùcúⁿ cuèndá cutnùní núú nchaa ñáyiú. ²² Te ñí ìⁿ tnúhu sá ñá təcú tnùní ñáyiú vitna cachí-ó sá vǎ təcú tnùní-yu chí dacuitíí sǎ təcú tnùní-yu, te ñí ìⁿ tnúhu sá càchí-ó cùu yuhu vitna vá cúú yùhu chí dacuitíí sǎ quée tǔu-xi núú ñáyiú. ²³ Te nchòhó cue ñáyiú ní xíndedóho nchaa tnúhu ní càháⁿ-í-a, te ío váha chí ná cuáha cuèndá —càchí-gá xáhaⁿ-gá xii-yu.

²⁴ Te ní xáhaⁿ tucu-gá:

—Ío váha chí cùndedóho tnúhu na càháⁿ-í-a. Te nàcuáa-ñi quide-ndo danehé-ndo ñáyiú tnúhu Yá Ndiòxí, te ñiu-ñi ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó. ²⁵ Te nchaa nchòhó ñáyiú təcú tnùní tnúhu Yá Ndiòxí, uuⁿ-gá

cuita tecú tnùní-ndó tnùhu-gá quíhíⁿ. Te nchaa nchòhó ñáyiú ñá túú təcú tnùní tnúhu-gá, te uuⁿ-gá vá təcú tnùní-ndó —càchí-gá xáhaⁿ-gá xii-yu.

Nàcuáa sàhnu triú

²⁶ Te Jesús xáhaⁿ tucu-gá:

—Na càni-í ìⁿ cuèndú núú-ndó cuèndá tecú tnùní-ndó nàcuáa cada-xi òré ndihu ndaha ñàha Yá Ndiòxí xii ñáyiú. Ìⁿ téé cuángacáⁿ-dé triú. ²⁷⁻²⁸ Te sáta ñí yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ñí quene yoco-xi te ní nguíhi triú-xi, dico téé ní sacáⁿ triú-áⁿ ñá túú xini-dé nása ní sahnu-xi, chí mee ñùhu ní quide-xi ní sahnu triú-áⁿ. ²⁹ Te òré sa ní ndihi ní cuaaⁿ te ní nguíta téé ní sacáⁿ-áⁿ náquèhndé-dé nátàxi tnaha-dé —càchí-gá xáhaⁿ-gá xii-yu.

Cuèndá ndíquíⁿ yutnu nàni mostázá

(Mt. 13:31-32; Lc. 13:18-19)

³⁰ Te xáhaⁿ tucu Jesús xii-yu:

—Na càni tucu-í ingá cuèndú núú-ndó cuèndá tecú tnùní-ndó nàcuáa cada-xi òré ndihu ndaha ñàha Yá Ndiòxí xii ñáyiú. ³¹ Ìⁿ yutnu nàni mostázá cúú-xi ìⁿ yutnu sá lihli vñhi-gá ndíquíⁿ-xi dàcúúxí ndíquíⁿ nchaa cúhú, ³² dico òré ná càcáⁿ-güedé núú ñùhú-güedé, te na xínu-xi te sàhnu-gá-xi

dàcúxí nchàa cùhú, te nchaa dité-xi ío cùu cahnu-xi, te ndéé cue quiti ndàva núú tàchí sácõo-güedi nchaa núú dité-xi xìnu ndeti-güedi — cachí-gá xãhaⁿ-gã xii-yu.

Ío titní cuendú ní caní Jèsús núú ñãyiú

(Mt. 13:34-35)

³³ Te ío-gá vài cuendú ní caní Jèsús núú ñãyiú cuendá tecú tnùní-yu tnúhu Yá Ndiõxí, dico dava cuendú ñá túú ní càní-gá núú-yu, chí ní cutnùní iní-gá sá vã tècú tnùní-yu nchaa. ³⁴ Te mee-ni cuendú ní caní Jèsús núú ñãyiú ndi tnahá òré ní dánèhé ñáhá-gã xii-yu tnúhu-gá. Te òré ndécú mèe Jèsús ndihi cue tée xica cuu ndihi-gá, te ní xáhaⁿ-gã xii-güedé nàcuáa quèe-xi ìⁿ ìⁿ cuendú ní caní-gá núú ñãyiú.

Jèsús ngání-gã táchí ndihi ndute làgúná

(Mt. 8:23-27; Lc. 8:22-25)

³⁵ Te ñu-ni nduu-ãⁿ òré sa ta cùndiquiⁿ cuáháⁿ ní xáhaⁿ Jèsús xii cue tée xica cuu ndihi-gá:

—Chí ná quihíⁿ-ó ndàa ingá xio yuhu làgúná —càchí-gá xãhaⁿ-gã xii-güedé.

³⁶ Te ní quide ndee ìní-gá nchaa ñãyiú xixúcu-áⁿ, te ñu-ni bàrcú sá ñúhú-gã òré ní dánèhé-gá ñãyiú tnúhu-gá ñu-ni xíáⁿ ní dácáca cuè tée xica cuu ndihi-gá ndéca ñàha-güedé xii-gá cuáháⁿ, te tnahá ìⁿ ùú-gá bàrcú ní xica-xi nchìcúⁿ-xi bàrcú ñúhú-gã-áⁿ cuáháⁿ. ³⁷ Te ñúhu barcú ñúhú-gã-áⁿ

ichi cuáháⁿ-xi núú ndute, te ní quexìo ìⁿ táchí ñhi, te ta nàdachitú-xi ndute xití bàrcú-áⁿ cuáháⁿ, te sa cuìní-nã-xi quèe naa bàrcú-áⁿ xití ndute ní cùu. ³⁸ Te Jèsús cáa-gã xidí-gá ìⁿ xichi ndàa sáta bàrcú-áⁿ, te yìncihi ìⁿ dóo dǐquí-gã. Te sá dúcáⁿ cuìní-xi quèe naa bàrcú-áⁿ núú ní sáháⁿ-güedé ní ndo-cani ñaha-güedé xii-gá, te xãhaⁿ-güedé:

—ìMèstrú, ndiquíú ìní! ¿Náa ñá túú ndihú ìní-n sã tá quèe naa-o cuáháⁿ-ãⁿ? —càchí-güedé xãhaⁿ-güedé xii-gá.

³⁹ Te Jèsús ní ndiquíú ìní-gá te ní ndacóo-gá, te ní tenàá-gá táchí-ãⁿ, te ní xáhaⁿ-gã xii ndute làgúná:

—ìTnavíí-nã cuhuⁿ, chí ío dusaⁿ! —càchí-gá xãhaⁿ-gã xii ndute-áⁿ.

Te òré-ni ní ngüíñí táchí-ãⁿ te ní nucúndecu nahi-nã ndute làgúná-áⁿ. ⁴⁰ Te Jèsús ní xáhaⁿ-gã xii-güedé:

—¿Ná cuendá ndéé dúcáⁿ yùhú-ndó-í? ¿Náa ñá túú sàndáá ìní ñáhá ndisa-ndo xii-í-ãⁿ? —càchí-gá xáhaⁿ-gã xii-güedé.

⁴¹ Dico mee-güedé chí ío ní yùhú-güedé sá ducaⁿ ñí quide-gá ní xiní-güedé, te ní xitnàha-güedé:

—¿Te ná tée cùu tée-a núú ní cáháⁿ-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnàha-güedé.

5

Ïⁿ téé yìhi ñaha espíritú cúndìhi yucu ñávàha

(Mt. 8:28-34; Lc. 8:26-39)

¹ Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñuú Gàdará.

² Te òré ní quene-gá xití bàrcú te ïⁿ téé yìhi ñaha espíritú cúndìhi yucu ñávàha ní quee-dé núú yíndüxi ndíyì cuáháⁿ-dé núú-gã. ³ Te mee-ni núú yíndüxi ndíyì-áⁿ quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dě.

⁴ Te ío titní xito ní dácútú-güedé cadená sáhá-dě ndìhi ndaha-dé dico ní dándává-ni-dě, te ní xóo dacàchi-gá-dé nchaa cadená-áⁿ, te ñá túú tnàhí ni ndàcu-güedé núú-dě. ⁵ Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núú yíndüxi ndíyì dico càna saa nahi-ni-dé, te ío ní xóo dānícuehé-dé mée-dě ndìhi yúú.

⁶ Te òré ní xiní-dé Jèsús te xínu-dé ní sáháⁿ núú-gã, te ní ngüíñí xití-dě, ⁷ te espíritú yíhí ñaha xii-dé-áⁿ ní quide-xi níhi ní cáháⁿ-dé, te xàhaⁿ-dě xii-gá:

—¿Ná cuendá véxi yòhó Jèsús Déhe Dútú Ndiöxí sàdí-n ìchi-í? Te cáháⁿ ndàhú-í núú Ndiöxí yuhu núu-n sã vã dāndòho ñaha-n xii-í — cāchí-dé xàhaⁿ-dě xii-gá.

⁸ Te ducaⁿ ní cáháⁿ-dé cuendá sá Jèsús ní xàhaⁿ-gã xii espíritú cúndìhi yucu ñávàha

yìhi ñaha xii-dé-áⁿ sã quéé ñàha-xi xii-dé.

⁹ Te Jèsús ní xicáⁿ tnúhú-gã núú-dě, te xàhaⁿ-gã:

—¿Nása nàni-n-í? — cāchí-gá xàhaⁿ-gã xii-dé.

Te ní xàhaⁿ-dě:

—Vài Sandadú, duha nàni-í chi ío cuéhé-ndí — cāchí-dé xàhaⁿ-dě xii-gá.

¹⁰ Te cue espíritú cúndìhi yucu ñávàha-áⁿ ní cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi ingá xichi. ¹¹ Te ñu-ni yatni yucu núú ndécú Jèsús-áⁿ yíhí vài cuchí xixexi-güedi. ¹² Te nchaa cue espíritú-áⁿ ní cáháⁿ ndàhú-xi núú-gã, te xàhaⁿ-xi xii-gá:

—Cáháⁿ ndàhú-ndí núú-n sã dáñá-n quíhu-ndí yiqui cūñú nchaa cūchí-áⁿ — cāchí-xi xàhaⁿ-xi xii-gá.

¹³ Te Jèsús ní xàhaⁿ-gã sá cúú quíhu-xi yiqui cūñú-güedi, te xínu dàtná úú mīl-güedi yìhi yucu-áⁿ. Te nchaa espíritú cúndìhi yucu ñávàha yìhi ñaha xii téé-áⁿ ní quee ñaha-xi xii-dé, te cuānguíhu-xi yiqui cūñú nchaa cūchí-áⁿ, te nchaa-güedi ní xinu-güedi duha ní quéé-güedi ndàa núú dèhvá yuhu làgúná-áⁿ, te ní ngaunihnu-güedi xití ndute te ní ndìhi-güedi ní cáhá.

¹⁴ Te òré ní xiní cue téé xito cuchí-áⁿ nācuāa ní cuu te ní xinu-güedé, te ní sáháⁿ-güedé ní cani-güedé cuendú núú cuè ñáyiú ndècu xití ñuú, ndìhi núú cuè ñáyiú ndècu xití yucu. Te nchaa ñáyiú ní

níhí tnũhu ní xicá-yu cuáháⁿ ndéhě-yu nàcuáa ní cuu. ¹⁵ Te òré ní quexiò-yu núú ndécú Jèsús te ní xiní-yu téé ní xíhi ñaha cuè espíritú cúndihi yucu ñávãha-áⁿ núcõo-dé núú sahá Jèsús, te nihnu-ná-dé dóó-dě te núcõo-ná-dé dàtná ìⁿ ñáyiu váha, te ní yùhú-yu òré ní xiní ñáhã-yu xii-dé. ¹⁶ Te nchaa ñáyiu ní xiní nàcuáa ní cuu ní ndúha téé yíhi ñaha cue espíritú cúndihi yucu ñávãha-áⁿ ní cùu ní caní-yu cuèndú núú nchàa ñáyiu ní quexiò-áⁿ nàcuáa ní cuu ní ndúha téé-áⁿ ndihi nàcuáa ní cuu cuèndá nchaa cùchí-áⁿ. ¹⁷ Te sá dúcáⁿ ni níhí ñáyiu-áⁿ tnũhu nàcuáa ní cuu núú nchaa-yu ní ngüíta-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-áⁿ núhú-gá ní ngüíta téé ní xíhi ñaha cuè espíritú cúndihi yucu ñávãha-áⁿ càháⁿ ndàhú-dé núú-gã nõu vá cúndèe iní-gá quíhíⁿ ndihi ñaha-gã xii-dé. ¹⁹ Dico ñá túú ní sãha-gá tnúhu quíhíⁿ ndihi ñaha-gã xii-dé, te ní xáhaⁿ-gã xii-dé:

—Cuanùhú vehe-n, te caní-n cuèndú núú cuè ñáyiu sá Yã Ndiõxí ní cundàhú iní ñáhã-gã xii-n, te ío càhnu cuu nchaa sá vãha ní quide-gá sá cùu-xí-n —càchí-gá xãhaⁿ-gã xii-dé.

²⁰ Te téé-áⁿ ñí xica-dé cuánuhú-dé, te ní sáhãⁿ-dé ndi ùxí ñuú nání Dècápolís, te ní caní-dé cuèndú núú

nchàa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñúhu-yu.

Cuèndá déhe yoco té Jàirú ndihi cuèndá ìⁿ ñadihí ní tnãndéé dóó Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vãi ñáyiu ní tacá núú ñí quexiò-gá-áⁿ, te xiáⁿ ndécú-gã ²² ní quexiò ìⁿ téé tàxi tnuní veñúhu núú-gã, te téé-áⁿ nání-dě Jàirú, te ní ngüíñí xítí-dě núú-gã. ²³ Te ní ngüíta-dé càháⁿ ndàhú-dé núú-gã, te xãhaⁿ-dě xii-gá:

—Ío càhú tnàhá déhe yoco-í cùhú-xi, te ndècu-ná-xi sá cùu-xi, te véxi-í càháⁿ ndàhú-í núú-n nõu vá cúndèe iní-n quíhíⁿ-ó vèhe-í tendaha-n-xi cuèndá ndúha-xi, te cun-decu-xi —càchí-dé xãhaⁿ-dě xii-gá.

²⁴ Te Jèsús ní xica-gá cuáháⁿ-gá ndihi téé-áⁿ, te ío vãi ñáyiu nchìcúⁿ ñáhã xii-gá cuáháⁿ, te dàdehnde ñaha-ná-yu xii-gá ni cùu. ²⁵ Te tnuú nchaa ñáyiu-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuíá sã cùhú-aⁿ ngòyo ñaha ñíñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ñí cuu ta quide tátna ñaha xii-aⁿ, te sa ní ndihi nchaa sá ndécú ndihi-aⁿ ní nadico-aⁿ cuèndá ní níhí-aⁿ díhúⁿ ñí queheⁿ nchaa ñáyiu ní quide tátna ñaha xii-aⁿ dico ni ìⁿ-yu ñá túú ní ndàcú-yu ndúha-aⁿ, chi da uuⁿ-gá tá

cùu cahú-aⁿ cuáháⁿ. 27 Te òré ní níhí-aⁿ tnúhu cuendá Jèsús, te ní xica-aⁿ cuáhá-aⁿ núú ndécú-gă. Te òré ní quexio-aⁿ núú ndécú-gă te ní sáháⁿ ndehe yatni-aⁿ ndàa sátá-gă ní tnándeé-aⁿ dóó-gă. 28 Te ducaⁿ nǐ quide-aⁿ chi ní sani iní-aⁿ sá nǔu ndacu-aⁿ tnándeé-aⁿ cuedicó luha yuhu dóó Jèsús te ndúha-aⁿ ní sani iní-aⁿ. 29 Te òré ducaⁿ nǐ quide-aⁿ te ñá túú-gă ní ngòyo ñaha-gă níñí xii-aⁿ, te òré-áⁿ nǐ cutnùní iní-aⁿ sá nǐ ndúha-aⁿ cuéhé tnáhá-aⁿ. 30 Te Jèsús ní cutnùní iní-gă sá ìⁿ ñáyiú ní ndúha sá cuendá-gă, núu ní nchócótó-gă ndàa sátá-gă te ní xícáⁿ tnúhú-gă núú nchàa ñáyiú nchicúⁿ ñáhá xii-gă, te xăhaⁿ-gă xii-yu:

—¿Ndédacàa-ndo ní tnándeé ñáhá xii-í? —càchí-gă xăhaⁿ-gă xii-yu.

31 Te cue téé xica cuu ndihi-gă ní xăhaⁿ-güedě xii-gă:

—Mèstrú, ndèhe-n sá váí ñáyiú nchicúⁿ ñáhá xii-n, te texio texio dàdehnde ñáhá-yu xii-n te xícáⁿ tnúhú-gă-n yòò ní tnándeé ñáhá xii-n —cachí-güedé xăhaⁿ-güedě xii-gă.

32 Te Jèsús ní xíndéhé văha-gă xio xio diñi-gă nǔu ndédacàa ñáyiú ní tnándeé ñáhá xii-gă. 33 Te sá dúcáⁿ nǐ cutnùní iní ñadìhí-áⁿ nàcuáa ní cuu, núu yùhú yùhú-aⁿ ní sáhá-aⁿ ní ngúíñí xítí-áⁿ nǔú Jèsús, te ní xăhaⁿ ndăá-aⁿ xii-gă nàcuáa ndùu cuendá-aⁿ. 34 Te Jèsús ní xăhaⁿ-gă xii-aⁿ:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndihú-gă iní-n, chi vá dúcáⁿ-gă ndoho-n —càchí-gă xăhaⁿ-gă xii-aⁿ.

35 Te càháⁿ dúcáⁿ-ní Jèsús ní sáá cue téé xinu cuechi vehe té Jàirú téé tàxi tnuní veñúhu-áⁿ, te xăhaⁿ-güedě xii-dé:

—Sa ní xíhí déhe-n, vá chíchùu-gă-n Mèstrú —càchí-güedé xăhaⁿ-güedě xii-dé.

36 Dico Jèsús ñá túú ní quide cuendá-gă nàcuáa ndùu tnúhu ní càháⁿ cue téé-áⁿ, te ní xăhaⁿ-gă xii téé tàxi tnuní veñúhu-áⁿ:

—Ñá túú nă cani iní-n, quíndáá iní ñáhá-ní-n xii-í —càchí-gă xăhaⁿ-gă xii-dé.

37 Te Jèsús vá yòo-gă ní cuíní-gă canchicúⁿ ñáhá xii-gă quíhíⁿ, chi té Pèlú-ni, ndihi té Jàcobó-ni, ndihi ñaní-ni-dé té Juàá cuáháⁿ ndihi ñaha-gă xii-güedé. 38 Te òré ní quexio-gă ndihi-güedé vehe téé tàxi tnuní veñúhu-áⁿ, te ní xíní-gă sá ìò vâi ñáyiú xĩndecu, te súúní dusaⁿ quidé-yu te níhi xícáháⁿ-yu te xĩndáhí-yu. 39 Te òré cuánguihu-gă xítí vehe, te ní xăhaⁿ-gă xii-yu:

—¿Ná cuendá ndéé dúcáⁿ ìò dusaⁿ quide-ndo, te ndàhyú-ndó? Te xíchí-a ñá túú ní xíhí-xi chi dícó xidí-xi —càchí-gă xăhaⁿ-gă xii-yu.

40 Te ní sácú ndéé ñáhá-yu xii-gă sá dúcáⁿ nǐ càháⁿ-gă, chi sá cúú-xí mèe-yu chi ní xíhí ndisa xíchí-áⁿ. Te òré-áⁿ nǐ

queñuhu-gá nchaá-yu quehé, te cuánguihu-gá núú cándòdo yiqui cuñú xíchí nǐ xíhí-án. Te ndèca-gá tātá xíchí nǐ xíhí-án ndihi nǎná-xi cuánguihu, te tnàhá cue téé úní ndihi-gá-án cuánguihu ndihi-gá. ⁴¹ Te ní tñii-gá ndaha xíchí nǐ xíhí-án, te ní xáhaⁿ-gǎ:

—Tàlita, cúmí —càchí-gǎ xǎhaⁿ-gǎ.

Te tnúhu-án quée-xí: Yòhó xíchí cuéchí yúhú càchí-í sá ndácò-n, duha quèe-xi tnúhu-án.

⁴² Te òré-ni-án nǐ ndoto xíchí cuéchí-án nǐ ndacòo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaa ñáyiú sá dúcáⁿ nǐ dándótó ñàha Jesús xii-xi. ⁴³ Te Jèsús ní cáháⁿ víhí-gǎ dóho tātá-xi ndihi nǎná-xi sá vǎ yòo ìⁿ cúñàhá-yu sá nǐ dándótó ñàha-gǎ xii-xi. Te sátá dúcáⁿ te ní xáhaⁿ-gǎ xií-yu sá cuñàhá-yu xii-xi sá cáxi-xí.

6

Jèsús ndécú-gǎ ñuú Nazàrét (Mt. 13:53-58; Lc. 4:16-30)

¹ Te Jèsús ní ndee-gǎ ñuú núú nǐ dándótó-gǎ xíchí nǐ xíhí-án, te cuánuhú-gǎ núú cúú ñuú-gǎ, te tnàhá cue téé xica cuu ndihi-gǎ cuánuhú ndihi-gǎ. ² Te ndècu Jesús ñuú-gǎ ní tnahá nduu ndètatú ñáyiú. Te nduu-án cuánguihu-gǎ xití veñúhu dàcuaha ñàha-gǎ xií-yu. Te vǎi ñáyiú ndèdóho nchaa tnúhu cáháⁿ-gǎ, te xicuñúhu vǐhí-yu, te xitnàhá-yu:

—¿Ndèé ní sáháⁿ dácúáhá tēe-a núú ndéé duha váha cáháⁿ-dé, nása ní quide-dé núú ndéé duha ío váha cùtnuní iní-dé, te ndàcu-dé quidé-dé nchaa sá vǎ yòo tnàhí ndàcu cada-ì? ³ Te dicó carpintèrú cúú-dé, dicó déhe tá Màriá cúú-dé, te ñaní-dé cúú tē Jàcobó, ndihi té Chèé, ndihi té Jùdás, ndihi té Xímú, te ñiu-ni cue cúha-dé cúú ñáyiú ndècu ndihi-o ñuú-a —càchí-yu xitnàhá-yu.

Te ñá túú ní cuíní-gǎ-yu cáháⁿ ndihi váha ñàhá-yu xii-gǎ. ⁴ Te Jèsús ní xáhaⁿ-gǎ xií-yu:

—Te núú ìⁿ tée cáháⁿ tnúhu Yá Ndiòxí ná násáá-dé ñuú-dé dácúàha-dé ñáyiú tnúhu-gǎ, te nchaa ñáyiú ñuú-dé-án, ndihi nchaa ñáyiú ndècu ndihi-dé vehe-dé, ndihi nchaa ñáyiú cùu ndi mee-dé ñá túú nèhé-yu sá yíñùhu núú-dé, dico cue ñáyiú nchaa dava-gǎ ñuú chi nèhé-yu sá yíñùhu núú-dé —càchí-gǎ xǎhaⁿ-gǎ xií-yu.

⁵ Te ñá túú ní quide tátna Jèsús vǎi ñáyiú cuèndá sá ñà túú ní sàndáá iní ñàhá-yu xii-gǎ, dico ní quide tátna-gǎ ìⁿ úú ñáyiú cùhú ní sàndáá iní ñàhá xii-gǎ. Te ní tendaha ñàha-ní-gǎ xií-yu te ní ndúha-yu. ⁶ Te ío ní cuñúhu-gǎ sá dúcáⁿ ñà túú ní cuíní-yu quindáá iní ñàhá-yu xii-gǎ. Te sátá dúcáⁿ te ní xica-gǎ cuáháⁿ-gǎ nchaa dava-gǎ ñuú líhli càa yatni xiáⁿ cuèndá dácúàha-gǎ ñáyiú tnúhu-gǎ.

Jèsús táuchìuⁿ-gǎ quíhíⁿ

cue téé xica cuu ndihi-gá cáháⁿ-güedé tnúhu Yá Ndióxi núú ñáyi

(Mt. 10:5-15; Lc. 9:1-6)

7 Te Jèsús ní cana-gá ndi ùxúú cue téé xica cuu ndihi-gá, te ní sáñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cündihi yucu ñávãha yìhi ñaha xii ñáyi. Te ní xáhaⁿ-gã xii-güedé sá ndì ndúú ndi ndúú-güedé quíhíⁿ-güedé cáháⁿ-güedé tnúhu Yá Ndióxi núú ñáyi. 8-9 Te cùmání-gã caca-güedé quíhíⁿ-güedé, te ni xáhaⁿ-gã xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vã cánèhe-ndo sá cáxí-ndó, te ni vã cánèhe-ndo díhúⁿ, chi ìⁿ caa-ni tátnu canehe-ndo, te chàú yíhí-ní-ndó-ãⁿ xíãⁿ-ni quíhi-ndo, te vã cánèhe-gá-ndó ìngá ichi dóó-ndó chi ñu-ni dóó níhú-ndó-ãⁿ xíãⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xãhaⁿ-gã xii-güedé.

10 Te xãhaⁿ tùcu-gá:

—Te òré ná sàá-ndó ìⁿ ñuú, te ió ñáyi cáháⁿ ñáhã-yu xii-ndo vèhé-yu, te xíãⁿ-ni cundecu-ndo ndèé ná sàá nduu ndèe-ndo ñuú-áⁿ. 11 Te núú ió dava ñuú ñá túú cuíní-yu cáháⁿ ndihi ñaha vãha-yu xii-ndo, te ni ñá túú cuíní-yu cundedóho-yu tnúhu cáháⁿ-ndó, te ndee-ni-ndo ñuú-áⁿ te naquidi-ndo ticáchúhmá ñí tní sáhá-ndó cuendá ná cùtnuní iní-yu sá

ñà túú quide váha-yu. Te na càchí tnúhu ndáá-í xii-ndo sã ná sàá nduu càda ndáá Yá Ndióxi cuéchi nchaa ñáyi, te cue ñáyi ducaⁿ na càda ñaha xii-ndo-áⁿ ïo-gá ndohó-yu dàvá-áⁿ dàcüúxí dàtná ndoho cue ñáyi ñuú Sòdomá ndihi cue ñáyi ñuú Gòmorá —càchí-gá xãhaⁿ-gã xii-güedé.

12 Te cue téé-áⁿ ñí xica-güedé cuáháⁿ-güedé te ní ngúita-güedé dácüàha-güedé cue ñáyi tnúhu Yá Ndióxi, te xãhaⁿ-güedé xií-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchaa ichi cuehé ichi duha ndècu-ndo. —càchí-güedé xãhaⁿ-güedé xií-yu.

13 Te vãi espíritú cündihi yucu ñávãha yìhi ñaha xii ñáyi ta queñuhu-güedé yiqui cùñú-yu cuáháⁿ, te vãi tucu ñáyi cùhú tá quide tátna-güedé cuáháⁿ chíhí ñaha-güedé acití xií-yu te ndúha-yu.

Nàcuáa ní cuu ní xíhí té Juáá téé dàcuandute ñaha xii ñáyi
(Mt. 14:1-12; Lc. 9:7-9)

14 Te nchaa xichi ní níhí ñáyi tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyi ní níhí-dé tnúhu nchaa nàcuáa quide-gá, te ní cachí-dé:

—Té Juáá téé ní xóo dacuàndute ñaha xii ñáyi ní ndoto núu dàcáⁿ ndácú-dé quidé-dé nchaa sá vã yóo tnàhí ndàcu cada —duha ní cachí-dé.

15 Te dava ñáyiú cächí-yu sá tẽ Èliás tée ní xóo cáháⁿ tnúhu Yá Ndiõxí ndéé sanaha ní nasáá-dé.

Te davá-yu cächí-yu sá cúú-gã dàtná ìⁿ tée ní xóo cáháⁿ tnúhu Yá Ndiõxí ndéé sanaha. 16 Te tẽ Hèrodés ní níhí-dé tnúhu nchaa nàcuáa càháⁿ-yu, te ní cachí-dé:

—Diu tẽ Juáá tée ní táuchíuⁿ-í ní xehndé-güedé díquí-xi ní ndoto —cächí-dé.

17-18 Te duha ní cuu cútnàhá ní sahní tẽ Hèrodés tẽ Juáá, chi dàvá-áⁿ nĩ naqueheⁿ tẽ Hèrodés-áⁿ ìⁿ ñaha nàni Herodiás ndécá-dẽ, te ñaha-áⁿ sá ní cándeca ñaha ñàní-dé tẽ Lìpé. Te tẽ Juáá ní xáhaⁿ-dẽ xii tẽ Hèrodés sá ñà túú ní quide váha-dé sá dúcáⁿ nĩ naqueheⁿ-dé ñaha ní cándeca ñàní-dé, núu sá cuendá ñaha-áⁿ nĩ táuchíuⁿ tẽ Hèrodés ní tñii-güedé tẽ Juáá ní chihi ñaha-güedé vecaá, te ní dácútú ñaha-güedé xii-dé, te ducaⁿ nĩ quide-dé cuendá sá ndécá ñaha-dé xii-aⁿ.

19 Te ñaha nàni Herodiás ndécá tẽ Hèrodés-áⁿ ìo ní cuu úhú iní-aⁿ tẽ Juáá, te ní cuiní-aⁿ cahni-aⁿ-dé, dico ñà túú ní níhí-aⁿ nàcuáa cada-aⁿ, 20 Te mee tẽ Hèrodés chi ní cutnùní ndáá iní-dé sá tẽ Juáá cúú-dẽ ìⁿ tée quide mee-ni sá váha, te quide ndáá-dé núu Yá Ndiõxí, te ní xóo yùhú ñáhá-dẽ núu xĩáⁿ ñà túú ní dàña-dé ná cada ñaha ñaha ndeca-dé-áⁿ xii tẽ Juáá. Te tẽ Hèrodés-áⁿ ìo ní cudíí iní-dé ní xíndedóho-dé nchaa tnúhu ní xáhaⁿ tẽ Juáá xii-dé, dico ñà túú ní sàni iní-dé duuⁿ duuⁿ tñii-dé tnúhu-áⁿ. 21 Te ìⁿ nduu ní xóo vico vehe tẽ

Hèrodés ní quide càhnu-dé nduu nĩ cacu-dé. Te nduu-áⁿ nĩ níhí ñaha nàni Herodiás-áⁿ nàcuáa cada-aⁿ cuendá cuú tẽ Juáá. Te nduu-áⁿ ní cáháⁿ tẽ Hèrodés nchaa cue tée cùchiuⁿ, ndihi nchaa cue tée tàxi tnuní ñáhá xii cue sandadú, ndihi nchaa cue tée cuica ndècu distritú Galileá cuendá cudini ndihi ñaha-dé xii-güedé nduu-áⁿ. 22 Te

ndècu ìⁿ déhe yoco ñaha nani Herodiás-áⁿ, te xíchí-áⁿ nĩ quíhu-xi vehe núú cúú vico-áⁿ nĩ xita saha-xi mèi oré yíhí tẽ Hèrodés mèsá ndihi nchaa cue tée ní cáháⁿ-dé, te ío ní cudíí iní-dé ndihi nchaa cue tée-áⁿ nàcuáa ní xita xíchí-áⁿ. Te tẽ Hèrodés ní xáhaⁿ-dẽ xii-xi:

—Cácaⁿ núu-í núu ná cuiní-n te taxi-í —cächí-dé xáhaⁿ-dẽ xii-xi.

23 Te ní cacunehe-dé ndéé Yá Ndiõxí nàcuáa cutnùní iní xíchí-áⁿ sá ndáa cuáñaha-dẽ núu ná cúú sá ná càcáⁿ-xi núu-dẽ cuèi ndéé cuádava nchaa sá ndécú ndihi-dé, te núu na càcáⁿ-xi. 24 Te sá dúcáⁿ nĩ xáhaⁿ-dẽ xii-xi núu ní quee-xi quehé ní xáhaⁿ-xi xii náná-xi:

—Náá, ¿ná cúú sá càcáⁿ-í núú tẽ Hèrodés? —cächí-xi xáhaⁿ-xi xii-aⁿ.

Te náná-xi-áⁿ nĩ xáhaⁿ-aⁿ xii-xi:

—Cuaháⁿ càcáⁿ-n díquí tẽ Juáá tée dàcuandute ñaha xii ñáyiú —cächí-aⁿ xáhaⁿ-aⁿ.

25 Te ndihi-ni cuándihu xíchí-áⁿ xití vehe núú yíhí tẽ Hèrodés-áⁿ, te xáhaⁿ-xi xii-dé:

—Cuiní-í sá mèi nduu vitna quehndé-n díquí tẽ Juáá tée dàcuandute ñaha xii ñáyiú te taxi-n, dico na cùhuⁿ ìⁿ

xití cóhó taxi-n —càchí-xi xāhaⁿ-xi xii-dé.

26 Te té Hèrodés ní ngüíta-dé ndihú víhí iní-dé sá dúcáⁿ nĩ xāhaⁿ-xi xii-dé, dico ñá túú ní cùyii-dé cúñaha-dé xii-xi sá vā cúú cuañaha-dé sá xicáⁿ-xi, chi cuèndá sá núú nchaa ñáyiú ní xāhaⁿ-dē sá cúú cuañaha-dé núú ná cúú sá ná cācáⁿ-xi, te ní cacunehe-dé ndéé Yá Ndiöxí nācuáa cutnùní iní-xi sá ndāá cuañaha-dé sá ná cācáⁿ-xi núú-dé. 27 Te té Hèrodés-áⁿ ndihí-ni ní xāhaⁿ-dē xii ìⁿ sandàdú sá quihíⁿ-dé quehndé-dé díquí tē Juàá. 28 Te sandàdú-áⁿ nĩ xica-dé cuáháⁿ-dé vecaá núú yihí tē Juàá-áⁿ, te ní quexìo-dé te ní xehndé-ni-dé díquí tē Juàá, te ní chihi-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ nĩ nacuáha-xi nāná-xi. 29 Te òré ní níhí nchaa cue téé ní xica cuu ndihí ndii Juàá-áⁿ tnúhu sá dúcáⁿ nĩ sahni ñaha-güedē xii ndii, te ní sáháⁿ-güedé ní ndocani-güedé yiqui cùñú ndii te ní chindúxi-güedé.

Jèsús dácàxi-gá úhúⁿ mĩl cue téé te ìⁿ ñáyiú ñihí ndihí landú (Mt. 14:13-21; Lc. 9:10-17; Jn. 6:1-14)

30 Te nchaa cue téé ní táuchíúⁿ Jèsús cuáháⁿ cáháⁿ tnúhu Yá Ndiöxí núú ñáyiú ní ndexìo-güedé núú-gá te ní ngüíta-güedé nácàni tnúhu-güedé nchaa nācuáa ní quide-güedé ndihí nchaa nācuáa ní dánèhé ñáhá-güedé xii-yu. 31 Te Jèsús ní xāhaⁿ-gā xii-güedé:

—Chí nèhé ná quihíⁿ-ó ìⁿ xichi núú ñá túú ñáyiú ndetatú-ó —càchí-gá xāhaⁿ-gā xii-güedé.

Te ducaⁿ nĩ xāhaⁿ-gā xii-güedé, chi ío cuéhé ñáyiú cuáháⁿ véxi-yu cùú-yu núú ndécú-gā. Te ní ñá ñihí-gá nása cada-gá caxi-gá ndihí cue téé xica cuu ndihí-gá. 32 Te Jèsús cuánguee-gá bàrcú ndihí mee-ni cuè téé ní táuchíúⁿ-gā cáháⁿ tnúhu-gā, te cuáháⁿ-gā ndihí-güedé ìⁿ xichi núú ñá túú ñáyiú ndècu. 33 Dico vāi ñáyiú ní cutnùní iní-yu sá díú-gā ñúhú bàrcú-áⁿ cuáháⁿ ndihí cue téé xica cuu ndihí-gā, te nchaa ñúú cáá yàtni xiáⁿ nĩ quee ñáyiú xixínú-yu cuáháⁿ núú nĩ quidé-yu cuèndá quexìo Jèsús, te sa ndécú-yu xiáⁿ nĩ quexìo-gā. 34 Te òré ní quene Jèsús xití bàrcú, te ní xiní-gá cuéhé víhí ñáyiú xixúcu núú nĩ quexìo-gā-áⁿ, te ní cundàhú iní ñáhá-gā xii-yu chi ndécú-yu dàtná xĩndecu cue mbéé cue quiti ñá túú tòli-xi, te ío vāi núú sá nĩ ngüíta-gā ní dácuáhá ñaha-gā xii-yu. 35 Te sátá tá cuàa cuáháⁿ te ní sáháⁿ cue téé xica cuu ndihí Jèsús núú-gā, te xāhaⁿ-güedé xii-gā:

—Sa ní cuaa te ñá túú ñáyiú ndècu yatni iha. 36 Vāha-gā dandàca nchaa ñáyiú-a chi na quihíⁿ-yu nchaa vehe càa xití yucu-a, ndihí nchaa ñúú cáá nchaa yatni iha cuaáⁿ-yu sá caxí-yu —càchí-güedé xāhaⁿ-güedé xii-gā.

37 Te Jèsús ní xāhaⁿ-gā:

—Mee-ndo chí cuãñaha sã ná caxí-yu —cächí-gá xãhaⁿ-gã xii-güedé.

Te xãhaⁿ-güedé xii-gá:

—¿Te nása cada-ndí, chi xini ñuhu-xi datná úú ciendú díhúⁿ denariú cuendá cuaaⁿ-ndí sã caxí-yu? —cächí-güedé xãhaⁿ-güedé xii-gá.

³⁸ Te Jèsús ní xãhaⁿ-gã xii-güedé:

—Chí cuáháⁿ cundehe-ndo nõu ná daha pãá ndécú ndihí-ndo te cachí tnúhu-ndo —cächí-gá xãhaⁿ-gã xii-güedé.

Te ní sáháⁿ ndéhé-güedé nõu ná daha pãá ndécú, te ní xãhaⁿ-güedé xii-gá:

—Úhúⁿ duha-ná pãá ndihí úú-nã chácá ndécú —cächí-güedé xãhaⁿ-güedé xii-gá.

³⁹ Te Jèsús ní xãhaⁿ-gã xii nchaa ñáyiú sã ná nihí tnáhã-yu cuu titní xichí-yu, te ngóo-yu nchaa núú cühú cuí cãa xíáⁿ. ⁴⁰ Te nchaá-yu ní ngóo-yu, te dava xichí-yu ní ngóo ñⁿ ciendú-yu, te dava xichí-yu ní ngóo údico úxí-yu.

⁴¹ Te sátá ñⁿ ndihí-yu ní ngóo, te ní queheⁿ Jèsús ndi úhúⁿ pãá ndi úú chácá-ãⁿ, te ní ndacoto-gá andiu te ní ndacáⁿ táhú-gã núú Yã Ndiõxí, te dãtnúni ní táhú cuèchi-gá pãá-ãⁿ te ní sãñaha-gã xii cue téé xica cuu ndihí-gá ní dácãhñu-güedé nchaa ñáyiú-ãⁿ ñⁿ xexí-yu. Te diu-ni ducaⁿ ñⁿ quide tucu-gá úú chácá-ãⁿ. ⁴² Te nchaá-yu ní xexí-yu ní ndahá xití-yu.

⁴³ Te sátá ñⁿ túhú cóhõ-yu te ní nadatãcã-güedé nchaa

sã ñⁿ quendóo, te ní chítú ùxúú tnáhá tidihí mee-ni sã ñⁿ quendóo núú úhúⁿ-ni pãá, ndihí núú úú-ni chácá. ⁴⁴ Te nchaa ñáyiú ní xexi-ãⁿ chí xĩnu úhúⁿ mĩl mee-ni cuè téé chí diu-ni cue téé-ãⁿ ñⁿ quíúndehu, te ñⁿ ñáyiú dihi ndihí cue landú.

Jèsús xicã-gã núú ndute
(Mt. 14:22-27; Jn. 6:16-21)

⁴⁵ Te òré-ni-ãⁿ ñⁿ xãhaⁿ Jèsús xii cue téé xica cuu ndihí-gá sã quèe-güedé bàrcú codonúu-güedé quíhíⁿ-güedé ñⁿ ñuú námí Betsaidá cáá ndãa ingá xio yuhu làgúná núú ndécú-güedé-ãⁿ, te mee-gã quendóo-gá cada ndee ñⁿ tnáhã-gã ndihí cue ñáyiú.

⁴⁶ Te sátá ñⁿ yãha ní quide ndee ñⁿ tnáhã-gã ndihí-yu, te ní xica-gã cuáhãⁿ-gã ñⁿ tindúú cáá yãtni xíáⁿ cuendá cáháⁿ ndihí-gá Yã Ndiõxí. ⁴⁷ Te òré sa ní cundiquíⁿ te bàrcú sã ñúhú cuè téé xica cuu ndihí-gá sa cuáhãⁿ-xi ndéé cuádava xití làgúná-ãⁿ, te mee-gã ndécú-gã ñⁿ núú tindúú. ⁴⁸ Te túu ndèhe-gá sã súúni ndòho-güedé tá dácaca-güedé bàrcú-ãⁿ cuáhãⁿ, chí cuendá ndãa nacuaa cuáhãⁿ-xi-ãⁿ duha véxi táchí te nãtúndaha-xi. Te ingá nduu-ãⁿ tàcuíhndã-gá sa ní cuyatni vií-nã Jèsús bàrcú ñúhú-güedé-ãⁿ, dico núú ndute tá xica-gã cuáhãⁿ te luha-ná te yãha ñaha-gã xii-güedé ní cuu. ⁴⁹⁻⁵⁰ Te òré ní xiní ñãhá cuè téé ñúhu barcú-ãⁿ xii-gá te ní yùhú-güedé ní cana saa-güedé, chí ní sani

iní-güedé sá ñⁿ almá cúú-gã.
Te ní xáhaⁿ-gã xii-güedé:

— ñⁿí cunduu-ndo, vá
yuhú-ndó, chí yuhú cúú-í! —
càchí-gá xãhaⁿ-gã xii-güedé.

⁵¹ Te Jèsús cuánguee-gá
xítí bàrcú ñúhú-güedé-áⁿ, te
sátá cuánguee-gá te òré-ni ní
ngúíñí táchí, te ní cuñúhu
vìhi-güedé. ⁵² Te ducaⁿ chí
cue téé-áⁿ ñà túú ní cùtnuní
iní-güedé nása quíde-gá,
chí ñà túú ní cùtnuní váha
iní-güedé nàcuáa ndúu sá ní
quíde-gá òré ní nadacàyá-gá
pàá, chí ío ñí ñíquí-güedé.

*Jèsús quíde tãtna-gá ñáyíu
cùhú ñúú Genesàrét
(Mt. 14:34-36)*

⁵³ Te ní yáha-güedé ndìhi-gá
ndàa ingá xio yuhu làgúná,
te ní sáá-güedé ndìhi-gá yucu
cue téé ñúú Genesàrét. Te
yácáⁿ ní dácútú ndéé-güedé
bàrcú-güedé yuhu làgúná.
⁵⁴ Te òré ní quene Jèsús ndìhi
cue téé xica cuu ndìhi-gá
xítí bàrcú, te nchaa ñáyíu
xíndecu-áⁿ ñí cutnùní iní-yu
sá díú-gã. ⁵⁵ Te ñáyíu-áⁿ
ndìhi-ni ní sáháⁿ-yu nchaa
núú xíndecu cue ñáyíu cùhú,
te cue ñáyíu cùhú-áⁿ ñí quée-yu
xító nchìdo ñahá-yu cuáháⁿ
ndí tnahá ñⁿ ñⁿ xichi núú
nihí-yu tnúhu quèxio Jesús.
⁵⁶ Te nchaa ñúú náhnú ndìhi
nchaa ñúú lìhli núú cuáháⁿ
Jèsús, ducaⁿ xíndecá-yu nchaa
ñáyíu cùhú cuáháⁿ xítí ñúú
sàcáⁿ ñáhã-yu núú-gã cuèndá
cada tátna ñaha-gã xii-yu. Te
diu-ni ducaⁿ xíquidé-yu nchaa
dava-gá xichi núú cuáháⁿ-gá
núú xíndecu cue ñáyíu, te

càháⁿ ndàhú-yu núú-gã sá ná
dáñá-gã tnándeé cue ñáyíu
cùhú-áⁿ cuèdicó luha yuhu
dóó-gã cuèndá ndúha-yu. Te
nchaa ñáyíu cùhú ní tnándeé
yuhu dóó-gã ní ndúha-yu.

7

*Cuèndá nchaa sá quíde-xí
ngúndecu cuèchi ñáyíu
(Mt. 15:1-20)*

¹ Te ñúú Jerusalén ní
quee cue téé dàcuaha ñaha
xii ñáyíu nchaa tnúhu ní
chídó tnùní ndíi Moisés, te
ní quexìo-güedé núú ndécú
Jèsús, te tnahá cue téé cùu
fariséú ní quexìo ndìhi-güedé.
² Te cue téé-áⁿ ñí xini-güedé
sá dàva cue téé xica cuu ndìhi
Jesús ñà túú ndàha-güedé
dàtná ndáhá mèe cue téé cùu
fariséú-áⁿ òré caxi-güedé. Te
xíãⁿ núu cue téé ní quexìo-áⁿ
ñí cáháⁿ cuèhé-güedé cuèndá
cue téé xica cuu ndìhi-gá.
³ Te ducaⁿ chí nchaa cue téé
cùu fariséú-áⁿ ndìhi nchaa
ñáyíu isràél nchìcúⁿ nihnú-yu
quíde-yu dàtná ní xóo cada
nchaa cue ñaní tnahã-yu ní
xíndecu ndéé sanaha, chí
nchaa ñáyíu-áⁿ và cáxi-yu te
núu vá ndáhã-yu dàtná ní
xóo ndaha nchaa cue ñaní
tnahã-yu ní xíndecu ndéé
sanaha-ãⁿ. ⁴ Te ñáyíu-áⁿ ndí
tnahá òré cuáháⁿ-yu núú
yãhu te nàsáá-yu, te ndáhá-yu
nàcuáa sàni iní-yu ndùvétú iní
Yã Ndiõxí, te núu vá dúcáⁿ
càdá-yu te vá cáxi-yu. Te
tnahá náquèté-yu vàsú sá
sácùhuⁿ sá xihí-yu, ndìhi lítu,
ndìhi cóhó càá, ndìhi càamá.
Te nchaa xéhé náquèté-yu

nàcuáa sàni iní-yu ndùvétú iní Yá Ndiõxí. Te ío-gá titní sá nǐ xóo cada nchaa ñáyiú ní xíndecu ndéé sanaha-ǎⁿ nchicúⁿ nihnú-yu quidé-yu. ⁵ Te cue téé cùu fariséú-áⁿ, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés-áⁿ nǐ xáhaⁿ-güedé xii Jèsús:

—¿Ná cuendá cue téé xica cuu ndihí-n ñá túú nàquete-güedé ndaha-güedé òré caxi-güedé dàtná ní cachí nchaa cue téé ní xíndecu ndéé sanaha-i? —càchí-güedé xáhaⁿ-güedé xii-gá.

⁶ Te Jèsús ní xáhaⁿ-gǎ xii-güedé:

—Nchòhó cúú-ndó cué téé ío dándahú mée-xí chi càchí-ndó sǎ ío quíde ndáá-ndó te ñá ndáá sá quíde ndáá-ndó. Te ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yá Ndiõxí ndéé sanaha núú tütú-gá núú càháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dìcò-ni yuhu càháⁿ-yu, chi ñá túú ñùhu iní ñáhǎ-yu xii-í.

⁷ Te àúⁿ nǎ cuu chiñuhu ñahá-yu xii-í, chi ñá túú vèdana ndèè nándihí-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá nǐ cahu iní cue ñáyiú ñuyíú-a càháⁿ-yu.

Duha ní chídó tnùní ndíi Chàíá núú tütú Yá Ndiõxí nàcuáa ní cáháⁿ-gá

cuendá-ndó. ⁸ Te nchòhó ní dáñǎ-ndó nàcuáa ní cachí Yá Ndiõxí cada-ndo, te nchicúⁿ nihnu-ndo quíde-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácúhuⁿ sá xihí-ndó nàtava-ndo nàcuáa ní xóo cada ñáyiú-áⁿ nǐ xóo naqueté-yu nchaa xǎⁿ, te nándi-gá nchaa núú sǎ quíde-ndó —càchí Jèsús xáhaⁿ-gǎ xii-güedé.

⁹ Te ní xáhaⁿ tùcu-gá xii-güedé:

—Te nchòhó, ñá túú cuíni-ndó càda-ndo nàcuáa cuíni Yá Ndiõxí, chi mee-ni nàcuáa ní cachí cue téé ní xíndecu ndéé sanaha nchicúⁿ nihnu-ndo quíde-ndo. ¹⁰ Te ndíi Moisés ní cachí ndíi sá ncháá ñáyiú canehé-yu sá yíñùhu núú tǎtǎ-yu ndihí núú nǎnǎ-yu. Te nchaa ñáyiú na càháⁿ úhú cuendá tǎtǎ-yu àdi cuendá nǎnǎ-yu te cahni ñaha-güedé xii-yu ní cachí ndíi. ¹¹ Te nchòhó càchí-ndó sǎ núu ñⁿ téé na cūñaha-dé xii tǎtǎ-dé ndihí nǎnǎ-dé sá sǎ nǐ sàni iní-dé cuañaha-dé xii-yu cùu-xi Corbán, te ñá túú-gǎ xíní ñùhu-xi sá cuañaha-dé xii-yu, te tnúhu Còrbán-áⁿ quée-xí: Sá cúú cuendá Yá Ndiõxí. ¹² Te sá dúcáⁿ ná càháⁿ ñⁿ téé-áⁿ te nchòhó chindèe tnúhu-ndo-dé cuendá sá vǎ chindèe-gá-dé tǎtǎ-dé ndihí nǎnǎ-dé. ¹³ Te ducaⁿ quíde-ndo chi ní dáquéé tǐhú-ndó nàcuáa ní cachí Yá Ndiõxí cada-ndo, te mee-ni nàcuáa ta quíde cue téé ñuyíú-a véxi nchicúⁿ nihnu-ndo quíde-ndo, te ñu-ni ducaⁿ ta sànu ichi tnaha-ndo

véxi, te nándi-gá nchaa sá cáhú ìní-ndó quìde-ndo — cachí-gá xăhaⁿ-gă xii-güedé.

14 Te Jèsús ní xăhaⁿ tùcu-gá xii cue ñáyiú xĩndecu-áⁿ:

—Chí táquixi ndehe iha, te cundedóho váha-ndo tnũhu na cáháⁿ-í-a te ío váha cuáha-ndo cuëndá. 15 Nchaa sá xéxi-ndó chí ñá túú nă quidé-xí ìní-ndó, dico nchaa sá cuèhé sá dúhá sàni ìní-ndó quìde-ndo, nchaa xiăⁿ quidé-xí ndècu cuéchi-ndo. 16 Te nchaa nchòhó ñáyiú ndédóho nchaa tnúhu cáháⁿ-í-a ío váha chí cuáha cuëndá —càchí-gá xăhaⁿ-gă xii-yu.

17 Te Jèsús ní dándõo-gá nchaa ñáyiú núú xixúcu-yu-áⁿ te cuándihu-gá xití vehe. Te cue téé xica cuu ndihi-gá ní xicáⁿ tnúhú-güedé núú-gă nõu nása quèe-xi cuendú ní cani-gá núú ñáyiú-áⁿ. 18 Te ní xăhaⁿ-gă xii-güedé:

—¿Te náa tnàhá nchòhó ñá túú ní tècú tnùní-ndó cuèndú ní cani-í núú ñáyiú-áⁿ? Nchaa sá xéxi-yu cuánguee xití-yu ñá túú quide-xi ìní-yu năcuáa ngũndecu cuéchi-yu. 19 Chí ñá díú ìní-yu cuánguee-xi chí cuánguee ndáá-xi xití-yu, te nàyáha ñaha-xi xii-yu —càchí-gá xăhaⁿ-gă xii-güedé.

Te sá dúcáⁿ nĩ cáháⁿ-gá te ní dátũu-gá sá cúú càxi-o nchaa núú sá cúú càxi-o. 20 Te ní xăhaⁿ tùcu-gá xii-güedé:

—Nchaa sá cuèhé sá dúhá quide ñáyiú xiăⁿ cécú nihnu-xi ìní-yu, te nchaa xiăⁿ quidé-xi ndècu cuéchi-yu. 21 Te ìní-yu-áⁿ cécú nihnu nchaa sá

cuèhé sá dúhá, chí sàni cuehé sání dùha ìní-yu. Te cue téé cáháⁿ ndihi-güedé ñadĩhí te ñá díú ñadĩhí-güedé cúũ-yu, te diu-ni ducaⁿ quide cue ñáyiú dĩhí cáháⁿ ndihi-yu téé te ñá díú yĩ-yu cùu-güedé. Te sàhni-yu cue tnàha ñáyiú-yu, te mee-ni ìchi díí ìní cúdeí ìní-yu cundecú-yu. 22 Te dùhu ndachiuⁿ tnahá-yu, te xihó-yu cundecu ndihi-yu sá ndécú ndihi tnaha ñáyiú-yu, te ío quide úhú ìní-yu sá cúú-xi tnàha ñáyiú-yu, te ío dándahú tnáhă-yu, te mee-ni nchaa sá cuèhé sá dúhá cúdeí ìní-yu quide-yu, te ío cuédú ìní-yu, te ío yiti yùhú-yu, te ío quide cahnú-yu mée-yu, te quide-yu nándi-gá sá ñá túú tàú-yu cadá-yu. 23 Te nchaa sá cuèhé sá dúhá-áⁿ cécú nihnu-xi ìní-yu, te nchaa xiăⁿ quidé-xi ndècu cuéchi-yu, te ñá túú cùu-xi sá vâha sá cúú-xi ìní-yu.

*Íiⁿ ñadĩhí véxi ñuú xicá ní sándáá ìní-aⁿ Jèsús
(Mt. 15:21-28)*

24 Te ní xica Jèsús cuáháⁿ-gá ndéé yucu cue téé ñuú Tírú, ndihi yucu cue téé ñuú Sìdón. Te òré ní quexio-gá xiăⁿ te cuánguĩhu-gá ìⁿ vehe te xiăⁿ cundecu-gá, te cuení-gá sá vă quení ñáyiú sá xiăⁿ ndécú-gă ní cùu, dico dai ní níhí-yu tnúhu. 25 Te ìⁿ ñadĩhí ndécú ìⁿ déhe yoco-aⁿ, te yihí ñaha espíritú cundĩhí yucu ñávâha xii-xi, te ñaha-áⁿ ío ndihí ní níhí-aⁿ tnúhu sá nĩ quexio Jesús xiăⁿ nõu ní sáháⁿ-aⁿ núú

ndécú-gă, te ní ngüñí xítí-án nũú-gă. ²⁶ Te ní ngüita-aⁿ càháⁿ ndàhú-aⁿ núú-gă, te xăhaⁿ-aⁿ sã nũu yá cündèe iní-gá queñuhu-gá espíritú cündìhi yucu ñávãha yìhi ñaha xii déhe-aⁿ. Dico ñã díú ñàha israél cúú-áⁿ chi ñaha ñuú Sirofènicíá cúú-áⁿ te tnúhu griégú cúú tnúhu-aⁿ. ²⁷ Te xiãⁿ nũu ní xáhaⁿ Jèsús xii-aⁿ:

—Daña na caxi tnaa nchaa landú chítú xítí-güexi, te dătnùní caxi cue iná, chi ñã túú ndùu váha-xi queheⁿ-o sã xéxí landú te cuáha-o iná — cächí-gá xăhaⁿ-gă xii-aⁿ.

²⁸ Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhó landú — cächí-aⁿ xăhaⁿ-aⁿ xii-gá.

²⁹ Te Jèsús ní xáhaⁿ-gă xii-aⁿ:

—Ío váha ní càháⁿ-n, te cuanùhú te ñã túú-gă ná cani iní-n, chi sa ní quee espíritú cündìhi yucu ñávãha yìhi ñaha xii déhe-n — cächí-gá xăhaⁿ-gă xii-aⁿ.

³⁰ Te ñaha-áⁿ nĩ nasáá-aⁿ vehe-aⁿ te càa déhe-aⁿ núú cãmá, dico ñã túú-gă espíritú cündìhi yucu ñávãha yìhi ñaha xii-xi chi sa ní quee ñaha-xi.

Jèsús quidé tătna-gá ñã tée ñã cúú càháⁿ váha te doho-dě

³¹ Te Jèsús ní ndee-gá yucu cue tée ñuú Tírú te ní yáha-gá yucu cue tée ñuú Sidón, ndìhi yucu ndi ùxí ñuú nání Dècápolís, te ní sáá-gá ndéé yuhu làgúná distrítú Galileá.

³² Te xiãⁿ ndécú-gă ní quexìo ñáyiu ndéé núú-gă ndécã-yu ñã tée ñã cúú càháⁿ váha-dé te doho-dě. Te càháⁿ ndàhú-yu

núú-gă sá ná tëndaha ñaha-gá xii-dé cuendá ndúha-dé. ³³ Te Jèsús ní queñuhu ñaha-gá xii-dé tnuú-yu, te ndèca ñaha-gá cuáháⁿ ñã xio, te ní dáquihu-gá díquí ndáhá-gă yaú lóho-dé, te ní dácánùu-gá dí-gá díquí ndáhá-gă, te ní tendaha-gă yàa-dé. ³⁴ Te ní ndacoto-gá andiù te ní sánuu iní-gá, te ní càháⁿ-gá tnúhu mee-gă, te xăhaⁿ-gă:

—Ĭfatá! —cächí-gá xăhaⁿ-gă xii-dé.

Te tnúhu-áⁿ quée-xí: Nacaáⁿ yòhó lóho. ³⁵ Te òré-ni-áⁿ nĩ nacaáⁿ lóho-dé, te ní nduu váha yàa-dé, te ní cuu càháⁿ váha-dé. ³⁶ Te Jèsús ní càháⁿ víhí-gă dóho ñáyiu ndìhi ñaha xii tée ní quide tătna-gá-áⁿ sã vã yòo ñã cüñàhá-yu sá nĩ quide tătna ñaha-gă xii-dé, dico uuⁿ-gá ní quidé-yu ní càháⁿ-yu núú ñáyiu sá nĩ quide tătna-gá tée-áⁿ. ³⁷ Te nchaá-yu ío ní cuñúhu-yu, te ní xitnàhá-yu:

—Váha vîhi quide-dé, chi nchaa-ni ndàcu-dé quidé-dě, chi quide tătna-ni-dé ñáyiu doho, te quide tătna-ni-dé ñáyiu ñihí —cächí-yu xitnàhá-yu.

8

Jèsús dácàxi-gá cúmí mĩ ñáyiu

(Mt. 15:32-39)

¹ Te ñã nduu tucu ío cuéhé ñáyiu ní tacá núú ndécú Jèsús, te ñã túú tnàhí sá caxí-yu. Te ní cana-gá cue tée xica cuu ndìhi-gá, te ní xáhaⁿ-gă xii-güedé:

2 —Yúhú, cùndahú iní-í nchaa ñáyi-u-a chi sa ní cuu úní nduu ndècu ndihi ñahá-yu xii-o iha, te ñá túú tnàhí ná sá cáxi-yu.

3 Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndècú-yu — càchí-gá xăhaⁿ-gă xii-güedé.

4 Te ní xăhaⁿ-güedě xii-gá:

—¿Te ndèé níhí-ó să cuăñaha-o càxi nchaa ñáyi-u-a, te iha ñá túú nă ío chi cùu-xi xítí yucu-í? —càchí-güedé xăhaⁿ-güedě xii-gá.

5 Te Jèsús ní xícáⁿ tnúhú-gă núu-güedě, te xăhaⁿ-gă:

—¿Ná daha-gá pàá ndécú ndihi-ndo-í? —cachí-gá xăhaⁿ-gă xii-güedé.

Te ní xăhaⁿ-güedě xii-gá:

—Ndècu ndihi-ndí úsá-gá tnàhá —càchí-güedé xăhaⁿ-güedě xii-gá.

6 Te Jèsús ní xăhaⁿ-gă xii nchaa ñáyi-u sá ngóo-yu nchaa-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gă núú Yă Ndiöxí. Te dătnùní ní táhú cuèchi-gá te ní sãñaha-gă xii cue téé xica cuu ndihi-gá ní dăcăhñu-güedé nchaa ñáyi-u-áⁿ. 7 Te ndècu ndihi-güedé ìⁿ úú chácá lîhli, te diu-ni ducaⁿ nî quide-gá ní ndacáⁿ táhú-gă núú Yă Ndiöxí. Te dătnùní ní táúchíúⁿ-gă ní dăcăhñu ñaha-güedě xii-yu. 8 Te nchaa-yu ní xexí-yu ní ndahá xítí-yu. Te sátá nî túhú còhò-yu te ní nadatàcá-güedé nchaa sá nî quendóo, te

ní chítú úsá tnàhá tídihi mee-ni să nî quendóo-áⁿ.

9 Te núú ncháá ñáyi-u ní xexi-áⁿ xínu dătná cúmí mîl-yu. Te sátá nî yáha ní dăcáxí ñaha Jèsús xii-yu te ní dándácá ñaha-gá. 10 Te dătnùní cuánguee-gá bàrcú ndihi cue téé xica cuu ndihi-gá cuáháⁿ-gá ndihi-güedé yucu cue téé ñuú Dalmănutá.

Cue téé cùu fariséú xăhaⁿ-güedě xii Jèsús cada-gá ìⁿ sá vă yóo tnàhí ndàcu cada (Mt. 16:1-4; Lc. 12:54-56)

11 Te núú nî quexió Jèsús xíaⁿ nî sáá cue téé cùu fariséú, te ní ngúita-güedé nándi tnúhu xăhaⁿ-güedě xii-gá xító ndèé ñahá-güedě. Te xăhaⁿ-güedě sá ná cádá-gă ìⁿ sá vă yóo tnàhí ndàcu cada cundehe-güedé năcuáa cutnùní iní-güedé nūu ndáá sá Yă Ndiöxí ní tendaha ñaha-gá xii-gá véxi-gá ñuyíú-a. 12 Te ní sánuu iní-gá te ní xăhaⁿ-gă xii-güedé:

—Nchaa nchòhó ñáyi-u ndècu ñuyíú-a cuíní-ndó càda-í ìⁿ sá vă yóo tnàhí ndàcu cada nacuáa cutnùní iní-ndó nūu ndáá sá Yă Ndiöxí chindée ñaha-gá xii-í. Dico na càchí tnúhu ndáá-í xii-ndo să vă càda-í sá cuíní-ndó —càchí-gá xăhaⁿ-gă xii-güedé.

13 Te ní dándóo-gá ñáyi-u xîndecu-áⁿ, te cuándee-gá bàrcú ndihi cue téé xica cuu ndihi-gá te cuáháⁿ-gá ndihi-güedé ndàa ingá xio yuhu làgúná.

Năcuáa quide cue téé cùu fariséú

(Mt. 16:5-12)

14 Te ní cunaa-güedé canehe-güedé sá cáxí-güedé quíhíⁿ, te ñⁿdii-ni paá ndécú xítí bàrcú-áⁿ ní naníhí-güedé.

15 Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sã ïo quíhi iní-ndó cùndecu-ndo te vá cádá cuèndá tnàhí-ndo lèvadurá cue téé cùu fariséú, ndíhi levadurá cue téé cùndíhi té Hérodés —càchí-gá xáhaⁿ-gá xii-güedé.

16 Te ní ngüíta-güedé xitnàha-güedé:

—Cuèndá sá ñà túú ní cãnehe-o paá quixi núu xiãⁿ duha càháⁿ-gá —càchí-güedé xitnàha-güedé.

17 Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gá xii-güedé:

—¿Ná cuèndá da sá ñà túú ní cãnehe-ndo paá quixi càháⁿ-ndó? Te ñá díú cuèndá paá-áⁿ ní càháⁿ-í, te dicó-ni sá méé-ndó ñà túú quide cuendá váha-ndo nàcuáa ndùu tnúhu càháⁿ-í, te ni ñã tècú tnùní-ndó chí ïo ñi díquí-ndó.

18 Te cuèi ndèhe-ndo dico ñá túú cùtnuní iní-ndó nã cúú nchàa sá quidè-í, te cuèi ndédóho-ndo nchàa tnúhu càháⁿ-í dico ñá cùtnuní iní-ndó nãsa ndùu-xi, te ni ñã ndácú iní-ndó nchàa sá tá quide-í véxi.

19 Te chí dándàcu iní cùtnàhá ní táhú cuèchi-í úhúⁿ-ni paá te ní xexi úhúⁿ mĩl mee-ni cuè téé chí díu-ni cue téé-áⁿ ní quíúndehu. Te chí càchí tnúhu ná daha tídihi ní chítú mee-ni sã ñi

quendóo òré ní nadatàcá-ndó —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

Te xáhaⁿ tùcu-gá:

20 —Te cùtnàhá ní táhú cuèchi tucu-í úsá tnàhá paá ní xexi cúmí mĩl ñáyiú, te chí càchí tnúhu ná daha tucu tídihi ní chítú mee-ni sã ñi quendóo —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnúhu ní càháⁿ-í ãⁿ ñãhá? —càchí-gá xáhaⁿ-gá xii-güedé.

Jèsús quidé tãtna-gá ñⁿ téé cuáá ñuú Bètsaidá

22 Te Jèsús ní sáa-gá ndíhi cue téé xica cuu ndíhi-gá ñuú Bètsaidá. Te ñuú-áⁿ ndécú-gá ní quexio ñáyiú núú-gá tánèhé-yu ñⁿ téé cuáá, te càháⁿ ndàhú-yu núú-gá núu vá cùndèe iní-gá tendaha ñàha-gá xii-dé cuèndá ndúha núú-dé. 23 Te Jèsús ní tñi-gá ndaha téé cuáá-áⁿ, te ní queñuhu ñaha-gá tnuú-yu, te ndèca ñaha-gá cuáháⁿ ñⁿ xio yuhu ñuú. Te yàcáⁿ ní dácànùu-gá dí-gá núú-dé te ní tendaha ñàha-gá xii-dé, te dàtnuní ní xicáⁿ tnúhú-gá núú-dé, te xáhaⁿ-gá:

—¿Cùtnuní núú-n-ǎn? —
càchí-gá xǎhaⁿ-gǎ xii-dé.

24 Te téé cuáá-án ní ndonehe
núú-dě, te xǎhaⁿ-dě xii-gá:

—Cùtnuní núú-í ndéhè-í
nchaa cue téé-ǎn, dico dà
ndáa yutnu cui ndáa-güedé
te xìca-güedé —càchí-dé
xǎhaⁿ-dě xii-gá.

25 Te Jèsús ní tendaha
tùcu-gá núú-dě te ní cuu
ní ndacoto váha-gá-dé, te
òré-án ní ndúha núú-dě. Te
nchaandi túhú sá ndéhé-dé
ní cutnùní váha núú-dé nāndi
cùu nchaa xǎn. 26 Te ní xáhaⁿ
Jèsús xii-dé:

—Vitna te núhú-n, dico
ndáá ichi vehe-n nǎhú-n te
ñá díú dà xití ñuú quihíⁿ-n, te
vá yõ ñⁿ cúnaha-n sǎ yǎhú ní
quide tátna-í núú-n ní ndúha
—càchí-gá xǎhaⁿ-gǎ xii-dé.

*Té Pèlú xǎhaⁿ-dě xii Jèsús sá
díú-gǎ cúú-gǎ Crìstú*

(Mt. 16:13-20; Lc. 9:18-21)

27 Te Jèsús ní xica-gá
cuáháⁿ-gá ndihi cue téé xìca
cuu ndihi-gá nchaa ñuú líhli
càa ñuú Cèsareá Filipú, te òré
ñúhú-gǎ ndihi-güedé ichi te ní
xícáⁿ tnúhú-gǎ núú-güedé, te
xǎhaⁿ-gǎ xii-güedé:

—Chí càchí tnúhu nása
cáháⁿ ñáyi cuendá-í. ¿Yoo
cùu-í càchí-yu-va? —càchí-gá
xǎhaⁿ-gǎ xii-güedé.

28 Te ní xáhaⁿ-güedé xii-gá:

—Davá-yu càchí-yu sá
cúú-n ndii Juáá téé ní xóo
dacuàndute ñaha xii ñáyi, te
davá-yu càchí-yu sá cúú-n tē
Èliás, te dava tucú-yu càchí-yu
sá cúú-n ñⁿ téé ní xóo cáháⁿ
tnúhu Yá Ndiõxí ndéé sanaha,

duha càchí-yu —càchí-güedé
xǎhaⁿ-güedé xii-gá.

29 Te ní xícáⁿ tnúhú tùcu-gá
núú-güedé, te xǎhaⁿ-gǎ
xii-güedé:

—Te nchòhó, ¿yoo sàni
iní-ndó cùu-í-í? —càchí-gá
xǎhaⁿ-gǎ xii-güedé.

Te té Pèlú ní xáhaⁿ-dě xii-gá:

—Yòhó cúú-n Crìstú Yáa
ní tendaha Yá Ndiõxí véxi
ñuyú-a —càchí-dé xǎhaⁿ-dě
xii-gá.

30 Te Jèsús ní cáháⁿ-gá
dóho-güedé, te xǎhaⁿ-gá:

—Vá yõ ñⁿ cúnaha-ndo
yòo cuu-í —càchí-gá xǎhaⁿ-gǎ
xii-güedé.

*Jèsús cáháⁿ-gá sá cáhni
ñaha-güedé xii-gá*

(Mt. 16:21-28; Lc. 9:22-27)

31 Te Jèsús ní ngüíta-gá
xǎhúhu-gá cue téé xìca cuu
ndihi-gá nàcuáa yáha-gá, te
xǎhaⁿ-gǎ xii-güedé:

—Yúhú Téé cùu ñani
tnáhá-ndó nchàa-ndo chí ío
ndoho-í, chí daquèe tihú ñáhá
nchàa cue téé cùu sacuéhé
núú ñáyi israhél, ndihi cue
dútú cùnù, ndihi cue téé
dàcuaha ñaha xii ñáyi nchaa
tnúhu ní chídó tnùnì ní chídó
tnùnì ndii Moisés, nchaa cue
téé-án dàquee tihú ñáhá-güedé
xii-í. Te sáa nduu te cahni
ñaha-güedé xii-í, dico nduu
únì sá cùu-í tē ndoto-í —
càchí-gá xǎhaⁿ-gǎ xii-güedé.

32 Te ducaⁿ ní cáháⁿ
Jèsús núú cuè téé xìca cuu
ndihi-gá nàcuáa tecú tnùnì
váha-güedé tnúhu cáháⁿ-gá.
Te té Pèlú ní cana ñaha-dé
xii-gá ñⁿ xio, te ní ngüíta-dé
ténáa ñáhá-dé xii-gá ní cùu.

33 Dico Jèsús ndii-ni ní

nchócuĩhnu-gá ní ndàcoto-gá núú nchàa-güedé chi ndàa sàtá-gã xĩndecu-güedé, te ní ngüíta-gá ténàà-gá té Pèlú, te xàhaⁿ-gã xii-dé:

—¡Xocuiñí yòhó núú-í-a, chi dàtná càháⁿ yucu ñávãha càháⁿ-n! Chi ñá túú sàni iní-ò dàtná sàni iní Yã Ndiõxí, chi ñⁿ-ni sàni iní-ò ndihì dava-gá cue ñáyiu ndècu ñuyíú-a — càchí-gã xàhaⁿ-gã xii-dé.

³⁴ Te Jèsús ní cana-gá nchaa cue téé xica cuu ndihì-gá, ndihì nchaa ñáyiu xĩndecu-áⁿ, te ní xàhaⁿ-gã:

—Nchaa ñáyiu cuini chit-nahá ñáhá xii-í, te xini ñuhu-xi vá cáda-gã-yu sá sàni iní méè-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. ³⁵ Te nchaa ñáyiu cuini sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiu ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuendá-í, ndihì sá cuendá tnúhu-í, te ñáyiu-áⁿ naníhí tãhú-yu.

³⁶ Te cuèi nchaandi túhú sá ío ñuyíú-a na nihí ñáyiu cundecu ndihí-yu, dico núu ñu nchaa xíãⁿ ná càda cuíta nihnú-yu te ñá túú vèdana nandihì-xi sá dúcáⁿ ndècu ndihì-yu nchaa xíãⁿ. ³⁷ Te ni ñⁿ sá ío ñuyíú-a vá chindèe-xi ñáyiu cuendá naníhí tãhú-yu. ³⁸ Te nchaa ñáyiu na cùcahaⁿ núu-xi càháⁿ váha cuendá-í, ndihì cuendá tnúhu-í núu nchàa ñáyiu dàquee tihú ñáhá xii Yã Ndiõxí, ñáyiu xĩndecu ichi cuèhé ichi duha, te tnàhá

yùhú Téé cùu ñanì tnáhã-yu nchaa-yu cucahaⁿ núú-í núu-yu òré ná quixi tucu-í ndihì cue espíritú xínú cuèchi núu Tãtà-í Dútú Ndiõxí. Te mee-gã cada cutnùnì inì nchaa ñáyiu sá yùhú ío càhnu cuu-í.

9

¹ Te na càchí tnúhu ndáá-í xii-ndo sá ío dava nchòhó ñáyiu xĩndecu iha vitna vá cùu-ni-ndo, chi cundecu-ni-ndo ndéé quiní-ndó sáa nduu ndihu ndaha ñàha Yã Ndiõxí xii ñáyiu, te dàvã-áⁿ quiní-ndó sá ndácú-gã quidé-gã nchaandi túhú sá vãha —càchí-gã xàhaⁿ-gã xii cue téé xica cuu ndihì-gá ndihì cue ñáyiu-áⁿ.

Jèsús ní nadama dóo-gã ndihì núú-gã

(Mt. 17:1-13; Lc. 9:28-36)

² Te núu ñnú nduu sá dúcáⁿ ní càháⁿ Jèsús te ní xica-gã cuásaá-gã ñⁿ yucu dúcúⁿ, te ndèca-gá té Pèlú, ndihì té Jàcobó, ndihì té Juàá cuásaá, te únì tnàhì-ni cue téé-áⁿ ndécá-gã cuásaá. Te yucu-áⁿ ndécú-gã ní nadama núú-gã, ³ te ní nadama dóo-gã. Te dóo-gã-áⁿ sũúni ñ nduu cuixíⁿ quiyí te tãsaⁿ, te ni ñⁿ ñáyiu ñuyíú-a ñá túú ndácú-yu naqueté-yu ñⁿ dóo nduu cuixíⁿ dàtná ní nduu dóo-gã. ⁴ Te ní xiní-güedé té Moisés ndihì té Èliás nútñi-güedé ndihì-gá ndátnúhu ndihì ñaha-güedé xii-gã. ⁵ Te té Pèlú ní xàhaⁿ-dè xii Jèsús:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuvixiⁿ, te ìⁿ cuu cuèndá-n te ìⁿ cuu cuèndá té Moisés te ìⁿ cuu cuèndá té Èliás —càchí-dé xàhaⁿ-dè xii-gá.

⁶ Te ducaⁿ nǐ cáháⁿ-dé chi ío ní yùhú-güedé, te cuèndá-ní ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása ndùu tnúhu ní cáháⁿ-dé. ⁷ Te òré-áⁿ nǐ quexìo ìⁿ vícò nùú ndécú-güedé ndìhi Jèsús ní dádähu ñaha-xi xii-güedé ndìhi-gá, te xití vícò-áⁿ nǐ cáháⁿ Yä Ndiöxí ní tecú dóho-güedé, te xàhaⁿ-gä xii-güedé:

—Tée-a cùu-dé Déhe-í tée ío cùu iní-í, te cundedóho-ndo nchàa tnúhu càháⁿ-dé —càchí-gá xàhaⁿ-gä xii-güedé.

⁸ Te òré ní quide cuèndá-güedé, te ñá túú-gä ní xini-güedé cue tée úú-áⁿ chi mee-nä Jèsús ndécú.

⁹ Te òré cuánuu ndìhi ñaha-gä xii-güedé yucu-áⁿ, te ní cáháⁿ-gä dóho-güedé, te xàhaⁿ-gä:

—Vá yõ ìⁿ cùñaha-ndo nchàa sá nǐ xiní-ndó nùú nǐ sáá-ó-á, te cuu cáháⁿ-ndó dico ndéé ná yàha ndoto yúhú Tée cùu ñaní tnàhá-ndó nchàa-ndo sá cùú-í —càchí-gá xàhaⁿ-gä xii-güedé.

¹⁰ Núu xiáⁿ cue tée-áⁿ nǐ xúhuⁿ nahi-ní ìni-güedé nchaa sá nǐ xiní-güedé núú nǐ sáháⁿ-güedé ndìhi Jèsús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuèndá ducaⁿ nǐ cáháⁿ-gá sá ndèé ná yàha ndoto-gá sá cùú-gá te dātnuní cáháⁿ-güedé nācuāa ndùu

nchaa sá nǐ xiní-güedé. ¹¹ Te ní xicáⁿ tnúhú-güedé núú Jèsús, te xàhaⁿ-güedé xii-gá:

—¿Cuini-ndí cachí tnúhu-n nǎ cuèndá càchí cue tée dàcuaha ñaha xii ñáyiú nchaa tnúhu ní chídó tnùní ndíi Moisés sá dīhna-gá té Èliás ndixi-dé te dātnuní quixi Yáá tendaha Yä Ndiöxí quixi ñuyíú-a? —càchí-güedé xàhaⁿ-güedé xii-gá.

¹² Te Jèsús ní xàhaⁿ-gä:

—Ndáá sá códó nùu ìⁿ tée quixi-dé te cada-dé dātná ní quide té Èliás, te tée-áⁿ cada ndáá-dé nchaa nācuāa cùu. Dico núú tütú Yä Ndiöxí càháⁿ-xi cuèndá yúhú Tée cùu ñaní tnàhá-ndó nchàa-ndo sá ío ndoho-í, te daquèe tihú ñáhá ñáyiú xii-í. ¹³ Te na càchí tnúhu-í xii-ndo vitna sá sá ní quixi ìⁿ tée ní quide dātná ní xóo cada té Èliás, te cue ñáyiú ñá túú ní cānehé-yu sá yíñùhu núú-dé, te ní quide ñáhá-yu xii-dé nchaa nācuāa ní quixi iní mēé-yu. Te núú tütú Yä Ndiöxí sa ndèé tnuní nchaa nācuāa yáha-dé, te nchaa xiáⁿ sa ní quide ñaha ñáyiú xii-dé —càchí-gá xàhaⁿ-gä xii-güedé.

Jèsús quidé tātna-gá ìⁿ tée cuechi yihí ñaha espíritú cundìhi yucu ñávāha

(Mt. 17:14-21; Lc. 9:37-43)

¹⁴ Te Jèsús ní ndexìo-gá ndìhi cue tée úní-áⁿ nùú xīndecu dava-gá cue tée xica cuu ndìhi-gá, te vāi vihi ñáyiú ndècu núú ndécú-güedé-áⁿ, te tnàhá cue tée dàcuaha ñaha xii-yu nchaa tnúhu ní chídó tnùní ndíi Moisés xīndecu, te cue tée-áⁿ nāndi tnúhu

xãhaⁿ-güedë xii cue tée xica cuu ndihi Jesús. ¹⁵ Te òré ní xiní-yu ní ndexìo-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihi ñáhá-yu xii-gá. ¹⁶ Te ní xicáⁿ tnúhú-gã núú cuè tée xica cuu ndihi-gá nõu ná tnúhu ndàtnúhu-güedé ndihi cue tée-áⁿ. ¹⁷ Te ìⁿ ñáyiu xindecu xíáⁿ nĩ xáhãⁿ-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cùndìhi yucu ñávãha xii-dé, te diu xíáⁿ ní quide ní cuu ñìhí-dé. ¹⁸ Te ío ndòho-dé chi súúní ndèni ní cuu ngòtni ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nõhu-dé, te ndàda ruúⁿ ñáhá-xí xii-dé. Te sa ní xáhãⁿ-í xii cue tée xica cuu ndihi-n sá queñúhu-güedé espíritú cùndìhi yucu ñávãha yìhi ñaha xii-dé dico ñá túú ní ndàcu-güedé queñúhu-güedé-xi —càchí ñáyiu-áⁿ xáhãⁿ-yu xii-gá.

¹⁹ Te Jèsús ní xáhãⁿ-gã:

—¡Nchaa nchòhó ñáyiu ndècu ñuyíú-a ío sàá iní-ndó, chi ñá túú cuíní-ndó quìndáá iní-ndó Yã Ndiõxí, te ní cuu vài nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gã cada-ndo-i? Te chí cándèca tée cùhú-áⁿ táquxi iha —cachí-gá xáhãⁿ-gã xii-yu.

²⁰ Te ñáyiu ndihi ñaha xii tée yìhi ñaha espíritú cùndìhi yucu ñávãha-áⁿ

ndécá ñáhá-yu xii-dé cuáháⁿ ndéé núú Jèsús, te òré ní xiní ñáhá espíritú cùndìhi yucu ñávãha-áⁿ xii-gá, te ní ngüíta-ni-xi sàhni yìhí ñáhá tucu-xi xii-dé, te ní dánduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. ²¹ Te Jèsús ní xicáⁿ tnúhú-gã núú tãtá-dé, te xáhãⁿ-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáhãⁿ-gã xii-dé.

Te tée-áⁿ nĩ xáhãⁿ-dè xii-gá:

—Ndéé cùtnáhá cúú líhli-dé ní ngüíta espíritú cùndìhi yucu ñávãha duha quide ñaha-xi xii-dé. ²² Te ní cùtítñí xito dàngaunihnu ñaha-xi xii-dé núú ñùhú, te ní cutítñí tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tátna-n-dé, te cundàhú iní ñáhá-n xii-ndí chindee ñaha-n —cachí-dé xáhãⁿ-dè xii-gá.

²³ Te Jèsús ní xáhãⁿ-gã:

—Te ná cuendá cachí-n nõu ndacu-í cada tátna-í déhe-n, chi nchaa ñáyiu na quìndáá iní ñáhá xii-í te nihí-yu sá ná càcáⁿ-yu núú-í —càchí-gá xáhãⁿ-gã xii-dé.

²⁴ Te tãtá tée cuechi-ãⁿ ñìhi ní cáháⁿ-dè xáhãⁿ-dè xii-gá:

—Sàndáá iní ñáhà-í xii-n, dico chindee ñaha xii-í cuendá ná quìndáá iní ñáhá-gã-í xii-n —càchí-dé xáhãⁿ-dè xii-gá.

²⁵ Te Jèsús ndéhé-gã sá ìo vài ñáyiu ta tàcá núú ndécú-gã-áⁿ. Te ní tenàá-gá espíritú cùndìhi

yucu ñávãha-án, te xãhaⁿ-gã xii-xi:

—Yòhó espíritú cúndìhi yucu ñávãha, ní quide ñìhì-n ñì quide doho-n tée-a, dico vitna yúhú càchí-í sá quéé-n yìqui cuñú-dé te vá ndìhu-gá-n —càchí-gá xãhaⁿ-gã xii espíritú cúndìhi yucu ñávãha-án.

²⁶ Te espíritú cúndìhi yucu ñávãha-án ñì dácáná sàa ñaha-xi xii tée-án, te ní sahnì yìhì ñáhá tùcu-xi xii-dé, te dàtnùnì ní quee ñaha-xi xii-dé cuáháⁿ-xi, dico tée-án chi dacàa-ni ndíyi càa-dé cátùu-dé. Te nchaa ñáyiu xĩndecu xíaⁿ càchí-yu sá ñì xíhì-dé ní cùu. ²⁷ Te Jèsús ní tn̄i-gá ndaha-dé ní ndocani ñaha-gã xii-dé, te ní ndacóo-dé ní nucúnutn̄i-dé.

²⁸ Te Jèsús cuándihu-gá xití vehe ndìhi cue tée xica cuu ndìhi-gá, te òré ndéhé-güedé ñá túú-gã ñáyiu, te ní xícáⁿ tnúhú-güedé núú-gã, te xãhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cúndìhi yucu ñávãha yìhì ñaha xii tée-án —càchí-güedé xãhaⁿ-güedé xii-gá.

²⁹ Te Jèsús ní xãhaⁿ-gã xii-güedé:

—Na càchí tnúhu-í xii-ndo sã nũu òré cuiní-ndó queñuhu-ndo espíritú cúndìhi yucu ñávãha yìhì ñaha xii ñáyiu dàtná cúu espíritú cúndìhi-xi yìhì ñaha xii tée-án ní cùu ña, te xini ñuhu-xi sá ïo cáháⁿ ndìhi-ndo Yá Ndiöxí

te ñá túú tnàhí ná caxi-ndo cáháⁿ ndìhi-ndo-gã, te ducaⁿ te ndacu-ndo queñuhu-ndo espíritú cúndìhi yucu ñávãha yìhì ñaha xii ñáyiu —càchí-gá xãhaⁿ-gã xii-güedé.

Jèsús cáháⁿ tucu-gá sá cáhni ñaha-güedé xii-gá

(Mt. 17:22-23; Lc. 9:43-45)

³⁰ Te Jèsús ní quee-gá núu ndécú-gã-án ndìhi cue tée xica cuu ndìhi-gá cuáháⁿ-gá ndìhi-güedé distrítú Galileá, te cuiní-gá sá vã quiní ñáyiu ndéé ichi cuáháⁿ-gá. ³¹ Te ducaⁿ ñì sani iní-gá, chi mee-gã sa naha-gá sá ndàá cada-xi nàcuáa xãhaⁿ-gã xii cue tée xica cuu ndìhi-gá, te duha xãhaⁿ-gã xii-güedé:

—Yúhú Tée cùu ñani tnáhá-ndó nchaa-ndo sáá ïiⁿ nduu te cuáha cuendá ñáhá-güedé xii-í núu cuè tée cùu úhú iní ñáhá, te cahni ñaha-güedé xii-í, dico nduu únì sá cùu-í te ndoto-í —càchí-gá xãhaⁿ-gã xii-güedé.

³² Dico ñá túú tnàhí ní tècú tnùnì-güedé nása ndùu tnúhu ní cáháⁿ-gá, te ní ñà túú ní cùyi-güedé cacáⁿ tnúhú-güedé núú-gá.

Cue tée ndücu tnúhu núu tnáhá nũu ndédacàa-güedé ïo-gá cúnùu

(Mt. 18:1-5; Lc. 9:46-48)

³³ Te Jèsús ní quexìo-gá ndìhi cue tée xica cuu ndìhi-gá ñuú Capèrnaúm, te òré sa ndècu-gá ïiⁿ vehe te ní xícáⁿ tnúhú-gã núú-güedé, te xãhaⁿ-gã xii-güedé:

—¿Nándi cùu tnúhu ta xitnaha-ndo véxi? —càchí-gá xãhaⁿ-gã xii-güedé.

³⁴ Dico ñá túú tnàhí ní cǎháⁿ-güedé cúñaha-güedé xii-gá nũu ná tnúhu xitnaha-güedé òré ñúhú-güedé ichi. Te ducaⁿ ní quide-güedé chi cuendá tá ndàtnúhu-güedé nũu ndëdacàa-güedé ío-gá cúnũu. ³⁵ Te Jèsús ní ngóo-gá, te ní xáhaⁿ-gǎ xii ndi ùxúú cue téé xica cuu ndihí-gá:

—Chí táquixi iha te cund-edóho-ndo tnúhu na cǎháⁿ-í-a. Te núu ío dava-ndo cuíní-ndó cúnũu-ndo, te cada-ndo sǎ cúú-ndó ñáyiu nchícúⁿ cuí-nǎ, te cunu cuechi-ndo nũú tnàha ñáyiu-ndo — cǎchí-gá xáhaⁿ-gǎ xii-güedé.

³⁶ Te Jèsús ní sanutnǎ-gá ñⁿ té líhli cuádava tnuú-güedé, te dàtnúní ní nguídèhé ñáhá-gǎ xii-dé, te xáhaⁿ-gǎ xii-güedé:

³⁷ —Nchaa ñáyiu na quèheⁿ cuendá ñⁿ té líhli dàtná té líhli-a cuendá sǎ ñúhú íní ñáhá-yu xii-í ñá, te cada íní-yu sǎ yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í te ñá díú-ní mèe-í ní quèheⁿ cuendá-yu, chi tnàhá Tǎtà-í Dútú Ndióxi Yaá ní tendaha ñàha xii-í véxi-í ñuyíú-a ní queheⁿ cuendá-yu —cǎchí-gá xáhaⁿ-gǎ xii-güedé.

Nchaa ñáyiu ñá túú cùu úhú íní ñáhá xii-o te cùndihí ñáhá-yu (Mt. 10:42; Lc. 9:49-50)

³⁸ Te té Juáá diu-ni ñⁿ téé xica cuu ndihí-gá ní xáhaⁿ-dë xii-gá:

—Mèstrú, ní xiní-ndí ñⁿ téé cǎcunehe ñaha-dé xii-n, te quèñuhu-dé espíritú cùndihí yucu ñávàha yíhi ñaha xii

ñáyiu, te nchúhú ñá túú ní dàña-gá-ndí ducaⁿ cǎda-dé, chi ñá túú xica cuu ndihí ñaha-dé xii-o —cǎchí-dé xáhaⁿ-dë xii-gá.

³⁹ Te Jèsús ní xáhaⁿ-gǎ xii-güedé:

—Daña-ndo na cǎda nahi-dé ní cùu, chi ñá túú ní ñⁿ ñáyiu ndihí ndihí-ni ndacu cǎháⁿ cuèhé cuendá-í te núu cǎcunehe ñáhá-yu xii-í, te quidè-yu sǎ vǎ yóo tnàhí ndacu cada. ⁴⁰ Te nchaa ñáyiu ñá túú cùu úhú íní ñáhá xii-o te cùndihí ñáhá-yu. ⁴¹ Te na cǎchí tnúhu-í xii-ndo sǎ cuè ñáyiu na tàxi ñⁿ yaxiⁿ ndute coho-ndo cuendá sǎ cúú-ndó cuè téé xica cuu ndihí-í, te ñáyiu-áⁿ sǎá nduu te dacuèí sǎ nihí-yu sǎ ndúú tǎhũ-yu — cǎchí-gá xáhaⁿ-gǎ xii-güedé.

Cada cuendá-ó vǎ cùndècu-o ichi cuehé ichi duha (Mt. 18:6-9; Lc. 17:1-2)

⁴² Te xáhaⁿ tùcu Jesús xii-güedé:

—Te núu ñⁿ téé na dàcǎháⁿ-dé cue ñáyiu sǎndáá íní ñáhá xii-í cadá-yu nándi sǎ cuèhé sǎ dúhá, te váha-gá sǎ nũu na dàcutu ndeé-güedé ñⁿ yúú yódó dǔcúⁿ-dë, te dàquée ñaha-güedé xii-dé xití ndute lámár, te ñá díú sǎ cùndècu-dé ducaⁿ cǎda-dé. ⁴³ Te núu ñⁿ xio ndaha-ndo quide-xi quide-ndo nándi sǎ cuèhé sǎ dúhá, te quehndé-ndó cuíta-xi, chi váha-gá sǎ nánihí tǎhú-ndó cuèi na cuíta ñⁿ xio ndaha-ndo te ñá díú sǎ quihíⁿ-ndó nihíí ní ndúú-ndó nũú ùhú núú ndàhú núú dicó sǎá ndáhá itá ñuhú ní caa ní quihíⁿ. ⁴⁴ Chi yácáⁿ

10

cúu-xí nũú ñà túú tnàhí ndàhvá ñuhú, te ío ndoho-ndo cundeacu-ndo xíaⁿ ni caa ni quíhíⁿ. 45 Te núu ìⁿ xio sáhá-ndó quide-xi quide-ndo nándi sá cuéhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ìⁿ xio sáhá-ndó, te ñá díú sã quíhíⁿ-ndó ñihí ní ndúú-ndó nũú ùhú núú ndàhú núú dicó sàà ndáhá ìtá ñuhú ni caa ni quíhíⁿ. 46 Chi yàcáⁿ ñá túú tnàhí ndàhvá ñuhú, te ío ndoho-ndo cundeacu-ndo xíaⁿ ni caa ni quíhíⁿ. 47 Te núu ìⁿ xio tinùu-ndo quide-xi quide-ndo nándi sá cuéhé sá dúhá, te tava-ndo cuíta-xi, chi váha-gá sá cundeacu-ndo núú ndécú Yã Ndiõxí táxi tnùní-gá cuèi na cuíta ìⁿ xio tinùu-ndo, te ñá díú sã ndi nduú xio núú-ndó quíhíⁿ-ndó núú ùhú núú ndàhú. 48 Chi yàcáⁿ ñá túú tnàhí ndàhvá ñuhú, te ío ndoho-ndo cundeacu-ndo xíaⁿ ni caa ni quíhíⁿ.

49 Te dàtná quidé-güedé quiti sãhni-güedé chihí-güedé cuñú-di ñí te dàquée-güedé núú ñuhú, ducaⁿ sãtnahá-xi ndoho cue ñáyiú chi ío ndohó-yu. 50 Te ñí chi ío váha nãndíhi-xi, dico núu na ndùu víxiⁿ-xi te ñá túú-gã nándíhi-xi te ni ñà túú-gã nása cada-o ndùu úhá tucu-xi. Te ío váha cada cuendá-ndó nãcuáa cundeacu-ndo cuendá cuu-ndo ñáyiú váha, te ducaⁿ te cuu-ndo dàtná ñí sã ñà túú ndùu víxiⁿ, te ío váha cundeacu ndihí tnàha-ndo —cachí-gá xáhaⁿ-gã xii-güedé.

Jèsús càháⁿ-gá cuendá cue ñáyiú dàña tnaha

(Mt. 19:1-12; Lc. 16:18)

1 Te Jèsús ní xica-gá cuáháⁿ-gá ní yáha-gá yucu distrítú Jüdeá ní téhndé-gá ndàa ingá xio yúte Jòrdán. Te yàcáⁿ ndécú-gã ní tacá tucu cuéhé víhi ñáyiú, te ní ngúita-ni tucu-gá dánèhé ñáhá-gã xii-yu tnúhu-gá chi ducaⁿ tnàhí quide-gá. 2 Te ní quèxio ìⁿ úú cue téé cùu fariséú núú ndécú Jèsús xito ndèé ñáhá-güedé xii-gá nũu nása cunduu tnúhu càháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núú-n nũu cuu dàña ìⁿ téé ñadíhí-dé àⁿ ñáhá —càchí-güedé xáhaⁿ-güedé xii-gá.

3 Te Jèsús ní xáhaⁿ-gã xii-güedé:

—Te nchòhó, ¿nása ní cachí ndí Moisés cada-ndo-i? —càchí-gá xáhaⁿ-gã xii-güedé.

4 Te ní xáhaⁿ-güedé xii-gá:

—Ndí Moisés ní cachí ndí sá cúú dàña ìⁿ téé ñadíhí-dé dicó-ni sá cadúha-dé ìⁿ tutú cuãñaha-dé, te núú tütú-àⁿ codo tnùní sá ní dàña ñàha-dé, te ducaⁿ te cuu dàña-dé ñadíhí-dé —càchí-güedé xáhaⁿ-güedé xii-gá.

5 Te Jèsús ní xáhaⁿ-gã xii-güedé:

—Te ducaⁿ ní chídó tnùní ndí Moisés cada-ndo cuendá sá ío sàà ini-ndó. 6 Dico Yã Ndiõxí cútñáhá ní cadúha-gã ñuyú ndihí nchaa sá ío, chi téé ñadíhí ní cadúha-gá.

7 Te xíaⁿ nũu nchaa cue

tée na nihí ñadìhí-xi, te dínⁿ-ná cada-güedé tátá-güedé ndihi náná-güedé, chi mee-ná ñadìhí-güedé cuu cuu ndihi-güedé. ⁸ Te cue ñáyiú úú-án ñà túú-gă ndí dííⁿ ndí dííⁿ yìquì cuñú cúŭ-yu, chi cada iní-ndó sǎ ííⁿ-ná yìquì cuñú cúŭ-yu. ⁹ Te xǎⁿ nũ ñá túú ndũ váha-xi daña cuè tée ñadìhí-güedé, chi mee Yá Ndiõxí ní cachí-gá sá cúú ũú-yu cundecú-yu ndéé naa ndéé cuú-yu —càchí-gá xǎhaⁿ-gǎ xii-güedé.

¹⁰ Te òré yíhí Jèsús ndihi cue tée xica cuu ndihi-gá vehe, te ní xícáⁿ tnúhú-güedé núú-gǎ nása ndũu tnúhu ní cáháⁿ-gá cuendá cue ñáyiú daña tnaha. ¹¹ Te Jèsús ní xǎhaⁿ-gǎ xii-güedé:

—Te núu ííⁿ tée na dàña-dé ñadìhí-dé te naqueheⁿ-dé ingá ñadìhí, te ío nèhé quidé-dé, te ííⁿ-ni cuèchi cùu-xi ndihi cuèchi quide tée ndèca ñadìhí te càháⁿ ndihi-dé ingá ñadìhí. ¹² Te diu-ni ducaⁿ sǎtnahá-xi cùu tucu ñáyiú dìhí te núu na dàñá-yu yí-yu te naquehéⁿ-yu ingá tée, chi ííⁿ-ni cuèchi cùu-xi sá quidé-yu ndihi sá quidé cuè ñáyiú dìhí ndécú yì-xi, te càháⁿ ndihí-yu ingá tée —càchí-gá xǎhaⁿ-gǎ xii-yu.

Jèsús xícáⁿ táhú-gǎ núú Yá Ndiõxí cuendá landú
(Mt. 19:13-15; Lc. 18:15-17)

¹³ Te ííⁿ ũú ñáyiú ndècá-yu landú líhli cuáháⁿ núú Jèsús, chi cuíní-yu sá

téndàha ñaha-gá xii-güexi. Te cue tée xica cuu ndihi-gá ní ngúita-güedé ténáá ñáhá-güedé xii-yu, te xǎhaⁿ-güedé sá vǎ dúcáⁿ càdá-yu. ¹⁴ Te òré ní xiní-gá sá dúcáⁿ quide-güedé, te ní cudééⁿ-gǎ núú-güedé, te xǎhaⁿ-gǎ xii-güedé:

—Chí dáñá ná quixi nahi cue landú líhli-án nũú-í-a te vá càdí-ndó ìchi-güexi, chi dàtná cúú váha iní cue landú líhli-án ducaⁿ cùu váha iní cue ñáyiú yìndaha Yá Ndiõxí. ¹⁵ Te na càchí tnúhu ndáá-í xii-ndo sǎ nũu vá quindáá iní ñáhá-ndó dàtná quidé cuè landú líhli sàndáá iní ñáhá xii-í, te vá ndíhu ndaha ñaha Yá Ndiõxí xii-ndo —càchí-gá xǎhaⁿ-gǎ xii-güedé.

¹⁶ Te sátá dúcáⁿ ní xǎhaⁿ-gǎ te ní nguídèhé-gá cue landú-án te ní tendaha ñaha-gá xii-güexi, te ní xícáⁿ táhú-gǎ núú Yá Ndiõxí cuendá-güexi.

Ííⁿ tée cuica càháⁿ ndihi-dé Jèsús

(Mt. 19:16-30; Lc. 18:18-30)

¹⁷ Te òré sa ñũhu ichi Jèsús caca-gá quíhíⁿ-gá ingá xichi ní cùu ní quexìo cunu ííⁿ tée ní ngúíñí xítí-dé núú-gǎ, te xǎhaⁿ-dè xii-gá:

—Yòhó Mèstrú, cùu-n tée ío váha iní-xi, te cuíní-í nũu vá cùndèe iní-n càchí tnúhu-n ná cúú sǎ càdà-í cuendá nduu táhú-í cundecu-í ndihí Yá Ndiõxí ní caa ní quíhíⁿ —càchí-dé xǎhaⁿ-dè xii-gá.

¹⁸ Te Jèsús ní xǎhaⁿ-gǎ xii-dé:

—¿Te cùtnuní iní-n nàcuáa ndùu tnúhu càháⁿ-n sã yùhú váha iní-ãⁿ? Chi ìⁿdii díí-ni Yá Ndiõxí ío váha iní-gá. ¹⁹ Te yòhó xìní-n nàcuáa ní cachí Yã Ndiõxí cada ñáyiú, te duha ní cachí-gá: “Nchòhó cue téé vá càháⁿ ndihi-ndo ñàdihí te núu ñá díú ñàdihí-ndó cúú-yu, te ducaⁿ-ni nchòhó cue ñáyiú dihi tucu vá càháⁿ ndihi-ndo tée te núu ñá díú yì-ndo cuu-güedé, te vá cáhni-ndó tnàha ñáyiú-ndo, te ni vã dúhú-ndó sã ndécú ndihí-yu, te ni vã dácàcu-ndo cuéchi neñùú sá cúú-xí tnàha ñáyiú-ndo, te ni vã dácuàndehnde-ndo, te canehe-ndo sã yíñùhu núú tãtá-ndó ndihí núú nãná-ndó”, duha ní cachí Yã Ndiõxí cada ñáyiú —càchí-gá xãhaⁿ-gã xii-dé.

²⁰ Te téé-áⁿ ñí xãhaⁿ-dë xii-gá:

—Mèstrú, nchaa xíãⁿ ní ngúíta-í quidè-í ndéé cútnàhá cúú làndú-í —càchí-dé xãhaⁿ-dë xii-gá.

²¹ Te Jèsús ní xíndéhé ñàha váha-gá xii-dé, te ní cuu váha iní ñáhá-gã, te ní xãhaⁿ-gã xii-dé:

—Dico cùmání ìngá núú sã cádá-n. Vitna te quihíⁿ-n te dico-n nchaa sã ndécú ndihí-n, te díhúⁿ-n cuãha táhú-n cuè ñáyiú ndàhú. Te ducaⁿ, te nduu táhú-n nùcúndecu váha-n núú ndécú Yã Ndiõxí táxí tnùní-gá, te sátá ná yãha ducaⁿ càda-n, te quixi-n chìtnahá ñáhá-n xii-í cuèi na ndòho-n datná

ndòho-í —càchí-gá xãhaⁿ-gã xii-dé.

²² Te sá dúcáⁿ ñí xãhaⁿ Jèsús xii-dé te ío ní cundiyí-dé chi ío cuica-dë, te ní xica-dé cuánuhú-dé.

²³ Te ní ndacoto-gá ni càndéé dihi-gá, te ní xãhaⁿ-gã xii cue téé xica cuu ndihí-gá:

—Cue ñáyiú cuica chi ío úhú quíndáá iní-yu Yá Ndiõxí cuendá ndíhu ndaha ñàha-gá xii-yu —càchí-gá xãhaⁿ-gã xii-güedé.

²⁴ Te cue téé xica cuu ndihí-gá-áⁿ ío ní cuñúhu-güedé nàcuáa ní càháⁿ-gã, te ní xãhaⁿ tùcu-gá xii-güedé:

—Nchòhó cue téé xica cuu ndihí-í cachí tnúhu tucu-í xii-ndo sã ío úhú quíndáá iní cue ñáyiú cuica Yã Ndiõxí cuendá ndíhu ndaha ñàha-gá xii-yu, chi sàni iní-yu sã ncháá sã ndécú ndihí-yu dácàcu nihnu ñaha-xi xii-yu núú ùhú núú ndàhú. ²⁵ Te yáchí-gá yãha ìⁿ càméyu yaú ìⁿ yiqui ticú dàcúxí sã quíndáá iní ìⁿ ñáyiú cuica Yã Ndiõxí cuendá ndíhu ndaha ñàha-gá xii-yu —càchí-gá xãhaⁿ-gã xii-güedé.

²⁶ Te cue téé xica cuu ndihí-gá ní cuñúhu vihi-gá-güedé sá dúcáⁿ ñí càháⁿ-gã, te ní ngúíta-güedé xitnàha-güedé:

—¿Te yoo sa ndacu naníhí tàhú te núu ducaⁿ vãíⁿ? —càchí-güedé xitnàha-güedé.

²⁷ Te Jèsús ní xíndéhé váha ñaha-gã xii-güedé, te ní xãhaⁿ-gã:

—Nchaa ñáyiú ñuyíú-a chi vá ndácũ-yu ná cadá-yu nàcuáa ndíhu ndaha ñàha Yá Ndiõxí xii-yu, dico mee-gã chi ndacu-gá ndíhu ndaha ñàha-gá xii-yu, chi nchaandi túhú sá vãha ndacu-gá quidé-gã —càchí-gá xãhaⁿ-gã xii-güedé.

²⁸ Te té Pèlú ní xáhaⁿ-dë xii-gá:

—Nchúhú ní dándõo-ndí nchaandi túhú sá ndécú ndíhi-ndí te ní tuha ñàha-ndí xii-n —càchí-dé xãhaⁿ-dë xii-gá.

²⁹ Te Jèsús ní xáhaⁿ-gã xii-dé:

—Na càchí tnúhu ndáá-í xii-ndo sã ncháá ñáyiú na dándõo vehe-xi, àdi ñaní-xi, cúha-xi, tãtá-xi, nãná-xi, déhe-xi, àdi ñuhu-xi, te núu ducaⁿ na cadá-yu sá cuendá-í ndíhi sá cuendá tnúhu-í, ³⁰ te ío-gã cuéhé sã cuãñaha Yá Ndiõxí cundecu ndíhi-yu, chi níhí-yu vehé-yu, ñuhú-yu, ñaní-yu, cúha-yu, nãná-yu, déhe-yu, te ñá díú-ní sã nchàa xíãⁿ níhí-yu cundecu ndíhi-yu, chi tnàhá nduu táhũ-yu cundecu ndíhi ñàhá-yu xii-í ni caa ni quíhíⁿ ná sàá nduu. Dico díhna-gá ndoho tnahá-yu núú ñuyíú-a sá cuendá-í. ³¹ Te dava ñáyiú cùnuu ndecu ichi Yá Ndiõxí vitna, ñáyiú-áⁿ sãá nduu te vá ío-gã cunúu-yu dàtná cúnúu-yu vitna, te dava ñáyiú nchicúⁿ ñá túú cùnuu vitna ñáyiú-áⁿ sãá nduu te ío cunúu-yu —càchí-gá xãhaⁿ-gã xii-güedé.

Jèsús càháⁿ tucu-gá sá cáhni ñàha-güedé xii-gá

(Mt. 20:17-19; Lc. 18:31-34)

³² Te ñuhu Jèsús ichi ndíhi cue téé xica cuu ndíhi-gá cuásaá ndíhi ñàha-gã xii-güedé ñúú Jerusàlén, te yòdo nuu-gá núú-güedé cuásaá. Te cue téé-áⁿ xicũñuhu-güedé sá dúcáⁿ cuáháⁿ-gá ñúú Jerusàlén, te dava cue ñáyiú xinchícúⁿ xiyùhú-yu. Te ní taudíⁿ-gá ndí ùxúú cue téé xica cuu ndíhi-gá, te ní ngúíta-gá cání-gã cuendú núú-güedé nchaa nàcuáa yáha-gá. ³³ Te xãhaⁿ-gã xii-güedé:

—Vitna ñuhu-o ichi cuásaá-ó ñúú Jerusàlén, te yácáⁿ cuáha cuendá ñàhá-güedé xii yúhú Téé cùu ñaní tnàhá-ndó nchàa-ndo núú cuè téé cùu dútú cúnúu, ndíhi núú cuè téé dàcuaha ñàha xii ñáyiú nchaa tnúhu ní chídó tnùní ndí Moisés. Te díu cue téé-áⁿ cuñaha-güedé xii dava-gá cue téé sá cáhni ñàha-güedé xii-í, te cuáha cuendá ñàhá-güedé xii-í núú cuè téé ñá túú cùu cue téé isràél. ³⁴ Te cue téé-áⁿ cudíquí ndeé ñàhá-güedé xii-í, te caniha-güedé ndíhi ñí, te tíú díí ñàhá-güedé, te cahni ñàha-güedé xii-í dico nduu úní sá cùú-í te ndoto-í —càchí-gá xãhaⁿ-gã xii-güedé.

Té Jàcobó ndíhi té Juàá càháⁿ ndàhú-güedé núú Jèsús sá cadá-gã ñí sá cuini-güedé

(Mt. 20:20-28)

³⁵ Te cue déhe té Zebèdeú té Jàcobó ndíhi té Juàá ní

quexìo-güedé núú Jèsús, te xăhaⁿ-güedě xii-gá:

—Mèstrú, véxi-ndí càháⁿ ndàhú-ndí núú-n nŭu vá cündèe iní-n càda-n ìⁿ sá cuìní-ndí —càchí-güedé xăhaⁿ-güedě xii-gá.

36 Te Jèsús ní xícáⁿ tnúhú-gă núú-güedě, te xăhaⁿ-gă:

—¿Ná cúú să cuìní-ndó càda-í-i? —càchí-gă xăhaⁿ-gă xii-güedě.

37 Te ní xăhaⁿ-güedě xii-gá:

—Cuìní-ndí sá òré ná sáá nduu cùndecu-n núú táxí tnùnín-n, te ìⁿ-ndí cunucóo-ndí xio cùha-n te ìⁿ-ndí cunucóo-ndí xio dátni-n —cachi-güedé xăhaⁿ-güedě xii-gá.

38 Te Jèsús ní xăhaⁿ-gă xii-güedě:

—Nchòhó, ñá túú cùtnuní iní-ndó năcuáa ndùu sá xícáⁿ-ndó núú-í. ¿Te náa cundee iní-ndó dândoho ñaha ñáyiu xii-ndo dátiná dandòho ñahá-yu xii-í, te cundee tùcu iní-ndó càhni ñahá-yu xii-ndo dátiná cahni ñahá-yu xii-í-ăⁿ? —càchí-gă xăhaⁿ-gă xii-güedě.

39 Te ní xăhaⁿ-güedě xii-gá:

—Cundee iní-ndí yăha-ndí ncha năcuáa càháⁿ-n-ăⁿ —càchí-güedé xăhaⁿ-güedě xii-gá.

Te Jèsús ní xăhaⁿ-gă xii-güedě:

—Ndáá sá cündèe iní-ndó ndòho-ndo ncha nacuáa ndoho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í.

40 Dico sá dúcáⁿ cuìní-ndó să ìⁿ-ndó cùnucóo-ndo xìo cuha-í te ìⁿ-ndo cùnucóo-ndo xìo datni-í, te xăⁿ chi ñá díú

yúhú tàú-í cachí-í te núú sá cúú cùnucóo-ndo àdi sá vă cúú cùnucóo-ndo, chi mee Tătà-í Dútú Ndiòxí cachí-gá te núú ná cúú ñáyiu nduu táhú cunucóo dìñi-í dàvâ-ăⁿ —càchí-gă xăhaⁿ-gă xii-güedě.

41 Te òré ní níhí ùxi-gă cue tée xica cuu ndihi-gă tnúhu năcuáa ndùu sá cuìní té Jăcobó ndihi ñani-dé té Juáá, te ní cudééⁿ-güedě núú cuè tée úú-ăⁿ. 42 Te Jèsús ní cana-gă ncha cue tée xica cuu ndihi-gă-ăⁿ, te ní xăhaⁿ-gă xii-güedě:

—Nchòhó xini-ndó să cuè tée yindaha ìⁿ nacióⁿ quide-güedé sá ìo cùnuu-güedé, te ncha dava-gă cue tée cùndihi-güedé tnàhá-güedé quidé-güedé sá ìo cùnuu-güedé. 43 Dico nchòhó chi vá dúcáⁿ càda-ndo. Chi núu dava-ndo cuìní-ndó cùnuu-ndo te xini ñuhu-xi cunu cuechi núú tnàhá-ndó te vá cádá-ndó să cúnùu-ndo. 44 Te núu dava-ndo cuìní-ndó quène cáva-ndo, te cuu-ndo dátiná cue ñáyiu ñá túú tnàhí dàná quee núú chíúⁿ pàtróoⁿ-xi cunu cuechi núú tnàhá-ndó. 45 Te yúhú Tée cùu ñani tnàhá-ndó nchaa-ndo, chi ñá túú véxi-í sá cúnú cuèchi ñáyiu núú-í, chi véxi-í sá cúnú cuèchi-í núú-yu. Te cuú-í ñuyúú-a cuendá vâi-yu cácu nihnu núú ùhú núú ndàhú —càchí-gă xăhaⁿ-gă xii-güedě.

Jèsús quidé tătna-gă ìⁿ tée cuáa nání-dě Bartimeú (Mt. 20:29-34; Lc. 18:35-43)

46 Te Jèsús ní quexìo-gá ñúú Jericó ndìhi cue téé xìca cuu ndìhi-gá, te ní yáha-gá ndìhi-güedé ichi xití ñúú-án, te ío cuéhé ñáyiú nchìcúⁿ ñáhá xì-gá cuáháⁿ te ìⁿ xio yuhu ìchi sá ñí quee xití ñúú-án núcõo ìⁿ téé cuàá nání-dě Bartimeú, te tátá-dě nání-dě Tìmeú, te téé-áⁿ núcõo-dé yuhu ìchi-án xìcáⁿ ndàhú-dé.

47 Te téé-áⁿ ñí cutnùnì iní-dé sá Jèsús téé ñúú Nazàrét ñúhú-dě ichi, te ní ngüíta-dé níhi càháⁿ-dé, te xàhaⁿ-dě xii-gá:

—Jèsús, ñaní tnáhá ndìi Davíí, cundàhú iní ñáhá xii-í! —càchí-dé xàhaⁿ-dě xii-gá.

48 Te vài ñáyiú tènaá ñáhă-yu xii-dé, te xăhăⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xàhaⁿ-dě xii-gá:

—Jèsús, ñaní tnáhá ndìi Davíí cundàhú iní ñáhá xii-í! —càchí-dé xàhaⁿ-dě xii-gá.

49 Te Jèsús ní ngüíñí-gá te ní xáhaⁿ-gă xii cue téé ndìhi-gá:

—Chí cuănguaca téé cuàá-ăⁿ candeca-ndo-dě quixi iha —càchí-gá xàhaⁿ-gă.

Te cue téé-áⁿ ñí xica-güedé cuănguaca-güedé téé cuàá-áⁿ, te òré ní quexìo-güedé núú-dě te ní xáhaⁿ-güedě xii-dé:

—Ndacuíñí te vá ndìhú-gá iní-n, na quèhíⁿ-ó chi càna ñaha Jesús xii-n —càchí-güedé xàhaⁿ-güedě xii-dé.

50 Te téé-áⁿ ñí xócání-dě dóó ndíxí-dě, te ndìhi-ni ní ndacuíñí-dé te ní xica-dé cuáháⁿ-dé núú Jèsús. 51 Te òré ní quexìo-dé te ní xícáⁿ

tnúhú-gă núú-dě, te xàhaⁿ-gă xii-dé:

—¿Ná cuìní-n càda ñaha-í xii-n-í? —càchí-gá xàhaⁿ-gă xii-dé.

Te téé cuàá-áⁿ ñí xáhaⁿ-dě xii-gá:

—Mèstrú, cuìní-í cada tátna-n nűú-í cuèndá cun-dehe-í —càchí-dé xàhaⁿ-dě xii-gá.

52 Te Jèsús ní xáhaⁿ-gă xii-dé:

—Cuanùhú vitna, chi sa ní ndúha núú-n chi ní sándáá iní-n Yă Ndiõxí —càchí-gá xàhaⁿ-gă xii-dé.

Te òré-ni-áⁿ ñí ndúha núú-dě te nchìcúⁿ-dé Jèsús cuáháⁿ.

11

Jèsús cuănguihu-gá ñúú Jerusálén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndìhi cue téé xìca cuu ndìhi-gá ñúú Bètaniá, ndìhi ñúú Bètfaqé, te xíáⁿ cáá yùcu nani Olívú, te yatni vií-nă xíáⁿ cáá ñùú Jerusálén. Te Jèsús ní cana-gá úú-ni tnáhá cue téé xìca cuu ndìhi-gá. 2 Te ní xáhaⁿ-gă xii-güedé:

—Chí cuáháⁿ ñúú cáá yàtni yacáⁿ, te òré quexìo-ndo yacáⁿ te naníhí-ndó ìⁿ búrru ndètníi-di, te vátá yõo ìⁿ-gá codo ñàha xii-di, te nandaxi-ndo-di te candeca-ndo-di quixi. 3 Te núu yoo na càcáⁿ tnúhú nűú-ndó nă cuèndá nándaxi-ndo-di, te cúñaha-ndo sá yùhú Yaá xícá cùu ndìhi-ndo xini ñuhu-í-di, te na yàha canehe chiùn-í-di

te ndihi-ni natendaha-ĩ-di, duha cúñaha-ndo —càchí-gá xãhãⁿ-gã xii-güedé.

4 Te cue tée-áⁿ ñi xica-güedé cuáhãⁿ-güedé, te òré ní quexìo-güedé ñuú-áⁿ te ní naníhí-güedé ìⁿ búrru ndètníi-di ìⁿ yutnu ñihnu yatni ìⁿ yuyehe vehe caa yatni yuhu ichi, te ní ngüíta-güedé nándàxi-güedé-di.

5 Te mei òré nándàxi-güedé-di ní quexìo ñáyiú xãhãⁿ-yu xii-güedé:

—¿Ná cuendá nándàxi-ndo búrru-áⁿ-i? —càchí-yu xãhãⁿ-yu xii-güedé.

6 Te cue tée-áⁿ ñi xáhaⁿ-güedé xii-yu nàcuáa ní xáhaⁿ Jèsús cúñaha-güedé. Te sátá dúcãⁿ te ní dáñã-yu ndèca-güedé búrru-áⁿ cuáhãⁿ núú ndécú Jèsús. 7 Te òré ní quexìo-güedé ndihi-di núú ndécú-gã, te ní sacãⁿ ndodo-güedé dóo-güedé sátã-di, ní ngódó ñaha Jèsús xii-di. 8 Te ío cuéhé ñáyiú ta sácãⁿ-yu dóo-yu ichi cuáhãⁿ-gã cuendá núú dóo-yu-áⁿ yãha-gã ndihi quití yòdo-gã, te davá-yu xèhndé-yu ndaha yutnu ta sacãⁿ-yu cuáhãⁿ.

9 Te nchaa ñáyiú yòdo nuu núú-gã ndihi nchaa ñáyiú nchícúⁿ ndaa sátã-gã ní ngüíta-yu níhi càháⁿ-yu, te càchí-yu:

—¡Ío càhnu cuu Yaá-a! ¡Te Yá Ndiöxí ná chindee ñaha-gã, chi diu-gã cúú-gã Yaá ní tendaha-gã véxi quide núú-gã! 10 ¡Te diu-ni Yaá-á

cúú-gã Yaá véxi quindaha ñaha xii-o datná ní xóo cada ndíi Dàvíi! ¡Te ndéé nchaa sátá ío andiu na càchí-xi sátá ío càhnu cuu-gã! —duha càchí-yu.

11 Te Jèsús ní quexìo-gã ñuú Jerusálén, te cuánguihu-gã xití veñúhu càhnu sátá ío cùnuu, te ní xíndéhé vãha-gã nchaa sátá ndécú xití veñúhu-áⁿ. Te sátá dúcãⁿ te ní ndee-gã cuáhãⁿ-gã ñuú Bètaniá ndihi ndi ùxúú cue tée xica cuu ndihi-gã chi sa ní cuaa.

Jèsús xãhaⁿ-gã xii yutnu ngüxí sátá vã cúúⁿ-gã sávidí-xi (Mt. 21:18-19)

12 Te nduu tnéé-áⁿ ñi quee Jèsús ñuú Bètaniá ndihi cue tée xica cuu ndihi-gã, te ichi ñùhu-gã ní xíhí-gã docó. 13 Te xica ñi xini-gã nútñi ìⁿ yutnu ngüxí, te ní xica-gã cuándéhé-gã nõu ndéé sávidí-xi te ñá túú ñã ndéé, chi mee-ni ndàha-xi ndéé chi ñá díú yóo sácúndeé sávidí-xi. 14 Te Jèsús ní xáhaⁿ-gã xii yutnu ngüxí-áⁿ:

—Vitna te vá yóo ìⁿ-gã caxi sávidí-n, chi vá cúúⁿ-gã —càchí-gã xãhaⁿ-gã xii yutnu ngüxí-áⁿ.

Te cue tée xica cuu ndihi-gã ní tecú dóho-güedé nàcuáa ní xáhaⁿ-gã xii yutnu ngüxí-áⁿ.

Jèsús ñá túú tnàhá ini-gã nàcuáa quide ñáyiú xití veñúhu (Mt. 21:12-17; Lc. 19:45-48; Jn. 2:13-22)

15 Te Jèsús ní quexìo tucu-gã ndihi cue tée xica cuu ndihi-gã ñuú Jerusálén, te cuánguihu tucu-gã xití veñúhu càhnu sátá

ïo cùnuu, te xití veñúhu-án xĩndecu cue ñáyiú quide ndáhú nádíco-yu, ndihí cue ñáyiú xĩsaaⁿ. Te nchaá-yu ní queñuhu ñaha Jèsús xii-yu quehé, te ní dándúá-gá mèsá cue ñáyiú dàma díhúⁿ, ndihí nchaa xilé sácõo nchihí cue ñáyiú dico lómá xĩndecu xití veñúhu-án. 16 Te ñá túú tñahí-gá ní dàña-gá yáha cue ñáyiú ndihí nchaa sá nchídõ-yu ichi xití veñúhu-án. 17 Te ní xáhaⁿ-gã xii-yu:

—Núú tùtú Yã Ndiõxí càháⁿ-xí nàcuáa ní càháⁿ-gã, te ní cachí-gá: “Vehe-í cúú-xí vèhe núú tàcá ñáyiú ñihí ñuyúú càháⁿ ndihí ñáhá-yu xii-í”, duha ní càháⁿ-gã càchí-xi núú tùtú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gã xii-yu.

18 Te nchaa dútú cùnùu, ndihí nchaa cue téé dàcuaha ñaha xii-yu nchaa tnúhu ní chídó tnùní ndí Moisés ní tecú dóho-güedé nàcuáa ní càháⁿ-gá te ní ngüíta-güedé ndúcú-güedé nàcuáa cada-güedé cahni ñaha-güedé xii-gá, chi yuhú-güedé sá ïo cunuu-gã, te ducaⁿ chi nchaa ñáyiú ío cùnúhu-yu nchaa tnúhu càháⁿ-gá. 19 Te òré sa ní cuaa cuií-nã, te ní quee tucu Jèsús ndihí cue téé xìca cuu ndihí-gá ñúú Jerusàlén cuáháⁿ-gá ndihí-güedé ingá xichi.

Ní yíchí yutnu ngüxí
(Mt. 21:20-22)

20 Te nduu tñéé nehé-ni ní yáha tucu Jèsús ndihí cue téé

xìca cuu ndihí-gá núú níhnú yutnu ngüxí, te ní xini-güedé sa ní yíchí ñihí ndéé yóho-xi. 21 Te té Pèlú ní ndacu iní-dé nàcuáa ní xáhaⁿ Jèsús xii yutnu ngüxí-án, te ní xáhaⁿ-dè xii-gá:

—Mèstrú, cundehe ñá ní yíchí yutnu ngüxí sá ní xáhaⁿ-n sá vã cúúⁿ-gã sávidí-xi —càchí-dé xáhaⁿ-dè xii-gá.

22 Te Jèsús ní xáhaⁿ-gã xii-güedé:

—Quindáa ndisa iní-ndó Yã Ndiõxí. 23 Te na càchí tnúhu ndáa-í xii-ndo sã núu nchòhó cúñaha-ndo xii tĩndúú-a xocuiñí-xi núú ndécú-xí, te quíhíⁿ-xi queé-xi xití lámár. Te diu ducaⁿ càda-xi te núu nchòhó vá cání ñⁿ cani úú iní-ndó, te quindáa iní-ndó sã dúcáⁿ càda-xi. 24 Te xíãⁿ núu càchí tnúhu-í xii-ndo sã nchaa sá ná càcáⁿ-ndó núu Yã Ndiõxí òré càháⁿ ndihí-ndo-gã, te taxi-gá te núu nchòhó sãndáa ndisa iní-ndó sã táxí-gã sá xicáⁿ-ndó núú-gã. 25 Te òré càháⁿ ndihí-ndo Yã Ndiõxí te dandacu iní-ndó te núu ndècu ñáyiú ñá túú cùu váha iní ñáhá xii-ndo, te cada càhnu iní-ndó-yu cuendá ducaⁿ càda cahnu iní ñáhá Tãtá-ndó Dütú Ndiõxí Yáa ndécú àndiu xii-ndo cuendá nchaa sá ñà túú váha quide-ndo. 26 Dico núu nchòhó vá cadá càhnu iní-ndó sã quidé ñaha tnaha ñáyiú-ndo xii-ndo, te ní Tãtá-ndó Dütú Ndiõxí vá cadá càhnu iní ñáhá-gã xii-ndo cuendá nchaa sá ñà túú váha quide-ndo —cachí-gá xáhaⁿ-gã xii-güedé.

Jèsús ndécú ndíhi-gá tnúhu ndee ìní

(Mt. 21:23-27; Lc. 20:1-8)

²⁷ Te Jèsús ní ndexìo tucu-gá ñúú Jerusalén ndíhi cue tée xìca cuu ndíhi-gá, te cuánguihu tucu-gá xití veñúhu cànhu sá Ìo cùnūu ndíhi-güedé. Te xití veñúhu-án yíhí-gã ní quexìo cue dútú cùnūu ndíhi cue tée dàcuaha ñaha xii ñáyiū nchaa tnúhu ní chídó tnùnì ndíi Moisés, ndíhi cue tée cùu sacuéhé nūú ñáyiū isràél. ²⁸ Te xáhaⁿ-güedé xii-gá:

—Cuìnì-ndí cachí tnúhu-n xii-ndí nása ndūu tnúhu ndee ìní ndécú ndíhi-n núu quìde-n nándi sá quídé-n, ¿te yoo ducaⁿ ñí taxi tnúhu ndee ìní-án xii-n-í? —càchí-güedé xáhaⁿ-güedé xii-gá.

²⁹ Te Jèsús ní xáhaⁿ-gã xii-güedé:

—Yúhú tnàhá-í cuìnì-í cácaⁿ tnúhu-í ìⁿ sá cácaⁿ tnúhu-í núú-ndó te núu na cachí tnúhu-ndo, te cachí tnúhu-í xii-ndo yòo ní taxi tnúhu ndee ìní xii-í duha quìde-í. ³⁰ Te chí càchí tnúhu xii-í yoo ní táuchíúⁿ ñí dácúándùte ndíi Juàá ñáyiū, ¿Yá Ndiòxí áⁿ cuè tée ñuyíú-a ní táuchíúⁿ dùcaⁿ ní quide ndíi? Te chí càchí tnúhu —càchí-gá xáhaⁿ-gã xii-güedé.

³¹ Te ní ngúíta-güedé xítñàha-güedé:

—¿Nása cúñaha-o? Chí núu na cúñaha-o sã Yá Ndiòxí ní táuchíúⁿ dùcaⁿ ní quide ndíi Juàá ñá, te quesaha-dé: “¿Ná cuendá ñá túú ní sàndáá ìní-ndó tnúhu ní cáháⁿ ndíi vaiⁿ?”, quesaha-dé. ³² Te ní

vã cúú cùñaha-o sã cuè ñáyiū ñuyíú-a ní táuchíúⁿ dùcaⁿ ní quide ndíi Juàá —càchí-güedé xítñàha-güedé.

Te ducaⁿ ñí xítñàha-güedé chí ñá túú ní cùtnunì ìní-güedé nása cúñaha-güedé xii-gá, chí xiyùhú-güedé cue ñáyiū chí nchaa ñáyiū-án ñí cutnùnì ndáá ìní-yu sá Yá Ndiòxí ní táuchíúⁿ-gã ducaⁿ ñí quide ndíi Juàá. ³³ Te ní xáhaⁿ-güedé xii Jèsús:

—Ñá túú xìnì-ndí yoo ní táuchíúⁿ dùcaⁿ ní dácúándùte ndíi Juàá ñáyiū —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Te núu ducaⁿ te ni yùhú vá càchí tnúhu-í xii-ndo yòo ní taxi tnúhu ndee ìní duha quìde-í —càchí-gá xáhaⁿ-gã xii-güedé.

12

Cuendá cue tée cuìhna ìní-xi
(Mt. 21:33-46; Lc. 20:9-19)

¹ Te Jèsús ní ngúíta-gá cání-gã ìⁿ cuèndú núú ñáyiū nàcuáa tecú tnùnì-yu tnúhu-gá, te xáhaⁿ-gã xii-yu:

—Ìⁿ tée ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vã cúú dàñú, te ní cadúha-dé núú quíhni-dé ndéhé yoho yàha stilé-án òrè ná cùu, te ní cadúha-dé ìⁿ xító dùcúⁿ núú cáúndòdo cue tée coto yoho yàha stilé-án.

Te ní sáá ìⁿ nduu quèe-dé quíngaca cuu xica-dé vai nduu, te ní dándõo ndaha-dé sá ñí xitu-dé-án xii ìⁿ úú cue tée cáháⁿ ndíhi-dé cuendá cada chiùⁿ-güedé, te ní

ndatnúhu-güedé sá òré ná cúú te cuu cuendá dava-güedé te ducaⁿ te ní quee-dé cuáháⁿ-dé. ² Te sáta ní sáá nduu ní cuu ndéhé yoho yàha stilé sá ní xitu-dé-áⁿ, te ní xáhaⁿ-dë xii ìⁿ tée xinu cuechi núú-dë: “Cuáháⁿ cácaⁿ-n sá cúú cuendá-í núú cuè tée ní dándõ ndàha-í nchaa yoho yàha stilé sá ní xitu-í-áⁿ”, càchí-dé xáhaⁿ-dë. Te tée xinu cuechi-áⁿ ní xica-dé cuáháⁿ-dé. ³ Te cue tée-áⁿ ní tñi-güedé tée xinu cuechi-áⁿ, te ní caniha-güedë xii-dé, te dätñuní ní nacuícúⁿ ñáhá-güedë, te ñá túú tñàhí ná ní sãñaha-güedë. ⁴ Te tée cùu xítóhó yoho yàha stilé-áⁿ ní tendaha tùcu-dé ingá tée xinu cuechi núú-dë cuáháⁿ-dé. Te òré ní quexio tée xinu cuechi-áⁿ te cue tée-áⁿ ní sáha ñaha-güedé yúú xii-dé, te ní táhú-güedë díquí-dë, te ní xícuèhé ñáhá-güedë xii-dé. ⁵ Te tée cùu xítóhó nchaa yoho yàha stilé-áⁿ ní tendaha tùcu-dé ingá tée xinu cuechi núú-dë cuáháⁿ-dé núú cuè tée-áⁿ, dico tée-áⁿ òré ní quexio-dé te ní sahní ñaha-güedë xii-dé. Te tée cùu xítóhó nchaa yoho yàha stilé-áⁿ ní tendaha-dë vài-gá cue tée xinu cuechi núú-dë cuáháⁿ ngácáⁿ-güedé sá cúú cuendá-dé ní cùu dico ñi-nduu ducaⁿ ní quide ñaha tùcu cue tée ndèè nchaa yoho yàha stilé-áⁿ xii-güedé, chi dava-güedé ní caniha-güedë te dava-güedé ní sahní ñaha-güedë.

⁶ Te tée cùu xítóhó nchaa yoho yàha stilé-áⁿ ndécú ìⁿndii-ná tée tendaha-dë

quíhíⁿ núú cuè tée ní dándõ ndaha-dë sá ní xitu-dé-áⁿ, te tée tendaha-dë-áⁿ cúú-dë déhe ducuⁿ-dé, te ío cùu iní ñáhá-dë. Te ní sani iní-dé: “Váha-gá núu tendaha-í déhe-í-a núhú-dé, chi òré quini ñáhá-güedë xii-dé te cànehe-güedé sá yíñùhu núú-dë”, duha ní sani iní-dé. Te ducaⁿ te ní xáhaⁿ-dë xii déhe-dé-áⁿ sá núhú-dé, te tée-áⁿ cuñuhú-dé cuáháⁿ ngácáⁿ-dé sá cúú cuendá tátá-dë núú cuè tée-áⁿ. ⁷ Dico òré ní xini cue tée quide chiuⁿ-áⁿ déhe tée cùu xítóhó nchaa yoho yàha stilé-áⁿ, te ní xítñaha-güedé: “Tée-áⁿ tée véxi nduu táhú ñuhu-a ndihi sá cáá núú-xi, dico cahni-o-dë te mee-o ndùu táhú-ó sá ndúú táhú-dë”, duha ní xítñaha-güedé. ⁸ Te ní tñi-güedé tée-áⁿ, te ní sahní ñaha-güedë, te ní dáquéné-güedë yiqui cùñú-dé ìⁿ xio yuhu ñuhu núú cáá yòho yaha stilé-áⁿ —duha cuáháⁿ cuendú ní caní Jèsús núú-yu.

⁹ Te Jèsús ní xáhaⁿ tùcu-gá xii-yu:

—¿Te nchòhó sa cùtnuní iní-ndó nàcuáa cada xítóhó ñuhu-áⁿ ãⁿ? Chi núhú-dé te cahni-dé cue tée-áⁿ te dándõ ndaha-dë ñuhu-dé xii cue tée cùtnuní iní-dé cada ndáá —càchí-gá xáhaⁿ-gã xii-yu.

¹⁰ Te xáhaⁿ tùcu-gá xii-yu:

—Te nchòhó, náa ñá túú dàcuaha-ndo núú tùtú Yã Ndióxí núú càchí-xi:

Yúú sá ní dáquée tñhú cue tée dàcaa vehe,

ní cuu-xi yúú cùñuu vitna.

¹¹ Chi mee Yã Ndióxí ducaⁿ ní cachí-gá cunduu, te

cùu-xi ìíⁿ sá ìo cùñúhu-o
 vītna.
 Duha càchí-xi núú tūtú-gá —
 càchí Jèsús xáhaⁿ-gǎ xii-yu.

12 Te cue tée ní xíndedóho
 nàcuáa ndùu tnúhu ní
 cáháⁿ-gá ní cuiní-güedé tñi
 ñaha-güedě xii-gá ní cùu,
 chi ní cutnùní iní-güedé sá
 cuendá-güedé ní cáháⁿ-gá,
 dico ní yùhú-güedé tñi
 ñaha-güedě xii-gá cuendá sá
 ìo vài ñáyiú, te ná ío ná cada
 ñáhá-yu xii-güedé ní sani
 iní-güedé, te ní xica-güedé
 cuáháⁿ-güedé.

Cuendá impuèstú

(Mt. 22:15-22; Lc. 20:20-
 26)

13 Te sátá ñi xica-güedé
 cuáháⁿ-güedé, te ní ten-
 daha-güedě ìíⁿ ùú cue
 tée cùu fariséú, ndihi ìíⁿ
 ùú cue tée cùndihi té
 Hèrodés cuáháⁿ-güedé núú
 ndécú Jèsús ndúcú-güedě
 nàcuáa cada-güedé datìcánuu
 ñaha-güedě xii-gá núú tñhu
 cáháⁿ-gá. 14 Te cue tée-áⁿ ñi
 quexìo-güedé núú Jèsús, te
 xáhaⁿ-güedě xii-gá:

—Mèstrú, cùnuni iní-ndí
 sá ìo ndáá càháⁿ-n, te ñá túú
 quide cuendá-n nàcuáa càháⁿ
 ñáyiú, te cuèi ndédani càa-yu
 ìíⁿ-ni càháⁿ-n ndihí-yu chi ñá
 túú quide cuendá-n cuèi ná
 ñáyiú cùú-yu, te càháⁿ ndáá-n
 nàcuáa càháⁿ Yá Ndiòxí
 cundecu-o ñuyíú-a. Te cachí
 tnúhu xii-ndí ñuu váha-ni
 quide-ndí sá chǎhu-ndí té
 Cèsár tée ìo cùnuu cuendá im-
 puèstú áⁿ ñáhá —càchí-güedé
 xáhaⁿ-güedě xii-gá.

15 Dico Jèsús ní cutnùní
 iní-gá sá xító ndèé ñáhá-güedě
 xii-gá, núu ní xáhaⁿ-gǎ
 xii-güedé:

—¿Ná cuendá ducaⁿ xito
 ndeé ñáhá-ndó xì-í? Chí
 dánèhé ñáhá xì-í ìíⁿ díhúⁿ sǎ
 chǎhu-ndo cuendá impuèstú
 te núu nása càa —cachí-gá
 xáhaⁿ-gǎ xii-güedé.

16 Te cue tée-áⁿ ñi dánèhé
 ñáhá-güedě xii-gá ìíⁿ díhúⁿ
 sǎ chǎhu-güedé cuendá im-
 puèstú. Te Jèsús ní xáhaⁿ-gǎ
 xii-güedé:

—Chí càchí tnúhu xii-í
 ñuu yoo núú-xi ndèé ndihi
 yoo diu-xi ndeé —càchí-gá
 xáhaⁿ-gǎ xii-güedé.

Te ní xáhaⁿ-güedě xii-gá:

—Núú tē Cèsár ndèé
 ndihi diu-dé —càchí-güedé
 xáhaⁿ-güedě xii-gá.

17 Te Jèsús ní xáhaⁿ-gǎ
 xii-güedé:

—Te núu ducaⁿ te chí
 nàcuáha té Cèsár sá cúú
 cuendá-dé, te sá cúú cuendá
 méé Yá Ndiòxí te xíaⁿ
 nacuáha-ndo-gǎ —càchí-gá
 xáhaⁿ-gǎ xii-güedé.

Te cue tée-áⁿ ìo ní
 cùñúhu-güedé sá dúcáⁿ ñi
 cáháⁿ-gá.

Cuendá cue ñáyiú ndoto

(Mt. 22:23-33; Lc. 20:27-
 40)

18 Te sátá dúcáⁿ te ní quexìo
 ìíⁿ úú cue tée cùu saducéú
 núú ndécú Jèsús, te cue tée-áⁿ
 ñá túú sàndáá iní-güedé sá
 ndótó cuè ñáyiú ní xihí, te ní
 xáhaⁿ-güedě xii-gá:

19 —Mèstrú, ndíi Moisés
 càchí ndíi núú tūtú ndíi ndècu
 vitna sá ñuu ìíⁿ tée na cùú-dé
 te quendóo ñadihí-dé, te

núu ñá túú ní xõ déhe-dé ndihi ñadihi-dé-án, te téé cùu ñani-dé naqueheⁿ-dé ñaha ní quendóo quée-án cuendá coo déhe-dé ndihi-aⁿ cuendá téé ní xihí-án. ²⁰ Te ní xindecu úsá tñahá cue téé mee-ni ndi ñani-güedé. Te téé díhna ní níhí ñadihi-dé, te ñá túú ní cùdí-dé cundecu-dé chí ní xihí-dé, te ni ñⁿ déhe-dé ñá túú ní xõ ndihi ñadihi-dé. ²¹ Te téé cùu uú ní naqueheⁿ-dé ñaha ní quendóo quée-án, dico ní xihí tucu-dé, te ni ñⁿ tucu déhe-dé ñá túú ní xõ ndihi ñaha-án. Te ñⁿ-ni ducaⁿ ní xihí téé cùu uní. ²² Te ní xínu ndi úsá-güedé ní cándeca ñaha-güedé xii ñaha-án, dico ni ñⁿ-güedé ñá túú ní xõ déhe-güedé ndihi-aⁿ, te ní ndihi-güedé ní xihí te ndée núu ní ndihi-ná ní xihí tñahá ñadihi-án. ²³ Te na sàá nduu ndòto-güedé ndihi ñaha-án, ¿te ndédacàa-güedé ñadihi-güedé cuu-aⁿ-i? Chí ndi úsá-güedé ní cándeca ñaha-güedé xii-aⁿ —càchí-güedé xàhaⁿ-güedé xii-gá.

²⁴ Te Jèsús ní xàhaⁿ-gá xii-güedé:

—Ní xíta nchòhó tnúhu càháⁿ-ndó, chí ñá túú xini-ndó nàcuáa càháⁿ Yá Ndiõxí núu tütú-gá, te ní ñà túú xini-ndó sã díú-gã ndácú-gã quidé-gã nchaandi túhú sã vãha. ²⁵ Te na càchí tnúhu-í xii-ndo sã òré ná sãá nduu ndòto nchaa ñáyiú ní xihí, te dàvá-án vã yõ-gã dasaⁿ ðehe yoco-xi chí vá yõ-gã candeca tñaha, chí na ndòtó-yu te cuu-ná-yu dàtná cue espíritú xínu cuèchi

núu Yá Ndiõxí. ²⁶ Te núu nchòhó cuini-ndó càháⁿ-ndó cuendá nchaa ñáyiú ndoto, te díhna-gá dacuàha-ndo nacuáa ní chidó tnùni ndii Moisés núu tütú ndii ní cùu. Chí ñⁿ núu tütú ndii càháⁿ-xi nàcuáa ní xàhaⁿ Yá Ndiõxí xii ndii cùtnàhá ní càháⁿ ndihi ñaha-gã ñⁿ xichi núu níhñú tnùtau nchicún ñuhú. Te duha ní xàhaⁿ-gã xii ndii: “Yúhú cùu-í Ndiõxí tẽ Àbrahám, ndihi té Isàác, ndihi té Jàcób”, duha ní xàhaⁿ Yá Ndiõxí xii ndii càchí-xi núu tütú ndii. ²⁷ Te Yá Ndiõxí ñá túú cùu-gá Ndiõxí cue ñáyiú ní xihí, chí cùu-gá Ndiõxí cue ñáyiú xindecu vívú, núu xíãⁿ nchòhó ío xíta-ndo tnúhu càháⁿ-ndó. Te sã dúcáⁿ ní càháⁿ-gá cuendá cue téé-án, te xíãⁿ cùtnùni sã cuèi ní xihí-güedé sã cúu-xí tñaha ñáyiú-güedé, dico ndècu vívú-güedé sã cúu-xí-gã —càchí-gá xàhaⁿ-gã xii-güedé.

Tnúhu sã ïo-gá cùnùu
(Mt. 22:34-40)

²⁸ Te tñahá ñⁿ téé dàcuaha ñaha xii ñáyiú nchaa tnúhu ní chidó tnùni ndii Moisés ndèdóho-dé nchaa tnúhu càháⁿ Jèsús ndihi cue téé cùu saducéu-án, te ndèdóho-dé sã sùúni vãha níhí-gá tnúhu nàdanchocáva-gá. Te ní sãndehe yatni-dé núu-gã, te xàhaⁿ-dẽ xii-gá:

—Cachí tnúhu xii-í ndédacàa tnúhu sã ní càháⁿ Yá Ndiõxí ío-gá cùnùu cuu díhna —càchí-dé xàhaⁿ-dẽ xii-gá.

²⁹ Te Jèsús ní xàhaⁿ-gã xii-dé:

—Duha càháⁿ tnúhu sã ïo-gá cùnùu: “Nchòhó ñáyiú isràel ío vãha chí cùndèdóho tnúhu-a. ñⁿndii díi-ni Yá

Ndiöxí ndécú, te ðiu-ni-gá cúú-gă Ndiöxí-ó. ³⁰ Te cuu iní-ndó Dütú Ndiöxí Yaá cúú Ndiöxí-ndó nì yuhu nì iní-ndó, te canì iní-ndó càda-ndo datná cuìní mée-gă, te mee-ni tnùhu váha canì iní-ndó cuëndá cuu vii cuu váha-ndo nùú-gă, te coo iní-ndó càda-ndo nacuáa cuu váha iní-gá”, duha càháⁿ tnúhu sá ïo-gá cúnúu. ³¹ Te duha càháⁿ tucu ingá tnúhu cùu úú sá ïo cúnúu: “Cuu iní-ndó tnàha ñáyiu-ndo dàtná cúú iní-ndó mée-ndo”, duha càháⁿ tnúhu cùu úú-án. Te úú duha-ni tnúhu-a cùu-xi tnúhu sá ïo-gá cúnúu — cachí-gá xăhaⁿ-gă xii-dé.

³² Te tée dàcuaha ñaha xii ñáyiu nchaa tnúhu ní chídó tnùnì ndíi Moisés ní xăhaⁿ-dĕ xii-gá:

—Mèstrú, váha-ni càháⁿ-n chi ndáá sá ñⁿdii-ni Yá Ndiöxí ndécú, te ñá túú-gă ndĕé ndécú ingá ndiöxí. ³³ Te dàtná ní cachí-n sã nì yuhu nì iní-ó cùu iní-ó Yă Ndiöxí, te canì iní-ó càda-o nacuáa cuu vii cuu váha iní-gá te ïo vii ïo váha cuu iní-ó dàtná cuìní mée-gă, te coo iní-ó càda-o nacuáa cuu váha iní-gá, te cuu iní-ó cuè tnaha ñáyiu-o dàtná cúú iní-ó mée-o. Te nchaa xiăⁿ ïo-gá xínì ñùhu-xi cada-o dacúxí sã cuăñaha-o quĕti cahni-güedé te cáyú-dì nduu táhú ñáhá Yă Ndiöxí, ndihì dâcúxí nchâa dava-gá sá sãñaha-o ndùu táhú-gă — càchí-dé xăhaⁿ-dĕ xii-gá.

³⁴ Te sá dúcáⁿ ïo váha ndùu tnúhu ní cáháⁿ tée-án, núu ní xăhaⁿ Jësús xii-dé:

—Luha-ná cúmăní xii-n te ndíhu ndaha ñàha Yá Ndiöxí —càchí-gá xăhaⁿ-gă xii-dé.

Te sá dúcáⁿ nì xăhaⁿ-gă xii tée-án, núu vá yôo ñⁿ-gă ní cùyi nágá tnúhu nducu tnúhu-yu núú-gă.

Yoo cùu Xítóhó Jesucrìstú
(Mt. 22:41-46; Lc. 20:41-44)

³⁵ Te Jësús yíhí-gă xití veñúhu càhnu sá ïo cúnúu danehé-gá ñáyiu, te xăhaⁿ-gă xii-yu:

—Cue tée dàcuaha ñaha xii ñáyiu nchaa tnúhu ní chídó tnùnì ndíi Moisés càchí-güedé sá Crìstú Yaá tendaha Yă Ndiöxí quixi ñuyúu-a cùu-gă déhe ndíi Dàvií, te ndíi-án nì cunaha vihi ní xíhí ndíi. ¿Te ná cuëndá ducaⁿ càháⁿ-güedé?

³⁶ Te mee ndíi Dàvií-án nì dácáhú inì ñáhá Espiritú Yă Ndiöxí xii ndíi nâcuáa cáháⁿ ndíi, te duha ní cachí ndíi:

Dütú Ndiöxí ní xăhaⁿ-gă xii Yaá cúú Xítóhó-í:
“Ngóo xio cùha-í,

te yúhú cada-í te nchaa sá cúú ũhú inì ñáhá xii-n canehe-xi sá yíñùhu núú-n.”

Duha ní xăhaⁿ Dütú Ndiöxí xii Yaá cúú Xítóhó-í.

Duha ní cachí ndíi. ³⁷ ¿Te nása cùu Crìstú déhe ndíi Dàvií, te mee ndíi ní cachí ndíi sá cúú-gă Xítóhó ndíi? —càchí Jësús xăhaⁿ-gă xii-yu.

Te ïo cuéhé ñáyiu ní xíndedóho nchaa tnúhu ní cáháⁿ-gă, te ïo ní cudíi iní-yu ní xíndedóho ñáhá-yu xii-gă.

Jësús càháⁿ-gá cuëndá cue tée dàcuaha ñaha xii ñáyiu

nchaa tnúhu ní chídó tnùní ndíi Moisés
(Mt. 23:1-36; Lc. 11:37-54; 20:45-47)

³⁸ Te òré dánèhé ñhá Jèsús xii cue ñáyíu, te xáhaⁿ-gã xii-yu:

—Cada cuèndá-ndó vã cádá-ndó dàtná quidé cuè téè dàcuaha ñaha xii ñáyíu nchaa tnúhu ní chídó tnùní ndíi Moisés, chí cue téè-áⁿ tnàhá iní-güedé cuihnu-güedé dóó nání sã sácúihnu cue téè cùnuu-gá te cuíni-güedé sã méé-ní ndíhi tnúhu yíñùhu cáháⁿ ndíhi ñaha ñáyíu xii-güedé nchaa núú xícá cùu-güedé. ³⁹ Te nàcáxi-güedé xilé sácõo nchíhi cue téè cùnuu-gá xití veñúhu sácõo nchíhi-güedé. Te ducaⁿ-ni quíde-güedé cuèi òré quíhu-güedé mèsá caxi-güedé òré ndécú-güedé ìⁿ vico, chí mee-ni núú sácõo cue téè cùnuu cuíni-güedé coo-güedé. ⁴⁰ Te quèndeé-güedé vehe nchaa ñáyíu quèé, te ío naha càháⁿ ndíhi-güedé Yã Ndiõxí dàndahú-güedé méé-güedé sã ío quíde ndáá-güedé cuèndá sã cuíni-güedé cáháⁿ váha ñáyíu cuèndá-güedé. Te sã dúcáⁿ quíde-güedé te ío-gá ndoho-güedé núú ùhú núú ndàhú dàcúxí dàva-gá ñáyíu —càchí-gá xáhaⁿ-gã xii-yu.

Díhúⁿ nduu táhú Yã Ndiõxí ní dáquëe ìⁿ ñaha ndàhú ñaha quèé

(Lc. 21:1-4)

⁴¹ Te nùcõo Jèsús xití veñúhu yatni núú ndécú àlcanciá te ndèhe-gá xídáquëe ñáyíu díhúⁿ xití alcanciá-áⁿ,

te tnàhá cue ñáyíu cuica xídáquëe-yu vãi díhúⁿ. ⁴² Te ní quexìo ìⁿ ñaha ndahú ñaha quèé, te ndèhe-gá ní dáquëe-aⁿ úú tnàhá díhúⁿ còbrí xití alcanciá, te díhúⁿ-áⁿ ío sacú yáhu-xi. ⁴³ Te Jèsús ní cana-gá cue téè xica cuu ndíhi-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã ñàha ndahú ñaha quèé-a ío-gá nándíhi díhúⁿ ní dáquëe-aⁿ xití alcanciá dàcúxí díhúⁿ ní dáquëe dava-gá-yu. ⁴⁴ Chi nchaa ñáyíu-áⁿ ní dáquëe-yu mee-nã díhúⁿ sã ní quendóo-ná, dico ñaha quèé-a cuèi ndàhú-aⁿ dico ní dáquëe-aⁿ nihí díhúⁿ sã cuááⁿ sã cáxí-áⁿ ní cùu —cachí-gá xáhaⁿ-gã xii-güedé.

13

Jèsús càchí-gá sá ngóyó veñúhu
(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sã ío cùnuu, te ìⁿ téè xica cuu ndíhi-gá ní xáhaⁿ-dè xii-gá:

—jMèstrú, cundehe nã ío vii ní sáá veñúhu-aⁿ ndíhi nchaa vehe nèhe tnaha ndíhi-xi, te ío vii ndãa nchaa yúú yíhi! —càchí-dé xáhaⁿ-dè xii-gá.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe sã cùñúhu-n-a vitna sáá nduu te vá cùndùu-gá-xi dàtná cáá-xí vitna, chí ní ìⁿ-gá yúú vã códó nchíhi tnaha-xi, chí ndíhi ngoyo —càchí-gá xáhaⁿ-gã xii-dé.

Nàcuáa cada-xi nduu ta cuyatni naa ñuyúú

(Mt. 24:3-28; Lc. 21:7-24; 17:22-24)

3 Te Jèsús ní xica-gá ndihi cue téé xica cuu ndihi-gá cuáháⁿ ndihi ñaha-gă xii-güedé yucu nàni Olívú, te yucu Olívú-áⁿ tũu ndáá núú cáá veñúhu càhnu sá ïo cùnunu. Te Jèsús ní quexio-gá ndihi-güedé yucu Olívú-áⁿ, te xíaⁿ nĩ ngóo-gá te núú núcõo-gá-áⁿ nĩ sáháⁿ té Pèlú ndihi té Jàcobó ndihi té Juáá ndihi té Ndríxí, te dayuhu nĩ xáhaⁿ-güedě xii-gá:

4 —Cuíní-ndí cachí tnúhu-n nã nduu dúcaⁿ cada-xi ngoyo veñúhu càhnu sá ïo cùnunu, àdi nándi cùu sá cádá-xí cuendá cutnùní iní-ndí sá sà ta cuyatni nduu ducaⁿ cada-xi —cachí-güedé xáhaⁿ-güedě xii-gá.

5 Te Jèsús ní xáhaⁿ-gă xii-güedé:

—Ío quihi iní-ndó cùndecu-ndo te tnúhu-áⁿ cãháⁿ-xi nàcuáa naníhí tãhú ñáyiu. 11 Te òré ná càndeca ñaha ñáyiu xii-ndo quihíⁿ núú cuè téé cùchiuⁿ cuáha cuendá ñáhă-yu, te òré vátá sàá-gá-ndó nũú-güedě te vá cání iní-ndó nũu nása cunduu tnúhu cũñaha-ndo xii-güedé. Chi òré-nã te Yá Ndiõxí dacàhu iní ñáhă-gă xii-ndo nása cunduu tnúhu cũñaha-ndo xii-güedé, te ñu-ni tnúhu sá dácàhu iní ñáhă-gă-áⁿ cũñaha-ndo xii-güedé. Te ñá díú mèe-ndo cáháⁿ-ndó chi Espiritú Yá Ndiõxí cáháⁿ-xi yuhu-ndo. 12 Te dava cue téé cuáha cuendá-güedé ñani-güedé núú cuè téé cùchiuⁿ cuendá

7 Te òré ná nihí-ndó tnúhu sá nàá-güedé ndèni ní cuu, te vá yuhú-ndó chi dacuití sã dúcáⁿ càda-xi, dico vátá sàá-gá nduu nàa ñuyúú òré ducaⁿ càda-xi. 8 Chi cue téé ñiⁿ nacióⁿ nàá-güedé ndihi cue téé ingá nacióⁿ, te titní ñuú ngúíta-güedé nàá-güedé, te

titní xichi ñuyúú nĩhi vèhi tnáa, te titní tucu xichi ñuyúú coo tnamá, te ío-gá cuéhé sã yãha ñáyiu. Te nchaa sá dúcáⁿ càda-xi-áⁿ cúú-xí tnũndõho sá vítná vãha vãha quèsaha-xi sácúú-xí cuè ñáyiu ndècu ñuyúú-a.

9 'Dico nchòhó ío quihi iní-ndó cùndecu-ndo, chi nchaa ñáyiu na cùu úhú iní ñáhă xii-ndo cuáha cuendá ñáhă-yu xii dava-ndo núú cuè téé cùchiuⁿ, te candeca ñaha-güedě xii-ndo quihíⁿ xití veñúhu-güedé, te yacáⁿ caniha-güedé xii-ndo. Te quihíⁿ-ndó núú cuè téé yindaha nacióⁿ àdi núú dâva-gá cue téé cùnunu sá cuendá-í, te nchòhó nihí-ndó nàcuáa cada-ndo cãháⁿ váha-ndo cuendá-í núú-güedě.

10 Te cùmání-gă sáá nduu nàa ñuyúú-a te sa cuténunu tnúhu-í nĩ càa xico ñuyúú-a, te tnúhu-áⁿ cãháⁿ-xi nàcuáa naníhí tãhú ñáyiu. 11 Te òré ná càndeca ñaha ñáyiu xii-ndo quihíⁿ núú cuè téé cùchiuⁿ cuáha cuendá ñáhă-yu, te òré vátá sàá-gá-ndó nũú-güedě te vá cání iní-ndó nũu nása cunduu tnúhu cũñaha-ndo xii-güedé. Chi òré-nã te Yá Ndiõxí dacàhu iní ñáhă-gă xii-ndo nása cunduu tnúhu cũñaha-ndo xii-güedé, te ñu-ni tnúhu sá dácàhu iní ñáhă-gă-áⁿ cũñaha-ndo xii-güedé. Te ñá díú mèe-ndo cáháⁿ-ndó chi Espiritú Yá Ndiõxí cáháⁿ-xi yuhu-ndo. 12 Te dava cue téé cuáha cuendá-güedé ñani-güedé núú cuè téé cùchiuⁿ cuendá

cahni ñaha-güedě. Te dava cue tée cùu tátá ñu-ni ñucaⁿ càda-güedé cuáha cuendá-güedé déhe-güedé núu cue tée cùchiuⁿ. Te dava cue tée cùu déhe cuu úhú ñi-güedé tátá-güedé ñihi ñáha-güedě, te cuáha cuendá ñáhá-güedě xií-yu núu cue tée cùchiuⁿ cuendá cahni ñaha-güedě xii-yu. ¹³ Te ío cuéhé ñáyiu cuu úhú ñi ñáhá-yu xii-ndo sá cuendá-í, dico nchaa nchòhó ñáyiu na càda ndee-ni ñi canchicúⁿ ñihnu ñaha-ni xii-í te naníhí tàhú-ndó.

¹⁴ Te ñdi Dániel tée ní xóo cáháⁿ tnúhu Yá Ndióxi ndéé sanaha ñi chídó tnúni ñdi núu tütú ñdi cuendá ñi sá dáquèe tíhú Yá Ndióxi cundecu ñi xichi núu ña túú tàú-xi cundecu-xi, te xíáⁿ cada-xi sá vǎ cúndecu-gá ñi ñi ñáyiu xíáⁿ. Te cada cuendá váha-ndo ñacuáa ní cáháⁿ ñdi, chi nduu na quini-ndó xíáⁿ cundecu-xi ñi xichi núu ña túú tàú-xi cundecu-xi, te dàvá-áⁿ nchaa ñáyiu xíndecu distritú Júdeá xini ñuhu-xi cunú-yu quíhíⁿ-yu xití yucu. ¹⁵ Te nchaa ñáyiu ndáa ndódó ñiquí véhé-xí vǎ ñihu-gá-yu vehé-yu quehéⁿ-yu ñi ndachíuⁿ-yu canehé-yu quíhíⁿ. ¹⁶ Te nchaa ñáyiu cuáháⁿ yucu ñi vǎ ñuhú-gá-yu vehé-yu cúnúquehéⁿ-yu dóo-yu. ¹⁷ Te ñdáhú ní cuu nchaa ñáyiu ñi ñi ñuhú ñehe-xi, ñihi cue ñáyiu ñi ñi xíndeca déhe vitna sá ñi na saá nduu ñucaⁿ cada-xi! ¹⁸ Te nchòhó ío chí càcáⁿ táhú núu Yá Ndióxi cuendá

sá vǎ ñucáⁿ ndòho-ndo yóo quidé vǐxiⁿ-xi. ¹⁹ Chi dàvá-áⁿ coo tnúndòho, cahnu vihi ñuyíu, te vátá ñi nduu-gá coo tnúndòho cahnu vihi-áⁿ ndéé cúnáhá ní cadúha Yá Ndióxi ñuyíu, chí ñu-ni dàvá-áⁿ coo tnúndòho cahnu vihi-áⁿ, te ñi núu cuáháⁿ núu véxi vǎ cóo-gǎ tnúndòho-áⁿ. ²⁰ Te Yá Ndióxi càchí-gá sá vǎ ío vǎi nduu coo tnúndòho cahnu vihi-áⁿ ñuyíu sá cuendá nchaa ñáyiu ní cáháⁿ-gá cundecu ñihi-gá. Te núu vǎi nduu na coo tnúndòho-áⁿ, te vǎ yóo cácu ñihnu.

²¹ Te dàvá-áⁿ cǐñaha ñáyiu xii-ndo: “Chí cúndèhe íha, chí íha ní quexíu Cristú Yá ní tendaha Yá Ndióxi véxi ñuyíu-a”, duha cúnáhá-yu xii-ndo. Ádi quesahá-yu: “Chí cúndèhe yacáⁿ chí yacáⁿ ndécú-gǎ”, quesahá-yu. Te vǎ quíndáa ñi-ndó tnúhu cáháⁿ-yu. ²² Te coo cue tée ñani-güedé méé-güedě ñatná ñani-í te cachí-güedé sá cúu-güedě Yá ní tendaha Yá Ndióxi véxi ñuyíu-a. Te dava-güedé cachí-güedé sá cúu-güedé cue tée cáháⁿ tnúhu Yá Ndióxi dico ña ñdáhú sá cúu-güedé cue tée cáháⁿ tnúhu-gá, te cada-güedé ñi ní núu sá vǎ yóo ñahí ñacu cada cuendá ñdáhú-güedé ñáyiu, te caní ñi-güedé ñdáhú-güedé ndéé cue ñáyiu ní cáháⁿ Yá Ndióxi cundecu ñihi-gá. ²³ Te vitna ío váha cuáha-ndo cuendá, te quíhí ñi-ndó cundecu-ndo, chí nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñaní tnáhá nchàa ñáyiu

(Mt. 24:29-35,42-44; Lc. 21:25-36)

24 'Te nà yáha-ni coo tnúndòho cahnu vihi-án, te vá dáyèhé-gá nchícanhii te ni vá dáyèhé-gá yóó. 25 Te ngoyo nchaa chódíní ndéè andiù, te quidi-xi andiù. 26 Te dàvá-án quini ñáhá nchàa ñáyiu xii yúhú Tée cùu ñaní tnáhá-yu ncháá-yu quee-í andiù quixi-í ichi xití vícò, te quini-yu sá ïo càhnu cuu-í, te quide-í nchaa sá vãha. 27 Te tendaha-í cue espíritú xínú cuèchi núú-í quíhíⁿ-xi nadatàcá-xi nchaa ñáyiu ní cáháⁿ-í chitnahá ñáhá xii-í xíndecu ni càa xico ñuyíú.

28 'Te cundehe-ndo nàcuáa quide yutnu ngúxí, chi yutnu-án ndúú yùte núú dìté-xi te nàtahú ndaha-xi, te òré ducaⁿ quide-xi te càchí-ndó sá sà ní cuyatni nuu cahni. 29 Te ducaⁿ sàtnahá-xi cada-xi òré ná quini-ndó càda-xi nchaa nacuéa ní cáháⁿ-í, te cutnùní iní-ndó sá sà ní cuyatni vii-ná nduu nàa ñuyíú. 30 Te na càchí tnúhu ndáá-í xii-ndo sá òré vátá cùu-gá cue ñáyiu xíndecu ñuyíú-a vitna, te cada-xi nchaa nàcuáa ní cáháⁿ-í. 31 Te andiù ndihí ñuyíú-a chi ndihí nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá.

32 'Dico ñá túú cùtnuní ná nduu quixi tucu-í, te ni ñá túú cùtnuní ná òré chi vá yóo xini, te ni cuè espíritú xínú cuèchi núú Yá Ndiòxí ñá túú xini-xi ná nduu quixi-í,

te ni mée yúhú tée cùu Déhe Dútú Ndiòxí ñá túú xini-í ná nduu quixi tucu-í, chi ñ^{ndi} díi-ni mee Tàtà-í Dútú Ndiòxí xini-gá núu ná nduu quixi-í.

33 'Te nchòhó xini ñùhu-xi sá ïo quihí iní-ndó cùndecu-ndo, te cáháⁿ ndihí-ndo Yá Ndiòxí, chi ñá túú xini-ndó ná nduu quixi tucu-í. 34 Te na càchí tnúhu-í xii-ndo cuendá ñⁿ tée cùní quíngaca cuu xica. Te tée-áⁿ cùmání-gá quee-dé vehe-dé te ní xáhaⁿ-dè xii cue tée xinu cuechi núú-dè sá ná càdá cuendá-güedé vehe-dé. Te ní sáñaha-dè xii-güedé ndí dííⁿ núú-güedé chiuⁿ cada-güedé. Te ní xáhaⁿ-dè xii tée ndéè yuyèhe sá ná cùndecu túha-ni-dé yuyèhe ndéè nàsáá-dé. 35 Te duha nduu tnúhu cáháⁿ-í cuendá nchòhó cùndecu túha-ndo, chi ñá túú xini-ndó ná nduu te ni ñá túú xini-ndó ná òré quixi tucu yúhú Yaá cúú Xitohó-ndó, núú òré sa ní cundiquⁿ, àdi dava niú, àdi oré sa ní cana uuⁿ líhi, àdi oré sa ta cùdító cuáháⁿ, núu xíáⁿ ïo chí cùndecu túha. 36 Te duha cáháⁿ-í chí na cuáháⁿ òré ñá túú ná yíhí iní-ndó quèxio-í, te ñá túú ndècu túha-ndo. 37 Te dàtná-ni xáhaⁿ-í xii nchòhó sá cùndecu túha-ndo, te diù-ni ducaⁿ xáhaⁿ-í xii nchaa dava-gá ñáyiu sá cùndecu túha-yu — càchí-gá xáhaⁿ-gá xii-güedé.

14

Ndùcu-güedé nàcuáa cada-güedé cahni-güedé Jesús

(Mt. 26:1-5; Lc. 22:1-2; Jn. 11:45-53)

1 Te cùmání ùú-gá nduu te quesaha vico pascuá, vico xèxi ñáyiú pàá sá ñà túú yìhi levadurá. Te cue dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuendá tnì ñaha-güedé xii-gá te cahni ñaha-güedé.

2 Te ní xítñaha-güedé:

—Váha-gá sá vã tníí-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —càchí-güedé xítñaha-güedé.

Íñ ñadìhí chíhí-áⁿ àcítí díquí Jèsús

(Mt. 26:6-13; Jn. 12:1-8)

3 Te Jèsús ndécú-gã ñuú Bètaniá vehe ìñ téé nàni Xímú, téé ní tnahá cuéhé sã dátèhyú nihnu-xi yiqui cùnù-ó. Te yìhi Jèsús mèsa xéxí-gã ní quexìo ìñ ñadìhí néhé-áⁿ ìñ sá ñí cuáha yúú vãha yúú nánì àlabastrú, te xití xíãⁿ ñúhú àcítí sáháⁿ tnámí sã nánì nãrdú sá ío ndèyáhu, te ní táhú-áⁿ xíãⁿ te acítí ñúhú xití-xi-áⁿ ñí sódo-aⁿ díquí Jèsús. 4 Te ìñ ùú cue téé xíndecu-áⁿ ñí cudééⁿ-güedé sá dúcáⁿ ñí quide-aⁿ, te ní xítñaha-güedé:

—Ñá túú quide váha ñaha-ãⁿ dàcáⁿ quidé-áⁿ, chi íí ñí dácuita-aⁿ acítí váha-ãⁿ. 5 Chi váha-gá ñuú cuyáhu acítí-ãⁿ sá ùní cièndú díhúⁿ denàriú, te díhúⁿ sã cùyáhu acítí-ãⁿ cuu cuendá ñáyiú ndàhú ní cùu —cachí-güedé xítñaha-güedé.

Te ní tenáá-güedé ñaha-áⁿ sã dúcáⁿ ñí quide-aⁿ.

6 Te Jèsús ní xáhaⁿ-gã xii-güedé:

—Chí dáñá, vá dásatú-ndó ìní ñadìhí-a, chi sá ñí quide ñaha-aⁿ xii-í cúú-xí ìñ sá vãha. 7 Chi cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nánì òré càchí ìní-ndó te chindee-ndó-yu. Dico yúhú chi vá ncháá ndùu cundecu ndihi ñaha-í xii-ndo ñùyú-a. 8 Te ñadìhí-a ní quide-aⁿ ìñ sá vãha ndèé není ní ndacu-aⁿ, chi sá dúhá ñí quide ñaha-aⁿ xii-í ní chihi ñaha-aⁿ àcítí, te xíãⁿ cada ìní-ndó sã sá quide túha-aⁿ yiqui cùnù-í cuendá quíndúxi-xi. 9 Te na càchí tnúhu ndáá-í xii-ndo sã ndèni ní cuu nihí ñuyúú ná càháⁿ ñáyiú tnúhu-í, te càháⁿ-yu tnahá cuendá ñadìhí-a cuendá quini nchaa ñáyiú nàcuáa ñí quide-aⁿ, te ducaⁿ vã nàcuánaá-yu —càchí-gá xáhaⁿ-gã xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú ìní ñáhá xii-gá

(Mt. 26:14-16; Lc. 22:3-6)

10 Te té Jùdás Iscarioté ní sáháⁿ-dé ní ndatnúhu-dé ndihi cue téé cùu dútú cùnùu sá cuáha cuendá-dé Jèsús núú-güedé, te núú tnahá té Jùdás-áⁿ cúú ùxúú tnahá cue téé xica cuu ndihi-gá ní cùu. 11 Te òré ducaⁿ ñí ndatnúhu-dé ndihi-güedé, te ío ní cudí ìní-güedé, te ní xáhaⁿ-güedé xii-dé sá cuañaha-güedé díhúⁿ xii-dé. Te té Jùdás-áⁿ ñí ngúíta-dé ndúcú-dé nàcuáa

cada-dé cuáha cuèndá-dé
Jèsús núú-güedë.

*Cùdini Jèsús ndihi cue téé
xica cuu ndihi-gá*

*(Mt. 26:17-29; Lc. 22:7-23;
Jn. 13:21-30; 1 Co. 11:23-26)*

12 Te ní sáá nduu ní que-
saha víco pascuá, víco ñá túú
xèxi ñáyiú pàá sá ñà túú yíhi
levadurá, te diu-ni nduu-áⁿ
sáhní-güedë ìⁿ mbéé líhli
xèxí-yu nduu víco pascuá-áⁿ.
Te cue téé xica cuu ndihi Jèsús
ní xícáⁿ tnúhú-güedë núú-gá,
te xáhaⁿ-güedë xii-gá:

—Mèstrú, véxi-ndí xícáⁿ
tnúhú-ndí núú-n núu ndèé
cáá vehe cuiní-n càda túha-ndí
sá cùdini-o sacuaa nduu
víco pascuá —càchí-güedë
xáhaⁿ-güedë xii-gá.

13 Te Jèsús ní xáhaⁿ-gá xii
úú-ni tnàhá cue téé xica cuu
ndihi-gá:

—Chí cuàháⁿ xití ñuú-áⁿ,
te yàcáⁿ naníhí-ndó ìⁿ téé
tànehe yóó ndute, te téé-áⁿ
cándèndaha-ndo-dë quíhíⁿ.

14 Te núu ndèdacàa vehe na
ndíhu-dé te xíáⁿ quíhu-ndo.
Te cúñaha-ndo xii xítóhó
vehe-áⁿ: “Yáá cúú Mèstrú
càchí-gá sá núu ndèdacàa
xichi xití vehe-n cuñaha
núu-n xii-gá cùdini-gá ndihi
cue téé xica cuu ndihi-gá
sacuaa nduu pascuá”, duha
cúñaha-ndo. 15 Te dātnùní
danèhé ñáhá-dë xii-ndo
ìⁿ quartú cáhnú càa núú
ññu, chí vehe yòdo tnaha
cuu-xi, te sa ní quide
túha-dé nchaa sá nándíhi, te
nchòhó dicó-ñá comidá càda
túha-ndo cùdini-o —cachí-gá
xáhaⁿ-gá xii-güedë.

16 Te cue téé-áⁿ ní
xica-güedë cuáháⁿ-güedë xití
ñuú-áⁿ, te nchaa-ni nàcuáa ní
xáhaⁿ Jèsús ní cuu. Te ní quide
túha-güedë sá cùdini-güedë
ndihi-gá sacuaa nduu víco
pascuá-áⁿ.

17 Te sátá ní cundiquíⁿ te ní
quexío Jèsús ndihi ndi úxúú
cue téé xica cuu ndihi-gá.

18 Te cuánguihu-gá mèsá
ndihi-güedë cuèndá cùdini
ndihi ñaha-gá xii-güedë, te òré
yíhí-gá mèsá ndihi-güedë, te
xáhaⁿ-gá xii-güedë:

—Na càchí tnúhu ndáá-í
xii-ndo sá ìⁿ nchòhó cue téé
xèxi ndihi ñaha xii-í cuáha
cuèndá ñáhá-ndó núú cuè
téé cùu úhú iní ñáhá xii-í —
càchí-gá xáhaⁿ-gá xii-güedë.

19 Te sá dúcáⁿ ní xáhaⁿ-gá
xii-güedë, te nchaa-güedë ní
ngúíta-güedë cùndiyí-güedë.
Te da ìⁿ da ìⁿ-güedë
ní ngúíta-güedë xícáⁿ
tnúhú-güedë núú-gá, te
xáhaⁿ-güedë xii-gá:

—¿Ñá díú yúhú ducaⁿ sàni
iní-n càda-í-u? —càchí-güedë
xáhaⁿ-güedë xii-gá.

20 Te Jèsús ní xáhaⁿ-gá
xii-güedë:

—Diu-ni ìⁿ nchòhó cue
téé úxúú xícá cùu ndihi-í,
téé na dàquèndaha còhó òré
daquèndaha-í, téé-áⁿ cuáha
cuèndá ñáhá-dë xii-í núú
cuè téé cùu úhú iní ñáhá.
21 Te yúhú Téé cùu ñani
tnáhá-ndó nchàa-ndo ñuhu
ichi-í cuáháⁿ-í ndoho-í nàcuáa
cáháⁿ-xi núú tütú Yá Ndióxi.
Dico ndàhú ní cuu téé ducaⁿ
na cuáha cuèndá ñáhá xii-í
núú cuè téé cùu úhú iní ñáhá,
chí váha-gá sá vā cācú tēé-áⁿ

cundecu-dé ní cùu, te ñá díú sã ní cacu-dé te ducaⁿ càda-dé —càchí-gá xãhaⁿ-gã xii-güedé.

²² Te nini cùdini cue téé xica cuu ndihi Jesús ní queheⁿ-gã pàá, te ní ndacáⁿ táhú-gã núú Yã Ndiòxí, te dàtnùní ní táhú cuèchi-gá, te ní ngüita-gá dácãhũ ñaha-gã xii-güedé, te xãhaⁿ-gã:

—Chí quéhéⁿ pàá-a caxi-ndo, te cada iní-ndó sã cúú-xí dàtná yiqui cùñú-í —càchí-gá xãhaⁿ-gã xii-güedé.

²³ Te ní queheⁿ-gã vãsú ñúhú ndùdí ndéhé yoho yàha stilé, te ní ndacáⁿ táhú-gã núú Yã Ndiòxí, te dàtnùní ní ngüita-gá sãñaha-gã xii-güedé cuëndá coho-güedé luha luha sã ñúhú xití-xi, te nchaa-güedé ní xihí. ²⁴ Te ní xãhaⁿ-gã xii-güedé:

—Ndudí ndéhé yoho yàha stilé-a cada iní-ndó sã cúú-xí dàtná ñíñí-í sã cáti òré cahni ñaha-güedé xii-í. Te sã dúcáⁿ càti ñíñí-í xiãⁿ cutnùní ndáá sã Yã Ndiòxí cada-gá ñngá núú sã vãha sã cúú-xí vãi ñáyiu dàtná ní cachí-gá cada-gá.

²⁵ Te na càchí tnúhu ndáá-í xii-ndo sã vítná-nã duha xihí-í ndudí ndéhé yoho yàha stilé-a te vá cóhó-gã-í, dico na sãá nduu cundecu-í núú ndécú Yã Ndiòxí táxi tnùní-gá, te dàvá-án cada iní-í sã dàtná sã cóhó tùcu-í chí ío cudíí ñíñí-í —càchí-gá xãhaⁿ-gã xii-güedé.

Jesús càháⁿ-gá sã tẽ Pèlú cùñaha-dẽ xii ñáyiu sã ñà túú xini ñáhá-dẽ xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jesús ní xita-gá ñⁿ ndudú ndihi cue téé xica cuu

ndihi-gá, te dàtnùní ní xica-gá cuáháⁿ-gá ndihi-güedé yucu Òlívú. ²⁷ Te yacáⁿ ní xãhaⁿ-gã xii-güedé:

—Na càchí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yã Ndiòxí núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dẽ ndihi-güedi cuténuu”, duha càchí-xi núú tütú-gá. ²⁸ Dico na cùú-í te ndoto-í te codonuu-í núú-ndó quihíⁿ distritú Galileá —càchí-gá xãhaⁿ-gã xii-güedé.

²⁹ Te té Pèlú ní xãhaⁿ-dẽ xii-gá:

—Te cuèi nchaa-güedé ná dàndóo ñaha-güedé xii-n, dico yúhú chí vá dàndóo ñaha-í xii-n —càchí-dé xãhaⁿ-dẽ xii-gá.

³⁰ Te Jèsús ní xãhaⁿ-gã xii-dé:

—Na càchí tnúhu ndáá-í xii-n sã niú vitna cùmání-gã cana líhi úú xito, te úní xito cáháⁿ-n núú ñáyiu sã ñà túú xini ñáhá-n xii-í —càchí-gá xãhaⁿ-gã xii-dé.

³¹ Dico té Pèlú ní cáháⁿ ñíñí-dé, te xãhaⁿ-dẽ xii-gá:

—Cuèi na cùú ndihi ñaha-í xii-n dico vá càháⁿ-í núú ñáyiu sã ñà túú xini ñáhá-í xii-n —càchí-dé xãhaⁿ-dẽ xii-gá.

Te nchaa dava-gá cue téé xica cuu ndihi-gá diu-ni ducaⁿ ní xãhaⁿ-güedé xii-gá.

Jesús càháⁿ ndihi-gá Yã Ndiòxí ñⁿ xichi núú nání Gëtsemaní

(Mt. 26:36-46; Lc. 22:39-46)

32 Te Jèsús cuáháⁿ-gá ndihi cue téé xica cuu ndihi-gá ìⁿ xichi núú nání Gètsemaní. Te òré ní quexìo-gá ndihi-güedé xiáⁿ, te ní xáhaⁿ-gã xii-güedé:

—Chí cúnúçõo iha cun-detu-ndo na quihíⁿ-í yàcáⁿ cáháⁿ ndihi-í Yã Ndiõxí — cächí-gá xáhaⁿ-gã xii-güedé.

33 Te ndèca-gá té Pèlú, ndihi té Jàcobó, ndihi té Juàá cuáháⁿ, te ñá túú tñáhi-gá cúú vãha iní-gá te ní ngúita-xi súúni ndihú iní-gá. 34 Te ní xáhaⁿ-gã xii cue téé úní-áⁿ:

—Súúni ndihú iní-í dàtná sá cúú-í, te chí quéndõo iha te vá cùdú-ndó — cächí-gá xáhaⁿ-gã xii-güedé.

35 Te sa ñùnchíí luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndihi-gá Tátá-gã Dútú Ndiõxí sá núu vá cündèe iní-gá tau-nihnu ñaha-gã xii-gá cuendá nchaa nacuáa yáha-gá. 36 Te òré càháⁿ ndihi Jèsús Tátá-gã Dútú Ndiõxí, te xáhaⁿ-gã:

—Yòhó tátá mée-í, nchaandi túhú sá vãha ndàcu-n quide-n, te càháⁿ ndàhú-í núú-n núu vá cündèe iní-n tàunihnu ñaha-n xii-í cuendá sá vã ndòhò-í ná sáá òré, dico vá cáda-n nacuáa cächí iní mée-í chì cada-n nacuáa cächí mee-n — cächí-gá xáhaⁿ-gã xii Tátá-gã Dútú Ndiõxí.

37 Te sátá ñí yáha ní cáháⁿ ndihi-gá Tátá-gã Dútú Ndiõxí, te cuánuhú-gá núú ñí dándõo-gá cue téé úní-áⁿ, te xíxídi-güedé òré ní nasáá-gá, te ní xáhaⁿ-gã xii té Pèlú:

—Xímú, ¿náa sama xidí-n? ¿Náa ñá cündèe tñahi núú-n vã cùdú-ni-n cuèdicó ìⁿ òré-áⁿ? —cächí-gá xáhaⁿ-gã xii-dé.

Te ní xáhaⁿ tucu-gá xii-güedé:

38 —Te chí quéndõo tucu, te cuhuⁿ iní-ndó vã cùdú-ndó, te cáháⁿ ndihi-ndo Yã Ndiõxí cuendá sá vã dácáháⁿ ñáhá yucu ñávãha xii-ndo cáda-ndo sá ñá túú tàú-ndó cáda-ndo. Te na cächí tñuhu ndáá-í xii-ndo sá nchòhó cuíní-ndó cáda-ndo nchaa nacuáa càháⁿ-í dicó-ni sá ñá túú ñihí ndéé-ndó — cächí-gá xáhaⁿ-gã xii-güedé.

39 Te Jèsús ní xica tucu-gá cuáháⁿ-gá cáháⁿ ndihi-gá Tátá-gã Dútú Ndiõxí, te ñu-ni nacuáa ní xáhaⁿ-gã díhna xáhaⁿ tucu-gá. 40 Te òré ní yáha ní cáháⁿ ndihi-gá Tátá-gã Dútú Ndiõxí, te cuánuhú tucu-gá núú xíndecu cue téé úní xicá cùu ndihi-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúni ñuhu saní núú-güedé, te ñá ní ñihí-güedé tñuhu cúñaha-güedé xii-gá òré ní nasáá-gá. 41 Te ní sáháⁿ tucu-gá xito cùu úní ní cáháⁿ ndihi-gá Tátá-gã Dútú Ndiõxí, te òré ní nasáá tucu-gá núú xíndecu-güedé, te xáhaⁿ-gã xii-güedé:

—¿Te náa xidí-ni tucu-ndo?, te vitna vá cùdú-gá-ndó chí sa ní sáá òré cuáha cuendá ñáhá-güedé xii yúhú Téé cùu ñaní tñáhá-ndó nchàa-ndo núú cuè téé ndècu ichi cuehé ichi duha. 42 Te vitna chí ndácõo na quihíⁿ-ó chí sa véxi

tée cuáha cuendá ñáhá xii-í núú cuè tée cùu úhú iní ñáhá —càchi-gá xáhaⁿ-gá xii-güedé.

Ní tñii-güedé Jèsús ndécá ñàha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te càháⁿ dúcáⁿ-ní Jèsús ní quexìo té Jùdás. Te núú tnàhá tée-ánⁿ cúú ùxúú tnàhá cue tée xica cuu ndihi-gá. Te ndihi-dé vài cue tée ní quexìo, te dava-güedé xñehe-güedé machití te dava-güedé xñehe-güedé carrutí. Te cue tée-ánⁿ nǐ tendaha ñàha cue dútú cùnùu ndihi cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndihi cue tée cùu sacuéhé nǔú ñáyiu israél. ⁴⁴ Te té Jùdás tée cuáha cuendá ñáhá xii Jèsús sa ní xitnǔhu-dé cue tée-ánⁿ nàcuáa cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dǎ xii-güedé:

—Cundehe-ndo tée na tøyuhu-í, te tée-ánⁿ tñii-ndo-dé chi tée-ánⁿ cúú-dǎ tée ndèé iní-ndó, te ío quihi iní-ndó càndeca-ndo-dé quihíⁿ—duha ní xáhaⁿ-dǎ xii-güedé.

⁴⁵ Te òré ní quexìo té Jùdás ndihi cue tée-ánⁿ nǔú ndécú Jèsús, te ní xáhaⁿ-dǎ xii-gá:

—Mèstrú —càchí-dé xáhaⁿ-dǎ xii-gá.

Te ní tøyuhu ñàha-dé. ⁴⁶ Te nchaa cue tée ndihi-dé-ánⁿ nǐ tñii-güedé Jèsús cuendá candeca ñaha-güedǎ xii-gá quihíⁿ. ⁴⁷ Te ñⁿ cue tée cùndihi Jèsús ní tava-dé machití-dé, te ní xehndé-ni-dé ñⁿ xio lóho ñⁿ tée xinu cuechi núú dǔtú cùnùu, te ní quendeé duuⁿ lóho tée-ánⁿ. ⁴⁸ Te Jèsús ní

xáhaⁿ-gǎ xii cue tée ní tñii ñaha xii-gá-ánⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñii ñaha-ndo xii-í, dàtná quidé-ndó ñⁿ ñadúhú quidé ñaha-ndo xii-í. ⁴⁹ Te nchaa-ni nduu ní xiní-ndó nǐ xindecu-í xití veñúhu càhnu sǎ ío cùnùu ní xóo danèhé-í ñáyiu, te ñǎ túú ní tñii ñaha-ndo xii-í. Dico dàcutíí sǎ dúhá yáha-í cuendá quee ndáá-xi nàcuáa càháⁿ-xi núú tǔtú Yǎ Ndióxi —càchí-gá xáhaⁿ-gǎ xii-güedé.

⁵⁰ Te nchaa cue tée xica cuu ndihi-gá ní xinu-güedé ní dándóo ñaha-güedǎ xii-gá.

Ñⁿ tée cuechi nǐ xinu-dé

⁵¹ Te ñⁿ tée cuechi ndëndaha-dé Jèsús cuáháⁿ, te lavichi-dǎ, ñⁿ-ni dóo yádí yídúcúⁿ nuu-dé nihi-dé, te ní tñii ñaha-güedǎ xii-dé, ⁵² dico ní ndacu-dé ní quenuñi-dǎ te ní dándóo-dé dóo yídúcúⁿ nuu-dé-ánⁿ nǐ xinu-dé.

Jèsús ndécú-gǎ jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue tée ní tñii ñaha xii Jèsús ndécá ñaha-güedǎ xii-gá cuáháⁿ núú tée cùu dútú cùnùu-gá. Te xiáⁿ nǐ tacá nchaa dava-gá cue tée cùu dútú cùnùu, ndihi cue tée cùu sacuéhé nǔú ñáyiu israél, ndihi cue tée dàcuaha ñaha xii-yu nchaa tnúhu ní chídó tnùní ndíi Moisés cuendá cada-güedé jùndá. ⁵⁴ Te té Pèlú xica xica-ni nchicúⁿ ñáhá-dǎ xii-gá cuáháⁿ ní sáá-dé ndéé quehé vehe núú ndécú tée cùu dútú

cúnù-gá-án, te xíaⁿ ní ngóo teté-dé yuhu nùhú ndihì cue tée cùu poleciá.

55 Te cue tée cùu dútú cúnù ndihì nchaa dava-gá cue tée xíndecu jùndá ndúcú-güedě ñáyiú dacàa ìⁿ cuéchi díquí Jèsús cuendá ducaⁿ níhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé. 56 Te cuèi vài ñáyiú dàcaá-yu cuéchi díquí-gã dico mee-ni sã ní cahu iní mée-yu ní cáhán-yu, chi tucu càhán ìⁿ tucu càhán ìⁿ-yu. 57 Te davá-yu ní ndacuñí-yu te ní ngüíta-yu dàcaá-yu ìⁿ cuéchi neñúú díquí-gã, te xãhán-yu xii nchaa cue tée cùnùu:

58 —Nchúhú ní tecú dóho-ndí càchí-dé sá dánhòyo-dé veñúhu càhnu sá ìo cùnùu sá ní dácáa cuè tée ñuyíú-a, te dandàa tucu-dé ingá veñúhu saa, ðiu-ni núú cáá tnahí veñúhu-án te xití úní-ni nduu sa nadaxínu-dé, te vá cúú-gã-xi veñúhu sá ní dácáa cuè tée ñuyíú-a, duha càchí-dé ní tecú dóho-ndí —càchí-yu xãhán-yu xii-güedé.

59 Dico ni dùcaⁿ ñá túú ní cùu ìⁿnuú-yu nchaa tñuhu ní cáhán-yu.

60 Te tée cùu dútú cúnù-gá ní ndacuñí-dé tnuú nchaa ñáyiú, te xãhán-dě xii Jèsús:

—¿Ná cuendá duha ndùu tñuhu càhán ñáyiú-a cuendá-n? Te cáhán nùu nása ndùu tñuhu càhán-n —càchí-dé xãhán-dě xii-gá.

61 Dico Jèsús ñá túú tnahí ní cáhán-gá. Te tée cùu dútú

cúnù-gá-án ní xãhán tucu-dé xii-gá:

—Cuini-í cachí tñuhu-n xii-ndí nùu sá díú Crístú Déhe Yá Ndióxi Yá ní tendaha-gá véxi ñuyíú-a cùu-n. Te ðiu Yá Ndióxi cúú-gã Yá quidé càhnu-ndí —càchí-dé xãhán-dě xii-gá.

62 Te Jèsús ní xãhán-gã xii-dé:

—Ðiu Yá-án cúú-í, te na càchí tñuhu-í xii-ndo sã sàà nduu te quini-ndo yùhú Tée cùu ñani tnahá-ndó nchaa-ndo cunucóo-í xio cùha Dútú Ndióxi Yá ndácú quide nchaandi túhú sá vaha. Te davá-án quini ñahá-ndó xii-í quee-í andiu quixi-í ichi xití vícò —càchí-gá xãhán-gã xii-dé.

63 Te dútú cúnù-gá-án ní ndátá-dě dóo cáni nihnu-dé cuendá sá ña túú ní tnahá iní-dé nàcuáa ní cáhán Jèsús, te ní xãhán-dě xii nchaa cue tée xíndecu jùndá:

—Ñá túú-gã xini ñuhu-xi cue tée cáhán nùu ndáa sá ndècuéchi-dé àdi ñá túú ndècuéchi-dé. 64 Chi sa ní xíndedóho-o nàcuáa ndùu tñuhu ní cáhán-dé ní cáhán úhú-dé cuendá Yá Ndióxi, te nchaa-ndo chí càhán vitna núu nása sàni iní-ndó cùnduu cuendá tée-a —càchí-dé xãhán-dě xii-í-güedé.

Te nchaa-güedé ní cachí-güedé sá ná cúú-dé.

65 Te dava-güedé ní ngüíta-güedé ní tiú díí ñahá-güedě xii-gá, te ní dáðahu-güedé núú-gã, te ní ngüíta-güedé cániha-güedé xii-gá, te xãhán-güedé:

—¡Cáháⁿ ná cótó nă cúú tée ní caniha xii-n! — cachí-güedé xáhaⁿ-güedě xii-gá.

Te cue tée cùu poleciá ní cani-güedé núú-gă.

Té Pèlú cáháⁿ-dé núú ñăyiu sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú ñinu quide-güedé jündá, chi vehe yòdo tnaha cuu-xi, te té Pèlú núcõo-dé quehé vehe-áⁿ. Te ñⁿ xíchí xínú cuèchi núú dütú cùnùu-áⁿ ñi quexio-xi núú núcõo té Pèlú.

⁶⁷ Te òré ní xini ñáhá-xí xii-dé núcõo teté-dé yuhu ñuhú, te ní xindéhé ñaha váha-xi xii-dé, te xáhaⁿ-xi:

—Yòhó tnàhá-n cùu-n tée xica cuu ndihi Jesús tée ñuú Nazàrét —càchí-xi xáhaⁿ-xi xii-dé.

⁶⁸ Te té Pèlú ní xáhaⁿ-dě xii-xi:

—Yúhú ñà túú xini-í tée-áⁿ, te ní ñà túú cùnùnì iní-í nása ndùu tnúhu cáháⁿ-n —càchí-dé xáhaⁿ-dě xii-xi.

Te té Pèlú ní xica-dé cuáháⁿ-dé ndàa nacúaa nchii yuyèhe vehe-áⁿ, te ní cana ñⁿ líhi. ⁶⁹ Te xíchí xínú cuèchi-áⁿ ñi xini ñáhá tùcu-xi xii-dé, te xáhaⁿ-xi xii nchaa ñáyiu xindecu-áⁿ:

—Diu tée-áⁿ tnàhá-dé xicá cùu-dé ndihi tée ndèca-güedé cuánguihu-a —càchí-xi xáhaⁿ-xi xii-yu.

⁷⁰ Dico té Pèlú ñà túú ní ñnuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcáⁿ ñi xáhaⁿ xíchí-áⁿ xii-dé, te ní xáhaⁿ tùcu dava cue ñáyiu xindecu-áⁿ xii-dé:

—Ndáá sá tnàhá-n cùu-n tée xica cuu ndihi tée

ndèca-güedé cuánguihu-áⁿ chi cùu-n tée distritú Galileá, te cáháⁿ-n dàtná cáháⁿ-güedé —càchí-yu xáhaⁿ-yu xii-dé.

⁷¹ Te té Pèlú ní xáhaⁿ-dě xii-yu:

—Nchàcuiti Yá Ndiõxí sá yúhú cáháⁿ ndáá-í sá ñà túú xini-í tée càcunehe-ndo-áⁿ —càchí-dé xáhaⁿ-dě xii-yu.

⁷² Te òré-ni-áⁿ ñi cana tucu líhi xito cùu uú, te òré-áⁿ ñi ndacu iní té Pèlú nacúaa ní xáhaⁿ Jèsús xii-dé sá cùmání-gă cana ñⁿ líhi uú xito te únì xito cáháⁿ-dé núú ñáyiu sá ñà túú xini ñáhá-dě xii-gá. Te òré ducaⁿ ñi ndacu iní-dé nacúaa ní xáhaⁿ Jèsús xii-dé, te ní ndáhyú-dé ní ndixi cuèchi iní-dé.

15

Jèsús ndécú-gă núú tē Pilatú
(Mt. 27:1-2, 11-14; Lc. 23:1-5; Jn. 18:28-38)

¹ Te sátá ñi túndaá te cue tée cùu dütú cùnùu, ndihi cue tée cùu sacuéhé ñúu ñáyiu isràél, ndihi cue tée dàcuaha ñaha xii ñáyiu nchaa tnúhu ní chídó tnùnì ndii Moisés, ndihi nchaa dava-gá cue tée cùnùu ní xindecu jündá ní nataká-güedé, te ní dácútú-güedě Jèsús te ndèca ñaha-güedé xii-gá cuáháⁿ núú tē Pilatú. ² Te té Pilatú ní xicáⁿ tnúhú-dě núú Jèsús, te xáhaⁿ-dě xii-gá:

—¿Ndáá sá díú-n cùu-n tée yindaha ñaha xii ñáyiu isràél-áⁿ? —càchí-dé xáhaⁿ-dě xii-gá.

Te Jèsús ní xáhaⁿ-gă xii-dé:

—Diu-í yindaha-í-yu —càchí-gă xáhaⁿ-gă xii-dé.

³ Te cue tée cùu dútú cúnùu dacao-güedé vai cuéchi díquí-gă. ⁴ Te té Pilatú ní xícáⁿ tnúhú tùcu-dé núú-gă, te xăhaⁿ-dě xii-gă:

—Cáhán, ná cuendá ñă cáhán-n te cundehe nă ndée duha titní cuéchi dàcaa díquí ñáhá cuè tée-a xii-n — cächí-dé xăhaⁿ-dě xii-gă.

⁵ Dico Jèsús ñă túú tnàhí ni cáhán-gă te té Pilatú ío ní cuñúhu-dé sá dúcáⁿ ñà túú tnàhí ni cáhán-gă.

Cue ñáyiú xăhăⁿ-yu xii té Pilatú sá cahní-dě Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnahá nduu víco pascuá dácăcu té Pilatú ñⁿ tée yîhi vecaá chi ducaⁿ tnàhí quide-dé, te mee ñáyiú cáhán-yu te núu ndédacàa tée yîhi vecaá-áⁿ căcu-dé, te tée-áⁿ dácăcu-dé. ⁷ Te yîhi ñⁿ tée nàni Barrabás vecaá ndihí dava-gă cue tée cündihí-dé. Te té Barrabás-áⁿ ñă sanu ichi-dé ñáyiú ñúú ingá ichi, te ní ngúita-yu ndihí-dé ní cuu úhú iní-yu cue tée cùchiuⁿ, te ní sahani-dé ndiyi núu xăhăⁿ ní chihí ñaha-güedě vecaá xii-dé. ⁸ Te nchaá ñáyiú ní sáhán-yu núú tē Pilatú, te cáhán ndàhú-yu núú-dě sá ná cádá nàhi-ni-dé dàtná quidé-dě. ⁹ Te té Pilatú ní xăhaⁿ-dě xii-yu:

—¿Cuini-ndó să dácăcu-í tée yindaha ñaha xii ñáyiú israhél-ăⁿ? —cächí-dé xăhaⁿ-dě xii-yu.

¹⁰ Te ducaⁿ ñă cáhán té Pilatú, chi ní cutnùní iní-dé sá dicó sá cuedú iní cuè

dútú cúnùu núu xăhăⁿ ducaⁿ ñă quide-güedé ní sáha cuendá ñáhá-güedě xii Jèsús núú-dě.

¹¹ Te cue dútú cúnùu ní xăhaⁿ-güedě xii nchaá ñáyiú sá ná cuñáhá-yu xii té Pilatú dácăcu-dé té Barrabás, te ní quidé-yu năcuáa ní xăhaⁿ-güedě. ¹² Te té Pilatú ní xícáⁿ tnúhú-dě núú-yu, te xăhaⁿ-dě xii-yu:

—¿Ná cuini-ndó cãda-í tée cächí-ndó yindaha ñaha xii ñáyiú israhél-i? —cächí-dé xăhaⁿ-dě xii-yu.

¹³ Te nchaá-yu níhi ní cáhán-yu, te xăhăⁿ-yu xii-dé:

—¿Cata caa-dé núú cùrúxí! —cächí-yu xăhăⁿ-yu xii-dé.

¹⁴ Te té Pilatú ní xăhaⁿ-dě xii-yu:

—¿Te ná cúú cuéchi ní quide-dé te núu ducaⁿ cuini-ndó cãda-í-dé-i? —cächí-dé xăhaⁿ-dě xii-yu.

Dico nchaá-yu uuⁿ-gă níhi ní cáhán-yu, te xăhăⁿ-yu xii-dé:

—¿Cata caa-dé núú cùrúxí! —cächí-yu xăhăⁿ-yu xii-dé.

¹⁵ Te té Pilatú ní quide-dé năcuáa ní xăhăⁿ-yu xii-dé cuendá sá cúdiu-dé núú-yu, te ní dácăcu-dé té Barrabás, te ní táúchíúⁿ-dē ní cani-güedé Jèsús ndihí ñă. Te sátá dúcáⁿ ñă quide ñaha-güedě xii-gă, te ní táúchíúⁿ-dē candeca ñaha-güedě quíhíⁿ cata caa ñaha-güedě xii-gă núú cùrúxí.

¹⁶ Te cue tée cùu sandadú ndécá ñaha-güedé xii-gă cuáhánⁿ vechíuⁿ, te diu-ni xíaⁿ cúú vèhe tée cùu gobiernú. Te xíaⁿ ñă tacá nchaá dava-gă cue tē cùu sandadú. ¹⁷ Te xíaⁿ ní dăcuíhnú ñaha-güedé

xii-gá ñⁿ dóo tǐcuèhé víhí, te ní cadúha-güedé ñⁿ coróná ñnu ní chihi-güedé díquí-gǎ. ¹⁸ Te ní ngúíta-güedé níhi càháⁿ-güedé cúdíquí ndeé ñáhá-güedé xii-gá, te xǎhaⁿ-güedé:

—¡Ío càhnu cuu yohó téé yindaha ñaha xii ñáyiú isràél!
—càchí-güedé xǎhaⁿ-güedé xii-gá.

¹⁹ Te càni-güedé díquí-gǎ ndihi ñⁿ carrutí, te tiú díí ñáhá-güedé xii-gá, te ngüñí xití-güedé núú-gǎ quidé-güedé sá néhé-güedé sá yíñuhu núú-gǎ dico ñá ndáá chi dicó cúdíquí ndeé ñáhá-güedé xii-gá. ²⁰ Te sátá dúcáⁿ ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóo tǐcuèhé víhí sǎ ñí dácuihnú ñaha-güedé, te ní dándíúnuu ñaha-güedé xii-gá dóo méé-gǎ. Te dátñuní ndécá ñaha-güedé cuáháⁿ núú catá càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndihi Jèsús ní naníhí-güedé ñⁿ téé ñnuú Cirené nání-dé Xímú, te déhe-dé cúú ñⁿ téé nàni Lijandrú, ndihi ingá téé nàni Rúfú. Te té Xímú-áⁿ ñúhú-dé ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndèca-güedé Jèsús cuáháⁿ ñⁿ xichi núú nání

Gölgotá, te tnúhu-áⁿ quée-xí: ñⁿ xichi núú nání yiqui díquí ndíyi, duha quèe-xi tnúhu-áⁿ. ²³ Te ní sǎñaha-güedé xii-gá ndudí sá ñí quée yúcú nání mǐrrá coho-gá ní cùu dico ñá túú ní xíhi-gá. ²⁴ Te ní sata caa ñaha-güedé xii-gá núú cùrúxí. Te sátá dúcáⁿ te cue téé cùu sandadú-áⁿ ñí xito ndeé-güedé núu ndèdaca-güedé cuu cuendá-güedé dóo-gǎ.

²⁵ Te cùu-xi caá ñⁿ dátñéé òré ní sata caa ñaha-güedé xii-gá núú cùrúxí. ²⁶ Te ní taxi ndecu-güedé ñⁿ sá ndeé lètrá núú tǎcàa-gá. Te lètrá-áⁿ càháⁿ-xi ná cuendá ducaⁿ ñí quide ñaha-güedé xii-gá. Te duha càháⁿ lètrá-áⁿ: “Tée yindaha ñaha xii ñáyiú isràél”, duha càchí-xi. ²⁷ Te tnàhá úú cue téé cùu ñadúhú ñí sata caa-güedé diu-ni núú cùrúxí tucu. Te ñⁿ-dé ní sata caa-güedé xio cùha-gá, te ingá-dé ní sata caa-güedé xio dátñi-gá. ²⁸ Te ducaⁿ ñí cuu chi ní quee ndáá-xi nàcuáa càháⁿ-xi núú tütú Yǎ Ndiòxí núú càchí-xi: “Ñⁿ-ni ñí quide ñaha-güedé xii-gá ndihi cue téé ndècu cuéchi-xi”, duha càchí-xi núú tütú-gá.

²⁹ Te nchaa ñáyiú yǎha yatni núú tǎcàa-gá dácucó-yu díquí-yu te xǐcuèhé ñáhǎ-yu xii-gá, te xǎhǎⁿ-yu:

—Te ná cuendá ducaⁿ càa-n taca-n xiáⁿ, te càchí-n sǎ dǎngoyo-n veñúhu càhnu sá ío cùnuu te dandàa-ñ ingá veñúhu saa, te xití úní-ni nduu sa nadañinu-n càchí-n. ³⁰ Te vitna tanuu núú

cùrúxí-áⁿ dàcácu-n mèe-n — cachí-yu xáháⁿ-yu xii-gá.

31 Te ñi-u-ni ducaⁿ ñi quide cue tée cùu dùtú cùnùu, ndihi cue tée dàcuaha ñaha xii ñáyi u nchaa tnúhu ní chídó tnùní ndíi Moisés, chi ní cudíquí ndeé ñáhá-güedé xii-gá, te ní xitnàha-güedé:

—Tée-a ní ndacu-dé ní dácácu nihnu-dé ñáyi u, ¿te ná cuendá ñá ndácú-dé dàcácu nihnu-dé méé-dé-i? 32 Te núu ndáá sá díú-dé cúu-dé Cristú Yaá ní tendaha Yá Ndióxi véxi ñuyíu-a quindaha ñaha xii ñáyi u isráel, te na cundehe-o nuu-dé núu cùrúxí, cuendá quíndáá iní-ó-dé — cächí-güedé xitnàha-güedé.

Te ndeé tnàhá cue tée tàcaa xio xio ñi-ñi-gá xicuèhé ñáhá-güedé xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee ñihí ñuyíu, te ducaⁿ-ni càa ní cuu ndeé caá úní sacuaa. 34 Te ñi-u-ni òré caá úní sacuaa-áⁿ ñihí ní cáháⁿ Jèsús, te xáháⁿ-gá xii Tátá-gá Dùtú Ndióxi:

—Elóí, Elóí, láma sabàctaní —cächí-gá xáháⁿ-gá.

Te tnúhu-áⁿ quée-xí: Ndióxi méé-í, Ndióxi méé-í, ná cuendá ní dáñá ñaha-n xii-í, duha quèe-xi tnúhu-áⁿ.

35 Te dava cue tée xíndecu yatni núu tàcàa-gá-áⁿ ñi tecú dóho-güedé nàcuáa ní cáháⁿ-gá, te ní xitnàha-güedé:

—Chí cùndédóho chí càna-dé té Èliás —cächí-güedé xitnàha-güedé.

36 Te ñiⁿ cue tée xíndecu-áⁿ xínú-dé ní sáháⁿ ní chindóyo-dé

luha cáchí xití ndudí íá, te ní chinenu-dé díquí ñiⁿ yutnu càni te ní ndocaní-dé chíhí-dé yuhu-gá cuendá coho-gá. Te ní xáháⁿ cuè tée xíndecu-áⁿ xii téé-áⁿ:

—Cundetú tnaa na cundehe-o nacoto núu quixi té Èliás nunehe ñaha-dé xii-dé núu cùrúxí —cächí-güedé xáháⁿ-güedé xii-dé.

37 Te Jèsús ñihí ní canasaa-gá te ní xihí-ni-gá. 38 Te sátá dúcáⁿ te ní ndátá dǒo cúu còrtiná xití veñúhu càhnu sá ío cùnuu ní quée dava ndáá, te ndàa núu ñinu ní ngúita-xi ní ndátá. 39 Te tée cùu capitáⁿ nútñi-dé ndàa núu Jèsús, te ndèhe-dé nàcuáa ní quide-gá òré ní xihí-gá, te ní cachí-dé:

—Sá ndáá ndisa sá díú tée-a cùu-dé Déhe Yá Ndióxi ní cùu —duha ní cachí-dé.

40 Te xica xínutñi ñiⁿ úú ñáyi u ñihí ndéhé-yu nchaa nàcuáa ní quide ñaha-güedé xii Jèsús, te tnàhá tá Màriá Magdalená, ndihi tá Salómé, ndihi tá Màriá náná té Chèé ndihi té Jacobó té cächí-güedé cúu líhli-gá. 41 Te cue ñáyi u ñihí-áⁿ ñi xica cuú-yu ndihi Jèsús distritú Galileá ní xinu cuèchí-yu núu-gá. Te cue ñáyi u ñihí-áⁿ nchícúⁿ ñáhá-yu xii-gá ní quexio ndeé ñuú Jerusalén ndihi dava-gá ñáyi u ñihí nchícúⁿ ñáhá xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

42 Te cùu-xi nduu vispré nduu ndetatú ñáyi u. Te

nduu-ǎⁿ xǐquide túha-yu sá cúu ìngá nduu nduu ndètatú-yu-áⁿ, te diu-ni nduu-ǎ sa ní cuaa vihi, ⁴³ te ìⁿ téé nàni Cheé téé ñúú Arimateá ní cuyi-dě ní sáháⁿ-dé núú tǎ Pilatú, te ní xáhaⁿ-dě sá nǔu vá cùndèe iní-dé daña-dě chindúxi-dé yiqui cùñú Jèsús. Te tnahá té Chèe-áⁿ cúú-dě ìⁿ téé cùnūu cundihi-dé cue téé quide jundá, te tnahá-dé ndétú-dě sáá nduu ndihu ndaha ñàha Yá Ndiòxí xii-dé ndihi cue ñáyiú. ⁴⁴ Te té Pilatú ío ní cuñúhu-dé sá dúcáⁿ ío ndihi ní xihí Jèsús, te ní cana-dé téé cùu capitáⁿ ní xicáⁿ tñuhú-dě núú-dě nǔu ndisa sá sà ní xihí-gá. ⁴⁵ Te téé cùu capitáⁿ-áⁿ ñí xáhaⁿ-dě xii té Pilatú sá ndàá ní xihí Jèsús, núu xiáⁿ té Pilatú-áⁿ ñí sáha-dé tñuhu chindúxi té Chèe-áⁿ yiqui cùñú-gá. ⁴⁶ Te té Chèe-áⁿ ñí saaⁿ-dé ìⁿ dóó vǎha, te ní sáháⁿ-dé ní nunehe-dé yiqui cùñú Jèsús núú cùrúxí, te ní chidúcúⁿnuu-dé yiqui cùñú-gá dóó vǎha sá ñí saaⁿ-dé-áⁿ, te dàtnùnì néhé-dé yiqui cùñú-gá cuáháⁿ ní chihi-dé ìⁿ yaú nchiì yiqui naha càva, te ní sadí-dé yuhu yaú-áⁿ ndihi ìⁿ yúú quèhéⁿ. ⁴⁷ Te tá Màriá Magdalèná, ndihi tá Màriá nǎná tǎ Chèe ní xiní-yu núú ñí chihi-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sáta ñí cundiquⁿ nduu ndètatú ñáyiú, te tá Màriá

Magdalèná, ndihi tá Salómé, ndihi tá Màriá nǎná tǎ Jàcobó ní saaⁿ-yu acití sàháⁿ tñámí cuèndá canehé-yu quihíⁿ chihí-yu yiqui cùñú Jèsús. ² Te ndumìngú nehé-ni òré vitna vǎha vǎha ní xínu coto núú nchìcanchii ní quexió-yu núú nchiì yaú yihí yiqui cùñú Jèsús. ³ Te ní xitnahá-yu:

—Yoo cùñaha-o xòcani yúú ndèdí yuhu yaú-a, chi vá yòo tnahí ndècu iha —cachí-yu xitnahá-yu.

⁴ Te òré ní xindéhé vǎha-yu te ní xiní-yu sá yúú cáhnú ndèdí yuhu yaú-áⁿ ìⁿ xio-ná ndécú. ⁵ Te cuánguihú-yu xití yaú-áⁿ, te ní xiní-yu nùcúo ìⁿ espíritú xínú cuèchi núú Yá Ndiòxí ndàa xio cuhá-yu, te càa-xi datná cáá ìⁿ téé cuechi, te ñihnu-xi ìⁿ dóó cuixíⁿ dóó cání, te ní yùhú-yu òré ní xiní-yu espíritú-áⁿ. ⁶ Te espíritú-áⁿ ñí xáhaⁿ-xi xii-yu:

—Vá yùhú-ndó, chi yúhú sa cùtnunì iní-í sá nchòhó véxi-ndo nànducu-ndo yiqui cùñú Jèsús téé ñúú Nazàrèt téé ní sahani-güedé núú cùrúxí, dico ñá túú-gǎ yiqui cùñú-dé ndécú ìha chi sa ní ndoto-dé, te chí cùndèhe núú ñí sacáⁿ-güedé yiqui cùñú-dé te quiní-ndó ñá ñá túú-gǎ-dé. ⁷ Te chí cuáháⁿ núú ndécú tǎ Pèlú ndihi dava-gá cue téé ní xica cuu ndihi-dé, te duha cùñaha-ndo xii-güedé: “Jèsús codonùu-gá núú-ndó quihíⁿ distritú Galileá, te yàcáⁿ quiní-ndó-gǎ dàtná ní cachí-gá xii-ndo”, duha cùñaha-ndo xii-güedé —càchí

espíritú-áⁿ xǎhaⁿ-xi xii-yu.

⁸ Te cue ñáyiú ñáhi-áⁿ ïo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ïo ní yùhú-yu, te ñá túú tnàhí ná tnúhu ní xǎhⁿ-yu xii cue ñáyiú ní naníhí-yu ichi cuèndá sá ïo ní yùhú-yu.

Tá Màriá Magdalèná ní xiní-xi Jèsús

(Jn. 20:11-18)

⁹ Te sátá dúcáⁿ ñi ndoto Jèsús ndumìngú nehé-ni-áⁿ, te díhna nuu-gǎ tá Màriá Magdalèná ní quee túu-gá núu-xi, te ñi tá Màriá-áⁿ cúu-xí xíhí ñi xíhi ñaha ùsá espíritú cúndíhi yucu ñáváha ní cùu, te Jèsús ní queñuhu-gá nchaa espíritú-áⁿ yiqui cùñú-xi. ¹⁰ Te xíhí-áⁿ ñi sáhá-xi ní xítñúhu-xi cue téé ní xica cuu ndíhi Jèsús nàcuáa ní cuu, te xíndáhi-güedé sá ndíhú iní-güedé òré ní quexìo-xi núu ndécú-güedé. ¹¹ Te òré ní xáhaⁿ tá Màriá xii-güedé sá ñi ndoto Jèsús ndíhi sá ñi xiní ñáhá-xí xii-gá, te ñá túú ní sàndáá iní-güedé.

Jèsús ní quee túu-gá núu ùú cue téé ní xica cuu ndíhi-gá

(Lc. 24:13-35)

¹² Te úú tnàhá cue téé ní xica cuu ndíhi Jèsús ñúhú-güedé ichi cuáháⁿ-güedé yucu, te uuⁿⁱ ní quee túu-gá núu-güedé, te ní dácótó ñaha-xi xii-güedé sá ñá túú-gǎ cáá-gǎ dàtná cáá-gǎ. ¹³ Te cue téé úú-áⁿ ñi xica-güedé cuáháⁿ-güedé ní xítñúhu-güedé nchaa dava-gá cue téé ní xica cuu ndíhi-gá

sá ñi xiní ñáhá-güedé xii-gá, dico ñi-ni ducaⁿ ñá túú ní sàndáá iní cue téé-áⁿ tnúhu ní cáháⁿ-güedé.

Jèsús xǎhaⁿ-gǎ xii cue téé ní xica cuu ndíhi-gá nàcuáa ndiú chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndí ùxí ñiⁿ cue téé ní xica cuu ndíhi Jèsús yíhi-güedé mèsá xéxí-güedé, te ní quee túu-gá núu-güedé te ní tenáá ñáhá-gǎ xii-güedé cuèndá sá ïo sáá iní-güedé ñá túú sàndáá iní ñáhá vǎha-güedé xii-gá, chí ñá túú ní cuíní-güedé quíndáá iní-güedé nàcuáa ní xáhaⁿ ñáyiú ní xiní ñáhá xii-gá sátá ñi yáha ní ndoto-gá. ¹⁵ Te ní xáhaⁿ-gǎ xii-güedé:

—Quíhíⁿ-ndó ñi^{hi} ñuyíú cáháⁿ-ndó núu nchàa ñáyiú tnúhu váha tnúhu sá cáháⁿ nàcuáa naníhí tàhú-yu. ¹⁶ Te nchaa ñáyiú na quíndáá iní tnúhu-áⁿ te cuanduté-yu, te naníhí tàhú-yu, dico nchaa ñáyiú vá quíndáá iní tnúhu-áⁿ te cuíta nihnú-yu. ¹⁷ Te nchaa ñáyiú na quíndáá iní ñáhá xii-í te cadá-yu sá vǎ yóo tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cúndíhi yucu ñáváha yíhi ñaha xii ñáyiú. Te uuⁿⁱ ndacú-yu cáháⁿ-yu ingá núu tnúhu sá vátá dácuáha-gá-yu. ¹⁸ Te cuèi na tní^{hi}-yu cóo dééⁿ dico ñá túú ñá cada ñaha-ñi xii-yu, te cuèi venènú ná cáxi-yu dico ñá túú ñá tnahá-yu, te tendáhá-yu cue ñáyiú cùhú te

ndúha-yu —càchí-gá xǎhaⁿ-gǎ
xii-güedé.

Jèsús cuánda-gá andiu

(Lc. 24:50-53)

¹⁹ Te sátá nǐ yáha ducaⁿ
nǐ xáhaⁿ Jèsús xii cue téé ní
xica cuu ndihi-gá, te ní ndan-
chita-gá cuánda-gá andiu
te ní ngóo-gá xio cùha Dútú
Ndiǒxí. ²⁰ Te cue téé-áⁿ nǐ
xica-güedé cuáháⁿ-güedé, te
ní ngüíta-güedé càháⁿ-güedé
tnúhu Xítohó Jesucristú
nchaa xichi. Te mee-gǎ ní
chindee ñàha-gá xii-güedé
ní quide-güedé nchaa sá vǎ
yǒo tnàhí ndàcu cada cuendá
cutnùní iní ñáyiú sá ndàá
càháⁿ-güedé tnúhu-gá. Duha
ní cuu dàvá-áⁿ.

TNÚHU NÍ CHÍDÓ TNŪNÍ TĒ LŪCÁ

*Nācuáa ní ngódó tnūni
tnúhu Yá Ndiöxí*

¹ Te vâi ñáyiú chîdo tnuní-yu nchaa nācuáa ndūu tnúhu nihí-yu nācuáa ní cuu, te nchoo tnáhá-ó sà naha-o nacuáa ní cuu. ² Te ñiu-ni nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xiní ndáá nācuáa ní cuu ndéé díhna, cue téé ní cáháⁿ tnúhu Yá Ndiöxí. ³ Te yúhú sa ní cuu nduu quide cuendá-í nchaa nācuáa ní cuu, núu xíáⁿ ní sani iní-í tee váha-í nchaa tnúhu-a núú tütú sá cúú-xí yòhó té Tēofilú chi ío váha cūu iní-í sá cúú-xí-n, ⁴ te tē-í cuendá cutnūnī iní-n sá sá ndáá cúú-xí nchaa sá ní dánēhé ñáhá-güedé xii-n.

*Íⁿ espíritú xínú cuèchi núú
Yá Ndiöxí càchí-xi sá cacú íⁿ téé
cunani Juáá*

⁵ Te cúnahá ní xindahá té Hērodés ñáyiú distritú Jüdeá ðává-án ní xindecu íⁿ dútú ní xinani-dē Zacàriá, te ní cundihí-dé cue dútú Àbiás. Te ñadhí-dé ní xinani-aⁿ Èlisabét, te ñaha-án ní cuu-aⁿ ñani tnáhá ndíi Àrón. ⁶ Te ndi ndúu-yu ío ní quide ndáá-yu núú Dütú Ndiöxí, chi ní tní-yu nchaa tnúhu ní cáháⁿ-gá. ⁷ Te ñá túú nì íⁿ déhe-yu, chi ducaⁿ táhú tá Elisabét sá vā cóó déhe-aⁿ, te ducaⁿ ndi ndúu-yu ío ní sahnú-yu.

⁸ Te íⁿ nduu xínu cuechi tucu té Zacàriá ndihí nchaa

cue téé cūndihí-dé núú Yá Ndiöxí xití veñúhu. ⁹ Te ðává-án ní xito ndeé-güedé cuendá cutnūnī iní-güedé núu ndēdacāa-güedé quihu núú nāá xití veñúhu-án cahmi-güedé sá sáháⁿ tnámí, te ní cutnūnī sá tē Zacàriá quihu-dé. Te ducaⁿ ní quide-güedé, chi ducaⁿ tnáhí ní xóo cada nchaa cue dútú ðává-án. ¹⁰ Te nini sáhmi té Zacàriá sá sáháⁿ tnámí núu nāá, te vâi vihi ñáyiú xindecu quehé veñúhu-án cáháⁿ ndihí-yu Yá Ndiöxí. ¹¹ Te ní xiní té Zacàriá íⁿ espíritú xínú cuèchi núú Yá Ndiöxí nūtní-xi xio cūha núu nāá núú càyú sá sáháⁿ tnámí-án. ¹² Te òré ní xiní té Zacàriá espíritú-án te ñá ní cūtnunī iní-dé nása cada-dé chi ío ní yúhú-dé. ¹³ Te espíritú-án ní xáhaⁿ-xi:

—Zacàriá, vá yúhú-n chi Yá Ndiöxí ní tedóho-gá tnúhu ní cáháⁿ-n, te vitna coo íⁿ déhe ñadhí-n tá Elisabét te danàni-n-dé Juáá. ¹⁴ Te ío cudíí iní-n, te ducaⁿ ío vâi ñáyiú cudíí iní-yu na cacú-dé. ¹⁵ Te ío cudíu-dé núú Yá Ndiöxí, te ni vā cóhó-dé ndidí te ni vā cóhó-dé ndudí sá ní natíu, te sa cundecu ndihí-dé Espíritú Yá Ndiöxí òré cacú-dé. ¹⁶ Te ñiu-dé cada te ío vâi ñáyiú israhél natuhá-yu ichi Dütú Ndiöxí Yaá cúú Ndiöxí-ó. ¹⁷ Te té Juáá-án codonūu-dé núú-gá, te cundecu ndihí-dé Espíritú-gá, te taxi tnūnī-dé ðátná ní quide té Èliás. Te nacanu ichi-dé cue téé cūu sacuéhé cuendá cada-güedé

sá vâha sá cúu-xí cuè téé cuechi, te cuèi cue téé ío sáá iní-xi, te ðiu-dé cada te tñii-güedé tnúhu váha, tnúhu càháⁿ ñáyiú quide ndáá. Te ðucaⁿ càda-dé cada túha-dé ñáyiú cuèndá cunu cuèchí-yu núú Dütú Ndiöxí —càchí-xi xâhaⁿ-xi xii-dé.

18 Te té Zacàriá ní ndúcú tnúhu-dé núú espíritú-áⁿ, te xâhaⁿ-dê:

—¿Te nása cutnùní ndáá iní-í tnúhu càháⁿ-n-í? Chi yúhú ío ní sahnú-í ndihí ñadhí-í —càchí-dé xâhaⁿ-dê xii-xi.

19 Te espíritú-áⁿ ñí xâhaⁿ-xi:

—Yúhú cúu-í espíritú nání Gàbriél, te xínu cuechi-í núú Yá Ndiöxí, te mee-gã ní táuchíúⁿ-gã náhà-í tnúhu-gá véxi cuèndá cutnùní iní-n nâcuáa cada ñaha-gã xii-ndo.

20 Te vitna cuu ñihí-n te vá càháⁿ-gá-n ndéé ná sáá nduu càcu déhe ñadhí-n, chi ñá túú ní sândáá-ni iní-n tnúhu ní càháⁿ-í. Te dacuitíí sáá nduu càda-xi nâcuáa ní càháⁿ-í-a —càchí espíritú-áⁿ xâhaⁿ-xi xii-dé.

21 Te nchaa ñáyiú xñdecu quehé ndétü-yu té Zacàriá, te xícunúhu-yu sá ío cùyaa-dé xití veñúhu. 22 Te òré ní ndee té Zacàriá, te ñá ní cùu-gá càháⁿ ndihí ñaha-dê xií-yu, te òré-áⁿ ñí cutnùní iní-yu sá ñí xiní-dé ñí espíritú xínú cuèchi núú Yá Ndiöxí xití veñúhu. Te mee-ñá ndaha-dé ní quide-dé núú-yu chi ñá ní cùu-gá càháⁿ-dê.

23 Te ní xínu nduu ñí xinú cuechi tè Zacàriá núú Yá Ndiöxí xití veñúhu, te cuánuhú-dé vehe-dé. 24 Te sáta dúcáⁿ ñí cuu te ñadhí-dé

tá Elisàbét ní ngúhuⁿ déhe-aⁿ, te úhúⁿ yóó ñà túú tnàhí-gá ní quèe-aⁿ caca cuu-aⁿ, te ní cachí-aⁿ: 25 “Mee Dütú Ndiöxí duha ní cundàhú iní ñáhá-gã sá cóó ñí déhe-í cuèndá sá vá cúu yíchí iní ñáhá ñáyiú xii-í”, duha ní cachí-aⁿ.

Íⁿ espíritú xínú cuèchi núú Yá Ndiöxí càchí-xi sá cáci Jesús

26-27 Te núú ñnú yóó sã ñí ngúhuⁿ déhe tá Elisàbét, te ní tendaha túcu Yá Ndiöxí espíritú nání Gàbriél cuaháⁿ-xi ñí ñúú nání Nàzarét cuaháⁿ ngoto-xi ñí xíchí cuèchí nàni Mariá. Te ñúú-áⁿ yíndèhu-xi distritú Galiléa. Te xíchí-áⁿ sa ní cundáá tnúhu sá tnândaha-xi ndihí ñí téé nàni Cheé ñani tnáhá ndii Dàvií.

28 Te espíritú-áⁿ ñí quíhu-xi ndéé xití vehe núú ndécú tá Màriá, te ní xâhaⁿ-xi:

—¿Cóvâha-n-aⁿ! Dütú Ndiöxí ío cùu iní ñáhá-gã xii-n te ndècu ndihí ñaha-gá, te ío-gá xító ñaha-gá xii-n dàcúúxí dàva-gá ñáyiú ðihí —càchí espíritú-áⁿ xâhaⁿ-xi.

29 Dico òré ní xiní tá Màriá espíritú-áⁿ, te ní quiyúhú iní-xi sá dúcáⁿ ñí càháⁿ espíritú-áⁿ. Te ní sani iní-xi: “¿Ná cuèndá duha càháⁿ-tu espíritú-a-í?”, duha ní sani iní-xi. 30 Te espíritú-áⁿ ñí xâhaⁿ-xi:

—Màriá, vá yùhú-n chi ðucaⁿ ñí nduu táhú-n núú Yá Ndiöxí. 31 Te vitna ngúhuⁿ déhe-n, te na càcu-dé te danàni-n-dé Jesús. 32 Te ío cunuú-dê, chi Dütú Ndiöxí Yáá ío cunuú cachí-gá sá Dêhe-gá cúu-dê, te ðiu-gá cada te cuu-dé ñí téé cunuú

núú ñáyiú isràél dàtná ní quide-gá ndíi Dàvií. ³³ Te taxi tnùnì-dé ñáyiú isràél, te ducaⁿ-ni cùnuu-dé ni caa ni quíhíⁿ —càchí-xi xáhaⁿ-xi.

³⁴ Te tá Màriá ní xáhaⁿ-xi xìi espíritú-áⁿ:

—¿Te nása cuu tnúhu càháⁿ-n te ñá túú yìí-i? —càchí-xi xáhaⁿ-xi.

³⁵ Te ní xáhaⁿ espíritú-áⁿ:

—Espíritú Yá Ndiöxí quixi cundecu ndihi-n, te ducaⁿ Yá Ndiöxí cada-gá ìⁿ sá vâha sá cúú-xí-n ná càcu déhe-n. Te Yá Ndiöxí càchí-gá sá ïo cundecu yiñùhu-dé núú-gã, chi Déhe-gá cúú-dě. ³⁶ Te tnàhá didí-n tă Elisàbét ñúhú dēhe-aⁿ cuèi ío ní sahnú-aⁿ, te diu-aⁿ càchí-yu sá vã cóó dēhe-aⁿ ni cùu, te vitna sa ní cuu ìnú yóó ñúhú dēhe-aⁿ.

³⁷ Chi Yá Ndiöxí ndácú-gã quidé-gã nchaa sá vã yõo tnàhí ndàcu cada —cachí-xi xáhaⁿ-xi.

³⁸ Te tá Màriá ní xáhaⁿ-xi:

—Yúhú ná cúnú cuèchi-í núú Dútú Ndiöxí, te mee-gã ná cádá ñàha-gá xii-í nàcuáa ní cachí-n —càchí-xi xáhaⁿ-xi xii espíritú-áⁿ.

Te sáta dúcáⁿ te espíritú-áⁿ nĩ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

³⁹ Te tá Màriá ío ndíhì cuáháⁿ-xi ìⁿ ñúú cáá xití yucu distritú Jùdeá. ⁴⁰ Te ní sáá-xi vehe té Zacàriá, te cuánguihu-xi ní dándácõo váha-xi tá Elisàbét. ⁴¹ Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xití-aⁿ, te òré-áⁿ nĩ ngúndecu ndihí-aⁿ Espíritú Yá

Ndiöxí. ⁴² Te níhi ní cáháⁿ-aⁿ, te xáhaⁿ-aⁿ xii tá Màriá:

—Yá Ndiöxí ío xìto ñàha-gá xii-n dàcúxí dàva-gá tnàha dihí-ó, te ducaⁿ-ni xìto-gá cuèi déhe-n. ⁴³ ¿Te ná cúú yúhú núu véxi coto ñàha yòhó nãná Yaá cúú Xìtohó-í-i? ⁴⁴ Chi òré-ni ní tecú dóho-í ní cáháⁿ-n te ní candá-ni déhe-í xití-í sá cùdìí ìní-dé. ⁴⁵ Te váha táhú yòhó sá ní sàndáá ìní-n, chi dacuitíi sã cádá Dútú Ndiöxí nàcuáa ní cáháⁿ espíritú ní tendaha-gã ní quixi ní cachí tnúhu xii-n nàcuáa cada-gá —càchí-aⁿ xáhaⁿ-aⁿ xii tá Màriá.

⁴⁶ Te ní xáhaⁿ tă Màriá:

Ío càhnu cuu Dútú Ndiöxí,

⁴⁷ Ío cùdìí ìní-í chi diu-gá tau-nihnu ñàha-gã xii-í núú ùhú núú ndàhú.

⁴⁸ Chi ní ndacu ìní ñàhá-gã xii yúhú, te dicó ìⁿ xíchí xínú cuèchi núú-gã cùú-í,

te vitna te nchaandi túhú ñáyiú cachí-yu sá ïo váha táhú-í.

⁴⁹ Te Yá Ndiöxí cándòo caa nine ìní-gá, te ío càhnu ìⁿ sá vâha ní quide-gá sá cúú-xi-í.

⁵⁰ Te cùndahú ìní-gá nchaa ñáyiú nèhe sá yíñùhu núú-gã.

Te ducaⁿ-ni cuèi ñáyiú sa ndècu ñuyíú-a ndihí ñáyiú vitna véxi.

⁵¹ Chi ta quide-gá nchaa sá vã yõo tnàhí ndàcu cada véxi,

te ta dándóo canúú-gã cue ñáyiú quide cahnu mee-xi.

52 Te cue ñáyiú tàxi tnuní
ñá túú-gă dáñá-gă taxi
tnùnî-yu,

te cue ñáyiú ndàhú ní quide
nînu ñaha-gă xii-yu.

53 Te cue ñáyiú ndècu ndihi
tnúndòho tnúhu ndàhú
ní quide váha ñaha-gă
xii-yu,

te cue ñáyiú cuica ñà túú nă
ní ñihî-gă-yu cundecu
ndihî-yu.

54 Te chîndee-gă ñáyiú isrâél,
ñáyiú xînu cuechi
núú-gă, te ñá túú
dăña nihnu ñaha-gă
xii-yu, chi cùndahú iní
ñáhá-gă.

55 Chi ducaⁿ ñî xáhaⁿ-gă xii
ndîi Àbrahám, ndihi cue
ñanî tnáhá ndîi.

Duha ní xáhaⁿ tâ Màriá xii tá
Elisàbét.

56 Te ní xîndecu tá Màriá
dàtná únî yóó ndihi tá Elisàbét
te dàtnùnî cuánuhú-xi
vehe-xi.

*Ní cacu té Juàá té
dacuàndute ñaha xii ñáyiú*

57 Te ní sáá nduu ñî cacu
ñî déhe téte tá Elisàbét. 58 Te
nchaa ñáyiú ndècu yatni
ndihi-aⁿ, ndihi nchaa ñanî
tnáhá-áⁿ ñî ñihî-yu tnúhu
nàcuáa ní chîndee ñàha Yá
Ndiôxí xii-aⁿ. Te ío ní cudíi
inî-yu cuèndá-aⁿ. 59 Te núú
ùná nduu sá ñî cacu déhe-aⁿ,
te ní sáháⁿ ñáyiú núú ndécú-áⁿ
cuèndá cuáhă-yu señá ñî
déhe-aⁿ. Te cuinî-yu cunani
dêhe-áⁿ Zacàriá dàtná nánî
tâtá ní cùu. 60 Te ní xáhaⁿ náná
dêhe-áⁿ:

—Ñáhá, chi Juàá cunani-dê
—càchî-aⁿ xáhăⁿ-aⁿ xii-yu.

61 Te ní xáhăⁿ-yu:

—¿Te ná cuèndá te ñá túú
ní ñî ñanî tnáhá-ndó dùcaⁿ
nani-i? —càchî-yu xáhăⁿ-yu.

62 Te ní quidé-yu ndàhá-yu
núú tâtá dêhe-áⁿ cuèndá
cuinî-yu núu nása cuinî
mée-dê cunani dêhe-dê,
63 Te ní xícáⁿ-dê ñî tutú ní
chídó tnùnî-dê nàcuáa cunani
dêhe-dê, te duha ní chídó
tnùnî-dê: “Juàá cunani-dê”,
càchî-xi núú tûtú ní tee-dê-áⁿ.
Te nchaa ñáyiú xîndecu-áⁿ ñî
cuñúhu-yu nàcuáa ní cuu.

64 Te òré-áⁿ ñî nacáháⁿ té
Zacàriá sá ñî cuu ñihî-dê
ní cùu, te ní ngüíta-dê ní
càchî-dê sá ío càhnu cuu Yá
Ndiôxí. 65 Te nchaa ñáyiú
xîndecu yatni ndihi-dê ní
cuñúhu-yu, te nchaa ñáyiú
xîndecu ñihîi xitî yucu distritú
Jùdeá ní ñihî-yu tnúhu nàcuáa
ní cuu. 66 Te nchaa ñáyiú-áⁿ
íó vâi ní sani inî-yu, te ní
xítñáhă-yu:

—¿Ná cúú să cádá tēe-ăⁿ
ndéé idá-gă ná cuèhnu-dê? —
càchî-yu xítñáhă-yu.

Te ducaⁿ ñî xítñáhă-yu chi
Dútú Ndiôxí ndécú ndihi
ñaha-gă xii-dê.

*Té Zacàriá càchî-dê sá ío
càhnu cuu Yá Ndiôxí*

67 Te té Zacàriá tâtá tē
lîhli-áⁿ ñî ngúndecu ndihi-dê
Espiritú Yá Ndiôxí te ní
cáháⁿ-dê nchaa tnúhu sá
ñî dánèhé ñáhă-gă, te ní
càchî-dê:

68 Ío càhnu cuu Dútú Ndiôxí
nchoo ñáyiú isrâél,

chi ní quixi coto ñaha-gă
xii-o, te cùu-o ñáyiú cùu
cuèndá-gă, chi dàcácu
nihnu ñaha-gă xii-o
vîtna.

69 Chi ní tendaha-gã ìⁿ téé véxi-dé dâcâcu nihnu ñaha-dé xii-o núú úhú núú ndàhú.

Te cùu-dé ñaní tnáhá ndí Dàvií téé ní xinu cuechi núú-gã ndéé sanaha.

70 Te diu-ni tnúhu ní cáháⁿ Yá Ndióxí ní cáháⁿ cue téé ní quide ndáá ní xíndecu núú-gã ñuyíú-a ndéé sanaha.

71 Te ní cachí-güedé sá táúniñhu ñaha-gá xii-o núú nchàa ñáyiú cùu úhú iní ñáhá, ndíhi núú nchàa ñáyiú ñá túú cùu quiní ndee ñáhá.

72 Te ní xáhaⁿ-gã sá cùndàhú iní ñáhá-gã xii-o, te ducaⁿ càda-gá chi vá nâcûànaa-gá tnúhu ní cáháⁿ-gá ndíhi-güedé.

73 Te diu ducaⁿ ndùu tnúhu ní xáhaⁿ-gã xii ndí Abrahám sá

74 táúniñhu ñaha-gá xii-o núú nchàa ñáyiú cùu úhú iní ñáhá,

cuendá sá vã yùhú-ó cùu cuechi-o núú-gã.

75 Te cada ndáá-ó, te cundecu yiññuhu-o núú-gã ndí nchàa nduu cundecu-o ñuyíú-a.

Duha ní cachí té Zacàriá.

76 Te xáhaⁿ-dê xii té lihli-án: Te yòhó té lihli, cáháⁿ ñáyiú cuendá-n sã cúu-n ìⁿ téé càháⁿ tnúhu Dútú Ndióxí Yáá ío cùnuu,

chi quíhíⁿ-n còdonuu-n núú Yáá cúú Xítohó-ó dâtúha-n ñáyiú cuendá cundecu túha-yu òrè quexìo-gá.

77 Te cùñaha-n xii ñáyiú isràèl sá cuíní-gá cada càhnu iní-gá nchaa cuéchi-yu, te naníhí tãhú-yu.

78 Te ducaⁿ càda-gá chi ío cùu iní ñáhá-gã xii-o, chi ndéé andíu ní tendaha-gã ìⁿ téé véxi cuuⁿ-dé dandíxi túu-dé iní-ó cuendá cutnùní iní-ó nâcûáa ndùu cuendá Yá Ndióxí.

79 Te ducaⁿ dândixi túu-dé iní nchaa ñáyiú ndècu ichi cuehé ichi duha ta xíta nihnu cuáháⁿ cuendá nucúnu ichí-yu ìⁿ ichi váha,

Duha ní xáhaⁿ tẽ Zacàriá xii déhe-dé.

80 Te té lihli-án tá sàhnu-dé, te ta chìndee chítúu ñaha Yá Ndióxí xii-dé cuáháⁿ, te ní xíndecu-dé xití yucu ndéé ní sáá nduu ní ngüíta-dé ní cáháⁿ-dé núú cuè ñáyiú isràèl tnúhu Yá Ndióxí.

2

Ní cacu Jèsús (Mt. 1:18-25)

1 Te dàvâ-áⁿ nĩ táúchíúⁿ tẽ Àugustú Cèsár nucódó tnùní nchaa ñáyiú nàcióⁿ yíndàha-dé. 2 Te xéhé sã dñnanuu nĩ nucódó tnùní ñáyiú, te diu-ni dàvâ-áⁿ nĩ cunuu té Cìreníú distritú Sìriá.

3 Te nchaa ñáyiú ní nataká-yu ñuú núú nĩ cacú-yu cuendá nucódó tnùní-yu. 4 Núu xiáⁿ ní quee té Chèè ñuú Nazàrét ìⁿ ñuú yíndèhu distritú Galileá, te cuáháⁿ-dé ñuú Bèlén ìⁿ ñuú yíndèhu distritú Jùdeá, chi xiáⁿ nĩ cuu ñuú ndí Dàvií, te diu-ni ñaní tnáhá té Chèé-án nĩ cuu ndí. 5 Núu

xíáⁿ cuáháⁿ-dé ndéé ñúú Bèlén nucódó tnùnì-dé, te tnàhá tá Màriá xíchí nǐ cundáá tnúhu sá tnàndaha ndìhi-dé cuáháⁿ ndìhi ñaha-dě, te sa ñùhu déhe-xi. ⁶ Te nini cùyaá-yu ñúú Bèlén-áⁿ nǐ sáá òré cacu déhe-xi. ⁷ Te nǐ cacu déhe díhna-xi, te nǐ chidúcúⁿnuu-xi dóó, te nǐ sacáⁿ ñáhá-xí ìⁿ vehe núú cúú vèhe quitì, chí ñá túú ní ñìhì-yu vehe coó-yu.

Cue espíritú xínú cuèchi núú Yá Ndiòxí ndìhi cue toli.

⁸ Te yatni ñúú-áⁿ xǐndecu ìⁿ úú toli ndèé-güedé mbéé-güedé ndécú-güedé majadá niú-áⁿ. ⁹ Te uuⁿni ní quexìo ìⁿ espíritú xínú cuèchi núú Yá Ndiòxí, te Yá Ndiòxí ní quide-gá ní dáyèhé-xi ní càndéé núú xǐndecu-güedé, te ní yùhú víhì-güedé. ¹⁰ Te ní xáhaⁿ espíritú-áⁿ:

—Vá yùhú-ndó, chí nàha-í ìⁿ tnúhu váha véxi sá cúú-xí-ndó, te ío cudí^í iní-ndó ndìhi nchaa ñáyiú. ¹¹ Chí vitna ní cacu ìⁿ téé dàcácu ñhnu ñaha xii-ndo núú ùhú núú ndàhú ñúú ndíj Dàvií, te téé-áⁿ cúú-dé Xítóhó Jesucristú. ¹² Te dàtná ìⁿ sèñá te naníhì-ndó tè ìhli-áⁿ yídúcúⁿ nuu-dé dóó cáá-dě ìⁿ vehe quitì —càchí-xi xáhaⁿ-xi xii-güedé.

¹³ Te òré-áⁿ nǐ quexìo cuéhé víhì espíritú véxi cuuⁿ andiú nǐ naníhì tnáhá-xí ndìhi espíritú-áⁿ, te ní ngüíta-xi ní chíñuhu-xi Yá Ndiòxí, te càchí-xi:

¹⁴ Ío càhnu cuu Yá Ndiòxí Yaá ndécú àndiú, te na cùndecu váha-ni nchaa ñáyiú cùu iní méé-gá!

Duha càchí cue espíritú-áⁿ.

¹⁵ Te òré cuándaa cue espíritú-áⁿ andiú, te ní ngüíta cue toli-áⁿ xǐtnàha-güedé:

—Na quihíⁿ-ó ñúú Bèlén quini-ó nàcuáa ní cuu, chí Dútú Ndiòxí sa ní cachí tnúhu-gá —càchí-güedé xǐtnàha-güedé.

¹⁶ Te ní tnì-güedé ichi súúnì ndìhi cuáháⁿ-güedé, te ní naníhì-güedé tá Màriá ndìhi té Chèé, ndìhi té ìhli-áⁿ cáá-dě xití ìⁿ vehe quitì. ¹⁷ Te òré ní xiní ñáhá-güedé te ní xáhaⁿ-güedé xii-yu nàcuáa ní xáhaⁿ espíritú-áⁿ xii-güedé cuèndá té ìhli-áⁿ. ¹⁸ Te nchaa ñáyiú ní tecú dóho-xi ní cuñúhu-yu nàcuáa ní cáhán-güedé. ¹⁹ Dico tá Màriá chí ñùhu nahi-ni iní-xi, te dicó-ni sàni iní-xi cuèndá nchaa tnúhu-áⁿ. ²⁰ Te cue toli-áⁿ nǐ natnì-güedé ichi, te ta xǐtnàha-güedé cuánuhú sá ío càhnu cuu Yá Ndiòxí cuèndá nchaa tnúhu ní xǐndedóho-güedé, ndìhi cuèndá nchaa sá ní xiní-güedé, chí cuèndá sá ndàá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

²¹ Te núú ùná nduu sá nǐ cacu té ìhli-áⁿ, te ní sáha-güedé sèñá ñì-dé, te ní dánánì ñaha-güedé Jèsús xii-dé, diú-ni nàcuáa ní xáhaⁿ espíritú xínú cuèchi núú Yá Ndiòxí xii tá Màriá ndéé cùtnáhá vátá ngühuⁿ-gá-dé xití-xi.

²² Te sátá nǐ tnahá nduu, nduu ì-yu nàcuáa càhánⁿ nchaa tnúhu ní chídó tnùnì

ndíi Moisés, te ndècá-yu té lĩhli-án cuáhán ñúú Jerusálén cuendá quee túu-dé núú Dütú Ndiöxí. ²³ Te ducaⁿ ñi quidé-yu, chi ducaⁿ cãháⁿ-xi núú tütú Yã Ndiöxí sá ncháá lãndú té na càcu díhna quetúu-güexi núú-gã cuendá cundecu-ná-güexi cuendá-gã. ²⁴ Te ní quidé-yu ñacuáa cãháⁿ Yã Ndiöxí núú tütú-gã núú cãchí-xi: “Canehe-ndo úú lõmá àdi úú cūcu quĩhíⁿ nduu táhú ñáhá Yã Ndiöxí”, duha cãháⁿ-gã núú tütú-gã.

²⁵ Te dàvá-án ndécú ñiⁿ téé nàni Mió ñúú Jerusálén. Te ío váha iní-dé, te chĩñuhu-dé Yã Ndiöxí, te ndètu-dé sáá nduu chĩndee ñaha Yã Ndiöxí xii ñáyiu isràél. Te ndècu ndihí té Mió-án Espíritú Yã Ndiöxí.

²⁶ Te sa ní xáhaⁿ-xi xii-dé sá vã cūú-ni-dé, chi dacuítí quĩní-dé Crĩstú Yaá tendaha Yã Ndiöxí quixi ñuyíú-a. ²⁷ Te téé-án ndécá ñaha Espíritú Yã Ndiöxí xii-dé cuáhán veñúhu càhnu sá ño cūnuu. Te cuáhán-yu ndihí Jèsús veñúhu-án cuendá cadá-yu ndihí-gã ñacuáa cãháⁿ tnúhu ní chídó tnùní ndíi Moisés. ²⁸ Te òré ní sáá-yu, te té Mió-án ñi nguídèhé-dé Jèsús, te ní cãháⁿ-dé sá ño càhnu cuu Yã Ndiöxí, te ní xáhaⁿ-dẽ xii-gã:

²⁹ Yòhó Dütú Ndiöxí sa ní cuu daña-n cūú-í vitna,

chi sa ní quide-n ñacuáa ní cachí-n xii yúhú téé xĩnu cuechi núú-n.

³⁰ Chi sa ní xiní núú-í Yaá dàcácu nihnu ñaha xii ñáyiu núú ùhú núú ndàhú vitna.

³¹ Te Yaá ní tendaha-n vëxi núú ndécú ncháa ñáyiu ñuyíú-a.

³² Te cūu-gã dàtná ñiⁿ ñuhú, chi dandixi túu-gã iní ñáyiu cuendá cutnùní iní-yu cuendá Yã Ndiöxí cuẽi ñá díú ñáyiu isràél cūú-yu.

Te diu-gã cada, te canehe ñáyiu dava-gã ñúú sá yĩñuhu núú ñáyiu isràél chi diu ñáyiu isràél cūú-yu ñáyiu cūu cuendá-n.

Duha ní xáhaⁿ tẽ Mió xii Yã Ndiöxí.

³³ Te té Chèé ndihí nãná Jèsús ní cuñúhu-yu tnúhu ní cãháⁿ té Mió cuendá-gã.

³⁴ Te dàtnùní té Mió ní xícáⁿ táhú-dẽ núú Yã Ndiöxí cuendá-yu, te xáhaⁿ-dẽ xii tá Màriá nãná Jèsús:

—Cundedóho tnúhu na cãháⁿ-í-a, té lĩhli-a ní nduu táhú-dẽ nacanu ichi-dé dava ñáyiu isràél ichi Yã Ndiöxí, te davá-yu vá tnĩ-yu tnúhu cãháⁿ-dé, te ñáyiu-án cuĩta nihnú-yu, te cada-dé ñacuáa cutnùní iní ñáyiu sá Yã Ndiöxí ní tendaha ñaha-gã xii-dé, dico vá quĩndáá iní-yu, chi daquèe tíhú ñáhã-yu xii-dé. ³⁵ Te ducaⁿ te cutnùní ñacuáa sàni iní ñiⁿ ñiⁿ ñáyiu. Dico sá cūú-xí yòhó chi ío cada ndàhú-xi iní-n, chi súúni dàtná sá ñi ñicuèhé iní-n càda-xi —cachí-dé xáhaⁿ-dẽ xii tá Màriá.

³⁶ Te xíáⁿ ndécú tnàhá ñiⁿ ñaha cãháⁿ tnúhu Yã Ndiöxí nání-án Àná, te tãtá-aⁿ ní xínani-dẽ Fãnuél ñani tnáhá ndíi Àsér. Te ñaha-án sa ní sahnu vĩhi-aⁿ, te cuechi-ni-aⁿ

nĩ tnándaha-aⁿ te úsá-ni cuiá nĩ xindecu-aⁿ ndihĩ yĩ-aⁿ,
 37 te ní quendóo quèé-aⁿ, te sa ñũhu-aⁿ cúmídícó cúmí cuiá-aⁿ. Te ñá túú ní xõo quee-aⁿ veñúhu càhnu sá ïo cùnũu, chi nduu niú ní xóo chiñũhu-aⁿ Dútú Ndiõxí, te áma ñá túú tnàhí ná ní xõo caxi-aⁿ ní xóo cáháⁿ ndihĩ-aⁿ Yá Ndiõxí. 38 Te ñũu-ni òré ndécũ-yu ndihĩ Jèsús ní quexìo-aⁿ núũ-yu, te ní ndacáⁿ táhú-áⁿ núú Yá Ndiõxí cuendá sá nĩ xini-aⁿ Jèsús, te dàtnùní ní ngũíta-aⁿ càháⁿ váha-aⁿ cuendá-gá núú nchàa ñáyũu, ñáyũu ndètu quiní sáá nduu dàcácu Yá Ndiõxí ñáyũu Jerusàlén núú tnũndòho tnúhu ndáhú.

Cuánuhú-yu ñũú Nazàrét

39 Te sátá nĩ quidé-yu nchaa nàcuáa càháⁿ tnúhu Yá Ndiõxí, te cuánuhú-yu ñũú Nazàrét núú ndécú tnàhí-yu, te ñũú-áⁿ yĩndèhu-xi distritú Galileá. 40 Te té lĩhli nani Jèsús-áⁿ tá sàhnu-dé, te ta nihí ndéé-dé cuáháⁿ, te ducaⁿ ïo váha ta sáá sá xini tnùnĩ-dé cuáháⁿ, chi Yá Ndiõxí ndécú ndihĩ ñaha-gá xii-dé.

Jèsús ndécú-gã veñúhu

41 Te ndi tnahá cuiá nĩ xóo quihíⁿ té Chèé ndihĩ náná Jèsús vico pàscuá ñũú Jerusàlén. 42 Te cútnahá ní chítú Jèsús úxúú cuiá-gã, te cuáháⁿ-yu ndihĩ-gá ñũú Jerusàlén vico pàscuá, chi ducaⁿ tnàhí quidé-yu. 43 Te òré ní yáha vico, te ní natnũí-yu ichi cuánuhú-yu, te ní quendóo-gá ñũú Jerusàlén, te ní náná-gã, te ní tẽ Chèé

ñá túú ní xini ní quendóo-gá. 44 Chi ní sani iní-yu sá ñũtnahá-gá tnuú nchaa ñáyũu ní sáháⁿ vico cuánuhú. Te ní xúhuⁿ-yu ñⁿ nduu ichi ta ndùcu tnúhu-yu-gá núú nchàa ñani tnáhã-yu, ndihĩ núú nchàa ñáyũu xini tnáhã ndihĩ-yu, 45 te ñá túú ní nanihĩ ñáhã-yu xii-gá. Núu ní nacuicó-yu cuánuhú tucú-yu ñũú Jerusàlén cuendá yacáⁿ nanducu ñahá-yu xii-gá.

46 Te núú ùní nduu sá ní dana núú ñáhã-yu xii-gá, te ní nanihĩ ñáhã-yu nùcòo-gá xitĩ veñúhu càhnu sá ïo cùnũu tnuú cue tée dàcuaha ñaha xii-yu nchaa tnúhu ní chídó tnùnĩ ndi Moisés, te ndèdóho ñaha-gã xii-güedé, te nándi sá ndúcú tnúhu-gá núú-güedé. 47 Te nchaa cue tée xĩndedóho ñaha xii-gá xicunúhu-güedé sá ïo váha sáá sá xini tnùnĩ-gá, te ïo váha nihĩ-gá tnúhu nàdanchocáva-gá. 48 Te òré ní xini ñahá tẽ Chèé ndihĩ náná-gã xii-gá, te ïo ní cuñúhu-yu, te ní xáhaⁿ náná-gã xii-gá:

—Yòhó déhe-í, ¿ná cuendá ducaⁿ nĩ quide ñaha-n xii-ndí? Te tātá-n ndihĩ yúhú ndihú iní-ndí xicá nanducu ñaha-ndí xii-n —càchĩ-xi xáhaⁿ-xi xii-gá.

49 Te ní xáhaⁿ Jèsús xii-yu:

—¿Ná cuendá nándùcu ñaha-ndo? ¿Náa ñá túú xini-ndó sã núú chíúⁿ Tātá-í tãú-í caca cuu-í-ãⁿ? — càchĩ-gá xáhaⁿ-gã xii-yu.

50 Dico mèé-yu ñá túú ní tècú tnùnĩ-yu nàcuáa ní xáhaⁿ-gã.

⁵¹ Te sáta dúcáⁿ te cuánuhú ndihí ñáhá-yu xii-gá ñuú Nazàrét, te ío ní sándáá iní ñáhá-gá xií-yu. Te nchaa sá ñí quide-gá-áⁿ ñí xúhuⁿ nahi-ni iní ñáná-gá. ⁵² Te Jèsús ducaⁿ-ni ta sàhnu-gá cuáháⁿ, te ta sàá-gá sá xìní tnùní-gá cuáháⁿ, te ducaⁿ cùdiu-gá núú Yá Ndiöxí, ndihí núú nchàa ñáyiu.

3

Té Juàá tée dàcuandute ñaha xii ñáyiu càháⁿ-dé tnúhu Yá Ndiöxí xití yucu
(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá yíndàha té Tiberiú cuéhé nacióⁿ, te dàvá-áⁿ ñí cunuu té Pilatú distrítú Jùdeá, te té Hèrodés ní cunuu-dé distrítú Galileá, te ñaní-dé té Lipé ní cunuu-dé distrítú Itùreá ndihí ingá distrítú nání Tràconité, te té Lisàniás ní cunuu-dé distrítú Abiliniá. ² Te té Anás ndihí té Caifás ní cuu-güedé dútú cúnùu. Te dàvá-áⁿ ñí cáháⁿ ndihí ñaha Yá Ndiöxí xii té Juàá déhe té Zacàriá xití yucu sá quihíⁿ-dé cáháⁿ-dé tnúhu-gá núú ñáyiu. ³ Te té Juàá ní yáha-dé nchaa ñuú cáá yàtni yúte Jòrdán, te xáhaⁿ-dè xii nchaa ñáyiu:

—Chí dándixi túu iní sá ñà túú quide váha-ndo, te dañà-ndo nchàa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndiöxí nchaa yíca cuèchi-ndo — duha ní xáhaⁿ-dè xií-yu.

⁴ Te ducaⁿ ñí quide-dé chi ní quee ndáá-xi nàcuáa ní chídó

tnùní ndíi Chàiaá tée ní xóo cáháⁿ tnúhu Yá Ndiöxí ndéé sanaha núú tùtú ndíi núú càchí-xi:

Tècú càháⁿ níhi ìⁿ tée yìhi xití yucu, te xáhaⁿ-dè xii ñáyiu:

“Chí dáñá nchàa ichi cuehé ichi duha ndècu-ndo, te tnì-ndo ichi váha, te ducaⁿ càda-ndo cuendá cundecu túha-ndo, chi véxi Yaá ío cùnùu.

⁵ Te nchaa núú cùnú nachítú, te nchaa tindúú ndihí nchaa yucu ngoyo nihnu cuendá nduu ndáá, te nchaa ichi ñá túú cuáháⁿ ndáá nduu ndáá, te nchaa ichi ñá túú càváha nduu váha.

⁶ Te nchaa ñáyiu ñuyíu-a níhí-yu tnúhu sá Yá Ndiöxí véxi-gá dàcácu nihnu ñaha-gá xií-yu núú ùhú núú ndàhú.”
Duha ní chídó tnùní ndíi Chàiaá núú tùtú ndíi.

⁷ Te òré ní xica ñáyiu cuáháⁿ-yu cuendá dacuandute ñaha té Juàá xií-yu, te ní xáhaⁿ-dè:

—¡Nchaa nchòhó cúu-ndó dàtná ìⁿ cóo dèéⁿ chi ío cuihna iní-ndó! ¿Te nása ní cuu núu tnàhá nchòhó ndúcú-ndó nàcuáa cácu nihnu-ndo núú tnùndòho cahnu vihi sá tá cùyatni ñaha xii-ndo véxi-i?

⁸ Te chí cáda váha vitna cuendá ducaⁿ cùnùní sá ñí dáñá-ndó nchàa ichi cuehé ichi duha ndècu-ndo. Te vá càchí-ndó sá ío càhnu cuu-ndo cuendá sá cúu-ndó ñaní tnàhá ndíi Abrahám, chi cuèi ndéé yúu te ndacu Yá Ndiöxí ndada-gá ñáyiu te cuú-yu ñaní tnàhá ndíi Abrahám.
⁹ Te caá chi ndècu túha-xi sá quèhndé-xi nchaa yutnu

sá ñà túú cáváha sávidí-xi, chi nchaa yutnu-án tēhndé-xi te cuánguee-xi núú ñùhú càyú-xi. Te duha sātñahá-xi ndoho nchaa ñáyiú ñá túú quide váha, chi nchaa ñáyiú ducaⁿ ñà túú quide váha cúu-yu dàtná nchaa yutnu sá ñà túú cáváha sávidí-xi. —càchí-dé xāhaⁿ-dē xii-yu.

10 Te ní xicáⁿ tnúhu-yu núú-dē, te xāhāⁿ-yu:

—¿Te nása cada-ndí váiⁿ? —càchí-yu xāhāⁿ-yu xii-dé.

11 Te xāhaⁿ-dē:

—Te núu ndēdacāa-ndo ndecu ndihi-ndo úú dóó te cuañaha-ndo ñⁿ xii ñáyiú ñá túú ndecu ndihi, àdi núu ndecu ndihi-ndo sá nchító-ó te cuáha-ndō-yu na caxí-yu —càchí-dé xāhaⁿ-dē xii-yu.

12 Te ní quexio ñⁿ úú cue téé cuihna iní-xi quide cobrá ñáhá xii ñáyiú cuendá impuēstú cuendá cuàndute-güedé, te ní xicáⁿ tnúhu-güedé núú tē Juáá, te xāhaⁿ-güedé:

—Mēstrú, ¿te nása cada-ndí cuendá cuu váha iní Yá Ndiōxí-i? —càchí-güedé xāhaⁿ-güedé xii-dé.

13 Te té Juáá ní xāhaⁿ-dē:

—Vá cuidó-ndó càda cobrá-ndó ñáyiú —càchí-dé xāhaⁿ-dē xii-güedé.

14 Te tnàhá ñⁿ úú cue téé cúu sandadú xīndecu-án ñí xicáⁿ tnúhú-güedé núú tē Juáá, te xāhaⁿ-güedé:

—Te nchúhú ¿nása cada-ndí cuendá cuu váha iní Yá Ndiōxí-i? —càchí-güedé xāhaⁿ-güedé xii-dé.

Te ní xāhaⁿ tē Juáá:

—Vá quéndēé-ndó sá néhé tnàha ñáyiú-ndo, te ní vā dácàa díquí-ndō-yu ñⁿ sá ñà túú nā quidē-yu, te nduu vétú iní-ndó nācuáa ñùhu yáhu-ndo —càchí-dé xāhaⁿ-dē xii-güedé.

15 Te nchaa ñáyiú xīndetu sá quíxí Crístú sàni ñⁿ sàni úú iní-yu núu sá díú Crístú Yáá tendaha Yá Ndiōxí quixi ñuyíú-a cúu te Juáá àdi ñáhá. 16 Dico té Juáá ní cáháⁿ ndodo-dé núú-yu ncháa-yu, te xāhaⁿ-dē:

—Na càchí tnúhu ndáá-i xii-ndo sá yùhú véxi-í sá cuendá-ni dacuàndute ñaha-í xii-ndo dàtná ní càchí Yá Ndiōxí, dico nchícúⁿ ingá téé véxi, te téé-áⁿ taxi-dé Espíritú Yá Ndiōxí cundecu ndihi-ndo, te cúu-xi datná ñⁿ ñuhú, chi ndada ndoo ndada nine-xi iní-ndó. Te téé-áⁿ ño-gá cúnúu-dé dácúxí yùhú, chi yùhú cúu-í ñⁿ téé duuⁿ duuⁿ ñá túú tàú-í nandaxi-í cuèdicó ñⁿ chàu-dé dico quide-í chiú-dé. 17 Te téé-áⁿ

sa véxi túha-dé sá cadá dñⁿ ñaha-dé xii-o dàtná quidé ñáyiú ndàda ndoo triú, chi ñáyiú-áⁿ sa nèhe túha-ná-yu yaxí-yu òré náñani cuendá ndada ndoo-yu, te òré ndádá ndoo-yu triú-áⁿ te dàquee dñⁿ-yu mihi-xi, te tàxúha-yu mee-nā triú-áⁿ, te mihi-xi-áⁿ sáhmi-yu. Te dàtná quidē-yu mihi triú-áⁿ ducaⁿ sātñahá-xi cada ñaha téé-áⁿ xii nchaa ñáyiú ñá túú quide váha, chi daquihíⁿ ñáhá-dē xii-yu núú ñùhú núú càyú, te ñuhú-áⁿ ñà túú tnàhí ndàhvá —càchí-dé xāhaⁿ-dē xii-yu.

18 Te titní víhí-gã tnúhu váha ní xáhaⁿ tẽ Juáa xii-yu òré ní dásàhú ñhá-dẽ. 19 Te ní cáháⁿ-dé dóhò té Hèrodés cuendá sá ndécá-dẽ ìⁿ ñaha nàni Herodiás ñaha ní cãndeca ñaní-dé té Lìpé, te ní xáhaⁿ-dẽ cuendá nchaa dava-gá sá cuèhé sá dúhá quide-dé. 20 Dico té Hèrodés ñã túú ní quide cuendá-dé tnúhu ní cáháⁿ té Juáa, chi nèhé-gá tucu ní quide-dé, chi da vecaa ní chihi-dé té Juáa.

Sàndute Jesús

(Mt. 3:13-17; Mr. 1:9-11)

21 Te òré dácuaⁿdute té Juáa nchaa ñáyiu, te tnàhá Jèsús ní dácuaⁿdute ñaha-dé xii-gá. Te nini cáháⁿ ndihi-gá Dútú Ndiõxí ní nacaáⁿ andi^u, 22 te ní quee Espiritú Yã Ndiõxí véxi cuuⁿ túu-xi, te càa-xi datná cáá ìⁿ lómá, te òré-áⁿ ní tecú ní cáháⁿ Yã Ndiõxí ndéé andi^u, te xáhaⁿ-gã xii Jèsús:

—Yòhó cúú-n Dèhe-í tée ío cùu iní-í, te ío cùdí iní ñáhà-í xii-n —càchí-gá xáhaⁿ-gã xii Jèsús.

*Cue tée ní xíndecu díhna-gá ñuyú-a dácúúxí Xìtohó Jesu-
crìstú*

(Mt. 1:1-17)

23 Te ndècu Jesús dàtná ócò úxí cuíá-gã cútnàhá ní chisaha-gã chi^un ní táhú Tãtá-gã Dútú Ndiõxí cada-gá. Te ní cuu-gá déhe té Chèé chi ducaⁿ sàni iní ñáyiu ñuyú-a. Te té Chèé-áⁿ nĩ cuu-dé déhe té Èlì, 24 te tée-áⁿ nĩ cuu-dé déhe té Mátát. Te té Mátát-áⁿ nĩ cuu-dé déhe té Lèví, te tée-áⁿ nĩ cuu-dé déhe té Mèlquí. Te té Mèlquí-áⁿ nĩ cuu-dé déhe té Jàná, te tée-áⁿ

nĩ cuu-dé déhe té Chèé. 25 Te té Chèé-áⁿ nĩ cuu-dé déhe té Matàtiás, te tée-áⁿ nĩ cuu-dé déhe té Àmós. Te té Àmós-áⁿ nĩ cuu-dé déhe té Nàhúm, te tée-áⁿ nĩ cuu-dé déhe té Èslí. Te té Èslí-áⁿ nĩ cuu-dé déhe té Nagài, 26 te tée-áⁿ nĩ cuu-dé déhe té Mátát. Te té Mátát-áⁿ nĩ cuu-dé déhe té Matàtiás, te tée-áⁿ nĩ cuu-dé déhe té Semèi. Te té Semèi-áⁿ nĩ cuu-dé déhe té Chèé, te tée-áⁿ nĩ cuu-dé déhe té Jùdá. 27 Te té Jùdá-áⁿ nĩ cuu-dé déhe té Jòaná, te tée-áⁿ nĩ cuu-dé déhe té Rèsá. Te té Rèsá-áⁿ nĩ cuu-dé déhe té Zorobàbél, te tée-áⁿ nĩ cuu-dé déhe té Salàtiél. Te té Salàtiél-áⁿ nĩ cuu-dé déhe té Nèrí, 28 te tée-áⁿ nĩ cuu-dé déhe té Mèlquí. Te té Mèlquí-áⁿ nĩ cuu-dé déhe té Àdí, te tée-áⁿ nĩ cuu-dé déhe té Còsám. Te té Còsám-áⁿ nĩ cuu-dé déhe té Elmódám, te tée-áⁿ nĩ cuu-dé déhe té Èr. 29 Te té Èr-áⁿ nĩ cuu-dé déhe té Jòsué, te tée-áⁿ nĩ cuu-dé déhe té Elièzér. Te té Elièzér-áⁿ nĩ cuu-dé déhe té Jòrím, te tée-áⁿ nĩ cuu-dé déhe té Mátát. 30 Te té Mátát-áⁿ nĩ cuu-dé déhe té Lèví, te tée-áⁿ nĩ cuu-dé déhe té Mió. Te té Mió-áⁿ nĩ cuu-dé déhe té Jùdá, te tée-áⁿ nĩ cuu-dé déhe té Chèé. Te té Chèé-áⁿ nĩ cuu-dé déhe té Jònán, te tée-áⁿ nĩ cuu-dé déhe té Eliàquím. 31 Te té Eliàquím-áⁿ nĩ cuu-dé déhe té Mèléá, te tée-áⁿ nĩ cuu-dé déhe té Mainán. Te té Mainán-áⁿ nĩ cuu-dé déhe té Mátatá, te tée-áⁿ nĩ cuu-dé déhe té Nàtán. 32 Te té Nàtán-áⁿ nĩ cuu-dé déhe té Dàvií, te tée-áⁿ nĩ cuu-dé déhe té Isàí. Te té Isàí-áⁿ nĩ cuu-dé déhe té Òbéd,

te téé-áⁿ nǐ cuu-dé déhe té Bòóz. Te té Bòóz-áⁿ nǐ cuu-dé déhe té Sàlmón, te téé-áⁿ nǐ cuu-dé déhe té Naàson. ³³ Te té Naàson-áⁿ nǐ cuu-dé déhe té Aminadáb, te téé-áⁿ nǐ cuu-dé déhe té Àrám. Te té Àrám-áⁿ nǐ cuu-dé déhe té Èsróm, te téé-áⁿ nǐ cuu-dé déhe té Fàrés. Te té Fàrés-áⁿ nǐ cuu-dé déhe té Jùdá, ³⁴ te téé-áⁿ nǐ cuu-dé déhe té Jàcób. Te té Jàcób-áⁿ nǐ cuu-dé déhe té Isàác, te téé-áⁿ nǐ cuu-dé déhe té Àbrahám. Te té Àbrahám-áⁿ nǐ cuu-dé déhe té Tàré, te téé-áⁿ nǐ cuu-dé déhe té Nàcór. ³⁵ Te té Nàcór-áⁿ nǐ cuu-dé déhe té Sèrúg, te téé-áⁿ nǐ cuu-dé déhe té Ragàù. Te té Ragàù-áⁿ nǐ cuu-dé déhe té Pèlég, te téé-áⁿ nǐ cuu-dé déhe té Hèbér. Te té Hèbér-áⁿ nǐ cuu-dé déhe té Sàlá, ³⁶ te téé-áⁿ nǐ cuu-dé déhe té Cànán. Te té Cànán-áⁿ nǐ cuu-dé déhe té Arfàxád, te téé-áⁿ nǐ cuu-dé déhe té Sëm. Te té Sëm-áⁿ nǐ cuu-dé déhe té Nöé, te téé-áⁿ nǐ cuu-dé déhe té Làméc. ³⁷ Te té Làméc-áⁿ nǐ cuu-dé déhe té Matusalén, te téé-áⁿ nǐ cuu-dé déhe té Ènóc. Te té Ènóc-áⁿ nǐ cuu-dé déhe té Jàréd, te téé-áⁿ nǐ cuu-dé déhe té Mahalàleél. Te té Mahalàleél-áⁿ nǐ cuu-dé déhe té Cànán, ³⁸ te téé-áⁿ nǐ cuu-dé déhe té Ènós. Te té Ènós-áⁿ nǐ cuu-dé déhe té Sèt, te téé-áⁿ nǐ cuu-dé déhe té Àdán. Te té Àdán-áⁿ chi mee Yá Ndiòxí ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espiritú Yá Ndiòxí, te Espiritú-áⁿ ndécá ñaha-xi xii-gá cuáháⁿ ìⁿ xití yucu. ² Te yàcáⁿ ní xíndecu-gá údico nduu, te sácuíhná nǐ cuiní-xi coto ndeé ñáhá-xí xii-gá te núu ndisa sá vǎ cáda-gǎ ìⁿ sá ñà túú tàú-gá cada-gá. Te ñá túú tnàhí ná ní xèxi-gá ndi údico nduu-áⁿ, te sátá dúcáⁿ te ní xícáⁿ iní-gá caxi-gá. ³ Te sácuíhná-áⁿ nǐ xáhaⁿ-xi xii-gá:

—Te núu ndisa sá cúu-n Dèhe Yá Ndiòxí, te cúñaha xii yúú-a na nduu-xi paá — cächí-xi xáhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núú tùtú Yá Ndiòxí cächí-xi: “Ná díú mèe-ni paá candeca-xi iní ñáyiu, chi tnàhá nchaa tnúhu càháⁿ Yá Ndiòxí candeca-xi iní-yu”, duha cächí-xi núú tùtú-gá — cächí-gá xáhaⁿ-gǎ xii-xi.

⁵ Te dàtnùnǐ sácuíhná ndécá ñaha-xi xii-gá cuáháⁿ ìⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi túhú nacióⁿ cáá ñùyúú. ⁶ Te ní xáhaⁿ-xi xii-gá:

—Yúhú cada-í, te taxi tnùnǐ-n nchàa-ndi túhú nacióⁿ-a ndihi nchaa sá vǎha ió diu-ni nchaa nacióⁿ-a, te cachí ñáyiu sá ïo cùnuu-n, chi yúhú cúú cuèndá-í nchaa sá ió nchaa nacióⁿ-a, te ndèdani càa ñáyiu cùu iní-í te cúñaha-í xii-yu taxi tnùnǐ-yu. ⁷ Te núu ni yùhu ni iní-n chiñuhu ñaha-n xii-í ñǎ, te nchaa taxi-í cuu cuèndá-n — cächí-xi xáhaⁿ-xi xii-gá.

⁸ Te Jèsús ní xáhaⁿ-gǎ xii-xi:

—Xocuiñí yòhó sácuihná nũú ndécù-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñⁿdì dí-ni-gã cada-ndo nchàa nacuáa càháⁿ-gã”, duha càchí-xi núú tütú-gá — càchí-gá xãhaⁿ-gã xii-xi.

⁹ Te sácuihná ndécá ñaha tucu-xi xii-gá cuáháⁿ ñuú Jerusalén, te ní xáhaⁿ-xi xii-gá cuásaá-gá díquí veñúhu càhnu sá ño cùnunu, te ní xáhaⁿ tucu-xi:

—Te núu ndisa cùu-n Déhe Yá Ndiöxí te cuandé ndava ndéé núú ñúhú ¹⁰ cuendá quee ndáá-xi nàcuáa càháⁿ-xi núú tütú Yá Ndiöxí núú càchí-xi:

Yá Ndiöxí tendaha-gã cue espíritú xínú cuèchi núú-gã quixi-xi coto ñaha-xi xii-n.

¹¹ Te núú ndáhá-xí càundodo-n cuendá sá vá dánicuèhé yúú sãhá-n,

duha càchí-xi núú tütú-gá — càchí sácuihná xãhaⁿ-xi xii-gá.

¹² Te Jèsús ní xáhaⁿ-gã xii-xi:

—Te càchí tucu-xi núú tütú Yá Ndiöxí: “Vá caní ñí-n còto ndeé-n Dütú Ndiöxí Yaá cúú Ndiöxí-n núu ndisa sá dácacu nihnu ñaha-gã xii-n cuendá ñⁿ sá sání ñí-n càda-n sá cúú-xí mée-n”, duha càchí-xi núú tütú-gá — càchí-gá xãhaⁿ-gã xii-xi.

¹³ Te sátá dúcáⁿ te sácuihná ñà túú-gã ní cùtnuní ñí-xi nása cada-xi Jèsús, núú xãⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tátá-gã Dütú Ndiöxí cada-gã

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gá distritú Galileá, dico sa ndècu ndihi-gá Espíritú Yá Ndiöxí, te ní càa xico xiáⁿ ñí ñíhí-yu tñuhu nchaa nàcuáa quide-gá. ¹⁵ Te ndi tnahá ñuú cuáháⁿ-gá ducaⁿ cuãnguïhu-gá veñúhu-yu dānehé ñáhá-gã xií-yu, te ncháa-yu càchí-yu sá ño càhnu cuu-gá.

Jèsús ndécú-gã ñuú Nazàrét
(Mt. 13:53-58; Mr. 6:1-6)

¹⁶ Te Jèsús ní sáháⁿ-gá ñuú Nazàrét ñuú núú ñí sahnu-gá. Te nduu ndètatú ñáyiu ní quíhu-gá veñúhu, chi ducaⁿ tñahí quide-gá, te ní ngúnutñi-gã dácuaaha-gá tutú ndéé tñuhu Yá Ndiöxí. ¹⁷ Te ní sãñaha-güedé xii-gá tutú ndéé tñuhu ní cáháⁿ ndí Chàíá téé ní xóo cáháⁿ tñuhu Yá Ndiöxí ndéé sanaha, te òré ní nandicá-gá núú tütú-áⁿ te ní naníhí-gá núú càchí-xi:

¹⁸ Espíritú Yá Ndiöxí ndécú ndíhi ñaha-xi xii-í,

chi ní cachí-gá sá càháⁿ-í tñuhu-gá sá cúú-xí ñáyiu ndàhú,

ñáyiu vátá cündèdóho tñahí-gá.

Te véxi-í cuendá vá ndíhú-gá ñí ñáyiu ñá túú ndècu váha ñí-xi,

te cue ñáyiu sa nèhe váha ñaha-ñã yucu ñávãha dácacu nihnu-í-yu.

Te cue ñáyiu cuáá nacaáⁿ-í núú-yu,

te ñáyiu ndòho dandoho ñaha tnahã ñáyiu-xi tauni-hnu-í-yu.

19 Te cúñaha-ĩ xii ñáyiú sá sàà nduu càda Yá Ndiòxí ìñ sá vâha sá cúú-xí-yu.

Duha càchí-xi núú tùtú dâcuâha-gá.

20 Te Jèsús ní nacadí-gá núú tùtú-áⁿ, te ní nacuâha-gá ìñ tée xinu cuechi veñúhu-áⁿ, te ní ngóo-gá. Te nchaa ñáyiú yìhi veñúhu ñá núú núú-yu ndèhe ñahá-yu xii-gá. 21 Te xâhaⁿ-gã xii-yu:

—Mei vitna ní quee ndáá-xi nâcuâa càháⁿ-xi núú tùtú Yá Ndiòxí —câchí-gá xâhaⁿ-gã xii-yu.

22 Te ncháá-yu ní cáháⁿ váha-yu cuendá-gá, te ní cuñúhu-yu tnúhu váha càháⁿ-gá, te xítnahá-yu:

—¿Te náa ñá díú tée-a cùu-dé déhe té Chèe-ãⁿ? —câchí-yu xítnahá-yu.

23 Te Jèsús ní xáhaⁿ-gã:

—Na càchí tnúhu ndáá-í xii-ndo sã ñúhú ìní-ndó cúñaha-ndo xii-í ìñ tnúhu cùtexinu sá càháⁿ mée-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tùcu-ndo xii-í: “Sa ní níhí-ndí tnúhu nâcuâa ní quide-n ñúú Capèrnaúm, te cada-n tnàhá ñúú núú ñi sahnú-n”, duha quesaha-ndo —câchí-gá xâhaⁿ-gã xii-yu.

24 Te ní xáhaⁿ tùcu-gá:

—Na càchí tnúhu ndáá-í xii-ndo sã ñi ìñ tée càháⁿ tnúhu Yá Ndiòxí ñá túú tnàhá ìní ñáhá ñáyiú ñúú-dé. 25 Te na càchí tnúhu ndáá tucu-í xii-ndo sã ìo vâi ñáyiú ñíhí ñáyiú quée ní xindecu nàcióⁿ Isràél cùtnahá ní xindecu té Èliás cùtnahá ñá túú ní cùuⁿ

dáú ùní cuiá dava, te dàvá-áⁿ ìo ní ndoho ñáyiú docó nitùhú nàcióⁿ. 26 Dico Yá Ndiòxí ñá túú ní tëndaha-gá té Èliás quíhíⁿ-dé vehe ndédani càa ñáyiú ñíhí-áⁿ, chi vehe ìñ ñaha ñúú Sàreptá ní xáhaⁿ-gã ní sáháⁿ-dé, te ñúú-áⁿ cáá yàtni-xi ñúú Sìdón. 27 Te ní xindecu tucu ìngá tée ní xóo cáháⁿ tnúhu Yá Ndiòxí ndéé sanaha, te tée-áⁿ ñi xínani-dé Eliseú, te ñi-ni dàvá-áⁿ ñi xindecu tucu vâi ñáyiú cùhú nàcióⁿ Isràél, ñáyiú ní tnahá cuéhé sã dátèhyú nihnu-xi yiqui cùnú-yu dico ñá túú ní ndúha-yu, chi ìñ-ñi-ni té Nàmán tée distritú Sìriá ní ndúha-dé —câchí-gá xâhaⁿ-gã xii-yu.

28 Te sá dúcáⁿ ñi cáháⁿ-gá te xíáⁿ ní cudééⁿ víhí ncháa ñáyiú yìhi veñúhu-ãⁿ núú-gã.

29 Te ní queñuhú-yu Jèsús yuhu dèhvá tìndúú núú cáá ñúú-yu-áⁿ cuendá yàcáⁿ dàquée-yu-gá déhvá ní cùu. 30 Dico Jèsús vii-ni ní quee-gá tnuú-yu cuáháⁿ-gá.

Ìñ tée yìhi ñaha espíritú cùndìhi yucu ñávâha (Mr. 1:21-28)

31 Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yàcáⁿ ndécú-gã ní tnahá nduu ndetàtú ñáyiú, te ní ngúita-gá dâcuâha-gá ñáyiú. 32 Te xicuñúhu-yu nchaa nâcuâa dànehé ñáhá-gã xii-yu, chi càháⁿ-gá dàtná càháⁿ ìñ tée cùnuu, te cùnuu ndisa-gá.

33 Te xití veñúhu yíhi ìⁿ téé yíhi ñaha ìⁿ espíritú cúndìhi yucu ñávãha, te espíritú-áⁿ ñí quide-xi níhi ní cáháⁿ téé-áⁿ, te xãhaⁿ-dẽ xii Jèsús:

34 —¿Te ná cuíní yòhó Jèsús téé ñuú Nazàrét cada ñaha-n xii-ndí nũu véxi-n nũú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xìní ñáhà-í xii-n sã cúú-n ìⁿ téé ñá túú tñàhí cuéchi-xi chi núú Yã Ndióxí ní quee-n véxi-n ñùyíú-a —càchí-dé xãhaⁿ-dẽ xii-gá.

35 Te Jèsús ní tenàá-gá espíritú cúndìhi yucu ñávãha-áⁿ, te xãhaⁿ-gã:

—¡Cadí yuhu-n, te taquèe yiqui cuñú téé-áⁿ! —càchí-gá xãhaⁿ-gã.

Te espíritú cúndìhi yucu ñávãha-áⁿ ñí dándùá-xi téé-áⁿ ndèé ñuhu tnuú ñáyíu xĩndecu-áⁿ, te ñá túú-gã ná ní quide ñaha-xi, te ní quee ñaha-xi xii-dé. 36 Te nchaa ñáyíu xĩndecu-áⁿ ñí cuñúhu-yu, te ní xitnàhá-yu:

—¿Te nása ndũu-tu tñúhu cáháⁿ téé-áⁿ ñá? ¡Te cáháⁿ-dé dàtná cáháⁿ ìⁿ téé tàxi tñuní víhí, chi cáháⁿ-ni-dé te nchaa espíritú cúndìhi yucu ñávãha quèe-ni-xi yiqui cuñú-yu! —càchí-yu xitnàhá-yu.

37 Te nchaa xichi ní níhí-yu tñúhu nãcuáa quide Jèsús.

Jèsús quidé tãtna-gá nãná ñadìhí té Xímú

(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadìhí té Xímú-áⁿ cùhú-aⁿ

ñùhu vihi-aⁿ cahni, te ní cáháⁿ ndàhú-yu núú Jèsús cuendá-aⁿ. 39 Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xãhaⁿ-gã xii cahni-áⁿ sã ná xòcuíñí-xi, te ní xòcuíñí-ni-xi, te òré-ni-áⁿ ñí ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedẽ ndìhi-gá.

Jèsús quidé tãtna-gá vãi ñáyíu cùhú

(Mt. 8:16-17; Mr. 1:32-34)

40 Te òré ní ngódó tñúú nchícanchii, te nchaa ñáyíu xĩndecu ndìhi ñáyíu cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìⁿ ìⁿ ñáyíu cùhú-áⁿ, te ducaⁿ ñí quide-gá te ní ndúha-yu. Te ndí díⁿ nũú cuèhé tñahá-yu ìⁿ ìⁿ-yu ni cùu. 41 Te tñahá dava ñáyíu cùhú-áⁿ yíhí ñaha espíritú cúndìhi yucu ñávãha xii-yu ni cùu, te òré ní quee ñaha-xi xii-yu, te xíãⁿ ní quide-xi níhi ní cáháⁿ-yu, te xãháⁿ-yu xii Jèsús:

—Yòhó cúú-n Dẽhe Dútú Ndióxí —càchí-yu xãháⁿ-yu xii-gá.

Dico Jèsús níhi ní cáháⁿ-gá ní tenàá-gá nchaa espíritú cúndìhi yucu ñávãha-áⁿ, te xãhaⁿ-gã sã vã dúcáⁿ-gã cada-xi, chi sa xìní-xi sã díú-gã cúú-gã Crístú Yaa ní tendaha Yã Ndióxí véxi ñùyíú-a.

Jèsús dánèhé-gá ñáyíu distritú Galiléa

(Mr. 1:35-39)

42 Te ìⁿ nduu ní túndaá-ni ní quee Jèsús ñuú núú

ndécú-gă-án cuăháⁿ-gá ìⁿ xichi núú ñă túú ñăyiu ndècu. Te cue ñăyiu ní ngüíta-yu nànducu ñahá-yu xii-gá te ní naníhí ñáhă-yu, te cuíní-yu ngani ñahá-yu xii-gá cuendá sá ñà túú-gă ndèé quíhíⁿ-gá ní cùu. ⁴³ Dico ní xáhaⁿ-gă xii-yu:

—Dacuitíi quíhíⁿ-í cúñaha-í xii nchaa ñăyiu dava-gá ñuú tnúhu sá càháⁿ nàcuáa ndíhu ndaha ñàha Yá Ndióxi xii-yu, chi chiúⁿ tnahí-ăⁿ vëxi-í —càchí-gá xăhaⁿ-gă xii-yu.

⁴⁴ Te ní xica cuu Jèsús ní dánèhé-gá ñăyiu tnúhu-gá nchaa xití veñúhu ndăa distritú Galileá.

5

Jèsús ní quide-gá ní níhí-güedě chácá

(Mt. 4:18-22; Mr. 1:16-20)

¹ Te ìⁿ xito ndècu Jesús yuhu làgúná Genesàrét, te ío cuéhé ñăyiu ní sáá, te ta dàdehnde ñaha-ná-yu xii-gá cuáháⁿ sá cuíní-yu cundedóho-yu nchaa tnúhu càháⁿ-gá. ² Te Jèsús ní xiní-gá úú bàrcú cue téé tñi chácá xínutñi-xi yatni yuhu làgúná-án, te sa ní quene cue téé ñúhu xití-xi-án xínaquete-güedé ñunu-güedé.

³ Te Jèsús cuásaá-gá núú ìⁿ bàrcú-án, te bàrcú-án cúu-xí bàrcú té Xímú, te ní xáhaⁿ-gă xii té Xímú-án sá dánñundehe-dé-xi luha-gá xití ndute. Te dătnùní ní ngóo-gá núú bàrcú-án, te xíaⁿ núcóo-gá ní ngüíta-gá dánèhé-gá ñăyiu. ⁴ Te òré ní túhú ní dánèhé

ñáhá-gă xii-yu, te ní xáhaⁿ-gă xii té Xímú:

—Daquíhíⁿ bàrcú-a xití làgúná mei núú cùnú-gá, te dàquée-ndo ñunu-ndo tñi-ndo chácá —càchí-gá xăhaⁿ-gă xii-dé.

⁵ Te té Xímú ní xáhaⁿ-dë:

—Mèstrú, ni niú ní quide chiúⁿ-ndí te ni ìⁿ chácá ñà túú ní níhí-ndí, dico vitna cuendá-ni sá yòhó táuchiuⁿ-n te na dàquée-ndí ñunu-ndí váⁿ —càchí-dé xăhaⁿ-dë xii-gá.

⁶ Te òré ní dáquée-güedé ñunu-güedé te súúní vâi chácá ñi níhí-güedé, te ta ndátá-nă ñunu-güedé cuáháⁿ ní cùu. ⁷ Núu ní quide-güedé ndaha-güedé núú dâva-gá cue téé cündihí-güedé xixúhuⁿ ingá bàrcú cuendá quíhíⁿ-güedé chindee ñàha-güedé. Te cue téé-án ñi sáháⁿ-güedé ní chindee tñaha-güedé ní dăchitú-güedé ndi ndúú bàrcú mee-ni chăcá, te súúní ñi cuu vée núu cuíní-na-xi quée naa-güedé ndihí bàrcú ní cùu. ⁸ Te sá dúcáⁿ cuíní-xi quée naa bàrcú ní cùu, núu té Xímú, àdi Pelú chi úú diu-dé, ní ngüíñi xití-dë núú Jèsús, te xăhaⁿ-dë:

—Xocuiñi yòhó Jèsús núú ndécú-í-a, chi yúhú cùu-í ìⁿ téé ío ndècu cuéchi-xi —càchí-dé xăhaⁿ-dë xii-gá.

⁹ Te ducaⁿ ñi càháⁿ-dé chi ní yúhú-dé, te ní cuñúhu-dé ndihí nchaa cue téé ndihí-dé-án cuendá sá ío vâi chácá ñi níhí-güedé.

¹⁰ Te tñahá té Jàcobó ndihí té Juáá cue déhe té Zebèdeú ío ní cuñúhu-güedé, te diu-ni

cue téé cùndìhi té Xímú-án cúú-güedé tñahá-güedé. Te Jèsús ní xáhaⁿ-gã xii té Xímú:

—Vá yùhú-n, chi neni vitna quíhíⁿ-n dàcaháⁿ-n ñáiyu cuèndá tuha ñahá-yu xii-í — cächí-gá xãhaⁿ-gã xii-dé.

11 Te ní quene-güedé ndìhi bàrcú ndéé ñuhu yìchí yuhu làgúná-án. Te òré-án ñí dándõo-güedé nchaandi túhú sá ndécú ndìhi-güedé, te ní tuha-güedé Jèsús.

Jèsús quidé tãtna-gá ìⁿ téé tñahá cuéhé sã dátèhyú nihnu-xi yìqui cùñú-ó

(Mt. 8:1-4; Mr. 1:40-45)

12 Te òré ní quexìo Jèsús ìⁿ ñuú, te ní quexìo ìⁿ téé cùhú tñahá-dé cuéhé sã dátèhyú nihnu-xi yìqui cùñú-ó, te òré ní xiní-dé Jèsús te ní sáháⁿ-dé núú ndécú-gã, te ní ngüñí xítí-dé núú-gã te ní nuu núú-dé ndàa núú ñuhú te cãháⁿ ndàhú-dé, te xãhaⁿ-dë xii-gá:

—Mèstrú, véxi-í cãháⁿ ndàhú-í núú-n nùu vá cùndèe iní-n càda tãtna ñaha-n xii-í, chi cùtnuní iní-í sã ndácú-n — cächí-dé xãhaⁿ-dë xii-gá.

13 Te Jèsús ní dácaá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna te ndúha-n — cächí-gá xãhaⁿ-gã xii-dé.

Te òré-ni ní xócüñí cuéhé tñahá-dé. 14 Te dàtnuní ní xáhaⁿ tucu Jèsús xii-dé:

—Vá yõo ìⁿ cùñaha-n sã ñí quide tãtna ñaha-í xii-n, núú dütú-ñi cuáháⁿ cuèndá sá ná quíni ñahá-dë xii-n sã ñí ndúha-n te cuáha-n-dë sá

ndúú tãhú Yã Ndiõxí dàtná ní cachí ndí Moisés cuèndá ná quíni ñáiyu sã ndàa ní ndúha-n — cächí-gá xãhaⁿ-gã xii-dé.

15 Te ducaⁿ ta xíté nuu-gá tnúhu nchaa nãcuáa quide Jèsús, te ío cuéhé ñáiyu ní xóo tacá nchaa núú ñí xíndecu-gá cuèndá sá cuíni-yu cund-edóho-yu tnúhu cãháⁿ-gã, ndìhi cuèndá sá cuíni-yu cada tãtna ñaha-gã xii-yu. 16 Dico Jèsús ní xóo quee nihni-gá tnuú-yu ní xóo quíhíⁿ-gá núú ñà túú ñáiyu ndècu ní xóo cãháⁿ ndìhi-gá Yã Ndiõxí.

Jèsús quidé tãtna-gá ìⁿ téé cùhú ñá cúú-gã candá nihnu

(Mt. 9:1-8; Mr. 2:1-12)

17 Te ìⁿ nduu dànehé-gá ñáiyu, te xíncúo ìⁿ úú cue téé cùu fariséú, ndìhi cue téé dàcuaha ñaha xii ñáiyu nchaa tnúhu ní chídó tnuní ndí Moisés. Te cue téé-án ñí quee-güedé nchaa ñuú yíndèhu distritú Galileá, ndìhi distritú Jüdeá, ndìhi ñuú Jerusalén, te nchaa ñuú-án ñí quee-güedé cuáháⁿ-güedé núú ndécú-gã. Te Yá Ndiõxí chíndèe ñaha-gá quidé tãtna-gá ñáiyu cùhú. 18 Te ìⁿ úú cue téé nchìdo-güedé ìⁿ téé cùhú ñá cúú-gã candá nihnu ñuhu-dé xító ní quexìo ndìhi ñaha-güedé, te cuíni-güedé quíhu ndìhi ñaha-güedé ndéé xítí vehe, sáa-güedé ndéé núú Jèsús ndìhi téé cùhú-án. 19 Dico ñá túú ní ñhí-güedé ndèe ichi quíhu-güedé, chi cuèndá ío cuéhé ñáiyu ndècu, núú xíãⁿ ní sáa-güedé díquí

véhé-ǎⁿ nǐ caáⁿ-güedé te ndàa díquí véhé-ǎⁿ nǐ dáquë-güedé téé cùhú-áⁿ, te ñùhu-ni-dé xító ní dáquë ñaha-güedé tnuú ñáyiú ní sáá ndéé núú Jèsús.
 20 Te Jèsús ní cutnùnǐ iní-gá sá nǐ yuhu nǐ iní-güedé sàndáá iní ñáhá-güedé xii-gá, núú ní xáhaⁿ-gǎ xii téé cùhú-áⁿ:

—Yòhó téé cùhú, sa ní quide càhnu iní-í nchaa cuéchi-n — cǎchí-gǎ xǎhaⁿ-gǎ xii-dé.

21 Te cue téé dàcuaha ñaha xii-yu nchaa tnuúhu ní chídó tñuní ndíi Moisés ndihí cue téé cùu fariséú ní sani iní-güedé: “¿Ná cúú tée-a núú càháⁿ cuèhé-dé cuendá Yá Ndiöxí-í? Te vá yõo ñⁿ ndàcu cada cahnu iní nchaa yícá cuéchi ñáyiú, chí ñⁿdíi díi-ni Yá Ndiöxí quidé càhnu iní-gá”, duha ní sani iní-güedé.

22 Dico Jèsús sa ní cutnùnǐ iní-gá nàcuáa sàni iní-güedé nùu ní xáhaⁿ-gǎ xii-güedé:

—¿Te ná cuendá ducaⁿ sàni iní-ndó-í? 23 Te sá dúhá nǐ xáhaⁿ-í xii téé cùhú-a sá cáda càhnu iní-í nchaa yícá cuéchi-dé, te xiǎⁿ nchòhó ñá túú cùtnuní iní-ndó nùu ndáá càháⁿ-í àdi ñá ndáá. Dico núú cúu-í-dé sá ndácõo-dé, te caca-dé te cutnùnǐ ndáá iní-ndó nùu ndáá càháⁿ-í àdi ñá ndáá, chí cundehe nùú-ndó nàcuáa cada-í.
 24 Te vitna na càda-í nàcuáa cutnùnǐ iní-ndó nchaa-ndo sá yúhú Téé cùu ñani tñáhá-ndó nchaa-ndo ndecu ndihí-í tñúhu ndee iní sá cáda càhnu iní-í nchaa cuéchi ñáyiú ñuyúú-a —cǎchí-gǎ xǎhaⁿ-gǎ xii-güedé.

Te sáta dúcáⁿ te ní xáhaⁿ-gǎ xii téé cùhú-áⁿ:

—Ndacóo, te ndocani-n xító ñùhu-n véxi-áⁿ, te núhú-n vehe-n —cǎchí-gǎ xǎhaⁿ-gǎ xii-dé.

25 Te òré-ni-áⁿ nǐ ndúha téé cùhú-áⁿ te ní ndacóo-dé, te ní ndocani-dé xító ñùhu-dé ní quexio-áⁿ, te ní natñi-dé ichi ta cǎháⁿ-dé cuánuhú sá ño càhnu cuu Yá Ndiöxí. 26 Te nchaa ñáyiú xĩndecu-áⁿ ní cuñúhu-yu, te tñáhá-yu ní cǎchí-yu sá ño càhnu cuu Yá Ndiöxí, te ducaⁿ ño ní yùhú-yu, te ní xitñáhá-yu:

—Vitna ní xiní-ó ñⁿ sá ñá túú tñáhí xiní-ó ní cùu — cǎchí-yu xitñáhá-yu.

Jèsús cána-gǎ té Lèví

(Mt. 9:9-13; Mr. 2:13-17)

27 Te sáta dúcáⁿ nǐ cuu te ní quee Jèsús xiáⁿ, te ní xiní-gá ñⁿ téé nàni Leví núcõo-dé ñⁿ xichi quide cobrá-dé ñáyiú cuendá impuestú, chí cobràdór cúu-dé, te ní xáhaⁿ-gǎ xii-dé:

—Néhé chitñahá ñáhá-n xii-í —cǎchí-gǎ xǎhaⁿ-gǎ xii-dé.

28 Te té Lèví-áⁿ nǐ ndàcuñí-dé te ní dándõo-dé nchaa sá ndécú ndihí-dé núú núcõo-dé-áⁿ, te ní tuha-dé Jèsús.

29 Te sáta dúcáⁿ te té Lèví-áⁿ nǐ quide-dé ñⁿ vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuànguihu-güedé mèsá ní ngóo-güedé ndihí dava-gá ñáyiú ní quexio cuendá caxi-güedé ndihí-yu. 30 Dico cue téé cùu fariséú ndihí cue téé dàcuaha ñaha xii-yu nchaa tnuúhu ní chídó tñuní ndíi Moisés ní ngúita-güedé

xìcuèhé-güedé cue téé xìca cuu ndihi-gá, te xáhaⁿ-güedě:

—¿Ná cuendá xéxí-ndó xìhi-ndo ndihi cue téé cuihna iní-xi quide cobrá ñáhá xii ñáyi cuendá impuéstú, ndihi nchaa dava-gá cue téé ndècu ichi cuehé ichi duha-i? — cächí-güedé xáhaⁿ-güedě.

31 Te Jèsús ní xáhaⁿ-gá xii-güedé:

—Nchaa ñáyi ñá túú cùhú chi ñá túú xìni ñuhú-yu ñátátná, dico nchaa ñáyi cùhú chi xìni ñuhu ñahá-yu.

32 Te yúhú véxi-í cáháⁿ-í ñáyi cùtnuní iní-xi sá ndécú cuéchi-xi cuendá dañá-yu nchaa sá cuehé sá dúhá quidé-yu, te ñá túú véxi-í cáháⁿ-í ñáyi cächí sá ñá túú ndècu cuéchi-xi —cächí-gá xáhaⁿ-gá xii-güedé.

Cue téé ndècu tnúhu núu Jèsús cuendá ñáyi ñá túú tnàhí ná xéxí áma cáháⁿ ndihí-yu Yá Ndióxi

(Mt. 9:14-17; Mr. 2:18-22)

33 Te ní xáhaⁿ-güedě xii Jèsús:

—Te áma ñá túú tnàhí ná xéxí cué téé xìca cuu ndihi té Juáá cáháⁿ ndihi-güedé Yá Ndióxi, te diu-ni ducaⁿ quide cue téé xìca cuu ndihi nchúhú cue téé cùu fariséu. ¿Te ná cuendá cue téé xìca cuu ndihi-n ñá túú dùcaⁿ quide-güedé núu nchaa-ni nduu xèxi-güedé xìhi-güedé quidé-güedé-i? —cachí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchòhó xìní-ndó sá vǎ cúú cùñaha-o xii cue ñáyi ñuhu vico tnándaha sá vǎ cúú

càxí-yu nini ndècu ndihi ñaha téé tnándaha-áⁿ xií-yu. 35 Dico sáá nduu te vǎ cùndècu ndihi ñaha-gá téé tnándaha-áⁿ xií-yu, te dàvá-áⁿ te cahni iní-yu vǎ cǎxí-yu sá ndihú iní-yu — cächí-gá xáhaⁿ-gá xii-güedé.

36 Te ní cani-gá ñⁿ cuendú núú ñáyi nàcuáa tecú tnùní-yu tnúhu-gá, te xáhaⁿ-gá:

—Vǎ yóo ñⁿ dándée luha dóo sáá ñⁿ dóo sa ní cuu tùhú víhí, chi núu yoo ducaⁿ na càda, te dóo sáá-áⁿ nàndiyi-xi te uuⁿ-gá ndata-xi dóo sǎ ní cuu tùhú-áⁿ, te luha dóo sáá-áⁿ ñà túú nàtaú-xi ndée dóo sǎ ní cuu tùhú-áⁿ. 37 Te ní vǎ yóo ñⁿ chìhi ndidí sáá xítí ñⁿ lamba sa ní cuu tùhú víhí, chi núu yoo ducaⁿ na càda, te ndava lamba sa ní cuu tùhú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ. 38 Núu xíáⁿ xíní ñuhu-xi quée ndidí sáá-áⁿ xítí ñⁿ lamba saa cuendá ducaⁿ ñà túú nǎ cuu cováha-xi. 39 Te ní ñⁿ ñáyi ñá túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ní quene díhna-gá, chi cächí-yu sǎ xíhí vǎha-gá ndidí sá ní quene díhna-gá-áⁿ dàcúxí ndidí sáá —cächí-gá xáhaⁿ-gá xií-yu.

6

Cue téé xìca cuu ndihi Jèsús sàhnú-güedé yoco triú nduu ndètatú ñáyi

(Mt. 12:1-8; Mr. 2:23-28)

1 Te ñⁿ nduu cùu-xi nduu ndetatú ñáyi ñuhu Jèsús ichi ndihi cue téé xìca cuu ndihi-gá, te ta yǎha-gá

ndihi-güedé ìⁿ xichi núú cáá triú, te ní ngúita-güedé sàhnú-güedé yoco triú-áⁿ te ndihi ndaha-güedé quíⁿ-güedé quéé triú tá xèxi-güedé cuáháⁿ. ² Te ìⁿ úú cue téé cùu fariséú ní xáhaⁿ-güedé xii cue téé xica cuu ndihi-gá:

—¿Te ná cuendá ducaⁿ quide nchohó ìⁿ sá ñà túú tàú-ó càda-o vitna cuu-xi nduu ndetatú-ó-í? —
càchí-güedé xáhaⁿ-güedé.

³ Te Jèsús ní xáhaⁿ-gã xii-güedé:

—¿Te náa ñá túú dàcuaha-ndo núú tùtú Yã Ndiöxí núú càháⁿ-xi nàcuáa ní quide ndíi Dàvíi cùtnàhá ní xíhí ndíi docó ndihi cue téé ní xica cuu ndihi ndíi-áⁿ? ⁴ Chi ní quíhu ndíi vehe Yá Ndiöxí, te ní queheⁿ ndíi pàá ní cuu í ndécú-áⁿ ñí dácãhñu ndíi cue téé xica cuu ndihi ndíi ní xèxi ndíi ndihi-güedé, te ñá túú tàú ndíi sá dúcáⁿ càda ndíi ni cùu, chi mee-ni cuè dútú tàú-güedé caxi-güedé pàá-áⁿ ní cùu —
càchí-gá xáhaⁿ-gã xii-güedé.

⁵ Te ní xáhaⁿ tùcu-gá:

—Te yúhú Téé cùu ñani tnàhá-ndó nchàa-ndo, tnàhá-í ndécú ndihi-í tnúhu ndee ìní sá cùu-í nchaa ñáyiu nàcuáa cadá-yu nduu ndetatú-ó-á —
càchí-gá xáhaⁿ-gã xii-güedé.

Ìⁿ téé ní yíchí ìⁿ xio ndaha-xi

(Mt. 12:9-14; Mr. 3:1-6)

⁶ Te ingá nduu ñiu-ni nduu ndetatú ñáyiu cuánguihu Jèsús xití veñúhu dànehé-gá ñáyiu. Te xíaⁿ ndécú ìⁿ téé cùhú ní yíchí nihnu ìⁿ xio

ndaha cùha-dé. ⁷ Te cue téé dàcuaha ñaha xii ñáyiu nchaa tnúhu ní chídó tnúni ndíi Moisés, ndihi cue téé cùu fariséú ndéhé-güedé nùu cada tátna ñaha Jèsús xii téé cùhú-áⁿ nduu ndetatú-güedé-áⁿ cuendá níhí-güedé nàcuáa cada-güedé cacáⁿ cuéchi-güedé cuendá-gá. ⁸ Dico Jèsús sa ní cutnúni iní-gá nàcuáa sàni iní-güedé, te ní xáhaⁿ-gã xii téé cùhú ndaha-xi-áⁿ:

—Ndàcuiñí te ngúnutnii-n cuádava tnuú-ndí-a —càchí-gá xáhaⁿ-gã xii-dé.

Te téé-áⁿ ñí ndacuiñí-dé te ní ngúnutnii-dé cuádava tnuú-güedé ndihi-gá. ⁹ Te dātnúni Jèsús ní xicáⁿ tnúhú-gã núú cuè ñáyiu xĩndecu-áⁿ, te xáhaⁿ-gã xií-yu:

—Cuini-í cachí tnúhu-ndo ñá cúú sã vaha cada-o ndúu ndetatú-ó. ¿Ìⁿ chiúⁿ váha àdi ìⁿ chiúⁿ cuehé, sá cadá tátna-o ñáyiu cùhú àdi sá cáhni-ó-yu? —càchí-gá xáhaⁿ-gã xií-yu.

¹⁰ Te dātnúni ní ndacoto-gá núu-yu ncháá-yu, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n —
càchí-gá xáhaⁿ-gã xii-dé.

Te ní ndocani-dé ndaha-dé, te òré-ni ní ndúha. ¹¹ Te cue téé xĩndecu-áⁿ sũúni ñí cudééⁿ-güedé sá dúcáⁿ ñí quide tátna Jèsús téé cùhú-áⁿ, te ní ngúita-güedé ndátnúhu-güedé nùu nása cada ñaha-güedé xii-gá.

Jèsús cãxi-gá úxúú tnàhá cue téé dacuáha ñaha xii ñáyiu tnúhu-gá

(Mt. 10:1-4; Mr. 3:13-19)

12 Te sáta dúcáⁿ ní cuu te ní xica Jèsús cuáháⁿ-gá xiti yucu cuendá yacáⁿ cáháⁿ ndihi-gá Tátá-gã Dútú Ndiöxí, te ní niú ní cáháⁿ ndihi ñaha-gã. 13 Te sáta ní túndaá, te ní cana-gá nchaa cue téé xica cuu ndihi-gá, te ní cáxi-gá úxúú tnàhá-güedé, te cue téé-áⁿ ní xáhaⁿ-gá sá díú-güedé cuu-güedé cue téé quíhíⁿ cáháⁿ tnúhu-gá núú ñáyiú. 14 Te duha xínani ndi úxúú cue téé-áⁿ. Té Xímú, àdi Pelú chi úú diu-dé, ndihi ñaní-dé té Ndríxí, ndihi té Jàcobó, ndihi té Juàá, ndihi té Lìpé, ndihi té Bartolómé, 15 ndihi té Mäteú, ndihi té Mäxí, ndihi té Jàcobó déhe té Àlfeú, ndihi ingá té Xímú téé ní cundihi cue téé cananistá, 16 ndihi té Jüdás ñaní té Jàcobó, ndihi té Jüdás Iscàrioté téé ní sáá nduu ní sáha cuendá ñáhá xii Jèsús núú cuè téé cùu úhú iní ñáhá xii-gá, duha xínani cuè téé ní cáxi Jèsús ní xica cuu ndihi-gá.

Jèsús dánèhé-gá cuéhé víhí ñáyiú

(Mt. 4:23-25)

17 Te Jèsús cuánuu-gá yucu núú ní sáá-gá-áⁿ, te ní ngava-gá iiⁿ núú ndàá ndihi cue téé xica cuu ndihi-gá, te xiáⁿ ní ngúnutníi-gá. Te xiáⁿ ndécú dàva-gá cue téé xica cuu ndihi-gá ndihi vai ñáyiú ndètu ñahá-yu xii-gá, te ñáyiú-áⁿ vèxi-yu nchaa ñúú cáá dìstrítú Jüdeá, ndihi ñúú Jerusàlén, te ndècu ñáyiú véxi ndàa yuhu lamár yatni ñúú Tírú, ndihi ñúú Sídón. Te nchaa ñáyiú-áⁿ

ní quexió-yu cuíní-yu cund-edóho-yu nchaa tnúhu càháⁿ Jèsús, ndihi cuendá sá cuíní-yu ndúha-yu nchaa cuéhé tnàhá-yu. 18 Te tnàhá ñáyiú yìhi ñaha espíritú cundihi yucu ñávãha. 19 Te nchaá-yu cuíní-yu dacáá-yu ndahá-yu tendàhá-yu Jèsús ní cùu cuendá sá ní níhí-yu tnúhu sá ndècu ndihi-gá tnúhu ndee iní quidé tátna-gá nchaa ñáyiú cùhú.

Cuendá ñáyiú ío váha táhú-xi (Mt. 5:1-12)

20 Te Jèsús ní ndacoto-gá núú cuè téé xica cuu ndihi-gá, te ní xáhaⁿ-gã:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxi tnúni Yá Ndiöxí.

21 Váha táhú nchaa nchòhó ñáyiú ío cuíní cundedóho tnúhu Yá Ndiöxí chi ío vii ío váha cuu iní-ndó.

Váha táhú nchaa nchòhó ñáyiú ndàhyú sá ndihú iní-ndó, chi sáá nduu te cudíí iní-ndó nì caa ni quíhíⁿ.

22 Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gã-yu quíhu-ndo vèñúhu, te cúcuéhé ñáhã-yu xii-ndo, te cachí-yu sá ñã díú ñáyiú váha cùu-ndo, te ducaⁿ càda ñahá-yu xii-ndo sã cuendá yúhú Téé cùu ñaní tnáhá-ndó nchàa-ndo.

23 Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ío váha càa ndecu andiú cundecu ndihi-ndo nduu

na nasaá-ndó yàcáⁿ cun-decu-ndo, chi ñi-ⁿni ducaⁿ ní xóo cada ñaha cuè ñani tñahá-yu xii cue tée ní xóo cáháⁿ tnúhu Yá Ndiöxí ní xíndecu ndéé sanaha.

24 'Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiöxí, chi vitna ío váha ndécú-yu, dico sáá nduu te nduu ndàhú-yu.

25 'Te ndàhú ní cuu tucu nchaa ñáyiú ñá túú tñahí ná cúmání xii-xi vitna, chi sáá nduu quíni-yu tnúndòho tnúhu ndàhú.

'Te ndàhú ní cuu nchaa ñáyiú cùdíí iní-xi ndècu ichi cuehé ichi duha vitna, chi sáá nduu te ndáhyú-yu sá ndìhú iní-yu.

26 'Te ndàhú ní cuu nchaa ñáyiú na càháⁿ váha dava-gá ñáyiú cuèndá-xi, chi ducaⁿ ní xóo cáháⁿ váha-yu cuèndá nchaa cue tée ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiöxí te ñá ndàá —càchí-gá xàháⁿ-gá xii-güedé.

Cuu iní-ó nchaa ñáyiú cùu úhú iní ñáhá xii-o
(Mt. 5:38-48; 7:12)

27 Te Jèsús ní xàháⁿ-gá xii nchaa ñáyiú xíndecu-áⁿ:

—Nchaa nchòhó ñáyiú xíndedòho ñaha càchí tnúhu-í xii-ndo sá cúú iní-ndó ñáyiú cùu úhú iní ñáhá xii-ndo, te cada-ndo sá váha sá cúú-xí-yu cuèi nándi sá ná cádá ñahá-yu xii-ndo. 28 Te cácáⁿ táhú-ndó núú Yá Ndiöxí cuèndá ñáyiú càháⁿ úhú ñáhá xii-ndo, ndìhi cuèndá ñáyiú tèe ñaha cuéchi neñùú xii-ndo. 29 Te núu ní

canihá-yu xii-ndo ñiⁿ xito te cuíni tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndìhi dúhnú-ndó, te dañá-ndo na cànehé-yu quíhíⁿ.

30 Te núu xicáⁿ-yu ñiⁿ sá nándìhi-yu núú-ndó te cuáñaha-ndo, àdi quen-deé-yu ñiⁿ ndachìuⁿ-ndo, te vá nándacáⁿ-ndó núú-yu. 31 Te nchaa sá váha cuíni-ndó càda tñaha ñáyiú-ndo, te cada-ndo tñahá-ndó ndìhí-yu.

32 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sá ío váha quide-ndo, chi tñahá nchaa ñáyiú ndècu ichi cuehé ichi duha ducaⁿ xíquidé-yu. 33 Àdi mee-ni ñáyiú quide ñaha sá váha xii-ndo quide váha-ndó-yu, te vá càchí-ndó sá ío váha quide-ndo, chi tñahá nchaa ñáyiú ndècu ichi cuehé ichi duha ducaⁿ xíquidé-yu.

34 Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ñiⁿ sá xicáⁿ-yu núú-ndó, te vá cáni iní-ndó sá ío quide váha-ndo, chi tñahá ñáyiú ndècu ichi cuehé ichi duha dàsaⁿ nuú-yu ñiⁿ sá néhé váha-yu, te ndètu cahnu-ná-yu nacoto ñaha ñáyiú ní sáha nuú-yu-áⁿ. 35 Dico nchòhó xíni ñùhu-xi cuu iní-ndó ñáyiú cùu úhú iní ñáhá xii-ndo, te cada-ndo sá váha sá cúú-xí-yu, te cuáñaha nuu-ndo ñiⁿ sá ná ndìhi-yu te núu xicáⁿ-yu núú-ndó, te vá cùndètu-ndo nacoto ñahá-yu xii-ndo. Te ducaⁿ te ío-gá cuéhé ñihí-ndó cùndecu

ndihi-ndo, te cuu ndisa-ndo dēhe Dútú Ndiõxí, chi ío càhnu iní-gá sá cúu-xí nchàa ñáyiú ñá túú ndàcáⁿ táhú núú-gǎ cuendá nchaa sá vǎha quide-gá, ndihi sá cúu-xí nchàa ñáyiú ndècu ichi cuehé ichi duha. ³⁶Te cunduu càhnu iní nchòhò tucu dàtná càhnu iní Tàtá-ó Dútú Ndiõxí.

Vá càháⁿ cuèhé-ó cuendá tnàha ñáyiú-o

(Mt. 7:1-5)

³⁷Te vá càháⁿ cuèhé-ndó cuendá sá quidé tnàha ñáyiú-ndo, te ducaⁿ te Yá Ndiõxí ñá túú nà tnúhu cúñaha-gǎ xii-ndo. Te vá cúñaha-ndo xii ñáyiú sá quihíⁿ-yu ìⁿ xichi núú ùhú núú ndàhú ndohó-yu cuendá nchaa sá ñà túú vǎha quide-yu, te ducaⁿ te Yá Ndiõxí vá cúñaha-gǎ xii-ndo sǎ tnàhá-ndó quihíⁿ-ndó ìⁿ xichi núú ùhú núú ndàhú ndoho-ndo. Te chí cáda càhnu iní nchaa sá quidé-yu, te ducaⁿ te Yá Ndiõxí cada càhnu iní ñáhá-gǎ xii-ndo tucu. ³⁸Te chí cuñaha xii ñáyiú núú ná cúú sǎ xíní ñùhú-yu, te dàtná chitu ìⁿ yicá súúní xidó coyo-ná, ducaⁿ tàxi Yá Ndiõxí xii-ndo. Te nánicuáa na càda-ndo cada vǎha-ndo sǎ cúu-xí tnàha ñáyiú-ndo, te ñu-ni ducaⁿ càda ñaha Yá Ndiõxí xii-ndo —càhí Jèsús xǎhaⁿ-gǎ xií-yu.

³⁹Te dàtnùní ní cani-gá ìⁿ cuendú núú-yu nàcuáa tecú tnùnì-yu tnúhu-gá, te xǎhaⁿ-gǎ:

—Ìⁿ tée cuáá chi ñá ndácú-dé cuita nehe-dé ingá tée cuáá, chi núú ducaⁿ na

càda-güedé te ndi ndùú-güedé ngaunihnu-güedé déhvá.

⁴⁰Te ni ìⁿ landú yihí scuèlá ñá túú cùnuu-gá-güexi dàcúúxí mèstrú-güexi, te ndéé núu na cùtúha vǎha-güexi, te dàtnùní nùtnahá-güexi tée dānehé ñáhá xii-güexi.

⁴¹Te na càhí tnúhu-í xii-ndo sǎ nchàa cuéchi quide ñáyiú cùu-xi datná ìⁿ mihi líhli. ¿Te ná cuendá ndéhé-ndó ìⁿ sá ñà túú vǎha quide tnaha ñáyiú-ndo, te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sǎ ndéhé-ndó dàtná ìⁿ mihi líhli ñùhu núú tnàha ñáyiú-ndo, te mee-ndo ñùhu ìⁿ mihi cahnu-gá núú-ndó. ⁴²Te núu na nàcanu ichi-ndo tnaha ñáyiú-ndo cuendá sá ñà túú quide vǎha-yu ndècú-yu te mee-ndo vihi-gá quidé-ndó ñá, te cada iní-ndó sǎ xǎhaⁿ-ndo xií-yu sá nátàva-ndo mihi líhli ñùhu núú-yu, te mihi càhnu ñuhu núú méé-ndó ñà túú quide cuendá-ndó. ¡Te sá dúcáⁿ quide-ndo te ío dāndahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó! Te xini ñuhu-xi díhna-gá dañha-ndo nchàa sá ñà túú vǎha quide-ndo, te dàtnùní ducaⁿ te cutnùní vǎha iní-ndó nàcuáa nacanu ichi-ndo tnàha ñáyiú-ndo.

Ndi dǎⁿ núú yutnu xini-ó nǎ yutnu cùu-xi cuendá sá sǎvidí-xi

(Mt. 7:17-20; 12:34-35)

⁴³Te ñá túú ni ìⁿ yutnu vǎha te quiní-ó cùuⁿ sǎvidí sá ñà túú vǎha, te ni ìⁿ yutnu

sá ñà túú vǎha, te quini-ó cùuⁿ sǎvidí váha, chi mee-ni sǎvidí sá ñà túú vǎha cùuⁿ.
 44 Te ndi dǎⁿ núú yutnu xini-ó nǎ yutnu cùu-xi cuendá sá sǎvidí-xi, chi ñá túú xini-ó cùuⁿ ngúxí ìⁿ tnu ìñu, te ni ñà túú xini-ó cùuⁿ ndéhé yoho yàha stilé díquí ìⁿ yoho yàha cutexínu. 45 Te nchaa ñáyiú váha iní-xi càháⁿ-yu tnúhu váha, chi ñu-ni tnúhu váha tnàhí-áⁿ ñúhú iní-yu, te nchaa ñáyiú ñá túú vǎha iní-xi càháⁿ cuèhé-yu, chi ñu-ni tnúhu cuèhé tnàhí-áⁿ ñúhú iní-yu, chi nchaa sá ñúhú iní-yu te xiǎⁿ càháⁿ-yu.

Ìⁿ vehe ndècu cimientú-xi ndihi ìⁿ vehe ñá túú cimientú-xi (Mt. 7:24-27)

46 ¿Te ná cuendá càchí-ndó sǎ yúhú cúu-í Yaá cúú Xitohó-ndó te ñá túú quide-ndo nchaa nacuaá càháⁿ-í-i? 47 Te na càchí tnúhu-í xii-ndo cuendá ñáyiú tùha ñaha xii-í, chi ñáyiú-áⁿ sácúndedóho-yu nchaa tnúhu càháⁿ-í te tnǎⁿ-yu. 48 Te ñáyiú-áⁿ cúu-yu dàtná ìⁿ téé ní dácáá ìⁿ vehe, chi téé-áⁿ ñhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, dico ñá túú ní ndàcu-xi cuido-xi, te ducaⁿ chi téé ní dácáá vèhe-áⁿ nǎ tava-dé cimientú-xi núú yúú cáxíⁿ. Duha sǎtnahá-xi cùu nchaa ñáyiú sácúndedóho tnúhu càháⁿ-í te tnǎⁿ-yu. 49 Te ñáyiú sácúndedóho tnúhu càháⁿ-í te ñá túú tnǎⁿ-yu,

ñáyiú-áⁿ cúu-yu dàtná ìⁿ téé ní dácáá ìⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, te íi-ni ní xido-xi vehe-áⁿ cuendá sá ñá túú ní quène cimientú-xi. Duha sǎtnahá-xi cùu nchaa ñáyiú sácúndedóho tnúhu-í te ñá túú cuini-yu tnǎⁿ-yu — càchí-gá xǎhaⁿ-gá xii-yu.

7

Jèsús quidé tǎtna-gá ìⁿ téé xinu cuechi núú ìⁿ téé cùu capitáⁿ

(Mt. 8:5-13)

1 Te sátá nǎ yáha ní càháⁿ Jèsús ndihi ñáyiú, te cuáháⁿ-gá ñúú Capèrnaúm. 2 Te yacáⁿ ndécú ìⁿ téé cùu capitáⁿ, te cùhú ìⁿ téé xinu cuechi núú-dé téé ío-gá cúú iní-dé, te sa ndècu-ná-dé sá cúú-dé. 3 Te òré ní níhí tée cùu capitáⁿ-áⁿ tnúhu cuendá Jèsús, te ní tendaha-dé ìⁿ úú cue téé cùu sacuéhé núú ñáyiú isràél cuáháⁿ-güedé càháⁿ ndàhú-güedé núú-gǎ núu vá cündèe iní-gá quihíⁿ-gá cada tǎtna-gá téé xinu cuechi núú-dé-áⁿ. 4 Te ní quexìo-güedé núú ndécú Jèsús, te ní ngüita-güedé càháⁿ ndàhú víhí-güedé núú-gǎ, te xǎhaⁿ-güedé:

—Tée cùu capitáⁿ ní cachí-dé véxi-ndí núu vá cündèe iní-n quihíⁿ-n càda tǎtna-n ìⁿ téé xinu cuechi núú-dé chi cùhú-dé, te taú ndisa-n càda-n nacuaá càháⁿ capitáⁿ-áⁿ, 5 chi téé-áⁿ ío cùu iní ñáhá-dé xii nchaa nchúhú ñáyiú isràél te ñu-dé ní

táuchíúⁿ-dě ní sáá veñúhu-ndí
—càchí-güedé xáhaⁿ-güedé
xii-gá.

6 Te sátá dúcáⁿ te
Jèsús ní xica-gá cuáháⁿ-gá
ndihi-güedé, te òré tá
cùyatni-gá vehe núú ndécú
tée cùhú-áⁿ cuáháⁿ, te téé cùu
capitáⁿ-áⁿ ñí xáhaⁿ-dě xii ìⁿ
úú cue téé càháⁿ ndihi-dé:

—Quíhíⁿ-ndó cùñaha-ndo
xì Yaá cúú Mèstrú sá càchí-í
sá ñà túú nà cani iní-gá, chì
ñá túú tàú-í sá quíhu-gá ndéé
xítí vehe-í, 7 chì ñí sá cùnú
ndúcú mèe-í-gá ñá túú ní
cùyii-í. Núu xiáⁿ cùñaha-ndo
xì-gá sá ná càháⁿ-ni-gá sá
ndúha téé xínu cuechi núù-í-a
te ndúha-dé. 8 Chì yúhú ndécú
cuè téé tàxi tnuní ñáhá xii-í,
te ducaⁿ yúhú tucu ndècu
cue sandadú táxi tnùn-í. Te
òré xáhaⁿ-í xii ìⁿ-dé quíhíⁿ-dé
ìⁿ chiuⁿ te cuáháⁿ-dé, te òré
xáhaⁿ-í xii ingá-dé quixi-dé
te véxi-dé, te òré xáhaⁿ-í xii
téé xínu cuechi núù-í cada-dé
ìⁿ chiuⁿ te quide-dé. Duha
càchí-í cùñaha-ndo xii-gá —
càchí-dé xáhaⁿ-dě xii cue téé
càháⁿ ndihi-dé-áⁿ.

9 Te sátá dúcáⁿ ñí
xáhaⁿ-güedé xii Jèsús, te ní
cuñúhu-gá nchaa tnúhu ní
cáháⁿ téé cùu capitáⁿ-áⁿ, te ní
nchócótó-gá núú nchàa ñáyi
nchícúⁿ ñáhá xii-gá cuáháⁿ, te
ní xáhaⁿ-gá:

—Na càchí tnúhu ndáá-í
xii-ndo sá vátá quíní-gá-í ní
ìⁿ ñáyi israhél, ñáyi ío váha
sàndáá iní-xi Yá Ndiöxí dàtná
sàndáá iní ñáhá tée-áⁿ xii-gá
—càchí-gá xáhaⁿ-gá xií-yu.

10 Te òré ní ndexìo cue
téé nèhe tnúhu-áⁿ ñí sáháⁿ

núú Jèsús, te sa ní ndúha téé
cùhú-áⁿ.

*Jèsús dándòto-gá déhe ìⁿ
ñaha quèé*

11 Te sátá dúcáⁿ ñí cuu
te ní xica Jèsús cuáháⁿ-gá
ìⁿ ñuu nání Nàín, ndihi
cue téé xica cuu ndihi-gá,
ndihi vài ñáyi. 12 Te òré
ní sáá-gá yuhu ñuu-áⁿ, te ní
xiní-gá nchídó-güedé ìⁿ ndíyi
cuáháⁿ chindúxi ñaha-güedé,
te ndíyi-áⁿ cúú dèhe ìⁿ ñaha
quèé, te ìⁿndi ducaⁿ-ni déhe-aⁿ
ndècu ni cuu te ní xihí-dé.
Te ío cuéhé ñáyi cuáháⁿ
chindúxi ñaha. 13 Te òré
ní xiní ñáhá Jèsús xii-aⁿ
ndàhyú-aⁿ te ní cundàhú iní
ñáhá-gá, te ní xáhaⁿ-gá:

—Vá ndàhyú-n —càchí-gá
xáhaⁿ-gá xii-aⁿ.

14 Te ní dáyátní-gá cajú
ñúhú ndíyi-áⁿ te ní dácàá-gá
ndaha-gá te ní tendaha-gá
cájá-áⁿ, te ní ngüñí cue téé
nchìdo ñaha-áⁿ. Te ní xáhaⁿ-gá
xii ndíyi-áⁿ:

—Tée cuechi, yúhú càchí-í
sá ndácòo-n —càchí-gá
xáhaⁿ-gá xii ndíyi-áⁿ.

15 Te téé ní xihí-áⁿ ñí
nucúnucóo-dé te ní ngüita-dé
càháⁿ-dé, te Jèsús ní nacuáha
cuèndá ñáhá-gá xii-dé ndaha
náná-dé. 16 Te sá dúcáⁿ ñí
quide Jèsús ní xiní-yu te ío ní
yúhú-yu, te ní xitnàhá-yu:

—Ío càhnu cuu Yá Ndiöxí
chì ìⁿ téé càháⁿ tnúhu-gá
ní quexìo núú ndécú-ó —
càchí-yu xitnàhá-yu.

Te ní xitnàha tucú-yu:

—Yá Ndiöxí véxi-gá
chindee ñaha-gá xii nchaa

nchoo ñäyiu cùu cuendá-gá —
càchí-yu xitnàhá-yu.

17 Te nchaa ñuú distritú
Júdeá, ndihi dava-gá ñuú ní
níhí-yu tnúhu nàcuáa ní quide
Jèsús.

*Cue téé ní tendaha té Juàá
cuáháⁿ núú ndécú Jèsús*

(Mt. 11:2-19)

18 Te cue téé xica
cuu ndihi té Juàá ní
xáhaⁿ-güedé xii-dé nchaa sá
ní quide-gá, núu ní cana-dé
úú tnàhá-güedé 19 cuendá
cúñaha-dé quíhíⁿ-güedé
nducu tnúhu-güedé núú Jèsús,
te núu sá díú-gã cúú-gã Crístú
Yaá ní tendaha Yá Ndiöxí
véxi ñuyíú-a àdi sá cündètu
nahi-ni-güedé mei Yàá-áⁿ.
20 Te òré ní quexìo cue téé ní
tendaha tẽ Juàá núú ndécú
Jèsús, te xáhaⁿ-güedé xii-gá:

—Té Juàá téé dàcuandute
ñaha xii ñáyiú ní tendaha
ñaha-dé xii-ndí véxi-ndí cácaⁿ
tnúhú-ndí núú-n, núu sá
díú-n cùu Crístú Yaá quixi
ñuyíú-a, àdi sá cündètu-ndí
mei Crístú càchí-dé —
càchí-güedé xáhaⁿ-güedé
xii-gá.

21 Te mei òré ní quexìo-güedé-áⁿ
ní quide tátna Jèsús vãi ñáyiú
cùhú, te davá-yu càhú víhí
tnàhá-yu, te ndi dííⁿ ndí dííⁿ
núú cuèhé tnàhá-yu ñⁿ ñⁿ-yu,
te cue ñáyiú yìhí ñaha espíritú
cündihí yucu ñávaha ní
queñuhu-gá espíritú-áⁿ yiqui
cũnú-yu, te ío vãi ñáyiú cuáá
ní nacaáⁿ-gá núú-yu. 22 Te
Jèsús ní xáhaⁿ-gã xii-güedé:

—Chí cuánùhú te cani-ndo
cuèndú núú tẽ Juàá nchaa

sá ní xiní-ndó quide-í, ndihi
nchaa nàcuáa ndùu tnúhu ní
cáháⁿ-í ní xindedóho-ndo. Te
cúñaha-ndo xii-dé sá quidé
tátna-í núú cuè ñáyiú cuáá, te
quide tátna-í cue ñáyiú yacua,
ndihi cue ñáyiú tnàhá cuéhé
sã dátèhyú nihnu-xi yiqui
cũnú-yu, ndihi cue ñáyiú
doho, nchaa ñáyiú-áⁿ quide
tátna-í te ndùha-yu, te ndéé
cue ñáyiú sa ní xíhí dándòto-í
cúñaha-ndo xii-dé, te cúñaha
tùcu-ndo xii-dé sá ndècuu-í
dánèhé-í nchaa ñáyiú ndàhú
tnúhu sá sánú ichi ñaha xii-yu
nàcuáa naníhí tàhú-yu. 23 Te
cúñaha tùcu-ndo xii-dé sá ío
váha táhú nchaa ñáyiú ñá túú
quide sáá iní nchaa tnúhu
cáháⁿ-í, duha cúñaha-ndo
xii-dé —càchí-gá xáhaⁿ-gã
xii-güedé.

24 Te sátá ní yáha-güedé
cuánuhú-güedé, te ní ngúita
Jèsús ní cáháⁿ-gá núú ñáyiú
cuendá té Juàá, te xáhaⁿ-gã
xii-yu:

—Nchòhó ní sándéhé-ndó
ñⁿ téé ndècu xití yucu, te
téé-áⁿ ñà túú sàni ñⁿ saní úú
iní-dé, chí ñá túú quide-dé
dàtná quidé nchaa ité náhnú
cuáháⁿ-xi duha cuáháⁿ-xi
dàcáⁿ òré quéné tãchí. 25 Te
ni ñà túú ní sándéhé-ndó
ñⁿ téé nihnu dóó vãha dóó
vii càa. Te nchòhó xiní-ndó
sã ñáyiú sàcuíhnu dóó vãha
dóó vii càa ñá túú nã
cúmãní xii-yu, te nchaa
ñáyiú-áⁿ ndécũ-yu vehe cue
téé cùnno yindaha ñaha xii
ñáyiú. 26 Dico nchòhó chí
ní sándéhé-ndó ñⁿ téé càháⁿ
tnúhu Yá Ndiöxí. Te ndáá
sá díú tẽ càháⁿ tnúhu-gá

cúu-dě dico cùnūu-gá-dé dácúúxí dáva-gá cue tée cáháⁿ tnúhu-gá. ²⁷ Te diu cuendá té Juáá-áⁿ cáháⁿ-xi núú tütú Yá Ndiöxí nàcuáa ní xáhaⁿ-gã xii Crístú, te duha ní xáhaⁿ-gã:

Tendaha-ĩ ìⁿ tée cáháⁿ tnúhu-í codonūu-dé núú-n cuendá dätúha-dé ñáyiū cuendá quíndáa ínī-yu tnúhu-n.

Duha ní xáhaⁿ-gã, te ducaⁿ nĩ ngódó tnùnī núú tütú-gá. ²⁸ Te na cächí tnúhu-í xii-ndo sã nĩ ìⁿ cue tée ñuyíú-a ñá túú cùnūu-güedé dàtná cúnūu té Juáá tée dàcuandute ñaha xii ñáyiū. Te nchaa ñáyiū sa ta ndĩhu ndaha ñaha Yá Ndiöxí vitna cuáháⁿ cúnūu-gá-ni tucú-yu dácúúxí tẽ Juáá cuẽi cùú-yu ñáyiū ñá túú cùnūu dácúúxí dáva-gá ñáyiū yĩndaha-gá —cächí Jèsús xáhaⁿ-gã xii-yu.

²⁹ Te sá dúcáⁿ nĩ cáháⁿ Jèsús, núu nchaa ñáyiū ní dácúúndute té Juáá ní cachí-yu sá ïo váha quide Yá Ndiöxí, te diu-ni ducaⁿ nĩ cáháⁿ cue tée cuihna ìní-xi quide cobrá ñahá xii ñáyiū cuendá impuèstú, cue tée ní dácúúndute-dé. ³⁰ Dico cue tée cùu fariséú, ndihi cue tée dàcuaha ñaha xii ñáyiū nchaa tnúhu ní chídó tnùnī ndíi Moisés, cue tée ñá túú ní dàcuandute té Juáá ñá túú ní tnàhá ìní-güedé cada-güedé nchaa sá váha cuiní Yá Ndiöxí. ³¹ Te Xítohó Jesucristú ní xáhaⁿ-gã xii-yu:

—Na cächí tnúhu-í xii-ndo nàcuáa sãtnahá-xi cùu ñáyiū ndècu vitna. ³² Chi ñáyiū-áⁿ cùú-yu dàtná cue landú sácõo

núú yáhu dàdiq̄i-güexi te níhi cáháⁿ-güexi, te xĩtnàha-güexi: “Ní tiú-ndí yaá ndihi vilu te ñá túú ní cuiní-ndó càta-ndo, Te ïo yica ìní ní xita yuhu-ndí te ñá túú ní ndähyú-ndó”, cächí-güexi xĩtnàha-güexi. Te ducaⁿ sãtnahá-xi cùu ñáyiū ndècu vitna. ³³ Te té Juáá tée ní xõo dacuandute ñaha xii ñáyiū ïo ndähú ní xõo caxi-dé, te ni ñá túú ní xõo coho-dé ndudí ndéhé yoho yáha stilé sá sá ní nduu-xi ndidí, te ní cachí-ndó sã nĩ xĩndecu ndihi-dé espíritú cündihi yucu ñávaha. ³⁴ Te sátá nĩ quexio yúhú Té cùu ñaní tnáhá-ndó nchaa-ndo, te xèxi-í xihí-í ndécú-í te cächí-ndó sã cùú-í tée xèxi vihi te xihí vihi-í. Te cächí tucu-ndo sã cùú-í tée xica cuu ndihi cue tée cuihna ìní-xi quide cobrá ñahá xii ñáyiū cuendá impuèstú, ndihi nchaa dáva-gá cue tée ndècu ichi cuehé ichi duha, duha cächí-ndó. ³⁵ Te ñáyiū ní tnahá tnúhu ndihi Yá Ndiöxí, ñáyiū-áⁿ quidẽ-yu nàcuáa cutnùnī sá mée-gã ïo ndècu ndihi-gá sá xìnī tnùnī-gá — cächí-gá xáhaⁿ-gã xii-yu.

Jèsús ndécú-gã vehe ìⁿ té cùu fariséú tée nàni Xímú

³⁶ Te ìⁿ té cùu fariséú ní cáháⁿ-dé Jèsús vehe-dé caxi-gá, te òré ní quexio-gá te cuánguihu-gá mèsá. ³⁷ Te xíaⁿ núcõo-gá ní sáa ìⁿ ñadhí te diu-ni ñaha ñuú-áⁿ cúú-áⁿ, te ndècu-aⁿ ichi díí ìní, te sá nĩ níhí-aⁿ tnúhu sá cuãngxí Jèsús vehe té cùu fariséú-áⁿ, núu nèhe-aⁿ ìⁿ yoó chitu acití säháⁿ tnámí. ³⁸ Te ní

ngóo-aⁿ ìⁿ xio dǎñi Jesús, te ní ngüita-aⁿ ndàhyú-aⁿ te ndihi ndute núú-aⁿ ní naquete-aⁿ sàhá-gá. Te dàtnùní ní nadayìchí-aⁿ ndihi idi díquí-aⁿ, te ní teyuhu-aⁿ sàhá-gá, te ní chihi ñaha-aⁿ àcítí sàháⁿ tnámí-áⁿ. ³⁹ Te sá dúcáⁿ ní quide-aⁿ ní xiní téè cùu fariséú téè ní cáháⁿ ñáhá xii-gá-áⁿ núu ní sani iní-dé: “Te núu dícó ndisa téè càháⁿ tnúhu Yá Ndiòxí cúú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dícó ìⁿ ñaha ndècu ichi díí iní cúú-áⁿ”, duha ní sani iní-dé. ⁴⁰ Te Jèsús ní xáhaⁿ-gá xii-dé:

—Xímú, ndècu ìⁿ tnúhu cachí tnúhu-í xii-n —càchí-gá xáhaⁿ-gá xii-dé.

Te téè cùu fariséú-áⁿ xáhaⁿ-dè xii-gá:

—Cachí tnúhu, Mèstrú —càchí-dé xáhaⁿ-dè xii-gá.

⁴¹ Te Jèsús ní xáhaⁿ-gá:

—Ní xíndecu ìⁿ téè ní xóo dasaⁿ núu díhúⁿ, te ní xítaú úú tnàhá-güedé núú-dè. Te ìⁿ-dé ní sàha-dé úhúⁿ cièndú díhúⁿ denàriú, te ingá-dé ní sàha-dé údico úxí. ⁴² Te ñá ní ñihí-güedè nacháhu-güedé núú-dè, te téè ní sánùu ñaha-áⁿ ní quide càhnu iní-dé ndí ndùú-güedé. Te vitna cachí-ò tucu te núu ndèda càa-güedé cúú ìní ñáhá-gá-güedé xii-dé —càchí-gá xáhaⁿ-gá xii-dé.

⁴³ Te ní xáhaⁿ tē Xímú-áⁿ:

—Sànuu sá tēè tàù vài-gá díhúⁿ ìo-gá cúú ìní-dé téè ní sánùu ñaha díhúⁿ-áⁿ —càchí-dé xáhaⁿ-dè xii-gá.

Te ní xáhaⁿ Jèsús:

—Sá ndàá càháⁿ-n —càchí-gá xáhaⁿ-gá xii-dé.

⁴⁴⁻⁴⁶ Te Jèsús ní ndacoto-gá núú ñadihí-áⁿ, te ní xáhaⁿ-gá xii té Xímú-áⁿ:

—¿Ndèhe-n nacúaa quide ñadihí-a ñá? Chi cuánguihu-í vehe-n, dico ñá túú ní tàxi-n ndute ndoo sàhá-í, te ní ñà túú ní tēyuhu ñaha-n, te ní ñà túú ní chihi-n acítí díquí-í, dico ñadihí-a ní naquete-aⁿ ndihi ndute núú-aⁿ sàhá-í, te ní nadayìchí-aⁿ ndihi idi díquí-aⁿ, te nuu núu teyuhu-aⁿ sàhá-í, te ní chihi-aⁿ acítí sàháⁿ tnámí sàhá-í. ⁴⁷ Te na càchí tnúhu-í xii-n sá ìo cùu iní ñáhá-áⁿ xii-í, te núu xíáⁿ cùtnùní iní-ó sá cuèi ìo vài sá cuèhé sá dúhá ní quide-aⁿ, dico Yá Ndiòxí sa ní quide càhnu iní ñáhá-gá xii-aⁿ. Chi Yá Ndiòxí quidé càhnu iní-gá ñáyiú cuèi vài àdi sacú cuèchi-yu, te núu sacú cuèchi-yu te sacú cúú ìní ñáhá-yu xii-í —càchí-gá xáhaⁿ-gá xii-dé.

⁴⁸ Te ní xáhaⁿ-gá xii ñadihí-áⁿ:

—Sa ní quide càhnu iní-í nchaa cuèchi-n —càchí-gá xáhaⁿ-gá xii-aⁿ.

⁴⁹ Te cue téè xínucóo ndihi-gá xitnàha-güedé:

—¿Ná téè cùu téè-a núu nándi sá quidé-dè, te ndéè nchaa yíca cuèchi ñáyiú quide càhnu iní-dé-i? —càchí-güedé xitnàha-güedé.

⁵⁰ Te Jèsús ní xáhaⁿ tùcu-gá xii ñadihí-áⁿ:

—Sa ní cácu nihnu-n núu ùhú núu ndàhú vitna chi ní sándáá iní ñáhá-n xii-í, te vitna cuanùhú te ñá túú-gá

ná cani iní-n —càchí-gá xáhaⁿ-gã xii-aⁿ.

8

Ñáyiú dìhí ní chindee ñàha xii Jesús

¹ Te sátá dúcáⁿ ñí cuu te Jèsús ní xica-gá cuáháⁿ-gá titní víhí ñùú náhnú, ndihí ñuú líhli dānehé-gá ñáyiú nàcuáa ndihu ndaha ñàha Yá Ndiòxí xii-yu. Te cuáháⁿ ndihí-gá ndi ùxúú tnhá cue téé xica cuu ndihí-gá, ² ndihí ñí ùú ñáyiú dìhí ní quide tátna-gá ní xíhí ñàha espíritú cùndihí yucu ñávàha, ndihí ñáyiú tnhá dava-gá cuéhé ùhú ní cùu. Te xíáⁿ tnhá tucu ñí ñàha nàni Mariá Magdalèná, te ñàha-áⁿ ñí xíhí ñàha ùsá espíritú cùndihí yucu ñávàha xii-aⁿ ní cùu, te ní quee ñàha-xi. ³ Te tnhá ñí ñàha nàni Juáná ñadìhí ñí téé nàni Chúza téé ní cunuu ñí xinu cuechi vèhe té Hèrodés, ndihí ingá ñàha nàni Susana nchaa ñáyiú-áⁿ ñí chindee ñàhá-yu xii-gá ndihí nchaa sá ndécú ndihí-yu, te ñi-ni ducaⁿ ñí quide vài-gá tucu ñáyiú nchicúⁿ ñàhá xii-gá cuáháⁿ.

Nàcuáa quide téé cuángacáⁿ triú

(Mt. 13:1-9; Mr. 4:1-9)

⁴ Te ío vài ñáyiú ndaa ñuú ní tacá-yu núú ndécú Jèsús, te ní ngúíta-gá ní cani-gá ñí cuèndú núú-yu cuèndá tecú tñuní-yu tñuhu-gá, te xáhaⁿ-gã xii-yu:

⁵ —Íⁿ téé cuángacáⁿ-dé triú. Te òré ní ngúíta-dé dāngoyo-dé triú-áⁿ te dava ní

quene ndava ní ngava ndéé ichi, te ní xénihnu ñáyiú, te ní xiní tñlaá te ní nadatácá-güedi.

⁶ Te dava ní ngava ñuhu yadi núú yíhí víhí yúú, te ní xínu-xi dico núú sàcú-ni nduu te ní yíchí-xi, chi ñá túú cōhyo yíhí.

⁷ Te dava ní ngava núú yúcú ndíquíⁿ tnu ñíhu, te ñíⁿnuu-ni ñí xínu-xi ndihí tnu ñíhu-áⁿ, te tnu ñíhu-áⁿ ñí dánáá-xí nchaa triú sá ñí xínu-áⁿ. ⁸ Dico dava triú-áⁿ ñí ngava-xi núú ndécú ñíhu cocoⁿ, te xíáⁿ ní xínu-xi te ní sahnú-xi, te ío váha ní cuu, chi núú ñíⁿ-ní triú te ní nguíhí yoco-xi ñíⁿ cièndú triú-xi —càchí-gá xáhaⁿ-gã xii-yu.

Te níhí ní cáháⁿ-gá ní xáhaⁿ tucu-gá xii-yu:

—Nchaa nchòhó ñáyiú ní xíndedóho tñuhu ní cáháⁿ-í-a, te ío váha chí cuáha cuèndá —càchí-gá xáhaⁿ-gã xii-yu.

Nàcuáa quèe-xi tñuhu ní cáháⁿ Jèsús

(Mt. 13:10-17; Mr. 4:10-12)

⁹ Te cue téé xica cuu ndihí Jèsús ní xicáⁿ tñuhú-güedé núú-gã núu nása quèe-xi cuèndú ní cani-gá núú ñáyiú.

¹⁰ Te ní xáhaⁿ-gã xii-güedé:

—Nchòhó chi sa càchí tñuhu Yá Ndiòxí xii-ndo ñíⁿ sá vátá quíní-gá-ndó, chí càchí tñuhu-gá nàcuáa cada-gá ndihu ndaha-gã ñáyiú, dico dava-gá ñáyiú caní-í mee-ni cuèndú núú-yu, chí cuéi na quíní-yu nchaa nàcuáa cuu dico ñí vá cùtñuní iní-yu ná cuèndá ducaⁿ cùu, àdi cuéi na cùndedóho-yu dico ñí vá təcú

tnùní-yu —càchí-gá xáhaⁿ-gã xii-güedé.

Jèsús càháⁿ-gá nàcuáa quèe-xi tnúhu cuendá té cuángacáⁿ triù

(Mt. 13:18-23; Mr. 4:13-20)

11 Te xáhaⁿ tùcu-gá xii-güedé:

—Duha quèe-xi cuendú ní cani-í núú-ndó, chi triù ní sacáⁿ tée-áⁿ cúu-xí dàtná tnúhu Yá Ndiöxí. 12 Te triù sá ñi quene ndava ní ngava ndéé ichi-áⁿ, xiáⁿ cúu-xí dàtná ñáyiu ní quée iní-xi tnúhu Yá Ndiöxí, dico sácuihná cuáháⁿ-xi xòcani-xi tnúhu-gá iní-yu cuendá sá vã quíndáá iní-yu, te vã nánihí tahú-yu. 13 Te triù sá ñi ngava ñuhu yadi núú yíhí vihí yúú, xiáⁿ cúu-xí dàtná ñáyiu ní xíndedóho tnúhu Yá Ndiöxí te díí iní ní tníⁿ-yu tnúhu-gá, dico òré ná dàcaháⁿ ñáhá yùcu ñávãha xii-yu nándi cadá-yu, te dàña nihnú-yu tnúhu-gá chi ñá ñihí ndéⁿ-yu canchicúⁿ nihnú-yu nàcuáa càháⁿ tnúhu-gá. 14 Te triù sá ñi ngava núú yúcu ndíquiⁿ tnu iñu-áⁿ, xiáⁿ cúu-xí dàtná ñáyiu ní tecú dóho-xi tnúhu Yá Ndiöxí, dico cuèé cuèé ní nacuanaá-yu tnúhu-gá, chi cuendá mee-ñi sã cúu-xí mèe-yu ñuhu iní-yu, ndihi cuendá sá ïo sàni iní-yu cuu cuicá-yu, ndihi cuendá sá ïo cùdíí iní-yu nchaa sá ïo ñuyíú-a núu xiáⁿ àuⁿ nã cuu ní xíndedóho-yu tnúhu-gá.

15 Dico triù sá ñi ngava núú ndécú ñuhu cocoⁿ, xiáⁿ cúu-xí dàtná ñáyiu váha iní-xi ní

xíndedóho tnúhu Yá Ndiöxí chi ñá túú dàña nihnú-yu, te ñi yùhu ñi iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti

(Mr. 4:21-25)

16 'Te ñá túú ñi ñáyiu tèñuhú-yu ñi iti te dàdáhu-yu, àdi chiváha-yu ñi caha càamá, chi tàxi ndecú-yu núú ñnu cuendá cutnùní núú nchaa ñáyiu ndècu vehe. 17 Te ñi ñi tnúhu sá ñã tècú tnùní ñáyiu vitna vá càchí-ó sã vã tècú tnùní-yu chi dacuèi sá tècú tnùní-yu, te ñi ñi tnúhu sá càchí-ó cùu yuhu vitna vá cúu yùhu chi dacuítí sã quée tũu-xi núú ñáyiu.

18 'Te chí cùndedóho váha tnúhu ña càháⁿ-í-a. Nchaa ñáyiu sàndáá iní ñáhá xii Yá Ndiöxí ío-gá cuita quíndáá-gá iní ñáhã-yu xii-gá quíhíⁿ, te nchaa ñáyiu ñá túú sàndáá iní ñáhá xii-gá uuⁿ-gá cuita cuu sáa-gá iní-yu núú-gã quíhíⁿ —càchí-gá xáhaⁿ-gã xii-güedé.

Cue ñani Jèsús ndihi nãná-gã

(Mt. 12:46-50; Mr. 3:31-35)

19 Te ní quexio náná Jèsús ndihi cue ñani-gá vehe núú ndécú-gã, te ñá ndácũ-yu càháⁿ ndihi ñáhã-yu xii-gá chi ío cuéhé ñáyiu ndècu núú ndécú-gã. 20 Te ñi ñáyiu xíndecu-áⁿ ñi dáyãha-yu tnúhu núú-gã, te xáháⁿ-yu:

—Ní quexio náná-n ndihi cue ñani-n xínutnii-yu quehé, te cuini-yu càháⁿ ndihi ñáhã-yu xii-n —càchí-yu xáháⁿ-yu xii-gá.

21 Te ní xáhaⁿ-gǎ:

—Nchaa ñáyiú sàcúndedóho tnúhu Yá Ndiõxí te quidé-yu nchaa nàcuáa càháⁿ tnúhu-gǎ, ñáyiú-áⁿ cúú-yu dàtná nǎnà-í ndihí dàtná cue ñaní-í — cǎchí-gǎ xáhaⁿ-gǎ xii ñáyiú ní dáyǎha tnúhu núú-gǎ-áⁿ.

Jèsús ngání-gǎ táchí ndihí ndute làgúná

(Mt. 8:23-27; Mr. 4:35-41)

22 Te ìⁿ nduu ní quée Jèsús bàrcú ndihí cue téé xica cuu ndihí-gǎ, te ní xáhaⁿ-gǎ:

—Chí ná quíhíⁿ-ó ndàa ingá xio yuhu làgúná —cǎchí-gǎ xáhaⁿ-gǎ xii-güedé.

Te cuáháⁿ-güedé ndihí-gǎ.

23 Te niní ñuhu barcú ichi cuáháⁿ-xí núú ndute ní xidí Jèsús. Te ní ngüíta-xi níhi víhi quene táchí te ta nàdachitú-xi ndute xití bàrcú-áⁿ cuáháⁿ, te sa cuíní-nǎ-xi quée naa bàrcú-áⁿ xití ndute ní cùu.

24 Te ní sáháⁿ-güedé núú cáá Jèsús xidí-gǎ, te ní xáhaⁿ-güedé xii-gǎ:

—ìMèstrú, ndiquíú iní chi tà quée naa-o cuáháⁿ! —cǎchí-güedé xǎhaⁿ-güedé xii-gǎ.

Te Jèsús ní ndiquíú iní-gǎ te ní ndacóo-gǎ te ní tenáa-gǎ táchí-ǎⁿ ndihí ndute làgúná-áⁿ, te ní ngüíñí-ni táchí-ǎⁿ te ní nucúndecu nahi-nǎ ndute làgúná-áⁿ.

25 Te ní xáhaⁿ-gǎ xii-güedé:

—ìNáa ñá túú sàndáá iní ñáhá ndisa-ndo xii-í ǎⁿ? — cǎchí-gǎ xáhaⁿ-gǎ xii-güedé.

Te ní cuñúhu-güedé sá dúcáⁿ ñí quide-gǎ ní

xiní-güedé, te ní yùhú-güedé, te ní xitnáha-güedé:

—ìTe ná téé cùu téé-a núu ní cáháⁿ-ni-dé te ní ngüíñí táchí te ní nucúndecu nahi-ni ndüte làgúná-a-í? —cǎchí-güedé xitnáha-güedé.

Tée yìhi ñaha cue espíritú cúndihí yucu ñávǎha

(Mt. 8:28-34; Mr. 5:1-20)

26 Te ní sáa-gǎ ndihí-güedé yucu cue téé ñuú Gàdará, te yìhi ndáa-ni ndàa ingá xio làgúná-áⁿ cáá dìstritú Galileá.

27 Te òré ní quene Jèsús xití bàrcú te ní dáyátní ñaha ìⁿ téé ñuú-áⁿ xii-gǎ, te yìhi ñaha titní espíritú cúndihí yucu ñávǎha xii-dé. Te ní cunaha ñà túú-gǎ sácúhnu-dé dóó-dě, te ní ñà túú-gǎ sácúndecu-dé vehe-dé, chi da nchaa núú yíndǔxi ndíyi quide vehe-dé. 28 Te òré ní xiní-dé Jèsús te ní ngüíñí xití-dě núú-gǎ, te cue espíritú yìhi ñaha xii-dé-áⁿ ñí quide-xi níhi ní cáháⁿ-dé, te xǎhaⁿ-dě xii-gǎ:

—ìNá cuèndá véxi-õ Jèsús Déhe Dútú Ndiõxí sàdí-n ìchi-í-í? Te càháⁿ ndàhú-í núú-n sǎ và dándòho ñaha-n xii-í —cǎchí-dé xǎhaⁿ-dě xii-gǎ.

29 Te ducaⁿ ñí cáháⁿ-dé cuèndá sá Jèsús ní xáhaⁿ-gǎ xii nchaa espíritú cúndihí yucu ñávǎha yìhi ñaha sá ná quée ñaha-xi xii-dé. Te nchaa xiáⁿ ní xóo dacáháⁿ-xi iní-dé nándi sá ñí xóo cada-dé núu ní xóo dacùtu ñaha-güedé cadená xii-dé cuèndá sá ñà túú-gǎ ná cada-dé, te ní xóo cundéé ñáhá-güedé, dico cuèi ducaⁿ

dico ní xóo dandáva-ni-dé cadená, te cue espíritú cúndihí yucu ñávãha-án ní xóo dacunu ñaha-xi xii-dé ní xóo quíhíⁿ-dé xití yucu. ³⁰ Te Jèsús ní xicáⁿ tnúhú-gã núú-dé, te xáhaⁿ-gã:

—¿Nása nàni-n-i? —
cachí-gá xáhaⁿ-gã.

Te ní xáhaⁿ-dè:

—Vài Sandadú nàni-í —
càchí-dé xáhaⁿ-dè xii-gã.

Te ducaⁿ ñí xáhaⁿ-dè xii-gã cuendá sá ïo cuéhé espíritú cúndihí yucu ñávãha yìhi ñaha xii-dé. ³¹ Te nchaa espíritú-án ñí cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi núú ùhú núú ndàhú. ³² Te òu-ni yatni yucu núú ndécú Jèsús-án yìhí vài cuchí xìxexi-güedi, te nchaa espíritú-án ñí cáháⁿ ndàhú-xi núú-gã sá ná dàña-gá quíhu-xi yiqui cùñú nchaa cùchí-án, te Jèsús ní xáhaⁿ-gã sá cúú quíhu-xi yiqui cùñú-güedi. ³³ Te ní quee ñaha nchaa espíritú-án xii téé-án, te ní quíhu-xi nchaa cùchí-án, te cùchí-án ñí xinu-güedi duha ní queé-güedi ndaa núú dèhvã yuhu làgúná-án, te ní ngaunihnu-güedi xití ndute te ní ndihí-güedi ní cáhá.

³⁴ Te òré ní xiní cue téé xìto cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuendú núú cue ñáyiu ndècu xití ñuú, ndihí núú cue ñáyiu ndècu xití yucu. ³⁵ Te nchaa ñáyiu ní níhí tnúhu ní queé-yu cuáháⁿ ndéhě-yu nàcuáa ní cuu. Te òré ní quexiò-yu núú ndécú Jèsús,

te ní xiní-yu téé ní xìhi ñaha cue espíritú cúndihí yucu ñávãha-án núcòo-dé núú sàhá Jèsús, te ñihnu-ná-dé dóó-dé, te núcòo-dé dàtná ìⁿ ñáyiu váha, te ní yùhú-yu òré ní xiní ñáhã-yu xii-dé. ³⁶ Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cúndihí yucu ñávãha-án ní cùu ní caní-yu cuendú núú nchaa ñáyiu ní quexiò-án nàcuáa ní cuu ní ndúha téé-án ndihí nàcuáa ní cuu cuendá nchaa cùchí-án. ³⁷ Te sá dúcáⁿ ñí níhí-yu tnúhu nàcuáa ní cuu, núu nchaa ñáyiu ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá ñuu ndèé ichi véxi-gã. Te sá dúcáⁿ ñí cáháⁿ-yu núu cuáháⁿ-gã núú ndécú bàrcú. Te òré ndée-gã bàrcú-án nùhú-gã ³⁸ ní ngüíta téé ní xìhi ñaha cue espíritú cúndihí yucu ñávãha càháⁿ ndàhú-dé núú-gã ñuu vá cùndèe iní-gã quíhíⁿ ndihí ñaha-gã xii-dé, dico Jèsús ní quide ndee iní ñáhã-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n cuendú núú nchaa ñáyiu sá ïo càhnu cuu nchaa sá vãha ní quide ñaha Yã Ndiòxí xii-n —càchí-gá xáhaⁿ-gã xii-dé.

Te téé-án ñí xica-dé cuánuhú-dé te ní ngüíta-dé ní cani-dé cuendú núú nchaa ñáyiu xindecu ñihí ñuú sá ïo càhnu cuu nchaa sá vãha ní quide ñaha Jèsús xii-dé.

Cuendá déhe yoco tẽ Jàirú, ndihi cuendá ìn ñadihi ní tnándeé dóó Jèsús

(Mt. 9:18-26; Mr. 5:21-43)

40 Te òré ní ndexìo Jèsús ndàa ingá xio yuhu làgúná, te ñáyìu xĩndecu xiáⁿ sa ndètu cahnu ñaha-ná-yu, te ío váha ní cáháⁿ ndihi ñáhá-yu xii-gá òré ní nasáá-gá. 41 Te ìn tée tàxi tñuní veñúhu ní quexìo-dé núú ndécú Jèsús, te tée-áⁿ nání-dẽ Jàirú, te ní ngüíñí xítí-dẽ núú-gã càháⁿ ndàhú-dé, te xáhaⁿ-dẽ xii-gá:

—Véxi-í càháⁿ ndàhú-í núú-n nũu vá cùndèe iní-n quíhíⁿ-ó vèhe-í cada tátna-n dẽhe yoco-í —càchí-dé xáhaⁿ-dẽ xii-gá.

42 Te ducaⁿ ñí xáhaⁿ-dẽ chí ndècu ìn dii-ñí déhe yoco-dẽ, te ndècu-xi datná úxúú cuíá-xi, te càhú víhí tñàhá-xi cùhú-xi te cùnì-xi cuú-xi. Te Jèsús ní xica-gá cuáháⁿ-gá ndihi tée-áⁿ, te ío vài ñáyìu nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

43 Te tnuú nchaa ñáyìu-áⁿ ñútnàhá ìn ñaha cùhú, te ñaha-áⁿ sà ní cuu úxúú cuíá sã cùhú-aⁿ ngòyo ñaha ñíñí xii-aⁿ, te ío cuéhé dǐhúⁿ ñí cuu dāndoñuhu-aⁿ chí ní nadico-aⁿ nchāa sã ndécú ndihi-aⁿ cuendá ní níhí-aⁿ dǐhúⁿ ñí queheⁿ nchaa ñáyìu ní quide tátna ñaha xii-aⁿ, dico ní ìn-yu ñá túú ní ndàcú-yu ndúha-aⁿ. 44 Te ní sáháⁿ ndehe yatni-aⁿ ndāa sátá Jèsús, te ní tnándeé-aⁿ luha yuhu dōó-gã te òré-ni-áⁿ ñí ndúha-aⁿ.

45 Te Jèsús ní xicáⁿ tñuhú-gã núú-yu, te xáhaⁿ-gã:

—¿Ndèdacāa-ndo ní tnándeé ñáhá xii-í? —càchí-gá xáhaⁿ-gã xii-yu.

Te nchaa-yu ní xáhaⁿ-yu sã ñí ìn-yu ñá túú ní tnándeé ñáhá xii-gá. Te té Pèlú ndihi cue tée cùndihi-dé ní xáhaⁿ-güedé xii-gá:

—Mèstrú, ndèhe-n sá vái ñáyìu nchìcúⁿ ñáhá xii-n, te xio xio dàdehnde ñáhá-yu, te xicáⁿ tñuhú-gã-n yòo ní tnándeé ñáhá xii-n —cachí-güedé xáhaⁿ-güedé xii-gá.

46 Dico Jèsús ní xáhaⁿ-gã xii-yu:

—Dico diu ìn-ndo ní tnándeé ñáhá xii-í, chí ní cutnùnì iní-í sã ìn ñáyìu cùhú ní tnándeé ñáhá xii-í te ní ndúha-yu —càchí-gá xáhaⁿ-gã xii-yu.

47 Te sátá ñí xiní ñaha-áⁿ sã ñí cutnùnì iní Jèsús sã ñí tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüíñí xítí-áⁿ nũú-gã, te ní náhmá-aⁿ núú-gã, ndihi núú nchāa ñáyìu ná cuendá ducaⁿ ñí quide-aⁿ ní tnándeé-aⁿ-gá, ndihi cuendá sã òré-ni-áⁿ ñí ndúha-aⁿ. 48 Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñáhá-n xii-í nũu ní ndúha-n, te cuanùhú vitna te ñá túú-gã ná canì iní-n —càchí-gá xáhaⁿ-gã xii-aⁿ.

49 Te càháⁿ dúcáⁿ-ní Jèsús ní sáá ìn tée xìnu cuechi vehe té Jàirú tée tàxi tñuní veñúhu, te xáhaⁿ tẽe xìnu cuechi-áⁿ xii-dé:

—Sa ní xíhí déhe-n, vá chíchiuⁿ-gã-n Mèstrú —càchí-dé xáhaⁿ-dẽ.

⁵⁰ Te sá dúcáⁿ xǎhaⁿ tǎe xínu cuechi-áⁿ xii té Jàirú ní tecú dóho Jèsús, núu ní xáhaⁿ-gǎ xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —càchí-gǎ xáhaⁿ-gǎ xii-dé.

⁵¹ Te òré ní sáá-gǎ vehe té Jàirú te ñá ní dàña-gǎ quíhu ñáyiu cùtexínu, núu té Pèlú-ni ndihi té Jàcobó-ni, ndihi té Juàá-ni, ndihi tǎtá ndihi nǎná-ni xíchí ní xíhí-áⁿ cuǎnguihu ndihi-gǎ xití vehe.

⁵² Te nchaa ñáyiu sa xindecu vehe-dé-áⁿ xǐndáhyú-yu sá ndihú iní-yu cuendá sá ní xíhí-xi. Te Jèsús ní xáhaⁿ-gǎ xií-yu:

—Vá ndàhyú-ndó, chi òcò-ni xidí-xi ñá túú ní xíhí-xi —càchí-gǎ xáhaⁿ-gǎ xií-yu.

⁵³ Te ní sácú ndeé ñáhǎ-yu xii-gǎ, chi sá cúú-xí mèe-yu chi ní xíhí ndisa xíchí-ǎⁿ. ⁵⁴ Te Jèsús ní tñi-gǎ ndaha xíchí ní xíhí-áⁿ, te níhi ní cáháⁿ-gǎ, te xáhaⁿ-gǎ:

—Xíchí cuéchí, ndacóo —càchí-gǎ xáhaⁿ-gǎ.

⁵⁵ Te xíchí-ǎⁿ ní ndoto-xi, te òré-ni ní ndacóo-xi, te Jèsús ní xáhaⁿ-gǎ sá ná cuǎñahá-yu sá cáxí-xí. ⁵⁶ Te tǎtá-xi ndihi nǎná-xi súúni ní cuñúhu-yu sá dúcáⁿ ní dándótó ñàha Jèsús xii-xi, te ní xáhaⁿ-gǎ xií-yu sá vǎ yǎo ñiⁿ cúñahá-yu sá dúcáⁿ ní quide-gǎ.

9

Jèsús téndàha-gǎ ndi ùxúú cue tée xica cuu ndihi-gǎ

*quíhíⁿ-güedé cáháⁿ-güedé
tnúhu-gǎ*

(Mt. 10:5-15; Mr. 6:7-13)

¹ Te Jèsús ní cana-gǎ ndi ùxúú cue tée xica cuu ndihi-gǎ, te ní sǎñaha-gǎ xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cùndihi yucu ñávǎha yíhi ñaha xii ñáyiu, ndihi cuendá sá cádá tǎtna-güedé nchaa ñáyiu cùhú. ² Te ní xáhaⁿ-gǎ xii-güedé sá quíhíⁿ-güedé danèhé-güedé ñáyiu nàcuáa cada Yá Ndiòxí ndihu ndaha ñàha-gǎ xií-yu, te ducaⁿ càda tǎtna-güedé cue ñáyiu cùhú. ³ Te cùmání-gǎ caca-güedé quíhíⁿ-güedé, te ní xáhaⁿ-gǎ xii-güedé:

—Ñá túú tñahí ná canehe-ndo cùu ichi-ndo, ni tǎtnu, ni ñùnu, ni sǎ cáxí-ndó, ni dǐhúⁿ. Te ni vǎ cánèhe-ndo ñngá ichi dóó-ndó, chi diu-ni dóó níhnú-ndó-ǎⁿ xiǎⁿ tñahí-ni. ⁴ Te ndédani càa vehe na saá-ndó, te xiáⁿ cundecu-ndo ndèé ná saá nduu ndèe-ndo. ⁵ Te núu ñá túú cuíni-yu queheⁿ cuendá ñáhǎ-yu xii-ndo, te ndee-ndo ñùú-áⁿ, te naquidi-ndo ticá chùhmá ní tñi sáhá-ndó cuendá sá ná cùtnuní iní-yu sá ñà túú quide váha-yu —càchí-gǎ xáhaⁿ-gǎ xii-güedé.

⁶ Te sáta dúcáⁿ ní xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuàha-güedé ñáyiu tnúhu Yá Ndiòxí, tnúhu sá càháⁿ nàcuáa naníhí tǎhú-yu, te ducaⁿ ta quide

tátna-güedé nchaa ñáyi cùhú cuáháⁿ.

Nàcuáa ní cuu ní xíhí té Juáa tée dàcuandute ñaha xii ñáyi

(Mt. 14:1-12; Mr. 6:14-29)

⁷ Te té Hèrodés tée cùu gobiernú ní níhí-dě tnúhu nchaa nàcuáa quide Jesús, te quíyuhú iní-dé te sàni iní-dé yoo cùu-gá. Te ducaⁿ ní sani iní-dé chi dava ñáyi càchí-yu sá tẽ Juáa tée ní xóo dacuàndute ñaha xii ñáyi ní ndoto cùu-gá. ⁸ Te davá-yu càchí-yu sá tẽ Èliás cúu-gã, te davá-yu càchí-yu sá ìⁿ tée ní xóo cáháⁿ tnúhu Yá Ndiõxí ndéé sanaha vihi ní ndoto cùu-gá, càchí-yu. ⁹ Dico té Hèrodés ní cachí-dé:

—Yúhú ní táuchíuⁿ-í ní xehndé-güedé díquí tẽ Juáa. ¿Te yoo cùu tée dii cuèndú-xi ñihí-a sá sũúni cuèhé nũú sã quidé-dě váiⁿ? —duha ní cachí-dé.

Te té Hèrodés ndúcú-dě nàcuáa cada-dé cuèndá quini-dé Jesús.

Jèsús dácàxi-gá úhúⁿ mìl cue tée te òrè ñáyi dihí ndihi landú
(Mt. 14:13-21; Mr. 6:30-44; Jn. 6:1-14)

¹⁰ Te nchaa cue tée ní táuchíuⁿ Jèsús cuáháⁿ cáháⁿ tnúhu Yá Ndiõxí núú ñáyi ní ndexìo-güedé núú-gã te ní ngüita-güedé nácàni tnúhu-güedé nchaa nàcuáa ní quide-güedé. Te dàtnùní ní xica-gá medii-ni-gá ndécá ñaha-gá xii-güedé cuáháⁿ ìⁿ xichi núú ñà túú ñáyi ndècu, yatni núú cáá ñuú Bètsaidá. ¹¹ Dico òré ní níhí ñáyi tnúhu sá cuáháⁿ Jesús,

te nchìcúⁿ-yu-gá cuáháⁿ, te òré ní quexìo-yu núú-gã, te ní queheⁿ cuèndá ñáhá-gã xii-yu, te ní dánèhé ñáhá-gã xii-yu nàcuáa ndíhu ndaha ñaha Yá Ndiõxí xii-yu, te ní quide tátna-gá nchaa ñáyi cùhú.

¹² Te òré sa ní cuaa te ní natacá ndi ùxúú cue tée xica cuu ndihi-gá núú-gã, te ní xáhaⁿ-güedé xii-gá:

—Sa ní cuu dandàca-n nchaa ñáyi-a, chi sa ní cuaa, te na quíhíⁿ-yu nchaa vehe càa yatni iha, ndihi nchaa xití ñuú cáá yatni iha cuaaⁿ-yu sá cáxi-yu, te diu-ni yàcáⁿ ndetatú-yu, chi núú ndécú-ó iha ñà túú tnahí ná ió —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gã xii-güedé:

—Mee-ndo chí cuãñaha sã ná càxi-yu —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Ñà túú nãgá ndécú ndihi-ndí, chi úhúⁿ duha-ná pàá, ndihi úú-nã chácá ndécú ndihi-ndí, te diu-ni núú quíhíⁿ-ndí cuaaⁿ-ndí sá cáxi-yu —càchí-güedé xáhaⁿ-güedé xii-gá.

¹⁴ Te xínu dàtná úhúⁿ mìl mee-ni cuè tée, te òrè ñáyi dihí ndihi landú. Te Jèsús ní xáhaⁿ-gã xii cue tée xica cuu ndihi-gá:

—Chí cñaha na ngõ ndi údico úxí ndi údico úxí-yu ìⁿ ìⁿ xichi —càchí-gá xáhaⁿ-gã xii-güedé.

15 Te ducaⁿ nĩ quide-güedé, te ní ngóo-yu nchaá-yu. 16 Te dātnūnĩ ní queheⁿ-gá ndi ùhúⁿ pàá-áⁿ, ndihi ndi ndùú chácá-ǎⁿ. Te ní ndacoto-gá andiu, te ní ndacáⁿ táhú-gǎ núú Yá Ndiòxí, te dātnūnĩ ní táhú cuèchi-gá pàá-áⁿ ndihi chácá-ǎⁿ, te ní sáha-gá nchaa cue téé xica cuu ndihi-gá ní dácǎhñu ñaha-güedé xii-yu. 17 Te nchaá-yu ní xexí-yu ní ndahá xití-yu. Te sátá nĩ túhú cóhō-yu te ní nadatácá-güedé nchaa sá nĩ quendóo, te ní chítú ùxúú tnáhá tídihi mee-ni sá nĩ quendóo.

Té Pèlú xáhaⁿ-dě xii Jèsús sá díú-gǎ cúú-gǎ Crístú

(Mt. 16:13-19; Mr. 8:27-29)

18 Te ñⁿ nduu ndècu mee Jesús ndihi cue téé xica cuu ndihi-gá, te càháⁿ ndihi-gá Yá Ndiòxí, te sátá nĩ yáha ní càháⁿ ndihi-gá Yá Ndiòxí, te ní xicáⁿ tnúhú-gǎ núú-güedé, te xáhaⁿ-gǎ xii-güedé:

—¿Yoo cùu yúhú càchí ñáyiu-va? —càchí-gá xáhaⁿ-gǎ xii-güedé.

19 Te ní xáhaⁿ-güedé xii-gá:

—Davá-yu càchí-yu sá cúú-n ndii Juáá téé ní xóo dacuàndute ñaha xii ñáyiu, te davá-yu càchí-yu sá cúú-n tē Èliás, te davá-yu càchí-yu sá ñⁿ téé ní xóo càháⁿ tnúhu Yá Ndiòxí ndéé sanaha nĩ ndoto cùu-n, duha càchí-yu —càchí-güedé xáhaⁿ-güedé xii-gá.

20 Te ní xicáⁿ tnúhú tùcu-gá núú-güedé, te xáhaⁿ-gǎ xii-güedé:

—Te nchòhó, ¿yoo sàni iní-ndó cùu-í-í? —càchí-gá xáhaⁿ-gǎ xii-güedé.

Te té Pèlú ní xáhaⁿ-dě xii-gá:

—Yòhó cúú-n Crístú Déhe Dútú Ndiòxí —càchí-dé xáhaⁿ-dě xii-gá.

Jèsús càháⁿ-gá sá càhni ñaha-güedé xii-gá

(Mt. 16:20-28; Mr. 8:30-9:1)

21 Te ní xáhaⁿ-gǎ xii-güedé sá vǎ yóo ñⁿ cùñaha-güedé yoo cùu-gá. 22 Te ní xáhaⁿ-gǎ xii-güedé:

—Yúhú Téé cùu ñani tnáhá-ndó nchàa-ndo ío cuéhé sǎ ndòhò-í, chi daquèe tíhú ñáhá cuè téé cùu sacuéhé núú ñáyiu israél, ndihi cue dútú cùnu, ndihi cue téé dàcuaha ñaha xii ñáyiu nchaa tnúhu ní chídó tnùnĩ ndii Moisés, te sáá nduu te cahni ñaha-güedé xii-í, dico nduu úní sá cùu-í tē ndoto-í —càchí-gá xáhaⁿ-gǎ xii-güedé.

23 Te dātnūnĩ ní xáhaⁿ-gǎ xii nchaa ñáyiu:

—Nchaa ñáyiu cùnĩ chit-nahá ñáhá xii-í, te xini ñuhu-xi vǎ cádá-gǎ-yu sá sání ñni méé-yu, te ñⁿ nduu ñⁿ nduu cada ndee ñni-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í. 24 Te nchaa ñáyiu cùnĩ sá ñà túú tnáhí ná yáha cundecu ñuyíú-a cuíta nihnú-yu. Dico nchaa ñáyiu ñà túú yùhú cuèi nándi sá ná yáha-yu cundecú-yu ñuyíú-a sá cuèndá-í, te ñáyiu-áⁿ naníhí tàhú-yu. 25 Te cuèi nchaandi túhú sá ío ñuyíú-a na ñihí ñáyiu cundecu ndihí-yu,

dico núu diu nchaa xiáⁿ ná càda cuíta nihnú-yu te ñá túú vèdana nàndíhi-xi sá dúcáⁿ ndècu ndíhi-yu nchaa xiáⁿ. ²⁶ Te nchaa ñáyiú na cùcahaⁿ núu-xi cáháⁿ váha cuèndá-í ndíhi cuèndá nchaa tnúhu-í, te tnàhá yúhú Tée cùu ñaní tnàhá-ndó nchàa-ndo cucahaⁿ núu-í núu-yu òré quixi tucu-í ndíhi cue espíritú xínú cuèchi núu Tàtá-í Dútú Ndiòxí, te mee-gá cada cutnùní iní nchaa ñáyiú sá ìo càhnu cuu-í. ²⁷ Te na càchí tnúhu ndáá-í xii-ndo sá ìo dava nchòhó ñáyiú ndècu iha vitna vá cùu-ni-ndo, chi cundecu-ni-ndo ndéé quini-ndó sáá nduu ndíhu ndaha ñàha Yá Ndiòxí xii ñáyiú —càchí-gá xáhaⁿ-gá xii-yu.

Ní nadáma dóó Jèsús ndíhi núu-gá

(Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ ní cáháⁿ Jèsús, te cuásaá-gá ìⁿ yucu cáháⁿ ndíhi-gá Yá Ndiòxí, te ndèca-gá té Pèlú, ndíhi té Jàcobó, ndíhi té Juáa cuásaá. ²⁹ Te nini càháⁿ ndíhi-gá Yá Ndiòxí ní nadáma núu-gá ndíhi dóó-gá, te dóó-gá-áⁿ sùúni ní nduu cuixíⁿ víhí, te súúni dàtásaⁿ-xi. ³⁰ Te òré-ni-áⁿ ní xiní-güedé úú tnàhá cue tée càháⁿ ndíhi-gá, te ìⁿ-dé cúu-dé té Moisés, te ingá-dé cúu-dé té Èliás, ³¹ te súúni dàtásaⁿ-xi ní càndéé núu ndécú cue tée úú-áⁿ ndíhi-gá, te xindatnúhu-güedé nàcuáa ndoho Jèsús cuú-gá ñuú Jerusalén dàtná ní cachí méé-gá. ³² Te té Pèlú ndíhi

úú-gá-güedé cuíni víhí-güedé cúdú-güedé, dico ní sahani iní-güedé ñá túú ní xidí-güedé, te ní dánèhé núu ñáhá-xí xii-güedé sá sùúni váha càa núu ndécú Jèsús, ndíhi úú cue tée càháⁿ ndíhi-gá-áⁿ. ³³ Te òré sa ndècu ndee cue tée úú-áⁿ caca-güedé núhú-güedé, te ní xáhaⁿ tē Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixiⁿ, ìⁿ cuu cuèndá-n, te ìⁿ cuu cuèndá té Moisés, te ìⁿ cuu cuèndá té Èliás —càchí-dé xáhaⁿ-dē xii-gá.

Dico té Pèlú chi ní mèe-dé ñá túú ní cùtnuní iní-dé nása nduu tnúhu ní cáháⁿ-dé. ³⁴ Te nini càháⁿ-dé ní quexio ìⁿ vícò núu ndécú-güedé-áⁿ ní dádáhu ñaha-xi xii-güedé, te ní yùhú-güedé sá dúcáⁿ ní quexio vícò-áⁿ ní dádáhu ñaha-xi. ³⁵ Te xití vícò-áⁿ ní tecú ní cáháⁿ Yá Ndiòxí, te xáhaⁿ-gá xii-güedé:

—Tée-a cùu-dé Déhe-í, tée ìo cùu iní-í, te tni-ndo nchàa tnúhu càháⁿ-dé —duha ní xáhaⁿ-gá xii-güedé.

³⁶ Te sáta dúcáⁿ ní cáháⁿ Yá Ndiòxí, te ní quide cuèndá-güedé sá mèdii-ná Jèsús ndécú-gá xiáⁿ. Te vá yòo ìⁿ ní xáhaⁿ-güedé nàcuáa nduu nchaa sá ní xiní-güedé-áⁿ.

Jèsús quidé tātna-gá ìⁿ tée cuechi yíhi ñaha espíritú cundíhi yucu ñáváha

(Mt. 17:14-21; Mr. 9:14-29)

³⁷ Te ingá nduu-áⁿ cuánuu-gá yucu-áⁿ ndíhi-güedé, te ìo cuéhé ñáyiú cuáháⁿ tnàhá ñáhá xii-gá. ³⁸ Te ìⁿ tée ñúhu

tnahá tnuú-yu-áⁿ ñí cáháⁿ níhi-dé, te xáhaⁿ-dê xii-gá:

—Mèstrú, ío càháⁿ ndàhú-í núú-n nũu vá cùndèe iní-n càda tátna-n dèhe-í, chí ìⁿdìi duha-dé ndécú,³⁹ te yìhi ñaha espíritú cùndìhi yucu ñávãha xii-dé, te òré ná nàtni ñaha-xi xii-dé, te dàcana saa ñaha-xi, te ndàda ruúⁿ ñáhá-xí xii-dé, te tàva-xi tíñú yuhu-dé. Te ío dàndoho ñaha-xi xii-dé, chí ndéé núú ñà cúú-gã, te dàña ñaha tnaa-xi xii-dé,⁴⁰ Te sa ní cáháⁿ ndàhú-í núú cuè téé xica cuu ndihi-n queñuhu-güedé-xi, dico ñá túú ní ndàcu-güedé —càchí-dé xáhaⁿ-dê xii-gá.

⁴¹ Te Jèsús ní xáhaⁿ-gã xii nchaa ñáiyu:

—¡Nchaa nchòhó ñáiyu ndècu ñuyíú-a ío sàá iní-ndó, chí ñá túú cuíní-ndó quíndáá iní-ndó Yã Ndiòxí! Te ní cuu vãi nduu quide ndee iní-í nchaa sá quidé-ndó, ¿te ná ndéé ama vá dúcãⁿ-gã cada-ndo-i? —càchí-gá xáhaⁿ-gã xii-yu.

Te ní xáhaⁿ-gã xii téé cùhú dèhe-xi-áⁿ:

—Taxi dèhe-n ìha —càchí-gá xáhaⁿ-gã xii-dé.

⁴² Te òré cuáháⁿ téé cuechi-ãⁿ núú-gã, te espíritú cùndìhi yucu ñávãha-áⁿ ñí dándùá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáháⁿ-gã ní tenáá-gá espíritú-áⁿ, te ní quee ñaha-xi xii-dé, te ní nacuéha cuendá ñáhá-gã xii-dé tátá-dé.⁴³ Te ncháá-yu ní cuñuhu-yu sá

dúcãⁿ ñí cuu, te ní cachí-yu sá ío càhnu cuu Yã Ndiòxí.

Jèsús càháⁿ tucu-gá sá cùú-gá

(Mt. 17:22-23; Mr. 9:30-32)

Te nini xicũúhu-yu nàcuáa ní quide Jèsús, te ní xáhaⁿ-gã xii cue téé xica cuu ndihi-gá:

⁴⁴ —Nchòhó cundedóho váha-ndo tnũhu na càháⁿ-í-a, te vá ná cuànaa-ndo, chí yúhú Téé cùu ñaní tnáhá-ndó nchàa-ndo sáá ìⁿ nduu te cuáha cuendá ñáhá-güedé xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

⁴⁵ Dico cue téé-áⁿ ñà túú ní tècú tnùní-güedé nàcuáa ndùu tnúhu ní xáhaⁿ-gã xii-güedé, te ducaⁿ ñí yáha-güedé, chí ducaⁿ tnàhí ní cachí-gá sá vã tècú tnùní-güedé, te ní yùhú-güedé cãcãⁿ tnúhú-güedé núú-gã nása ndùu tnúhu ní xáhaⁿ-gã xii-güedé.

Cue téé ndùcu tnúhu núú tnáhá nũu ndédacàa-güedé ío-gá cùnũu

(Mt. 18:1-5; Mr. 9:33-37)

⁴⁶ Te cue téé xica cuu ndihi-gá ní nguíta-güedé ndátnũhu-güedé nũu ndédacàa-güedé ío-gá cùnũu,⁴⁷ dico Jèsús ní cutnùní iní-gá nàcuáa sàni iní-güedé nũu ní cana-gá ìⁿ té lĩhli, te ní sanu tnãí ñaha-gã ìⁿ xio dñi-gá.⁴⁸ Te ní xáhaⁿ-gã xii-güedé:

—Nchaa ñáiyu na quèheⁿ cuendá ìⁿ té lĩhli dàtná té lĩhli-a cuendá sá ñúhú iní ñáhã-yu xii-í ñá, te cada iní-yu sá yúhú ní queheⁿ cuendá-yu, te nchaa ñáiyu na quèheⁿ cuendá ñáhá xii yúhú,

te cada iní-yu sá tnàhá Tàtà-í Dútú Ndiòxí Yaá ní tendaha ñàha xii-í véxi-í ñuyíú-a ní queheⁿ cuendá-yu. Te nchaa ñáyiú ío ndàhú iní-xi mee-ni xinu cuechí-yu, ñáyiú-áⁿ ïo-gá cúnúú-yu —càchí-gá xáhaⁿ-gá xii-güedé.

Ñáyiú ñá túú cùu úhú iní ñáhá cündihi ñahá-yu xii-o
(Mr. 9:38-40)

⁴⁹ Te té Juàá diu-ni ïⁿ tée xica cuu ndihi-gá ní xáhaⁿ-dē xii-gá:

—Mèstrú, ní xiní-ndí ïⁿ tée càcunehe ñaha-dé xii-n, te ndèñuhu-dé espíritú cündihi yucu ñávàha yìhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndihi ñaha-dé xii-o —càchí-dé xàhaⁿ-dē xii-gá.

⁵⁰ Te Jèsús ní xáhaⁿ-gá xii-dé:

—Daña-ndo na càda nahi-dé ní cùu, chi ñáyiú ñá túú cùu úhú iní ñáhá xii-o te cündihi ñahá-yu —càchí-gá xáhaⁿ-gá xii-dé.

Jèsús càháⁿ-gá dóho té Jàcobó ndihi té Juàá

⁵¹ Te òré sa ta cùyatni ndaa Jesús andiú, te ní xica-gá cuáháⁿ-gá ñuú Jerusàlén, chi duuⁿ duuⁿ ní sani iní-gá sá quihíⁿ-gá. ⁵² Te ní tendaha-gá cue tée yòdo nuu cuáháⁿ, te ní quexìo-güedé ïⁿ ñuú, te ñuú-áⁿ yíndèhu-xi distritú Sàmariá, te ndùcu-güedé ïⁿ vehe cada túha-güedé òré quexìo-gá. ⁵³ Dico ñáyiú Sàmariá ñá túú ní cuiní-yu cuáñaha nùú-yu vehe, chi

cuendá sá ñi cutnùnì iní-yu sá ìchi yáha-ni-gá quihíⁿ-gá ñuú Jerusàlén. ⁵⁴ Te sá dúcáⁿ ñi quidé-yu ñá túú ní cuiní-yu cuáñaha nùú-yu vehe ndetatú-gá, núu ní xáhaⁿ tè Jàcobó ndihi té Juàá cue tée xica cuu ndihi-gá xii-gá:

—Mèstrú, ¿cuiní-n càcáⁿ táhú-ó nùú Yá Ndiòxí cuendá dangáva-gá ñuhú danàa-gá ñáyiú ñuú-a dàtná ní quide té Èliás tée ní xóo cáháⁿ tnúhu Yá Ndiòxí ndéé sanaha-áⁿ? —càchí-güedé xáhaⁿ-güedé xii-gá.

⁵⁵ Te Jèsús ní nchócótó-gá núu-güedé, te níhi ní cáháⁿ-gá dóho-güedé, te xáhaⁿ-gá:

—Nchòhó, chi ñá túú vaha iní-ndó te núu ducaⁿ càháⁿ-ndó. ⁵⁶ Chi yúhú Tée cùu ñanì tnáhá-ndó nchàa-ndo véxi-í sá dácäcu nihnu-í ñáyiú, te ñá díú véxi-í sá dácüita nihnu-í-yu —càchí-gá xáhaⁿ-gá xii-güedé.

Te sátá dúcáⁿ ñi xáhaⁿ-gá, te ní xica-gá cuáháⁿ-gá ndihi-güedé ingá ñuú.

Ñáyiú cuiní chitnahá ñáhá xii Jesús ní cùu

(Mt. 8:19-22)

⁵⁷ Te ñuhu Jesús ìchi ndihi-güedé, te ïⁿ tée ní xáhaⁿ-dē xii-gá:

—Mèstrú, cuiní-í canchicúⁿ ñáhà-í xii-n ndèni ní cuu na quihíⁿ-n —càchí-dé xàhaⁿ-dē xii-gá.

⁵⁸ Te Jèsús ní xáhaⁿ-gá xii-dé:

—Nchaa ñúcuii chi ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí

yutnu, dico yúhú Tée cùu ñani tnáhá-ndó nchàa-ndo chi ñá túu ndeé cáá vehe-í ñuyíú-a ndetatú-í —càchí-gá xáhaⁿ-gá xii-dé.

⁵⁹ Te dàtnùní ní xáhaⁿ tùcu-gá xii ingá-dé:

—Yòhó taquìxi chitnahá ñáhá-n xii-í —càchí-gá xáhaⁿ-gá xii-dé.

Dico téa-án ñí xáhaⁿ-dë xii-gá:

—Mèstrú, dañá na nùhú-í cundetú-í cuú tātà-í te chindúxi-í-dé, te dàtnùní quixi-í chitnahá ñáhá dũcaⁿ-ná-í xii-n —càchí-dé xáhaⁿ-dë xii-gá.

⁶⁰ Te Jèsús ní xáhaⁿ-gá xii-dé:

—Daña ñáyiú ñá túu sàndáá iní ñáhá xii-í ná chindúxi tnàha meé-yu, chi ñáyiú-án cùú-yu dàtná ñáyiú ní xihí cuéi ndècu-ní-yu núú ñuyíú-a. Te yòhó taquìxi, chi quíhíⁿ-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáhaⁿ-gá xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuiní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dë xii-gá.

⁶² Te Jèsús ní xáhaⁿ-gá:

—Nchaa ñáyiú ní sàndáá iní ñáhá xii-í, te núu vá cànchícúⁿ nihnu ñáhá-yu ni yùhu ni iní-yu, te cùú-yu dàtná ñíⁿ téa ní tñí ndaha látú cutu-dé, chi téa-án núu na ndàcoto-dé ndàa sátá-dë òré xitú-dë, te vá quíhíⁿ

ndáá látú-dé ducaⁿ sãtnahá-xi cùú-yu. Te cue ñáyiú chi vá cùú ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gá xii-dé.

10

Jèsús téndàha-gá únídico úxi cue téa quíhíⁿ cáháⁿ tnúhu-gá núú ñáyiú

¹ Te sátá dúcáⁿ ñí cuu, te ní cáxi tucu Xitohó Jesucristú únídico úxi cue téa codonù-güedé quíhíⁿ-güedé cáháⁿ-güedé tnúhu-gá nchaa ñuú, ndíhi nchaa dava-gá xichi núú quíhíⁿ-gá, te ndí ndúú ndí ndúú-güedé tendaha ñàha-gá xii-güedé quíhíⁿ-güedé. ² Te cùmání-gá caca-güedé, te ní xáhaⁿ-gá xii-güedé:

—Nchòhó xini-ndó sã òré ná sáa yóo cuu nchaa sá xitú ñáyiú, te ío vèi cuu. Te na càchí tnúhu ndáá-í xii-ndo sã dàtná vèi sá xitú ñáyiú cùu, ducaⁿ ío vèi ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñaha xii-yu tnúhu-gá, núu xíáⁿ xini ñúhu-xi cácaⁿ-ndó núú Yá Ndiòxí cuendá sá ná dàcaháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá. ³ Te nchòhó cùú-ndó dàtná cue mbéé cue quiti cuáháⁿ núú yihí cué quiti dééⁿ. Chi tendaha ñaha-í xii-ndo quíhíⁿ-ndó núú xíndecu nchaa ñáyiú cuihna iní-xi. ⁴ Te vá cànèhe-ndo ñunu cuhúⁿ ndachiuⁿ-ndo, ni núú cùhúⁿ díhúⁿ-ndó, te ni vã cádá tũha-gá-ndó

chàú-ndó chi diu-ni chàú yíhi-ndó-ǎⁿ xǎⁿ-ni quihi-ndo, te vá ïo cuyaa-ndo cǎháⁿ ndihi-ndo ñǎyiu ñùhu ichi. ⁵ Te òré ná quèxio-ndo ìⁿ vehe, te duha cúñaha-ndo xii ñǎyiu dii vèhe-xi-áⁿ: “Yá Ndiòxí chindee ñàha-gá xii-ndo ïo váha cuu iní-ndó cùndecu-ndo”, duha cúñaha-ndo xii-yu. ⁶ Te núu ñǎyiu-áⁿ nǐ nduu táhũ-yu sá cùndècu váha iní-yu núú Yǎ Ndiòxí, te cuu-xi sá vǎha sá cúú-xí-yu tnúhu cúñaha-ndo-ǎⁿ, dico núu ñǎ túú ní cǎháⁿ váha ndihi ñàhá-yu xii-ndo, te cúñaha-ndo sǎ vǎ cúú-xí sǎ váha sá cúú-xí-yu. Dico núu ní cǎháⁿ váha ndihi ñàhá-yu xii-ndo, ⁷ te diu-ni vehe-áⁿ cada vehe tnaa-ndo, te ñǎ túú-gǎ ndèé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiuⁿ dacuití táu-güedé sá nihí-güedé sá cǎxí-güedé cuendá nchaa chiúⁿ quide-güedé. ⁸ Te núu ní sǎá-ndó ìⁿ ñuú núu nǐ queheⁿ cuendá ñáhǎ-yu xii-ndo, te caxi-ndo nchàa sá ná tàxí-yu. ⁹ Te cada tátna-ndo cuè ñǎyiu cùhú xǐndecu ñuú-áⁿ, te cúñaha-ndo xii-yu sá sǎ ní sǎá nduu ndíhu ndaha ñàha Yá Ndiòxí xii-yu. ¹⁰ Dico núu ní sǎá-ndó ìⁿ ñuú núú ñǎ túú ní queheⁿ cuendá ñáhǎ-yu xii-ndo, te tni-ndo ìchi cuita cǎháⁿ-ndó cuǎháⁿ, te cúñaha-ndo xii-yu: ¹¹ “Ndéé tícǎ chúhmǎ nǐ tni sáhǎ-ndí ñuú-ndó nàquidi-ndí, te duha quide-ndí cuendá cutnùní iní-ndó sǎ ñǎ túú quide

váha-ndo ndècu-ndo. Dico cunaha-ndo sǎ sǎ ní sǎá nduu ndíhu ndaha ñàha Yá Ndiòxí xii-ndo ní cùu”, duha cúñaha-ndo xii-yu. ¹² Te na cǎchí tnúhu-í xii-ndo sǎ ná sǎá nduu càda ndǎá Yǎ Ndiòxí cuèchi nchaa ñǎyiu, te ñǎyiu ñuú-áⁿ ïo-gǎ ndohó-yu dàvǎ-áⁿ dàcúúxí ñǎyiu ñuú Sòdomá —cǎchí-gǎ xáhaⁿ-gǎ xii-güedé.

Cuendá ñǎyiu dava ñuú ñǎ túú sǎndǎá iní tnúhu Xítoho Jesucristú

(Mt. 11:20-24)

¹³ Te Jesús xáhaⁿ-gǎ xii ñǎyiu dava ñuú ñǎ túú sǎndǎá iní tnúhu-gǎ:

—¡Ndàhú nchòhó cue ñǎyiu ñuú Coràzín! ¡Te ndàhú nchòhó cue ñǎyiu ñuú Bètsaidá! Chi núu dicó ñuú Tírú, ndihi ñuú Sídón ní quide-í nchaa sá vǎ yòo tnàhí ndàcu cada datná ní quide-í ñuú-ndó-áⁿ nǐ xiní-ndó ñǎ, te sá ndèé ama-gǎ cuihnú-yu dóo ndàhú, te cunucóo-yu núú yǎá cuendá sá ndíxí cuèchi iní-yu sá ñǎ túú quide váha-yu ní cùu. ¹⁴ Dico sǎá nduu te ïo-gǎ dandòho ñaha Yá Ndiòxí xii-ndo dàcúúxí ñǎyiu ñuú Tírú, ndihi ñǎyiu ñuú Sídón. ¹⁵ Te nchòhó ñǎyiu ñuú Capèrnaúm quide iní-ndó sǎ sǎ cuándaa-ndo àndíu, dico ñáhǎ chi núú ùhú núú ndàhú cundecu-ndo —duha ní xáhaⁿ-gǎ xii nchaa ñǎyiu ñuú-áⁿ.

¹⁶ Te xáhaⁿ tùcu-gǎ xii cue téé tendaha-gǎ quihíⁿ cǎháⁿ tnúhu-gǎ-áⁿ:

—Nchaa ñǎyiu na cùndedóho nchaa tnúhu cǎháⁿ-ndó, te

cada iní-yu sá yǔhú càháⁿ-í ndèdóho-yu, te nchaa ñáyi na dàquee tihú ñáhá xii-ndo, te tnàhá yúhú daquee tihú-yu, te nchaa ñáyi ducaⁿ na dàquee tihú ñáhá xii-í, te tnàhá Tàtá-í Dútú Ndiöxí Yaa ní tendaha ñàha xii-í véxi-í ñuyíú-a dàquee tihú-yu — càchí-gá xáhaⁿ-gã xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únídico úxi ní tendaha Jèsús ní sáháⁿ ní cáháⁿ tnúhu-gá núú ñáyi

17 Te cue téé únídico úxi-áⁿ ñí nasáá-güedé te súúni cùdíí ìní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávàha sàndáá iní ñáhá-xí xii-ndí òré cáci nèhe ñàha-ndí xii-n —càchí-güedé xáhaⁿ-güedé xii-gá.

18 Te Jèsús ní xáhaⁿ-gã:

—Ndáá càháⁿ-ndó chi yúhú ní xini-í cùtnàhá ní xíta nihnu yucu ñávàha, chi dàtná ní ngava ìⁿ tasaⁿ ñí ngava-xi ñuyíú-a. 19 Te dàtná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tihú-ndó yucu ñávàha, te ñá túú ná cada ñàha-xi xii-ndo, chi ní taxi-í tnúhu ndee ìní ndécú ndíhi-ndo. 20 Dico vá cùdíí ìní-ndó cuèndá sá sàndáá ìní ñáhá cuè espíritú cùndíhi yucu ñávàha xii-ndo, chi cùdíí ìní-ndó cuèndá sá sà yodo tnuní-ndó núú tütú Yá Ndiöxí Yaa ndécú àndíu —cachí-gá xáhaⁿ-gã xii-güedé.

Jèsús cùdíí iní-gá

(Mt. 11:25-27; 13:16-17)

21 Te òré-áⁿ súúni ñí quide díí ìní ñáhá Espíritú Yá Ndiöxí xii Jèsús, te ní xáhaⁿ-gã xii Yá Ndiöxí:

—Yòhó Tàtá-í Dútú Ndiöxí, ío chíñuhu ñàha-í xii-n chí díu-n tàxi tnuní-n àndíu ndíhi ñuyíú-a, te dànehé-n cuè ñáyi nchaa tnúhu váha, te díu-ni ñáyi-áⁿ cùú-yu ñáyi ñá túú cùtnuní iní-xi nchaa tnúhu càháⁿ cue téé túha, te nchaa tnúhu càháⁿ-n-áⁿ ñá túú ní dàtúu-n núú ñáyi càchí sá ío túha, te ío váha sàá díquí-xi. Te ducaⁿ quide-n, chí ducaⁿ cuíni-n cùnduu —cachí-gá xáhaⁿ-gã xii Yá Ndiöxí.

22 Te xáhaⁿ tùcu-gá xii cue téé ní nasáá-áⁿ:

—Mee Tàtá-í Dútú Ndiöxí ní cachí-gá sá cùnùu-í núú nchàa-ndí túhú sá ío. Te vá yóo ìⁿ xini nàcuáa sàni ìní yúhú Déhe Dútú Ndiöxí, chí ìndíi díí-ni mee-gã xini-gá nàcuáa sàni ìní-í. Te ducaⁿ ìndíi-ni yúhú xini-í nàcuáa sàni ìní mée-gã, te nchaa ñáyi càchí ìní-í sá quíni-yu nàcuáa sàni ìní Tàtá-í Dútú Ndiöxí te xitnùhu-í-yu, te vá yóo ìⁿ-gã xini nàcuáa sàni ìní-gá chí díu-ni ñáyi ducaⁿ xitnùhu-í-áⁿ xini-yu —càchí-gá xáhaⁿ-gã xii-güedé.

23 Te ní nchócótó-gã núú xíndecu mee-ni cuè téé xica cuu ndíhi-gá, te ní xáhaⁿ-gã xii-güedé:

—Váha táhú nchòhó ndíhi nchaa ñáyi ndèhe nchaa nacuéa quide-í vitna. 24 Chí ío cuéhé cue téé ní xóo càháⁿ tnúhu Yá Ndiöxí ndéé sanaha, ndíhi cue téé ní

xíndaha ñaha xii ñáyiú ní cuiní-güedé cundehe-güedé nchaa sá ndéhé-ndó quide-í vitna, te ñá túú ní xini-güedé, te ní cuiní-güedé cund-edóho-güedé nchaa tnúhu càháⁿ-í ndédóho-ndo vitna, te ñá túú ní xíndedóho-güedé — càchí-gá xáhaⁿ-gá xii-güedé.

Nàcuáa ní quide ìⁿ tée distritú Sàmaria

25 Te ìⁿ tée dàcuaha ñaha xii ñáyiú nchaa tnúhu ní chídó tnùnì ndíi Moisés ní ndacuñí-dé xító ndèé-dé Jèsús nùu nása cunduu tnúhu càháⁿ-gá, te xáhaⁿ-dë xii-gá:

—Mèstrú, ¿ná cúú sã cáda-í cuendá nduu táhù-í cundecu-í ndihì Yá Ndiöxí ní caa ní quíhíⁿ-i? —càchí-dé xáhaⁿ-dë xii-gá.

26 Te Jèsús ní xáhaⁿ-gá xii-dé:

—Cuiní-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gá xii-dé.

27 Te xáhaⁿ-dë xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiöxí Yaá cúú Ndiöxí-ndó ní yuhu ní iní-ndó, te caní iní-ndó càda-ndo datná cuiní mée-gã, te mee-ni tnúhu váha caní iní-ndó nàcuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyiú-ndo dàtná cúú iní-ndó mée-ndo”, duha càchí ndíi núú tütú ndíi —càchí-dé xáhaⁿ-dë xii-gá.

28 Te Jèsús ní xáhaⁿ-gã:

—Váha-ni càháⁿ-n, te núu cada-n nàcuáa càháⁿ-n ãⁿ, te nduu táhù-n cundecu-n ndihì

Yá Ndiöxí ní caa ní quíhíⁿ — càchí-gá xáhaⁿ-gã xii-dé.

29 Te sá dúcáⁿ ní xáhaⁿ Jèsús xii-dé nùu ndücu-dé nàcuáa cada-dé cácu nihnu-dé núú tnúhu ní càháⁿ-dë, te ní xicáⁿ tnúhú-dë núú-gã, te xáhaⁿ-dë:

—¿Yoo cùu tnaha ñáyiú-í-i? —càchí-dé xáhaⁿ-dë xii-gá.

30 Te Jèsús ní cani-gá ìⁿ cuendú núú-dë nàcuáa tecu tnùnì-dé tnúhu-gá, te xáhaⁿ-gã:

—Ìⁿ tée ní ndee-dé ñuú Jerusalén ñúhú-dë ichi cuánuu-dé cuáháⁿ-dë ñuú Jericó, te ní quee ñadúhú ichi-dé ní dúhú-güedé dóo níhnú-dë, ndihì nchaa sá néhé-dë, te ní caniha vihi-güedé, te nchito diu-ná-dé ní dáñá ñaha-güedé te cuáháⁿ-güedé. 31 Te mei òré cátüu-dé-án ñúhú ìⁿ dütú ichi-án, te òré ní xini ñáhá dütú-án xii-dé, te ìⁿ xio-ni ní xócõo ndee-dé ní yáha-dé.

32 Te ñúhu tucu ìⁿ tée cùu levitá ichi-án, te òré ní xini-dé téé-án cátüu-dé, te diu-ni ducaⁿ ní quide-dé ìⁿ xio-ni ní xócõo ndee-dé ní yáha-dé.

33 Dico ìⁿ tée distritú Sàmaria ñúhú tucu-dé ichi-án te òré ní xini-dé téé-án cátüu-dé, te ní cundàhú iní ñáhá-dë.

34 Te ní sáháⁿ-dë núú cátüu téé-án, te ní quide tátna-dé nchaa núú ní nícuèhé xii téé-án ní chihi-dé yúcú, te ní dácútú-dë. Te dàtnùnì ní dácáá ñaha-dé sátá quiti-dé, te ndëca ñaha-dé cuáháⁿ ìⁿ vehe núú sácõo cue ñáyiú sácúhuⁿ ichi, te yàcáⁿ ní xito ñaha-dë. 35 Te ingá nduu òré ní nucúhuⁿ téé Samaritánú-án ichi, te ní tava-dé úú díhúⁿ denàriú, te ní sáha-dé téé cùu

xítóhó vehe-án, te ní xáhaⁿ-dè:
 “Coto saú-n tée-a, te núu ñá ní
 tnàhá díhúⁿ sã ní taxi-í, te cuè
 na dândoñuhu-gá-n díhúⁿ-n
 cuendá-dé, te òré ná quìxi
 tucu-í te nacháhu-í”, duha ní
 xáhaⁿ tée Samaritánú-án xii
 tée dii vèhe xiáⁿ. ³⁶ Te vitna
 cáháⁿ, te núu ndèdacàa cue tée
 úní-án cúu-güedé tée váha cùu
 iní-güedé tnàha ñáyiugüedé
 —càchí-gá xáhaⁿ-gã xii tée
 dàcuaha ñaha xii-í ñáyiugüedé
 nchaa tnúhu ní chídó tnúni
 ndíi Moisés.

³⁷ Te tée-án ní xáhaⁿ-dè
 xii-gá:

—Tée ní cundàhú iní ñáhá
 xii tée ní dánícuèhé ñáhá
 cuè ñadúhú-án, tée-án cúu-dé
 tée cùu iní tnàha ñáyiugüedé
 —càchí-dé xáhaⁿ-dè xii-gá.

Te Jèsús ní xáhaⁿ-gã:

—Cuàháⁿ te diu-ni ducaⁿ
 càda-n tnàhá-n —càchí-gá
 xáhaⁿ-gã xii-dé.

*Jèsús ndécú-gã vehe tá
 Mårta ndihí tá Måríá*

³⁸ Te Jèsús ñúhú-ni-gã ichi
 cuáháⁿ-gã ndihí cue tée xica
 cuu ndihí-gá, te ní sáá-gá
 ñúu líhli, te xiáⁿ ní quee
 ñúu xíchí nání Mårta ní cáháⁿ
 ñáhá-xí xii-gá vehe-xi. ³⁹ Te
 tá Mårta ndècu ñúu cúhú-xi
 nàni-xi Måríá, te xíchí-án ní
 ngóo-xi núu Jèsús ndèdóho-xi
 nchaa tnúhu càháⁿ-gá. ⁴⁰ Te
 tá Mårta-án ndihí vihi-ni
 iní-xi quide-xi chiuⁿ-xi, te
 ní sáháⁿ-xi núu Jèsús, te ní
 xáhaⁿ-xi:

—Mèstrú, ¿náa ñá túu
 tnàhí sàni iní-n sã ní dándòo
 ndaha ñaha cúhú-í nchaa
 chiuⁿ-án? Cúñaha saú ná
 quìxi-xi chindee ñaha-xi —
 cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gã:

—Yòhó Mårta, ñuhu tneñu
 vihi-n, te ndihú iní-n sã ño
 vài chiuⁿ-n ñuhu, ⁴² dico xini
 ñuhu vihi-gá-xi cundedóho-n
 tnúhu càháⁿ-í, chi tá Måríá-a
 sa ndèdóho-xi tnúhu-í, te vá
 yòo ñúu ndacu xocàni tnúhu-í
 sã ní ngúndecu ndihí-xi —
 càchí-gá xáhaⁿ-gã xii-xi.

11

*Jèsús dánèhé-gá cue tée
 xica cuu ndihí-gá nàcuáa cáháⁿ
 ndihí-güedé Yã Ndiõxí*

(Mt. 6:9-15, 7:7-11)

¹ Te ñúu nduu càháⁿ ndihí
 Jèsús Yã Ndiõxí ñúu xichi, te
 sáta ní yáha ní cáháⁿ ndihí-gá
 Yã Ndiõxí, te ní xáhaⁿ ñúu tée
 xica cuu ndihí-gá xii-gá:

—Mèstrú, dánèhé ñáhá
 xii-ndí nása cáháⁿ ndihí-ndí
 Yã Ndiõxí dàtná ní quide ndíi
 Juáa ní dánèhé ndíi cue tée ní
 xica cuu ndihí ndíi —càchí-dé
 xáhaⁿ-dè xii-gá.

² Te Jèsús ní xáhaⁿ-gã:

—Òré cáháⁿ ndihí-ndo Yã
 Ndiõxí, te cachí-ndó:

Yòhó tãtã-ndí Dútú Ndiõxí Yaa
 ndécú àndiu,
 nchaa ñáyiugüedé na càháⁿ-yu sã
 cúu-n Yaa ío yiñuhu.

Te xicáⁿ táhú-ndí núu-n sã
 ná sáá nduu ndíhu
 ndàhá-n-yu.

Te cada-n dàtná càchí iní-n
 ñuyíú-a dàtná quidé-n
 àndiu.

³ Te xicáⁿ táhú-ndí núu-n
 sã táxí-n sã cándèca
 iní-ndí ñúu nduu ñúu
 nduu.

⁴ Te cada càhnu iní-n nchaa
 yicá cuèchi-ndí, chi
 tnàhá nchúhú quidé

càhnu iní-ndí nchaa
sá quidé ñaha tñaha
ñáyi-ndí.

Te vá dáñá-n dàcaháⁿ ñáhá
yùcu ñávãha xii-ndí
cada-ndí sá ñà túú
vãha, chi coto ñaha-n
xii-ndí cuendá sá vã
dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gã xii-güedé.

⁵ Te Jèsús ní xáhaⁿ tùcu-gá:

—Te núu ndédacãa nchóhó
ndécú ñⁿ téé tñaha tnúhu
ndihí-ndo, te dava niú
cáháⁿ-ndó vehe-dé, te òré
ní quexio-ndo, te xáhaⁿ-ndo
xii-dé: “Véxi-í núu vá cundèe
iní-n tàxi nuu-n úní tñáhá
páá, ⁶ chi ñⁿ téé xini tñáhá
ndihí-í ñúhú-dé ichi ní
quexio-dé vehe-í, te ñá túú
tñahí ná cuãñaha-í caxi-dé”,
quesaha-ndo cũñaha-ndo.

⁷ Te téé-áⁿ cáháⁿ-dé ndéé xiti
vehe-dé, te cúñaha-dé xii-ndo:
“Vá dásatú nihá-n chi ndèdí
yuyèhe-í, te cà-í ndihí cue
landú-í, te vá cúú ndácóo-í
taxi-í sá cuiní-n”, quesaha-dé
cũñaha-dé xii-ndo. ⁸ Te

na càchí tnúhu-í xii-ndo
sã cuèi cùu-dé téé tñaha
tnúhu ndihí-ndo, dico ducaⁿ
cũñaha-dé xii-ndo, dico
dacuítí sã ndácóo-dé taxi-dé
sá cuiní-ndó cuendá sá vã
dásatú-gá-ndó iní-dé. ⁹ Te

yúhú càchí-í xii-ndo sã
cãcáⁿ-ndó núu ná cuiní-ndó
núú Yã Ndióxi te taxi-gá. Te
vá dáñá ndèé-ndó cãcáⁿ-ndó
núú-gã núu ná cuiní-ndó, te
ducaⁿ te nihí-ndó. Te cada
iní-ndó sã ní quexio-ndo
vehe ñⁿ tñaha ñáyi-ndo te
ní cáháⁿ-ndó, te ñáyi-áⁿ ní
tedóho ñáhá-yu xii-ndo te ní

nacaáⁿ-yu yuyèhe. Te ducaⁿ
càda iní-ndó chi Yã Ndióxi
tedóho ñaha-gã xii-ndo, te
taxi-gá sá ná cãcáⁿ-ndó
núú-gã. ¹⁰ Chi nchaa ñáyi
ducaⁿ xiquide te Yã Ndióxi
tedóho ñaha-gã xi-yu nihí-yu
sá cuiní-yu. Te diu-ni ducaⁿ
tùcu nchaa ñáyi na cãcáⁿ
núú-gã ñⁿ sá cuiní-yu, chi
sãñaha-gã sá xicáⁿ-yu núú-gã.
Te diu-ni ducaⁿ tùcu nihí
nchaa ñáyi ñá túú dáña
ndeé xicáⁿ núú Yã Ndióxi sá
cuiní-yu, chi nihí-yu.

¹¹ Te nchóhó cue téé cùu
tátá ñá túú cundee iní-ndó
cuãñaha-ndo cuè déhe-ndo ñⁿ
yúú caxi-güexi òré xicáⁿ-güexi
ñⁿ páá núú-ndó cãxi-güexi,
te ní ñá túú cundee iní-ndó
cuãñaha-ndo ñⁿ cóo caxi-güexi
òré xicáⁿ-güexi ñⁿ chácá
núú-ndó cãxi-güexi. ¹² Te
ní ñá túú cundee iní-ndó
cuãñaha-ndo ñⁿ nchacua
caxi-güexi òré xicáⁿ-güexi
ñⁿ ndíú núú-ndó cãxi-güexi.
¹³ Te nchóhó cuèi ndéé dau
sáá iní-ndó, dico sãha-ndo
cuè déhe-ndo sã vãha
xèxi-güexi òré xicáⁿ-güexi
núú-ndó. Te núu nchóhó
ducaⁿ quide-ndo, ñe uuⁿ-gá
ducaⁿ quide Tátá-ndó Dütú
Ndióxi Yaá ndécú àndi-ú, chi
taxi-gá Espiritú-gá cundecu
ndihí-ndo te núu na cãcáⁿ-ndó
núú-gã! —càchí-gá xáhaⁿ-gã
xii-güedé.

*Càchí-güedé sá ndécú ndihí
Jesús yucu ñávãha*

(Mt. 12:22-30; Mr. 3:20-27)

¹⁴ Te Jèsús ndéñuhu-gá
espíritú cundihí yucu ñávãha
yíhi ñaha xii ñⁿ téé ní quide

ñihí-xi, te òré ní ndee ñaha
espíritú-án xii téé-án, te ní
nacáháⁿ-dé. Te ío ní cuñúhu
ñáyiu sá dúcáⁿ ñi guide-gá.
15 Te davá-yu ní xitnàhá-yu:

—Tée-a ndèñuhu-dé ncha
espíritú cùndìhi sácuihná
yihí ñaha xii ñáyiu, chi
diu-ni sácuihná-án chindèe
ñaha-xi xii-dé, te diu-ni-xi tàxi
tnuní-xi ncha espíritú-án —
càchí-yu xitnàhá-yu.

16 Te davá-yu xito ndee
ñáhã-yu xii-gá, te xähãⁿ-yu
sá ná cádá-gã ìⁿ sá vã yõ
tnàhí ndàcu cada ñuyú^u-a
cundèhé-yu nàcuáa cutnùnì
iní-yu núu ndáá sá Yã Ndiõxí
ní tendaha ñaha-gá xii-gá
véxi-gá ñuyú^u-a. 17 Dico
mee-gã sa ní cutnùnì iní-gá
ncha nàcuáa sàni iní-yu, núu
ní xáhaⁿ-gã xií-yu:

—Te nchòhó xìnì-ndó
sã núu ìⁿ téé yìndaha ìⁿ
nacióⁿ vá cúú ìⁿnuu-dé
ndìhi cue téé cùndìhi-dé,
te vá cùdìi-dé cunu-dé.
Te diu-ni ducaⁿ sãtnahá
tucu-xi cùu cue ñáyiu xìndecu
ìⁿ-ni vèhe, chi núu vá cúú
ìⁿnuú-yu cundecú-yu, te vá
cùdìi-yu cundecu càhnú-yu.

18 Te ducaⁿ sãtnahá-xi cùu
sácuihná, chi núu vá cúú
ìⁿnuu-xi ndìhi ncha espíritú
cùndìhi-xi te vá cùdìi-xi
cundecu-xi taxi tnùnì-xi.
Te duha càháⁿ-í chi nchòhó
càchí-ndó sã sácuihná chindèe
ñaha-xi xii-í queñúhu-í
ncha espíritú cùndìhi-xi
yihí ñaha xii ñáyiu. 19 Te
núu yúhú quidé cuendá-ndó
sã sácuihná chindèe ñaha-xi
xii-í, te xìni ñuhu-xi cada
cuendá-ndó yõ chindee

ñaha xii cue téé xìca cuu
ndìhi-ndo queñúhu-güedé
ncha espíritú cùndìhi-xi yihí
ñaha xii ñáyiu. Te mee-güedé
càchí-güedé sá nchòhó ñá
túú càháⁿ ndáá-ndó sã dúcáⁿ
càháⁿ-ndó. 20 Te ndáá sá
Yã Ndiõxí chindèe ñaha-gá
xii-í queñúhu-í ncha espíritú
cùndìhi sácuihná yihí ñaha xii
ñáyiu, te xíãⁿ cutnùnì iní-ndó
sã sá ní sáá nduu ndìhu
ndaha ñaha Yã Ndiõxí xii-ndo.

21 Te núu ìⁿ téé ío ndee, te
súunì ñíí cáá-dé, te ndèe-dé
vehe-dé cuendá sá vã cuíta,
te ní guide túha-dé tìtní sá
dèéⁿ, te ío váha nèhe váha-dé
ncha ndachìuⁿ-dé. 22 Dico
núu quexìo ingá téé ío-gá
ñíí cáá te ndee-gã-dé, te
ngüíta-dé nàá-dé ndìhi téé
ndèe vehe-xi-áⁿ, te cada
cànárì ñáháⁿ téé-áⁿ xii téé ndèe
vehe-xi-áⁿ, te quendeé-dé
ncha sá dèéⁿ cùndèe iní-dé,
te taxi tnùnì-na-dé ncha
xíãⁿ, ndìhi ncha sá ndécú
ndìhi-dé, te dàcáhñu-dé
ncha cue téé cùndìhi-dé
ncha sá ná ñihí-dé.

23 Te ncha ñáyiu ñá túú
cùndìhi ñaha xii-í, te cùu úhú
iní ñáhã-yu, te ncha ñáyiu
ñá túú chindèe ñaha xii-í, te
dàquee tihũ-yu chìuⁿ guide-í.

*Espíritú cùndìhi yucu
ñávãha sá nánchòcáva xito cùu
uú*

(Mt. 12:43-45)

24 Te òré ná quèe ñaha
ìⁿ espíritú cùndìhi yucu
ñávãha xii ìⁿ ñáyiu, te
cuáháⁿ-xi ndùcu-xi ìⁿ xichì
núu cùndècu-xi te ñá ñihí-xi,
te ní sani iní-xi: “Váha-gá
núhú tucu-í núu ñi xìndecu-í”,

duha ní sani iní-xi. ²⁵ Te cuánuhú-xi, te òré ní nasáá-xi, te ní xiní-xi sá cáá ìní ñáyiú-áⁿ dàtná cáá-nǎ ìⁿ vehe ní natíhú, chi ní nduu vii-ná, vá yǎo-gá ndécú. ²⁶ Te sáta dúcáⁿ te ní xica-xi cuáháⁿ-xi cuándúcú-xi úsá tnàhá espíritú cúndìhi-xi sá nèhé víhí-gǎ xǐquide, te òré ní níhí-xi cue espíritú-áⁿ te ndèca ñaha-xi cuáháⁿ cuendá ngúndecu ndìhi-xi ñáyiú-áⁿ, te ñáyiú-áⁿ uuⁿ-gá nándi yáha-yu dàcúúxí ndéé díhna —càchí-gá xáhaⁿ-gǎ xií-yu.

Cuendá ñáyiú cùu váha ndisa iní-xi

²⁷ Te ñini càháⁿ Jèsús tnúhu-áⁿ núú ñáyiú ní cáháⁿ níhi ìⁿ ñadìhí tnuú-yu, te xáhaⁿ-aⁿ xii Jèsús:

—¡Sá vǎha táhú ñadìhí ní dácácú ñaha xii-n, te ní dácuéhnú ñaha-aⁿ! —cachí-aⁿ xáhaⁿ-aⁿ xii-gǎ.

²⁸ Te Jèsús ní xáhaⁿ-gǎ:

—¡Váha-gǎ táhú nchàa ñáyiú sàcúndedóho nchaa tnúhu càháⁿ Yǎ Ndiǒxí te sàndáá iní-yu! —càchí-gǎ xáhaⁿ-gǎ xii-aⁿ.

Ñáyiú ñá túú sàndáá iní ñáhá xii Jèsús cuíní-yu cada-gǎ ìⁿ sá vǎ yǎo tnàhí ndàcu cada (Mt. 12:38-42; Mr. 8:12)

²⁹ Te ta tàcá vǎi ñáyiú te dàdehnde tnaha-ná-yu, te ní ngúíta Jèsús xáhaⁿ-gǎ xií-yu:

—Nchòhó ñáyiú ndècu ñuyíú vitna, chi ío sáá iní-ndó, te cuíní-ndó càda-í ìⁿ sá vǎ yǎo tnàhí ndàcu cada cuendá cuíní-ndó cùtnuní iní-ndó núu ndisa sá Yǎ Ndiǒxí ní tendaha ñaha-gǎ xii-í véxi-í.

Dico ñá túú nǎgá cada-í quíní-ndó, chi sa níhí-ndó tnúhu nàcuáa ní yáha ndíi Jònás téé ní xóo cáháⁿ tnúhu Yǎ Ndiǒxí ndéé sanaha, te ñu-ni ducaⁿ yáha yúhú tucu. ³⁰ Chi nchaa ñáyiú ñuú Nñivé ní cutnùní iní-yu sá Yǎ Ndiǒxí ní tendaha ñaha-gǎ xii ndíi Jònás ní sáháⁿ ndíi ñuú-yu. Te ducaⁿ sǎtnahá-xi cùu yúhú Téé cùu ñani tnàhá-ndó nchàa-ndo, chi sáá nduu te cutnùní iní-ndó sǎ Yǎ Ndiǒxí ní tendaha ñaha-gǎ xii-í véxi-í ñuyíú-a. ³¹ Te na sáá nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a, te dàvǎ-áⁿ quíní-ndó ìⁿ ñadìhí ñaha ní xíndaha ìⁿ nacióⁿ cáá ndàa xio cuha núú quéné nchìcanchii. Te ñaha-áⁿ ío xica ní xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salòmón, chi ndíi-áⁿ ío ní sáá sá xini tnùní ndíi. Te ñaha-áⁿ càháⁿ-aⁿ dàvǎ-áⁿ sǎ nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndíhi ñaha-ndo xii yúhú, te ñu-í ío-gǎ cùnùu-í dàcúúxí ndíi Salòmón. ³² Te ñu-ni nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a vitna, dàvǎ-áⁿ tnàhá cue ñáyiú ní xíndecu ñuú Nñivé cundecú-yu núú Yǎ Ndiǒxí, te tnàhá-yu cachí-yu sá ñà túú ní quide ndáá-ndó. Chi ñáyiú ñuú Nñivé-áⁿ ní ndixi túu iní-yu sá ñà túú quide váha-yu ndècú-yu te ní natuhá-yu ichi Yǎ Ndiǒxí cùtnàhá ní cáháⁿ ndíhi ñaha ndíi Jònás tnúhu-gǎ xií-yu. Dico vitna iha ndècu ndíhi

ñaha-ndo xii yúhú tée càháⁿ
tucu tnúhu Yá Ndiöxí, te diu-í
ío-gá cúnüu-í dàcúúxí ndi
Jónás.

*Núu-ó cùu-xi datná ìⁿ ñuhú
(Mt. 5:15; 6:22-23)*

³³ Te ñá túú nì ìⁿ ñáyi
teñuhú ìⁿ linterná, te taxi
ndecú-yu ìⁿ núu yídáhu, àdi
chiváha-yu xití ìⁿ tídihi, chi
tàxi ndecú-yu ìⁿ núu ñnu
cuendá nchaa ñáyi quihu
vehe cutnùní núu-yu. ³⁴ Te
núu-ndó cùu-xi datná ìⁿ
ñuhú, chi ìⁿ sá ná quini-ndó te
ndixi túu iní-ndó ñá cúú xǎⁿ,
te núu càváha núu-ndó, te
ducaⁿ cùtnuní iní-ndó ñá cúú
sǎ ndécú núu-ndó, áⁿ te núu
cùhú, te vǎ cùtnuní iní-ndó
ñá cúú sǎ ndécú núu-ndó.
Te sǎ dúcáⁿ cùhú núu-ndó te
cada iní-ndó sǎ ndécú-ndó
dàtná ìⁿ núu nées. ³⁵ Te ío
cada cuendá-ndó vǎ cáni
cuèhé iní-ndó cuendá tnúhu
Yá Ndiöxí cuendá cutnùní
iní-ndó nàcuáa cundecu-ndo,
chi núu na cáni cuèhé iní-ndó
cuendá tnúhu-gá, te cùu-ndo
datná ìⁿ ñáyi ñá túú cùtnuní
núu-xí. ³⁶ Te núu càndoo
canine iní-ndó, te mee-ní sǎ
vǎha ñuhu iní-ndó, te cùtnuní
váha iní-ndó tnúhu ndáá
dàtná cùtnuní váha núu-ndó
òré càyú ñuhú, ducaⁿ cùtnuní
iní-ndó —càchí-gá xáhaⁿ-gǎ
xii-yu.

*Jèsús càháⁿ-gá cuendá cue
té cùu fariséu ndihi cue té
dàcuaha ñaha xii-í ñáyi*

*(Mt. 23:1-36; Mr. 12:38-40;
Lc. 20:45-47)*

³⁷ Te òré ní ndihi tnúhu
ní càháⁿ Jèsús, te ìⁿ té cùu
fariséu ní càháⁿ ñáhá-dě
xii-gá vehe-dé caxi-gá, te

cuánguihu-gá vehe-dé, te ní
ngóo-gá mèsá. ³⁸ Te té cùu
fariséu-áⁿ ío ní cuñúhu-dé,
chi Jèsús ñá túú ní ndàha-gá
nàcuáa sàni iní-güedé nduu
vétú iní Yá Ndiöxí òré ní
ngóo-gá caxi-gá dàtná quidé
mèe-güedé. ³⁹ Te Jèsús ní
xáhaⁿ-gǎ xii-dé:

—Nchòhó cue té cùu
fariséu xini-ndó sǎ ío ñáyi
nàquete sàtá-ni tàsáⁿ ndihi
sàtá-ni còhó, te xití-xi
càndehe caduha-ni. Te ducaⁿ
sàtnahá-xi cùu nchòhó, chi
ndaha-ni-ndo nàquete-ndo,
te iní-ndó ñá túú nduu ndoo,
te nándi dándahú-ndó tnàha
ñáyi-ndo, te queheⁿ-ndo sǎ
ndécú ndihi-yu, te nándi-gá
nchaa sǎ cuèhé sǎ dúhá ñuhu
iní-ndó quide-ndo. ⁴⁰ ¡Te
nchòhó cúu-ndó cuè téé ío
ñí iní-xi! ¿Te náa ñá túú
cùtnuní iní-ndó sǎ Yá Ndiöxí
Yaá ní cadúha yiqui cùñú-ó
diu-ni-gá ní chihi-gá iní-ó-áⁿ?
⁴¹ Te nchaa sǎ vǎha ndècu
ndihi-ndo cuáha-ndo nchàa
ñáyi xini ñuhu na cundecu
ndihi-yu, te núu ducaⁿ na
càda-ndo, te cuu-ndo ñáyi sa
ní nduu ndoo ní nduu nine
iní-xi.

⁴² ¡Te ndàhú ní cuu nchaa
nchòhó cue té cùu fariséu!
Chi sǎha-ndo Yá Ndiöxí núu
ùxí xichi yúcu nání mèntá,
ndihi yúcu rúdá, ndihi nchaa
dava-gá núu yúcu quèe
comidá, dico ñá túú quide
ndáá-ndó, te ni ñá túú ñuhu
iní-ndó Yá Ndiöxí. Dico tnúhu
càháⁿ-í-a tàú-ndó càda-ndo,
te ni vǎ dáñá ndèé-ndó
càda-ndo nchaa dava-gá sǎ
vǎha.

⁴³ ¡Te ndàhú ní cuu nchòhó

cue tée cùu fariséu! Chi cuiní-ndo cùnucóo-ndo nũú sácõo cue tée ío cùnũu xití veñúhu, te cuiní-ndo mèe-ni ndihi tnúhu yíñũhu cáháⁿ ndihi ñaha ñáyiũ xii-ndo nchàa núú xicá cùu-ndo.

44 'iTe ndàhú ní cuu nchòhó cue tée dàcuaha ñaha xii ñáyiũ nchaa tnúhu ní chídó tnùní ndíi Moisés, ndihi nchòhó cue tée cùu fariséu chi ío dándahú-ndó mèe-ndo sá quidé ndàá-ndó te ñá ndàá sá quidé ndàá-ndó! Chi cùu-ndo datná ìⁿ ñáyiũ ní xihí te ní nguindũxi, te ñá túú cùtnuní-gá ndéé yíndũxi-yu, te cuèi nà yáha ñáyiũ dico ñá túú cùtnuní sá yíndũxi ndíyi. Te ducaⁿ sãtnahá-xi cùu nchohó, chi nchaa ñáyiũ ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó — cãchí-gá xáhaⁿ-gã xii-güedé.

45 Te ní xáhaⁿ ìⁿ tée dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xicuehé-n ãⁿ —cãchí-dé xáhaⁿ-dé xii-gá.

46 Te Jèsús ní xáhaⁿ-gã:

—iNdàhú ní cuu tnàhá nchaa nchòhó cue tée dàcuaha ñaha xii ñáyiũ nchaa tnúhu ní chídó tnùní ndíi Moisés! Chi quíde-ndo datná quidé ñáyiũ dàcuido ìⁿ tnaha ñáyiũ-xi ìⁿ sá ío vée, te mèe-yu ni lùha ñá túú cuiní-yu cuidó-yu. Te ducaⁿ sãtnahá-xi quíde nchohó chi dànehé-ndó ñáyiũ nacuáa cadá-yu, dico mee-ndo chi ni lùha ñá túú cuiní-ndó càda-ndo nacuáa dànehé-ndó-yu.

47 'iTe ndàhú ní cuu tucu-ndo! Chi càdúha-ndo nũú ní nguindũxi cue tée ní xóo cáháⁿ tnúhu Yá Ndióxi ndéé sanaha cuendá sá cúnaha-ndo núú yíndũxi cue ndíi, te ñiu-ni cue ñaní tnàhá-ndó ní sahani-güedé cue ndíi. 48 Te nchòhó sa nàha-ndo nacuáa ní quíde cue ñaní tnàhá-ndó, te cãchí-ndó sã ní quíde váha-güedé sá dúcáⁿ ní sahani-güedé cue ndíi-áⁿ, te vitna càdúha-ndo nũú ní nguindũxi cue ndíi.

49 Te Yá Ndióxi ío sàá nchaa sá xiní tnùní-gá, te ní cachí-gá sá dácáháⁿ-gá iní cue tée cuendá cáháⁿ-güedé tnúhu-gá núú ñáyiũ, te cada-güedé nchaa nacuáa cuiní-gá, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gá. 50 Te nchaa ñáyiũ ñuyíú vitna tnàhá-yu nacháhu-yu núú Yá Ndióxi cuendá sá ní sahani-güedé cue tée ní cáháⁿ tnúhu-gá ndéé cùtnàhá ní ngáva ñuyíú. 51 Te ndéé ndíi Àbél tée ní sahani-güedé ndéé díhna nuu, ndihi ndéé ndíi Zacàriá tée ní sahani-güedé ndéé núú ní ndihi-ná ndácáⁿ cuendá ñàhá Yá Ndióxi núú ñáyiũ ndècu ñuyíú vitna, te ñiu ndíi-áⁿ ní sahani-güedé mei tnúú veñúhu càhnu sá ío cùnũu, ndihi xító núú sácòdó sã ndúú tãhú Yá Ndióxi.

52 'iTe ndàhú ní cuu tucu nchaa nchòhó cue tée dàcuaha ñaha xii ñáyiũ nchaa tnúhu ní chídó tnùní ndíi Moisés! Chi quíde-ndo datná quidé ìⁿ tée tàxi tnuní ìⁿ

vehe, chi nacadí-dé te ñá dáñá-dě quihu ñáyiú te ni mée-dé ñá túú quihu-dé. Te ducaⁿ sátnahá-xi quide-ndo, chi dâcuaha-ndo tnúhu Yá Ndiöxí te ñá túú cuini-ndo quindáá ini-ndo te ni ñá túú dânehé-ndo ñáyiú cuini tñi tnúhu-gá nâcuáa tàú-xi cunduu cuendá naníhí tàhú-yu — cächí-gá xáhaⁿ-gã xii-dé.

⁵³ Te òré ní ndee Jèsús vehe téé cùu fariséú-áⁿ, te cue téé dâcuaha ñaha xii ñáyiú nchaa tnúhu ní chídó tñini ndíi Moisés, ndihí cue téé cùu fariséú ní cudééⁿ-güedé núú-gã, te ní ngüita-güedé nándi sá xicáⁿ tnúhú-güedé núú-gã cuendá cuini-güedé núu vá cuíta-gá ñⁿ tnúhu càháⁿ-gã ⁵⁴ cuendá ducaⁿ ñihí-güedé nâcuáa cada-güedé cacáⁿ cuéchi-güedé cuendá-gã.

12

Jèsús càháⁿ-gã cuendá cue téé dàndahú mée-xí

¹ Te òré-áⁿ ñí tacá tñi mîl ñáyiú núú ndécú Jèsús, te súuní dicó ngõnchihi tnàha-ná-yu. Te ndèdóho-yu ní xáhaⁿ Jèsús xii cue téé xica cuu ndihí-gã:

—Cada cuendá-ndo vã cáncñicúⁿ ñihnu-ndo nâcuáa quide cue téé cùu fariséú, chi cue téé-áⁿ ño dàndahú-güedé mée-güedé sá quidé ndáá-güedé dico ñá ndáá sá quidé ndáá-güedé.

² Te nchaa tnúhu sá cúu yùhu ni cuu vá cúu yùhu-gã, chi nchaa dacuitíí sã quéé tñu-xi núú ñáyiú. ³ Chi nchaa tnúhu càháⁿ dayuhu-ndo

quée túu-xi núú chítú núú tàcá, te nchaa tnúhu càháⁿ mée-ndo vèhe-ndo dacuitíí sã ñihí ñáyiú tnúhu.

Yá Ndiöxí xini ñùhu-xi yuhú-ó-gã

(Mt. 10:26-31)

⁴ 'Te nchòhó cue téé ño váha tnàhá tnúhu ndihí-í ná cächí tnúhu-í xii-ndo sã vã yùhú-ndo cue ñáyiú cuei na càhni ñahá-yu xii-ndo, chi diu-ni yiquí cùñú-ndo ndàcú-yu cahni-yu, te ñá túú ñágá ndacú-yu cada ñahá-yu xii-ndo. ⁵ Te na cächí tnúhu-í xii-ndo sã Yá Ndiöxí tau-ndo yùhú-ndo-gã, chi mee-gã ño cùnuu-gã, te diu-gã quidé-gã sã vã cùndècu-gã ñáyiú ñuyíú, te daquihíⁿ ñahá-gã xii-yu núú ùhú núú ndàhú, núu xiáⁿ cächí tnúhu-í xii-ndo sã Yáá-áⁿ tau-ndo yùhú-ndo-gã.

⁶ 'Te nchòhó xini-ndo sã ndéé úhúⁿ tnàhá tñlaá cùyáhu-di núú ùú díhúⁿ, dico Yá Ndiöxí ñá túú cùnnaa-gã ni ñⁿ-güedi, chi nèhe cuendá ñahá-gã xii-güedi. ⁷ Te nchòhó ndéé ñⁿ ñⁿ idi díquí-ndo yìndehu, núu xiáⁿ cächí-í sã vã yùhú-ndo, chi cùnuu-gã-ndo dàcúúxí tñlaá cuei vãi vihi-güedi.

Ñáyiú na dátúu núú dàva-gã ñáyiú sá ndécú ndihí-yu Xitohó Jesucristú

(Mt. 10:32-33; 12:32; 10:19-20)

⁸ 'Te na cächí tnúhu-í xii-ndo sã núu na dátúu-ndo núú dàva-gã ñáyiú sá ndécú ndihí ñaha-í xii-ndo. Te ducaⁿ te tnàhá yùhú Téé cùu ñaní tnàhá-ndo nchàa-ndo dátúu-í núú nchàa cue

espíritú xínú cuèchi núú Yă Ndiöxí sá nchòhó ndécú ndìhi ñaha-ndo xii-í. ⁹ Dico núú na cùñaha-ndo xii ñáyiu sá ñà túú ndècu ndìhi ñaha-ndo xii-í, te òu-ni ducaⁿ càda yúhú Tée cùu ñaní tnáhá-ndó nchàa-ndo, chi cùñaha-í xii cue espíritú xínú cuèchi núú Yă Ndiöxí sá ñà túú ndècu ndìhi ñaha-í xii-ndo.

¹⁰ Te ndédani càa ñáyiu na càháⁿ cuèhé cuendá yúhú Tée cùu ñaní tnáhá-ndó nchàa-ndo, te cada càhnu iní ñáhá Yă Ndiöxí xii-yu. Dico ñáyiu na càháⁿ cuèhé cuendá Espíritú Yă Ndiöxí, te ñáyiu-áⁿ vâ cáda càhnu iní ñáhá-gă xii-yu.

¹¹ Te òré ná càndeca ñaha-güedé xii-ndo quihiⁿ veñúhu, àdi núú cuè tée cùchiuⁿ, te ni vâ cání iní-ndó nñu nása cunduu tnúhu cùñaha-ndo xii-güedé, te ni vâ cání iní-ndó nñu ná tnúhu nadànchocáva-ndo nñu ná tnúhu na cùñaha-güedé xii-ndo, ¹² chi òré-nă te mee Espíritú Yă Ndiöxí dacàhu iní ñáhá-xí xii-ndo tnúhu cùñaha-ndo xii-güedé — càchí-gă xáhaⁿ-gă xii-güedé.

Cuendá ñⁿ tée cuica

¹³ Te ñⁿ tée ñúhu tnáhá tnuú ñáyiu-áⁿ ní xáhaⁿ-dè xii Jèsús:

—Mèstrú, cùñaha xii ñaní-í sá ná chídava-dé sá ní dándò tâtá-ndí cuu cuendá-ndí — càchí-dé xáhaⁿ-dè xii-gă.

¹⁴ Te Jèsús ní xáhaⁿ-gă xii-dé:

—¿Te ná cuendá ducaⁿ càháⁿ-n? Te ñá díú chiúⁿ-áⁿ vèxi-í cada-í, chi ñá díú tée cùchiuⁿ cuu-í —càchí-gă xáhaⁿ-gă xii-dé.

¹⁵ Te xáhaⁿ-gă xii nchaa ñáyiu xñdecu-áⁿ:

—Nchaa nchòhó ñáyiu ndèdòho nchaa tnúhu càháⁿ-í ío váha cada cuendá-ndó, te vâ cání iní-ndó nñandi nducu-ndo cùndecu ndìhi-ndo, chi cuèi vâi vihi na nihí-ndó cùndecu ndìhi-ndo, dico vâ chindèe ñaha-xi cudíi-ndo cùndecu-ndo ñuyíú-a — càchí-gă xáhaⁿ-gă xii-yu.

¹⁶ Te dătnùní ní ngúita-gă cání-gă ñⁿ cuendú núú-yu cuendá tecú tnùnì-yu tnúhu-gă, te xáhaⁿ-gă:

—Íⁿ tée cuica sùúní ní cuu nchaa tatá ní xitu-dé núú ñúhú-dé.

¹⁷ Te ní ngúita-dé sání iní-dé: “¿Te nása cada-í? Te ñá túú ndéé nataxúha-í nchaa sá ní xitu-í”, duha ní sani iní-dé. ¹⁸ Te dătnùní ní sáha váha tucu-dé cuendá năcuáa cada-dé, te ní cachí-dé: “Duha na cunduu, dangòyo-í yacá-í, te ndada càhnu-gă-í, te xití-xi nataxúha-í nchaandi túhú sá ní xitu-í, ndìhi nchaa dava-gă sá ndécú ndìhi-í.

¹⁹ Te sátá dúcáⁿ, te cachí-í: Ío vâi sá ndécú ndìhi-í, te cudíi-xi cuèhé cuíá, te vitna ndetatú-í, te coho-í te caxi-í cada-í, te nándi-gă cada-í cuendá cudíi iní-í cundecu-í, duha quesaha-í”, càchí-dé.

²⁰ Dico Yă Ndiöxí ní xáhaⁿ-gă xii-dé: “Yòhó, ñá túú nândìhi sá sání iní-n, chi yúhú càchí-í sá niú vitna cuú-n, te nchaa sá ndécú ndìhi-n ¿yoo cuu sá vâha xii-aⁿ-í?”, càchí-gă xáhaⁿ-gă xii-dé. ²¹ Duha yáha nchaa ñáyiu nándi sání iní-xi cundecu ndìhi-xi ñuyíú-a,

dico ñáyi-u-áⁿ ïo ndàhú-yu chi ñá túú nã nduu táhũ-yu núú Yã Ndiõxí cundecu ndihí-yu —càchí Jësús xáhaⁿ-gã xii-yu.

Yá Ndiõxí xító-gã nchaa ñáyi-u sàndáá iní ñáhá xii-gá
(Mt. 6:25-34)

22 Te ní xáhaⁿ Jësús xii cue téé xica cuu ndihí-gá:

—Te na càchí tnúhu-í xii-ndo sã vã ïo cani iní-ndó nõu nása cundecu-ndo, àdi nása níhí-ndó sã cáxí-ndó, àdi nása níhí-ndó dõó cuihnu-ndo. 23 Chi cùnuu-gá mée-ndó dàcúxí sã nchító-ndó, te ducaⁿ yiqui cuñú-ndó cùnuu-gá-xi dàcúxí dõó sácũhnu-ndo.

24 Te chí cuãha cuendá nãcuáa quide cue ticácá, chi ni ñã túú chihí-güedi tatá cuu itú natahu-güedi te ni ñã túú ndéé nútnĩ yacá-güedi, te níhí-güedi xèxi-güedi, chi Yá Ndiõxí xító ñàha-gá xii-güedi. jTe nchòhó cùnùu-gá-ndó dàcúxí nchàa cue quiti ndava! 25 Te cuèi nãndi sã sání vihi iní-ndó ndècu-ndo, dico ñã ndácú-ndó càda-ndo nacuáa cuehnu-ndo cuèdicó ñⁿ yiqui-gã. 26 Te núu ni sã lúhá xiãⁿ ñã ndácú-ndó càda-ndo, jte ná cuendá ïo sãni iní-ndó cuendá nchaa sã cuñi-ndó níhí-ndó cundecu ndihí-ndo?

27 Te chí cáda cuendá nãcuáa sãhnu ñⁿ tnu itá, chi ni ñã túú quide chiuⁿ-xi, te ni ñã túú quèheⁿ-xi idi. Te na càchí tnúhu-í xii-ndo sã ndĩi Salòmón ïo vii ní cáa nchaa sã ñĩ xindecu ndihí ndĩi, dico vii-gá tucu càa nchaa itá dàcúxí nchàa sã ñĩ xindecu ndihí ndĩi. 28 Te

cúhú sã ïo vitna tnaa-ni cùdí-xi te sãhmí-yu, te cuèi ducaⁿ dico ïo vii càdúha Yã Ndiõxí nchaa cúhú-ãⁿ. jTe nchòhó ïo cùnuu-ndo dàcúxí nchàa cúhú-ãⁿ, núu xiãⁿ ïo xito ñàha-gá xii-ndo, te dicó yica cùu iní-ndó sàndáá iní-ndó-gã! 29 Te vã ïo canchicúⁿ nihnu-ndo sã cóhó sã cáxí-ndó, te ni vã dándihú-ndó iní-ndó nõu nása cada-ndo níhí-ndó. 30 Chi nchaa ñáyi-u ñã túú sàndáá iní ñáhá xii Yá Ndiõxí ducaⁿ mée-ni sã cóhó sã cáxí-yu xica nchicúⁿ nihnú-yu. Dico mee Tãtá-ó Dütú Ndiõxí sa nàha-gá nãndi cùu sã xini ñũhu-ndo, te taxi-gá. 31 Te cada-ndo nchàa nacuáa càháⁿ Yã Ndiõxí Yá yindàha ñàha xii-ndo, te ducaⁿ te taxi-gá nchaa sã xini ñũhu-ndo.

Cuendá sã vãha nduu táhú-ó núú Yã Ndiõxí
(Mt. 6:19-21)

32 Te vã yùhú nchòhó cue téé ndècu ndihí-í cuèi ïo sacú-ndó, chi Tãtá-ó Dütú Ndiõxí ní cachí-gá sã ndúú táhú-ndó cundecu-ndo núú ndécú-gã taxi tnúni-ndó tnàhá-ndó. 33 Te chí dicó nchàa sã ndécú ndihí-ndo, te chí cuãha nchaa ñáyi-u ndàhú díhúⁿ-ndó ñáyi-u xini ñũhu, te cada vãha-ndo cundecu-ndo, te ducaⁿ te nduu táhú-ndó sã ïo-gã vãha núú Yã Ndiõxí cundecu ndihí-ndo, te xiãⁿ vã cúú tũhú tnàhí-gá-xi, te ni vã ndihí nihnu-gá-xi, te ni ñãdúhú vã ndácú-güedẽ duhu-güedẽ, te ni tiquidi vã quèé-dí. 34 Te núu xiãⁿ cúú cuendá-ndó ñã, te diu-ni

xíáⁿ ñúhú ìní-ndó, áⁿ te núu mee-ni sǎ ndécú ñùyíú-a ndècu ndíhi-ndo, te ñi-u-ni nchaa xíáⁿ ñúhú ìní-ndó.

Xìni ñuhu-xi quíhi iní-ó cùndecu-o

35-36 Te ío quíhi iní-ndó cùndecu-ndo, te cada-ndo dàtná quidé dàva cue té xínu cuechi sacúndecu túha-güedé cuéi nání òré-áⁿ ndétú-güedé pàtróóⁿ-güedé ná òré nasáá-dé sá cuáháⁿ-dé víco tnándaha. Te núu niú te sa cúu cáyú-ni ñuhú-güedé sá cùndetu ñaha-güedé, chi òré ná násáá-dé dacàsaⁿ-dé yuyèhe, te ndíhi-ni nacaáⁿ-güedé ndíhu-dé. ³⁷ Te váha táhú nchaa cue té xínu cuechi-áⁿ, chi ndècu túha-ni-güedé ndétú-güedé ndéé òré ní nasáá pàtróóⁿ-güedé, te na càchí tnúhu ndáá-í xii-ndo sǎ òré ná násáá pàtróóⁿ-güedé-áⁿ te chíhi ñaha-dé mèsá xii-güedé, te ndacáⁿ ndee-dé dóó níhnú-dé núu yíquí-dé, te ngüíta-dé cani-dé cóhó-güedé cuendá caxi-güedé. ³⁸ Te ñi-u-ni ducaⁿ càda-dé cuéi dava niú, àdi tacuíhndá-gá, te núu ñá túú xidí-güedé òré nasáá-dé, te cue té xínu cuechi-áⁿ ïo váha tnahá-güedé. ³⁹ Te núu dícó ñⁿ tée cùu xítohó ñⁿ vehe xini-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dé nacaáⁿ-güedé yuyèhe-dé quíhu-güedé duhu-güedé. ⁴⁰ Te nchòhó tucu nchaa-ni nduu quíhi iní-ndó cùndecu túha-ndo, chi na cuáháⁿ nduu ñá túú yíhi iní-ndó,

te quixi tucu yúhú Téé cùu ñaní tnáhá-ndó nchaa-ndo — cachí-gá xáhaⁿ-gǎ xii-güedé.

Cue téé quide ndáá ndíhi cue téé ñá túú quide ndáá

(Mt. 24:45-51)

⁴¹ Te té Pèlú ní xicáⁿ tnúhú-dé núú Jèsús, te xáhaⁿ-dè:

—Mèstrú, ¿te tnúhu ní cáháⁿ-n-áⁿ cùu-xi mee-ni cuendá nchúhú áⁿ cuendá nchaa ñáyiu? —càchí-dé xáhaⁿ-dè xii-gá.

⁴² Te Jèsús ní xáhaⁿ-gǎ:

—Cáháⁿ-í cuendá ñáyiu quide váha dàtná quidé ñⁿ téé tàxi tñuní ñáhá xii cue ñáyiu xínu cuechi ndecu vehe patróóⁿ-xi, chi téé-áⁿ ïo váha tècú tñuní-dé, te quide-dé nchaa nàcuáa càháⁿ pàtróóⁿ-dè, te dàcaxi-dé cue ñáyiu xínu cuechi oré tau-xi caxí-yu. ⁴³ Te núu ducaⁿ quide váha téé tàxi tñuní ñáhá xii cue ñáyiu xínu cuechi-áⁿ ñá, te ío váha tnáhá-dé òré násáá pàtróóⁿ-dè núu ndéé cuáháⁿ-dé. ⁴⁴ Te na càchí tnúhu ndáá-í xii-ndo sǎ téé quide ndáá táxi tñuní ñáhá xii cue ñáyiu xínu cuechi-áⁿ cñaha-nǎ pàtróóⁿ-dè xii-dé sá ncháándí túhú-nǎ sá ndécú ndíhi-dé quindaha-dé. ⁴⁵ Dico núu téé tàxi tñuní ñáhá xii cue ñáyiu xínu cuechi-áⁿ ná cani iní-dé sá cùyàa patróóⁿ-dè vá násáá ndíhi-ni-dé ñá, te ngüíta-dé cani-dé nchaa ñáyiu xínu cuechi, cuéi téé cuéi ñadíhi, te ngüíta-dé caxi-dé coho-dé, te dàxini-dé méé-dé, ⁴⁶ te nduu ñá túú yíhi iní-dé te nasáá pàtróóⁿ-dè, te

dandòho ñaha patróón-dě-án xii-dé, te daquihíⁿ ñáhá-dě xii-dé núú ndécú ñáyiu ñá túú ní quide ndáá.

47 'Te dava cue téé xínu cuechi xini-güedé nàcuáa cuiní patróón-güedé cada-güedé te ñá túú quide-güedé, te ni ñà túú cuiní-güedé cundecu túha-güedé cundetu-güedé patróón-güedé, te nchaa cue téé ducaⁿ xíquide dandòho ñaha patróón-güedé, chi ñáni vilhi-güedé. 48 Te dava cue téé xínu cuechi ñá túú xini-güedé nàcuáa cuiní patróón-güedé cada-güedé, te ní quide-güedé sá néñúú-güedé ìⁿ sá ñà túú tàú-güedé cada-güedé ñá, te cue téé-án sacú-gá dandòho ñaha patróón-güedé, chi sacú-gá ñáni-güedé. Te ñáyiu cùtnuní iní-xi nàcuáa cuiní Yă Ndiöxí cada-yu, te ñu-ni ducaⁿ tàú-yu cada-yu nàcuáa cuiní-gá. Te ñáyiu vai-gá tècú tnùní nàcuáa càháⁿ-gá, te ñu-ni ducaⁿ vai nchaa sá càháⁿ-gá tàú-yu cada-yu.

*Ñá túú cùu ìⁿnuu ñáyiu
(Mt. 10:34-36)*

49 'Te yúhú véxi-í ñuyíú-a cuendá cutnùní iní ñáyiu nàcuáa cada ñaha Yă Ndiöxí xii-yu, jte cuiní-í sá ndihi-ni cada-gá nàcuáa sàni iní-gá! 50 Te yúhú ío vai tnúhu sàni iní-í, jchi sáá nduu te ío ndoho-í, te ñu-ni xǎⁿ cuhuⁿ iní-í ndéé ná sáá nduu ñucaⁿ yáha-í! 51 Te nchòhó vá cání iní-ndó sá yúhú véxi-í ñuyíú-a te cundecu ndihi

tnàha váha-ni ñáyiu, te ñáhá chi da ngüita-yu vá cúú ìⁿnuú-yu cundecu-yu. 52 Te ndéé není vitna ngüita ñáyiu vá cúú ìⁿnuú-yu cundecu-yu, te na càda-o cuendá te núu úhúⁿ ñáyiu xǎndecu ìⁿ-ni vèhe, te vá cúú ìⁿnuu-gá-yu, chi úní-yu ndatnúhu-yu te nàá-yu ndihi úú-gá-yu, àdi ñáyiu úú-án ndatnúhu-yu te nàá-yu ndihi ñáyiu úní-án. 53 Te dava cue téé cùu tátá vá cúú ìⁿnuu-gá-güedé ndihi déhe ducuⁿ-güedé, te ni dàva cue ñáyiu cùu náná vá cúú ìⁿnuu-gá-yu ndihi déhe yòcò-yu, te ni sǎnu-yu vá cúú ìⁿnuu ndihi-gá-yu. Te ducaⁿ càdá-yu chi davá-yu quindáá iní ñáhă-yu xii-í, te davá-yu vá quindáá iní ñáhă-yu — càchí-gá xáhaⁿ-gă xii-güedé.

*Ñáyiu cùtnuní iní-xi nàcuáa
quide-xi ñuyíú ndihi andiu
(Mt. 16:1-4; Mr. 8:11-13)*

54 Te Jèsús ní xáhaⁿ-gă xii nchaa ñáyiu xǎndecu-án:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sǎ cúúⁿ dǎú, te ñu ducaⁿ ndisa quide-xi. 55 Te òré ná quène táchí ndàa xio datni nàcuáa quène nchíanchii, te càchí-ndó sǎ ío cada ihni-xi, te ñu ducaⁿ ndisa quide-xi. 56 Te nchòhó ío váha cùtnuní iní-ndó nàcuáa quide-xi andiu ndihi ñuyíú, jte ná cuendá quidé-ní-ndó sǎ ñă tècú tnùní-ndó nàcuáa quide Yă Ndiöxí vitna? Te sá ñucáⁿ quide-ndo-án ío dándahú-ndó mèe-ndo sá ío váha cùtnuní

iní-ndó, chi ñá ndàá sá cútñuní iní-ndó.

Nducu-o nàcuáa nucuñdecu ndihi váha-o ñáyiú cùu úhú iní ñáhá

(Mt. 5:25-26)

57 Te nchòhó, ¿ná cuèndá ñá túú dándixi túu-ndo iní-ndó càda-ndo mee-ni sá vâha sá táu-ndó càda-ndo-i? 58 Te núu ío ñⁿ-ndo ní sacáⁿ cuèchi ñáyiú cuèndá-ndó cuèndá ñⁿ sá ní quide-ndo, te cuáháⁿ-ndó ndihí-yu núu tée cùchiuⁿ, te nini ñùhu-ndo ndihí-yu ichi, te nducu-ndo nàcuáa cada-ndo nàcáháⁿ cánnú iní tnáhá-ndó ndihí-yu cuèndá sá vâ cándèca ñaha-gá-yu quíhíⁿ núu tée cùchiuⁿ, chi núu ducaⁿ na càdá-yu te tée cùchiuⁿ-áⁿ nachihí ñaha-dě ndaha cue tée cùu poleciá, te cue tée-áⁿ chihí ñaha-güedě vecaá xii-ndo. 59 Te na càchí tnúhu-í xii-ndo sá núu na ngáva-ndo vecaá, te vâ cãcu-ndo te núu vâ náchãhu-ndo nchàa sá táu-ndó —càchí-gá xáhaⁿ-gá xií-yu.

13

Xini ñuhu-xi natuha-o ichi Yá Ndiõxí

1 Te diu-ni òrè-áⁿ ní ngúnutnî ñⁿ úú ñáyiú núu Jèsús cáni-yu cuèndú núu-gá nàcuáa ní quide ñaha té Pilatú xii cue tée distrítú Galileá cue tée ní sahní quiti nduu táhú Yá Ndiõxí, te mei òré ní sahní-güedé cue quiti-áⁿ ní táuchíúⁿ tẽ Pilatú cue sandadú-dé ní sahní-güedé cue tée Galileá-áⁿ, te ní xica níñí-güedé núu ñúhú

ndihí níñí cue quiti-áⁿ, te ní nadácánuu-xi. 2 Te Jèsús ní xáhaⁿ-gá xií-yu:

—Te núu nchòhó sání iní-ndó sá sá dúcáⁿ ní yáha cue tée distrítú Galileá-áⁿ te cùu-güedé cue tée ndècu vihi-gá cuèchi-xi dàcúúxí cuè tée ñúu-güedé ñá. 3 Te na càchí tnúhu-í xii-ndo sá ñáhá. Te núu nchòhó vâ ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vâ nátnî-ndo ichi Yá Ndiõxí. 4 Te núu nchòhó sání iní-ndó sá ñáyiú sáhúⁿ úní ní xihí ní táu ñáhá vèhe ducúⁿ Siloé ío-gá ndécú cuèchi-yu dàcúúxí nchàa ñáyiú xindecu ñúu Jerusalén ñá, 5 te na càchí tnúhu tucu-í xii-ndo sá ñáhá. Te núu nchòhó vâ ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vâ nátnî-ndo ichi Yá Ndiõxí —càchí-gá xáhaⁿ-gá xií-yu.

Yutnu ngüxí ñá túú cùuⁿ sávidí-xi

6 Te Jèsús ní cani tucu-gá ñⁿ cuèndú núu-yu nàcuáa tecú tnùní-yu tnúhu-gá, te xáhaⁿ-gá:

—Ñⁿ tée nùtnî ñⁿ yutnu ngüxí núu ñúhú-dě, te cuáháⁿ ndéhé-dě núu ní cuuⁿ sávidí-xi ní cùu, te ní ñⁿ ñá túú ní cùuⁿ. 7 Te ní xáhaⁿ tée-áⁿ xii tée ndèe ñuhu-dé: “Ñaha-n sá vitna ní cuu úní cuiá quixí còto-í yutnu ngüxí-a te ñá túú xini-í ní ñⁿ sávidí-xi. Te quehndé-n vitna, chi àúⁿ nã cuu nùtnî-xi

quide tneñu-xi núu ñuhu-án", cächí-dé xáhaⁿ-dë xii téé ndéé ñuhu-dé-án. ⁸ Te téé ndéé ñuhu-án ní xáhaⁿ-dë: "Pàtróón, dañá na cuñhu-xi cuíá vitna-ná, te na nàdatayá-í ñuhu núu sàhá-xi, te chihi-í sahán. ⁹ Te ducaⁿ te cudana cuuⁿ sávidí-xi, àdi núu ñá túú ní cùuⁿ sávidí-xi ñá te téhndé-ná-xi", cächí-dé xáhaⁿ-dë xii pàtróón-dë — cächí-gá xáhaⁿ-gã xii-yu.

Jesús quidé tãtna-gá ñⁿ ñadihí ní nduu cueyi sãtã-xi nduu ndetátú ñáyiu

¹⁰ Te ñⁿ xito cùu-xi nduu ndetátú ñáyiu, te yìhi Jesús ñⁿ veñúhu dànehé-gá ñáyiu. ¹¹ Te xíáⁿ ndécú ñⁿ ñadihí ní cuu sáhúⁿ úní cuíá sã cùhú-aⁿ yìhi ñaha espíritú cùndíhi yucu ñávãha xii-aⁿ, te xíãⁿ ní ndada cueyi-xi sãtã-aⁿ, te ñá dáñá-gã-xi nucúnutñi ndáá-aⁿ. ¹² Te òré ní xiní ñáhá Jesús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuéhé tñáhá-n —cächí-gá xáhaⁿ-gã xii-aⁿ.

¹³ Te ní dácàá-gá ndaha-gá ní tendaha ñàha-gá xii-aⁿ, te òré-ni-án ñí ndúha-aⁿ te ní nucúnutñi ndáá-aⁿ, te ní ngúíta-aⁿ ní cachí-aⁿ sá ïo càhnu cuu Yá Ndiõxí. ¹⁴ Dico téé tàxi tñuní veñúhu ní cudééⁿ-dë sá dúcáⁿ ñí quide Jesús ní quide tátna-gá ñaha cùhú-án nduu ndetátú-yu, te ní xáhaⁿ-dë xii-yu:

—Íó ñnú nduu tàú-ó càda chiúⁿ-o, te ndédani càa nduu-án quixi-ndo cùtãtna-ndo, dico ñá díú ndùu

cuu-xi nduu ndetátú-ó — cächí-dé xáhaⁿ-dë xii-yu.

¹⁵ Te ní xáhaⁿ Jesús:

—Nchòhó chí ïo dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó ãⁿ? ¹⁶ Te ñadihí-a cùu-aⁿ ñaní tñáhá ndii Abrahám, te dicó-ni sá yucu ñávãha quide duha cuhú-aⁿ ní cuu sáhúⁿ úní cuíá, ¿te náa ñá túú xini ñuhu-xi cutãtna-aⁿ cuéi cùu-xi nduu ndetátú-ó ãⁿ? —cächí-gá xáhaⁿ-gã xii-dé.

¹⁷ Te sá dúcáⁿ ñí cáháⁿ Jesús, núu nchaa cue téé cùu úhú iní ñáhá xii-gá ní cucahaⁿ núu-güedë, dico nchaa dava-gá ñáyiu chi xícudíi ñí-yu xíndéhë-yu nchaa sá vã yõ tñahí ndacu cada quide-gá.

Cuendá ndíquíⁿ yutnu nàni mostázá

(Mt. 13:31-32; Mr. 4:30-32)

¹⁸ Te ní xáhaⁿ-gã xii-yu:

—Na càni-í ñⁿ cuendú núu-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndiõxí xii-ndo. ¹⁹ ñⁿ téé ní queheⁿ-dë ndíquíⁿ yutnu nàni mostázá te nèhe-dé cuáháⁿ ní sacáⁿ-dë núu ñúhú-dë te ní xínu-xi, te ní sahnu-xi ní cuu dùcúⁿ-xi, te cue quiti ndàva núu tàchí cãdúha-güedi tacá-güedi núu dité-xi —cächí-gá xáhaⁿ-gã xii-yu.

Nàcuáa quide levadurá

(Mt. 13:33)

²⁰ Te ní xáhaⁿ tucu Jesús xii-yu:

—Te na càchí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñaha-gá xii-ndo. ²¹ Ìn ñadìhí ní quehe^{n-a} levadùrá ní chihí-aⁿ úní arròbá yuchi triú, te levadùrá-án ñí quide-xi ní ndaa nihí yusa^{n-án}—càchí-gá xáha^{n-gá} xií-yu.

Yuyèhe cuiñi
(Mt. 7:13-14, 21-23)

²² Te ichi ñuhu Jesús cuáhá^{n-gá} ñuú Jerusalén, te nchaa ñuú náhnú, ndihí nchaa ñuú líhli ta yáha-gá ducaⁿ ta dànehé-gá ñáyiú tnúhu-gá cuáháⁿ. ²³ Te ìn ñuú-án ñí xáhaⁿ ìn téé xii-gá:

—Mèstrú, cuiní-í cácaⁿ tnúhu-í ìn tnúhu núu-n, ¿ndáá sá ïo sacú ñáyiú nànhí tàhú-áⁿ? —càchí-dé xáha^{n-dé} xii-gá.

Te Jesús ní xáha^{n-gá} xii-dé ndihí nchaa ñáyiú:

²⁴ —Cada-ndo sá nánihí tàhú-ndó, te tni-ndo ichi Yá Ndiöxí, te ichi-gá-án cúu-xí dàtná ìn yuyèhe cuiñi, te càchí tnúhu-í xii-ndo sá ïo cuéhé ñáyiú cachí iní-yu quíhu-yu yuyèhe cuiñi-án dico vá ndácü-yu. ²⁵ Te na càni tucu-í ingá cuèndú núu-ndó nàcuáa tecú tnùní-ndó tnúhu càhá^{n-í}. Te òré ná ndàcuíñí téé cùu xitohó vehe, te nacadí-dé yuyèhe, te nchaa nchòhó ñáyiú na quèndóo quehé dacàsa^{n-ndo} yuyèhe, te quesaha-ndo cùñaha-ndo xii-dé: “Tátá, nacaán yuyèhe na quíhu-ndí”, quesaha-ndo cùñaha-ndo xii-dé. Dico téé cùu xitohó vehe-án cùñaha-dé xii-ndo: “Ñá túú xini-í

nchòhó ndèé ñáyiú cùu-ndo”, duha cùñaha-dé xii-ndo. ²⁶ Te dàtnúni ngúita nchòhó cùñaha-ndo xii-dé: “Nchúhú ní xexi ndihí ñaha-ndí, te ní xihí ndihí ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cùñaha-ndo xii-dé. ²⁷ Dico cachí tucu téé cùu xitohó vehe-án cùñaha-dé xii-ndo: “Sa ní cachí-í sá ñà túú xini-í ndèé ñáyiú cùu-ndo.

Te chí xocuiñí nchòhó ñáyiú ndècu ichi cuéhé ichi duha núu ndècu-í”, quesaha-dé cùñaha-dé xii-ndo. ²⁸ Te na sáa nduu dùcaⁿ cada-xi te quini-ndó tè Abrahám, ndihí té Isàác, ndihí té Jàcób, ndihí nchaa cue téé ní xóo cáháⁿ tnúhu Yá Ndiöxí, te nchaa cue téé-án ndécú-güedé núu ndécú-gá táxí tnùní-gá, te nchòhó quee tíhú-ndó núu-gá sá tnúhu ñá túú ní cuini cada ndáá, te dàvá-án ndàhyú-ndó te cuu rúhñú-ná núhu-ndo sá sàtú iní-ndó cuèndá sá ndòhó-ndó. ²⁹ Te dàvá-án quíhu nchaa ñáyiú ndi cùmí xio ñuyúú núu ndécú Yá Ndiöxí táxí tnùní-gá caxí-yu ndihí-gá, te cundecú-yu ndihí-gá. ³⁰ Te dava ñáyiú nchìcúⁿ ñá túú cùnuu ndecu ichi Yá Ndiöxí vitna, ñáyiú-án sáa nduu te ïo cunúu-yu. Te dava ñáyiú cùnuu ndecu ichi-gá vitna, ñáyiú-án sáa nduu te vá ïo-gá cunúu-yu —càchí-gá xáha^{n-gá} xií-yu.

Jesús ndàhyú-gá cuèndá ñáyiú ñuú Jerusalén
(Mt. 23:37-39)

³¹ Te diu-ni nduu-án ñí quexio ìn úu cue téé cùu

fariséu núu ndécú-gã, te xãhaⁿ-güedë xii-gã:

—Quee-n ìha quíhíⁿ-n nõu ndèé quíhíⁿ-n, chi téé cùu Herodés cùnì-dé cahni ñaha-dë xii-n —càchí-güedé xãhaⁿ-güedé xii-gã.

32 Te Jèsús ní xãhaⁿ-gã:

—Chí cuàháⁿ te cùñaha-ndo xii téé nèhe mañá-áⁿ sã càchí-í sã ná cùndedóho váha-dé ìⁿ tnúhu càháⁿ-í, chi cùmání ìⁿ úú-gã nduu cundecu-í xocàni-í nchaa espíritú cùndìhi yucu ñávãha yìhi ñaha xii ñáyiu, te cada tátna-í nchaa dava-gã ñáyiu cùhú, te ducaⁿ te ndìhi chùuⁿ-í, duha cùñaha-ndo xii-dé. 33 Dico dacuití sã cùhúⁿ-í ichi ìⁿ úú-gã nduu, te ducaⁿ te sáá-í núu quíhíⁿ-í, chi vá cúu tnàhí cuú ìⁿ téé càháⁿ tnúhu Yá Ndiõxí ingá ñuú, chi mei ñuú Jerusalén cuú-güedé —càchí-gã xãhaⁿ-gã xii-güedé.

34 Te ní xãhaⁿ-gã xii ñáyiu ñuú Jerusalén:

—Nchòhó chi sàhni-ndo nchaa cue téé càháⁿ tnúhu Yá Ndiõxí, cue téé ní tendaha-gã véxi, te mee-ni ndìhi yúu sáhní-ndó-güedé. ¡Te titní xito ní cuiní-í nadatàcá ñáhà-í xii-ndo dàtná nádàtacá ìⁿ nchuxi cuè déhe-dì sàquihí-güedì xití ndíxíⁿ-dì, dico ñá ní cuiní-ndó, te ducaⁿ-ni sàni iní-í ndéé vitna! 35 Te chí cùndedóho tucu ingá tnúhu na càháⁿ-í-a: Yá Ndiõxí dañã ñaha-gã xii-ndo. Te na càchí tnúhu tucu-í xii-ndo sã vá quini ñáhã-gã-ndó xì-í, dico sáá nduu te quini ñáhã tucu-ndo, te nduu-áⁿ cachí-ndó sã

ìo càhnu cuu yúhú Yáá ní tendaha Dütú Ndiõxí véxi ñuyíú-a —càchí-gã xãhaⁿ-gã xii-yu.

14

Jèsús quidé tátna-gã ìⁿ téé ñùhu cuiñu

1 Te duha ní cuu ìⁿ nduu, nduu ndètatú ñáyiu chí ìⁿ téé cùu fariséu cùnùu ní càháⁿ-dé Jèsús vehe-dé caxi-gã, te cue téé ndècu vehe-dé ndéhé-güedé nõu nása cada-gã. 2 Te xíaⁿ ndécú tnàhá ìⁿ téé cùhú ñúhú-dé cuiñu. 3 Te Jèsús ní xicáⁿ tnúhú-gã núu cuè téé dàcuaha ñaha xii ñáyiu nchaa tnúhu ní chídó tnùnì ndí Moisés, ndìhi núu cuè téé cùu fariséu, te xãhaⁿ-gã:

—¿Cuu cada tátna-o ìⁿ ñáyiu cùhú nduu ndètatú-ó ãⁿ ñáhã? —càchí-gã xãhaⁿ-gã xii-güedé.

4 Dico cue téé-áⁿ ñã túu tnàhí ní càháⁿ-güedé. Te ní dácáá-gã ndaha-gã ní tendaha-gã téé cùhú-áⁿ ní quide tátna ñaha-gã xii-dé, te ní xãhaⁿ-gã sã ná nùhú-dé vehe-dé. 5 Te ní xicáⁿ tnúhú-gã núu nchaa cue téé-áⁿ, te xãhaⁿ-gã:

—¿Te núu nchòhó ná ngáúnhnu ìⁿ búrru-ndo àdì ìⁿ ndicutu-ndo déhvã, te vá ná tàva ndìhi-ni-ndo-dì cuèi cùu-xi nduu ndetátú-ndó-áⁿ? —càchí-gã xãhaⁿ-gã xii-güedé.

6 Te ñã túu ní ñhí-güedé tnúhu na dànocháva-güedé.

Ñáyiu càháⁿ-yu quíhíⁿ vico tnãndaha

7 Te ndèhe Jesús nàcuáa xíquide nchaa ñáyiu ndècu

vico sá sũní nĩ nacáxi-yu xilé sácõo nchihi cue tée cùnuu-gá conchihí-yu òré cuánguĩhú-yu mèsá caxí-yu, núu ní xáhaⁿ-gã xií-yu:

8 —Òré ná càháⁿ ñáhá ìⁿ ñáyiu xii-ndo ìⁿ vico tnándaha, te vá cóó-ndó nũú xilé sácõo cue tée cùnuu-gá, chí núu ducaⁿ na càda-ndo, te cudana quexìo dava-gá ñáyiu cùnuu-gá dàcúúxí nchòhó. 9 Te ñáyiu ní cáháⁿ ñáhá xii-ndo-áⁿ quixí-yu te cúñahá-yu xii-ndo: “Chí cuãñaha xilé núcõo nchihi-ndo-áⁿ ná cõnchihi ñáyiu ní quexìo-a”, quesàhá-yu cúñahá-yu xii-ndo. Te cuiní-ndó ñáhá cuèi cùcahaⁿ núú-ndó ndàcuñí-ndó quihíⁿ-ndó ngõo-ndo nũú xilé xĩnutnĩ ndéé núu nĩ ndihi-ná ndàa sátá-xi. 10 Te yúhú càchí-í sá òré ná càháⁿ ñáhã-yu xii-ndo, te ngõo-ndo nũú xilé xĩnutnĩ ndéé núu nĩ ndihi-ná ndàa sátá-xi chí cuendá òré ná quèxio ñáyiu ní cáháⁿ ñáhá xii-ndo, te cúñahá-yu xii-ndo: “Nchòhó cue ñáyiu càháⁿ ndihi-í, chí yãha núu xilé sácõo cue tée cùnuu-gá coo-ndo”, duha cúñahá-yu xii-ndo. Te ducaⁿ te cada nínu ñaha nchaa ñáyiu yihí ndihi-ndo mesá. 11 Te nchaa ñáyiu na càda nínu mee-xi, te ñáyiu-áⁿ ñà túú cùu nínu-yu, te nchaa ñáyiu ñá túú quide nínu mee-xi, ñáyiu-áⁿ cúú nínu-yu —càchí-gá xáhaⁿ-gã xii-yu.

12 Te dàtnùní ní xáhaⁿ-gã xii téé ní cáháⁿ ñáhá xii-gá:

—Te yòhó òré cuiní-n

càda-n ìⁿ vico, te vá càháⁿ-n mèe-ni cue téé càháⁿ ndihi-n, ni cuè ñaní-n, ni cuè ñáyiu cùu ñaní tnáhá-n, ni cuè ñáyiu cuica ndècu yatni ndihi-n, chí ñáyiu-áⁿ ducaⁿ càdá-yu ìⁿ nduu cáháⁿ ñáhã-yu xii-n te ndéyãhu-ni sá nĩ quidè-n-yu. 13 Te ñáhá chí òré ná càda-n ìⁿ vico, te cáháⁿ-n ñáyiu ndàhú, ndihi ñáyiu ñá cúú càca, ndihi ñáyiu yacua, ndihi ñáyiu cuàá. 14 Te núu ducaⁿ na càda-n, te cuu-xi ìⁿ sá vãha xii-n, chí ñáyiu-áⁿ vã nihí-yu nacoto ñáhã-yu xii-n, dico na cùú-n te sáá nduu ndòto-n ndihi nchaa ñáyiu ní quide ndáá ní xĩndecu ichi Yá Ndiõxí, te dàvá-áⁿ taxi-gá sá ndúú tàhú-n —càchí-gá xáhaⁿ-gã xii-dé.

Nàcuáa xĩquide ñáyiu òré càháⁿ ñáhá ìⁿ téé cada vico (Mt. 22:1-10)

15 Te sá dúcáⁿ nĩ cáháⁿ Jèsús ní tecú dóho cue téé yihí mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáyiu na càxi nchaa sá cuãha ñaha Yá Ndiõxí nduu na sáa-yu cundecú-yu núú ndécú-gã táxi tnùní-gá —càchí-dé xáhaⁿ-dè xii-gá.

16 Te Jèsús ní xáhaⁿ-gã xii-dé:

—Íⁿ téé quide-dé vico, te ní dátècú tnúhu-dé cuéhé víhí ñáyiu quihíⁿ-yu caxí-yu. 17 Te òré sa ní cuu-ná sá cáxi-yu, te ní xáhaⁿ-dè xii téé xĩnu cuechi núú-dè sá quihíⁿ-dé cúñaha-dè quihíⁿ-yu caxí-yu, chí sa ndècu túha nchaa sá cáxi-yu. 18 Dico

nchaá-yu ní xáhăⁿ-yu xii-dé sá ná cádá càhnu iní téé càháⁿ ñáhá-ăⁿ, chi ñá túú cùyáchí-yu quíhíⁿ-yu vico-áⁿ. Te téé ní cáháⁿ ndihí téé xínu cuechi-áⁿ díhna ní xáhaⁿ-dê: “Íchí ñí saaⁿ-í ñí pedàsú ñuhu, te quíhíⁿ ndéhè-í tnaví, núu xíăⁿ càháⁿ ndàhú-í núú-n sá cùñaha-n xii téé càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchí-í”, càchí-dé xáhaⁿ-dê. ¹⁹ Te ingá-dé ní xáhaⁿ-dê: “Ní saaⁿ-í úhúⁿ yùndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xíăⁿ càháⁿ ndàhú-í núú-n sá cùñaha-n xii téé càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchí-í”, càchí-dé xáhaⁿ-dê. ²⁰ Te ingá tucu-dé ní xáhaⁿ-dê: “Íchí ñí tnándaha-í núu xíăⁿ vá cùyáchí-í quíhíⁿ-í”, càchí-dé xáhaⁿ-dê. ²¹ Te òré ní nasáá téé xínu cuechi-áⁿ, te ní naçani tnúhu-dé núu pàtróón-dê nchaa nàcuáa ní xáhăⁿ-yu. Te ní cudééⁿ tée cùu patróón-ăⁿ, te ní xáhaⁿ-dê xii téé xínu cuechi núú-dê-áⁿ: “Yáchí cuàháⁿ nanducu-n nchaa ñáyiú ndàhú, ndihí nchaa ñáyiú ñá cúú càca, ndihí nchaa ñáyiú yacua, ndihí nchaa ñáyiú cuàá, te ndëni ní cuu na nàñíhí-n-yu te candècá-n-yu quixi”, càchí-dé xáhaⁿ-dê. ²² Te sátá ñí nasáá téé xínu cuechi-áⁿ, te ní xáhaⁿ-dê xii pàtróón-dê: “Pàtróón, sa ní quide-í chiúⁿ ní táhú-n, dico ndècu-gá núú cóo-yu”, càchí-dé xáhaⁿ-dê. ²³ Te téé cùu patróón-dê-áⁿ ñí xáhaⁿ-dê: “Cuàháⁿ tucu ndëni ní cuu te cada yica-n na quixí-yu quíhu-yu cuendá

ná chítú vehe-í. ²⁴ Te na càchí tnúhu-í xii-n sá ñí ñáyiú ní cáháⁿ-í díhna vá cúú-gă caxí-yu sá sà ní quide túha-í caxí-yu ni cùu”, cachí téé-áⁿ xáhaⁿ-dê xii téé xínu cuechi núú-dê —càchí-gá xáhaⁿ-gă xii téé-áⁿ.

Ndoho-o cùndecu-o ichi Xítohó Jesucristú
(Mt. 10:37-38)

²⁵ Te ío cuéhé ñáyiú nchícúⁿ-yu Jèsús, te ní xáhaⁿ-gă xii-yu:

²⁶ —Te núu dava nchòhó cuíní-ndó chítnahá ñáhá-ndó xii-í, te cuu iní ñáhá ndisa-ndo. Te cuéi na dándóo-ndo tătá-ndó, ndihí náná-ndó, ndihí ñadihí-ndó, ndihí déhe-ndo, ndihí ñaní-ndó, ndihí cúha-ndo, te caní iní-ndó sá cuéi na cúú-ndó sá cuendá-í, te ducaⁿ te cuu ndisa-ndo cuè ñáyiú tnàhá tnúhu ndihí-í. ²⁷ Te nchaa ñáyiú vá cànchícúⁿ nihnu ñaha xii-í cuendá sá yuhú-yu ndohó-yu dàtná ndoho-í, ñáyiú-áⁿ vă cúú-yu ñáyiú tnahá tnúhu ndihí-í. ²⁸ Te núu ñí nchòhó ná càni iní-ndó dàcaa-ndo ñí vehe ducúⁿ, ¿te náa ñá díú díhna-gá cada cuendá-ndó núu ndédau díhúⁿ cuu, ducaⁿ te cutnúmí iní-ndó núu tnahá díhúⁿ-ndó càa vehe-áⁿ àdi ñáhá? ²⁹ Chi núu vá dúcáⁿ càda-ndo, te na ngüita-ndo tàusaha-ndo te vá xínu cada-ndo, te nchaa ñáyiú na cùndehe ñaha xii-ndo, te cáháⁿ cuéhé-yu cuendá-ndó. ³⁰ Te cachí-yu: “Tée-ăⁿ ní ngüita-dé dácàa-dé ñí vehe te ñá ní ndàcu-dé xínu”, cachí-yu. ³¹ Àdi te núu ñí téé yindaha ñaha xii

ñáyiú cuèní-dé nàá-dé ndihi ingá tucu téé yíndaha ñaha xii ñáyiú, ¿te náa ñá díú díhna-gá cada cuèndá-dé te núú ndacu-dé ndihi úxí mĩl cue sandádú-dé nàá-güedé, ndihi ócò mĩl cue sandádú ingá tucu téé yíndaha ñaha xii ñáyiú cùu úhú iní tnáhá ndihi-dé-áⁿ? ³² Àdi te núú xìto-dé sá vǎ ndácú-dé ñá, te òré vátá cùyàtni ñaha-gá téé cùu úhú iní tnáhá ndihi-dé-áⁿ, te tendaha-dě ìⁿ téé quíhíⁿ-dé quíhu-dé tnúhu ndàhú núú tée-áⁿ cuèndá sá vǎ nàá-güedé. ³³ Te duha càháⁿ-í chi núú nchòhó vá cádá ndèe iní-ndó dàña-ndo nchaa sá ndécú ndihi-ndo cuèndá chitnahá ñáhá-ndó xii-í, te vá cùu-ndó cuè ñáyiú tnáhá tnúhu ndihi-í.

Ñí nǎ nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núú na nduu víxiⁿ-xi, ¿te nása-gá cada-o nàndihi-o te núú ducaⁿ-i? ³⁵ Chi ñá túú-gǎ nàndihi-xi nì sá dàcá ñuhu, te nì sá dàcá saháⁿ, chi cuèndá-nǎ dǎngoyo-o. Te nchaa nchòhó ñáyiú ní xíndedóho tnúhu ní cáháⁿ-í-a xini ñuhu-xi ío váha cuáha-ndo cuèndá —càchí-gá xáhaⁿ-gǎ xií-yu.

15

Cuèndá ìⁿ mběé quiti ní xíta
(Mt. 18:10-14)

¹ Te cue téé cuihna ìní-xi quide cobrá ñáhá xii ñáyiú cuèndá impuèstú ndihi cue dava-gá ñáyiú ndècu ichi cuehé ichi duha ní quexió-yu

núú ndécú Jèsús cuèndá cund-edóho-yu tnúhu càháⁿ-gá. ² Te ní ngüita cue téé cùu fariséú, ndihi cue téé dàcuaha ñaha xii ñáyiú nchaa tnúhu ní chídó tnùní ndí Moisés xícáháⁿ cuèhé-güedé cuèndá-gá, te càchí-güedé:

—Tée-a quèheⁿ cuèndá-dé ñáyiú ndècu ichi cuehé ichi duha, te xèxi ndihi ñaha-dé xii-yu —càchí-güedé xitnàha-güedé.

³ Te Jèsús ní cani-gá ìⁿ cuèndú nàcuáa tecú tnùní-güedé tnúhu-gá, te xáhaⁿ-gǎ xii-güedé:

⁴ —Ìⁿ téé ndècu ìⁿ cièndú mběé-dě, te ní xíta ìⁿ-di, te nchòhó sa cùtnuní iní-ndó nàcuáa cada téé-áⁿ, chi dándóo-dé cùmídícó sǎhúⁿ cùmí-di ìⁿ yucu, te cúnúndúcú-dé quiti ní xíta xíáⁿ ndèe ndéé naníhí-dě-di.

⁵ Te òré ní naníhí-dě-di te ní dácáá-dě-di chíó-dě ní docó-dé-di sá cúdǎ ìní-dé. ⁶ Te òré ní nasáá-dé vehe-dé, te ní dátacá-dé nchaa cue téé càháⁿ ndihi-dé, ndihi nchaa ñáyiú ndècu yatni ndihi-dé, te ní xáhaⁿ-dě: “Chí ná cúdǎ ìní-ó vitna, chi ní naníhí-í mběè-í quiti ní xíta nì cùu”, cachí-dé xáhaⁿ-dě xií-yu. ⁷ Te yúhú càchí-í sá ìo-gá cúdǎ ìní Yǎ Ndióxi ndihi cue espíritú xínú cuèchi núú-gǎ núu ìⁿ ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñà túú vǎha quidé-yu ndécú-yu te tníⁿ-yu ichi-gá, dàcúúxí cùmídícó sǎhúⁿ cùmí ñáyiú sa ní tuha ichi-gá, chi ñá túú-gǎ xini ñuhu-xi ndixi cuèchi iní-yu

chi sa ndècú-yu ichi-gá —
càchí-gá xáhaⁿ-gã xii-güedé.

Cuèndá díhúⁿ nǐ xíta

8 Te ní cani Jèsús ingá
cuèndú núú-güedé, te
xáhaⁿ-gã:

—Íⁿ ñadhí ndécú ndihí-aⁿ
úxí díhúⁿ cuixíⁿ, te ní
dácuita-aⁿ ìⁿ te ní teñuhú-aⁿ
iti, te ní ngüita-aⁿ nàtihu-aⁿ
vehe, te súúni vâha vâha
ní nanducu-aⁿ ndéé ní
naníhí-aⁿ. 9 Te òré ní
naníhí-aⁿ, te ní dátacá-aⁿ
nchaa ñáyiú dihí càháⁿ
ndihí-aⁿ ndihí nchaa ñáyiú
ndècu yatni ndihí-aⁿ, te ní
xáhaⁿ-aⁿ: “Chí ná cùdíí ìní-ó
vìtna chi ní naníhí-í díhúⁿ-í
sá nǐ xíta ní cùú”, cachí-aⁿ
xáhaⁿ-aⁿ xii-yu. 10 Te yúhú
càchí-í sá dúcáⁿ ìo cùdíí ìní
nchaa espíritú xínú cuèchi
núú Yã Ndiöxí, núú ìⁿ
ñáyiú ndècu ichi cuéhé ichi
duha na ndixi cuèchi iní-yu
cuèndá nchaa sá ñà túú vâha
quidé-yu, te tñiⁿ-yu ichi-gá —
càchí-gá xáhaⁿ-gã xii-güedé.

*Cuèndá ìⁿ téé ñá túú ní quide
váha*

11 Te ní cani tucu Jèsús
ingá cuèndú núú-güedé, te
xáhaⁿ-gã:

—Íⁿ téé ndècu úú déhe
ducúⁿ-dé, 12 te téé lihli-gá
ní xáhaⁿ-dè xii tâtá-dè:
“Táu, taxi-n tãhú sã cúú
cuèndá-í”, càchí-dé xáhaⁿ-dè.
Te tâtá-dè-áⁿ nǐ sãñaha-dè
ndí díⁿ núú-güedé sã cúú
cuèndá-güedé. 13 Te núú
sàcú-ni nduu, te déhe-dé téé
lihli-gá-áⁿ nǐ nadico-dè nchaa
sá nǐ sãñaha tâtá-dè, te ní
xica-dé cuáháⁿ-dé ìⁿ ñúú xícá,
te yacáⁿ ní tñiⁿ-dé ìⁿ ichi

cuéhé ichi duha, te ní ndihí
díhúⁿ-dè ní dándóñuhu-dé
ndihí cue téé càháⁿ ndihí-dé,
ndihí nchaa ñáyiú dihí xindecu
ichi díí ìní. 14 Te ní ndihí ndoo
díhúⁿ-dè ní dándóñuhu-dé,
te núú sàcú-ni nduu ní sáa
tnamá ñúú núú ndécú-dè-áⁿ,
te ñá nihí-gá-dé sã cáxí-dé,
te xihí-dé docó. 15 Núú
ní xica-dé cuáháⁿ ndúcú
chìuⁿ-dé núú ìⁿ téé diu-ni
ñúú xíaⁿ, te téé-áⁿ nǐ sáha
chìuⁿ ñaha-dé ìⁿ xichi núú
ñúhú-dè coto-dé cùchí. 16 Te
súúni xihí-dé docó te cuini-dé
caxi-dé nchaa sã sãha-yu
cùchí-áⁿ ní cùú, dico ñá túú
ní sãñahá-yu xii-dé. 17 Te
uuⁿni ní sani váha iní-dé, te
ní cachí-dé: “Í^o cuéhé cue téé
xìnu cuechi vehe tâtá-í te ìo
cuéhé sã xéxí-güedé ndécú, te
yúhú duha ndòho-í docó iha!
18 Te ndacuñí-í te núhú-í vehe
tâtá-í, te cùñaha-í xii-dé: Táu,
ñá túú ní quide váha-í núú Yã
Ndiöxí te ni ñà túú ní quide
váha-í núú-n, 19 te ñá túú-gã
táu-í sã cùú-í déhe-n vìtna, te
cada ñaha-ñà-n xii-í dàtná ìⁿ
téé xìnu cuechi núú-n”, duha
ní sani iní-dé cùñaha-dè xii
tâtá-dè. 20 Te sáta dúcáⁿ nǐ
sani iní-dé, te ní natni-dé
ichi cuánuhú-dé vehe tâtá-dé,
te xica-gã cuánuhú-dé ní
xiní ñáhá tâtá-dè xii-dé te
ní cundáhú iní ñáhá-dè.
Te xìnu tâtá-dè-áⁿ nǐ sáháⁿ
nútnahá ñáhá-dè, te ní numi
ñaha-dè, te ìo váha ní cáháⁿ
ndihí ñaha-dè. 21 Te ní xáhaⁿ
dèhe-dé-áⁿ xii-dé: “Táu, ñá
túú ní quide váha-í núú Yã
Ndiöxí te ni ñà túú ní quide
váha-í núú-n, te ñá túú-gã
táu-í sã cùú-í déhe-n vìtna”,
cachí-dé xáhaⁿ-dè.

22 'Dico tătá-dě-án nĩ xáhaⁿ-dě xii cue tée xĩnu cuechi núú-dě: "Chĩ quẽñũhu ndĩhi-ni dóo vǎha-gá cuáha-ndo dẽhe-í-a na cuihnu-dé, ndihi ìⁿ dehé ná quĩhi díquí ndáhá-dě, ndihi chàu váha na quĩhi-dé. 23 Te quĩhĩⁿ ngueheⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na càxi-o-di. 24 Chi dẽhe-í-a ní sani iní-í sá ní xihí-dé ní cùu, te ñáhá chi ndècu vívú-dě, te ní sani tucu iní-í sá ní xíta-dé ní cùu te ní nasáá méé-dě", cǎchĩ-dé xǎhaⁿ-dě xii cue tée xĩnu cuechi núú-dě-án. Te ní ngũíta-güedé ní quide-güedé vico.

25 Te dẽhe-dé tée sǎcuéhé-gǎ cuáháⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ió yaá cúu vico. 26 Te ní cana-dé ìⁿ tée xĩnu cuechi, te ní xicáⁿ tnúhú-dě núú-dě ná cuendá ducaⁿ ió yaá. 27 Te tée xĩnu cuechi-án nĩ xáhaⁿ-dě: "Ñanĩ-n tẽe cuáháⁿ ní cùu ní nasáá-dé, te tătá-n nĩ táuchíúⁿ-dě ní xihí ìⁿ ndicutu nũma quiti caváha-gá cuendá sá nĩ nasáá váha-dé", cǎchĩ-dé xǎhaⁿ-dě.

28 'Dico ñanĩ-dé tée sǎcuéhé-ǎⁿ nĩ cudééⁿ-dě, te ní cachĩ-dé sá vǎ ndĩhu-dé vehe cundecu-dé vico-án ní cùu, dico ní quee tătá-güedé ní cáháⁿ ndáhú-dé núú-dě cuendá ndĩhu-dé. 29 Te ní xáhaⁿ-dě xii tătá-dě: "Táu, cundedóho váha saú-n tnũhu na cǎháⁿ-í-a, yúhú ió cuéhé cuiá nĩ cuu xĩnu cuechi-í núú-n, te ni ìⁿ xito ñá túú quide sáá iní-í núú-n, te ni

ìⁿ chivá lihli ñá túú tàxi-n-di caxi díí iní-í-di ndihi cue tée cǎháⁿ ndihi-í. 30 Te vitna ní nasáá dẽhe-n tée ní sáháⁿ ní dándõñũhu díhúⁿ-n ndihi nchaa ñáyiú xĩndecu ichi díí iní. Te ní sahani-n ìⁿ ndicutu numa quiti caváha-gá sá cuendá-dé", cǎchĩ-dé xǎhaⁿ-dě xii tătá-dě. 31 Te ní xáhaⁿ tătá-dě xii-dé: "Yòhó dẽhe-í ducaⁿ-ni ndècu ndihi ñaha-n xii-í, te nchaa sá ndécú ndihi-í cúu-xí cuendá-n. 32 Te vitna dacuitií tàú-xi sá cádá-ó vico, te cudíí iní-ó, chi ñanĩ-n-án nĩ quide-í cuendá sá ní xihí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě", cǎchĩ-dé xǎhaⁿ-dě xii dẽhe-dé tée sǎcuéhé-gǎ-án —duha cuáháⁿ cuendú ní cani Jèsús núú-güedě.

16

Nàcuáa ní quide ìⁿ tée tàxi tnuní ñáhá xii cue tée xĩnu cuechi

1 Te Jèsús xáhaⁿ-gǎ xii cue tée xica cuu ndihi-gá:

—Ní xĩndecu ìⁿ tée cuica, te ducaⁿ nĩ xĩndecu ìⁿ tée ní taxi tnuní ñáhá xii cue tée ní xĩnu cuechi núú-dě. Te tée-án nĩ xiní ñáhá ñáyiú dùhu-dé díhúⁿ tẽe cùu patróóⁿ-dě, te cuáháⁿ-dé dándõñũhu-dé, te ní xáhǎⁿ-yu xii tée cùu patróóⁿ-dé sá dúcáⁿ quide-dé.

2 Te tée cùu patróóⁿ-dẽ-án nĩ cana ñaha-dě xii-dé, te ní xáhaⁿ-dẽ: "¿Ná cuendá duha cǎháⁿ ñáyiú cuendá-n? Yáchĩ chi na tàxi cuendá-n nchaa chiuⁿ ní quide-n, chi vitna te vá táxí tnuní-gá-n cuè tée xĩnu cuechi núú-í",

càchí-dé xǎhaⁿ-dě. ³ Te tée tǎxi tnuní ñáhá xii cue tée xinu cuechi-áⁿ ní sani iní-dé: “¿Te nása cada-í vitna na quèhndé pàtróòⁿ-í chiùⁿ-í? Chi ñá cùndèe-gá-í cada-í chiùⁿ vée, te cùcahaⁿ núù-í cǎcáⁿ ndàhú-í. ⁴ Dico duha cada-í cuèndá queheⁿ cuèndá ñáhá ñǎyiu vehé-yu òré ná quèhndé duuⁿ-ná pàtróòⁿ-í chiùⁿ-í”, duha ní sani iní-dé. ⁵ Te sátá dúcáⁿ te ní cana-dé ìⁿ ìⁿ cue tée tàú núú pàtróòⁿ-güedé. Te tée díhna ní xícáⁿ tnúhú-dé núú-dé, te xǎhaⁿ-dě: “¿Ndèé dau tàú-n núú pàtróòⁿ-í?”, càchí-dé xǎhaⁿ-dě. ⁶ Te tée-áⁿ ní xǎhaⁿ-dě: “Tàú-í ìⁿ cièndú bàrril acití”, càchí-dé xǎhaⁿ-dě. Te tée tǎxi tnuní ñáhá xii cue tée xinu cuechi-áⁿ ní xǎhaⁿ-dě: “Iha náu reciù-n-á, te ndadúha ingá sá ùdico úxí taxi-n”, càchí-dé xǎhaⁿ-dě. ⁷ Te dàtnùní ní xícáⁿ tnúhú tùcu-dé núú ingá-dé, te xǎhaⁿ-dě: “Te yòhó, ¿ndèé dau tàú-n-í?”, càchí-dé xǎhaⁿ-dě. Te tée tàú-áⁿ ní xǎhaⁿ-dě: “Ìⁿ cièndú ngohnchi triù tàú-í”, càchí-dé xǎhaⁿ-dě. Te tée tǎxi tnuní ñáhá xii cue tée xinu cuechi-áⁿ ní xǎhaⁿ-dě: “Iha náu reciù-n-á, te cadúha ingá sá cùmídícó-nǎ taxi-n”, càchí-dé xǎhaⁿ-dě. ⁸ Te tée cùu patróòⁿ-áⁿ ní cachí-dé sá ío váha ñùhu díquí tée dùhu-áⁿ nàcuáa cada-dé cundecu váha-dé. Te nchaa ñáyiu xĩndecu ichi cuèhé ichi duha, ío-gá váha ñùhu díquí-yu nàcuáa cadá-yu cundecu váha-yu ndihí nchaa ñáyiu cùndihí-yu dàcúxí ñáyiu ndècu ichi Yá Ndiòxí.

⁹ Te yúhú càchí-í sá cadá-ndó sǎ váha ndihí

nchaa sá ndécú ndihí-ndo ní cuáha ñuyíú yícá cuèchi-a, te ducaⁿ te coo cue tée ío váha tnahá tnúhu ndihí-ndo, te òré ná ndihí nchaa sá ío ñuyíú-a, te Yá Ndiòxí queheⁿ cuèndá ñáhá-gǎ xii-ndo, te cundecu-ndo ndihí-gá ní caa ní quíhíⁿ.

¹⁰ Te núu ìⁿ tée quide ndáá cuèi ìⁿ chiùⁿ líhli na càda-dé, te diu-ni ducaⁿ quide ndáá-dé cuèi ìⁿ chiùⁿ cahnu na cada-dé. Dico tée ñá túú quide ndáá, chi cuèi chiùⁿ líhli àdi chiuⁿ cahnu na cada-dé dico ìⁿ-ni quide-dé. ¹¹ Te núu nchòhó vá cadá-ndó sǎ váha ndihí nchaa sá ní cuáha ñuyíú yícá cuèchi-a ña, te Yá Ndiòxí vá táxí-gǎ sá váha ndècu ndihí-gá xii-ndo. ¹² Te núu vá cadá ndáá-ndó còto-ndo nchaa sá táxí nùu tnahá ñáyiu-ndo, te vá yòo taxi sá ndúú tàhú-ndó.

¹³ Te ní ìⁿ tée xinu cuechi vá ndácú-dé cunu cuechi-dé núú úú pàtróòⁿ, chi tée-áⁿ cuu váha iní-dé núú ìⁿ pàtróòⁿ-dè te tñii-dé nchaa tnúhu càháⁿ pàtróòⁿ tée cùu váha iní-dé núú-xi-áⁿ. Te núú ingá tucu pàtróòⁿ-dè vá cúú váha iní-dé, te ní vǎ tñii-dé tnúhu càháⁿ pàtróòⁿ-dè-áⁿ. Te ducaⁿ sǎtnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhuⁿ iní-ndó nchaa sá ío ñuyíú-a —càchí-gá xǎhaⁿ-gǎ xii-güedé.

¹⁴ Te nchaa cue tée cùu fariséú ío ñùhu iní-güedé nchaa sá ío ñuyíú-a, te xĩndedóho-güedé nchaa tnúhu càháⁿ Jèsús, te ní càháⁿ yíchí-güedé cuèndá-gá. ¹⁵ Te Jèsús ní xǎhaⁿ-gǎ xii-güedé:

—Nchòhó cúú-ndó cue tée ío vâha càháⁿ núú ñáyiú cuèndá-ni sá cuíní-ndó cãháⁿ vâha-yu cuèndá-ndó, dico Yá Ndiõxí xíní ndáá-gá nâcuáa càa iní-ndó ñⁿ ñⁿ-ndo, te nchaa sá càchí cue ñáyiú ñuyíú-a sá ío nândíhi, Yá Ndiõxí dáquèe tíhú-gã.

Cuèndá nchaa tnúhu ní chídó tnùní ndíi Moisés

¹⁶ Te nchaa tnúhu ní chídó tnùní ndíi Moisés cúnùu-xi ní cuu, ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndiõxí ndéé sanaha. Dico cútnàhá ní ngúita té Juáá tée ní xóo dacuàndute ñaha xii ñáyiú ní cáháⁿ-dé tnúhu-í, ndéé dàvâ-áⁿ ñà túú-gã ní cùnuu nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndiõxí ndéé sanaha. Te diu-ni ndéé dàvâ-áⁿ ñi quesaha ta təcú tnùní ñáyiú nâcuáa ndíhu ndaha ñàha Yá Ndiõxí xií-yu, te vai ñáyiú ío sàni iní-yu vitna nâcuáa cada-yu ndíhu ndaha ñàha Yá Ndiõxí xií-yu. ¹⁷ Te nchaa tnúhu ní chídó tnùní ndíi Moisés ío ndáá càháⁿ-xi, te ndíhi-gá naa andiú ndíhi ñuyíú dàcúxí sã ndíhí ñⁿ ñⁿ tnúhu-áⁿ cada-xi nâcuáa càháⁿ-xi.

Jesús càháⁿ-gá cuèndá ñáyiú dàña tnaha

(Mt. 19:1-12; Mr. 10:1-12)

¹⁸ Te núu ñⁿ tée na dàña tnaha-dé, ndíhi ñadíhí-dé, te tnândaha tucu-dé ndíhi ingá-yu, te nehé víhí quide-dé te núu ducaⁿ na càda-dé, te tée na tnândaha ndíhi ñaha ní dàhá yíi-xi, te diu-ni ducaⁿ

ñà túú cùu-xi sá vâha te núu ducaⁿ na càdá-yu —càchí-gá xáhaⁿ-gã xii-güedé.

Cuèndá ñⁿ tée nàni Lázaru ndíhi cuèndá ñⁿ tée cuica

¹⁹ Te xáhaⁿ tucu-gá xii-güedé:

—Ní xíndecu ñⁿ tée cuica, te ní xóo cuihnu-dé mee-ni dõó vâha dóó vii càa, te nchaa nduu súuní vâha ní xóo cada-dé vico vehe-dé. ²⁰ Te ní xíndecu tucu ñⁿ tée ndàhú ní xínani-dé Lázaru, te tée-áⁿ ñi cuhú-dé ní xíndéé-dé nítùhú-dé ndíhyi, te ñⁿ nduu ñⁿ nduu ní xóo taxinucóo ñaha-güedé xii-dé yuyèhe tée cuica-áⁿ. ²¹ Te tée ndàhú-áⁿ ñi xóo cuú-dé docó, te ní xóo cuíní-dé caxi-dé nchaa sá ñà túú-gã ní xóo yâha caxi tée cuica-áⁿ, te ñà túú ní xóo níhí-dé. Te cuèi iná ní xóo quíhíⁿ-di ní xóo nayuu-di nchaa núú ndíhyi ndéé-dé-áⁿ. ²² Te ní sáá ñⁿ nduu te ní xíhí tée ndàhú-áⁿ, te cue espíritu xínú cuèchi núú Yá Ndiõxí ndécá ñàha-xi xii-dé cuándaa núú ndécú tẽ Abrahám cundecu-dé. Te ní sáá nduu ñi xíhí tée cuica-áⁿ tnàhá-dé, te ní chindúxi ñaha-güedé xii-dé. ²³ Te ní sáá-dé núú xíndecu nchaa ñáyiú ní xíhí ñà túú ní quide ndáá núú Yá Ndiõxí te xíáⁿ ío ndòho-dé ndécú-dé, te ní ndonehe núú-dé te xica ñi xíní-dé tẽ Abrahám ndíhi tẽ Lázaru-áⁿ xíndecu-güedé. ²⁴ Te níhi ní cáháⁿ-dé, te xáhaⁿ-dẽ: “Yòhó tãtá Abrahám, cundàhú iní ñàhá xii-í, te cuñaha xii tẽ Lázaru ná dândaxiⁿ-dé díquí ndàhá-dé, te na quixi-dé dândaxiⁿ-dé yàa-í, chi ío ndòho-í ñùhù-í núú ñùhú núú càyú-a”, càchí-dé xáhaⁿ-dẽ

xii té Àbrahám. ²⁵ Dico té Àbrahám ní xáhaⁿ-dê: “Ndàhú yòhó ñaní tnáhà-í, dandàcu iní sá ïo váha ní xíndecu-n ñùyíú, te té Lázaráú ïo ndàhú ní ndoho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna.

²⁶ Te ñá díú-ní sá xǎⁿ tucu, chi cuádava ndècu ìⁿ déhvá cùnú ñúhú nèhu-xi núú ndécú-ó, te cuèi nchaa ñáyiú xíndecu iha na càchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, càchí-dé xǎhaⁿ-dê. ²⁷ Te ní xáhaⁿ tée cuica-ǎⁿ: “Te núú ducaⁿ te càháⁿ ndàhú-í núú yòhó tǎtá

Àbrahám vitna sá téndàha-n té Lázaráú ná quihíⁿ-dé vehe tǎtá-í, ²⁸ chi ndècu úhúⁿ-gá ñaní-í, te na cǔñaha-dê xii-güedé sá vǎ cádá-güedé dàtná ní quide-í cuendá sá vǎ quixí-güedé tnáhá-güedé núú ndécú-í ndóhò-í-a”, càchí-dé xǎhaⁿ-dê. ²⁹ Te té Àbrahám ní xáhaⁿ-dê: “Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue tée ní xóo cáháⁿ tnúhu Yá Ndióxi ndéé sanaha, te nchaa tnúhu-án ná tníi-güedé nàcuáa càháⁿ-xi”, càchí-dé xǎhaⁿ-dê xii-dé. ³⁰ Te ní xáhaⁿ tucu tée cuica-ǎⁿ: “Tǎtá Àbrahám, dico vá cádá cuendá-güedé nchaa tnúhu-án, dico núú ìⁿ ñáyiú ñá túú-gǎ ndécú ñùyíú ìⁿ ñáyiú ndècu ndíhi-n quihíⁿ-yu cáháⁿ ndíhi ñáhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide

váha-güedé ndécú-güedé, te cada váha-güedé”, càchí-dé xǎhaⁿ-dê xii-dé. ³¹ Dico té Àbrahám ní xáhaⁿ-dê: “Te núú ñá túú cuíni-güedé tníi-güedé tnúhu ní cáháⁿ ndíi Moisés, ndíhi tnúhu ní cáháⁿ cue tée ní xóo cáháⁿ tnúhu Yá Ndióxi ndéé sanaha ña, te díu-ni ducaⁿ càda-güedé cuèi ìⁿ ñáyiú ní xihí ná ndòtó-yu cǔñáhá-yu nàcuáa ndùu tnúhu váha, chi vá quíndáá iní-güedé”, càchí té Àbrahám xǎhaⁿ-dê xii tée cuica-ǎⁿ — càchí Jèsús xáhaⁿ-gǎ xii cue tée cùu fariséú.

17

Quihi iní-ó vǎ cùndècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gǎ xii cue tée xica cuu ndíhi-gá:

—Dacuití sá cóo cuè tée dacàháⁿ-güedé ñáyiú cadá-yu nándi sá cuèhé sá dúhá, ïdico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá! ² Chi váha-gá sá núu na dàcutu ndeé ñáyiú ìⁿ yúú yódó dúcúⁿ-güedé te dàquéé ñáhá-yu xii-güedé xití ndute làmár, te ñá díú sá cùndècu-güedé dacàháⁿ-güedé ñáyiú cadá-yu nándi sá cuèhé sá dúhá, cuèi ñáyiú ndàhú iní-xi dandàhú-güedé. ³ Te ïo quihí iní-ndó cùndecu-ndo.

⁴ Te núú ìⁿ ñaní tnáhá-ndó quide-dé ìⁿ sá ñà túú táú-dé cada-dé sá cúú-xi-ndó te cáháⁿ-ndó dòho-dé, te núú ní ndixi cuéchi iní-dé sá ñà túú ní quide váha-dé,

te cada càhnu iní-ndó sǎ ní quide-dé. ⁴ Te cuèi úsá xito na càda-dé nándi sǎ ñá túú tàú-dé cada-dé sǎ cúu-xi-ndó ìⁿ nduu, te núu na quixi-dé úsá xito núu-ndó, te cachí-dé sǎ vǎ dúcáⁿ-gǎ cada-dé, te xini ñuhu-xi cada cahnu iní-ndó-dé —càchí-gǎ xáhaⁿ-gǎ xii-güedé.

Ñáyiú sàndáá ndisa iní-xi

⁵ Te ní xáhaⁿ cuè téé xica cuu ndihi Jesús xii-gǎ:

—Chindee ñàha xii-ndí cuèndá ducaⁿ te quíndáá-gǎ iní-ndí sǎ Yǎ Ndióxi ndácú-gǎ quidé-gǎ nchaa sǎ vǎha —càchí-güedé xáhaⁿ-güedé xii-gǎ.

⁶ Te ní xáhaⁿ Jèsús:

—Te núu nchòhó quíndáá ndisa iní-ndó sǔúni cuèdicó luha lij dàtná cuìni-ndó càa ìⁿ ndíquiⁿ yutnu nàni mostázá, te ducaⁿ te cuu cúñaha-ndo xii ìⁿ yutnu: “Quene-n ìha te quíhíⁿ-n cuìhnu-n xiti làmár”, duha cúñaha-ndo. Te ducaⁿ càda-xi te núu na quíndáá ndisa iní ñáhá-ndó xii-í —càchí-gǎ xáhaⁿ-gǎ xii-güedé.

Nàcuáa tàú ìⁿ téé xinu cuechi cada-dé

⁷ Te xáhaⁿ tùcu-gǎ xii-güedé:

—Te núu ìⁿ nchòhó ndécú ìⁿ téé xinu cuechi núu-ndó, te cuáháⁿ-dé yucu cuángada chiùⁿ-dé, àdi cuáháⁿ-dé yucu coto-dé quiti, te òré ní nasáá-dé vehe sǎ ní sáháⁿ-dé yucu, te vǎ cúñaha nchòhó cue téé cùu patróoⁿ-dè xii-dé: “Yáchí nehé caxi-n dítá”, vǎ dúhá cúñaha-ndo.

⁸ Chi nchòhó cue téé cùu patróoⁿ-dè cúñaha-ndo xii-dé:

“Cundihí iní cada túha sǎ cùdini-í, te díhna-gǎ-í caxi-í dítá te dàtnùni caxi-n”, duha cúñaha nchòhó cue téé cùu patróoⁿ xii-dé. ⁹ Te òré ná ndíhí chiùⁿ ní táhú nchòhó cue téé cùu patróoⁿ cada téé xinu cuechi núu-ndó, te ñá túú tàú-ndó ndácáⁿ táhú-ndó núú téé xinu cuechi núu-ndó. ¹⁰ Te duha càháⁿ-í chi núu òré ná ndíhí nchaa chiuⁿ ní táhú Yǎ Ndióxi cada-ndo, te cachí-ndó: “Nchúhú cúu-ndí cue téé xinu cuechi núú Yǎ Ndióxi, dico ñá túú tàú-gǎ ndacáⁿ táhú-gǎ núu-ndí, chi mee-ni chiuⁿ ní táhú-gǎ ní quide-ndí”, duha cachí-ndó —càchí-gǎ xáhaⁿ-gǎ xii-güedé.

Jèsús quidé tǎtna-gǎ úxi cue téé tnàhá cuéhé sǎ dátèhyú nihnu-xi yiqui cùñú ñáyiú

¹¹ Te ñuhu Jesús ichi cuáháⁿ-gǎ ñuu Jerusalem, te ní yáha-gǎ núu ràyá distritú Sámariá ndihi distritú Galileá. ¹² Te ta cùyatni-gǎ ìⁿ ñuu lihli cuáháⁿ, te ní sátnahá ñáhá úxi tnàhá cue téé cùhú xii-gǎ, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tní-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xáhaⁿ-güedé xii-gǎ.

¹⁴ Te òré ní xini ñáhá Jèsús xii-güedé, te ní xáhaⁿ-gǎ:

—Chí cuáháⁿ núu dùtú ná cundehe ñaha-dé xii-ndo —càchí-gǎ xáhaⁿ-gǎ xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé

cuéhé tnàhá-güedé. ¹⁵ Te nchaa-güedé ní cutnùní iní-güedé sá ñí ndúha-güedé, dico ñⁿ-ni-dé ní nacuico-dě, te ní ngüíta-dé níhi ní cáháⁿ-dé, te ní cachí-dé sá ño càhnu cuu Yá Ndiöxí. ¹⁶ Te ní ngüíñí xítí-dě núú Jèsús, te ní nuu núú-dě ndàa núú ñúhú ndàcáⁿ táhú-dě núú-gã. Te téé-áⁿ cúú-dě téé distritú Sãmariá. ¹⁷ Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèé ndécú dàva-gá-güedé-i? ¹⁸ ¿Te náa ñⁿdii-ni téé ingá ñuú-a ní nacuico-dě ndàcáⁿ táhú-dě núú Yá Ndiöxí, te càchí-dé sá ño càhnu cuu-gá ñã? — càchí-gá.

¹⁹ Te ní xáhaⁿ-gã xii téé-áⁿ:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-ñ Yá Ndiöxí —càchí-gá xáhaⁿ-gã xii-dé.

Nàcuáa yindaha ñaha Yá Ndiöxí
(Mt. 24:23-28, 36-41)

²⁰ Te cue téé cùu fariséú ní xícáⁿ tnúhú-güedé núú Jèsús nùu ná ama ngüíta Yá Ndiöxí ndíhu ndaha-gã ñáyiu. Te ní xáhaⁿ-gã:

—Ñá túú ñã cada-xi ñuyíú quini-ndó cuendá cutnùní iní-ndó sã ndíhu ndaha ñaha Yá Ndiöxí xii-ndo. ²¹ Te ñí vã yoo cachí: “Iha ndècu-gá táxí tnùní-gá, àdi yacáⁿ ndécú-gã táxí tnùní-gã”, chi tnuú-ndó sà ndecu-gá ndíhi nchaa ñáyiu yindaha-gá —càchí-gá xáhaⁿ-gã xii-güedé.

²² Te ní xáhaⁿ-gã xii cue téé xica cuu ndíhi-gá:

—Te nchòhó chi sáá nduu, te cachí iní-ndó sã sùúni cuèdicó ñⁿ nduu quini ñáhá-ndó xii yúhú Téé cùu ñaní tnàhá-ndó nchaa-ndo, dico vá quini ñáhá-gã-ndó xii-í. ²³ Te coo ñáyiu cúñahá-yu xii-ndo: “Iha ndècu-gá, áⁿ yacáⁿ ndécú-gã”, quesàhá-yu cúñahá-yu xii-ndo. Dico vá quindáá iní-ndó quíhíⁿ-ndó ndíhi-yu núú càchí-yu, te ñí vã cáni iní-ndó quíhíⁿ méé-ndó. ²⁴ Chi dàtná cuini-ndó quide-xi oré sáá nduté àndiu, chi uuⁿni dàyehé-xi ñíhi ñuyíú, ducaⁿ càda-xi nduu na quixi tucu yúhú Téé cùu ñaní tnàhá-ndó nchaa-ndo, te dàv-áⁿ quini ñáhá nchaa-ndi túhú ñáyiu xii-í. ²⁵ Dico díhna-gá ndoho vihi-í, te daquèe tihú ñáhá ñáyiu ñuyíú-a xii-í. ²⁶ Te cadá-yu dàtná ní quide ñáyiu ní xindecu cútnahá ní xindecu té Nöé, te ñu-ni ducaⁿ sãtnahá-xi cada nchaa ñáyiu ndècu vitna ndéé sáá nduu quixi tucu yúhú Téé cùu ñaní tnàhá-ndó nchaa-ndo. ²⁷ Chi caxi-ní-yu, coho-ní-yu, te caca cuu-ni cue téé xica ndáhú, te tnandaha-ní-yu, chi ducaⁿ ñí quidé-yu dàv-áⁿ ndéé ní sáá nduu cuãnguee té Nöé xítí bàrcú, te ní ngüíta-xi ní cuuⁿ dáú ñí ndaa ndute ñuyíú, te nchaá-yu ní xíhí ní cáhá-yu dàv-áⁿ. ²⁸ Te ñu-ni ducaⁿ ñí quide tucu ñáyiu cútnahá ní xindecu té Löt, chi xèxí-yu xíhí-yu, te sááⁿ-yu te nàdicó-yu, te xixitú-yu nándi sá xixitú-yu, te nchaa cue téé xidácáá-güedé vehe.

29 Te òré ní quee té Lõt ñúú Sòdomá, te ní ngoyo ñuhú andiú, te dàcá yúú sũúní dícó ní nduu ñuhú-ñă-xi, te ní xíhí nchaandi túhú ñáyíu ñúú-áⁿ. 30 Te ñíu-ni ducaⁿ sãtnahá-xi cada ñáyíu na sã nduu quixi tucu yúhú Tée cùu ñani tnáhá-ndó nchàa-ndo ñuyíú-a.

31 Te núu ñⁿ ñáyíu càndodó-yu díquí véhě-yu nduu-ãⁿ, te nì vá ndíhu-gá-yu quehéⁿ-yu ñⁿ ndachiúⁿ-yu canehé-yu quíhíⁿ, te ñáyíu cuáháⁿ yucu, te nì vá nùhú-gá-yu vehé-yu. 32 Te chí dándàcu iní nàcuáa ní yáha ñadihí té Lõt. 33 Te nchaa ñáyíu cuiní dàcácu nihnu mee-xi ñuyíú-a ña, te cuíta nihnú-yu, te nchaa ñáyíu na cùú sá cuendá-í, te naníhí tãhú-yu.

34 Te na càchí tnúhu tucu-í xii-ndo sã ndúu-áⁿ, te núu úú-yu càa ñⁿ núú xito, te ñⁿ-yu ndanchitá-yu ndaá-yu andiú, te ñⁿ-yu quendóo. 35 Te núu úú ñáyíu ñíhí nchícõ-yu ñⁿ-ni vèhe, te ñⁿ-yu ndanchitá-yu ndaá-yu andiú, te ñⁿ-yu quendóo. 36 Te núu úú cue tée yíhi-güedé yucu, te ñⁿ-dé ndànchita-dé ndaa-dé andiú, te ñⁿ-dé quendóo —càchí-gá xáhaⁿ-gã xii-güedé.

37 Te sá dúcáⁿ ñí cáháⁿ-gá ñúú ní xicáⁿ tnúhú-güedé núú-gã, te xáhaⁿ-güedé xii-gá:

—Mèstrú, ¿te ndèé ducaⁿ càda-xi-i? —cachí-güedé xáhaⁿ-güedé xii-gá.

Te ní xáhaⁿ-gã:

—Te nchòhó xini-ndó sã ncháá ñúú yúcu yiqui cuñú ní xíhí, te yacáⁿ tàcá cue ndixíí xéxí-güedi —cachí-gá xáhaⁿ-gã xii-güedé.

18

Jesús càháⁿ-gá cuendá ñⁿ juéxí ndíhi cuendá ñⁿ ñaha quèé

1 Te Jesús ní caní-gá ñⁿ cuendú núú-güedé cuendá sá vã ná túhú iní-güedé cáháⁿ ndíhi-güedé Yã Ndiõxí nchaa-ni òré. 2 Te xáhaⁿ-gã:

—Ñⁿ ñúú ndécú ñⁿ juéxí, te nì ñà túú sãndáá iní-dé Yã Ndiõxí, te nì ñⁿ tnúhu xáhaⁿ ñáyíu ñà túú cuiní-dé cada cuendá-dé. 3 Te ñíu-ni ñúú-áⁿ ndécú tucu ñⁿ ñadihí ñaha quèé, te ní sáháⁿ-aⁿ cáháⁿ ndàhú-aⁿ núú juéxí-áⁿ cuendá cada ndáá-dé ñⁿ cuéchi. 4 Te titní xito ní cuu sáháⁿ-aⁿ cáháⁿ ndàhú-aⁿ núú-dé te ñà túú cuiní-dé cada cuendá-dé tnúhu cáháⁿ-aⁿ ni cùu, te ndéé núú ñà cùú-gã te ní sani iní-dé: “Te cuéi ñà túú sãndáá iní-í Yã Ndiõxí, te nì ñà túú quide cuendá-í nchaa tnúhu cáháⁿ ñáyíu cada-í, 5 dico na càda ndáá-í cuendá ñaha quèé-a ndíhi ñáyíu cùu úhú iní tnáhá ndíhi-aⁿ, chi vá cündèe-gá iní-í nuu núu quixi-aⁿ dasátú iní ñáhá xii-í”, duha ní sani iní tée cùu juéxí-áⁿ —càchí-gá xáhaⁿ-gã xii-güedé.

6 Te ní xáhaⁿ tucu-gá xii-güedé:

—Cada cuendá-ndó nàcuáa ní sani iní juéxí tée cuihna iní-xi-áⁿ. 7 Te Yã Ndiõxí ío chindee-gá nchaa ñáyíu ní cáháⁿ-gá cundecu ndíhi-gá,

chi cuěi nduu cuěi niú cãháⁿ ndihî ñáhã-yu xii-gã, te vã cùyãã-gã nachinaa-gã nchaa sã quidé ñãha nchaa ñãyiu cùu úhú iní ñáhã xii-yu. ⁸ Te ío ndihî ducaⁿ càda-gã. Te òré ná quixi yúhú Tée cùu ñanî tnáhã-ndó nchãã-ndo, ^{¿te} náa naníhî-gã-í ñãyiu sãndãá ndisa iní Yã Ndiõxí-ãⁿ? — cãchi-gã xãhãⁿ-gã xii-güedé.

Nãcuãa quide ìⁿ tée cùu fariséú ndihî ìⁿ tée cùu cobradór

⁹ Te Jèsús ní cãháⁿ-gã núú ñãyiu nãcuãa quide ñãyiu sãni iní sã ío quide ndãá te dàquee tíhũ-yu tnãha ñãyíu-yu, te xãhãⁿ-gã xii-yu:

10 — Úú cue tée cuáhãⁿ-güedé veñúhu cãhnu sã ío cùnuu cãháⁿ ndihî-güedé Yã Ndiõxí, te ìⁿ-dé cúú-dě tée cùu fariséú, te ingã-dé cúú-dě tée cuihna ìni-xi quide cobrá ñáhã xii ñãyiu cuendã impuèstú. ¹¹ Te tée cùu fariséú-ãⁿ nútnî-dé cãháⁿ ndihî-dé Yã Ndiõxí, te xãhãⁿ-dë xii-gã: “Yòhó Dútú Ndiõxí ndãcãⁿ táhù-í núú-n, chi ñã túú quide-í dàtnã quidé dàva-gã-güedé, chi dùhu-güedé, cãháⁿ ndihî-güedé ñadihî te ñã díú ñadihî-güedé cúú-yu, te nãndi-gã nchaa sã cuèhé sã dúhá quide-güedé, te ni ñã túú quide-í dàtnã quidé tée cuihna ìni-xi quide cobrá ñáhã xii ñãyiu cuendã impuèstú ndécú ìha. ¹² Chi yúhú ñã túú tnãhî ná xéxì-í úú nduu xití samànã cuendã sã cãháⁿ ndihî ñãhã-í xii-n, te nchaa sã nihî-í te cãhu-í úxí xichi, te ìⁿ xichi

tãxi-í xii-n”, cãchí-dé xãhãⁿ-dë xii Yã Ndiõxí. ¹³ Dico tée cuihna ìni-xi quide cobrá ñáhã xii ñãyiu cuendã impuèstú-ãⁿ chi xica lùha nutnî-dé, te ni lùha ñã túú cùyî-dé ndonehe núú-dë andiú cuendã sã ndíxí cuèchi ìni-dé nchaa sã ñã túú vãha quide-dé, te ndedí ndaha-dé pèchú-dé sã ndihú ìni-dé, te xãhãⁿ-dë xii Yã Ndiõxí: “Yòhó Dútú Ndiõxí cundãhú ìni ñáhã xii-í, chi ío cuèhé sã ñã túú vãha quide-í núú-n!”, cãchí-dé xãhãⁿ-dë xii Yã Ndiõxí. ¹⁴ Te na cãchí tnúhu-í xii-ndo sã tée cuihna ìni-xi quide cobrá ñáhã xii ñãyiu-ãⁿ nî tedóho Yã Ndiõxí nchaa tnúhu ní cãháⁿ-dé, te ní quide cãhnu ìni-gã nchaa sã ñã túú vãha ní quide-dé, te cuánuhú-dé vehe-dé. Te tée cùu fariséú-ãⁿ ñã túú ní tedóho ñãha Yã Ndiõxí xii-dé. Chi nchaa ñãyiu na càda cãhnu mee-xi ñuyíu-a te vã cúú-yu ñãyiu cùnuu, te nchaa ñãyiu ñã túú quide cãhnu mee-xi, ñãyiu-ãⁿ cunúu-yu — cãchí Jèsús xãhãⁿ-gã xii-yu.

Jèsús quidé ÿ-gã landú
(Mt. 19:13-15; Mr. 10:13-16)

¹⁵ Te ìⁿ úú ñãyiu ndècã-yu landú lìhli cuáhãⁿ núú Jèsús chi cuìní-yu sã téndãha ñãhã-gã xii-güexi, te òré ní xiní cue tée xica cuu ndihî-gã sã ndécã-yu landú-ãⁿ cuáhãⁿ núú-gã, te ní ngúita-güedé ténãã ñáhã-güedé xii-yu, te xãhãⁿ-güedé sã vã dúcãⁿ càdã-yu. ¹⁶ Dico Jèsús ní cana ñãhã-gã xii-güedé, te ní xãhãⁿ-gã:

—Chí dáńá ná quìxi nahi landú lìhli-áⁿ nù-í-a, te vá càdí-ndó ìchi-güexi, chi dàtná cúú vâha iní cue landú lìhli-áⁿ ducaⁿ cùu vâha iní cue ñáyiú yìndaha ñaha Yá Ndiöxí. 17 Te na cächí tnúhu ndáá-í xii-ndo sã nùu vá quíndáá iní ñáhá-ndó dàtná quidé dàva landú lìhli sàndáá iní ñáhá xii-í, te vá ndíhu ndaha ñaha Yá Ndiöxí xii-ndo, te vá ndúú tãhú-ndó cùndecu-ndo ndíhi-gá ni caa ni quíhíⁿ — cächí-gá xáhaⁿ-gã xii-güedé.

Íiⁿ téé cuica càháⁿ ndíhi-dé Jèsús

(Mt. 19:16-30; Mr. 10:17-31)

18 Te íiⁿ téé cùnuu ní xicáⁿ tnúhú-dé núú Jèsús, te xáhaⁿ-dẽ xii-gá:

—Yòhó Mèstrú, cùu-n téé ío vâha iní-xi, te cùiní-í nùu vá cùndèe iní-n cächí tnúhu-n ná cúú sã vâha cada-í cuendá nduu tãhú-í cundecu-í ndíhi Yá Ndiöxí ni caa ni quíhíⁿ — cächí-dé xáhaⁿ-dẽ xii-gá.

19 Te Jèsús ní xáhaⁿ-gã xii-dé:

—¿Te cùtnuní iní-n nàcuáa ndùu tnúhu càháⁿ-n sã yúhú vâha iní-ãⁿ? Chí íiⁿ dúi ní Yá Ndiöxí vâha iní-gá. 20 Te yòhó xini-n nàcuáa ní cachí Yá Ndiöxí cada ñáyiú, te duha ní cachí-gá: “Nchòhó cue téé vá càháⁿ ndíhi-ndo ñàdihí te núu ñá díú ñàdihí-ndó cúú-yu, te ducaⁿ-ni nchòhó cue ñáyiú dìhí tucu vá càháⁿ ndíhi-ndo tẽe te núu ñá díú yì-ndo cuu-güedé, te vá cáhni-ndó tñaha ñáyiú-ndo, te ni vá dúhú-ndó sã ndécú ndíhi-yu, te ni vá dácacu-ndo

cuéchi neñúú sá cúú-xí tñaha ñáyiú-ndo, te canehe-ndo sã yíñùhu núú tãtá-ndó ndíhi núú ñáná-ndó”, duha ní cachí Yá Ndiöxí cada ñáyiú —cächí Jèsús xáhaⁿ-gã xii-dé.

21 Te téé-áⁿ ñí xáhaⁿ-dẽ xii-gá:

—Nchaa xíãⁿ ní ngüíta-í quidé-í ndéé cùtnáhá cúú landú-í —cächí-dé xáhaⁿ-dẽ xii-gá.

22 Te Jèsús ní xáhaⁿ-gã xii-dé:

—Dico cùmání ìngá núú sã cadá-n, vitna te quíhíⁿ-n te dico-n nchaa sá ndécú ndíhi-n, te díhú-n cuãha tãhú-n cué ñáyiú ndàhú, te ducaⁿ te nduu tãhú-n cùndecu vâha-n núú ndécú Yá Ndiöxí táxi tñuní-gá, te na yãha ducaⁿ càda-n te quixi-n chitnahá ñáhá-n xii-í —cächí-gá xáhaⁿ-gã xii-dé.

23 Te sá dúcáⁿ ñí xáhaⁿ Jèsús xii-dé, te ío ní cundiýí-dé, chí ío cuica-dẽ. 24 Te sá ñí xini ñáhá Jèsús xii-dé cundiýí-dé, núu ní cachí-gá:

—¡Ío úhú quíndáá iní ñáyiú cuica Yá Ndiöxí cuendá ndíhu ndaha ñaha-gã xii-yu! 25 Te yáchí-gá yãha íiⁿ caméyu yaú íiⁿ yiqui ticú dácúxí sã quíndáá iní íiⁿ ñáyiú cuica Yá Ndiöxí cuendá ndíhu ndaha ñaha-gã xii-yu —duha ní cachí-gá.

26 Te nchaa ñáyiú ní tecú dóho-xi tnúhu ní cáháⁿ-gã ní xáháⁿ-yu xii-gá:

—¿Te yoo naníhí tãhú te núu ducaⁿ vãíⁿ? —cächí-yu xáháⁿ-yu xii-gá.

27 Te Jèsús ní xáhaⁿ-gǎ xií-yu:

—Cue ñáyiú ñuyíú-a chi vá ndácũ-yu ná cadá-yu nàcuáa ndíhu ndaha ñàha Yá Ndióxí xií-yu, dico mee-gǎ chi ndacu-gá ndíhu ndaha ñàha-gá xií-yu chi nchaa sá vǎha ndàcu-gá quidé-gǎ — càchí-gá xáhaⁿ-gǎ xií-yu.

28 Te té Pèlú ní xáhaⁿ-dě xii-gá:

—Nchúhú ní dándõo-ndí nchaa sá ndécú ndíhi-ndí, te ní tuha ñaha-ndí xii-n — càchí-dé xáhaⁿ-dě xii-gá.

29 Te ní xáhaⁿ-gǎ xii ñáyiú:

—Na càchí tnúhu ndáá-í xii-ndo sǎ ncháá ñáyiú na dándõo vehe-xi, àdi tátá-xi, nǎná-xi, ñaní-xi, cúha-xi, ñadìhí-xi, déhe-xi cuendá sá cuíní-yu ndíhu ndaha ñàha Yá Ndióxí xií-yu, ³⁰ te ío-gá cuéhé sǎ cuañaha-gǎ xií-yu cundecu ndíhí-yu, te ñá díú-ní xǎn, chi tnàhá nduu táhũ-yu cundecu ndíhi ñàhá-yu xii-í ni caa ni quíhíⁿ ná sáá nduu — càchí-gá xáhaⁿ-gǎ xií-yu.

Jèsús càháⁿ tucu-gá sá cáhni ñàha-güedé xii-gá

(Mt. 20:17-19; Mr. 10:32-34)

31 Te Jèsús ní taudìⁿ-gá ndi ùxúú cue téé xica cuu ndíhi-gá tnuú ñáyiú, te ní xáhaⁿ-gǎ xii-güedé:

—Vitna te quíhíⁿ-ó ñùú Jerusalén, chi yàcáⁿ cada-xi nchaa nàcuáa sa ní chídó tnùní cue téé ní xóo càháⁿ tnúhu Yá Ndióxí ndéé sanaha nàcuáa yáha yúhú Téé cùu ñaní tnàhá-ndó nchàa-ndo. ³² Chi

cuáha cuendá ñàhá-güedé xii-í núú cuè téé ñá túú cùu cue téé isràél, te cudíquí ndeé ñàhá-güedé xii-í, te cúcuéhé ñàhá-güedé, te tiú díí ñàhá-güedé xii-í. ³³ Te caniha-güedé ndíhi ñí, te dàtnùní cahni ñaha-güedé xii-í, dico nduu úní sá cùú-í te ndoto-í — càchí-gá xáhaⁿ-gǎ xii-güedé.

34 Dico ni ìⁿ tnúhu ní càháⁿ-gá ñá túú ní tècú tnùní-güedé, chi ío yídáhu tnúhu ní càháⁿ-gá nùu xǎⁿ ni ìⁿ ñá túú ní tècú tnùní-güedé.

Jèsús quidé tǎtna-gá núú ìⁿ téé cuáá ñuú Jericó

(Mt. 20:29-34; Mr. 10:46-52)

35 Te òré tá cùyatni Jesús ñuú Jericó cuáháⁿ, te yuhu ìchi cuáháⁿ-gá-án núcõo ìⁿ téé cuáá xicáⁿ ndàhú-dé. ³⁶ Te òré ní tecú dóho-dé xicáháⁿ vǎi ñáyiú xiyáha-yu, te ní xicáⁿ tnúhú-dé núú ñáyiú ndècu ndíhi-dé ná cuendá ducaⁿ vǎi-yu yáha. ³⁷ Te ní xáhǎⁿ-yu sá Jèsús téé ñuú Nazàrèt ñúhú-dé ìchi. ³⁸ Te níhi ní càháⁿ-dé, te xáhaⁿ-dě xii-gá:

—Jèsús ñaní tnàhá ndíi Dàvíí, cundàhú iní ñàhá xii-í! — càchí-dé xáhaⁿ-dě xii-gá.

39 Te ñáyiú xixódó núú nùú Jèsús ní tenàá ñàhá-yu xii-dé, te xáhǎⁿ-yu sá ná càdí-dé yuhu-dé dico uuⁿ-gá níhi ní càháⁿ-dé xáhaⁿ-dě xii-gá:

—Yòhó téé cùu ñaní tnàhá ndíi Dàvíí, cundàhú iní ñàhá xii-í! — càchí-dé xáhaⁿ-dě xii-gá.

40 Te Jèsús ní ngüíñí-gá, te ní táuchíúⁿ-gã ní sángueheⁿ ñaha cuè téé ndihi-gá. Te òré ní quexìo-dé núú-gã, te ní xícáⁿ tnúhú-gã núú-dě, te xáhaⁿ-gã:

41 —¿Ná cuíní-n cada ñaha-í xii-n-í? —càchí-gá xáhaⁿ-gã xii-dé.

Te téé cuàá-áⁿ ñí xáhaⁿ-dě:

—Mèstrú, cuíní-í cada tátna-n núù-í cuèndá cundehe-í —càchí-dé xáhaⁿ-dě xii-gá.

42 Te Jèsús ní xáhaⁿ-gã:

—Sa ní ndúha núú-n chi ní sándáá iní-n Yá Ndiòxí —càchí-gá xáhaⁿ-gã xii-dé.

43 Te òré-ni-áⁿ ñí ndúha núú-dě, te ní chinchícúⁿ-dě Jèsús, te ní cachí-dé sá ïo càhnu cuu Yá Ndiòxí. Te nchaa ñáyiú ní xiní nàcuáa ní cuu ní ndúha núú-dě tnàhá-yu ní cachí-yu sá ïo càhnu cuu Yá Ndiòxí.

19

Jèsús ndihi ìⁿ téé nàni Zaqueú

1 Te Jèsús ní sáá-gá ñuú Jericó, te ta yáha-gá xití ñuú-áⁿ cuáháⁿ. 2 Te ñuú-áⁿ ndécú ìⁿ téé cuica nàni-dé Zaqueú, te cùnuu-dé táxí tnùní-dé cue téé cùndihi-dé, cue téé cuihna iní-xi quide cobra ñáhá xii ñáyiú cuèndá impuèstú. 3 Te téé-áⁿ cuíní-dé quíní-dé Jèsús òré-áⁿ ní cùu te ñá ní ndàcu-dé, chi ïo cuéhé ñáyiú, te ñá túú dùcúⁿ-dé.

4 Te xìnu-dé ní ngódó núú-dě te ní sáá-dé díquí ìⁿ yutnu sícómorú nùtníí yatni yuhu ìchi núú yáha Jèsús cuèndá cuíní-dé quíní ñáhá-dě xii-gá. 5 Te òré tá yáha Jèsús xiáⁿ,

te ní ndonehe núú-gã díquí yutnu núú cándòdo-dé-áⁿ, te ní xáhaⁿ-gã xii-dé:

—Zaqueú, tanùu ndihi díquí yutnu-áⁿ, chi tnavíí quexìo-í vehe-n ndètatú-í —càchí-gá xáhaⁿ-gã xii-dé.

6 Te té Zaqueú-áⁿ ñí nuu ndíhi-dé díquí yutnu-áⁿ, te ío ní cudíí iní-dé ní queheⁿ cuèndá-dé Jèsús vehe-dé. 7 Te sá ñí xiní ñáyiú ní quexìo Jesús vehe-dé, te ncháá-yu ní ngúita-yu càháⁿ cuéhé-yu cuèndá-gá, te xitnàhá-yu:

—Tée-a cuánguihu-dé vehe ìⁿ téé ndècu ìchi cuéhé ìchi duha —càchí-yu xitnàhá-yu.

8 Te té Zaqueú-áⁿ ñí ndacuíñí-dé tnuú-yu, te xáhaⁿ-dě xii Jèsús:

—Yòhó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá ñí dúhù-í-yu nacuáñaha-í xii-yu —càchí-dé xáhaⁿ-dě xii-gá.

9 Te Jèsús ní xáhaⁿ-gã xii té Zaqueú:

—Vitna ní naníhí tàhú-n ndíhi nchaa ñáyiú xíndecu vehe-n, chi tnàhá-n cùu-n ñaní tnàhá ndíi Àbrahám. 10 Te yúhú Tée cùu ñaní tnàhá-ndó nchàa-ndo véxi-í nándùcu-í ñáyiú ní xíta nihnu cuèndá dàcácu nihnu-í-yu núú ùhú núú ndàhú —càchí-gá xáhaⁿ-gã xii-dé.

Nàcuáa ní quide-güedé ndihi díhúⁿ cuàáⁿ
(Mt. 25:14-30)

11 Te nchaa ñáyiú-áⁿ ñí sani iní-yu sá ndíhi-ni ndíhu

ndaha ñàha Yá Ndiöxí xii-yu cuendá sá ñi cuyatni Jèsús ñúú Jerusàlén, te xíãⁿ ñúú ní ngúita Jèsús ní cani-gá ñⁿ cuendú núú-yu cuendá tecú tnùní váha-yu tnúhu-gá. ¹² Te xáhaⁿ-gá xii-yu:

—Ní xíndecu ñⁿ téé cùu ñaní tnáhá ñáyiú cùnuu, te cuáháⁿ-dé ingá ñúú xícá cuendá yacáⁿ cuáha ñaha-güedé chiúⁿ coo-dé, te dätñuní ndixi-dé quindaha-dé titní ñúú. ¹³ Te cùmání-gá quee-dé quíhíⁿ-dé, te ní cana-dé úxí cue téé xínu cuechi núú-dé, te ní sáñaha-dé ndí dííⁿ núú-güedé ñⁿ caa ñⁿ caa díhúⁿ cuááⁿ, te ní xáhaⁿ-dé: “Chí cáda ndáhú ndíhi díhúⁿ-ãⁿ ndéé ná sàa nduu nàsáá-í”, càchí-dé xáhaⁿ-dë xii-güedé. ¹⁴ Dico nchaa ñáyiú ñúú quindaha-dé-áⁿ ñà túú tnáhá iní-yu sá quíndaha ñaha-dé, núú ní tendahá-yu cue téé nèhe tnúhu cuáháⁿ núú cuè téé cuáñaha chiúⁿ coo-dé-áⁿ, te ní xáháⁿ-yu sá cüñaha-güedé sá ñà túú tnáhá iní-yu sá tée-áⁿ quindaha ñaha-dé xii-yu. ¹⁵ Dico dacuitíí sá ñi sáha-güedé téé-áⁿ chiúⁿ coo-dé sá díú-dé quindaha-dé ñáyiú nchaa ñúú-áⁿ, te ní nacuico-dé cuánuhú-dé ñúú-dé. Te òré ní nasáá-dé vehe-dé, te ní tendaha-dé ñⁿ téé ní sánúcana ñaha xli cue téé xínu cuechi núú-dé, cue téé ní dándöo ndaha-dé díhúⁿ cuendá cacáⁿ tnúhú-dé núú-güedé ñⁿ ñⁿ-güedé ñúú ndéé dau ní chídó-xí díquí díhúⁿ sá ñi dándöo ndaha ñaha-dé-áⁿ. ¹⁶ Te téé ní ndéxio

díhna xáhaⁿ-dë: “Pàtróóⁿ, ní quide-í ndáhú ndíhi díhúⁿ-n sá ñi dándöo ndaha ñaha-n xii-í, te sá ñⁿ ní taxi-n te ní chídó-xí ùxí-gá tnáhá te náu-a naqueheⁿ cuendá-n”, càchí-dé xáhaⁿ-dë. ¹⁷ Te téé cùu patróóⁿ-dë-áⁿ ñi xáhaⁿ-dë: “Ío váha téé xínu cuechi cuu-n chí ío váha ní quide-n, te sá ñi quide váha-n ndíhi sacú díhúⁿ sá ñi dándöo ndaha ñaha-í xii-n, te xíãⁿ ñúú yúhú càchí-í sá táxí tnùní-n ùxí ñúú vitna”, càchí-dé xáhaⁿ-dë. ¹⁸ Te ní ndéxio ingá-dé, te ní xáhaⁿ-dë: “Pàtróóⁿ, ní quide-í ndáhú ndíhi díhúⁿ-n sá ñi dándöo ndaha ñaha-n xii-í, te sá ñⁿ ní taxi-n te ní chídó-xí ùhúⁿ-gá tnáhá te náu-a naqueheⁿ cuendá-n”, càchí-dé xáhaⁿ-dë. ¹⁹ Te ní xáhaⁿ téé cùu patróóⁿ-dë-áⁿ xii-dé: “Te yòhó taxi tnùní-n ùhúⁿ ñúú”, càchí-dé xáhaⁿ-dë xii téé xínu cuechi-áⁿ. ²⁰ Te dätñuní ní ndéxio tucu ingá-dé, te xáhaⁿ-dë: “Pàtróóⁿ, náu díhúⁿ-n-á, te naqueheⁿ cuendá-n chí ní taxúha-í ní chidúcúⁿnuu-í ñⁿ pañú te ñà túú ní quide-í ndáhú ndíhi díhúⁿ-n, ²¹ chí ní yúhú ñáhà-í xii-n, chí cùu-n ñⁿ téé díí, te nàqueheⁿ-n ñⁿ sá ñà túú ní tàxi ndecu-n, te nàtahu-n ñⁿ xichi núú ñà túú ní chìhi-n tatá”, càchí-dé xáhaⁿ-dë xii pàtróóⁿ-dë. ²² Te ní xáhaⁿ pàtróóⁿ-dë xii-dé: “Yòhó cùú-n ñⁿ téé cuihna iní-xi xínu cuechi núú-í, te ñi-ni nchaa tnúhu càháⁿ-n-ãⁿ càchí tnùní-xi nàcuáa cuu ndáá cuéchi-n. Te núú sàni iní-n sá cùú-í ñⁿ téé díí, te nàqueheⁿ-í ñⁿ sá ñà túú ní tàxi

ndecu-í, te nàtahu-í ìn xichi núú ñà túú nǐ chihi-í tatá, ²³ te núu ducaⁿ ña, ¿te ná cuendá ñá túú ní càhu iní-n dásaⁿ nuu-n díhúⁿ nǐ taxi-í, te cúñaha-n chǎhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-i?”, cachí-dé xǎhaⁿ-dē xii téé xìnu cuechi-án. ²⁴ Te ní xǎhaⁿ tēe cùu patróón-án xii cue téé xǐndecu xián: “Chí quéndèé díhúⁿ cuáán néhé tēe-a, te cuáha-ndo tēe nèhe úxí tucu díhúⁿ cuáán-án”, cachí-dé xǎhaⁿ-dē xii-güedé. ²⁵ Te ní xǎhaⁿ-güedé: “Pàtróón, dico sa nèhe-dé úxí díhúⁿ cuáán”, cǎchí-güedé xǎhaⁿ-güedé. ²⁶ Te ní xǎhaⁿ tēe cùu patróón-án: “Na cǎchí tnúhu-í xii-ndo sǎ cuè ñáyiú íó xii-xi te níhí-gǎ-yu cundecu ndihí-yu, te cue ñáyiú sacú ndécú ndihí cuita ndihí nihnu nchaa sǎ ndécú ndihí-yu”, cǎchí téé cùu patróón-án xǎhaⁿ-dē xii-güedé. ²⁷ Te xǎhaⁿ tucu-dé xii-güedé: “Nchaa ñáyiú cùu úhú iní ñáhá xii-í ñá tnáhá iní-yu quindaha-í-yu, te chí cándecá-yu taquixi iha, te cahni-ndö-yu núu-í-a”, cǎchí téé cùu patróón-án xǎhaⁿ-dē xii-güedé —duha cuáhán cuendú ní caní Jèsús núú ñáyiú.

Jèsús cuánguihu-gá ñuú Jerusálén

(Mt. 21:1-11; Mr. 11:1-11; Jn. 12:12-19)

²⁸ Te sátá dúcán nǐ cáhán-gá, te ní nucúhuⁿ ichi-gá cuáhán-gá ñuú Jerusálén. ²⁹ Te òré sa ní cuyatni-gá ñuú

Bèttagé, ndihí ñuú Bètaniá te xián cáá yucu nani Olívú, te ní xǎhaⁿ-gǎ xii úú cue téé xica cuu ndihí-gá:

³⁰ —Chí cuáhán ñuú cáá yàtni yacáⁿ, te òré quexìo-ndo yacáⁿ, te nanihí-ndó ìn búrru ndètní-di, te vátá yóo ìn-gá codo ñaha xii-di, te nandaxi-ndo-di te candeca-ndo-di quixi. ³¹ Te núu yoo na càcán tnúhu núú-ndó nǎ cuendá nándaxi-ndo-di, te cúñaha-ndo xii-yu sǎ yúhú Yaá xicá cùu ndihí-ndo xiní ñuhu-í-di —cǎchí-gá xǎhaⁿ-gǎ xii-güedé.

³² Te cue téé-án nǐ xica-güedé cuáhán-güedé, te nchaa-ni nàcuáa ní xǎhaⁿ Jèsús ducaⁿ ní cuu, ³³ chí mei òré nándaxi-güedé búrru-án nǐ quexìo cue ñáyiú cùu xitohó-di xicán tnúhu-yu núú-güedé, te xǎháⁿ-yu:

—¿Ná cuendá nándaxi-ndo búrru-ndí-i? —cǎchí-yu xǎháⁿ-yu.

³⁴ Te ní xǎhaⁿ-güedé xii-yu:

—Nà ndaxi-ndí-di chí Yaá xicá cùu ndihí-ndí xiní ñuhu ñaha-gá xii-di —cǎchí-güedé xǎhaⁿ-güedé xii-yu.

³⁵ Te ndéca-güedé-di cuáhán núú ndécú Jèsús, te òré ní quexìo-güedé ndihí-di núú ndécú-gǎ te ní sacán ndodo-güedé dóo-güedé sátá-di, te ní ngódó ñáhá-gǎ xii-di. ³⁶ Te ío cuéhé ñáyiú ta sácán-yu dóo-yu ichi cuáhán-gá cuendá núú dǒo-yu-án yǎha-gá ndihí quiti yòdo-gá. ³⁷ Te ní nucúita nuu-gá ichi tǐndúú yucu Olívú tá cuyatni-gá ñuú Jerusálén

cuáháⁿ, te nchaa ñáyi
sàndáá iní ñáhá xì-gá nchìcúⁿ
ñáhã-yu te ní ngüita-yu níhi
càháⁿ-yu sá cúdíí iní-yu, te
càchí-yu sá ïo càhnu cuu Yá
Ndiöxí cuendá sá ní xiní-yu
nchaa sá vã yõo tnàhí ndàcu
cada ní quide-gá. ³⁸ Te
càchí-yu:

—Ío càhnu cuu Yaá véxi
quindaha ñaha xii-o, te diu-gá
cúu-gã Yaá ní tendaha Yá
Ndiöxí véxi quide núu-gã! ¡Te
ío càhnu cuu mee-gá! ¡Te
andiu ñà túu tnàhí ná cúu! —
duha càchí-yu.

³⁹ Te ñⁿ úú cue tée cùu
fariséu ñúhú tnàhá tnuú
ñáyi-áⁿ ní xáhaⁿ-güedë xii
Jèsús:

—Mèstrú, cúñaha nchaa
ñáyi ndihí-n na càdí-yu
yuhú-yu —càchí-güedë
xáhaⁿ-güedë xii-gá.

⁴⁰ Dico Jèsús ní xáhaⁿ-gã
xii-güedë:

—Te na càchí tnúhu-í
xii-ndo sã nüu ñáyi-a na
càdí-yu yuhú-yu ña, te nchaa
yúu cãháⁿ níhi-xi dàtná ñⁿ
ñáyi —càchí-gá xáhaⁿ-gã
xii-güedë.

⁴¹ Te òré ní cuyatni-gá ñuu
Jerusalén te ní xiní-gá, te
ní ndáhyú-gá cuendá nchaa
ñáyi dii ñúu-xi-áⁿ sã ndihú
iní-gá. ⁴² Te ní xáhaⁿ-gã xii cue
ñáyi-áⁿ:

—Ío cuu váha iní-í te núu
dicó nchòhó tecú tnùní-ndó
vítna ñⁿ tnúhu sá cadá vãha
ñaha xii-ndo, chí ñá túu-gã
ná cuu cundecu-ndo, te
núu na tècú tnùní-ndó.
Dico ñá tècú tnùní-ndó, chí
ío yidáhu tnúhu-a. ⁴³ Te

sáá nduu tnündòho tnúhu
ndáhú sá cúu-xi-ndó, te
nchaa cue tée dava-gá
ñuu cúu úhú iní tnàhá
ndihí-ndo quixi-güedë chi-
doco ñaha-güedë xii-ndo, te
ní càndéé núu ndécú-ndó-ãⁿ
dacàa-güedë ndóho cuendá
xiáⁿ quihí váha-güedë nàa
ndihí ñaha-güedë xii-ndo, te
vá dáñá-güedë cunu-ndo.
⁴⁴ Te cahni ñaha-güedë
xii-ndo, te ndihí nchaa
vehe-ndo dängoyo-güedë
ndéé cimiéntú-xi, chí ñá túu
ní cuiní-ndó nàcuáha-ndo
cuendá òré ní quixi coto ñaha
Yá Ndiöxí xii-ndo —duha ní
xáhaⁿ-gã xii ñáyi ñuu-áⁿ.

*Jèsús ñá túu tnàhá iní-gá
nàcuáa quidé-yu veñúhu*

*(Mt. 21:12-17; Mr. 11:15-
19; Jn. 2:13-22)*

⁴⁵ Te Jèsús cuánguihu-gá xití
veñúhu càhnu sá ïo cùnuu,
te xití veñúhu-áⁿ xindecu cue
ñáyi quide ndáhú ndihí cue
ñáyi xísaaⁿ. Te ní queñuhu
ñaha Jèsús xií-yu quehé. ⁴⁶ Te
ní xáhaⁿ-gã xií-yu:

—Núu tùtú Yá Ndiöxí
càháⁿ-xi nàcuáa ní càháⁿ-gá,
te duha ní cachí-gá: “Vehe-í
cúu-xi nüu càháⁿ ndihí ñaha
ñáyi xii-í”, duha ní càháⁿ-gá
càchí-xi núu tùtú-gá. Dico
nchòhó quidé-ndó vehe-gá
vehe ñadúhú —càchí-gá
xáhaⁿ-gã xií-yu.

⁴⁷ Te Jèsús nchaa nduu
dànehé-gá ñáyi xití veñúhu,
dico cue tée cùu dútú cùnùu,
ndihí cue tée dàcuaha ñaha xii
ñáyi nchaa tnúhu ní chídó
tnùní ndíi Moisés, ndihí cue
téè cùnùu ñuu-áⁿ ndúcú-güedë
nàcuáa cada-güedë cahni

ñaha-güedë xii-gá. ⁴⁸ Dico ñá ñihí-güedé nàcuáa cada-güedé, chi cuëndá nchaa ñáyiú ío cùdíí iní-yu ndèdóho-yu nchaa tnúhu càháⁿ-gá.

20

Jèsús ndécú ndíhi-gá tnúhu ndee iní

(Mt. 21:23-27; Mr. 11:27-33)

¹ Te ñⁿ nduu yíhi Jèsús xití veñúhu càhnu sá ío cùnnu danehé-gá ñáyiú tnúhu sá càháⁿ nàcuáa naníhí tàhú-yu. Te ní quexìo cue tée cùu dútú cùnnu ndíhi cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndíhi cue tée cùu sacuéhé núú ñáyiú isràél, ² te ní xáhaⁿ-güedë xii-gá:

—Cuíní-ndí cachí tnúhu-n xii-ndí nása ndùu tnúhu ndee iní ndécú ndíhi-n núu quide-n nándi sá quidé-n. ¿Te yoo ducaⁿ ñí taxi tnúhu ndee iní-án xii-n? —càchí-güedé xáhaⁿ-güedë xii-gá.

³ Te Jèsús ní xáhaⁿ-gá:

—Yúhú tnàhá-í cuíní-í cácaⁿ tnúhu-í ñⁿ sá càcáⁿ tnúhu-í núú-ndó, te cachí tnúhu-ndo.

⁴ Te chí càchí tnúhu xii-í yoo ní táuchíúⁿ ñí dácúándüte ndí Juàá ñáyiú. ¿Yá Ndiòxí áⁿ cuè tée ñuyíú-a ní táuchíúⁿ dùcaⁿ ní quide ndí? —càchí-gá xáhaⁿ-gá xii-güedé.

⁵ Te ní ngúíta-güedé xitnàha-güedé:

—¿Nása cúñaha-o? Chi núu nà cúñaha-o sá Yá Ndiòxí ní táuchíúⁿ dùcaⁿ ní quide ndí Juàá ñá, te quesaha-dé: “¿Ná cuëndá ñá túú ní sàndáá

iní-ndó tnúhu ní cáháⁿ ndí váníⁿ?”, quesaha-dë. ⁶ Ádi te núu nà cúñaha-o sá cuè ñáyiú ñuyíú-a ní táuchíúⁿ dùcaⁿ ní quide ndí ña, te nchaa ñáyiú cuáha ñàhá-yu yúú xii-o, te cahni ñàhá-yu, chi càchí-yu sá ndáá sá Yá Ndiòxí ní táuchíúⁿ-gá ní cáháⁿ ndí Juàá tnúhu-gá núú ñáyiú —càchí-güedé xitnàha-güedé.

⁷ Te ní xáhaⁿ-güedë xii-gá sá ña túú xini-güedé yoo ní táuchíúⁿ dùcaⁿ ní dácúándüte ndí Juàá ñáyiú. ⁸ Te ní xáhaⁿ Jèsús xii-güedé:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáhaⁿ-gá xii-güedé.

Cuëndá cue tée cuíhna iní-xi

(Mt. 21:33-44; Mr. 12:1-11)

⁹ Te sátá dúcáⁿ te ní ngúíta Jèsús ní cani-gá ñⁿ cuëndú núú ñáyiú nàcuáa tecú tnùní-yu tnúhu-gá, te xáhaⁿ-gá xii-yu:

—Ñⁿ tée ní xitu-dé mee-ni yòho yaha stilé núú ñúhú-dë.

Te ní sáá ñⁿ nduu quíngaca cuu xica-dë vání nduu te ní dándõo ndaha-dë sá ñí xitu-dé-án xii ñⁿ úú cuè tée càháⁿ ndíhi-dé cuëndá cada chiúⁿ-güedé, te ní ndatnúhu-güedé sá òré ná cùu te cuu cuëndá dava-güedé te ducaⁿ te ní quee-dé cuáháⁿ-dé. ¹⁰ Te sátá ñí sáá nduu ñí cuu nchaa ndéhé yoho yàha stilé sá ñí xitu-dé-án, te ní xáhaⁿ-dë xii ñⁿ tée xinu cuechi núú-dé: “Cuáháⁿ cácaⁿ-n sá cúú cuëndá-í núú cuè tée ní dándõo ndàhá-í nchaa yoho yàha stilé sá ñí

xitu-í”, cächí-dé xǎhaⁿ-dĕ. Te téé xínu cuechi-áⁿ nǐ xica-dé cuáháⁿ-dĕ, dico cue téé ndĕé nchaa yoho yàha stilé-áⁿ nǐ tñi-güedé téé xínu cuechi-áⁿ te ní caniha-güedĕ, te ní nacuícúⁿ ñáhá-güedĕ xii-dé, te ñá túú tñahí ná ní sǎñaha-güedĕ. 11 Te dǎtnùní téé cùu xítohó nchaa yoho yàha stilé-áⁿ nǐ tendaha tùcu-dé ingá téé xínu cuechi núú-dĕ cuáháⁿ-dĕ, dico ñi-u-ni ducaⁿ nǐ quide ñaha-güedĕ xii-dé, chi ní xícuèhé ñáhá-güedĕ, te ní caniha-güedĕ te ní nacuícúⁿ ñáhá-güedĕ, te ñá túú tñahí ná ní sǎñaha-güedĕ. 12 Te téé cùu xítohó nchaa yoho yàha stilé-áⁿ nǐ tendaha tùcu-dé ingá-dé cuáháⁿ-dĕ, te ñi-u-ni ducaⁿ nǐ quide ñaha tùcu-güedĕ, chi ní dánícuèhé ñáhá-güedĕ, te ní nacuícúⁿ ñáhá-güedĕ.

13 “Te téé cùu xítohó nchaa yoho yàha stilé-áⁿ nǐ sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quiní ñáhá-güedĕ xii-dé, te canehe-güedĕ sá yǐñuhu núú-dĕ”, duha ní sani iní-dé. 14 Dico òré ní xiní cue téé quide chiúⁿ-áⁿ dĕhe xítohó nchaa yoho yàha stilé-áⁿ, te ní xítñaha-güedĕ: “Téé-áⁿ téé véxi nduu táhú ñuhu-a ndihi nchaa sá cáá núú-xi, dico cahni-o-dĕ te mee-o ndùu tahú-ó sá ndúú táhú-dĕ”, cächí-güedĕ xítñaha-güedĕ. 15 Te ní queñuhu ñaha-güedĕ ñiⁿ xio yuhu ñuhu-áⁿ, te ní sahni ñaha-güedĕ xii-dé — duha cuáháⁿ cuëndú ní cani

Jèsús núú-yu.

Te dǎtnùní ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada ñaha xítohó ñuhu-áⁿ xii cue téé-áⁿ ñǎ? 16 Chi núhú-dé te cahni-dé cue téé-áⁿ, te dǎndóo ndaha-dĕ ñuhu-dé xii cue téé cùtnuní iní-dé cada ndáá — cächí-gá xáhaⁿ-gǎ xií-yu.

Te sá dúcáⁿ nǐ cáháⁿ-gá, núu ní cachí-yu:

—¡Sá vǎ cächí Ndiòxí sá dúcáⁿ yǎha-o! —cächí-yu.

17 Te Jèsús ní ndacoto-gá núú-yu, te ní xáhaⁿ-gǎ:

—Chí cächí tñuhu nása quèe-xi nacuáa cáháⁿ-xi núú tütú Yǎ Ndiòxí, núú cächí-xi:

Yúú sǎ nǐ dáquéé tǐhú cue téé ðàcaa vehe ní saa-xi cùu-xi yúú cúnùu vitna.

Duha cächí-xi núú tütú-gá.

18 Te nchaa ñáyiú ñá túú cuíní tñi tñuhu-í, te ndohó-yu dǎtná ñiⁿ ñáyiú tñahnú duuⁿ òré ndúá-yu núú yúú, àdi núu na tàú ñáhá-xí te ðàcachi duuⁿ ñaha-xi —cachí-gá xáhaⁿ-gǎ xií-yu.

Cuëndá impuèstú

(Mt. 21:45-46; 22:15-22; Mr. 12:12-17)

19 Te cue téé cùu dútú cúnùu, ndihí cue téé ðàcuaha ñaha xii ñáyiú nchaa tñuhu ní chídó tñuní ndíi Moisés ní cuíní-güedĕ tñi-güedĕ Jèsús òré-ni-á ní cùu, chi ní cutnùní iní-güedĕ sá cuëndá-güedĕ ní cáháⁿ-gá, dico ní yùhú-güedĕ cuëndá sá ío vǎi ñáyiú. 20 Te ní ndúcú-güedĕ nàcuáa cada-güedĕ tñi ñaha-güedĕ xii-gá, te ní tendaha-güedĕ

cue té cuáháⁿ ngoto dayuhu ñàha xii-gá, te cuáháⁿ-güedé dàtná cue té váha iní-xi, te ndùcu-güedé nàcuáa cada-güedé nũu cáháⁿ-gá ìⁿ tnúhu sá ñà túú tàú-gá cáháⁿ-gá cuèndá ducaⁿ te candeca ñaha-güedé xii-gá quihíⁿ cuáha cuèndá ñáhá-güedé núú tõe cùnũu. ²¹ Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiũ mee-ni tnúhu váha, te cuèi ndédani càa ñáyiũ ìⁿ-ni càhán-n ndihí-yu, te càhán ndáá-n nàcuáa càhán Yá Ndiõxí cundecu-o ñuyíú-a. ²² Te cachí tnúhu xii-ndí nũu váha-ni cháhu-ndí té Cèsár tée ío cùnũu cuendá impuèstú ãⁿ ñáhá —càchí-güedé xáhaⁿ-güedé xii-gá.

²³ Dico Jèsús ní cutnùni iní-gá sá xító ndèè ñáhá-güedé xii-gá, núu ní xáhaⁿ-gá xii-güedé:

²⁴ —Chí dánèhé ñáhá xii-í ìⁿ díhúⁿ cuixíⁿ te cachí tnúhu-ndo nũu yoo núú-xi ndèé, ndihi yoo diu-xi ndèé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tẽ Cèsár ndèè ndihi diu-dé —càchí-güedé xáhaⁿ-güedé xii-gá.

²⁵ Te ní xáhaⁿ tùcu-gá xii-güedé:

—Te núu ducaⁿ te chí nàcuáha té Cèsár sá cúu cuèndá-dé, te sá cúu cuèndá méé Yá Ndiõxí, te xíáⁿ nacuáha-ndo-gá —càchí-gá xáhaⁿ-gá xii-güedé.

²⁶ Te ñá ní ndàcu tnahí-güedé daticánũu ñaha-güedé xii-gá núú tnúhu

cáhán-gá, chi òré ní cáhán-gá, te da ní cuñúhu-güedé nchaa tnúhu ní cáhán-gá, te váha-gá ní sadí-güedé yuhu-güedé.

Cuèndá nchaa ñáyiũ ndoto
(Mt. 22:23-33; Mr. 12:18-27)

²⁷ Te sáta dúcáⁿ te ní sáá ìⁿ úú cue té cùu saducéú núú ndécú Jèsús. Te cue tée-áⁿ ñà túú sàndáá iní-güedé sá ndótó cuè ñáyiũ ní xihí, te ní xáhaⁿ-güedé xii-gá:

²⁸ —Mèstrú, ndí Moisés càchí ndíi núú tùtú ndècu vitna sá nũu ìⁿ tée na cùu, te quendóo ñadihí-dé te ñá túú dèhe-dé ní xõo ndihi-aⁿ, te tée cùu ñaní-dé naqueheⁿ-dé ñaha ní quendóo quèé-áⁿ cuèndá coo dèhe-dé ndihi-aⁿ cuèndá ñaní-dé tée ní xihí-áⁿ. ²⁹ Te ní xíndecu úsá tnahá cue tée mee-ni ndí ñaní-güedé. Te tée díhna ní níhí ñadihí-dé, dico ñá túú ní cùdí-dé cundecu-dé chi ní xihí-dé, te ni ìⁿ déhe-dé ñá túú ní xõo ndihi ñadihí-dé-áⁿ. ³⁰ Te tée cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ìⁿ tucu déhe-dé ñá túú ní xõo ndihi ñaha-áⁿ. ³¹ Te tée cùu uní ní naqueheⁿ tucu-dé ñaha ní quendóo quèé-áⁿ, te diu-ni ducaⁿ ní xihí-dé, te ní xínu ndi úsá-güedé ní cándeca ñaha-güedé xii ñaha-áⁿ, dico ni ìⁿ-güedé ñá túú ní xõo déhe-güedé ndihi-aⁿ, te ní ndihi-güedé ní xihí. ³² Te ndéé núú ní ndihi-ná ní xihí tnahá ñadihí-áⁿ. ³³ Te na sáá nduu ndòto-güedé ndihi ñaha-áⁿ ¿Te ndédacàa-güedé ñadihí-güedé cuu-aⁿ-i? Chi ndi úsá-güedé

ní cándeca ñaha-güedě xii-aⁿ
—càchí-güedé xáhaⁿ-güedě
xii-gá.

34 Te Jèsús ní xáhaⁿ-gã
xii-güedé:

—Nchaa ñáyiú ñuyíú-a
tnándahá-yu. 35 Dico nchaa
ñáyiú ní nduu táhú ndoto
díhna nuu ñáyiú-áⁿ cun-
decú-yu ndihi Yá Ndióxi ní
caa ní quíhíⁿ, te yàcáⁿ ñá
túú-gã sá cándeca tnahá-yu.
36 Te ní ñà túú-gã tnúhu
xíhí, chí cuu-ná-yu dàtná cue
espíritú xínú cuèchi núú Yá
Ndióxi cuendá sá ní ndotó-yu,
chí cùú-yu déhe-gá. 37 Te ndéé
ndíi Moisés ní chídó tnùní ndíi
núú tütú ndíi sá ncháá ñáyiú
ní xíhí ndotó-yu, te ñu-ni
xíáⁿ càháⁿ-xi cuendá tnutàú
nchícúⁿ ñuhú, te ñu-ni xíáⁿ
càchí tucu-xi sá Yá Ndióxi
cúú-gã Ndióxi ndíi Abrahám,
ndíi Isàác, ndihi ndíi Jácób.
38 Te cue téé-áⁿ chí cuèi ní
xíhí-güedé sá cúú-xí nchòhó,
dico sá cúú-xí Yá Ndióxi chí
ndècu vívú-ni-güedé. Chí
cùtnuní iní-ó sá Yá Ndióxi
cúú-gã Ndióxi mee-ni cuè
ñáyiú xíndecu vívú, te ñá túú
cúú-gã Ndióxi cue ñáyiú ñá
túú ndècu vívú. Te sá cúú-xí
mèe-gá chí nchaa ñáyiú ndècu
ndihi-gá ndécú vívú-yu cuèi
sa ní xíhí-yu núú ñuyíú-a —
càchí-gá xáhaⁿ-gã xii-güedé.

39 Te ñⁿ téé dàcuaha ñaha xii
ñáyiú nchaa tnúhu ní chídó
tnùní ndíi Moisés ní xáhaⁿ-dě
xii Jèsús:

—Mèstrú, váha-ni càháⁿ-n
—càchí-dé xáhaⁿ-dě xii-gá.
40 Te ñá túú-gã ní cùyí-güedé

cácáⁿ tnúhú-güedě ní ñⁿ tnúhu
núú-gã.

Yoo déhe-xi cùu Cristú

(Mt. 22:41-46; Mr. 12:35-
37)

41 Te Jèsús ní xáhaⁿ-gã
xii-güedé:

—¿Te nása càchí-tu-yu sá
Cristú Yaá tendaha Yá Ndióxi
quixi ñuyíú-a cùu-gá déhe ndíi
Dàvií? 42 Te mee ndíi Dàvií-áⁿ
ní cachí ndíi núú libré Sálmú:
Dútú Ndióxi ní xáhaⁿ-gã xii
Yaá cúú Xítohó-í:

“Ngóo xio cùha-í,
43 te yúhú cada-í te nchaa sá
cúú úhú iní ñáhá xii-n
canehe-xi sá yíñuhu
núú-n.”

Duha ní xáhaⁿ Dútú Ndióxi
xii Yaá cúú Xítohó-í càchí ndíi
núú libré Sálmú. 44 ¿Te nása
cùu Cristú déhe ndíi Dàvií,
te mee ndíi ní cachí ndíi sá
cúú-gã Xítohó ndíi-í? —càchí
Jèsús xáhaⁿ-gã xii-güedé.

*Jèsús càháⁿ-gá cuendá cue
téé dàcuaha ñaha xii ñáyiú
nchaa tnúhu ní chídó tnùní ndíi
Moisés*

(Mt. 23:1-36; Mr. 12:38-40;
Lc. 11:37-54)

45 Te òré ndátnùhu Jèsús
ndihi cue téé xica cuu ndihi-gá
xíndedóho ñaha ñáyiú, te
xáhaⁿ-gã xii-güedé:

46 —Cada cuendá-ndó vã
cádá-ndó nàcuáa quide cue téé
dàcuaha ñaha xii ñáyiú nchaa
tnúhu ní chídó tnùní ndíi
Moisés, chí tnàhá iní-güedé
cuihnu-güedé dóo nání sã
sácuihnu cue téé cùnuu.
Te nchaa núú tàcá ñáyiú
cuíní-güedé sá ndihi tnúhu
yíñuhu cáháⁿ ndihi ñáhá-yu
xii-güedé, te nàcáxi-güedé xilé
sácóo nchihí cue téé cùnuu-gá

xití veñúhu conchihi-güedé, te ducaⁿ-ni quide-güedé cuëi òré quihu-güedé mèsá caxi-güedé òré ndécú-güedé ìⁿ vico, chi mee-ni nùú sácõo cue tée cùnuu-gá cuìní-güedé coo-güedé. ⁴⁷ Te quèndé-güedé vehe nchaa ñáyiú dìhí ñáyiú quèé, te ío naha càháⁿ ndihi-güedé Yă Ndiõxí cuendá cuìní-güedé cáháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiú —càchí-gá xáhaⁿ-gá xii-güedé.

21

Díhúⁿ nduu táhú Yă Ndiõxí ní dáquëe ìⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gá xití veñúhu xidáquëe cue tée cuica díhúⁿ nduu táhú Yă Ndiõxí xití alcanciá. ² Te ní xiní-gá tnàhá ìⁿ ñaha ndàhú ñaha quèé ní dáquëe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xĩndecu-áⁿ:

—Na càchí tnúhu ndáá-í xii-ndo sã ñàha ndahú ñaha quèé-a ío-gá nándihi díhúⁿ ní dáquëe-aⁿ xití alcanciá nduu táhú Yă Ndiõxí dàcúxí díhúⁿ ní dáquëe dàva-gá-yu. ⁴ Chi nchaa ñáyiú-áⁿ ní dáquëe-yu mee-nã sã ní ndóo-ná, dico ñaha quèé-a cuëi ndàhú-aⁿ dico ní dáquëe-aⁿ nihí díhúⁿ sã cuááⁿ-áⁿ sã cáxí-áⁿ ní cùu —cachí-gá xáhaⁿ-gá xii-yu.

Jèsús càchí-gá sá ngóyó veñúhu

(Mt. 24:1-2; Mr. 13:1-2)

⁵ Te ìⁿ úú ñáyiú xĩcáháⁿ-yu cuendá veñúhu càhnu sá ío cùnuu sá ío vii càa nchaa yúú yíhí, ndihi cuendá nchaa sá ní sãñaha táhú ñáyiú yìhi xití-xi. Te Jèsús ní xáhaⁿ-gá xii-yu:

⁶ —Sáá nduu te nchaa sá cùñúhu-ndo-a vã cùndúu-gá-xi dàtná cáá-xí vitna, chi ní ìⁿ-gá yúú vã códó nchìhi tnaha-gá-xi chi ndihi ngoyo —càchí-gá xáhaⁿ-gá xii-yu.

Nàcuáa cada-xi nduu ta cùyatni naa ñuyíú

(Mt. 24:3-28; Mr. 13:3-23)

⁷ Te cue tée xĩndecu-áⁿ ní xicáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nándi cùu sá cádá-xí cuendá cutnùní iní-ndí sá sã ta cuyatni nduu ducaⁿ cada-xi-í? —cachí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Ío quihi iní-ndó cùndecu-ndo, te vã dáñá-ndó mèe-ndo dan-dahú ñáhá ñáyiú xii-ndo. Chi ío cuéhé cue tée coo ñuyíú-a, te danani-güedé mèe-güedé dàtná nani-í te cachí-güedé: “Yúhú cùu-í Crìstú Yaá ní tendaha Yă Ndiõxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vã quèndáá iní-ndó, te nì vã túhá-ndó-güedé. ⁹ Te òré ná nihí-ndó tnúhu sá titní nacióⁿ xĩnàá-güedé te dàva ñuú xĩnàá-güedé ndi mèe-güedé, te vã yuhú-ndó chi dacuití sã dúcáⁿ càda-xi,

dico vátá sàá-gá nduu nàa ñuyú óré ducaⁿ càda-xi — cachí-gá xáhaⁿ-gã xii-güedé.

10 Te xáhaⁿ tùcu-gá xii-güedé:

—Nchaa cue téé ìⁿ nàcióⁿ nàá-güedé ndihi cue téé ingá nàcióⁿ, te titní ñuú ngúíta-güedé nàá-güedé. 11 Te titní xichi ñuyú níhi vìhi tnáa, te titní tucu xichi ñuyú coo tnamá, te titní tucu xichi ñuyú quixi cuéhé, te titní núú sã cádá-xí àndiu, te yùhú ñáyiu.

12 Te òré cúmání-gã cada-xi nchaa nàcuáa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhíⁿ xití veñúhu-güedé cada ndáá-güedé cuéchi-ndo, te chihí ñaha-güedé ve-caá xii-ndo, te candeca ñaha-güedé quíhíⁿ núú cuè téé cùnúu yindaha nacióⁿ àdi núú dàva-gá cue téé cùnúu sá cuendá-í. 13 Te òré ducaⁿ na càda ñaha-güedé xii-ndo, te òré-án tàù-xi cáháⁿ váha-ndo cuendá-í núú-güedé. 14 Te vá cání iní-ndó núu nása cunduu tnúhu cúñaha-ndo xii-güedé cuendá cácu nihnu-ndo. 15 Chi yùhú dacàhu iní ñáhà-í xii-ndo tnúhu cúñaha-ndo xii-güedé, te taxi-í sá vátá quíní tnùní-gá-ndó, te ni ìⁿ ñáyiu cùu úhú iní ñáhá xii-ndo vá ñihí-gá-yu tnúhu cúñahá-yu xii-ndo. 16 Te ndéé tátá-ndó, ndihi ñaní-ndó, ndihi cue ñáyiu cùu ñaní tnáhá-ndó, ndihi cue ñáyiu càháⁿ ndihi váha-ndo cuáha cuendá ñáhã-yu xii-ndo núú

cuè téé cùchiuⁿ, te dava-ndo càhni ñaha-güedé xii-ndo. 17 Te ío cuéhé ñáyiu cuu úhú iní ñáhã-yu xii-ndo sã cuendá-í. 18 Dico Yá Ndióxi ío coto ñaha-gã xii-ndo chí ndéé idi díquí-ndó còto-gá. 19 Te núu na càda ndee iní-ndó càchicúⁿ nihnu ñaha-ndo xii-í, te nduu táhú-ndó cùndecu-ndo ndihi Yá Ndióxi ni caa ni quíhíⁿ.

20 Te nduu na quíní-ndó ñùhu doco sandadú ni càndéé yuhu ñuú Jerusalén, te sa cutnùní iní-ndó sã sã ní cuyatni nduu dànaa-güedé ñuú-án. 21 Te dàvã-án nchaa ñáyiu xíndecu distritú Júdeá xíní ñùhu-xi cunú-yu quíhíⁿ-yu xití yucu, te nchaa ñáyiu xíndecu ñuú Jerusalén queé-yu xití ñuú-án, te ñáyiu ñá túú xíndecu ñuú-án vã ndíhu-gá-yu. 22 Chi dàvã-án cuu-xi nduu tnündòho tnúhu ndàhú, te ducaⁿ càda-xi chí ducaⁿ ndéé tnuní núú tùtú Yá Ndióxi nàcuáa dandòho ñaha-gá xii-yu. 23 Te ndàhú ní cuu nchaa ñáyiu díhí ñúhú dèhe-xi, ndihi nchaa ñáyiu ndèca déhe vitna sàdi na sáa nduu dùcaⁿ cada-xi! Chí ío cuéhé tnündòho tnúhu ndàhú coo núú ndécú-yu dàvã-án, te xíãⁿ cuu-xi ìⁿ tnündòho tendaha Yá Ndióxi quixi sá cúu-xi-yu. 24 Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhíⁿ nchaa ñuú xicá, te cue téé dava-gá ñuú cunuu-güedé ñuú Jerusalén, te mee Yá Ndióxi cachí-gá te núu ná daha nduu cunuu-güedé

ñuú-án.

Nacuáa cada-xi òré quixi tucu Téé cùu ñaní tnáhá cué ñáyi

(Mt. 24:29-35, 42-44; Mr. 13:24-37)

²⁵ 'Te cada-xi ñⁿ sá vátá quíní-gá ñáyi nuú nchĩcanchii, ndihĩ nuú yóó, ndihĩ nuú nchàa chódíní, te ñuyíú-a coo tnúhu ndihú iní-xi te vá cútnùní iní-yu nása cadá-yu cuendá sá ïo dusaⁿ càda ndute lamár òré candaundéé tnáhá-xi. ²⁶ Te nchaa ñáyi cuneé-yu sá yuhú-yu, ndihĩ sá ndihú iní-yu cuendá nchaa sá cadá-xi ñuyíú-a, te quidi-xi andiu. ²⁷ Te sátá dúcáⁿ te quíní-ndó yúhú Téé cùu ñaní tnáhá-ndó nchàa-ndo quee-í andiu quixi-í ichi xití vícò, te dàvá-án quíní ñáhá nchàa ñáyi sá ïo cùnuu-í te ndàcu-í quide-í nchaa sá vâha. ²⁸ Te òré ná ngũita-xi ducaⁿ càda-xi, te cuita cundee-gã iní-ndó quihĩⁿ, te quihĩ iní-ndó chi sa ní cuyatni vii-nã nduu cãcu nihnu-ndo vã cùndecu-gá-ndó nuú ñuyíú yicá cuèchi-a —càchĩ-gá xáhaⁿ-gã xii-güedé.

²⁹ Te ní cani-gá ñⁿ cuendú nuú-güedé nacuáa tecú tnùní váha-güedé tnúhu-gá, te xáhaⁿ-gã xii-güedé:

—Chí cùndèhe yutnu ngúxí ndihĩ nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchĩ-ndó sã sã ní cuyatni nuu cahni. ³¹ Te ñu-ñi ducaⁿ sãtnáhá-xi cùu òré ná quíní-ndó càda-xi nchaa nacuáa càháⁿ-í, te sá

dúcáⁿ te cutnùní iní-ndó sã sã ní cuyatni nduu ndihu ndaha ñàha Yá Ndióxi xii-ndo.

³² 'Te na càchĩ tnúhu ndáá-í xii-ndo sã òré vátá cùú-gá cue ñáyi xĩndecu ñuyíú-a vitna, te cada-xi nchaa nacuáa ní càháⁿ-í. ³³ Te andiu ndihĩ ñuyíú-a chi ndihĩ nihnu-xi, dico tnúhu-í chi vã ndihĩ nihnu-xi, chi cùu-xi tnúhu ndáa.

³⁴ 'Te quihĩ iní-ndó vã cùndecu-ndo ichi cuehé ichi duha, te vã cùú-ndó ñáyi quihu, te vã cùhúⁿ iní-ndó mèe-ni nchaa sã ïo ñuyíú-a, chi núu ducaⁿ na càda-ndo te nacuaana-ndo sã sãá nduu càda-xi nacuáa ní càháⁿ-í. Te uuⁿi sãá nduu-ãⁿ, ³⁵ te cada-xi dàtná cuíní-ndó quide ñⁿ trampá chi uuⁿi ngáva-xi, te ducaⁿ càda-xi nchaa ñáyi xĩndecu ñuyíú-a, chi uuⁿi sãá nduu-ãⁿ. ³⁶ Te nchòhó cundecu túha-ndo te ïo càháⁿ ndihĩ-ndo Yá Ndióxi cuendá ndacu-ndo yáha-ndo nchàa tnúndòho quixi ñuyíú-a, te ducaⁿ te nasáá-ndó cùndecu-ndo nuú ndécú yúhú Téé cùu ñaní tnáhá-ndó nchàa-ndo —cachĩ-gá xáhaⁿ-gã xii-güedé.

³⁷ Te nduu nduu ní xóo danèhé Jèsús ñáyi tnúhu-gá xití veñúhu càhnu sã ïo cùnuu, te niú niú ní xóo quihĩⁿ ngúdú-gá xití yucu Ólívú. ³⁸ Te nehé nehé ní xóo quihĩⁿ nchaa ñáyi veñúhu-áⁿ ñi xóo cundedóho-yu nchaa tnúhu càháⁿ-gá.

22

Ndùcu-güedé

nacuáa

cada-güedé cahni-güedé Jèsús
(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnàhá vico pàscuá, te vico-án xéxi ñáyiú pàá sá ñà túú yìhi levadurá. ² Te cue téé cùú dútú cùnù, ndìhi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé cahni-güedé Jèsús, te dícó-ni sá xiyùhú-güedé ñáyiú.

³ Te yucu ñávaha ní dácáhu ìní ñáhá-xí xii té Jüdás déhe té Iscarioté, te núú tnàhá téé-án cúú ùxúú tnàhá cue téé xica cuu ndìhi-gá ní cùú.

⁴ Te té Jüdás-án nì sáhá-dé ní ndatnúhu-dé ndìhi cue téé cùú dútú cùnù, ndìhi cue téé tàxi tnunì ñáhá xii cue téé quide cuendá veñúhu nàcuáa cada-dé cuáha cuendá-dé Jèsús núú-güedé.

⁵ Te ío ní cudíi ìní-güedé, te ní xáhaⁿ-güedé xii-dé sá cuñaha-güedé díhúⁿ,

⁶ te ní xáhaⁿ-dē sá cúú quèheⁿ-dé díhúⁿ-āⁿ, te ní ngúita-dé ndúcú-dē nàcuáa cada-dé cuáha cuendá-dé Jèsús núú-güedé òré ñà túú ñáyiú.

Cùdini Jesús ndìhi cue téé xica cuu ndìhi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu nì que-saha vico xexí-yu pàá sá ñà túú yìhi levadurá, te diu-ni nduu-āⁿ sáhní-güedé ìⁿ mbéé lihli xèxí-yu. ⁸ Te Jèsús ní xáhaⁿ-gá xii té Pélú ndìhi té Juáa:

—Chí cuàhánⁿ chi cada túha-ndo núú cùdini-o sacuaa nduu vico pascuá —càchi-gá xáhaⁿ-gá xii-güedé.

⁹ Te ní xícánⁿ tnúhú-güedé núú-gá, te xáhaⁿ-güedé xii-gá:

—¿Te ndéé cáá vèhe cuiní-n càda túha-ndí-i? —càchi-güedé xáhaⁿ-güedé xii-gá.

¹⁰ Te ní xáhaⁿ Jèsús xii-güedé:

—Chí cùndèdóho na càchi tnúhu-í xii-ndo nàcuáa cada-ndo. Òré quíhu-ndo xití ñuú núú quíhíⁿ-ndó, te naníhí-ndó ìⁿ téé tànehe ìⁿ yoó ndute, te téé-ánⁿ candéndaha-ndo-dē quíhíⁿ, te núú ndèdacaà vehe na ndíhu-dé te xíaⁿ quíhu-ndo.

¹¹ Te cuñaha-ndo xii xitohó vehe-án: “Yaá cúú Mèstrú càchi-gá núú ndèdacaà xichi xití vehe-n cuñaha nùu-n xii-gá cudini-gá ndìhi cue téé xica cuu ndìhi-gá sacuaa nduu vico pascuá”, duha cuñaha-ndo. ¹² Te dàtnunì danèhé ñáhá-dē xii-ndo ìⁿ quartú cáhnú càa núú ñinu, chi vehe yòdo tnaha cuu-xi, te sa ní quide túha-dé nchaa sá ná ndìhi, te nchòhó dícó-ná sá cùdini-o cada túha-ndo —càchi-gá xáhaⁿ-gá xii-güedé.

¹³ Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cùdini-güedé ndìhi-gá sacuaa nduu vico pascuá-án.

¹⁴ Te sátá nì tnahá òré cudini Jesús ndìhi cue téé ní táuchíuⁿ-gá cáhánⁿ tnúhu-gá

núú ñáyiú, te cuánguihu ndihi ñaha-gǎ xii-güedé mèsá. ¹⁵ Te xáhaⁿ-gǎ xii-güedé:

—¡Ducaⁿ-ni ïo sàni iní-í sá cúdini ndihi ñaha-í xii-ndo sàcuua nduu vico pascuá òré cúmǎní-gǎ sáá nduu ndòho-í te cuú-í! ¹⁶ Te na càchí tñúhu-í xii-ndo sǎ vǎ dúhá-gǎ caxi ndihi ñaha-í xii-ndo ndùu vico pascuá, chi ndéé òré ná sáá nduu nàsáá-ndó núú táxí tnùní Yǎ Ndióxi cundecu-o, te dàvá-áⁿ cada iní-ndó sǎ dàtná sá cǎxí tucu-o chi ïo váha cuu iní-ó cùndecu-o —cachí-gǎ xáhaⁿ-gǎ xii-güedé.

¹⁷ Te ní queheⁿ-gǎ ñⁿ vǎsú ñúhú ndúdí ndéhé yoho yàha stilé, te ní ndacáⁿ táhú-gǎ núú Yǎ Ndióxi, te dàtnùní ní xáhaⁿ-gǎ xii-güedé:

—Chí quehéⁿ vǎsú ñúhú ndúdí ndéhé yoho yàha stilé-a, te coho-ndo lùha luha nchaa-ndo. ¹⁸ Te na càchí tñúhu tucu-í xii-ndo sǎ vítná-nǎ duha xihí ndihi ñaha-í xii-ndo ndúdí ndéhé yoho yàha stilé-a te vá cóhó ndihi ñaha-gǎ-í, dico na sáá nduu nǎníhí tnáhá-ó núú ndécú Tǎtà-í Dútú Ndióxi táxí tnùní-gǎ, te dàvá-áⁿ cada iní-ó sǎ dàtná sá cóhó ndihi ñaha tucu-í xii-ndo, chi ïo cudí iní-ó —càchí-gǎ xáhaⁿ-gǎ xii-güedé.

¹⁹ Te sátá ñǎ túhú cóhó-güedé ní cudini-güedé, te ní queheⁿ-gǎ pǎá te ní ndacáⁿ táhú tucu-gǎ núú Yǎ Ndióxi, te dàtnùní ní táhú cuèchi-gǎ, te ní dǎcǎhñu ñaha-gǎ xii-güedé, te xáhaⁿ-gǎ:

—Pǎá-a cùu-xi datná yiqui cùnú-í, chi cahni ñaha-güedé xii-í sá cuèndá-ndó, te

ducaⁿ-ni càxi-ndo pǎá-a cuèndá ndacu iní ñáhá-ndó xii-í —càchí-gǎ xáhaⁿ-gǎ xii-güedé.

²⁰ Te diu-ni ducaⁿ ñǎ quide-gǎ ndihi vǎsú ñúhú ndúdí ndéhé yoho yàha stilé, chi ní queheⁿ-gǎ te òré sǎñaha-gǎ xii-güedé coho-güedé, te ní xáhaⁿ-gǎ:

—Ndúdí ñúhú vǎsú-a cada iní-ndó sǎ cuú-xí dàtná ñíñí-í sá cǎtí òré cahni ñaha-güedé xii-í. Te sá dúcáⁿ cǎtí ñíñí-í xiǎⁿ cutnùní ndáá sá Yǎ Ndióxi cada-gǎ ingá núú sǎ váha sá cuú-xi-ndó.

²¹ ¡Dico vitna chi iha tnáhá téé cuáha cuèndá ñáhá xii-í núú cuè téé cùu úhú iní ñáhá yihí-dé mèsá.

²² Te yúhú Téé cùu ñani tnáhá-ndó nchaa-ndo ñuhu ichi-í cuáhá-í cuú-í dàtná ní cachí Yǎ Ndióxi. ¡Dico ndáhú ní cuu téé ducaⁿ na cuáha cuèndá ñáhá xii-í núú cuè téé cùu úhú iní ñáhá! —càchí-gǎ xáhaⁿ-gǎ xii-güedé.

²³ Te ní ngúita-güedé ndúcú tnúhu núú tnáhá-güedé núu ndéda càa-güedé ducaⁿ càda cuáha cuèndá ñáhá xii-gǎ núú cuè téé cùu úhú iní ñáhá.

Xíndatnúhu-güedé ndédacàa-güedé cunuu-gǎ

²⁴ Te sátá dúcáⁿ te ní ngúita-güedé xíndatnúhu-güedé núu ndédacàa-güedé tàú-güedé cunuu-güedé. ²⁵ Dico Jèsús ní xáhaⁿ-gǎ xii-güedé:

—Nchaa cue téé yìndaha ñaha xii ñáyiú ïo tàxi tnùní-güedé, te mee-güedé cuíní-güedé sá càháⁿ váha ñáyiú cuèndá-güedé. ²⁶ Dico nchòhó vá dúcáⁿ càda-ndo,

chi núu ìⁿ-ndo cùn^u te cada-ni-ndo sã ñà túú cùn^u-ndo, àdi cuu-ndo ìⁿ tée tàxi tnuní ñáhá xìi cue tée xìnu cuechi, te cada-ni-ndo sã cúú-ndó ìⁿ tée xìnu cuechi-áⁿ.
 27 Te vã càchí-ó sã tée xìnu cuechi cunu-gá-dé, chi tée quíhu mèsá cún^u-gá-dé. Dico yúhú ndécú ndìhi ñaha-í xii-ndo dàtná ìⁿ tée xìnu cuechi.

28 Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sã táyáha-í véxi.
 29 Te Tãtà-í Dútú Ndiòxí ní cachí-gá sã táxi tnùn-í, te yúhú càchí-í xii-ndo sã sãá nduu te tnàhá-ndó tàxi tnùn-í.
 30 Te dàvã-áⁿ caxi-o coho-o càda-o núú táxi tnùn-í, te yàcáⁿ ngúita-ndo càda ndáá-ndó cuèchi ndi ùxúú xichi ñáyi^u isràél — càchí-gá xáhaⁿ-gã xii-güedé.

Jèsús càháⁿ-gá sã tẽ Pèlú cúnaha-dě xii ñáyi^u sã ñà túú xìní ñáhá-dě xii-gá

(Mt. 26:31-35; Mr. 14:27-31; Jn. 13:36-38)

31 Te Xítohó Jesucristú ní xáhaⁿ-gã xii té Xímú:

—Yòhó Xímú, cundedóho váha ìⁿ tnúhu na càháⁿ-í-a, chi dàtná cuení-n quide táchí triú sácáⁿ-xi duha sácáⁿ-xi dàcáⁿ, ducaⁿ quèsaha yucu ñávaha cada ñaha-xi xii-ndo. Chi coto ndeé ñáhá-xi xii-ndo te núu ndisa sàndáá iní ñáhá-ndó xii-í. 32 Dico yúhú xicáⁿ táhù-í núú Yã Ndiòxí cuendá-n, cuendá sã vã dáñá ndeé-n quindáá iní ñáhá-n xii-í. Te òré ndixi túu iní-n sã ñà túú ní quide váha-n, te quíhíⁿ-n cuáha-n cuè tée cùndìhi-n

tnúhu ndee iní cuendá canchicúⁿ nihnu-ni-güedé ichi Yã Ndiòxí —càchí-gá xáhaⁿ-gã xii-dé.

33 Te ní xáhaⁿ-dě xii-gá:

—Mèstrú, sa ndècu túha-í sã quíhíⁿ ndìhi ñaha-í xii-n vècaá, àdi cuéi na cùú ndìhi ñaha-í xii-n —càchí-dé xáhaⁿ-dě xii-gá.

34 Te Jèsús ní xáhaⁿ-gã:

—Pèlú, na càchí tnúhu-í xii-n sã cùmání-gã cana ìⁿ líhi te úní xito càháⁿ-n núú ñáyi^u sã ñà túú xìní ñáhá-n xii-í —càchí-gá xáhaⁿ-gã xii-dé.

Sa ní cuyatni ndoho Jèsús

35 Te Jèsús ní xáhaⁿ-gã xii-güedé:

—Te cùtnàhá ní tendaha ñaha-í xii-ndo ní sáháⁿ-ndó chiúⁿ-í, chi ñà túú ní cànehe-ndo ní ìⁿ sã cúhúⁿ dìhúⁿ-ndó, te ní ìⁿ sã cúhúⁿ ndàchiuⁿ-ndo ñà túú ní cànehe-ndo. Te chí càchí tnúhu núu íó ìⁿ sã ní cùmání xii-ndo —càchí-gá xáhaⁿ-gã xii-güedé.

Te ní xáhaⁿ-güedé:

—Ñáhá, chi ní ìⁿ sã ñà túú ní cùmání xii-ndí —càchí-güedé xáhaⁿ-güedé xii-gá.

36 Te ní xáhaⁿ-gã:

—Te vitna núu ndècu ndìhi-ndo sã sácúhuⁿ dìhúⁿ-ndó, àdi sã sácúhuⁿ ndachiuⁿ-ndo te canehe-ndo. Te núu ñà túú ndècu ndìhi-ndo machití, te nadico-ndo dóó t̃cachi nihnu-ndo te cuaaⁿ-ndo. 37 Te na càchí tnúhu-í xii-ndo sã dàcuítí sã yáha-í nàcuáa càháⁿ-xi núú tütú Yã Ndiòxí núú càchí-xi: “Ìⁿ-ní ní quide ñaha-güedé xii-gá, ndìhi

cue téé ndècu cuéchi-xi", duha càchí-xi núú tütú-gá. Te ñá díú-ní xǎn yáha-í chi nchaandi tühú nàcuáa càháⁿ-xi núú tütú-gá yáha-í — càchí-gá xáhaⁿ-gǎ xii-güedé.

38 Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gá:

—Chí návii-nǎ yuhu-ndo, vá càháⁿ-gá-ndó —càchí-gá xáhaⁿ-gǎ xii-güedé.

Jèsús càháⁿ ndihi-gá Yǎ Ndiöxí yucu Òlívú

(Mt. 26:36-46; Mr. 14:32-42)

39 Te Jèsús ní quee-gá cuáháⁿ-gá yucu Òlívú, chi ducaⁿ tnàhí quide-gá. Te cue téé xica cuu ndihi-gá nchicúⁿ ñáhá-güedé xii-gá cuáháⁿ. 40 Te òré ní quexio-gá xiáⁿ, te ní xáhaⁿ-gǎ xii-güedé:

—Chí càháⁿ ndihi Yǎ Ndiöxí cuendá sá vǎ dácàháⁿ ñáhá yucu ñávǎha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gǎ xii-güedé.

41 Te sátá dúcáⁿ te ní quee dǎiⁿ-gá tnuú-güedé cuáháⁿ-gá ñⁿ xio, te sa ñùnchií luha ní xica ndehe-gá núú ndécú-güedé, te xiáⁿ ñí ngüíñí xití-gǎ càháⁿ ndihi-gá Tǎtá-gǎ Dútú Ndiöxí. 42 Te xáhaⁿ-gǎ:

—Táu, te núú dicó cachí-n te taunihnu ñaha-n xii-í cuendá sá vǎ ndóhò-í ná sǎá òré, dico vá cádá-n nàcuáa càchí iní méé-í, chi cada-n nàcuáa càchí iní méé-n —càchí-gá xáhaⁿ-gǎ xii Tǎtá-gǎ Dútú Ndiöxí.

43 Te sátá dúcáⁿ te ní quexio ñⁿ espíritú xínú cuèchi núú

Yǎ Ndiöxí ní sǎñaha-gǎ-xi tnúhu ndee iní xii-gá. 44 Te òré súúní ndihú iní-gá, te uuⁿ-gá súúní ñí yuhu ní iní-gá càháⁿ ndihi-gá Dútú Ndiöxí, te tnéé-gǎ cáá dàtná cáá ñíñí te ngóyó núú ñúhú.

45 Te sátá ñí yáha ní càháⁿ ndihi-gá Tǎtá-gǎ Dútú Ndiöxí, te ní ndacuíñí-gá cuánuhú-gá núú ñí dándò-gá cue téé-áⁿ, te òré ní nasáá-gá te xixídí-güedé cuendá sá ïo cuéhé tnúhu sàni iní-güedé cuendá-gá. 46 Te xáhaⁿ-gǎ xii-güedé:

—¿Ná cuendá xidí-ndó? Chí ndácóo, te càháⁿ ndihi-ndo Yǎ Ndiöxí cuendá sá vǎ dácàháⁿ ñáhá yucu ñávǎha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gǎ xii-güedé.

Ní tñi-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexio vai cue téé, te ñⁿ téé xica cuu ndihi-gá nání Jüdás cúnù-dé yódó nùu-dé núú-güedé ní quexio ndéé núú-gǎ, te ní teyuhu ñàha-dé xii-gá, te núú tnàhá téé-áⁿ cúú ùxúú cue téé xica cuu ndihi-gá. 48 Te ní xáhaⁿ Jèsús xii-dé:

—Jüdás, ¿te yòhó cuáha cuendá ñáhá-n xii yúhú Téé cùu ñaní tnàhá-ndó nchàa-ndo núú cuè téé cùu úhú iní ñáhá xii-í càháⁿ-n núú duha tèyuhu ñaha-n-áⁿ? —càchí-gá xáhaⁿ-gǎ xii-dé.

49 Te sátá ñí xini nchaa cue téé cündihi Jesús nàcuáa cùu

cue téé ní quexìo-áⁿ, núu ní xicáⁿ tnúhú-güedě núú-gă, te xăhaⁿ-güedě xii-gă:

—Mèstrú, ¿cuu nàá-ndí ndihi-güedé ndihi machítí-a ñă? —càchí-güedé xăhaⁿ-güedě xii-gă.

⁵⁰ Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dütú cúnúu-gă, te ní quendeé duuⁿ lóho-dé.

⁵¹ Te Jèsús ní xăhaⁿ-gă xii-güedé:

—Chí dáñá-güedě, vá dúcáⁿ càda-ndo —cachí-gă xăhaⁿ-gă xii-güedé.

Te ní dácàá-gă ndaha-gă ní tendaha-gă núú ní xindeé lóho téé-áⁿ, te ní nduu váha dàtná-ni càa. ⁵² Te nchaa cue téé cùu dütú cúnúu, ndihi cue téé tàxi tnuní nchaa cue téé quide cuendá veñúhu sá ìo cúnúu, ndihi cue téé cùu sacuéhé núú ñăyiu isràél, nchaa cue téé-áⁿ véxi tñi ñaha-güedě xii-gă, te ní xăhaⁿ-gă xii-güedé:

—Nchòhó, nèhe-ná-ndó màchítí, nèhe-ná-ndó càrrutí véxi-ndo núú ndécù-í, dàtná quidé-ndó ìⁿ ñadúhú quidé ñàha-ndo xii-í. ⁵³ Te ducaⁿ-ni ní xini-ndó ní xíndecu-í xiti veñúhu càhnu sá ìo cúnúu ní xóo danèhé-í ñăyiu, te ní lùha ñá túú ní cùu tnándeé ñáhá-ndó xì-í òré-áⁿ, te vitna ní sáá òré ducaⁿ càda-ndo, te cada sácúíhná nàcuáa cùu ini-xi —càchí-gă xăhaⁿ-gă xii-güedé.

Té Pèlú càháⁿ-dé núú ñăyiu sá ñá túú xini-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18,

25-27)

⁵⁴ Te ní tñi-güedé Jèsús, te ndèca ñaha-güedé xii-gă cuáháⁿ vehe téé cùu dütú cúnúu-gă, te té Pèlú xica xica-ni nchicúⁿ ñáhá-dě xii-gă cuáháⁿ. ⁵⁵ Te òré ní quexìo-güedé xiáⁿ te ní dàtnáhá-güedé ñuhú quehé vehe-áⁿ, te ni càndéé yuhu nùhú-áⁿ ní ngóo teté-güedé, chi quide víxiⁿ-xi, te tnàhá té Pèlú ní ngóo teté ndihi ñaha-dě xii-güedé. ⁵⁶ Te xiáⁿ ndécú ìⁿ xichí xínú cuèchi vehe-áⁿ, te òré ní xini-xi núcóo teté tnàhá té Pèlú, te ní ndacoto-xi núú-dě, te ní xăhaⁿ-xi xii-güedé:

—Tnàhá téé-a xica cuu ndihi-dé téé ndèca-güedé cuánguihu-ăⁿ —càchí-xi xăhaⁿ-xi xii-güedé.

⁵⁷ Dico té Pèlú ñá túú ní núnúu-dé, te xăhaⁿ-dě xii-xi:

—Yúhú ñá túú xini-í téé-ăⁿ —càchí-dé xăhaⁿ-dě xii-xi.

⁵⁸ Te tna tnaa-ni ní cuu, te ní xini ñáhá tucu ìⁿ-dé, te xăhaⁿ-dě:

—Yòhó tnàhá-n xica cuu ndihi-n téé ndèca-güedé cuánguihu-ăⁿ —càchí-dé xăhaⁿ-dě xii-dé.

Dico té Pèlú ní xăhaⁿ-dě:

—Ñáhá, ñá díú yúhú xicá cùu ndihi-í-dé —càchí-dé xăhaⁿ-dě.

⁵⁹ Te sa ní cuu dàtná ìⁿ òré te càchí tucu ingá-dé:

—Ndáá sá tée-a xica cuu ndihi-dé téé ndèca-güedé cuánguihu-ăⁿ, chi tnàhá-dé cúú-dě téé distritú Galileá —càchí-dé xăhaⁿ-dě xii-güedé.

⁶⁰ Te té Pèlú ní xăhaⁿ-dě xii téé-áⁿ:

—Yúhú ñá túú cùtnuní iní-í nása ndúu tnúhu càháⁿ-n — cächí-dé xáhaⁿ-dë.

Te ni vátá xñu ducaⁿ-gã tnúhu càháⁿ-dé ní cana-ni ñⁿ líhi. ⁶¹ Te Xítohó Jesucristú ní nchócótó-gã núú-dë, te òré-ni-áⁿ ñí ndacu iní-dé tnúhu ní xáhaⁿ-gã xii-dé sá cùmání-gã cana ñⁿ líhi, te úní xito cáháⁿ-dé sá ñà túú xini ñáhá-dë xii-gá. ⁶² Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dë ní ndixi cuéchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue téé ndeé ñáhá xii Jèsús ní cudíquí ndeé ñáhá-güedë xii-gá, te ní dádáhu-güedé núú-gã, te ní caniha-güedë xii-gá, te xáhaⁿ-güedë:

—¡Cáháⁿ ná cótó yò ní caniha xii-n! —cachí-güedé xáhaⁿ-güedë xii-gá.

⁶⁵ Te cuéhé víhí-gã tnúhu cuéhé ní xáhaⁿ-güedë xii-gá.

Jèsús ndécú-gã jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá ñí túndaá, te ní tacá cue téé cùu sacuéhé núú ñáyiú isráél, ndihi cue téé cùu dútú cùnùu, ndihi cue téé dàcuaha ñaha xii-yu nchaá tnúhu ní chídó tnùní ndíi Moisés, te ndèca-güedé Jèsús cuáháⁿ núú cádá-güedë jùndá, te òré ní quexìo-güedé ndihi-gá núú cádá-güedë jùndá-áⁿ, te ní xáhaⁿ-güedë xii-gá:

⁶⁷ —Cuìní-ndí cachí tnúhu-n xii-ndí núu ñu-n cùu-n Cristú Yaá ní tendaha

Yá Ndiöxí véxi ñuyíú-a — cächí-güedé xáhaⁿ-güedë xii-gá.

Te ní xáhaⁿ-gã xii-güedé:

—Te núu na cächí-í sá diú-í cúú Cristú ñá, te ní vá quíndáá iní-ndó, ⁶⁸ àdi te núu ñⁿ sá ná càcáⁿ tnúhu-í núú-ndó, te ní vá cächí tnúhu-ndo, te ní vá dáñá ñàha-ndo. ⁶⁹ Dico vitna ní cuyatni nduu ngóo yúhú Tée cùu ñaní tnáhá-ndó nchàa-ndo xio cuha Dútú Ndiöxí Yaá ío cùnùu — cachí-gá xáhaⁿ-gã xii-güedé.

⁷⁰ Te dātnuní nchaá-güedé ní xícáⁿ tnúhú-güedë núú-gã, te xáhaⁿ-güedë xii-gá:

—¿Te yòhó cúú-n Dëhe Yá Ndiöxí te núu ducaⁿ vāni? —cächí-güedé xáhaⁿ-güedë xii-gá.

Te ní xáhaⁿ Jèsús:

—Ndáá sá diú Dëhe-gã cúú-í dàtná cächí mée-ndó-áⁿ —cächí-gá xáhaⁿ-gã xii-güedé.

⁷¹ Te ní xitnàha-güedé:

—Ñá túú-gã xini ñuhu-xi cue téé cáháⁿ núu ndáá sá ndecuéchi-dé àdi ñá túú ndecuéchi-dé chi yuhu mee-dë ní cáháⁿ-dé vitna ní xíndedóho-o —cächí-güedé xitnàha-güedé.

23

Jèsús ndécú-gã núú tē Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaá-güedé ní ndacuñí-güedé, te ndèca-güedé Jèsús cuáháⁿ núú tē Pilatú, ² te núú tē-áⁿ ñí ngúíta-güedé sácáⁿ cuéchi-güedé cuendá-gá, te xáhaⁿ-güedé:

—Ní naníhí-ndí té-e-a dándahú-dé ñáyiú ñuú-ó, chi xáhaⁿ-dě xii-yu sá vǎ chǎhu-gá-yu impuèstú xii té Cèsár téé ío cùnuu, te cǎchí-dé sá díú-dě cúú-dě Crístú Yáá ní tendaha Yǎ Ndiòxí véxi ñuyíú-a te yíndaha-dé ñáyiú cǎchí-dé —cǎchí-güedé xáhaⁿ-güedé xii-dé.

³ Te té Pilatú ní xícáⁿ tnúhu-dé núú-gǎ, te xáhaⁿ-dě xii-gá:

—¿Ndáá sá díú-n cùu-n téé yíndaha ñaha xii ñáyiú isràél-ǎⁿ? —cǎchí-dé xáhaⁿ-dě xii-gá.

Te Jèsús ní xáhaⁿ-gǎ xii-dé:

—Diu-í yíndaha-í-yu — cǎchí-gá xáhaⁿ-gǎ xii-dé.

⁴ Te té Pilatú ní xáhaⁿ-dě xii nchaa ñáyiú, ndihí cue téé cùu dútú cúnùu:

—Yúhú cúnùníní iní-í sá ñà túú nì ìⁿ cuéchi téé-a — cǎchí-dé xáhaⁿ-dě xii-yu.

⁵ Dico níhi-gá ní cáháⁿ-güedé, te xáhaⁿ-güedé:

—Cǎchí-ndí sá ío dusaⁿ xíquide ñáyiú cuendá nchaa sá dánèhé ñáhá-dě xii-yu, te ní quesaha-dě ndéé distritú Galileá, te ní yáha-dé ñihí distritú Jüdeá dánèhé-dé ñáyiú, te vítna ní sáá-ni-tu-dé ndéé ndíha dǎnehé-dé-yu — cǎchí-güedé xáhaⁿ-güedé xii té Pilatú.

Jèsús ndécú-gǎ núú té Hèrodés

⁶ Te sá dúcáⁿ ñí tecú dóho té Pilatú ní cacu nehé-yu distritú Galileá, núu xíáⁿ ní xícáⁿ tnúhú-dě núú-yu núu téé Galileá cúú-gǎ. ⁷ Te ní xáhǎⁿ-yu sá díú tée yácáⁿ

cúú-gǎ, núu xíáⁿ ní na dàyáha ñaha-dě xii-gá ndaha té Hèrodés téé cùu gobiernú distritú Galileá chi nduu-ǎⁿ ndécú-dě tnáhá-dé ñuú Jerusalén-áⁿ. ⁸ Te òré ní xiní té Hèrodés-áⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quini ñáhá-dě xii-gá te ñá túú tnáhí xiní ñáhá-dě xii-gá ní cùu, chi cuendá-ni tnúhu ñihí-dé cuendá-gá, te ndètu-dé sáá ìⁿ nduu quini ñáhá-dě xii-gá, te cada-gá ìⁿ sá vǎ yǒo tnáhí ndàcu cada cundehe-dé ní sani iní-dé. ⁹ Te vǎi sá ñí xícáⁿ tnúhú-dě núú Jèsús, dico ní ìⁿ tnúhu ñá túú ní cáháⁿ-gá. ¹⁰ Te xíáⁿ xíndecu tnáhá cue téé cùu dútú cúnùu, ndihí cue téé dàcuaha ñaha xii ñáyiú nchaa tnúhu ní chídó tnùníní ndí Moisés, te cue téé-áⁿ sùúní ío iní-güedé sácáⁿ cuéchi-güedé cuendá-gá. ¹¹ Te té Hèrodés ndihí cue téé cùu sandadú-dé ñá túú ní cùu váha iní-güedé núú Jèsús, te ní cudíquí ndéé ñáhá-güedé xii-gá, te ní dácuíhnú ñaha-güedé dóó váha xii-gá dàtná cáá dǒó sácúíhnu cue téé sàquíndaha ñaha xii ñáyiú. Te dàtnùníní té Hèrodés ní dánùhú ñáhá tucu-dé xii-gá ndaha té Pilatú. ¹² Te nduu-ǎⁿ ñí tnáhá tnúhu té Pilatú ndihí té Hèrodés, chi cùu úhú iní tnáhá-güedé ní cùu.

Cǎchí-güedé sá cáhíní-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³ Te té Pilatú ní na-datácá-dé nchaa cue téé cùu dútú cúnùu ndihí dava-gá cue

tée cùnūu, ndihi nchaa ñáyiū ñuú-án,¹⁴ te ní xáhaⁿ-dë:

—Nchòhó ndécá-ndó tēe-a véxi ní taxi cuendá-ndó-dë iha, te cächí-ndó sã ïo dusaⁿ quide ñáyiū cuendá nchaa sá dánèhé ñáhá-dë xií-yu, te núú-ndó ndücu tnúhu-í núú-dë núu ná ní quide-dé. Dico yúhú cútnúí iní-í sá ñà túú nì ïⁿ cuéchi-dé dàtná càháⁿ-ndó-ãⁿ.¹⁵ Te cuéi té Hèrodés diu-ni ducaⁿ càháⁿ-dé sá ñà túú cuéchi-dé núu ní techiūⁿ ñaha tucu-dé cuándixi-dé iha. Te vitna sa ní cutnùí iní-ó sã ñà túú táú-xi cahni-o-dë chi ñà túú cuéchi ní quide-dé.¹⁶ Te na dândoho-ni-í-dé te dácácu-í-dé —cächí-dé xãháⁿ-dë xií-yu.

¹⁷ Te ndi tnahá nduu vico pascuá te dacuití sã dácácu té Pilatú-án ïⁿ cue tée yíhi ve-caá, chi ducaⁿ tnàhi quide-dé.¹⁸ Dico nchaá-yu ní cuáá-yu, te xãháⁿ-yu xii-dé:

—¡Queñuhu tée nàni Jesús-án, te cahni-n-dë! ¡Te dácácu-n tē Barrábás! — cächí-yu xãháⁿ-yu xii-dé.

¹⁹ Te té Barrábás-án ñi sanu ichi-dé ñáyiū ñuú ingá ichi, te ní ngúita-yu ndihi-dé ní cuu úhú iní-yu cue tée cùchiuⁿ, te ní sahani-dé ndíyí núu xiãⁿ ní chihí ñaha-güedë ve-caá xii-dé.²⁰ Te té Pilatú cuini-dé dácácu-dé Jèsús núu xiãⁿ càháⁿ ndihi ñaha tucu-dé xií-yu ni cùu,²¹ dico uuⁿ-gá níhi ní cuáá-yu, te ní xáháⁿ-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! — cächí-yu xãháⁿ-yu xii-dé.

²² Te xito cuu úní ní xáhaⁿ tē Pilatú:

—¿Te ná cúú cuéchi ní quide-dé te núu ducaⁿ cuini-ndó càda-í-dé-í? Te yúhú cútnúí iní-í sá ñà túú cuéchi ní quide-dé núu xiãⁿ ñà túú táú-xi cahni-o-dë, te na dândoho-ni-í-dé te dácácu-í-dé —cächí-dé xãháⁿ-dë xií-yu.

²³ Dico níhi-ni càháⁿ-yu xãháⁿ-yu sá ná càta caa ñaha-dé xii-gá núu cùrúxí, te ñáyiū-án ndihi nchaa cue tée cùu dútú cùnūu xicáháⁿ níhi-güedé ndíhi-yu ndéé ní xínu iní té Pilatú cada-dé nàcuáa cächí iní-yu.²⁴ Te ní xáháⁿ-dë xií-yu sá cúú càda-dé nàcuáa xãháⁿ-yu.²⁵ Te ducaⁿ te ní dácácu-dé té Barrábás tée ní sanu ichi ñáyiū ñuú ingá ichi, te diu-ni-dé ní sahani-dé ndíyí núu xiãⁿ ní xíhi-dé ve-caá, te dàtnúí ní táúchiúⁿ-dë cada-güedé Jèsús nàcuáa xãháⁿ-yu.

Sàta caa-güedé Jèsús núu cùrúxí
(Mt. 27:32-44; Mr. 15:21-32; Jn. 19:17-27)

²⁶ Te ndëca-güedé Jèsús cuáháⁿ núu catá càa ñaha-güedé xii-gá, te ichi cuáháⁿ-güedé ndíhi-gá ní tnii-güedé ïⁿ tée ñuú Cirené nání-dë Xímú ñúhú-dë ichi duha cuándixi-dé ní sáháⁿ-dé yucu, te ní dácúidó ñaha-güedé xii-dé cùrúxí nchídó Jèsús, te ní ngúita nchicúⁿ-dé sátá-gã.

²⁷ Te ïo cuéhé ñáyiū nchicúⁿ ñáhá xii-gá cuáháⁿ, te vai ñáyiū dñí ïo níhi ndàhi-yu sá ndíhú iní-yu cuendá Jèsús.²⁸ Te Jèsús ní nchócótó-gã núú-yu, te ní xáháⁿ-gã:

—Nchòhó ñáyiú dìhí ñuú Jerusálén, vá ndàhyú-ndó cuendá-í chí ndàhyú cuendá méé-ndó ndìhí cuendá déhe-ndo. ²⁹ Chí sáá nduu quèsaha ñáyiú: “Sá vâha táhú nchaa ñáyiú ñá túú càcu déhe-xi, ndìhí nchaa ñáyiú vátá quíní-gá cuhuⁿ déhe-xi, chí ní ñà túú xíní-yu dacadí-yu”, duha quesàhá-yu. ³⁰ Te dàvá-áⁿ cũñaha ñáyiú xii nchaa tindúú ndìhí nchaa núú xìquí: “Chí tácuuⁿ ngónchihi ñaha-ndo xì-ndí”, duha cũñàhá-yu. ³¹ Te núu yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha —càchí-gá xáhaⁿ-gã xii-yu.

³² Te ndèca tucu-güedé úú tñahá cue téé ndècu ndisa cuéchi-xi cuáháⁿ cuendá cahni ñaha-güedé xii-güedé ndìhí Jèsús. ³³ Te òré ní quexìo-güedé ndìhí-gá ìⁿ xichi núú nání Yìquí Díquí Ndíyi, te xíaⁿ nĩ sata caa ñaha-güedé xii-gá núú cùrúxí, ndìhí úú cue téé ndècu ndisa cuéchi-xi-áⁿ, te ìⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá diu-ni núú cùrúxí tucu. ³⁴ Te ní xáhaⁿ-gã xii Tátá-gã Dútú Ndiòxí:

—Táu, cada càhnu iní sá quidé-güedé, chí ñá túú cùtnuní iní-güedé ná cúú sã quidé-güedé —càchí-gá xáhaⁿ-gã.

Te cue téé cùu sandadú ní xito ndèé-güedé nõu ndèdacàa-güedé cuu

cuendá-güedé dóó-gã. ³⁵ Te nchaa ñáyiú xĩndecu-áⁿ ndèhè-yu nàcuáa quide-güedé Jèsús, te nchaa cue téé cùnuu ní cudíquí ndeé ñáhá-güedé xii-gá, te ní xitnàha-güedé:

—Te dava ñáyiú ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Crístú Yáá ní tendaha Yã Ndiòxí véxi ñuyíú-a cùu-dé —càchí-güedé xitnàha-güedé.

³⁶ Te tñahá cue téé cùu sandadú ní cudíquí ndeé ñáhá-güedé xii-gá, chí ní sàndehe yatni-güedé núú táca-gá sãñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cúu-n tõe yìndaha ñaha xii ñáyiú isràél, te dácácu nihnu mee-n —càchí-güedé xáhaⁿ-güedé xii-gá.

³⁸ Te ní taxi ndecu-güedé ìⁿ sá ndèé lètrá ndàa díquí-gã te ndèé úní núú tñuhu, tñuhu griégú, ndìhí tñuhu látín, ndìhí tñuhu hèbreú, te duha quèe-xi ndi nuní núú tñuhu-áⁿ “Téa cùu-dé téé yìndaha ñaha xii ñáyiú isràél”, duha quèe-xi.

³⁹ Te ìⁿ téé ndècu ndisa cuéchi-xi, téé ní sata caa-güedé dìñi-gá xicuhèé ñáhá-dé xii-gá, te xáhaⁿ-dè:

—Te núu yòhó cúu-n Crístú Yáá ní tendaha Yã Ndiòxí véxi ñuyíú-a, te dácácu nihnu mee-n, te dácácu nihnu ñaha xìi nchúhú tñahá-ndí tucu —càchí-dé xáhaⁿ-dè xii-gá.

⁴⁰ Dico ingá téé cùndihí-dé téé tàcaa ingá xio dìñi-gá

ní tenàá ñáhá-dě xii-dé, te xáhaⁿ-dě:

—¿Te náa ñá túú ndàcu iní-n Yá Ndiòxí vitna duha càa-o ndoho-o ndìhi téé nàni Jèsús-a ñá? ⁴¹ Chi nchoo tàù ndisa-o sá dúhá ndòho-o nacháhu-o cuèchi-o, dico Jèsús-a chi ñá túú cuèchi-dé —càchí-dé xáhaⁿ-dě xii téé tàcaa ndìhi-dé-áⁿ.

⁴² Te dātñùnì ní xáhaⁿ-dě xii-gá:

—Jèsús, ndacu iní ñáhá-n xii-í òré ná quìxi-n taxi tnuní-n ñùyíú-a —càchí-dé xáhaⁿ-dě xii-gá.

⁴³ Te Jèsús ní xáhaⁿ-gã:

—Na càchí tnúhu ndáá-í xii-n sá méí ndùu vitna cundecu ndìhi ñaha-í xii-n núú nì nduu táhù-í cundecu-í —càchí-gá xáhaⁿ-gã xii-dé.

Ní xíhí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee nihii ñuyíú, te ducaⁿ-ni càa ní cuu ndéé caá únì sacuaa. ⁴⁵ Chi ñá túú-gã ní dàyehé nchícanhii te ní ndátá dǒó cúú còrtiná veñúhu càhnu sá ìo cùnuu ní quée dava ndáá. ⁴⁶ Te nihi ní cáháⁿ Jèsús, te xáhaⁿ-gã xii Tātá-gã Dútú Ndiòxí:

—Táu, naqueheⁿ cuèndá-n espíritú-í —càchí-gá xáhaⁿ-gã xii Tātá-gã.

Te tnúhu-ná-áⁿ nì cáháⁿ-gá te ní xíhí-ni-gá.

⁴⁷ Te òré ní xiní téé cùu capitáⁿ sá dúcáⁿ nì cuu, te ní ndacu iní-dé Yá Ndiòxí, te ní cachí-dé:

—Sá ndáá ndisa sá tée-a cùu-dé ìⁿ téé ìo quide ndáá ndécú ñùyíú-a ni cùu —duha ní cachí-dé.

⁴⁸ Te chitu ñáyiú ní tacá xíáⁿ chi cuíní-yu cundèhé-yu nása cada-güedé Jèsús. Te sátá nì yáha ní xiní-yu nàcuáa ní quide ñaha-güedé xii-gá, te ní ndìhí-yu ní ndaca ta caní-yu pèchú-yu cuánuhú sá ndìhú iní-yu. ⁴⁹ Dico ndècu tnahá cue ñáyiú xìnì tnahá ndìhi Jèsús, ndìhi ñáyiú dìhí ní chinchícúⁿ ñáhá xii-gá ndéé distritú Galileá, te ñáyiú-áⁿ xica-ni xixínutñí-yu xíndéhě-yu nchaa nàcuáa ní quide ñaha-güedé xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ téé ñuú Arimateá nání-dé Chèé, te ñuú-áⁿ yíndèhu-xi distritú Jüdeá, te ìo váha iní-dé te quide ndáá-dé núú Yá Ndiòxí, te tnahá-dé cúú-dé chiuⁿ te ní xíndecu-dé jündá cue téé isràél. ⁵¹ Te ñá ní tnahá tnahí iní-dé nàcuáa ní cáháⁿ-güedé núú jündá nàcuáa cada-güedé Jèsús. Te téé-áⁿ ndétú-dé sáá nduu ndìhu ndaha ñaha Yá Ndiòxí xii-dé ndìhi ñáyiú.

⁵² Te téé-áⁿ nì sáháⁿ-dé núú tǎ Pilatú te ní xáhaⁿ-dě sá núu vá cündèe iní-dé dañá-dé chindúxi-dé yiqui cùñú Jèsús. Te té Pilatú-áⁿ nì sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ìⁿ dóó cuixíⁿ, te ní chihi-dé ìⁿ yaú nchii yiqui naha càva, te vátá yǒo ìⁿ-gá nguíndüxi yaú-áⁿ. ⁵⁴ Te cùu-xi nduu vispré nduu ndètatú ñáyiú, núu xíquide túha-ná-yu sá cúú ìngá nduu.

55 Te nchaa ñáyiú díhí ní chinchícúⁿ ñáhá xì Jèsús ndéé distritú Galileá ndëndáhá-yu té Chèé ní sáháⁿ núú nchíi yaú-áⁿ, núú ní xiní-yu nàcuáa ní sacáⁿ-dé yiqui cùñú-gá xití yaú-áⁿ. 56 Te ducaⁿ te cuánuhú-yu vehé-yu, te ní quide túha-yu acití sàháⁿ tnámí, ndihí pomadá, te ní ndetatú-yu ingá nduu-áⁿ nǐ quidé-yu nàcuáa càháⁿ tnúhu Yá Ndiõxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

1 Te ndumìngú nehé víhí-ní cuáháⁿ tucu ñáyiú díhí núú nchíi yaú ní chihi-güedé yiqui cùñú Jèsús, te nèhé-yu nchaa sá sáháⁿ tnámí nǐ quide túha-yu-áⁿ cuáháⁿ, te tnàhá tucu ñⁿ úú-gá tnàha dihí-yu nchícúⁿ ñáhá xì-yu cuáháⁿ. 2 Te òré ní quexió-yu yuhu yaú-áⁿ te ní xiní-yu sá yúú ndedí ñⁿ xio-ná ndécú, 3 te ní quíhu-yu xití yaú-áⁿ, dico ñá túú-gá yiqui cùñú Jèsús yíhí. 4 Te ñá ní cùtnuní tnàhí iní-yu ndéé ichi cuáháⁿ yiqui cùñú-gá, te ní xiní-yu úú espíritú xínú cuèchi núú Yá Ndiõxí xìnutnì-xi dñí-yu te xìxìhnu-xi dóó chàhnchí. 5 Te ní yùhú-yu te ñá túú ní cùyí-yu cundèhé-yu cue espíritú-áⁿ, te cue espíritú-áⁿ nǐ xáhaⁿ-xi xì-yu:

—¿Ná cuèndá nándùcu-ndo Jèsús Yaá ndécú vǐvú núú yíndüxi ñáyiú ní xíhí-i? 6 Te ñá túú-gá yiqui cùñú-gá

ndécú ìha chi sa ní ndoto-gá, te chí dándàcu iní nàcuáa ní càháⁿ-gá cùtnàhá ní xíndecu-ndo ndihí-gá distritú Galileá, 7 chi ní cachí-gá sá méé-gá cúú-gá ñaní tnàhá-ndó nchaa-ndo, te dacuití cuàha cuèndá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-áⁿ cuú-gá dico nduu úní sá cuú-gá te ndoto-gá, duha ní cachí-gá xii-ndo.

8 Te òré-áⁿ nǐ ndacu iní-yu tnúhu ní càháⁿ Jèsús. 9 Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuèndú núú ndì úxí ñⁿ cue téé ní táuchíúⁿ Jèsús càháⁿ tnúhu-gá, ndihí núú dàva-gá ñáyiú. 10 Te ñáyiú ducaⁿ nàha tnúhu cuánuhú núú-güedé-áⁿ cúú tǎ Màriá Magdalèna, ndihí tá Juáná, ndihí tá Màriá nǎná tǎ Jàcobó, ndihí dàva-gá ñáyiú díhí. 11 Dico cue téé-áⁿ nǐ sani iní-güedé sá dicó càhú iní-yu tnúhu xáhãⁿ-yu xii-güedé nùu ñá túú ní sàndáá iní-güedé nàcuáa ní xáhãⁿ-yu.

12 Dico té Pèlú ní quee-dé xínú-dé cuáháⁿ cuándéhé-dé yaú núú nǐ chihi-güedé yiqui cùñú Jèsús, te ní sáá-dé te ní ngáundeyi-dé xító ñihni-dé xití yaú-áⁿ te ní xiní-dé sá méé-nǎ dóó nǐ xíducúⁿ nuu-gá yúcu ñⁿ xio, te ío ní cuñúhu-dé sá dúcáⁿ nǐ cuu, te ní natnì-dé ichi cuánuhú-dé vehe núú xíndecu-güedé.

*Ichi ñuú Emàús**(Mr. 16:12-13)*

13 Te ñuú-ni nduu-ãñ ñúhú ùú cue téé ní xica cuu ndihi Jèsús ichi cuáháñ-güedé ññ ñuú nání Emàús, te sàcúhuñ-güedé dàtná úú òré ichi ndéé ñuú Jerusalén, te ndéé ñuú Emàús.

14 Te ta ndàtnúhu-güedé cuáháñ nchaa nàcuáa ní cuu, 15 te nini dùcañ xicáháñ-güedé, te Jèsús ní natnahá ñáhá-gã xii-güedé te ndèca tnaha-gã ndihi-güedé cuáháñ. 16 Te cuéi ndèhe ñaha-güedé xii-gá dico dàtná ññ sá ndedí núú-güedé, chi ñá ná quini ñáhá-güedé xii-gá ní cùu. 17 Te Jèsús ní xicáñ tnúhú-gã núú-güedé, te xáhañ-gã:

—¿Ná tnúhu xicáháñ-ndó ñúhu-ndo ichi núu ducañ ño cùu ndiyí-ndó-í? —càchí-gá xáhañ-gã xii-güedé.

18 Te ññ téé nani Cleofás ní xáhañ-dé xii-gá:

—¿Te ná cuèndá nchaa ñáyiú íchí ññ sáá ñuú Jerusalén xini-yu nchaa nàcuáa ní cuu, te ññ ñni-ná yòhó ñá túú xini-n-í? —càchí-dé xáhañ-dé xii-gá.

19 Te ní xáhañ-gã xii-güedé:

—¿Te ná ní cuu-i? —càchí-gá xáhañ-gã xii-güedé.

Te ní xáhañ-güedé xii-gá:

—Cuèndá Jèsús téé ñuú Nazàrét càháñ-ndí, chi téé-áñ cúú-dé ññ téé càháñ tnúhu Yá Ndiòxí, te ío váha nduu tnúhu càháñ-dé ní cùu, te quide-dé sá vã yòo tnàhí ndàcu cada nacuáa cudíí ñí Yá Ndiòxí ndihi ñáyiú ní cùu. 20 Te cue téé cùu dútú cùnùu, ndihi cue téé cùnùu taxi tnuní ñáhá xii-ndí

ní sáha cuèndá ñáhá-güedé xii-dé núú tẽ Pilatú te ní sata caa ñaha-güedé te núú cùrúxí-áñ ññ xihí-dé. 21 Dico vïtna sá ní cuu úní nduu sá ññ xihí-dé, te nchúhú ní sani iní-ndí sá tẽ-áñ dàcácu nihnu ñaha-dé xii nchúhú ñáyiú isràél núú nchàa tnúndòho tnúhu ndàhú ndécú-ndí. 22 Dico ío cùnúhu-ndí cúú, chi ññ úú ñáyiú ñíhí ní tuha ñaha xii-dé ndécú ndihi-ndí ní sáháñ ngotó-yu ndéxuehe tàcuñhdá-gá yaú núú ññ chihi-güedé yiqui cùnú-dé, 23 te ní nasáa-yu càchí-yu xii-ndí sá ñà túú-gã yiqui cùnú-dé yíhí xití yaú-áñ. Te ní xini-yu espíritú xínú cuèchi núú Yá Ndiòxí, te ní xáhañ-xi xii-yu sá ndécú vïvú-dé. 24 Te sátá dúcáñ te ññ úú cue téé cùnùhi-ndí ní sáháñ ndéhé-güedé yaú-áñ, te ní xini-güedé sá ndàá cúú-xí nchàa tnúhu ní càháñ ñáyiú ñíhí-áñ, dico ñá túú ní xini-güedé téé-áñ —càchí-güedé xáhañ-güedé xii-gá.

25 Te Jèsús ní xáhañ-gã xii-güedé:

—Ío cùmání sã xini tnuní-ndó, chi ío cuèé sàndáá iní-ndó tnúhu ní càháñ cue téé ní xóo càháñ tnúhu Yá Ndiòxí ndéé sanaha! 26 ¿Te náa ñá túú tàú-xi sá ndóhó Cristú òré cùmání-gã sáá nduu ndàa-gã andiú núú ndécú Dütú Ndiòxí cundecu-gã-áñ? —càchí-gá xáhañ-gã xii-güedé.

27 Te ní ngúita-gã xáhañ-gã nàcuáa quèe-xi nchaa tnúhu càháñ-xi núú tütú Yá Ndiòxí cuèndá-gá, te díhna-gá ní

cáháⁿ-gá nàcuáa ndùu nchaa tnúhu yòdo tnuní núú tütú ndíi Moisés, te dǎtnúní ní cáháⁿ-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáháⁿ tnúhu Yá Ndiǒxí ndéé sanaha.

28 Te òré ní quexio-güedé yuhu ñúú núú cuáháⁿ-güedé-áⁿ, te Jèsús ní quide-ni-gá sá yáha-gá quíhíⁿ-gá ingá xichi ní cùu. 29 Dico ní cáháⁿ ndàhú-güedé núú-gǎ sá quéndõo-gá xíaⁿ ndetatú-gá ndihi-güedé, te xáhaⁿ-güedé xii-gá:

—Quendóo ndihi ñaha xii-ndí iha ndetatú-n chi sa ní cuaa, te tnavíi cundiquiⁿ —càchí-güedé xáhaⁿ-güedé xii-gá.

Te xíaⁿ cáá ñⁿ vehe cuánguihu-güedé ndetatú-güedé ndihi-gá. 30 Te òré sa yíhi-güedé mèsá ndihi-gá cùdini ndihi ñaha-güedé, te ní queheⁿ-gá pàá te ní ndacáⁿ táhú-gǎ núú Yá Ndiǒxí, te ní táhú cuèchi-gá te dǎtnúní ní dácáhñu ñaha-gǎ xii-güedé. 31 Te òré-áⁿ ñí naquiní ñáhá-güedé xii-gá ní cùu, dico uuⁿni ní ndóñhúhú-gǎ. 32 Te ní xítñaha-güedé:

—Te ndáá sá sũúni cùdíi ñí-ó òré tá ndàtnúhu-o ndihi Jèsús véxi ichi, te ta dǎnehé ñáhá-gǎ xii-o ncháa nacuáa quèe-xi tnúhu càháⁿ-xi núú tütú Yá Ndiǒxí —càchí-güedé xítñaha-güedé.

33 Te ñá túú-gǎ ní xíndetu-güedé chi ndíhi-ni ní natñi-güedé ichi cuánuhú-güedé xáhaⁿ-gǎ te ní dǎnehé ñúú Jerusalén, te ní nasáá-güedé núú xíndecu ndi

ùxí ñⁿ cue téé ní táuchíúⁿ Jèsús cáháⁿ tnúhu-gá, ndihi dava-gá ñáyiu. 34 Te cue téé xíndecu-áⁿ xáhaⁿ-güedé:

—Ndáá sá ñí ndoto Yaa cúú Mèstrú, chi ní xini ñáhá tǎ Xímú —càchí-güedé xáhaⁿ-güedé.

35 Te cue téé ní nasáá-áⁿ ñí cani-güedé cuendú nàcuáa ní cuu ichi, ndihi nàcuáa ní cuu ní naquiní-güedé Jèsús òré ní táhú-gǎ pàá ní dácáhñu ñaha-gǎ xii-güedé.

Jèsús ní quexio-gá núú xíndecu cue téé ní xica cuu ndihi-gá

(Mt. 28:16-20; Mr. 16:14-18; Jn. 20:19-23)

36 Te càháⁿ dúcáⁿ-ní-güedé nàcuáa ní cuu ní quexio Jèsús ní ngúnutñi-gá ndéé tnuú-güedé, te xáhaⁿ-gǎ xii-güedé:

—Yá Ndiǒxí chindèe ñaha-gǎ xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

37 Te da ní yùhú-güedé, te ní sani iní-güedé sá dícó ñⁿ espíritú cúú sǎ ndéhé-güedé ní cùu. 38 Dico Jèsús ní xáhaⁿ-gǎ xii-güedé:

—¿Ná cuendá yùhú-ndó, te sáni ñⁿ sani úú iní-ndó-í? 39 Chí cùndèhe ndaha-í ndihi sáhá-í te quiní-ndó nǎ ñu-ni-í. Te chí téndàha ñaha xii-í te cundehe-ndo, te núu ñⁿ espíritú ndécú yiqui cuñú-xi dǎtná ndécú ndihi yùhú —càchí-gá xáhaⁿ-gǎ xii-güedé.

40 Te sáta dúcáⁿ ñí ñáhá-gǎ xii-güedé ndaha-gá ndihi sáhá-gǎ. 41 Te ío

ní cuñúhu-güedé, te ní cudíí ìní-güedé sá ndécú-gã tnuú-güedé dico sàni ìn sàni úú ìní-güedé, te ní xáhaⁿ Jèsús xii-güedé:

—¿Ndècu ndihi-ndo luha sá cáxí-ó ìha ñá? —càchí-gá xáhaⁿ-gã xii-güedé.

⁴² Te ní sáñaha-güedé xii-gã luha chácá ñí chíhó, ndihi dítá ñúñú ñúhú ndùdí, ⁴³ te ní queheⁿ-gá te ndèhe-güedé ní xexi-gá. ⁴⁴ Te dàtnùní ní xáhaⁿ-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnàhá ndécú ndihi ñaha-gá-í xii-ndo, chí ní cachí-í sá dàcùití cãda-xi nchaa nacuaá cáháⁿ-xi núú tütú ndí Moisés, ndihi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndióxi ndéé sanaha, ndihi núú librú Sãlmú —càchí-gá xáhaⁿ-gã xii-güedé.

⁴⁵ Te òré-án ñí sáñaha-gã sá xìní tñùní-güedé, te ní tecú tñùní-güedé nchaa tnúhu càháⁿ-xi núú tütú Yá Ndióxi.

⁴⁶ Te ní xáhaⁿ-gã xii-güedé:

—Ducaⁿ ndéé tñuní núú tütú Yá Ndióxi sá dàcùití sá yúhú Crístú cuú-í, te nduu úní ndoto-í. ⁴⁷ Te ñihí ñuyíú cùténuu tnúhu ní cáháⁿ-í, dico díhna nuu-gã ñuú Jerusálén ngüíta-yu cacunehe ñahá-yu xii-í, te cáháⁿ-yu nacuaá ní dánèhé-í-yu, te cùñàhá-yu xii cue ñáyiú sá ná dàndixi túu-yu ìní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natñí-yu ichi Yá Ndióxi, te ducaⁿ te cada càhnu ìní-gá nchaa yíca

cuèchi-yu. ⁴⁸ Te vitna nchòhó cuu-ndo cuè téé cáháⁿ ndáá nchaa nacuaá ní cuu chí ní xìní núú-ndó. ⁴⁹ Te yúhú tendaha-í Espíritú Yá Ndióxi quixi cundecu ndihi-ndo, chí ducaⁿ ñí cachí-gá. Dico chí cùndècu-ni ñuú Jerusálén-áⁿ ndéé ná quèxio Espíritú Yá Ndióxi ngündecu ndihi-ndo cuèndá chindee ñaha-xi xii-ndo cada-ndo nchaa nacuaá ní cáháⁿ-í —càchí-gá xáhaⁿ-gã xii-güedé.

Jèsús cuándaa-gá andiu
(Mr. 16:19-20)

⁵⁰ Te Jèsús ní queñuhu ñaha-gã xii-güedé ñuú Jerusálén ndécá ñaha-gã cuáháⁿ ñuú Bètaniá, te xíaⁿ ñí ndonehe-gá ndaha-gá núú ñnu, te ní xícáⁿ táhú ñaha-gã xii-güedé núú Yá Ndióxi. ⁵¹ Te sátá ñí xícáⁿ táhú ñaha-gã xii-güedé núú Yá Ndióxi, te ní quee-gá tnuú-güedé cuándaa-gá andiu.

⁵² Te ní ngüíta-güedé ní cachí-güedé sá ìo càhnu cuu Jesús, te ní natñi-güedé ichi cuánuhú-güedé ñuú Jerusálén, te súúní cùdíí ìní-güedé ñúhú-güedé ichi. ⁵³ Te nchaa nduu ní xíndecu-güedé veñúhu càhnu sá ìo cùnuu ní ndacáⁿ táhú-güedé núú Yá Ndióxi, te ní cachí-güedé sá ìo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÚNÍ TÉ JUÀÁ

Déhe Yá Ndiöxí ní cuu-gá ìⁿ ñáyiu

1 Cùmání-gã ngáva ñuyú, te sa ndècu ndìhi Yá Ndiöxí Déhe-gá. Te ìⁿ-ni xícuu-gá. Te Déhe-gá-áⁿ ñí cuu-gá dàtná ìⁿ tnúhu, chi ní cachí tnúhu-gá nàcuáa càa Tátá-gã Dútú Ndiöxí. 2 Te sa ndècu-gá ndìhi Dútú Ndiöxí te ní ngáva ñuyú. 3 Te òⁿ-ni tnúhu mee Dútú Ndiöxí ní cuu ní cadúha Déhe-gá nchaa sá íó ñuyú. Te núu ñá túú Déhe-gá ñá, te ñá túú ñá coo ñuyú-a ní cùu. 4 Te òⁿ-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. 5 Te tnúhu-gá ní xité nuu-xi núú ndécú nchaa ñáyiu ñúhu ichi cuehé ichi duha. Te ñáyiu-áⁿ cú^u-yu dàtná cue ñáyiu ndècu ìⁿ núú nées, te òⁿ-ni-yu cachí iní-yu xocàni-yu tnúhu-gá dico vá ndác^u-yu.

6-7 Te ní xíndecu ìⁿ tée ní xínani-dé Juàá, te tée-áⁿ ñí táuchíúⁿ Yá Ndiöxí sá càháⁿ-dé tnúhu-gá núú ñáyiu. Te ní xáhaⁿ-dè xií-yu sá vèxi Déhe-gá ñuyú-a, te dandìxi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. 8 Te ñá díú mèe té Juàá ní dandìxi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càháⁿ-dé sá Déhe

Yá Ndiöxí véxi-gá dandìxi túu-gá iní-yu. 9 Te ndáá ndisa sá mée-gã dandìxi túu-gá iní ñáyiu ñuyú-a cuendá cutnùní iní-yu nàcuáa ndùu cuendá Yá Ndiöxí.

10 Te ní xíndecu-gá ñuyú-a, te ñáyiu ñuyú-a ñá ní cùtnuní iní-yu yoo cùu-gá, te òⁿ-ni mee-gã ní cadúha-gá ñuyú-a ní guide-gá chiúⁿ ní táhú Dútú Ndiöxí. 11 Te ní quixi-gá ñuyú ñí cadúha mee-gã, dico cue ñáyiu ñuyú-a ñá ní cùu váha iní-yu núú-gã. 12 Dico davá-yu ní sándáá iní ñáhã-yu xii-gá, te ní nduu táh^u-yu ní nduu déhe ñaha Yá Ndiöxí xií-yu. 13 Te ñá túú ní ndùu déhe ñaha-gã xií-yu sá cú^u-yu déhe ñáyiu ñuyú-a, àdi sá ndécú tátã-yu, ñánã-yu chi mee Yá Ndiöxí ducaⁿ ñí cuini-gá cunduu sá ndúú dèhe ñaha-gã xií-yu.

14 Te Déhe-gá ní quixi túu-gá ñuyú-a, te ní cuu-gá ìⁿ yiquí cùñú ní xíndecu ndìhi ñaha-gã xii nchoo cue ñáyiu ní xica cuu túu ndìhi-gá. Te ní xiní-ó sã ío càhnu cuu-gá cuendá sá ìⁿ dìí-dí-ni-gã cúu-gã Déhe Yá Ndiöxí, te ío cùndahú iní ñáhã-gã chindèe ñaha-gã xii nchoo ñáyiu ndècu ñuyú-a, te ío ndáá càháⁿ-gã. 15 Te duha ní càháⁿ té Juàá cuendá Déhe Yá Ndiöxí ní xáhaⁿ-dè xii ñáyiu:

—Cuendá tée iha ni càháⁿ-í ndéé càni-gá ní cachí-í sá quíxí ìⁿ tée quixi. Te tée-áⁿ cùnùu-gá-dé, chi díhna-gá-dé sa ndècu-dé dàcúxí yùhú — duha ní xáhaⁿ-dè xií-yu.

16 Te ío váha iní Yaa-án chi xito ñaha-gá xii-o nchaa-o ñⁿ nduu ñⁿ nduu. 17 Te ndí Moisés ní cachí tnúhu ndí tnúhu Yá Ndiöxí tnúhu sá sánú ìchi ñaha xii-o nacuaa cundecu-o, dico Déhe-gá Xítohó Jesucristú ní cachí-gá sá ío cùu iní ñáhá Yá Ndiöxí xii-o. Te ní cáháⁿ-gá nchaa dava-gá tnúhu ndáá. 18 Te ñá ñⁿ ñáyiú xini túu-yu Yá Ndiöxí. Dico ñⁿdii díi-ni Déhe-gá Yaa ndécú ndíhi-gá càchí tnúhu-gá nàcuáa càa-gá.

Té Juàá tée dàcuandute ñaha xii ñáyiú càháⁿ váha-dé cuèndá Xítohó Jesucristú

(Mt. 3:11-12; Mr. 1:7-8; Lc. 3:15-17)

19 Te cue tée isràèl ndécú ñúú Jerusálén ní tendaha-güedé cue dútú ndíhi cue tée cùu levítá cuáháⁿ-güedé núú ndécú tē Juàá ndúcú tnúhu-güedé núú-dē nūú ná tée cùu-dé. 20 Te ní cáháⁿ ndáá-dé ní xáhaⁿ-dē xii-güedé:

—Yúhú, ñá díú Cristú Yaa ní tendaha Yá Ndiöxí véxi ñuyíú-a cùu-í —càchí-dé xáhaⁿ-dē.

21 Te ní xáhaⁿ tùcu-güedé:

—¿Te yoo cùu yohó vání? ¿Á yohó cùu-n tē Èliás? —càchí-güedé xáhaⁿ-güedé xii-dé.

Te ní xáhaⁿ tē Juàá:

—Yúhú, ñá díú tē Èliás cùu-í —càchí-dé xáhaⁿ-dē.

Te xáhaⁿ tùcu-güedé:

—¿Te yohó cùu-n tēe ní cachí cue tée ndée sanaha quixi cáháⁿ tnúhu Yá Ndiöxí-áⁿ? —càchí-güedé xáhaⁿ-güedé xii-dé.

Te ní xáhaⁿ-dē:

—Ni ñá díú tēe-áⁿ cùu-í —càchí-dé xáhaⁿ-dē xii-güedé.

22 Te ní xáhaⁿ tùcu-güedé:

—¿Te ná tée cùu yohó vání?, cuèndá ducaⁿ nàcani tnúhu-ndí núú cùe tée ní tendaha ñaha xii-ndí véxi-ndí, te cáháⁿ duuⁿ-n nūú ná tée cùu-n —càchí-güedé xáhaⁿ-güedé xii-dé.

23 Te ní xáhaⁿ tē Juàá:

—Yúhú cùu-í tée xica cáháⁿ xití yucu nàcuáa ní cáháⁿ ndí Chaiá, chi ndí-áⁿ ní cachí ndí: “Chí dáñá ìchi cuehé ìchi duha ndècu-ndo te tñi-ndo ìchi váha, chi véxi Yaa ío cùnuu”, duha ní cachí ndí —càchí tē Juàá xáhaⁿ-dē xii-güedé.

24 Te cue tée ndùcu tnúhu núú tē Juàá nūú ná tée cùu-dé, cue tée-áⁿ ní tendaha ñaha cue tée cùu fariséú xii-güedé.

25 Te ní xáhaⁿ tùcu-güedé xii tē Juàá:

—¿Ná cuèndá dàcuandute-n ñáyiú te núu ñá díú Cristú cùu-n, te ni ñá díú tē Èliás, te ni ñá díú tē véxi cáháⁿ tnúhu Yá Ndiöxí cùu-n vání? —càchí-güedé xáhaⁿ-güedé xii-dé.

26-27 Te ní xáhaⁿ tē Juàá:

—Yúhú ní ngódó núu-í dàcuandute-í ñáyiú. Dico nchícúⁿ ñⁿ tée véxi, te tée-áⁿ cúnūu-gá-dé dàcúxí yúhú, chi yúhú cùu-í ñⁿ tée duuⁿ duuⁿ ñá túú tau nandaxi cuèdicó ñⁿ chàu-dé dico quide-í chiúⁿ-dē. Te tée-áⁿ sa ñúhu tnahá-dé tnuú-ndó dicó-ni sá ñá túú xini-ndó-dē —càchí-dé xáhaⁿ-dē.

28 Duha ní cuu ñúú Bètábará ñúú cáá ndaa ingá xio yúte

Jordán, yacáⁿ ní xíndecu té Juáá ní dácuándute-dé ñáyiu.

Jesús quidé càhnu ini-gá nchaa yíca cuèchi ñáyiu

²⁹ Te nduu tnée ní xiní té Juáá Jèsús véxi yatni-gá núu ndécú-dě ndihi ñáyiu. Te ní xáhaⁿ-dě xii-yu:

—Chí cùndèhe té-ăⁿ, chi té-ăⁿ cúú-dě Crìstú Yaá ní tendaha Yă Ndiôxí véxi ñuyíú-a, te véxi-dé cada càhnu ini-dé nchaa yíca cuèchi ñáyiu ñuyíú. Te cùu-dé dàtná ìⁿ mbéé quiti ío váha iní-xi. ³⁰ Te ñu té-ăⁿ ní cachí-í sá cànchícúⁿ-dé quixi. Te cùnuu-gá-dé dàcúxí yǔhú, chi dihna-gá-dé sa ndècu ní cachí-í xii-ndo. ³¹ Te ní yǔhú ñá túú xini-í-dé ní cùu, dico xica cuu-í dácuándute-í ñáyiu cuendá nchaa ñáyiu israél quini ñáhă-yu xii-dé —cachí-dé xáhaⁿ-dě xii-yu.

³² Te ní xáhaⁿ tùcu-dé:

—Ní xiní-í Espiritú Yă Ndiôxí ní quee-xi andiu véxi cuuⁿ-xi ngúndecu ndihi ñaha-xi xii-dé, te dàtná cáá lómá cáá Espiritú-áⁿ véxi cuuⁿ-xi. ³³ Te yúhú ñá túú xini-í-dé ní cùu, dico Yă Ndiôxí Yaá ní tendaha ñaha xii-í xíca cùu-í dácuándute-í ñáyiu, Yaá-áⁿ ní cachí tnúhu-gá sá tée na quini-í ngúndecu ndihi Espiritú-gá sá véxi cuuⁿ andiu, te té-ăⁿ taxi-dé Espiritú-gá cundecu ndihi-o. ³⁴ Te yúhú ní xiní-í-dé te xini ndáá-í sá Dèhe Dútú Ndiôxí cúú-dě. Te xiăⁿ cachí tnúhu-í xii-ndo —cachí té Juáá xáhaⁿ-dě xii-yu.

Cue téé dihna nuu xica cuu ndihi Jesús

³⁵ Te nduu tnée-áⁿ ñu-ni xiáⁿ ndécú té Juáá ndihi úú cue téé xica cuu ndihi-dé. ³⁶ Te ní xiní-dé Jèsús ñuhú-gă ichi, te ní xáhaⁿ-dě xii cue téé xica cuu ndihi-dé-áⁿ:

—Chí cùndèhe té-ăⁿ, chi té-ăⁿ cúú-dě Crìstú Yaá ní tendaha Yă Ndiôxí véxi ñuyíú-a. Te cùu-dé dàtná ìⁿ mbéé quiti ío váha iní-xi —cachí-dé xáhaⁿ-dě.

³⁷ Te sá dúcáⁿ ní cáháⁿ té Juáá núú cuè téé úú ndihi-dé-áⁿ núu ní chinchícúⁿ-güedé Jèsús. ³⁸ Te ní nchócótó-gă ndaa sátá-gă, te ní xiní-gá sá nchícúⁿ ñáhă-güedě xii-gá. Te ní xáhaⁿ-gă xii-güedé:

—¿Ná nánducu-ndo? —cachí-gá xáhaⁿ-gă xii-güedé.

Te ní xáhaⁿ-güedě:

—¿Ndée ndécú-n, Ràbíí? —cachí-güedé xáhaⁿ-güedé xii-gá.

Te Ràbíí-áⁿ quée-xí Mèstrú tnúhu mee-güedě. ³⁹ Te ní xáhaⁿ Jèsús xii-güedé:

—Chí nèhé te quini-ndo —cachí-gá xáhaⁿ-gă.

Te ní xica-güedé cuáhăⁿ-güedé, te ní quexiò-güedé núú quidé vèhe-gá. Te ndècu-ni-güedé ndihi-gá ní cuaa, chi dàtná òré caa cúmí sacuaa ní sáá-güedé.

⁴⁰ Te úú cue té-ăⁿ ní tnii-güedé tnúhu ní cáháⁿ té Juáá, te ní chinchícúⁿ-güedé Jèsús. Te núú úú cue té-ăⁿ, ìⁿ-dé nání-dě Ndrìxí, te ñaní-dé cúú tē Xímú, àdi Pelú chi úú ñu-dé. ⁴¹ Te té Ndrìxí-áⁿ ní nanducu-ni-dě ñaní-dé te ní xáhaⁿ-dě:

—Ní naníhí-ndí téé cùu Mesiás —cachí-dé xáhaⁿ-dě.

Te Mèsiás-án quée-xí Crìstú tnúhu mee-güedë, Yaá ní ten-daha Yá Ndiöxí véxi ñuyíu-a.

42 Te ndèca té Ndrìxí ñaní-dé cuáháⁿ núú ndécú Jèsús. Te òré ní xiní ñáhá Jèsús xii té Ximú, te ní xáhaⁿ-gã:

—Yòhó cúu-n tē Ximú déhe té Jónás, te vitna danàni ñaha-í Céfás xii-n —càchí-gá xáhaⁿ-gã.

Te Céfás-ã quée-xí Pèlú tnúhu mee-güedë.

Jèsús ní cáháⁿ-gá té Lìpé ndìhi té Natanàél

43 Te nduu tnèé ní sani iní-gá quihíⁿ-gá distritú Galilea. Te ní naníhí-gã ñⁿ tée nàni Lìpé, te ní xáhaⁿ-gã xii-dé:

—Néhe ná quihíⁿ-ó núú quihíⁿ-í-a —càchí-gá xáhaⁿ-gã.

44 Te té Lìpé-án cúu-dë tée ñúú Bètsaidá. Te diu-ni ñúú yacáⁿ cúu ñúú té Ndrìxí ndìhi té Pèlú. 45 Te té Lìpé ní naníhí tnáhá-dë ndìhi té Natanàél, te ní xáhaⁿ-dë:

—Ní naníhí-ndí tée dii cuèndú-xi ní chidó tnùnì ndíi Moisés ndìhi dava-gá cue tée ní xóo cáháⁿ tnúhu Yá Ndiöxí ndéé sanaha. Te tée-án nání-dë Jèsús déhe té Chéé, tée ñúú Nazàrét —càchí-dé xáhaⁿ-dë.

46 Te ní xáhaⁿ tē Natanàél xii té Lìpé:

—¿Te náa ío váha càa ñúú Nazàrét núu da yacáⁿ quee tée cáháⁿ tnúhu Yá Ndiöxí? —càchí-dé xáhaⁿ-dë.

Te ní xáhaⁿ tē Lìpé:

—Néhe ná quihíⁿ-ó te quiní-n —càchí-dé xáhaⁿ-dë.

47 Te òré ní xiní Jèsús té Natanàél tá cùyatni-dé

cuáháⁿ, te ní cáháⁿ-gá cuèndá-dé te ní cachí-gá:

—Tée véxi-ãⁿ cúu-dë mei tēe isràél, te ñá ñⁿ ndùu dandahú-dé ñáyiú —càchí-gá xáhaⁿ-gã.

48 Te ní xáhaⁿ tē Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dë.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gã-n càha yutnu ngúxí-ãⁿ te ni tē Lìpé vátá cáná ñaha-gá-dé xii-n òré-án —càchí-gá xáhaⁿ-gã xii-dé.

49 Te sá dúcáⁿ ñí cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúu-n Dèhe Dútú Ndiöxí yíndàha-n ñáyiú isràél —càchí-dé xáhaⁿ-dë xii-gã.

50 Te Jèsús ní xáhaⁿ-gã:

—Cuèndá sá ñí xiní ñáhà-í xii-n càha yutnu ngúxí xíãⁿ iní ñáhá-n, dico cuéhé-gã núú sã quíní-n —càchí-gá xáhaⁿ-gã xii-dé.

51 Te ní xáhaⁿ tùcu-gá:

—Na càchí tnúhu ndáá-í sá sàá nduu, te quiní-ndó nàcaáⁿ andiú. Te quiní-ndó cuè espíritú xínú cuèchi núú Yá Ndiöxí sá ndàa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gã xii-güedé.

2

Vico tnãndaha ío ñúú Cànaá

1 Te nduu úní sá dúcáⁿ ñí cuu te ní xóo ñⁿ vico tnãndaha ñúú Cànaá, ñⁿ ñúú yíndèhu distritú Galilea. Te yacáⁿ ní xíndecu nãná

Jèsús. ² Te tnàhá Jèsús ndihi cue tée xica cuu ndihi-gá ní cáháⁿ-yu cuáháⁿ-gá ndihi-güedé vico-áⁿ. ³ Te òré ní ndihi vìnú, te ní xáhaⁿ náná Jèsús xii-gá:

—Ñá túú-gã vìnú ndécú ndihí-yu —càchí-aⁿ xãhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xìni ñuhu-xi da yúhú cúñaha-n cuendá vìnú-áⁿ, chi vátá tnàhá-gá òré quiní-yu yoo cùu yúhú —càchí-gá xáhaⁿ-gã xii-aⁿ.

⁵ Te ní xáhaⁿ-aⁿ xì ñáiyu xìnu cuechi:

—Cada-ndo nchàa nacuáa na cáháⁿ Jèsús —càchí-aⁿ xáhaⁿ-aⁿ.

⁶ Te yácáⁿ nútñí ñú quídi yúú te quée dàtná ñⁿ cièndú lítrú ndute ñⁿ ñⁿ quídi-áⁿ. Te ndute-áⁿ nándihí ñáiyu isràél ndáhã-yu te nàqueté-yu cóhõ-yu chí ducaⁿ tnàhí quidé-yu nàcuáa sándáá iní-yu Yá Ndiõxí. ⁷ Te ní xáhaⁿ Jèsús xii nchaa cue tée xìnu cuechi:

—Nadachitú-ndó ndùte ndi nchaa quídi-áⁿ —càchí-gá xáhaⁿ-gã xii-güedé.

Te ní nadachitú-güedé. ⁸ Te ní xáhaⁿ-gã:

—Vitna te tava-ndo lùha, te canehe-ndo quihíⁿ cuáha-ndo tée quide vico —cachí-gá xáhaⁿ-gã xii-güedé.

Te ducaⁿ ñí quide-güedé ní tava-güedé luha nèhe-güedé cuáháⁿ ní sáha-güedé tée quide vico. ⁹ Te ní xito ndéé tée quide vico-áⁿ, te sa ní nduu-xi vìnú, te ñá túú ní xìní-dé ndéé véxi-xi, dico mee cuè tée xìnu cuechi sa naha-güedé

núú ñí tava-güedé. Ducaⁿ te tée quide vico-áⁿ ñí cana-dé tée tnãdaha. ¹⁰ Te ní xáhaⁿ-dë:

—Nchaa ñáiyu quide vico queñuhú-yu díhna-gá vìnú váha. Te sa vãi vìnú váha xihí-yu, te dàtnùní queñuhú-yu vìnú ndàhú. Te yòhó díhna-gá vìnú ndàhú ní queñuhu-n, te ndéé núú ñí ndihi-ná ní queñuhu-n vìnú váha —càchí tée quide vico-áⁿ xáhaⁿ-dë xii tée tnãdaha-áⁿ.

¹¹ Te sá ñí nadatiù Jèsús ndute-áⁿ ñí nduu-xi vìnú cúú-xí ñⁿ chiuⁿ díhna nuu sã vã yõo tnàhí ndàcu cada ní quide-gá ñuú Cànaá, ñⁿ ñuú yíndèhu distritú Galileá, te chiùⁿ ní quide-gá-áⁿ cúú-xí ñⁿ chiuⁿ cahnu vihi, núu xíãⁿ ní cutnùní iní-yu sá ño càhnu cuu-gá, te ní sándáá iní ñáhá nchàa cue tée xica cuu ndihi-gá.

¹² Te sátá ñí yáha vico, te ní xica Jèsús ndihi náná-gã, ndihi cue ñaní-gá, ndihi nchaa cue tée xica cuu ndihi-gá cuáháⁿ-yu ñuú Capèrnaúm. Te yácáⁿ ní xíndecú-yu ñⁿ úu nduu ndihi-gá.

Jèsús ñá túú tnàhá iní-gá nàcuáa quide ñáiyu xití veñúhu (Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáiyu isràél vico pàscuá, te ní xica Jèsús cuáháⁿ-gá ñuú Jerusalén. ¹⁴ Te sátá ñí sáá-gá yácáⁿ, te ní xica-gá cuáháⁿ-gá veñúhu càhnu sá ño cùnuu, te xití veñúhu-áⁿ ñí xìní-gá ndécú ñáiyu dicó-yu ndicutu, mbéé ndihi lõmá, te tnàhá ñáiyu dàma díhúⁿ núcõo-yu

ní xiní-gá. ¹⁵ Te ní queheⁿ-gá ñⁿ úú yoho, te ní cáunuu tnàha-gá, te ní dáyùhu-gá ñáyiu ní queé-yu quehé veñúhu, ndihi ndicutú-yu ndihi mběě-yu. Te cue ñáyiu dàma díhúⁿ-áⁿ ní dāngöyo-gá díhũⁿ-yu, te ní dāndúá-gá mèsá-yu. ¹⁶ Te ní xáhaⁿ-gá xii cue ñáyiu dico lómá:

—¡Queñuhu-ndo nchàa quiti-a xití veñúhu-a! ¡Vá cáda-ndó vèhe núú yáhu núú cúú vèhe Tàtá-í Dútú Ndiöxí! —càchí-gá xáhaⁿ-gá xii-yu.

¹⁷ Te xiáⁿ ní ndacu iní cue téé xica cuu ndihi-gá sá dúcáⁿ yòdo tnuní núú tütú-gá, te càchí-xi: “Ío cùyica iní-í chi ñá cuíní-yu canehe ñ-yu vèhe Tàtá-í”, duha càchí-xi núú tütú-gá.

¹⁸ Te ní xáhaⁿ cuè téé isràél xii-gá:

—¿Ná cúú sã vã yõo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-i? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dāngöyo veñúhu-a, te není xití úní nduu te sa nadaxínu-í —càchí-gá xáhaⁿ-gá xii-güedé.

²⁰ Te ní xáhaⁿ tùcu cue téé isràél:

—Údico ñnú cuía ñí xindecuu-güedé ní sáa veñúhu-a, te yòhó cuíní-n nādaxínu-n xití úní-ni nduu —càchí-güedé xáhaⁿ-güedé xii-gá.

²¹ Dico sá ñí cáháⁿ-gá chi ñá díú cuèndá veñúhu ní cáháⁿ-gá chi cuèndá yiqui

cùñú-gá ní cáháⁿ-gá. ²² Núu sáta ñí xihí-gá, te ní ndoto-gá, te òré-áⁿ ñí ndacu iní cue téé ní xica cuu ndihi-gá nàcuáa ní cáháⁿ-gá, núu xiáⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xiní-gá nàcuáa càa iní nchaa ñáyiu

²³ Te òré ndécú Jèsús vico pàscuá, te ío vài ñáyiu ní sándáá iní ñáhá xii-gá cuèndá ío titní sá vã yõo tnàhí ndàcu cada ní quide-gá ní xiní-yu.

²⁴ Dico Jèsús ñá ní cáháⁿ-gá nchaa tnúhu ñúhu iní-gá, chi sa ní cutnùní iní-gá sá ñà túú cùu váha iní-yu. ²⁵ Te ñá túú xini ñuhu-gá ñⁿ ñáyiu cúñaha nàcuáa càa iní nchaa tnàha ñáyíu-yu, chi mee-gá sa nàha ndáá-gá nàcuáa càa iní-yu ncháa-yu.

3

Jèsús ndihi té Nicòdemú

¹ Ní xindecu ñⁿ téé cùu fariséu ní xínani-dé Nicòdemú, te ní cuu-dé ñⁿ téé cùnuu núú ñáyiu isràél. ² Te téé-áⁿ ñí sáháⁿ-dé niú ní cáháⁿ ndihi-dé Jèsús, te ní xáhaⁿ-dé:

—Mèstrú, yúhú ndihi dava-gá-güedé sa nàha-ndí sá Yá Ndiöxí ní tendaha ñàha-gá xii-n vèxi-n dānehé ñáhá-n xii-ndí, chi núu ñá túú Yá Ndiöxí ndécú ndihi-n, te vá ndácú-n càda-n nchaa sá vã yõo tnàhí ndàcu cada quide-n —cachí-dé xáhaⁿ-dè.

³ Te ní xáhaⁿ Jèsús:

—Na càchí tnúhu ndáá-í xii-n sã ncháa ñáyiu vá ná

càcu saa tucu, te vá ndíhu ndaha ñàha Yá Ndiõxí xii-yu —càchí-gá xáhaⁿ-gã xii-dé.

⁴ Te ní xáhaⁿ tẽ Nicòdemú:

—¿Te nása cada ìⁿ ñáyiu sa ní yì te cacu-ni tucú-yu? ¿Náa ndíhu tucú-yu xití ñănã-yu te cacu tucú-yu xito cùu uú-ãⁿ? —càchí-dé xáhaⁿ-dẽ xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sã nchaa ñáyiu na ndùu ndoo nduu nine iní-xi cuú-yu ñáyiu ní na càcu saa ndihì ndute ndihì Espíritú Yá Ndiõxí, ñáyiu-áⁿ ndíhu ndaha ñàha-gá xii-yu. ⁶ Te nchaa ñáyiu càcu ñuyíú-a, chi déhe ñáyiu ñuyíú-a cùú-yu. Te ñáyiu ní nduu ndoo ní nduu nine iní-xi, ñáyiu-áⁿ ní nduu táhũ-yu Espíritú Yá Ndiõxí te tàxi tñuní ñáhá-ñã Espíritú-gá xii-yu. ⁷ Te vá cùñũhu-n tnúhu ní cáháⁿ-í-a, chi nchaa ñáyiu ní sándáá iní ñáhá xii-í ní nduu ndoo ní nduu nine iní-yu, te ñáyiu-áⁿ cùú-yu dàtná ñáyiu ní nacacu saa. ⁸ Táchí ndèni xíáⁿ tècú dóho-o xico-xi, dico ñá túú xini-ó ndèè ichi véxi-xi, te ní ñá túú xini-ó ndèè ichi cuáháⁿ-xi. Ducaⁿ sãtnahá-xi cùu Espíritú-gá ndécú ndihì ñáyiu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dàtnuní ní xicáⁿ tnúhú tucu té Nicòdemú núú-gã, te xáhaⁿ-dẽ xii-gá:

—¿Te nása ndùu tnúhu cáháⁿ-n dùcaⁿ cáháⁿ-n? —càchí-dé xáhaⁿ-dẽ xii-gá.

¹⁰ Te ní xáhaⁿ Jèsús:

—Yòhó cúú-n ìⁿ tée cùtnuní iní-xi, chi dàcuaha-n ñáyiu

isràél, ¿te ñá tècú tñuní-n tnúhu cáháⁿ-í-u? ¹¹ Te na càchí tnúhu ndáá-í xii-n sã nchũhú cáháⁿ-ndí ìⁿ sá ní tecú tñuní-ndí, te cáháⁿ ndáá-ndí cuendá ìⁿ sá ní xiní-ndí. Dico nchòhó ñá tècú tñuní-ndó tnúhu cáháⁿ-ndí. ¹² Te ñá sándáá iní-ndó tnúhu cáháⁿ-í cuendá nchaa nàcuáa cùu ñuyíú-a, te uuⁿ-gá cada-ndo nũ cáháⁿ-í cuendá nchaa nàcuáa cùu andiu.

¹³ Vá yõo ìⁿ saá andiu, te cañi-xi cuendú nàcuáa cãa. Chi ìⁿ dñi díi-ni yúhú véxi cuuⁿ-í andiu, te cùu-í ñaní tnáhá-ndó nchaa-ndo. Te dñu-ni yacáⁿ ndaa-í cundecu-í. ¹⁴ Te dàtná ní ndanehe ndíi Moisés cóo ní sata caa ndíi-di xití yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñaní tnáhá-ndó nchaa-ndo ìⁿ nduu, ¹⁵ te ducaⁿ yãha-í cuendá nchaa ñáyiu na quindáá iní ñáhá xii-í te nduu táhũ-yu cundecú-yu ndihì Yá Ndiõxí ni caa ni quíhíⁿ —càchí-gá xáhaⁿ-gã xii-dé.

Yá Ndiõxí ío cùu iní-gá ñáyiu ñuyíú-a

¹⁶ Te Yá Ndiõxí ío cùu iní-gá ñáyiu ñuyíú-a. Te ìⁿ dñi-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quindáá iní ñáhá ñáyiu, te vá cuíta nihnú-yu, chi nduu táhũ-yu cundecú-yu ndihì-gá ni caa ni quíhíⁿ. ¹⁷ Te Yá Ndiõxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyiu, chi ní tendaha-gã Déhe-gá ní

quixi-gá sá dácăcu nihnu-gá ñáyiú ñuyíú-a núú ùhú núú ndàhú.

18 Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. 19 Chi ní quixi Déhe-gá ñuyíú-a ní dándíxí tũu-gá iní-yu cuendá cutnùní iní-yu năcuáa ndùu cuendá Yă Ndiöxí te tñíⁿ-yu ìⁿ ichi váha ni cùu, te ñá ní tnàhá iní-yu, chi ní cudíⁿ-gă iní-yu nchaa sá cuèhé sá dúhá dăcúúxí să vâha, núú xiăⁿ tá xíta nihnú-yu cuáháⁿ. 20 Te nchaa ñáyiú quide nchaa sá cuèhé sá dúhá ñă tnàhá iní-yu cutnùní iní-yu năcuáa ndùu cuendá Yă Ndiöxí, te ñá tñíⁿ-yu tnúhu-gá cuendá yùhú-yu nduu tnùní nchaa sá quidě-yu. 21 Te nchaa ñáyiú ñùhu ichi ndáá cuení-yu cutnùní iní-yu năcuáa ndùu cuendá Yă Ndiöxí, te cùtnuní sá chindèe ñaha-gá xií-yu, chi quide váha-yu.

Té Juàá tée dăcuandute ñaha xii ñáyiú cáháⁿ váha tucu-dé cuendá Jèsús

22 Te sátá dúcáⁿ ñă cuu, te ní quee Jèsús cuáháⁿ-gá ndihí cue tée xica cuu ndihí-gá distritú Jùdeá. Te yàcáⁿ ní xindecu tnaa-gá ndihí-güedé ní xóo dăcuandute-güedé ñáyiú. 23 Te ndècu té Juàá ìⁿ xichi núú nání Ènón yatni ñuú Sălém dăcuandute-dé ñáyiú,

chi yàcáⁿ ío váha ñùhu ndute, núú xiăⁿ ní xóo quíhíⁿ ñáyiú yàcáⁿ ní xóo cuandute-yu. 24 Duha ní cuu cùtnàhá vátá ngávă-gă té Juàá vecaá.

25 Te ní cacu ìⁿ cuendú ní cáháⁿ cue tée xica cuu ndihí té Juàá ndihí ìⁿ úú cue tée isrâél, núú ndédacăa sá vâha-gá cada ñáyiú cuendá nduu í-yu. 26 Te ní sáháⁿ-güedé núú ndécú té Juàá ní xăhaⁿ-güedě:

—Mèstrú, tée ní quixi núú ñă xindecu-n ndăa ingá xio yúte Jördán, tée dii cuendú-xi ní cáháⁿ-n, tée-ăⁿ dăcuandute-dé tnàhá-dé ñáyiú. Te ío vâi ñáyiú ní chinchícúⁿ ñáhá xii-dé — căchí-güedé xăhaⁿ-güedě xii-dé.

27 Te ní xăhaⁿ tě Juàá:

—Te vá yôo ìⁿ ndăcu cada ìⁿ chiuⁿ năcuáa cuu váha iní Yă Ndiöxí, te núú ñă túú mée-gá chindèe ñaha-gá xií-yu. 28 Te nchòhó sa năha-ndo sá yùhú ní cáháⁿ ndáá-í sá ñă díú Crístú cùu-í, dico mee Yă Ndiöxí ní tendaha ñaha-gá yódó nùu-í véxi núú Yăá-áⁿ. 29 Te nchòhó xini-ndó să ìⁿ tée tnăndaha te xíchí tnăndaha ndihí-ná-dé cündihí-dé. Te tée ní xica ndáhú ío cùdíⁿ iní-dé ndédóho-dé nchaa tnúhu cáháⁿ tée tnăndaha-áⁿ. Te ducaⁿ sătnahá-xi cùu yùhú, chi ío cùdíⁿ iní-í sá vái ñáyiú ta chinchícúⁿ ñáhá xii Jèsús cuáháⁿ. 30 Te uuⁿ-gá cuita cuu vâi ñáyiú cutnùní iní-xi sá ío cùnuu-gá, te yùhú cuita ndóo ndee-í quíhíⁿ —căchí-dé xăhaⁿ-dě xii-güedě.

Crístú véxi cuuⁿ-gá andiu

³¹ Te ìⁿdiì díí-ni Crìstú Yaa véxi cuuⁿ andiù cùnuu-gá núú ñùyíú-a. Te nchaa ñáyiù ndècu ñuyíú-a cùú-yu ñáyiù ñuyíú iha, te càháⁿ-yu sá cùú-xí ñùyíú-a. Dico Crìstú Yaa véxi cuuⁿ andiù ³² càháⁿ-gá ìⁿ sá ñí xíní-gá, te càháⁿ-gá ìⁿ sá ñí tecú dóho-gá. Te ñá túú cuìní-yu quindáá iní-yu tnúhu càháⁿ-gá. ³³ Te nchaa ñáyiù tnì tnúhu càháⁿ Yaa véxi cuuⁿ andiù-án càháⁿ-yu sá tnúhu Yá Ndiòxí cùú-xí ìⁿ sá ndàá. ³⁴ Te Déhe-gá Yaa véxi cuuⁿ andiù càháⁿ-gá mee-ni tnúhu-gá. Te ñá ùhú iní-gá ní sáñaha-gã Espiritú-gá ndécú ndihi Déhe-gá. ³⁵ Te Dútú Ndiòxí ío cùu iní-gá Déhe-gá, núu ní xáhaⁿ-gã sá méé-gã taxi tnùní-gá nchaandi túhú sá ío. ³⁶ Te nchaa ñáyiù na quindáá iní ñáhá xii Déhe-gá, ñáyiù-án cundecú-yu ndihi-gá ñi caa ñi quíhíⁿ. Te nchaa ñáyiù vá quindáá iní ñáhá xii Déhe Yá Ndiòxí ío dandòho ñaha-gá xii-yu.

4

Jèsús ndihi ìⁿ ñaha Sàmariá

¹ Te ní níhí cue téé cùu fariséú tnúhu sá vai-gá ñáyiù ta chinchícúⁿ ñáhá xii Jèsús. Te ducaⁿ vai-gá-yu ta dàcuandute-gá cuáháⁿ dàcúúxí tã Juáá. ² Te cuèi ñá díú mèe-gá dácuaⁿdute ñaha-gá xii-yu, dico cue téé xica cuu ndihi-gá dácuaⁿdute ñaha-güedé xii-yu. ³ Te ní níhí Jèsús tnúhu nàcuáa càháⁿ cue téé cùu fariséú, núu

ní ndee-gá distritú Jùdeá cuánuhú tucu-gá distritú Galileá.

⁴ Te ichi ñuhu-gá ní nayáha-gá distritú Sàmariá. ⁵ Te ní sáá-gá ìⁿ ñuu nání Sicár te ñuu-án yíndèhu-xi distritú Sàmariá. Te xíaⁿ cáá yàtni ñuhu núu ñí sáha táhú ndi Jàcób déhe ndi ndi Chèé. ⁶ Te yàcáⁿ cáá dòco ní cuu cuendá ndi Jàcób. Te cùu-xi datná cuádava nduu ñuhu Jèsús ichi, te ío ní xáú-gá núu ní sáá-gá yuhu dòco-án ñí ngóo-gá ndétátú-gá. ⁷⁻⁸ Te ní xica cue téé xica cuu ndihi-gá cuáháⁿ-güedé xii ñuu Sicár cuánguaaⁿ-güedé sá cáxí-güedé. Te yuhu dòco-án núcòo-gá ní sáá ìⁿ ñadìhí ñaha distritú Sàmariá véxi quèhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gã.

⁹ Te ní xáhaⁿ ñadìhí-án:

—¿Ná cuendá da núu-í xicáⁿ-n ndute coho-n? Te yòhó cùú-n téé isràél, te yúhú cùú-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ñí xáhaⁿ-aⁿ, chi ñá túú ndècu váha ñáyiù isràél ndihi ñáyiù distritú Sàmariá. ¹⁰ Te ní xáhaⁿ Jèsús xii-aⁿ:

—Ñá cútñuní iní-n nã taxi Yá Ndiòxí xii-n, te ñi ñá cútñuní iní-n yòo xicáⁿ ndute núu-n. Te núu dicó xini-n yòo cuu yúhú á, te da mee-n càcáⁿ-n ndute núu-í coho-n, te yúhú taxi-í ndute cundecu ndihi-n núu cuáháⁿ núu véxi —càchí-gá xáhaⁿ-gã.

¹¹ Te ní xáhaⁿ tùcu ñadìhí-án:

—Tátá, ñi sá quèhnu-n ndüte ñá túú nèhe-n, te doco-a cùnú víhí, te ñá túú ndèé quíngueheⁿ-n ndüte taxi-n coho-í. ¹² Ndíi Jàcób ñaní tnáhá-ndíi ní xíndecu ndèé sanaha ñi cadúha ndíi doco-a ñi tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúúxí ndíi-ǎn? —càchí-aⁿ xáhaⁿ-aⁿ xii-gá.

¹³ Te ní xáhaⁿ Jèsús:

—Nchaa ñáiyu xihí ndute doco-a, te vá cúú vètú dúcáⁿ iní-yu chi dayìchí ñáhá-ní tùcu-xi ndute-a. ¹⁴ Dico nchaa ñáiyu na còho ndute na cuáñaha-í, te vá íⁿ ndùu-gá dayìchí ñáhá-xí ndüte-áⁿ xii-yu, chi ndute cuáñaha-í cúú-xí ndüte váha-gá. Te dàtná quéé nihni ndute xití doco-a, nchaa-ni nduu ñuhu ñá túú yìchí, ducaⁿ sàtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yùhú —càchí-gá xáhaⁿ-gá xii-aⁿ.

¹⁵ Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vǎ dáyìchí ñáhá tnáhí-gá-xi ndute. Te vá quíxí-gǎ-í quixi quéhnu-í ndute doco-a —càchí-aⁿ xáhaⁿ-aⁿ xii-gá.

¹⁶ Te ní xáhaⁿ Jèsús:

—Cuàháⁿ cuángàna yì-n, te quixi-ndo ìha —cachí-gá xáhaⁿ-gá xii-aⁿ.

¹⁷ Te ní xáhaⁿ-aⁿ:

—Ñá túú yì-í —càchí-aⁿ xáhaⁿ-aⁿ xii-gá.

Te ní xáhaⁿ tùcu Jèsús:

—Ndáá càháⁿ-n sǎ ñà túú yì-n. ¹⁸ Dico ní cuu úhúⁿ tée cǎndeca-n, te tée ndèca-n vitna chi ñá díú yì-n cuu-dé, te ndáá càháⁿ-n sǎ ñà túú yì-n —cachí-gá xáhaⁿ-gá xii-aⁿ.

¹⁹ Te sá dúcáⁿ ñi xáhaⁿ-gá nùu ní xáhaⁿ tùcu-aⁿ:

—Tátá, yùhú sání iní-í sá yòhó cúú-n íⁿ tée càháⁿ tnúhu Yá Ndiòxí. ²⁰ Te cue ñaní tnáhá-ndíi ní xíndecu ndèé sanaha ñi xóo cada càhnú-yu Yá Ndiòxí tindúú-a, dico nchòhó ñáiyu isràél càchí-ndó sǎ ndèé ñuú Jerusalén cada càhnu-o-gá —càchí-aⁿ xáhaⁿ-aⁿ xii-gá.

²¹ Te ní xáhaⁿ Jèsús xii-aⁿ:

—Íⁿ tnúhu na càháⁿ-í-a, te quindáá iní-n. Sa ta cùyatni sáá nduu sá ñà díú-gǎ mee-ni tindúú-a, te ni ñà díú-gǎ mee-ni ñuú Jerusalén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá. ²² Te nchòhó cue ñáiyu Sàmariá chi ñá cùtnùní iní-ndó ná cúú sǎ quidé càhnu-ndo, dico nchúhú ñáiyu isràél, chi cùtnuní iní-ndí ná cúú sǎ quidé càhnu-ndí. Chi íⁿ tée isràél véxi-dé dàcácu nihnu-dé ñáiyu cuendá vá quíhíⁿ-yu núú ùhú núú ndàhú. ²³ Te neni vitna ngúita-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúú-xí-gǎ, chi mee-gǎ ducaⁿ cuini-gá cadá-yu cada càhnú-yu-gá. ²⁴ Te Yá Ndiòxí chi íⁿ espíritú cúú-gǎ. Te nchaa ñáiyu na càda càhnu ñaha, te cadá-yu ni yùhu ni iní-yu sá cúú-xí-gǎ te

cadá-yu dàtná càháⁿ tnúhu-gá
—càchí-gá xáhaⁿ-gã xii-aⁿ.

25 Te ní xáhaⁿ ñàdihí-áⁿ:

—Xini-í sá quixí tée cùu
Mesiás, tée càchí-güedé nání
Cristú. Te tée-áⁿ ná sàá-dé, te
cachí tnúhu ndáá-dé nàcuáa
cuu —càchí-aⁿ xáhaⁿ-aⁿ xii-gá.

26 Te ní xáhaⁿ Jèsús:

—Diu tée-áⁿ cúu yúhú tée
ndàtnúhu ndihi-n —càchí-gá
xáhaⁿ-gã xii-aⁿ.

27 Te òré-áⁿ nǐ ndexìo
cue tée xica cuu ndihi-gá,
te ní cuñúhu-güedé sá
ndátnúhu-gá ndihi ñàdihí-áⁿ.
Dico ni ìⁿ-güedé ñá ní xicáⁿ
tnúhú-güedé núú-gã nǔu ná
cuèndú ndátnúhu-gá ndihi
ñàdihí-áⁿ.

28 Ducaⁿ te ní
dándõ ñàdihí-áⁿ yoó ndute-aⁿ
xiáⁿ, te ní xica-aⁿ cuánuhú-aⁿ
ñúu cútnúhu-aⁿ ñáyiu cuèndá
Jèsús. 29 Te ní xáhaⁿ-aⁿ:

—Chí nèhé ná quihíⁿ-ó,
chi quiní-ndó nǎ cúu ìⁿ
tée núcóo yuhu dòco-áⁿ nǔu
ñá díú Cristú Yaá ní ten-
daha Yá Ndiõxí véxi ñuyíú-a
cùu-dé nǔu ní càháⁿ ndáá-dé
nàcuáa cùu ndecu-í —càchí-aⁿ
xáhaⁿ-aⁿ xii-yu.

30 Te sá nǐ níhí ñáyiu
ñúu-áⁿ tnúhu, xiáⁿ ní xicá-yu
cuáháⁿ-yu. 31 Te òré vátá
sàá-gá-yu xiáⁿ nǐ xáhaⁿ cuè tée
xica cuu ndihi-gá xii-gá:

—Mèstrú, cudèñu na
cudèñu-o —cachí-güedé
xáhaⁿ-güedé xii-gá.

32 Te ní xáhaⁿ-gã:

—Ndècu ìⁿ sá cáxi-í, ìⁿ sá
ñà túu xini nchòhó —càchí-gá
xáhaⁿ-gã xii-güedé.

33 Te cue tée xica cuu
ndihi-gá xitnáha-güedé:

—Váa ío ñáyiu ní quixi
nehe sá nǐ xexi-gá nǔu
duha càháⁿ-gá —càchí-güedé
xitnáha-güedé.

34 Te ní xáhaⁿ-gã:

—Dàtná cuini-ndó cùu
vétú ini-ó òré xexí-ó, ducaⁿ
cùu vétú ini-í quidè-í nchaa
nàcuáa ní càháⁿ Yá Ndiõxí
Yaá ní tendaha ñàha xii-í
véxi-í ñuyíú-a, te chiúⁿ-gá ío
cùdíⁿ ini-í dandihí-í. 35 Te
nchòhó càchí-ndó sǎ cùmání
cùmí-gã yóó te cuu itú. Dico
yúhú càchí-í sá cundehe-ndo
ñáyiu-áⁿ, chi sa ndècu túha-yu,
dàtná cúu-nǎ itú sá sà ní
cuu-ná natahu-o cùu-yu,
chi sa ndècu túha-ná-yu
cundedóho-yu tnúhu-í. 36 Te
dàtná cúu ñáyiu natahu itú
chi sa cúhuⁿ yáhu-yu, ducaⁿ
sǎtnahá-xi cùu ñáyiu na càháⁿ
tnúhu-í, chi cuáñaha-í sá ndúú
táhü-yu na sàá nduu. Te

nchaa ñáyiu na tñè tnúhu-í
te nduu táhü-yu cundecu-í
ndihí-yu ni caa ni quihíⁿ.
Te dàtná cúu ñáyiu ní chihi
tatá-xi, ndihi ñáyiu ní natahu
itú-xi cùdíⁿ-nǎ ini-yu. Ducaⁿ
sǎtnahá-xi cùu ñáyiu na càháⁿ
tnúhu-í. 37 Chi ndáá queé-xí
nàcuáa cuáháⁿ ìⁿ cuèndú sá
càchí-xi: “Tucu tée ní chihi
tatá, te tucu tée ní natahu”,
duha cuáháⁿ cuèndú-áⁿ. 38 Te
yúhú tendaha ñaha-í xii-ndo
quihíⁿ-ndó càháⁿ-ndó tnúhu-í
núú sá ní yáha-güedé ní
càháⁿ-güedé tnúhu-í. Te
nchòhó quihíⁿ-ndó dicó-nǎ
nduu cuèndá-ndó chiúⁿ-áⁿ —
càchí-gá xáhaⁿ-gã xii-güedé.

39 Te ío cuéhé ñáyiu ñúu-áⁿ
nǐ xindèdóho-yu cuèndú ní

cani ñadìhí-áⁿ nũ-yu sá Jèsús ní xáhaⁿ-gã nchaa nãcuáa quide-aⁿ, te xíãⁿ ío vãi-yu ní sándáá iní-yu Jèsús. ⁴⁰ Te ní quexió-yu núú ndécú-gã, te ní cáháⁿ ndàhú-yu núú-gã sá quéndoo-gá ñuú-yu, núu xíãⁿ ní xíndecu-gá ndihí-yu úú nduu. ⁴¹ Te ío cuéhé-gã-yu ní sándáá iní-yu tnúhu ní cáháⁿ méé-gã. ⁴² Te ní xáháⁿ-yu xii ñadìhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gá, chi ní cáháⁿ méé-gã ní xíndedóho-ndí vitna núu ní sándáá ndisa iní-ndí sá díú-gã cúú-gã Crístú Yaá ní tendaha Yã Ndiõxí véxi ñuyíú-a dàcácu nihnu-gá ñáyu núu ùhú núu ndàhú — càchí-yu xáháⁿ-yu xii-aⁿ.

Jèsús quidé tãtna-gá déhe ñⁿ tée ndèé chíúⁿ núú gobiernú

⁴³ Te nduu úní ní nucúhuⁿ Jèsús ichi cuáháⁿ-gá distritú Galileá. ⁴⁴ Te cuáháⁿ-gá yacáⁿ, chi mee-gã ní cachí-gá sá nũ ñⁿ tée na càháⁿ-dé tnúhu Yã Ndiõxí ñuú núu ñ cacu-dé, te ñá túú nèhé-yu sá yíñuhu núú-dě. ⁴⁵ Te òré ní sáá-gá distritú Galileá, te ío váha ní cuu iní ñáhã-yu xii-gá, chi cuendá tnàhá-yu ní xíndecu ndihí-gá vico pãscuá ñuú Jerusalén. Te yacáⁿ ní xiní-yu nchaa sá ñ quide-gá.

⁴⁶ Te ní sáháⁿ tucu-gá ñuú Cànaá ñⁿ ñuú yíndèhu distritú Galileá, núu ñ nadatiu-gá ndute ní nduu-xi vínú. Te ñuú Capernaúm ndécú ñⁿ tée ndèé chíúⁿ núú tée cùu gobiernú, te tée-áⁿ cùhú ñⁿ

déhe-dé. ⁴⁷ Te ní níhí-dě tnúhu sá ñ ndee Jèsús distritú Júdeá ní ndexio-gá distritú Galileá, núu ní sáháⁿ-dé núú ndécú-gã, te ní cáháⁿ ndàhú-dé núú-gã sá quihíⁿ-gá cada tãtna-gá déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhá-ndó xii-í te núu vá cada-í ñⁿ sá vá yoo tnàhí ndacu cada quiní-ndó —càchí-gá xáhaⁿ-gã xii-dé.

⁴⁹ Te ní xáhaⁿ tucu tée cùhú déhe-xi-áⁿ xii-gá:

—Tãtá, cundee iní-n ná quihíⁿ-ni-o càda tãtna-n dèhe-í ná cuu-dé, chi càhú víhí tnàhá-dé —càchí-dé xáhaⁿ-dě xii-gá.

⁵⁰ Te ní xáhaⁿ Jèsús:

—Cuanùhú te quiní-n ñá ní ndúha déhe-n —càchí-gá xáhaⁿ-gã xii-dé.

Te ní sándáá iní-dé tnúhu ní cáháⁿ Jèsús, te cuánuhú-dé. ⁵¹ Te ñuhu-dé ichi cuánuhú-dé ní sánú tnàhá ñáhá cuè tée xínu cuechi núú-dé. Te ní xáhaⁿ-güedé sá sà ta ndúha déhe-dé cuáháⁿ.

⁵² Te ní xícáⁿ tnúhú-dě núú-güedé ná òré cúú-xí ñ ngüita-xi ta quëtaú cuéhé-dě. Te ní xáhaⁿ-güedé:

—Icu dàtná òré caá ñⁿ sacuaa ní nchíco-dé cahñi —càchí-güedé xáhaⁿ-güedé xii-dé.

⁵³ Te tãtá tée cùhú-áⁿ ñ ndacu iní-dé sá díú òré ní quëtaú cuéhé-dě ní cáháⁿ ndihí-dé Jèsús ní xáhaⁿ-gã sá ndúha déhe-dé. Te xíãⁿ nũ ndi nchaa tée-áⁿ vehe-dé ní sándáá iní-yu Jèsús.

54 Te sá nǐ quide-gá-áⁿ cúú ũú xito quide-gá sá vǎ yǒ tnahí ndacu cada. Te sá nǐ quide-gá xito cùu uú-áⁿ cúú-xí sǎ nǐ quide-gá cútnàhá ní ndee-gá distritú Jùdea cuánuhú-gá distritú Galiléa.

5

Jèsús quidé tǎtna-gá ìⁿ téé cùhú ìⁿ xichi núú nání Bètesdá

¹ Te sátá dúcáⁿ nǐ cuu, te ní tnahá nduu nǐ quide ñáyiú isràél ìⁿ vico. Te ní sáháⁿ Jèsús ñuú Jerusàlén.

² Te ní càa xico yuhu ñuú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni

xíáⁿ cáá ìⁿ tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tǎnquí-áⁿ cáá ũhúⁿ corrèdór.

³ Te xití corrèdór-áⁿ xǐndecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gǎ candá nihnu, ndètú-yu candá ndute-áⁿ.

⁴ Chi nihí-yu tnúhu sá ãma nihnu cùuⁿ ìⁿ espíritú xínú cuèchi núú Yǎ Ndióxi, te dàcandá-xi ndute ñúhu tanquí-áⁿ. Te ñáyiú díhna nuu nà quée xití ndute-áⁿ, te òré-ni ndúha-yu. ⁵ Te yàcáⁿ ñútnàhá ìⁿ téé ní cuu ócò sáhúⁿ úní cuíá sǎ cùhú-dé. ⁶ Te ní xiní Jèsús cáá-dé, te ní cutnùnì iní-gá sá nǐ cuu cuéhé cuíá cùhú-dé, te ní xáhaⁿ-gǎ:

—¿Cuíní-n ndúha-n-ǎⁿ? —
càchí-gá xáhaⁿ-gǎ xii-dé.

⁷ Te ní xáhaⁿ téé cùhú-áⁿ:

—Tǎta, vá yǒo nihí-í dàquée ñaha xì-í xití tǎnquí-a òré càndá ndute, chi òré cuíní-í quée-í, te ingá-ni

tucú-yu quènduú-yu núú-í cuángueé-yu —càchí-dé xáhaⁿ-dè xii-gá.

⁸ Te ní xáhaⁿ Jèsús:

—Ndacuíní, te ndaca-ni-n yùu-n, te caca-n —càchí-gá xáhaⁿ-gǎ xii-dé.

⁹ Te òré-ni-áⁿ nǐ ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-ǎⁿ cúú-xí nduu ndetatú ñáyiú, ¹⁰ núu ní xáhaⁿ cuè téé isràél xii téé ní cuhú-áⁿ:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dè:

—Mee téé ní quide tǎtna ñaha xì-í ní cachí-dé sá ndácàni-í yuu-í, te caca-í —càchí-dé xáhaⁿ-dè xii-güedé.

¹² Te ní xáhaⁿ-güedé:

—¿Te ná cúú téé ducaⁿ ní cachí sá ndácàni-n yuu-n te caca-n-i? —càchí-güedé xáhaⁿ-güedé xii-dé.

¹³ Dico téé ní cuhú-áⁿ ñà túú ní cùtnunì iní-dé ná cúú téé ní quide tǎtna ñaha xì-dé, chi Jèsús òré-ni ní xica-gá cuáháⁿ-gá tnuú nchaa ñáyiú chitu xǐndecu xíáⁿ. ¹⁴ Te sátá dúcáⁿ te ní naníhí tnahá Jèsús ndihi téé ní quide tǎtna-gá-áⁿ xití veñúhu càhnu sá ïo cùnuu, te ní xáhaⁿ-gǎ xii-dé:

—Ní xiní-n nǎ ní ndúha-n-va. Te vitna vá cádá-gǎ-n nǎndí sá cuéhé sá dúhá, chi núu na càda-ni-n ña, te quixi ingá cuéhé, te vǐhi-gá ndoho-n —càchí-gá xáhaⁿ-gǎ xii-dé.

¹⁵ Ducaⁿ te ní xica téé ní cuhú-áⁿ cuángúñaha-dé xii cue téé isràél sá Jèsús ní quide tǎtna ñaha-gǎ xii-dé. ¹⁶ Núu

sátá nǐ níhí cue téé isràèl tnúhu, te ní cuu úhú iní-güedé Jèsús. Te ní cuiní-güedé cahni ñaha-güedě xii-gá cuendá sá dúcáⁿ nǐ quide tátna-gá nduu ndètatú-güedé. ¹⁷ Te ní xáhaⁿ Jèsús xii-güedé:

—Tàtá-í Dútú Ndiöxí quidé chiuⁿ-ni-gá nǔu xiǎⁿ quidé chiuⁿ-í tñàhá-í —càchí-gá xáhaⁿ-gǎ xii-güedé.

¹⁸ Te ní cudééⁿ-güedě sá ñǎ ní cǎnehe íi-gǎ nduu ndètatú-güedé, te ní cuiní-güedé cahni ñaha-güedě, te uuⁿ-gá ní cuiní-güedé cahni ñaha-güedě xii-gá sá nǐ cachí-gá sá Tàtá-gǎ cúú Dútú Ndiöxí, chi ní sani iní-güedé sá cuiní-gá nútñahá-gá Yǎ Ndiöxí nǔu xiǎⁿ ío ní cudééⁿ-güedě.

Jèsús Déhe Yá Ndiöxí táxí tñùní-gá

¹⁹ Te ní xáhaⁿ tùcu Jesús xii-güedé:

—Na càchí tnúhu ndáá-í xii-ndo sǎ yǔhú chi ni ìⁿ sá ñǎ ndácù-í cada mee-í nǔu ñá túú mèe Tàtá-í dǎnehé ñáhá-gǎ xii-í nǎcuáa cada-í, chi nchaa sá quidé Tàtá-í quidè-í tñàhá-í. ²⁰ Te Tàtá-í ío cùu iní ñáhá-gǎ xii-í nǔu dǎnehé ñáhá-gǎ nchaa nǎcuáa quide-gá. Te vitna ndècu vai-gá chiuⁿ tahu-gá cada-í, chiuⁿ sá vǎtá quìní-gá-ndó càda-í nǎcuáa cuñúhu vǐhi-ndo. ²¹ Chi Tàtá-í dandòto-gá ñáyiu ní xíhí. Te yúhú cada-í te nduu támú nchaa ñáyiu càchí iní-í cundecu ndihí ñàhá-yu xii-í ni caa ni quíhíⁿ. ²² Te na

sáa nduu te ñá díú Tàtá-í cada ndáá-gá cuéchi ñáyiu, chi ní cachí-gá sá yǔhú cada ndáá-í ²³ cuendá nchaa ñáyiu canehé-yu sá yíñùhu núu-í dàtná nehě-yu sá yíñùhu núu Tàtá-í Yáá ní tendaha ñaha xii-í véxi-í ñuyíú-a. Te nchaa ñáyiu ñá túú nèhe sá yíñùhu núu yǔhú, te ni nǔu Tàtá-í ñá túú nehé-yu sá yíñùhu.

²⁴ Te na càchí tnúhu ndáá-í xii-ndo sǎ nchaa ñáyiu na cùndedóho tnúhu na càháⁿ-í, te núu na quìndáá iní-yu Dútú Ndiöxí Yáá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu támú-yu cundecú-yu ndihí-gá ni caa ni quíhíⁿ. ²⁵ Te vitna na càchí tnúhu ndáá-í xii-ndo sǎ nchaa ñáyiu ndècu ichi cuehé ichi duha cùu-yu dàtná ìⁿ ñáyiu ní xíhí, te vitna ní sáa nduu cùndedóho-yu tnúhu càháⁿ yúhú Déhe Dútú Ndiöxí, te nchaa ñáyiu na quìndáá iní-xi, te naníhí támú-yu. ²⁶ Te dàtná quidé mèe Tàtá-í dácácu nihnu-gá ñáyiu, ducaⁿ nǐ cachí-gá cada-í dácácu nihnu-í-yu. ²⁷ Te ní cachí tucu-gá sá sáa ìⁿ nduu, te cada ndáá-í cuéchi nchaa ñáyiu ñá túú quide ndáá, chi yúhú táxí tñùní-í, te cùu-í ñaní tñáhá-ndó nchaa-ndo. ²⁸ Te ni vǎ cùñùhu-ndo tñùhu càháⁿ-í, chi sáa nduu te nchaa ñáyiu ní xíhí tecú dóho-yu tnúhu càháⁿ-í. ²⁹ Te ndoto nchaa ñáyiu ní quide váha cundecu ndihí-í-yu ni caa ni quíhíⁿ, te ndoto tñàhá nchaa ñáyiu ní quide cuehé ní quide duha,

te ñáyiú-án quĩhíⁿ-yu núú ùhú núú ndàhú.

Yá Ndiõxí chĩndèe tnúhu-gá Jèsús

30 'Te yúhú, chi ni ìⁿ sá ñă ndácù-í cada mee-ĩ nũu ñă djú mèe Yá Ndiõxí táuchlúⁿ-gá nàcuáa cada-í. Te quide ndáá-í cuéchi ñáyiú nàcuáa tàxi tnuní-gá cada-í, te yúhú ñă túú quide-í sá cúú ìní mèe-í chi Tàtá-í ní táuchíúⁿ-gá nàcuáa cada-í. 31 Te núu na càháⁿ-í sá mèe-í táxi tnùmí-í, te vá quindáá ìní-ndó. 32 Chi Yá Ndiõxí chĩndèe tnúhu ñaha-gá xii-í, te yúhú xìní-í sá tnúhu càháⁿ-gá cuendá-í cúú-xí ìⁿ sá ndáá. 33 Te nchòhó ní téchíúⁿ-ndó cué tée ní sáháⁿ ní ndúcú tnúhu-güedé núú tẽ Juáá nũu ná tnúhu càháⁿ-dé cuendá-í, te tée-ãⁿ ní càháⁿ ndáá-dé nàcuáa ndũu cuendá-í. 34 Dico yúhú, chi ñă túú xini ñuhu-í ìⁿ ñáyiú ñuyíú-a chindee tnúhu ñahá-yu xii-í, dico té Juáá ní càháⁿ váha-dé cuendá-í, te xiãⁿ càchí tnúhu tucu-í cuendá quindáá ìní-ndó, te naníhí tàhú-ndó. 35 Te dàtná cuìní-ndó cùu ìⁿ iti ndéñuhú te dàyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudí^í ìní-ndó tnúhu ní càháⁿ-dé. 36 Te váha-ni ní càháⁿ té Juáá, dico yúhú chi ndècu nchaa sá tá quide-í véxi nàcuáa ní táuchíúⁿ Yá Ndiõxí cada-í, te nchaa xiãⁿ cúú-xí ìⁿ sá cútnùní ìní-ndó sã mèe Yá Ndiõxí ní tendaha ñaha-gá xii-í véxi-í ñuyíú-a. 37 Te ñu-ni-gá chĩndèe tnúhu ñaha-gã xii-í, dicó-ni sá mèe-ndó ñă túú cuìní-ndó càda cuendá-ndó

tnúhu càháⁿ-gá, te ni ñă túú xìní-ndó nàcuáa cà-gá. 38 Te ñă túú quẽe ìní nchòhó tnúhu càháⁿ-gá, chi ñă túú sàndáá ìní ñahá-ndó xii yúhú Déhe-gá. 39 Te dàcuaha vihi-ndo tutú ndèe tnúhu-gá, chi sàni ìní-ndó sã xiãⁿ-ni dacuàha-ndo te naníhí tàhú-ndó. Te váha-ni quide-ndo, chi ñu tutú-ãⁿ càháⁿ-xi cuendá-í. 40 Te nchòhó ñă túú cuìní-ndó quindáá ìní ñahá-ndó xii-í cuendá naníhí tàhú-ndó.

41 'Te yúhú, ñă túú xini ñuhu-í sá càdá càhnu ñaha-ndo xii-í. 42 Dico sa xìní-í nàcuáa sàni ìní-ndó chi ñă túú cùu ìní-ndó Yá Ndiõxí. 43 Te yúhú véxi-í ñuyíú-a chi Tàtá-í ní tendaha ñaha-gá, te nchòhó ñă túú cuìní-ndó tnũ-ndo tnúhu càháⁿ-í, dico núu quixi ìⁿ tée càháⁿ cuendá mèe-xí, chi quindáá ìní-ndó. 44 Te ná váha nchòhó ná tnũ-ndó tnúhu càháⁿ-í, te xio xio-ni quide cahnu tnaha-ndo, te ñă túú quide cuendá-ndó sã tnúhu váha càháⁿ Yá Ndiõxí cuu xii-ndo. 45 Te vá cání ìní-ndó sã yúhú ndacáⁿ cuéchi-í núú Tàtá-í nàcuáa quide-ndo, chi ndíi Moisés ní chídó tnùní ndíi núú tütú Yá Ndiõxí nàcuáa quide-ndo sá ñă túú quide váha-ndo, te mee-ndo sàni ìní-ndó sã naníhí tàhú-ndó cuendá tnúhu ní càháⁿ ndíi. 46 Chi núu nchòhó sàndáá ndisa ìní-ndó tnúhu ní càháⁿ ndíi Moisés ñă, te ducaⁿ te quindáá ìní-ndó yúhú ní cùu, chi ndíi-ãⁿ ní chídó tnùní ndíi nàcuáa cada-í ñuyíú-a vitna. 47 Te núu ñă túú sàndáá ìní-ndó tnúhu ní chídó tnùní ndíi, te ñu-ni

ducaⁿ càda ñaha-ndo xii-í vâ quindáá iní-ndó tnúhu càháⁿ-í —càhí-gá xáhaⁿ-gã xii-güedé.

6

Jèsús dácàxi-gá úhúⁿ mĩ ñáyiu

(Mt. 14:13-21; Mr. 6:30-44; Lc. 9:10-17)

¹ Te sátá dúcáⁿ ñi cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chi úú diu-xi. ² Te ío cuéhé ñáyiu nchìcúⁿ ñáhá xii-gá cuáháⁿ cuèndá sá ñi xiní-yu nchaa sá vâ yõo tnàhí ndàcu cada ní quide-gá, chi ní quide tátna-gá nchaa ñáyiu cùhú. ³ Te ní sáá Jèsús ndihi cue téé xica cuu ndihi-gá ñi núú tìndúú, te xíaⁿ ñi ngóo-gá ndihi-güedé. ⁴ Te ta cùyatni coo víco pascuá, víco quide ñáyiu isràél. ⁵ Te ní xiní-gá sá ío vâi ñáyiu nchìcúⁿ ñáhá xii-gá cuáháⁿ, te ní xáhaⁿ-gã xii té Lìpé:

—¿Ndèé quíhíⁿ-ó quĩnguaaⁿ-o sã cáxí nchaa ñáyiu-a? —càhí-gá xáhaⁿ-gã xii-dé.

⁶ Te ducaⁿ ñi xáhaⁿ-gã xii-dé cuèndá sá cuìní-gá quini-gá nása cunduu tnúhu cáháⁿ-dé, dico mee-gã sa xiní-gá nàcuáa cada-gá. ⁷ Te ní xáhaⁿ tè Lìpé xii-gá:

—Te cuèi úú cièndú díhúⁿ denàriú ná dàndoñuhu-o cuaaⁿ-o paá, te ñi vâ tnàhá caxí-yu luha luha —càhí-dé xáhaⁿ-dè xii-gá.

⁸ Te té Ndrìxí ingá téé xica cuu ndihi-gá, ñani té Xímú, àdi Pelú chi úú diu-dé, ní xáhaⁿ-dè:

⁹ —Iha ndècu ñiⁿ té líhli nèhe-dé úhúⁿ paá cebadá te úú chácá, dico ndéé tnahá xéhé, te cuéhé víhí ñáyiu —càhí-dé xáhaⁿ-dè xii-gá.

¹⁰ Te ní xáhaⁿ Jèsús xii-güedé:

—Chí cũñaha nà ngóo-yu nchaa-yu —càhí-gá xáhaⁿ-gã.

Te ñáyiu-áⁿ ñi ngóo-yu, te càa vihi ité núú ñi ngóo-yu-áⁿ, te xínu dàtná úhúⁿ mĩ mee-ni cuè téé, te diñⁿ ñáyiu dihí ndihi landú. ¹¹ Te ní queheⁿ Jèsús paá, te ní ndacáⁿ táhú-gã núú Yã Ndiõxí, te ní sãñaha-gã paá-áⁿ xii cue téé xica cuu ndihi-gá, te cue téé-áⁿ ñi dácãhñu-güedé ní xexi nchaa ñáyiu xixúcu-áⁿ. Te diu-ni ducaⁿ ñi quide-gá chácá, te ní dácãhñu tucu-güedé-di ní xexi ñáyiu ní ndahá xití-yu. ¹² Te òré ní túhú cóhõ-yu, te ní xáhaⁿ Jèsús xii cue téé xica cuu ndihi-gá sá ná nàqueheⁿ-güedé nchaa sá ñi quendóo cuèndá sá vâ quíhíⁿ-xi núú míhí.

¹³ Te cue téé-ãⁿ ní naqueheⁿ-güedé nchaa sá ñi quendóo, te ní chítú ùxúú tídihi núú ùhúⁿ-ni paá cebadá. ¹⁴ Te sá ñi xiní-yu ní nadacayá-gá sá ñi xexí-yu, xiãⁿ ní ngüíta-yu ní xitnàhá-yu:

—Ndáá sá tẽe-a sa ío cuèndú sá quíxí-dè ñuyíu-a cáháⁿ-dé tnúhu Yá Ndiõxí —càhí-yu xitnàhá-yu.

¹⁵ Te ní cutnùní iní Jèsús sá cádá yicá-yu can-deca ñahá-yu xii-gá quíhíⁿ cuèndá cundecu-gá quindaha ñaha-gá xií-yu ni cùu, núu xiãⁿ

ní xica tucu-gá cuáháⁿ-gá xití yucu mee ñi chícuú-gá.

Jèsús xicá-gă núú ndute

(Mt. 14:22-27; Mr. 6:45-52)

16 Te òré ní cuu ndiquiⁿ, te cuáháⁿ cue téé xica cuu ndihi-gá yuhu làgúná.

17 Te ní quée-güedé bàrcú cuáháⁿ-güedé ñuú Capèrnaúm cáá ndàa ingá xio yuhu làgúná, te sa ní cuu ndiquiⁿ, te ñà túú Jèsús quèxio quée-gá bàrcú ñùhú-güedě-áⁿ. 18 Te ní ngüita-xi quène táchí ñhi, te ñhi dàcandau ndéé tnáhá ndüte lagúná-áⁿ. 19 Te sa ní cuu dàtná úhúⁿ kilómetrú cuáháⁿ-güedé, te ní xini-güedé Jèsús tá cüyatni-gá bàrcú ñùhú-güedě véxi-gá núú nduté, te ní yùhú-güedé. 20 Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gă xii-güedé.

21 Te ío ní cudíi ñi-güedé sá ñi quexio-gá cuánguee-gá bàrcú, te òré-ni ní quexio-güedé ndihi-gá ndéé ingá xio yuhu làgúná núú cuáháⁿ-güedé.

Ñáyiú nànducu ñaha xii Jèsús

22 Te ingá nduu-ăⁿ xĩndecu-ni nchaa ñáyiú ní quendóo yuhu làgúná. Te ní quide cuendá-yu sá ñi ñi-ná bàrcú nútñi-áⁿ ní cùu ñà túú-gă, chi cue téé xica cuu ndihi Jèsús ní quée-güedé bàrcú-áⁿ cuáháⁿ-güedé. Te ní ñhi-yu tnúhu sá ñà túú ní quée tnáhá Jèsús. 23 Te ñu-ni nduu-ăⁿ ñi quée ñi úú bàrcú ñuú Tiberiás ní sáá-xi yatni núú ñi xexi-yu paa sá ñi ndacáⁿ táhú Jèsús núú Yá Ndiöxi. 24 Te ní xini-yu sá

ñà túú Jèsús ndihi cue téé xica cuu ndihi-gá, núu ní quée-yu bàrcú-áⁿ cuáháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gă dàtná ñi sá nchító-ó

25 Te ní sáá-yu ingá xio yuhu làgúná, xiáⁿ ñi naníhi-yu Jèsús, te ní xáháⁿ-yu xii-gá:

—Mèstrú, ¿ná òré ní sáá-n ñha? —cachí-yu xáháⁿ-yu xii-gá.

26 Te ní xáhaⁿ Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá ñi xexi-ndo ñi ndahá xití-ndó, dico ñà díú cuendá sá ñi quide-í sá vă yõ tnáhi ndàcu cada nanducu ñaha-ndo. 27 Te vá cáda cuendá-ndó sã mée-ni sã cáxi-ndó càda chiúⁿ-ndo chi xiáⁿ vá cùdii-xi. Chi ío-gá xini ñùhu-xi cada cuendá-ndó tnúhu Yá Ndiöxi te tñi-ndo, te naníhi tàhú-ndó, Te tnúhu-áⁿ cachí tnúhu yúhú Téé cùu ñani tnáhá-ndó nchàa-ndo, te xiáⁿ candeca-xi iní-ndó ñi caa ni quíhiⁿ, chi mee Dùtú Ndiöxi ní cachí-gá sá dúcáⁿ càda-í —càchí-gá xáhaⁿ-gă xii-yu.

28 Te ní xáháⁿ-yu:

—¿Nása cada-ndí cuendá ngúmu ichi-ndí nàcuáa cùni Yá Ndiöxi cunduu-i? —càchí-yu xáháⁿ-yu xii-gá.

29 Te ní xáhaⁿ Jèsús xii-yu:

—Yá Ndiöxi cùni-gá sá quindáá iní ñáhá-ndó xii yúhú, téé ní tendaha-gă véxi ñuyíú-a —càchí-gá xáhaⁿ-gă xii-yu.

30 Te ní xáhaⁿ tucú-yu xii-gá:

—¿Ná cúú sǎ vǎ yǒ
tnàhí ndàcu cada, cada-n
cùndehe-ndí cuèndá quíndáá
iní ñáhá-ndí xii-n-í? ¿Ádi nágá
cúú sǎ cáda-n cuèndá cutnùní
iní-ndí sá ndáá càháⁿ-n-í?
31 Chi cue ñaní tnáhá-ó nǐ
xíndecu ndéé sanaha nǐ
xexí-yu pàá nání mànáá xití
yucu dàtná yódó tnùní núú
tútú Yǎ Ndiòxí núú càchí-xi:
“Yá Ndiòxí ní sǎñaha-gǎ sá
nǐ xexí-yu, te ní cuuⁿ túu-xi
andiu”, duha càchí-xi núú
tútú-gǎ —càchí-yu xǎhǎⁿ-yu
xii-gǎ.

32 Te ní xáhaⁿ Jèsús:

—Na càchí tnúhu ndáá-í
xii-ndo sǎ ñà díú ndíi Moisés
ní sǎñaha ndíi pàá ní cuuⁿ
andiu nǐ xexí-yu, chi mee
Tàtá-í ní sǎñaha-gǎ sá nǐ
xexí-yu. Te sá táxi-gǎ vitna
cùu-xi 33 datná pàá véxi
cuuⁿ andiu càndeca-xi iní-ndó
nǐ caa nǐ quíhíⁿ —càchí-gǎ
xáhaⁿ-gǎ xii-yu.

34 Te ní xáhǎⁿ-yu xii-gǎ:

—Tàtá, mee-ni pàá-áⁿ
taxi-n càxi-ndí —càchí-yu
xǎhǎⁿ-yu xii-gǎ.

35 Te ní xáhaⁿ Jèsús:

—Yúhú cúú-í dàtná ñⁿ
sǎ xéxi-ndó càndeca-xi
iní-ndó. Te duha ndúu tnúhu
càháⁿ-í, chi nchaa ñáyiu na
quíndáá iní ñáhá xii-í, te
vá ndóhó-gǎ-yu docó te vá
ndóhó-gǎ-yu ndute. 36 Dícò-ní
sá nchóhó ñá túú sàndáá iní
ñáhá-ndó cuéi xini ñáhá-ndó
xii-í. 37 Te nchaa ñáyiu na
càchí Tàtá-í nduu cuèndá-í
nasaá-yu núu-í, te ñáyiu-áⁿ
vǎ dáquèe tíhù-í-yu. 38 Te ñá
díú yúhú sá véxi cuuⁿ-í andiu

te quíde-í nchaa sá cúú iní
mée-í, chi véxi cuuⁿ-í sá cáda-í
nchaa nàcuáa ní táuchíuⁿ
mèe Tàtá-í Dútú Ndiòxí Yáa
ní tendaha ñaha xii-í véxi-í
ñuyíu-a. 39 Te cuíni-gǎ sá
ncháá ñáyiu ní cachí-gǎ nduu
cuèndá-í vá dáñà-í-yu cuíta
nihnú-yu, te na sàá nduu te
diu-ni-í dandòto-í-yu. 40 Chi
ducaⁿ nǐ cachí Dútú Ndiòxí
cunduu sá ncháá ñáyiu na
tníi tnúhu càháⁿ-í, te quíndáá
ndisa iní ñáhǎ-yu xii yúhú
Déhe-gǎ, te nduu táhǎ-yu
cundecú-yu ndíhi Yá Ndiòxí
nǐ caa nǐ quíhíⁿ, te yúhú
dandòto-í-yu na sàá nduu —
càchí-gǎ xáhaⁿ-gǎ xii-yu.

41 Te ñá ní tnàhá iní
ñáyiu isràél tnúhu ní cáháⁿ
Jèsús núu ní ngúita-yu ní
cáháⁿ cuèhé-yu cuèndá-gǎ
cuèndá sá nǐ xáhaⁿ-gǎ sá
mée-gǎ cúú-gǎ dàtná sá xéxi-ó
véxi cuuⁿ andiu. 42 Te ní
xítnàhá-yu:

—¿Náa ñá díú tée-a cùu-dé
Jèsús déhe té Chéé? Nchoo
xini-ó tǎtá-dé, te xini-ó
nǎná-dé, iná cachí-tu tée-a
sá andiu véxi cuuⁿ-dé! —
càchí-yu xítnàhá-yu.

43 Te ní xáhaⁿ Jèsús xii-yu:

—Vá càháⁿ cuèhé-gǎ-ndó
cuèndá-í, chí dáñá. 44 Vá yǒ
quíndáá iní ñáhá xii yúhú núu
ñá túú mèe Tàtá-í táxi cuèndá
ñáhá-gǎ xii-yu. Te diu-gǎ ní
tendaha ñaha-gǎ xii-í véxi-í,
te yúhú dandòto-í-yu na sàá
nduu. 45 Te núú túú cue tée
ní xóo cáháⁿ tnúhu Yá Ndiòxí
ndéé sanaha càchí-xi: “Yá
Ndiòxí danèhé ñáhá-gǎ xii-yu
tnúhu-gǎ”, duha càchí-xi. Te
nchaa ñáyiu na cùndedóho

nchaa tnúhu càháⁿ Dútú Ndiöxí, te cutúha-yu nàcuáa càháⁿ-gá, te ñáiyu-áⁿ quìndáa iní ñáhá-yu xii yúhú.

46 Te vá yõo xini ñáhá xii Dútú Ndiöxí chi ñⁿdii-ni yúhú xini-í-gá, chi núu ndécú-gá ní quee-í véxi cuuⁿ-í —càchí-gá xáhaⁿ-gá xii-yu.

47 Te xáhaⁿ tùcu-gá:

—Na càchí tnúhu ndáa-í xii-ndo sá nchaa ñáiyu na quìndáa iní ñáhá xii-í, te naníhí tàhú-yu. 48 Te yúhú cúu-í dàtná ñⁿ sá xéxi-ndó càndeca-xi iní-ndó, te ducaⁿ sátnahá-xi cùu-í chi yúhú cada-í te nduu tàhú-ndó cùndecu-ndo ndihí Yá Ndiöxí ni caa ni quíhíⁿ. 49 Te cue ñaní tnáhá-ó ñi xíndecu ndéé sanaha ñi xexí-yu pàá nání mànáá xití yucu, dico ní sáa nduu te dacuítí ñi xihí-yu. 50-51 Te yúhú càháⁿ-í cuendá mèe-í, chi véxi cuuⁿ-í andiu. Te cùu-í dàtná ñⁿ sá nchító-ndó, te nchaa ñáiyu na càxi te càndeca-xi iní-yu ni caa ni quíhíⁿ te vá cuíta nihnu-gá-yu. Te sá táxi-í xii-ndo xáaⁿ cúu-xí yiqui cuñú-í, te cùu-xi cuendá nchaa ñáiyu nihí ñuyíu cuendá nduu tàhú-yu cundecú-yu ndihí Yá Ndiöxí ni caa ni quíhíⁿ —càchí-gá xáhaⁿ-gá xii-yu.

52 Te ní nguíta ñáiyu isràél xitnàhá-yu:

—¿Nása cada-tu téa-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

53 Te ní xáhaⁿ Jèsús:

—Na càchí tnúhu ndáa-í xii-ndo sá núu na càda iní-ndó

sá dàtná sá cáxi-ndó yiqui cuñú yúhú Téa cùu ñaní tnáhá-ndó nchaa-ndo, te cada tucu iní-ndó sá dàtná sá cóhó-ndó ñiñi-í ñá, te xáaⁿ quée-xí sá quìndáa iní ñáhá-ndó ñi yuhu ñi iní-ndó te naníhí tàhú-ndó, te núu ñáhá te cuíta nihnu-ndo. 54 Nchaa ñáiyu na càda iní-xi sá dàtná sá cáxi-yu yiqui cuñú-í te cohó-yu ñiñi-í, ñáiyu-áⁿ naníhí tàhú-yu te yúhú dandòto-í-yu na sàa nduu. 55 Chi yiqui cuñú-í ndihí ñiñi-í cúu-xí mèe-í. 56 Te nchaa ñáiyu na càda iní-xi sá dàtná sá cáxi-yu yiqui cuñú-í te cohó-yu ñiñi-í, te ñáiyu-áⁿ ñⁿ-ná cuu-í ndihí-yu chi cundecu ndihí-í-yu. 57 Te yúhú nchító-í chi ducaⁿ nchító Tàtà-í Yaá ní tendaha ñàha xii-í véxi-í ñuyíu-a. Te diu-ni ducaⁿ nchaa ñáiyu na quìndáa iní ñáhá xii-í te cundecu ndihí-í-yu ni caa ni quíhíⁿ. 58 Te yúhú cúu-í dàtná ñⁿ sá nchító-ndó véxi cuuⁿ andiu, dico ñá díu pàá sá nání mànáá ní xèxi cue ñaní tnáhá-ó ñi xíndecu ndéé sanaha, chi ní xexí-yu pàá te dacuèi ní xihí-yu. Te nchaa ñáiyu na quìndáa iní ñáhá xii yúhú Yaá véxi cuuⁿ andiu, te cundecu ndihí-í-yu ni caa ni quíhíⁿ —càchí-gá xáhaⁿ-gá xii-yu.

59 Nchaa tnúhu-a ní càháⁿ-gá xití veñúhu ñáiyu ñuu Capèrnaúm.

Jèsús càchí tnúhu-gá nàcuáa naníhí tàhú-ó

60 Te sá dúcáⁿ ñí cáháⁿ-gá nũu vâi ñáyiú nchícúⁿ ñáhá xì-gá ní xítñahá-yu:

—Vá tñíí cuítì-o tñúhu cáháⁿ-dé chi ñá díú tñúhu sá cúú vâha iní-ó cáháⁿ-dé — cächí-yu xítñahá-yu.

61 Te ní cutnùnì iní Jèsús sá ñà túú cáháⁿ vâha-yu cuendá tñúhu ní cáháⁿ-gá, núu ní xáhaⁿ-gá xii-yu:

—¿Náa ñá tñahá iní-ndó nâcuáa cáháⁿ-í-a? 62 Te uuⁿ-gá cada nchòhó nũu quínì-ndó yũhú Tée cùu ñanì tñahá-ndó nchàa-ndo ndaa-í núú ñí xíndecu-í díhna. 63 Te espíritú ndécú ndìhi yiqui cuñú-ó, xíáⁿ ndécá ñàha-xi xii-o, te núu ñá túú xíáⁿ, te yiqui cuñú-ó ñà túú nàndìhi-xi. Dico núu nchaa tñúhu cáháⁿ-í-a quée-xi iní-ndó ñá, te quínì-ndó nã xéhé candeca ñàha-xi xii-ndo núú cuáháⁿ núú vèxi. 64 Te dava nchòhó chi ñá túú sándáá iní-ndó —cächí-gá xáhaⁿ-gá xii-yu.

Te ducaⁿ ñí xáhaⁿ-gá chi sa nàha-gá nândi cùu ñáyiú vâ quíndáá iní ñáhá xì-gá. Te ducaⁿ sà naha-gá ndédacàa tée cuáha cuendá ñáhá xì-gá núú cuè tée cùu úhú iní ñáhá. 65 Te ní xáhaⁿ tucu Jèsús xii-yu:

—Te duha cáháⁿ-í chi sa ní cächí tñúhu-í xii-ndo sã vâ yõo ñí cuínì tñí tñúhu-í te núu ñá túú Tãtã-í Dútú Ndiöxí sánú ìchi ñàha-gá xii-yu — cächí-gá xáhaⁿ-gá xii-yu.

66 Te òré-án ïo vâi ñáyiú nchícúⁿ ñáhá xì-gá ní xócõo-yu ñá ní xica cuu-gá-yu ndìhi-gá. 67 Te xíáⁿ ní xáhaⁿ Jèsús xii ndi ùxúú cue tée xica cuu ndìhi-gá:

—¿Cuínì-ndó dândóo ñàha-ndo tñahá-ndó-ãⁿ? — cächí-gá xáhaⁿ-gá xii-güedé.

68 Te ní xáhaⁿ tẽ Xímú, àdi Pelú chi úú diu-dé:

—Mèstrú, ñá túú-gã ndèé quíhíⁿ-ndí, chi nchúhú náhá-ndí sá tñúhu mee-n cùu-xi sá vâha candeca-xi iní-ndí ñí caa ñí quíhíⁿ. 69 Chi nchúhú sa ní sándáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiöxí yaá ndécú àndiú — cächí-dé xáhaⁿ-dẽ xii-gá.

70 Te ní xáhaⁿ Jèsús:

—Nàha-ndo sá yũhú ní cáháⁿ ñáhá-í xii ndi ùxúú-ndó xica cuu ndìhi ñàha-í xii-ndo, dico ñí-ndo quíhu ñàha yùcu ñávâha xii-ndo —cächí-gá xáhaⁿ-gá xii-güedé.

71 Duha ní cáháⁿ Jèsús cuendá té Jüdás déhe té Xímú Iscarioté ñí tée ñùtnahá núú ùxí ñí cue tée xica cuu ndìhi-gá, chi sa nàha-gá sá tée-ãⁿ cuáha cuendá ñáhá-dẽ xii-gá ñí nduu núú cuè tée cùu úhú iní ñáhá.

7

Cue ñanì Jèsús ñá túú sándáá iní-güedé nâcuáa ndiú tñúhu cáháⁿ-gá

1 Te sátá dúcáⁿ ñí cuu, te ní xica cuu Jèsús distritú Galileá, te ñá ní sáháⁿ-gá distritú Jùdeá, chi yacáⁿ cuínì cue tée isrâél cahni ñàha-güedé xii-gá ní cùu. 2 Te ní cuyatni nduu càdá-yu vico, vico sá dánanì-yu Vico Vehe Tnuvixiⁿ. 3 Te ní xáhaⁿ cuè ñanì Jèsús xii-gá:

—Vâha-gá quíhíⁿ-n distritú Jùdeá te vâ cúndecu-n iha,

chi yàcáⁿ cada-n nchàa sá quidé-n ìha cuendá quini nchaa ñáyiú cùndihì ñaha xii-n ndecu yacáⁿ. ⁴ Chi núu cuiní-ó quini nchaa ñáyiú ná chiúⁿ cada-o te vá cádá ðàyuhu-o. Te yòhó cuéhé núú sá quidé-n, te cada-n na quini nchaa ñáyiú —càchí-güedé xáhaⁿ-güedé xii-gá.

⁵ Ducaⁿ ñí cáháⁿ cue ñaní-gá, chi ñí mèe-güedé ñá túú sàndáá iní-güedé nàcuáa ndùu tnúhu càháⁿ-gá. ⁶ Te ñí xáhaⁿ Jèsús xii-güedé:

—Vátá tnàhá-gá òré quihíⁿ-í dico nchòhó ndédani càa oré cuu quihíⁿ-ndó. ⁷ Chi nchaa ñáyiú ñùhu ichi cuehé ichi ðuha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá càháⁿ-í sá quidè-yu nchaa sá cuéhé sá dúhá. ⁸ Te chí cuáhán nchòhó vico chi yúhú vá quihíⁿ-ni-í chi vátá tnàhá-gá òré quihíⁿ-í —càchí-gá xáhaⁿ-gã xii-güedé.

⁹ Te ducaⁿ ñí xáhaⁿ-gã te ñí ndóo-gá Galileá, te cue téé-án cuáhán-güedé.

Jèsús ndécú-gã ñí vico chiñuhú-yu Yá Ndiöxí

¹⁰ Dico sátá cuáhán cue ñaní-gá, te ñí xica-gá cuáhán-gá tnàhá-gá ðicó-ñí sá ðàyuhu cuáhán-gá. ¹¹ Te ñáyiú isràél ñáyiú xíndecu vico nànducú-yu Jèsús, te xítnàhá-yu:

—¿Ndéé ndécú Jèsús? —
càchí-yu xítnàhá-yu.

¹² Te nchaa ñáyiú xíndecu vico xíndatnúhu-yu cuendá-gá. Te davá-yu

xítnàhá-yu sá ìo váha iní-gá, te davá-yu xítnàhá-yu sá ñà díú tèe váha cùu-gá, chi dándahú-gá ñáyiú.

¹³ Dico mee-ni xícáháⁿ náhí-yu, chi xiyùhú-yu cue téé cùnnu núu-yu.

¹⁴ Te ta ngühuⁿ dava vico, te cuánguïhu Jèsús veñúhu càhnu sá ìo cùnnu, te ñí ngüita-gá dácuaaha-gá ñáyiú. ¹⁵ Te ñáyiú isràél ñí cuñúhu vñí-yu sá ìo váha càháⁿ-gá, te ñí xítnàhá-yu:

—¿Ná cuendá ìo váha ñùhu-tu díquí tèe-a tnúhu càháⁿ-dé te ñá túú ñí dácuaaha-dé-í? —càchí-yu xítnàhá-yu.

¹⁶ Te ñí xáhaⁿ Jèsús:

—Ñá díú cuendá mèe-í cúu-xí sá dánèhé ñáhã-í xii-ndo, chi cuendá Dútú Ndiöxí Yaá ñí tendaha ñàha xii-í véxi-í cúu-xí. ¹⁷ Te núu ìo dava-ndo ñí yuhu ñí iní-ndó cuiní-ndó càda-ndo nacuaáa cuiní Yá Ndiöxí cunduu, te cutnúni ndáá iní-ndó sá tnúhu dácuaaha ñaha-í xii-ndo cùu-xi cuendá mée Dútú Ndiöxí, te ñá díú cuendá mèe-í cúu-xí. ¹⁸ Te téé cuiní sá cádá càhnu ñaha ñáyiú xii-dé, téé-án càháⁿ-dé nàcuáa véxi iní mée-dé. Dico yúhú cuiní-í sá cádá càhnú-yu Dútú Ndiöxí Yaá ñí tendaha ñàha xii-í véxi-í ñuyíú-a, te càháⁿ ndáá-í te ñá túú dácuaandehnde-í.

¹⁹ Te ndíi Moisés ñí taxi ndíi tnúhu sá sánú ichi ñaha xii-ndo nacuaáa cundecu-ndo, te ñí dùcaⁿ ñá túú sàndáá iní-ndó nàcuáa càháⁿ tnúhu-án. ¿Te ná cuendá cuiní-ndó càhni ñaha-ndo

xii-í? —càchí-gá xáhaⁿ-gă xii-yu.

²⁰ Te ní xáhăⁿ-yu xii-gá:

—Yucu ñăvâha dâcoto ñaha xii-ó, chi vá yôo ïⁿ cuñí cahni ñaha xii-n —cachí-yu xăhăⁿ-yu xii-gá.

²¹ Te ní xáhaⁿ Jêsús xii-yu:

—Sá nĩ quide-í ïⁿ sá vă yôo tnâhí ndâcu cada nduu cuu-xi nduu ndetatú-ó, xiăⁿ ío ní cuñúhu ñaha-ndo xii-í. ²² Te ndíi Moisés ní cachí ndíi sá cuăha-yu seña ñïi cue landú tée, dico ñá díú mée ndíi ní cahu iní ndíi chi ducaⁿ tnâhí ní xóo cada cue ñani tnâhá-ó dâvá-áⁿ, núu xiăⁿ nchôhó sâha-ndo seña ñïi landú tée cuéi cùu-xi nduu ndetatú-ó. ²³ Te ducaⁿ quide-ndo cuendá sá ñà túú nă cumání-ndó núu tnúhu sá sánú ichi ñaha xii-ndo ní dândôo ndíi Moisés. ¿Te ná cuendá cúdêéⁿ-ndó núu-í sá nĩ quide tátna-í tée cùhú nduu ndetatú-ó-í? ²⁴ Te váha váha cada cuendá-ndó, te vá cuendá-ni cáháⁿ-ndó sá yúhú ndécuechi-í chi ñá túú xini-ndó —càchí-gá xáhaⁿ-gă xii-yu.

Jêsús xáhaⁿ-gă xii-yu núu véxi-gá

²⁵ Te dava ñáyiú ñuú Jerusalén ní ngúita-yu xitnâhá-yu:

—¿Náa ñá díú tēe-áⁿ nándücu-güedé cahni-güedé?, ²⁶ núu náí-dé nútñïi núu chítú núu tàcá-ăⁿ cáháⁿ-dé, te vá yôo cùyïi cùñaha xii-dé ïⁿ tnúhu. Cudana te cue tée cùchiuⁿ sandáá iní-güedé sá díú-dé cúú-dé Crístú Yáá ní tendaha Yá Ndiôxí véxi ñuyíú-a. ²⁷ Dico nchoo xini-ó ndéé ichi véxi tée-ăⁿ, dico

Crístú ná quixi-gá chi vá yôo ïⁿ quini ndéé ichi quixi Yáá-áⁿ —càchí-yu xitnâhá-yu.

²⁸ Te yïhi Jêsús xití veñúhu cahnú sá ío cùnúu danehe-gá ñáyiú, te ní tecú dóho-gá tnúhu cáháⁿ-yu. Te níhi ní cáháⁿ-gá, te xáhaⁿ-gă xii-yu:

—¿Ná quini-tu nchôhó ndéé ichi véxi yúhú! Yúhú véxi-í dico ñá díú să cúú iní mée-í, chi Yá Ndiôxí Yáá quidé nchâa-ndi túhú sá vâha ní tendaha ñaha-gá xii-í véxi-í, te nchôhó ñá túú xini-ndó-gă.

²⁹ Te yúhú xini-í-gá chi núu ndécú-gă ní quee-í véxi-í, te diu mee-gă ní tendaha ñaha-gá véxi-í —càchí-gá xáhaⁿ-gă xii-yu.

³⁰ Te sá dúcáⁿ nĩ cáháⁿ-gá, núu cuñí-güedé tnïi ñaha-güedé xii-gá quihíⁿ-gá vecaá ní cùu, dico vá yôo ïⁿ ni cùyïi tnïi ñaha xii-gá chi vátá sàá-gá òré tnïi ñaha-güedé. ³¹ Dico vai-yu ní sandáá iní ñahă-yu xii-gá, te ní xitnâhá-yu:

—¿Nágá cúú să cadá Crístú ná quixi-gá-í?, te tée-a ío cuéhé núu să tá quide-dé véxi. Váa diu tée-a cùu-dé Crístú Yáá ní tendaha Yá Ndiôxí véxi ñuyíú-a —càchí-yu xitnâhá-yu.

Cue tée cùu fariséu cuñí-güedé quihíⁿ Jêsús vecaá

³² Te ní níhi cue tée cùu fariséu tnúhu nâcuáa cáháⁿ ñáyiú cuendá Jêsús, núu ní ndatnúhu-güedé ndïhi cue dútú cùnúu, te ní techiuⁿ-güedé cue tée quide cuendá veñúhu cuáháⁿ-güedé cuátñïi ñaha-güedé xii-gá

ní cùu. ³³ Te ní xáhaⁿ-gǎ xii-güedé:

—Sacú duha nduu cundecu ndihí ñaha-í xii-ndo, te núhu tucu-í núú ndécú tǎtà-í Yaá ní tendaha ñaha xii-í véxi-í ñuyíú-a. ³⁴ Te cuéi na nanducu ñaha-ndo dico vá ná nihí ñáhá-ndó chí vá sáa-ndó núú cundecu-í —càchí-gá xáhaⁿ-gǎ xii-güedé.

³⁵ Te ní ngüita ñáyiú isràél xǐtnàhá-yu:

—¿Ndèé quíhíⁿ-tu té-a te vá ná nihí-ó-dě-i? ¿Àdi quíhíⁿ-dé na chitnahá-dé ñáyiú isràél ñáyiú nchítenuu nchaa ñuú xícá cuendá danèhé-dé ñáyiú griégú? ³⁶ ¿Nása càháⁿ-tu-dé duha càháⁿ-dé: “Nanducu ñaha-ndo te vá nánihí ñáhá-ndó chí vá sáa-ndó núú cundecu-í”, càchí-tu-dé? —càchí-yu xǐtnàhá-yu.

Nàcuáa cada Espiritú Yǎ Ndiöxí iní-ó

³⁷ Te nduu ñí yáha-ná vico cùu-xi nduu cahnu vihi, te nduu-ǎⁿ ñí ngúnu tñí Jèsús tnuú ñáyiú, te níhi ní càháⁿ-gá, te xáhaⁿ-gǎ xii-yu:

—Núu ió dava-ndo yìchí-ndó ndüte, te quixi-ndo núú-í, te coho-ndo. ³⁸ Duha càháⁿ-í chí nchaa ñáyiú na quíndáá iní ñáhá xii-í, te cada-xi iní-yu dàtná ñí núú xícá ndüte, nchaa-ni nduu xica ñá túú yìchí, ducaⁿ càda-xi iní-yu núú cuaháⁿ núú véxi dàtná càháⁿ-xi núú tütú Yǎ Ndiöxí —càchí-gá xáhaⁿ-gǎ xii-yu.

³⁹ Te ducaⁿ ñí càháⁿ-gá cuendá sá quíxí Espiritú Yǎ Ndiöxí ngúndecu ndihí nchaa ñáyiú na quíndáá iní

ñáhá xii-gá, chí sáa nduu ndàa-gá andiú càda cahnu ñaha Tátá-gǎ xii-gá, te dàvǎ-áⁿ te quixi Espiritú Yǎ Ndiöxí cundecu ndihí-yu.

Ñá ní cùu ñí nuú-yu cuendá tñíhu ní càháⁿ Jèsús

⁴⁰ Te dava ñáyiú ní xíndedóho tñíhu ní càháⁿ Jèsús ní xǐtnàhá-yu:

—Ndáá sá tée-a cùu-dé tée càchí-yu quixi càháⁿ tñíhu Yǎ Ndiöxí —càchí-yu xǐtnàhá-yu.

⁴¹ Te dava tucú-yu xǐtnàhá-yu:

—Tée-a cùu-dé Crìstú Yaá ní tendaha Yǎ Ndiöxí véxi ñuyíú-a —càchí-yu xǐtnàhá-yu.

Te dava-gá tucú-yu xǐtnàhá-yu:

—¿Náa ndàa distritú Galileá quixi Crìstú Yaá tendaha Yǎ Ndiöxí quixi ñuyíú-a? ⁴² Chí núú tütú Yǎ Ndiöxí càchí-xi sá Crìstú Yaá tendaha Yǎ Ndiöxí quixi ñuyíú-a cuu-gá ñí ñaní tnáhá ndí Dàvíí, te quee-gá ñuú Bèlèn ñuú méé ndí Dàvíí, duha càháⁿ-xi núú tütú Yǎ Ndiöxí —càchí-yu xǐtnàhá-yu.

⁴³ Te xǎⁿ núu ñá ní cùu ñí nuú-yu cuendá Jèsús. ⁴⁴ Te davá-yu cuení-yu tñí-yu Jèsús quíhíⁿ-gá vecaá ní cùu, dico ní ñíⁿ-yu ñá túú ní cùyíⁿ-yu tñí ñàhá-yu xii-gá.

Cue tée cùchiuⁿ ñá túú sàndáá iní-güedé Jèsús

⁴⁵ Te cue tée cuaháⁿ tñí ñaha xii Jèsús ní cùu ní ndexio-güedé núú cuè tée cùu fariséu ndihí núú cuè dütú cúnú. Te xáhaⁿ cuè tée cúnú-áⁿ:

—¿Ná cuèndá ñá ní cãndeca-ndo tẽe-ãⁿ quixi? — cãchí-güedé xãhaⁿ-güedë.

46 Te cue tée ní sáháⁿ chiùⁿ ní xáhaⁿ-güedë:

—Ni ìⁿ tée ñá túú xìní-ndí cáháⁿ dàtná cáháⁿ tée-ãⁿ — cãchí-güedé xãhaⁿ-güedë.

47 Te ní xáhaⁿ cuè tée cùu fariséu:

—¿Náa tnàhá nchòhó ní sándáá iní-ndó tnùhu ndehnde cáháⁿ tée-ãⁿ? 48 ¿Náa ñá túú xìní-ndó sã nì ìⁿ cue tée tàxi tnuní nchúhú, te nì ìⁿ nchúhú cue tée cùu fariséu ñá túú sándáá iní-ndí tée-ãⁿ ñã? 49 Nchaa ñáyíu tùha ñaha xii tée-ãⁿ ñá túú sándáá iní-yu nãcuáa cáháⁿ tnúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —cãchí-güedé xãhaⁿ-güedë xii cue tée-ãⁿ.

50 Te té Nicòdemú tée ní sáháⁿ niú ní ndatnúhu-dé ndihi Jèsús cúu-dé tnàhá-dé ìⁿ tée fariséu, te ní xáhaⁿ-dë xii-güedé:

51 —Tnúhu sá sánú ìchi ñaha xii-o nacuáa cundecu-o cãchí-xi sá ndeé cundedóho-o nãsa cáháⁿ tée tàú cuéchi cuèndá cutnúni iní-ó nã ní quide-dé, te dàtnúni cáháⁿ-ó nùu ndisa ndècuéchi-dé àdi ñá túú ndècuéchi-dé —cãchí-dé xãhaⁿ-dë.

52 Te ní xáhaⁿ-güedë:

—Cùu ní cachí sá tnàhá-ò cúu-n tée distritú Galileá nùu ducaⁿ cáháⁿ-n. Dacuáha tutú yódó tnúni tnúhu Yá Ndiòxí te quiní-n nãcuáa cáháⁿ-xi sá nì ìⁿ tée vèxi distritú Galileá ñá túú cáháⁿ-dë tnúhu Yá Ndiòxí —cãchí-güedé xãhaⁿ-güedë.

53 Ducaⁿ te ndi díⁿ cuãnuhú-güedé vehe-güedé.

8

Íⁿ ñadìhí ndécú vìhi cuéchi-xi

1 Te Jèsús cuáháⁿ-gá yucu Òlívú. 2 Te sátá nì túndaá nduu tnèé, te cuáháⁿ tucu-gá veñúhu càhnu sá ìo cùnuu. Te ìo cuéhé ñáyíu ní chítú níhnù-yu núú-gã, te ní ngóo-gá ní dánèhé ñáhá-gã xii-yu. 3 Te ní quexìo cue tée dàcuaha ñaha xii-yu nchaa tnúhu ní chídó tnúni ndí Moisés, ndihi cue tée cùu fariséu, te ndèca-güedé ìⁿ ñadìhí ní sáa, te ñaha-áⁿ nì xini ñáhã-yu cáháⁿ ndihi-aⁿ ìⁿ tée dico ñá díú yì-aⁿ cuu-dé, te ní sanutnì ñaha-güedë xii-aⁿ tnuú nchaa ñáyíu xìndecu núú Jèsús. 4 Te ní xáhaⁿ-güedë xii Jèsús:

—Mèstrú, ñadìhí-a ní xini ñáhá ñáyíu xii-aⁿ cáháⁿ ndihi-aⁿ ìⁿ tée dico ñá díú yì-aⁿ cuu-dé. 5 Te tnúhu ní chídó tnúni ndí Moisés cãchí-xi sá yùu cahni-o nchaa ñáyíu dìhí duha quide. Te yòhó, ¿nása cãchí-n cùnduu-i? —cachí-güedé xãhaⁿ-güedë xii-gá.

6 Duha ní cáháⁿ-güedé chi cuèndá sá cuini-güedé coto ndeé ñáhá-güedë xii-gá nùu nása cáháⁿ-gá cuèndá núcóo nchihí ñaha-güedë xii-gá ní cáháⁿ-güedë. Te ní ngúnu ndeyi-gá te ní ngúita-gá tée-gã ndihi díquí ndáhá-gã lètrá núú ñúhú. 7 Te xicáⁿ tnúhú-ni tucu-güedé núú-gã nùu ní ndonehe núú-gã, te ní xáhaⁿ-gá:

—Ndědani cãa nchohó te núu ñá túú nã cuéchi quide-ndo te díhna nuu-gã-ndó chĩ cuãha-aⁿ yúú —càchí-gá xáhaⁿ-gã xii-güedé.

⁸ Te ní ngúnu ndeyi tucu-gá téé tucu-gá letrá núú ñúhú.

⁹ Te sá dúcáⁿ ñĩ xáhaⁿ-gã xii-güedé te ní ndixi túú iní-güedé sá ñà túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue téé cùu sacuéhé ñĩ ndee te ní ngúíta nchicúⁿ dava-gá-güedé. Te sátá ñĩ ndihí-güedé ní ndee, te ní quendóo mee-nã Jèsús ndihí ñadìhí-áⁿ. ¹⁰ Te ní ndonehe núú Jèsús te ní xiní-gá sá ñĩ ndihí-güedé cuáháⁿ te mee-nã ñadìhí-áⁿ ñĩ ndóo-aⁿ, te ní xáhaⁿ-gã xii-aⁿ:

—¿Nděndi cuáháⁿ cue téé càchí sá ñĩ quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —càchí-gá xáhaⁿ-gã xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhà-í castiú xii-n. Te vitna te núhú-n te vá cadá-gã-n nãndi sá cuéhé sá dúhá —càchí-gá xáhaⁿ-gã xii-aⁿ.

Jèsús dándixi túu-gá iní-ó

¹² Te ní cáháⁿ tucu Jèsús núú ñáyiu, te xáhaⁿ-gã xii-yu:

—Yúhú cùú-í dàtná ìⁿ ñuhú dáyehe-í ñuyíú-a, te nchaa ñáyiu na chitnahá ñáhá xii-í, te vá cùndecu-gá-yu ichi cuéhé

ichi duha, chi yúhú dándixi túu-í iní-yu cuendá cutnùní iní-yu nàcuáa ndùu cuendá Yã Ndiöxí, te cundecu-í ndihí-yu ni caa ni quíhíⁿ —càchí-gá xáhaⁿ-gã xii-yu.

¹³ Te ní xáhaⁿ cuè téé cùu fariséú xii-gá:

—Medì-n caháⁿ-n sã cúú-n téé váha, te vá yóo ìⁿ-gá chindèe tnúhu ñaha xii-n núu ná téé cùu-n, dico xiãⁿ ñá túú nãndihí-xi —càchí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuèi càháⁿ-í cuendá mée-í dico nãndihí tnúhu càháⁿ-í. Chi yúhú nàha-í ndèe ichi véxi-í, te xiní-í ndèe ichi núhú-í, dico nchòhó chi ñá túú xiní-ndó ndèe ichi véxi-í, te ni ñá túú xiní-ndó ndèe ichi quíhíⁿ-í. ¹⁵ Te nchòhó chi cuendá-ni càháⁿ-ndó cuendá ñáyiu núu quide váha-yu àdi ñá túú quide váha-yu. Te yúhú ñá túú càháⁿ-í cuendá ñáyiu núu quide váha-yu àdi ñá túú quide váha-yu.

¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ni mée-í càháⁿ, chi tnàhá Tãtã-í Yaa ní tendaha ñaha xii-í véxi-í ñuyíú-a càháⁿ-gá chindèe tnúhu ñaha-gã xii-í.

¹⁷ Te tnúhu sá sánú ìchí ñaha xii-ndo cachí-xi sá núu na cùndecu úú cue téé cáháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na càháⁿ-güedé ndi ndùú-güedé te xiãⁿ nãndihí-xi, duha càchí tnúhu-áⁿ. ¹⁸ Te diu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mée-í, te diu-ni dàtná càháⁿ-í càháⁿ Tãtã-í Yaa ní tendaha ñaha

xii-í véxi-í ñuyíú-a —càchí-gá xáhaⁿ-gã xii-güedé.

19 Te ní xáhaⁿ-güedë xii-gá:

—¿Te ndëé ndécú Tătá-n-í? —càchí-güedé xáhaⁿ-güedë.

Te ní xáhaⁿ Jèsús:

—Te núu dìcò xìní-ndó yòo cuu yúhú-á te ducaⁿ te quini-ndó Tătá-í. Te ni yúhú ñá túu xìní-ndó yòo cuu-í núu xíáⁿ ñá túu xìní-ndó Tătá-í —càchí-gá xáhaⁿ-gã xii-güedé.

20 Duha ní cáháⁿ Jèsús nini

dàcuaha-gá ñáyiu xití veñúhu núu ndécú àlcanjá díhúⁿ. Te vá yòo iiⁿ ní cùyii tñii ñaha xii-gá chi vátá sàá-gá òré tñii ñaha-güedë.

Ñáyiu ñá túu sàndáá ini ñáhá xii Jesús vá ndácú-yu quíhíⁿ-yu núu nùhú-gá cundecu-gá

21 Te ní xáhaⁿ tùcu Jesús xii-güedé:

—Yúhú nùhú-í te nanducu ñaha-ndo te vá nánhí ñáhá-ndó, te cuú-ndó núu yíca cuëchi-ndo, chi vá ndácú-ndó sáá-ndó núu nùhú-í cundecu-í —càchí-gá xáhaⁿ-gã xii-güedé.

22 Te ní xítñaha cue téé is-ràel:

—¿Te náa cahni-dé méé-dë núu càchí-dé sá vá ndácú-ó sàá-ó núu quíhíⁿ-dé-áⁿ? —càchí-güedé xítñaha-güedé.

23 Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñùhu iní-ndó sá ío ñuyíú-a. Te yúhú chi téé núu ñinu cùu-í núu xíáⁿ ñá túu sá ío ñuyíú-a ñùhu iní-í. 24 Te xíáⁿ núu càchí-í sá cuú-ndó núu yíca cuëchi-ndo,

chi ñá cuini-ndó quindáá iní-ndó sá yúhú véxi cuuⁿ-í andiu, te núu xíáⁿ diu-ni núu yíca cuëchi-ndo cùu-ndó —càchí-gá xáhaⁿ-gã xii-güedé.

25 Te ní xícaⁿ tnúhú-güedë núu-gã, te xáhaⁿ-güedë:

—¿Te ná cúu yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gã:

—Sa ní cachí tnúhu-í xii-ndo ndëé díhna —càchí-gá xáhaⁿ-gã xii-güedé.

26 Te xáhaⁿ tùcu-gá:

—Ndëcu cuéhé tnúhu cáháⁿ-í cada ndáá-í cuëndá nchòhó. Te Tătá-í Yaá ní tendaha ñaha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní cáháⁿ-gá ní xíndedóho-í —càchí-gá xáhaⁿ-gã xii-güedé.

27 Te mee-güedë ñá túu ní tècú tnùnì-güedé sá cuëndá Dútú Ndiòxí ní cáháⁿ Jèsús.

28 Te ní xáhaⁿ-gã xii-güedé:

—Òré ná catá càa ñaha-ndo xii yúhú Téé cùu ñani tñáhá-ndó nchàa-ndo núu cùrúxí cahni ñaha-ndo, te òré-áⁿ cutnùnì iní-ndó yòo cuu-í, te ñá túu quide-í sá cúu iní méé-í, chi yúhú càháⁿ-í nàcuáa ní dánèhé ñáhá Tătá-í 29 Yaá ní tendaha ñaha xii-í véxi-í. Te diu-gá ndécú ndihì ñaha-gá xii-í, te ñá túu dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gã xii-güedé.

30 Te sá dúcáⁿ ñí cáháⁿ-gá núu ío vài ñáyiu ní sàndáá ini ñáhá xii-gá.

Ñáyiú sàndáá iní ñáhá xii Yá Ndiöxí ndihi ñáyiú ndècu ichi cuehé ichi duha

³¹ Te ní xáhaⁿ Jèsús xii ñáyiú israél ñáyiú ní sàndáá iní ñáhá xii-gá:

—Te núu vá dáñá ndèé-ndó cada-ndo nchaa nacuaá cãháⁿ-í, te cuu ndisa-ndo cuè téé tnàhá tnúhu ndihi-í, ³² te tecú tnùní-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gã xii-yu.

³³ Te ní xáhãⁿ-yu:

—Nchúhú cúu-ndí cue ñaní tnáhá ndíi Àbrahám, te ni ñⁿ nduu ñá túú ndèé sácũndedí nihnu-ndí ndoho tnahá-ndí nõu cáchí-õ sá dacácu nihnu ñaha-n xii-ndí —càchí-yu xãhãⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tnúhu ndáá-í xii-ndo sá nchaa ñáyiú quide nchaa sá cuehé sá dúhá tàxi tnuní ñáhá-nã-xi xii-yu. ³⁵ Te cue ñáyiú xinu cuechi te vá cúú ñⁿ-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-án chi ñⁿ-ni cùu ndihi ñaha-güexi xii-yu. ³⁶ Te núu yúhú Yaá cúú Dèhe Yá Ndiöxí dacácu nihnu ñaha-í xii-ndo nõu nchaa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúu-ndó ñaní tnáhá ndíi Àbrahám, te dicó-ni sá ñã tnáhá ini-ndó tnúhu cãháⁿ-í nõu xãⁿ cuiní-ndó cãhni ñaha-ndo. ³⁸ Te yúhú cãháⁿ-í nãcuáa ní dánèhé ñáhá Tãtã-í, te nchòhó quidé-ndó nãcuáa cãháⁿ tãtã-ndó —càchí-gá xáhaⁿ-gã xii-yu.

³⁹ Te ní xáhãⁿ-yu:

—Ndíi Àbrahám cúú tãtã-ndí —càchí-yu xãhãⁿ-yu xii-gá.

Te ní xáhaⁿ Jèsús:

—Núu ndisa ñaní tnáhá ndíi Àbrahám cúu-ndó, te cada-ndo nãcuáa ní xóo cada ndíi ni cùu. ⁴⁰ Te yúhú cuèi cãháⁿ-í ñⁿ tnúhu ndáá nãcuáa cãháⁿ Yã Ndiöxí càchí tnúhu-gá xii-í, te cuiní-ndó cãhni ñaha-ndo. ¡Dico ndíi Àbrahám chi ñã túú ducaⁿ ni quide ndíi! ⁴¹ Te nchòhó quidé-ndó nãcuáa quide tãtã-ndó —càchí-gá xáhaⁿ-gã xii-yu.

Te ní xáhãⁿ-yu:

—Nchúhú, ñã túú yàyacáⁿ ndécú tãtã-ndí, chi ñⁿndíi Yá Ndiöxí cúú tãtã-ndí —càchí-yu xãhãⁿ-yu xii-gá.

⁴² Te ní xáhaⁿ Jèsús:

—Núu dicó Yã Ndiöxí ndisa cùu Tãtã-ndó te cuu iní ñáhá-ndó xii-í ní cùu chi yúhú ní quee-í núu ndécú-gã véxi-í ñuyiú-a. Te ñã túú véxi-í sá cúú iní méè-í, chi mee-gã ní tendaha ñaha-gã véxi-í. ⁴³ Te ñã túú tècú tnùní-ndó tnúhu cãháⁿ-í chi ñã túú tnáhá ini-ndó. ⁴⁴ Te nchòhó chi tãtã-ndó cùu yucu ñávãha núu cùdíi ini-ndó quide-ndo nchaa nacuaá cùu ini-xi, chi ndéé òré ní ngáva ñuyiú ducaⁿ-ni ndècu-xi dacáhãⁿ-xi ini-ndó sãhni tnaha-ndo. Te ñã ñⁿ ndùu cãháⁿ-xi ñⁿ tnúhu ndáá chi ñã túú xica-xi ichi ndáá, chi mee-ni ichi tnúhu ndehnde xica-xi chi ducaⁿ ini-xi. Te ñⁿu-xi dacahu-xi ini-ndó dacuandehnde-ndo. ⁴⁵ Te yúhú cãháⁿ-í tnúhu ndáá te ñã túú cuiní-ndó quindáá ini ñáhá-ndó. ⁴⁶ ¿Te ndèdacàa

nchohó xini-ndó sã quidè-í ìⁿ sã cuèhé sã dúhá-í?, te yúhú ñá túú ñá quidè-í chi cãháⁿ ndáá-í, ¿te ná cuendá ñá túú cuìní-ndó quindáá iní-ndó tnúhu cãháⁿ-í? 47 Te nchaa ñáyiú ndècu ichi Yá Ndiòxi, ñáyiú-áⁿ sácúndedóho-yu nchaa tnúhu cãháⁿ-gá. Te nchòhó chi ñá díú ichi Yá Ndiòxi ndécú-ndó núu ñá túú sácúndedóho-ndo tnúhu cãháⁿ-gá —càchí-gá xáhaⁿ-gá xií-yu.

Dìhna-gá Cristú sa ndècu dacúúxí ndí Ìbrahám

48 Te ní xáhaⁿ ñáyiú isràél:

—Váha-ni cãháⁿ-ndí sã tée samaritanú cuú-n, te yucu ñávãha ndècu ndíhi-n —càchí-yu xáháⁿ-yu xií-gá.

49 Te ní xáhaⁿ Jèsús:

—Yúhú, ñá túú yùcu ñávãha ndècu ndíhi-í, chi Tãtà-í quidé cãhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gá xií-yu.

50 Te xáhaⁿ tùcu-gá:

—Yúhú, ñá túú càchí-í sã cádá cãhnu ñaha-ndo, dico Dútú Ndiòxi cuìní-gá sã cádá cãhnu ñaha-ndo xii-í. Te mee-gã cãháⁿ-gá núu ndèdacàa-ndo quide váha, te ndèdacàa-ndo ñá túú quide váha. 51 Te na càchí tnúhu ndáá-í xii-ndo sã nchaa ñáyiú na tnì tnúhu cãháⁿ-í te vá cuíta nihnú-yu —càchí-gá xáhaⁿ-gá xií-yu.

52 Te ní xáhaⁿ tùcu ñáyiú isràél:

—Vitna te ní xiní ndáá-ndí sã yùcu ñávãha ndècu ndíhi-n, chi ndí Ìbrahám ndíhi nchaa cue tée ní xóo cãháⁿ tnúhu Yá Ndiòxi ndéé sanaha ñí

xíhí-güedé, te yòhó càchí-tu-n sã ncháá ñáyiú na tnì tnúhu cãháⁿ-n te vá cuú-gá-yu. 53 ¿Náa ío-gá cãhnu cuu-ó dácúúxí ñàní tnáhá-ndí ndí Ìbrahám-áⁿ? Tée-áⁿ dai ní xíhí-dé ndíhi cue tée ní xóo cãháⁿ tnúhu Yá Ndiòxi ndéé sanaha. ¿Te yòhó nágá-tu cùu-n te vá cùú-n cãháⁿ-n-í? —càchí-yu xáháⁿ-yu.

54 Te ní xáhaⁿ Jèsús:

—Te núu dìcò mée-í quidé cãhnu-í mée-í ñá, te ñá túú nandíhi sã quidè-í núu ducaⁿ. Dico Tãtà-í quidé cãhnu ñaha-gá xii-í, te díu-ni Yaá-áⁿ càchí-ndó cùu Ndiòxi-ndó. 55 Te nchòhó chi ñá túú xini-ndó-gá. Te yúhú chi xini-í-gá. Te núu na càchí-í sã ñá túú xini-í-gá te dàcuandehnde-í dàtná ndehnde mée-ndo. Te yúhú chi xini ndisa-í-gá te tnì-í nchaa tnúhu cãháⁿ-gá. 56 Te ndí Ìbrahám ñàní tnáhá-ndó ñí xindecu ndéé sanaha ío ní cudíí iní ndí sã quini ñáhá ndí xii-í, te ní sáá nduu ñí xiní ñáhá ndí xii-í núu ío ní cudíí iní ndí —càchí-gá xáhaⁿ-gá xií-yu.

57 Te ní xáhaⁿ ñáyiú isràél xii Jèsús:

—Ni vátá cùhúⁿ-gã-n ùdico úxí cuiá-n te càchí-n sã ñí xiní-n ndí Ìbrahám, te ní cunaha vihi ní xíhí ndí-áⁿ —càchí-yu xáháⁿ-yu xií-gá.

58 Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cunde cu ndí-áⁿ ñuyúú-a te yúhú sa ndècu-gá-í —càchí-gá xáhaⁿ-gá xií-yu.

59 Te sá dúcáⁿ nǐ cáháⁿ-gá nũu xiǎⁿ ní quehéⁿ-yu yúu cuáha ñàhá-yu xii-gá ní cùu, te ní nguiváha-gá núu-yu te ní quee-gá xití veñúhu cuáháⁿ-gá.

9

Jesús quidé tǎtna-gá ìⁿ tée cuáá

1 Te núu xicá cùu Jesús ní naníhí-gǎ ìⁿ tée cuáá, te sa ducaⁿ tnàhí càa núu-dě ní cacu-dé. 2 Te ní xáhaⁿ cuè tée xica cuu ndihí-gá xii-gá:

—Mèstrú, ¿ná cuendá dàcáⁿ cuáá tée-ǎⁿ ní cacu-dé? ¿Sá cuendá nchaa yicá cuèchi tǎtá-dě, ǎⁿ sǎ cuendá nchaa yicá cuèchi nǎná-dě, ǎⁿ sǎ cuendá nchaa yicá cuèchi mee-dě dàcáⁿ cáá-dě ní cacu-dé? —càchí-güedé xǎhaⁿ-güedé xii-gá.

3 Te ní xáhaⁿ Jesús:

—Ni ñà díú sǎ cuendá nchaa yicá cuèchi mee-dě, te ni ñà díú sǎ cuendá nchaa yicá cuèchi tǎtá-dě, te ni ñà díú sǎ cuendá nchaa yicá cuèchi nǎná-dě, chi mee Yǎ Ndiöxí ní cuini-gá sá dúcáⁿ cünduu-dé sǎá-dé ñuyúu-a cuendá sǎ ñuyúu-a quini ñáyiu nása cada ñaha Yǎ Ndiöxí xii-dé ndúha núu-dě. 4 Te vitna ió-gá nduu cùyica sǎ cáda-í nchaa chiⁿ ní táhú Yǎá ní tendaha ñàha xii-í véxi-í ñuyúu-a, chi sǎá nduu te vá ndácú-gǎ-í cada-í chiⁿ-gá. 5 Te nini ndècu-gǎ-í ñuyúu-a te dǎndixi túu-í iní nchaa ñáyiu cuendá cutnùni iní-yu nàcuáa ndùu cuendá Yǎ Ndiöxí —càchí-gá xǎhaⁿ-gǎ xii-güedé.

6 Te sátá dúcáⁿ nǐ cáháⁿ-gá, te ní sati-gá díi-gá núu ñúhú te ní dácá-gǎ luha ñuhu ní cuáha ndéhyú, te ndéhyú-ǎⁿ nǐ dácánùu-gá ndúu xio núu tée cuáá-áⁿ. 7 Te ní xáhaⁿ-gǎ xii-dé:

—Quíhíⁿ-n nàquete-n núu-n ndùte tanquí Silòé —càchí-gá xáhaⁿ-gǎ xii-dé. Te Silòé-áⁿ quée-xí tnúhu mèe-yu: Tée xica chiuⁿ.

Te ní sáháⁿ tée cuáá-áⁿ nǐ naquete-dé núu-dě, te òré ní ndexio-dé te sa ndèhe-dé. 8 Te nchaa ñáyiu ndècu yatni núu ndécú-dě ndihí nchaa ñáyiu xini ñáhá xii-dé núu xicáⁿ ndáhú-dé ní xitnàhá-yu:

—¿Náa ñà díú tée-ǎⁿ ní xóo cácáⁿ ndáhú-dé? —càchí-yu xitnàhá-yu.

9 Te davá-yu càchí-yu sǎ díú-dě, te davá-yu càchí-yu sǎ ñà díú-dě, dico ducaⁿ càa-dé, càchí-yu xitnàhá-yu.

Dico mee-dě ní xáhaⁿ-dě xii-yu sǎ díú-dě.

10 Te ní xicáⁿ tnúhũ-yu núu-dě, te xǎháⁿ-yu:

—¿Nása ní cuu núu ní ndúha núu-n ndèhe-n vitna? —cachí-yu xǎháⁿ-yu xii-dé.

11 Te ní xáhaⁿ-dě:

—Tée nàni Jesús-ǎⁿ ní cadúha-dé luha ndéhyú te ní dácánùu-dé núu-í, te ní táuchíuⁿ-dě ní sáháⁿ-í tànquí Silòé ní naquete-í núu-í, te òré-áⁿ nǐ cuu cundehe-í —càchí-dé xǎhaⁿ-dě xii-yu.

12 Te ní xicáⁿ tnúhú tùcú-yu núu-dě, te xǎháⁿ-yu:

—¿Te ndèè ndécú tée-áⁿ? —càchí-yu xǎháⁿ-yu xii-dé.

Te ní xáhaⁿ-dě:

—Ñá túú xìní-í —càchí-dé xǎhaⁿ-dě xii-yu.

Cue téé cùu fariséú ndátnúhu-güedé ndihi téé ní ndúha núú-xi

13 Te ndèca-güedé téé ní ndúha núú-xi-áⁿ cuǎháⁿ núú cuè téé cùu fariséú. 14 Te cuèndá sá ndùu ndetatú-yu ní cadúha Jèsús ndéhyú ní dácánù-gá núú tǎe-áⁿ te ní ndúha, 15 xiǎⁿ nùu ní xícáⁿ tnúhú cuè téé cùu fariséú núú-dě, te xǎhaⁿ-güedé:

—¿Nása ní cuu ní ndúha núú-n? —càchí-güedé xǎhaⁿ-güedé xii-dé.

Te ní xáhaⁿ-dě xii-güedé:

—Iⁿ téé ní dácánù-dé ndéhyú nùu-í te ní sáháⁿ-í ní naquete-í, te ní cuu ndèhe-í vitna —càchí-dé xǎhaⁿ-dě xii-güedé.

16 Te dava cue téé cùu fariséú ní xítnáha-güedé:

—Ñá díú Yǎ Ndiöxí ní tëndaha ñaha-gá xii téé-ǎⁿ véxi-dé nùu duha quide-dé nchaá sá vǎ yǒo tnàhí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xítnáha-güedé.

Te dava-güedé ní xítnáha-güedé:

—¿Nása ndacu-dé cada-dé sá vǎ yǒo tnàhí ndàcu cada te núu cùu-dé téé yíca cuèchi? —càchí-güedé xítnáha-güedé.

Te ñá túú ní cùu ñⁿnuu-güedé tnúhu ní cáháⁿ-güedé. 17 Te ní xícáⁿ tnúhú tùcu-güedé núú tǎe ní ndúha núú-xi-áⁿ, te xǎhaⁿ-güedé:

—Te yòhó, ¿nása càchí-n cuèndá téé ní quide tátna

núú-n te ní ndúha? —càchí-güedé xǎhaⁿ-güedé xii-dé.

Te ní xáhaⁿ-dě:

—Yúhú càchí-í sá ñⁿ tǎe cáháⁿ tnúhu Yá Ndiöxí cúú-dé —càchí-dé xǎhaⁿ-dě xii-güedé.

18 Dico cue téé isràél ñá ní sàndáá iní-güedé sá cuáá-dé ní cùu, chi cuèndá sa ní ndúha núú-dě ní xìní ñáhá-güedé, te xiǎⁿ nùu ní cana-güedé tátá-dě ndihi nǎná-dě, 19 te ní xícáⁿ tnúhú-güedé núú-yu, te xǎhaⁿ-güedé:

—¿Diu téé-a déhe-ndo tǎe càchí-ndó cuáá-dé ní cacu-dé-ǎⁿ? ¿Te nása ní cuu ní ndúha núú-dé? —càchí-güedé xǎhaⁿ-güedé xii-yu.

20 Te ní xáhaⁿ tátá-dě ndihi nǎná-dě:

—Diu déhe-ndí cúú-dě te sa cuáá ndisa-dé ní cacu-dé, 21 dico ñá túú xìní-ndí nása ní cuu ní ndúha núú-dé, te ni ñá túú xìní-ndí yoo ní quide tátna. Chí càcáⁿ tnúhú nùu méé-dé xiǎⁿ nùu sa sàcuéhé-dé, te na cáháⁿ-dé nùu nása ní cuu ní ndúha núú-dé —càchí-yu xǎháⁿ-yu xii-güedé.

22 Duha ní cáháⁿ tátá-dě ndihi nǎná-dé ní xǎháⁿ-yu xii-güedé cuèndá sá yùhú-yu cue téé cùnno núú ñǎyiu isràél, chi cue téé-ǎⁿ sa ní ndatnúhu-güedé ní cuu ñⁿnuu-güedé sá nùu ndèdacàa ñǎyiu na cáháⁿ sá Jèsús cúú-gǎ Cristú Yaá ní tendaha Yá Ndiöxí véxi ñuyú-a, te vá dáhá-gǎ-güedé quihu-yu veñúhu. 23 Núu xiǎⁿ ní xǎhaⁿ tátá-dě ndihi nǎná-dé sá ná càcáⁿ tnúhú-güedé núu méé-dé chi sa sacuéhé-dé.

24 Te xǎnⁿ nõu ní cana tucu-güedé téé ní ndúha núú-xi-áⁿ, te ní xáhaⁿ-güedé:

—Cáháⁿ-n ìⁿ tnúhu ndáá chi Yá Ndiõxí ndéhé ndì-gá nàcuáa ní cuu ní ndúha núú-n, chi nchúhú xìní-ndí sá dícó ìⁿ téé ndècu yíca cuèchi-xi cùu téé càchí-n ní quide tátna núú-n —càchí-güedé xáhaⁿ-güedé xii-dé.

25 Te ní xáhaⁿ-dè:

—Yúhú, ñá túú xìní-í te núu téé ndècu yíca cuèchi-xi cùu-dé àdi ñáhá. Dícó-ni sá xìní-í sá cuàá-í ní cùu te vitna ní cuu cundehe-í —càchí-dé xáhaⁿ-dè xii-güedé.

26 Te ní xícaⁿ tnúhú tucu-güedé núú-dè, te xáhaⁿ-güedé:

—¿Nása ní quide ñaha-dè xii-n te ní ndúha núú-n-í? —càchí-güedé xáhaⁿ-güedé xii-dé.

27 Te ní xáhaⁿ-dè:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuíní-ndó càchí tnúhu-ni tucu-í? ¿Á tnáhá-ndó cuíní-ndó quindáa iní-ndó tnúhu càháⁿ-dè? —càchí-dé xáhaⁿ-dè xii-güedé.

28 Te ní cudééⁿ-güedé núú-dè, te ní xáhaⁿ-güedé xii-dé:

—Te núu yòhó cuíní-n chinchícúⁿ-n tée-áⁿ te cuáháⁿ, dico nchúhú chi canchícúⁿ nihnu nahi-ni-ndí nàcuáa ní cáháⁿ ndíi Moisés. 29 Te nchúhú chi nàha-ndí sá Yá Ndiõxí ní cáháⁿ ndìhi-gá ndíi Moisés, dico téé càchí-n-áⁿ chi ni ñà túú xìní-ndí ndèé téé cùu-dé —càchí-güedé xáhaⁿ-güedé xii-dé.

30 Te ní xáhaⁿ tée ní ndúha núú-xi-áⁿ:

—¿Te náa ñá díú nchòhó càchí-ndó sá ìo túha-ndo? Te núu ducaⁿ càháⁿ-ndó sá ñà túú xìní-ndó ndèé téé cùu-dé, te òu-dé ní quide tátna-dé núú-í ní ndúha —càchí-dé xáhaⁿ-dè xii-güedé.

Te xáhaⁿ tucu-dé:

31 —Xìní-ó sá Yá Ndiõxí ñá túú tédòho-gá tnúhu càháⁿ ñáyiú quide nchaa sá cuèhé sá dúhá, chi nchaa ñáyiú quide cahnu ñaha xii-gá te quidé-yu nchaa nàcuáa cùu iní-gá, te ñáyiú-áⁿ tédòho-gá tnúhu càháⁿ-yu. 32 Te ñá ìⁿ ndùu cáháⁿ ñáyiú cuendá ìⁿ téé cada tátna núú ìⁿ ñáyiú cuàá ndéé ní cacu-xi te ndúha. 33 Te núu ñá díú mèe Yá Ndiõxí ní tëndaha ñaha-gá xii téé-áⁿ véxi-dé ñá, te vá ndácú-dè cada tátna-dé núú-í ní cùu —càchí-dé xáhaⁿ-dè xii-güedé.

34 Te ní xáhaⁿ-güedé:

—Dico yòhó ndèé yatni vài cuèchi sa ta quide-n véxi, ¿te vitna nacanú ichi ñaha-n xii-ndí cáháⁿ-n-áⁿ? —càchí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhí tnáhá ndìhi ñaha-dé xii-güedé.

Ñáyiú ñá túú ndìxi túu iní cuendá nchaa sá cuèhé sá dúhá quidé-yu

35 Te ní níhí Jèsús tnúhu sá ní queñuhu-güedé téé ní cuhú núú-xi-áⁿ tnuú-güedé cuendá sá vǎ tnáhá tnúhu ndìhi ñaha-gá-dé xii-güedé, te ní naníhí ñáhá-gá xii-dé te ní xáhaⁿ-gá:

—¿Sàndáá iní-n Dèhe Yá Ndióxi-ǎn? —càchí-gá xáhaⁿ-gǎ.

³⁶ Te ní xáhaⁿ tée ní cuhú núu-xi-ǎn:

—Mèstrú, cachí tnúhu núu ndèé ndécú tée-áⁿ cuendá quíndáá iní-í-dé —càchí-dé xáhaⁿ-dè xii-gá.

³⁷ Te ní xáhaⁿ Jèsús:

—Sa xini-n-dè chi diu-dé cúu yùhú tée ndàtnúhu ndihi-n —càchí-gá xáhaⁿ-gǎ xii-dé.

³⁸ Te ní ngüñí xítí-dè núu-gǎ, te ní xáhaⁿ-dè:

—Xítóhó Jesucristú, sàndáá iní ñáhà-í xii-n —càchí-dé xáhaⁿ-dè xii-gá.

³⁹ Te ní xáhaⁿ tùcu Jèsús:

—Yúhú véxi-í ñuyíu-a cada ndáá-í cuéchi ñáyi. Te ncha ñáyi ñá túu quide váha cùu-yu dàtná ìⁿ ñáyi cuàá, dico ncha ñáyi cùtnuní iní-xi sá ñà túu quide váha, te núu na quíndáá iní-yu tnúhu càháⁿ-í, te cada iní-ndó sǎ dàtná sá ñí nacaáⁿ núu-yu chi tñí-yu tnúhu càháⁿ-í. Te ñáyi càchí sá quidé váha vá núu núu-yu cuéchi-yu chi quesàhá-yu sá ìo ndáá quidé-yu, ñáyi-áⁿ cùu-yu dàtná ìⁿ ñáyi cuàá, chi vá ndíxi túu iní-yu sá ñà túu quide váha-yu ndécú-yu, te vá tñí-yu tnúhu càháⁿ-í —càchí-gá xáhaⁿ-gǎ xii-dé.

⁴⁰ Te sá dúcáⁿ ñí cáháⁿ-gá, núu ní cáháⁿ ìⁿ úú cue tée cùu fariséu, te xáhaⁿ-güedé:

—¿Te náa tnàhá nchúhú cuàá-ndí cáháⁿ-n-ǎn? —càchí-güedé xáhaⁿ-güedé xii-gá.

⁴¹ Te ní xáhaⁿ Jèsús:

—Te núu dìcò nchòhò cuàá-ndó ñá, te vá cùndècu cuéchi-ndo ní cùu, dico càchí-ndó sǎ ndéhé-ndó ìⁿ sá quidé-ndó te ñá ndáá, núu xíǎⁿ ìo ndècu cuéchi-ndo.

10

Jèsús càháⁿ-gá cuendá cùrrálí mbéé

¹ Te na càchí tnúhu ndáá-í xii-ndo sǎ ìⁿ tée ñá túu quíhu ndàa yuyehe ìⁿ currálí mbéé, te cùtexínu-ni na cùdó-dé, tée-áⁿ cúu-dè ñádúhú.

² Dico tée quíhu ichi yèhe currálí-güedi, tée-áⁿ cúu-dè xítóhó-güedi. ³ Te tée ndèé yèhe currálí-güedi nacaáⁿ-dé

te cuángühu xítóhó-güedi te ní cáháⁿ-dé, te ní nucúhuⁿ ndudú ñáhá-güedi xii-dé. Te

ní cáháⁿ díú-dè-güedi te ní queñuhu-dé-güedi cùrrálí. ⁴ Te sáta ñí quee-güedi cùrrálí, te

ní ngódó núu-dè núu-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túu

chinchicúⁿ-güedi ìⁿ tée tàtú, chi núcúhuⁿ ndudú-güedi sá ñà díú xítóhó-güedi cùu-dé, núu xíǎⁿ xínú-güedi núu-dè —càchí-gá xáhaⁿ-gǎ xii-güedé.

⁶ Duha ní cáháⁿ Jèsús cuendá sá cuíni-gá dacuàhá-yu tnúhu-gá ní cùu, dico ñá ní tècú tnùní-yu nása ndùu tnúhu ní cáháⁿ-gá.

Jèsús cúu-gǎ dàtná ìⁿ toli

⁷ Te ní xáhaⁿ tùcu Jèsús xii-güedé:

—Na càchí tnúhu ndáá-í xii-ndo sǎ yùhú cùu-í dàtná ìⁿ yèhe currálí núu ndíhu

cue mbëé. ⁸ Te nchaa cue téé sa yòdo nuu-gá ní quixi ní dándàhú-güedé ñáiyu cùu-güedé dàtná ñádúhú dùhu-güedé cue mbëé ní cùu, dico ñá ní quide cuendá ñáhá-güèdi xii-güedé, chi ní cutnùnì inì-güedi sá ñà díú xítóhó-güedi cùu-güedé. ⁹ Te yúhú cùu-í dàtná yuyèhe currálì cue mbëé. Te ducaⁿ sãtnahá-xi cùu-í chi nchaa ñáiyu na tùha ñaha xii-í te naníhí tàhú-yu. Te cùu-yu dàtná cue mbëé quitì xíquee currálì-xi cuáhán-güedi núú cáá ité caxi-güedi, te dàtnùnì cuándihu-ná-güedi currálì, ducaⁿ sãtnahá-xi cùu-yu.

¹⁰ 'Ñádúhú òrè véxi-dé chi dùhu-dé, sàhni-dé te dànaa-dé mbëé, dico yúhú chi véxi-í cuendá sá naníhí tàhú-ndó te ío cudíí inì-ndó cùnu cuechi-ndo núú Dùtú Ndiòxí ni caa ni quíhíⁿ. ¹¹ Te yúhú cùu-í dàtná ìⁿ toli téé ío nèhe cuendá mbëé-xi, chi téé-án cuèi na cùu-dé sá cúu-xí mbëé-dé cuendá-ná sá ná cácu-güedi. ¹² Te núu ìⁿ téé na còto ñaha xii-güedi, te téé-án cuendá-ni sá ñúhú yáhu-dé xító-dé-güedi. Te núu na quínì-dé sáá ìⁿ quitì dééⁿ te dàña-dé-güedi xìnu-dé, te ndíhi-güedi xité nuu ñaha quitì dééⁿ-áⁿ, chi ñá díú mèi xítóhó-güedi cùu-dé. ¹³ Chi cuendá-ni sá ñúhú yáhu-dé xító-dé-güedi núu ñá túú nã ndíhú inì-dé cuèi na dàndíhi ñaha quitì cuihna. ¹⁴ Te yúhú cùu-í dàtná ìⁿ téé ío váha xito mbëé-xi, chi téé-án da ìⁿ da ìⁿ-di xìnì-í-dé nàcuáa ndãa-di, te ducaⁿ xìnì ñáhá-güedi

xii-dé. Te ducaⁿ sãtnahá-xi cùu yúhú ndíhi nchaa ñáiyu sàndáá inì ñáhá xii-í, chi yúhú xìnì-í-yu te ducaⁿ mée-yu xìnì ñáhá-yu xii-í.

¹⁵ 'Te ñu-ni ducaⁿ cùu-í ndíhi Tãtà-í, chi xìnì ñáhá-gã xii-í te xìnì-í-gá. Te sáá nduu cùu-í cuendá nchaa ñáiyu sàndáá inì ñáhá xii-í. ¹⁶ Te ndècu-gá ñáiyu vátá quìndáá inì ñáhá-gã xii-í. Te xìnì ñuhu-xi cundedóho-yu tnúhu-í te quìndáá inì ñáhá-yu cuendá ìⁿ-ná ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cúu yúhú.

¹⁷ 'Te Tãtà-í ío cudíí inì ñáhá-gã xii-í cuendá sá sáá ìⁿ nduu te cuú-í, te cuú-í chi ducaⁿ càchí inì-í, te ñá díú sã cúu inì ñáiyu ñuyúú-a cuú-í, te cuú-í dico ndoto-í. ¹⁸ Te vá yòo ìⁿ te ndacu cahni ñaha xii-í, te núu ñá díú sã cúu inì mée-í cuú-í. Te dàtná-ni cùu inì-í sá cùu-í te ñu-ni ducaⁿ ndòto-í chi ducaⁿ ñí cachí Tãtà-í Dùtú Ndiòxí cunduu — càchí-gá xáhaⁿ-gã xii-güedé.

¹⁹ Te sá dúcáⁿ ñí cáhán-gá te ñá ní cùu ìⁿnuu tucu ñáiyu isráel. ²⁰ Te davá-yu ní xítñahá-yu:

—¿Ná cuendá sàndáá-tu inì-ndó tnúhu càháⁿ téé-áⁿ, te yucu ñávãha ndècu ndíhi-dé, lúcú téé-áⁿ? —càchí-yu xítñahá-yu.

²¹ Te davá-yu ní xítñahá-yu:

—¿Náa xìnì-ndó ìⁿ téé ndècu ndíhi yucu ñávãha duha váha càháⁿ-dé? ¿Náa xìnì-ndó núu ndàcu yucu ñávãha cada tátña-xi núú ìⁿ

tée cuáá te ndúha? —càchí-yu xitnàhá-yu.

Ñáyiú isràél dáquèè tíhũ-yu Jèsús

22 Te ndi tnahá cuíá ndádà càhnú-yu vico veñúhu càhnu sá ïo cùnuu ñuú Jerusàlén, te mei yóó quidé v̄xiⁿ-xi quidé-yu vico-áⁿ. 23 Te

corrèdór veñúhu-áⁿ nání-xí Sàlomón, te xiáⁿ xicá cùu Jèsús.

24 Te ní chítú níhnú ñáyiú isràél núú-gã, te ní xáhãⁿ-yu:

—¿Ná ndéé òré cachí tnúhu ndáá-n, te núu sá Crístú Yáá ní tendaha Yã Ndiòxí véxi ñuyíú-a cùu-n, àdi ná tée cùu-n?, cáháⁿ-ni-n —càchí-yu xáhãⁿ-yu xii-gã.

25 Te ní xáhaⁿ Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núú sã quidé-í sá ní táuchíúⁿ Tãtã-í cada-í, te cùu-xi ñⁿ sá cútñuní iní-ndó nã tée cùu-í. 26 Dico nchòhó ñá sàndáá iní-ndó, chi ñá túú cùu-ndo ñáyiú ní chitnahá ñáhá xii-í. 27 Chi nchaa ñáyiú ní chitnahá ñáhá xii-í cùu-yu dàtná cue mbèé quitì xĩndecu ndihì xitohó-xi chi nùcúhuⁿ ndudú-güedi xitohó-güedi,

te ducaⁿ nàquiní ñáhá-ní xitohó-güedi xii-güedi. Ducaⁿ sãtnahá-xi cùu nchaa ñáyiú ní chitnahá ñáhá xii-í. 28 Te yúhú cada-í te nduu táhũ-yu cundecu ndihì ñáhá-yu xii-í ni

caa ni quíhíⁿ te vá íⁿ ndùu-gá cuíta nihnú-yu, te ni vã yóo ñⁿ ndacu naquendeé ñáhá xii-yu ndaha-í. 29 Chi Tãtã-í ní taxi cuèndá ñáhá-gã xii-yu. Te ío cùnuu-gã núu xiãⁿ vá yóo ñⁿ ndacu naquendeé ñáhá

xii-yu ndaha-gã. 30 Yúhú ndihì Tãtã-í Dútú Ndiòxí ñⁿ-ni cùu-ndí —càchí-gã xáhaⁿ-gã xii-yu.

31 Te ní queheⁿ tucu ñáyiú isràél yúú cuãha ñáhá-yu xii-gã ní cùu.

32 Te ní xáhaⁿ-gã xii-yu: —Ío cuéhé sã vãha ní quidé-í núu-ndó ní chindee ñàha Tãtã-í Dútú Ndiòxí. ¿Te ndédacaa sã ñã tnàhá iní-ndó núu cùiní-ndó cuãha ñàha-ndo yúú xii-í? —càchí-gã xáhaⁿ-gã xii-yu.

33 Te ní xáhaⁿ ñáyiú isràél: —Ñá díú cuèndá nchaa sã vãha ni quide-n cuiní-ndí cuãha ñàha-ndí yúú xii-n, chi ñⁿ dìi-ni sá ïo cáháⁿ úhú-n cuèndá Yã Ndiòxí. Te dìcò ñⁿ tée ñuyíú-a cùu-n te càchí-n sã cúu-n Ndiòxí —càchí-yu xáhãⁿ-yu xii-gã.

34 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

35 Te ní xáhaⁿ Jèsús:

36 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

37 Te ní xáhaⁿ Jèsús:

38 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

39 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

40 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

41 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

42 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

43 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

44 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

45 Te ní xáhaⁿ Jèsús: —Núú tùtú Yã Ndiòxí sá ndécú ndihì-ndo cáháⁿ-xi nàcuáa ní cáháⁿ-gã, te duha ní cachí-gã: “Nchòhó quidé-ndó núu-í”, duha ní cachí-gã. 35 Te nàha-o sá vã cúú quèhndé nihnu-o tnúhu yòdo tnuní núú tùtú Yã Ndiòxí, chi mee-gã ní cachí-gã sá cádá-yu núú-gã, te vá càchí-ó sã ñã ndáá. 36 Te núu ducaⁿ ní cáháⁿ-gã sá núú-gã quidé nchaa ñáyiú ní sàndáá iní ñáhá xii-gã ñã, ¿te ná cuèndá cúdeéⁿ-ndó núú yúhú sá càchí-í sá cùu-í Déhe-gã? Te mee Yã Ndiòxí ní tendaha ñàha-gã xii-í véxi-í ñuyíú-a sá cádá-í chiúⁿ-gã. 37 Te núu ñã túú quide-í nàcuáa ní táuchíúⁿ Tãtã-í cada-í ñã,

te vá quíndáá iní ñáhá-ndó.
 38 Te núu quide-í ñá, te cuéi
 vá quíndáá iní ñáhá-ndó xii
 mee-í dico quíndáá iní-ndó
 nchàa chiuⁿ quide-í. Ducaⁿ te
 cutnùní ndáá iní-ndó sã Yã
 Ndiõxí ndécú ndihí-í te ìⁿ-ni
 cùu-ndí —càchí-gá xáhaⁿ-gã
 xii-yu.

39 Te ní cuiní-güedé tñi ñaha
 tùcu-güedé xii-gá quíhíⁿ-gá ve-
 caá ní cùu, dico ní xinu núu
 ñáhá-gã xii-güedé.

40 Te ní xica-gá cuáháⁿ-gá
 ndàa ingá xio yúte Jòrdán núu
 nĩ xóo dacuàndute ndíi Juáá
 ñáyiú ndéé díhna, yàcáⁿ ní
 xíndecu-gá. 41 Te yàcáⁿ ío vãi
 ñáyiú ní sáháⁿ ní cáháⁿ ndihí
 ñaha xii-gá, te ní xítñahá-yu:

—Ndíi Juáá, cuéi ñá túu
 ní quide ndíi sá vã yõo tñahí
 ndàcu cada dico ndáá ní cáháⁿ
 ndíi, chí dàtná-ni ní cáháⁿ
 ndíi quide téa —càchí-yu
 xítñahá-yu.

42 Te yàcáⁿ ío vãi-yu ní
 sándáá iní ñáhã-yu xii-gá.

11

Ní xihí té Lázaru

1 Ñuú Bètaniá ní xíndecu
 ìⁿ téa ní xínani-dẽ Lázaru.
 Te càhú víhí nĩ tñahá-dé
 ní cuhú-dé, te ní xíndecu
 ndihí-dé cue cúha-dé tá
 Màriá ndihí tá Màrta chí xíaⁿ
 ñuú-yu. 2 Te tá Màriá-áⁿ
 cúu-xí xíchí nĩ sódó àciti
 sáháⁿ tñámí sáhá Jèsús, te ní
 nadayichí-xi sáhá-gã ndihí idi
 díquí-xi. Te cuendá sá cùhú
 cúha-yu té Lázaru, 3 núu ní
 tendahá-yu ñáyiú ñaha tñuhu
 cuáháⁿ núu Jèsús, te xáhãⁿ-yu
 xii-gá:

—Mèstrú, téa ío cùu iní-n
 ío càhú tñahá-dé cùhú-dé —
 càchí-yu xáhãⁿ-yu xii-gá.

4 Te sá dúcáⁿ càa tñuhu ní
 sáá, núu ní xáhaⁿ Jèsús xii-yu:

—Dico cuéhé-ãⁿ chí vá
 cùu-dé sá cùu dúcáⁿ-dè, chí
 Yá Ndiõxí cuiní-gá sá quini-yu
 nchaa sá cáda-gã cuendá
 chiñuhu ñahá-yu xii-gá, te
 ñu-ni ducaⁿ chiñuhu ñahá-yu
 xii yúhú Déhe-gá —càchí-gá
 xáhaⁿ-gã xii-yu.

5 Te cuéi ío cùu iní ñáhá
 Jèsús xii té Lázaru ndihí cue
 cúha-dé 6 dico òré ní níhí-gã
 tñuhu, te ní cuyaa-gã úu-gá
 nduu núu ndécú-gã. 7 Te ní
 xáhaⁿ-gã xii cue téa xica cuu
 ndihí-gá:

—Na quíhíⁿ tucu-o dístiritú
 Jùdeá —càchí-gá xáhaⁿ-gã
 xii-güedé.

8 Te ní xáhaⁿ cuè téa xica cuu
 ndihí-gá xii-gá:

—Mèstrú, vitna-ni cuiní cue
 téa israhél xíndecu yàcáⁿ cuáha
 ñaha-güedé xii-n yuú ní cùu,
 ¿te cuiní-ni tucu-n quíhíⁿ-n-ú?
 —càchí-güedé xáhaⁿ-güedé
 xii-gá.

9 Te ní xáhaⁿ Jèsús:

—Úxúú òré cúu ìⁿ nduu,
 te núu nduu na càca cuu-o,
 te ñá túu ñã candaundeé-ó
 chí cùtnuní núu-ó chí ditó.
 10 Dico núu niú ná càca cuu-o,
 te ío ná candaundeé-ó chí
 vá cùtnuní núu-ó —càchí-gá
 xáhaⁿ-gã xii-güedé.

11 Te ní xáhaⁿ Jèsús:

—Té Lázaru téa ío váha
 tñahá tñuhu ndihí-o ní
 xídí-dé dico quíhíⁿ-ó chí ndo-
 cani-o-dẽ —càchí-gá xáhaⁿ-gã
 xii-güedé.

12 Te ní xáhaⁿ-güedé xii-gá:

—Mèstrú, te núu xidí-dé te váa sa ta ndüha-dé cuáháⁿ —càchí-güedé xáhaⁿ-güedé xii-gá.

13 Duha ní cáháⁿ Jèsús, chi té Lázaru sa ní xihí-dé te cue téé xica cuu ndihí-gá ní sani iní-güedé sá ní xidí ndisa-dé. 14 Te Jèsús ní xáhaⁿ ndáá-gá xii-güedé:

—Sa ní xihí té Lázaru, 15 Váha-gá sá ñã ní sáháⁿ-í quíngoto-í-dé, chi ndècu ingá chiuⁿ cada-í quiní-ndó, te quíndáá iní ñáhá-gã-ndó xii-í, te vitna na quihíⁿ-ó núu ndécú yiqui cuñú ndíi —càchí-gá xáhaⁿ-gã xii-güedé.

16 Te té Mǎxí téé xáhaⁿ-güedé cuáchí ní xáhaⁿ-dē xii dava-gá-güedé:

—Na quihíⁿ-ó nchàa-o chi yàcáⁿ cuú-ó ndihí-dé —càchí-dé xáhaⁿ-dē xii-güedé.

Jèsús càháⁿ-gá sá cuéi na cuú ñáyiu dico ndotó-yu cundecú-yu ndihí-gá

17 Te òré ní sáá Jèsús ñuu Bètaniá, te ní xáhãⁿ-yu sá sá ní cuu cúmí nduu ní xihí té Lázaru. 18 Te ñuu-áⁿ cáá yátni-ni-gá ñuu Jerusálén, dàtná cuádava-ná òré cuhuⁿ-o ichi te saá-ó. 19 Núu xíáⁿ vâi ñáyiu israhél ní sáháⁿ-yu ní cáháⁿ ndihí-yu tá Mărta ndihí cúhú-xi tá Màriá, te ní sãñáhá-yu tnúhu ndee ínì sá dúcáⁿ ñí xihí cúha-yu. 20 Te ní níhí tá Mărta tnúhu sá ñúhú Jèsús ichi cuáháⁿ-gá núu ndécú-yu núu ní sáháⁿ-xi ní sátnahá-xi-gá, te cúhú-xi tá Màriá ní ndóo-xi yehe. 21 Te òré ní nanihí tá Mărta Jèsús, te ní xáhaⁿ-xi xii-gá:

—Mèstrú, te núu dicó ní xíndecu-n iha te vá cuú cúha-ndí ní cuú. 22 Te cuéi vitna te núu ná sá ná cacáⁿ-n núu Yã Ndióxi te taxi-gá xii-n —càchí-xi xáhaⁿ-xi xii-gá.

23 Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gá xii-xi.

24 Te ní xáhaⁿ tá Mărta:

—Ndáá chí sa xini-í sá ndótó-dē ná quítnahá nduu ndòto nchaa ñáyiu ní xihí —càchí-xi xáhaⁿ-xi xii-gá.

25 Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quihíⁿ ná sáá nduu. Te nchaa ñáyiu na quíndáá iní ñáhá xii-í, te cuéi na cuú-yu dico ndotó-yu cundecu-í ndihí-yu ni caa ni quihíⁿ. 26 Te nchaa ñáyiu ndècu vívú ñuyíú-a te núu na quíndáá iní ñáhã-yu xii-í, te cundecu ndihí-í-yu ni caa ni quihíⁿ. ¿Sándáá iní-n tnúhu-a ñã? —càchí-gá xáhaⁿ-gã xii tá Mărta.

27 Te xáhaⁿ-xi:

—Mèstrú, sándáá iní-í, te sándáá tucu iní-í sá díú-n cuú-n Cristú Déhe Yá Ndióxi, Yaá ní tendaha-gã véxi ñuyíú-a —càchí-xi xáhaⁿ-xi xii-gá.

Jèsús ndàhí-gá núu ní nguíndüxi té Lázaru

28 Sátá dúcáⁿ ñí cáháⁿ-xi te ní sáháⁿ ngana-xi cúhú-xi tá Màriá, te dayuhu ñí xáhaⁿ-xi:

—Yàcáⁿ ní quexio Mèstrú, te càna ñaha-dé xii-n —càchí-xi xáhaⁿ-xi.

29 Te sá dúcáⁿ xáhaⁿ cùhú tá Màriá sá cáná ñaha Jèsús

xii-xi, núu ndíhi-ni ní xica-xi cuáháⁿ-xi núú ndécú-gă. ³⁰ Te Jèsús vátá quíhu-gá xití ñúú, chi ndècu-ni-gá núú ñí sáháⁿ tnahá ñáhá tă Mărta. ³¹ Te ñáyiu isràél ndécú sãhaha tnúhu ndee ìní xii tá Măriá ndíhi cùhú-xi ní sani ìní-yu sá cuáháⁿ-xi núú yíndũxi cúha-xi ndáhyú-xi ní cáhãⁿ-yu, núu nchìcúⁿ-yu-xi cuáháⁿ.

³² Te ní sáá tá Măriá núú ndécú Jèsús te ní ngüñí xití-xi núú-gă, te xãhaⁿ-xi xii-gá:

—Mèstrú, te núu dícó ní xíndecu-n ìha te vá cùú cúha-ndí ní cùú —cachí-xi xãhaⁿ-xi xii-gá.

³³ Te sá ñí xini Jèsús ndàhyú tá Măriá ndíhi ñáyiu isràél nchìcúⁿ ñáhá cuáháⁿ, xĩãⁿ ío ní cuyica ìní-gá. ³⁴ Te ní xãhaⁿ-gă xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xãhaⁿ-gă xii-yu.

Te ní xáhãⁿ-yu:

—Mèstrú, néhé ná quíhíⁿ-ó te quini-n —càchí-yu xáhãⁿ-yu xii-gá.

³⁵ Te ní ndáhyú-gá tnahá-gá. ³⁶ Te ní xitnàha ñáyiu isràél:

—Súúni cùú ìní-dé ndíi ni cùú —cachí-yu xitnàhá-yu.

³⁷ Te davá-yu xitnàhá-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núú ñá túú ní quide tátna-dé té Lăzarú cuendá sá vã cùú-dé ní cùú-i? —cachí-yu xitnàhá-yu.

Jèsús dándòto-gá té Lăzarú

³⁸ Te ío ní cuyica tùcu ìní Jèsús òré ní quexìo-gá yuhu yàú núú ñí chihi-güedé yiqui

cùñú té Lăzarú. Te yuhu yàú-áⁿ ndedí ìñⁿ yúú. ³⁹ Te ní xãhaⁿ Jèsús xii-yu:

—Chí xócàni yúú-ãⁿ —càchí-gá xãhaⁿ-gă xii-yu.

Te ní xãhaⁿ tă Mărta cúha tée ní xihí-áⁿ:

—Mèstrú, sa tucu sáháⁿ-dé chi sa ní cuu cùmí nduu sá ñí xihí-dé —càchí-xi xãhaⁿ-xi xii-gá.

⁴⁰ Te ní xãhaⁿ Jèsús:

—¿Náa ñá díú ñí cachí-í sá núu na quíndáá ìní-n, te quini-n sã ío càhnu cuu Yá Ndiõxí? —càchí-gá xãhaⁿ-gă xii-xi.

⁴¹ Te ní xócáni-yu yúú ndedí yuhu yàú-áⁿ. Te ní ndacoto-gá andiu, te ní xãhaⁿ-gă xii Tátá-gă Dútú Ndiõxí:

—Táu, ndacáⁿ táhù-í núú-n sã ñí tèdoho-n tnúhu ní cáháⁿ-í. ⁴² Te yúhú sa nàha-í sá ncháá-ni òré ndedòho ñaha-n xii-í, dícó duha càháⁿ-í cuendá sá ná təcú dóho nchaa ñáyiu ndècu ìha cuendá quíndáá ìní-yu sá díú-n ñí tendaha ñaha-n xii-í véxi-í ñuyíú-a —càchí-gá xãhaⁿ-gă xii Dútú Ndiõxí.

⁴³ Te sátá dúcáⁿ ñí cáháⁿ-gá ndíhi Yá Ndiõxí, te níhi ní cáháⁿ-gá xãhaⁿ-gă xii tée ní xihí-áⁿ:

—¡Lăzarú, tandèe xíáⁿ! —càchí-gá xãhaⁿ-gă xii-dé.

⁴⁴ Te ní ndee tée ní xihí-áⁿ yaú-áⁿ, te ndùtu dóó cuíñí ndàha-dé ndíhi sáhá-dě, te dăhu tucu ìñⁿ dóó núú-dě. Te ní xãhaⁿ Jèsús xii-yu:

—Chí nándàxi-dé te dañà-ndo-dě ná cáca-dě —càchí-gá xãhaⁿ-gă xii-yu.

*Ndücu-güedé nàcuáa
cada-güedé cahni-güedé Jèsús*
(Mt. 26:1-5; Mr. 14:1-2; Lc.
22:1-2)

45 Te nchaa ñáyiú nchícúⁿ ñáhá xii tá Màriá cuáháⁿ ío vai-yu ní sándáá iní-yu Jèsús sá ñi xini-yu nàcuáa ní quide-gá. 46 Dico davá-yu ní sáháⁿ-yu núú cuè téé cùu fariséú, te ní caní-yu cuèndú núú-güedě nàcuáa ní quide Jèsús. 47 Te cue téé cùu fariséú ndihi cue dútú cúnúú ní natacá-güedé ní xóo-güedé jundá, te ní xitnàha-güedé:

—¿Nása cada-o?, chi téé-áⁿ ío vai sá vã yõ tnahí ndàcu cada quide-dé. 48 Te núu na dãña ío te nchaa ñáyiú quindáá iní ñáhã-yu xii-dé, te quixi cue téé ñuú Rómá dangòyo-güedé veñúhu-o te danãa-güedé nchaa ñuú-ó — càchí-güedé xitnàha-güedé.

49 Te ñiⁿ cue téé-áⁿ nání-dě Caifás, te cúnúu-gá-dé núú dàva-gá cue dútú cuíá-áⁿ, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó. 50 Te ní ñã sãha-ndo cuèndá sá vãha-gá tnahá-ó, te núu na cùú ñiⁿ-ni téé cuèndá nchaa ñáyiú isràél, te ñá díú sã dánàa ñaha-güedé xii-yu —càchí-dé xãhaⁿ-dě xii-güedé.

51 Dico té Caifás chi ñá díú sã cúú iní méé-dě ní cãháⁿ-dé, chi cuèndá sá cuíá-áⁿ ñi cúnúu-dě núú cue dútú, núu xiãⁿ Yã Ndiõxí ní dácáhú iní ñáhã-gã nàcuáa cãháⁿ-dé sá Jèsús cuú-gá sá cúú-xí nchãa ñáyiú isràél.

52 Te ñá díú cuèndá mee-ni ñáyiú-áⁿ cuú-gá, chi cuú-gá

tnahá cuèndá nchaa ñáyiú ní sándáá iní ñáhá xii-gá, ñáyiú nchíténúu nihii ñuyúú, te ñiⁿ-nã cuú-yu ndihi-gá. 53 Núu ndéé nduu-áⁿ ñi ndatnúhu cue téé cúnúu núú ñáyiú isràél nàcuáa cada-güedé cahni-güedé Jèsús.

54 Te xiãⁿ núu ñã ní xica cuu-gá Jèsús quini ñáhã ñáyiú isràél, te ní quee-gá cuáhãⁿ-gá ñuú Efráin, ñiⁿ ñuú cáá yãtni yucu, yacáⁿ ní ngüñí-gá ndihi cue téé xica cuu ndihi-gá.

55 Te ta cùyãtni nduu cadá-yu vico pascuá. Te cuéhé ñáyiú ní queé-yu ñuú-yu cuáhãⁿ-yu ñuú Jerusalén cuèndá sá sã ndihí-yu nchaa-yu nduu íí, te tnahá nduu vico pascuá. 56 Te yacáⁿ nándúcú-yu Jèsús ní cùu te ñá túú-gã òré-áⁿ, te ní nanihí tnahã-yu xití veñúhu, te xitnàhá-yu:

—¿Nása sãni iní-ndó-í? ¿Quixi Jèsús vico áⁿ ñáhã? — càchí-yu xitnàhá-yu.

57 Te cue téé cùu fariséú ndihi cue dútú cúnúu sa ní xáhaⁿ-güedé xii ñáyiú sá núu nděda-ni càá-yu xini-yu núú ndécú Jèsús te na càháⁿ-ni-yu cuèndá tñi ñaha-güedé xii-gá.

12

Íiⁿ ñadìhí chihí-áⁿ Jèsús acití
(Mt. 26:6-13; Mr. 14:3-9)

1 Íñú-gá nduu cùmání tnahá vico pascuá, te ní sáhãⁿ Jèsús ñuú Bètaniá, ñuú té Lãzarú téé ní dándótó-gã.

2 Te xiãⁿ ñi cadúha-yu sá ní cudini Jesús. Te tá Màrta ní sani-xi cóhó, te té Lãzarú

yíhí-dě mèsá ndihi Jèsús, ndihi dava-gá-güedé xéxí-güedé. ³ Te tá Màriá néhé-xí cuädava lítrú acití sáháⁿ tnámí sã ïo ndéyáhu, te acití-ánⁿ nĩ cuáha mee-ni yücú nãrdú, te ní sódó-xi sáhá Jèsús, te ní nadayìchí-xi ndihi idi díquí-xi sáhá-gã. Te nihíi xití vehe ní xité nuu dicó acití-ánⁿ. ⁴ Te té Jüdás déhe té Ximú Iscarioté diu-ni ìⁿ tée xica cuu ndihi-gá, tée cuáha cuendá ñáhá xii-gá núú cuè tée cùu úhú iní ñáhá nĩ xáhaⁿ-dë xii-gá:

⁵ —¿Ná cuendá ñá ní cùyáhu acití-a sá ùní ciendú díhúⁿ denàriú cuu cuendá ñáyiu ndàhú? —càchí-dé xáhaⁿ-dë xii-gá.

⁶ Dico sá dúcáⁿ nĩ cáháⁿ té Jüdás chi ñá díú sã ndísá ñùhu iní-dé ñáyiu ndàhú chi dicó-ni ìⁿ ñádúhú cúú-dë, chi diu-dé néhé cuendá-dé díhúⁿ-güedé nchaa-güedé te ní xóo duhu ñàha-dé xii-güedé. ⁷ Te ní xáhaⁿ Jèsús:

—Daña, vá dásátú-n iní xíchí-a na tàxúha nahi-xi àcití-a, chi nàndíhi ndéé òré ná nguĩndüxi-í. ⁸ Chi nchòhó chi cuhuⁿ tnahá-ni ñáyiu ndàhú tnuú-ndó, dico yúhú chi vá ncháá ndùu cundecu ndihi ñàha-í xii-ndo —càchí-gá xáhaⁿ-gã xii-dé.

Tnàhá té Lãzarú cuiní-güedé cahni ñàha-güedé xii-dé

⁹ Te vãi ñáyiu isràél ní nihí-yu tnúhu sá ndécú Jèsús ñúú Bètaniá. Te ní sáháⁿ-yu cuendá quiní-yu-gá, te quiní-yu tnàhá té Lãzarú tée ní dándótó-gã. ¹⁰ Te cue dútú cúnùu ní ndatnúhu-güedé ní

cuu ìⁿ nuu-güedé cuendá sá cáhni-güedé tnàhá té Lãzarú ní cùu, ¹¹ chi diu cuendá tée-ánⁿ nĩ cuu cuéhé ñáyiu isràél tá dàña nihnú-yu-güedé cuáháⁿ cuendá sá nĩ sándáá iní-yu Jèsús.

Jèsús cuànguihu-gá ñúú Jerusálén

(Mt. 21:1-11; Mr. 11:1-11; Lc. 19:28-40)

¹² Te nduu tnéé-ánⁿ vãi ñáyiu ní quexìo ñúú Jerusálén cuendá cundecú-yu vico, te ní nihí-yu tnúhu sá Jèsús sáá-gá tnàhá-gá cundecu-gá vico-ánⁿ, ¹³ núu ní xehndé-yu ndaha yùtnu ñúú, te nèhé-yu ní sáháⁿ ní sátnahá ñáhã-yu xii-gá. Te níhi ní cáháⁿ-yu, te càchí-yu:

—¡Ío càhnu cuu Yá Ndiòxí! Te ducaⁿ-ni ïo càhnu cuu Yáá ní tendaha-gá véxi quindaha ñàha xii-o —duha ní cachí-yu.

¹⁴ Te Jèsús ní nihí-gã ìⁿ búrru, te yòdo-gá-di cuáháⁿ. Te ducaⁿ nĩ cuu chi ní quee ndáá-xi nàcuáa càháⁿ-xi núú tütú Yá Ndiòxí núú càchí-xi:

¹⁵ Vá yùhú nchòhó cue ñáyiu ndècu ñúú Sìón,

chi iha véxi tée yìndaha ñàha xii-ndo yodo-dé ìⁿ búrru.

Duha càchí-xi núú tütú-gá. ¹⁶ Dico cue tée xica cuu ndihi Jèsús ñá ní ndàcu iní-güedé nàcuáa càháⁿ-xi núú tütú Yá Ndiòxí nàcuáa cada Jèsús. Dico sátá cuãndaa-gá andiù càda cahnu ñàha Tátá-gã xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ nĩ cuu.

¹⁷ Nchaa ñáyiu ní xíndecu ndihi Jèsús òré ní dándótó-gã

té Lăzarú, ya yàcáⁿ ní caní-yu cuendú núú ñăyiu nàcuáa ní quide ñaha-gă xii-dé. ¹⁸ Te vâi-yu ní sáháⁿ-yu núú ndécú Jêsús cuendá sá ñí níhí-yu tnúhu ní quide-gá sá vă yôo tnàhí ndàcu cada. ¹⁹ Te cue tée cùu farisèu ní xitnàha-güedé:

—Ní xito-ndo nă ñá túú nàndihí sá quidé-ó-vá, chì nchaa ñáyiu ní chinchícúⁿ ñáhă-yu xii-dé —càchí-güedé xitnàha-güedé.

*Ñáyiu ñá túú cùu ñáyiu is-
raél nánducú-yu Jêsús*

²⁰ Te tnàhá ñáyiu ñá túú cùu ñáyiu israél ní sáháⁿ-yu vico ñuú Jerusàlén ní quide càhnú-yu Yá Ndiôxí. ²¹ Te ñáyiu-áⁿ ñí sáháⁿ-yu núú tē Lìpé tée ñuú Betsaidá, te ñuú-áⁿ yíndèhu-xi distritú Galileá. Te ní xáhăⁿ-yu xii-dé:

—Tátá, vá cündèe iní-n càchí tnúhu-n nūu ndèé ndécú Jêsús, chi cuíní-ndí cáháⁿ ndihí-ndí-gá —càchí-yu xáhăⁿ-yu xii-dé.

²² Te té Lìpé ní naníhí-dě té Ndríxí te ní xáhăⁿ-dě nàcuáa càháⁿ-yu, te ndi ndùú-güedé ní sáháⁿ-güedé ní xáhăⁿ-güedé xii Jêsús nàcuáa càháⁿ-yu. ²³ Te ní xáhăⁿ Jêsús xii-güedé:

—Vitna ní cuyatni òré cada càhnu ñaha Tátá-í xii-í, te quíní-yu sá ño càhnu cuu yúhú Tée cùu ñaní tnàhă-yu nchaaⁿ-yu. ²⁴ Te na càchí tnúhu ndáá-í xii-ndo să nūu ñⁿ tatá vá ngává-xí nūú ñúhú tēhyú-xi ña, te diu-ni ducaⁿ cùnduu-xi cundecu-xi. Dico ñⁿ tatá ná ngává nūú ñúhú xínu déhe-xi, te xíăⁿ nádàcayá

tnàhá-xí, te mee-xi tēhyú-xi. ²⁵ Te nchaa ñáyiu ño ñúhu iní-xi cundecu ñuyúú-a ñá túú ñúhu iní-yu Yá Ndiôxí, te ñáyiu-áⁿ cuíta nihnú-yu. Te nchaa ñáyiu ño ñúhu iní ñáhá xii Yá Ndiôxí, ñáyiu-áⁿ cundecú-yu ndihí-gá ñi caa ñi quíhíⁿ. ²⁶ Te nchaa ñáyiu cuíní cunu cuechi nūú-í xini ñuhu-xi natuha ñahá-yu xii-í, te nduu táhū-yu cundecú-yu núú nùhú-í cundecu-í. Te nchaa ñáyiu na cùnu cuechi nūú-í, te cada càhnu ñaha Tátá-í xii-yu —càchí-gá xáhăⁿ-gă xii-güedé.

*Jêsús càháⁿ-gá sá cáhni
ñàha-güedé xii-gá*

²⁷ Te ní xáhăⁿ tucu-gá:

—Ío ndihú iní-í. Te cùñaha-í xii Tátá-í taunihnu ñaha-gă nūu dícó sá cúú, dico vá cúú chì cuendá tnàhí-a véxi-í —càchí-gá xáhăⁿ-gă xii-güedé.

²⁸ Te ní xáhăⁿ-gă xii Tátá-gă Dútú Ndiôxí:

—Táu, cada nàcuáa ní sani iní-n cùnduu cuendá sá ná cadá càhnu ñaha ñáyiu xii-n —càchí-gá xáhăⁿ-gă.

Te ducaⁿ te ní tecú ní cáháⁿ Yá Ndiôxí ndéé andiu, te càchí-gá:

—Sa ní quide-í nàcuáa cachí ñáyiu sá ño càhnu cuu-í. Te cada tucu-í cuendá cada càhnu ñaha-gă-yu xii-í —càchí Yá Ndiôxí xáhăⁿ-gă xii Déhe-gá.

²⁹ Te nchaa ñáyiu xíndecu ní tecú dóho-yu ní cáháⁿ-gá, dico ñá túú ní sàni iní-yu sá mée-gă ní cáháⁿ, chì davá-yu ní xitnàhá-yu sá ñúhu ní cáháⁿ, te davá-yu ní

xítñahá-yu sá ñⁿ espíritú xínú
cuèchi núú Yá Ndiöxí ní cáháⁿ.
30 Te ní xáhaⁿ Jèsús xii-yu:

—Ñá díú cuendá yúhú
ní cáháⁿ Yá Ndiöxí, chi ní
cáháⁿ-gá cuendá sá nchòhó
cundedóho-ndo. 31 Te vitna ní
sáá nduu càda ndáá Yá Ndiöxí
cuèchi nchaa ñáyiu ñuyíú-a,
te ducaⁿ te vá cúnù-gá yucu
ñávaha. 32 Te na càta caa
ñaha-güedé xii-í núú cùrúxí,
te xiáⁿ cuú-í te níhí-yu tnúhu
ni càa xico ñuyíú, te quindáá
iní-yu tnúhu-í —càchí-gá
xáhaⁿ-gá xii-yu.

33 Duha ní cáháⁿ-gá
cuendá cutnùní iní-yu nàcuáa
ndoho-gá òré cuú-gá. 34 Te ní
xáhãⁿ-yu xii-gá:

—Nihí-ndí tnúhu sá nũú
tútú yódó tnùní tnúhu Yá
Ndiöxí càháⁿ-xi sá Crístú Yaá
tendaha-gá quixi ñuyíú-a
cundecu-gá ni caa ni quíhíⁿ.
¿Te yòhó nása càháⁿ-tu-n
sá ñⁿ téé cùu ñaní tnáhá
nchaa ñáyiu ñuyíú-a cahni
ñaha-güedé núú cùrúxí? Te
cachí tnúhu-ñ ná cúú tée-án
—càchí-yu xáhãⁿ-yu xii-gá.

35 Te ní xáhaⁿ Jèsús:

—Yúhú cúú-í dàtná ñⁿ
ñuhú dáyehé ñuyíú-a, dico
sacú-ni nduu ndècu ndihi
ñaha-í xii-ndo. Te caca-ndo
ìchi ndáá vitna dáyehé-gá-í
núú-ndó chi na cùnee te vá
cùtnùní-gá núú-ndó ndéé
ichi quíhíⁿ-ndó. 36 Quindáá
iní ñáhá-ndó xii-í vitna
ndècu ndihi ñaha-gá-í xii-ndo
dàndixi túu-í iní-ndó, cuendá
cutnùní iní-ndó nàcuáa ndùu
cuendá Yá Ndiöxí, te cuu-ndo
dèhe-í —càchí-gá xáhaⁿ-gá
xii-yu.

Te sátá dúcáⁿ ní cáháⁿ Jèsús,
te ní quee-gá cuáhãⁿ-gá ñⁿ
núú vã ná nihí ñáhãⁿ-yu xii-gá.

*Ñáyiu isràél ñá cuíní-yu
quindáá iní-yu Jèsús*

37 Te cuèi ío vai sá vã yõo
tnàhí ndàcu cada ní quide
Jèsús ní xiní-yu, dico ni dùcaⁿ
ñá túú ní sàndáá iní-yu-gá.

38 Te ducaⁿ ní quidé-yu chi
dacuítí ní quee ndáá-xi
nàcuáa ní chídó tnùní ndíi
Chàia ndíi ní cáháⁿ tnúhu
Yá Ndiöxí ndéé sanaha nũú
tútú-gá núú càchí-xi:

Yòhó Yaá cúú Xitohó-í, vá yõo
ñⁿ sàndáá iní tnúhu
cáháⁿ-ndí.

Te vá yõo ñⁿ cùtnuní iní-xi sá ío
càhnu cuu-n.

Duha ní chídó tnùní ndíi
Chàia núú tütú-gá. 39 Te ñá
ní sàndáá iní-yu chi ní quee
ndáá-xi nàcuáa ní chídó tnùní
tucu ndíi Chàia núú tütú Yá
Ndiöxí nàcuáa cáháⁿ Jèsús:

40 Mee Yá Ndiöxí ní quide-gá
sá vã tècú tnùní-yu,

chi ní dádãhu ndodo iní
ñáhãⁿ-gá xii-yu,

chi ío sáá iní-yu núu ñá ní
cuíní-gá-yu quindáá
iní ñáhãⁿ-yu xii-gá.

Te ni vã túhá ñáhãⁿ-yu xii
yúhú cuendá dacãcu ni-
hnu-í-yu.

41 Duha ní chídó tnùní ndíi
Chàia nàcuáa cáháⁿ Jèsús chi
ní xiní ndíi sá ío càhnu cuu-gá.

42 Te cuèi ducaⁿ ní cuu
dico titní cue téé cùnuu núú
ñáyiu isràél ní sàndáá iní
ñáhãⁿ-güedé xii-gá. Dico ñá
túú ní xõo cáháⁿ ndáá-güedé
chi ní xõo yúhú-güedé sá vã
dãñã-gá cue téé cùu fariséú

quíhu-güedé veñúhu. ⁴³ Chi ní xóo cudíí-gã iní-güedé sá cãháⁿ ñáyiu dàcúúxí tñuhu cãháⁿ Yã Ndiöxí.

Ñáyiu ñá túú sãndáá iní tñuhu Jèsús cuíta nihnú-yu

⁴⁴ Jèsús níhi ní cãháⁿ-gã, te cãchí-gã:

—Nchaa ñáyiu na quindáá iní ñáhá xii-í, te ñá díú-ní mèe-í quindáá iní-yu, chi tnahá Tãtà-í Yaá ní tendaha ñàha xii-í véxi-í ñuyíú-a quindáá iní-yu. ⁴⁵ Te ñáyiu xini ñáhá xii yúhú xini-yu tnahá Tãtà-í. ⁴⁶ Te yúhú véxi-í dandixi túu-í iní ñáyiu ñuyíú-a cuendá cutnùní iní-yu nãcuáa nduu cuendá Yã Ndiöxí, te nchaa ñáyiu na quindáá iní ñáhá xii-í te vá cundècu-gã-yu ichi cuèhé ichi duha. ⁴⁷ Te núu ió davá-yu ndedóho-yu nãcuáa cãháⁿ-í te ñá túú tñí-yu tñuhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dàcuíta nihnu-í-yu, chi véxi-í sá dácãcu nihnu-í-yu. ⁴⁸ Te nchaa ñáyiu na cùyíchí iní ñáhá xii-í te ñá túú quide cuendá-yu nãcuáa cãháⁿ-í, te ñáyiu-áⁿ ná sãá nduu te cuíta nihnú-yu chi ñá ní tñí-yu tñuhu ní cãháⁿ-í. ⁴⁹ Te yúhú ñá túú cãháⁿ-í tñuhu véxi iní mèe-í, chi mee Tãtà-í Yaá ní tendaha ñàha xii-í véxi-í ñuyíú-a ní cachí tñuhu-gã nãcuáa cunduu tñuhu cãháⁿ-í danèhé-í ñáyiu. ⁵⁰ Te yúhú xini-í sá tñuhu ní táuchíúⁿ Tãtà-í cãháⁿ-í cúu-xí ñíⁿ sá vãha sá cúu xii-ndo chi nduu táhú-ndó cundecu-ndo

ndihi-gã ní caa ní quíhíⁿ, núu xiãⁿ cãháⁿ-í nchaa nãcuáa ní táuchíúⁿ-gã —cãchí-gã xáhaⁿ-gã xií-yu.

13

Jèsús náquète-gã sáhá cuè téé xica cuu ndihi-gã

¹ Te cùmání-gã tnahá vico pãscuá, te Jèsús sa nàha-gã sá sã ní cuyatni òré dandóo-gã ñuyíú-a, te ndaa-gã núu ndécú Tãtà-gã. Te ió ní cuu iní-gã nchaa ñáyiu ní sãndáá iní ñáhá xii-gã, te ní quide ndisa-gã sá ní cuu iní ñáhá-gã xií-yu.

²⁻⁴ Te ní quíhu yucu ñãvãha díquí tẽ Jüdás déhe té Ximú Iscarioté, te ní sani iní-dé nãcuáa cada-dé cuáha cuendá-dé Jèsús núu cuè téé cùu úhú iní ñáhá xii-gã. Te Jèsús sa nàha-gã sá méé Yã Ndiöxí Yaá cúu Tãtà-gã ní sãñaha-gã tñuhu ndee iní xii-gã sá cáda-gã núu-gã, te nàha-gã sá díú núu Tãtà-gã ní quee-gã véxi-gã ñuyíú-a. Te sãá nduu nãsãá tucu-gã núu Tãtà-gã. Te cùdini Jèsús ndihi cue téé xica cuu ndihi-gã ní cùu, te ní ndacuñí-gã yuhu mèsá, te ní taunuu-gã ñíⁿ dóo níhnú-gã, te ní queheⁿ-gã ñíⁿ dóo ní dácútú-gã núu yíquí-gã. ⁵ Te ní chihi-gã ndute ñíⁿ tñá, te xiãⁿ ní naquete-gã sáhá cuè téé xica cuu ndihi-gã, te ndihi dóo ndútú núu yíquí-gã-áⁿ ní nadayíchí-gã sáhá-güedé.

⁶ Te òré naquete-gã sáhá tẽ Ximú, àdi Pelú, ní cùu ní xáhaⁿ-dẽ xii-gã:

—Mèstrú, ¿te yòhó na-
quete-n sàhà-í-u? —càchí-dé
xàhaⁿ-dě xii-gá.

⁷ Te ní xáhaⁿ Jèsús:

—Vitna ñá cutnùní iní-n
să quidè-í-a dico sáá nduu
te cutnùní iní-n —càchí-gá
xáhaⁿ-gă xii-dé.

⁸ Te ní xáhaⁿ tĕ Pèlú:

—Yúhú chi vá ñⁿ ndùu te
naquete-n sàhà-í —càchí-dé
xàhaⁿ-dĕ xii-gá.

Te ní xáhaⁿ Jèsús:

—Te núu vá náquète-í
sáhá-n áⁿ, te vá cáda-gă-n
cuendá sá ndécú ndihi ñaha-í
xii-n —càchí-gá xáhaⁿ-gă
xii-dé.

⁹ Te ní xáhaⁿ tĕ Pèlú:

—Te núu ducaⁿ te vá méé-ní
sàhà-í naquete-n, chi na-
quete-n tnàhá ndaha-í ndihi
díqui-í —càchí-dé xàhaⁿ-dĕ
xii-gá.

¹⁰ Te ní xáhaⁿ Jèsús xii-dé:

—Tée íchí nĭ xichi chi
xini ñuhu-xi sá sáhá-na-dĕ
ndoo, te ducaⁿ te nduu
ndoo-dé nihi-dé. Te nchòhó
sa càndoo-ndo cuéi ña
ncháá-ndó càndoo —cachí-gá
xáhaⁿ-gă xii-dé.

¹¹ Te ducaⁿ nĭ cáhán Jèsús
chi sa naha-gá sá ñⁿ cuè tée-áⁿ
cuàha cuendá ñáhá-güedĕ
xii-gá núu cuè tée cùu úhú
iní ñáhá, xiáⁿ núu ní xáhaⁿ-gă
sá ñà túú càndoo-güedĕ
nchaa-güedĕ.

¹² Te sátá nĭ naquete-gá
sáhá-güedĕ, te ní ndécúñhu-gá
dóo-gă, te ní nucóo-gá yuhu
mésá, te ní xáhaⁿ-gă xii-güedĕ:

—¿Te ní cutnùní iní-ndó sã
nĭ quide ñaha-í xii-ndo-ãⁿ?

¹³ Te nchòhó váha-ni
cáhán-ndó sã cùnùu-í, te

dànani ñaha tucu-ndo Mestrú
xii-í, te ndáá cáhán-ndó. ¹⁴ Te
núu yúhú cùu-í Mèstrú, te cùu
tucu-í tée cùnuu te nàquete-í
sáhá-ndó, te ñu-ni ducaⁿ
càda nchòhó tucu naquete
sáhá tnàhá-ndó. ¹⁵ Yúhú sànu
ichi ñaha-í xii-ndo nàcuáa
cada-ndo. ¹⁶ Te na càchí
tnúhu ndáá-í xii-ndo sã nĭ
ñⁿ tée xinu cuechi ñá túú
cùnuu-dé dàcúúxí pàtróoⁿ-dĕ,
te nĭ ñⁿ tée xica chiⁿ ñá túú
cùnuu-dé dàcúúxí tĕe tĕndaha
ñaha xii-dé cuáhán-dé chiⁿ.
Te ducaⁿ sãtnahá-xi cùu yúhú
ndihi nchòhó. ¹⁷ Te núu
ní cutnùní iní-ndó nàcuáa
ní quide ñaha-í xii-ndo ña,
te ducaⁿ càda tnaha-ndo te
cuu váha iní ñáhá Yã Ndiõxí
xii-ndo.

¹⁸ 'Yúhú, ñá túú càhán-í
cuendá-ndó nchàa-ndo, chi
yúhú sa nàha-í nàcuáa sàni
iní ñⁿ ñⁿ nchòhó cue tĕe ní
nanducu ñhnu-í tnuu nchaa
ñáyiu ñuhu ichi cuehé ichi
duha ní cachí-í chitnahá
ñáhá-ndó xii-í. Chi dacuití sã
quéé ndáá-xi nàcuáa càhán-xi
núu tütú Yã Ndiõxí núu
càchí-xi: “Tĕe xĕxi ndihi ñaha
xii-í ngóo-dé cuu úhú iní
ñáhá-dĕ”, duha càchí-xi núu
tütú-gá. ¹⁹ Te cùmání-gă sáá
nduu càda ñaha-dé sá sání
iní-dé, núu xiáⁿ càchí tnúhu-í
xii-ndo nàcuáa cada-dé, chi
na sáá nduu-ãⁿ te cutnùní
iní-ndó sã yúhú cùu-í Crístú
Yáá ní tendaha Yã Ndiõxí
véxi ñuyíu-a. ²⁰ Te na càchí
tnúhu ndáá-í xii-ndo sã nchàa
ñáyiu na queheⁿ cuendá
ñáhá xii cue tĕe tendaha-í
cáhán tnúhu-í, te cada iní-yu
sá tnàhá yúhú ní queheⁿ
cuendá-yu. Te nchaa ñáyiu
na queheⁿ cuendá ñáhá xii-í,

te cada iní-yu sá tnàhá Tǎtà-í Dútú Ndiǒxí Yaá ní tendaha ñàha xii-í véxi-í ñuyíú-a ní queheⁿ cuendá-yu —càchí-gá xáhaⁿ-gǎ xii-güedé.

Jèsús càchí-gá sá tǎ Jüdás cuáha cuendá ñáhá-dě xii-gá núú cuè téé cùu úhú iní ñáhá
(Mt. 26:20-25; Mr. 14:17-21; Lc. 22:21-23)

21 Te sátá dúcáⁿ ní cáháⁿ Jèsús te ío ní ndíhú iní-gá, te ní xáhaⁿ-gǎ xii-güedé:

—Na càchí tnúhu ndáá-í xii-ndo sǎ díú-ní ìⁿ nchohó cuáha cuendá ñáhá-ndó xii-í núú cuè téé cùu úhú iní ñáhá —càchí-gá xáhaⁿ-gǎ xii-güedé.

22 Te ní ngüíta cue téé xica cuu ndíhi-gá ndéhé ìⁿ ndehe ìⁿ núú tnáhá-güedé, chí ñá ní cùtnuní iní-güedé ndédacàa-güedé cuendá-güedé ní cáháⁿ-gá. 23 Te ìⁿ téé-áⁿ ío cùdíí iní ñáhá Jèsús, te ndècu yatni-dé díñi-gá cùdini-dé ndíhi-gá. 24 Te té Xímú, àdi Pelú chí úú diù-dé, ní quide-dé sèñá núú tǎe ndècu yatni díñi-gá-áⁿ sá càcáⁿ tnúhú-dě núú-gǎ nùu ndédacàa-güedé cuendá-güedé ní cáháⁿ-gá. 25 Te téé-áⁿ ní sáháⁿ ndehe yatni-gá-dé díñi Jesús, te ní xáhaⁿ-dě xii-gá:

—Mèstrú, ¿ndédacàa-ndí cuendá-ndí ní cáháⁿ-n-í? —càchí-dé xáhaⁿ-dě xii-gá.

26 Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cúú-dě —càchí-gá xáhaⁿ-gǎ xii-dé.

Te ní chindóyo-gá luha pàá, te ní sáha-gá té Jüdás déhe té Xímú Iscarioté. 27 Te òré ní queheⁿ-dé pàá, te ní

ngündecu ndíhi ñàha dùuⁿ-ná yucu ñávàha xii-dé. Te ní xáhaⁿ Jèsús:

—Sá ní sani iní-n càda-n te cada ndíhi-ni-n —càchí-gá xáhaⁿ-gǎ xii-dé.

28 Te ní ìⁿ cue téé cùdini ndíhi-gá ñá ní tǎcu tnùn-í-güedé nása ndùu tnúhu ní xáhaⁿ-gǎ xii té Jüdás. 29 Te dava-güedé ní sani iní-güedé sá sǎ cuendá sá ndécú ndíhi-dé sá ñúhú díhúⁿ, te vǎa ío ìⁿ sá cuááⁿ-dǎ nàndíhi-güedé vico, àdi díhúⁿ cuáha-dé ñáyiú ndàhú xáhaⁿ-gǎ ní cáháⁿ-güedé. 30 Te sa ní cundiquiⁿ ní queheⁿ cuendá té Jüdás pàá caxi-dé, te òré ní níhí-dǎ pàá-áⁿ te ní quee-dé cuáháⁿ-dǎ.

Jèsús càchí tnúhu-gá nàcuáa cada-o

31 Te sátá ní quee té Jüdás cuáháⁿ-dǎ, te ní xáhaⁿ Jèsús xii dava-gá-güedé:

—Vitna te quiní-ndó ndíhi nchaa ñáyiú sá ío càhnu cuu yúhú Téé cùu ñaní tnáhá-ndó nchàa-ndo, te òré-áⁿ cutnùn-í iní-ndó sǎ ío càhnu cuu tucu mee Yá Ndiǒxí. 32 Te núu yúhú quidé càhnu-í Yá Ndiǒxí, te diu-ni ducaⁿ càda cahnu ñàha-gá xii yúhú, te ñá túú-gǎ titní nduu te ducaⁿ càda-gá. 33 Te nchòhó cue déhe-í na càchí tnúhu-í sá sàcú duha-ná nduu ndècu ndíhi ñàha-í xii-ndo. Te nchòhó nanducu ñàha-ndo xii-í dico vǎ ná níhí ñáhá-ndó dàtná ní xáhaⁿ-í xii ñáyiú isràél, te diu-ni ducaⁿ càháⁿ-í núú-ndó sǎ vǎ ndácú-ndó quíhíⁿ-ndó núú quíhíⁿ-í. 34 Te duha

sànu ichi ñaha tucu-í xii-ndo nàcuáa cada-ndo sã cúu iní tnáhá-ndó ìⁿ ìⁿ-ndo datná yúhú cúu iní ñáhà-í xii-ndo. ³⁵ Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiu sá cúu-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú vá nũnuu-dé sá xicá cùu ndihí ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úu òu-dé, xii Jèsús:

—Mèstrú, ¿ndéé quihíⁿ-n-í? —càchí-dé xáhaⁿ-dẽ xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quihíⁿ núu quihíⁿ-í, dico na sàá nduu te òai sáá-n núu cùndècu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuèndá nõu vá ndácù-í canchicúⁿ ñáhà-í xii-n quihíⁿ vitna-i? Chi yúhú ñá túu tnáhí yùhú-í cuèi na cùu-í sá cuèndá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sá xèhndé iní-n sã cuèi na cùu-n cuèndá-í-u? Tẽ na càchí tñúhu ndáá-í xii-n sã cùmání-gã cana líhi, te úní xito càháⁿ-n sã ñá túu xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó nõu ndécú Yã Ndiõxí

¹ Te ní xáhaⁿ-gã xii-güedé:

—Te ñá túu ñá cani iní-ndó. Quindáá iní-ndó Yã Ndiõxí, te quindáá iní-ndó yúhú. ² Chi núu ndécú Tãtà-í ío nõne núu cùndècu-o, chi núu ñáhá ñá te sa cachí tñúhu-í xii-ndo ni cùu. Te vitna na nõhú-í te cada túha-í núu cùndècu-ndo. ³ Te òatnùní quixi tucu-í te candeca ñaha-í xii-ndo quihíⁿ cuèndá ìⁿ-ni xìchi cundecu-o. ⁴ Te sa ñaha-ndo ndéé quihíⁿ-í te sa xini-ndó ichi —càchí-gá xáhaⁿ-gã xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túu xini-ndí ndéé quihíⁿ-n te da ichi-ná quini-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùu-í òatná ìⁿ ichi te càháⁿ-í tñúhu ndáá, te yúhú cada-í te naníhí tãhú-ndó. Te ìⁿ òai òi-í yúhú cada-í te sáá-ndó nõu Yã Ndiõxí cundecu-ndo te núu na quindáá iní ñáhá-ndó xii-í. ⁷ Te núu òicó cùtñùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tãtà-í ní cùu. Dico vitna òatná sá ñá xini núu-ndó Dútú Ndiõxí Yáá cúu Tãtà-í cada iní-ndó, chi ní xini-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndiõxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túu xini ñáhá-n xii-í? Te sa ní cuu vài nduu ndecu ndihí ñaha-í xii-ndo, chi ñáyiu xini ñáhá xii-í te xini-yu tnáhá Tãtà-í. ¿Te ná cuèndá yòhò

càchí-n sǎ dánèhé ñàhà-í xii-ndo Tǎtà-í? ¹⁰ ¿Náa ñá túú sàndáá iní-ndó sǎ yúhú ndécù-í ndihí Tǎtà-í? Te mee-gǎ ndécú ndihí ñaha-gǎ xii-í. Te nchaa tnúhu càháⁿ-í núú-ndó ñaa túú càháⁿ-í sǎ véxi iní mèè-í, chi Tǎtà-í Yaa ndécú ndihí ñaha xii-í chindèe ñaha-gǎ quidè-í chiùⁿ-gǎ. ¹¹ Te quindáá iní-ndó sǎ yúhú ndécù-í ndihí Tǎtà-í, te ducaⁿ mèe-gǎ ndécú ndihí ñaha-gǎ xii-í. Te núu ñá túú sàndáá iní-ndó tnúhu càháⁿ-í-a, te dandàcu iní-ndó nchaa chiùⁿ ta quide-í véxi, te quindáá iní ñáhá-ndó. ¹² Te na càchí tnúhu ndáá-í xii-ndo sǎ nchaa ñáyiu na quindáá iní ñáhá xii-í, te cadá-yu chiùⁿ quide-í te càhnu-gǎ chiùⁿ cadá-yu chi yúhú núhú-í núú ndécú Tǎtà-í cundecu-í nàcuáa ñihí ndéé-gǎ-yu cundecú-yu. ¹³ Te nchaa sǎ ná càcáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáyiu sǎ ïo càhnu cuu Tǎtà-í Dútú Ndiõxí. ¹⁴ Te yúhú cada-í nchaa sǎ cuiní-ndó càcáⁿ táhú-ndó núu-í, te núu na quindáá iní ñáhá ndisa-ndo xii-í.

Jèsús càchí-gǎ sǎ téndàha-gǎ Espíritú Yǎ Ndiõxí quixi cundecu ndihí-o

¹⁵ Te núu nchòhó cúú iní ñáhá-ndó xii-í te tñi-ndo nchaa tnúhu càháⁿ-í. ¹⁶ Te yúhú cacáⁿ táhú-í núú Tǎtà-í sǎ téndàha-gǎ Espíritú-gǎ quixi cundecu ndihí-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiu

ndècu ichi cuehé ichi duha ñá túú xini-yu Espíritú Yǎ Ndiõxí te ni vá cúú cundecu ndihí-yu. Dico nchòhó sa xini-ndó Espíritú-gǎ te ndècu ndihí ñaha-xi xii-ndo. Te sǎá ¹⁸ nduu te cunuu Espíritú-gǎ iní-ndó. ¹⁸ Te yúhú vá dáñá ñihnu ñaha-í xii-ndo, chi quixi tucu-í cundecu ndihí ñaha-í xii-ndo. ¹⁹ Te sácú duha-ná nduu ndècu-í te vá quini ñáhá-gǎ ñáyiu xii-í, dico nchòhó chi quini ñáhá-ni-ndó xii-í. Te ducaⁿ-ni cundecu-ndo ichi váha chi cundecu ndihí ñaha-í xii-ndo ni caa ni quíhíⁿ. ²⁰ Te dàvá-áⁿ cutnùní iní-ndó sǎ ndécù-í ndihí Tǎtà-í, te ducaⁿ nchòhó cundecu ndihí ñaha-ni-ndo xii-í. ²¹ Te nchaa ñáyiu dàcuaha tnúhu-í te tñi-yu, ñáyiu-áⁿ quidé ndisá-yu sǎ cúú iní ñáhá-yu xii-í. Te ducaⁿ Tǎtà-í cúú iní ñáhá-gǎ xii-yu, te ducaⁿ-ni yúhú cúú iní-í-yu tucu, te ducaⁿ te cutnùní iní-yu sǎ ndécú ndihí-í-yu —càchí-gǎ xáhaⁿ-gǎ xii-dé.

²² Te ní càháⁿ ²² tée nàni Judás dico ñá díú tǎ Judás déhe té Ximú Iscarioté ní càháⁿ, chi ingá té Judás ní xáhaⁿ-dǎ xii-gǎ:

—Mèstrú, ¿nása cada-n cuendá cutnùní iní-ndí sǎ cundècu ndihí ñaha-n xii-ndí, te ñáyiu ñuhu ichi cuehé ichi duha vá cundècu ndihí-n-yu-í? —càchí-dé xáhaⁿ-dǎ xii-gǎ.

²³ Te ní xáhaⁿ Jèsús xii-güedé:

—Nchaa ñáyiu cùu iní ñáhá xii-í te tñi-yu tnúhu càháⁿ-í, te ñáyiu-áⁿ cúú iní ñáhá Tǎtà-í

xii-yu, te yúhú ndihí Tătà-í ndécú-ndí ndihí-yu. ²⁴ Te nchaa ñáyiú ñá túú cùu iní ñáhá xii-í te ñá túú tní-yu tnúhu càháⁿ-í. Te nchaa tnúhu ní cáháⁿ-í ní xíndédóho-ndo chí Tătà-í Yaá ní tendaha ñàha xii-í véxi-í ñuyúú-a ní dácáhu iní ñáhá-gă xii-í, te ñá díú mèe-í ní càhu iní-í tnúhu cáháⁿ-í.

²⁵ 'Duha ndùu tnúhu càháⁿ-í núú-ndó vitna ndecu ndihí ñàha-gá-í xii-ndo. ²⁶ Dico Yá Ndióxi tendaha-gă Espiritú-gá quixi-xi cada-xi núu-í taxi-xi tnúhu ndee iní xii-ndo, te ñu-xi chindee ñàha-xi xii-ndo te danèhé ñáhá-xí xii-ndo nchaa sá cúmăní quini-ndó, te ñu-ni-xi dandàcu iní ñáhá-xí xii-ndo nchaa nacuaá ní cáháⁿ-í.

²⁷ 'Te yúhú chindee chituu ñàha-í xii-ndo ío váha cuu iní-ndó cundecu-ndo datná yúhú ío váha cùu iní-í ndécú-í, chí sa ta cùyatni nduu núhú-í. Te yúhú càchí tnúhu ndáá-í sá chindèe ñàha-í xii-ndo, te vá càdà-í dàtná quidé ñáyiú ñùhu ichi cuehé ichi duha. Te ni vă ndihú iní-ndó, te ni vă yúhú-ndó. ²⁸ Te sa ní xíndédóho-ndo ñí cáháⁿ-í sá nùhú-í, te quixi tucu-í cundecu ndihí ñàha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tătà-í, te cudí iní-ndó ní cùu, chí ío càhnu cuu-gá dácúxí yúhú. ²⁹ Te sa ní cachí tnúhu-í sá nùhú-í, te na sàá òré núhú-í núú ndécú Tătà-í, te quindáá iní ñáhá-ndó xii-í.

³⁰ 'Te ñá túú-gă vâi tnúhu ndatnúhu ndihí ñàha-í xii-ndo chí sa véxi yucu ñávàha sá

táxi tnúni ñuyúú-a, dico vá táxi tnúni ñáhá-xí xii yúhú. ³¹ Te cada-í nchaa nàcuáa ní táuchíúⁿ Tătà-í cuendá cutnúni iní nchaa ñáyiú ñuyúú-a sá yúhú ío cùu iní-í-gá. Te vitna chí ndácuñí ná quihíⁿ-ó —càchí-gá xáhaⁿ-gă xii-güedé.

15

Cuendá yoho yàha stilé ndihí nchaa dité-xi

¹ Te ní xáhaⁿ tucu-gá xii-güedé:

—Yúhú cùu-í dàtná yoho yàha stilé, te Tătà-í cúu-gă dàtná ñíⁿ téé xito yoho yaha stilé-áⁿ. ² Te nchaa ñáyiú ní sándáá iní ñáhá xii-í cúu-yu dàtná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñá cuini-gá-xi cuuⁿ ndéhé-xi, te ndàda ndoo-dé nchaa dité-xi sá cúuⁿ cuendá cuuⁿ-gá. ³ Te ducaⁿ sàtnahá-xi cùu nchóhó, chí sa ní xócuñí nchaa sá cuèhé sá dúhá ndècu ndihí-ndo, chí ní sándáá iní-ndó tnúhu ní cáháⁿ-í. ⁴ Te cuu ñíⁿnuu-ndo cundecu ndihí ñàha-ndo xii-í, te núu ducaⁿ na càda-ndo, te cundecu ndihí ñàha-í xii-ndo. Chí núu ñíⁿ yutnu vídí ná quèndèé dité-xi, te dité-xi sá ñí quèndé-áⁿ vă cúuⁿ-gă sá vídí-xi chí duuⁿ duuⁿ ní xíta-xi. Ducaⁿ sàtnahá-xi cùu nchóhó chí vá ndácú-ndó càda-ndo chiuⁿ-í, te núu vá cundècu ndihí ñàha-í xii-ndo.

⁵ 'Chí yúhú cùu-í dàtná yutnu vídí-áⁿ, te nchóhó cúu-ndó dàtná nchaa dité-xi. Te nchaa ñáyiú cùu ñíⁿnuu ndihí ñàha xii-í, te ndècu

ndihi-í-yu, te ndácú-yu quidé-yu chiùⁿ-í. Te núu vá cúú ìⁿnuu ndihi ñahá-yu xii-í, te vá ndácũ-yu cadá-yu chiùⁿ-í. ⁶ Te nchaa ñáyiú vá cúú ìⁿnuu ndihi ñaha xii-í, te yáha-yu dàtná yáha ìⁿ dité yutnu vídí sá ñà túú cùuⁿ sávidí-xi, chi xèhndé-güedé yìchí-xi, te sàhmi-güedé.

⁷ Cuu ìⁿnuu ndihi ñaha-ndo xii-í, te vá nácuaⁿ-ndo nacuaá ní cáháⁿ-í. Te núu ducaⁿ na càda-ndo, te ñani cuèní-ndó cǎcáⁿ-ndó núu-í te taxi-í. ⁸ Te núu nchòhó ná cadá vǎha-ndo cùndecu-ndo, te ío cada càhnu-ndo Tàtá-í, te ducaⁿ cùtnumí sá ndísá cùu-ndo cue téé ní chitnahá ñáhá xii-í. ⁹ Te yúhú ío cùu iní ñáhà-í xii-ndo dàtná cúú iní ñáhá Yá Ndiòxí xii-í. Te cada-ni-ndo mèe-ni sá vǎha cuèndá cudí^í iní ñáhá-gǎ-í xii-ndo. ¹⁰ Te núu na quíndáá iní-ndó càda-ndo nchaa nacuaá ní cáháⁿ-í, te ío cuu iní ñáhà-í xii-ndo, chi yúhú ducaⁿ ío sàndáá iní-í Tàtá-í quidé-í nchaa nácuaá ní cáháⁿ-gǎ, te xǎⁿ núu ío cùu iní ñáhá-gǎ xii-í.

¹¹ 'Duha càháⁿ-í núu-ndó cuèndá cudí^í ndísá iní-ndó dàtná cudí^í iní mèe-í. ¹² Te duha ndúu tnúhu càháⁿ-í cuèndá sá cúú iní tnáhá-ndó ìⁿ ìⁿ-ndo datná cúú iní ñáhà-í xii-ndo. ¹³ Te núu ní xíhó sǎ cúú-xí ìⁿ téé ío váha tnáhá tnúhu ndihi-o, te xǎⁿ cutnùmí iní ñáyiú sá ío cùu iní-ó-dě. ¹⁴ Te nchòhó cuu-ndo cuè téé ío váha tnáhá tnúhu ndihi-í te núu na càda-ndo nchaa nacuaá càháⁿ-í. ¹⁵ Te vá cùñaha-gǎ-í xii-ndo sǎ cúú-ndó cuè téé

xínu cuechi núu-í, chi ní ìⁿ téé xínu cuechi ñá túú xini-dé ná quidé pàtróoⁿ-dě. Te yúhú cǎchí-í xii-ndo sǎ cúú-ndó cuè téé ío váha tnáhá tnúhu ndihi-í, chi ní cachí tnúhu-í nchaa nácuaá ní cáháⁿ Tàtá-í. ¹⁶ Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchìuⁿ-í quíhíⁿ-ndó càda-ndo nchaa nacuaá ní cáháⁿ-í, chi tnúhu-áⁿ vǎ ndihí ñihnu-xi. Te ducaⁿ nchaa sá ná cǎcáⁿ-ndó núu Tàtá-í Yá Ndiòxí te taxi-gǎ, te núu na quíndáá iní ñáhá-ndó xii-í. ¹⁷ Te yúhú càháⁿ-í dóho-ndo sǎ cúú iní tnáhá-ndó ìⁿ ìⁿ-ndo.

Ñáyiú ndècu ichi cuehé ichi duha cùu úhú iní-yu Jèsús ndihi nchaa ñáyiú sàndáá iní tnúhu-gǎ

¹⁸ 'Te nchaa ñáyiú ndècu ichi cuehé ichi duha ñá cúú quèní ñáhǎ-yu xii-ndo, te sa nàha-ndo sá díhna-gǎ yúhú ní ngüíta-yu ducaⁿ ñà cúú quèní ñáhǎ-yu xii-í. ¹⁹ Te núu dícò tnáhá nchòhó ndécú-ndó ichi cuehé ichi duha ña, te cuu iní ñáhǎ-yu xii-ndo dàtná cúú iní tnáhǎ-yu ndi mèe-yu ní cùu. Te yúhú ní nanducu ñihnu ñaha-í xii-ndo tnúú ñáyiú ndècu ichi cuehé ichi duha, núu xǎⁿ ío cùu úhú iní ñáhǎ-yu xii-ndo cuèndá sá ñà túú-gǎ chítnáhá-ndó-yu. ²⁰ Te dandacu iní-ndó nácuaá ní cáháⁿ-í sá nì ìⁿ téé xínu cuechi ñá túú cùnuu-dé dácúxí pàtróoⁿ-dě. Te yúhú cúú úhú iní ñáhǎ-yu, te díu-ni ducaⁿ càda ñáhá-yu xii nchòhó. Te núu dícò ní tní-yu tnúhu ní cáháⁿ-í

ñá, te ðiu-ni ducaⁿ tn̄i-yu tnúhu cáháⁿ-ndó nũ-yu ni cùu. ²¹ Te ducaⁿ càda ñahá-yu xii-ndo sã cuendá-í, chi ñá xini-yu Tãtã-í Yaá ní tendaha ñaha xii-í véxi-í ñuyíú-a.

²² 'Te váa vá cundècu cuéchi-yu ni cùu, te núu ñá túu yúhú ní cáháⁿ-í nú-yu, te vitna vá cúu tnàhí cachí-yu sã ñà túu cuéchi-yu. ²³ Chi nchaa ñáyiú cùu úhú iní ñahá xii-í, te cùu úhú iní-yu tnàhá Tãtã-í. ²⁴ Te váa ni ñⁿ cuéchi-yu vá cundècu ni cuu, te núu ðicó ñá túu ní xini-yu nchaa sã ñi quide-í sã vá yõo tnàhí ndàcu cada. Te cuéi ní xini-yu dico dai cùu úhú iní ñahá-yu xii-í ndihi Tãtã-í. ²⁵ Te duha quidé-yu chi dacuítí quèe ndáá-xi nàcuáa yòdo tnuní núu tútú Yã Ndiõxí sã dácuahá-yu, chi càchí-xi sã ñà túu ñã cuéchi-í te cuu úhú iní ñahá-yu xii-í.

²⁶ 'Te Espiritú Tãtã-í Dútú Ndiõxí sã ndécú núu-gã tendaha-í quixi chindee ñaha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cáháⁿ ndáá-xi cuendá cutnùní iní nchaa ñáyiú yoo cùu-í. ²⁷ Te nchòhó tnàhá-ndó cáháⁿ váha-ndo cuendá-í cuendá cutnùní iní-yu yoo cùu-í, chi ñaha-ndo sã ndéè òrè ní ngúita-í quidé-í chiúⁿ Tãtã-í ní chitnahá ñahá-ndó xii-í —càchí-gá xáhaⁿ-gã xii-güedé.

16

¹ Te ní xáhaⁿ tùcu-gá xii-güedé:

—Duha cáháⁿ-í cuendá ná nanchòcáva iní-ndó

núhú-ndó ichi cuehé ichi duha. ² Chi vá dáñá-gã-güedé quíhu-ndo venúhu, te ni vá cúu-gã quini ndeé ñahá-güedé xii-ndo. Te sáá ñⁿ nduu te cahni ñaha-güedé xii-ndo, te xiãⁿ cuu cahaⁿ-güedé sã quidé-güedé chiúⁿ Yã Ndiõxí. ³ Te ducaⁿ càda-güedé chi ñá túu xini-güedé Tãtã-í, te ni ñà túu xini ñahá-güedé xii yúhú. ⁴ Te duha nduu tnúhu cáháⁿ-í núu-ndó, chi na sáá òrè te ndacu iní-ndó nchaa tnúhu sã sã ní cachí tnúhu-í xii-ndo nàcuáa cada ñaha-güedé xii-í.

Nchaa chiúⁿ quide Espiritú Yã Ndiõxí

'Te ñá túu ní càchí tnúhu-í xii-ndo ndéè díhna chi ndècu ndihi ñaha-í xii-ndo. ⁵ Dico vitna sa ta cùyatni nduu núhú-í núu ndécú Tãtã-í Yaá ní tendaha ñaha xii-í véxi-í ñuyíú-a. Te ni ñⁿ nchohó ñá túu xicáⁿ tnúhú-ndó núu-í núu ndéè quíhíⁿ-í. ⁶ Chi mee-ni sã ndihú iní-ndó sã dúcáⁿ ní cáháⁿ-í. ⁷ Te na càchí tnúhu ndáá-í xii-ndo sã váha-gá sã cúu-xi-ndó núu núhú-í, chi tendaha-í Espiritú Yã Ndiõxí quixi cundecu ndihi-ndo chindee ñaha-xi, chi núu vá núhú-í te vá quíxí Espiritú-gá cundecu ndihi-ndo chindee ñaha-xi xii-ndo. ⁸ Te na quíxí Espiritú-gá te dandìxi túu-xi iní nchaa ñáyiú ndècu ichi cuehé ichi duha sã ñà túu quide váha-yu. Te dacàhu iní ñahá-xi sã ndécú ñⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sã Yã Ndiõxí cada ndáá-gá cuéchi-yu. ⁹ Te ducaⁿ te

cutnùní iní-yu sá ndécú cuèchi-yu, chi ñá túú sàndáá iní ñáhá-yu xii-í. ¹⁰ Te ducaⁿ te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tátá-í, te nchòhó vá quíní ñáhá-gã-ndó. ¹¹ Te ducaⁿ te cutnùní iní-yu sá Yã Ndiöxí cada ndáá-gá cuèchi-yu, chi sa ní cáháⁿ-gá sá yúcu ñávãha sá táxí tnùní ñuyúú-a quíhíⁿ-xi núú ùhú núú ndàhú.

¹² Te vãi-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndèdòho-ndo nchàa vitna. ¹³ Te na quixi Espiritú Yã Ndiöxí, Espiritú cáháⁿ ndáá cuiti, te Espiritú-áⁿ danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní mée-xí chi dacàhu iní ñáhá-xí nchàa sá cáháⁿ Yã Ndiöxí, te cachí tnúhu-xi nchaa nàcuáa cada-xi ndéé núú cuaháⁿ núú vèxi-gá. ¹⁴ Te Espiritú-gá-áⁿ cada càhnu ñaha-xi xii yúhú chi ndècu ndihí-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndihí Tátá-í ndécú ndihí-í tnáhá-í, núú xiãⁿ càchí-í sá Espiritú-gá danèhé ñáhá-xí nchàa tnúhu-í xii-ndo.

Nchaa ñáyiu ndihú iní-xi nduu dñí iní-yu na quixi tucu Jesús

¹⁶ Te ñⁿ úú-nã nduu ndècu-í te vá quíní ñáhá-gã-ndó xii-í, dico núú sàcú-ni nduu te quíní ñáhá tùcu-ndo xii-í, te ducaⁿ chi núhú-í núú ndécú Tátá-í —càchí-gá xáhaⁿ-gã xii-güedé.

¹⁷ Te sá dúcáⁿ ñí cáháⁿ-gá nõu ní ngüita ñⁿ úú cue tée xica cuu ndihí-gá xitnàha-güedé:

—¿Nása ndùu-tu tnúhu cáháⁿ-gá sá càchí-gá sá ñⁿ úú-nã nduu ndècu-gá te vá quíní-gá-ó-gã, dico núú sàcú-ni nduu te quíní tucu-o-gã-i?, chi núhú-gá núú ndécú Tátá-gã —càchí-güedé xitnàha-güedé.

¹⁸ Te xitnàha tucu-güedé:

—¿Nása cuaháⁿ-tu tnúhu-ãⁿ sá sàcú-ni nduu? Te ñá tècú tnùní-ó nása ndùu tnúhu cáháⁿ-gá —càchí-güedé xitnàha-güedé.

¹⁹ Te Jèsús ní cutnùní iní-gá sá cuíní-güedé cacáⁿ tnúhú-güedé núú-gã nása ndùu tnúhu ní cáháⁿ-gá, núú ní xáhaⁿ-gã:

—Cuendá sá ñí cachí-í sá ñⁿ úú-nã nduu ndècu-í te vá quíní ñáhá-gã-ndó xii-í, dico núú sàcú-ni nduu te quíní ñáhá tùcu-ndo xii-í ní cachí-í, ¿xiãⁿ ndúcú tnúhu núú tnáhá-ndó-ãⁿ? —càchí-gá xáhaⁿ-gã xii-güedé.

²⁰ Te ní xáhaⁿ tùcu-gá:

—Te na càchí tnúhu ndáá-í xii-ndo sã nchòhó ndihú víhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudíí iní-yu. Dico nchòhó ñáyiu ndáhyú chi sáá nduu te nduu díí iní-ndó. ²¹ Chi dàtná cuíní-ndó cùu ñⁿ ñadihí ñaha ní tnahá nduu cacu déhe-xi vãi sani iní-aⁿ sá quidé úhú ñáhá-xí. Dico na yãha cacu déhe-aⁿ, te ñá túú-gã ndácú iní-aⁿ sá ñí quide úhú ñáhá-xí

xìi-aⁿ chi mee-nǎ sá cudíí
 iní-aⁿ déhe-aⁿ. ²² Ducaⁿ
 sátnahá-xì cùu nchohó vitna
 chi ndihú iní-ndó sǎ nùhú-í,
 dico quixi tucu-í quixi coto
 ñaha-í xii-ndo, te òré-áⁿ te
 cudíí ndisa iní-ndó, te vá
 yõo ñⁿ-gá dandihú iní ñáhá
 xii-ndo davá-áⁿ.

²³ Te davá-áⁿ ñà túú-gǎ ná
 nducu tñuhu-ndo nùú-í. Te
 na cǎchí tñuhu ndáá-í xii-ndo
 sǎ Tǎtà-í taxi-gǎ nchaa sá
 ná cǎcáⁿ-ndó núú-gǎ nùu na
 quìndáá iní ñáhá-ndó xii-í.
²⁴ Te ndéé vitna vátá dúcáⁿ-gǎ
 cada-ndo cǎcáⁿ-ndó. Dico
 cǎcáⁿ-ndó núú-gǎ nùu ná
 cuíní-ndó te taxi-gǎ cuèndá
 cudíí ndisa iní-ndó —cǎchí-gǎ
 xáhaⁿ-gǎ xii-güedé.

*Xítóhó Jesucristú ní cunuu
 tñuhu-gǎ núú yucu ñávǎha*

²⁵ Te xáhaⁿ tucu-gǎ
 xii-güedé:

—Mee-ní nǐ chidáhu
 ndodo-í tñuhu ní cǎháⁿ-í
 núú-ndó, dico sáá nduu
 te vá chidáhu-gǎ-í tñuhu
 cǎháⁿ-í, chí cǎháⁿ ndáá-na-í
 cuèndá Tǎtà-í. ²⁶ Te davá-áⁿ
 cǎcáⁿ-ndó núú Tǎtà-í nùu
 ná cuíní-ndó te taxi-gǎ, te
 núu na quìndáá iní ñáhá-ndó
 xii yúhú Déhe-gǎ. Te ñà
 túú-gǎ xíní ñuhu-xi sá yúhú
 cǎcáⁿ-í núú-gǎ cuèndá-ndó
 chí cǎcáⁿ mée-nǎ-ndó. ²⁷ Chí
 mee Tǎtà-í ío cùu iní ñáhá-gǎ
 xii-ndo cuèndá cúú iní
 ñáhá-ndó xii-í, te sàndáá
 iní-ndó sǎ núú-gǎ ní quee-í
 véxi-í. ²⁸ Te yúhú ní quee-í
 núú Tǎtà-í véxi-í ñuyíú-a,
 te vitna dándóo-í ñuyíú-a
 te núhú-í núú ndécú-gǎ —
 cǎchí-gǎ xáhaⁿ-gǎ xii-güedé.

²⁹ Te ní xáhaⁿ cuè téé xìca
 cuu ndihí-gǎ:

—Vitna chí cǎháⁿ ndáá-nǎ-n,
 ñà túú-gǎ chidáhu-n tñuhu
 cǎháⁿ-n. ³⁰ Te vitna ní xíní-ndí
 sá ío váha cùtnuní iní-n nchaa
 nacuaa cùu, te cùtnuní iní-n
 nchaa nacuaa sàni iní nchaa
 ñáyiu. Te ñà túú xini ñuhu-xi
 nágá nducu tñuhu-yu núú-n
 chí nchaa sa ní dátúu-n
 nùú-yu. Te xíáⁿ nùu sàndáá
 iní-ndí sá núú Yǎ Ndiõxí ní
 quee-n véxi-n —cǎchí-güedé
 xáhaⁿ-güedé xii-gǎ.

³¹ Te ní xáhaⁿ Jèsús:

—¿Te vitna sàndáá
 iní-ndó-áⁿ? ³² Vitna ní sáá
 nduu ní sáá òré sá ncháá
 nchòhó cutenuu-ndo cǎa ñⁿ
 caa úu cuu-ndo, te dándóo
 mee ñaha-ndo xii-í. Dico
 ñà díú mèe dii-í quendóo
 chí ndècu ndihí-í Tǎtà-í.
³³ Duha cǎháⁿ-í cuèndá cuu
 váha iní-ndó cùndecu-ndo, chí
 ñuyíú-a cuu úhú iní ñáhá-yu
 xii-ndo, dico ní vá yúhú-ndó
 chí yúhú sa ní dáqueé tñù-í
 nchaa sá cuèhé sá dúhá ío
 ñuyíú-a —cǎchí-gǎ xáhaⁿ-gǎ
 xii-güedé.

17

*Jèsús xicáⁿ táhu-gǎ núú
 Tǎtà-gǎ Dútú Ndiõxí cuèndá
 cue téé xìca cuu ndihí-gǎ*

¹ Te sátá dúcáⁿ nǐ cǎháⁿ
 Jèsús te ní ndacoto-gǎ andiú,
 te ní xáhaⁿ-gǎ xii Tǎtà-gǎ Dútú
 Ndiõxí:

—Táu, vitna ní sáá nduu
 càda cahnu ñaha-n xii-í
 cuèndá ducaⁿ càda cahnu
 ñaha-í xii-n. ² Chí mee-n
 nǐ cachí-n sǎ táxí tñuní-í
 nchaa ñáyiu ñuyíú-a, te
 dàcacu nihnu-í nchaa ñáyiu

ní cachí-n nàníhí tàhú. ³ Te cundecu ndihí-ò-yu ni caa ni quíhíⁿ, chi sàndáá iní ñáhã-yu sá ñⁿ dìi díi-ni yòhó cúú-n Ndiòxí ndisa, te ducaⁿ xíní ñáhã-yu xii yúhú Jesucristú tée ní tendaha-n vèxi ñuyúú-a.

⁴ Te yúhú ní chiñuhu ñaha-ĩ xii-n ñuyúú-a, te ní xínu chiúⁿ ní cachí-n càda-í. ⁵ Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cútñhá vátá ngáva-gá ñuyúú.

⁶ Te nchaa ñáyiu ní nanducu nihnu-n tnuú nchaa ñáyiu ndècu ichi cuehé ichi duha, ní taxi cuendá-n-yu, te ní xáhaⁿ-ĩ xii-yu yoo cùu-n. Te cuendá-n cùú-yu, te ní taxi cuendá-n-yu, te ní sàndáá iní-yu tñuhu-n. ⁷ Te vitna ní cutnùní iní-yu sá ncháá tñuhu ndècu ndihí-í diu-ni mee-n ní taxi-n. ⁸ Te ní dánèhé-í-yu nchaa tñuhu sá ñí dánèhé ñáhã-n xii-í, te ní sàndáá iní-yu. Te ní cutnùní iní-yu sá núú-n ñí quee-í véxi-í, te ní sàndáá iní-yu sá yòhó ní tendaha ñaha-n xii-í véxi-í ñuyúú-a.

⁹ Te yúhú càháⁿ ndàhú-í núú-n cuendá nchaa ñáyiu ní taxi cuendá-n. Te ñá túú càháⁿ ndàhú-í núú-n cuendá ñáyiu ndècu ichi cuehé ichi duha, chi cuendá nchaa ñáyiu ní taxi cuendá-n càháⁿ-í, chi cuendá-n cùú-yu. ¹⁰ Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xí cuendá-í tñhá-í. Te xíquide càhnu ñahá-yu xii-í.

¹¹ Te yúhú vá cundècu-gá-í ñuyúú-a, dico mèe-yu chi

cundecu-ní-yu, te yúhú ndixi-í núú ndécú-n. Táu, yòhó ío yíñuhu ndecu-n, te yúhú càháⁿ ndàhú-í núú-n sá ní yùhu ni iní-n còto-n nchaa ñáyiu ní taxi cuendá-n, ñáyiu ní sàndáá iní tñuhu-í cuendá sá ñⁿ-ní ìchi cuú-yu cundecú-yu dàtná ñⁿ-ni cùu nchoo. ¹² Chi òré ndécú-í ndihí-yu ñuyúú-a ní xito-í-yu nàcuáa cùu iní-n, te ni ñⁿ-yu ñá túú ní xíta nihnu, chi ñⁿdìi-ni té Jùdás ní xíta nihnu tñáhí-dé, te ducaⁿ ñí cuu cuendá sá ñí quee ndáá-xi nàcuáa yòdo tñuní núú tütú-n.

¹³ Te vitna sa ndixi-í núú ndécú-n, dico ñini ndècu-gá-í ñuyúú-a duha càháⁿ-í cuendá sá cúdíí iní-yu dàtná cúdíí iní mèe-í. ¹⁴ Te yúhú ní dánèhé-í-yu tñuhu-n, dico nchaa ñáyiu ndècu ichi cuehé ichi duha cùu úhú iní ñáhã-yu xii-yu cuendá sá ñá túú-gã ndécú-yu ichi cuehé ichi duha-áⁿ dàtná yúhú ñá túú ndècu-í ichi-áⁿ. ¹⁵ Te ñá túú càhí-í sá xócàní-n-yu ñuyúú-a, dico càháⁿ ndàhú-í núú-n sá dácãcu nihnú-n-yu núú yucu ñávãha. ¹⁶ Te yúhú ñá túú ndècu-í ichi cuehé ichi duha, te ducaⁿ mèe-yu ñá túú-gã ndécú-yu ichi cuehé ichi duha. ¹⁷ Te ío na cundecu yihi ñuhu-gá-yu núú-n dàcuahá-yu tñuhu-n, chi cùu-xi ñⁿ tñuhu ndáá. ¹⁸ Te dàtná ní tendaha ñaha-n xii yúhú véxi-í tnuú nchaa ñáyiu ndècu ichi cuehé ichi duha, ducaⁿ càda-í tendaha-í-yu quíhíⁿ-yu càháⁿ-yu tñuhu-í tnuú nchaa ñáyiu ndècu ichi

cuehé ichi duha. ¹⁹ Te yúhú ndécú yĩñuhu-í núú-n, te cada ñaha-n xii-í nàcuáa cùu iní-n sá cuendá-yu, te ducaⁿ te cundecu yĩñuhú-yu núú-n dàcuahá-yu tnúhu-n.

²⁰ Te ñá díú cuendá mee-ni ñáyiú sa ní sándáá iní-xi càháⁿ ndàhú-í núú-n, chi tnàhá cuendá nchaa ñáyiú na quindáá iní ñáhá xii-í ndéé idá-gá nõu na cùndedóho-yu tnúhu càháⁿ ñáyiú na tëndaha-í. ²¹ Te xicáⁿ táhù-í núú-n sá ncháá-yu ìⁿ-ná ichi na cùú-yu, te ìⁿ-ná cani iní ndihì ñáhá-yu xii-o dàtná cúú nchòo ìⁿ-ni cuu-o. Te ducaⁿ ìⁿ-ná cuu-o ndihì-yu cuendá sá ná quindáá iní nchaa ñáyiú ndècu ichi cuehé ichi duha sá díú-n ñĩ tendaha ñàha-n xii-í véxi-í ñuyíú-a. ²² Te nchaa sá vǎha ní taxi-n ndècu ndihì-í ní dánèhè-í-yu cuendá sá ìⁿ-ná cuú-yu cundecú-yu dàtná ndécú nchòo. ²³ Te yúhú cundecu ndihì-í-yu, te yòhó cundecu ndihì ñaha-n xii yúhú cuendá ìⁿ-ná cuu ndisá-yu cundecú-yu. Te ducaⁿ te cutnùnì iní nchaa ñáyiú ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúú iní ñáhá-n xii yúhú.

²⁴ Táu, mee-n ñĩ taxi cuendá-n-yu, te cuiní-í sá cùndécú-yu núú cùndècu-í cuendá quini-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndéé cùtnàhá vátá ngǎva-gá ñuyíú. ²⁵ Táu, yòhó ío yĩñuhu

ndecu-n. Te ñáyiú ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyiú ní sándáá iní ñáhá xii-í sa xini-yu sá díú-n ñĩ tendaha ñàha-n xii-í véxi-í ñuyíú-a. ²⁶ Te sa xáhaⁿ-í xii-yu yoo cùu-n, te diu-ni ducaⁿ càda-í cuendá cuu iní tnàhá-yu dàtná cúú iní ñáhá-n xii-í, te ducaⁿ cùndecu-í ndihì-yu —càchì-gá xáhaⁿ-gǎ xii Tǎtá-gǎ Dútú Ndiõxì.

18

Ni tnì-güedé Jèsús ndécá ñàha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñĩ càháⁿ Jèsús, te ní quee-gá ndihì cue téé xica cuu ndihì-gá cuáháⁿ-güedé ndàa ingá xio yuhu yùú Cèdrón. Te yàcáⁿ cáá ìⁿ lahuertá, te xití lahuertá-áⁿ cuǎnguihu Jèsús ndihì cue téé xica cuu ndihì-gá. ² Te té Jùdás déhe té Ximú Iscarioté téé ní sáha cuendá ñáhá xii-gá núú cue téé cùu úhú iní ñáhá sa xini-dé lahuertá-áⁿ chi titnì xito ní sáháⁿ Jèsús ndihì-güedé xiáⁿ. ³ Núu ndáá ichi xiáⁿ ñĩ sáá té Jùdás ndihì vǎi sandadú, ndihì cue téé quide cuendá veñúhu ní techiúⁿ ñaha cue dútú cùnùu, ndihì cue téé cùu fariséú. Te xinehe-güedé machitì ndihì ìⁿ ùú-gá sá dééⁿ, te yòtnúú-güedé lìntèrná ndihì iti ní sáá. ⁴ Te Jèsús sa nàha-gá nchaa nàcuáa cada ñaha-güedé xii-gá nõu ní sáháⁿ tuha ñaha-gǎ xii-güedé, te ní xáhaⁿ-gǎ:

—¿Yoo nànducu-ndo? —
cachí-gá xáhaⁿ-gǎ xii-güedé.

⁵ Te ní xáhaⁿ-güedé:

—Jèsús tée ñuú Nazàrét
nándücu-ndí —càchí-güedé
xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nàni-í, te
náu-í ndécú-á te núu yúhú
nándücu-ndo —cachí-gá
xáhaⁿ-gǎ xii-güedé.

Te tnàhá té Jüdás tée ní
sáha cuendá ñáhá xii-gá
ndihi-güedé. ⁶ Te òré ní
xáhaⁿ Jèsús sá díú-gǎ cúu tée
nàndücu-güedé, te ní nacaca
dùma-güedé te ní nduá-güedé
ndéé ñuhu. ⁷ Te ní xicáⁿ tnúhú
tùcu Jesús núu-güedé yoo
nàndücu-güedé. Te ní xáhaⁿ
tùcu-güedé sá Jèsús tée ñuú
Nazàrét nándücu-güedé, ⁸ núu
ní xáhaⁿ-ná Jèsús:

—Sa ní cáháⁿ-í sá díú
yúhú ducaⁿ nàni-í, te núu
yúhú nándücu-ndo, te
daña-ndo ncháa cue tée iha
na nùhú-güedé —càchí-gá
xáhaⁿ-gǎ xii-güedé.

⁹ Duha ní cuu chi ní quee
ndáá-xi nàcuáa ní cáháⁿ mée
Jèsús chi ní cachí-gá sá ncháá
ñäyiu ní sáha cuendá ñáhá
Yá Ndiöxí cundecu ndihi-gá
vá cuíta nihnú-yu. ¹⁰ Te té
Xímú, àdi Pelú chi úu diu-dé,
néhé-dé ìⁿ machití, te ní
tava-dé machití-áⁿ ñí-xi te ní
xehndé-dé lóho xio cùha ìⁿ tée
nàni Malcú ní quèndéé duuⁿ.
Te tée-áⁿ xínú cuèchi-dé núu
dútú cúnüu-gá. ¹¹ Te ní xáhaⁿ
Jèsús xii té Pelú:

—Nataxúha machití-áⁿ
núu ñúhú-xí, chi dacuití sǎ
ndóhò-í nàcuáa ní cachí Tàtà-í

cunduu —càchí-gá xáhaⁿ-gǎ
xii-dé.

*Jèsús ndécú-gǎ núu dútú
cúnüu-gá*

(Mt. 26:57-58; Mr. 14:53-
54; Lc. 22:54)

¹² Te cue sandàdú ndihi
cue tée cúnüu-gá núu-güedé,
ndihi cue tée quide cuendá
veñúhu ní tni-güedé Jèsús,
te ní dácútú ñàha-güedé.

¹³ Te ndèca ñàha-güedé xii-gá
cuáháⁿ núu ndécú tē Ànás, te
té Ànás-áⁿ cúu-dé tǎtá ñadihí
té Caifás. Te té Caifás-áⁿ ní
cúu-dé dútú cúnüu-gá cuía-áⁿ.

¹⁴ Te diu-ni tée-áⁿ ní xáhaⁿ-dè
xii ñäyiu isràél sá vǎha-gá
sá ìⁿ-ní tée na cùu-dé sá
cuendá-yu ncháá-yu.

*Té Pelú càháⁿ-dé núu ñäyiu
sá ñà túu xini-dé Jèsús*

(Mt. 26:69-70; Mr. 14:66-
68; Lc. 22:55-57)

¹⁵ Te té Pelú, àdi Xímú chi
úu diu-dé, ndihi ingá tucu-dé
nàcuáa xica cuu ndihi-güedé
Jèsús nchicúⁿ ñáhá-güedé
xii-gá cuáháⁿ. Te ìⁿ tée-áⁿ xini
tnáhá-dé ndihi dútú cúnüu-áⁿ
núu nchicúⁿ-dé tnáhá-dé
Jèsús cuánguihu ndéé núu cáá
vèhe tée cúnüu-áⁿ. ¹⁶ Dico té
Pelú ní ndóo-dé yuyèhe ndaa
quehé, núu ní ndee tée ndihi
té Pelú-áⁿ ní cáháⁿ ndihi-dé
ñàha ndéé yuyèhe, te ndèca-dé
té Pelú cuánguihu. ¹⁷ Te ní
xáhaⁿ ñàha ndéé yuyèhe-áⁿ xii
té Pelú:

—¿Náa ñá díú yòhó
tnáhá-n xica cuu ndihi-n tée
ndèca-güedé cuánguihu-a? —
càchí-aⁿ xáhaⁿ-aⁿ xii-dé.

Te ní xáhaⁿ tē Pelú:

—Ñáhá, ñá túú tǝ-ǎⁿ xícá cùu ndihi-ú —càchí-dé xǎhaⁿ-dǝ xii-aⁿ.

¹⁸ Te ío víxiⁿ quide-xi núu cue tée xinu cuechi, ndihi cue tée quide cuendá veñúhu ní dátñáhá-güedé ñuhú, te xínutñí teté-güedé ndihi té Pèlú.

Dútú cúnúu nducu tnúhu-dé núu Jèsús

(Mt. 26:59-66; Mr. 14:55-64; Lc. 22:66-71)

¹⁹ Te dútú cúnúu ní xícáⁿ tnúhú-dǝ núu Jèsús núu nándi cùu cue tée xica cuu ndihi-gá, te nándi sá dánèhé ñáhá-gǎ xii-güedé. ²⁰ Te ní xáhaⁿ-gǎ:

—Yúhú càháⁿ ndodo-í núu nchàa ñáyiu cuéi xití veñúhu càhnu sá ío cúnúu, te cuéi xití nchaa dava-gá veñúhu núu tàcá nchaa ñáyiu isràél ducaⁿ-ni dànehé-í-yu, te ñá túú dàyuhu cáháⁿ-í. ²¹ Núu vá càcáⁿ tnúhú-n núu-í. Cacánⁿ tnúhú núu nchàa ñáyiu sácúndedóho tnúhu càháⁿ-í, te na càháⁿ-yu núu nása ndùu tnúhu càháⁿ-í chi xini-yu —càchí-gá xáhaⁿ-gǎ xii-dé.

²² Te sá dúcáⁿ ñí cáháⁿ Jèsús núu ñíⁿ tée quide cuendá veñúhu nùtní-dé tnàhá-dé te ní caní-dé ñíⁿ déhndé núu-gǎ. Te ní xáhaⁿ-dǝ:

—¿Ná cuendá ducaⁿ càháⁿ-n núu dútú cúnúu-i? —cachí-dé xáhaⁿ-dǝ xii-gá.

²³ Te ní xáhaⁿ Jèsús xii-dé:

—Te núu nèhé ní cáháⁿ-í te cáháⁿ-n nása ndùu tnúhu ní cáháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gǎ xii-dé.

²⁴ Te ndùtu yoho-ni Jesús ní dánùhú ñáhá tǝ Ànás

xii-gá ndaha té Caifás dútú cúnúu-gá.

Té Pèlú càháⁿ tucu-dé núu ñáyiu sá ñá túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtní teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xícá cùu ndihi tée ndèca-ndí véxi-ǎⁿ? —càchí-güedé xáhaⁿ-güedé xii-dé.

Te ní xáhaⁿ tǝ Pèlú:

—Ñáhá, ñá túú tǝ-áⁿ xícá cùu ndihi-ú —càchí-dé xáhaⁿ-dǝ xii-güedé.

²⁶ Te ñíⁿ ñaní tnàhá tǝ ní xehndé té Pèlú lóho-xi-áⁿ xínú cuèchi-dé tnàhá-dé núu dútú cúnúu. Te tǝ-áⁿ ñí xáhaⁿ-dǝ xii té Pèlú:

—¿Náa ñá díú tnàhá-n ndihi-n-dé ní xini ñáhà-í òré ní tní-ndí-dé xití lahuertá? —càchí-dé xáhaⁿ-dǝ xii-dé.

²⁷ Te té Pèlú ní xáhaⁿ tucu-dé sá ñá díú-dǝ, te òré-áⁿ ñí cana ñíⁿ líhi.

Jèsús ndécú-gǎ núu tǝ Pilatú
(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiúⁿ tée cùu gobiernú. Te sa ta cùditó-ni-gá cuáháⁿ núu ñá ní cuíni cue tée isràél quíhu-güedé xití vechiúⁿ tée cùu gobiernú-áⁿ. Te núu ñí quíhu-güedé vechiúⁿ-áⁿ ñá, te vá cúu-gǎ quíhu-güedé cudini-güedé vico pascuá ní cùu chi ducaⁿ tnàhí quide-güedé. ²⁹ Núu té Pilatú tée cùu gobiernú ní quee-dé vechiúⁿ-dé ní cáháⁿ

ndihi ñaha-dě xii-güedé, te ní xáhaⁿ-dě:

—¿Ná cuéchi ní quide té-e-a núu ndèca-ndo-dé véxi? — cächí-dé xáhaⁿ-dě xii-güedé.

³⁰ Te ní xáhaⁿ-güedé:

—Te núu dícó ñá túú cuéchi-dé-án te vá cándèca-ndí-dé ñá túú véxi-í sá táxi tnùn-í-í quixi núu-n ní cùu — cachí-güedé xáhaⁿ-güedé xii-dé.

³¹ Te ní xáhaⁿ tucu té Pilatú xii-güedé:

—Chí cándèca-dé cuánùhú, te cada ndáá-ndó cuéchi-dé nàcuáa cãa leí mée-ndó — cächí-dé xáhaⁿ-dě xii-güedé.

Te ní xáhaⁿ-güedé:

—Dico nchúhú ñáyiú isràél chi ñá túú dùcaⁿ taxi tnuní leí sá cáhni-ndí — cächí-güedé xáhaⁿ-güedé xii-dé.

³² Te ducaⁿ ñí cuu chi dacuití ñí quee ndáá-xi nàcuáa ní cáháⁿ mée Jèsús cada-xi cuú-gá.

³³ Te cuándihu té Pilatú vechiⁿ-dé, te ní cana-dé Jèsús ní xicáⁿ tnúhú-dé núu-gã, te xáhaⁿ-dě:

—¿Yòhó yíndaha-n ñáyiú isràél-án? — cächí-dé xáhaⁿ-dě xii-gá.

³⁴ Te ní xáhaⁿ Jèsús:

—¿Te xíãⁿ cãháⁿ-n sã véxi iní mée-n, àdi ió ñí ñáyiú ní cachí tnúhu xii-ñ cuèndá-í? — cächí-gã xáhaⁿ-gã xii-dé.

³⁵ Te ní xáhaⁿ tẽ Pilatú xii-gã:

—Ñá díú tẽ isràél cúu-í núu ducaⁿ cãháⁿ-n, chi cue ñaní tnáhá-n cuè té isràél ndihi cue dútú cúnúu ní taxi cuèndá ñhá-güedé xii-n ìha. ¿Te ná ní quide-n? — cächí-dé xáhaⁿ-dě xii-gã.

³⁶ Te ní xáhaⁿ Jèsús:

—Ñá díú tẽ ñuyíú-a cùu-í te ní ñá túú véxi-í taxi tnùn-í-í ñuyíú-a, chi núu dícó iha tàxi tnuní-í án te cue té-e xica cuu ndihi-í nãá-güedé ndihi cue té-e isràél cuèndá sã vã tní ñaha-güedé xii-í ní cùu, dícó ñá túú véxi-í sá táxi tnùn-í-í ñuyíú-a — cächí-gã xáhaⁿ-gã xii-dé.

³⁷ Te ní xáhaⁿ tẽ Pilatú:

—¿Te té-e yíndaha ñáyiú cùu-ó vání? — cächí-dé xáhaⁿ-dě xii-gã.

Te ní xáhaⁿ Jèsús:

—Te dàtná cächí-n-ãⁿ yíndaha ndisa-í ñáyiú, chi yúhú véxi-í ñuyíú-a te iha ní cacu-í te cãháⁿ-í mee-ni tnúhu ndáá. Te nchaa ñáyiú na cùdí ìní-xi tnúhu ndáá, te tedóho-yu nchaa tnúhu cãháⁿ-í — cächí-gã xáhaⁿ-gã xii-dé.

³⁸ Te ní xáhaⁿ tẽ Pilatú:

—¿Te ná cúu-tu tnúhu ndáá-áiⁿ? — cächí-dé xáhaⁿ-dě xii-gã.

Cächí-güedé sã cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicáⁿ tnúhú tẽ Pilatú núu Jèsús, te ní quee tucu-dé quehé, te xáhaⁿ-dě xii cue té-e isràél:

—Ñá túú ñã cuéchi té-e-a, ³⁹ Te váha-ni chi ducaⁿ tnàhi quide nchóhó sã ndí tnahá nduu víco pascuá cùn-í-ndó sã dácacu-í ñí tée yíhi ve-caá. Te núu cùn-í-ndó te na dàcacu-í tée yíndaha ñaha xii-ndo — cächí-dé xáhaⁿ-dě xii-güedé.

40 Te sá dúcáⁿ ní cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedě:

—¡Vá dácácu-n tée-áⁿ, té Barrábás dácácu-n! —càchí-güedé xáhaⁿ-güedě xii-dé.

Te té Barrábás-áⁿ ní cuu-dé ìⁿ ñadúhú.

19

1 Te té Pilatú ní táuchíúⁿ-dè ní tñi ñaha cuè sandadú xii Jèsús, te ní caniha-güedé xii-gá ndihi ñi. 2 Te ñu-ni cue tée-áⁿ ní cadúha-güedé ìⁿ coróná iñu ní chihi-güedé díquí-gă, te ní dáquũ nuu ñaha-güedě xii-gá ìⁿ dóó tícuèhé víhí. 3 Te ní sáháⁿ ndehe yatni-gá-güedé núú-gă, te ní xáhaⁿ-güedé:

—¡Ío càhnu cuu yohó tée yindaha ñaha xii ñáyiú isràél! —càchí-güedé xáhaⁿ-güedé cúdíquí ndeé ñáhá-güedě xii-gá.

Te ní cani-güedé déhndé núú-gă.

4 Te ní quee tucu té Pilatú quehé te ní xáhaⁿ-dè xii nchaa ñáyiú xĩndecu quehé:

—Te cundehe-ndo-dè ná ndeé ñuhu-í-dé iha, chi yúhú sáha-í cuendá sá ñà túú cuèchi-dé —càchí-dé xáhaⁿ-dè xii-yu.

5 Te ní ndeñuhu ñaha té Pilatú xii Jèsús xiti vechiúⁿ-dè te ñuhu ìⁿ coroná iñu díquí-gă, te nihnu-gá dóó tícuèhé víhí-ă. Te ní xáhaⁿ tẽ Pilatú xii-yu:

—¡Nái-dé-a! —càchí-dé xáhaⁿ-dè xii-yu.

6 Te ní xiní ñáhá cuè dútú cúnúu ndihi cue tée

quide cuendá veñuhu. Te ní cuáá-güedé, te xáhaⁿ-güedě:

—¡Cata caa-dé! ¡Cata caa-dé núú cùrúxí! —càchí-güedé xáhaⁿ-güedě xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dè quíhíⁿ cata caa-ndo-dè núú cùrúxí, chi yúhú cùtnúni iní-í sá ñà túú na cuèchi-dé —càchí-dé xáhaⁿ-dè xii-güedé.

7 Te ní xáhaⁿ cuè tée isràél:

—Léi ndécú ndihi nchúhú càchí-xi sá dài cuú-dé, chi càchí-dé sá Dèhe Yá Ndiõxí cuú-dè —càchí-güedé xáhaⁿ-güedě xii-dé.

8 Te sá dúcáⁿ ní xáhaⁿ-güedé xii té Pilatú, te vaa-gá ní yúhú-dé. 9 Núu cuándihu tucu-dé vechiúⁿ-dé, te ní xáhaⁿ tucu-dé xii Jèsús:

—¿Te yohó ndeé tée cùu-n-í? —cachí-dé xáhaⁿ-dè xii-gá.

Dico Jèsús ñà túú ní cáháⁿ-gá.

10 Núu ní xáhaⁿ tẽ Pilatú xii-gá:

—¿Te vá càchí tñuhu-n núu ndeé tée cùu-n-u? ¿Náa ñà túú xiní-n sã yúhú táxí tñuní-í, te cuu-ni tauchiúⁿ-í cata caa ñaha-güedé xii-n núú cùrúxí cuú-n, te cuu-ni dácácu ñaha-í xii-n-ă? —càchí-dé xáhaⁿ-dè xii-gá.

11 Te ní xáhaⁿ Jèsús:

—Yohó ñà túú sã táxí tñuní ñáhá-n xii yúhú ní cùu núu ñà túú Yá Ndiõxí ní cuiní-gá sá dúcáⁿ cunduú, te tée ní taxi cuendá ñáhá xii-í núú-n tée-áⁿ ío-gá ndécuechi-dé dácúúxí yohó —càchí-gá xáhaⁿ-gă xii-dé.

12 Te òré-áⁿ nǐ ngúíta té Pilatú ndúcú-dě nàcuáa cada-dé dácácu-dé Jèsús ní cùu, dico cue tée isràél ní ngúíta-güedé ní cuáá-güedé, te xǎhaⁿ-güedé:

—Te núu na dácácu-n tǎe-áⁿ, te ñá díú tǎe tnàhá tnúhu ndihí té Cèsár cùú-n. Chi nděda-ni cǎa tée na cǎchí sá cùú-dě tée yìndaha ñaha xii ñáyíu cùu úhú iní-dé té Cèsár. Te té Jèsús-áⁿ cǎchí-dé sá táxí tnùní-dé —cǎchí-güedé xǎhaⁿ-güedé xii-dé.

13 Te sá dúcáⁿ ní xǎhaⁿ-güedé xii té Pilatú núu ní quee-dé ndihí Jèsús cuáháⁿ ndihí ñaha-dě corrèdór núú nǐ quee mee-ni yúú váha núú ñúhú, te xiáⁿ nání-xí Gǎbatá tnúhu hǎebreú. Te xiáⁿ ndécú xilé sácóo nchihí té Pilatú xèhndé-dé cuéchi ñáyíu, núu ní nucóo-dé núú xilé-dé òré ní quexìo-dé ndihí Jèsús. 14 Te cùu-xi datná cuádava nduu, nduu víspré vico pàscuá. Te ní xǎhaⁿ tǎ Pilatú xii ñáyíu isràél:

—¡Nái tée yìndaha ñaha xii-ndo-a! —cachí-dé xǎhaⁿ-dǎ xii-yu.

15 Te ní cuáá-yu, te xǎhǎⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —cǎchí-yu xǎhǎⁿ-yu.

Te ní xǎhaⁿ tǎ Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xǎhaⁿ-dǎ xii-yu.

Te cue dútú cúnùu ní xǎhaⁿ-güedé:

—Nchúhú ñá túú-gǎ tée yìndaha ñaha xii-ndí, chi ñndi-ni té Cèsár yìndaha

ñaha-dé xii-ndí —cǎchí-güedé xǎhaⁿ-güedé xii-dé.

16 Te té Pilatú ní xǎhaⁿ-dǎ ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núú cùrúxí.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gǎ cùrúxí cuáháⁿ ñn xichi núú nání Yìquì Díquì Ndíyí. Te tnúhu hǎebreú quee-xí Gǎlgotá. 18 Te yàcáⁿ ní sata caa ñaha-güedé xii-gá núú cùrúxí-áⁿ. Te xio xio dǎñi-gá ní sata caa-güedé úú cue tée ndècu ndisa cuéchi-xí dǎu-ni núú cùrúxí tucu. 19 Te ní táúchíúⁿ tǎ Pilatú ní taxi ndecu-güedé ñn sá ndéé lètrá núú cùrúxí tá cǎa-gá, te duha cǎchí lètrá-áⁿ: “Jèsús tée ñuú Nazàrét, tée yìndaha ñaha xii ñáyíu isràél”, duha cǎchí-xi. 20 Te vǎi ñáyíu isràél ní xiní-yu nàcuáa cǎháⁿ lètrá-áⁿ, chi yatni-ni yuhu ñuú ní sata caa ñaha-güedé xii-gá núú cùrúxí. Te lètrá-áⁿ cǎháⁿ-xi tnúhu hǎebreú, te cǎháⁿ-xi tnúhu grìégú, te cǎháⁿ-xi tnúhu làtín. 21 Te ní xǎhaⁿ cué dútú cúnùu xii té Pilatú:

—Vá táúchìuⁿ-n tee-güedé lètrá cǎháⁿ-xi “Tée yìndaha ñaha xii ñáyíu isràél” ní cùu, váha-gá tauchìuⁿ-n tee-güedé lètrá cǎháⁿ-xi “Tée cǎchí yìndaha ñaha xii ñáyíu isràél ní cùu” —cachí-güedé xǎhaⁿ-güedé xii-dé.

22 Te ní xǎhaⁿ tǎ Pilatú:

—Nàcuáa ní táúchiùⁿ-í ní tee-güedé te ducaⁿ quèndóo-xi —càchí-dé xáhaⁿ-dë xii-güedé.

²³ Te sátá nǐ sata caa ñaha cuè sandadú xii Jèsús núú cùrúxí, te cúmí xichi ní quide-güedé dóó-gă, te ìⁿ ìⁿ xichi dóó-gă ní cáhñu cue sandadú-áⁿ. Te ndècu ìⁿ dóó-gă dóó cání ñà túú ní tícu. ²⁴ Te cuèndá dóó-áⁿ nǐ xítñaha cue sandadú-áⁿ:

—Vá ndátá-ó dǒo-a, váha-gă nǔu na còto ndéé-ó cuèndá quiní-ó ndèdacàa-o cuu cuèndá-ó —càchí-güedé xítñaha-güedé.

Te ducaⁿ nǐ quide-güedé chi ní quee ndáá-xi nàcuáa càháⁿ-xi núú tütú Yă Ndiöxí núú càchí-xi: “Títí xichi ní cáhñu-güedé dóó-í. Te ní xito ndéé-güedé cuèndá cutnùní iní-güedé ndèdacàa-güedé níhí-güedé dóó-í”, duha càchí-xi núú tütú-gă. Te sá dúcáⁿ càháⁿ-xi núú tütú Yă Ndiöxí nǔu xíáⁿ ducaⁿ nǐ quide cue sandadú-áⁿ.

²⁵ Te yatni òñi curúxí núú tácaà Jesús nútnǐ ñaná-gă, ndihi cùhú-xi, ndihi tá Màriá ñadìhí té Clèofás, ndihi tá Màriá Magdalèná. ²⁶ Te ní xiní Jèsús ñaná-gă nútnǐ-aⁿ òñi ìⁿ téé ní xica cuu ndihi-gă, téé ío cùu iní-gă, te ní xáhaⁿ-gă xii ñaná-gă:

—Náá, téé nùtnǐ-áⁿ nduu-dé dàtná déhe mee-n —càchí-gă xáhaⁿ-gă xii-aⁿ.

²⁷ Te ní xáhaⁿ-gă xii téé ní xica cuu ndihi-gă-áⁿ:

—Ñaha-áⁿ nduu-aⁿ dàtná ñaná méé-n —càchí-gă xáhaⁿ-gă xii-dé.

Núu ndéé dàvá-áⁿ nǐ nduu ñaná ñáhá tèe-áⁿ xii ñaná-gă.

Ní xihí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá nǐ ndihi chiùⁿ ní táhú Tătá-gă Dútú Ndiöxí ní quide-gă nǔu ní cachí-gă:

—Yíchí-í ndute —càchí-gă.

Te duha ní cáháⁿ-gă chi ní quee ndáá-xi nàcuáa càháⁿ-xi núú tütú Yă Ndiöxí.

²⁹ Te ndècu ìⁿ lítu ñùhu ndudí íá. Te sá dúcáⁿ ní cáháⁿ-gă sá yíchí-gă ndute, núu xíáⁿ ní queheⁿ-güedé cáchí te ní chindóyo-güedé xítí ndudí íá-áⁿ, te ní chinenu-güedé díquí ìⁿ dité yutnu nàni hisópó, te ní ndocani-güedé ní chihi-güedé yuhu-gă. ³⁰ Te sátá nǐ xihí-gă ndudí íá-áⁿ, te càchí-gă:

—Vitna ní dáxínu cava-í nchaa chiùⁿ ní cachí Tătá-í cada-í —duha ní cachí-gă.

Te ní xócuíta dúcúⁿ-gă ndàa núú-gă, te ní xihí-ni-gă.

Ìⁿ sandadú ní caáⁿ-dé yiquí naha Jèsús ndihi ìⁿ pùyá yihí caá núú-xi

³¹ Te cuèndá sá nduu vispré vico pàscuá cúú-xí nǔu ñá ní cuíⁿ cue téé isràel cun-decu-ní yiquí cùñú-gă núú cùrúxí ndihi yiquí cùñú cue téé ní sata caa-güedé òñi-gă, chi cuèndá nduu tnéé-áⁿ cúú-xí nduu ndetatú ñáyiú, te ío quide cahnú-yu nduu-áⁿ, núu ní xáhaⁿ-güedé xii té Pilatú sá táúchiùⁿ-dé quíhíⁿ cue téé cahnú-güedé díhíⁿ Jèsús ndihi díhíⁿ cue téé tàcaa

ndihi-gá, te xocàni-güedé yiqui cùñú-gá ndihi yiqui cùñú-güedé yàcáⁿ. ³² Te sáta dúcáⁿ te ní sáháⁿ cue sandàdú ní sáhnú-güedé díhiⁿ cue téé tàcaa xio xio diñi Jesús. ³³ Te òré ní cuyatni-güedé núú-gã, te ní xiní-güedé sá sã ní xihí-gá nõu ñá ní sáhnú-güedé díhiⁿ-gá.

³⁴ Dico ìⁿ sandàdú-áⁿ ñi cúxi-dé pùyá néhé-dé ìⁿ xio yiqui naha-gã, te yìhi caá núú-xi núu ní caáⁿ-xi yiqui naha-gã ní quee ñíñi ndihi ndute cuí. ³⁵ Te yúhú té Juáá téé ní cadúha tutú-a ní xiní-í nàcuáa ní cuu ní xihí Jesús, te xíãⁿ nõu càháⁿ ndáá-í cuendá quíndáá iní-ndó. ³⁶ Te ducaⁿ ñi cuu ñá ní sáhnú-güedé díhiⁿ Jesús, chi ní quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Vá càhnú-güedé ñi ìⁿ yiqui-gá”, duha càchí-xi. ³⁷ Te ducaⁿ ñi quide-güedé Jesús ní caáⁿ-güedé yiqui naha-gã, chi ingá xichi núú tütú Yã Ndiõxí càchí-xi: “Sáá nduu te quiní-güedé ìⁿ téé ní dánícuèhé-güedé”, duha càchí-xi.

Chindúxi-güedé Jesús

(Mt. 27:57-61; Mr. 15:42-47; Lc. 23:50-56)

³⁸ Te sáta dúcáⁿ ñi cuu, te té Chèé téé ñúú Arimàtea tnahá-dé ní sándáá iní-dé tñúhu Jesús dico dayuhu, chi ní xóo yúhú-dé cue téé cùnnoo núú ñãyiu isràél. Te téé-áⁿ ñi xáhaⁿ-dë xii té Pilatú nõu vá dáñá-dë canehe-dé yiqui cùñú Jesús quíhíⁿ chindúxi-dé, te té Pilatú

ní xáhaⁿ-dë xii-dé sá cúú cànehe-dé yiqui cùñú Jesús quíhíⁿ, núu ní sáháⁿ-dé ní nuu nehe-dé yiqui cùñú-gá núú cùrúxí nchídó-dë cuáháⁿ. ³⁹ Te té Nicòdemú téé ní sáháⁿ niú ní cáháⁿ ndihi-dé Jesús ndéé díhna, téé-áⁿ néhé-dé ócó úxí kílú yuchi ní cuáha mee-ni yúcú sã nání mirrá ndihi yúcú sã nání ãloés. Te ío váha tñami saháⁿ. ⁴⁰ Te ní naníhi tñahá-dé ndihi té Chèé, te ní chidúcúⁿ nuu-güedé yiqui cùñú Jesús mee-ni dõó vãha, te nàcuáa ta dùcuⁿ nuu-güedé yiqui cùñú-gá dóó-ãⁿ, te ducaⁿ ta chido-güedé yuchi sáháⁿ tñamí-ãⁿ núú dõó-ãⁿ chi ducaⁿ tñahí quide ñãyiu isràél òré chíndúxi tñahá-yu. ⁴¹ Te yatni núú ñi sata caa-güedé Jesús caá ìⁿ lahuertá. Te xití lahuertá-áⁿ nchìi ìⁿ yaú cava duha cuáháⁿ ndáá-xi, te vátá yõo ìⁿ-gá nguíndúxi xíaⁿ. ⁴² Te cuendá sá ñi cuyatni tnahá nduu ndètátú ñãyiu isràél nõu xíãⁿ yaú cava nchìi yatni-ni xíaⁿ ñi chihi-güedé yiqui cùñú Jesús.

20

Jesús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núú ñi chihi-güedé yiqui cùñú Jesús, te ní sáá-xi ní xiní-xi sá ñã túú-gã ndédi yúú yèhe yaú-áⁿ. ² Núu xinu-xi cuánuhú núú ndécú té Xímú, àdi Pelú chi úú diu-dé, ndihi ingá téé ní xica

cuu ndihi-gá téé ío cùu iní-gá, te ní xáhaⁿ-xi xì-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndèé ní taxi ndecu-güedé — cächí-xi xáhaⁿ-xi xì-güedé.

³ Te ní quee té Pèlú ndihi ingá téé-áⁿ cuáháⁿ ndéhé-güedé yaú núú nǐ chihi-güedé yiqui cùñú-gá.

⁴ Te ndúú-güedé xínú-güedé cuáháⁿ ní cùu, dico ingá téé-áⁿ nǐ cuu níhi-gá sáhá-dé cuáháⁿ-dé nǔu díhna-gá-dé ní sáá-dé yuhu yaú núú nǐ chihi-güedé yiqui cùñú Jèsús ní cùu. ⁵ Te ní ngáundeyi-dé xító nihni-dé xití yaú-áⁿ, te ní xiní-dé mee-nǎ dóo vǎha sá nǐ xíducúⁿ nuu-gá yúcú, dico ñá ní quǐhu-dé.

⁶ Te sátá nǐ sáá té Pèlú te cuánguihu-dé xití yaú-áⁿ, núu tnàhá-dé ní xiní-dé nchaa dóo nǐ xíducúⁿ nuu-gá yúcú-áⁿ.

⁷ Te ní xiní-dé sá dóo nǐ xíndútú díquí-gǎ ñá túú càtuu jundú-xi ndihi dóo nǐ xíducúⁿ nuu-gá chi ní nadúcúⁿ nuu-ná càtùu ñⁿ xio. ⁸ Te nchícúⁿ tucu téé ní sáá díhna-gá-áⁿ cuánguihu xití yaú-áⁿ, te ní xiní-dé sá dóo-nǎ yúcú, te ñá túú-gǎ yiqui cùñú Jèsús nǔu ní sándáá iní-dé sá nǐ ndoto-gá.

⁹ Chi vátá tècú tnùnì-gá-güedé nàcuáa càháⁿ-xi núú tütú Yǎ Ndióxí núú cächí-xi sá Jèsús ndoto-gá. ¹⁰ Te ní xícó ndì ndúú cue téé ní sángoto yaú núú nǐ chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnàhá-gǎ

ndihi tá Màriá Magdalèná
(Mr. 16:9-11)

¹¹ Te ní sáá tucu tá Màriá yuhu yaú núú nǐ chihi-güedé yiqui cùñú Jèsús te ní ngúíta-xi ndàhyú-xi, te ní ngáundeyi-xi xìto nihni-xi xití yaú-áⁿ. ¹² Te xití yaú-áⁿ nǐ xiní-xi úú espíritú xínú cuèchi núú Yǎ Ndióxí xǐxíhnu-xi mee-ni dóo cuixíⁿ xǐndecu-xi núú nǐ cáa yiqui cùñú-gá. Te ñⁿ-xi núcóo núú nǐ cáa díquí-gǎ, te ñⁿ-xi núcóo núú nǐ cáa sáhá-gǎ. ¹³ Te espíritú-áⁿ nǐ xáhaⁿ-xi xì tá Màriá:

—¿Ná cuendá ndàhyú-n? — cächí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaá cúú Xìtohó-í cuáháⁿ, te ñá túú xiní-í ndèé ní taxi ndecu-güedé — cächí-xi xáhaⁿ-xi xì cue espíritú-áⁿ.

¹⁴ Te tnúhu-ni-áⁿ nǐ cáháⁿ-xi te ní nchócótó-xi ñⁿ xio, te ní xiní-xi Jèsús núnñi-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gǎ xáhaⁿ-gǎ xii-xi.

Te mee-xi nǐ sani iní-xi sá tèe xìto lahuertá-áⁿ cúú tèe-áⁿ, núu ní xáhaⁿ-xi:

—Tǎta, te núu yòhó néhé-n yiqui cuñú Jèsús cuáháⁿ, te cáháⁿ-n ndèé ní taxi ndecu-n chí cuendá naqueheⁿ-í canehe-í núhú —cächí-xi xáhaⁿ-xi.

¹⁶ Te ní cáháⁿ díú ñàhá-gá xii-xi, te xáhaⁿ-gǎ:

—¡Màriá! —cächí-gǎ xáhaⁿ-gǎ xii-xi.

Te ní ndacoto-xi núú-gǎ, te ní cáháⁿ-xi tnúhu hëbreú, te xǎhaⁿ-xi:

—¡Rabòní! —càchí-xi xǎhaⁿ-xi. Te tnúhu-án quée-xí Mèstrú.

¹⁷ Te ní xáhaⁿ Jèsús:

—Daña vá ngání ñaha-n chi vátá ndáá-gǎ-í núú ndécú Tàtá-í. Te núhú-n cùñaha-n xii cue téé ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiöxí, te diu-gá cúú Tàtá-ndó nchaa-ndo, te diu-ni-gá cúú Ndiöxí-ndó —càchí-gá xáhaⁿ-gǎ xii-xi.

¹⁸ Te ní natnii tá Màriá Magdalená ichi cuánuhú-xi cùñaha-xi xii cue téé ní xica cuu ndihí-gá sá nǐ xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gǎ xii-xi.

Ní quexìo Jesús núú xĩndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

¹⁹ Te diu-ni ndumìngú sandiquíⁿ ní natacá cue téé ní xica cuu ndihí-gá, te xĩndedí nihnu-güedé vehe sá xiyùhú-güedé cue téé cùnuu núú ñáyiú isràél. Te ní quíhu Jèsús ndéé tnuú-güedé ní ngúnutnii-gá, te ní xáhaⁿ-gǎ:

—Yá Ndiöxí chĩndèe ñaha-gá xii-ndo ío váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁰ Te ní dánèhé ñáhá-gǎ ndaha-gá ndihí yiquí naha-gǎ xii-güedé. Te ío ní cudíí iní-güedé sá díú ndisa-gá ní xiní ñáhá-güedé. ²¹ Te ní xáhaⁿ tucu Jesús xii-güedé:

—Yá Ndiöxí chĩndèe ñaha-gá xii-ndo ío váha cùu iní-ndó ndècu-ndo. Te dàtná ní tendaha ñaha Tàtá-í Dútú Ndiöxí xii-í véxi-í ñuyíú-a, te ducaⁿ tëndaha ñaha-í xii-ndo quíhíⁿ-ndó cáháⁿ-ndó tnúhu-í núú ñáyiú —càchí-gá xáhaⁿ-gǎ xii-güedé.

²² Te ní chiyóco-gǎ núú-güedé, te ní xáhaⁿ-gǎ:

—Chí ndúú tàhú Espíritú Yá Ndiöxí cundecu ndihí-ndo. ²³ Te nchaa ñáyiú na quĩndáa iní-xi tnúhu-í te cùñaha-ndo xii-yu sá nǐ quide càhnu iní Yá Ndiöxí nchaa cuéchi-yu. Te nchaa ñáyiú vá quĩndáa iní tnúhu-í te cùñaha-ndo xii-yu sá vǎ cadá càhnu iní-gá cuéchi-yu —càchí-gá xáhaⁿ-gǎ xii-güedé.

Té Mǎxí càháⁿ ndihí-dé Jèsús

²⁴ Te núú ùxúú cue téé ní xica cuu ndihí-gá, te ìⁿ-dé nání-dě Mǎxí téé ní xóo danani-güedé Cuáchí, te téé-án ñà túú-dě ndécú ndihí-güedé òré ní sáháⁿ Jèsús. ²⁵ Te dava-gá cue téé ní xica cuu ndihí-gá ní xáhaⁿ-güedé xii-dé:

—Ní xiní-ndí Jèsús —càchí-güedé xáhaⁿ-güedé.

Te ní xáhaⁿ tè Mǎxí:

—Te vá quĩndáa iní-í, chi ndéé quĩní-í ndaha-gá núú nǐ quée nduyú, te dàquíhu-í díquí ndáhà-í núú nǐ caáⁿ nduyú-án, te dàquíhu ndàha-í yiquí naha-gǎ núú nǐ caáⁿ, ducaⁿ te quĩndáa iní-í —càchí-dé xáhaⁿ-dě xii-güedé.

²⁶ Te núú ùná tucu nduu ní natacá tucu cue téé ní xica cuu ndihí Jèsús ìⁿ vehe, te

nduu-ǎⁿ tnàhá té Mǎxí ndécú ndìhi-güedé. Te cuèi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiöxí chindèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

27 Te ní xáhaⁿ-gǎ xii té Mǎxí:

—Cundehe ndàha-í te dàquíhu-n dĩquí ndáhá-n núú nǐ quée nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ñⁿ cani úú iní-n —càchí-gá xáhaⁿ-gǎ xii-dé.

28 Te ní xáhaⁿ tǎ Mǎxí xii-gá:

—ÿYòhó cúú-n Xítohó-í! ÿYòhó cúú-n Ndiöxí-í! —càchí-dé xáhaⁿ-dǎ xii-gá.

29 Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gǎ iní nchaa ñáyiú ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tñúhu yòdo tñuní núú tütú-a

30 Te vǎi-gá sá vǎ yõo tnàhí ndàcu cada ñá túú yòdo tñuní núú tütú-a ní quide Jèsús núú cuè téé ní xica cuu ndìhi-gá. 31 Dico dava-gá ní ngódó tñuní núú tütú-a cuèndá sá quíndáá iní-ndó sǎ Jèsús cúú-gǎ Crístú Déhe Dútú Ndiöxí, te naníhí tǎhú-ndó te núu na quíndáá iní-ndó-gǎ.

21

Úsá cue téé ní xica cuu ndìhi Jèsús ní xiní ñáhá-güedé xii-gá

1 Te ingá nduu tucu xíndecu cue téé ní xica cuu ndìhi Jèsús yuhu làgúná ñuú Tiberiás, te ní sáháⁿ-gá núú xíndecu-güedé-áⁿ. Te duha ní cuu ní xiní ñáhá-güedé xii-gá. 2 Te ndècu té Xímú, àdi Pelú chi úú diu-dé, ndìhi té Mǎxí téé ní xóo cúñaha-güedé Cuáchí, ndìhi té Natanàél téé ñuú Cànaá, te ñuú-áⁿ yíndèhu-xi distritú Galileá, te tnàhá ndi nduú déhe té Zebèdeú, ndìhi úú-gá tucu cue téé ní xica cuu ndìhi-gá. 3 Te ní xáhaⁿ tǎ Pelú xii-güedé:

—Quíhíⁿ-í quítníⁿ-í chácá —càchí-dé xáhaⁿ-dǎ xii-güedé.

Te ní xáhaⁿ-güedé:

—Tnàhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xití bàrcú-áⁿ cuáháⁿ-güedé. Te niú-áⁿ ñǎ ní nǐhí tnàhí-güedé chácá. 4 Te sa ta cùditó-ñǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gǎ.

5 Te ní xáhaⁿ-gǎ xii-güedé:

—Cue téé cuechi, ÿní níhí-ndó chácá caxi-o ñǎ? —càchí-gá xáhaⁿ-gǎ xii-güedé.

Te ní xáhaⁿ-güedé:

—Védana chácá ñà túú ní nǐhí-ndí —càchí-güedé xáhaⁿ-güedé xii-gá.

6 Te ní xáhaⁿ Jèsús:

—Chí dáquèe ñunu-ndo ndàa xio cuha barcú

chi níhí-ndó-dí —càchí-gá xáhaⁿ-gã xii-güedé.

Te ducaⁿ nĩ quide-güedé, te òré nátava-güedé ñunu xití ndute, te ñá cündèe-gá-güedé natava-güedé cuendá sá nĩ chítú chăcá xití-xi. ⁷ Te tée ní xica cuu ndihi-gá tée ío cùu iní-gá ní xáhaⁿ-dë xii té Pèlú:

—¡Diu Xítoho Jesucristú! —
càchí-dé xáhaⁿ-dë xii-dé.

Te sá nĩ tecú dóho té Pèlú sá dúcáⁿ càháⁿ-dé nũu ní ndiúnuu-dé dóó-dë, chi dóó sã yímàa-ni-dé níhnú-dë ní cùu. Ducaⁿ te ní nuu ndava-dé bàrcú ní ngauni-hnu-dé ndute, te cuáháⁿ-dé núú ndute-áⁿ nĩ quene-dé ndéé ñuhu yìchí. ⁸ Te dava-gá cue tée ndihi té Pèlú diu-ni cue tée ní xica cuu ndihi Jèsús ní quendóo-güedé dàtná ìⁿ ciendú-gá mèstrú te quene-güedé yuhu ndute. Te tañuhu-ni-güedé ñunu-güedé chitu chăcá nĩ quene-güedé ndéé yuhu ndute. ⁹ Te òré ní quene-güedé ñuhu yìchí, te ní xiní-güedé càyú ñuhú, te núú ñùhú-áⁿ ñùhú ìⁿ chăcá ndihi ìⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ìⁿ úú chăcá quití íchí nĩ tñi-ndo —
càchí-gá xáhaⁿ-gã xii-güedé.

¹¹ Núú té Pèlú ní sáháⁿ-dé núú ndécú bàrcú, te ní quée-dé xití-xi ní cändeé-dé ñunu ñuhu chăcá táñuhu-dé ní quene ndéé ñuhu yìchí, te chitu chăcá náhnú, te ñuhu ìⁿ ciendú údico úxí úní-dí xití ñunu-áⁿ, te cuèi ducaⁿ vâi-dí ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó —
càchí-gá xáhaⁿ-gã xii-güedé.

Dico ní ìⁿ cue tée ní xica cuu ndihi-gá-áⁿ ñă ní xicáⁿ tnúhú-güedé núú-gã nũu yoo cùu-gá, chi sa ní cutnùní iní-güedé sá díú Jèsús cúú-gã. ¹³ Te Jèsús ní sáháⁿ-gá ní queheⁿ-gá pàá ní sãñaha-gã xii-güedé caxi-güedé, te dàtnùní ní queheⁿ tucu-gá chăcá nĩ sãñaha-gã xii-güedé.

¹⁴ Vitna cùu úní xito sá xiní ñáhá cue tée ní xica cuu ndihi-gá sátá nĩ ndoto-gá.

Jèsús càháⁿ ndihi-gá té Pèlú

¹⁵ Te sátá nĩ túhú cóhó-güedé ní sadí iní-güedé te ní xicáⁿ tnúhú Jèsús núú tẽ Xímú, àdi Pelú chi úú diu-dé, te xáhaⁿ-gã:

—Xímú, déhe té Jònás, ¿cùu iní-gá-n yùhú dàcúúxí dàva-gá cue tée-a ñă? —
càchí-gá xáhaⁿ-gã xii-dé.

Te ní xáhaⁿ tẽ Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dë xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé líhli-í —càchí-gá xáhaⁿ-gã xii-dé.

Te cue mbéé-áⁿ cúú-güedí ñáyiú cùu cuendá-gá.

¹⁶ Te ní xáhaⁿ tùcu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáhaⁿ-gã xii-dé.

Te ní xáhaⁿ tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dë xii-gá.

Te ní xáhaⁿ-gã:

—Te núu ducaⁿ, te coto-n cuè mbéè-í —càchí-gá xáhaⁿ-gã xii-dé.

17 Te xito cùu uní ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhá-n-ã? —càchí-gá xáhaⁿ-gã xii-dé.

Te té Pèlú ío ní cundìyí-dé sá dúcáⁿ nǐ cuu úní xito xicáⁿ tnúhú-gã núú-dě núu ndisa sá cúu iní ñáhá-dě xii-gá, te ní xáhaⁿ-dě:

—Mèstrú, yòhó nchaa sa xiní-n, te sa cùtnumí iní-n sá cúu iní ñáhá-í xii-n —càchí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í. 18 Te na càchí tnúhu ndáá-í xii-n sá cùtnhá cuechí-gã-n nǐ xóo ndécuihnu mee-n dǒo-n, te ní xóo quíhíⁿ-n ndèni ní xóo cachí iní-n, dico na yìi-n te dacàá-n ndàha-n, te ìngá tée dacuihnu ñaha xii-n dóo-n te cada yica-dě candeca ñaha-dě xii-n quíhíⁿ ìⁿ núú ñà túú tnàhá iní-n —càchí-gá xáhaⁿ-gã xii-dé.

19 Te sá dúcáⁿ nǐ cáháⁿ Jèsús cúu-xí sá nǐ dátècú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yá Ndiǒxí, te ní xáhaⁿ-gã xii-dé:

—¿Canchicúⁿ ñáhá-n xii-í! —càchí-gá xáhaⁿ-gã xii-dé.

Tée ío cùu iní-gá

20 Te ní nchócótó tǎ Pèlú ndàa sátá-dě, te ní xiní-dé sá nchicúⁿ ñáhá ìngá tée xica cuu ndihí-gá cuáháⁿ, tée ío cùu iní-gá tée ní xínucóo dìñi-gá òré ní cudini ndihí ñaha-gá

xii-güedé, te diu-ni téé-áⁿ nǐ xicáⁿ tnúhú-dě núú-gã dàvá-áⁿ núu ndèda càa tée cuáha cuèndá ñáhá xii-gá núu cuè tée cùu úhú iní ñáhá. 21 Te òré ní xiní té Pèlú sá nchicúⁿ ñáhá téé-áⁿ, te ní xicáⁿ tnúhú-dě núú Jèsús, te xáhaⁿ-dě:

—Mèstrú, te téé-ãⁿ, ¿ná cúu sá yáha-dé-í? —càchí-dé xáhaⁿ-dě xii-gá.

22 Te ní xáhaⁿ Jèsús:

—Te núu yúhú cuiní-í sá cùndècu-ni-dé ndéé ná quixi tucu-í ñuyíú-a, ¿te yòhó ná cuèndá-n núu xicáⁿ tnúhú-n? Yòhó canchicúⁿ ñáhá-ní xii-í —càchí-gá xáhaⁿ-gã xii-dé.

23 Te ní xinu tnúhu núu nchàa ñáyiú sàndáá iní tnúhu-gá sá tǎe-ãⁿ vǎ cùú-dé. Dico Jèsús ñá túú dùcaⁿ ní xáhaⁿ-gã sá vǎ cùú-dé, chi ní xáhaⁿ-gã: “Núu yúhú cuiní-í sá tǎe-ãⁿ cundecu-ni-dé ndéé ná quixi tucu-í ñuyíú-a, ¿te yòhó ná cuèndá-n?” duha ní xáhaⁿ-gã xii té Pèlú.

24 Te diu-ni yúhú té Juáá téé ní sani iní-yu sá vǎ cùú càháⁿ ndáá-í nchaa nàcuáa ní cuu, te ducaⁿ nǐ tee-í núú tütú-a, te cùtnumí iní-ndó sá tnúhu ndáá cúu-xí.

25 Te ndècu vai-gá núú sá nǐ quide Jèsús. Te núu dicó ní ngündee nchaandi túhú ñá, te vǎa ni te nǐhí ñuyíú te vǎ tnàhá núú-xi cundecu lìbrú, te núu dicó ní ngündee nchaa. Te ducaⁿ na cùnduu. Te ío chí cádá ndèe iní-nǎ vitna.

**NCHAA NÀCUÁA
NÍ QUIDE CUE
TÉE NÍ TÁÚCHÍÚⁿ
JÈSÚS DACUÀHA
ÑAHA XII ÑÁYIU
TNÚHU-GÁ**

Jèsús ní cachí tnúhu ndáá-gá sá quíxí Espíritú Yă Ndiôxí cundecu ndihi ñáyiu

¹ Te duha ní cáháⁿ té Lùcá ní xii-dé té Tëofilú: Yúhú sa ní chídó tnùní-í núú librú ndéé díhna nchaa sá ní quide Jèsús, ndihi nchaa sá ní dácúáhá-gă ñáyiu. Te ní chídó tnùní-í nchaa sá ní quide-gá ndéé nduu ní quesaha-gă quidé chiuⁿ-gá, ² ndihi nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue téé ní cáháⁿ-gá dacuàha ñaha xii ñáyiu tnúhu-gá, te mee Espíritú Yă Ndiôxí ní chindee ñaha-xi xii-gá ní xáhaⁿ-gă nàcuáa cada-güedé. ³ Te sátá ní xihí-gá te ní ndoto-gá, te ní xindecu-gá údico nduu. Te titní xito ní sáháⁿ-gá núú ní xindecu-güedé, te ducaⁿ ní quide-gá cuendá quini-güedé sá ndáá ní ndoto-gá, te ní xáhaⁿ-gă nàcuáa quide Yă Ndiôxí ndihu ndaha-gă ñáyiu.

⁴ Te ñⁿ nduu ndécu ndihi ñaha-gá xii-güedé, te ní xáhaⁿ-gă:

—Vá queé-ní-ndó ñúú Jerusálén, chi cundetu-ndo

quixi Espíritú Yă Ndiôxí cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tátá-ó Dütú Ndiôxí Yaá ndécú andiu nacuáa cunduu. ⁵ Te ndáá sá ndii Juàá ní dácúándüte ñaha ndii xii-ndo, dico vitna ñá túú-gă cuéhé nduu, te quexio Espíritú Yă Ndiôxí cundecu ndihi-ndo — cächí-gá xáhaⁿ-gă xii-güedé.

Jèsús cuándaa-gá andiu

⁶ Te òré ní xindecu-güedé ndihi Jèsús, te ní xáhaⁿ-güedé xii-gá:

—Mèstrú, cuini-ndí cachí tnúhu-n núu sa ta cùyatni nduu chindee-n ñáyiu ñúú Isràél cuendá taxi tnùní tucú-yu ñúú-yu —cächí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xìni ñuhu-xi cunaha nchohó xíⁿ, chi Tátá-ó Dütú Ndiôxí náhá-gă ná nduu cada-gá nchaa sá ní cáháⁿ-gá. ⁸ Te òré quexio Espíritú Yă Ndiôxí cundecu ndihi-ndo, te cuyii-ndo ní yuhu ní iní-ndó quihíⁿ-ndó cáháⁿ-ndó tnúhu-í núú ñáyiu ñúú Jerusálén ndihi núú ñáyiu distritú Jüdeá ndihi núú ñáyiu distritú Sàmariá. Te ducaⁿ-ni cáháⁿ-ndó quihíⁿ-ndó ní caxico ñuyú —cächí-gá xáhaⁿ-gă xii-güedé.

⁹ Te sátá dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuándihu-gá xití vícò, te ñá túú-gă ní xìní náhá-güedé xii-gá. ¹⁰ Te ndèhe vihi-güedé andiu núú ndéé quini ñáhá-güedé xii-gá yòtnúhu, te ní quexio cunu úú

cue tée ñihnu dóo cuixíⁿ núú ndécú-güedé. ¹¹ Te xáhaⁿ-güedé:

—Nchòhó cue tée Galileá, ñná cuendá ndéhé-ndó àndiu? Te dàtná-ni càa Jesús cuándaa-gá andiu vitna, te ducaⁿ-ni cùnduu-gá quixi tucu-gá —càchí cue tée ñihnu dóo cuixíⁿ-án xáhaⁿ-güedé.

Cuendá sá ñà túú-gã ndíi Jùdás ñúu ní nanducu-güedé té Màtiá ní nucúnutnî-dé núú ndíi

¹² Te ní ndee-güedé yucu Òlívú cuánuhú-güedé ñúú Jerusalén, te ní xúhuⁿ-güedé cuèdicó cuádava òré ichi. ¹³ Te òré ní ndexio-güedé ñúú-án, te cuándaa-güedé cuàrtú ndée núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juàá, té Ndríxí, té Lìpé, té Mǎxí, té Bartolòmé, té Mâteú, té Jàcobó déhe té Àlfeú, ndihi té Xímú tée ní cundihí cue tée canànistá, ndihi té Jùdás ñaní té Jàcobó. ¹⁴ Te ní naníhí tnáhá-güedé nchaa-güedé yàcáⁿ ndihi tá Màriá nǎná Jesús, ndihi cue ñaní-gá ndihi dava-gá cue ñáyiu ñíhí. Te ñⁿ-ni ní cuú-yu ní cáháⁿ ndihí-yu Yá Ndiòxí.

¹⁵ Te ñⁿ nduu ní xíndecu dàtná ñⁿ cièndú ócò mee-ñi ñáyiu sàndáá iní tnúhu Jesús, te ní ngúnutnîi té Pèlú núú-yu, te ní xáhaⁿ-dè xií-yu:

16-17 —Nchòhó cue ñáyiu ndècu ndihí-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndíi Dàvíí tée ní xíndecu ndée sanaha nàcuáa ní cáháⁿ Espíritú Yá Ndiòxí cuendá té

Jùdás. Te dacuitíi dùcaⁿ ní cuu, chi tnáhá té Jùdás ní xíndecu ndihí-o, te ní xinu cuechi-o ndihí-dé núú-gã sá ñíhna, te ducaⁿ ñí quide-dé ní sáha cuendá-dé Jesús núú cuè tée cùu úhú iní ñáhá xii-gá. ¹⁸ Te ní cháhu ñaha-güedé xii-dé cuendá sá ñí sáha cuendá ñáhá-dé xii-gá. Te ní sáháⁿ-dé ñⁿ xichi ní sata caa-dé méé-dé, te ní ngava-dé, te ní cahndí duuⁿ xiti-dé te xíaⁿ ñí xihí-dé. Te ní naqueheⁿ-güedé ñíhúⁿ sá ñí cháhu-güedé ndíi, te ní nacuaaⁿ-güedé ñuhu núú ñí ngava ndíi-án. ¹⁹ Te nchaa ñáyiu Jerusalén ní ñíhí-yu tnúhu, te ní dánáñi-yu ñuhu-án Acèldamá. Te tnúhu mèe-yu quèe-xi: Ñuhu núú ñí sati ñíhí. ²⁰ Te duha ní cáháⁿ ndíi Dàvíí ní chídó tnùní ndíi núú librú Sǎlmú ní dándóo ndíi: “Nà ndóo nahi vèhe-dé, vá yòo ñⁿ quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nanducu-güedé ingá tée nucúnutnîi núú ndíi”, duha ní cáháⁿ ndíi Dàvíí —càchí té Pèlú xáhaⁿ-dè xií-yu.

²¹⁻²² Te ní xáhaⁿ tucu-dé:

—Te ducaⁿ ñí cáháⁿ ndíi Dàvíí, te vitna xini ñuhu-xi nanducu-o ñⁿ tée nucúnutnîi-dé núú ndíi Jùdás, te xini ñuhu-xi ñu-ni ñⁿ tée ní xica cuu ndihí Xítóhó Jesucristú cùtnáhá ní xica cuu-o ndihí-gá, ñⁿ tée ní xiní ndée òré ní dácuándute ñaha ndíi Juàá xii-gá, te ndée òré cuándaa-gá andiu. Te tée nanducu-o cùndecu-dé cáháⁿ-dè nàcuáa ní cuu ní

ndoto-gá —càchí té Pèlú xăhaⁿ-dê xií-yu.

²³ Te ní cacunehe-güedé úú tnàhá-güedé nūu ndēdacāa-güedē nduu táhú-güedē nucúnutnī-güedē nūú ndīi. Te ìⁿ-dē nání-dē Chèé Barsábás, àdi Justú chi úú diu-dé, te ingá-dé nání-dē Mātiá. ²⁴ Te ní cáháⁿ ndihí-güedé Yă Ndiöxí, te xăhaⁿ-güedē xii-gá:

—Yòhó Dútú Ndiöxí xiní-n ìní nchaa ñáyiú, te mee-n nàha-n nūú ndēda cāa nūú úú cue téa-a tnàhá ìní-n ²⁵ cáháⁿ-güedé tnúhu-n nūú ñáyiú, te téa-áⁿ nucúnutnī-dé nūú ndīi Júdás, chi cuáháⁿ ndīi nūú ùhú nūú ndàhú nūú tàú-xi quíhíⁿ ndīi —càchí-güedé xăhaⁿ-güedē xii-gá.

²⁶ Te ní xito ndéé-güedé, te ní cutnūnī sá tēe nàni Mātiá quendóo-dé ndihí úxí ìⁿ cue téa ní táuchíúⁿ-gă dacuàha ñaha xii ñáyiú tnúhu-gá.

2

Ní quexìo Espíritú Yă Ndiöxí cundecu ndihí ñáyiú

¹ Te ní sáá nduu còo vico Pentecostés te xīndecu nchaa ñáyiú ìⁿ-ni xīchí. ² Te ní tecú dóho-yu uuⁿi ní níhi andiu, dàtná quidé ìⁿ táchí níhi vīhi ní quide-xi, te ducaⁿ nī cuu ndéé xití vehe nūú ndécū-yu nchaa-yu. ³ Te ní xiní-yu dàtná cáá itá ñuhú cáá sã ndécú xití vehe, te ní xité nuu-xi ní ngoyo ndodo-xi díquī-yu nchaa-yu. ⁴ Te ducaⁿ nī quide-xi òré ní quexìo Espíritú Yă Ndiöxí ní

ngūndecu ndihí-yu nchaa-yu. Te ní ngūita-yu ní cáháⁿ-yu tnúhu cue ñáyiú ñá túú cūu ñáyiú isràél, te nchaa xīáⁿ ní quide Espíritú Yă Ndiöxí.

⁵ Te vai ñáyiú isràél xīndecu nchaa dava-gá ñuú ní tacá-yu ñuú Jerusalén, te ñáyiú-áⁿ ïo ndūcu ndéé-yu dācuahá-yu nchaa ndudú sá dācuàha tnahí-yu. ⁶ Te òré ní tecú dóho-yu ñīhi, te ní sáháⁿ-yu ní xīndedóho-yu tnúhu càháⁿ méé-yu ìⁿ ìⁿ ñuú-yu, chi ndi dííⁿ ndi dííⁿ tnūhu càháⁿ ñáyiú ndècu-áⁿ. ⁷ Te xīáⁿ ïo ní cuñúhu ñáyiú véxi dava-gá ñuú, te ní xíttnàhá-yu:

—Ñáyiú ducaⁿ xīcáháⁿ cúú-yu ñáyiú distritú Galileá. ⁸ ¿Te nása ní quidé-yu ní cutúha-yu nācuāa càháⁿ-ó ìⁿ ìⁿ-o ndéé lihli-o? ⁹ Te iha véxi ñáyiú dava nācìóⁿ, chi véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capadociá, véxi ñáyiú Pòntó, véxi ñáyiú Àsiá, ¹⁰ véxi ñáyiú Frigiá, véxi ñáyiú Pànfilíá, véxi ñáyiú Ègíptú, véxi ñáyiú Áfricá ñáyiú ndècu ndéé nūú-gă-xi ñuú Cìrené. Te tnàhá ñáyiú ñuú Rómá véxi, te ñáyiú-áⁿ chi ñá díú mēe-ni ñáyiú isràél cúú-yu nchaa-yu, dico ìⁿ-ni cūu sá dācuahá-yu. ¹¹ Te véxi ñáyiú Crètá, véxi ñáyiú Àrabiá. Te nchaa-o sa ndèdóho-o càháⁿ-yu nācuāa cuáháⁿ tnúhu mee-o ìⁿ ìⁿ-o. Te nchaa ñáyiú xīcáháⁿ tnúhu-o càháⁿ-yu cuendá nchaa sá vă yōo tnàhí

ndàcu cada ní quide Yá Ndiöxí
—càchí-yu xìtnàhá-yu.

12 Te ní cuñúhu vîhí-yu, te
ñá ná sàá iní-yu nása ní cuu,
te xìtnàhá-yu:

—¿Nása ní cuu duha
càháⁿ-yu tnúhu-o? —càchí-yu
xìtnàhá-yu.

13 Te davá-yu ní sácú ndeé
yíchí ñáhã-yu, te xìtnàhá-yu:

—Xixíni ñáyíu-áⁿ núu ñá
nãhá-yu tnúhu càháⁿ-yu —
càchí-yu xìtnàhá-yu.

*Tnúhu ní xáhaⁿ tẽ Pèlú xii
cue ñáyíu*

14 Te ní ngúnutnîi té Pèlú
ndîhi úxí ìⁿ cue téé ní táúchíúⁿ
Jèsús dacuàha ñaha xii ñáyíu
tnúhu-gá, te níhi ní càháⁿ-dé,
te xãhaⁿ-dẽ xii-yu:

—Nchaa nchòhó ñáyíu dis-
trítú Jùdeá ndîhi nchòhó ñáyíu
ñuú Jerusálén, cundedóho
váha-ndo tnúhu na càháⁿ-í-a.

15 Ná ndàá tnúhu càháⁿ-ndó,
chi ñá túú xîni-ndí te ducaⁿ
càháⁿ-ndó, chi davitna cùu-xi
caá ìⁿ dátneé, vátá tnàhá-gá
òré coho ñáyíu ndidí. 16 Te

yúhú ná càchí tnúhu-í xii-ndo
vìtna nacuáa ní xáhaⁿ Yã
Ndiöxí xii ndíi Jòél téé ní xóo
càháⁿ tnúhu-gá ndeé sanaha
nacuáa cada ñaha-gã xii ñáyíu,
te ndíi-áⁿ nî chídó tnùní ndíi
nacuáa ní càháⁿ-gá. 17 Te duha
ní xáhaⁿ-gã xii ndíi:

Cùmání-gã sáá nduu nàa
ñuyíú, te cuãñaha-ï
Espíritú-í cundecu
ndîhi nchaa ñáyíu na
quindáa iní ñáhã xii-í.

Te cue déhe-yu càháⁿ-yu
tnúhu-í,

te cue téé cuechi dacòto núú
ñáhã-xí xii-güedé,

te ducaⁿ-ni cuè téé ni sàhnu
càháⁿ saní-güedé,

te ñíu-ni cuendá nchaa sá
quidè-í ducaⁿ dàcoto
núú ñáhã-xí xii-güedé.

18 Te nchaa ñáyíu xînu cuechi
núú-í càháⁿ-yu tnúhu-í,
te cuãñaha-ï Espíritú-í
cundecu ndîhi-yu.

19 Te ndeé andíu, yácáⁿ vâi sá
cãdã-í nacuáa cuñúhu
vîhí-yu,

te núú ñuyíú-a cada-í ìⁿ sá
vátá quini tnàhí-gã-yu,
te ngoyo níñi te ngoyo ñuhú te
quene vîhi ñúhmã.

20 Te vá dáyèhé-gá nchícanchii,
cuu nee ñuyíú te cuu ticuèhé
núú yóo dàtná ticuèhé
níñi.

Te davá-áⁿ sáá nduu quixi Yaá
cúú Xìtohó-yu,

te nduu-ãⁿ cuu-xi ìⁿ nduu
cãhnu vîhi, chi cada-gá
nchaa sá ñà túú
xîmí-yu, te cuñúhu
vîhí-yu.

21 Te òré xiáⁿ te nchaa ñáyíu
càháⁿ ndîhi ñaha xii
Yaá cúú Xìtohó-yu-áⁿ
naníhí tãhú-yu.

Duha ní xáhaⁿ Yã Ndiöxí xii
ndíi Jòél ní chídó tnùní ndíi.

22 Te nchòhó ñáyíu isrâél,
cundedóho váha-ndo tnúhu
na càháⁿ-í-a cuendá Jèsús téé
ñuú Nazàrét. Te Jèsús ní
quide-gá chiúⁿ Yá Ndiöxí, chi
mee Yã Ndiöxí ní chindee
ñàha-gá ní quide Jèsús ná
daha núú chiúⁿ, núu xiáⁿ ní
ndacu-gá ní quide-gá nchaa
sá vã yóo tnàhí ndàcu cada, te
xiáⁿ ní cuñúhu vîhi-ndo. Te sa
nãha-ndo nacuáa ní quide-gá
cútnàhá ní xica cuu-gã ñuyíú.

23 Te ndíi Jùdás ní taxi cuendá

ñáhá ndíi Jèsús xii nchòhó cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñi ñaha-güedë xii-gá te ní sata caa ñaha-güedë núú cùrúxí, te núú cùrúxí-án nĩ xihí-gá. Dico sa ní cutnùní iní Yă Ndiöxí sá dúcáⁿ càda-ndo Jesús, te mee Yă Ndiöxí ní cachí-gá sá dúcáⁿ ndòho Jesús.

24 Te diu-ni mee Yă Ndiöxí ní dándótó-gă Jèsús, chi sa ní cáhán-gă sá òré cuú-gă te vá cuú dúcáⁿ-gă. 25 Te ndíi Dàvíi tée ní xindaha ñaha xii cue ñaní tnáhà-ó nĩ xindecu ndée sanaha ní chídó tnùní ndíi nàcuáa ní cáhán Jèsús, te duha ní cáhán-gă:

Cùtnuní iní-í sá ncháá ndùu ndecu ndihí-í Yă Ndiöxí, te ío chindee ñaha-gă xii-í,

te ñá túu tnáhí sá yùhú-í.

26 Te ío ndàcán táhù-í núú Yă Ndiöxí chi cùdñí iní-í, chi sa nàha-í sá cùú-í dico ndoto-í,

27 chi vá dáñá-gă quihíⁿ dúcáⁿ àlmá-í núú ndécú ñăyiu ní xihí,

te vá dáñá-gă téhyú yiqui cùñú-í chi cùú-í Déhe-gă, te yùhú sa nàha-í sá cúú iní ñáhá-gă xii-í.

28 Te sa ní cachí tnúhu-gă nàcuáa cada-í cundecu-í ichi váha, te cuendá sá ndécú ndihí ñaha-gă xii-í núu ío cùdñí iní-í.

Duha ní cáhán Jèsús, te ducaⁿ nĩ chídó tnùní ndíi Dàvíi.

29 "Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvíi tée ní xindecu ndée sanaha vñi,

chi ní xihí-dé, te ní chindúxi ñaha-güedë, te nàha-o tnavíi núú nĩ chindúxi ñaha-güedë.

30 Te ndíi Dàvíi ní xóo cáhánⁿ ndíi tnúhu Yă Ndiöxí, te sa nàha ndíi sá Yă Ndiöxí ní cáhánⁿ ndáá cuiⁿ-gă sá diú-ní ñiⁿ tñaha ndíi taxi tnùní-dé ñăyiu isràel ndée cuèe-gă dàtná ní xóo taxi tnùní mee ndíi cùtnáhá ní xindecu ndíi, te tée taxi tnùní-án cúú Crístú chi cùu-gă ñiⁿ tñaha ndíi.

31 Te sa ní cutnùní iní ndíi sá ndótó Crístú, núu xiánⁿ ní chídó tnùní ndíi sá vă dáñá Yă Ndiöxí sá quihíⁿ dúcáⁿ àlmá-gă cundecu-xi núú ndécú ñăyiu ní xihí, te vá dáñá-gă téhyú yiqui cùñú-gă.

32 "Te ndáá chi Yă Ndiöxí ní dándótó-gă Jèsús, te nchúhú ní xiní-ndí sá nĩ ndoto-gă.

33 Te ní xáhaⁿ Yă Ndiöxí xii Jèsús sá cundecu ndihí ñaha-gă, te taxi tnùní Jèsús ní caa ní quihíⁿ. Te Yă Ndiöxí ní sáñaha-gă Espíritú-gă ní ngündecu ndihí-gă nàcuáa ní xáhaⁿ-gă, te diu Jèsús ní quide-gă nchaa sá nĩ xiní-ndó vitna ndihí nchaa sá nĩ xindedóho-ndo. 34 Te ndíi Dàvíi ñá túu ní ndaa túu ndíi andíu ndihí yiqui cuñú ndíi, te òré ndécú-gă ndíi ñuyíu-a ní cachí ndíi:

Dútú Ndiöxí ní xáhaⁿ-gă xii Yáa cúú Xitohó-í:

"Ngóo xio cùha-í,

35 te yùhú cada-í te nchaa sá cúú úhú iní ñáhá xii-n canehe-xi sá yíñùhu núú-n."

Duha ní xáhaⁿ Dútú Ndiöxí xii Yáa cúú Xitohó-í càchí ndíi.

36 "Te nchòhó ñăyiu isràel cùu-ndo ndí mee-í, te cuiⁿ-í

cundedóho váha-ndo ìⁿ tnúhu na cáháⁿ-í-a. Jèsús ní sata caa-ndo-gã núú cùrúxí, dico Yá Ndiöxí ní cachí-gá sá Jèsús dacäcu nihnu-gá ñáyiú, te vá cání ìⁿ caní úú iní-ndó, chi diu-gá cùnù-gá núú nchàa ñáyiú —càchí té Pèlú xãhaⁿ-dë xií-yu.

³⁷ Te ñáyiú ní xíndedóho tnúhu ní cáháⁿ té Pèlú ní ndixi túú iní-yu nàcuáa quidé-yu ndècú-yu, te ní xáhãⁿ-yu xii-dé ndihí dava-gá cue téé ní táuchíúⁿ Jèsús dacuàha ñaha xií-yu tnúhu-gá:

—Nchaa nchòhó cue ñani tnáhá-ndí, ¿nása cachí-ndó cunduú, nása cada-ndí vitna? —càchí-yu xáhãⁿ-yu xii-güedé.

³⁸ Te ní xáhãⁿ tẽ Pèlú xií-yu:

—Daña-ndo nchàa sá cuèhé sá dúhá quíde-ndo, te cada càhnu iní Yã Ndiöxí nchaa yíca cuèchi-ndo. Te cuandute-ndo cuèndá quiní-yu sá ñí natuha-ndo ìchi Jesús, te ducaⁿ te taxi Yá Ndiöxí Espiritú-gá cundecu ndihí-ndo, ³⁹ chi cuíní-gá taxi-gá Espiritú-gá xii mee-ndo ndihí déhe-ndo, te cuãñaha-gã Espiritú-gá xii nchaa ñáyiú ni càa xico ñuyíú, ñáyiú cáhãⁿ-gá cundecu ichi-gá ndéé idá-gá —càchí té Pèlú xãhaⁿ-dë xií-yu.

⁴⁰ Te titní-gá tnúhu ní xáhãⁿ-dë nàcuáa cadá-yu, te xãhaⁿ tùcu-dé:

—Daña-ndo nchàa sá cuèhé sá dúhá quíde-ndo, vá cadá-ndó sã quidé dàva-gá-yu —càchí-dé xãhaⁿ-dë.

⁴¹ Te nchaa ñáyiú ní sándáá iní-xi tnúhu ní cáhãⁿ té Pèlú

ní sanduté-yu, te diu-ni nduu-ãⁿ ñí cuu dàtná úní mìl ñáyiú ní sándáá iní-xi ní xíndecu ndihí ñáyiú xídacuáhá tnúhu Yá Ndiöxí. ⁴² Te ío ní xíndedóho-yu tnúhu ní cáhãⁿ cue téé ní táuchíúⁿ Jèsús dacuàha ñaha xií-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá nãhã-yu sá dúcãⁿ ñí quíde Jèsús cútñahá vátã cãhni ñàha-gá-güedé xii-gá, te ní xóo cáhãⁿ ndihí-yu Yá Ndiöxí.

Nàcuáa ní quíde nchaa ñáyiú ní sándáá iní tnúhu Jèsús ndéé díhna nuu

⁴³ Te ncháa-yu ní cuñúhu vñhí-yu, chi cue téé ní táuchíúⁿ-gã dacuàha ñaha xií-yu tnúhu-gá ní quíde-güedé titní núú sã vã yõ tnáhí ndàcu cada, te xiãⁿ ní cutnùní iní-yu sá méé Yá Ndiöxí chíndèe ñaha-gá xii-güedé. ⁴⁴ Te nchaa ñáyiú sándáá iní tnúhu Jèsús cáhãⁿ ndihí tnàha váha-yu, te cuèi-ni nchaa ndachíuⁿ nandíhi-yu ndècu cahnu. ⁴⁵ Te ní dícõ-yu nchaa ndachíuⁿ sã ñã túú xini ñuhú-yu, te ní níhí-yu díhúⁿ te ní sãñahá-yu xii nchaa ñáyiú ñã nihí. ⁴⁶ Te ìⁿ nduu ìⁿ nduu ní xóo quíhíⁿ ndihí tnáhã-yu veñúhu càhnu sã ío cùnuu. Te ní xexi ndihí tnáhã-yu vehé-yu. Te ío ní cudíí iní-yu chi ìⁿ-ni ní cuú-yu ncháa-yu. ⁴⁷ Te ío ní ndacáⁿ táhũ-yu núú Yã Ndiöxí, te nchaa dava-gá ñáyiú ní cáhãⁿ váha-yu cuèndá ñáyiú-ãⁿ. Te mee Yá Ndiöxí ní quíde-gá

ní sándáá iní vai-gá ñáyi, te ní xíndecú-yu ndihí dava-gá ñáyi xídácuáhá tnùhu-gá.

3

Quide tátna-güedé ñⁿ té yacua

1 Te ñⁿ nduu òré caá úní sacuaa, òré xíchááⁿ-yu ndihí Yá Ndióxi cuáháⁿ té Pèlú ndihí té Juáá veñúhu càhnu sá ïo cùnuu sácúú-xí ñáyi isràél. 2 Te ndècu ñⁿ té yacua, te ducaⁿ-ni càa-dé ní cacu-dé. Te sàháⁿ ndihí ñàhá-yu veñúhu càhnu sá ïo cùnuu, te sácóo-dé ñⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xicáⁿ ndàhú-dé núú ncháa ñáyi sàháⁿ veñúhu. 3 Te ní xiní-dé té Pèlú ndihí té Juáá cuánguihu-güedé veñúhu, te xicáⁿ ndàhú-dé núú-güedé. 4 Te ní ndacoto-güedé núú-dé, te ní xáhaⁿ tè Pèlú xii té yacua-áⁿ:

—Cundehe ñàha xii-ndí — càchi té Pèlú xáhaⁿ-dè xii-dé.

5 Te ní xíndéhé ñàha-dé xii-güedé, chi ní cáháⁿ-dè sá ïo ñⁿ sá cuáñaha-güedé. 6 Te ní xáhaⁿ tè Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítohó Jesucristú Yaá ní xíndecu ñuú Nazàrét, ndacu-gá cada tátna ñaha-gá xii-n, ndacuñí te caca-n — càchi-dé xáhaⁿ-dè.

7 Te té Pèlú ní tní-dé ndaha cùha té yacua-áⁿ, te ní ngúta-dé ndacàni ñaha-dé, te òré xíaⁿ ñí naníhí ndéé-dé, te ní ndúha sáhá-dé. 8 Te ní ndacuñí cunu mee-dé te ní xica-dé, te ní càchi-dé sá ïo càhnu cuu Yá Ndióxi

cuendá sá ñí ndúha-dé, te ta sándava-dé cuánguihu ndihí ñaha-güedé veñúhu. 9 Te nchaa ñáyi xíndecu-áⁿ ñí xiní-yu sá ñí nduu váha-dé, te ndéhé-yu ndacáⁿ táhú-dé núú Yá Ndióxi. 10 Te ní naquiní ñàhá-yu xii-dé sá díu tèe xicáⁿ ndàhú té ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ñí ndúha-dé.

Té Pèlú ní cáháⁿ-dé corredór sá néhé díu ndí Salómón

11 Te sátá veñúhu càa corredór sá néhé díu ndí Salómón. Yàcáⁿ ndécú té Pèlú ndihí té Juáá ndihí té ní ndúha sáhá-xi, te ñá cuíni té ní ndúha sáhá-xi-áⁿ dañá-dé quíhíⁿ-güedé dandóo ñaha-güedé xii-dé. Te chítú-yu ní quexío coyó-yu núú ndécú-güedé, te ní cuñúhu vihi-yu sá ñí ndúha sáhá tèe cùhú-áⁿ. 12 Te té Pèlú ní xiní-dé ní quexío coyó-yu, te ní xáhaⁿ-dè xií-yu:

—Nchòhó ñáyi isràél, çná cuendá ndéé dúcáⁿ ndèhe ñaha-ndo xii-ndí te cuñúhu-ndo sá ñí ndúha té yacua-áiⁿ? Nchòhó cáháⁿ-ndó sá méé-ndí ní quide tátna-ndí-dé sá ïo váha iní-ndí, dico ñàhá chi ñá díu mèe-ndí ní quide tátna-ndí-dé. 13 Chi Yá Ndióxi ní ndadúha ñaha-gá xii-dé, chi díu-gá cúú Ndióxi ndíi Àbrahám ndihí ndíi Isàac ndihí ndíi Jàcób, te díu-ni cue té-áⁿ cúú ñàní tnàhá-ó ñí xíndecu ndéé sanaha vihi, Te díu-ni Ndióxi-áⁿ ñí xáhaⁿ-gá xii Déhe-gá Jèsús sá táxi tnùní-gá

nchaa sá ío andíu ndíhi nchaa ñáyiú ndècu ñuyíú-a, dico mee-ndo ní sáha cuèndá-ndó Jèsús núú tée cùchiuⁿ. Te té Pilatú ní cuini-dé dacăcu-dé Jèsús ní cùu, te mee-ndo ñà ní cuini-ndó. ¹⁴ Te Yá Ndiöxí ní cachí-gá sá ío váha iní Jèsús te ñá túú tnàhi cuéchi-gá. Te mee-ndo ñà túú ní cuini-ndó căcu-gá núu ní xáhaⁿ-ndo xii té Pilatú sá váha-gá dacăcu-dé ìⁿ tée ndècu vihi cuéchi-xi, te vá dacăcu-dé Jèsús. ¹⁵ Te ní xáhaⁿ-ndo sá cahní-güedé Jèsús Yaá quidé nchìto-ndecu-o, dico Yá Ndiöxí ní dándótó ñàha-gá, te ní xiní-ndí sá ndàá ní ndoto-gá. ¹⁶ Te nchúhú sa nàha-ndí sá díú Xìtohó Jesucristú ní ndadúha-gá tée yacua, te náí-dé nútñi-a. Te ducaⁿ ní quide-gá chí ní sándáá iní ñáhá-dé xii-gá, te vitna ní xiní-ndó sá ndàá ní ndúha-dé.

¹⁷ Te nchòhó ndíhi cue tée cùnunu ní sahní-ndo Xìtohó Jesucristú, chí ñà ní cùtnuní iní-ndó sá ní quide-ndo. ¹⁸ Te cue tée ní xóo cáháⁿ tnúhu Yá Ndiöxí ndéé sanaha ní chídó tnùní-güedé năcuáa ní xáhaⁿ Yá Ndiöxí xii-güedé sá Cristú quixi-gá ñuyíú-a, te ndoho vihi-gá, te xiáⁿ núu ducaⁿ ní cuu ío ní ndoho-gá. ¹⁹ Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te ducaⁿ te cada cahnú iní-gá nchaa sá ñà túú váha ní quide-ndo ñuyíú-a, te canu ichi ñàha-gá xii-ndo ìⁿ ichi váha. ²⁰ Te ní tendaha-gá Cristú ní quixi-gá ñuyíú-a, chí mee Yá Ndiöxí ní cachí-gá sá díú Cristú

taunihnu ñàha-gá xii-ndo. ²¹ Te dacuití cùndecu-gá andíu ndéé ná sáá nduu nàtaxi ndecu-gá nchaa sá ndécú ñuyíú năcuáa sàni iní mée-gá. Te díu ducaⁿ ní cáháⁿ Yá Ndiöxí núu ducaⁿ ní chídó tnùní cue tée ní xóo cáháⁿ tnúhu-gá ndéé sanaha. ²² Te ndíi Moisés ní xáhaⁿ ndíi xii cue ñaní tnáhá-ó ní xíndecu ndéé sanaha: “Yá Ndiöxí tendaha-gá ìⁿ tée quixi-dé cáháⁿ-dé tnúhu-gá dàtná cuini-ndó ní quide ñàha-gá xii yúhú, te tée-áⁿ cuu-dé ìⁿ ñaní tnáhá-ndó. Te cundedóho váha-ndo nchàa tnúhu cáháⁿ-dé. ²³ Te nchaa ñáyiú vá quindáá iní tnúhu cáháⁿ-dé, te cuíta nihnú-yu chí vá quihíⁿ-yu núú quihíⁿ ñáyiú sándáá iní tnúhu Yá Ndiöxí”, duha ní xáhaⁿ ndíi Moisés xii-yu —cachí té Pèlú xáhaⁿ-dè xii-yu.

²⁴ Te ní xáhaⁿ tùcu té Pèlú xii-yu:

—Ndíi Sàmuél ndíhi nchaa cue tée nchìcúⁿ-gá ní xóo cáháⁿ tnúhu Yá Ndiöxí ndéé sanaha ní cáháⁿ-güedé năcuáa cada-xi vitna. ²⁵ Te Yá Ndiöxí ní cáháⁿ-gá ndíhi cue tée ní cáháⁿ tnúhu-gá ndéé sanaha. Te ní quide ndáá-gá ndíhi nchaa ñaní tnáhá-ó ní xíndecu ndéé sanaha năcuáa cada-gá naníhí tàhú-ó. Te duha ní xáhaⁿ-gá xii ndíi Àbrahám: “Ío nduu cacu ìⁿ tnàha-n, te tée-áⁿ cada-dé te naníhí tàhú ñáyiú ñuyíú-a”, duha ní xáhaⁿ-gá xii ndíi Àbrahám. ²⁶ Núu xiáⁿ ní tendaha-gá Déhe-gá ní quixi-gá núú ndécú-ndó cuèndá dañá-ndo nchàa sá cuèhé sá dúhá quide-ndo, te

naníhí tànhú-ndó —càchí té
Pèlú xàhaⁿ-dè xií-yu.

4

*Té Pèlú ndihí té Juàá
ndécú-güedě ndaha té cùchiuⁿ*

1 Te té Pèlú ndihí té Juàá càháⁿ dúcáⁿ-ni-güedě ndihí ñáyiú, ní quexìo cue dútú ndihí té tãxi tñuní ñáhá xii cue tée quide cuendá veñúhu càhnu sá ïo cùnuu, ndihí cue tée cùu saducéú. 2 Te ní cudééⁿ-güedě nchaa-güedě núú tẽ Pèlú ndihí té Juàá sá xàhaⁿ-güedě xii ñáyiú sá ndótó ñáyiú ní xíhí dàtná ní ndoto Jèsús. 3 Te ní tñi ñaha-güedě ní chihí ñaha-güedě vecaá xii-güedé, te ñá ní quide ndáá té cùchiuⁿ cuéchi-güedé nduu-ãⁿ chi sa ní cuaa. 4 Te ïo vãi ñáyiú ní sándáá iní-yu tñúhu ní cáháⁿ-güedé, te ñáyiú-áⁿ ndihí ñáyiú sa ní sándáá iní-xi ndéé cãni-gá ní xínu dàtná úhúⁿ mĩ mee-ni cuè tée, te dñiⁿ ñáyiú dñí ndihí landú.

5 Te nduu tñéé-áⁿ diu-ni ñuú Jerusàlén-áⁿ ñí tacá cue tée yìndaha veñúhu, ndihí cue tée cùu sacuéhé nùú ñáyiú isràél ndihí cue tée dàcuaha ñaha xii-yu nchaa tñúhu ní chídó tñumí ndí Moisés. 6 Te tñáhá dútú cùnùu-gá té nàni Anás ndécú ndihí té Caifás, ndihí té Juàá, ndihí té Lijandrú ndihí dava-gá ñani tñáhá dútú cùnùu-gá-áⁿ ndécú. 7 Te ní xàhaⁿ-güedě xii cue tée xínu cuechi núú-güedě:

—Chí cuàháⁿ queñuhu-ndo tẽ Pèlú ndihí té Juàá vecaá,

te na quixi-güedé iha —
càchí-güedé xàhaⁿ-güedě.

Te ní quexìo té Pèlú ndihí té Juàá núú cuè tée cùnuu, te cue tée cùnuu-áⁿ ñí xicáⁿ tñúhú-güedě núú-güedě, te xàhaⁿ-güedě:

—¿Nása ní quide-ndo cuendá tée yacua-ãⁿ? ¿Yoo ní táuchíúⁿ dùcaⁿ cada-ndo? —cachí-güedé xàhaⁿ-güedě.

8 Te ndècu ndihí té Pèlú Espiritú Yá Ndiòxí, núú xiãⁿ ní xàhaⁿ-dè xii-güedé:

—Nchòhó cue tée cùchiuⁿ ndihí nchòhó cue tée cùu sacuéhé nùú ñáyiú isràél, 9 te núu cuini-ndó quini-ndó ñasa ní quide-ndí ní ndúha tée yacua-ãⁿ, 10 te cund-edóho-ndo ñiⁿ tñúhu na càháⁿ-í-a. Xini ñuhu-xi cund-edóho nchaa ñáyiú isràél cuendá quini-yu nàcuáa ní cuu ní ndúha tée-ãⁿ. Xitohó Jesucristú Yaá ní xindecu ñuú Nazàrét ní quide tátna-gá sáhá tẽe yacua ní ndúha, te diu-ni-gá ní sata caa-ndo nùú cùrúxí te núú cùrúxí-áⁿ ñí xíhí-gá, te ní dándótó ñaha Yá Ndiòxí xii-gá. 11 Te núú tütú Yá Ndiòxí càchí-xi: “Cristú cúu-gã dàtná ñiⁿ yúú ndécú xiquí ñiⁿ vehe. Te yúú càchí-yu sá ñà túú nàndíhi, te diu xiãⁿ ní nàndíhi-xi ní ngúnutñi-xi xiquí véhé”, duha càchí-xi núú tütú-gá. Te ducaⁿ sãtnahá-xi cùu Jesús, chi càchí-ndó sã ñà túú nàndíhi-gá, 12 dico Yá Ndiòxí ñá túú ndéé ní tãxi ndecu-gá ingá tée dàcácu nihnu ñaha xii-o núú úhú núú ndàhú, chi ñiⁿ dñí dñí-ni Déhe-gá Xitohó

Jesucristú dacăcu nihnu ñaha-gă xii-o —càchí té Pèlú xăhaⁿ-dê xii-güedé.

13 Te té Pèlú ndihi té Juàá ñá túú tŭha-güedé, te cùñúhu cue tée cùchiuⁿ sá ïo ñí xindáa-güedé. Te ní cutnùní iní cue tée cùchiuⁿ-áⁿ să Jèsús ní xica cuu ndihi-güedé, núu xíáⁿ ñá túú tnàhí yùhú-güedé càháⁿ-güedé. 14 Te cuèndá ndécú ndihi té Pèlú ndihi té Juàá téé ní ndúha sáhá-xi, núu xíáⁿ ñá ní ñhí cue tée cùchiuⁿ tnúhu càháⁿ-güedé. 15 Te ní xáhaⁿ-güedé xii té Pèlú ndihi té Juàá sá queé-güedé quehé cuèndá ndóo mee-güedé ndatnúhu-güedé. 16 Te ní xítñaha-güedé:

—¿Nása cada-o ũú cue téé-áⁿ?, chi nchaá ñáyiú ñúú Jerusalén nánhá-yu sá ñi quide tátña-güedé ñⁿ téé yacua, te xíáⁿ xicuñúhu vîhi ñáyiú. Te vá cúú càchí-ó sá ñă ndáá, chi vâi ñáyiú ní xiní nàcuáa ní cuu. 17 Te dayùhú-ó-güedé te cùñaha-o sá vă càháⁿ-gá-güedé tnúhu Jèsús, chi núu ñáhá te quindáá-gá iní-yu —càchí-güedé xítñaha-güedé.

18 Te ní cana tucu-güedé té Pèlú ndihi té Juàá, te xăhaⁿ-güedé sá vă dăcuàha-gá-güedé ñáyiú tnúhu Jèsús. 19 Te té Pèlú ndihi té Juàá ní xáhaⁿ-güedé:

—Chí cuăha cuèndá, te núu sá càchí nchòhó cada-ndí àdi sá càháⁿ Yă Ndiôxí cada-ndí. Te cada càhñu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yă Ndiôxí. 20 Chi dacuitíí

căháⁿ-ndí năcuáa ní càháⁿ Jèsús, te càháⁿ-ndí nchaá sá ñi xiní-ndí ní quide-gá —càchí-güedé xăhaⁿ-güedé.

21 Te cue téé cùchiuⁿ níhi-gá ní càháⁿ-güedé xăhaⁿ-güedé sá cáda càstiú ñáhá-güedé núu vá dáñá-güedé sá dăcuàha-güedé ñáyiú. Te ducaⁿ te ní dáñá ñàha-güedé cuánuhú-güedé, chi ñá ní ñhí-güedé nása cada-güedé cada castiú ñáhá-güedé, chi nchaá-yu ndàcáⁿ táhŭ-yu núu Yă Ndiôxí sá ñi ndúha téé yacua. 22 Te téé ní quide tátña-güedé-áⁿ ndécú-dé vîhi-gá údico cuíá-dé, te ío ní cuñúhu-yu sá ñi ndúha-dé.

Ñáyiú sândáá iní tnúhu Jèsús xicáⁿ táhŭ-yu núú-gă sá vă yùhú-yu càháⁿ-yu tnúhu-gá

23 Te ní ndee té Pèlú ndihi té Juàá cuánuhú-güedé núu ndécú cuè téé cùndihi-güedé, te ní nacani tnúhu-güedé năcuáa ní xáhaⁿ cuè dútú cùnùu ndihi cue téé cùu sacuéhé núú ñáyiú israhél. 24 Te sáta ñi xindedóho-yu tnúhu ní càháⁿ-güedé, te ñⁿ-ni tnúhu ní càháⁿ-yu nchaá-yu ndihi Yă Ndiôxí, te ní xáháⁿ-yu xii-gá:

—Yòhó Dútú Ndiôxí, ní cadúha-n àndiú, ní cadúha-n ñùyíú, ní cadúha-n lámár, ní cadúha-n nchàandi túhú sá ío ñuyíú. 25 Te ndíí Dávíí ní sândáá iní ndíí tnúhu ní càháⁿ-n, te ní chídó tnùní ndíí năcuáa ní xáhaⁿ-n càháⁿ ndíí, te ñⁿ-ni Espiritú-n ñi chindee ñàha-xi xii ndíí ní chídó tnùní ndíí, te duha ní chídó tnùní ndíí:

Ñáiyu ñá túú cùu ñáiyu is-
raél ío cùdèèⁿ-yu núú
Yá Ndiòxí,

te cuíní-yu nàá-yu ndihí-gá,
dico vá ndácũ-yu chi
mee-gă cúnùu-gă.

26 Te cue tée yìndaha nacióⁿ
ndihí cue tée cùchiuⁿ
tacá-güedé nàá-güedé
ndihí Dútú Ndiòxí
ndihí Crìstú Yaá ní
quixí ñuyíú-a.

Duha ní chídó tnùní ndí Dàvíí
nàcuáa ndùu tnúhu ní cáháⁿ-n
—càchí-yu xăhăⁿ-yu xii Yá
Ndiòxí.

27 Te xăhaⁿ tucú-yu xii-gă:

—Ndáá ní cáháⁿ ndí Dàvíí
chi ðiu-ni ñuú iha ní tacá
té Hèrodés ndihí té Pònciú
Pilatú ndihí ñáiyu ñá túú cùu
ñáiyu israél ndihí ñáiyu israél
ní cáháⁿ cuèhé-yu cuèndá
Jèsús. Te Yòhó Dútú Ndiòxí,
Déhe-n cùu Jesús nũu ío váha
iní-gă, te ní sáha chiúⁿ-n-gă,
te ío úhú ní cuu iní ñáhá
ñáiyu xii-gă. 28 Te ní quidé-yu
nàcuáa ní sani iní-n càdá-yu
ndéé sanaha, ndéé cútnàhá
ní ngáva ñuyíú. 29 Te Yòhó
Dútú Ndiòxí sa nàha-n nása
cáháⁿ cue tée cuíní cada úhú
ñáhá xii-ndí. Te quide-ndí
chiúⁿ tahu-n, te vitna chindee
ñàha-n xii-ndí cuèndá sá vă
yùhú-ndí cáháⁿ-ndí tnúhu-n.
30 Te cada tátna-n ñáiyu cùhú,
te chindee ñàha-n xii-ndí, te
cada-ndí nchaa sá vă yõo
tnàhí ndàcu cada nacuáa
cuñúhu vîhí-yu. Te xini-ndí
sá méé Jèsús chindee ñàha-gă
xii-ndí, chi quide-gă chiúⁿ
tahu-n —cachí-yu xăhăⁿ-yu
xii Yá Ndiòxí.

31 Te sátá ñí yáha ní
cáháⁿ-yu ndihí Yá Ndiòxí, te ní
quidi-xi vehe núú xîndecú-yu,
te òrè-áⁿ ñí cutáhú tucú-yu
ncháa-yu Espiritú-gă. Te ní
cáháⁿ-yu tnúhu Yá Ndiòxí, te
ñá túú tnàhí ni yùhú-yu.

*Cuèndá nchaa ndachiuⁿ
cánehe chiúⁿ-yu*

32 Te nchaa ñáiyu ní sándáá
iní tnúhu Yá Ndiòxí ñⁿ-ni
tnúhu ní cáháⁿ-yu ncháa-yu.
Ëⁿ-ni tnúhu ní sani iní-yu, te
ní xóo chindee tnàhá-yu chi
ní xóo cuáha táhú tnáhă-yu
nchaa sá xíní ñùhú-yu, te ni
Ëⁿ-yu ñá túú ní cáháⁿ-yu sá
ndàchiúⁿ-yu ñⁿdi-ní-yu cùu
nchaa sá ndécú ndihí-yu.
33 Te cue tée ní táuchíúⁿ Jèsús
dacuàha ñaha xii-yu tnúhu-gă
ío váha ní cáháⁿ-güedé nàcuáa
ní cuu ní ndoho Xítóhó
Jesucristú. Te ío ní chindee
ñàha Yá Ndiòxí ní cáháⁿ-yu
tnúhu-gă, te ñá túú ní cáháⁿ
cuèhé dava-gă-yu cuèndá
ñáiyu dàcuaha tnúhu-gă. 34 Te
ñá túú tnàhí ni cùndahú-yu
díhúⁿ, chi nchaa ñáiyu
ndècu ndihí ñuhu-xi, ndihí
nchaa ñáiyu càa vehe-xi ní
nadícó-yu, te da ñⁿ da ñⁿ
ndachíúⁿ-yu ní nadícó-yu òrè
xíní ñùhú-yu díhúⁿ. 35 Te
ní sãñàhá-yu xii cue tée ní
táuchíúⁿ Jèsús dacuàha ñaha
xii-yu tnúhu-gă, te cue tée-áⁿ
ñí dácăhñu-güedé nchaa
ñáiyu xini ñuhu. 36 Te distritú
Chìpré ndécú ñⁿ tée nani-dé
Chèé ñani tnáhá ndí Lèví,
te ní xóo cuu cuechi-dé
veñúhu ñáiyu israél. Te
cuèndá sá sãñaha-dé tnúhu

ndee ìní xii-yu, xí^{án} nõu ní dánání ñàha-güedé Vèé xii-dé. ³⁷ Te téé-áⁿ nĩ nadico-dé luha ñuhu-dé, te nèhe-dé díhúⁿ cuáháⁿ núú cué téé ní táúchíúⁿ-gã dacuàha ñaha xii-yu tnúhu-gá.

5

Té Anàniás ndihi tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadihí-dé nání-áⁿ Sàfirá, te ñáyiú-áⁿ nĩ nadicó-yu luha ñuhú-yu.

² Te ní taxúha-dé sacú díhúⁿ, te sacú-gá néhé-dé cuáháⁿ ní sáñaha-dé xii cue téé ní táúchíúⁿ Jèsús dacuàha ñaha xii ñáyiú tnúhu-gá, te ní dándahú ñáhá-dé xii-güedé, chi ní xáhaⁿ-dè sá ñihí ní sáñaha-dé, te nàha ñadihí-dé sá dúcáⁿ nĩ quide-dé. ³ Te ní xáhaⁿ tẽ Pèlú xii-dé;

—Anàniás, ¿ná cuendá ducaⁿ nĩ quide-n nĩ dáñá-n nĩ quíhu sácúíhná ìní-n? Te ní dácúándèhnde-n núú Espíritú Yá Ndiõxí, te ní taxúha-n sácú díhúⁿ nĩ níhí-n cuendá ñuhu-n. ⁴ ¿Te ñuhu-áⁿ cuendá sá ñuhú mèe-n, àdi díhúⁿ-áⁿ cuendá sá díhúⁿ méé-n cùu-xi, te cuu-ni cada-n nàcuáa cächí ìní-n càhaⁿ-n ñá? ¿Ná cuendá ducaⁿ nĩ quide-n? ¿Ná ní quide-xi ìní-n nõu ní dácúándèhnde-n núú Yá Ndiõxí? Chi ñá díú-ní mèe-ni ñáyiú ni dándahú-n — cächí té Pèlú xáhaⁿ-dè xii-dé.

⁵ Te òré ní ndihi tnúhu ní xáhaⁿ tẽ Pèlú, te uuⁿi ní nduá-dé te ní xihí-ni-dé. Te nchaa ñáyiú ní níhí tnúhu sá nĩ xihí-dé, te ní yùhú víhí-yu. ⁶ Te ní quixi ìⁿ úú cue téé cuechi, te ní

ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadihí téé ní xihí-áⁿ, te vátá quíní-gá-aⁿ sá nĩ xihí yíi-aⁿ. ⁸ Te ní xáhaⁿ tẽ Pèlú xii-aⁿ:

—Cuíní-í cachí tnúhu ndáá-n. ¿Ndèdau ní díco-ndó ñuhu, ní díco-ndó nàcuáa ní cachí yíi-n áⁿ? —cächí té Pèlú xáhaⁿ-dè xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ — cachí-aⁿ xáhaⁿ-aⁿ.

⁹ Te ní xáhaⁿ tẽ Pèlú:

—¿Ná cuendá ducaⁿ nĩ chitnàha tnúhu-ndo dùcaⁿ ní quide-ndo ní cuíní-ndó dándahú-ndó Espíritú Yá Ndiõxí? Quíní-n, chi sa cuándixi cue téé ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —cächí-dé xáhaⁿ-dè xii-aⁿ.

¹⁰ Te òré-áⁿ ní nduá-aⁿ núú tẽ Pèlú, te ní xihí-ni-aⁿ. Te cuándihu cue téé cuechi-áⁿ xití vehe, te ní xiní-güedé sá sá ní xihí-aⁿ, núu ní xido ñaha tucu-güedé cuáháⁿ chindúxi-güedé-aⁿ dìñi yíi-aⁿ. ¹¹ Te ní yùhú víhí ñáyiú ní sándáá ìní tnúhu Yá Ndiõxí, ndihi dava-gá ñáyiú ní níhí tnúhu nàcuáa ní cuu.

Ní quide-güedé titní núú sá vǎ yǒ tnàhí ndàcu cada te ío ní cuñúhu ñáyiú

¹² Te cue téé ní táúchíúⁿ Jèsús dacuàha ñaha xii-yu tnúhu-gá titní víhí sá vǎ

yõo tnàhí ndàcu cada ní quide-güedé, te ní cuñúhu vîhí-yu. Te nchaa ñáyiu ní sándáá iní-xi tnúhu Jèsús ní xóo tacá-yu corrèdór néhé dîi ndîi Salòmón. ¹³ Te nchaa ñáyiu ñá túú dàcuaha tnúhu-gá ñá ní cùyî-yu chit-nahá-yu ñáyiu ní sándáá iní-xi tnúhu-gá, dico nchaá-yu ní cáháⁿ váha-yu cuèndá ñáyiu ní sándáá iní-xi tnúhu-gá. ¹⁴ Te vâi téé, vâi ñadihí ní sándáá iní-yu tnúhu-gá. ¹⁵ Te cuèndá sá ní níhî-yu tnúhu sá quidé tâtna cue téé ní xica cuu ndihî Jèsús, núu xîáⁿ ní queñuhú-yu nchaa ñáyiu cùhú ichi, te davá-yu ní quide túha-yu cà má te davá-yu ní quide túha-yu yuu, núu núú ncháa xîáⁿ tá sàcáⁿ-yu cue ñáyiu cùhú-áⁿ cuãháⁿ, te xîáⁿ cáã-yu ndètú-yu, chí ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xî xîi-yu te ndúha-yu. ¹⁶ Te ní quixi ñáyiu ñúú yatni Jerusàlén ndécã-yu ñáyiu cùhú, ndihî ñáyiu yîhi ñaha espíritú cùndîhi yucu ñávâha ní quixi, te nchaá-yu ní ndúha.

Ío ní quide úhú-güedé té Pèlú ndihî té Juáá

¹⁷⁻¹⁸ Te dútú cùnù-gá ndihî cue téé cùu saducéú cue téé cùndîhi-dé ní cudééⁿ-güedé sá ïo chítú-yu dàcuaha tnúhu Jèsús, núu xîáⁿ ní tñî-güedé cue téé ní táuchíúⁿ Jèsús dacuàha ñaha xîi-yu tnúhu-gá ní chihî ñaha-güedě vecaá. ¹⁹ Te xítî níú-áⁿ ní quexìo ìⁿ espíritú xínú cuèchi núú

Yã Ndiõxí ní nacaáⁿ-xi yèhe vecaá ní quee-güedé, te ní xáhaⁿ-xi xîi-güedé:

²⁰ —Quíhîⁿ-ndó veñúhu càhnu sá ïo cùnùu te cùñaha-ndo xîi ñáyiu nàcuáa cadá-yu naníhî tàhú-yu —càchí espíritú-áⁿ xáhaⁿ-xi xîi-güedé.

²¹ Te sá dúcáⁿ ní xáhaⁿ-xi núu sátá ní túndaá, te ní sáháⁿ-güedé veñúhu càhnu sá ïo cùnùu sá cúú-xí ñáyiu isràél ní dácuahá ñaha-güedé xîi-yu.

Te dútú cùnù-gá ndihî cue téé cùndîhi-dé ní nadatácá tnáhá-güedé ndihî nchaa cue téé cùu sacuéhé núú ñáyiu isràél ndihî cue téé cùchiuⁿ, te ní tendaha-güedé sandádú cuáháⁿ queñuhu-güedé cue téé yîhi vecaá ní cùu. ²² Te ní quexìo-güedé yèhe vecaá, te ní xínî-güedé sá ní ìⁿ-gá cue téé dàcuaha ñaha xîi ñáyiu tnúhu Jèsús ñá túú-gã-güedé yîhî. Te cuánuhú-güedé ²³ ní xítñúhu-güedé cue téé cùchiuⁿ, te xáhaⁿ-güedé:

—Ní sáháⁿ-ndî ní sándéhé-ndî vecaá, te ndéé chóó-nî, te xîndecu-nî sandádú cue téé xîndéé yèhe vecaá. Te ní nacaáⁿ-ndî vecaá, te vá yõo ìⁿ-gá yîhî —càchí-güedé xáhaⁿ-güedé.

²⁴ Te sá dúcáⁿ ní xáhaⁿ-güedé, te cuáháⁿ iní cue dútú cùnùu ndihî téé tàxi tñunî cue téé xîndéé veñúhu càhnu sá ïo cùnùu, te ní xítñaha-güedé:

—¿Nása cada-xi vitna duha càa ní cuu ní xinu cue téé yîhi vecaá-î? —càchí-güedé xítñaha-güedé.

25 Te ní quexìo ìíⁿ téé ní xáhaⁿ-dè:

—Cundedóho-ndo na càchí tñúhu-í ìíⁿ tñúhu. Cue téé ní chíhi-ndo vécaá ndécú-güedé veñúhu càhnu sá ìo cùnuu dacuaha-güedé ñáyiu — càchí-dé xáhaⁿ-dè.

26 Te cue téé ndèé veñúhu ndihí téé tàxi tñuní ñáhá xii-güedé cuánguaca ñaha-güedé, te ñá túú ní quide úhú ñáhá-güedé, chí ní yùhú-güedé cuáha yúú ñáhá ñáyiu dii ñúú-xi-áⁿ. 27 Te ní ndexìo ndihí ñaha-güedé núú cuè téé cùu sacuéhé ndihí núú cuè téé cùchiuⁿ. Te dútú cùnùu-gá ní ngüíta-dé ténáá ñáhá-dé xii-güedé, te xáhaⁿ-dè:

28 —Te náa ñá díú ní cachí-ndí sá vǎ dǎcuàha-gá-ndó ñáyiu tñúhu Jèsús te dàcuaha-ni-ndó-yu, te vitna nchaa ñáyiu ñúú Jerusàlén ní níhí-yu tñúhu nǎcuáa càháⁿ-ndó. ¿Te ná cuendá ducaⁿ quide-ndo, te càchí-ndó sǎ nchùhú ndècuéchi-ndí ní sahní-ndí Jèsús-í? — càchí dútú cùnùu-gá xáhaⁿ-dè xii-güedé.

29 Te té Pèlú ndihí dava-gá cue téé ní táuchíuⁿ Jèsús dacuàha ñaha xii-yu ní xáhaⁿ-güedé xii cue téé cùchiuⁿ:

—Nchúhú, Yá Ndiöxí cùnùu-gá sándáá iní-ndí tñúhu càháⁿ-gá dǎcúxí tñúhu càháⁿ ñáyiu. 30 Te nchòhó ní sata caa-ndo Jèsús núú cùrúxí te núú cùrúxí-áⁿ ní xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sándáá iní cue ñaní

tñáhá-ndí ní xíndecu ndéé sanaha. 31 Te Yá Ndiöxí ní xáhaⁿ-gǎ sá cùndecu Jèsús xio cùha-gá cuendá taxi tñuní-gá te dacácu nihnu-gá ñáyiu isràél núú ùhú núú ndáhú. Te ducaⁿ-ni dacácu nihnu-gá nchaa ñáyiu na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32 Te ní xiní-ndí nǎcuáa ní quide-gá, núú xiǎⁿ cání-ndí cuendú núú nchaa ñáyiu, te Espíritú Yá Ndiöxí chíndèe ñaha-xi xii-ndí càháⁿ-ndí tñúhu-gá. Te diu-ni Espíritú-gá ní sañaha-gǎ xii nchaa ñáyiu ní sándáá iní-xi tñúhu-gá —càchí té Pèlú ndihí dava-gá-güedé xáhaⁿ-güedé xii cue téé cùchiuⁿ.

33 Te sátá dúcáⁿ ní xáhaⁿ-güedé xii cue téé cùchiuⁿ, te ní cudééⁿ-güedé, te ní ndatnùhu-güedé sá cáhni ñaha-güedé. 34 Te ìíⁿ téé cùu fariséu tñaha-dé cúú-dé chiúⁿ, te nǎni-dé Gamaliél, te cùu-dé mèstrú dǎcuàha-dé ñáyiu nǎcuáa ní chidó tñuní ndíi Moisés, te ìo yíñùhu caháⁿ ndihí ñáhá-yu xii-dé. Te ní ngúnutnǎi-dé, te ní xáhaⁿ-dè sá ná quèe tnaa té Pèlú ndihí dava-gá-güedé quehé. 35 Te ní xáhaⁿ-dè xii cue téé cùchiuⁿ:

—Nchòhó cue téé isràél, xini ñuhu-xi sá cání vǎha iní-ndó nǎsa cada-ndo ndihí cue téé-áⁿ. 36 Chí ní cunaha ní xíndecu ìíⁿ téé ní xínani Tèudás, te ní cachí-dé sá cùnùu-dé, te ní cundihí-dé dàtná cúmí ciendú cue téé, te ñá ní cuíní-güedé cuu ìíⁿnuu-güedé ndihí cue téé cùchiuⁿ. Te ní sahní ñaha cuè téé cùchiuⁿ-áⁿ xii téé Tèudás, te ní ndihí cue

tée ní xica cuu ndihi-dé ní xíté nuu-güedé, te ñá túú-gá ní quide-güedé nàcuáa ní sani iní-güedé cada-güedé. ³⁷ Te sáta nì xíhí tée-án, te ní tnahá nduu nùcódó tnùnì ñáyiú. Te dàvá-án nì xíndecu ìⁿ tée distritú Galileá ní xínani-dé Júdás. Te titní-güedé ní chitnahá ñáhá-güedé xii-dé. Te tnáhá-dé ní sahnì ñaha tucu cue tée cùchiuⁿ, te nchaa cue tée ní xica cuu ndihi-dé ní xíté nuu-güedé. ³⁸ Te na càchí tnúhu-í sá dáñá-ndó cuè tée-án, te nì ñá túú nágá tnúhu cúñaha-ndo xii-güedé, chi núu chiúⁿ mee-güedé quidé-güedé te cuíta-güedé, ³⁹ dico núu chiúⁿ Yá Ndiöxí quidé-güedé, te vá ndínìhnu chiúⁿ quide-güedé. Te núu quide-güedé chiúⁿ Yá Ndiöxí, te vá nàá-ndó ndihi-güedé, chi Yá Ndiöxí nàá ndihi-ndo sá dúcáⁿ xiquide-ndo —càchí té Gamaliél xáhaⁿ-dē xii cue tée cùchiuⁿ.

⁴⁰ Te nchaa-güedé ní cáháⁿ sá tnúhu ndáá càháⁿ-dé. Te dàtnùnì ní nacana tucu-güedé té Pèlú ndihi dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vá càháⁿ-gá-güedé tnúhu Jèsús, te dàtnùnì ní dáñá ñaha-güedé cuánuhú-güedé. ⁴¹ Te ío ní cudí^í iní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiú tnúhu Jèsús. ⁴² Te ìⁿ nduu ìⁿ nduu ní dácúáhá-güedé ñáyiú xítí veñúhu càhnu sá ío cùnuu ndihi nchaa vehé-yu. Te ní xáhaⁿ-güedé xii-yu sá Jèsús cúú-gá Crístú Yaá ní quixi

ñuyíú-a.

6

Ní ndúcú-güedé úsá cue tée cundecu dacáhñu sá cáxí ñáyiú

¹ Te diu-ni dàvá-án nì sándáá iní vài ñáyiú tnúhu Jèsús. Te cue ñáyiú griégú ní cáháⁿ cuèhé-yu cuèndá ñáyiú israél, sá ñáyiú dihi ñáyiú quèé ñáyiú cáháⁿ tnúhu griégú ñá túú tnáhá sá cáxí-yu, chi ñá túú sáñaha ìⁿnuu-güedé. ² Te cue tée úxúú ní táuchíúⁿ Jèsús dacuàha ñaha xii-yu tnúhu-gá, cue tée-áⁿ nì cana-güedé nchaa ñáyiú sándáá iní tnúhu Jèsús. Te ní xáhaⁿ-güedé xii-yu:

—Nchúhú chi vá cúú dácáhñu-ndí sá cáxí-yu, chi mee-ni tnúhu Yá Ndiöxí cáháⁿ-ndí. ³ Te nchòhó cue tée ndècu ndihi-ndí ichi Xítohó Jesucristú cáháⁿ ndihi-ndo úsá cue tée xíndecu iha, cue tée cáháⁿ ndihi ñáhá-yu mee-ni tnúhu yíñuhu, cue tée ndècu ndihi Espiritú Yá Ndiöxí, mee-ni cuè tée cùtnunì váha iní-xi. Te cue tée-án cuàha-ndí-güedé chiúⁿ cada-güedé dacáhñu-güedé sá cáxí-yu. ⁴ Te nchúhú mee-ni Yá Ndiöxí cáháⁿ ndihi-ndí, te mee-ni tnúhu-gá dacuàha-ndí-yu —càchí-güedé xáhaⁿ-güedé xii-yu.

⁵ Te nchaá-yu ní tní^í-yu tnúhu ní cáháⁿ-güedé, núu ní ndúcú-yu cue tée cada chiúⁿ-án. Te ìⁿ-dé nání-dé Tévá, te ío váha sándáá iní-dé Yá Ndiöxí, te ndècu ndihi-dé Espiritú-gá. Te duha ní

xínani dàva-gá-güedé: té Lìpé, té Pröcoró, té Nicànor, té Tìmon, té Pàrmenás, té Lǎxí tée ñúú Antiòquiá tée ní sándáá iní-xi sá dácuaàha ñáyiú isràèl te vitna ní sándáá iní-dé tnúhu Jèsús. ⁶ Te úsá cue tée-án ñí sáhán-güedé núú cuè tée úxúú ní táuchíúⁿ Jèsús dacuaàha ñaha xii-yu tnúhu-gá, te cue tée úxúú-án ñí cáhán ndihí-güedé Yá Ndiòxí, te ní sacáⁿ ndodo-güedé ndaha-güedé díquí cuè tée úsá-án.

⁷ Te ñáyiú ní sándáá iní tnúhu Jèsús cuáhán-yu titní xichi cáhán-yu tnúhu-gá. Te vai-gá ñáyiú ta sándáá iní-yu tnúhu-gá cuáhán, te ní xíndecú-yu ndihí dava-gá ñáyiú dácuaaha tnúhu-gá ñúú Jerusàlén. Te titní dútú ñí sándáá iní-güedé tnúhu-gá.

Ní tñi-güedé té Těvá

⁸ Te té Těvá ní quide-dé titní núú sǎ vǎ yõo tnàhí ndàcu cada, te ní cuñúhu vihí-yu sá dúcán ñí quide-dé, te ducaⁿ ñí quide-dé chi ndècu ndihí-dé Yá Ndiòxí chindèe ñaha-gá. ⁹ Te ní xíndecu cue tée ní xóo cunu cuechi núú ñí tée tàxi tnuní, te tée tàxi tnuní-án ñǎ ní xõo dañá tnàhí-dé quee-güedé núú chíúⁿ-dě, te ní xinu-ná-güedé. Te sátá xiǎⁿ, te ní dácáá-güedé veñúhu-güedé, te veñúhu-án sáhán ñáyiú ñúú Cirené, ñáyiú ñúú Alejándriá, ñáyiú ñúú Ciliciá, ndihí ñáyiú distritú Àsiá. Te nchaa ñáyiú-án ñí nàa ndihí-yu té Těvá. ¹⁰ Te ñá ní ñihí-yu tnúhu cáhán-yu, chi ío

váha ní sáá díquí-dě nàcuáa ní xáhaⁿ-dě xii-yu, chi Espiritú Yá Ndiòxí ní chindee ñàha-xi xii-dé. ¹¹ Te ní cháhu-yu cue tée ní dácuaándèhnde tnúhu ní cáhán té Těvá núú-yu. Te ní xáhaⁿ-güedé sá cáhán cuèhé-dé cuendá ndíi Moisés ndihí cuendá Yá Ndiòxí. ¹² Te cuendá sá dúcán ñí dácuaándèhnde-güedé núú ní sándáá iní-yu, te ní cudéⁿ-yu núú tǎ Těvá. Te ní cudéⁿ cue tée cùu sacuéhé, te tnàhá cue tée dácuaaha ñaha xii-yu nchaa tnúhu ní chídó tnuní ndíi Moisés ní cudéⁿ-güedé. Te ní sáhán-güedé ní tñi-güedé té Těvá ndécá ñàha-güedé cuáhán núú quidé cuè tée cùchiuⁿ jundá, ndihí cue tée cùu sacuéhé. ¹³ Te ndécá-yu cue tée dácuaandehnde cuáhán núú quidé-güedé jundá, te ní quesaha-ni tùcu-güedé cáhán cuèhé-güedé, te xáhaⁿ-güedé:

—Tée-a mee-ni cáhán cuèhé-dé cuendá veñúhu sá ío cùnuu, veñúhu ní cuu íí, te cáhán cuèhé-dé cuendá nchaa sá ñí chídó tnuní ndíi Moisés. ¹⁴ Te ní tecú dóho-ndí cächí-dé sá Jèsús tée ñúú Nazàrét dangòyo-dé veñúhu càhnu sá ío cùnuu te vá dáñá-gǎ-dé cada-ndí nàcuáa ní cachí ndíi Moisés cada-ndí —cächí-güedé xáhaⁿ-güedé.

¹⁵ Te nchaa cue tée ndècu jundá ní ndacoto váha-güedé núú tǎ Těvá. Te ní dáyèhé-xi núú-dě dàtná quidé-xí núú espíritú xínú cuèchi núú Yá Ndiòxí.

7

Té Těvá xáhaⁿ-dě sá ñà túú cuèchi-dé

1 Te ní xáhaⁿ dütú cúnù-gá xii-dé:

—¿Ndáá tnúhu càháⁿ-güedé cuèndá-n-áⁿ? —càchí-dé xáhaⁿ-dè.

2 Te té Těvá ní xáhaⁿ-dè xii-güedé:

—Nchòhó cue ñaní tnáhà-í ndihì nchòhó cue tée cùu sacuéhé, cundedóho-ndo ìⁿ tnúhu na càháⁿ-í-a. Yá Ndiöxí ío cúnuu-gá, te ní cáháⁿ ndihì-gá ndíi Àbrahám nàcióⁿ Mesopòtamiá cútnáhá vátá quihìⁿ-gá ndíi cundecu ndíi ñúú Hàrán. 3 Te ní xáhaⁿ-gá xii ndíi: “Daña-n nchàa ñaní tnáhá-n, te daña-n ñùhu-n, te quihìⁿ-n ìⁿ xichi núú dánèhé ñáhà-í cundecu-n”, duha ní xáhaⁿ Yá Ndiöxí xii ndíi Àbrahám. 4 Te sátá dúcáⁿ ní xáhaⁿ Yá Ndiöxí xii ndíi Àbrahám, te ní ndee ndíi ñúú Câldeá, te cuáháⁿ ndíi cundecu ndíi ñúú Hàrán. Te sátá ní xihí tàtá ndíi, te ní xáhaⁿ Yá Ndiöxí quixi ndíi cundecu ndíi núú ndécú-ó vitna. 5 Te Yá Ndiöxí ñá túú ní sãñaha-gã ni lùha ñùhu cuu cuendá ndíi núú ní xindecu ndíi. Te ní xáhaⁿ ndáá Yá Ndiöxí xii ndíi sá cuãñaha-gã ñùhu cuu cuendá ndíi, te na cùu ndíi, te ndóo ndihì nchaa ñaní tnáhá ndíi cacu túu ndéé cuèé-gá. Te ducaⁿ ní xáhaⁿ-gã cuèi vátá cündècu-gá ni ìⁿ déhe ndíi.

6 Te ní xáhaⁿ tùcu Yá Ndiöxí xii ndíi Àbrahám sá díú-ní ñaní tnáhá ndíi quihìⁿ-yu núú xicá cündecú-yu cúmí cièndú cuíá, te vá daña-yu queé-yu núú chíúⁿ-yu, te ío dandòho ñaha-güedé núú cündècu-yu. Duha ní xáhaⁿ Yá Ndiöxí xii

ndíi, te ndáá ducaⁿ ní cuu. 7 Te ní xáhaⁿ tùcu Yá Ndiöxí xii ndíi Àbrahám: “Yúhú dandòho-í nchaa ñáyiú na dandòho ñaha xii cue ñaní tnáhá-n. Te ðává-áⁿ te ndee cue ñaní tnáhá-n núú cündècu-yu, te quixí-yu chiñuhu ñáhá-yu xii-í iha”, duha ní xáhaⁿ Yá Ndiöxí xii ndíi Àbrahám, te ndáá ducaⁿ ní cuu. 8 Te Yá Ndiöxí ní quide ndáá-gá ndíi ndíi Àbrahám, te ní xáhaⁿ-gã xii ndíi sá cuãha-güedé seña ñíi nchaa landú tée cuendá cunáhá-yu nàcuáa ndúu sá ní quide ndáá-gá ndihì ndíi Àbrahám. Núu xiãⁿ núú ùná nduu sá ní cacu té Isàác déhe ndíi Àbrahám, te ní sáha ndíi seña ñíi-dé. Te ðiú-ni ducaⁿ ní quide tucu té Isàác déhe-dé té Jàcób, te ðiú-ni ducaⁿ ní quide té Jàcób, chi úxúú déhe-dé ní xindecu, te nchaa-güedé ducaⁿ ní quide-dé. Te ndi úxúú cue tée-áⁿ ní cuu-güedé ñaní tnáhá-ó.

9 Te ìⁿ déhe té Jàcób ní xínani-dè Chèé. Te ñá ní cùu váha iní cue ñaní-dé núú-dé, núu ní díco ñaha-güedé ní queheⁿ ñaha cuè tée cuáháⁿ nàcióⁿ Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. 10 Te ní chindee ñaha-gá xii-dé ní cácu-dé cútnáhá ní ndoho vihi-dé. Te tée yìndaha Egiptú ío ní cudíi iní-dé té Chèé, te ní cutnùní iní-dé sá ío váha túha té Chèé, te ducaⁿ ní cutnùní iní-dé, chi Yá Ndiöxí ní chindee ñaha-gá xii té Chèé. Te ní xáhaⁿ tée yìndaha Egiptú xii té Chèé sá díú tè Chèé coo-dé gobièrnú Ègiptú, te taxi tnùnì-dé nchaa

ñáyi u xinu cuechi núú tē yindaha Egiptú-áⁿ.

11 'Te ní quíhu tnamá nihí nacióⁿ Ègiptú ndihí nacióⁿ Cànaá, te ío ní ndohó-yu. Te nchaa ñaní tnáhá-ó ñí xindecu ndéé sanaha ñá ní xóo níhí-gá-yu sá cáxi-yu. 12 Te ní níhí tē Jácób tnúhu sá ío triú Ègiptú, núu ní tendaha-dē cue déhe-dé ní sáháⁿ-güedé ní sänguaaⁿ-güedé triú-áⁿ, te dává-áⁿ ñí sáháⁿ cue ñaní tnáhá-ó xito díhna nuu nacióⁿ Ègiptú. 13 Te xito cùu uú cuáháⁿ-güedé, te ní xáhaⁿ tē Chèé sá ñaní-dé cúu-güedē. Te tē yindaha Egiptú ní cutnùní iní-dé sá díú-ní ñaní tē Chèé cúu-güedē. 14-15 Te ní cana tē Chèé tātá-dē tē Jácób ndihí nchaa ñaní tnáhá-dē. Te cùu-xi datná únídico sáhúⁿ-yu ndēca tē Jácób cuáháⁿ nacióⁿ Ègiptú núu ndécú tē Chèé, te xiáⁿ ñí quexió-yu ní ngóo-yu. Te yacáⁿ ní xihí tē Jácób ndihí nchaa déhe-dé cue ñaní tnáhá-ó. 16 Te sátá ñí cuu titní cuíá, te ní natava-güedé yiqui ndíi Jácób ndihí nchaa déhe ndíi nchido-güedé cuáháⁿ ñúú Sìquém. Te ndíi Àbrahám sa ní cuu titní-gá cuíá sá ñí nacuaaⁿ ndíi ñuhu núú cué déhe ndíi Hámór. Te xiáⁿ nchíi yaú ní nachindúxi-güedé yiqui-áⁿ.

17 'Te cùtnahá vátá nátava-gá-güedé yiqui cue ndíi, te sa ta tnáhá yatni cada Yá Ndióxi nàcuáa ní xáhaⁿ-gá xii ndíi Àbrahám cada-gá sá cúu-xí ñáyi u isràél ndécú Ègiptú, te ta càyá víhí-yu cuáháⁿ. 18 Te dává-áⁿ chi ingá

tē yindaha nacióⁿ Ègiptú, te ñá túu-gá ní xini-dé nása ní xóo cada ndíi Chèé. 19 Te tē yindaha Egiptú ñá ní quide ndáá-dé, chi ío ní dándóhó-dē ñaní tnáhá-ó ñí xindecu dává-áⁿ. Te ní táuchíuⁿ-dē sá xócuíⁿ-yu dándóo-yu déhe yiquiⁿ cuendá ndihí-güexi cuú. 20 Te dává-áⁿ ñí cacu tē Moisés, te ío ní cudíi iní ñáhá Yá Ndióxi xii-dé. Te ní xindecu ndihí ñaha náná-dē ndihí tātá-dē úní-ni yóo. 21 Te ndēca ñahá-yu cuáháⁿ ingá xichi, te yacáⁿ ní dándóo ñahá-yu xii-dé, te ní naníhí ñahá déhe yoco tē yindaha Egiptú, te ní xito-xi-dé datná xitó-xí ñí déhe mee-xi ñí xito-xi-dé ndéé ní sahnu-dé. 22 Te ní cutúha-dé nchaa sá xini cue tē ègiptú, te ío váha ní sáa díqui-dē tnúhu cáháⁿ-dé ndihí nchaa sá cadá-dē.

23 'Te cùtnahá ndécú-dē údico cuíá-dē, te ní cachí-dé sá quíhíⁿ-dé cáháⁿ ndihí-dé cue ñaní tnáhá-dē ñáyi u isràél. 24 Te ní xini-dé ní caniha ñí tē ègiptú xii ñí tē isràél, te ñá ní cùndee iní-dé cundehe-dē ñúu ní sáháⁿ-dé ní chindee-dē tē isràél, te ní sahni-dé tē ègiptú, 25 chi ní cachí Yá Ndióxi sá díú-dē dacacu-dé, ñaní tnáhá-dē ñáyi u isràél núú cué tē ègiptú. Te ní sani iní-dé sá cùtnùní iní-yu nàcuáa ní xáhaⁿ Yá Ndióxi xii-dé, dico ñá túu ní cùtnumí iní-yu. 26 Te nduu tnēé ní xini-dé nàá úu cue tē isràél, te ñá túu ní tnáhá iní-dé nàá-güedé ñúu ní xáhaⁿ-dē xii-güedé: “¿Ná cuendá ducaⁿ xínáá-ndó? ¿Náa ñá díú ndimee-ndo núu

ducaⁿ xĩnàá-ndó?” Duha ní xáhaⁿ tẽ Moisés xii-güedé. ²⁷ Te tée ndècuéchi ní sáháⁿ-dé ní chindaha ñĩnu-dé tẽ Moisés ìⁿ xio, te ní xáhaⁿ-dè: “¿Ná cúú yòhó nõu véxi-n tàxi tñuní ñáhá-n? ²⁸ Te tñahá-ni tucu yúhú cahni-n dàtná ní sahani-n tẽe ègiptú icu càhaⁿ-n á”, duha ní xáhaⁿ-dè xii té Moisés. ²⁹ Te sá dúcáⁿ ñĩ cáháⁿ tée israhél nõu ní yúhú té Moisés ní xinu-dé cuáháⁿ-dé ní sáá-dé nacióⁿ Mèdián. Yacáⁿ ní ngóo-dé, te yacáⁿ ní tñandaha-dé, te ní cacu úú déhe tée-dé.

³⁰ Te sátá ñĩ xĩnu údico cuía, te ní sáháⁿ té Moisés ìⁿ xio yucu Sinái. Te yacáⁿ ní xiní-dé ìⁿ tñutáu nchicúⁿ ñuhú, te xití itá ñuhú-áⁿ ñĩ xiní-dé yihí ìⁿ espíritú xínú cuèchi núú Yá Ndióxi. ³¹ Te òré ní xiní-dé sá yihí-xí xití itá ñuhú-áⁿ, te ní cuñúhu vihi-dé sá ñĩ xiní-dé espíritú-áⁿ xití itá ñuhú-áⁿ, te ní sándehe-gá-dé, te ní xindéhe vaha-dé. Te ní tecú dóho-dé ní cáháⁿ Yá Ndióxi, te xáhaⁿ-gá xii-dé: ³² “Yúhú cúú-í Ndióxi ní cáháⁿ ndihí cue ñani tñahá-n ndéé sanaha, ndíi Abrahám ndihí ndíi Isàác ndihí ndíi Jácób, ndihí dava-gá cue ñani tñahá-n. Nchaa cue ndíi-áⁿ ñĩ xóo cáháⁿ ndihí-í.” Duha ní xáhaⁿ-gá xii té Moisés. Te ní quidi ñaha-xi xii té Moisés sá ñĩ yúhú-dé, te ñá ní cùyi-gá-dé cundehe-dè tñutáu nchicúⁿ ñuhú-áⁿ. ³³ Te Yá Ndióxi ní xáhaⁿ-gá xii-dé: “Queñuhu chàú-n, chi núú ñúhú ñĩ cuu íj nùtni-n. ³⁴ Te yúhú ndéhè-í sá ío ndòho nchaa ñáyiú cùu cuendá-í,

ñáyiú ndècu nacióⁿ Ègiptú. Te ní tecú dóho-í sá ío ndàhú xícáháⁿ-yu, núu xiáⁿ véxi-í càhí tñuhu-í sá ñuhú-n nacióⁿ Ègiptú cuendá ndeñuhú-n-yu yacáⁿ.” Duha ní xáhaⁿ Yá Ndióxi xii té Moisés.

³⁵ Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tñuní ñáhá-n xii-ndí?” Duha ní xáháⁿ-yu xii té Moisés. Te ñu-ni té Moisés ní tendaha ñaha Yá Ndióxi ní sáháⁿ-dé dacacu-dé ñáyiú israhél nacióⁿ Ègiptú cuèi ñá ní sàndáá iní ñáhá-yu xii-dé. Dico ní taxi tñuní-dé-yu, chi ducaⁿ ñĩ xáhaⁿ-gá òré ní xiní-dé espíritú xínú cuèchi núú-gá xití tñutáu nchicúⁿ ñuhú. ³⁶ Te té Moisés ní ngúita-dé ní quide-dé sá vã yóo tñahí ndàcu cada, te ní cuñúhu vihi-yu sá dúcáⁿ ñĩ quide-dé, te ducaⁿ ñĩ quide-dé Ègiptú ndihí Lámár Tícuèhé. Te ní ngódó núú-dè núú-yu ní queé-yu Ègiptú cuáháⁿ-yu ìⁿ ichi xití yucu núú vã yóo tñahí ndècu, te ní xihí-yu údico cuía xití yucu-áⁿ, te xiáⁿ ñĩ xóo cada-dé sá vã yóo tñahí ndàcu cada. ³⁷ Te ñu-ni té Moisés ní xáhaⁿ-dè xii cue ñani tñahá-dé dàvá-áⁿ: “Yá Ndióxi cada-gá te coo ìⁿ ñani tñahá-ndó ndéé cuèé-gá, te tée-áⁿ cãháⁿ-dé tñuhu-gá núú-ndó dàtná cuini-ndó ñĩ cachí-gá quidé yúhú, te ío xini ñuhu-xi cundedóho-ndo tñuhu cáháⁿ-dé”, duha ní xáhaⁿ tẽ Moisés xii-yu dàvá-áⁿ. ³⁸ Te ñu-ni té Moisés ní xindecu ndihí-dé ñáyiú israhél

xití yucu, te ní sáá-dé yucu Sinái, te xíáⁿ nǐ quixi ìⁿ espíritú xínú cuèchi núú Yă Ndiôxí ní cáháⁿ ndihi ñaha-xi xii-dé, te yàcáⁿ ní dâcuáhá ñaha-xi tnúhu-gá, te diu-ni tnúhu-áⁿ nǐ ndóo dàcuaha-o.

39 'Te cue ñani tnáhá-ó nǐ xíndecu ndéé sanaha ñă nǐ sândáá iní-yu té Moisés, te ñá ní ndée iní ñáhă-yu xii-dé, chi ní cuiní-yu nuhú tucú-yu ñúú Ègíptú cundecú-yu. 40 Te òré ndécú tē Moisés yucu ní xáhăⁿ-yu xii ñani-dé té Àrón: "Cadúha-n ìⁿ úú ndiôxí dǐhúⁿ cuááⁿ codonùu núú-ó cùhuⁿ-o ichi, chi ñá túú cùtnumí iní-ó ndéé ichi cuáháⁿ té Moisés, téé yòdo nuu núú-ó ndùu ní quee-o Ègíptú", duha ní xíi-yu té Àrón. 41 Te dàvá-áⁿ nǐ cadúha-güedé ìⁿ chěhlu mee-ni dǐhúⁿ cuááⁿ, te ní sahní-güedé ìⁿ úú quiti nchìto ní quide càhnu-güedé chěhlu-áⁿ. Te ío ní cudǐ iní-yu quiti-áⁿ, chi ní cachí-yu sá díú-ní ndiôxí cúú-dí. 42 Te sá dúcáⁿ nǐ quidé-yu, xǐáⁿ ní dáñá ñaha Yă Ndiôxí xii-yu. Te ní dáñá-gă ní xóo cada càhnú-yu nchíanchii, ndihi yóó, ndihi nchaa chódíní. Te duha ní chídó tnùnǐ ìⁿ téé ní xóo cáháⁿ tnúhu Yă Ndiôxí ndéé sanaha nâcuáa ní xáhaⁿ-gă xii ñáiyu dàvá-áⁿ:

Nchòhó ñáiyu isràél, ní cuu údico cuíá yǐhí-ndó yùcu,

te ní sahní-ndo quiti-ndo ní quide càhnu ñaha-ndo xii-í cáháⁿ-ndó, dico ñáhă chi ní sahní-ndo-güedé ní

quide càhnu-ndo sá nǐ cadúha mee-ndo.

43 Te ní cadúha-ndo ìⁿ veñúhu lǐhli,

te ní sanutnǐ-ndo Mòlóc sá càchí-ndó cùu ndiôxí-ndó xica nchido-ndo xití yucu,

te ní cadúha-ndo ìⁿ chódíní, te quiti-áⁿ càchí-ndó sá cúú-dí ndiôxí Rènfan, te ndi ndùú sá nǐ cadúha-ndo-áⁿ nǐ quide càhnu-ndo.

Te cuendá sá dúcáⁿ nǐ quide-ndo te yúhú queñuhu ñaha-í xii-ndo quǐhíⁿ-ndó cundecu-ndo ingá xio nacióⁿ Babiloniá.

Duha ní xáhaⁿ Yă Ndiôxí xii-yu, te ducaⁿ nǐ chídó tnùnǐ téé ní xóo cáháⁿ tnúhu-gá.

44 'Te xití yucu-áⁿ nǐ dácáá-güedé ìⁿ veñúhu vehe dóó. Te vehe-áⁿ nǐ cuu-xi ìⁿ sá cùtnùnǐ iní-yu sá Yă Ndiôxí ndécú ndihí ñaha-gá xii-yu. Te vehe-áⁿ nǐ dácáá-güedé nâcuáa ní xáhaⁿ Yă Ndiôxí xii té Moisés, chi ní dánèhé ñáhă-gă xii-dé nâcuáa dacàa-güedé. 45 Te sátá nǐ xíhí nchaa cue téé-áⁿ, te ní ndóo ndihi nchaa déhe-güedé veñúhu-áⁿ. Te ní xido tucu-güedé veñúhu-güedé cuáháⁿ-güedé, te cuáháⁿ ndihi-güedé té Jòsué núú cundécú-yu. Te sátá nǐ quexió-yu, te ní dácúnǐ-yu ñáiyu dii ñúú-xi-áⁿ chi mee Yă Ndiôxí ní chindee ñaha-gá xii-yu. Te sátá nǐ ndihi nchaa ñáiyu ní xica nchido veñúhu dóó-áⁿ nǐ xíhí, te ní ndóo ndihi dava-gá-yu. Te ducaⁿ-ni ndécú-xi ní cacu té

Dàvií, téé ní xíndaha ñàha xii-yu. ⁴⁶ Te Yá Ndiöxí ní cudíí víhí iní-gá té Dàvií. Te ní xícáⁿ tnúhú-dě núú-gã nõu cuu dacàa-dé veñúhu cuu cuendá-gá, chi ñⁿ-ní Yá Ndiöxí ní xóo cada càhnu té Dàvií ndihi té Jàcób, ñaní tnáhá-ó ní xíndecu ndéé sanaha vihi-gá. ⁴⁷ Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salómón, chi ní dàña-gã ní dácáá-dě veñúhu cuu cuendá-gá ⁴⁸ cuèi ñá túú sácúndecu-gá veñúhu dàcaa cue téé ñuyúú-a, chi ndèni xiáⁿ ndécú-gã chi espíritú cúú-gã. Te duha ní chídó tnùní téé ní xóo cáháⁿ tnúhu Yá Ndiöxí ndéé sanaha nàcuáa ní cáháⁿ-gá:

⁴⁹ Yúhú táxí tnùní-í andiũ ndihi ñuyúú,
te xiáⁿ nõu nchòhó vá ndácú-ndó chihí ñaha-ndo xití veñúhu dàtná quidè-yu sá cächí-yu cùu ndiöxí-yu ní cadúha-yu.

Te ñá túú xìni ñuhu-í núú ndétátú-í,
⁵⁰ chi yúhú ní cadúha-í nchaa sá ió ñuyúú-a.

Duha ní cáháⁿ Yá Ndiöxí, te diu-ni ducaⁿ ñí chídó tnùní téé ní xóo cáháⁿ tnúhu-gá —duha ndèu nchaa tnúhu ní xáhaⁿ tẽ Těvá xii-güedé.

⁵¹ Te ní xáhaⁿ tùcu-dé:

—Nchòhó, ió sáa iní-ndó chi quide-ndo datná quidé ñayiu ñá túú cùu ñayiu isràél chí ñá túú tédóho-ndo tnúhu càháⁿ Yá Ndiöxí, chi ñá cuíní-ndó quíndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó

ñí xíndecu ndéé sanaha. ⁵² Chi cue téé-áⁿ ió ní xóo dandóho-güedé nchaa cue téé ní xóo cáháⁿ tnúhu Yá Ndiöxí ndéé sanaha. Te ní sahani-güedé nchaa cue téé ní cáháⁿ sá quixí Crístú ñuyúú-a, te Yaá-áⁿ ñà túú cuèchi-gá. Te diu-ni ducaⁿ ñí quide-ndo Crístú cúnàhá ní quixi-gá ñuyúú-a, chi ní sáha cuendá-ndó-gã núú cuè téé ní cuu úhú iní ñáhá xii-gá ní sahani ñaha-güedé. ⁵³ Te ndècu ndihi-ndo tnúhu ní chídó tnùní ndíi Moisés nàcuáa ní xáhaⁿ espíritú xínú cuèchi núú Yá Ndiöxí xii ndíi, te ni dùcaⁿ ñá túú sàndáá iní-ndó tnúhu-áⁿ nõu ní sahani-ndo Jěsús. Te diu-ni tnúhu-áⁿ ndécú ndihi-ndo ndéé vitna —cächí té Těvá xáhaⁿ-dẽ xii-güedé.

Ní sahani-güedé té Těvá

⁵⁴ Te sá dúcáⁿ ñí xáhaⁿ tẽ Těvá xii-güedé, te ní cudééⁿ víhí-güedé núú-dě, núú ní quide rúhñú-güedé núhu-güedé sá sàtú iní-güedé.

⁵⁵ Te té Těvá ndécú ndihi-dé Espíritú Yá Ndiöxí, te ní ndacoto váha-dé andiũ, te ní xiní-dé súmí dátasaⁿ-xi núú ndécú Yá Ndiöxí, te ní xiní-dé Xítóhó Jesucristú nútnñ-gá xio cùha Yá Ndiöxí. ⁵⁶ Te ní xáhaⁿ tẽ Těvá xii-güedé:

—Chí cündèhe andiũ chi yúhú ndèhé-í Xítóhó Jesucristú nútnñ-gá xio cùha Yá Ndiöxí, te diu-gá cúú-gã ñaní tnáhá-ndó nchaa-ndo —cachí-dé xáhaⁿ-dẽ.

⁵⁷ Te ní sadí-güedé dóho-güedé cuendá sá ñá ní tnáhá iní-güedé cundédóho-güedé tnúhu càháⁿ-dẽ,

te uuⁿni ní cuáá-güedé, te ní taxi ndaha ñàha-güedé xii-dé⁵⁸ ndécá ñàha-güedé cuáháⁿ ndéé ìⁿ xio yuhu ñùú, te yàcáⁿ ní sáñaha-güedé yúú xii-dé. Te ndècu ìⁿ téé cuechi nàni-dé Sàulú, te téé-áⁿ ñí quide cuendá-dé dóó-güedé cuendá ní nune ndaha-güedé ní sáñaha-güedé yúú xii té Těvá. ⁵⁹ Te òré sáñaha-güedé yúú, te ní cáháⁿ ndihí-dé Xítóhó Jesucristú te xáhaⁿ-dè:

—Yòhó Xítóhó Jesucristú, naqueheⁿ-n ìní-í —càchí-dé xáhaⁿ-dè xii-gá.

⁶⁰ Te ní nguíñí xítí-dè, te níhi ní cáháⁿ-dè, te xáhaⁿ-dè:

—Yòhó Xítóhó Jesucristú, vá técuèchi-n cuè téé-a sá dúhá quide ñaha-güedé xii-í —càchí-dé xáhaⁿ-dè xii-gá.

Te xíáⁿ-ná ní cáháⁿ-dè, te ní xihí-dé.

8

Té Sàulú chíhí-dè ñáyíu sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá ñí sahani-güedé té Těvá.

Te ñíu-ni nduu-áⁿ ñí cuu níhi cuendá nchaa ñáyíu sàndáá iní-xi tnúhu Jèsús ñúú Jerusálén. Te ní ndihí-yu ní xité nuu cuáháⁿ-yu distritú Júdeá ndihí distritú Sàmariá. Te cue téé ní táuchíúⁿ Jèsús dácuàha ñaha xií-yu tnúhu-gá ní ndóo-güedé ñúú Jerusálén.

² Te nchaa cue téé càháⁿ ndihí Yá Ndióxi ní chindúxi-güedé ndíi Těvá. Te ío ní ndáhyú ñáyíu ní sàndáá iní tnúhu Jèsús sá ñí xihí ndíi. ³ Te té Sàulú ío dàndoho-dé-yu, chí

ndí vehe ndí vehe cuáháⁿ-dè cuátní-dé cuèi téé cuèi ñadihí ndécá-dè cuáháⁿ vecaá.

Càháⁿ-yu tnúhu Yá Ndióxi distritú Sàmariá

⁴ Te nchaa ñáyíu ní xité nuu cuáháⁿ-yu càháⁿ-yu tnúhu Jèsús nchaa núú quexió-yu.

⁵ Te té Lìpé cuáháⁿ-dè distritú Sàmariá càháⁿ-dè tnúhu Xítóhó Jesucristú Yaa ní tendaha Yá Ndióxi ní quixi ñuyíú-a. ⁶ Te ío vài núú sá vǎ yóo tnàhí ndàcu cada ní quide-dé, te ní cuñúhu vihí-yu, te ní xíndedóho váha-yu nchaa tnúhu ní cáháⁿ-dè. ⁷ Te vài ñáyíu yìhi ñaha espíritú cundíhi yucu ñávàha ní queñuhu-dé nchaa espíritú-áⁿ yiqui cuñú-yu, te ní cana saa-xi òré ní ndee-xi yiqui cuñú-yu cuáháⁿ-xi, te ní ndúha-yu. Te vài ñáyíu cùhú ñá cúú-gǎ candá nihnú-yu ndihí ñáyíu yacua ní quide tátna-dé, te ní ndúha-yu. ⁸ Te sá dúcáⁿ ñí cáháⁿ-dè tnúhu Jèsús te ní quide tátna-dé-yu, xíáⁿ ío ní cudíí ìní ñáyíu ñúú-áⁿ.

⁹ Te ñíu-ni ñúú-áⁿ ndécú ìⁿ téé nàni Xímú, te téé-áⁿ xíní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyíu distritú Sàmariá sá dúcáⁿ quide-dé, te ní cachí-dé sá díú-ní-dè cúnúu. ¹⁰ Te nchaa ñáyíu cuèi ñáyíu cuica te cuèi ñáyíu ndàhú ío nèhé-yu sá yíñùhu núú-dè, te xítnàhá-yu:

—Téé-áⁿ ío chìndeę ñaha Yá Ndióxi xii-dé nuu vài núú sá quide-dé —càchí-yu xítnàhá-yu.

11 Te ní sándáá iní-yu nàcuáa ní xóo cada ndùu-dé, te ní xóo cuñúhu vîhí-yu, te ní cuu naha dùcaⁿ-ni dandahú ñáhá-dě xii-yu. 12 Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xii-yu sá Yă Ndiöxí cuini-gá ndihu ndaha ñaha-gá xii-yu. Te cuëi téé cuëi ñadihi ní sándáá iní-yu tnúhu-gá, te ní sanduté-yu. 13 Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndihi té Lìpé, te ní cuñúhu-dé chi titní núú sá vā yōo tnàhí ndàcu cada ní quide té Lìpé, te ní cuñúhu vîhi nchaa ñayiu.

14 Te dava-gá cue téé ní táuchíúⁿ Jèsús dacuàha ñaha xii ñayiu tnúhu-gá ní níhí-güedě tnúhu sá ñayiu distritú Sàmariá ní sándáá iní-yu tnúhu Yă Ndiöxí. Te ní tendaha-güedě té Pèlú ndihi té Juàá cuáháⁿ-güedé distritú Sàmariá. 15 Te ní quexìo-güedé, te ní cáháⁿ ndihi-güedé Yă Ndiöxí ní xicáⁿ-güedé Espiritú-gá quixi cundecu ndihí-yu. 16 Chi ni ñⁿ-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. 17 Te òré ní sacáⁿ ndodo-güedé ndaha-güedé díquǐ-yu, te ní quexìo Espiritú-gá ní ngúndecu ndihí-yu.

18 Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuini-dé cuáñaha-dě díhúⁿ xii té Pèlú

ndihi té Juàá ní cùu. 19 Te ní xáhaⁿ-dě:

—Chindee ñàha-ndo cuendá ndèda-ni càá-yu cacáⁿ ndodo-í ndaha-í díquǐ-yu, te níhí-yu Espiritú Yă Ndiöxí cundecu ndihí-yu —càchí-dé xáhaⁿ-dě xii-güedé.

20 Te té Pèlú ní xáhaⁿ-dě xii-dé:

—Yòhó cuíta nihnu-n ndihí díhúⁿ-n, chi cuini-n cuáaⁿ-n sá vāha quide Yă Ndiöxí. 21 Yòhó vá cúú càda-n chiuⁿ quide-ndí, chi ñá túú ndècu váha iní-n núú Yă Ndiöxí. 22 Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n núú Yă Ndiöxí sá ná càdá càhnu iní-gá tnúhu ní cáháⁿ-n. 23 Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dě xii té Xímú.

24 Te ní xáhaⁿ tē Xímú xii-güedé:

—Cáháⁿ ndàhú-ndó núú Yă Ndiöxí sá ñà túú nă tnahá-í sá dúcáⁿ ní cáháⁿ-í —càchí-dé xáhaⁿ-dě.

25 Te té Pèlú ndihi té Juàá ní cáháⁿ-güedé tnúhu Yă Ndiöxí núú ñayiu ñuú-áⁿ. Te ní xáhaⁿ-güedě nchaa nàcuáa ní quide Jèsús ní xiní-güedé òré ní xica cuu-gá ñuyíú-a. Te ní tñi-güedé ichi cuánuhú-güedé ñuú Jerusálén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihi ñⁿ téé ñuú Etiópía

26 Te ñⁿ espíritú xínú cuèchi núú Yă Ndiöxí ní quexìo-xi

ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñuú Gázá, dico mee-ni xítí yucu cuáháⁿ ichi — cächí-xi xáhaⁿ-xi xii-dé.

27 Te ní xica-dé cuáháⁿ-dé, te ní natnahá-dé ìⁿ té nacióⁿ Etiopía ñúhú-dě ichi. Te cùu-dé tesorèrú xínú cuèchi-dé núú ìⁿ ñadihi ñaha yindaha nacióⁿ Etiopía, te ñaha-áⁿ nání-áⁿ Cándacé. 28 Te té etiopía-áⁿ ní sáháⁿ-dé ñuú Jerusalén ní cáháⁿ ndihi-dé Yá Ndiöxí, te ñuhu-dé ichi cuánuhú-dé ñuú-dé ñúhú-dě carretà, te dâcuaha-dé tnúhu ní chídó tnùní ndii Chàíá té ní xóo cáháⁿ tnúhu Yá Ndiöxí ndéé sanaha. 29 Te ní xáhaⁿ Espiritú Yá Ndiöxí xii té Lìpé:

—Quíhíⁿ tuha-n càrretá-áⁿ —cächí Espiritú-gá xáhaⁿ-xi xii-dé.

30 Te té Lìpé ní sátuha-dé carretà-áⁿ, te ní tecú dóho-dé nâcuáa cáháⁿ té etiopía-áⁿ, té ñuhu carretà-áⁿ dâcuaha-dé nâcuáa ní chídó tnùní ndii Chàíá. Te ní xáhaⁿ tē Lìpé xii té etiopía-áⁿ:

—¿Tècú tnùní-n nchàa tnúhu dâcuaha-n-áⁿ? —cächí té Lìpé xáhaⁿ-dē xii-dé.

31 Te ní xáhaⁿ tē etiopía:

—¿Nása tecú tnùní-í te vá yõo dânehé ñáhá xii-í? Ta quène iha coo-n chi danèhé ñáhá-n —cächí-dé xáhaⁿ-dē xii té Lìpé.

Te cuáaá té Lìpé núú carretà ní ngóo-dé. 32 Te ndédóho-dé nâcuáa dâcuaha té etiopía-áⁿ nâcuáa ní chídó tnùní ndii Chàíá núú tütú Yá Ndiöxí núú cächí-xi:

Dàtná quidé ìⁿ mbéé cada-dé òré can-deca ñaha-güedě xii-dé quíhíⁿ cahni ñaha-güedě chi ñá túú nã cada-dé,

dàtná cuíní-ndó quide mbéé òré dèté-di ñá túú ndáhí-di ducaⁿ càda-dé òré cahni ñaha-güedě chi ni vã cáháⁿ-dé.

33 Te mee-ni cùdiquí ndeé ñáhá-güedě xii-dé, te ni vã ndúcú tnúhu-güedé núú-dě nõu ndáá ndècuèchi-dé.

Te ío cuu nduu cuihna ìní cue ñaní tnáhá-dē, chi cahni ñaha-güedě xii-dé ñuyíú-a.

Duha cáháⁿ tutú ní dâcuáhá tē etiopía ní xindedóho té Lìpé.

34 Te ní xáhaⁿ tùcu té Etiopía xii té Lìpé:

—Cundee ìní-n cächí tnúhu-n yõo cacunehe té ní cáháⁿ tnúhu Yá Ndiöxí ndéé sanaha, núu cáháⁿ-dé cuendá méé-dě àdi cáháⁿ-dé cuendá ingá ñáyiú —cächí té etiopía-áⁿ xáhaⁿ-dē xii té Lìpé.

35 Te té Lìpé ní cani-dé cuendú núú tē etiopía nâcuáa ní cáháⁿ ndii Chàíá nâcuáa cada Jèsús òré quixi-gá ñuyíú-a. Te ní xáhaⁿ-dē nâcuáa nduu tnúhu Jèsús ndii nâcuáa ní quide-gá. 36 Te ñuhu-güedě ichi cuáháⁿ-güedé ní naníhí-güedě ìⁿ xichi núú ñúhú ndùte, te ní xáhaⁿ tē etiopía:

—Iha ñuhu ndute, ¿te vá cúú cuàndute-í iha-áⁿ? —cächí-dé xáhaⁿ-dē xii té Lìpé.

37 Te xáhaⁿ tē Lìpé:

—Te núu sàndáá ndisa iní-n Jèsús, te cuu cuandute-n — cächí-dé xáhaⁿ-dě.

Te ní xáhaⁿ tée etiòpiá:

—Sàndáá ndisa iní-í sá Dèhe Yá Ndiöxí cúu Xítohó Jesucristú — cächí-dé xáhaⁿ-dě.

³⁸ Te ní ngani-dé carrètá, te ní nuu-güedé ndi ndúú-güedé, te cuánguee-güedé xití ndute, te ní dácuanđute ñaha té Lìpé xii-dé. ³⁹ Te òré ní nene-güedé xití ndute, te ndèca ñaha Espíritú Yá Ndiöxí xii té Lìpé cuáháⁿ. Te ñá túú ní xini tée ní sandute-áⁿ ndéé ichi cuáháⁿ té Lìpé. Te ío ní cudíí iní-dé sá ñí natuha-dé ichi Yá Ndiöxí, te cuándaa-dé núú carrètá-dé cuánuhú-dé. ⁴⁰ Te ní quexìo té Lìpé ñuú Àzotó, te ndi tnahá ñuú ndi tnahá ñuú cuáháⁿ-dé cáháⁿ-dé tñuhu Yá Ndiöxí, te ní yáha-dé cuáháⁿ-dé ní quexìo-dé ndéé ñuú Cèsareá.

9

Té Sàulú ní tuha-dé ichi Xítohó Jesucristú

(Hch. 22:6-16; 26:12-18)

¹ Te té Sàulú mee-ni cáháⁿ cuèhé-dé cuendá ñáyiu ní sàndáá iní tñuhu Jèsús, te cuìní-dé cahni ñaha-dé xií-yu. Te ní sáháⁿ-dé núú dütú cúnüu-gá, ² te ní xáhaⁿ-dě sá cádüha dütú-áⁿ ìñ tutú canehe-dé quíhíⁿ cuáha-dé cue tée xindeé nchito veñúhu ñuú Dàmascú, chi cuìní-dé tñi-dé nchaa ñáyiu dàcuaha tñuhu Xítohó Jesucristú candeca ñaha-dé quíhíⁿ ñuú Jerusalén. ³ Te ní xica-dé cuáháⁿ-dé tá cüyatni-dé ñuú Dàmascú, te uuⁿni ní quee ñuhú andiu, te ní dáyèhé-xi

ndéé núú nütñi-dé. ⁴ Te ní nduá-dé ndéé ñuhu, te ní tecú dóho-dé cáháⁿ ìñ sá cáháⁿ núú ñnu, te xáhaⁿ-xi xii-dé:

—Yòhó Sàulú, ¿ná cuendá cúu úhú iní ñáhá-n xii-í te dándoho ñaha-n? — cächí sá cáháⁿ-áⁿ xáhaⁿ-xi xii-dé.

⁵ Te ni xáhaⁿ-dě:

—¿Ná cúu yòhó sá cáháⁿ-áⁿ-í? — cächí-dé xáhaⁿ-dě.

Te ní xáhaⁿ sá cáháⁿ xii-dé:

—Yúhú cúu-í Jèsús tée cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-áⁿ nñu na cuxi-güedé-di puyá te sáha-di patadá núú-xi, te quide úhú-di mee-di. Te ducaⁿ sätnahá-xi cùu yohó chi ñá túú sàndáá iní ñáhá-n xii-í — cächí sá cáháⁿ-áⁿ xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ñí yùhú-dé, te ní xáhaⁿ-dě:

—Xítohó Jesucristú, ¿te ná cuìní-n càda-í-í? — cächí-dé xáhaⁿ-dě.

Te Jèsús ní xáhaⁿ-gá xii-dé:

—Ndacóo, te quíhíⁿ-n ñuú-áⁿ, te yacáⁿ tecú tñuhu-n nã cúu sá cádá-n — cächí-gá xáhaⁿ-gá xii-dé.

⁷ Te cue tée cuáháⁿ ndihí té Sàulú ní tecú dóho-güedé cáháⁿ ìñ sá cáháⁿ, dico vá yòo tñahí ni xini-güedé, te ní yùhú víhí-güedé, te ñá túú tñahí ni cáháⁿ-güedé. ⁸ Te ní ndacóo té Sàulú, te ñá ní cùu-gá cundehe-dé, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú. ⁹ Te yacáⁿ ní xindecu-dé úní nduu, te ñá ní cùu tñahí cundehe-dé, te ñá

túu nã ní xèxi-dé, te ñá túu ní xihí-dé ndute.

10 Te ndècu téé sàndáá iní tnúhu Jèsús ñúú Dàmascú, nání-dé Anàniás, te ní sáháⁿ Jèsús núú sání-dé, te ní xáhaⁿ-gã xii-dé:

—¡Anàniás! —càchí-gá xáhaⁿ-gã.

Te ní xáhaⁿ-dë:

—¿Yúhú càháⁿ ndihi-n-ãⁿ?
—càchí-dé xáhaⁿ-dë.

11 Te ní xáhaⁿ-gã:

—Ndacuíñí, te quíhíⁿ-n ìⁿ chiuⁿ ichi núú dánàni-güedé Ichi Ndáá, te yacáⁿ nanducu-n vehe té Jüdás, chi vehe téé-án ndécú ìⁿ téé ñúú Tàrsú nání-dë Sàulú, te téé-án sa càháⁿ ndihi ñaha-dë xii-í. 12 Te téé-án ní dácótó ñaha-xi sá ní xiní ñáhá-dë xii-n ní quexio-n núú ndécú-dë, te ní sacáⁿ ndodo-n ndàha-n díquí-dë, te ducaⁿ te ní nacaáⁿ núú-dë ní dácótó ñaha-xi xii-dé —càchí-gá xáhaⁿ-gã.

13 Te té Anàniás ní xáhaⁿ-dë:

—Yòhó Xítohó Jesucristú, càchí tnúhu-í xii-n sã ní níhí-í tnúhu nàcuáa quide-dé sá ïo quide úhú-dé ñáyiu càháⁿ ndihi-n ñúú Jerusalén. 14 Chi nèhe-dé tutú ní sáñaha cuè dútú cúnùu cuendá níhí-dë nàcuáa cada-dé tñi-dé nchaa ñáyiu sàndáá iní ñáhá xii-n —cachí-dé xáhaⁿ-dë xii-gá.

15 Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndihi-dé, chi cuíní-í cada-dé chiúⁿ-í, quíhíⁿ-dé càháⁿ-dé tnúhu-í núú cuè ñáyiu isràél, ndihi núú cuè ñáyiu ñá túu cùu ñáyiu isràél, ndihi núú cuè téé yìndaha ñaha xií-yu.

16 Te yúhú cúñaha-í xii-dé sá ndóhó vîhi-dé cuendá-í —càchí-gá xáhaⁿ-gã xii té Anàniás.

17 Te cuáháⁿ té Anàniás vehe núú ndécú tè Sàulú te ní sacáⁿ ndodo-dé ndaha-dé díquí tè Sàulú, te ní xáhaⁿ-dë:

—Yòhó té Sàulú téé ndècu ndihi-í ichi Xítohó Jesucristú, ñu-ni Xítohó Jesucristú Yaa ní càháⁿ ndihi ñaha xii-n ichi ní tendaha ñaha-gá véxi-í cuendá cacáⁿ táhù-í núú-gã cuendá-n te ndúha núú-n, te dàtnùní quixi Espiritú-gá cundecu ndihi-n —càchí-dé xáhaⁿ-dë.

18 Te dàtná sá ní xócání-ó ìⁿ sá ndedí núú-dë ní quide ñaha-xi xii-dé, te ní nacaáⁿ núú-dë, te ní sandute-dé.

19 Te ní xexi-dé, te ní naníhí ndéé-dë, te titní nduu ní xíndecu ndihi-dé ñáyiu ní sàndáá iní tnúhu-gá ñúú Dàmascú.

Té Sàulú dácuaⁿ-ha-dé ñáyiu tnúhu Yá Ndióxi ñúú Dàmascú

20 Te sáta ní ndúha núú-dë, te ní sáháⁿ-dé veñúhu cuè ñáyiu isràél ní xáhaⁿ-dë sá Jèsús cúú-gã Déhe Yá Ndióxi. 21 Te nchaa ñáyiu ní xíndedóho tnúhu ní càháⁿ-dé, te ní cuñúhu vîhí-yu, te ní xítñahá-yu:

—Ñu-ni téé-ãⁿ ní sahani-dé ñáyiu ní xóo chiñúhu ñaha xii Jèsús ñúú Jerusalén. Te ní quixi-dé iha ní cuíní-dé tñi ñaha-dë xií-yu candeca ñaha-dë quíhíⁿ núú cuè dútú cúnùu ní cuu —cachí-yu xítñahá-yu.

22 Te ió iní-gá té Sàulú xáhaⁿ-dë xií-yu sá díú Jèsús

cúu-gă Cristú Yaá ní tendaha Yă Ndiôxí ní quixi ñuyíu-a, te xíáⁿ ñá ní ñíhí ñăyiu isràél ndécú ñúú Dàmascú tnúhu cáháⁿ-yu, te ní cuñúhu vihí-yu.

Té Sàulú ní dáxió-dě núú ñăyiu isràél

²³ Te sátá ñí cuu títí nduu, te ní ndatnúhu cue té isràél sá cáhni-güedě té Sàulú. ²⁴ Te té Sàulú ní níhí-dě tnúhu nàcuáa cáháⁿ-güedě cada ñaha-güedě xii-dé, te cuèi nduu cuèi niú néhé cuèndá-güedě yuyèhe núú ñúdòco ndóho yuhu ñúú cuèndá cuèni-güedě tñi ñaha-güedě xii-dé te cahni ñaha-güedě. ²⁵ Te ñí niú ndécá ñaha cue té ní sándáá iní-xi tnúhu Jèsús cuháⁿ ndéé núú ñúdòco ndóho yuhu ñúú. Te ní sáá-güedě núú ndóho, te ní chihi ñaha-güedě xii-dé xití tídihi te ní dánděe ñaha-güedě núú ñúhú, te ní quene-dé cuháⁿ-dé.

Te Sàulú ndécú-dě ñúú Jerusálén

²⁶ Te té Sàulú ní nasáá-dé ñúú Jerusálén, te cuèni-dé chitnahá-dé ñăyiu sándáá iní tnúhu Jèsús, te ní yùhú-yu chi ní cáháⁿ-yu sá dándàhú ñáhá-dě sá sándáá iní-dé Jèsús. ²⁷ Te té Bèé ndécá-dě té Sàulú cuháⁿ núú ndécú cue té ní táuchíuⁿ Jèsús dacuàha ñaha xii-yu tnúhu-gá. Te ní cani té Bèé cuèndú núú-güedě nàcuáa ní cuu ní naníhí tnáhá tē Sàulú ndihi Jèsús ichi, te ní cáháⁿ ndihi ñaha-gă xii-dé. Te ní xáhaⁿ tùcu té Bèé nàcuáa ní cáháⁿ té Sàulú tnúhu Jèsús núú ñăyiu Dàmascú, te ñá túú tnàhí

ní yùhú-dé ní cáháⁿ-dé, cächí té Bèé xáhaⁿ-dě xii-güedě. ²⁸ Te ní xíndecu té Sàulú ndihi ñăyiu xídacuáhá tnúhu-gá ñúú Jerusálén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ní yùhú-dé ²⁹ ní cáháⁿ ndihi-dé ñăyiu isràél ñăyiu cáháⁿ tnúhu griégú. Te ñăyiu-áⁿ ñí ngúita-yu ndàtnúhu-yu sá cáhni ñáhá-yu xii-dé. ³⁰ Te ñăyiu sándáá iní tnúhu-gá ní níhí-yu tnúhu nàcuáa cuèni ñăyiu cáháⁿ tnúhu griégú cada ñáhá-yu xii té Sàulú, núu ní sándeca ñáhá-yu xii-dé ñúú Cèsareá, te yàcáⁿ ní tendaha ñáhá-yu cuánuhú-dé ñúú Tàrsú.

³¹ Te sátá xíáⁿ te ní sanaá-yu ñá túú-gă ní xòo cada úhú-yu nchaa ñăyiu sándáá iní tnúhu Jèsús nihíi distritú Jùdeá, ndihi distritú Galileá, ndihi distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yă Ndiôxí cadá-yu, te ío ní xíndecu yíñhú-yu núú-gă, te Espiritú-gá ní chindee ñaha-xi xii-yu, te vâi-gá ñăyiu ní sándáá iní-yu tnúhu-gá.

Té Pèlú ní quide tátna-dé té Èneás

³² Títí xichi ní sáháⁿ té Pèlú ní cáháⁿ-dé tnúhu Yă Ndiôxí. Te ñí nduu ní sáháⁿ-dé ñúú Lidá ní cáháⁿ ndihi-dé ñăyiu sándáá iní ñáhá xii Jèsús. ³³ Te yàcáⁿ ní naníhí-dě ñí tée nàni Èneás, te ní cuu úná cuíá cùhú-dé, te ni lùha ñá cúu-gă candá nihnu-dé. ³⁴ Te ní xáhaⁿ tē Pèlú xii-dé:

—Èneás, Xítohó Jesucristú cada tátna ñaha-gã xii-n tnàvíí. Ndacóo te ndocani-n yüu-n —cachí-dé xãhaⁿ-dë.

Te òré-ni ní ndacóo-dé, 35 Te nchaa ñáyiü ñuú Lidá ndihi ñáyiü ñuú Sàrón ní xiní-yu sá ñí ndúha-dé, te ní sándáá víhí iní-yu Xítohó Jesucristú.

Ní ndoto tá Dòrcás

36 Te ñuú Jòpé ndécú ñⁿ ñadihí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xãhãⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiü ndàhú. 37 Te váha-ni ndècu-aⁿ ní cuu, te ní tní ñaha cuèhé ní xíhí-aⁿ, te ní nadacùchi ñahá-yu, te ní chihi ñahá-yu ñⁿ cuártú ndécú ndéé núú ñnu. 38 Te ñáyiü ní sándáá iní tnúhu Jèsús ñuú Jòpé ní níhí-yu tnúhu sá ndécú tè Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue té cuáháⁿ-güedé núú ndécú-dé cuèndá cúñaha-güedé can-deca ñaha-güedé xii-dé quíhíⁿ núú ndécü-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñuú-ndí, chí yacáⁿ cáná ñahá-yu quíhíⁿ-n tnàvíí —cachí-güedé xãhaⁿ-güedé xii té Pèlú.

39 Te té Pèlú ní xica-dé cuáháⁿ-dé ndihi cue téé-áⁿ ñuú Jòpé, te òré ní quexìo-güedé ndihi-dé, te cuásá ndihi ñaha-güedé cuártú ndéé núú ñnu. Te nchaa ñáyiü dìhí ñáyiü quèé ní tacá ndéé ñahá xii ndíyi-áⁿ

xíndáhyú-yu, te ní dánèhé ñahã-yu nchaa dóo ñí cadúha ñaha ní xíhí-áⁿ. Chí ní xóo cadúha-aⁿ dícúⁿ, te ní xóo cadúha-aⁿ dío òré ní xíndecu-aⁿ ñuyíú-a, te nchaa xíãⁿ ní dánèhé ñahã-yu xii té Pèlú. 40 Te té Pèlú ní xáhaⁿ-dé sá quèé-yu nchaa-yu quehé, te ní queé-yu. Te ní ngüñí xítí-dé te ní cáháⁿ ndihi-dé Yã Ndiõxí, te dãtnùní ní ndacoto-dé núú cándòdo ndíyi-áⁿ, te ní xáhaⁿ-dë:

—Tàbitá, ndacóo —cachí-dé xãhaⁿ-dë.

Te ní ndacoto-aⁿ núú tè Pèlú te ní ndacóo-aⁿ, 41 Te ní tní-dé ndaha-aⁿ ní nacanutñí ñaha-dë. Te ní cana-dé nchaa ñáyiü dìhí ñáyiü quèé ndihi nchaa ñáyiü sándáá iní tnúhu Jèsús cuèndá quiní-yu sá ñí ndoto-aⁿ. 42 Te nchaa ñáyiü ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xíhí-áⁿ, te vai-yu ní sándáá iní-yu Xítohó Jesucristú. 43 Te titní nduu ní xíndecu té Pèlú vehe té Ximú téé dàcuitá ñíí.

10

Té Pèlú ndihi té Còrneliú

1 Te ndècu ñⁿ téé nàni-dé Còrneliú ñuú Cèsareá te cùu-dé capitáⁿ, te ndècu ndihi-dé ñⁿ cìèndú sandàdú. Te cue téé-áⁿ nání-güedé Sandàdú Itàlianú. 2 Te téé cùu capitáⁿ ío váha iní-dé, te mee-dé ndihi ñadihí-dé ndihi nchaa landú-dé ío nèhé-yu sá yíñùhu núú Yã Ndiõxí, te sáha-dé ñáyiü ndàhú ñáyiü israél díhúⁿ, te ío càháⁿ ndihi-dé Yã Ndiõxí. 3 Te ñⁿ nduu dàtná òré caá úní sacuaa ní dácótó núú

ñáhá-xí xii-dé sá ni sáháⁿ ìⁿ
espíritú xínú cuèchi núú Yă
Ndiöxí núú-dě, te ní xáhaⁿ-xi:

—Còrneliú —càchí-xi

xáhaⁿ-xi xii-dě.

⁴ Te ní xini-dé ndi ndùú xio
núú-dě espíritú-áⁿ. Te ío ní
yùhú-dé. Te ní xáhaⁿ-dě:

—¿Ná chíúⁿ vëxi-n? —
càchí-dé xáhaⁿ-dě.

Te xáhaⁿ-xi:

—Ío càháⁿ ndihi-n Yă
Ndiöxí, te ñáyiú ndàhú
sãhaha-n dîhúⁿ-n, te nchaa
xíáⁿ sa nàha-gá. ⁵ Te

vitna tendaha-n cuè téé
na quihíⁿ-güedé ñúú Jòpé
quíngana-güedé ìⁿ téé nàni
Xímú, àdi Pelú chi úú òú-dé,
te candeca ñaha-güedé quixi.

⁶ Te òré quexìo-dé te cachí
tnúhu-dé nchaa dava-gá sá
cuíní Yă Ndiöxí cada-n. Te
ndècu-dé vehe ingá tucu téé
nàni Xímú téé dàcuítá ñii, te
vehe téé-áⁿ cáá ìⁿ xio yuhu
lamár —càchí-xi xáhaⁿ-xi
xii-dě.

⁷ Te sátá cuáháⁿ espíritú-áⁿ,
te té Còrneliú ní cana-dé úú
tnàhá cue téé xínu cuechí
núú-dě ndihi ìⁿ sandàdú xínú
cuèchi tucu núú-dě, te tnàhá
sandàdú-áⁿ ío càháⁿ ndihi-dé
Yă Ndiöxí. ⁸ Te té Còrneliú
ní cani-dé cuèndú núú-güedé
nàcuáa ní cáháⁿ espíritú xínú
cuèchi núú Yă Ndiöxí. Te ní
tendaha ñaha-dé xii-güedé
cuáháⁿ-güedé ñúú Jòpé.

⁹ Te nduu tnèé-áⁿ
ñúhú-ní-güedé ichi cuáháⁿ-güedé
te cùu-xi datná òré caúxúú
nduu ta cùyatni-güedé ñúú-áⁿ,
te òré-áⁿ ní sáá té Pelú
díquí véhé càháⁿ ndihi-dé
Yă Ndiöxí. ¹⁰ Te òré-áⁿ sa
xihí-dé docó cuíní-dé caxi-dé,
te nini càdúha-yu sá cáxí-dé

ní dácótó núú ñáhá-xí ¹¹ sá
ní xini-dé ìⁿ sá ndécú àndiú,
te càa datná cáá ìⁿ dóó
cáhnú nchìcúⁿ yoho ndi cùmí
xíquí-xi véxi cuuⁿ núú ñúhú.

¹² Te núú dõó-áⁿ yódó cõó
ndihi quiti ndàva ndihi nchaa
núú quiti ndèé cùmí sáhá-xi.

¹³ Te ní tecú dóho-dé càháⁿ ìⁿ
sá càháⁿ, te xáhaⁿ sá càháⁿ-áⁿ
xii-dé:

—Pèlú, ndacuíñí cahni-n
ndèda-ni càa quiti-a caxi-n-di
—cachí sá càháⁿ-áⁿ xáhaⁿ-xi
xii-dě.

¹⁴ Te té Pèlú ní xáhaⁿ-dě:

—Vá cáhni-í-di chi càchí
tnúhu sá sánú ìchi ñaha xii
nchúhú ñáyiú isràél sá vă cúú
càxi-ndí nchaa quiti-a chi cuu
cuèchi, te vátá cáxí-gă-í-di ni
ìⁿ xito —cachí-dé xáhaⁿ-dě.

¹⁵ Te ní cáháⁿ tucu sá ní
cáháⁿ-áⁿ, te xáhaⁿ-xi:

—Vá cúú càchí-n sá vă cúú
càxi-n-di, chi mee Yă Ndiöxí
ní cachí-gá sá díú nchàa
quiti-a cuu caxi-o vitna —
cachí sá ní cáháⁿ-áⁿ xáhaⁿ-xi
xii-dě.

¹⁶ Te ducaⁿ ní cáháⁿ sá ní
cáháⁿ-áⁿ ùní xito, te dàtnùní
cuándaá tucu dóó-áⁿ àndiú.

¹⁷ Te té Pèlú ñá ní cùtnuní
iní-dé ná cuèndá ducaⁿ ní
dácótó núú ñáhá-xí xii-dé,
núú xíáⁿ ío cuéhé ní sani
iní-dé. Te òré-áⁿ ní quexìo
cue téé ní tendaha té Còrneliú
ndéé yuyèhe, chi ndi vehe
ndi vehe cuáháⁿ-güedé ndúcú
tnúhu-güedé ndèé cáá vèhe té
Xímú téé dii vèhe-xi ndecu té
Pèlú. ¹⁸ Te ní cáháⁿ níhi-güedé,
te xáhaⁿ-güedé:

—Ná túú cùdana iha ndecu
ìⁿ téé nànducu-ndí nání-dě
Xímú, àdi Pelú chi úú òú-dé
—càchí-güedé xáhaⁿ-güedé.

19 Te té Pèlú vài sani iní-dé sá nǐ dácótó nǔú ñàhá-xí xii-dé. Te òré-áⁿ nǐ xáhaⁿ Espíritú Yá Ndiǒxí xii-dé:

—Cundedóho-n ìⁿ tnúhu na càháⁿ-í-a. Ní quexio úní cue téé nànducu ñàhá xii-n. 20 Yáchí, cuandèe chí quíhíⁿ-n ndíhi-güedé, te vá yúhú-n chí yúhú ní xáhaⁿ-í véxi cuaca ñàhá-güedé xii-n —càchí Espíritú-gá xáhaⁿ-xí xii té Pèlú.

21 Te ní xica-dé cuánde-dé nǔú ndécú cuè téé xica nànducu ñàhá xii-dé, te xáhaⁿ-dè xii-güedé:

—Yúhú cúú tée nànducu-ndo-áⁿ. Náu-í-a nǔú ná chíúⁿ cuìní ñàhá-ndó —càchí-dé xáhaⁿ-dè xii-güedé.

22 Te xáhaⁿ-güedé:

—Tée cùu capitáⁿ téé nàni Corneliú ní tendaha ñàhá-dé véxi-ndí, te téé-áⁿ ío váha iní-dé, chí ío sàndáá iní-dé Yá Ndiǒxí, te nchaa ñáyíu isràél ío váha càháⁿ-yu cuéndá-dé. Te ìⁿ espíritú xínú cuèchi nǔú Yá Ndiǒxí ní xáhaⁿ-xí xii-dé sá cáná ñàhá-dé xii-n quíhíⁿ-n vèhe-dé dacuàha-n-dé tnúhu Yá Ndiǒxí —càchí cue téé ní tendaha té Còrneliú xáhaⁿ-güedé xii té Pèlú.

23 Te ní xáhaⁿ tē Pèlú sá quíhu-güedé vehe-dé, te candeca tnàha-güedé ndíhi-dé quíhíⁿ ndéé nduu tnéé. Te nduu tnéé-áⁿ nǐ xica-güedé ndécá tnàha-güedé ndíhi té Pèlú cuáháⁿ, te tnàhá ìⁿ ũú cue téé sàndáá iní tnúhu Jèsús ñúú Jòpé cuáháⁿ ndíhi ñàhá-güedé xii-dé.

24 Te ndéé íngá nduu ní quexio-güedé ñúú Cèsareá.

Te té Còrneliú ndétú ñàhá-dé xii-güedé vehe-dé te sa ndècu túha-dé ndíhi ñàdìhí-dé ndíhi nchaa landú-dé ndíhi cue téé ío váha tnàhá tnúhu ndíhi-dé, chí ní cana ñàhá-dé ní nínàhá-yu ndíhi-dé cundetú-yu té Pèlú. 25 Te sátá nǐ quexio té Pèlú vehe té Còrneliú, te ní quee-dé quehé, te ní ngüíñí xítí-dé nǔú tē Pèlú chíñúhu ñàhá-dé ní cùu. 26 Te té Pèlú ní xáhaⁿ-dè:

—Ndacuíñí vá ngüíñí xítí-n nǔú-í chí ñá díú Ndiǒxí cúu-í, dícó ìⁿ téé ñuyíú-a cùu-í —càchí té Pèlú xáhaⁿ-dè xii-dé. 27 Te ta càháⁿ té Pèlú ndíhi té Còrneliú cuánguihu-güedé xítí vehe, te chítu ñáyíu xìxíhi xítí vehe. 28 Te ní xáhaⁿ tē Pèlú xii-yu:

—Sa nàha-ndo sá càchí tnúhu sá sánú ìchi ñàhá xii nchúhú ñáyíu isràél sá vá cúú quíxi-ndí vehe ní ìⁿ nchohó ñáyíu ñá túú cùu ñáyíu isràél te ní vá cúú tnàhá tnúhu ndíhi ñàhá-ndí xii-ndo. Dico Yá Ndiǒxí ní cachí-gá sá vá cúú càháⁿ-í sá vá cúú càháⁿ ndíhi-í ñáyíu ñá túú cùu ñáyíu isràél, chí cuu cuèchi. 29 Núu xíáⁿ ndíhi-ni véxi-í òré ní quexio tnúhu sá cáná ñàhá-ndo. Te cachí tnúhu-ndo nà cuéndá cáná ñàhá-ndo —cachí té Pèlú xáhaⁿ-dè xii-yu.

30 Te té Còrneliú ní xáhaⁿ-dè:

—Ní cuu cúmí nduu, te díu-ni dàtná òré iha cùu-xi, te yúhú ndècu-í díu-ni vehe-í, te ñá túú tnàhí ná xéxi-í cáháⁿ ndíhi-í Yá Ndiǒxí, te òré-áⁿ nǐ quexio ìⁿ espíritú xínú cuèchi nǔú-gá níhnu-xí dǒó cuíxíⁿ dóó chàhnchí. 31 Te càchí-xi: “Còrneliú, ní

xíndedóho Yá Ndiõxí tnúhu ní cáháⁿ-n ndìhi-gá, te xíní-gá sá sãñaha-n dîhúⁿ xii ñáyiu ndàhú. ³² Te ñúú Jòpé ndécú ìⁿ téé nàni Xímú, àdi Pelú chi úú diu-dé, te ndècu-dé vehe ìⁿ téé nàni tucu Xímú téé dàcuitá ñii, te cãa vehe-dé ìⁿ xio yuhu làmár, te cana-n-dě ná quixi-dé ndatnúhu-n ndìhi-dé”, duha ní cáháⁿ espíritú xínú cuèchi núú Yá Ndiõxí. ³³ Núu xíãⁿ ndìhi-ni ní cana ñaha-í xii-n. Te táxãhu xii-n sã vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiõxí, te cuíní-ndí cachí tnúhu-n nchãa tnúhu ní cachí Yá Ndiõxí cáháⁿ-n — cãchí té Còrneliú xãhaⁿ-dě.

Té Pèlú ní ndatnúhu-dé ndìhi ñáyiu ní tacá vehe té Còrneliú

³⁴ Te té Pèlú xãhaⁿ-dě xii-yu:

—Vitna ní xíní-í sá Yá Ndiõxí cáháⁿ ndìhi-gá ñáyiu cuèi ndèda-ni cãa ñúú, te ìⁿ-ni quide-gá ndìhi nchaa-yu. ³⁵ Te nchaa ñáyiu nèhe sá yíñùhu núú Yá Ndiõxí, te xíquide váha-yu, te nchaa-yu cùu váha iní ñáhá-gã xii-yu. Te ñá túú quide cuendá-gá cuèi ná ñáyiu ñúú cúú-yu. ³⁶ Te Yá Ndiõxí ní tendaha-gã Xítóhó Jesucristú ní sáháⁿ-gá ní xíndecu-gá nacióⁿ Isràèl, te ní xáhaⁿ-gã xii-yu ìⁿ tnúhu váha nàcuáa cuu váha iní-yu. Te diu-ni mee Jèsús cúnùu-gá núú ñáyiu ni cãa xico ñuyiú. ³⁷ Te nàha-ndo sá dîhna-gá ndíi Juáá ní cáháⁿ ndíi tnúhu Yá Ndiõxí núú ñáyiu, te ní dácúandùte ñaha ndíi xii-yu.

Te dãtnùní ní ngüita Jèsús ní cáháⁿ-gá tnúhu-gá distritú Galileá, te dãtnùní ní sáháⁿ-gá nihii nacióⁿ Isràèl ní cáháⁿ-gá tnúhu-gá núú ñáyiu. ³⁸ Te sa nàha-ndo sá Yá Ndiõxí ní sãñaha-gã Espíritú-gá xii Jèsús téé ñúú Nazàrét ndécú ndìhi-dé chíndèe ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáyiu yìhi ñaha espíritú cùndìhi yucu ñávãha. Te ío vai-gá sá vãha ní quide ñaha-gã xii-yu, te ducaⁿ ñí quide-gá, chi Yá Ndiõxí ní chindee ñaha-gá. ³⁹ Te mee-ndí ní xíní-ndí nàcuáa ní quide Jèsús ñúú Jerusalén ndìhi nihii nacióⁿ Isràèl. Te ní sata cãa ñaha-güedé xii-gá núú cùrúxí te yacáⁿ ní xíhí-gá. ⁴⁰ Te núú ùní nduu ní dándótó ñaha Yá Ndiõxí xii-gá. Te ní cuíní-gá sá cùndècu Xítóhó Jesucristú titní nduu sátá ñí ndoto-gá cuendá cáháⁿ ndìhi ñaha-gã xii-ndí nchaa-ndí nàcuáa ní xica cuu-ndí ndìhi-gá. ⁴¹ Te ñá ncháá ñáyiu ni xíní ñáhá xii-gá, chi mee-ni nchùhú cue téé ní cachí-gá sá cãháⁿ ndáá-ndí sá ñí ndoto-gá, chi ní xíndecu ndìhi-ndí-gá, te ní xihí ní xexi-ndí ndìhi-gá, núu cãháⁿ ndáá-ndí sá ñí ndoto-gá. ⁴² Te ní cachí-gá sá nchùhú quíhíⁿ-ndí cúñaha-ndí xii ñáyiu sá méé Yá Ndiõxí ní táuchíúⁿ-gã sá Jèsús cada ndáá-gá cuèchi nchaa ñáyiu ndècu vívú ndìhi cuèchi nchaa ñáyiu ní xihí. Te ducaⁿ ñí xáhaⁿ Yá Ndiõxí xii Jèsús, te

díu-ni ducaⁿ ñí cachí Jèsús cáháⁿ-ndí. ⁴³ Te cue téé ní cáháⁿ tnúhu Yá Ndiöxí ndéé sanaha ñí cáháⁿ-güedé sá quíxí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuéchi-yu — càchí té Pèlú xáhaⁿ-dè xií-yu.

Ní quexìo Espíritú Yá Ndiöxí ní ngúndecu ndíhi cue ñáyiú ñá túú cùu ñáyiú isràél

⁴⁴ Te mei òré càháⁿ-dè ndèdóho-yu ní quexìo Espíritú Yá Ndiöxí ní ngúndecu ndíhi nchaa ñáyiú-án. ⁴⁵ Te cue téé isràél cuáháⁿ ndíhi té Pèlú, cue téé ní sándáá iní tnúhu Jèsús ní cuñúhu vîhi-güedé sá ñí quexìo Espíritú Yá Ndiöxí ní ngúndecu ndíhi-yu, chi cuèndá sá ñà díú ñáyiú isràél cúy-yu núu xíáⁿ ní cuñúhu-güedé. ⁴⁶ Te ní cutnùní sá ñí quexìo Espíritú Yá Ndiöxí ní ngúndecu ndíhi-yu, chi ní ngüíta-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xini-yu cáháⁿ-yu. Te ní ndacáⁿ táhü-yu núú Yá Ndiöxí cuèndá nchaa sá ñí quide-gá. ⁴⁷ Te dàtnùní ní xáhaⁿ tē Pèlú:

—Vitna te cuandute ñáyiú ní natuha ichi Xítohó Jesucristú chi sa ndècu ndíhi-yu Espíritú Yá Ndiöxí dàtná cuíní-ndó ndècu ndíhi nchoo, núu xíáⁿ vá cúú càchí dava-gá ñáyiú sá vā cúú cuànduté-yu —càchí-dé xáhaⁿ-dè xií-yu.

⁴⁸ Te dàtnùní ní xáhaⁿ-dè xii ñáyiú:

—Vitna te cuandute-ndo, te òré-án te cacunehe-ndo Xítohó Jesucristú —càchí-dé xáhaⁿ-dè xií-yu.

Te dàtnùní ní cáháⁿ ndáhü-yu núú tē Pèlú cundecu ndíhi ñaha-dè xií-yu ñú nduu.

11

Té Pèlú ní cani-dé cuèndú núú ñáyiú sándáá iní tnúhu Jèsús ñúú Jerusalén

¹ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndíhi cue ñáyiú ní sándáá iní tnúhu-gá, ñáyiú ndècu distritú Jùdeá ní níhü-yu tnúhu sá ñáyiú ñá túú cùu ñáyiú isràél ní sándáá iní-yu tnúhu Yá Ndiöxí. ² Te òré ní ndexìo té Pèlú ñúú Jerusalén, te ñáyiú isràél ñáyiú ní cachí sá cádá ncháa nacuáa ní cáháⁿ ndí Moisés ní satnuhu ñáhá-yu xii-dé. ³ Te ní xáháⁿ-yu xii té Pèlú:

—¿Ná cuèndá ní sáháⁿ-n ndéé ndíacáⁿ ní cáháⁿ ndíhi-n ñáyiú-án, te ñà túú quidé-yu dàtná quidé nchò-i? Te ní sáháⁿ-n yacáⁿ ní xexi-n ndíhi-yu —càchí-yu xáháⁿ-yu xii-dé.

⁴ Te té Pèlú ní cani-dé cuèndú nacuáa ní cuu núú ní sáháⁿ-dè, te xáhaⁿ-dè:

⁵—Ní xíndecu-í ñúú Jòpé. Te òré càháⁿ ndíhi-í Yá Ndiöxí, te ní dácótó ñaha-xi xii-í sá vèxi cuuⁿ ñí dóó cáhnú àndü, te ndùtu ndí cumí xíquí-xi, te ní ngava-xi núú ndécù-í. ⁶ Te ní xíndéhé vāha-í, te ní xini-í nchaa quiti yòdo núú-xi. Te ñí xichi yòdo quiti cúmí sáhá-xi, te ñí xichi yòdo quiti

deéⁿ, te ñⁿ xichi yòdo cóo, te ñⁿ xichi yòdo quitì ndava. ⁷ Te ní tecú dóho-í càháⁿ ñⁿ sá càháⁿ, te càchí-xi: “Pèlú, ndacuñí cahni-n ndèda-ni càa quitì-a caxi-n-di”, cachí sá ñí càháⁿ-áⁿ. ⁸ Te ní xáhaⁿ-í: “Vá càhni-í-di chi càchí tnúhu sá sánú ìchi ñaha xii nchúhú ñáyiu isràèl sá vâ cúu càxi-ndí nchaa quitì-a”, xáhaⁿ-í. ⁹ Te ní tecú dóho-í càháⁿ-ni tucu núu ñnu, te càchí sá càháⁿ-áⁿ: “Vá cúu càchí-n sá vâ cúu càxi-n-di, chi mee Yá Ndiöxí ní cachí-gá sá díú nchaa quitì-áⁿ cuu caxi-o”, càchí sá càháⁿ-áⁿ. ¹⁰ Te ducaⁿ ñí càháⁿ sá ñí càháⁿ-áⁿ ùní xito, te dàtnùní cuándaa dóó-áⁿ ndihì nchaa quitì-áⁿ andiu. ¹¹ Te òré-ni ní quexìo úní cue téee vehe núu ndécù-í. Te cue téee-áⁿ ñí tendaha ñaha ñⁿ téee ñnuú Cèsareá nándücu ñaha-güedé xii-í. ¹² Te mee Espiritú Yá Ndiöxí ní cachí-xi sá quihíⁿ-í ndihì-güedé, te ní cachí-xi sá ñà túú nã canì iní-í. Te tnàhá ñnu cue téee ndècu iha ní sáháⁿ ndihì ñaha-güedé xii-í, te nchaa-ndí ní sáháⁿ-ndí vehe té Còrneliú ñnuú Cèsareá. ¹³ Te ní canì-dé cuèndú nàcuáa ní cuu ní sáháⁿ ñⁿ espíritú xínú cuèchi núu Yá Ndiöxí vehe-dé, te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cuè téee na quihíⁿ-güedé ñnuú Jòpé quíngana-güedé ñⁿ téee nàni Xímú, àdi Pelú chi úu ñu-dé. Te candeca ñaha-güedé quixi. ¹⁴ Te téee-áⁿ cachí tnúhu-dé nása cada-n naníhí tãhú-n ndihì ñadihí-n, ndihì landú-n, ndihì nchaa ñáyiu xínu cuechi vehe-n”,

duha ní xáhaⁿ espíritú-áⁿ xii té Còrneliú. ¹⁵ Te òré ní ngüita-í càháⁿ ndihì-í-yu ní quexìo Espiritú Yá Ndiöxí ní ngündecu ndihì-yu dàtná ní quide-xi cútnàhá ní taxi Yá Ndiöxí Espiritú-gá ndéé díhna ní ngündecu ndihì nchoo. ¹⁶ Te ní ndacu iní-í nàcuáa ní càháⁿ Xitohó Jesucristú, te duha ní cachí-gá: “Té Juáa ní xóo dacuandute-dé ñáyiu, dico yúhú sãñaha-í Espiritú Yá Ndiöxí cundecu ndihì-yu”, duha ní cachí-gá. ¹⁷ Te Yá Ndiöxí ní sãñaha-gã Espiritú-gá cundecu ndihì ñáyiu ñã túu cùu ñáyiu isràèl dàtná ní quide-gá cútnàhá ní sándáa iní-ó tnúhu Jèsús, núu xiãⁿ vá càchí-í sá vâ cúu càda-í ñⁿ sá cuiní Yá Ndiöxí cada-í — càchí té Pèlú xáhaⁿ-dè xii-yu.

¹⁸ Te sátá dúcáⁿ ñí xáhaⁿ tẽ Pèlú, te ñã túu-gã ná tnúhu ní càháⁿ-yu, te ío ní cudíí ñni-yu nchaa nàcuáa ní quide Yá Ndiöxí, te ní xitnàhá-yu:

—Tnàhá nchaa ñáyiu ñã túu cùu ñáyiu isràèl naníhí tãhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuiní Yá Ndiöxí cunduu —càchí-yu xitnàhá-yu.

Ñáyiu sándáa iní tnúhu Jèsús ñnuú Antiòquia

¹⁹ Te sátá ñí sahani-güedé té Tèvá, te ní cuiní-güedé cada úhú-güedé nchaa ñáyiu ní sándáa iní-xi tnúhu Jèsús, te ní xité nuú-yu ndi tnàhá ñⁿ ñⁿ ñnuú. Te davá-yu cuáháⁿ-yu ndéé distritú Fèniciá ndihì distritú Chìpré ndihì ñnuú

Antiòquia. Te ní cáháⁿ-yu tnúhu Jèsús núú mee-ni ñáiyu isràél, te ñá ní xĩtnúhu-yu dava-gá-yu. ²⁰ Te dava-gá ñáiyu distritú Chìpré ndihì ñáiyu ñuú Cirené ní sáháⁿ-yu ñuú Antiòquia. Te ñá díú mèe-ni ñáiyu isràél ní cáháⁿ ndihì-yu, chi tnàhá ñáiyu ñá túú cùu ñáiyu isràél ní xáháⁿ-yu tnúhu Jèsús. ²¹ Te ní chindee ñàha-gá xii ñáiyu cáháⁿ tnúhu-gá, te vài-gá-yu ní sándáá iní-yu-gá chi ní tuhá-yu ichi-gá.

²² Te ñáiyu ndècu ñuú Jerusalén ñáiyu ní sándáá iní tnúhu Jèsús ní níhì-yu tnúhu nàcuáa ní cuu, núu xiáⁿ ní tendàhá-yu té Bèé cuáháⁿ-dé ñuú Antiòquia. ²³ Te òré ní quexio té Bèé, te ní xiní-dé nàcuáa ní quide ñàha-gá xii-yu sá ní naníhì tàhú-yu, núu xiáⁿ ío ní cudíí iní-dé. Te ní dácáhú iní ñáhá-dě, te ní xáhaⁿ-dě:

—Ío nducu ndèe-ndo cada-ndo nchaa sá cächí Yá Ndiòxí cada-ndo —cächí-dé xáhaⁿ-dě xii-yu.

²⁴ Te té Bèé cúú-dě ìⁿ téé váha iní-xi, te ndècu ndihì-dé Espíritú Yá Ndiòxí, te ío sándáá iní-dé tnúhu Jèsús. Te vài vihi ñáiyu ní tuhá-yu ichi-gá.

²⁵ Te dàtnùní cuáháⁿ té Bèé ñuú Tàrsú cuánúndúcú-dé té Sàulú. ²⁶ Te òré ní naníhì ñáhá-dě, te ndèca ñàha-dé cuáháⁿ ñuú Antiòquia, te yàcáⁿ ní xíndecu-güedé ìⁿ cuíá ndihì ñáiyu ní sándáá iní tnúhu Jèsús, te vài-yu ní dácúáhá ñàha-güedé tnúhu-gá. Te díu-ni ñuú

Antiòquia ní dánání ñàhá-yu Cristiànú xii nchaa ñáiyu sándáá iní tnúhu Jèsús.

²⁷ Te ndéé dàvá-áⁿ ní quee ìⁿ úú cue téé cáháⁿ tnúhu Yá Ndiòxí ñuú Jerusalén cuáháⁿ-güedé ñuú Antiòquia.

²⁸ Te ìⁿ-dé nání-dě Àgabú, te ní chindee ñàha Espíritú Yá Ndiòxí xii-dé, te ní sáháⁿ-dé núú nchaa ñáiyu sándáá iní tnúhu-gá, te ní xáhaⁿ-dě xii-yu sá quíxí ìⁿ tnamá nihì ñuyíú. Te ducaⁿ ní cuu sátá ní ngúnutnì té Claudiú téé yìndaha cuéhé nacióⁿ. ²⁹ Núu xiáⁿ nchaa ñáiyu sándáá iní tnúhu Jèsús ñuú Antiòquia ní ndatnúhu-yu sá chíndèe-yu nchaa ñáiyu sándáá iní tnúhu-gá ndécú distritú Jùdeá cuendá vá ndóhó vìhì-yu docó. Te nàcuáa ní níhì-yu, te ducaⁿ ní sacáⁿ tnáhá-yu.

³⁰ Te ní tacá díhúⁿ-áⁿ, te nèhe té Bèé ndihì té Sàulú cuáháⁿ, cuáha-güedé cue téé yìndaha ñáiyu sándáá iní tnúhu-gá.

12

Sátá ní xihí té Jàcobó, te ní ngava té Pèlú vecaá

¹ Te ndéé dàvá-áⁿ ní ngúita té Hèrodés téé yìndaha ñàha xii ñáiyu isràél ní quide úhú-dé ìⁿ úú ñáiyu sándáá iní tnúhu Yá Ndiòxí. ² Te ní táuchíúⁿ-dě ní tni-güedé té Jàcobó ñaní té Juáá, te ní sahani ñàha-güedé ndihì machití. ³ Te ío ní cudíí iní dava ñáiyu isràél cuendá sá ní sahani ñàha-güedé xii té Jàcobó, núu xiáⁿ ní tendaha tùcu té Hèrodés sandádú-dé ní sáháⁿ

tni tucu-güedé té Pèlú. Te ducaⁿ nĩ quide-dé cútñahá ní xóo vico ní xexí-yu paa sá ñà túú yìhi levadurá. ⁴ Te ní naníhí-güedé té Pèlú, te ní tni ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ìⁿ sandàdú cùndeé-güedé té Pèlú. Te ní xáhaⁿ-dè:

—Cundeé-ndó ndi cùmí ndi cùmí-ndó tē-áⁿ —càchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuendá cahni ñaha-güedé cáháⁿ-dè ní cùu. ⁵ Te ní xíhi-ni té Pèlú vecaá, te ní xindeé cuaa ñaha sandadú xii-dé. Te cue ñáyiú sandáá iní tñuhu Yá Ndiòxí ío ní xicáⁿ táhü-yu núú-gã cuendá sá ñà túú nã cada ñaha-güedé xii-dé.

Yá Ndiòxí ní dácacu-gá té Pèlú vecaá

⁶ Ìⁿ niú-gá quihi té Pèlú vecaá ní cùu, te nduu tnéé tauchíuⁿ té Hèrodés quihíⁿ sandàdú queñuhu ñaha-güedé xii-dé vecaá cuendá quiní nchaa ñáyiú nása cada ñaha-güedé ní cùu. Te té Pèlú cáá-dé xidí-dé xití vecaá, te ndi ndúú dúcúⁿ ndáhá-dè ndútú càdená, te xio xio diñi-dé ndécú sandadú, te dava-gá sandadú xindeé-güedé yehe vecaá. ⁷ Te ní quexio ìⁿ espíritu xínú cuèchi núú Yá Ndiòxí xití vecaá núú cáá tē Pèlú xidí-dé, te uuⁿni ní dáyèhé-xi xití vecaá, te ní danguíhi ñaha-xi xii-dé, te xáhaⁿ-xi xii-dé:

—Yáchí, ndácóo —càchí-xi xáhaⁿ-xi xii-dé.

Te ní ndacóo-dé, te nchaa cadená ndútú dúcúⁿ ndáhá-dè ní nandáxí. ⁸ Te ní xáhaⁿ tucu espíritu-áⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xáhaⁿ-xi xii-dé.

Te ní ndíhu nuu-dé dóo-dé, te ní xáhaⁿ tucu espíritu-áⁿ:

—Candixi dóo-n, te na quihíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchícúⁿ-dè espíritu-áⁿ, te ñá ní cùtnuní iní-dé núu ndáá ìⁿ espíritu xínú cuèchi núú Yá Ndiòxí ducaⁿ quide àdi ñáhá, te dàcoto ñaha-xi xii-dé ní sanj iní-dé. ¹⁰ Te ndèndaha-ni-dé espíritu-áⁿ cuáháⁿ ní yáha-dé nàcuáa xñutñi sandadú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndedí caá nàcuáa ní yáha ichi sá cuáháⁿ ndéé xití ñuú, te ní nacaáⁿ méé yehe-áⁿ, te ní quee-dé cuáháⁿ-dè ndihi espíritu-áⁿ. Te ní tnahá-dé ìⁿ tnuú, te yacáⁿ ní dándõo ñaha espíritu-áⁿ xii-dé. ¹¹ Te dàtnuní ní nene váha sanj núú-dé, te ní cutnùní iní-dé, te ní cachí-dé:

—Ndáá sá Yá Ndiòxí ní tendaha-gã espíritu-áⁿ ní quixi-xi ní dácacu ñaha-xi xii-í cuendá sá và cáhni ñaha té Hèrodés. Te dava ñáyiú israél ío ní cudíí iní-yu cuendá sá ñi cuiní té Hèrodés cahni ñaha-dé xii-í —duha ní cachí-dé sátá ñi cutnùní iní-dé.

¹² Te sátá ñi cutnùní iní-dé sá ñi cacu-dé, te cuáháⁿ-dè vehe ìⁿ ñaha nani Mariá nãná tē Juáá, àdi Mácú chi úú

dìu-dé, te xíáⁿ ndécú vài-yu càháⁿ ndihí-yu Yá Ndiöxí. 13 Te té Pèlú ní quexìo-dé ndéé yuyèhe ní dácásáⁿ-dè, te ní quixi ìⁿ xíchí nání Ròdé ní quixi ndehe-xi nă cúú ñăyiu dâcasaⁿ. 14 Te ní nucúhuⁿ ndudú-xi sá díú tē Pèlú, te ní cudíí vîhí iní-xi, dico ñá ní nàcaáⁿ-xi yuyèhe. Te ní quene cunu-xi cuáháⁿ ngúñaha-xi xií-yu sá nútñi té Pèlú yuyèhe ndaa quehé. 15 Te ñá ní sàndáá iní-yu tnúhu ní cáháⁿ-xi, te xăháⁿ-yu xii-xi:

—¡Ná tnúhu vîhi cáháⁿ-ôⁿ xíchí lùcú! —càchí-yu xăháⁿ-yu.

Te xăháⁿ-xi să ndáá nútñi-dé, te xăháⁿ-yu:

—Ñá díú tē Pèlú chi espíritú sá xító ñaha xii-dé cúú să càháⁿ —càchí-yu xăháⁿ-yu xii-xi.

16 Te òré ducaⁿ xitnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu vîhí-yu. 17 Te ní quide-dé ndaha-dé núŷ-yu cuendá cadí-yu yuhú-yu. Te ní ngúita-dé ní cani-dé cuendú nâcuáa ní quide ñaha Yă Ndiöxí xii-dé sá ñí dácăcu ñaha ìⁿ espíritú xínú cuèchi núú-gă xii-dé vecaá, te ní xáhaⁿ-dè xií-yu:

—Cúu-ndo tē Jâcobó ndihi dava-gá ñăyiu sàndáá iní tnúhu Jêsús nâcuáa ní quide ñaha Yă Ndiöxí xii-í —càchí-dé xăháⁿ-dè xii-yu.

Te sátá dúcáⁿ ñí xáhaⁿ-dè, te ní quee-dé cuáháⁿ-dè ingá xichi.

18 Te sátá ñí túndaá, te ní ngúita nchaa sandádú càháⁿ ìⁿ càháⁿ ìⁿ-güedé, te xitnàha-güedé:

—Ñá túú-gă té Pèlú yíhí vècaá, ¿te nâsa cada-o-i? —càchí-güedé xitnàha-güedé.

19 Te té Hèrodés ní tendaha-dè titni sandádú cuáháⁿ-güedé cuánündúcú ñaha-güedé, te ñá ní nânihí ñáhá-güedé xii-dé. Te dătnùní ní cana-dé sandádú cue tée ní xindeé ñáhá xii té Pèlú, te ní tenáá ñáhá-dè xii-güedé, te ní xáhaⁿ-dè xii dava-gá cue sandádú-dé:

—Cahni-ndo cuè tée-ăⁿ —càchí té Hèrodés xăháⁿ-dè.

Te dătnùní ní quee té Hèrodés distritú Jùdeá cuáháⁿ-dè ñuú Cèsareá, yacáⁿ ní ngündecu-dé.

Ní xíhí té Hèrodés

20 Té Hèrodés ní cudéén-dè núú ñăyiu ñuú Tirú ndihi núú ñăyiu ñuú Sidón. Te xíáⁿ ní ndatnúhu-yu ní cuu ìⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihi ñáhá-yu xii-dé, te ní ndatnúhu ndihí-yu té Blástú. Te tée-áⁿ cúú-dè chiúⁿ quide-dé núú tē Hèrodés, te ní chindee tnúhu ñaha-dè xií-yu, chi ní cáháⁿ ndàhú-yu núú tē Hèrodés sá vă cadá ŷhú ñáhá-dè xií-yu. Te ducaⁿ ñí quidé-yu cuendá ñuú té Hèrodés-áⁿ queé să xéxi-yu.

21 Te ní xáhaⁿ tē Hèrodés ná nduu quíhíⁿ-yu ndatnúhu ndihi ñaha-dè xií-yu, te nduu-ăⁿ ñí quíunuu-dé ìⁿ dóó

váha, ìⁿ sá sácũhnu tée tàxi tnuní. Te ní ngóo-dé núú xilé váha, xilé sá sácõo nchihi tée tàxi tnuní, te ní ngũita-dé ní cáháⁿ sàhú-dé dóho-yu. ²² Te uuⁿni ní cuáá-yu te càchí-yu:

—¡Tée-a cáháⁿ-dé dico ñá díú tée ñuyíú-a cùu-dé chi ndiõxí cúú-dě! —càchí-yu xitnàhá-yu.

²³ Te ñu-ni òré-áⁿ ñí yáha ìⁿ espíritú xínú cuèchi núú Yá Ndiõxí, te ní sãñaha-xi cuéhé xii té Hèrodés. Te ducaⁿ ñí tñahá-dé chi mee-dě ñá ní xãhaⁿ-dě sá ñáyiu cùu-dé, te ní cáhãⁿ-yu sá ndiõxí cúú-dě. Te nchìto-gá-dé ní sanú ñáhá tìndácú xii-dé, te dàtnùnì ní xihí-dé.

²⁴ Te ío titní xichi ní sáháⁿ ñáyiu sándáá iní tñúhu Yá Ndiõxí ní cáháⁿ-yu tñúhu-gá, te ío chitú-yu ní sándáá iní-yu tñúhu-gá.

²⁵ Te té Bèé ndihí té Sàulú ní ndihí chiuⁿ-güedé, te ní ndee-güedé ñuú Jerusàlén cuáháⁿ-güedé ndihí té Juáá, àdi Mácú chi úú ñiú-dé.

13

Té Bèé ndihí té Sàulú cuáháⁿ-güedé dácuaⁿha-güedé ñáyiu tñúhu Yá Ndiõxí nchaa ñuú xicá

¹ Te ñuú Antiòquia ndécú ìⁿ úú cue tée càháⁿ tñúhu Yá Ndiõxí núú nchaa ñáyiu ní sándáá iní-xi tñúhu-gá. Te ndècu tucu ìⁿ úú cue tée cùu mestrú dácuaⁿha ñaha-güedé xii-yu tñúhu-gá. Ìⁿ-dé nání-dě Bèé, te ìⁿ-dé nání-dě Xímú, te té Xímú-áⁿ xãhaⁿ-güedé Nègrú chi tnuu-dě. Te ingá-dé nání-dě Lùciú, te

tée-áⁿ cúú-dě tée ñuú Cirené. Te ingá-dé nání-dě Sàulú, te ingá tucu-dé nání-dě Manàén. Te té Manàén-áⁿ ndihí té Hèrodés tée cùu gobiernú Galileá ío váha ní xóo cáháⁿ ndihí tñaha-güedé cùtnàhá ní cùu lĩhli-güedé. ² Te ìⁿ nduu ñá túú ñá ní xèxi ñáyiu ní sándáá iní tñúhu Yá Ndiõxí cuendá mee-ñi-gã ní cáháⁿ ndihí-yu, te ní xáhaⁿ Espíritú Yá Ndiõxí xii-yu:

—Tendaha-ndo tẽ Bèé ndihí té Sàulú quihíⁿ-güedé dava-gá ñuú cada-güedé chiuⁿ tahu-í, chi ducaⁿ cuiní-í cunduu —càchí Espíritú-gá xãhaⁿ-xi xii-yu.

³ Te ní cáháⁿ ndihí tucú-yu Yá Ndiõxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí tẽ Bèé ndihí té Sàulú. Te sátá dúcáⁿ ñí quide-güedé, te ní quide ndee ñí ñáhã-yu xii-güedé.

Té Bèé ndihí té Sàulú cuáháⁿ-güedé distritú Chìpré cáháⁿ-güedé tñúhu Yá Ndiõxí

⁴ Te té Bèé ndihí té Sàulú ní quee-güedé cuáháⁿ-güedé cuendá ducaⁿ cuiní Espíritú Yá Ndiõxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yacáⁿ ní quee-güedé bàrcú cuáháⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute. ⁵ Te ní quexìo-güedé mei ñuú Salaminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiu isràél càháⁿ-güedé tñúhu Yá Ndiõxí.

Te cuáháⁿ ndihi-güedé té Juáa cuendá chindee ñaha-dé xii-güedé. ⁶ Te ní tñii-güedé ichi cuáháⁿ-güedé ñuú Páfós cáa ndàa ingá xio Chìpré, te yàcáⁿ ní naníhí tnáhá-güedé ndihi ìⁿ tée isràél nāmí-dě Barjésús, te tée-áⁿ xini-dé cada ndùu-dé, te càchí-dé sá càháⁿ-dé tnúhu Yá Ndiòxí dico ñá ndáa. ⁷ Te tée-áⁿ quidé chiùⁿ-dé ndihi té Sèrgiú, àdi Páblú chi úú diù-dé, te cùu-dé gobiernú Chìpré, te ío túha-dé. Te ní cana-dé té Bèé ndihi té Sàulú, chi cuini-dé cundedóho-dé tnúhu Yá Ndiòxí. ⁸ Te tée quide nduu-áⁿ ñá ní dàña-dé cáháⁿ-güedé tnúhu-gá, chi ñá ní cuini-dé sá tée cùu gobiernú-áⁿ tuha-dé ichi Yá Ndiòxí. Te ducaⁿ ñí quide té Barjésús, tée xáhaⁿ-güedé Èlimás. ⁹ Te tnáhá tucu té Sàulú ndécú úú diù-dé chi xáhaⁿ tucu-güedé Páblú, te ndècu ndihi-dé Espiritú Yá Ndiòxí. Te ní xindéhé ñíi ñáhá-dé xii tée quide nduu-áⁿ. ¹⁰ Te ní xáhaⁿ-dè:

—Yòhó, chi dàtná quidé yùcu ñávaha quide-n chi mee-ni dándahú-n ñáiyu. Yòhó cúu-n dèhe sácuhlá, chi nchaa tnúhu váha cuini Yá Ndiòxí cáháⁿ-yu, te yòhó ñá dáña-n. ¹¹ Te vitna quini-n nacuáa cunduu, chi taxi Yá Ndiòxí ìⁿ castiú xii-n chi vá cútnuni-gá núu-n càca cuu-n ìⁿ úú nduu — càchí-dé xáhaⁿ-dè xii tée quide nduu-áⁿ.

Te òré ducaⁿ ñí xáhaⁿ tē Páblú xii-dé, te òré-ni ní cuaa-dé, te ñá túú ní cùtnuni tnáhí-gá núu-dé, te ní xóo nducu-ná-dé ñáiyu ní xóo

cuíta nehe ñaha xii-dé. ¹² Te tée cùu gobiernú ní xini-dé nacuáa ní quide té Páblú, te ío ní cuñuhu-dé. Te ní tnáhá ini-dé tnúhu Jèsús, núu xiáⁿ ní sándáa ini-dé.

Té Páblú ndihi té Bèé ndécú-güedé ñuú Antiòquiá Pìsidiá

¹³ Te té Páblú ndihi dava-gá cue tée xica cuu ndihi-dé ní quee-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pànfiliá. Te té Juáa ní nacuico-dé ní dándõo ñaha-dé xii-güedé cuánuhú-dé ñuú Jerusàlén. ¹⁴ Te

dava-gá-güedé ní quee-güedé ñuú Pèrgé cuáháⁿ-güedé ñuú Antiòquiá, te Pìsidiá yíndàha-xi ñuú-áⁿ. Te nduu xíndetatú-yu, te ní sáháⁿ-güedé veñuhu ñáiyu isràél, te ní ngóo-güedé xití veñuhu. ¹⁵ Te cue tée ndècu veñuhu ní queheⁿ-güedé tutú yódó tnùni nchaa tnúhu sá ñí chídó tnùni ndíi Moisés ndihi tutú yódó tnùni nchaa tnúhu sá ñí chídó tnùni dava-gá cue tée ní xóo cáháⁿ tnúhu Yá Ndiòxí ndéé sanaha, te ní dácuáhá-güedé ní xíndedóho cue ñáiyu, te dàtnuni cue tée yíndaha veñuhu-áⁿ ñí xáhaⁿ-güedé xii té Páblú ndihi dava-gá-güedé:

—Nchòhó cue tée cùu ñani tnáhá-ndí, te núu cuini-ndó cáháⁿ-ndó tnúhu Yá Ndiòxí, te cuu cáháⁿ-ndó tnávíi cuendá cutúha-yu —càchí-güedé xáhaⁿ-güedé.

¹⁶ Te té Páblú ní ndacuíñí-dé, te ní ndacani-dé ndaha-dé

cuèndá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dě:

—Te nchòhó ñáyiú quide nchaa nacuáa cáháⁿ Yá Ndiòxí ndíhi nchaa nchòhó ñáyiú isràél, cundedóho-ndo nchàa-ndo ìⁿ tnúhu na cáháⁿ-í-a. ¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gă xii-yu te ní chindee ñaha-gă cuèndá cáyá-yu, chi cuiní-gá sá cúu vâi-yu, te ducaⁿ ñi quide-gă cútnàhá ní xíndecú-yu nâcióⁿ Ègiptú. Te dàtnùní ní dâcâcu ñaha-gă xii-yu ñuú-áⁿ, chi mee-gă nchaa ndâcu-gă quidé-gă. ¹⁸ Te ní xíndecú-yu ìⁿ xichi núú ñà túú tnàhí sâcúndecu ñáyiú údico cuíá, te xiti údico cuíá-áⁿ ñi cundee ìní-gă nchaa sá ñi quidé-yu. ¹⁹ Te Yá Ndiòxí ní chindee ñaha-gă xii ñáyiú isràél, te ní dánâá-yu úsâ nâcióⁿ, chi cuèndá ní cuiní-gă cuu cuèndá-yu ñuhú-áⁿ. ²⁰ Te dàtnùní ní cachí Yá Ndiòxí sá díú-ní cuè téé cùchiuⁿ taxi tnuní-güedé nchaa ñáyiú, te ducaⁿ ñi quide-güedé dàtnâ cúmí cîèndú dava cuíá. Te sâta xîáⁿ, te ní xíndecu té Sâmuél téé ní cáháⁿ tnúhu Yá Ndiòxí. ²¹ Te dává-áⁿ ñi cuiní ñáyiú isràél sá cündècu ìⁿ téé quindaha ñaha-dé xii-yu, te Yá Ndiòxí ní cachí-gá sá tē Sâul quindaha-dé-yu, te téé-áⁿ ñi cuu-dé déhe té Cîs, te té Benjamín téé ní xíndecu ndéé sanaha-gă ní cuu ñaní tnàhá-dé. Te té Sâul ní xíndaha-dé ñáyiú údico cuíá. ²² Te Yá Ndiòxí

ñá ní cuiní-gă cundecu-ni-dé quindaha-dé ñáyiú, chi ní cuiní-gá sá tē Dâvíí ndíhu ndaha-dé cue ñáyiú isràél, te ní cachí-gá: “Ío váha ní tnahá iní-í nâcuáa quide té Dâvíí déhe téé Isâi, te cada-dé nchaa nâcuáa cúñaha-í xii-dé”, duha ní cachí Yá Ndiòxí —câchí té Pâblú xáhaⁿ-dē xii-yu.

²³ Te ní xáhaⁿ tucu té Pâblú:

—Díu-ni ñaní tnàhá tē Dâvíí cúú Jêsús. Te Yá Ndiòxí ní tendaha-gă Jêsús ní quixi-gă ñuyíú-a cuèndá nchaa ñáyiú isràél ná quíndâá iní ñáhá xii Jêsús naníhí tàhú-yu, chi ducaⁿ ñi cachí Yá Ndiòxí cunduu. ²⁴ Te cútnàhá vâta ngüita-gă Jêsús cáháⁿ-gă tnúhu Yá Ndiòxí, te ní cáháⁿ té Juâá núú ñáyiú isràél sá xíní ñùhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gă cuú-dé, te ní xáhaⁿ-dē xii-yu: “Nchòhó câchí-ndó sâ yùhú cúu-í Crístú Yaá ndétú-ndó dico ñáhá, chi ñá díú yùhú cúu-í Crístú, chi davitna quixi Crístú Yaá tendaha Yá Ndiòxí quixi ñuyíú-a. Te yùhú cúu-í ìⁿ téé duuⁿ duuⁿ ñá túú tàú nandaxi cuèdicó chàu-gă dico quide-í chiuⁿ-gă”, duha ní cáháⁿ te Juâá —câchí té Pâblú xáhaⁿ-dē xii-yu.

²⁶ Te ní xáhaⁿ tucu té Pâblú:

—Cundedóho tucu-ndo ìngá tnúhu na cáháⁿ-í. Nchòhó tnàhá-ndó cùu-ndo ñaní tnàhá ndíi Àbrahám, te xíní-ndó sâ Yá Ndiòxí cúnúu-gă. Te díu-ni-gă cuiní-gá sá ncháá-ndó cündedóho-ndo tnúhu-gă, chi

cùu-xi tnúhu sá càháⁿ nàcuáa naníhí tãhú-ndó. ²⁷ Te nchaa ñáyiú ndècu ñuú Jerusalén ndihí nchaa cue tée cùnū ñá ní cùnūnì iní-yu ndihí-güedé sá Yã Ndiöxí ní tendaha-gã Jèsús ní quixi-gã ñuyíú-a. Te ñá ní sãha-yu cuendá sá díú Jèsús ní cacunehe cue tée ní cáháⁿ tnúhu Yã Ndiöxí ndéé sanaha cuéi ní dácuáhã-yu tnúhu-gã veñúhu-yu ndi tnahá úná nduu, nduu ndètátú-yu. Te ní cachí-yu sá ndècuéchi Jèsús, te ní xáhãⁿ-yu sá cáhni ñaha-güedé xii-gã. Te xiãⁿ sa naha cue tée ní xóo cáháⁿ tnúhu-gã ndéé sanaha sã dúcãⁿ càháⁿ-yu. ²⁸ Te cuéi ñá túú nã ní quide-gã te ní xáhãⁿ-yu xii té Pilatú tée cùu gobiernú sá táuchiuⁿ-dé cahni ñaha-güedé xii-gã. ²⁹ Te xiãⁿ núu ní sata caa ñaha-güedé xii-gã núu cùrúxí. Te ní quide-güedé nchaa nàcuáa ní chídó tnùnì cue tée ní cáháⁿ tnúhu Yã Ndiöxí ndéé sanaha. Te sátá ní xihí-gã, te ní nunehe ñaha-güedé xii-gã núu cùrúxí, te nchido ñaha-güedé cuáhãⁿ, te ní chihí ñaha-güedé ñⁿ xití yaú. ³⁰ Te Yã Ndiöxí ní dándótó-gã Jèsús. ³¹ Te titní xito ní sáhãⁿ Jèsús núu ndécú ñáyiú ní xica cuu ndihí-gã, ñáyiú ní quee distritú Galileá ní sáhãⁿ-yu ndihí-gã ñuú Jerusalén. Te vitna nchaa ñáyiú-án xáhãⁿ-yu xii dava-gã ñáyiú isràél nàcuáa ní cuu ní ndoto-gã.

³² Te nchúhú càháⁿ-ndí nàcuáa cada-ndo naníhí tãhú-ndó, chi Yã Ndiöxí ní xáhãⁿ-gã xii cue ñani tnahá-ó

ñi xíndecu ndéé sanaha sã téndaha-gã Déhe-gã Jèsús quixi-gã ñuyíú-a. ³³ Te ní quixi-gã ní xihí-gã, te ní dándótó ñaha Yã Ndiöxí xii-gã, te núu xiãⁿ naníhí tãhú-ó núu na quindáa iní-ó-gã. Te ñⁿ tée ní cáháⁿ tnúhu Yã Ndiöxí ndéé sanaha ní chídó tnùnì-dé núu sãlmú cúú úú nàcuáa ní cáháⁿ Yã Ndiöxí ní xáhãⁿ-gã xii Déhe-gã, te duha ní xáhãⁿ-gã: “Yòhó cúú-n Déhe-í, te vitna cutnùnì iní ñáyiú sá yùhú cúú-í Tãtã-n”, duha ní xáhãⁿ-gã xii Jèsús. Te ñⁿ-ni ducaⁿ ñi chídó tnùnì tée ní cáháⁿ tnúhu-gã ndéé sanaha. ³⁴ Te ingá xichi tucu núu tütú-gã ní chídó tnùnì ñⁿ tée ní xíndecu ndéé sanaha nàcuáa ní xáhãⁿ-gã xii Déhe-gã, te duha ní xáhãⁿ-gã: “Mee-ni sã vãha cada ñaha-í dàtná ní xii-í té Dàvií”, duha ní xáhãⁿ-gã. Te ducaⁿ ñi chídó tnùnì tée ní xíndecu ndéé sanaha nàcuáa ní cáháⁿ Yã Ndiöxí, chi òré ní xihí Jèsús te ní dándótó ñaha-gã cuendá sá vã tíú yiqui cuñú-gã. ³⁵ Te núu xiãⁿ duha ní chídó tnùnì ñⁿ tée ní xíndecu ndéé sanaha núu libré Sãlmú nàcuáa ní xáhãⁿ-dè xii-gã: “Vã dáñã-n sã tíú yiqui cuñú Déhe-n chi ío vãha quide-gã”, duha ní chídó tnùnì tée ní xíndecu ndéé sanaha —càhí té Pãblú xáhãⁿ-dè xii-yu.

³⁶ Te xãhaⁿ tucu-dé:

—Te té Dàvií ní quide-dé nchaa chiúⁿ ní tãhú Yã Ndiöxí cada-dé, te dàtnùnì ní xihí-dé. Te ní chindúxi ñaha-güedé xii-dé yatni nàcuáa yíndúxi cue ñani tnahá-dè ndéé sanaha-gã, te xiãⁿ ñi téhyú

yiqui cùñú-dé. ³⁷ Te Jèsús chi ñá ní tēhyú yiqui cùñú-gá, chi ní dándótó ñàha Yá Ndiöxí xii-gá. ³⁸ Te cuìní-í cachí tnúhu-í xii-ndo cuendá cutnùní iní-ndó nchàa-ndo sá cáda càhnu iní Yá Ndiöxí nchaa cuéchi-o, chi ní xihí Jèsús cuendá naníhí tǎhú-ó. ³⁹ Te nchaa ñáyiú na quíndáá iní ñáhá xii Jesús te cada càhnu iní-gá nchaa sá ñà túú vǎha ní quidé-yu, chi núu mee-ni tnúhu ní chídó tnùní ndíi Moisés ná quíndáá iní-yu te vá nánihí tǎhú-yu. ⁴⁰⁻⁴¹ Te ío coto-ndo mēe-ndo cuendá sá vǎ yǎha-ndo dàtná ní cachí Yá Ndiöxí yǎha cue ñáyiú ñá túú ní quide vǎha ní xíndecu ndéé sanaha. Te nàcuáa ní cáháⁿ-gá ní chídó tnùní ìⁿ téé ní cáháⁿ tnúhu-gá ndéé sanaha, te duha ní xáhaⁿ-gǎ xii-yu dàvǎ-áⁿ:

Cundedóho nchaa nchòhó ñáyiú cuèhé yuhu-xi na càháⁿ-í ìⁿ tnúhu te quíni-ndó nǎ cuñúhu-ndo,

yúhú quidè-í vǎi núú sǎ ío vǎha vitna ndècu-ndo ñuyú-a,

te cuèi na còo ñáyiú cachí tnúhu xii-ndo nàcuáa ndúu nchaa sá vǎha-áⁿ, dico nchòhó vá quíndáá iní-ndó,

te sá dúcáⁿ càda-ndo vá quíndáá iní-ndó, te dàcuíta nihnu-ndo mēe-ndo.

Duha ní xáhaⁿ-gǎ xii-yu te ducaⁿ nǐ chídó tnùní téé ní cáháⁿ tnúhu-gá ndéé sanaha —càchí té Pǎblú xǎhaⁿ-dē xii-yu.

⁴² Te òré ní ndee té Pǎblú veñúhu ñáyiú isràél ndihí cue téé xica cuu ndihí-dé, te ní cáháⁿ ndàhú ñáyiú yihí veñúhu núú-dē sá quihíⁿ-dé núú ùná nduu, te ñiu-ni tnúhu ní cáháⁿ-dé cáháⁿ tucu-dé òré quexìo-dé. ⁴³ Te sátá nǐ túhú veñúhu-yu, te vǎi ñáyiú isràél ndihí ñáyiú ní chitnahá ñáhá xii-yu nchicúⁿ nihnu quide nacuáa quidè-yu càháⁿ ndihí-yu Yá Ndiöxí cuáháⁿ ndihí-yu té Pǎblú ndihí té Bèé. Te ní xáhaⁿ-güedē xii-yu sá vǎ dáñá ndéé-yu canchicúⁿ nihnú-yu tnúhu sá càháⁿ nàcuáa quide Yá Ndiöxí sá cúu-xi-yu.

⁴⁴ Te núú ùná nduu, nduu ndètatú-yu ní quexìo vai vihi ñáyiú, chi nihí ñúú ní quexìo ndedóho-yu tnúhu Yá Ndiöxí. ⁴⁵ Te cuendá sá ío vǎi ñáyiú ní quexìo, núu xǎⁿ ní cuu cuédú iní ñáhá ñáyiú isràél xii té Pǎblú, te ní xícuèhé ñáhǎ-yu xii-dé. Te ní xáhǎⁿ-yu xii-dé sá dándàhú ñáhá-dē xii-yu ndihí tnúhu càháⁿ-dē. ⁴⁶ Te té Pǎblú ndihí té Bèé ñá túú ní yúhú ñáhá-güedē xii-yu. Te ní xáhaⁿ-güedē:

—Xini ñuhu-xi díhna-gá nchòhó ñáyiú isràél cáháⁿ ndihí-ndí tnúhu Yá Ndiöxí, te mee-ndo ñǎ cuìní-ndó cundedóho-ndo. Te sá dúcáⁿ quide-ndo, te vá nánihí tǎhú-ndó, te ni vǎ càháⁿ-gá-ndí tnúhu Yá Ndiöxí núú-ndó, dico cáháⁿ-ndí núú dàva-gá ñáyiú cuèi ñá díú ñáyiú isràél cúu-yu, ⁴⁷ chi ducaⁿ nǐ táuchíúⁿ Yá Ndiöxí cada-ndí. Te ní cachí-gá:

Cuini-í cundecu-ndo dàtná ìⁿ
 tée yòtnuú ñuhu cun-
 decu-ndo

cáháⁿ-ndó tnùhu-í núu
 nchàa ñáyiú ñá túú
 cùndihi-ndo ñáyiú
 ndècu nihií ñuyíú, te
 naníhí tàhú-yu,

duha ní cáháⁿ-gá —càchí
 té Páblú ndihi té Bèé
 xáhaⁿ-güedé xii-yu.

48 Te ñáyiú ñá túú cùu ñáyiú
 isràél ío ní cudíí iní-yu sá
 dúcáⁿ ñí cáháⁿ-güedé, te ní
 xítñahá-yu sá ío váha cuáháⁿ
 tnúhu Yá Ndiòxí. Te mee
 Yá Ndiòxí sa ñaha-gá nándi
 cùu ñáyiú naníhí tàhú, te
 diu-ni ñáyiú-áⁿ ñí sándáá
 iní-yu. 49 Te nchaa xichi
 xiáⁿ ñí sáháⁿ-yu ní cáháⁿ-yu
 tnúhu-gá. 50 Te cue té
 isràél ní ndatnúhu-güedé
 ndihi cue té cùnuu, ndihi
 cue ñáyiú dihií cùnùu, te
 ñáyiú dihi-áⁿ ñà túú tnàhí
 cùmání-yu veñúhu. Te ní
 xáhaⁿ-güedé sá cádá ùhú-yu té
 Páblú ndihi té Bèé, te dàtnùní
 cuicúⁿ ñáhá-yu xii-güedé, te
 ducaⁿ ñí quidé-yu. 51 Te
 ní casaⁿ ñuhu té Páblú
 ndihi té Bèé sáhá-güedé ní
 naquidi-güedé ticá chúhmá ñí
 tní sáhá-güedé. Te ducaⁿ ñí
 quide-güedé cuendá cutnùní
 iní-yu sá ñà túú ní quide
 váha-yu. Te dàtnùní ní
 quee-güedé cuáháⁿ-güedé ñuú
 Ìconiú. 52 Te ñáyiú ní sándáá
 iní-xi tnúhu Jèsús ío váha ní
 cuu iní-yu cuendá sá ñí naníhí
 tàhú-yu, te ncháa-yu sa ndècu
 ndihi-yu Espíritú Yá Ndiòxí.

14

Té Páblú ndihi té Bèé
 ndécú-güedé ñuú Ìconiú

1 Te ní quexìo té Páblú
 ndihi té Bèé ñuú Ìconiú.
 Te ní sáháⁿ-güedé veñúhu
 ñáyiú isràél, te ío váha ní
 cáháⁿ-güedé tnúhu Yá Ndiòxí,
 te vai ñáyiú isràél ndihi ñáyiú
 ñá túú cùu ñáyiú isràél ní
 sándáá iní-yu tnúhu-gá. 2 Te
 dava ñáyiú isràél ñá ní sándáá
 iní-yu, te ní cáháⁿ cuèhé-yu
 cuendá té Páblú ndihi té Bèé
 cuendá sá vǎ quindáá iní
 ñáyiú ñá túú cùu ñáyiú isràél.

3 Te ní xíndecu-güedé titní
 nduu, te ñá túú tnàhí ní
 yùhú-güedé ní dácuáhá-güedé
 ñáyiú tnúhu Yá Ndiòxí. Te
 mee-gǎ ní chindee ñaha-gá
 ní quide-güedé titní núu sǎ
 vǎ yòo tnàhí ndàcu cada, te
 ío ní cuñúhu-yu. Te ducaⁿ
 ñí quide-gá cuendá cutnùní
 iní-yu sá ndáá càháⁿ-güedé
 sá méé-gǎ ío cùu iní ñáhá-gǎ
 xii-yu, te naníhí tàhú-yu núu
 na quindáá iní-yu tnúhu-gá.

4 Te ní quee dava ñáyiú ñuú
 Ìconiú, davá-yu cùndihi-yu
 ñáyiú isràél ñáyiú ñá túú
 sándáá iní tnúhu Jèsús. Te
 davá-yu cùndihi-yu cue té ní
 táuchíúⁿ Jèsús càháⁿ tnúhu-gá.

5 Te ñáyiú isràél ndihi dava-gá
 ñáyiú ñá túú sándáá iní-xi ní
 cuu ñíⁿnúú-yu ndihi cue té
 cùnuu sá cání-yu-güedé, te
 cuáha yúú ñáhá-yu xii-güedé.

6 Te té Páblú ndihi té Bèé ní
 níhí-güedé tnúhu sá cuini-yu
 canihá-yu, núu xiáⁿ dayuhu
 ñí quee-güedé cuáháⁿ-güedé
 ñuú Lìstrá ndihi ñuú Dèrbé. Te

ndi ndúú ñuú-áⁿ yíndèhu-xi Licaoniá. Te ní sáháⁿ-güedé dava-gá ñuú líhli càa yatni xiáⁿ. ⁷ Te nchaá ñuú-áⁿ ní cáháⁿ-güedé tnúhu Jèsús.

Ñuú Lìstrá ní sáha yúú ñáhá-yu xii té Páblú

⁸ Te ñuú Lìstrá ndécú ñⁿ tée yacua, mee-ni núcóo-dé chi ducaⁿ tnàhí càa-dé ní cacu-dé. ⁹ Te ndédóho-dé tnúhu cáháⁿ té Páblú, te ní cutnùní iní té Páblú sá ïo sàndáá iní tée yacua-áⁿ sá Yá Ndiöxí cada tátna ñaha-gá xii-dé, núu xiáⁿ ní xíndéhé ñaha váha té Páblú xii-dé. ¹⁰ Te té Páblú ní cáháⁿ níhi-dé, te ní xáhaⁿ-dè:

—Ndacuíñí cunutñí váha-n —càchí-dé xáhaⁿ-dè.

Te ní ndacuíñí cunu-dé te ní xica-ni-dé. ¹¹ Te òré ní xini-yu sá tē Páblú ní quide tátna-dé tée yacua-áⁿ, te nchaá-yu ní cáháⁿ-yu tnúhu mèe-yu tnúhu Licàoniá. Te ní cáháⁿ níhi-yu, te xitnàhá-yu:

—Cue tée-áⁿ sànuu sá ñáyiú cùu-güedé dico ñáhá, chi ndiöxí cúu-güedé te ní quexiö-güedé ñuyiú-a —càchí-yu xitnàhá-yu.

¹² Te ní cachí-yu sá tē Bèé cúu-dè ndiöxí dánàní-yu Júpiter, te té Páblú cúu-dè ndiöxí dánàní-yu Mèrcuriú, chi cuendá tée-áⁿ cúu-dè tée cáháⁿ. ¹³ Te càa ñⁿ veñúhu yuhu ñuú-áⁿ núu quidé cahnú-yu ndiöxí sá dánàní-yu Júpiter. Te dútú yíndàha veñúhu-áⁿ ndécá-dè ñⁿ úú ndicutu cuáháⁿ quehé veñúhu, te ñuhu itá dúcúⁿ-güedi. Te cue quití-áⁿ cahni-dé cada càhnu-dé ndihí-yu té Bèé ndihí té

Páblú ní cùu, chi ducaⁿ quidé-yu quide cahnú-yu ndiöxí-yu. ¹⁴ Te té Bèé ndihí té Páblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñá tnàhá iní-güedé nàcuáa sàni iní-yu cadá-yu. Te xinu-güedé cuánguihu-güedé tnuú-yu, te níhi ní cáháⁿ-güedé, te xáhaⁿ-güedé:

¹⁵ —¿Ná cuendá ducaⁿ cuiní-ndó càda-ndo? Te ñu-ni tnàha ñáyiú-ndo cùu-ndí, dico-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vā cáda-gá-ndó nàcuáa quide-ndo, te quindáá iní-ndó Yá Ndiöxí, chi ñⁿ ñi-ni Yá Ndiöxí ndécú. Te ñu-gá ní cadúha-gá andiú ndihí ñuyiú-a ndihí lámár ndihí nchaandi túhú sá ïo ñuyiú-a. ¹⁶ Te ndéé sanaha ñí dáñá Yá Ndiöxí ní quidé-yu nàcuáa cuáháⁿ iní mèe-yu. ¹⁷ Te ní xóo cada-gá sá vāha cuendá cutnùní iní-yu sá ïo vāha iní-gá. Te ñu-gá dácùuⁿ-gá dáú, te tàxi-gá sá nchító-ó chi xitö-gá nchaá tatá xítú-ó, te xiáⁿ cúdí iní-ó ndècu-o ñuyiú-a —càchí té Páblú ndihí té Bèé xáhaⁿ-güedé xii-yu.

¹⁸ Te cuéi ducaⁿ ñí xáhaⁿ-güedé nchaá tnúhu-áⁿ, dico ïo úhú ní sàndáá iní-yu ñá ní sàhni-yu ndicutu-áⁿ chi cuendá ducaⁿ tnàhí quidé-yu sàhni-yu ndicutu òré quidé cahnú-yu ndiöxí-yu.

¹⁹ Te ñuú Antiòquia ndihí ñuú Ìconiú xíndecu dava ñáyiú isràél, te ní queé-yu

cuáháⁿ-yu ñuú Lìstrá núú ndécú tē Pāblú. Te xíáⁿ nǐ quexió-yu te ní xáháⁿ-yu xii ñáyiú dii ñuú xíáⁿ sǎ cáhñi-yu té Pāblú. Te ní sáha yúú ñáhá-yu xii-dé, te ní cáhāⁿ-yu sá nǐ xihí-dé, te ní tñi ñaha-güedē xii-dé, te tãñuhu ñaha-güedē xii-dé cuáháⁿ ñⁿ xio yuhu ñuú ní sá dáquéne ñaha-güedē. ²⁰ Te ní quexio cue ñáyiú sándáá iní tñuhu Jèsús núú cáttu-dé-áⁿ, te ní nadúcúⁿ ndèé ñáhá-yu xii-dé, te nini xñutñi-yu-áⁿ nǐ ndacóo-dé cuánuhú ndihi ñaha tùcu-dé xií-yu xití ñuú. Te nduu tñéé-áⁿ nǐ ndee-dé ndihi té Bèé cuáháⁿ-güedē ñuú Dèrbé.

²¹ Te ní cáhāⁿ-güedē tñuhu Yá Ndiöxí ñuú-áⁿ, te ío vai ñáyiú ní sándáá iní-yu tñuhu-gá. Te dātnùní ní quee-güedē cuáháⁿ tucu-güedē ñuú Lìstrá, ndihi ñuú Iconiú, ndihi ñuú Antiòquia. ²² Te ní xáhāⁿ-güedē xií-yu sá vǎ dáñá nìhnú-yu tñuhu Jèsús. Te sá dúcáⁿ nǐ cáhāⁿ-güedē, te vñhi-gá ní cudíí iní-yu cadá-yu nàcuáa cuñi Yá Ndiöxí cadá-yu, te ní xáhāⁿ-güedē:

—Dacuitíí cùndecu-o ñuyiú-a ndoho-o, te dātnùní ducaⁿ te nacuaca ñaha Yá Ndiöxí xii-o —cächí-güedē xáhāⁿ-güedē xií-yu.

²³ Te ní sáhāⁿ-güedē ndi tñahá ñⁿ ñⁿ xichi núú ndécú ñáyiú dācuaha tñuhu Yá Ndiöxí, te ní taxi ndecu-güedē cue tée quindaha ñaha xií-yu, te ní cáhāⁿ ndihi-güedē Yá Ndiöxí, te ñá túú tñahí ná

ní xèxi-güedē cuendá sá nǐ cáhāⁿ ndihi-güedē-gá. Te ní xáhāⁿ-güedē sá Yá Ndiöxí coto ñaha-gǎ xií-yu chi diu-ni-gá ní sándáá iní-yu.

Té Pāblú ndihi té Bèé cuáháⁿ tucu-güedē ñuú Antiòquia Siria

²⁴⁻²⁵ Te dātnùní ní quee té Pāblú ndihi té Bèé cuáhāⁿ-güedē, ní yáha-güedē distrítú Pìsidia. Te ní quexio-güedē ñuú Pèrgé, xíáⁿ nǐ cáhāⁿ-güedē tñuhu Jèsús. Te ñuú-áⁿ yíndèhu-xi Panfliá. Te dātnùní cuáhāⁿ-güedē ñuú Àtaliá. ²⁶ Te yàcáⁿ ní quee-güedē bàrcú cuánuhú tucu-güedē ñuú Antiòquia. Te ñuú-áⁿ cúú-xí ñuú núú ní xicáⁿ táhū-yu núú Yá Ndiöxí cuendá sá chindèe ñaha-gá xii-güedē chiuⁿ quide-güedē. Te cuendá sá nǐ ndihi chiuⁿ-güedē nchaa ñuú núú nǐ sáhāⁿ-güedē, núú xíáⁿ cuánuhú-na-güedē. ²⁷ Te ní ndexio-güedē ñuú-áⁿ, te ní cana-güedē nchaa ñáyiú sándáá iní tñuhu-gá, te ní cani-güedē cuendú núú-yu nchaa nàcuáa ní cuu núú nǐ sáhāⁿ-güedē, te xáhāⁿ-güedē: “Yá Ndiöxí ío ní chindee ñaha-gá xii-ndí ní cáhāⁿ-ndí tñuhu-gá núú nǐ sáhāⁿ-ndí, te mee-gǎ ní quide sá tñahá ñáyiú ñá túú cùu ñáyiú isràel ní xíndedóho-yu tñuhu-gá cuendá quíndáá iní-yu”, cächí-güedē xáhāⁿ-güedē xií-yu. ²⁸ Te vai nduu ní xíndecu-güedē ñuú Antiòquia ndihi nchaa ñáyiú ní sándáá iní tñuhu Jèsús.

15

*Ní natacá ñáyiú sàndáá iní
tnúhu Jèsús ñuú Jerusàlén*

¹ Te ní quee ñⁿ úú cue téé distritú Jùdeá cuáháⁿ-güedé ñuú Antiòquiá, te ní sáá-güedé, te ní xáhaⁿ-güedé xii ñáyiú sàndáá iní tnúhu Jèsús sá núu vá cuáha-güedé seña ñii nchaa cue téé dàtná ní cachí ndíi Moisés, te vá nánihí tàhú-güedé. ² Te sá dúcáⁿ ñí cáháⁿ cue téé-áⁿ, te ní ngúita té Páblú ndihí té Bèé ní tenáá-güedé cue téé-áⁿ, chí dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhíⁿ té Páblú ndihí té Bèé ndihí ñⁿ úú-gá-güedé ñuú Jerusàlén. Te yàcáⁿ cada-güedé ñⁿ jùndá ndihí mee-ní cuè téé ní táuchíúⁿ Jèsús càháⁿ tnúhu-gá, ndihí cue téé yìndaha ñáyiú sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue téé ní sáá ñuú Antiòquiá.

³ Te nchaa ñáyiú sàndáá iní tnúhu-gá ní quide ndee ìní ñáhá-yu xii-güedé, te ní tñi-güedé ichi cuáháⁿ-güedé. Te ní yáha-güedé distritú Fèniciá ndihí distritú Sàmariá, te yàcáⁿ ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí ìní nchaa ñáyiú ní xíndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusàlén, te ío ní cudíí ìní-yu sá ñí ndexìo váha-güedé. Te ndècu dava-gá cue téé ní táuchíúⁿ Jèsús dácua

ñaha xií-yu tnúhu-gá, ndihí cue téé yìndaha ñaha xií-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núu-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiúⁿ-gá. ⁵ Te ndècu ñⁿ úú cue téé ní tuha ichi Yá Ndiòxí, te cue téé-áⁿ cúu-güedé cue téé farisèú, te ní ndacuñí-güedé, te ní xáhaⁿ-güedé:

—Dacuití xini ñuhu-xi sá cuáha-güedé seña ñii cue téé cùmání cue téé ñá túú cùu ñáyiú isràél, te cùñaha-ndo sá ná cádá-güedé nchaa nàcuáa ní chídó tnùní ndíi Moisés —cachí cue téé cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dácua ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vài vihi tnúhu ní cáháⁿ-güedé. Te té Pèlú ní ndacuñí-dé, te ní xáhaⁿ-dè xii-güedé:

—Nchòhó cue téé ndècu ndihí-í ichi Xítohó Jesucristú, chí cùndedóho ñⁿ tnúhu na càháⁿ-í-a. Sa nàha-ndo sá ñí cachí Yá Ndiòxí sá d'ù-í cáháⁿ-í tnúhu Jèsús núu ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu. ⁸ Dico Yá Ndiòxí sa nàha-gá nása càa ìní ñⁿ ñáyiú. Te cùtnuní ìní-ó sá cúú ìní ñáhá-gá xii cue ñáyiú ñá túú cùu ñáyiú isràél, chí ní sáñaha-gá Espiritú-gá ndécú

ndihí-yu dàtná cuìní-ndó nǐ taxi-gá ndécú ndihí nchoo. ⁹ Chi Yá Ndiöxí ìⁿnuu-ni cùu iní ñàhá-gǎ xii-o nchàa-o ndihí cue ñáyiu ñá túú cùu ñáyiu isràél, chi tnàhá-yu ní xócání-gǎ nchaa sá cuèhé sá dúhá nǐ xóo cadá-yu ndéé òré ní sándáá iní-yu Jèsús. ¹⁰ ¿Te ná cuèndá nchòhó cuìní-ndó càda ñáyiu ní sándáá iní tnúhu-gá ìⁿ sá ñǎ tnàhá iní-gá sá cadǎ-yu? Te cuìní-ndó dándoho-ndó-yu. Te ni nchòo te ni cue ñaní tnàhá-ó nǐ xíndecu ndéé sanaha ñǎ ní ndàcú-yu cadá-yu nchaa xiǎⁿ. ¹¹ Te vǎ dúcǎⁿ cǎháⁿ-ndó, chi sa nàha-ndo sá Yǎ Ndiöxí ní cundàhú iní ñàhá-gǎ xii-o, te dió ducaⁿ nǐ quide-gǎ sá nánihí tàhú-ó nchàa-o. Te òu-ni ducaⁿ nǐ quide-gǎ ñáyiu ñá túú cùu ñáyiu isràél, te ní naníhí tàhú-yu —càchí té Pèlú xǎhaⁿ-dǎ xii-güedé.

¹² Te dàtnùnǐ té Bèè ndihí té Pǎblú ní ngüíta-güedé ní cǎháⁿ-güedé, te ní xíndedóho-yu nchaa tnúhu ní cǎháⁿ-güedé. Te ní xǎhaⁿ-güedé xií-yu nàcuáa ní chindee ñàha Yá Ndiöxí xii-güedé, te ní quide-güedé vǎi núú sǎ vǎ yóo tnàhí ndàcu cada, te ducaⁿ te ní cutnùnǐ iní ñáyiu ñá túú cùu ñáyiu isràél sá ndàá cǎháⁿ-güedé. ¹³ Te òré ní ndihí cuèndú ní cǎháⁿ-güedé, te té Jàcobó ní xǎhaⁿ-dǎ:

—Nchòhó cue téé ndècu ndihí-í ichi Xítóhó Jesucristú, chí cùndedóho ìⁿ tnúhu na cǎháⁿ-í-a. ¹⁴ Té Xímú, àdi Pelú chí úú diù-dé, ní caní-dé cuèndú nàcuáa ní quide Yá

Ndiöxí ndéé díhna ní dáquéé diìⁿ-gǎ ñáyiu ñá túú cùu ñáyiu isràél tnuú nchaa ñáyiu ñá túú ndècu ichi-gǎ, cuèndá cuìní-gǎ chiñuhu ñàhá-yu xii-gǎ. ¹⁵ Te dàtnùnǐ ní cǎháⁿ-dé nàcuáa ní cǎháⁿ Yǎ Ndiöxí ndéé sanaha. Te duha ní chídó tnùnǐ cue téé ní xóo cǎháⁿ tnúhu-gǎ ndéé sanaha nàcuáa ní cǎháⁿ-gǎ, te duha ní cachí-gǎ:

¹⁶ Dàtná cuìní-ndó cùu ìⁿ vehe ní sǎá te ní ngoyo te dàndaa-güedé xito cùu uú, ducaⁿ sǎtnahá-xi cada-xi ìⁿ nduu,

chi ñaní tnàhá ndií Dàvíí ní xóo cǎháⁿ ndihí ñàhá-yu xii-í ní cùu, te ní dǎñá ndéé-yu ichi-í, te na quixi-í te natuha ñaha tùcú-yu.

¹⁷ Te ducaⁿ te vǎi ñáyiu ñá túú cùu ñáyiu isràél nandúcú-yu ichi-í te cǎháⁿ ndihí ñàhá-yu.

¹⁸ Duha ní cǎháⁿ Yǎ Ndiöxí, te ducaⁿ nǐ chídó tnùnǐ cue téé ní xóo cǎháⁿ tnúhu-gǎ ndéé sanaha —càchí té Jàcobó xǎhaⁿ-dǎ xii-güedé.

¹⁹ Te xǎhaⁿ tùcu-dé:
—Yúhú càchí iní-í sǎ vǎ cúú dàsátú-ó iní nchaa ñáyiu ta sándáá iní-xi tnúhu Yá Ndiöxí, ñáyiu ñá túú cùu ñáyiu isràél, te ìⁿ úú-ni tnúhu cúñaha-o nàcuáa cadá-yu. ²⁰ Dico

xini ñuhu-xi daquihíⁿ-ó tùtú cúñaha-o sǎ vǎ cǎxí-gǎ-yu nchaa sá nchító-ó ndùu tàhú nchaa sá càchí-yu cùu ndiöxí-yu. Te cúñaha-o sǎ vǎ cǎháⁿ ndihí cue téé ñàdihí te núu ñá díú ñàdihí-güedé cúú-yu, te ni cuè ñáyiu diìhí

vá càháⁿ ndihí-yu téé te núu ñá díú yíⁿ-yu cùu-güedé, te vá cáxí-yu cuñú quití cuèhné, te vá cáxí-yu níñí. ²¹ Te ducaⁿ cũñaha-o, chi ndi tnahá ñuú núú ndécũ-yu, te xĩndecu ñáyiú isràél dácuaⁿhá-yu tnúhu ní chídó tnùní ndíi Moisés, te ndi tnahá nduu ndètátú-yu dácuaⁿhá-yu tnúhu ndíi veñúhu-yu —càchí té Jácobó xáhaⁿ-dē xii-güedé.

²² Te dātñuní cue téé ní táuchíúⁿ Jèsús dacuaⁿhá ñaha xii-yu tnúhu-gá, ndihí cue téé yĩndaha ñáyiú sàndáá iní tnúhu-gá ní cachí-güedé sá ndúcú-güedé ñⁿ úú-gá cue téé quíhíⁿ ndihí té Páblú ndihí té Bèé ñuú Antiòquiá, te diu-ni ducaⁿ ñí cáháⁿ dava-gá ñáyiú ndècu ichi-gá. Te úú cue téé ní ndúcú-güedé, ñⁿ-dé nání-dē Silás, te ñⁿ-dé nání-dē Jüdás, àdi Barsabás chi úú diu-dé, te cùnuu-güedé ndi ndùú-güedé. ²³ Te ní cadúha nchaa cue téé cùnuu tutú canehe-güedé quíhíⁿ, te duha càháⁿ-xi:

“Cóvãha díí-ndó nchãa-ndo. Nchúhú cue téé ní táuchíúⁿ Jèsús cáháⁿ-ndí tnúhu-gá, ndihí cue téé yĩndaha cue ñáyiú sàndáá iní tnúhu-gá quide ndee iní ñáhá-ndí xii nchòhó cue ñáyiú ndècu ndihí-ndí ichi-gá cuéi ñá díú ñáyiú isràél cúú-ndó. Te nchòhó ñáyiú xĩndecu ñuú Antiòquiá, ndihí nchòhó ñáyiú ndècu distritú Síríá, ndihí nchòhó ñáyiú ndècu distritú Cìliciá, càchí tnúhu-ndí xii-ndo sã ²⁴ ñí níhí-ndí tnúhu sã ñⁿ úú cue téé

ndècu iha ní quixi-güedé núú ndécú-ndó, te ñá túú chiuⁿ ni tahu-ndí quixi-güedé. Te sã ñⁿ tnúhu ní cáháⁿ-güedé ní xáhaⁿ-güedé xii-ndo sã ngũndecu señá ñⁿ-ndo, te canchicúⁿ nihnu-ndo nchãa nacuaⁿ ní chídó tnùní ndíi Moisés, te xiãⁿ ní saní ñⁿ ní saní úú iní-ndó, chi ñá túú xini-ndó ñuu ndáá tnúhu càháⁿ-güedé àdi ñá ndáá. ²⁵ Te ní ndatnúhu-ndí nãcuáa cundu sã téndãha-ndí úú cue téé quixi-güedé ndihí té Bèé ndihí té Páblú, cue téé ío cùu iní-ndí, te cue téé-áⁿ càháⁿ-güedé nãcuáa càháⁿ-ndí-a. ²⁶ Te diu-ni té Bèé ndihí té Páblú ní sáháⁿ-güedé ní cáháⁿ-güedé tnúhu Xítóhó Jesucristú nchaa xichi. Te ndi tnahá cuáháⁿ-güedé cuini-yu cahni ñáhá-yu xii-güedé. ²⁷ Te tendaha-ndí té Jüdás ndihí té Silás quixi-güedé tnáhá-güedé cachí tnúhu váha-güedé nãcuáa cuáháⁿ tnúhu càháⁿ-ndí. ²⁸ Te diu-ni ducaⁿ càháⁿ-ndí càchí tnúhu-ndí nãcuáa càháⁿ Espiritú Yã Ndiõxí cada-ndo, chi nchúhú vá càháⁿ-ndí sã cadá-ndó nchãa sã ñí cáháⁿ ndíi Moisés cada ñáyiú, chi ío úhú, te vá yõ ndacu cada. Te vitna na càháⁿ-ndí ñⁿ úú-ni tnúhu nãcuáa cada-ndo. ²⁹ Vã cáxí-ndó sã nchító-ó ndùu táhú nchaa sã càchí ñáyiú cùu ndiõxí-yu, te vá cáxí-ndó níñí, te vá cáxí-ndó cuñú quití cuèhné, te vá càháⁿ ndihí cue téé ñadihí te núu ñá díú ñadihí-güedé cúú-yu, te ni cué ñáyiú dihí vá càháⁿ

ndihí-yu té te núu ñá díú yíi-yu cùu-güedé. Te núu na càda-ndo nchaa nacuáa càháⁿ-ndí-a, te cada váha-ndo. Te vitna ío cada ndee ìní-ndo nchàa-ndo-na.” Duha ní chídó tnùnì-güedé núú tütú ní tendaha-güedé cuáháⁿ.

³⁰ Te ní quide ndee ìní-yu cue tée quíhíⁿ ñuú Antiòquiá, te ducaⁿ te ní xica-güedé cuáháⁿ-güedé. Te òré ní quexìo-güedé ñuú-áⁿ, te ní cana-güedé nchaa ñáyiu sàndáá ìní tnúhu Jèsús, te ní sáñaha-güedé tutú xii-yu.

³¹ Te ní dácuahá-yu tutú ní sáñaha-güedé-áⁿ, te ní cudíi víhí ìní-yu chí ío váha càháⁿ tutú-áⁿ. ³² Te té Jùdás ndihí té Silás tnàhá-güedé ní nduu táhú-güedé càháⁿ-güedé tnúhu sá dácàhu ìní ñáhá Yá Ndiòxí. Te ní xáhaⁿ-güedé vai tnúhu nàcuáa cadá-yu, te vèhi-gá ní cudíi ìní-yu cadá-yu nàcuáa càháⁿ Yá Ndiòxí cadá-yu. ³³ Te ní xíndecu-güedé ìⁿ úú nduu ndihí-yu, te dàtnùnì ní quide ndee ìní ñáhá-yu xii-güedé cuèndá sá nùhú-güedé núú vèxi-güedé, te mee-ni tē Jùdás cuánuhú-dé. ³⁴ Te té Silás ní xáhaⁿ-dē sá vā nùhú-ni-dé. ³⁵ Te té Pāblú ndihí té Bèé ní ndóo-güedé ní càháⁿ-güedé tnúhu Yá Ndiòxí ñuú Antiòquiá, te vai-gá tucu ñáyiu Antiòquiá ní càháⁿ-yu tnúhu-gá.

Xito cùu úú cuáháⁿ té Pāblú càháⁿ-dé tnúhu Yá Ndiòxí núú ñáyiu

³⁶ Te sáta ní cuu cuéhé nduu, te ní xáhaⁿ tē Pāblú xii té Bèé:

—Na quíhíⁿ-ó nchàa ñuú núú ní sáháⁿ-ó ní càháⁿ-ó tnúhu Yá Ndiòxí càháⁿ ndihí-o nchàa ñáyiu ní tuha ichi-gá cuèndá quini-ó núu ndecu váha-yu —càchí-dé xáhaⁿ-dē.

³⁷ Te té Bèé ní xáhaⁿ-dē sá quíhíⁿ ndihí-güedé té Juàá, àdi Mácú chí úú diu-dé. ³⁸ Dico té Pāblú ñá ní dàña-gá-dé quíhíⁿ té Juàá, chí ní dándōo ñaha-dē xii-güedé cútnàhá ní xíndecu-güedé Pānfilíá, te ní nacuico-dē cuánuhú-dé, te ñá túú-gā ní sáháⁿ ndihí ñaha-dē xii-güedé. ³⁹ Xíáⁿ ní cuu ní tenáá tnàhá tē Bèé ndihí té Pāblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáháⁿ-güedé Chìpré. ⁴⁰ Te té Pāblú ní xáhaⁿ-dē xii té Silás sá quíhíⁿ ndihí ñaha-dē, te ñáyiu sàndáá ìní-xi tnúhu Jèsús ní càháⁿ ndihí-yu Yá Ndiòxí sá chíndèe ñaha-gá xii-güedé. ⁴¹ Te ní xica-güedé cuáháⁿ-güedé te ní yáha-güedé ñhíi distritú Sìriá ndihí distritú Cìliciá. Te ní càháⁿ-güedé tnúhu Jèsús núú nchàa ñáyiu ní sàndáá ìní tnúhu-gá, núu xíáⁿ ío-gá ní cudíi ìní-yu cadá-yu nàcuáa càháⁿ Yá Ndiòxí.

16

Tnàhá té Timuteú cuáháⁿ ndihí-dé té Pāblú ndihí té Silás

¹ Te té Pāblú ndihí té Silás cuáháⁿ-güedé ñuú Dèrbé ndihí ñuú Lìstrá, te ñuú Lìstrá yacáⁿ ndécú ìⁿ tēe nàni Timuteú. Te tēe-áⁿ sàndáá ìní-dé tnúhu Jèsús, te tnàhá náná-dē sàndáá ìní-aⁿ tnúhu-gá, te

ñaha israél cúú-án, te téegríegú cúú tátá-dě.

² Te nchaa ñáyiú ní sándáá iní tnúhu-gá ñáyiú ndècu ñuú Lìstrá, ndihi ñáyiú ñuú Ìconiú, nchaa ñáyiú-án cúdí iní-yu nàcuáa quide-dé. ³ Te ní cuiní té Páblú sá tñahá té Timùteú quíhíⁿ ndihi-dé dava-gá ñuú, núu xíáⁿ díhna-gá seña ní sáha té Páblú ñí té Timùteú, chí ñá ní tñahá iní té Páblú sá càháⁿ cuèhé ñáyiú israél cuèdá té Timùteú. Te nchaa ñáyiú israél ndécú ñuú-án xíní-yu sá tée gríegú cúú tátá-dě, te ñá díú tée israél cúú-dě, te xíáⁿ ní sáha té Páblú seña ñí té Timùteú. ⁴ Te ndí tñahá ñuú ndí tñahá ñuú cuáháⁿ-güedé càháⁿ ndihi-güedé nchaa ñáyiú ní sándáá iní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue tée ní táuchíúⁿ Jèsús dacuàha ñaha xii-yu tnúhu-gá, ndihi cue tée yíndaha ñáyiú sándáá iní tnúhu-gá ñuú Jerusalén. ⁵ Te cuèdá ducaⁿ ñí sáháⁿ-güedé nchaa ñuú núú ndécú ñáyiú sándáá iní tnúhu-gá ní dácúhá ñàha-güedé xii-yu, núu xíáⁿ tá cùu túha-gá-yu tnúhu Yá Ndiòxí, te vài-gá-yu ní tuhá-yu ichi-gá.

Ní dácótó ñàha-xi xii té Páblú sá ñí xíní-dé ñí tée distritú Macèdoniá

⁶ Te ñá ní dañá Espiritú Yá Ndiòxí quíhíⁿ-güedé càháⁿ-güedé tnúhu-gá distritú Àsiá, núu ní sáháⁿ-güedé distritú Frigiá ndihi distritú Gàlaciá càháⁿ-güedé tnúhu-gá.

⁷ Te ní sáá-güedé yuhu distritú Misiá. Te quíhíⁿ-güedé distritú Bitiniá ní cùu, dico ñá ní dañá Espiritú Yá Ndiòxí quíhíⁿ-güedé yàcáⁿ. ⁸ Te ní yáha-güedé Misiá, te ní quexio-güedé ñuú Troás, te yàcáⁿ ní nanítnáhá-ndí ndihi-dé. ⁹ Te ñí níú ní dácótó-xí núú tē Páblú sá ñí xíní-dé ñí tée distritú Macèdoniá nútní-dé, te ní xáhaⁿ tē-án xii té Páblú: “Cada ndee iní-n quíhíⁿ-n Macèdoniá chí dacuàha ñaha-n nchaa sá xíní-n”, càchí-dé xáhaⁿ-dē, ní dácótó ñàha-xi xii té Páblú. ¹⁰ Te cuèdá sá dúcáⁿ ñí dácótó ñàha-xi xii té Páblú núu ní ndatnúhu-ndí quíhíⁿ-ndí Macèdoniá, chí ní cutnùní iní-ndí sá cáná ñàha Yá Ndiòxí quíhíⁿ-ndí càháⁿ-ndí tnúhu-gá núú ñáyiú yàcáⁿ.

Té Páblú ndihi té Silás ndécú-güedé ñuú Filipú

¹¹ Te ní quée-ndí bàrcú ñuú Troás, te cuáháⁿ ndáá-ndí ñuú Samòtraciá, te yàcáⁿ ní quexio-ndí, te ní yáha-ni-ndí cuáháⁿ-ndí. Te nduu tñéé ní quexio-ndí ñuú Nèápolis. ¹² Te yàcáⁿ ní quene-ndí bàrcú, te xica-na-ndí cuáháⁿ-ndí ñuú Filipú te ñuú-án yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Filipú-án ío cùnuu-xi, chí ío chítu ñáyiú ròma ní ngóo-yu. ¹³ Te nduu ndètatú-yu ní quée-ndí ñuú cuáháⁿ-ndí ñí xio yuhu yùte, chí yàcáⁿ sáháⁿ-yu càháⁿ

ndihí-yu Yá Ndiöxí. Te òrè ní quexìo-ndí, te ní naníhí tnáhá-ndí ndihí mee-ni ñáyiú dñí, te ní cáháⁿ-ndí tnúhu Yá Ndiöxí ní xíndedóho-yu.

14 Te ndècu ìⁿ ñaha naní Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúu-áⁿ, te dìco-aⁿ dóó muradú, te ío càháⁿ ndihí-aⁿ Yá Ndiöxí. Te diu-ni mee Yá Ndiöxí ní chindee ñaha-gá ní sándáá iní-aⁿ tnúhu ní cáháⁿ té Páblú. 15 Te ní sandute-aⁿ ndihí landú-aⁿ, ndihí nchaa ñáyiú xínu cuechi núu-aⁿ, te ní cachí-aⁿ xii-ndí:

—Te núu ní cutnùní iní-ndó sã ñí sándáá ndisa iní-í tnúhu Jèsús, te cundecu tnaa-ndo vèhe-í —càchí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

16 Te ìⁿ nduu ñùhu-ndí ichi cuáháⁿ-ndí núu càháⁿ ndihí-yu Yá Ndiöxí, te ní naníhí-ndí ìⁿ xíchí ñúhú ichi, te yìhi ñaha espíritú cùndihí yucu ñávãha xii-xi. Te xiãⁿ ní quide ní cáháⁿ-xi nchaa sá vã yõ tnàhí cùtnuní iní-xi núu nchaa ñáyiú ní sãngándihí ñaha xii-xi. Te ñáyiú dii vèhe-xi xínu cuechi-xi ío vài dñúⁿ ñí ñihí-yu chi ní cháhu nchaa ñáyiú ní sãngándihí ñaha xii-xi. 17 Te xíchí-ãⁿ ñí chinchícúⁿ ñáhá-xí xii-ndí ndihí té Páblú ndëndaha ñaha-xi cuáháⁿ, te ní cáháⁿ níhi-xi xãháⁿ-xi xii dava-gá ñáyiú:

—Cue té-a xínu cuechi-güedé núu Yá Ndiöxí, chi ío càhnu cuu-gá, te càchí tnúhu-güedé nása cada-ndo

nànihí tàhú-ndó —càchí-xi xãháⁿ-xi xii-yu.

18 Te titní xito ní yáha-ndí ducaⁿ-ni ñí cáháⁿ-xi. Te ñá ní cùndee-gá iní té Páblú sá dúcáⁿ càháⁿ-xi, núu ní nan-chocuíhnu-dé núu nútní-xi, te ní xãháⁿ-dë xii espíritú cùndihí yucu ñávãha yìhi ñaha xii-xi:

—Ío càhnu cuu Xítoho Jesucristú, núu xiãⁿ càchí-í sá xócuíñí-n vã quíhí-gã-n yìqui cuñú xíchí-a —càchí-dé xãháⁿ-dë.

Te òrè-ni ní quee espíritú cùndihí yucu ñávãha-áⁿ yìqui cùñú-xi.

19-20 Te ñáyiú dii vèhe-xi xínu cuechi-xi-áⁿ ñí cutnùní iní-yu sá vã ñihí-gá-yu dñúⁿ cuendá tnúhu càháⁿ-xi, núu ní tñí-yu té Páblú ndihí té Silás ndécá ñáhá-yu cuáháⁿ núu cuè té cùchiuⁿ Romá, te xãháⁿ-yu xii-güedé:

—Cue té-a cùu-güedé cue té israél, te ío dusaⁿ xíquide-güedé ñuú-ó. 21 Te cuíni-güedé cada-o nàcuáa quide-güedé, te vá cúu dùcaⁿ cada-o chi ñáyiú nacióⁿ Romá cúu-ó —càchí-yu xãháⁿ-yu xii cue té cùchiuⁿ.

22 Te uuⁿni ní cáháⁿ nchaa-yu, te xãháⁿ-yu sá ñà túú quide váha té Páblú ndihí té Silás. Te cue té cùchiuⁿ ñí cãndeé-güedé dóó tã Páblú ndihí dóó tã Silás ní ndátá-güedë, te ní táuchíuⁿ-güedë caniha-güedë ndihí tnudí xii-güedé. 23 Te ní caniha-güedë, te dãtnùní ní chihí ñaha-güedë vecaá. Te ní xãháⁿ-güedë xii té ndëchito vecaá sá cada cuèdadú víhí-dë

cuendá ná canú-güedé vecaá. ²⁴ Te cuendá sá dúcáⁿ ní cáháⁿ-güedé, núu té ndënchito vecaá ní dáyäha ñaha-dë ingá cuartú ndécú xítí vecaá, te ní chihi-dé sáhá-güedé yaú nduhu, te ní quide tii-dé.

²⁵ Te dava niú ní cáháⁿ ndihi té Páblú ndihi té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue té yìhi vecaá ní xindedóho-güedé nàcuáa ní xita-güedé. ²⁶ Te uuⁿni níhi vìhi ní tnáa ní quidi-xi ndéé cimientú vecaá, te ní nacaáⁿ nchaa yèhe vecaá, te ní ndihi cadená ndútú cuè té yìhi vecaá ní nandáxí. ²⁷ Te ní ndiquíú cúnú ìní té ndënchito vecaá, te ní quide cuendá-dé nchiì nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáháⁿ-dë sá ní ndihi cue té yìhi vecaá ní xinu ni cùu. ²⁸ Te té Páblú ní cáháⁿ níhi-dé, te xähaⁿ-dë xii té ndënchito vecaá:

—Vá dúcáⁿ càda-n cahni-n mee-n, chi nchaa-ni-ndí yìhí —càchí-dé xähaⁿ-dë xii té ndënchito vecaá.

²⁹ Te dätñuní ní xicáⁿ té ndënchito vecaá ñuhú, te xinu-dé cuánguihu xítí vecaá núu yìhí té Páblú ndihi té Silás, te quidi ñaha-ná-xi xii-dé ní quexio-dé ní ngüñí xítí-dé núu-güedé. ³⁰ Te dätñuní ndéca ñaha-dé xii-güedé ní ndee vecaá, te ní xicáⁿ tnúhú-dë núu-güedé, te xähaⁿ-dë:

—Nchòhó cachí tnúhu-ndo nãsa cada-í naníhí tãhú-í —càchí-dé xähaⁿ-dë.

³¹ Te ní xähaⁿ-güedé:

—Quindáa iní-n ndihi ñadihí-n, ndihi landú-n, ndihi nchaa ñáyu xinu cuechi núu-n tnúhu càháⁿ Xítohó Jesucristú, te naníhí tãhú-ndó —càchí-güedé xähaⁿ-güedé.

³² Te ní dácuhá ñaha-güedé xii té ndënchito vecaá ndihi nchaa ñáyu ndècu vehe-dé tnúhu Yá Ndiöxí. ³³ Te ñu-ni òré-áⁿ ní naquete-dé sátá-güedé núu ní ñáni, te dätñuní ní sandute-dé ndihí-yu. ³⁴ Te ndéca ñaha-dé cuháⁿ vehe-dé ní sãñaha-dë sá ní xexi-güedé, te ní cudíí víhí iní té ndënchito vecaá ndihi nchaa-dé vehe-dé sá ní tuhá-yu ichi Yá Ndiöxí. Te cuándihu tucu té Páblú ndihi té Silás vecaá.

³⁵ Te nduu tnéé ní xähaⁿ cuè té cùchiuⁿ xii poleciá cuháⁿ-güedé cúu-güedé té ndënchito vecaá queñuhu-dé úú cue té cuánguihu ndedí nduu ìcu núhú-güedé. ³⁶ Te té ndënchito vecaá ní xähaⁿ-dë xii té Páblú ndihi té Silás:

—Cue té cùchiuⁿ ní cachí-güedé sá queé-ndó nùhú-ndó, chi ñá túú-gã ná cada-güedé, chi sa ní yáha cuendá-ndó —càchí té ndënchito vecaá xähaⁿ-dë xii-güedé.

³⁷ Te té Páblú ní xähaⁿ-dë xii cue té cùu poleciá:

—Téa ròma cúu-ndí, te vá cúu dùcaⁿ-ni cundu, chi ní caniha-güedé tnudii xii-ndí, te ní xiní-yu nchaá-yu. Te ñá túú tnàhí ni xicáⁿ tnúhú-güedé

nũu ndáá ndècuéchi-ndí àdi ñáhá, chi cuèndá-ní ní chihi ñaha-güedë vecaá xii-ndí. Te vitna cuíní-güedé dacăcu ñaha-güedé núhú-ndí cuèndá sá vǎ yoo quini ñáhá nũhú-ndí cáháⁿ-güedë, dico vá cúu dùcaⁿ cada ñaha-güedé xii-ndí. Chí cuáháⁿ cúñaha-ndo na quixi mee-güedé queñuhu ñaha-güedë —càchí té Páblú xii-dé cue poleciá.

³⁸ Te cue tée cùu poleciá cuánuhú-güedé núu ndécú cuè tée cùchiuⁿ, te ní xáhaⁿ-güedë nàcuáa ní cáháⁿ té Páblú. Te sá dúcáⁿ ñí xáhaⁿ pòleciá sá tēe ròrmá cúu-güedë, xiáⁿ ní yùhú-güedé. ³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedë sá cádá càhnu iní-güedé sá ñí chihi ñaha-güedë vecaá, te ní ndeñuhu ñaha-güedë vecaá. Te ní cáháⁿ ndàhú-güedé núu cuè tée ní xíhi vecaá sá ndéé-güedë ñuú-áⁿ nũhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidíá, te ní ndatnúhu-güedé ndihi nchaá ñáyiú ní sándáá iní-xi tnúhu Jèsús, te ní xáhaⁿ-güedë xií-yu nàcuáa cadá-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Ànfípólís ndihi ñuú Apòloniá, te ní quexiò-güedé ñuú Tesalónica, te yacáⁿ cáá ñíⁿ

veñúhu ñáyiú isràél. ² Te ní sáháⁿ té Páblú veñúhu-áⁿ, chi ducaⁿ tnàhí quide-dé, te ndi tnahá nduu ndetátú-yu ní sáháⁿ-dé veñúhu-áⁿ ùní xito. Te ní ndatnúhu ndihi ñaha-dé xií-yu nàcuáa ní chídó tnúni cue tée ní xóo cáháⁿ tnúhu Yá Ndiòxí ndéé sanaha. ³ Te ní xitnúhu ñaha-dé nàcuáa ní cáháⁿ cue tée-áⁿ sá Crístú Yaá tendaha Yá Ndiòxí quixi ñuyiú-a ndoho vihi-gá, te cuú-gá, te ndoto-gá, te xáhaⁿ-dé:

—Te diu Jèsús cúu Crístú Yaá ní tendaha Yá Ndiòxí ní quixi ñuyiú-a, núu xiáⁿ càchí tnúhu-í vitna —càchí té Páblú xáhaⁿ-dé xií-yu.

⁴ Te dava ñáyiú isràél ní sándáá iní-yu tnúhu ní cáháⁿ té Páblú, te ní níhi tnáhă-yu ndihi-dé, ndihi té Silás. Te vai ñáyiú griègú ñáyiú càháⁿ ndihi Yá Ndiòxí ní sándáá iní-yu tnúhu Jèsús. Te ndècu titní ñáyiú dihi ñáyiú cùnnu, te ñáyiú-áⁿ tnàhá-yu ní sándáá iní-yu tnúhu-gá. ⁵ Te dava ñáyiú isràél ñá túú ní cùu váha iní-yu núu tē Páblú nũu ní ndúcũ-yu cue tée cuihna iní-xi tuhío-güedé cada chiúⁿ-güedé, chi ndi cuihnu ndi cuihnu-ni-güedé, te nchaá-yu ndihi cue tée-áⁿ ndi coyo ndi coyó-yu xicuáá-yu. Te sátá ñí tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàson, te ní quide yicá-yu ní quíhu-yu vehe-dé nándúcú-yu té Páblú ndihi té Silás cuèndá queñuhu ñahá-yu núu nchaá ñáyiú.

6 Te ñá ní nàníhí ñáhã-yu xii-güedé, núu xíáⁿ ní tñíⁿ-yu té Jàsón ndihí ìⁿ úú-gá cue té sàndáá iní tñúhu Jèsús, te tàñuhu ñahá-yu xii-güedé cuáháⁿ núu cuè té cùchiuⁿ. Te òré ní quexió-yu núu ndécú cuè té cùchiuⁿ, te ní ngúíta-yu ní cuáá-yu, te xáhãⁿ-yu xii-güedé:

—Ní quexió cue téé-ãⁿ ñúú-ó, te ío dusaⁿ quide-güedé, te ducaⁿ-ni quide-güedé nchaa ñúú núu xícaⁿ cùu-güedé. 7 Te té Jàsón-ãⁿ ní xáhaⁿ-dè sá cúú cùndecu-güedé vehe-dé, te ñá túú sàndáá iní-güedé nàcuáa càháⁿ té Cèsár té yìndaha cuéhé nàcióⁿ, te càchí-güedé sá ndécú ìngá té cùnuu-gá tucu nàni-dé Jèsús —càchí-yu xáhãⁿ-yu xii cue té cùchiuⁿ.

8 Te sáta dúcáⁿ ñí càháⁿ-yu, te ní cudééⁿ víhí cuè té cùchiuⁿ ndihí dava-gá ñáyíu ndèdóho. 9 Te vài díhúⁿ ñí xícaⁿ cue té cùchiuⁿ núu té Jàsón ndihí dava-gá cue té cuáháⁿ ndihí-dé cuèndá té Páblú ndihí té Silás, te núu na ndèe-güedé núhú-güedé, te nacuañaha cuè té cùchiuⁿ díhúⁿ-güedé.

Té Páblú ndihí té Silás ndécú-güedé ñúú Bèréá

10 Te òré ní cundiquíⁿ, te ní quide ndee iní ñáhã ñáyíu sàndáá iní tñúhu Jèsús xii té Páblú ndihí té Silás, te ní xica-güedé cuáháⁿ-güedé ñúú Bèréá. Te ñuⁿ-ni nduu ñí sáá-güedé yacáⁿ ní sáháⁿ-güedé veñúhu ñáyíu isràél. 11 Te váha-gá iní ñáyíu ñúú Bèréá dàcúúxí ñáyíu ñúú

Tesalónica, chi ío ní cudíí iní-yu ní xíndedóho-yu tñúhu Jèsús, te ìⁿ nduu ìⁿ nduu ní dácuañã-yu tñúhu ní chídó tñúní cue téé ní xóo càháⁿ tñúhu Yá Ndiòxí ndéé sanaha cuèndá cuèni-yu quini-yu núu ndáá càháⁿ té Páblú ndihí té Silás. 12 Te titní ñáyíu isràél ní sàndáá iní-yu tñúhu-gá ndihí titní cue té grìégú ndihí ñáyíu díhí ñáyíu cùnuu ní sàndáá iní-yu. 13 Te dava ñáyíu isràél ndécú-yu ñúú Tesalónica, te ñáyíu-ãⁿ ñí níhí-yu tñúhu sá ndécú té Páblú ndihí té Silás ñúú Bèréá càháⁿ-güedé tñúhu Yá Ndiòxí, núu xíáⁿ ní sáháⁿ-yu ñúú Bèréá ní dácuañdèhdé-yu núu nchaa ñáyíu vátá dácuañha-gá. Te ñáyíu-ãⁿ ñí sàndáá iní-yu tñúhu ndehnde te ní cudééⁿ víhí-yu núu-güedé. 14 Te òré-ãⁿ ñí xáhaⁿ ñáyíu sàndáá iní tñúhu-gá xii té Páblú sá quíhíⁿ-dé yuhu làmár, te ní xica-dé cuáháⁿ-dé, te té Silás ndihí té Timùteú ní quendóo-güedé ñúú Bèréá. 15 Te ìⁿ úú-güedé cuáháⁿ ndihí-güedé té Páblú, te ndèca ñaha-güedé cuáháⁿ ndéé ñúú Àtenás, te ní xáhaⁿ té Páblú xii-güedé:

—Núu na núhú-ndó, te cúu-ndo té Silás ndihí té Timùteú ná quíxí ndíhí-ni-güedé nanítnáhá-ndí iha —càchí-dé xáhãⁿ-dè.

Te ní xica-güedé cuánuhú-güedé.

Té Páblú ndécú-dé ñúú Àtenás

16 Te ñúú Àtenás ndétú té Páblú quíhíⁿ té Silás ndihí té Timùteú. Te yacáⁿ ní xiní-dé

sá ïo cuéhé sǎ cǎchí-yu cùu ndiòxí-yu ndècu te ñá ndàá sá díú ndiòxí cúú-xí, te xǎñ ñá túú ní cùu váha iní-dé, chi ñá tnàhá iní-dé nàcuáa quidé-yu. 17 Te ní sáhán-dé veñúhu ní cáhán ndihí-dé ñáyíu isràél ndihí dava-gá ñáyíu cáhán ndihí Yá Ndiòxí. Te ìñ nduu ìñ nduu sáhán-dé xití ñúú cáhán-dé tnúhu-gá ndihí nchaa ñáyíu xica cuu yacáñ. 18 Te cue téé cùu epicureú ndihí cue téé cùu estoicú, cue téé-án ñí ndatnúhu-güedé ndihí té Pǎblú, te dava-güedé xǐtnàha-güedé:

—¡Ná tnúhu vǐhi cáhán téé lùcú-ǎñ! —cǎchí-güedé xǐtnàha-güedé.

Te dava-güedé xǐtnàha-güedé:

—Sàni iní-ndí sá cáhán-dé cuèndá ndiòxí sá vǎtá quíní-gá-ó —cǎchí-güedé xǐtnàha-güedé.

Te ducañ xǐtnàha-güedé, chi cáhán té Pǎblú tnúhu Jèsús, te ní cáhán-dé nàcuáa ní dándótó ñàha Yá Ndiòxí xii-gá, xǎñ ñúu ducañ xǐtnàha-güedé. 19 Te ndèca ñàha-güedé xii té Pǎblú cuáhán ìñ xichi núú nání Àreópagú, te ní xáhañ-güedé xii-dé:

—Cachí tnúhu ndáá-n ñása cuáhán tnúhu cáhán-n, chi na cùtnuní ndáá iní-ndí, 20 chi ducañ-ni cáhán-n tnúhu sá ñà túú sácúndédóho-ndí, te cuíní-ndí cachí tnúhu ndáá-n ñása ndúu tnúhu-án cuèndá cutnùní váha iní-ndí —cǎchí-güedé xáhañ-güedé xii-dé.

21 Te nchaa ñáyíu ñúú Àtenás ndihí ñáyíu dava-gá ñúú, mee-ni tnúhu saa

cuíní-yu cáhán-yu, nchaa sá vǎtá cúndédóho-gá-yu cuíní-yu cundedóho-yu.

22 Te té Pǎblú ní ngúnutñí-dé núú xǐxúcu-yu nchaá-yu, te xáhañ-dé:

—Nchòhó cue ñáyíu ñúú Àtenás, cundedóho-ndo nchàa tnúhu na cáhán-í-a. Ío quíde cahnu nchohó sá cǎchí-ndó cùu ndiòxí-ndó. 23 Te vitna ní quexio-í ñúú-ndó, te ní xiní-í sá yàyacáñ ndécú nchàa sá cǎchí-ndó cùu ndiòxí-ndó cáhán ndihí-ndo. Te ní xiní-í ìñ xichi núú ndéé tnuní quidé cahnu-ndo Yá Ndiòxí Yáá ñá túú xiní-ndó, te diu-ni ducañ cáhán lètrá ndéé tnuní xǎñ, te cǎchí-xi: “Iha quíde cahnu-ndí Ndiòxí sá ñà túú xiní-ndí”, duha cáhán lètrá-án. Te quíde cahnu-ndo Yá Ndiòxí cáhán-ndó, dico ñá túú xiní-ndó ñása càa-gá, te yúhú xiní ndáá-í nàcuáa càa Yá Ndiòxí, chi diu-ni Yá Ndiòxí cáhán ndihí-í, te diu tnúhu-gá cáhán-í vitna.

24 Te diu Yá Ndiòxí ní cadúha-gá ñuyíú-a ndihí nchaa sá ío, núu diu-gá cúú Xitohó ñuyíú-a ndihí andiu. Te ñá túú xiní ñúhu-gá vehe dàcaa ñáyíu ñuyíú-a cundecu-gá. 25 Te ñá túú xiní ñúhu-gá ñáyíu chindee ñàhá-yu xii-gá, chi mee-gǎ quíde-gǎ nchító-ó ndècu-o te tàxi-gá yócó tǎchí-ó ndihí nchaa sá xiní ñúhu-o.

26 Te ndéé sanaha ñí cadúha-gá ìñ diu-ni téé, te diu-ni níñí-dé cúú ñáyíu ndècu ñicaxico ñuyíú. Te diu-ni mee Yá Ndiòxí ní xáhañ-gǎ nchaa núú cúndécú-yu, te mee-gǎ ní

cáháⁿ-gá ná daha cuía cudí nchaa nacióⁿ ndihi mée-yu. ²⁷ Te cuini-gá sá ncháá ñáiyu nanducu ñahá-yu cáhán ndihi ñahá-yu xii-gá, te mee-gá ndécú túha-gá sá cáhán ndihi ñaha-gá xii-yu ²⁸ Te diu-ni Yá Ndiöxí xító ñaha-gá xii-yu núu cudi-yu ndécú-yu te cándá-yu. Te duha ní cáhán ²⁹ ñaní tnáhá-ndó, té ní cutnuni iní-xi ní xindecu ndéé sanaha, te ní xáhaⁿ-dē xii-yu: “Nchaa-o cùu-o déhe Yá Ndiöxí”, duha ní xáhaⁿ-dē xii-yu. ³⁰ Te núu déhe Yá Ndiöxí cúu-yu ncháá-yu, te vá cúu cáhán-yu sá Yá Ndiöxí cúu sá ñí cadúha-yu ndahá-yu. Te sá ñí cadúha-yu cùu ndiöxí-yu-án, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mée-yu ní cahu iní-yu nacuáa cunduu sá cúu ndiöxí-yu. ³¹ Te cútnahá ñá túú ní cutnuni iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiöxí sá dúcáⁿ ñí quidé-yu. Te vitna cächí Yá Ndiöxí sá daña ncháa ndi túhú-yu nchaa sá cuéhé sá dúhá quidé-yu. ³² Te Yá Ndiöxí nahá-gá ná nduu cundecu nchaa ñáiyu núu-gá, te mee-gá sa naha-gá ndëndida càa ñáiyu ní quide váha, te ndëndida càa ñáiyu ñá túú ní quide váha. Te mee-gá ní xáhaⁿ-gá xii Déhe-gá Yaá nání Jesús cuñaha-gá xii-yu núu ndëndida cáa-yu ní quide váha te ndëndida cáa-yu ñá túú ní quide váha. Te mee Jesús cáhán ndáá cuiti-gá, te

sa naha-o sá ncháá xiáⁿ cada Jesús, chi diu cuendá-án ní dándótó ñaha Yá Ndiöxí xii-gá —cächí té Páblú xáhaⁿ-dē xii-yu.

³² Te òré ní cáhán té Páblú sá ñí ndoto Jesús, te dava ñáiyu ñá ní tnáhá iní-xi tnúhu ní cáhán-dē ní cáhán yichí-yu. Te davá-yu ní xáháⁿ-yu xii-dé:

—Te ingá xito quixi-n, te cáhán tucu-n tnúhu ní cáhán-n vitna —cachí-yu xáháⁿ-yu xii-dé.

³³ Te ní xica-dé cuáhán-dé. ³⁴ Te dava ñáiyu ní xindedóho tnúhu ní cáhán té Páblú ní sándáá iní-yu Jesús, te ní chindee tnúhu ñahá-yu xii-dé. Te ³⁵ ñí tée cùchiuⁿ Areópagú nání-dē Nixú ndihi ³⁶ ñadíhí nání-án Damarís, tnáhá-yu ní sándáá iní-yu tnúhu-gá ndihi dava-gá-yu.

18

Té Páblú ndécú-dē ñuu Còrintú

¹ Te té Páblú ní quee-dé ñuu Atenás cuáhán-dé ñuu Còrintú. ² Te yacáⁿ ní naníhí tnáhá-dē ndihi ³ ñí tée israhél nání-dē Àquilú, te tée-án cúu-dē tée distritú Pòntó, te ní xindecu-dé ndihi ñadíhí-dé tá Priscilá ñuu Rómá. Te té Césár tée yindaha cuéhé nacióⁿ, tée ñani Claudiú ní xáhaⁿ-dē sá vá cúu-gá cundecu ñáiyu israhél ñuu Rómá, te xiáⁿ núu ní ndee té Àquilú ndihi ñadíhí-dé cuáhán-yu ñuu Còrintú. Te sácú-ni nduu ní cuu sá ñí quexió-yu ñuu-án, te ní sáhán té Páblú ní ndatnúhu ndihi ñaha-dē xii-yu vehé-yu. ⁴ Te ní xáháⁿ-yu sá cundecu-dé cada chiúⁿ ndihi ñahá-yu, chi ⁵ ñí-ni

chìuⁿ quide-dé ndihí-yu, te ní xóo dacàá-yu vehe dóó. Te núu xiǎⁿ ní xíndecu ndihi ñaha tē Pǎblú ní quide chìuⁿ ndihi ñaha-dé xii-yu. ⁴ Te núu ùná núu ùná nduu, nduu ndètátú-yu, ní xóo quihíⁿ-dé veñúhu ñáiyu isràél. Te ní ndatnúhu-dé ndihi ñáiyu isràél ndihi ñáiyu ñá túú cùu ñáiyu isràél, te ní xáhaⁿ-dē sá quìndáá iní-yu tnúhu Jèsús.

⁵ Te té Silás ndihi té Timùteú ní quee-güedé distritú Macèdoniá cuáháⁿ-güedé núu ndécú tē Pǎblú. Te òré ní quexio-güedé, te ní cáháⁿ-ní tē Pǎblú tnúhu Yá Ndiòxí núu ñáiyu isràél, te xáhaⁿ-dē xii-yu sá Jèsús cúu-gǎ Crìstú Yaá ní tendaha Yá Ndiòxí ní quixi ñuyíu-a. ⁶ Te sá dúcáⁿ nǐ cáháⁿ-dé nǔu ní nàá ndihi ñàhá-yu xii-dé, te ní cáháⁿ cuèhé-yu cuèndá-dé, núu xiǎⁿ ní naquidi-dé dóó-dē. Te ducaⁿ nǐ quide-dé cuèndá sá cútnùní iní-yu sá ñǎ ní tnàhá iní-dé nàcuáa ní cáháⁿ-yu, te ní xáhaⁿ-dē xii-yu:

—Yúhú ñá túú cuèchi-í, te núu ní xíta nihnu-ndo, xiǎⁿ quèndóo cuèchi mee-nǎ-ndó. Te vitna quihíⁿ-í cáháⁿ ndihi-í ñáiyu ñá túú cùu ñáiyu isràél, te vá nándùcu-gá-í nchòhó ñáiyu isràél cáháⁿ ndihi ñaha-í xii-ndo —càchí-dé xáhaⁿ-dē xii-yu.

⁷ Te ní xica-dé cuáháⁿ-dé vehe ìⁿ tée nàni Justú, te tée-áⁿ ndécú yàtni-dé núu cáá veñúhu, te tnàhá-dé cáháⁿ ndihi-dé Yá Ndiòxí. ⁸ Te té Crìspú tée yíndaha veñúhu-áⁿ nǐ sándáá iní-dé

Jèsús ndihi ñadìhí-dé ndihi landú-dé. Te vǎi ñáiyu ñuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhǎ-yu xii-gá, te ní sanduté-yu. ⁹ Te ìⁿ niú ní cáháⁿ saní tē Pǎblú sá nǐ xáhaⁿ Yá Ndiòxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáiyu, ¹⁰ chi yúhú chindee ñaha-í xii-n, te vá yóo ìⁿ cada úhú ñáhǎ xii-n, te vǎi-gá ñáiyu ñuú-áⁿ quìndáá iní-yu tnúhu-í —càchí-gá xáhaⁿ-gǎ núu sàní-dé.

¹¹ Te ñuú Còrintú ní xíndecu tē Pǎblú ìⁿ cuía dǎva, te mee-ni tnúhu Yá Ndiòxí ní xóo dacuàha-dé ñáiyu.

¹² Te ndècu-gá-dé ñuú-áⁿ nǐ ngóo tē Gàlìon chìuⁿ taxi tnuní-dé distritú Acǎyá. Te dǎvá-áⁿ nǐ cudééⁿ ñáiyu isràél núu tē Pǎblú, te ní tni ñàhá-yu xii-dé ndécá ñàhá-yu cuáháⁿ núu cuè tée cùchiuⁿ. ¹³ Te ní xáhǎⁿ-yu xii tē Gàlìon tée cùu gobiernú:

—Tée-a ní quexio-dé ñuú-ó xica cuu-dé te cuiní-dé dandàhú ñáhǎ-dē chit-nahá-ndí-dé cada-ndí nàcuáa quide-dé quidé càhnu-dé Ndiòxí-dē, te dañá-ndí vá cádá-gǎ-ndí nàcuáa càháⁿ tnúhu sá sánú ìchi ñaha xii-o nacuáa cundecu-o cuiní-dé —càchí-yu xáhǎⁿ-yu xii tée cùu gobiernú.

¹⁴ Te té Pǎblú cuiní-dé caní-dé cuèndú ní cùu, te ní ngúita tē Gàlìon càháⁿ-dé, te xáhaⁿ-dē xii-yu:

—Nchòhó ñáiyu isràél, cundedóho-ndo tnúhu na càháⁿ-í-a. Te núu ndècu núu

ĩⁿ cuéchi ní quide-dé àdi ní sahní-dé ĩⁿ ndíyi, te cuu cundáá-xi iha, te cáháⁿ-ndó nũu nándi cùu sá nĩ quide-dé, 15 àdi dico-ni sá ĩⁿ tnũhu ní cáháⁿ-dé, te yáchí-gá chí cuáháⁿ yacáⁿ ndatnúhu-ndo nũú méé-ndó, chi mee-ni sã ñà túú quide-dé nãcuáa cáháⁿ tnũhu sá sánú ìchi ñaha xii-ndo caháⁿ-ndó, te yúhú ñá túú tnàhá iní-í cada ndáá-í nchaa xiãⁿ —càchí-dé xãháⁿ-dë.

16 Te ní cudééⁿ-dë, te ní ndeñuhu ñaha-dë xii-yu vechiⁿ. 17 Te ñáyiu ñá túú cùu ñáyiu isràél ní tñí-yu té Sõstenés tée yìndaha veñúhu ñáyiu isràél, te ndèhe té Gàlìón tée cùu gobiernú ní canihá-yu xii-dé, dico ñá túú tnàhí ná tnúhu ní cáháⁿ-dé taunihnu-dé tée ní caní-yu-áⁿ.

Té Pãblú cuáháⁿ tucu-dé ñuú Antiòquia, te yacáⁿ ní xica tucu-dé cuáháⁿ-dé dava-gá ñuú càháⁿ-dé tnúhu Yá Ndiòxí

18 Te titní-gá nduu ní xíndecu té Pãblú ñuú Còrintú, te ní quide ndee ìní-dé nchaa ñáyiu ní sándáá iní-xi tnúhu Jèsús, te ní tñí-dé ichi cuáháⁿ-dé distritú Sìriá ndihí té Àquilú ndihí ñadìhí té Àquilú-áⁿ tã Priscilá, te ní quexió-yu ñuú Cèncreá. Te cùmání-gã tñí-yu ichi quíhíⁿ-yu ñuú Éfesú, te ní dèté díquí tã Pãblú, chi ducaⁿ nĩ xãháⁿ-dë xii Yá Ndiòxí sá ndëé xínu ĩⁿ chiⁿ ní sani iní-dé cada-dé cuëndá-gá, te dàtnùni dèté-dé. Te ní quée-yu bàrcú cuáháⁿ-yu. 19 Te ní quexió-yu

ñuú Éfesú, te yacáⁿ ní xãháⁿ tã Pãblú sá cùndècu té Àquilú ndihí ñadìhí-dé, te mee-dë quíhíⁿ-dé dava-gá ñuú. Te cùmání-gã caca-dé quíhíⁿ-dé, te ní sáháⁿ-dé veñúhu ñáyiu isràél ní ndatnúhu ndihí ñaha-dë xii-yu. 20 Te ní xãháⁿ-yu sá cùndècu-dé titní nduu, te ñá ní cuíní-dé cundecu-dé. 21 Te ní xãháⁿ-dë:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiòxí ná càchí-gá, te vitna chí cáda ndèe iní —càchí-dé xãháⁿ-dë xii-yu.

Te ní quée-dé bàrcú cuáháⁿ-dé. 22 Te ní quexió-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexió-dé, te ní dándácõ váha-dé ñáyiu ndècu ichi Yá Ndiòxí, te dàtnùni ní xica-dé cuáháⁿ-dé ñuú Antiòquia. 23 Te yacáⁿ ní xíndecu-dé titní nduu, te dàtnùni ní tñí-dé ichi cuáháⁿ-dé. Te ní sáháⁿ-dé ñihí distritú Gàlaciá ndihí distritú Frigiá. Te ndi tnahá ñuú ní sáháⁿ-dé ní cáháⁿ-dé ndihí ñáyiu sándáá iní tnúhu Yá Ndiòxí, te ní ndúcú ndéé-gã-yu ní quidé-yu nchaa nãcuáa ní xãháⁿ-dë cadá-yu.

Té Àpolós càháⁿ-dé tnúhu Yá Ndiòxí ñuú Éfesú

24 Te dàvá-áⁿ nĩ quèxio ĩⁿ tée isràél ñuú Éfesú, te nàni-dé Àpolós, te cùu-dé tée ñuú Alejãndriá, te ío váha túha-dé tnúhu Yá Ndiòxí, te ío váha ñuhu díquí-dë nãcuáa

cáháⁿ-dé, ²⁵ chi sa xini-dé nàcuáa ní xóo cáháⁿ ndii Juáa cútnàhá ní xóo dacuàndute ndii ñáyi. Te ío ní cudí iní-dé ní cáháⁿ-dé nchaa nàcuáa ní cuu cuèndá Jèsús, dico vátá dácuaⁿhá-gá-dé nchaa tnúhu ní cáháⁿ méé Jèsús. ²⁶ Te ní sáháⁿ-dé veñuhu ñáyi isràél, te yacáⁿ ní cáháⁿ-dé ni yùhu ni iní-dé. Te ndècu té Àquilú ndihí ñadìhí-dé tá Priscilá ndedóho-yu tnúhu ní cáháⁿ-dé, te ní xáháⁿ-yu sá quihíⁿ-dé vehé-yu, te ní sáháⁿ-dé, te ní xitnùhu ñàhá-yu xii-dé dava-gá tnúhu Yá Ndiòxí sá ñà túú xini-dé. ²⁷ Te ní cachí té Àpolós sá quihíⁿ-dé distritú Acáyá, núu xiáⁿ ní cadúha ñáyi ñuu Éfesú ñⁿ tutú canehe-dé quihíⁿ ndaha ñáyi sàndáá iní tnúhu-gá xíndecu Acáyá. Te xáháⁿ-yu núu tütú-yu: “Cáháⁿ váha-ndo ndihí té Àpolós núu ní quexìo-dé”, cächí-yu xáháⁿ-yu núu tütú-yu. Te ní xica-dé cuáháⁿ-dé, te ní quexìo-dé Acáyá. Te nchaa ñáyi sàndáá iní tnúhu-gá yacáⁿ, diu-ni mee Yá Ndiòxí ní chindee ñàha-gá ní sàndáá iní ñàhá-yu xii-gá. Te té Àpolós ío váha ní cáháⁿ-dé tnúhu Yá Ndiòxí núu-yu, te xiáⁿ ío ní ndúcú ndéé-gá-yu ní quidé-yu chùuⁿ-gá. ²⁸ Te té Àpolós ní ndatnúhu-dé ndihí ñáyi isràél, te ní xíndedóho dava-gá-yu. Te ío váha ní caní-dé cuèndú nchaa nàcuáa ní xóo cáháⁿ cue téé ndéé sanaha sá quixí Crístú ñuyíu-a. Te ní cáháⁿ ndáá-dé

ní xáhaⁿ-dē sá diú-ní Jèsús cúu-gá Crístú Yaa ní tendaha Yá Ndiòxí ní quixi ñuyíu-a. Te ñáyi isràél xíndatnúhu-yu sá ñà ndáá nàcuáa cáháⁿ-dé, dico ñá ní ñihí-yu tnúhu cúñàhá-yu xii-dé, chi ío váha ñuhu díquí-dē tnúhu cáháⁿ-dé.

19

Té Páblú ndécú-dē ñuu Éfesú

¹ Te cútnàhá ndécú-gá té Àpolós ñuu Còrintú, te ní xica té Páblú cuáháⁿ-dé tá yáha-dé mee-ni xití yucu cuáháⁿ, te ní sáá-dé ndéé ñuu Éfesú. Te ñuu-áⁿ ñí naníhí tnáhá-dé ndihí cue téé sàndáá iní tnúhu Jèsús. ² Te ní xicáⁿ tnúhú-dé núu-güedē, te xáhaⁿ-dē:

—¿Sa ní quexìo Espiritú Yá Ndiòxí ní ngúndecu ndihí-ndo ndéé òré ní sàndáá iní-ndó Jèsús-áⁿ? —cächí-dé xáhaⁿ-dē xii-güedē.

Te ní xáhaⁿ-güedē:

—Ñá túú xini-ndí sá ío Espiritú Yá Ndiòxí —cächí-güedé xáhaⁿ-güedé xii-dé.

³ Te ní xáhaⁿ tùcu-dé:

—¿Nása ní cáháⁿ téé ní dácuaⁿndute ñaha xii-ndo-i? —cachí-dé xáhaⁿ-dē xii-güedé.

Te ní xáhaⁿ-güedē:

—Ní cáháⁿ-dé nàcuáa ní xóo cáháⁿ ndii Juáa —cächí-güedé xáhaⁿ-güedé xii-dé.

⁴ Te ní xáhaⁿ té Páblú:

—Ndii Juáa ní dácuaⁿndute ñaha ndii xii ñáyi, chi ní cuiní-yu sá dáñá-yu nchaa sá cuèhé sá dúhá quidé-yu. Te ní xáhaⁿ ndii xií-yu: “Quindáá iní-ndó tnúhu Jèsús chi dacuití quixi-gá ñⁿ nduu”,

duha ní xáhaⁿ ndií Juáá xii-yu —càchí té Páblú xáhaⁿ-dë xii-güedé.

⁵ Te sá dúcáⁿ nǐ cáháⁿ té Páblú xáhaⁿ-dë xii-güedé, núu xíáⁿ ní sandute-güedé nàcuáa ní dándöo tnúhu Jèsús.

⁶ Te ní sacáⁿ ndodo té Páblú ndahá-dé díquí-güedé, te òré-ni ní quexio Espíritú Yá Ndiöxí ní ngúndecu ndií-güedé, te ní ngüíta-güedé ní cáháⁿ-güedé tnúhu sá dácàhu iní ñáhá Espíritú-gá, tnúhu sá ñà túú xini-güedé cáháⁿ-güedé, te ní cáháⁿ-güedé tnúhu Yá Ndiöxí nàcuáa ní dácáhu iní ñáhá Espíritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dë veñúhu ñáyiu isràél ní cáháⁿ ndií-dé-yu, te úní yóo nǐ xínu ní xica cuu-dé veñúhu-yu. Te ío váha ñúhu díquí-dë tnúhu cáháⁿ-dë, núu xíáⁿ ní cuyii-dë ní cáháⁿ-dë, te ní xáhaⁿ-dë sá quíndáá iní-yu tnúhu Jèsús, te ducaⁿ te ndíhu ndaha ñàha Yá Ndiöxí xii-yu. ⁹ Te davá-yu ío sàá iní-yu ñá ní cuíní-yu quíndáá iní-yu, te ío ní cáháⁿ cuèhé-yu cuèndá Jèsús xití veñúhu núu dàva-gá-yu. Te té Páblú ní ndee-dé veñúhu cuáháⁿ-dë ndií ñáyiu sàndáá iní tnúhu Jèsús. Te ìⁿ nduu ìⁿ nduu ní sáháⁿ-dë scuèlá té Tiranú ní dácúáhá ñàha-dé xii-yu. ¹⁰ Te úú cuíá ducaⁿ nǐ sáháⁿ-dë scuèlá ní dácúáhá-dë ñáyiu. Te nchaa ñáyiu isràél ñáyiu ndècu nihií distrítú Àsiá ndií nchaa ñáyiu ñá túú cùu ñáyiu isràél ní xíndedóho-yu tnúhu Jèsús. ¹¹ Te té Páblú ío ní chindee ñàha Yá Ndiöxí

xii-dé ní guide-dé vài núú sǎ vǎ yöo tnàhí ndàcu cada.

¹² Te pañú díquí-dë ndií dóo cándèe núú yíquí-dë ní xicáⁿ-yu nèhé-yu ní sáháⁿ núú ndécú ñáyiu cùhú, te xíáⁿ ní tñii ñáyiu cùhú ndií ñáyiu yìhi ñaha espíritú cúndií yucu ñávàha, te ní ndúha-yu.

¹³ Te ñúú Isràél véxi cue tée tatna xica cuu-güedé quidé tátna-güedé ñáyiu yìhi ñaha espíritú cúndií yucu ñávàha. Te ní ngüíta-güedé ní cacu nèhe-güedé Jèsús cuèndá quee espíritú-án yíqui cùñú-yu, te ní xáhaⁿ-güedé:

—Xocuíñí-n, chi càchí Jèsús sá vǎ cúndècu ndií-gá-n tée-a. Te diu-ni Jèsús cacú nèhe té Páblú òré cáháⁿ-dë tnúhu-gá —càchí-güedé xáhaⁿ-güedé xii espíritú-án.

¹⁴ Te úsá tnàhá-güedé ducaⁿ nǐ xóo cada-güedé. Te tátá-güedé ní xínani-dë Èsevá, te tée-án nǐ cuu-dé dütú cúnùu. ¹⁵ Te sá dúcáⁿ nǐ cáháⁿ-güedé, te ní xáhaⁿ espíritú cúndií yucu ñávàha-án xii-güedé:

—¿Te ná cúú nchòhó nùu dayùhú ñáhá-ndó? Te xini-í Jèsús, te xini-í yoo cùu té Páblú, te nchòhó ñá túú xini ñàhà-í xii-ndo —càchí espíritú-án xáhaⁿ-xi xii-güedé.

¹⁶ Te tée yìhi ñaha espíritú cúndií yucu ñávàha-án nǐ ndanchita-dé ní tñii-dé cue tée quide tátna-án, te ní ndií dóo-güedé ní ndátá-dë, te ní dánicuèhé ñáhá-dë xii-güedé, te ní xinu-güedé cuáháⁿ-güedé. ¹⁷ Te nchaa

ñáyiú isràél ndécú ñúú Éfesú ndihí dava-gá ñáyiú ndècu diu-ni ñúú-án nĩ níhĩ-yu tnúhu nàcuáa ní cuu, te ío ní yuhú-yu, te vai-yu ní cachí sá ïo càhnu cuu Xítohó Jesucristú.

18 Te dava ñáyiú ní sándáá iní-xi tnúhu Jèsús ní sáháⁿ-yu núú ndécú tẽ Páblú, ndihí núú ndécú nchàa ñáyiú ní sándáá iní tnúhu-gá ní nàhmá-yu nàcuáa ní xóo cadá-yu. 19 Te titnĩ ñáyiú ni xóo cada ndùu nehé-yu tutú-yu ní sáháⁿ núú ndécú nchàa ñáyiú sándáá iní-xi tnúhu-gá, te yacáⁿ ní ndada cuendá-yu sá ïo yahu ní sáha-yu tutú-yu, chi ndéé údico úxí mĩl díhúⁿ cuixíⁿ ní sáha-yu núú ncháá. Te ncháa-yu ní sahmí-yu tutú-yu. 20 Te sátá nĩ cáyú nchaa tutú-án, te vai-gá ñáyiú ní tuhá-yu ichi Yá Ndiõxí, te ní sáha-yu cuendá sá ïo xìni ñuhu tnúhu Yá Ndiõxí.

21 Te ní cachí té Páblú sá quihíⁿ-dé distritú Macèdoniá ndihí distritú Acáyá, te dātnuní nuhú-dé ñúú Jerusálén, te ducaⁿ te dātnuní quihíⁿ-dé ñúú Rómá. 22 Te ndècu ndihí-dé té Timùteú ndihí té Èrastú cue tée chindee ñaha xii-dé. Te té Páblú ní xáhaⁿ-dẽ xii-güedé sá códo ñu-güedé quihíⁿ Macèdoniá, te ní xica-güedé cuáháⁿ-güedé, te mee-dẽ ní quendóo-dé.

Ñáyiú Éfesú ío dusaⁿ quidé-yu ñúú-yu

23 Te dàvá-án ïo ní cudéẽⁿ-yu núú nchàa ñáyiú ní tuha ichi Yá Ndiõxí. 24 Te ñⁿ tée ñúú Éfesú nání-dẽ Demètriú. Te tée-án ní xóo canehe chiúⁿ-dé

mee-ni díhúⁿ cuixíⁿ ní xóo cadúha-dé veñúhu líhli, dàtná cuiní-ndó cãa veñúhu Diáná sá cúú ndiõxí-yu. Te vai díhúⁿ ní xóo níhí-dẽ ndihí cue tée ní xóo cada chiúⁿ ndihí-dé. 25 Te ní cana-dé cue tée quide chiúⁿ ndihí-dé, ndihí nchaa cue tée quide chiúⁿ ndihí díhúⁿ cuixíⁿ, te ní xáhaⁿ-dẽ xii-güedé:

—Nàha-ndo sá ïo váha nihí-ó díhúⁿ cuendá chiúⁿ quide-o. 26 Te nàha-ndo

sá càchí té Páblú sá ñà díú ndiõxí cúú sã nĩ cadúha ñáyiú ñuyíú-a. Te ducaⁿ càháⁿ-dé ñúú-ó, te ducaⁿ-ni càháⁿ-dé nihí distritú Àsiá, te ío-gá vai ñáyiú sándáá iní tnúhu càháⁿ-dé. 27 Te ío úhú ñúu na cuíta chiúⁿ quide-o, vá yõ-gá cuaaⁿ sá cadúha-o. Te ngüita-yu cáháⁿ-yu sá veñúhu Diáná ñá túú càváha, te vá cadá càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiú distritú Àsiá quidé càhnu ñahá-yu ndihí ñáyiú xĩndecu ni cãa xico ñuyíú —càchí té Demètriú xáhaⁿ-dẽ xii-güedé.

28 Te sá dúcáⁿ nĩ cáháⁿ té Demètriú, xíãⁿ ní cudéẽⁿ-güedẽ núú tẽ Páblú, te uuⁿni ní cuáá-güedé te càchí-güedé:

—¡Ío càhnu cuu Dianá sàndú ñáyiú Éfesú! — càchí-güedé.

29 Te nchaa ñáyiú ñúú Éfesú ndi coyo ndi coyó-yu xicáháⁿ-yu. Te tnàhá úú cue tée distritú Macèdoniá xicá cùu-güedé ndihí té Páblú, ñⁿ-dé nání-dẽ Gáyú, te ñⁿ-dé nání-dẽ Arístarcú. Te ní tñi-güedé úú cue

tée-án, te cuánguihu coyo ndihi ñaha-güedē vehe núú quidé-güedē jündá. ³⁰ Te té Páblú cuíní-dé quíhu-dé tnàhá-dé vehe-án cáhán ndihi ñaha-dē ní cùu, te ñá ní dàña cue téé ní sándáá iní tnúhu-gá. ³¹ Te ñú cue téé cùnūu distritú Àsiá ní cáhán váha-güedē cuendá té Páblú, te ní xáhaⁿ-güedē xii ñú téé xínu cuechi núú-güedē ní sáhán-dé ní xáhaⁿ-dē xii té Páblú sá vǎ quíhu-dé vehe núú quidé-güedē jündá. ³² Te uuⁿni ní cuáá-yu nchaá-yu, te ñá ñú-ní tnúhu ní cáhán-yu, chi ndi díñ tnúhu ní cáhán-yu ñú ñú-yu. Te chitu-gǎ ñáyiú ñá ní cùtnuní iní-yu ná cuendá ní dátacá ñáhá-güedē xití vehe-án, chi ñá ñú-ní tnúhu ní cáhán-yu. ³³ Te davá-yu ní cáhán-yu sá cuéchi té Lijandrú cúú-xí, chi ní xáhaⁿ ñáyiú isràél xii-dé sá cáhán-dé yuhú-yu chindee tnúhu ñaha-dē xii-yu. Te ní quide-dé ndaha-dé núú-yu sá cündedóho-yu tnúhu cáhán-dé chindee tnúhu ñaha-dē xii-yu yòtnúhu. ³⁴ Te ní cutnùní iní-yu sá tēe isràél cúú-dē, te uuⁿni ní cuáá tucú-yu, ñá ní dàñá-yu cáhán-dé, te cächí-yu:

—¡Ío cùnūu Dianá sàndú ñúú Éfesú! —cächí-yu. Te dàtná úú òré ñú-ni tnúhu ní cáhán-yu.

³⁵ Te téé cùu secretariú-ni-gá ní cáhán-dé, te dàtnùní cuèé cuèé ní sadí-yu yuhú-yu. Te ní xáhaⁿ-dē xii-yu:

—Nchaa-ndo cündedóho-ndo

ñú tnúhu na cáhán-í-a. Ío cùnūu Dianá, te nchaandi túhú ñáyiú sa nàhá-yu sá ncháá-ó ío nēhe cuendá-ó veñúhu-ǎⁿ. Te nàhá-yu sá nēhé cuendá-ó sàndú-án, chi véxi cuuⁿ-gá andiú. ³⁶ Te vá yóo ñú cächí sá ñá ndáá. Te coto-ndo mēe-ndo, te vá cuidó-ndó càda-ndo, te vá cuidó-ndó cáhán-ndó. ³⁷ Te ná cuendá ndécá-ndó cuè téé-án véxi, te ñá túú nǎ ní quide-güedé, te ñá túú nǎ ní dùhu-güedé veñúhu, te ñá túú cáhán cuèhé-güedé cuendá Diáná. ³⁸ Te núu ío yoo nàá ndihi ñaha xii té Demètriú ndihi cue téé quide chiúⁿ ndihi-dé, te quíhíⁿ-güedé cacáⁿ cuéchi-güedé núu cuè téé cùchiúⁿ. Te cue téé cùchiúⁿ na cundoho-güedé núu quehndé-güedé cuéchi-yu àdi ñáhá. ³⁹ Àdi ío-gá ná cuendú ñúhú iní-ndó, te cáhán-ndó òré ná cóo jündá. ⁴⁰ Te ío úhú núu na nihí téé tàxi tnuní ñáhá xii-o tnúhu sá dúhá ío quide dusaⁿ-o, te cächí-dé sá ndécuechi-o chi ñá túú sándáá iní-ó-dé quesaha-dē. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnùní iní-ó nǎsa cùñaha-o xii téé tàxi tnuní ñáhá xii-o núu na càna ñaha-dé —cächí téé cùu secretariú xáhaⁿ-dē xii-yu.

⁴¹ Te ní xáhaⁿ-dē sá nùhú-yu te ní ndihí-yu cuánuhú.

20

Té Páblú cuáhán-dé distritú Macèdoniá ndihi distritú Grèciá

¹ Te òré ñá túú-gǎ ní quide dusaⁿ-yu, te ní cana ñaha tē Páblú xii nchaa ñáyiú sándáá

iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñháⁿ-dē xií-yu, te ní tñiⁿ-dé ichi cuáháⁿ-dé distritú Macèdoniá. ² Te tayáha-dé cuáháⁿ ññ ññ ñnúú yíndèhu Macedoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíⁿ iní-yu cadá-yu nàcuáa càháⁿ Yá Ndióxi cadá-yu sá dúcáⁿ ní cáháⁿ-dé dóho-yu. Té ní quexiò-dé distritú Grèciá. ³ Te xiáⁿ ñí xíndecu-dé úní yóó. Te xiáⁿ quèe-dé bàrcú quíhíⁿ-dé distritú Siriá ní cùu, te ní níhí-dē tnúhu sá ndétú ñàha ññ úú cue tée isráel cahni ñàha-güedé xii-dé ní cùu, núu xiáⁿ ní tñiⁿ-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihi-dé té Sopàtér tée ñnúú Bèrea, ndihi té Arìstarcú, ndihi ññ tée nàni Segundú. Te ndi ndùú cue tée-áⁿ cúu-güedē cue tée ñnúú Tesalónicá. Te tñhá té Gáyú tée ñnúú Dèrbé, ndihi té Timùteú cuáháⁿ ndihi-dé, te tñhá té Tiquicú ndihi té Trófimú cuáháⁿ ndihi-dé, te úú cue tée-áⁿ cúu-güedē cue tée distritú Àsiá. Te nchaa cue tée-áⁿ cuáháⁿ ndihi-güedé té Páblú. ⁵⁻⁶ Te ní quexiò-güedé ñnúú Filipú, te yàcáⁿ ní naníhí ñháⁿ-güedē xii-ndí. Te té Páblú ní tendaha-dē cue tée ndihi-dé cuáháⁿ-güedé ñnúú Tróás, te ní xáhaⁿ-dē sá díú-ní yàcáⁿ cundetú ñàha-güedē xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñà túú yíhi levadurá.

Te sátá ñí yáha vico, te ní quèe-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexiò-ndí ñnúú-áⁿ. Te yàcáⁿ ní naníhí tñháⁿ-ndí ndihi cue tée yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihi-dé ñáyiú ñnúú Tróás

⁷ Te ññ nduu ndumìngú ní naníhí tñháⁿ-ndí ndihi nchaa ñáyiú ní sàndáá iní-xi tnúhu Jèsús ní xexi-ndí pàá ndihi-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vǎ nàcuànaa-o sá ñí xíhí-gá cuendá naníhí tǎhú-ó. Te té Páblú ní ngúita-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tñndaá ingá nduu-áⁿ, te caca-dé quíhíⁿ-dé ingá xichi. ⁸ Te ndècú-yu vehe yòdo tñaha, te yíhí-yu ndéé cuàrtú cúú úní núú ññnu, te càyú víhí ññhú xiti cuàrtú-áⁿ. ⁹ Te ññ tée sa ta cùu sacuéhé luha nàni-dé Eùticú núcòo-dé yèhe ventaná, cuini-dé cúdú-dé, chi ní cunaha víhi caháⁿ té Páblú, te ní tñiⁿ ñàha sàni xii-dé ní xídí-dé, te ní ngava-dé ndéé ññhu. Te ní nuú-yu núú ññhú cuendá ndacani ñháⁿ-yu, te sa ní xíhí-dé, chi ío dúcúⁿ ní ngava-dé. ¹⁰ Te tñhá té Páblú nchícúⁿ-dé ní nuu. Te ní quexiò cunu-dé núú cǎtùu tée ní xíhí-áⁿ, te ní numi ñàha-ni-dē, te ní xáhaⁿ-dē xií-yu:

—Vá ndihú iní-ndó, chi ní ndoto-dé —càhí-dé xǎhaⁿ-dē xií-yu.

11 Te dătnùní cuándaa ndihi ñaha tùcu-dé xii-yu cuàrtú núú yíh-yu ni cùu, te yàcáⁿ ní xexi ndihi ñaha-dě xii-yu, dătnùní ní ngüita-dé vai-gá tnúhu ní cáháⁿ-dé, te cáháⁿ-ni-dé ní túndaá, te dătnùní ní xica-dé cuáháⁿ-dé.
12 Te téé ní ngava-áⁿ ní sánúndeca ñahá-yu xii-dé ndéé vehe-dé, te ío ní cudíí iní-yu sá ní ndoto-dé.

Ní quee-güedé ñuú Troás cuáháⁿ-güedé ñuú Miletú

13 Te té Păblú ní cachí-dé sá quihíⁿ-ndí ndihi bàrcú ndéé ñuú Àsón, te mee-dě caca saha-dě, te yàcáⁿ naníhí tnáhá-ndí ndihi-dé te quée-dé bàrcú, te ní quée-ndí bàrcú cuáháⁿ-ndí. 14 Te ní naníhí tnáhá-ndí ndihi-dé ñuú Àsón, te yàcáⁿ ní quée-dé bàrcú tnàhá-dé cuáháⁿ-ndí ñuú Mitilené. 15 Te ní quexìo-ndí ndéé ingá nduu yatni ñuú Quiú, te ndéé nduu tnéé ní quexìo-ndí ñuú Sámú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú. 16 Te té Păblú ñá ní cuíní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndihi iní-dé cuèndá cuíní-dé quíní-dé nùu vá ndácú-dě ndexìo-dé ñuú Jerusalén cundecu-dé vico Pentecòstés.

Té Păblú cáháⁿ ndihi-dé cue téé yindaha ñaha xii ñáyiu sàndáá iní tnúhu Jèsús ñuú Éfesú

17 Te òré ndécú tē Păblú ñuú Miletú, te ní cana-dé cue téé yindaha ñaha xii ñáyiu sàndáá iní tnúhu Jèsús ñuú Éfesú sá quihíⁿ-güedé núú ndécú-dě.
18 Te sátá ní quexìo-güedé, te ní xáhaⁿ-dě xii-güedé:

—Nàha-ndo nacuaá ní quide-í ndéé cùtnàhá ní quexìo-í distrítú Àsiá. 19 Chi ní quide-í nàcuáa ní cáháⁿ Yă Ndiöxí cada-í, ñá túú ní tühío-í, te ñá túú ní quide cahnu-í mèè-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuíní ñáyiu isràèl cahni ñahá-yu xii-í ní cùu, te ío ní ndoho-í ní cácu-í. 20 Te sa nàha-ndo sá ncháándì túhú sa ní cachí tnúhu-í nàcuáa cada-ndo cuèndá sá chindèe ñaha Yă Ndiöxí xii-ndo. Te ní cáháⁿ-í tnúhu-gá núú-ndó ncháa-ndo, te diu-ni ducaⁿ ní quixi-í ndi tnahá vehe-ndo ní cáháⁿ-í tnúhu-gá núú-ndó. 21 Te ní xáhaⁿ-í xii ñáyiu isràèl ndihi ñáyiu ñá túú cùu ñáyiu isràèl sá dáñá-yu nchaa sá cuèhé sá dúhá quidé-yu te quindáá iní-yu tnúhu Xítóhó Jesucristú. 22 Te dacutíi quihíⁿ-í ñuú Jerusalén, chi Espiritú Yă Ndiöxí ní cachí-xi sá dáí quihíⁿ-í, te ñá túú xini-í nándi cada ñaha-güedě xii-í yàcáⁿ te núu na quexìo-í. 23 Te ìⁿ ìⁿ ñuú núú sàháⁿ-í càchí tnúhu Espiritú-gá sá chíhí ñaha-güedé vecaá, te cada úhú ñahá-güedé. 24 Dico ñá túú tnàhí ná cuu cuèi na càhni ñaha-güedé xii-í, dico cuíní-í sá díí iní dandihí-í nchaa sá

nĩ cachí Xítohó Jesucristú cada-í. Te ní cachí Yă Ndiöxí sá cãháⁿ-í núú ñăyiu sá ïo cùu iní ñãhá-gă xii-yu, te naníhí tãhú-yu núu na quindáá iní-yu tnúhu-gă.

25 Te sa ní cachí tnúhu-í xii-ndo nchãa-ndo sá nõu na quindáá iní-ndó Yă Ndiöxí, te ndíhu ndaha ñaha-gă xii-ndo. Te na cãchí tnúhu-í sá nĩ ñⁿ nduu-gă vá quini ñãhá-ndó xii-í ñuyú-a. 26-27 Te yúhú ñá túú cuěchi-í nõu ïó ñáyiu vá naníhí tãhú, chi sa ní cachí tnúhu-í nchaa sá nĩ cãháⁿ mée Yă Ndiöxí cada-ndo. 28 Te coto-ndo mée-ndo, te coto-ndo tnãhá ñáyiu sãndáá iní tnúhu-gă, chi Espiritú-gă ní cachí-xi sá cúnũu-ndo núũ-yu dacuãha-ndó-yu tnúhu-gă. Te cada-ndo cuendá sá datná mběé-ndó cùu-yu, te mee-ndo cùu-ndo datná toli xito-ndó-yu ducaⁿ cãda-ndo cuendá, chi ñaha-ndo sá Jësús ní sati níñi-gă, te ní xihí-gă cuendá naníhí tãhú-ó ndíhi-yu. 29 Te yúhú sa cùnũnĩ iní-í sá òré ñá túú-gă-í ndécú, te quixi ñáyiu dandãhú ñãhá xii-ndo cuendá ñãha-ndo tnúhu Yă Ndiöxí, te cada ñãhá-yu xii-ndo datná quidé ñãñã òré tnĩ-dĩ mběé. 30 Te ñⁿ ùú cue tée ndècu ndíhi-ndo, cue tée-áⁿ dacuãndehnde-güedé, te cudana davá-yu quindáá iní-yu chítnãhá ñãhá-yu xii-güedé. 31 Te xĩãⁿ nõu cãchí tnúhu-í sá ïo quihí iní-ndó cündecu-ndo ndíhi nchaa ñáyiu sãndáá iní tnúhu-gă. Te ñaha-ndo sá yúhú ní xindecu-í únĩ cuíá nĩ cãháⁿ-í tnúhu Jësús

núú ñăyiu cuěi nduu cuěi niú. Te áma ní xóo ndáhyú-í, chi ñá ní cuini-yu quindáá iní-yu nchaa-yu tnúhu ní cãháⁿ-í —cãchí té Pãblú xãhaⁿ-dẽ xii-güedé.

32 Te xãhaⁿ tucu-dé:

—Nchòhó cue tée ndècu ndíhi-í ichi Xítohó Jesucristú, ïo cuini-í sá mée Yă Ndiöxí chindee ñaha-gă xii-ndo. Te mee-gă ní cãháⁿ-gă sá ïo cùdí iní ñãhá-gă xii-ndo. Te naníhí tãhú-ndó ndíhi nchaa ñáyiu cùu cuendá-gă, te chindee ñaha-gă xii-ndo cuendá cada-ndo nchãa sá cãháⁿ-gă. 33 Te òré ní xindecu ndíhi ñaha-í xii-ndo, te ní ñⁿ ùú ní dõó ñã túú ní cùdí iní-í. 34 Te mee-ndo sã naha-ndo sá yúhú ní quide chiũⁿ-í, te ní níhi-í nchaa sá nĩ nandíhi-í ndíhi cue tée xica cuu ndíhi-í. 35 Te sa ní xini-ndó ñacuãa ní quide-í ní quide chiũⁿ-í, te ñⁿ ùu-ni ducaⁿ cãda chiũⁿ-ndo cuendá chindee-ndo nchãa ñáyiu ndãhú, chi sa ñaha-ndo nacuãa ní cachí Xítohó Jesucristú, te duha ní cachí-gă: “Cùdí-gă iní-ó cuãha-o ñáyiu ndãhú sá xini ñúhú-yu ñacuúxí sã táxi-yu xii mee-o”, duha ní cachí-gă —cãchí té Pãblú xãhaⁿ-dẽ xii-güedé.

36 Te sátá dúcãⁿ nĩ cãháⁿ-dé, te ní ngüñĩ xiti-dẽ ndíhi dava-gă-güedé, te ní cãháⁿ ndíhi-dé Yă Ndiöxí. 37 Te sátá nĩ túhú tnúhu ní cãháⁿ-dé ndíhi Yă Ndiöxí, te ní ndáhyú víhi-güedé sá quihíⁿ-dé, te ní numi ñaha-güedé, te ní teyuhu ñaha-güedé. 38 Te ní ndíhú víhi iní-güedé, chi ní xãhaⁿ tẽ Pãblú sá

nì ìⁿ nduu-gá vá nánhí
tnáhá-güedë cáháⁿ ndihí
tnàha-güedé. Te cuáháⁿ ndihí
ñaha-güedë xii-dé núú ndécú
bàrcú.

21

*Té Páblú cuáháⁿ-dé ñuú
Jerusalén*

¹ Te ní quide ndee ìní-ndí
nchaa cue tée cùnuu. Te
ní quée-ndí bàrcú cuáháⁿ
ndáá ichi-ndí ñuú Còs. Te
nduu tnée ní sáháⁿ-ndí
ñuú Ròdás, te ní yáha-ndí
cuáháⁿ-ndí ñuú Pàtará.
² Te yàcáⁿ ní naníhí-ndí ìⁿ
bàrcú ñúhú ìchi-xi quíhíⁿ-xi
distrítú Fènicía, xíáⁿ ní
quée-ndí cuáháⁿ-ndí. ³ Te
ichi cuáháⁿ-ndí ní xiní-ndí
distrítú Chìpré cáá cuádava
xítí làmár, te ní yáha-ndí, te ní
quendóo ñuú-áⁿ xio dàtni-ndí.
Te cuáháⁿ-ndí ñuú Tìrú ìⁿ ñuú
yíndèhu distrítú Sìriá cuèndá
yàcáⁿ tava-güedé nchaa sá
nchídó bàrcú. ⁴ Te yàcáⁿ ní
naníhí tnáhá-ndí ndihí ñáyíu
ní sándáá iní tnúhu Jèsús,
te ní xíndecu-ndí úsá nduu
ndihí-yu. Te ní xáháⁿ-yu sá vǎ
quíhíⁿ té Páblú ñuú Jerusalén,
chi Espíritú Yǎ Ndiòxí ní
xáhaⁿ-xi xii-yu sá ndóhó
vìhi-dé ñúu na quíhíⁿ-dé.
⁵ Te sátá ñí yáha nduu úsá,
te ní quée-ndí cuáháⁿ-ndí
yuhu làmár. Te ní quée
nchaa ñáyíu ní sándáá iní
tnúhu-gá, tée, ñadíhí, nchaa
landú, nchaá-yu ní sándeca
ñàhá-yu yuhu làmár, te òré
ní quexìo-ndí, te ní ngúíñí

xítí-ndí ní cáháⁿ ndihí-ndí Yǎ
Ndiòxí. ⁶ Te ní quide ndee ìní
tnáhá-ndí ndihí-yu, te dàtnùní
ní quée-ndí bàrcú, te ní
naquehéⁿ-yu ichi cuánuhú-yu
vehé-yu.

⁷ Te ní xica bàrcú
ñúhú-ndí ní quée-xi ñuú
Tìrú cuáháⁿ-ndí ndihí-xi
ñuú Tolèmaidá. Te xíáⁿ ñí
sáá-xi te ní quene-ndí, te ní
sáháⁿ-ndí ní cáháⁿ ndihí-ndí
nchaa ñáyíu sándáá iní-xi
tnúhu Jèsús, te ní xíndecu-ndí
ndihí-yu ìⁿ nduu. ⁸ Te nduu
tnée ní ndée tucu-ndí bàrcú
cuáháⁿ-ndí ñuú Cèsareá, te
yàcáⁿ ní quene tucu-ndí
bàrcú, te cuáháⁿ-ndí vehe té
Lìpé cundecu-ndí ndihí-dé.
Te téé-áⁿ ñí xóo cada chiuⁿ
ndihí-dé ìñú-gá cue téé ní
chindee ñàha xii ñáyíu sándáá
iní tnúhu-gá ñuú Jerusalén ní
xóo cuáñaha-güedë sá ñí xóo
caxí-yu. Te dàtnùní mee-nǎ
tnúhu Yǎ Ndiòxí càháⁿ-dé xíca
cùu-dé. ⁹ Te té Lìpé-áⁿ ndècu
cúmí dèhe dìhí-dé, te ní ìⁿ-yu
vátá ndúcú ñàha-gá téé xií-yu,
te nchaá-yu càháⁿ-yu tnúhu
Yǎ Ndiòxí tnúhu sá dácàhu iní
ñáhá mée-gá. ¹⁰ Te xíáⁿ ñí
cúu títí nduu ndècu-ndí, te
ní quexìo ìⁿ téé nàni Agabú
ñuú-áⁿ, véxi-dé distrítú Jùdeá,
te téé-áⁿ tnáhá-dé càháⁿ-dé
tnúhu Yǎ Ndiòxí. ¹¹ Te ní
níhí-dé tnúhu núú ndécú-ndí
núu ní quixi-dé ní cáháⁿ ndihí
ñaha-dé xii-ndí. Te ní xícaⁿ-dé
cínchú té Páblú, te ní ngóo-dé,
te ní ngúíta-dé ní dácútú-dé
sáhá-dé ndihí ndaha-dé, te ní
cachí-dé xii-ndí:

—Espíritú Yǎ Ndiòxí ní

cachí-xi sá tée dii cìnchú-xi-a tñi ñaha cuè tée isràél ñuú Jerusálén, te duha dacutu ñaha-güedé xii-dé, te cuáha cuèndá ñahá-güedé xii-dé núú cuè tée ñuú Rómá. Duha ní cáháⁿ Espiritú-gá —càchí té Àgabú.

12 Te sá dúcáⁿ ñi cáháⁿ-dé, te ní xáhaⁿ-ndí nchaa-ndí sá vǎ quihíⁿ té Pǎblú ñuú Jerusálén.

13 Te té Pǎblú ní cachí-dé:

—¿Ná cuèndá ndéé dúcáⁿ ndàhyú-ndó dàndihú iní ñahá-ndó xii-í-í? Te ñá túú nǎ cuu cuèi na dacutu ñaha-güedé, àdi cuèi na càhni ñaha-güedé xii-í cuèndá sá cáháⁿ ndihi-í Jèsús, chi sa ndècu túha-í sá cùú-í —càchí-dé.

14 Te ñá túú ní sàndáá iní-dé sá dúcáⁿ xáhaⁿ-ndí, núú xiǎⁿ ñá túú-gǎ ná ní xáhaⁿ-ndí xii-dé sá vǎ quihíⁿ-dé, te ní xítñaha-ndí:

—Mee-ni-gǎ Yǎ Ndiòxí ná cùnaha-gá nása sàni iní-gá cada-gá —xítñaha-na-ndí.

15 Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusálén. 16 Te cuáháⁿ ndihi-ndí ñiⁿ úú cue tée Cèsareá, cue tée ní sàndáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàson, te tée-án cùú-dé tée distritú Chìpré, te ndècu-dé ñuú Jerusálén, te sa ní cuu vǎi nduu ní sàndáá iní-dé tnúhu-gá, te vehe tée-án ñi xíndecu-ndí.

Té Pǎblú ndátnúhu-dé ndihi té Jàcobó

17 Te òré ní quexìo-ndí ñuú Jerusálén, te nchaa ñáyiú ní sàndáá iní tnúhu Jèsús ní quixí-yu ní dándááo váha ñahá-yu, chi ní cudíí víhí iní-yu sá ñi quexìo-ndí. 18 Te nduu tnéé cuáháⁿ ndihi-ndí té Pǎblú cuèndá cáháⁿ ndihi-ndí té Jàcobó, te òré ní quexìo-ndí núú ndécú-dé, te ndècu ndihi-dé nchaa cue tée yìndaha ñaha xii ñáyiú sàndáá iní tnúhu Jèsús. 19 Te té Pǎblú ní dándááo váha ñaha-dé xii-güedé, te ní xáhaⁿ-dé nàcuáa ní quide Yǎ Ndiòxí ní chindee ñaha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isràél. 20 Te sátá ñi yáha ní cáháⁿ-dé, te ní ndácáⁿ táhǔ-yu núú Yǎ Ndiòxí cuèndá nchaa sá ñi quide-gá. Te dàtnùní ní xáhaⁿ-güedé xii té Pǎblú:

—Yòhó sa nàha-n sá ñi cuu títñi mǐl ñáyiú isràél ní sàndáá iní-yu tnúhu Jèsús, te càchí-yu sá ìo xìni ñuhu-xi cadá-yu nchaa nàcuáa cáháⁿ tnúhu sá ñi chídó tnùnì ndí Moisés. 21 Te ní níhí-yu tnúhu sá dácuàha-n ñáyiú isràél ñáyiú ndècu ñuú xícá cuèndá sá vǎ cadá-gǎ-yu nàcuáa ní cachí ndí Moisés cadá-yu. Te xáhaⁿ-n xii-yu sá vǎ cuáha-gá-yu seña ñi landú-yu, te vǎ cadá-gǎ-yu dàtná ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu. 22 Te na níhí-yu tnúhu sá ndécú-n ìha, te tnàvíí ngúíta-yu cáháⁿ cuèhé-yu cuèndá-n. 23 Te na càchí tnúhu-ndí nàcuáa cada-n. Ndècu cúmì

cue tée vátá cádá-gǎ-güedé nàcuáa ní cáháⁿ méé-güedé sá cádá-güedé cuendá nduu vétú iní Yǎ Ndiöxí. ²⁴ Te quíhíⁿ-n ndíhi-güedé te cada-n nchàa nacuáa ní xóo cada ñáyiú ndéé sanaha cuendá nduu vétú iní Yǎ Ndiöxí. Te tava-n díhúⁿ cuu núú-güedé cháhu-güedé veñúhu, te ducaⁿ te dǎtnúni ndacu deté díquí-güedé. Nchaa xiǎⁿ cada-n, te quiní ñáyiú sá ñá ndáá tnúhu càháⁿ nchaa ñáyiú càháⁿ cuèhé cuendá-n. Te na cùtnuní iní-yu sá tnàhá-n quide-n nchaa nacuáa ní chídó tnùní ndíi Moisés cadá-yu. ²⁵ Te sa ní quide ndáá-ndí cuendá nchaa ñáyiú ñúú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-áⁿ sá vǎ cáxi-yu nchaa sá nchító-ó ndúu táhú nchaa sá cǎchí-yu cùu ndióxí ní cadúha cue ñáyiú ñuyíú-a. Te ní xáhaⁿ-ndí sá vǎ cáxi-yu níñí, te vǎ cáxi-yu cuñú nchaa quití cuèhné. Te vǎ càháⁿ ndíhi cue tée ñadíhi te núu ñá díú ñadíhi-güedé cúú-yu, te ní cuè ñáyiú díhí vǎ càháⁿ ndíhi-yu tée te núu ñá díú yí-yu cùu-güedé. Duha ní tee-ndí núú tutú cuáháⁿ — cǎchí-güedé xáhaⁿ-güedé xii té Pǎblú.

Ní tnü-güedé té Pǎblú xiti veñúhu ñáyiú israél

²⁶ Te nduu tnéé cuáháⁿ té Pǎblú ndíhi cúmí cue tée veñúhu càhnu sá ío cùnuu núú ñáyiú israél cada-güedé

nàcuáa ní xóo cada ñáyiú ndéé sanaha cuendá nduu vétú iní Yǎ Ndiöxí. Te ní quíhu-dé veñúhu càhnu sá ío cùnuu-áⁿ ní xáhaⁿ-dē ná daha-gá nduu cùmání dandíhi-güedé nàcuáa ní xóo cada ñáyiú ndéé sanaha, te dǎtnúni cǎnehe-güedé sá ndúú táhú Yǎ Ndiöxí quíhíⁿ veñúhu.

²⁷ Te cùmání-gǎ cuu úsá nduu sá ní sáháⁿ-güedé veñúhu càhnu sá ío cùnuu, te sa ndècu tucu té Pǎblú veñúhu. Te cue tée israél véxi distritú Àsiá ní xiní-güedé té Pǎblú yíhí-dē veñúhu, te ní tnü ñaha-güedé xii-dé, te ío ní cáháⁿ cuèhé-güedé cuendá-dé núú dǎva-gá ñáyiú yíhi veñúhu cuendá sá cùdēⁿ-yu núú tē Pǎblú. ²⁸ Te níhi ní cáháⁿ-güedé, te xáhaⁿ-güedé xii-yu:

—¡Nchòhó ñáyiú israél, yáchí-ndó chì cuánùndaha ñaha-ndo! Chi tée-a yayàcáⁿ cuáháⁿ-dé càháⁿ-dé sá ñà túú nàndíhi-o, te càháⁿ-dé sá vǎ cádá-ó nchàa nacuáa càháⁿ tnúhu sá ní chídó tnùní ndíi Moisés, te cǎchí-dé sá ñà túú nàndíhi veñúhu-a. Te ñá díú-ní xiǎⁿ chi sa ní quíhu-dé veñúhu-a ndíhi cue tée ñá túú cùu ñáyiú israél, te sá dúcáⁿ ní quide-dé, te ñá túú-gǎ ní cǎnehe íi-dē xiti veñúhu. Te veñúhu-a cùu-xi vehe Yǎ Ndiöxí —cǎchí-güedé xáhaⁿ-güedé xii-yu.

²⁹ Te ducaⁿ ní cáháⁿ-güedé chi ní sani iní-güedé sá ní quíhu ndíhi-dé té Tröfimú veñúhu-güedé, chi ní xiní-güedé xícá cùu ndíhi

ñaha-dé xití ñuú. Te tée-áⁿ cúu-dě tée ñuú Éfesú, te ñá díú tée israél cúu-dě.

³⁰ Te chitu ñáyu ñuú-áⁿ nĩ tacá-yu ní tñi-yu té Páblú táñuhu ñahá-yu ní ndee veñuhu cãnu sá ïo cùnuu, te òré-ni ní nacadí-güedé yèhe veñuhu-áⁿ.

³¹ Te sa cahní-yu té Páblú ní cùu, te ní sáháⁿ ìⁿ úú-güedé núú ndécú tée cùu capitáⁿ cùnùu-gá, te ní xáhaⁿ-güedě xii-dé sá ncháá ñáyu ñuú Jerusàlén xĩnàá-yu. ³² Te òré-áⁿ cuáháⁿ tée cùu capitáⁿ cùnùu-gá ndihĩ dava-gá cue tée nchìcùⁿ-gá ndihĩ sandàdú-dé. Te òré ní xini-yu ní quexìo coyo-güedé núú xixúcu-yu, te ní yuhú-yu ñá túu-gã ní cãní-yu té Páblú. ³³ Te tée cùu capitáⁿ ní sãtuha-dé té Páblú, te ní xáhaⁿ-dě xii cue sandàdú-dé sá tñi ñaha-güedé dacùtu ñaha-güedé úú cadená. Te dãtnùní ní xicáⁿ tnúhú-dě núú-yu, te xáhaⁿ-dě:

—¿Ná cúu tée-a? ¿Ná ní quide-dé? —càchí-dé xáhaⁿ-dě xií-yu.

³⁴ Te tée cùu capitáⁿ-áⁿ ñã ní cùnùnĩ iní-dé nõu ná cúu sá ní quide té Páblú, chi uuⁿi ní cuáá-yu. Te tucu cãháⁿ ìⁿ, tucu cãháⁿ ìⁿ-yu, núu xĩáⁿ ní xáhaⁿ-dě cue sandàdú-dé sá cãndèca ñaha-güedé xii-dé quihĩⁿ cuàrtél núú ndécú-güedě.

³⁵⁻³⁶ Te nchìcùⁿ ñãhá-yu cuáháⁿ ní quexìo ndéé nãcuáa càa nchio cùnĩ-yu cahni ñahá-yu xii-dé ni cùu. Te níhi ní cãháⁿ-yu xãháⁿ-yu sá cãhni ñaha-güedé, te xĩáⁿ ní ndacani

ñaha-güedě ndécá ñaha-güedé cuásaá nchio-ãⁿ.

Té Páblú xáhaⁿ-dě xii-güedé sá ñã túu cuèchi-dé

³⁷ Te cuánguihu-güedé cuàrtél ndihĩ té Páblú ní cùu, te ní xáhaⁿ-dě xii tée cùu capitáⁿ cùnùu-gá:

—Cãháⁿ ndàhú-í núú-n cùnnetu-n na cũñaha-ì ìⁿ úú tnúhu xií-yu —càchí-dé xáhaⁿ-dě.

Te tée tàxi tnuní-áⁿ nĩ xáhaⁿ-dě:

—¿Náa tnàhá yòhó cãháⁿ-n tnúhu griégú? ³⁸ Te ní cãháⁿ-í sá tée ègíptú cúu-n, chi díu-n nĩ ndúcú-n cuè tée ní nàá ndihĩ tée cùchiuⁿ Cesár ní cãháⁿ-í, chi díu ìⁿ tée yacáⁿ ní ndúcú-dě cùmí mĩl cue tée ní sahani ndíyi. Te ndèca tnaha-güedé ní sáháⁿ xití yucu ní xihĩ váha-güedé —càchí-dé xáhaⁿ-dě xii té Páblú.

³⁹ Te té Páblú ní xáhaⁿ-dě:

—Ñá díú tée ègíptú cúu-í, chi tée israél cúu-í, chi díu-ni tée israél cúu tãtà-í, te dicó-ni sá nĩ cacu-í ñuú Tãrsú ñuú cãhnú, te ñuú-áⁿ yĩndèhu-xi distritú Ciliciá. Te cuiní-í cada ndee iní-n dãña-n na caháⁿ ndihĩ-í-yu —càchí-dé xáhaⁿ-dě.

⁴⁰ Te ní xáhaⁿ tée cùu capitáⁿ cùnùu-gá sá cúu cãháⁿ té Páblú, núu ní ngúmutnĩ-dé núú nchio, te ní quide-dé ndaha-dé sá cündedóho-yu. Te ní sadí-yu yuhú-yu, te ní cãháⁿ-dé tnúhu ñáyu israél, te xáhaⁿ-dě xií-yu:

22

1 —Chí cãdá cãnu iní nchòhó cue tée sa cuéhé ndihĩ nchòhó cue tée cuechi,

na càháⁿ-í ìⁿ tnúhu cund-
edóho-ndo sã ñà túú cuèchi-í,
chí ñá túú nã ní quide-í, te
ní ñà túú nã tnúhu càháⁿ-í —
càchi-dé xãháⁿ-dë xii-güedë.

² Te cuendá sá dúcáⁿ ñí
cáháⁿ-dë tnúhu mèe-yu núu
tnàvíí-nã ní sadí-yu yuhú-yu
ní xíndedóho-yu ní cáháⁿ-dë,
te xãháⁿ-dë:

³ —Yúhú cùu-í tée isràél, te
ní cacu-í ñuu Tàrsú, te ñuu-án
yíndèhu-xi Ciliciá. Te davitna
lìhli-í cútnàhá ní quexio-í ñuu
Jerusalén ní dácúáhá ñàha
té Gamaliél. Te ní dácúáhà-í
nchaa tnúhu ní chídó tnùní
nchaa cue tée ndéé sanaha
nacuáa cada ñáyiú. Te yúhú
ní cahu iní-í ní quide-í titní
núú chiúⁿ nacuáa cuu váha iní
Yã Ndiõxí ní cãháⁿ-í, te ñu-
ducaⁿ quide nchohó tucu. ⁴ Te
ní sánú ndúcù-í nchaa ñáyiú
sàndáá iní-xi tnúhu Jèsús,
cuèi tée, cuèi ñáyiú ñíhí ní
dácútù-í-yu, te ní chihi-í-yu
vecaá, te ní ñíhì-í tnúhu ndee
iní sá cáhni-ndí-yu. ⁵ Te
dútú cúnù-gá ndihí cue tée
cùnùu núú-ndó naha-güedé sá
ndàá càháⁿ-í chi mee-güedë
ní taxi-güedé tutú cuãñaha-í
xii ñáyiú isràél ñáyiú ndëcu
ñuu Dàmascú cuendá cutnùní
iní-yu nã chíúⁿ cuáháⁿ-í ní
cùu. Te ñùhu-í ichi cuáháⁿ-í
ñuu-án cuãnúndúcù-í ñáyiú
ní sàndáá iní-xi tnúhu Jèsús
cuendá dacùtu-í-yu te can-
deca-í-yu ndixi, te iha cada
úhú ñáhá-güedë xií-yu ni cùu.

*Té Pãblú xãháⁿ-dë xii ñáyiú
nacúáa ní cuu ní tuha-dé ichi
Jèsús*

(Hch. 9:1-19; 26:12-18)

⁶ Te ta cùyatni-í ñuu
Dàmascú cuáháⁿ-í, te cùu-xi
datná òré cauxúu nduu, te
uuⁿni ní quee ñuhú andiú,
te ní dáyèhé-xi ndéé núu
nútní-í. ⁷ Te ní quide nee-xi
núu-í, xiáⁿ ní nduá-í ndéé
ñuhu. Te ní tecú dóho-í
cáháⁿ ìⁿ sá càháⁿ andiú, te
càchi-xi: “Yòhó té Sàulú, ¿ná
cuendá cùú ùhú iní ñáhá-n
dàndoho ñaha-n xii-í?”, càchi
sá càháⁿ-án. ⁸ Te ní xáhaⁿ-í:
“¿Ná cùú yòhó sá càháⁿ-án?”,
xãháⁿ-í. Te ní cáháⁿ tucu
ingá xito te càchi-xi: “Yúhú
cùu-í Jèsús tée ní xíndecu
ñuu Nazàrét, te ducaⁿ ño
dàndoho ñaha-n xii-í”, càchi sá
cáháⁿ-án. Te xiáⁿ ní cutnùní
iní-í sá díú Jèsús càháⁿ. ⁹ Te
nchaa cue tée ndihí-í ní
xiní-güedé ní dáyèhé ñuhú,
te ní yùhú-güedé, dico ñá
túú ní tècú dóho-güedé òré
ní càháⁿ-gá. ¹⁰ Te ní xáhaⁿ-í
xii-gá: “Yòhó Xítohó Jesu-
crístú, ¿ná cuiní-n càda-í?”,
xãháⁿ-í xii-gá. Te ní cachí-gá:
“Ndacóo, te quíhíⁿ-n ñuu
Dàmascú, yacáⁿ tecú tnúhu-n
nchaa nacúáa cuiní Yã Ndiõxí
cada-n”, càchi-gá —càchi té
Pãblú xãháⁿ-dë xii-yu.

¹¹ Te ní xáhaⁿ tucu té Pãblú:

—Te cuendá sá ñí dácúáa
ñàha ñuhú xii-í núu ní tñí
cue tée ndihí-í ndaha-í ndéca
ñàha-güedé cuáháⁿ ndéé ñuu
Dàmascú.

¹² Te yacáⁿ ndécú ìⁿ tée
nàni Ananiás, te ío vãi sá
ñí chídó tnùní ndíi Moisés
cadá-yu quide-dé. Te nchaa
ñáyiú ñuu Dàmascú ío váha
cáháⁿ ndihí ñáhá-yu xii-dé.
¹³ Te ní quexio-dé núu
ndécù-í, te ní cachí-dé:

“Yòhó té Sàulú, té ndècu ndihí-í ichi Xítóhó Jesucristú, ndúha núu-n”, cächí-dé. Te òré-ni ní nacaáⁿ núu-í te ní xiní-í-dé. ¹⁴ Te dātnùnì ní cachí-dé: “Yá Ndiöxí ní cáháⁿ ndihí-gá ñaní tnáhá-ó nǐ xíndecu ndéé sanaha. Te diu-gá ní cáxi ñaha-gǎ xii-n cuendá quiní-n nchàa sá vǎha cuiní-gá cada-n. Te quiní-n Jèsús Yaá ñá túú cuèchi-xi, te diu-ni mee-gǎ cáháⁿ ndihí ñaha-gǎ xii-n. ¹⁵ Te cáháⁿ-n tnǎhu Jèsús núú nchàa ñáyiú, te cáháⁿ-n nchàa sá nǐ xiní-n ndihí nchaa sá nǐ xíndedóho-n. ¹⁶ Tnáví, te quíhíⁿ-n cuàndute-n, te cáháⁿ ndihí-n Yǎ Ndiöxí cuendá cada càhnu iní-gá nchaa sá cuèhé sá dúhá nǐ quide-n”, duha ní cachí té Ananiás xii-í —cächí té Pǎblú xǎhaⁿ-dē xii-yu.

Té Pǎblú ní cani-dé cuèndú nācuáa ní xǎhaⁿ Jèsús cada-dé quíhíⁿ-dē ñúú núú xíndecu ñáyiú ñá túú cùu ñáyiú isràél

¹⁷ Te ní xǎhaⁿ tùcu té Pǎblú:

—Te ní ndee-í cuándixi-í ñúú Jerusalén. Te ní sáháⁿ-í veñúhu càhnu sá ìo cùnunu ní cáháⁿ ndihí-í Yǎ Ndiöxí, te ní dácótó núú ñáhá-xí sǎ méé Jèsús ní xiní-í xití veñúhu, ¹⁸ te ní cachí-gá: “Yáchí, quee-n ñùú Jerusalén, chi ñáyiú-a vá quíndáá iní-yu nācuáa ní cachí-í cúñaha-n xii-yu cuèndá-í”, duha ní cachí-gá xii-í. ¹⁹ Te ní xǎhaⁿ-í xii-gá: “Yòhó Xítóhó Jesucristú, sa xiní-n sǎ ncháá ñáyiú nahá-yu sá nǐ sáháⁿ-í ndi tnahá ñⁿ ndi tnahá ñⁿ veñúhu nānducu-í ñáyiú sàndáá iní tnúhu-n,

te ní tnǎ-í-yu, ní chihí-í-yu vecaá, te ní táuchíuⁿ-í ní caniha-güedē xii-yu. ²⁰ Te cútnáhá ní sahani-güedé ndii Těvá té ní xóo cáháⁿ tnúhu-n, te tnáhá-í ndécú òré-án te ní xíndeé-í dóo cue té ní sahani ñaha xii ndii. Te yúhú ní cáháⁿ-í sá nǐ quide vǎha-güedé sá dúcáⁿ nǐ quide-güedé”, duha ní xǎhaⁿ-í xii-gá. ²¹ Te ní cachí tnúhu-gá xii-í: “Cuáháⁿ chi cuiní-í quíhíⁿ-n nchàa ñúú xícá núú xíndecu cue ñáyiú ñá túú cùu ñáyiú isràél cáháⁿ-n tnǎhu-í”, cächí-gá —cächí té Pǎblú xǎhaⁿ-dē xii-yu.

Te Pǎblú ndihí téé tàxi tnuní ñáhá xii cue sandadú

²² Te sá dúcáⁿ nǐ cáháⁿ-dē, te ñá ní tnáhá-gá iní-yu cundedóho-yu tnúhu càháⁿ-dē. Te ñⁿ-ni nǐ cuú-yu ncháá-yu, te ní cuáá-yu, te xǎhǎⁿ-yu:

—¡Chí cáhni-dē! ¡Ñá díú sǎ cùndècu-dé ñuyíú-a! —cächí-yu xǎhǎⁿ-yu.

²³ Te mei òré ducaⁿ nǐ cáháⁿ-yu, te ní ndátǎ-yu dóo-yu, te ní dáquéně-yu núú ñnu sá sǎtú iní-yu. Te ní quéhnu-yu ñuhu, te ní dácácòyó-yu núú ñnu sá ìo sǎtú iní-yu. ²⁴ Te téé cùu capitáⁿ cùnùu-gá ní xǎhaⁿ-dē xii cue sandadú-dé:

—Chí dítá-dē ná quíhu-dé ndéé xití vehe, te cani-ndo-dē ñí, chi na quène yuhu-dé ná tnúhu ní cáháⁿ-dē ñnu ndéé dúcáⁿ cùdèéⁿ-yu núú-dē —cächí-dé xǎhaⁿ-dē xii-güedé.

²⁵ Te sǎtá nǐ dácútú ñaha-güedé xii té Pǎblú sá caní ñaha-güedé ní cùu, te ní

xáhaⁿ-dě xii tée cùu capitáⁿ ndécú-ǎⁿ:

—Te na cächí tnúhu-í sá vǎ cúú cànha-güedé ñii, chi tée rò má cúu-í, te vátá quini ndáá-gá-ndó nüu ndècuéchi-í àdi ñháá —cächí-dé xáhaⁿ-dě xii tée cùu capitáⁿ.

²⁶ Te sá dúcáⁿ nǐ cáháⁿ-dé, te ní sáháⁿ tée cùu capitáⁿ núú tée cùnuu-gá, te ní xáhaⁿ-dě:

—Vá cúú càn-o tée-ǎⁿ, chi tée rò má cúú-dé —cächí-dé xáhaⁿ-dě.

²⁷ Te ní sáháⁿ tée cùu capitáⁿ cúnùu-gá ndéé núú tǐ Pǎblú, te ní xáhaⁿ-dě:

—Cáháⁿ ndáá-n nüu ndisa tée rò má cúú-n —cächí-dé xáhaⁿ-dě.

Te ní xáhaⁿ tǐ Pǎblú:

—Ndáá sá tǐe rò má cúú-í —cächí tǐ Pǎblú xáhaⁿ-dě xii tée cùnuu-áⁿ.

²⁸ Te ní xáhaⁿ tǐe cùnuu-áⁿ:

—Yúhú tnàhá-í cúú-í tée rò má, chi vai díhúⁿ nǐ cháhu-í —cächí-dé xáhaⁿ-dě.

Te tǐ Pǎblú ní xáhaⁿ-dě:

—Tnàhá-í cúú-í tée yàcáⁿ tucu, chi tǎtà-í cúú-dé tée rò má —cächí tǐ Pǎblú xáhaⁿ-dě xii tée cùu capitáⁿ cúnùu-gá.

²⁹ Te uuⁿni ní nacaca sata cue tǐe cuáháⁿ caniha xii-dé ní cùu. Te ní yúhú tǐe tàxi tnuní sá dúcáⁿ nǐ xáhaⁿ tǐ Pǎblú sá tǐe rò má cúú-dé, chi ní xáhaⁿ-dě ní dácútú ñàha-güedé xii-dé, núu xǎⁿ ní yùhu-dé.

Té Pǎblú ní cáháⁿ ndihi-dé cue tǐe cùnuu oré ní quide-güedé jündá

³⁰ Te tǐe tàxi tnuní sandàdú ñá ní xini-dé ná cuéchi ní dácáá ñǎyiu isràél díquí tǐ Pǎblú, núu xǎⁿ nduu tnéé ní cana-dé cue

dútú cúnùu, ndihi cue tǐe cùchiuⁿ, ndihi cue tǐe cùu sacuéhé, te ní xáhaⁿ-dě sá cáda-güedé jündá cuendá nducu tnúhu-güedé núú tǐ Pǎblú ná cuéchi ní dácáá-yu díquí-dé. Te ní xáhaⁿ-dě xii cue sandàdú sá nándàxi ñàha-güedé cadená ndútú-dé, te candeca ñàha-güedé quihíⁿ núú cáda-güedé jündá. Te ní sáháⁿ-güedé ní nandaxi ñàha-güedé xii-dé ndécá ñàha-güedé cuáháⁿ jündá, te ní quexìo-güedé, te ní ngúnutnǐ-dé núú cuè tǐe cùchiuⁿ.

23

¹ Te yàcáⁿ ní xindéhé vǎha tǐ Pǎblú núu nchàa-güedé, te ní xáhaⁿ-dě:

—Cada càhnu iní nchòhó cue tǐe cùchiuⁿ, te ducaⁿ nchòhó cue tǐe cùu sacuéhé, véxi-í cächí tnúhu-í sá ñà túú cuéchi-í, chi mee Yǎ Ndiòxí nàhá-gǎ nása ndècu-í ñuyíú-a, te ñá túú cùcahaⁿ núú-í núú-gǎ —cächí tǐ Pǎblú xáhaⁿ-dě xii-güedé.

² Te tǐ Anàniás tée cùu dútú cúnùu-gá ní xáhaⁿ-dě xii cue tǐe nùtnǐ yatni diñi tǐ Pǎblú sá cáni-güedé déhndé yuhu-dé.

³ Te tǐ Pǎblú ní xáhaⁿ-dě xii dútú-ǎⁿ:

—Yòhó, chi úhú tnàhí iní-n, chi ní ndúcú-n tǐe ní caniha xii-í, te ñá túú cuéchi-í, dico quini-n nǎ cada ñàha Yǎ Ndiòxí xii-n. Te yòhó ní cana ñàha-n nducu tnúhu-n nüu quide-í nchaa nàcuáa càháⁿ tnúhu sá nǐ chídó tnuní ndí Moisés cada-o. Te mee-n ní ndúcú-n tǐe ní caniha, te ñá túú dùcaⁿ ní cáháⁿ ndí cada-o

—càchí té Pàblú xăhaⁿ-dě xii dútú cúnù-gá-áⁿ.

⁴ Te cue té xĩnutnĩ dĩñĩ te Pàblú ní xăhaⁿ-güedě xii-dé:

—Nèhé ní quide-n chi ní xícuehé-n dútú cúnù-gá té xĩnu cuechi núú Yă Ndiöxí —càchí-güedě xăhaⁿ-güedě xii té Pàblú.

⁵ Te té Pàblú ní xăhaⁿ-dě xii-güedé:

—Cada càhnu iní-ndó chi ñá túú xĩní-í sá dútú cúnù-gá cúú-dě, chi núú tütú Yă Ndiöxí càchí-xi sá vă cúú cáháⁿ cuèhé-ó cuendá ĩⁿ té cunuu ñuú-ó yòtnúhu. Te yúhú ñá túú xĩní-í sá tée cunuu cuu-dé ñuú ní sácóo-í ní cáháⁿ-í —càchí té Pàblú xăhaⁿ-dě xii-güedé.

⁶ Te òré-áⁿ ñĩ cutnùnĩ iní té Pàblú sá dává-güedě cundĩhi-güedé cue té cùu saducéú, te dava-güedé cundĩhi-güedé cue té cùu fariséú, te níhi ní cáháⁿ-dé ní xăhaⁿ-dě xii-güedé:

—Yúhú cùú-í té fariséú, te tnàhá tătà-í ndĩhi xĩ-í cúú-güedě cue té fariséú tucu. Te tnàhá yúhú sàndáá iní-í sá ndótó nchàa ñáyiu ní xihí, te núu xiáⁿ cuiní-ndó ndùcu tnúhu-ndo ñuú-í cáná ñaha-ndo —cachí-dé xăhaⁿ-dě xii-güedé.

⁷ Te sá dúcáⁿ ñĩ cáháⁿ-dé xiáⁿ ní năá ndĩhi tnàha cue té cùu fariséú ndĩhi cue té cùu saducéú, chi ñá ĩⁿ-ní tnúhu ní cáháⁿ-güedé, chi ní ndĩ queheⁿ ndĩ queheⁿ-güedé sá ñĩ cáháⁿ-güedé. ⁸ Te cue té cùu saducéú càchí-güedé sá vă ndótó cuè ñáyiu ní xihí, te cue té cùu fariséú càchí-güedé sá ndótó-yu. Te cue té

cùu saducéú càchí-güedé sá ñà túú espíritú xĩnú cuèchi núú Yă Ndiöxí, te cue té cùu fariséú càchí-güedé sá ió espíritú xĩnú cuèchi núú-gă. ⁹ Te ta cùdééⁿ-güedě cuáháⁿ, te níhi-gá cúú ìní-güedé càháⁿ-güedé, te ĩⁿ úú cue té cùu fariséú cue té dăcuaha ñaha xii ñáyiu nchaa tnúhu ní chídó tnùnĩ ndĩ Moisés ní cáháⁿ níhi-güedé, te xăhaⁿ-güedé:

—Ñá túú cuèchi-dé, te cudana te ní cáháⁿ ndĩhi-dé ĩⁿ espíritú xĩnú cuèchi núú Yă Ndiöxí te vă ngöo vă cúú văha iní-ó ñuú-gă —càchí cue té cùu fariséú xăhaⁿ-güedě xii-güedé.

¹⁰ Te cuendá sá ió xĩnăá-güedé, xiáⁿ ní yúhú té cùu capitáⁿ cúnù-gá sá cahní-güedě té Pàblú, núu xiáⁿ ní xăhaⁿ-dě sá quihíⁿ-güedé cúnúcuaca ñaha-güedě candeca ñaha-güedě núhú cuàrtel.

¹¹ Te ndéé niú cúú úú ní quexio Xitohó Jesucristú núú ndécú tē Pàblú, te ní xăhaⁿ-gă:

—Ñĩ cunduu-n, vă yúhú-n, chi năcuáa ní cáháⁿ-n ní cacunehe ñaha-n xii-í iha, te dũ-ni ducaⁿ cáháⁿ-n căcunehe ñaha-n xii-í quihíⁿ-n ñuú Rómá —càchí-gă xăhaⁿ-gă xii-dé.

Cahni-güedé té Pàblú ní cùu

12-13 Te nduu tněé ní natacá vĩhi-gă údico cue té israhel ní ndatnúhu-güedé sá cahní-güedě té Pàblú, te ní xitnàha-güedé:

—Ni dĩtă vă caxí-ó te ni ndüte vă cöhó-ó nděe ndacu-o cahní-o té Pàblú, te

dătnùní caxi-o dítá, te coho-
ndüte, chi sa ní sani iní-ó sã
cádá-ó, te cuu cuéchi xii-o
núu vá cádá-ó —càchí-güedé
xìtnàha-güedé.

14 Te ní sáháⁿ-güedé núu
ndécú ncháa dútú cùnùu
ndihì ncháa cue tée cùu
sacuéhé, te ní xáhaⁿ-güedé:

—Ní cachí-ndí sá ni dítá
vã cáxí-ndí ndéé núu ní
ndacu-ndí ní sahani-ndí
té Păblú, chi sa ní sani
iní-ndí sá cádá-ndí, te cuu
cuéchi núu vá cádá-ndí.
15 Te duha cada-ndo ndihì
dava-gá cue tée cùnùu, chi
cũñaha-ndo xii tée cùu capitáⁿ
cùnùu-gá: “Quixi ndihì-n té
Păblú núu ndécú-ndí cuendá
ndatnúhu ndihì-ndí-dé,
chi cuíní-ndí nducu tñuhu
váha-gá-ndí ná cúu sã ní
quide-dé”, duha cũñaha-ndo
xii tée tàxi tñuní sandádú.
Te ducaⁿ-ni cũñaha-ndo
dândahú-ndó-güedé cuendá
quixi ndihì-güedé té Păblú, te
nchúhú sa cundetú-ndí-güedé
ichi, chi quíní té Păblú ná
cahni-ndí-dé —càchí-güedé
xáhaⁿ-güedé xii cue tée
cùchiuⁿ.

16 Te déhe cúha té Păblú
ní níhí-dé tñuhu năcuáa
cada-güedé ditó-dé. Te
ní sáháⁿ-dé cuártél, te ní
xáhaⁿ-dê xii ditó-dé năcuáa
cáháⁿ-güedé cada ñaha-güedé.
17 Te ní cana té Păblú ñⁿ tée
cùu capitáⁿ, te ní xáhaⁿ-dê:

—Vá cündèe iní-n, quíhíⁿ
ndihì-n tée-a na cáháⁿ
ndihì-dé tée cùnùu-gá, chi
ndècu ñⁿ cuendú cũñaha-dê
cuíní-í —càchí té Păblú
xáhaⁿ-dê xii tée cùu capitáⁿ.

18 Te dătnùní ní xica
téé cùu capitáⁿ ndécá-dê
dăxíⁿ tẽ Păblú cuáháⁿ núu
ndécú téé cùnùu-gá, te òré ní
quexio-güedé núu-dê, te ní
xáhaⁿ téé cùu capitáⁿ xii-dé:

—Té Păblú téé yihì vecaá
ní cana ñaha-dê xii-í, te ní
cachí-dé véxi-í ndihì téé-a
cuendá cachí tñuhu-dé ñⁿ
cuendú cuíní-dé —càchí-dé
xáhaⁿ-dê xii téé cùnùu-gá.

19 Te téé cùnùu-áⁿ ní tñi-dé
ndaha dăxíⁿ tẽ Păblú, te
tânehe ñaha-dé cuáháⁿ ñⁿ xio,
te ní xícáⁿ tñuhú-dê núu-dê,
te xáhaⁿ-dê:

—¿Ná cuendú cuíní-n
cáháⁿ-n? —càchí-dé xáhaⁿ-dê
xii dăxíⁿ tẽ Păblú.

20 Te ní xáhaⁿ-dê xii téé
cùnùu-áⁿ:

—Cue téé isrâel ní
ndatnúhu ndáá-güedé sá
quíxí-güedé tneé cáháⁿ
ndâhú-güedé núu-n cãndeca-n
té Păblú quíhíⁿ jùndá, te
yácáⁿ cécáⁿ tñuhú ndáá-güedé
núu-dê ná cúu sã ní quide-dé,
càchí-güedé xìtnàha-güedé.

21 Te vá quëndáá iní-n chi
dicó dandâhú ñáhá-güedé,
chi vîhi-gá údico-güedé
ndătnúhu-güedé cundedí-güedé
ichi cahni ñaha-güedé. Te
xìtnàha-güedé sá ni dítá
vã cáxí-güedé, te ni ndüte
vá cóhó-güedé ndéé núu
ní ndacu-güedé ní sahani
ñaha-güedé, te dătnùní
caxi-güedé dítá, te coho-güedé
ndute, chi sa ní sani
iní-güedé sá cádá-güedé, te
cuu cuéchi núu vá cádá-güedé,
càchí-güedé xìtnàha-güedé.
Te cundecu túha-ná-güedé
cundetú ñaha-güedé tneé,

te núu na quíndáá iní-n càndecá-n-dé quíhíⁿ jùndá —càchí-dé xǎhaⁿ-dě xii té cùnuu-áⁿ.

²² Te té cùnuu-áⁿ nǐ xǎhaⁿ-dě:

—Cuanùhú, te vá yõo tnàhí cùñaha-n sǎ nǐ quixi-n nǐ cachi tnúhu-n nàcuáa cǎháⁿ-güedé cada-güedé té Pǎblú —càchí-dé xǎhaⁿ-dě.

Ndèca-güedé té Pǎblú cuáháⁿ núú tǎ Juélí té cùu gobiernú

²³ Te té cùnuu-gá ní cana-dé úú cue té cùu capitáⁿ, te xǎhaⁿ-dě:

—Tava-ndo úú cièndú sandàdú cue té xica saha, ndihi únídico úxí sandàdú cue té yòdo cuayú, ndihi úú cièndú sandàdú mee-ni cuè té xínehe lǎnzá. Te cada túha-ndo chi caca-ndo òré caá íⁿ niú quíhíⁿ-ndó ñúú Cèsareá ndihi té Pǎblú. ²⁴ Te nducu-ndo cuèdicó íⁿ úú cuayú codo-dé ndihi cue té ndèé ñáhá xii-dé. Te cada cuèdádú-ndó-dé ichi, te candeca-ndo-dé quíhíⁿ quíndeca-ndo-dé núú tǎ cùu gobiernú —càchí té cùnuu-áⁿ xǎhaⁿ-dě xii cue té cùu capitáⁿ.

²⁵ Te té cùnuu-áⁿ nǐ cadúha-dé tutú cuèndá quíhíⁿ ndaha té Juélí té cùu gobiernú. Te duha ní chídó tnùní-dé núú tutú cuáháⁿ:

²⁶ “Cóvaha díi-n, tǎtá gobernàdór. Ío cada càhnu iní, yúhú nání-í Claudiú Lisiás. Yúhú ní tendaha-í íⁿ tutú véxi ndaha-n cuèndá quini tnùní-n nàcuáa ní cuu iha. ²⁷ Cue té isràél ní tñi-güedé íⁿ té nàni Pǎblú

cùini-güedé cahni ñaha-güedé ní cùu, te ní níhí-í tnúhu sǎ tǎe ròma cùu-dé nǔu ní sáháⁿ-í ndihi sandàdú-í ní dácǎcu-ndí-dé. ²⁸ Te ní cuini-í quini-í ná cuèndá téé ñaha-güedé cuèchi xii-dé, núu xǎⁿ ndécá-í-dé ní sáháⁿ núú nǐ quide cue té cùchiuⁿ isràél jùndá. ²⁹ Te yàcáⁿ ní níhí-í tnúhu sǎ ñà túú nǎ cuèchi nǐ quide-dé, chi cuèndá-ni sǎ ní níhí-güedé tnúhu sǎ ñà túú sandáá iní-dé cada-dé nchaa sǎ ní xóo cada ñáyiu ní xíndecu ndéé sanaha nchícúⁿ nihnu-güedé quide-güedé, xǎⁿ ní cudééⁿ-güedé núú-dé.

Te ñà túú cuèchi càhnu nǐ quide-dé nǔu quíhíⁿ-dé vecaá àdi cahni-í-dé. ³⁰ Te ní níhí-í tnúhu sǎ cuè té isràél ndúcú-güedé nàcuáa cada-güedé cahni ñaha-güedé xii-dé, xǎⁿ ní xáhaⁿ-í xii sandàdú-í sǎ cándèca ñaha-güedé quixi xǎⁿ. Te ní xáhaⁿ-í xii cue té tǎe ñaha cuèchi sǎ quíxí-güedé ndéé xǎⁿ cǎháⁿ-güedé nǔu ná cuèchi ní quide-dé. Te cada càhnu iní-n chi duha-ni ndùu tnúhu cǎháⁿ-í, te cundee iní-n quèheⁿ cuèndá-n-dě”, duha ní chídó tnùní téé ní cadúha tutú cuáháⁿ ndaha té Juélí.

³¹ Te cue sandàdú ní quide-güedé nàcuáa ní xáhaⁿ tǎe tàxi tnuní ñáhá xii-güedé chi ní xica-güedé ndihi té Pǎblú òré caá íⁿ niú, te dñu-ni niú-áⁿ nǐ quexìo-güedé ñúú Antipatrís. ³² Te sátá nǐ túndaá, te ní nacuico cuè téé xínehe lǎnzá ndihi dava-gá sandàdú xícá sàha cuánuhú-güedé cuàrtél, te mee-nǎ sandàdú cue téé yòdo cuayú cuáháⁿ

ndihi té Páblú. ³³ Te òré ní quexìo-güedé ñuú Cèsareá, te ní sáha-güedé tée cùu gobiernú tutú néhé-güedé cuáháⁿ. Te ní queheⁿ cuendá-dé té Páblú. ³⁴ Te sáta ní dácuaáhá tée cùu gobiernú-áⁿ tutú-áⁿ te ní xicáⁿ tnúhú-dě núu tē Páblú, te xáhaⁿ-dē:

—¿Ndèé tée cùu-n? —
cachí-dé xáhaⁿ-dē.

Te ní xáhaⁿ tē Páblú:

—Tée Cìlicia cùu-í —
càchí-dé xáhaⁿ-dē.

³⁵ Te ní xáhaⁿ tē cùu gobiernú-áⁿ:

—Òré quexìo cue tée tē ñaha cuéchi xii-n, te cáháⁿ-n nása ní cuu, chi níhì-í nàcuáa cada ndáá-í cuendá-n —
càchí-dé xáhaⁿ-dē xii té Páblú.

Te ní xáhaⁿ-dē xii sandàdú sá cùndèe-güedé té Páblú vehe càhnu té Hèrodés.

24

Té Páblú xáhaⁿ-dē xii té Juélí sá ña túu cuéchi-dé

¹ Te sáta ní cuu úhúⁿ nduu, te té Anàniás dútú cùnùu-gá cuáháⁿ-dé ñuú Cèsareá ndihi cue tée cùu sacuéhé ndihi ìⁿ tée nàni Tértulú tée càháⁿ yuhu-güedé. Te cuáháⁿ-güedé núu tē cùu gobiernú cuáháⁿ dácuaándèhnde-güedé núu-dē sá ndècuéchi té Páblú. ² Te ní ságuaca-güedé té Páblú. Te òré ní quexìo-dé núu-güedé, te ní ngúita té Tértulú xáhaⁿ-dē xii té Juélí nàcuáa càa cuéchi tē-güedé té Páblú:

—Ío càhnu cada iní tātá gobernàdór. Duha nduu chiuⁿ ndéé iní ñáhá-ndí xii-n vèxi-ndí, núu nása cachí-n cùnduu. Táxáhu xii-n, chi ío váha ndècu nchaa ñáyiú,

te ña túu nàá-yu chi ío váha quide-n. ³ Te ío cùdíí iní-yu chi nchaa-ni nduu xíndecu váha-yu nchaá-yu, te ío táxáhu Ndióxí xii-n sá dúcáⁿ quide-n. ⁴ Te cada càhnu iní, cuiní-í ndatnúhu-o ìⁿ úu-ni cuendú cuendá sá vā cùyaa-o dacuíta-í chiuⁿ-n.

⁵ Te ìⁿ tée iha ío dàsatú iní ñáhá-dē, chi ndēni ní cuu cuáháⁿ-dé ndátnūhu-dé ndihi ñáyiú isràél dánaá-dé-yu. Te nēhé quidē-dē chi cuáháⁿ-dé dácáháⁿ-dé nchaa ñáyiú cuendá quíndáá iní-yu tnúhu tē ní xíndecu ñuú Nazàrét.

⁶ Chì ducaⁿ càháⁿ cue tē iha sá ñí sáháⁿ-dé veñúhu càhnu sá ío cùnuu, te cuiní-dé daquēe tihú-dē veñúhu cuendá cuiní-dé xocàni-dé sá ìí ndécú, núu xiáⁿ ní tñi ñaha-güedé ndécá ñaha-güedé cuáháⁿ núu cuē tē cùchiuⁿ cuendá cacáⁿ tnúhú-güedé núu-dē núu ná cuendá ducaⁿ cuiní-dé cada-dé, chi ducaⁿ càa leí ndécú ndihi-güedé sá cadá ndáá-güedé núu ná ìⁿ sá cúu. ⁷ Te té Lìsiú tē cùu capitáⁿ cùnùu-gá ní quexìo-dé ndihi sandàdú, te ní dácúnú-güedé nchaa cue tē nùtni ndihi té Páblú, te dātnúni ní tñi ñaha-güedé xii-dé ndécá ñaha-güedé cuáháⁿ. ⁸ Te sáta xiáⁿ, te ní xáhaⁿ-dē sá quíxí-güedé ndéé ndíha cundáá cuéchi-dé. Te yòhó cundee iní-n cacáⁿ tnúhú-n núu-dē, te núu ndáá ducaⁿ ñí quide-dé àdi ñáhá —
càchí té Tértulú xáhaⁿ-dē xii té Juélí tē cùu gobiernú.

⁹ Te dava-gá cue tē isràél xínutni xiáⁿ ñí cáháⁿ-güedé

sá ndáá càháⁿ té Těrtulú.
 10 Te té cùu gobiernú ní
 quide-dé ndaha-dé núú tě
 Păblú cuendá cáháⁿ-dé, te té
 Păblú ní xáhaⁿ-dě:

—Yòhó sa ní cuu titní cuía
 ndécú-n ìha xehndé-n cuèchi
 nchaa ñáyiú xĩnàá, núu xiáⁿ
 ío cùdíí ìní-í sá ndìha téhndé
 cuèchi tèe ñaha-güedé xii-í.
 Te cundee ìní-n cùndedóho-n
 na càni-í cuèndú nàcuáa ní
 cuu. 11 Te nducu tnúhu-n te
 quini-n nă càháⁿ ndáá-í, chi
 sa ní cuu úxúú nduu sá ñĩ
 sáháⁿ-í veñúhu càhnu sá ìo
 cùnnu ñúú Jerusálén ní cáháⁿ
 ndihí-í Yă Ndiöxí. 12 Te ni ñà
 túú ní nàá-í ndihí ñáyiú xití
 veñúhu, te ñá túú ní xáhaⁿ-í
 nàá-yu ni ìⁿ xichi, te ni ìⁿ
 veñúhu líhli ní sáháⁿ-í ñá
 túú nă ní xáhaⁿ-í cada-yu.
 13 Te ni ñà túú quèñuhu-güedé
 cue tée cáháⁿ ndáá te núu
 ndáá ducaⁿ ñĩ quide-í. 14 Te
 yúhú càháⁿ ndáá-í sá càháⁿ
 ndihí-í Yă Ndiöxí, chi ñi-ni
 Yă Ndiöxí ní xóo cáháⁿ ndihí
 ñáyiú ndéé sanaha, núu xiáⁿ
 ní tuha-í ichi-gá. Te cue
 tée-a càchí-güedé sá ñà díú
 ìⁿ ichi váha ni tuha-í. Te
 yúhú sàndáá ìní-í nchaa sá
 ñĩ chídó tnùní ndíi Moisés
 ndihí dava-gá cue tée ní
 xóo cáháⁿ tnúhu Yă Ndiöxí
 ndéé sanaha. 15 Te sàndáá
 tucu ìní-í sá ndótó nchàa
 ñáyiú ní xihí, cuèi ñáyiú váha
 ìní-xi, te cuèi ñáyiú úhú ìní-xi,
 dico ndotó-yu. Te ducaⁿ
 ñĩ xóo quindáá ìní nchaa
 ñáyiú ní xĩndecu ndéé sanaha.
 16 Te yúhú ío ndücu ndee-í
 quidè-í nchaa sá càháⁿ Yă
 Ndiöxí cuendá sá vă cúú càhaⁿ
 núú-í núú-gă ndihí núú ñáyiú

ñuyíú-a.

17 Te sa ní cuu titní cuía
 sá ñà túú-gă sáháⁿ-í ñúú
 Jerusálén, te ní sáháⁿ tucu-í
 nehè-í díhúⁿ ñĩ taxi ñáyiú
 ñúú xicá cuendá cuañaha-í
 xii ñáyiú ñúú Jerusálén. Te
 ní ndúcú-í sá cuàha táhú-í
 Yă Ndiöxí. 18 Te ní xĩndecu-í
 veñúhu càhnu sá ìo cùnnu ní
 quide-í nchaa nàcuáa ní xóo
 cada ñáyiú ní xĩndecu ndéé
 sanaha cuendá nduu vétú
 ìní Yă Ndiöxí. Te ñá túú
 chitú-yu ni sáháⁿ, te ni ñà
 túú nă ní cùu, te ní naníhí
 ñáhá ìⁿ úú cue tée isràél
 xii-í, cue tée véxi distritú
 Àsiá. 19 Te quixi mee-güedé
 iha cáháⁿ-güedé, te núu sá
 ndáá ní xini-güedé sá yúhú
 ndècuèchi-í ní cùu, 20 àdi ñáhá.
 Dico cachí tnúhu cue tée-áⁿ
 năsa ní cuu òré ní xĩndecu-í
 jundá-güedé núu ndècuèchi-í
 àdi ñá túú ndècuèchi-í. 21 Dico
 ñá túú cuèchi-í chi ìⁿ dñi-ni
 tnúhu ni cáháⁿ-í ní xáhaⁿ-í
 xii-güedé sá sàndáá ìní-í sá
 ndótó nchàa ñáyiú ní xihí, te
 ñi-ni núu xiáⁿ càchí-güedé sá
 ndècuèchi-í —càchí té Păblú
 xáhaⁿ-dě xii té Juélí.

22 Te té Juélí sa xini váha-dé
 nàcuáa cuáháⁿ tnúhu Jèsús,
 núu xiáⁿ ñá ní cùnín-gá-dé
 ndatnúhu-dé ndihí té Păblú, te
 ní xáhaⁿ-dě:

—Sa ní cuu, cundetu-n
 na quèxio té Lìsiú tée cùu
 capitáⁿ cùnù-gá, te òré-áⁿ
 cundáá cuendá-n —càchí té
 Juélí xáhaⁿ-dě.

23 Te ní xáhaⁿ-dě xii tée cùu
 capitáⁿ:

—Cundee-n tě Păblú-ăⁿ, te
 núu năsa càchí-dé cada-n, te
 dañ-a-n na càháⁿ ndihí-dé cue
 tée xini tnáhá ndihí-dé núu

25

cuañaha-güedě nchaa sá xíní ñuhu-dé àdi nása cada-güedé —càchí té Juělí xāhaⁿ-dě xii tée cùu capitáⁿ.

24 Te ní cuu tĩtní nduu, te ní sáháⁿ té Juělí vechiūⁿ ndihí ñadihí-dé, te ñaha-áⁿ nání-áⁿ Drüsílá, te ñaha isràél cúú-áⁿ. Te ní xāhaⁿ-dě sá quĩngueñuhu-güedé té Pāblú, te òré ní quexiò-dé vechiūⁿ, te ní cáháⁿ-dé núŷ-yu nchaá-yu sá quĩndáá iní-yu tnúhu Xítohó Jesucristú. 25 Te ní xāhaⁿ-dè:

—Mee-ni sǎ vāha cada-ndo. Te coto-ndo mēe-ndo, te vǎ cádá-ndó nì ĩⁿ sǎ cuèhé sǎ dúhá, chí ĩⁿ nduu cáháⁿ Yǎ Ndiǒxí ndédacǎa ñáyiū vǎha iní-xi, te ndédacǎa ñáyiū úhú iní-xi —càchí té Pāblú xāhaⁿ-dè.

Te sǎ dúcǎⁿ nǐ xāhaⁿ-dè, te ní yùhú té Juělí, te ní xāhaⁿ-dè:

—Vǎ càháⁿ-gǎ-ó tnàví, cuaháⁿ, te òré cùyǎchí-í, te cana ñaha-í xii-n —càchí-dé xāhaⁿ-dè.

26 Te té Juělí ní quide-dé cuendǎ sǎ cuañaha tē Pāblú díhúⁿ te vǎ ndĩhu-gǎ-dé vecaá ní cùu, núu xǐǎⁿ tĩtní xito ní cana-dé té Pāblú vechiūⁿ ní ndatnúhu ndihí tnàha-güedé, dico ñǎ túú ní chǎhu-dé. 27 Te úú cuíá ducaⁿ nǐ quide-güedé, te dǎtnùní ní xínu té Juělí chiūⁿ-dé, te ní ngúnutnǐi té Pòrsiú Fèstú. Te òré ní xínu té Juělí chiūⁿ-dé, te ní dándǒo-dé té Pāblú yíhí-ni-dè vecaá. Te ducaⁿ nǐ quide-dé cuendǎ ní cuiní-dé cudũ-dé núú cuè tée isràél.

Té Pāblú càháⁿ ndihí-dé té Fèstú

1 Te ní cuu úní nduu sǎ nǐ quexiò té Fèstú ñuú Cèsareá ní queheⁿ-dé chiūⁿ, te ní quee-dé cuaháⁿ-dé ñuú Jerusalén. 2 Te yàcǎⁿ ní naníhí tnáhá-dè ndihí nchaa dútú cúnũu ndihí nchaa cue tée tàxi tnuní ñáhá xii ñáyiū isràél, te xāhaⁿ-güedé xii té Fèstú sǎ ndǎá ndècuèchi té Pāblú. 3 Te ní cáháⁿ ndàhú-güedé núú-dé sǎ téndàha-dé sandàdú-dé quĩngueñuhu ñaha-güedé vecaá xii-dé ndéé ñuú Cèsareá te candeca ñaha-güedé quíhíⁿ. Te ducaⁿ nǐ cáháⁿ-güedé, chí ní ndatnúhu-güedé sǎ cáhní ñaha-güedé xii té Pāblú ichi ni cùu. 4 Te té Fèstú ní xāhaⁿ-dè:

—Vǎ cúú quixi-dé ndéé ndíha. Na cùndetu-dé ñuú Cèsareá chí sacú-ni nduu cuyaa-í iha te dǎtnùní núhú-í yàcǎⁿ. 5 Te yáchí-gǎ quíhíⁿ ndihí-í cue tée cùnũu-gǎ, te yàcǎⁿ cuu cáháⁿ-ndó nũu ndǎá ndècuèchi-dé àdi cáháⁿ méé-dè nũu ndǎá ndècuèchi-dé àdi ñáhá, te cutnùní iní-ndó —càchí-dé xāhaⁿ-dè.

6 Te ní xíndecu té Fèstú úná úxí nduu ñuú Jerusalén, te dǎtnùní cuánuhú-dé ñuú Cèsareá. Te nduu tnèé cuaháⁿ-dé vechiūⁿ, te òré ní quexiò-dé, te ní xāhaⁿ-dè xii cue sandàdú xínú cuèchi sǎ quíhíⁿ-güedé queñuhu-güedé té Pāblú vecaá te candeca ñaha-güedé quíhíⁿ vechiūⁿ. 7 Te òré ní quexiò té Pāblú vechiūⁿ, te sa ndècu cue tée isràél cue tée ní quee ñuú Jerusalén, te

cuánguihu-güedé ndéé dñi té Páblú ní ngúnutnii-güedé, te xáhaⁿ-güedé xii cue tée cùchiuⁿ sá ndècuéchi vihi-dé, dico ñá túú ní cùndee tnúhu-güedé.
 8 Te té Páblú ní xáhaⁿ-dè xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnàhá iní-í cada-í ìⁿ sá càchí lèi sá vã cúú càda-o. Te ni xiti veñúhu càhnu sá ïo cùnuu ñá túú nã quide-í, te ni té Cèsár tée yìndaha cuéhé nacióⁿ ñá túú càháⁿ cuéhé-í cuendá-dé —càchí té Páblú xáhaⁿ-dè xii-dé.

9 Te té Fèstú ní cuini-dé cada-dé nàcuáa cudíu-dé núú cuè tée isràél ní cùu, núu xiáⁿ ní xáhaⁿ-dè xii té Páblú:

—¿Cundee iní-n quíhíⁿ-n ñúú Jerusalén-ãⁿ? Te yacáⁿ cundáá cuéchi sá sáa díquí-n —càchí té Fèstú xáhaⁿ-dè xii té Páblú.

10 Te xáhaⁿ tẽ Páblú:

—Díu-ni ìⁿ vechiúⁿ tée cùchiuⁿ Cèsár ndécù-í iha, te díu-ni iha cada ndáá-n núu cuini-n ní cùu. ¿Te ná cuendá candeca ñaha-n quíhíⁿ ingá xichi? Yòhó tnàhá-n xini-n sá ñá túú nã quide-í ñáyi isràél. 11 Chi núu dicó yuhú ní quide-í ìⁿ cuéchi càhnu, te ñá túú nã cada-xi cuèi na càhni ñaha-ndo xii-í ní cùu. Te sa ní cutnùní iní-n sá ñá ndáá, chi mee-ni tnúhu ndehnde xicáháⁿ-güedé, te ñá túú ndùu váha-xi ducaⁿ càda-n cúñaha-n sá quíhíⁿ-í ndihi-güedé ingá xichi. Te xiáⁿ cuini-í quíhíⁿ-í núú tẽ Cèsár tée yìndaha cuéhé nacióⁿ, te yacáⁿ càháⁿ méé-dè núu ndáá

ndècuéchi-í —càchí té Páblú xáhaⁿ-dè xii té Fèstú.

12 Te ní ndatnúhu té Fèstú ndihi cue tée chìndee tnúhu ñaha xii-dé, te dàtnùní ní xáhaⁿ-dè xii té Páblú:

—Te sa ní càháⁿ-n sá quíhíⁿ-n quítnahá-n tẽ Cèsár te díu-ni quíhíⁿ-n, te quiní-n nãsa càháⁿ tée-ãⁿ yacáⁿ —càchí-dé xáhaⁿ-dè xii té Páblú.

Té Páblú càháⁿ ndihi-dé té Àgripá tée yìndaha nacióⁿ Isràél

13 Te sátá nĩ cuu cuéhé nduu, te ní quee té Àgripá tée yìndaha nacióⁿ Isràél cuáháⁿ-dé ñúú Cèsareá ndihi ñadihí-dé, te ñaha-áⁿ nání-áⁿ Berènicé te òré ní quexiò-yu, te ní càháⁿ ndihí-yu té Fèstú.

14 Te sátá nĩ cuu titní nduu, te ní càháⁿ té Fèstú cuendá té Páblú ní xii-dé té Àgripá:

—Ndècu ìⁿ tée ní dándõo té Juéí vecaá nání-dé Páblú.

15 Te cútnahá ní sáháⁿ-í ñúú Jerusalén ní nanítnáhá-í ndihi cue dútú cùnùu ndihi cue tée cùu sacuéhé núú ñáyi isràél.

Te ní dácáá díquí-güedé té Páblú cuéchi, te ní cachí-güedé sá táuchíuⁿ-í cahni ñaha-güedé xii-dé ní cùu. 16 Te ní xáhaⁿ-í xii-güedé sá vã cúú, chi ñá túú dùcaⁿ quide nchúhú cue tée rómá cùtexínu cada castiú-ndí ñáyi, chi díhna-gá ndúcú tnúhu-ndí núú ñáyi sáa cuéchi díquí-xi cuendá quiní-ndí núu nása càháⁿ méé-yu ndihi ñáyi sàcáⁿ cuéchi cuendá-yu, te òré-áⁿ cùtnùní iní-ndí núu ndáá ndècuéchi-yu àdi ñáhá, te ducaⁿ te nihí-ndí nàcuáa quide

ndáá-ndí cuendá-yu, duha ní xáhaⁿ-ĩ xii-güedé —càchí té Fèstú xáhaⁿ-dë xii té Àgripá.

17 Te ní xáhaⁿ tùcu té Fèstú:

—Te sátá nĩ quexìo-güedé ndéé ndíha, te nduu tnéé ní sáháⁿ-ni-ndí vechiùⁿ. Te ní xáhaⁿ-ĩ sá quingueñuhu-güedé té Páblú candeca ñaha-güedé quixi, te òré ní quexìo-dé, 18 te ní ngüíta-güedé xáhaⁿ-güedé sá ndècuéchi-dé. Te ní sani iní-í sá ìⁿ cuéchi càhnu tee ñaha-güedé dico ñáhá, chi dìcò-ni sá ìⁿ tnùhu ní cáháⁿ-dé, xiáⁿ ducaⁿ nĩ quide-güedé. 19 Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuendá ndiöxí-güedé. Te tnàhá-ni cuendá ìⁿ tée nàni Jesús càháⁿ-dé, chi càchí-dé sá nĩ xihí tée-áⁿ te ní ndoto-dé càchí-dé xáhaⁿ-dë xii-güedé, càchí-güedé. 20 Te ñá ní cùtnuní iní-í nása cùñaha-ĩ xii-güedé cuendá téhndé cuéchi-dé. Te xiáⁿ ní xicáⁿ tnùhu-í núú tē Páblú nùu cundee iní-dé quihíⁿ-dé ñuú Jerusalén, te ndéé ndiácáⁿ cada ndáá-ndí cuendá-dé, te núu ndáá ndècuéchi-dé nàcuáa càháⁿ-güedé àdi ñáhá ní cùu. 21 Te dàtnuní té Páblú ní cachí-dé sá cündècu tnaa-dé vecaá te dàtnuní quihíⁿ-dé núú tē Cèsár, te tée-áⁿ cada ndáá-dé cuendá-dé. Te cuendá sá dúcáⁿ ní cáháⁿ té Páblú, xiáⁿ nùu ní xáhaⁿ-ĩ sá cündèé ñáhá cuè sandadú xii-dé, nini na còto-í nása cada-í quihíⁿ-dé núú tē Cèsár, duha ní xáhaⁿ-ĩ xii-güedé —càchí té Fèstú xáhaⁿ-dë xii té Àgripá.

22 Te té Àgripá ní xáhaⁿ-dë xii té Fèstú:

—Te tnàhá yúhú ío cudíí iní-í cundedóho-í tnùhu càháⁿ-dé —càchí-dé xáhaⁿ-dë.

Te ní xáhaⁿ tē Fèstú:

—Tneé cana-í-dé te cund-edóho-n nása cáháⁿ-dé —càchí-dé xáhaⁿ-dë.

23 Te nduu tnéé ní quexìo té Àgripá ndihí ñadìhí-dé tá Berènicé vechiùⁿ, te ío ní quide càhnu ñaha-güedé xií-yu. Te cuánguìhú-yu vechiùⁿ ndihí cue tée cùu capitáⁿ cùnùu-gá ndihí cue tée cùnuu ñuú Cèsareá. Te té Fèstú ní xáhaⁿ-dë sá quingueñuhu-güedé té Páblú vecaá, te òré ní quexìo-dé, 24 te ní xáhaⁿ tē Fèstú xii té Àgripá ndihí nchaa ñáyiu xĩndecu-áⁿ:

—Chí cündèhe tée iha chi tée-a càchí cue tée is-ràèl sá ndècuéchi-dé, te cùtnàhá ní xĩndecu-í ñuú Jerusalén ní cachí-güedé sá ndáá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchìuⁿ-í cahni ñaha-güedé xii-dé ní cùu. 25 Te sátá nĩ ndihí cuendú ní cáháⁿ-güedé, te ní cutnùní iní-í sá ñà túú nĩ ìⁿ cuéchi càhnu ní quide-dé, núu ñá túú ní tàuchiùⁿ-í cahni ñaha-güedé xii-dé. Te mee-dé ní cachí-dé sá quihíⁿ-dé núú tē Cèsár tée yìndaha cuéhé nàcióⁿ, te ní xáhaⁿ-ĩ sá cùu quihíⁿ-dé. 26 Te ñá túú ní xini váha-í nása ní quide-dé, núu xiáⁿ ñá ní nihí-í nàcuáa cadúha-í tutú quihíⁿ ndaha té Cèsár, te xiáⁿ ní cana-í-dé véxi-dé iha cuendá nchaa-ndo

cáháⁿ ndihi-ndo-dě. Te ducaⁿ cānuu cadíhna-gá yòhó tātá Àgripá cácaⁿ tnúhú-n nūú-dě nūu nása cáháⁿ-dé, te òré-án cutnùní iní-í nása cada-í cadúha-í tutú quíhíⁿ ndaha té Cèsár. ²⁷ Chi sàni iní-í sá ñà túú ndùu váha-xi sá quíhíⁿ ìⁿ tée tàú cuéchi te nūu vá códó tnùní nūú ìⁿ tutú nācuáa càa cuéchi tàú-dé —càchí té Fèstú xáhaⁿ-dě xii-güedé.

26

Te Pāblú càháⁿ ndihi-dé té Àgripá

¹ Te dātnùní ní xáhaⁿ tē Àgripá tée yìndaha nacióⁿ Isràèl xii té Pāblú:

—Te vitna cáháⁿ-n nūu nása ní cuu cuèndá-n —càchí-dé xáhaⁿ-dě.

Te té Pāblú ní nda-cani-dé ndaha-dé sá cùndèdóho-güedé, te ní xáhaⁿ-dě xii té Àgripá tée yìndaha nacióⁿ Isràèl:

²⁻³ —Tātá Àgripá, ío cùdíí iní-í sá nī naníhí tnáhá-ó vitna, chi yòhó ío váha xìní-n nchàa nacuáa quide ñáyiú isràèl quidé càhnú-yu Yá Ndiòxí, te ío váha xìní-n nchàa tnúhu xitnàhá-yu. Te vitna cundee iní-n cùndedóho-n ìⁿ úú tnúhu na càháⁿ-í. Na càchí tnúhu-í sá ñă ndáá ní quide-í nchaa sá càháⁿ cue tée isràèl.

Té Pāblú càháⁿ-dé nācuáa ní quide-dé cùtnàhá vátá túhá-gá-dé ichi Yá Ndiòxí

⁴ Te sa nàha nchaa cue tée cūnuu nūú ñáyiú isràèl nācuáa ní quide-í ñuú-í ndihi ñuú Jerusálén cùtnàhá ní cuu landú-í. ⁵ Te mee-güedé nàhá-güedé sá

ndèé līhli-í ní chitnahá-í cue tée cūu fariséú. Te nūu cuini-güedé cáháⁿ-güedé sá tēe fariséú cūu-í àdi ñáhá dico nchaa-güedé sa nàha-güedé sá cuè tēe-án nī chitnahá-í. Te cue tēe cūu fariséú-án ío cuini-güedé cada-güedé nchaa nācuáa nchícúⁿ nihnu ñáyiú quidé-yu. Te yúhú nchaa sá nchícúⁿ nihnú-yu quidé-yu-án nī quide-í. ⁶ Te vitna ndècu-í iha, te cáháⁿ-n nūu váha-ni quide-í àdi ñáhá, chi cue tēe-án tēe ñàha-güedé cuéchi xii-í cuèndá sá sàndáá iní-í sá ndótó nchàa ñáyiú ní xíhí. Te ñu-ni ducaⁿ nī xáhaⁿ Yá Ndiòxí xii nchaa ñaní tnáhá-ó nī xindecu ndéé sanaha. ⁷ Te nchaa ñáyiú-án xīndetú-yu nduu ndòto ñáyiú ní xíhí ní cūu. Te ñu-ni ducaⁿ ndètu nchaa ñaní tnáhá-ó ndècu ñuyíú-a ndéé vitna, te xíáⁿ nūu cuèi nduu cuèi niú càháⁿ ndihi-yu Yá Ndiòxí. Te sá sàndáá iní-í nūu xíáⁿ ní cáháⁿ-í, te tēe ñaha cue tēe isràèl cuéchi xii-í. ⁸ ¿Te ná cuèndá nchòhó cue tēe isràèl ñá túú cuini-ndó quèndáá iní-ndó sá dāndòto Yá Ndiòxí nchaa ñáyiú ní xíhí? —càchí té Pāblú xáhaⁿ-dě.

Té Pāblú cāni-dé cuèndú sá nī xóo chihí-dé ñáyiú sàndáá iní tnúhu Jèsús vecaá

⁹ Te ní xáhaⁿ tùcu té Pāblú:

—Ndéé dàvá-án nī quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní càháⁿ-í sá vāha-ni ní quide-í sá dúcáⁿ nī quide-í. ¹⁰ Te ñu-ni ducaⁿ nī quide-í ñuú Jerusálén. Te cue dútú cūnuu ní taxi-güedé ìⁿ tutú cuèndá tñi-í ñáyiú

ní sándáá iní tnúhu Jèsús, te vai-yu ní chihí-í vecaá. Te òré ní cáháⁿ-güedé sá cáhni-güedé ñáyiú-áⁿ, te tnàhá-í ní cáháⁿ-í sá cúú càhni ñaha-güedé xii-yu. ¹¹ Te titní xito ní sáháⁿ-í nchaa veñúhu ñáyiú isràél, te ní cani-í-yu te ní xáhaⁿ-í sá dáñã-yu ichi Jèsús. Te cuendá ío ní cudéèⁿ-í núú-yu, xiáⁿ ní sáháⁿ-í nchaa ñúú xicá ñí sánúndúcù-í dava-gá ñáyiú sándáá iní tnúhu-gá cuendá dandòho ñaha-güedé xii-yu.

Té Páblú càháⁿ tucu-dé nása ní cuu ní tuha-dé ichi Yá Ndiöxí (Hch. 9:1-19; 22:6-16)

¹² Te cuendá xiáⁿ ní xica tucu-í cuáháⁿ-í ñúú Dàmascú, néhè-í tutú ní taxi cue dútú cúnúu cuáháⁿ, cuendá sá ndácù-í tñí-í nchaa ñáyiú sándáá iní tnúhu Jèsús ní cùu. ¹³ Te òré caúxúú nduu ñùhu-í ichi cuáháⁿ-í, te uuⁿni ní quee ñuhú andiú ñí dáyèhé-xi ndéé núú nútñí-í ndihí cue téé ndéca tnaha ndihí-í, te níhi-gá ní dáyèhé-xi dàcúúxí nchicanhii. ¹⁴ Te nchaa-ndí ní nduá-ndí ndéé ñuhu, te ní tecú dóho-í càháⁿ ìⁿ sá càháⁿ tnúhu ñáyiú isràél, te càhí-xi: “Yòhó Sàulú, ¿Ná cuendá cúú ùhú iní ñáhá-n xii-í dándòho ñaha-n? Te ío dándòho-n mee-n, chi dàtná cuini-n quide ndicutu quide-n chi quití-áⁿ òré cùxi-güedé-di pùyá te sáha-di patadá núú-xi, te sá dúcáⁿ quide-di te quide úhú-di mee-di. Te ñucaⁿ sátnahá-xi cùu yohó chi ñá túú sándáá iní ñáhá-n xii-í”, càhí sá ñí cáháⁿ-áⁿ. ¹⁵ Te ní xáhaⁿ-í: “¿Ná cúú yòhó sá ñí cáháⁿ-áⁿ?”, xáhaⁿ-í. Te

càhí sá càháⁿ-áⁿ: “Yúhú cúú-í Jèsús Yaá cúú ùhú iní-n”, duha ní cachí sá càháⁿ-áⁿ. Te xiáⁿ ní cutnùni iní-í sá Jèsús càháⁿ. ¹⁶ Te ní cachí-gá: “Ndacuíñí-n chi yúhú càháⁿ-í chi cuini-í quihíⁿ-n càda-n chiuⁿ-í, chi quihíⁿ-n càháⁿ-n núú ñáyiú nàcuáa ní cuu ní xiní ñáhá-n xii-í vitna, te quixi tucu-í cáháⁿ ndihí ñaha-í xii-n, te cùñaha-n xii-yu nàcuáa cáháⁿ-í. ¹⁷ Chi cuini-í quihíⁿ-n càháⁿ-n tnúhu-í núú ñáyiú isràél ndihí núú ñáyiú ñá túú cùu ñáyiú isràél, te coto ñaha-í xii-n cuendá vá cáhni ñàhá-yu xii-n. ¹⁸ Te cuini-í quihíⁿ-n cùñaha-n xii-yu sá dáñã-yu nchaa ichi cuèhé ichi duha ndécú-yu, te tuhá-yu ichi váha cuendá vá quindáá iní-yu cadá-yu sá càháⁿ yucu ñávãha, te quindáá iní-yu cadá-yu nchaa nàcuáa càháⁿ Yá Ndiöxí. Te núu na quindáá iní-yu tnúhu càháⁿ-í, te cada càhnu iní-í nchaa cuéchi-yu, te naníhí tàhú-yu ndihí dava-gá ñáyiú sa ní xocuíñí nchaa sá cuèhé sá dúhá ñí xindecu iní-yu”, duha ní cachí-gá xii-í —càhí té Páblú xáhaⁿ-dè xii té Ágripá téé yindaha nacióⁿ Isràél.

Té Páblú quidé-dé nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tucu té Páblú xii té Ágripá:

—Ñá túú dàña ndeé-í quidè-í nchaa nàcuáa ní cáháⁿ Jèsús òré ní cáháⁿ-gá andiú. ²⁰ Te díhna-gá ñáyiú ñúú Dàmascú ní cáháⁿ-í tnúhu-gá núú-yu, te ní xáhaⁿ-í xii-yu

sá dáñã-yu nchaa sá cuèhè sá dúhá quidé-yu, te cáháⁿ ndihí-yu Yá Ndiöxí, te cadá-yu mee-ni sã vãha cuëndá cutnùní iní dava-gá-yu sá ní dáñã-yu nchaa sá ñà túú vãha ní xóo cadá-yu. Te ducaⁿ-ni ní xáhaⁿ-í xii ñáyiu ñúú Jerusàlén ndihí ñáyiu ñihí nacióⁿ Isràél ndihí nchaa ñáyiu ñá túú cùu ñáyiu isràél. ²¹ Te cuëndá sá dúcáⁿ ñí cáháⁿ-í nõu ní tñi ñaha cuè téé isràél xii-í cútñhá ní sáháⁿ-í veñúhu càhnu sá ïo cùnuu cahni ñaha-güedé ní cùu. ²² Te ñiu-ni mee Yá Ndiöxí ní chindee ñaha-gá xii-í nõu ndècu-í iha tñaví cáháⁿ-í tñúhu-gá, te mee-ni tñúhu-gá cáháⁿ ndihí-í ncháá-yu, cuèi ñáyiu cuica, te cuèi ñáyiu ndáhú. Te ndíi Moisés ndihí dava-gá cue téé ní xóo cáháⁿ tñúhu Yá Ndiöxí ndéé sanaha ní cáháⁿ-güedé nàcuáa cada-xi vitna, te ñiu-ni ducaⁿ cáháⁿ-í nchaa-ni nduu. ²³ Te cue téé-áⁿ ní cachí-güedé sá Cristú Yaá tendaha Yá Ndiöxí quixi ñuyíú-a ndoho tñahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiu ní xihí ndotó-yu nõu na sàá nduu chi ducaⁿ càda-xi ní cachí méé Yá Ndiöxí. Te cuëndá sá dúcáⁿ ñí ndoto-gá, xááⁿ cútñùní sá cúu nàñihí tàhú ñáyiu, cuèi ñáyiu isràél, te cuèi ñáyiu ñá túú cùu ñáyiu isràél. Te dàtná-ni ndùu tñúhu ní cáháⁿ cue téé ní xóo cáháⁿ tñúhu-gá ndéé sanaha-áⁿ, te ñiu-ni ducaⁿ cáháⁿ yúhú tucu —cachí té Páblú xáhaⁿ-dè.

Té Páblú xáhaⁿ-dè xii té Àgripá sá quindáá iní-dé tñúhu Jèsús

²⁴ Te sá dúcáⁿ ñí cáháⁿ té Páblú, te ní cáháⁿ níhi té Fèstú, te xáhaⁿ-dè:

—Páblú, ñío lúcú càháⁿ-n! Cuëndá ïo vài ní dácuáhá-n, nõu xááⁿ ndadá lúcú ñáhá-xi xii-n —cachí-dé xáhaⁿ-dè.

²⁵ Te ní xáhaⁿ tè Páblú:

—Ñáhá, vá dúcáⁿ cáháⁿ-n chi ñá díú sã lúcú-í duha càháⁿ-í, chi tñúhu ndáá càháⁿ-í. ²⁶ Te té Àgripá-a sa ñaha-dé ndihí nchaa ñáyiu isràél nàcuáa ní cuu, chi sa ní níhi-dé tñúhu ndihí dava-gá-yu nàcuáa ní cáháⁿ-í, nõu xááⁿ cúyí-í cáháⁿ ndihí-í-dé —cachí-dé xáhaⁿ-dè xii té Fèstú.

²⁷ Te ní xáhaⁿ-dè xii té Àgripá:

—Yúhú sa xini-í sá sàndáá iní-n tñúhu ní chidó tñùní cue téé ní xóo cáháⁿ tñúhu Yá Ndiöxí ndéé sanaha —cachí-dé xáhaⁿ-dè.

²⁸ Te ní xáhaⁿ tè Àgripá:

—¿Quide-n cuendá sá ñí nõu tñúhu ní cáháⁿ-n te quindáá iní-í tñúhu Jèsús cáháⁿ-n-áⁿ? —cachí-dé xáhaⁿ-dè.

²⁹ Te ní xáhaⁿ tucu té Páblú:

—Cuèi vitna te cuèi ndéé cuèé-gá dico cuini-í sá dàcutíí sã quindáá iní-n tñúhu Jèsús. Te ñiu-ni ducaⁿ xicáⁿ táhù-í nõu Yá Ndiöxí sá ncháá ñáyiu ndècu ndihí-o iha quindáá iní-yu tñúhu-gá dàtná cuini-n ñí quide yúhú, ducaⁿ càda-yu. Dico-ni sá nõu vá quihíⁿ-ni-yu vecáá dàtná cuini-n ndòho yúhú —cachí-dé xáhaⁿ-dè xii té Àgripá.

³⁰ Te sátá dúcáⁿ ñí cáháⁿ-dè, te ní ngúnutñi té Àgripá téé yíndaha nacióⁿ Isràél,

ndihi té Fèstú tée cùu go-
biernú, ndihi tá Berènicé
ndihi dava-gá ñáyu xñucóo
yatni. ³¹ Te ní tnahá-yu ndèca
tnahá-yu cuáháⁿ ìⁿ xio. Te ní
xítñahá-yu:

—Tée-ãⁿ ñá túú nã
cuéchi ni quide-dé nũu
chihî ñaha-güedé vecaá àdi
cahni ñaha-güedé —càchí-yu
xítñahá-yu.

³² Te té Àgripá ní xáhaⁿ-dè
xii té Fèstú:

—Cuéchi mee-dé chi ní
cachí-dé sá quítñahá-dé té
Cèsár, xiãⁿ nũu ndíhu tucu-dé
vecaá, te núu ñá túú dùcaⁿ ni
cáháⁿ-dé, te cácu-dé ní cùu —
cachí-dé xáhaⁿ-dè xii té Fèstú.

27

*Té Páblú cuáháⁿ-dé ñuú
Ròmá*

¹⁻² Te ní ndatnúhu-güedé
sá quíhíⁿ té Páblú ndihî
bàrcú nacióⁿ Italiá, te tnàhá
yúhú quíhíⁿ-í ndihî-dé. Te
tnàhá ìⁿ tée nàni Aristarcú
cuíní-dé quíhíⁿ ndihî-ndí-dé,
te cùu-dé tée ñuú Tesalónica,
te ñuú-áⁿ yíndèhu-xi dis-
tritú Macèdoniá. Te ní
sáha cuendá-güedé té Páblú
ndihî ìⁿ úú-gá cue tée xixíhî
vecaá ní queheⁿ cuendá
ñáhá tẽ Jülüú tée cùu capitáⁿ,
tée yíndaha nchaa san-
dadú nání Augustú, te ní
queé-ndí nchaa-ndí bàrcú
ñuú Adràmitiú. Te ní xica
bàrcú-áⁿ cuáháⁿ-ndí ndihî-xi
te cuíta yáha-ndí ìⁿ úú ñuú
yíndèhu distritú Àsiá quíhíⁿ.

³ Te nduu tnéé ní quexìo-ndí
ñuú Sidón. Te ío váha ní guide

té Jülüú, chi ní dáñá-dè ní
quene té Páblú ní sáháⁿ-dè
ní cáháⁿ ndihî-dé cue tée ío
váha tnàhá tnúhu ndihî-dé
nũu cudana cundáhú iní
ñáhá-güedé cuáñaha-güedé
nchaa sá xíní ñũhu-dé. ⁴ Te
dãtnùní ní ndéé tucu-dé bàrcú
cuáháⁿ-ndí. Te ío níhî táchí
te ñá ní dàña-xi caca ndáá
bàrcú, te ní sáháⁿ bàrcú ndéé
yatni yuhu distritú Chìpré,
te distritú-áⁿ cáá cuádava
xití lámár, te xiáⁿ ñà túú
cuéhé táchí ni yáha-ndí. ⁵ Te
ta yáha-ndí cuáháⁿ, te ní
yáha-ndí ìⁿ xio yuhu distritú
Ciliciá ndihî yuhu distritú
Pànfilia, te ní sáá-ndí ndéé
ñuú Mírá ìⁿ ñuú yíndèhu
distritú Liciá.

⁶ Te ní quene tée cùu
capitáⁿ cuándúcú-dé ingá
bàrcú, te ní níhî-dè ìⁿ
bàrcú tée ñuú Alejándriá,
ñúhú ìchi-xi quíhíⁿ-xi nacióⁿ
Italiá. Te ní ndicuaca
ñaha-dè xii-ndí cuáháⁿ-ndí
ní queé-ndí bàrcú-áⁿ, te ní
xica-xi cuáháⁿ-xi. ⁷ Te ío
cuéé cuáháⁿ bàrcú-áⁿ, cuéhé
nduu ní xúhuⁿ-xi ichi, te
yica-ni ní quexìo-ndí yuhu
ñuú Nidú, te ñá ní dàña-gá
táchí quíhíⁿ ndáá bàrcú nũu ní
xícó ndúú-xi. Te ní yáha-ndí
ìⁿ xio yuhu distritú Crètá núú
ñà túú quène vihi táchí, te
diu-ni cuádava tucu lámár cáá
distritú-áⁿ. Te ní yáha-ndí
yuhu ñuú Salmón, te diu-ni
Crètá yíndaha-xi ñuú-áⁿ.

⁸ Te ní yáha-ndí cuáháⁿ-ndí
mee-nã núú ràyá distritú
Crètá, te ío ní ndoho-ndí ní
sáá-ndí ìⁿ xichi núú nání

Puèrtú Váha, yatni vií-ni-gá ñúú Làseá.

⁹ Te ní cuyaa vîhi-ndí ichi, ducaⁿ-ni cùu-ndí ní tnahá yóó cúúⁿ dǎú táchí, te ío úhú yáha bàrcú ñúu na quíhíⁿ-ni-xi. ¹⁰ Te ní xáhaⁿ tē Pǎblú xii-güedé:

—Nchaa-ndo cùndedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndíhi barcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chí cáhá-ó ñúu na ngàuniñnu-o xití ndute —càchí-dé xáhaⁿ-dē xii-güedé.

¹¹ Te tée cùu capitáⁿ ñá ní sàndáá iní-dé tnúhu ní cáháⁿ tē Pǎblú. Dico tnúhu ní cáháⁿ tée dàcaca barcú ndíhi xítòhó-xi chí ní sàndáá iní-dé. ¹² Te ñá ní tnahá iní-güedé Puèrtú Váha cuèndá sá ñí tnahá yóó cúúⁿ dǎú táchí, te ñá túú dǎhu váha táchí xíáⁿ, núu vâi-güedé ní cuini-güedé yáha-güedé quíhíⁿ-güedé sáá-güedé ndéé ñúú Fènicé ní cùu. Te yàcáⁿ cundecu-güedé yóó cúúⁿ dǎú táchí cuéi ñá túú càváha vîhi, chí nchíi nàcuáa yáha bàrcú, te yàcáⁿ quíhu táchí, dico dǎhu-gá. Núu xíáⁿ ndéé ndíácăⁿ nâtàcá bàrcú yóó cúúⁿ dǎú táchí, te diu-ni Crètá yíndàha-xi ñúú-áⁿ.

Nitùhú làmár cúúⁿ dǎú táchí

¹³ Te duha ní quene nuu luha táchí, xíáⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètníi ndéé bàrcú, te ní xica-xi cuáháⁿ-xi ní yáha-ndí yatni

vií yuhu distritú Crètá. ¹⁴ Te tnaa-ni ní cuu sá ñí xíca bàrcú, te duha ní cunuu dǎú táchí ñⁿ xio yuhu ñúú-áⁿ ¹⁵ te nchíta ichi cuáháⁿ bàrcú. Te ñá ní ndàcu-gá-xi quíhíⁿ ndáá-xi nàcuáa cuáháⁿ-xi ní cùu, núu ní dáñá-ndí cuáháⁿ méé-nǎ bàrcú. ¹⁶ Te ní yáha-ndí ñⁿ ñúú nání Clàudá, te ñúú-áⁿ cáá cuådava xití làmár. Te ñⁿ xio yuhu ñúú núú ñá túú quène vihi táchí ñí yáha-ndí, te bàrcú líhli sá nchícúⁿ sátá bàrcú cáhnú, chí ní ndacu-ndí ní taxúha-ndí xití bàrcú cáhnú. ¹⁷ Te sátá ñí ndacu-ndí ní taxúha-ndí bàrcú líhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñúú Sirté, núu xíáⁿ ní ndíhi dóó nchítá ñíquí bàrcú ní nuu nehe-güedé, chí dóó-áⁿ ío níhi chindaha táchí, núu xíáⁿ cuáháⁿ bàrcú ñⁿ xio. Te ní dáñá-güedé ñá túú-gǎ ní dàcaca-güedé, núu cuáháⁿ méé-nǎ-xi ta chindaha táchí cuáháⁿ. ¹⁸ Te ío níhi dáú táchí, te ñá ní cuini tnahí-xi yáha. Te nduu úú sá dúcáⁿ ñá túú-gǎ ní dàcaca-güedé bàrcú te ní ngúíta-güedé ní dǎngöyo-güedé sá nchídó-xí cuèndá cuini-güedé nduu ñamá-xi. ¹⁹ Te nduu úní ní dǎngoyo-güedé nchaa ndachíuⁿ cánehe chiuⁿ-güedé xití bàrcú. ²⁰ Te cuéhé nduu ñá túú ní xíní-ndí ní chòdíní ní nchícanchíi, chí ío níhi ní cuuⁿ dáú táchí, núu ní cáháⁿ-ndí sá vǎ cǎcu-ndí, chí ndíhi-ndí cáhá ní cáháⁿ-ndí.

21 Te ní cuu titní nduu ñá túú-gã xéxí-ndí, núu xiáⁿ ní ngúnutnii té Páblú núú-güedé, te xáhaⁿ-dë:

—Quindáá iní-ndó tnúhu ní cáháⁿ-í, te cundecu nahi-o Crétá ní cùu. Te núu ni tñi-ndo tnúhu-í, te vá dácuita-o càrgá ndihi dava-gá ndàchiuⁿ ni cuu. 22 Te vá yùhú-ndó chi vá cùú ni ìⁿ-ndo dico bàrcú chi cuíta. 23 Te ñaha-ndo sá yùhú càháⁿ ndihi-í Yã Ndiöxí te quide-í nàcuáa càháⁿ-gá. Te ñu-ni mee-gã ní techùⁿ-gá ìⁿ espíritú xínú cuèchi núú-gã ní quixi, 24 te ní cachí-xi xii-í: “Vá yùhú-n chi vá cùú-n, dico dacuití quihíⁿ-n cáháⁿ ndihi-n tã Cèsár. Te ni ìⁿ tée ndihi-n vã cùú, chi ío cùdí ñí ñáhá Yã Ndiöxí xii-n”, duha ní cáháⁿ espíritú xínú cuèchi núú-gã ní cachí tnúhu-xi xii-í. 25 Núu xiáⁿ càchí tnúhu-í sá vã yùhú-ndó, chi sa cùtnuní iní-í sá cádá Yã Ndiöxí nàcuáa ní cáháⁿ espíritú xínú cuèchi núú-gã. 26 Te mee táchí chindaha-xi bàrcú daquihíⁿ-xi ndéé yuhu ndute —cachí té Páblú xáhaⁿ-dë xii-güedé.

27 Te sa ní cuu sáhuⁿ nduu sáhuⁿ niú sá ñí ngüíta-xi cùuⁿ dáú táchí, te ñá túú-gã dácaca-güedé bàrcú, chi mee-ñá táchí tá chindaha-xi bàrcú cuáháⁿ núú ndute lámár Adriá. Te sáta ñí cuu dava niú, te ní quide cuèndá cue tée dácaca bàrcú sá tá cùyatni-güedé ñuhu yichí. 28 Te ní chicuàhá-güedé ná daha-gá mëtrú néhé-xí sã cùnú xití ndute cuèndá cutnùní iní-güedé sá tá

cùyatni-xi ndéé yuhu lámár, te nèhe-xi ócò sáhuⁿ ìⁿ-ni-gá mëtrú. Te ní xica tucu bàrcú luha-gá, te dàtnùní ní chicuàhá tucu-güedé, te xiáⁿ néhé-xí ócò úsá-ni-gá mëtrú. 29 Te ní yùhú-güedé sá candaundeé-xi cava, te ní queheⁿ-güedé cúmí caá náhnú sã nchícúⁿ yoho, te ní dáquëe-güedé xití ndute ndaa sáta bàrcú, te dàtnùní ní ngüñí-xi ñá ní xica-gá-xi, te ní cuini-güedé sá òré-ni tundaá ní cùu. 30 Te cue tée dácaca bàrcú ní natava-güedé bàrcú lihli dandéé-güedé núú ndute ni cùu, te ní cachí-güedé sá quihíⁿ-güedé ndaa núú bàrcú dàquëe-güedé úú-gá caá cuèndá cuita candeé-xi bàrcú cáhnú cuèndá sá vã cáca-xí. Te cuini-güedé dandàhú-güedé dava-gá nchúhú cue tée ñuhu ndihi-güedé bàrcú, chi ní ndatnúhu-güedé sá cùnú-güedé ní cùu. 31 Te té Páblú ní xáhaⁿ-dë xii tée cùu capitáⁿ ndihi dava-gá sandàdú:

—Te núu na dandóo ñaha cue tée dácaca bàrcú cunu-güedé, te vá càcu-o —càchí-dé xáhaⁿ-dë.

32 Te sá dúcáⁿ ñí xáhaⁿ-dë núu ní sáháⁿ sandàdú ní xehndé-güedé yoho nchícúⁿ bàrcú lihli dágáúñihnu-güedé xití ndute cuáháⁿ-xi.

33 Te váha váha-ni ta tundaá cuáháⁿ, te ní xáhaⁿ tã Páblú:

—Sa ní cuu sáhuⁿ nduu ñá túú tñahí xèxi-ndo sá ndihú iní-ndó. 34 Te vitna yáchí-ndó, chi caxi-ndo cuèndá naníhí ndéé-ndó, te vá yùhú-ndó chi

ñá túú nă tnahá ní ìⁿ-ndo — cachí-dé xáhaⁿ-dě xii-güedé.

³⁵ Te sátá dúcáⁿ nǐ cáháⁿ-dé, te ní queheⁿ-dé ìⁿ pàá, te ní ndacáⁿ táhú-dě núú Yă Ndiôxí, te núú-güedé nchaa-güedé ducaⁿ nǐ quide-dé, te dătnùní ní táhú-dě luha ní xexi-dé, ³⁶ Te ducaⁿ te dătnùní ní cuyî-güedé ní xexi-güedé nchaa-güedé. ³⁷ Te úú ciëndú únídico sáhúⁿ ìⁿ-ndí ñúhú bàrcú núú tnahá té Păblú, te nchaa-ndí ní xexi ndihî-ndí-dé, ³⁸ Te ní xexi-ndí ní ndahá xitî-ndí. Te dătnùní ní ngüita-güedé ní tava-güedé nchaa ngohnchi triú ní dăngoyo-güedé xitî ndute cuëndá nduu ñamá-gá bàrcú.

Ní dáhu bàrcú xitî làmár

³⁹ Te sátá nǐ túndaá, te ñá ní cùnuni-gá iní-güedé ndèé cúú-xí nǔú nǐ sáá-güedé, te ní xiní-güedé ìⁿ xichi núú nǐ xícó ndúú luha yuhu làmár, te vâi vihi cúchí dândáá-xí yùhu ndute, te xíaⁿ ñá túú dâcandá víhí táchí ndute, Te ní ndatnúhu-güedé sá ndácú-güedé dacàca-güedé bàrcú quihîⁿ-xi ndéé núú ñúhú cŭchí. ⁴⁰ Te xíaⁿ nǔú ní sáháⁿ-güedé ní xehndé-güedé nchaa yoho nchícúⁿ caá tácandéè bàrcú ní ndóo xitî làmár, te ní nadatâyá-güedé vítú sǎ dâcuico-xi barcú, te ní nacata caa-güedé ìⁿ dóo dǐquí bàrcú, te ta chîndaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu ìⁿ xichi ní natacá víhí cŭchí xitî ndute, te xíaⁿ nǐ nguîndŭxi nihnu

bàrcú-güedé, te ní cutîi-xi xitî cúchí, te ñá ní ñihî-gǎ-güedé nâcuáa cada-güedé nene-xi. Te ío níhi ní dâcandá táchí ndute, te ní chúcú ndèé-xi ndâa sátá bàrcú, te ní ndihî ní táhú-xí. ⁴² Te cue sandâdú ní xitnâha-güedé sá cáhni-güedé nchaa cue téé ní xihî vecaá cuëndá sá vǎ quihîⁿ-güedé núú ndute te cunu-güedé. ⁴³ Te téé cùu capitáⁿ ñá ní dâña-dé cahni-güedé cue téé ní xihî vecaá, chi ñá ní cùndee iní-dé cahni-güedé tnahá té Păblú. Te ní xáhaⁿ-dě xii-güedé sá cuè téé xicuu cada quihîⁿ núú ndute te na yâha-güedé ndute quene-güedé yuhu làmár. ⁴⁴ Te dava cue téé ñá cúú càda, ní xáhaⁿ-dě nanducu-güedé vítú ní àdi vítú nǐ táhú sǎ nǐ xihî bàrcú, te núú xíaⁿ caundodo-güedé yâha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Păblú ndécú-dě ñuú Măltá cáá cuádava làmár

¹ Te sátá nǐ cácu-ndí ní nene-ndí ñuhu yichí, te ní níhi-ndí tnúhu nâcuáa nâni ñuú núú nǐ sáá-ndí, te ñuú-áⁿ nâni-xí Măltá, te çaa-xi cuádava làmár. ² Te ío quide víxiⁿ-xi cuëndá ío cùuⁿ dáú. Te ñáyîu ñuú-áⁿ ní cundâhú iní ñáhă-yu xii-ndí, ní dâtnâhá-yu ñuhú te ní cana ñâhá-yu ní sáháⁿ-ndí ní nacuídí-ndí. ³ Te té Păblú dátâcá-dé nducú, te tnahá-ni ìⁿ cóo dèéⁿ nǐ tniî

nihnu-dé-di, te òré cuáháⁿ ndaha-dé chucu-dě núú ñùhú, te ní ñáni-di cahni, te ní ndee-di xití nducu ní sándúú-di ndaha-dé, te ní xexihaⁿ-di xii-dé. ⁴ Te nchaa ñáyiu ndèhé-yu sá tãcãndeé-di ndaha-dé, te ní ngúíta-yu ní xítñàhá-yu:

—Vaa ndíyi ní sahani té-a, te ñá ní xihí-dé làmár, te dacuitíi sã cùú-dé vitna, chi sa ñaha Yá Ndiõxí ná ní quide-dé ñuyíú-a —càchí-yu xítñàhá-yu.

⁵ Te té Pãblú ní quidi-dé ndaha-dé ní ngaunihnu-di núú ñùhú, te ñá túú tñahí ná ní cùu núú ñí xexi-di. ⁶ Te ñáyiu ñúú-áⁿ xíndéhé-yu núu daquihíⁿ-xi chùhúⁿ àdi nduá-dé cuú-dé. Te naha ñí xíndéhé ñàhá-yu núu nása cada ñaha-xi xii-dé, te ñá túú tñahí ná ní quide ñaha-xi, te ní xítñàhá-yu:

—Vaa ndiõxí cùú tõe-a núu dàcáⁿ ñá túú tñahí ná ní quide-xi ndaha-dé núú ñí xexi cóó —càchí-yu xítñàhá-yu.

⁷ Te yatni núú dúcáⁿ ñí xexihaⁿ cõó-áⁿ cáá ñùhu xitu téa nani Publiú, te téa-áⁿ táxi tñuní-dé nihíi ñúú cáá cuãdava xití làmár núú ndécú-ndí nduu-áⁿ. Te ío váha iní-dé chi ní cana ñaha-dé ní sáháⁿ-ndí ní xíndecu-ndí úní nduu vehe-dé. ⁸ Te tãtã tẽ Pùbliú-áⁿ cáá-dě cùhú-dé ñùhú-dě cahni, te tñahá-dé daxi. Te té Pãblú ní sáháⁿ-dé núú cáá-dě, te ní cáháⁿ ndihí-dé Yá Ndiõxí, te ní sacáⁿ ndodo-dé ndaha-dé díquí tẽ cùhú-áⁿ, te ducaⁿ-ni ñí quide-dé, te ní ndúha téa

cùhú-áⁿ. ⁹ Te sátá dúcáⁿ ñí quide té Pãblú, te ní quixi nchaa ñáyiu cùhú núú ndécú-ndí, te ní quide tãtã ñaha tẽ Pãblú xii-yu te ní ndúha-yu. ¹⁰ Te òré ndécú-ndí xiáⁿ, te vãi sá ñí taxi táhú-güedě, te òré ní xica-ndí ní taxi tucu-güedé nchaa sá xíní ñùhu-ndí ichi.

Té Pãblú ní quexio-dé ñúú Ròmá

¹¹ Te yacáⁿ ní xíndecu-ndí úní yóó, te sa ndècu ñⁿ barcú téa ñúú Alejandriá òré ní quexio-ndí, te ní xíndecu-xi nihíi yóó cúúⁿ dãú táchí. Te núú-xi cãndodo sandú sá dánani-güedé Cãstór ndihí sãndú sá dánani-güedé Pólux, te xití bàrcú-áⁿ ñí quée-ndí cuáháⁿ-ndí. ¹² Te ní quexio-ndí ñúú Siràcusá, te yacáⁿ ní xíndecu-ndí úní nduu. ¹³ Te ní xica tucu bàrcú cuáháⁿ-xi, te ní quexio-ndí ñúú Règiú. Te nduu tñé duha ní quene nuu táchí. Te ní xica bàrcú cuáháⁿ-xi, te ndéé nduu úú ní quexio-ndí ñúú Pùteolí. ¹⁴ Te yacáⁿ ní naníhí tñahá-ndí ndihí ñáyiu sãndáá iní tñúhu Jèsús, te ní cachí-yu sá cùndecu-ndí úná nduu, núu xiáⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexio-ndí ñúú Ròmá. ¹⁵ Te ñáyiu ròmá ñáyiu sãndáá iní tñúhu Jèsús, ní nihí-yu tñúhu sá cuáháⁿ-ndí, te ní quixí-yu ní quixi tñahá ñàhá-yu ichi. Te davá-yu ní naníhí-ndí

ñuú Fòrú Àpiú, te davá-yu ní naníhí-ndí ñuú Úní Tàbernás. Te òrè ní xiní té Páblú nchaa ñáyiú véxi tnahá ñháá xii-ndí, te ndee ndèe ní cuu iní-dé, te ní ndacáⁿ táhú-dě núú Yá Ndiòxí sá dúcáⁿ nǐ quidé-yu. ¹⁶ Te sátá nǐ quexìo-ndí ñuú Ròmá, te cue tée cùchiuⁿ ní xáhaⁿ-güedě xii té Páblú sá cùndècu dǐⁿ-dè, te ní xindeé ñháá cuàa sandadú xii-dé.

Té Páblú càháⁿ-dé tnúhu Yá Ndiòxí ñuú Ròmá

¹⁷ Nduu úní sá nǐ quexìo té Páblú, te ní cana-dé cue tée cùnūu núú ñáyiú isràél ndécú ñuú Ròmá, te ní sáháⁿ-güedě núú ndécú-dě, te ní xáhaⁿ-dè:

—Nchòhó cue tée isràél, càchí tnúhu-í sá ñá túú nǎ ní quíde-í ní ñⁿ ñáyiú cùtnhá ní xíndecu-í ñuú Jerusàlén. Te ñá túú ní càháⁿ cuèhé-í sá quíde-yu nchaa nàcuáa ní xóo cada cue ñaní tnáhá-ó ní xíndecu ndéé sanaha, te ñá túú nǎ ní quíde-í te ní tñi ñaha-güedě ní sáha cuèndá ñháá-güedě xii-í núú cuè tée ròmá, cue tée ndècu yacáⁿ. ¹⁸ Te cue tée-áⁿ nǐ ndúcú tnúhu-güedé nūu ndáa ndècuéchi-í, te ní cutnùní iní-güedé sá ñǎ túú nǎ ní quíde-í, te xǎⁿ cuìní-güedé queñuhu ñaha-güedě xii-í vecaá ní cuu. ¹⁹ Te ñu-ñi cue tée isràél ñá ní dàña-güedé cácu-í, chi cuìní-güedé sá cáhni ñaha cue tée ròmá, cue tée xíndecu yàcáⁿ xii-í ní cuu, te xǎⁿ nūu ní xáhaⁿ-í sá quixì-í càháⁿ ndihí-í té Cèsár cuèndá iha cada ndáa méé-dé cuèndá-í, te vá yòo ñⁿ tee-í cuéchi. ²⁰ Núu xǎⁿ ní

cana ñaha-í xii-ndo cuèndá cunaha-ndo nàcuáa ní cuu. Te ní xáhaⁿ-í sá sandáa iní-í sá ndótó ñáyiú ní xíhí, te ñu-ñi ducaⁿ càháⁿ dava-gá ñáyiú isràél, te sá dúcáⁿ nǐ càháⁿ-í, te ní chihi ñaha-güedě vecaá, te xíndéé ñháá-güedě ndéé vitna —càchí té Páblú xáhaⁿ-dè xii-güedé.

²¹ Te ní xáhaⁿ-güedě xii-dé:

—Ñá túú tnáhi tutú ní tendaha cue tée distritú Jùdeá quixi cuèndá-n. Te ní cuè tée isràél ñá túú ní quixi-güedé càháⁿ cuèhé-güedé cuèndá-n. ²² Te cuìní-ndí cundedóho-ndí nása cunduú tnúhu càháⁿ-n, chi sa ní níhí-ndí tnúhu sá ncháá xichi ío xicáháⁿ cuèhé-yu cuèndá nchaa ñáyiú sandáa iní tnúhu Jèsús —càchí-güedé xáhaⁿ-güedě xii té Páblú.

²³ Te ní xáhaⁿ-güedě nduu cùyáchi-güedé te quixi-güedé cundedóho-güedé dava-gá cuèndú càháⁿ té Páblú, Te ní tnahá nduu ní ndatnúhu-güedé quíhíⁿ-güedé núú quíde véhe-dé, te vai-yu ní sáháⁿ-yu ní xíndedóho-yu tnúhu ní càháⁿ-dé, te ncháca nchaa ní càháⁿ ndihí-dé-yu. Te ní xáhaⁿ-dè xii-yu sá ndíi Moisés ndihí dava-gá cue tée ní xóo càháⁿ tnúhu Yá Ndiòxí ndéé sanaha nǐ chídó tnùní-güedé núú tutú-güedé sá díú-gǎ tendaha-gǎ Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te ñu-ñi nàcuáa càháⁿ tutú-güedé cada Crístú, te ducaⁿ nǐ quíde-gá cùtnhá ní xica cuu-gá ñuyíú-a, núu xǎⁿ ní cutnùní sá díú Jèsús

cúu-gă Cristú Yaá ní tendaha Yă Ndiöxí ní quixi ñuyíú-a. Te núu quindáá iní-yu, te ndíhu ndaha ñaha Yá Ndiöxí xií-yu.

²⁴ Te davá-yu ní sándáá iní-yu tnúhu ní cáháⁿ-dé, te davá-yu ñá túú ní sándáá iní-yu. ²⁵ Te cuendá sá ñă ííⁿ-ní tnúhu ni cáháⁿ-yu, núu xiáⁿ cuíní-yu núhú-yu ni cùu. Te ní xáhaⁿ tē Păblú sá cundetu tnaá-yu cáháⁿ-dé ingá tnúhu, te xăhaⁿ-dē:

—Ní xáhaⁿ Espiritú Yă Ndiöxí xii ndíi Chàíá nàcuáa cáháⁿ ndíi núu nchaa ñani tnáhá-ó ní xíndecu ndéé sanaha. Te ní cáháⁿ Espiritú-gá ííⁿ sá ndàá ní xáhaⁿ-xi xii ndíi, te duha ní xáhaⁿ-xi:

²⁶ Quíhíⁿ-n te cúñaha-n xii ñáiyu:

Nchòhó mee-ni cùndedóho-ndo tnúhu càháⁿ Yă Ndiöxí, dico ni vă təcú tnùní-ndó.

Te cada-gá titní núu să vă yôo tnàhí ndàcu cada, dico ni vă cútnùní iní-ndó nàcuáa ndùu sá cádá-gă,

²⁷ chi cuendá sá ío sàá iní-ndó, xiáⁿ ducaⁿ ñà túú săha-ndo cuendá nása cuáháⁿ tnúhu càháⁿ-gá,

chi ñá cuíní-ndó cùndedóho-ndo, te ni ñă sándáá iní-ndó.

Te ni ñă cuíní-ndó ðaña-ndo nchaa sá cuèhé sá dúhá quide-ndo

cuendá xocàni-gá nchaa xiáⁿ iní-ndó,

duha cúñaha-n xií-yu.

Càchí Espiritú-gá xăhaⁿ-xi xii ndíi. ²⁸ Te na càchí tnúhu-í sá quíhíⁿ cue tée càháⁿ tnúhu Yá Ndiöxí cáháⁿ-güedé tnúhu-gá

núu ñăyiu ñá túú cùu ñáiyu isràél, chi ñáiyu isràél ñá túú cuíní-yu cundedóho-yu. Dico ñáiyu ñá túú cùu ñáiyu isràél chi cùdíi iní-yu cundedóho-yu, núu xiáⁿ naníhí tǎhú-yu —càchí té Păblú xăhaⁿ-dē xií-yu.

²⁹ Te sátá ñí ndíhi cuèndú ní xáhaⁿ-dē, te ní ndeé-yu cuánuhú-yu ta ndàtnúhu-yu cuáháⁿ.

³⁰ Te úu cuiá ñí xínu ní xíndecu té Păblú ííⁿ vehe ní cháhu-dé. Te ní xóo cáháⁿ váha-dé ndíhi nchaa ñáiyu ní xóo quíhíⁿ vehe-dé. ³¹ Te ní xáhaⁿ-dē sá ndíhu ndaha ñaha Yá Ndiöxí xií-yu núu quindáá iní-yu tnúhu-gá, te vá yôo ííⁿ ni sàdí yuhu-dé. Te mee-ni tnúhu Xítohó Jesu-crístú ní cáháⁿ-dé núu-yu.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ RÒMÁ

*Té Păblú cádúha-dé tutú
quíhíⁿ ndaha ñáyiu xĩndecu ichi
Xítohó Jesucristú ndécú ñuú
Ròmá*

¹ Yúhú té Păblú xínú cuèchi-í
núú Xítohó Jesucristú, chi
mee Yă Ndiöxí ní cachí-gá sá
cúu-í ñⁿ téé cáháⁿ tnúhu-gá
núú ñáyiu, te tnúhu-gá cúu-xí
tnúhu sá cáháⁿ năcuáa naníhí
táhú-ó, núú ñuú-gá ní tendaha
ñaha-gá xii-í xicá cúu-í cáháⁿ-í
tnúhu-gá.

² Te ndéé sanaha ñí cachí
Yă Ndiöxí sá dàcuítíi sáa
nduu ngũndecu ndihí ñáyiu
tnúhu-gá. Te ducaⁿ ñí
xáhaⁿ-gă xii cue téé ní cáháⁿ
tnúhu-gá dāvá-áⁿ ñí chídó
tnùní-güedé núú tütú-gá.

³ Te tnúhu-gá sá cáháⁿ-í-a
cáháⁿ-xi ñuú-ni cuendá Xítohó
Jesucristú Yaá cúú Déhe-gá.
Te Déhe-gá-áⁿ cúú-gă ñⁿ ñáyiu,
te cúu-gá ñaní tnáhá ndii
Dávíi.

⁴ Te cúu-gá Yaá ñá
túú tnáhí cuéchi-xi. Te ní
xíhí-gá te ní ndoto-gá, te xĩⁿ
cútnùní iní-ó sá cúú-gă Déhe
Yá Ndiöxí, te ío cànnu cuu-gá.

⁵ Te ñuú-ni Xítohó Jesucristú ní
quide-gá ní nduu táhù-í núú
Yă Ndiöxí sá cáháⁿ-í tnúhu-gá
núú cuè ñáyiu ñuyúú-a cuendá
quíndáá iní-yu tnúhu-gá te
canchicúⁿ nihnú-yu cadá-yu
ncha năcuáa cáháⁿ-xi, te
ducaⁿ ío cuu cànnu-gá. ⁶ Te

tnáhá nchòhó cúú-ndó ñáyiu
sa nchícúⁿ nihnu quide-ndo
nchaa năcuáa cáháⁿ tnúhu-áⁿ,
chi ní cachí Yă Ndiöxí sá
nchòhó tnáhá tnúhu-ndo
ndihí Xítohó Jesucristú. ⁷ Te
nchòhó ñáyiu xĩndecu ñuú
Ròmá, ñáyiu ío cúu iní ñáhá
Yă Ndiöxí, cádúha-í tutú-a
daquíxi-í ndaha-ndo. Te
ñuú-ni nchòhó cúú-ndó cuè
ñáyiu ní cachí Yă Ndiöxí
cada ndáa cundecu-ndo
núú-gă. Te xicáⁿ táhù-í núú
Tátá-ó Dütú Ndiöxí ndihí
núú Xítohó Jesucristú sá ío
na chĩndee chítúu ñaha-gă
xii-ndo, te ducaⁿ ndi nduú-gá
ná cada te ío váha cuu iní-ndó
cundecu-ndo.

*Té Păblú cuíní-dé quíhíⁿ
ngoto-dé cue ñáyiu xĩndecu ichi
Xítohó Jesucristú ndécú ñuú
Ròmá*

⁸ Te díhna nuu-gă cächí
tnúhu-í xii-ndo sá ío ndácáⁿ
táhù-í núú Yă Ndiöxí cuendá
sá ío sándáá iní-ndó-gă, te
nchaa ñáyiu nihí-yu tnúhu
sá dúcáⁿ quide-ndo. Te
Xítohó Jesucristú dáyăha-gá
nchaa tnúhu cáháⁿ-í núú
Yă Ndiöxí.

⁹ Te ndi tnáhá
òré cáháⁿ ndihí-í Yă Ndiöxí
ducaⁿ-ni xicáⁿ táhù-í núú-gă
cuendá-ndó, te mee-gă
náhá-gă sá cáháⁿ ndáá-í, te
ñuú-ni núú-gă xínú cuèchi-í
ni yùhu ni iní-í, chi cáháⁿ-í
năcuáa ní quide Déhe-gá
Xítohó Jesucristú cuendá
naníhí táhù-ó. ¹⁰ Te xicáⁿ
táhù-í núú Yă Ndiöxí sá
núú mee-gă ná cächí te sáa
ñⁿ nduu quíxi coto ñaha-í
xii-ndo. ¹¹ Chi ío cuíní-í
cundecu ndihí ñaha-í xii-ndo
dànehé ñáhá-í ñⁿ úú tnúhu

nàcuáa ío-gá chindee ñàha Espíritú Yá Ndiòxí xii-ndo, te ducaⁿ ío-gá cuita nducu ndèe-ndo cada-ndo nchaa nacuáa cuìní-gá. ¹² Te ío chí ná cuáha tnàha-o tnúhu ndee ìní cundecu-o ìchi-gá, chí nchòhó ndihí yúhú ío sàndáá iní-ó-gá.

¹³ Te nchòhó ñáyíu ndècu ndihí-í ìchi Xítóhó Jesucristú na càchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuìní-í sá òré quixi coto ñaha-í xii-ndo, te vá cuíta chiúⁿ quixi-í dàtná quidè-í òré sãngoto-í nchaa ñáyíu dava-gá ñúú ñá túú xíta chiúⁿ-í chí ío váha sàhúuⁿ-yu tnúhu càháⁿ-í, dico ñá ndácú-í quixi-í quixi coto ñaha-í xii-ndo. ¹⁴ Te yúhú yídiquí-í cáháⁿ-í tnúhu Xítóhó Jesucristú núú nchàa ñáyíu càháⁿ tnúhu griégú, ndihí núú nchàa ñáyíu càháⁿ dava-gá núú tnúhu, ndihí núú nchàa ñáyíu túha, ndihí núú nchàa ñáyíu ñá túú túha. ¹⁵ Te cuèndá sá dúhá yídiquí-í cáháⁿ-í tnúhu-gá, xíáⁿ ío cuìní-í danèhé ñáhà-í xii nchaa nchòhó ñáyíu ñúú Rómá nàcuáa ndùu tnúhu sá càháⁿ nàcuáa naníhí tàhú-ó.

Ío cùnūu tnúhu Xítóhó Jesucristú

¹⁶ Te yúhú ñá túú tnàhí cùcahaⁿ núú-í cáháⁿ-í tnúhu Xítóhó Jesucristú, chí cùu-xi tnúhu ío cùnūu, chí Yá Ndiòxí ní cachí-gá sá ncháá ñáyíu na quìndáá iní-xi tnúhu-áⁿ te naníhí tàhú-yu. Te ní cachí-gá sá dǐhnanuu-gá ñáyíu isràél ngúndecu ndihí-yu tnúhu-áⁿ

te dàtnùní ngúndecu ndihí ñáyíu ñá túú cùu ñáyíu isràél. ¹⁷ Te tnúhu-áⁿ dánèhé ñáhà-xí xii-o sá cúdiu-o núú Yá Ndiòxí te núu mee-ni sã quìndáá iní-ó-gá dàtná càháⁿ-xi núú tütú-gá núú càchí-xi: “Nchaa ñáyíu sàndáá iní ñáhà xii Yá Ndiòxí cúdiú-yu núú-gá, te ndècu ndihí ñahá-yu xii-gá”, duha càchí-xi núú tütú-gá.

Nchaa ñáyíu ndècu ñuyíú ndècuéchi-yu

¹⁸ Te ndéé andiu tènðaha Yá Ndiòxí sá ùhú quixi sá cúu-xi nchàa ñáyíu ñá túú quide ndáá núú-gá, ñáyíu quide nchaa sá cuèhé sá dúhá. Te cuèndá nchaa sá quidè-yu-áⁿ xíáⁿ ñá túú cuìní-yu tnú-yu tnúhu ndáá tnúhu Yá Ndiòxí cuèndá cuu-xi ìⁿ sá vãha sá cúu-xi-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání ìní Yá Ndiòxí ndihí nàcuáa ndùu sá quidè-gá dàtná cùtnuní iní nchaa dava-gá-yu, chí diu-gá dánèhé ñáhà-gá xii-yu. ²⁰ Te ni vã ndácú-ó quìní núú-ó nãsa càa-gá, te ni vã ndácú-ó quìní-ó nãsa càa iní-gá, te ni vã ndácú-ó quìní-ó nãsa quide-gá táxi tnùn-í-gá nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyíú nǐ ngúita nchaa ñáyíu tècú tnùn-í váha-yu nàcuáa ndùu sá sání ìní-gá ndihí nàcuáa ndùu sá quidè-gá te ducaⁿ tècú tnùn-í-yu cuèndá nchaa sá nǐ cadúha-gá ndéhè-yu ío ñuyíú-a, núu xíáⁿ vá càchí-yu sá ñá túú cuèchi-yu. ²¹ Te

cuèi ducaⁿ nĩ cutnùnĩ iní-yu
 cuendá Yă Ndiõxí dico ñá túú
 cuiní-yu canehé-yu sá yĩñuhu
 núú-gă nàcuáa tàú-xi cunduu.
 Te ni ñà túú cuiní-yu ndacáⁿ
 táhũ-yu núú-gă cuendá nchaa
 sá vâha quide ñaha-gá xií-yu,
 chi mee-ni nchàa sá ñà túú
 vèdana nàndĩhi ñuhu iní-yu.
 Te quidé-yu dàtná quidé ñⁿ
 ñáyiu ñá túú ndècu ndihi
 nchaa sá xìnĩ tnùnĩ-xi. Te
 uuⁿ-gá uuⁿ-gá tá quidé-yu
 cuáháⁿ. ²² Te cãchĩ-yu sá
 cúú-yu ñáyiu ío váha sàa
 sá xìnĩ tnùnĩ-xi dico ñá
 ndàa, chi cúú-yu ñáyiu ío ñĩ
 dĩquí-xi. ²³ Te ñá túú cuiní-yu
 cáháⁿ-yu sá ío cãhnu cuu Yă
 Ndiõxí Yáa ndécú nchàa nduu
 nchaa quíú, chi da nchaa
 sá nĩ cadúha mèe-yu quide
 cahnú-yu. Te ní cadúha-yu
 nchaa sá nàhá ñáyiu ñá túú
 cùdí ndècu ñuyíú-a. Te
 ní cadúha-yu sá nàhá quiti
 ndàva, ndihi sá nàhá quiti
 sàcuíta ñuhu mee-xi, ndihi
 sá nàhá nchaa dava-gá quiti,
 nchaa xĩãⁿ quidé cãhnú-yu.

²⁴ Te xĩãⁿ nõu ní dáñá Yă
 Ndiõxí quidé-yu nchaa sá
 cuèhé sá dúhá sàni iní-yu. Te
 xĩãⁿ ío quide ndihi tnahá-yu
 sá cuèhé sá dúhá sàcúú-xí
 yiqui cuñú-yu. ²⁵ Te ducaⁿ
 quidé-yu chi ñá túú sàndáa
 iní-yu tnúhu ndáa tnúhu Yă
 Ndiõxí. Te mee-ni tnúhu
 ndehnde sàndáa iní-yu, te
 nèhé-yu sá yĩñuhu núú dâva
 sá nĩ cadúha-gá ío ñuyíú-a
 ndihi dava sá ndèe andiu te
 quide cahnú-yu, te ñá túú
 cãchĩ-yu sá mèe-gă ío cãhnu
 cuu-gá, dico mee-gă xìnĩ

ñuhu-xi cáháⁿ-yu sá ío cãhnu
 cuu-gá ni caa ni quíhĩⁿ. Te
 ndáa ndisa sá ío cãhnu cuu-gá.

²⁶ Te sá dúcáⁿ ñà túú
 quide váha-yu núu xĩãⁿ ní
 dáñá-nă Yă Ndiõxí quidẽ-yu
 nchaa sá cuèhé sá dúhá sàni
 iní mèe-yu. Te dava ñáyiu
 dĩhĩ cãháⁿ ndihi tnàhá-yu
 ndi mèe dĩhĩ-yu te ñá túú
 quidé-yu nàcuáa ní nduu
 táhũ-yu cadá-yu. ²⁷ Te diu-ni
 ducaⁿ xĩquide dava cue tée
 chi sàni cuehé sánĩ dùha
 iní-güedé sá cúú-xí yiqui
 cuñú-güedé ndi mèe tnaha
 tée-güedé, chi cãháⁿ ndihi
 tnàha ndi mee-güedé te ñá
 túú quide-güedé nàcuáa ní
 nduu táhũ-güedé cada-güedé,
 te sá dúcáⁿ quide-güedé te ñá
 túú tnàhĩ cùu váha iní-güedé
 ndécú-güedé, te ducaⁿ tnàhĩ
 tàú-xi ndoho-güedé cun-
 decu-güedé.

²⁸ Te ñá túú tnàhĩ ñuhu
 iní-yu Yă Ndiõxí nõu xĩãⁿ duuⁿ
 duuⁿ ní dáñá nihnu ñaha-gá
 xií-yu sàni cuehé sánĩ dùha
 iní-yu, te quidé-yu nchaa sá
 ñà túú tàú-yu cadá-yu. ²⁹ Te
 nchaa núú sã cuèhé sá dúhá
 cùnũu quidé-yu. Te cue tée
 cãháⁿ ndihi-güedé ñáyiu dĩhĩ
 te ñá díú ñàdĩhĩ-güedé cúú-yu.
 Te diu-ni ducaⁿ xĩquide cue
 ñáyiu dĩhĩ chi cãháⁿ ndihĩ-yu
 cue tée te ñá díú yĩ-yu
 cùu-güedé. Te mee-ni sã
 ñà túú váha quidé-yu sá
 cúú-xí tnàha ñáyíú-yu, te
 xihó-yu cundecu ndihĩ-yu sá
 ndécú ndihi dava-gá tnàha
 ñáyíú-yu, te ío sàni cuehé
 sánĩ dùha iní-yu sá cúú-xí

tnàha ñáyíu-yu, te ío cuédú íñi-yu, te sàhni tnahá-yu, te ío plètú-yu, te dándahú tnáhã-yu, te cùu úhú iní-yu cue tnàha ñáyíu-yu, te ío yiti yùhú-yu. ³⁰ Te càháⁿ cuèhé-yu cuèndá nchaa dava-gá tnàha ñáyíu-yu, te cùu úhú iní-yu Yá Ndiõxí, te xio xio cuìní-yu cunuu tnúhu-yu, te mee-ni sàni iní-yu sá ïo váha cunduú-yu, te ío quide cahnú-yu mèé-yu, te ío sàni iní-yu sá cádá ùhú-yu tnàha ñáyíu-yu, te ñá túú sàndáá iní-yu ni tãtã-yu ni nãñã-yu. ³¹ Te ñá túú tècú tnùní-yu sá váha, te ñá túú quidé-yu ìⁿ sá càháⁿ-yu, te ñá túú cùu iní-yu nì ñáyiu cùu ndi mèé-yu, te ni dàva-gá tnàha ñáyíu-yu, te ñá túú quide cahnu iní-yu ìⁿ sá cúmãní núú tnáhã-yu, te ni ñà túú cùndahú iní-yu tnàha ñáyíu-yu. ³² Te Yá Ndiõxí ní cachí-gá sá ncháá ñáyiu ducaⁿ xiquide quíhíⁿ-yu núú ùhú núú ndàhú. Te xìní-yu sá Yá Ndiõxí daquihíⁿ ñáhã-gã xii-yu núú ùhú núú ndàhú sá dúcãⁿ quidé-yu, dico uuⁿ-gá quidè-yu chi váha-gá cúú ìní-yu cue ñáyiu quide datná quidé mèé-yu.

2

Yá Ndiõxí cada ndáá-gá cuèchi nchaa ñáyiu ndècu ñuyíú

¹ Te nchòhó ñáyiu càchí sá ïo ndècu cuèchi dava-gá ñáyiu tnáhã-ndó ïo ndècu cuèchi-ndo cuèi nágá ñáyiu cùu-ndo, chi tnáhã-ndó quide-ni-ndo nchaa nacuaá quide dava-gá

ñáyiu càchí-ndó ndècu cuèchi-xi, te sá dúcãⁿ càháⁿ-ndó sã ndécú cuèchi ñáyiu-áⁿ te dàcaa-ndo cuèchi díquí-ndó chi tnáhã-ndó quide-ndo datná quidè-yu. ² Te nchoo xìní-ó sã Yá Ndiõxí ío váha cùtnuní iní-gá nàcuáa cada ndáá-gá cuèchi ìⁿ ìⁿ nchoo ñáyiu ndècu ñuyíú-a, chi daquihíⁿ-gá nchaa ñáyiu quide nacuaá ní càháⁿ-í núú ùhú núú ndàhú. ³ Te nchòhó ñáyiu ìⁿ-ni quide ndihi ñáyiu càchí mèé-ndó sã ndécú cuèchi-xi dacuítí sã ná chãhu-ndo núú Yá Ndiõxí sá dúcãⁿ quide-ndo. ⁴ Te ñá túú cùu váha iní-ndó sã Yá Ndiõxí cùndahú iní ñáhã-gã xii-ndo, te ni ñà túú cùu váha iní-ndó sã ïo cuìní-gá cada cahnu iní-gá nchaa sá ñà túú váha quide-ndo, te ni ñà túú quide cuendá-ndó sã Yá Ndiõxí quidé váha ñaha-gã xii-ndo cuèndá cuìní-gá sá nchòhó ndixi túu iní-ndó sã ñà túú quide váha-ndo ndècu-ndo. ⁵ Te nchòhó cúú-ndó ñáyiu ío sàá iní-xi, chi ñá túú cuìní-ndó ndixi túu iní-ndó sã ñà túú quide váha-ndo ndècu-ndo, te xiãⁿ núú ío-gá tá cùu vai tnúndòho sá cúú-xí-ndó. Te na sàá nduu tnúhu ndòho tnúhu ndàhú te ío ndoho-ndo, chi Yá Ndiõxí cada ndáá-gá nàcuáa nduu cuèchi-ndo. ⁶ Te dàvá-áⁿ cada ndáá Yá Ndiõxí nchaa nàcuáa nduu nchaa sá ní quide ìⁿ ìⁿ ñáyiu ndècu ñuyíú-a. ⁷ Te nchaa ñáyiu nchicúⁿ nihnu-ni quide mee-ni sá váha, ñáyiu-áⁿ nduu táhũ-yu cundecú-yu ndihi Yá Ndiõxí ni caa ni

quihíⁿ, te ducaⁿ quide váha-yu chi cuiní-yu sá Yá Ndiöxí cuu váha iní ñáhá-gã xii-yu, te cuiní tucú-yu nduu táhũ-yu núú ïo váha càa ndecu Yá Ndiöxí cundecú-yu ni caa ni quihíⁿ. ⁸ Te ío cùdééⁿ-gã núú nchàa ñáyiú ñùhu iní mee-ni sã cúu-xí mèe-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quidé-yu. ⁹ Te nchaa ñáyiú ducaⁿ xiquide ío ndíhú iní-yu. Te díhna-gá ñáyiú isràél ngúita-xi ndohó-yu, te dàtnùní ngúita-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ní quide váha-yu, te ío váha cuu iní-yu cundecú-yu. Te díhna-gá ñáyiú isràél ñáyiú ní quide váha ducaⁿ càda ñaha-gá xii-yu, te dàtnùní ducaⁿ càda ñaha-gá xii ñáyiú ñá túú cùu ñáyiú isràél ñáyiú ní quide váha.

¹¹ Te ñá túú quide cuendá-gá cuèi náí ñáyiú cùu-yu. ¹² Te nchaa ñáyiú ndècu ndihí nchaa tnúhu ní chídó tnùnì ndíi Moisés, Yá Ndiöxí cada ndáá-gá cuèchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndihí tnúhu ní chídó tnùnì ndíi-áⁿ, Yá Ndiöxí vá cáda ndáá-gá cuèchi-yu nàcuáa càháⁿ nchaa tnúhu-áⁿ. Dico nchaa ñáyiú quide nándi sá cuèhé sá dúhá dàcutíí cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu

ndihí-yu. ¹³ Te nchaa ñáyiú dícó-ni sàcúndedóho nchaa tnúhu ní càháⁿ ndíi Moisés te ñá túú tníi-yu, ñáyiú-áⁿ ñà túú cùdúu-yu núú Yá Ndiöxí, dico nchaa ñáyiú tníi nchaa tnúhu ní càháⁿ ndíi, ñáyiú-áⁿ càchí Yá Ndiöxí sá cúdúu-yu núú-gã, chi ñá túú-gã cuèchi-yu ndècu núú-gã. ¹⁴ Te nchaa ñáyiú ñá túú ndècu ndihí tnúhu ní chídó tnùnì ndíi Moisés, te núú quidé-yu nchaa nàcuáa ní càháⁿ ndíi te cùu-xi ñⁿ sá sání tnàhí iní mèe-yu cadá-yu, te sá sání iní-yu-áⁿ cúu-xí ñⁿ tnúhu váha sá sánú ìchi ñaha xii-yu nàcuáa cada váha-yu cundecú-yu. ¹⁵ Te sá dúcáⁿ quidé-yu xíⁿ cùtnùnì sá sání iní-yu dàtná càháⁿ tnúhu ní chídó tnùnì ndíi Moisés cada ñáyiú isràél, te ío váha cùtnunì iní-yu nchaa nàcuáa quidé-yu chi ndíxi túu iní-yu òré ñá túú quide váha-yu. ¹⁶ Te sáá nduu te Yá Ndiöxí cúñaha-gã xii Xítóhó Jesucristú cada ndáá-gá nchaa cuèchi ñáyiú, nchaa sá sání iní mèe-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nàcuáa nanihí tàhú-ó, tnúhu sá dánèhé ñàhà-í xii-ndo.

Cuendá ñáyiú isràél ndihí cuendá nchaa tnúhu ní chídó tnùnì ndíi Moisés

¹⁷ Te nchòhó ñáyiú isràél nchaa-ndo cùu-ndo ndí mee-í, te càchí-ndó sá nchicúⁿ nihnu-ndo quide-ndo nchaa tnúhu ní càháⁿ ndíi Moisés núu xíⁿ ndécú váha-ndo, te càchí-ndó sá ïo càhnu cuu-ndo sá ndécú ndihí-ndo Yá Ndiöxí. ¹⁸ Te cùtnunì iní-ndó nchàa nàcuáa cuiní Yá

Ndiõxí cada-ndo, te sá dúcáⁿ nchicúⁿ nihnu-ndo quide-ndo nacuáa càháⁿ tnúhu-án xǎⁿ cùtnuní iní-ndó nchaa sá ïo-gá váha xini ñuhu-xi cada-ndo. ¹⁹ Te cächí-ndó sǎ ïo váha xiní-ndó cànuichi-ndo nchaa ñáyu ñá túú cùtnuní iní-xi, te cächí tucu-ndo sǎ ïo váha xiní-ndó nà canu ichi-ndo nchaa ñáyu ndècu ichi cuehé ichi duha. ²⁰ Te sànu ichi-ndo nchaa ñáyu ïo ñi díqui-xi, ndihi nchaa ñáyu vitna ta tècú tnùní nchaa sá vǎha, te ducaⁿ quide-ndo chi ndècu ndihi-ndo nchaa tnúhu ní chídó tnùní ndíi Moisés, te tnúhu-án cúú-xí tnúhu ndáá, chi sànu ichi ñaha-xi xii-ndo nacuáa cada-ndo. ²¹ Te nchòhó dàcuaha-ndo ñáyu nacuáa cadá-yu, te mee-ndo ñá túú dàcuaha-ndo cada-ndo nchaa nacuáa tàú-xi cunduu, te xǎhaⁿ-ndo xii-yu sá vǎ cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú cǎháⁿ ndihi-güedé ñáyu dìhí te núu ñá díú ñàdihí-güedé cúú-yu, te ducaⁿ-ni cuè ñáyu dìhí, vá cúú cǎháⁿ ndihi-yu téé te núu ñá díú yǐ-yu cùu-güedé. Te nchaa sá xǎhaⁿ-ndo vǎ cúú càda ñáyu te mee-ndo quide-ni-ndo, te xǎhaⁿ-ndo xii-yu sá vǎ cǎnehé-yu sá yíñuhu núú nchaa sá cächí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú venúhu. ²³ Te cächí-ndó sǎ ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cǎháⁿ ndíi, te sá

dúcáⁿ quide-ndo-án te dàquee tíhú-ndó Yǎ Ndiõxí. ²⁴ Te quèe ndáá-xi nàcuáa càháⁿ-xi núú tütú Yǎ Ndiõxí nàcuáa quide-ndo-án núú cächí-xi sá nchaa ñáyu ñá túú cùu ñáyu isràél càháⁿ cuèhé-yu cuèndá Yǎ Ndiõxí sá cuèndá-ndó.

²⁵ Te nchòhó ñáyu isràél nchaa-ndo cùu-ndo ndi mee-í, te tnàhá-ndó ndècu ndihi-ndo seña ñi-ndo, te váha-ni sá dúcáⁿ te núu quide-ndo nchaa nacuáa ní cǎháⁿ ndíi Moisés. Dico núu ñá túú quide-ndo nchaa nacuáa ní cǎháⁿ ndíi ña, te ñá túú nàndihí-xi sá cúú-ndó ñáyu isràél cuèi ndècu seña ñi-ndo. ²⁶ Te nchaa ñáyu ñá túú ndècu ndihi seña ñi-xi, te núu quidé-yu nchaa nacuáa ní cǎháⁿ ndíi Moisés, te cúú-yu dàtná cue ñáyu ndècu ndihi seña ñi-xi, chi quidé-yu nchaa nacuáa ní cǎháⁿ ndíi. ²⁷ Te ñáyu ñá túú ndècu ndihi seña ñi-xi, te núu na càdá-yu nchaa nacuáa ní cǎháⁿ ndíi Moisés, te ñáyu-án cachí-yu sá ñá túú quide ndáá nchaa nchòhó ñáyu ndècu ndihi seña ñi-xi, chi ndècu ndihi-ndo nchaa tnúhu ní chídó tnùní ndíi te ñá túú quide-ndo nacuáa càháⁿ tnúhu-án. ²⁸ Te nchòhó ñáyu isràél, ñáyu nchicúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáyu isràél, te mee-ndo ndècu seña ñi-ndo dico ñá túú quide-ndo nacuáa tàú-xi cada nchaa ñáyu ndècu seña ñi-xi, te mee-ni seña-án sǎha-ndo ñi-ndo te ñá túú quide-ndo nacuáa cùni Yǎ

Ndiöxí cada-ndo. ²⁹ Te nchaa ñáyiú sàndáá ndisa iní-xi Yá Ndiöxí, ñáyiú-áⁿ cúú ndisá-yu ñáyiú isràél, te sa ní nduu ndoo ní nduu nine iní-yu chi Espiritú Yá Ndiöxí ducaⁿ nĩ quide-xi, dico ñá díú sá sáha-yu señá ñí-yu dàtná ní cachí ndí Moisés. Te ñáyiú-áⁿ cúú vâha iní ñáhá Yá Ndiöxí xii-yu cuéi ñá túú càháⁿ vâha tnâha ñáyiú-yu cuendá-yu.

3

¹ Te sá dúhá càháⁿ-í te ió dava ñáyiú quesàhá-yu sá ñí-ní cùu ñáyiú ñá túú cùu ñáyiú isràél ndihi nchoo ñáyiú isràél, te quesaha tùcú-yu sá ñí-ní quide tucu-xi cuéi na cuâha àdi vá cuâha señá ñí-yu. ² Dico yúhú càchí-í sá ncháá ñáyiú isràél ío-gá cúnúú-yu, chi ío títní núú sá vâha ní quide ñaha Yá Ndiöxí xií-yu, chi ní sáñaha-gã tnúhu-gá ndécú ndíhí-yu. ³ Te davá-yu ñá túú cuíní-yu cada ndáá-yu, dico ñá díú sá xĩáⁿ te cùyica iní Yá Ndiöxí ñá túú quide ndáá-gá. ⁴ Dico ñáhá chi xini ñúhu-xi sá ncháá ñáyiú cada cuendá-yu sá Yá Ndiöxí cúú-gã Yaá quidé ndáá cuiti, te cuéi ncháá-yu na càchí-yu sá ñà túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nàcuáa ní xáhaⁿ ñí tée ní xindecu ndéé sanaha xii-gá, te duha ní xáhaⁿ-dê:

Yòhó Dútú Ndiöxí, cùtnuní iní ñáyiú sá ío ndáá càháⁿ-n,

te cùnnyu nahi-ni tnúhu-n cuéi òré càchí ñáyiú sá ñà túú càháⁿ ndáá-n. Duha ní xáhaⁿ tée ndéé sanaha-ãⁿ xii-gá càchí-xi núú tùtú-gá.

⁵ Te cuendá nchaa sá cuèhé sá dúhá quide ñáyiú, xĩáⁿ cùtnuní iní-yu sá Yá Ndiöxí cúú-gã Yaá ío vâha quide ndáá, chi mee-gã ñá túú dùcaⁿ quide-gá. Te cuéi ducaⁿ dico vá cáni iní-yu sá Yá Ndiöxí ñá túú quide ndáá-gá sá dándòho ñaha-gá xií-yu na sàá nduu, te núú ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núú Yá Ndiöxí ñá túú quide ndáá-gá ñá, te vá cúú càda ndáá-gá nchaa cuéchi cue ñáyiú ñuyúú-a te núú ducaⁿ.

⁷ Te núú yúhú ná càni iní-í càháⁿ-í ñí tnúhu ndehnde, te sá tnúhu-áⁿ te caní tucu iní-í sá quidé càhnu-gá-í tnúhu ndáá tnúhu Yá Ndiöxí, te sá dúcáⁿ ná càháⁿ-í te caní tucu iní-í sá vâ cúú càháⁿ Yá Ndiöxí sá ndécú cuéchi-í. ⁸ Te núú na càni tucu iní-í sá vâha-gá cada-í nchaa sá cuèhé sá dúhá cuendá Yá Ndiöxí cada-gá sá vâha, dico ñá ndáá. Te ío ñáyiú càháⁿ cuèhé cuendá-í te càchí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuéchi-yu

⁹ Te vitna càchí dava ñáyiú sá ío-gá cúnúu nchoo cue ñáyiú isràél dàcúúxí dàva-gá

ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sã nchàa ñáyiú ndècuéchi-yu cuéi ñáyiú isràél te cuéi ñáyiú ñá túú cùu ñáyiú isràél. ¹⁰ Te núú tütú Yã Ndiöxí càchí-xi:

Vá yõo ìⁿ quide ndáá,

¹¹ te ni vá yõo ìⁿ tècú tnùnì tnúhu váha,

te ni vá yõo ìⁿ nànducu nihnu Yã Ndiöxí.

¹² Chi ncháá-yu ñá túú nchicúⁿ nihnú-yu ichi váha, te ncháá-yu cùu-yu ñáyiú xĩndecu neñúú sá cúu-xí Yã Ndiöxí.

Te ni ìⁿ-yu ñá túú quidé-yu ìⁿ sá vãha.

¹³ Te cada iní-ndó sã yúhũ-yu cùu-xi datná cúu ìⁿ yaú núú yĩndũxi ndíyi núú ïo ndehe sãháⁿ,

te ducaⁿ sãtnahá-xi cùu yuhú-yu, chi ïo càháⁿ cuèhé-yu, te mee-ni dandahú-yu nchaa tnàha ñáyiú-yu.

Te cada iní-ndó sã vènenú cóo yíhí yuhú-yu chi mee-ni càháⁿ úhú-yu cuèndá tnàha ñáyiú-yu.

¹⁴ Te ïo iní-yu càháⁿ úhú tnáhã-yu.

¹⁵ Te àúⁿ nã cuu àúⁿ nã xĩãⁿ xĩsahni tnáhã-yu.

¹⁶ Te nchaa núú xicá cùu-yu quide úhú iní-yu nchaa tnàha ñáyiú-yu nãcuáa ndihú iní ñáyiú-áⁿ.

¹⁷ Te ñá túú cuiní-yu cundecu ndihí tnàha váha-yu.

¹⁸ Te ñá túú sàni iní-yu canehé-yu sá yĩñùhu núú Yã Ndiöxí.

Duha quidé-yu càchí-xi núú tütú-gá.

¹⁹ Te cùtnunì iní-ó sã nchàa tnúhu ní chídó tnùnì ndíi Moisés cúu-xí cuèndá nchaa ñáyiú nchicúⁿ nihnu nchaa tnúhu-áⁿ. Te tnúhu-áⁿ cúu-xí cuèndá sá vã yõo tnàhí cachí sá ñà túú cuéchi-xi, te ducaⁿ te nchaandi túhú ñáyiú cutnùnì iní-yu sá ná chãhu-yu nchaa sá quidẽ-yu núú Yã Ndiöxí.

²⁰ Te ducaⁿ càda-xi chi ni ìⁿ ñáyiú vá càchí-ó sã vã cùndècu cuéchi-yu núú Yã Ndiöxí cuèndá-ni sá nchicúⁿ nihnú-yu nchaa tnúhu sá nĩ chídó tnùnì ndíi Moisés, te tnúhu-áⁿ càchí tnúhu-xi cuèndá-ni sá cùtnunì iní-ó sã ndécú-ó ìchi cuehé ichi duha.

Te núu na quèndáá iní-ó Xĩtohó Jesucristú te naníhí tàhú-ó

²¹ Te vitna ní cutnùnì iní-ó sã ñà díú sã càdá-ó nchàa nacuáa ní càháⁿ ndíi Moisés cudiú-o núú Yã Ndiöxí, chi mee-gã quidé cudiú-o núú-gã. Te núú tütú ndíi Moisés ndihí núú tütú cue téé ní xóo càháⁿ tnúhu Yã Ndiöxí ndéé sanaha càháⁿ-xi nãcuáa cada ñaha-gã xii-o vitna.

²² Te ducaⁿ cudiú-o núú Yã Ndiöxí te núu na quèndáá iní-ó Xĩtohó Jesucristú. Te diú-ni ducaⁿ cudiú nchaa ñáyiú ñuyiú te núu na quèndáá iní ñáhã-yu xii-gá, chi ìⁿ-ni cùu-o nchaa-o sá cúu-xí Yã Ndiöxí. ²³ Chi ncháá-yu

ndècu cuéchi-yu, chi ñá ìⁿ-yu quidé-yu nãcuáa càháⁿ Yã Ndiöxí sá cúu-yu ñáyiú quide váha. ²⁴ Dico Yã Ndiöxí ïo váha iní-gá chi ní quide ñaha-gã xii-o ìⁿ sá vãha, chi dicó-ni

ducaⁿ ñi quide-gá nàcuáa vá cùndècu-gá cuéchi-o nùú-gã, chi Xítohó Jesucristú ní sati ñíñi-gã te ní xíhí-gá, te ducaⁿ ñi yáha-gá cuendá sá vá cùndècu-gá cuéchi-o. ²⁵ Te Yá Ndiöxí ní taxi ndecu-gá Xítohó Jesucristú núú ñáyiu ñuyíú-a, te ní xíhí-gá sá cuendá nchaa yíca cuéchi-yu, te ducaⁿ ñi cuu cuendá sá ncháá ñáyiu na quindáá iní ñáhá xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuéhé sá dúhá ñi quide cue ñáyiu ní xíndecu ndéé sanaha. Te xiãⁿ ní xíhí Xítohó Jesucristú cuendá cutnùní iní-ó sã Yá Ndiöxí cúu-gã Yaá ío váha quide ndáá cuéi ducaⁿ ñi quide ndee iní-gá nchaa sá ñi quide cue ñáyiu-áⁿ. ²⁶ Núu xiãⁿ vitna ní cutnùní ndisa iní-ó sã quidé ndáá-gá, te quide-gá sá cué ñáyiu vá cùndècu-gá cuéchi-yu núú-gã, te núu na quindáá iní-yu Xítohó Jesucristú.

²⁷ Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te ducaⁿ ñà túú-gã cuéchi-o ndècu núú-gã cuendá sá sàndáá iní-ó Xítohó Jesucristú, te ñà díú sã cuendá nchaa tnúhu ní càháⁿ ndí Moisés. ²⁸ Te cùtnuní iní-ó sã ndéda-ni càa ñáyiu vá cùndècu-gá cuéchi-yu núú Yá Ndiöxí te núu na quindáá iní-yu Xítohó Jesucristú cuéi ní quidé-yu nchaa nàcuáa ní càháⁿ ndí Moisés àdi ñà túú ní quidé-yu.

²⁹ Te cùtnuní iní-ó sã Yá Ndiöxí cúu-gã Ndiöxí

nchaandi túhú ñáyiu, te ñà díú mèe-ni Ndiöxí ñáyiu isràél cúu-gã. ³⁰ Te ñⁿdi díi-gã cúu-gã Ndiöxí, te nchaa ñáyiu sàndáá iní ñáhá xii Xítohó Jesucristú te vá cùndècu-gá cuéchi-yu núú Yá Ndiöxí cuéi cúu-yu ñáyiu isràél àdi ñà túú cúu-yu. ³¹ Te ñà díú sã sàndáá iní-ó Xítohó Jesucristú te cachí-ó sã ñà túú nàndíhi nchaa tnúhu sá sánú ichi ñaha xii-o nacuáa cada-o, te ñáhá chi sá dúhá sàndáá iní-ó-gã te xiãⁿ nchícúⁿ nihnu-o quide-o nacuáa càháⁿ tnúhu-áⁿ.

4

Cuendá ndí Abrahám

¹ Te vitna na càchí tnúhu-í xii-ndo cuendá ndí Abrahám téé ní cuu ñani tnáhá-ó ñi xíndecu ndéé sanaha. ² Te ndí-áⁿ ñà túú ní xíndecu cuéchi ndí núú Yá Ndiöxí, dico ñà díú cuendá ñⁿ chiuⁿ ní quide ndí ducaⁿ ñà túú ní xíndecu cuéchi ndí núú-gã. Chi núu cuendá ñⁿ chiuⁿ ní quide ndí ducaⁿ ñà túú ní xíndecu cuéchi ndí núú Yá Ndiöxí ñà, te cada càhnu ndí mee ndí ni cùu, dico ñà díú núú Yá Ndiöxí cada càhnu ndí mee ndí te núu ducaⁿ ní quide ndí. ³ Te chí dándacu iní nàcuáa càháⁿ-xi núú tùtú Yá Ndiöxí núú càchí-xi: “Té Abrahám ní sàndáá iní-dé Yá Ndiöxí, te xiãⁿ ní cachí-gá sá cúdiu-dé núú-gã”, duha càchí-xi núú tùtú-gá. ⁴ Te sá cúhúⁿ yãhu ñⁿ téé quide chiuⁿ, te vá càchí-ó sã xiãⁿ cúu-xí ñⁿ táhú sã cúu-xí-dé chi yáhu tnàhí-dé cúu-xí. ⁵ Te vá yõo ñⁿ ndacu cada ñⁿ chiuⁿ nacuáa cudíu-xi núú Yá Ndiöxí. Te ñà

túu nă chiúⁿ xini ñuhu-xi cada ñáyu te cudiú-yu núu-gă, chi xini ñuhu-ni-xi sá quindáá-ni iní-yu-gá. Te diu-gá cächí-gá sá ñáyu ndècu ichi cuehé ichi duha vá cündècu-gá cuéchi-yu núu-gă, te núu na quindáá iní ñáhă-yu xii-gá. ⁶ Te diu-ni ducaⁿ ñi cáháⁿ ndíi Dàvií, chi ní cachí ndíi sá ìo váha táhú nchaa ñáyu ní cachí Yă Ndiöxí cudiú núu-gă, dico ñá díú cuendá ìⁿ chiúⁿ quidé-yu cudiú-yu núu-gă. ⁷ Te duha ní cachí ndíi:

Váha táhú nchaa ñáyu quide cahnu iní Yă Ndiöxí nchaa cuéchi-xi, te ñá túu-gă quidé cuendá-gá nchaa sá cuehé sá dúhá ní quidé-yu.

⁸ Váha táhú-yu chi Yă Ndiöxí cächí-gá sá ñá túu-gă cuéchi-yu.

Duha ní cachí ndíi Dàvií.

⁹ Te ñá díú mée-ni ñáyu ngündecu seña ñi-xi ducaⁿ váha táhú-yu, chi tnáhá ñáyu ñá túu ngündecu seña ñi-xi ducaⁿ váha táhú-yu. Te sa nàha-o sá Yă Ndiöxí ní cachí-gá sá cúdiu ndíi Àbrahám núu-gă cuendá sá ñi sándáá iní ñáhá ndíi xii-gá. ¹⁰ Te cunaha-ndo sá dîhna-gá ní cachí Yă Ndiöxí sá cúdiu ndíi Àbrahám núu-gă te dàtnùní ngündecu seña ñi ndíi. ¹¹ Te ní ngündecu seña ñi ndíi cuendá xíăⁿ cuu-xi ìⁿ seña sá cúdiu ndíi núu Yă Ndiöxí. Te ndéé cúnáhá vátá ngündecu-gá seña ñi ndíi, te sa cúdiu ndíi núu-gă chi ní sándáá iní ñáhá ndíi xii-gá. Te sá dúcáⁿ ñá túu ndècu seña

ñi ndíi cúnáhá ní sándáá iní ndíi Yă Ndiöxí xíăⁿ ní cuu ndíi dàtná ìⁿ dîhí dütú nchaa ñáyu sándáá iní ñáhá xii-gá, ñáyu ñá túu ní ngündecu seña ñi-xi, te cudiú-yu núu-gă. ¹² Te ndíi Àbrahám ní cuu tucu ndíi dàtná ìⁿ dîhí dütú nchaa ñáyu ní ngündecu seña ñi-xi, dico ñá díú cuendá-ni sá ñi ngündecu seña ñi-yu cùu ndíi dîhí dütú-yu, chi cuendá sá sándáá iní-yu Yă Ndiöxí nchícúⁿ nihnú-yu nàcuáa ní quide ndíi ní sándáá iní ñáhá ndíi xii-gá ndéé cúnáhá vátá ngündecu-gá seña ñi ndíi.

Yă Ndiöxí cada-gá nchaa nàcuáa ní cachí-gá te núu na quindáá iní-ó-gă

¹³ Te Yă Ndiöxí ní xáhaⁿ-gă xii ndíi Àbrahám sá ndúú táhú ndíi cunuu ndíi ñuyíú, ndíhi cue déhe ndíi, ndíhi nchaa dava-gá cue ñaní tnáhá ndíi vitna cacu túu. Te ducaⁿ ñi xáhaⁿ Yă Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gá núu xíăⁿ ní cudiú ndíi núu-gă. Te ducaⁿ ñi xáhaⁿ-gă xii ndíi dico ñá díú cuendá sá ñi quide ndíi nàcuáa ní xáhaⁿ Yă Ndiöxí xii ndíi Moisés cada ñáyu ndéé cuéé-gá. ¹⁴ Te núu mee-ni ñáyu nchícúⁿ nihnu quide nacuáa ní cáháⁿ ndíi Moisés ní ndúu táhú-yu cunúu-yu ñuyíú-a ní cùu ña, te ñá túu xini ñuhu-xi quindáá iní-ó Yă Ndiöxí, te ñá túu nandíhi tnúhu ní xáhaⁿ Yă Ndiöxí xii ndíi Àbrahám ní cùu te núu ducaⁿ. ¹⁵ Te núu ìⁿ ñáyu ñá túu quide nacuáa cáháⁿ

tnúhu sá sánú ìchi ñaha xii-o nacuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ní cùu ña, te ñá túú cuèchi-o ní cùu.

16 Te ducaⁿ ñí xáhaⁿ Yá Ndiöxí xii ndíi Àbrahám nàcuáa cada-gá, chi cuèdá sá ní sàndáá iní ñáhá ndíi xii-gá. Te ducaⁿ ñí quide-gá chi ío váha iní-gá, dico ñá díú sá ìⁿ chiuⁿ ní quide ndíi ducaⁿ ñí xáhaⁿ-gá. Te sá dúcáⁿ ñí cuu te cùu-xi ìⁿ tnúhu ndáá sá cúu-xí nchaa ñaní tnáhá ndíi, ñáyiu sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ní cuendá nchaa ñaní tnáhá ndíi nchìcùⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ñí cuu ndíi dàtná ìⁿ díhí dütú cue ñáyiu sàndáá iní ñáhá xii Yá Ndiöxí. 17 Te núu tütú Yá Ndiöxí càháⁿ-xi nàcuáa ní xáhaⁿ-gá xii ndíi, te duha ní xáhaⁿ-gá: “Yòhó té Àbrahám ní quide ñaha-ì xii-n dàtná ìⁿ díhí dütú cue ñáyiu xíndecu nihíi ñuyíú.” Duha ní xáhaⁿ Yá Ndiöxí xii ndíi, càhí-xi núu tütú-gá. Te Yá Ndiöxí náhá ndáá-gá sá cádá-xí nàcuáa ní xáhaⁿ-gá xii ndíi Àbrahám, te ñu-ni-gá cúu Yáá ní sàndáá iní ndíi, te ñu-ni-gá dándòto-gá ñáyiu ní xíhí, te ñu-ni-gá quidé tá ngündecu nchaa sá vátá cùndècu-gá ñuyíú-a.

18 Te Yá Ndiöxí ní xáhaⁿ-gá xii ndíi Àbrahám sá ío cuéhé ðehe ndíi coo, te ío ní sàndáá iní ndíi nàcuáa ní xáhaⁿ-gá dico ñá túú ní cùtnuní iní ndíi nása cada-gá, chi ío ní

sahnu ndíi. Te cuèdá sá dúcáⁿ ío ní sàndáá iní ndíi tnúhu ní xáhaⁿ-gá núu xiáⁿ ní cuu ndíi díhí dütú vài ñáyiu xíndecu nihíi ñuyíú. 19 Te ndíi Àbrahám ñúhu ndíi ìⁿ cièndú cuíá cùtnàhá ducaⁿ ñí xáhaⁿ Yá Ndiöxí xii ndíi, te ní cùtnuní iní ndíi sá ñà túú tàhú ndíi sá cóo ðehe ndíi ndíi ñadìhí ndíi ndíi Sàrá, chi ndíi ndùú-yu sa ní sahnu vèhí-yu, te cuèi ducaⁿ dico ní sàndáá-ní iní ndíi nàcuáa ní xáhaⁿ Yá Ndiöxí. 20 Te ñá túú ní sàni ìⁿ sani úú iní ndíi nàcuáa ní xáhaⁿ Yá Ndiöxí cada-gá sá cúu-xí ndíi, chi da uuⁿ-gá váha ní sàndáá iní ndíi nàcuáa ní xáhaⁿ-gá, te ní cachí ndíi sá ío càhnu cuu-gá. 21 Te ní cùtnuní ndáá iní ndíi sá Yá Ndiöxí ndácú-gá quidé-gá nchaa sá càháⁿ-gá. 22 Te sá ní sàndáá iní ndíi nàcuáa ní cáháⁿ Yá Ndiöxí, núu xiáⁿ ní cachí-gá sá cúu ndíi ìⁿ téé ñá túú cuèchi-xi núu-gá.

23 Te ní ngódó tnùní núu tütú Yá Ndiöxí cuèdá ndíi Àbrahám sá ñí cachí-gá sá ñà túú cuèchi ndíi núu-gá, te ñá díú-ní cuèdá mèé ndíi ní ngódó tnùní núu tütú-gá. 24 Chi tnàhá cuèdá-ó nchaa-o ní ngódó tnùní núu tütú-gá. Te càhí-gá sá ñà túú cuèchi-o núu-gá chi sàndáá iní-ó-gá, te ñu-gá cúu-gá Yáá ní dándótó ñaha xii Xítohó Jesucristú Yáá cúu Xítohó-ó.

25 Te Yá Ndiöxí ní cachí-gá sá díú Xítohó Jesucristú cuú-gá cuèdá nacháhu-gá nchaa cuèchi-o. Te ní xíhí-gá te ní ndoto-gá cuèdá nchaa-o vè cùndècu-gá cuèchi-o núu Yá

Ndiöxí te núu na quíndáá iní-ó-gă.

5

Ío váha tnàhá ñáyiu càchí Yă Ndiöxí sá ñà túú cuéchi-xi

¹ Te vitna, ñá túú-gă cuéchi-o ndècu núú Yă Ndiöxí chi sàndáá iní-ó Xítóhó Jesucristú, te ío váha ndècu ndìhi-o Yă Ndiöxí vitna sá cuèndá Xítóhó Jesucristú. ² Te cuèndá sá ni sàndáá iní-ó Xítóhó Jesucristú xiăⁿ diu-gá ní quide ní ngúndecu váha-o núú Yă Ndiöxí, te ducaⁿ-ni cùndecu-o, te ío cùdíí iní-ó chi ndècu ndìhi-o tnúhu ndee iní sá sàá nduu ngúndecu-o núú ío váha càa ndecu Yă Ndiöxí.

³ Te ñá díú-ní sá cuèndá sá ndúú tǎhú-ó cùndecu-o núú ndécú-gă cùdíí iní-ó, chi cùdíí iní-ó ndòho-o cuèndá-gă, chi cùtnuní iní-ó sá núu na ndòho-o cuèndá-gă te cunduu càhnu-gá iní-ó, ⁴ te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uuⁿ-gá tá ngúndecu ndìhi-o tnúhu ndee iní cuáháⁿ sá cádá váha ñaha Yă Ndiöxí xii-o. ⁵ Te núu ducaⁿ te vá ñáⁿ ndùu ndixi cuéchi iní-ó sá ndécú ndìhi-o tnúhu ndee iní ngúndecu váha-o. Te Espíritú sá ñí taxi Yă Ndiöxí ndécú ndìhi-o xiăⁿ quidé-xí cùtnuní iní-ó sá ío cùu iní ñáhá Yă Ndiöxí xii-o.

⁶ Te nchoo ñà túú vèdana ná ní ndàcu-o cada-o cuèndá dácácu nihnu-o mée-o, dico Xítóhó Jesucristú ní xihí-gă cuèndá-ó, ndìhi cuèndá nchaa dava-gă ñáyiu ñá túú tnàhá tnúhu ndìhi Yă Ndiöxí, te

ní xihí-gă mei ndùu taú-xi cuú-gă. ⁷ Te cudana-ni núu xihí ñáⁿ ñáyiu sá cuèndá ñáⁿ ñáyiu quide ndáá, te áma xihí tucu ñáⁿ-yu sá cuèndá ñáyiu quide váha tnàha ñáyiu-xi. ⁸ Te Yă Ndiöxí ní quide-gă sá nchóó cùtnuní iní-ó sá ío cùu iní ñáhá-gă xii-o, chi cùtnàhá ndécú-ó ìchi cuehé ìchi duha te ní tendaha-gă Xítóhó Jesucristú ní quixi-gă ñuyíú-a ní xihí-gă cuèndá-ó. ⁹ Te sá cuèndá sá ñí xihí Xítóhó Jesucristú xiăⁿ ñá túú-gă cuéchi-o ndècu núú Yă Ndiöxí, te vitna ní cùtnuní ndáá iní-ó sá vá dáquihíⁿ ñáhá-gă Yă Ndiöxí xii-o núú ùhú núú ndàhú sá cuèndá Xítóhó Jesucristú. ¹⁰ Te cùtnàhá ñá túú tnàhá tnúhu-o ndìhi Yă Ndiöxí ní cùu ní xihí Xítóhó Jesucristú Yaá cúú Dèhe-gă cuèndá cuu váha iní ñáhá-gă xii-o, te ducaⁿ te nduu tǎhú-ó cùndecu-o ndìhi-gă ni caa ni quihíⁿ cuèndá sá ñí ndoto Xítóhó Jesucristú. ¹¹ Te ndètu-o sáá nduu ngúndecu-o ndìhi-gă ni caa ni quihíⁿ, te ñá díú-ní xiăⁿ quidé-ó chi tnàhá cùdíí iní-ó Yă Ndiöxí, chi Xítóhó Jesucristú ní quide-gă ducaⁿ cùdíí iní-ó-gă, te diu-ni Xítóhó Jesucristú ní quide-gă ní nucúndecu váha-o ndìhi Yă Ndiöxí.

Nàcuáa ní quide ndíi Ádán ndìhi nàcuáa ní quide Xítóhó Jesucristú

¹² Te ndíi Ádán ñá túú ní quide ndáá ndíi núú Yă Ndiöxí núu xiăⁿ ní ngúndecu nchaa sá cuehé sá dúhá ñuyíú-a, te sá cuèndá

nchaa sá cuèhé sá dúhá quide ñáyiú xíáⁿ xihí-yu, te nchaa-yu xihí-yu chi nchaa-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dātnuní ní ngūndecu nchaa tnúhu sá ní chídó tnuní ndíi Moisés nācuáa ní xáhaⁿ Yá Ndiōxí cada ñáyiú, te nchoo cūtnuní iní-ó sá nūu ñá túú tnúhu sá sánú ichi ñaha xii-o nācuáa cada-o, te ñá túú cuéchi-o sánuu. ¹⁴ Te ndéé cūtnhá ní xindecu ndíi Ádán ní quesaha-xi xihí ñáyiú, te ducaⁿ-ni xihí-yu ndéé ní sáá nduu ní xindecu ndíi Moisés. Te ducaⁿ ní xihí-yu chi ní quidé-yu nchaa sá cuèhé sá dúhá cuéi ñá túú ní quidé-yu nācuáa ní quide ndíi Ádán, chi ndíi-áⁿ ñá túú ní sándáá iní ndíi nācuáa ní xáhaⁿ Yá Ndiōxí cada ndíi. Te ndíi Ádán ní cuu ndíi ñⁿ téé cūu cahnu ní xindecu ñuyíú-a, te sātá dúcáⁿ te ní quixi Xítohá Jesucristú te Yáá-áⁿ ío-gá cāhnu cuu-gá.

¹⁵ Te sá ní quide ndíi Ádán te vá cāchí-ó sá ñⁿ-ní cūu-xi ndihí sá ní cachí Yá Ndiōxí nduu táhú-ó vitna. Te sá ñá túú ní quide ndáá ndíi xíáⁿ nchaa ñáyiú xihí-yu, dico Yá Ndiōxí ío váha iní-gá chi ío váha ní quide-gá sá cúu-xí nchaa nchoo ñáyiú ndècu ñuyíú-a, chi dícó ducaⁿ ní cachí-gá sá nánihí tàhú-ó, te ñⁿ-ni téé tnàhá-dé ío váha ní quide-dé sá cúu-xí-ó, te téé-áⁿ cúu-dé Xítohá Jesucristú. ¹⁶ Te sá ní quide ñⁿ-ni ndíi Ádán ñá túú ñⁿ-ni cuu-xi ndihí sá ní quide Yá Ndiōxí sá cúu-xí-ó, chi ndíi-áⁿ ñá túú

ní quide ndáá ndíi núu-gá. Te sá dúcáⁿ ní quide ndíi te xíáⁿ ní cuu-xi cuéchi díhna nuu ní quide ndíi, núu xíáⁿ ní cachí Yá Ndiōxí sá cué ñáyiú quihíⁿ-yu núu úhú núu ndáhú nacháhu-yu nchaa sá cuèhé sá dúhá quidé-yu. Dico mee-gá ní quide sá cué ñáyiú naníhí tàhú-yu dícó-ni ducaⁿ, te ducaⁿ te vá cūndècu-gá cuéchi-yu núu-gá cuéi ío vai cuéchi-yu. ¹⁷ Te sá dúcáⁿ ñá túú ní quide ndáá ñⁿ-ni ndíi Ádán-áⁿ núu Yá Ndiōxí, xíáⁿ ní quide-xi xihí nchaa ñáyiú. Te sá cuendá sá ní quide ñⁿ-ni Xítohá Jesucristú xíáⁿ ío váha ní quide ñaha Yá Ndiōxí xii ñáyiú, chi dícó-ni ducaⁿ ní nduu táhú-yu cūdiú-yu núu-gá. Te nchaa ñáyiú ducaⁿ cūdiú núu-gá nduu táhú-yu cunúu-yu ndihí Xítohá Jesucristú cuendá sá ní quide-gá sá vāha sá cúu-xí-yu.

¹⁸ Te sá dúcáⁿ ní quide ndíi Ádán ñá túú ní quide ndíi nācuáa ní xáhaⁿ Yá Ndiōxí xii ndíi ñⁿ xito, núu xíáⁿ ní cachí-gá sá nchaa ñáyiú tàu-yu nacháhu-yu nchaa cuéchi-yu, dico Xítohá Jesucristú ní quide-gá ñⁿ sá vāha cuendá nchaa ñáyiú vá cūndècu-gá cuéchi-yu núu Yá Ndiōxí te núu na quindáá iní ñáhā-yu xii-gá, te ducaⁿ te cundecú-yu ndihí-gá ni caa ni quihíⁿ. ¹⁹ Te sá ñá túú ní sándáá iní ñⁿ-ni ndíi Ádán nācuáa ní xáhaⁿ Yá Ndiōxí xii ndíi, xíáⁿ ní nguínchicúⁿ nihnu nchaa ñáyiú quidé-yu nchaa sá

cuèhé sá dúhá. Te ducaⁿ ìⁿdii-ni Xítóhó Jesucristú ní quide-gá nàcuáa ní xáhaⁿ Yá Ndiòxí cuendá sá Yá Ndiòxí cachí-gá sá cúdiù-yu núú-gă.

20 Te Yá Ndiòxí ní xáhaⁿ-gă xii ndíi Moisés nàcuáa cada ñáyiú, te sá cuendá tnúhu-áⁿ uuⁿ-gá ní ngúita nchaa ñáyiú quidé-yu nchaa sá cuèhé sá dúhá, te Yá Ndiòxí uuⁿ-gá cundàhú iní ñáhá-gă xii-yu tucu. 21 Te sá cuendá nchaa cuéchi ñáyiú xiáⁿ xihí-yu, dico Yá Ndiòxí ío váha iní-gá chi diu-gá ní cachí-gá sá ncháá ñáyiú na tnàhá tnúhu ndihi ñaha xii-gá cudíù-yu núú-gă, te cundecú-yu ndihi-gá ni caa ni quíhíⁿ, te ducaⁿ chi Xítóhó Jesucristú ní quide-gá sá váha sá cúú-xí-yu.

6

Ñáyiú ñá túú-gă ndécú ichi cuehé ichi duha ndécú-yu cuendá Xítóhó Jesucristú

1 Te sá dúcáⁿ quide Yá Ndiòxí, te vá caní iní-ó cànchicúⁿ nihnu-ni-o ichi cuehé ichi duha, chi ñá díú sá cànchicúⁿ nihnu-o ìchi-áⁿ te ngóo càn iní-ó sá ío-gá cundàhú iní ñáhá-gă xii-o. 2 Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáyiú sa ní xihí, núú xiáⁿ vá cúú-gă canchicúⁿ nihnu-o ìchi-áⁿ. 3 Te sa nàha-o sá cuendá sá ñí sandute-o quèe-xi sá tnàhá tnúhu-o ndihi Xítóhó Jesucristú. Te sá ñí sandute-o quèe tucu-xi sá cúú-ó datná ñáyiú ní xihí ndihi-gá. 4 Te ñá díú-ní sá

ñí xihí-ó ndihi-gá chi quèe tucu-xi sá ñí nguindúxi-o ndihi-gá te ní ndoto-o datná ní ndoto mee-gă ní dándótó ñàha Dútú Ndiòxí Yaá ío cànnyu cuu, te ducaⁿ ñí cuu cuendá sá vă cundècu-gá-ó datná ní xindecu-o.

5 Te núú ìⁿ-ni cùu-o ndihi Xítóhó Jesucristú cuendá sá cúú-ó datná ñáyiú ní xihí ndihi-gá, te ndáá sá cúú-ó datná ñáyiú ní ndoto ní nguindecu váha datná ní ndoto mee-gă ní nucundecu váha-gá. 6 Te nchoo nàha-o sá cúú-ó ñáyiú ío ndècu cuéchi-xi ni cùu, dico sátá ñí cuu-o datná ñáyiú ní xihí datná ní xihí Xítóhó Jesucristú núú cùrúxí, te ndéé dàvá-áⁿ ñí dáñá-ó nchaa ichi cuehé ichi duha ndècu-o ni cuu, te ñá túú-gă cúnnyu sá cuèhé sá dúhá iní-ó. 7 Chi nchaa ñáyiú ní xihí ñá túú-gă ndécú-yu ichi cuehé ichi duha. 8 Te núú cùu-o datná ñáyiú ní xihí datná ní xihí Xítóhó Jesucristú ñá, te cùnnyú ndáá iní-ó sá cundècu-o ndihi-gá ni caa ni quíhíⁿ. 9 Te sa nàha-o sá Xítóhó Jesucristú ní xihí-gá te ní ndoto-gá te vá ìⁿ ndùu ìⁿ quíú-gă te cuú-gá, chi ñá túú năgá sá cadá cùú-gá. 10 Te Xítóhó Jesucristú ní xihí-gá ìⁿ xito-ni sá cuendá nchaa cuéchi nchoo ñáyiú ñuyíú, te vá ìⁿ ndùu-gá cuú-gá, te ndècu-ni-gá sá cúú-xí Yá Ndiòxí. 11 Núú xiáⁿ nchòhó cada iní-ndó sá datná sá ñí xihí-ndó vă cundècu-gá-ndó sá cúú-xí ìchi cuehé ichi duha, chi ndècu-ná-ndó sá cúú-xí Yá Ndiòxí, chi ní

tnahá tnúhu-ndo ndíhi Xítóhó Jesucristú Yáá cúú Xítóhó-ó.

12 Te núu xíáⁿ vá dáñá-gã-ndó cúnúu ní ìⁿ sá cuèhé sá dúhá ìní-ndó cuèdá sá vǎ cáda-gã-ndó ní ìⁿ sá cuèhé sá dúhá sàni ìní-ndó. 13 Te vá dáñá-ndó tàxi tnuní ñáhá ní ìⁿ sá cuèhé sá dúhá-ãⁿ xii-ndo cuèdá sá vǎ cáda-gã-ndó, te chí dáñá ná tàxi tnuní ñáhá Yǎ Ndiòxí xii-ndo, te chí dáñá ná chindee ñaha-gá cada-ndo mèe-ni sá vǎha, te ducaⁿ te cada ìní-ndó sǎ cúú-ndó dátá ñáyiú ní xíhí te ní ndoto ndècu. 14 Te ducaⁿ cáda-ndo chí vá ndácú-gã ní ìⁿ sá cuèhé sá dúhá tàxi tnuní ñáhá-xí xii-ndo, chí Yǎ Ndiòxí cundàhú ìní ñáhá-gã chindèe ñaha-gá xii-ndo. Te ducaⁿ chí ñá túú-gã cúnúu nchaa tnúhu sá ní chídó tnùní ndíi Moisés cada ñáyiú.

Ñáyiú nchìcúⁿ nihnu sá vǎha

15 Te ñá díú sǎ cundàhú ìní ñáhá Yǎ Ndiòxí xii-ó chindee ñaha-gá ndíhi sá ñà túú-gã cúnúu nchaa tnúhu ní chídó tnùní ndíi Moisés, te cachí-ó sǎ cúú-ní cundècu-o ichi cuèhé ichi duha. 16 Te nchoo xìní-ó sǎ núu na cuǎha-o tnúhu cunu cuechi-o núú ìⁿ ñáyiú cuíní cunu cuechi-o núú-xi, te cùu-ná-ó ñáyiú xínu cuechi núú-yu te quide-o nchaa chiunⁿ tahú-yu. Te ducaⁿ sǎtnahá-xi cùu nchaa ñáyiú quide nchaa sá cuèhé sá dúhá chí tàxi tnuní ñáhá-nǎ-xi xií-yu, te diu nchaa xíáⁿ dácuíta nihnu ñaha-xi xií-yu, te diu-ni ducaⁿ sǎtnahá-xi cùu nchaa ñáyiú sàndáá ìní ñáhá xii Yǎ Ndiòxí

chí tàxi tnuní ñáhá-gǎ xií-yu, te quide-yu nchaa sá vǎha nàcuáa cuíní mée-gǎ cáda-yu. 17 Te nchòhó ducaⁿ ní xóo cada-ndo nchaa sá cuèhé sá dúhá ní cùu, dico táxáhu xii Yǎ Ndiòxí chí vitna ní yùhu ní ìní-ndó quide-ndo nchaa nacuáa càháⁿ tnúhu-gá sá ní ngúndecu ndíhi-ndo. 18 Te vitna ñá túú-gǎ táxi tnùní ñáhá ní ìⁿ sá cuèhé sá dúhá xii-ndo, te quide-ná-ndó nchaa sá vǎha tàuchiunⁿ Yǎ Ndiòxí cada-ndo. 19 Te duha càháⁿ-í cuèdá cue ñáyiú xínu cuechi cuèdá sá nchòhó tecú tnùní-ndó nàcuáa ndùu tnúhu càháⁿ-í. Te nchòhó ní dáñá-ndó ní taxi tnùní ñáhá nchaa sá cuèhé sá dúhá xii-ndo, te ñá túú ní quide-ndo nacuáa ní càháⁿ Yǎ Ndiòxí cada-ndo chí da vǎha ní quide-ndo, te diu-ni ducaⁿ chí dáñá ná tàxi tnuní ñáhá Yǎ Ndiòxí xii-ndo vitna cuèdá cada-ndo mèe-ni sá vǎha nàcuáa cuíní mée-gǎ cada-ndo, te ducaⁿ te cuu-ndo ñáyiú quide ndáá cundècu núú-gǎ.

20 Te nchoo cǔtnahá ní xóo cada-o nchaa sá cuèhé sá dúhá ñà túú ní xóo cada-o ní ìⁿ sá vǎha cuíní Yǎ Ndiòxí cada-o. 21 Te dicó sácáⁿ-núú sǎñaha nchaa sá cuèhé sá dúhá-ãⁿ te núu na cáda-o, te ní ìⁿ sá vǎha vá nihí-ó te núu na cáda-o nchaa xíáⁿ, te diu nchaa xíáⁿ dácuíta nihnu ñaha-xi xii-ó. 22 Te vitna ñá túú-gǎ cúú-ó ñáyiú ndècu ichi cuèhé ichi duha, chí cùu-ná-ó ñáyiú quide nchaa nacuáa càháⁿ Yǎ Ndiòxí. Te sá dúhá quide-o cuu ndisa-xi ìⁿ sá vǎha sá cúú-xí-ó, te cùu-o ñáyiú quide ndáá ndécú-ó

nũú-gã vitna, te sáá nduu cùndecu-o ndihi-gá ni caa ni quihíⁿ. ²³ Te nchaa sá cuèhé sá dúhá dícó dácuita nihnu ñaha-xi xì-o, dico Yá Ndiõxí ní quide-gá sá dícó-ni ducaⁿ ndùu táhú-ó cùndecu-o ndihi-gá ni caa ni quihíⁿ, chi ní tnahá tnúhu-o ndihi Xítóhó Jesucristú Yaá cúú Xítóhó-ó.

7

Cuèndá ñáyiú tnãndaha

¹ Te nchaa nchòhó ñáyiú ndècu ndihi-í ichi Xítóhó Jesucristú sa nàha-ndo nacuaá càháⁿ tnúhu sá dánèhé ñáhá xii-o nacuaá cada-o cùndecu-o, chi tnúhu-áⁿ càháⁿ-xi dóho nchaa ñáyiú xíndecu vívú ñuyúú-a. ² Te nchaa ñáyiú dihi sa ndècu yí-xi, te diu tnúhu-áⁿ dánèhé ñáhá-xí xii-yu sá vã dáñã-yu yí-yu, dico núu na cúú yí-yu te ñá túú-gã ná càháⁿ tnúhu-áⁿ cuèndá-yu. ³ Dico núu vátá cúú-gá yí-yu te ñá túú ndùu váha-xi naquehéⁿ-yu ingá téé, dico núu na cúú yí-yu te quendóo mèé-yu, te ñá túú ñágá càháⁿ tnúhu sá dánèhé ñáhá xii-yu nácuaá cadá-yu te ducaⁿ te cuu naquehéⁿ-yu ingá téé, te ñá túú cùu-xi ñⁿ cuéchi.

⁴ Te nchòhó cue ñáyiú ndècu ndihi-í ichi Xítóhó Jesucristú cúú-ndó dàtná ñáyiú ní xihí dàtná ní xihí-gá. Te xíãⁿ ñá túú-gã táxi tnùnì ñáhá nchàa tnúhu ní chídó tnùnì ndíi Moisés xii-ndo. Te ducaⁿ ní cuu cuèndá nchòhó ngúndecu-ndo ndihi Xítóhó Jesucristú Yaá ní xihí ní cùu te

ní ndoto-gá. Te ducaⁿ ní cuu cuèndá nchaa nchoo ñáyiú ndècu ichi-gá cada-o nchàa nacuaá càháⁿ Yá Ndiõxí. ⁵ Te nchoo ní xíndecu-o ichi cuèhé ichi duha, te tnúhu sá sánú ichi ñaha xii-o nacuaá cada-o cùndecu-o cachí-xi sá ñá túú vãha cundecu-o ichi-áⁿ, te nchoo dà uuⁿ-gá ní quide-o nchàa sá cuèhé sá dúhá sã dúcáⁿ càháⁿ tnúhu-áⁿ, te sá dúcáⁿ ní quide-o te ta xita nihnu-o cuãháⁿ ní cùu. ⁶ Te vitna cada ini-ó sá cúú-ó dàtná ñáyiú ní xihí sá cúú-xí tnúhu sá dánèhé ñáhá xii-o nacuaá cada-o cùndecu-o, chi ñá túú-gã cùnùu-xi, te vitna mee-nã Espiritú Yá Ndiõxí chindèe ñaha-xi xii-o xinu cuechi-o núú-gã, te ñá diú cuèndá nchaa tnúhu sá ní ngúndee ndée dihna cada ñáyiú xinu cuechi-o núú-gã vitna.

Nchaa sá cuèhé sá dúhá ñúhu ini-í

⁷ Te cuéi duha càháⁿ-í dico vá cúú tnàhí càháⁿ-ó sã tnúhu sá sánú ichi ñaha xii-o nacuaá cada-o cùndecu-o ñá diú tnúhu váha cùu-xi. Te yúhú ñá túú cùtnunì ini-í ná cúú nchàa sá cuèhé sá dúhá ní cùu te núu ñá túú tnúhu-áⁿ ní càchí tnúhu-xi xii-í, te ni ñá túú cùtnunì tucu ini-í núu váha àdi ñá túú vãha sá nchídó ini-í sá ndécú ndihi tnahá ñáyiú-o ni cùu te núu ñá túú tnúhu-áⁿ ní càchí-xi sá vã cúú cùu ini-í sá ndécú ndihi-yu. ⁸ Te tnúhu-áⁿ ní dánèhé ñáhá-xí xii-í sá vã cúú càda-í ni ñⁿ sá cuèhé sá dúhá, dico sá cuèndá tnúhu-áⁿ uuⁿ-gá ducaⁿ ní sani ini-í ní quide-í. Te núu ñá túú tnúhu sá sánú ichi ñaha xii-o nacuaá cada-o cùndecu-o

ña, te ñá túú cùtnuní iní-í sá quide-í nándi sá cuèhé sá dúhá ní cùu. ⁹ Te cùtnàhá vátá nihí-gá-í tnúhu-áⁿ te ñá túú tnàhí ná sání iní-í ndécù-í ní cùu, dico sátá nì nihí-í tnúhu-áⁿ te ní cutnùní iní-í sá ndécú cuèchi-í, te ta xíta nihnu-í cuáháⁿ ní cùu. ¹⁰ Te núu ní quide-í nchaa nàcuáa càháⁿ tnúhu-áⁿ te sa ndéé ama-gá nanihí tãhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáháⁿ ní cùu. ¹¹ Te sá xíí tnúhu-áⁿ xíáⁿ uuⁿ-gá ní cunuu nchàa sá cuèhé sá dúhá nĩ dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáháⁿ ní cùu.

¹² Te tnúhu sá sánú ichi ñaha xii-o nacuáa cada-o cùndecu-o cuu-xi tnúhu ío yíñuhu ní taxi Yá Ndiõxí, te ìⁿ ìⁿ tnúhu-áⁿ cúu-xí mée-ni tnúhu váha, te ní ìⁿ tnúhu cuèhé tnúhu duha ñá túú ñuhu tnahá. ¹³ Te vá cúu càchí-í sá tnúhu váha-áⁿ nĩ quide-xi ta xíta nihnu-í cuáháⁿ ní cùu, chi nchaa sá cuèhé sá dúhá nĩ quide-í, xíáⁿ tá dàcuíta nihnu ñaha-xi xii-í cuáháⁿ ní cùu, te sá cuendá tnúhu váha-áⁿ ní cutnùní iní-í sá quide-í nchaa sá cuèhé sá dúhá, te xíáⁿ tá xíta nihnu-í cuáháⁿ ní cùu. Te sá cuendá nchaa nàcuáa càháⁿ tnúhu sá sánú ichi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tnúhu-áⁿ nĩ taxi Espíritú Yá Ndiõxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáyiu yíca cuèchi, te tàxi tñuní ñáhá nchàa sá cuèhé sá dúhá xii-o ní cuu. ¹⁵ Dico nchoo tnàhá iní-ó càda-o nchaa sá váha dico

ñá túú quide-o, te da nchaa sá ña túú tnàhá iní-ó càda-o quide-o, te ñá túú cùtnuní iní-ó nã cuendá ducaⁿ quide-o. ¹⁶ Te sá dúcáⁿ quide-o nchaa sá ña túú tnàhá iní-ó, te xíáⁿ ndíxí túu iní-ó sã tnúhu sá dúcáⁿ sãnu ichi ñaha xii-o nacuáa cada-o cùndecu-o cuu-xi tnúhu ío váha. ¹⁷ Te cùtnuní iní-ó sã nchàa sá cuèhé sá dúhá ñuhu iní-ó, xíáⁿ quide-xí dùcaⁿ quide-o sá ña túú váha, te ñá díú sã cáhú ìní mée-ó dùcaⁿ quide-o. ¹⁸ Te cùu-o cue ñáyiu sàni cuehé sání dùha iní-xi, te cuìní-ó càda-o nchaa sá váha dico ñá túú nihí ndéé-ó càda-o. ¹⁹ Te cuìní-ó càda-o nchaa sá váha dico ñá ndácú-ó, te ñá túú cuìní-ó càda-o datná quidé nchàa ñáyiu ndècu ichi cuehé ichi duha, chi ñáyiu-áⁿ mee-ni nchàa sá cuèhé sá dúhá quide-yu, dico ñu-ni nchaa xíáⁿ quide-ó tnàhá-ó. ²⁰ Te sá dúcáⁿ quide-o nchaa sá ña túú tnàhá iní-ó càda-o te ñá díú mée-o ducaⁿ çahu iní-ó quide-o, chi nchaa sá cuèhé sá dúhá ñuhu iní-ó xíáⁿ quide-xí dùcaⁿ quide-o.

²¹ Te ducaⁿ tnàhí yáha-o òrè cuìní-ó càda-o sá váha, chi da mee-ni nchàa sá cuèhé sá dúhá quide-o. ²² Te ío cùdíí iní-ó càda-o nchaa nacuáa càháⁿ Yá Ndiõxí, ²³ te dicó-ni sá ncháá sã cuèhé sá dúhá ñuhu iní-ó, xíáⁿ quide-xí ngàni ñaha-xi xii-o ñá túú quide-o sá váha sàni iní-ó càda-o, te ducaⁿ yáha-o chi nchaa sá cuèhé sá dúhá-áⁿ cùnùu-xi taxi tñuní ñáhá-xí xii-o.

²⁴ jTe ndàhú ní cuu nchoo! Chi vá yõo ìⁿ ní ndàcu cada nacuáa vá táxi tñuní ñáhá-gã

nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxáhu xii Yá Ndiöxí sá Xítohó Jesucristú ní quide-gá cuendá sá vǎ táxi tnùnì ñáhá-gǎ ni ìⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó càda-o nchaa nacuáa càháⁿ Yá Ndiöxí, dico núu nchaa sá cuèhé sá dúhá ná cùnnu-xi taxi tnuní ñáhá-xí xii-o, te ñu-ni nchaa xiáⁿ cada-o.

8

Ñáyi quide nchaa nacuáa càháⁿ Espíritú Yá Ndiöxí

¹ Te vitna nchaa nchoo ñáyi tnàhá tnúhu ndihi Xítohó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ìchi duha, chi mee-nǎ nchaa nàcuáa càháⁿ Espíritú Yá Ndiöxí quidé-ó. ² Te Espíritú Yá Ndiöxí-ǎ táxi tnùnì ñáhá-xí xii-o, te ducaⁿ chi ndècu ndihi-o Xítohó Jesucristú, te sá dúcaⁿ taxi tnuní ñáhá Espíritú-gá xii-o núu xiáⁿ ñá túú-gǎ táxi tnùnì ñáhá ni ìⁿ-gá sá cuèhé sá dúhá xii-o, te ducaⁿ quide Espíritú-gá cuendá sá vǎ cuíta nihnu-o, te ñu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhíⁿ. ³ Te nchoo ñá ní ndàcu-o cada-o nchaa nacuáa càháⁿ tnúhu sá sánú ìchi ñaha xii-o nacuáa cada-o cùndecu-o, núu xiáⁿ tnúhu-áⁿ ñá túú ní nihí ndéé-xí càda-xi cuendá sá nchóó vǎ cuíta nihnu-o. Dico Yá Ndiöxí ní tendaha-gǎ Déhe mee-gǎ ní quixi ñuyíú-a, te Yaá-áⁿ cúú-gǎ ìⁿ ñáyi, te

càa-gá dàtná cáá ñáyi ndècu cuèchi-xi xíndecu ñuyíú-a, te sá cuendá nchaa cuèchi nchaa nchoo ñáyi xíndecu ñuyíú-a ní quixi-gá, te ndéé dàvǎ-áⁿ ní quide-gá cuendá sá vǎ táxi tnùnì ñáhá-gǎ ni ìⁿ sá cuèhé sá dúhá xii-o. ⁴ Te ducaⁿ ní quide-gá cuendá nchoo nchicúⁿ nihnu-o quide-o nacuáa càháⁿ tnúhu sá sánú ìchi ñaha xii-o nacuáa cada-o, chi ñá túú-gǎ cùnùu ni ìⁿ sá cuèhé sá dúhá iní-ó, chi Espíritú Yá Ndiöxí-ñǎ táxi tnùnì ñáhá-xí xii-o.

⁵ Te nchaa ñáyi cùnnu nchaa sá cuèhé sá dúhá iní-xi mee-ni xiáⁿ ñúhú iní-yu te quidé-yu. Dico nchoo ñáyi quide nchaa nacuáa cuini Espíritú Yá Ndiöxí ñúhú iní-ó mèe-ni nacuáa càháⁿ Espíritú-gá-áⁿ te quide-o. ⁶ Te núu mee-ni nchaa sá cuèhé sá dúhá cùnnu iní-ó, te cuíta nihnu-o, dico núu mee-ni nchaa tnúhu càháⁿ Espíritú Yá Ndiöxí cùnùu iní-ó, te ío váha cuu iní-ó cùndecu-o ndihi-gá ni caa ni quíhíⁿ. ⁷ Te nchaa ñáyi ñúhu iní mee-ni sá cuèhé sá dúhá cùu úhú iní-yu Yá Ndiöxí, te ñá túú cuini-yu cadá-yu nàcuáa càháⁿ-gá, te ni ñá ndácü-yu cadá-yu. ⁸ Te nchaa ñáyi ducaⁿ cùnnu nchaa sá cuèhé sá dúhá iní-xi-áⁿ ñá túú cùdú-yu núu Yá Ndiöxí.

⁹ Te nchóhó chi ñá túú-gǎ cùnùu sá cuèhé sá dúhá iní-ndó, chi mee-nǎ nàcuáa càháⁿ Espíritú Yá Ndiöxí quidé-ndó, te ducaⁿ quide-ndo chi ndècu ndihi-ndo Espíritú-gá, te

dìu-ni Espiritú-gá-áⁿ nǐ tendaha Xítóhó Jesucristú véxi ndècu ndìhi-o, te nchaa ñáyiú ñá túú ndècu ndìhi Espiritú sá nǐ tendaha Xítóhó Jesucristú véxi ndècu ndìhi-o ñá túú ndècu ndìhi ñahá-yu xii-gá. ¹⁰ Te núu ndècu ndìhi-ndo Xítóhó Jesucristú, te cuèi na cùu yiqui cùñú-ndó sǎ cuendá nchaa sá cuèhé sá dúhá ió ñuyiú-a, dico iní-ndó chi cundecu ndìhi-xi Yá Ndiöxí chi ñá túú-gá cuèchi-ndo ndècu núú-gá. ¹¹ Te núu ndècu ndìhi-ndo Espiritú Yá Ndiöxí Yaá ní dándótó ñàha xii Xítóhó Jesucristú, te dìu-ni-gá cada te ndoto yiqui cùñú-ndó sǎ tá xíta nihnu cuáháⁿ núu na cùú-xi, te ducaⁿ chi ndècu ndìhi-ndo Espiritú-gá.

¹² Te nchòhó ñáyiú ndècu ndìhi-í ichi Xítóhó Jesucristú, ñá túú-gá tàù-ndó cùnuu ni ìⁿ sá cuèhé sá dúhá iní-ndó nàcuáa vá cùndècu-gá-ndó ichi cuehé ichi duha. ¹³ Chi núu na cùnuu sá cuèhé sá dúhá iní-ndó te cuíta nihnu-ndo, chi quíhíⁿ-ndó núú ùhú núú ndáhú. Dico núu òña-ndo mèe-ndo chindee ñàha Espiritú Yá Ndiöxí xii-ndo cuendá sá vǎ cùnùu-gá sá cuèhé sá dúhá iní-ndó ñá, te nduu táhú-ndó cùndecu-ndo ndìhi-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiú quide nchaa nacuáa sànu ichi ñàha Espiritú Yá Ndiöxí cùu-yu déhe-gá. ¹⁵ Te Espiritú sá nǐ taxi Yá Ndiöxí ndécú ndìhi-o ñá túú quide-xi sá nchóó yùhú-ó cùnu cuechi-o núú-gá, chi Espiritú-áⁿ quidé-xi sǎ nchóó cùu-o déhe-gá, te dìu-ni

Espiritú-áⁿ quidé xǎhaⁿ-o xii Yá Ndiöxí: “¡Yòhó Dútú Ndiöxí cùu-n Tátá méé-ndí!”, duha xǎhaⁿ-o xii-gá. ¹⁶ Te dìu-ni Espiritú-gá-áⁿ tnàhá tnùhu-xi ndìhi iní-ó, te càháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndiöxí xiáⁿ ní cachí-gá sá tnàhá-ó ndùu táhú-ó sǎ nǐ nduu táhú Xítóhó Jesucristú, te ducaⁿ ndùu táhú-ó te núu na càda ndee iní-ó ndòho-o datná ní ndoho Xítóhó Jesucristú, te núu ducaⁿ te ió cuu càhnu-o ndìhi-gá ni caa ni quíhíⁿ.

¹⁸ Te yùhú càchí-í sá ñá túú nǎ cada-xi cuèi ndòho-o cuendá-gá ndécú-ó ñuyiú-a, chi ió váha càa núú ndúú táhú-ó cùndecu-o na saá nduu. ¹⁹ Te nchaandi túhú sá nǐ cadúha Yá Ndiöxí ní taxi ndecu-gá ñuyiú-a ndètu cahnu-ná-xi saá nduu càchí-gá sá ió càhnu cuu nchaa déhe-gá. ²⁰ Te nchaa sá nǐ cadúha Yá Ndiöxí ní taxi ndecu-gá ñuyiú-a ní saá nduu ñá túú-gá cùú-xi sǎ vǎha sá cùú-xi-gá. Te ñá díú mèe sá nǐ taxi ndecu Yá Ndiöxí ñuyiú-a ducaⁿ ni sàni iní-xi cunduu, chi mee-gá ducaⁿ tnàhí ní cachí-gá cunduu sá saá nduu vǎ cùú-xi sǎ vǎha sá cùú-xi-gá, dico saá tucu nduu te nchaa xiáⁿ cuu tucu-xi sá vǎha sá cùú-xi-gá. ²¹ Te nchaa sá nǐ taxi ndecu-gá ñuyiú-a vá cùndùu-gá-xi dàtná cáá-xi vitna te ni vǎ dánàa-gá, chi nduu saa-xi te ngùndecu váha-xi dàtná ngùndecu váha nchaa cue déhe-gá. ²² Te nàha-o sá ncháandi túhú sá nchító nǐ cadúha Yá Ndiöxí ndécú ñuyiú-a ndòho-xi vitna

datná ndóhó ìⁿ ñadihí sa ní tnahá òré cacu dèhe-xi. ²³ Te ñá díú-ní nchàa sá dúcáⁿ ñí cadúha-gá-áⁿ ducaⁿ ndòho-xi, chi tnahá nchoo dùcaⁿ ndòho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiòxí Espíritú sá ñí cachí méé-gá nduu táhú-ó ðihnanuu. Te ío ndòho tnahá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùnú-ó, te cáháⁿ-gá sá cúú-ó dèhe-gá. ²⁴ Te Yá Ndiòxí ní quide-gá ní naníhí tàhú-ó nùu xíáⁿ ní ngúndecu ndihi-o tñuhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vá cúú cáháⁿ-ó sá cùndètu-o sá ndúú táhú-ó chi sa ndècu ndihi-o. ²⁵ Dico sá ndétú-ó ndùu táhú-ó cùu-xi sá vátá cùndècu ndihi-gá-ó, te xini ñuhu-ni-xi cada ndee-ni iní-ó cùndètu-o ndéé sáá nduu ndùu táhú-ó sá dúcáⁿ ñí cachí Yá Ndiòxí nduu táhú-ó.

²⁶ Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xini-ó cáháⁿ ndihi-o Yá Ndiòxí nàcuáa tàu-xi cunduu dico Espíritú-gá cáháⁿ ndàhú-xi núú-gá cuèndá-ó cuèi òré ñà níhí-ó tñuhu cáháⁿ-ó cuèndá nchaa sá ío cuini-ó cacáⁿ-ó núú-gá. ²⁷ Te Yá Ndiòxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cáháⁿ ndàhú-xi núú-gá cuèndá nchoo ñáyiu yindaha-gá, te cáháⁿ ndàhú-xi núú-gá nàcuáa cuini méé-gá cunduu.

Nchaa sá ná càda ñaha

ñáyiu te vá ndácú-yu nàdatùhú-yu iní-ó chi ndacu nahi-ni-o yàha-o nchàa sá ná cádá ñàhá-yu

²⁸ Te sa nàha-o sá Yá Ndiòxí quidé-gá sá ncháá sá yàha-o ndècu-o ñuyíú-a cùu-xi sá vàha sá cúú-xí nchòo cue ñáyiu cùu iní ñàhá xii-gá, chi cùu-o ñáyiu ní cáháⁿ-gá cundecu ndihi-gá datná ní cachí iní méé-gá. ²⁹ Te ndéé cùtnàhá vátá ngàva-gá ñuyíú, te Yá Ndiòxí sa nàha-gá nándi cùu ñáyiu cundecu ndihi-gá, te ðiu-ni ndéé dàvá-áⁿ ñí cachí-gá sá ñáyiu-áⁿ cunduu váha iní-yu datná váha iní Déhe mee-gá, te ducaⁿ ñí cachí-gá cuèndá sá Déhe mee-gá-áⁿ cunuu-gá núú nchàa ñáyiu cundecu ndihi-gá. ³⁰ Te nchaa ñáyiu ducaⁿ ñí cachí-gá cundecu ndihi-gá ndéé cùtnàhá vátá ngàva-gá ñuyíú cáháⁿ ñàhá-gá xii-yu vitna, te nchaa ñáyiu ducaⁿ cáháⁿ-gá cächí-gá sá ñà túú-gá cuèchi-yu ndècu núú-gá, te ðiu-ni ñáyiu-áⁿ cachí-gá sá ío cahnu cuú-yu.

³¹ Te vitna ní cutnùní iní-ó, te ñà túú nàgá caní iní-ó, chi Yá Ndiòxí ndécú ndihi ñaha-gá xii-o, te vá yòo ìⁿ-gá ndacu quehdé nihnu cuèndá sá vâ chindèe ñaha-gá xii-o. ³² Te Yá Ndiòxí ñà túú ní cùdí iní-gá Déhe-gá sá cùú-gá cuèndá nchaa nchoo ñáyiu xíndecu ñuyíú-a, te sá dúcáⁿ ndéè Déhe-gá ñà túú ní cùdí iní-gá xíáⁿ cùtnùní iní-ó sá táxi-gá nchaandi túhú sá xini ñuhu-o. ³³ Te vá yòo ìⁿ ndacu cacáⁿ cuèchi núú Yá

Ndiõxí cuendá nchaa ñáyiú ní cachí-gá cundecu ndihi-gá te núú ná cúú cuèchi-yu ndècu. Chi mee-gã càchí-gá sá ñà túú ndècu cuèchi-yu núú-gã.

³⁴ Te vá yõo ñⁿ ndacu daquihíⁿ ñáhá xii-o núú ùhú núú ndàhú, chí Xítóhó Jesucristú ní xihí-gá te ní ndoto-gá, te cuánda-gá núú ndécú Dütú Ndiõxí núcõo-gá xio cùha-gá, te ducaⁿ ño cùnnu-gá, te yacáⁿ càháⁿ ndàhú-gá núú Dütú Ndiõxí cuendá-ó.

³⁵ Te vá yõo ñⁿ ndacu cada ñaha xii-o ñⁿ sá ñà túú vãha cuendá sá vã cúú ñí ñáhá-gã Xítóhó Jesucristú xii-o, te ni tnúndòho tnúhu ndàhú, te ni sá ndihú iní-ó ñã cútñuní iní-ó nãsa cada-o cãcu nihnu-o ñⁿ sá ná yãha-o, te ni nchaa sá cáda ñaha ñáyiú sá cuendá-gá, te cuèi-ni sá vã nihí-ó sã cóhó sã cáxí-ó, te cuèi-ni sá vã nihí-ó dóo cuihnu-o, te cuèi ndècu-ná-ó sã yãha-o ñⁿ sá yãha-o, te cuèi sa ndècu-ná-ó sã cáhni ñáhá-yu, dico Xítóhó Jesucristú vá dáñá ndéé-gá sá cúú ñí ñáhá-gã xii-o. ³⁶ Te

quee ndáá-xi nãcuáa ní cáháⁿ ñⁿ tée ní xóo cáháⁿ tnúhu Yá Ndiõxí ndéé sanaha ñí ngódó tnùní núú tütú-gá núú càchí-xi:

Yòhó Dütú Ndiõxí nchaa-ni nduu nchaa-ni òré cuiní ñáyiú cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbéé cue quití sa ndècu túha-ná cahni-yu.

Duha ní cachí tée ní xóo cáháⁿ tnúhu-gá-áⁿ, te ducaⁿ

ñí ngódó tnùní núú tütú-gá.

³⁷ Te cuèi ducaⁿ nãndí sá ná càda ñáhá-yu xii-o, dico vá ndácú-yu nadatùhú-yu iní-ó chí ndacu nahí-ni-o yãha-o nchaa sá dúcáⁿ ná càda ñáhá-yu xii-o, te ducaⁿ chí Xítóhó Jesucristú Yá ío cùu iní ñáhá xii-o ndecu ndihi ñaha-gá chindèe ñaha-gá.

³⁸⁻³⁹ Te yúhú cútñuní ndáá iní-í sá ñí ñⁿ sá ío ñuyúú-a vá ndácú-xí càda-xi cuendá sá vá cúú ñí ñáhá-gã Yá Ndiõxí xii-o, te ni sã cùú-ó, te ni sã cùndècu-o ñuyúú-a, te ni ñⁿ espíritú sá ío cùnnu cundihi yucu ñávãha te ni ñⁿ dava-gá cue espíritú cùndihí-xi vá ndácú-xí càda-xi cuendá sá vá cúú ñí ñáhá Yá Ndiõxí xii-o. Te ni sã cúú ñuyúú-a vitna, te ni sã cúú ndéé cuéé-gá, te ni ñⁿ sá ndécú àndíu, te ni ñⁿ sá ndécú ñuyúú-a, te ni ñⁿ sá ñí cadúha mee Yá Ndiõxí, ni ñⁿ xiãⁿ vá ndácú-xí càda-xi cuendá sá vá cúú ñí ñáhá-gã xii-o chí ndècu ndihi-o Xítóhó Jesucristú Yá cúú Xítóhó-ó.

9

Yá Ndiõxí ní cachí-gá sá ñáyiú isràel cuú-yu ñáyiú canchicúⁿ nihnu ñaha xii-gá

¹ Te yúhú càháⁿ ndáá-í chí cùu-í ñⁿ tée ndècu ndihi Xítóhó Jesucristú, te ndècu ndihi-í Espíritú Yá Ndiõxí nũu xiãⁿ cútñuní iní-í sá càháⁿ ndáá-í. ² Te nchaa-ni nduu nchaa-ni òré ío ndihú iní-í, te ducaⁿ-ni ño quide úhú-xi iní-í ³ sá cuendá nchaa ñáyiú cùu ndí mee-í. Te núú dicó cúú-xí ñⁿ sá chindèe ñaha xií-yu nucúndecu váha-yu núú

Yă Ndiöxí ñá, te dàña-í mée-í dăcuíta nihnu ñaha Xítóhó Jesucristú nũu dicó sá cúú.
 4 Te nchaa ñáyiú cùu ndi mee-í-áⁿ cúú-yu ñáyiú isràél, te Yá Ndiöxí ní cachí-gá sá cúú-yu déhe-gá, te ní quide-gá năcuáa ní cutnùní iní-yu sá ïo cànhu cuu-gá, te ní cáháⁿ ndáá-gá núú-yu năcuáa cada ñaha-gă xii-yu, te ní xáhaⁿ-gă xii ndíi Moisés ní chídó tnùní ndíi năcuáa cadă-yu cundecú-yu. Te ní xáhaⁿ-gă xii-yu năcuáa cadă-yu cada cànhu ñahá-yu xii-gă, te ní xáhaⁿ tũcu-gă xii-yu nchaa năcuáa cada-gă ndéé cuèé-gă. 5 Te nchaa ñáyiú-áⁿ cúú-yu ñani tnáhá nchaa cue tée ní cunuu ní xindecu ndéé sanaha, te diu-ni ñani tnáhă-yu cùu Xítóhó Jesucristú Yaá ní tendaha Dütú Ndiöxí ní quixi ñuyiú-a, te tnáhă-gă cúú-gă Ndiöxí te ïo cunuu-gă, te nchaa nduu nchaa quiú ïo cànhu cuu-gă. Te ducaⁿ na cunduu.

6 Te vá cächí-ó să Yă Ndiöxí ñá túú ní quide-gă nchaa năcuáa ní cachí-gă cada-gă cuendá sá ñà túú sàndáá iní ñáhá dăva ñáyiú isràél xii-gă. Te sá dúcáⁿ xiquide davá-yu te ñá túú quidé-yu năcuáa tàú-xi cadă-yu sá cúú-yu ñáyiú isràél. Te ñáyiú ducaⁿ xiquide-áⁿ cúú-yu ñáyiú ñá túú cùu cuendá ñáhá Yă Ndiöxí. 7 Te cuèi nchaa-yu cúú-yu ñani tnáhá ndíi Àbrahám dico ñá túú quidé-yu nchaa năcuáa tàú-xi cunduu cadă-yu sá cúú-yu ñani tnáhá ndíi. Te Yá Ndiöxí ní xáhaⁿ-gă xii ndíi

Àbrahám: “Nchaa cue ñani tnáhá tē Isàac tē cùu déhe ducuⁿ-n, mee-ni cuè ñáyiú-áⁿ cuu ñani tnáhá-n”, duha ní xáhaⁿ-gă xii ndíi Àbrahám. 8 Te xǎⁿ cutnùní iní-ó să ñă ncháá ñáyiú cùu ñani tnáhá ndíi Àbrahám cúú-yu ñáyiú cùu cuendá Yă Ndiöxí, chi mee-ni ñáyiú sàndáá iní năcuáa ní cáháⁿ-gă cada-gă, ñáyiú-áⁿ cúú cuendá-gă. 9 Te duha ndũu tnũhu ní xáhaⁿ Yă Ndiöxí xii ndíi Àbrahám: “Sáá nduu te yúhú cada-í te coo ïⁿ déhe-n ndíi ñadihí-n tă Sărá”, duha ní xáhaⁿ-gă xii ndíi.

10 Te ñá díú-ni xǎⁿ ní quide Yá Ndiöxí, chi tnáhá ní ndatnúhu-gă ndíi ndíi Rèbecá cutnáhá vitna ñũhu úú déhe ndíi ndíi Isàac tē ní cuu ñani tnáhá-ó ní xindecu ndéé sanaha. 11-13 Te cutnáhá vitna ñũhu-gă déhe ndíi Rèbecá, cutnáhá vátá cadă-gă-güexi ni ïⁿ sá cuèhé sá dúhá, te ni ïⁿ sá văha, ní xáhaⁿ Yă Ndiöxí xii ndíi: “Déhe-n tēe díhna na căcu te tēe-áⁿ tnîi-dé nchaa tnũhu cáháⁿ déhe-n tēe cùu uú ná căcu”, duha ní xáhaⁿ-gă xii ndíi Rèbecá. Te ní quee ndáá-xi năcuáa ní cáháⁿ Yă Ndiöxí núú tütú-gă núú cächí-xi: “Té Jăcób ní cuu váha iní-í núú-dě, te té Esău ñá túú ní cùu váha iní-í núú-dě”, duha cächí-gă núú tütú-gă. Te ducaⁿ ní cuu chi ducaⁿ ní cachí mée-gă cunduu sá cáhăⁿ-gă nchaa ñáyiú cùní mée-gă, te ñá díú cuendá ïⁿ chiúⁿ quidé-yu cáhăⁿ ñáhă-gă xii-yu.

14 Te vá cúú tnáhí cáháⁿ-ó să Yă Ndiöxí ñá túú quide

váha-gá sá dúcáⁿ quide-gá chi mee-gã ío ndáá quidé-gã! 15 Te mee-gã ní xáhaⁿ-gã xii ndíi Moisés: “Cundàhú iní-í chindee-í mee-ni cuè ñáyiú cãchí iní-í”, duha ní xáhaⁿ-gã xii ndíi. 16 Te xiãⁿ cútnùní iní-ó sã cundàhú iní-gá ñáyiú chi ducaⁿ cuini méé-gã cunduu, dico ñá túú cundahú iní ñáhá-gã xií-yu cuendá sá dúcáⁿ cuini-yu cada-gá, te ni ñà túú cundahú iní ñáhá-gã xií-yu cuendá sá ío ndùcu ndeé-yu quidé-yu ìⁿ sá quidé-yu. 17 Te núú tütú Yã Ndiöxí cãháⁿ-xi nãcuáa ní xáhaⁿ-gã xii téé ní cuu Faráón téé ní xindaha nãcióⁿ Ègiptú, te duha ní xáhaⁿ-gã: “Yúhú ní quide-í yindàha-n ñáyiú cuendá cada-í titní núú sã cáda-í núú-n cuendá cutnùní iní-n sã ío cãhnu cuu-í, te ducaⁿ nchaa ñáyiú ñuyíú cutnùní iní-yu sá yúhú cúu-í Ndiöxí”, duha ní xáhaⁿ-gã xii téé ní cuu Faráón. 18 Te xiãⁿ cútnùní iní-ó sã Yã Ndiöxí cundàhú iní-gá mee-ni cuè ñáyiú cãchí iní méé-gã, te ducaⁿ ndàda díi-gá iní nchaa ñáyiú cãchí iní méé-gã ducaⁿ càda-gá.

19 Te sá dúhá cãháⁿ-í te dava-ndo quèsaha-ndo: “Ná cuendá Yã Ndiöxí dácàa-gá cuéchi díquí ñáyiú núú ni ìⁿ-yu ñá ndácü-yu quehndé nihnú-yu cuendá sá vã cáda Yã Ndiöxí nãcuáa cuini-gá”, quesaha-ndo. 20 Te chí cuãha cuendá sá dicó ñáyiú ñuyíú-a cùu-ndo te ñá túú ndùu váha-xi sá nchóhó cáháⁿ-ndó ìⁿ tnúhu sá ñà

túú ndùu váha sá cúu-xí Yã Ndiöxí. Te duha na cáháⁿ-í núú-ndó nãcuáa tecú tnùní-gã-ndó nãcuáa ndùu tnúhu cãháⁿ-í. Te ñá túú xini-ó sã ìⁿ quidi ñuhu cúñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. 21 Chi ñáyiú càdúha nchaa quidi-áⁿ cuu-ni cadúha-yu ndihi ñuhu cuéi nása na cunduu quidi cadúha-yu canehe chiúⁿ-yu, chi ìⁿ-ni ñuhu cadúha-yu quidi cánehe chiúⁿ-yu ndi tnahá nduu sãcáo-yu vico ndihi quidi sá cánehe chiúⁿ-yu nduu cùtexínu.

22 Te diu-ni ducaⁿ quide Yã Ndiöxí, chi cuini-gá dandòho-gã ñáyiú ñá túú quide nchaa nãcuáa nduu vétú iní-gá, te cada-gá nãcuáa cutnùní iní-yu sá ío cãhnu cuu-gá. Te sa ndècu túha-ná-yu sá quihíⁿ-yu núú ùhú núú ndàhú, te cuéi ducaⁿ dico ío ta quide cahnu iní-gá cuáháⁿ. 23 Te ducaⁿ quide-gá cuendá cutnùní iní nchaa ñáyiú ñuyíú sã ío váha quide-gá sá cúu-xí nchaa nchoo ñáyiú cundahú iní-gá, chi ní cachí-gá sá nchóó cuè ñáyiú cundahú iní-gá nduu táhú-ó cundecu-o ndihi-gá núú ío váha càa ndecu-gá. 24 Te dava nchoo ñáyiú ní cáháⁿ Yã Ndiöxí cúu-ó ñáyiú isràél, te dava-o cùu-o ñáyiú ñá túú cùu ñáyiú isràél. 25 Te ní quee ndáá-xi nãcuáa ní xáhaⁿ Yã Ndiöxí xii ndíi Òseás téé ní xóo cáháⁿ tnúhu-gá ndéé sanaha ní chídó tnùní ndíi núú tütú-gá núú cãchí-xi:

Ñáyiú ñá túú cùu cuendá-í ní cùu te nduu cuendá-í-yu,
te ñiú-ni ñáyiú-áⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

26 Te ñiú-ni ñuú núú dúcáⁿ nǐ cachí-í sá ñà túú ñáyiú cùu cuendá-í ñiú-ni ñuú-áⁿ coo ñáyiú cuu déhe yúhú Dútú Ndiöxí Yaá ndécú tũu andiú.

Duha ní xáhaⁿ Yá Ndiöxí xii ndíi Óseás ní chídó tnùní ndíi núú tütú-gá. 27 Te ndíi Cháíá téé ní xóo cáháⁿ tucu tnúhu Yá Ndiöxí ndéé sanaha nǐ cáháⁿ ndíi cuendá ñáyiú isràél, te duha ní cachí ndíi: “Cuéi cuéhé víhí ñáyiú isràél dàtná cuéhé ñuhu cúchí lámár dico sacú-ni-yu vá quíní-yu tnúndòho tnúhu ndàhú. 28 Te Yá Ndiöxí ío ndíhi cada-gá nchaa nàcuáa càháⁿ-gá ñuyíú”, duha ní cachí ndíi. 29 Te ní cáháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yaá táxí tnùní nchaandi túhú sá ío andiú ndíhi ñuyíú ñà túú ní dànaa-gá nchaa ñáyiú isràél, chí núu ni ndíhi-yu danàa ñaha-gá,

te nchoo cùu-o datná ní cuu nchaa ñáyiú ní xíndecu ñuú Sòdomá ndíhi nchaa ñáyiú ní xíndecu ñuú Gòmorrá, te ndíhi-o nàa datná ní naa nchaa ñáyiú-áⁿ ní cùu.

Duha ní cachí ndíi.

Ñáyiú isràél ñá túú sàndáá iní-yu tnúhu Xítóhó Jesucristú

30 Te sá cuendá xiáⁿ núu vitna càchí tnúhu-í xii-ndo sá cué ñáyiú ñà túú cùu ñáyiú isràél ñà túú ní nànducu nihnú-yu nàcuáa cadá-yu cudiú-yu núú Yá Ndiöxí, dico vitna cudiú-yu núú-gá chí ní sàndáá iní-yu Xítóhó Jesucristú. 31 Te ñáyiú isràél nchícúⁿ nihnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yá Ndiöxí dico ñá túú cudiú-yu núú-gá chí ñà ndácú-yu cadá-yu nchaa nàcuáa càháⁿ-xi. 32 Te ducaⁿ ñà túú cudiú-yu núú Yá Ndiöxí chí ñà túú sàndáá iní-yu Xítóhó Jesucristú, te sàni iní-yu sá sá cuendá mee-ni nchaa sá quidé mèé-yu cudiú-yu núú-gá, te sá dúcáⁿ quidé-yu te cùu-yu dàtná ñⁿ ñáyiú nguñenu ñⁿ yúú te nduá-yu. Te ducaⁿ sàtnahá-xi cùu-yu chí ñà túú cùu váha iní-yu núú Xítóhó Jesucristú. 33 Te quèe ndáá-xi nàcuáa ní cáháⁿ Yá Ndiöxí ñⁿ xichi núú tütú-gá núú càchí-xi:

Yúhú táxí ndècu-í ñⁿ téé ñuú Sión, te cuu-dé dàtná ñⁿ yúú, te yúú-áⁿ nguñenu ñáyiú te nduá-yu,

te nchaa ñáyiú na quíndáá iní ñáhá xii-dé, te vá ndíxí cuéchi iní-yu sá dúcáⁿ nǐ sàndáá iní ñáhá-yu xii-dé.

Duha càchí-gá núú tütú-gá.

10

1 Te nchòhò ñáyiú ndècu ndíhi-í ichi Xítóhó Jesucristú càchí tnúhu-í xii-ndo sá cáháⁿ

ndihi-í Yă Ndiöxí cuëndá ñáiyu israhél, chi ío cuini-í sá nánihí tǎhú-yu. ² Te na cǎháⁿ ndáá-í cuëndá-yu sá ío ndücu ndeé-yu xínu cuechí-yu núú Yă Ndiöxí, te dicó-ni sá ñà túú quidé-yu nǎcuáa cuini méé-gǎ cadá-yu. ³ Chi ñá túú quide cuendá-yu nǎcuáa cuini Yă Ndiöxí cada ñaha-gǎ xií-yu nǎcuáa cudíu-yu núú-gǎ, te quide-ní-yu nǎcuáa sǎni iní méé-yu cudíu-yu núú-gǎ te ñá túú cuini-yu tní-yu tnúhu cǎháⁿ-gǎ nǎcuáa cudíu-yu núú-gǎ. ⁴ Te Xítohó Jesucristú ní quide-gǎ cuendá sá vǎ cúnüu-gǎ nchaa tnúhu ní chídó tnúni ndíi Moisés, te nchaa ñáiyu na quindáá iní ñáhá xii-gǎ te ñu-gǎ cada te cudíu-yu núú Yă Ndiöxí.

⁵ Te ndíi Moisés cǎháⁿ ndíi núú tütú ndíi cuendá ñáiyu cuini cudíu núú Yă Ndiöxí cuendá sá nchícúⁿ nihnú-yu nchaa nǎcuáa ní cǎháⁿ ndíi. Te ní cachí ndíi sá nchǎá ñáiyu na cada nchaa nǎcuáa ní xáhaⁿ Yă Ndiöxí xii ndíi ní chídó tnúni ndíi te naníhí tǎhú-yu, te núú dicó ndacú-yu cadá-yu nchaa nǎcuáa ní cǎháⁿ ndíi. ⁶ Dico vitna núú na quindáá iní-ó Xítohó Jesucristú, te cudíu-o núú Yă Ndiöxí. Te duha cǎchí tnúhu ní chídó tnúni ndíi núú tütú-gǎ: “Vǎ cǎni iní-ndó sǎ xini ñuhu-xi cada-ndo íiⁿ sǎ vǎ yóo tnǎhí ndǎcu cada sǎ cǎá tǎu-ndo àndíu te cúñaha-ndo xii Cristú cuuⁿ-ndo ndihi-gǎ núú ñüyú-a. ⁷ Te ni vǎ cǎni tǎcu iní-ndó sǎ quihíⁿ tǎu-ndo núú xíndecu nchaa

ñáiyu ní xihí te cada-ndo sǎ Cristú ndoto-gǎ”, duha cǎchí tnúhu-áⁿ sǎ vǎ dúcáⁿ cǎni iní-ó. ⁸ Te cǎchí tǎcu tnúhu-áⁿ: “Tnúhu Yă Ndiöxí sǎ ndécú ndihi ñaha-xi xii-ndo chi sǎni iní-ndó cuendá tnúhu-áⁿ te cǎháⁿ-ndó”, duha cǎchí tnúhu-áⁿ. Te tnúhu sǎ ndécú ndihi-ndo-áⁿ cúu-xí tnúhu cǎháⁿ-ndíi núú ñáiyu, te xini ñuhu-xi sǎ quindáá iní-yu tnúhu-áⁿ. ⁹ Te núu na nǎnuu-ndo cǎháⁿ-ndó sǎ Xítohó Jesucristú cúu-gǎ Xítohó-ndó, te quindáá iní-ndó ñi yuhu ñi iní-ndó sǎ Yă Ndiöxí ní dándótó-gǎ Xítohó Jesucristú, te naníhí tǎhú-ndó te núu ducaⁿ na cada-ndo. ¹⁰ Te nchaa ñáiyu ducaⁿ sǎndáá iní te cǎháⁿ-yu sǎ Xítohó Jesucristú cúu-gǎ Xítohó-yu, ñáiyu-áⁿ cudíu-yu núú Yă Ndiöxí te naníhí tǎhú-yu.

¹¹ Te núú tütú Yă Ndiöxí cǎchí-xi sǎ ñi íiⁿ ñáiyu sǎndáá iní ñáhá xii Xítohó Jesucristú vǎ ndíxi cuéchi iní-yu sǎ dúcáⁿ sǎndáá iní ñáhá-yu xii-gǎ. ¹² Te sǎ cúu-xí Xítohó Jesucristú chi íiⁿ-ni cǎu ñáiyu israhél ndihi ñáiyu ñá túú cǎu ñáiyu israhél, chi ñu-gǎ cúu-gǎ Yaá cúnüu taxi tnuní-gǎ nchaa ñáiyu, te ío váha quide-gǎ sǎ cúu-xí nchaa ñáiyu cǎháⁿ ndihi ñaha xii-gǎ. ¹³ Te quèe ndáá-xi nǎcuáa cǎháⁿ-xi núú tütú Yă Ndiöxí núú cǎchí-xi: “Nchaa ñáiyu na cǎháⁿ ndáhú núú Xítohó Jesucristú sǎ dǎcǎcu nihnu ñaha-gǎ xií-yu, te ñáiyu-áⁿ naníhí tǎhú-yu”, duha cǎchí-xi núú tütú-gǎ.

14 Te ñáyi-u-áⁿ vǎ nihí-yu nàcuáa cáháⁿ ndàhú-yu núu-gǎ te núu ñá túú sàndáá iní ñáhǎ-yu xii-gá, te ni vǎ nihí-yu nàcuáa cadá-yu quindáá iní ñáhǎ-yu xii-gá te núu vátá cùndèdóho-gá-yu tnúhu-gá, te ni vǎ nihí-yu tnúhu-gá te núu vá yõ quíhíⁿ cùtnuhu ñaha xii-yu. 15 Te ni vǎ yõ quíhíⁿ ducaⁿ cùtnuhu ñaha xii-yu tnúhu-gá te núu Yá Ndiõxí vá téndàha-gá ñáyi-u quíhíⁿ cùtnuhu ñaha xii-yu. Te núu tùtú Yá Ndiõxí càchí-xi: “Ío vii ío váha cùu iní-ó vèxi ñáyi-u dǎnehé ñáhá xii-o nacuáa ndùu tnúhu sá càháⁿ nàcuáa naníhí tàhú-ó”, duha càháⁿ-xi núu tùtú-gá.

16 Te ñá ncháǎ-yu cuení-yu quindáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndíi Chàíá xii Yá Ndiõxí te duha ní xáhaⁿ ndíi xii-gá: “Yòhó Dútú Ndiõxí na nàcǎni tnúhu-í núu-n sǎ ío sacú-ni ñáyi-u sàndáá iní-yu tnúhu càháⁿ-ndí”, duha ní xáhaⁿ ndíi xii-gá. 17 Te xini ñuhu-xi sá dǐhna-gá cundedóho-yu tnúhu-áⁿ cuendá ducaⁿ te quindáá iní-yu, te tnúhu-áⁿ cúu-xi tnúhu Xítóhó Jesu-ristú.

18 Te vá cúu càháⁿ-ó sǎ ñà túú ní nihí ñáyi-u isràél tnúhu-gá, chi ncháá-yu ní nihí-yu tnúhu-gá, chi núu tùtú Yá Ndiõxí càchí-xi:

Cue téé ní càháⁿ tnúhu Yá Ndiõxí ní càháⁿ-güedé tnúhu-gá núu ñáyi-u, te tnúhu-áⁿ ní xité nuu-xi nihí ñuyú.

Duha càchí-xi núu tùtú-gá. 19 Te ni vǎ càháⁿ-ó sǎ ñáyi-u

isràél ñá túú ní cùu tnuní iní-yu nàcuáa ndùu tnúhu-gá chi ní tecú tnuní-yu. Te ndéé sanaha ñí chídó tnuní ndíi Moisés nàcuáa ní xáhaⁿ Yá Ndiõxí xii ñáyi-u isràél, te duha ní xáhaⁿ-gǎ xií-yu:

Yúhú cada váha-í nchaa ñáyi-u ñá túú cùu ñáyi-u isràél, ñáyi-u ñá túú cùtnuní iní-xi nàcuáa cada váha cundecu núu-í,

te nchòhó cudééⁿ-ndó núu-yu te cuu cuédú iní-ndó-yu.

Duha ní xáhaⁿ Yá Ndiõxí xií-yu te ducaⁿ ñí chídó tnuní ndíi Moisés. 20 Te ndíi Chàíá ñá túú tnàhí ní yùhú ndíi ní quide ndíi núu Yá Ndiõxí ní càháⁿ ndíi tnúhu-gá, te ní cachí ndíi:

Ñáyi-u ñá túú nànducu ñaha xii-í ní cùu ní naníhí ñáhǎ-yu xii-í,

te ni ñà túú ndùcu tnúhu ñáhǎ-yu xii-í ní cùu te ní xini ñáhǎ-yu.

Duha ní cachí ndíi Chàíá ní càháⁿ ndíi tnúhu Yá Ndiõxí. 21 Te ní quide tucu ndíi núu Yá Ndiõxí ní càháⁿ ndíi tnúhu-gá cuendá ñáyi-u isràél, te ní cachí ndíi: “Nchaa-ni nduu yíhí-í càháⁿ-í ñáyi-u isràél te ñá túú cuení-yu quindáá iní-yu chi ío sàá iní-yu”, duha ní cachí ndíi Chàíá ní càháⁿ ndíi tnúhu Yá Ndiõxí.

11

Cuendá ñáyi-u isràél ñáyi-u naníhí tàhú

1 Te cuéi ducaⁿ dícó vá càháⁿ-ó sǎ Yá Ndiõxí dáquèé tíhú-gǎ ñáyi-u isràél chi ñu-ni ñáyi-u-áⁿ cúu cuendá-gá, chi

yúhú tnàhá-í cúu-í mei tēe isràél, te ñaní tnàhá-í ní cuu ndíi Ábrahám tēe ní xíndecu ndéé sanaha v̄hi-gá, te diu-ni ñaní tnàhá-í ní cuu tucu ndíi Benjàmín. ² Te ndéé sanaha ðucaⁿ ní cachí Yá Ndiõxí sá nchũhú ñáyiú isràél cúu-ndí ñáyiú cùu cuendá-gá, te ñá túú dàquee tíhú ñáhá-gã xii-ndí, te nchòhó sa xíní-ndó nàcuáa càháⁿ-xi núú tütú Yá Ndiõxí núú càchí-xi nàcuáa ní quide té Eliás ní ndacáⁿ cuéchi-dé núú-gã cuendá ñáyiú isràél. ³ Te duha ní xáhaⁿ-dē xii-gá: “Yòhó Dútú Ndiõxí, ná nàcani tnúhu-í núú-n sã ní sahní-yu cue tēe càháⁿ tnúhu-n, te ní dátanú-yu núú xihí quiti ndùu táhú-n, te yúhú-nã ní cácu-í ndécù-í dico nànducu ñahá-yu chi tnàhá-í cuíní-yu cahni ñahá-yu xii-í”, duha ní xáhaⁿ-dē xii Yá Ndiõxí. ⁴ Te Yá Ndiõxí ní xáhaⁿ-gã xii-dé: “Sa ní dáqueé ðíⁿ-í úsá mìl cue tēe cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiõxí-yu te ñá ndàá sá ndiõxí cúu-xí”, duha ní xáhaⁿ-gã xii té Eliás. ⁵ Te ducaⁿ sãtnahá-xi cùu vitna chi xíndecu ñáyiú ní càháⁿ-gá ní chitnahá ñáhá xii-gá, te ducaⁿ ní quide-gá chi ní cundàhú iní ñáhá-gã xii-yu. ⁶ Te ducaⁿ ní càháⁿ ñáhá-gã xii-yu sá cúndàhú iní ñáhá-gã, te ñá díú cuendá ðíⁿ chiuⁿ quidé-yu ducaⁿ ní càháⁿ ñáhá-gã xii-yu, chi núú ðicó cuendá ðíⁿ chiuⁿ quidé-yu ducaⁿ ní càháⁿ ñáhá-gã xii-yu ña, te ñá díú-gã sá cúu

iní mée-gã ducaⁿ ní càháⁿ ñáhá-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuíní-yu cudíu-yu núú Yá Ndiõxí dico ñá ndácù-yu, dico dava ñáyiú ní càháⁿ-gã ñáyiú-áⁿ cudíu-yu núú-gã, te ñáyiú ducaⁿ ñà túú cùdiu núú-gã-áⁿ ïo ní cuu sàá iní-yu núú-gã. ⁸ Te ní quee ndáá-xi nàcuáa càháⁿ-xi núú tütú Yá Ndiõxí núú càchí-xi: “Yá Ndiõxí ní cachí-gá sá cúu-yu ñáyiú ïo ní ðíquí-xi, chi cuéi ndèhé-yu nàcuáa càháⁿ tnúhu-gá dico ñá cútnùní iní-yu nàcuáa càháⁿ-xi, te cuéi ndèdòho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tütú-gã. ⁹ Te ndíi Dàvíí ní cachí ndíi:

Ñáyiú ïo váha ndècu te cùdíi iní-yu quidé-yu vico, dico yáha-yu dàtná yáha ðíⁿ quiti ngáva trampá àdi ðíⁿ quiti ñá cútnùní iní-xi quèe xití ñunu, chi cuíta nihnú-yu te nacháhu-yu nchaa sá quidé-yu.

¹⁰ Te cúu-yu ñáyiú ñá túú vèdana tècú tnùní, te cùu tucú-yu dàtná ðíⁿ ñáyiú ïo ndòho nchido ðíⁿ sá vèe.

Duha ní cachí ndíi Dàvíí.

Ñáyiú ñá túú cùu ñáyiú isràél naníhí táhú-yu

¹¹ Te cuéi ducaⁿ dico vá càchí-ó sã sã dúcáⁿ ñà túú ní quide ndáá ñáyiú isràél te ní xíta nihnu duúⁿ-yu, te ñáhá chi sá dúcáⁿ ní quidé-yu te

ní ngúndecu ndihi dava-gá ñáyiú tnúhu sá càháⁿ nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudíí iní-yu naníhí tàhú-yu. ¹² Te sá dúcáⁿ nǐ quide sàá iní-yu ñá túú nǐ quide ndáá-yu núú Yá Ndiöxí, te xǎⁿ nǐ cuu-xi ìⁿ sá vâha sá cúú-xí ñáyiú nihíi ñuyúú, dico sáá nduu te cada ñáyiú isràél nchaa nàcuáa càháⁿ Yá Ndiöxí, te dâvâ-áⁿ ïo-gá váha cuu xii nchaa ñáyiú nihíi ñuyúú.

¹³ Te nchòhó ñáyiú ñá túú cùu ñáyiú isràél càchí tnúhu-í xii-ndo sâ Yá Ndiöxí nǐ cachí-gá sá càháⁿ-í tnúhu-gá núú-ndó, te yúhú càchí-í sá ïo càhnu cuu chiuⁿ quide-í. ¹⁴ Te duha càháⁿ-í cuendá sá nũu cudana ío dava ñáyiú cùu ndi mee-í cudíí iní-yu cada váha ñaha Yá Ndiöxí xii-yu dàtná quidé vâha ñaha-gâ xii-ndo, te naníhí tàhú-yu. ¹⁵ Te sá cuendá sá nǐ quee tíhú ñáyiú isràél nǐ nacáháⁿ cáhnú iní tnàhá ñáyiú nihíi ñuyúú ndihi Yá Ndiöxí, dico na sàá nduu núcúndecu váha ñáyiú isràél ndihi Yá Ndiöxí, te ío-gá váha tnàhá ñáyiú nihíi ñuyúú, te ñáyiú-áⁿ cada iní-ó sâ cúú-yu dàtná ñáyiú nǐ xíhí, dico dâvâ-áⁿ cada tucu iní-ó sâ cúú-yu dàtná ñáyiú nǐ ndoto chi núcúndecu váha-yu ndihi-gá. ¹⁶ Te núu sá lúhá-ní ìⁿ tílúlú yusaⁿ càvâha te ñu-ni ducaⁿ càvâha nihíi. Te núu càvâha yóho ìⁿ yutnu te ñu-ni ducaⁿ càvâha-xi nihíi-xi. Te ñu-ni ducaⁿ sâtnahá-xi cùu

ñáyiú isràél, chi ñani tnàhá-yu nǐ xíndecu ndéé sanaha nǐ cuú-yu ñáyiú nǐ cuu cuendá ñáhá Yá Ndiöxí, te ñu-ni ducaⁿ cùu cuendá ñáhá-gâ xii mèè-yu ndéé vitna.

¹⁷ Te ío ìⁿ yutnu váha nàni olívú, te dava dité yutnu-áⁿ nǐ téhndé te nǐ nucódó dité yutnu olívú cùtexínu, te mee-nâ yutnu olívú váha-áⁿ ïo váha quide-xi nchito dité yutnu olívú cùtexínu-áⁿ. Te dité nchaa yutnu olívú váha-áⁿ cúú-xí dàtná ñáyiú isràél, te nchaa dité-xi sá nǐ téhndé-áⁿ cúú-xí ñu-ni ñáyiú isràél ñáyiú ñá túú tnàhá tnúhu ndihi Yá Ndiöxí. Te dité yutnu olívú cùtexínu sá nǐ nucódó tnàhá-áⁿ cúú-xí dàtná ñáyiú ñá túú cùu ñáyiú isràél tnàhá tnúhu ndihi Yá Ndiöxí. ¹⁸ Te vá cání iní-ndó sâ sâ dúcáⁿ ndécu váha-ndo ndihi Yá Ndiöxí te ío cùnũu-ndo dacúúxí ñáyiú isràél, te vá dúcáⁿ càni iní-ndó chi sá cuendá nchaa ñani tnàhá ñáyiú isràél nǐ xíndecu ndéé sanaha ducaⁿ ndécu váha-ndo ndihi Yá Ndiöxí vitna, te ñá dǐú sâ cuendá nchòhó ndécú ndihi váha ñáyiú-áⁿ Yá Ndiöxí vitna.

¹⁹ Te cudana sàni iní-ndó te càchí-ndó sâ ñáyiú isràél nǐ quee tíhũ-yu cuendá sá nchòhó nucuíñi-ndó nũu-yu núcúndecu váha-ndo ndihi Yá Ndiöxí. ²⁰ Te ndáá sá nǐ quee tíhũ-yu chi ñá túú nǐ sàndáá iní ñáhá-yu xii-gá, te nchòhó ío váha cùu ndecu-ndo ndihi-gá chi nǐ sàndáá iní-ndó-gâ, dico vá càchí-ndó sâ ïo càhnu

cuu-ndo, te ío váha chí cuăha cuendá nàcuăa cundecu-ndo. ²¹ Te cue ñáyiú isrâél cúú-yu ñáyiú cùu cuendá-gá ní cùu te ní dáquéé tîhú ñáhá-gă xii-yu cuendá sá ñà túú ní sàndáá iní ñáhă-yu xii-gá, te tnáhá nchòhó daquèe tîhú ñáhá-gă xii-ndo te núu na càda-ndo datná ní quide ñáyiú-áⁿ. ²² Te chí cádá cuendá sá Yă Ndiôxí ío váha iní-gá, dico cùdééⁿ-gă núú nchàa ñáyiú ñá túú sàndáá iní ñáhá xii-gá, dico sá cúú-xí nchòhó cue ñáyiú sàndáá iní ñáhá xii-gá chí ío váha iní-gá. Te ducaⁿ-ni cùnduu váha iní-gá sá cúú-xí-ndó te núu vá dáñá ndéé-ndó càda-ndo nacuăa càháⁿ-gá cuendá sá ío váha iní-gá, te núu ñáhá te tnáhá nchòhó quee tîhú-ndó dàtná ní quee tîhú ñáyiú isrâél, ñáyiú ñá túú ní sàndáá iní ñáhá xii-gá. ²³ Dico núu ñáyiú isrâél ñáyiú ní dáquéé tîhú ñáhá Yă Ndiôxí quíndáá iní ñáhă-yu xii-gá te nduu cuendá ñáhá tùcu-gá xii-yu, te ñáyiú-áⁿ cúú-yu dàtná dava dité yutnu òlívú sá ñí téhndé te ní nucódó tnáhá tùcu. Te ducaⁿ sâtnahá-xi cúú-yu te núu na quíndáá iní ñáhă-yu xii-gá. ²⁴ Te nchòhó cúú-ndó dàtná nchaa dité yutnu òlívú cùtèxínu, chí ñá díú ñáyiú isrâél cúú-ndó, te dité nchaa yutnu òlívú cùtèxínu-áⁿ ñí nucódó-xi núú dité yutnu òlívú váha-áⁿ. Te yáchí-gá nucúndecu váha ñáyiú isrâél ndihí Yă Ndiôxí, chí cúú-yu dàtná nchaa dité yutnu

òlívú váha sá ñí téhndé te ní nucódó tnáhá tùcu. Te ducaⁿ sâtnahá-xi cúú-yu te núu na quíndáá iní ñáhă-yu xii-gá.

Sáá nduu te naníhí tàhú ñáyiú isrâél

²⁵ Te nchòhó ñáyiú ndècu ndihí-í ichi Xítóhó Jesucristú, na cächí tnúhu-í xii-ndo ñⁿ tnúhu nduu yuhu ní cuu, cuendá sá vă cání iní-ndó sá ío-gá váha sàá díquí-ndó dàcúúxí ñáyiú isrâél, chí dava ñáyiú isrâél cúú sàá iní-yu núú Yă Ndiôxí ñíni na ndihí ñáyiú ní cachí Yă Ndiôxí ngúndecu váha ndihí ñáhá-yu xii-gá, ñáyiú ñá túú cùu ñáyiú isrâél. ²⁶ Te nduu na ndihí ñáyiú-áⁿ ngúndecu váha-yu ndihí Yă Ndiôxí, te dàvâ-áⁿ naníhí tàhú ñáyiú isrâél chí quee ndáá-xi nàcuăa càháⁿ Yă Ndiôxí núú tùtú-gá núú cächí-xi:

Ndàa ñúú Sìón quixi Yaá cada naníhí tàhú nchaa ñáyiú,

te díu-ni Yaá-áⁿ cada-gá cuendá sá dáñá nchàa ñáyiú isrâél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiú isrâél, chí cada-í dàtná ní cachí-í ndéé sanaha.

Duha cächí Yă Ndiôxí núú tùtú-gá.

²⁸ Te sá cuendá tnúhu sá càháⁿ nàcuăa naníhí tàhú-ó xiáⁿ cúú ùhú iní ñáyiú isrâél Yă Ndiôxí, te sá dúcáⁿ quidé-yu xiáⁿ nchòhó ní níhí-ndó tnúhu sá càháⁿ nàcuăa naníhí tàhú-ndó. Te ní cachí Yă Ndiôxí sá ñáyiú isrâél cuu cuendá-gá, te cùu

iní ñáhá-ní-gă xii-yu, te ducaⁿ quide-gă chi ducaⁿ ñí xáhaⁿ-gă xii cue ñaní tnáhă-yu ní xíndecu ndéé sanaha. ²⁹ Te Yá Ndiöxí ñá túú nduu úhú iní-gă ñí sá táxí-gă, te ni ñà túú ndixi cuéchi iní-gă sá cáháⁿ ñáhá-gă xii-o. ³⁰ Te nchòhó chi ñá túú sàndáá iní-ndó Yá Ndiöxí ní cùu, dico vitna ñini ñà túú sàndáá iní ñáhá ñăyiu isràél xii-gă, te ní cundàhú iní ñáhá-gă ní dácăcu nihnu ñaha-gă xii-ndo núú úhú núú ndàhú. ³¹ Te vitna quidé-yu dàtná ní xóo cada nchòhó cútñahá ñá túú ní xóo quíndáá iní-ndó-gă. Dico sáá nduu te natuha ñáhá-yu xii-gă te dácăcu nihnu ñaha-gă xii-yu sá cundàhú iní ñáhá-gă dàtná ní quide ñaha-gă xii nchòhó. ³² Te Yá Ndiöxí ní dáñá-gă sá dúcáⁿ cunduu saá iní nchaa ñáyiu cuendá cuíní-gă cundàhú iní ñáhá-gă xii-yu.

³³ Te súúní vâha quide ñaha Yá Ndiöxí xii-o, te ío vâha xíní-gă nchaa cuéi sá ío andiu te cuéi sá ío ñuyíú-a, te ducaⁿ ío vâha saá nchaa sá xíní tnùní-gă. Te ñá ndácú-ó cùtnuní iní-ó nă cúú nchaa sá sání iní-gă cada-gă, te ni ñă ndácú-ó cùtnuní iní-ó năcuáa nduu cuendá nchaa sá quidé-gă. ³⁴ Te núú tütú-gă cächí-xi: “Vá yóo ñí cùtnuní iní-xi năcuáa sání iní Yá Ndiöxí, te ni vâ yóo ñí ndăcu dacahu iní ñáhá xii-gă năcuáa cáháⁿ-gă. ³⁵ Te Yá Ndiöxí ñá túú quide yica iní-gă cada-gă sá vâha sá cúú-xí ñăyiu cuendá ñí sá sãñáhá-yu xii-gă chi ñá túú dùcaⁿ quide-gă”, duha

cächí-xi núú tütú-gă. ³⁶ Te ducaⁿ chi mee Yá Ndiöxí ní taxi ndecu-gă nchaandi túhú sá ío ñuyíú, te diu-ni mee-gă táxi tnùní-gă nchaa sá ñí taxi ndecu-gă, te nchaa cùu-xi cuendá-gă. Te vitna chí ná cächí-ó sá ío cànnu cuu-gă ni caa ni quíhíⁿ. Te ducaⁿ na cunduu.

12

Cada-o năcuáa nduu vétú iní Yá Ndiöxí

¹ Te vitna nchòhó ñáyiu ndècu ndíhi-í ichi Xítohó Jesucristú cächí tnúhu-í xii-ndo sá Yá Ndiöxí cundàhú iní ñáhá-gă xii-o chindee ñaha-gă, núú xíáⁿ cáháⁿ ndàhú-í núú-ndó sá dáñá-ndó mee-ndo núú ndáhá-gă, te cada iní-ndó sá cúú-ndó dàtná ñí táhú sá nchító-ó ní nduu táhú-gă. Te cuu-ndo ñáyiu vâha ñáyiu cada nchaa năcuáa nduu vétú iní Yá Ndiöxí chi ducaⁿ tàú-ndó cada-ndo sá cúú-xí-gă. ² Te vá cánchezúⁿ nihnu-gă-ndó cada-ndo datná xíquide nchaa ñáyiu ndècu ichi cuehé ichi duha ndècu ñuyíú-a, te vá cùhúⁿ-gă iní-ndó ichi cuehé ichi duha-áⁿ, chí mee-nă sá vâha cuhuⁿ iní-ndó, te ducaⁿ te cutnùní iní-ndó nchaa năcuáa cuíní Yá Ndiöxí cada-ndo, te nchaa sá cuíní-gă cada-ndo cùu-xi mee-ni sá vâha, sá ío vâha nduu vétú iní-gă, te cùu-xi nchaa sá xíní ñúhu-xi cada-ndo núú-gă.

³ Te sá cuendá chiuⁿ ní cundàhú iní ñáhá Yá Ndiöxí ní taxi-gă xii-í xíáⁿ núu na cáháⁿ-í dóho-ndo vitna: Vá cání iní-ndó ñí sá ñá túú

tàu-ndó càni iní-ndó te cuc-ahaⁿ-ndo sã ío càhnu cuu-ndo. Te nchòhó ní sãndáá iní-ndó Yã Ndiõxí nũu chindee ñaha-gá xii-ndo, te vitna chí cuãha cuendá nũu ná daha núú chiun-gá ndacu-ndo càda-ndo.

4 Te nchoo tìtní xichi cùu yiqui cuñú-ó, te ndi d̃íⁿ ndi d̃íⁿ chiun guide-xi ìⁿ ìⁿ-xi.

5 Te ducaⁿ sãtnahá tucu-xi cùu nchoo ñáyiu ndècu ndihí Xítóhó Jesucristú chi cuèi ná daha tnáhá-ó dico ìⁿ-ni cùu-ó ndihí-gá, te ducaⁿ mèe-o tucu ìⁿ-ni cùu-o.

6 Te mee Yã Ndiõxí ní cundáhú iní ñáhá-gã xii-o ní taxi-gá chiun taú-ó càda-ó ìⁿ ìⁿ-o te chindee ñaha-gá xii-o, te xini ñuhu-xi cada-o nacuáa ndũu chiun ní taxi-gá cada-o. Te núu ní nduu táhú-ó nũú-gã sã cáháⁿ-ó tnũhu sã dácàhu iní ñáhá mèe-gá xii-o te cáháⁿ-ó nacuáa sãndáá iní-ó chindee ñaha-gá xii-o,

7 àdi ní nduu táhú-ó nũú-gã sã ío váha chindee-o tnàha ñáyiu-o te ðiu-ni ducaⁿ càda-o, àdi ní nduu táhú-ó d`anehé-ó ñáyiu tnũhu-gá te ðiu-ni ducaⁿ càda-o, 8 àdi ní nduu táhú-ó nũú-gã sã dácáháⁿ-ó ñáyiu canchicúⁿ nihnú-yu ichi-gá te ðiu-ni ducaⁿ càda-o, àdi ní nduu táhú-ó nũú-gã sã cuãñaha-o xii tnaha ñáyiu-o sã nihí-ó ndècu ndihí-o te ðiu-ni ducaⁿ càda-o, dico ni yũhu ni iní-ó cuãñaha-o xii-yu, àdi ní nduu táhú-ó nũú-gã taxi tnùní-ó te ðiu-ni ducaⁿ càda-o, te ni yũhu ni iní-ó càda-o, àdi ní nduu táhú-ó nũú-gã chindee-o cuè ñáyiu ndècu ndihí tnúndòho tnũhu ndáhú te ðiu-ni ducaⁿ càda-o, te ío

cud̃íⁿ iní-ó càda-o chiun-áⁿ.

Nchaa nacuáa tàu-xi cada nchaa ñáyiu ndècu ichi Xítóhó Jesucristú

9 Te cuu iní tnáhá ndisa-ndo ìⁿ ìⁿ-ndo, te dañá-ndo nchàa sã cuèhé sã dúhá te cada-ndo mèe-ni sã váha. 10 Te ío cuu iní tnáhá-ndó, te cada-ndo cuendá sã ìⁿ-ní ñáyiu cùu-ndo, te ìⁿ ìⁿ-ndo càni-gá iní-ndó cànehe yĩnhu núú tnáhá-ndó.

11 Te nducu ndèe-ndo cada-ndo nchaa chiun tahu Xítóhó Jesucristú vá tũhío-ndo, te cada-ndo nĩ yuhu ni iní-ndó sã cúú-xi-gã.

12 Te ío cud̃íⁿ iní-ndó cùndecu-ndo chi ní ngùndecu ndihí-ndo tnũhu ndee iní sã cùndècu ndihí-ndo Xítóhó Jesucristú, te cada càhnu iní-ndó cuèi nãndi na càda ñaha ñáyiu xii-ndo sã cuendá-gá, te vá dañá ndèe-ndó cáháⁿ ndihí-ndo Yã Ndiõxí.

13 Te chindee tnàha-ndo te núu ío dava nchòhó ñáyiu ndècu ichi-gá ío ìⁿ sã cúmãní xii-ndo, te ío váha cuu iní-ndó còto-ndo ñáyiu véxi vehe-ndo.

14 Te cãcáⁿ táhú-ndó nũú Yã Ndiõxí cuendá nchaa ñáyiu nãndi quide ñaha xii-ndo, te cãcáⁿ táhú-ndó nũú-gã sã ná chindee ñaha-gá xii-yu te ñá d̃íú dà cãcáⁿ táhú-ndó nũú-gã sã ná dàcuíta nihnu ñaha-gã xií-yu.

15 Te núu ío ñáyiu cud̃íⁿ iní-xi te cud̃íⁿ iní-ndó ndihí-yu, te núu ío ñáyiu ndihú iní-xi te ndihú iní-ndó ndihí-yu.

16 Te cuu ìⁿnuu-ndo cùndecu-ndo, te vá cãdá càhnu-ndo mee-ndo, te tnahá

tnúhu-ndo ndìhi nchaa ñáyi
ndàhú iní-xi, te vá cání
iní-ndó sã ïo-gá túha-ndo.

17 Te vá nánchòcáva-ndo
nàchinaa-ndo ìⁿ sá quidé
ñàha ñáyi xii-ndo, te ío
nducu ndèe-ndo cada-ndo
mee-ni sá vãha nàcuáa cuu
váha iní ñáyi. 18 Te ío

nducu ndèe-ndo cada-ndo sá
ndácú-ndó cundecu váha-ndo
ndìhi nchaa ñáyi. 19 Te

nchòhó ñáyi ío cùu iní-í, vá
cání iní-ndó nàchinaa-ndo ìⁿ
sá cáda ñàha ñáyi xii-ndo,
chì cundetu-ndo sã mée Yã
Ndiòxí ná nàchinaa-gá sá
quidé ñàhá-yu xii-ndo, chì
quee ndáá-xi nàcuáa càháⁿ
Yã Ndiòxí núú tütú-gá núú
càchí-xi: “Yúhú dandòho-í-yu
chì nachinaa-í nchaa sá
quidé-yu”, duha càchí-gá
núú tütú-gá. 20 Te xìni ñuhu

tucu-xi cada-ndo nacuáa
càháⁿ tucu-xi ingá xichi núú
tütú-gá núú càchí-xi: “Te
núú ñáyi cùu úhú iní ñàhá
xii-ndo ñá túú sã cóhó sã
cáxi-yu te cuãñaha-ndo xii-yu,
te núú ducaⁿ na càda-ndo
te ío cucahaⁿ núú-yu”, duha
càchí-xi núú tütú-gá. 21 Te

núú ío ìⁿ sá quidé ñàha
tnaha ñáyi-ndo xii-ndo te vá
nánchòcáva-ndo nàchinaa-ndo
sá quidé ñàhá-yu xii-ndo,
chì cada-ndo sã vãha sá
cúú-xi-yu, te ducaⁿ te vá
cáda-ndó sã ñà túú tàú-ndó
càda-ndo núú Yã Ndiòxí dàtná
quidé-yu.

13

1 Te nchaa ñáyi tàú-yu
quindáá iní-yu nchaa cue
tée cùchiuⁿ, chì Yã Ndiòxí
ní cachí-gá sá cundècu tée

cùchiuⁿ ñuyíú-a, núú xíãⁿ
xĩndecu-güedé vitna. 2 Te

nchaa ñáyi ñá túú sàndáá
iní ñàhá xii cue tée cùchiuⁿ
ñá túú tnàhá iní Yã Ndiòxí sá
dúcáⁿ quidé-yu, chì mee-gã
ní cachí-gá sá cundècu-güedé.

Te nchaa ñáyi ducaⁿ ñà
túú sàndáá iní ñàhá xii cue
tée cùchiuⁿ nacháhu-yu sá
dúcáⁿ quidé-yu. 3 Te nchaa

ñáyi quide váha ñá túú
yùhú-yu cue tée cùchiuⁿ

chì quide váha-yu, dico

nchaa ñáyi ñá túú quide

váha chì xiyùhú-yu cue tée
cùchiuⁿ. Te vitna núú nchòhó

cuiní-ndó sã vã yùhú-ndó
cuè tée cùchiuⁿ te chí cáda

vãha, te ducaⁿ te càháⁿ
váha-güedé cuendá-ndó. 4 Te

Yã Ndiòxí ducaⁿ ñí cachí-gá
cundecu-güedé cuendá

cada-güedé sá ñà túú ñã cuu

cundecu-ndo, te núú ñá túú
quide váha-ndo ndècu-ndo te

quiyùhú iní-ndó núú-güedé,
chì ñá túú àúⁿ ñã cuu ndècu

ndìhi-güedé tnúhu ndee iní
dandòho-güedé nchaa ñáyi

ñá túú quide váha, chì Yã
Ndiòxí ducaⁿ ñí cachí-gá

cundecu-güedé sá dúcáⁿ
càda-güedé dandòho-güedé

nchaa ñáyi ñá túú quide
váha. 5 Núú xíãⁿ ío xìni

ñuhu-xi sá quindáá iní-ndó
nchaa cue tée cùchiuⁿ, te ñá

díú sã yùhú-ndó dandòho
ñaha-güedé xii-ndo, chì

cada-ndo sã cùtnùní iní-ndó
sã cúú-xi ìⁿ sá vãha. 6 Chì

díu cuendá xíãⁿ sàcáⁿ-ndó
dìhúⁿ núú cuè tée cùchiuⁿ, te

ducaⁿ chì Yã Ndiòxí ducaⁿ ñí
cachí-gá cundecu-güedé te
dìu-ná chìuⁿ ndeé-güedé ñúhú

iní-güedé.

7 Te nacháhu-ndo nchàa sá tàú-ndó nǔú nchàa ñáyiú tàú-ndó nǔú-xi, te cuéi díhúⁿ tàú-ndó cuèndá ñuhu-ndo nǔú cuè téé cùchiuⁿ àdi nágá díhúⁿ tàú-ndó nǔú-güedé te nacháhu-ndo nǔú-güedé. Te ío-gá canehe-ndo sǎ yíñùhu núú nchàa ñáyiú cùnuu, te cáháⁿ váha-ndo ndìhí-yu. 8 Te vá dácuidó-ndó ndùu nacháhu-ndo sǎ tàú-ndó nǔú tnàha ñáyiú-ndo, te cuu iní tnáhá-ndó ìⁿ ìⁿ-ndo. Te núu ducaⁿ quíde-ndo ndecu-ndo ña, te quíde-ndo nchaa nacuaá cáháⁿ tnúhu sá sánú ìchi ñaha xii-o nacuaá cada-o cùndecu-o. 9 Te duha ndùu tnúhu cáháⁿ Yǎ Ndiòxí cuèndá nchaa sá vǎ cúú càda-o: “Nchaa nchòhó cue téé vǎ cáháⁿ ndìhi-ndo ñáyiú dìhí te núu ñá díú ñàdìhí-ndó cúú-yu, te ducaⁿ-ni nchàa nchohó cue ñáyiú dìhí tucu vǎ cáháⁿ ndìhi-ndo téé te núu ñá díú yì-ndo cuu-güedé, te vǎ cáhni-ndó tnàha ñáyiú-ndo, te vǎ dúhú-ndó sǎ ndécú ndìhí-yu, te vǎ dácàcu-ndo cuéchi neñúú, te vǎ xihó-ndó sǎ ndécú ndìhi tnaha ñáyiú-ndo”, nchaa xéhé càchí Yǎ Ndiòxí sá vǎ cúú càda-o. Te tnúhu-a quíde-o ndìhi nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quíde-o ingá tnúhu sá càchí-xi: “Cuu iní-ndó nchàa tnaha ñáyiú-ndo dàtná cúú iní-ndó mèe-ndo”, duha cáháⁿ tnúhu-áⁿ. Te nchaa dava-gá quíde-ó te núu quíde-o nacuaá cáháⁿ tnúhu-a. 10 Te nchaa ñáyiú cùu iní tnàha ñáyiú-xi

te ñá túú quíde úhú iní-yu tnàha ñáyiú-yu, te núu ducaⁿ cùu iní-yu tnàha ñáyiú-yu te quíde-yu nàcuáa cáháⁿ tnúhu sá sánú ìchi ñaha xii-o nacuaá cada-o cùndecu-o.

11 Te ducaⁿ xini ñuhu-xi cada-ndo chí sa ní cutnùní iní-ndó nàcuáa ta xica nduu cuáháⁿ ñuyíú-a, te ní sáá nduu sá ío xini ñuhu-xi ndixi túu iní-ó càda-o nchaa nacuaá cáháⁿ Yǎ Ndiòxí, chí vitna sa ní cuyatni-gá nduu nàcuaca ñaha Xitohó Jesucristú xii-o dàcúúxí ndèé cùtnáhá ní sándáá iní-ó tnúhu-gá. 12 Te cada iní-ndó sǎ dàtná ìⁿ niú sá sá ta cuyatni túndaá, ducaⁿ sǎtnahá-xi cùu ñuyíú yíca cuéchi-a chí sa ta cùyatni nduu quixi tucu Xitohó Jesucristú, te núu xǎⁿ xini ñuhu-xi dañ-a nchaa sá cuèhé sá dúhá te cada-o mèe-ni sá vǎha, te ducaⁿ te ni ìⁿ sá cuèhé sá dúhá vǎ cùnùu-xi taxi tnuní ñáhá-xi xii-o, te ducaⁿ te vǎ cúú-gǎ-ó dàtná ñáyiú ndècu núú néé chí cuu-ná-ó dàtná ñáyiú ndècu núú ditó. 13 Te cada-o nchàa nacuaá tàú-xi cunduu cundecu-o dàtná tàú-xi cada ñáyiú ndècu ìchi Xitohó Jesucristú, te vǎ quíhíⁿ-ó víco cuehé víco duha, te vǎ cúú-ó ñáyiú quíhu, te ni vǎ cáháⁿ ndìhi-o ñáyiú dìhí te núu ñá díú ñàdìhí-ó cúú-yu, te ducaⁿ-ni cuè ñáyiú dìhí tucu vǎ cáháⁿ ndìhí-yu téé te núu ñá díú yì-yu cùu-güedé, te ni vǎ cùndècu-o ìchi díí iní, te ni vǎ nàá-ó ndìhi tnaha ñáyiú-o, te ni vǎ cúú-ó ñáyiú cuédú iní. 14 Te vitna nchòhó dañ-ndo mèe-ndo sá Xitohó Jesucristú

ná chindee ñaha-gá xii-ndo càda váha-ndo cùndecu-ndo datná quidé mèe-gá ndécú-gã, te vá cání-gã iní-ndó càda-ndo datná ní xóo cada-ndo cùtnhá ní cunu nchaa sá cuèhé sá dúhá iní-ndó.

14

Vá cuátnùhu tñaha-o nacuáa ndècu-o ichi Xítohó Jesucristú

¹ Te núu ìn ñáyiú ndècu ichi Xítohó Jesucristú ñá túú tècú tnùnì váha-yu nàcuáa cuìnì Yã Ndiöxí cadá-yu, te queheⁿ cuendá-ni-ndó-yu te vá ténáá tnáhá-ndó ndìhí-yu. ² Chi íó ñáyiú sàni iní sá cúú vâha iní Yã Ndiöxí sá cúú càxí-yu nâni nihí-yu, te dava ñáyiú ñá túú cùtnuní váha iní-yu nàcuáa càháⁿ Yã Ndiöxí te mee-ní yúcú xéxi-yu. ³ Te ñáyiú xèxi nchaa núú sã nihí-yu te vá dáquèe tíhũ-yu ñáyiú ñá túú xèxi, te ducaⁿ-ni ñáyiú ducaⁿ ñà túú xèxi-áⁿ vã cuátnùhú-yu nchaa ñáyiú ducaⁿ xèxi nchaa núú sã nihí-xi-áⁿ, chi tnáhá ñáyiú ducaⁿ xèxi nchaa núú sã nihí-xi-áⁿ quéhéⁿ cuendá ñáhá Yã Ndiöxí xií-yu. ⁴ Te ñá túú ndècu ndìhi-o tnúhu ndee ìní cuatnúhu-o ñáyiú xínu cuechi, chi mee ñáyiú cùu patrôⁿ-yu tàú-yu cáháⁿ-yu te núú cundáá ñáyiú xínu cuechi núú-yu àdi ñá túú cundáá-yu. Te ducaⁿ sãtnahá-xi cùu ñáyiú xínu cuechi núú Yã Ndiöxí, chi mee-gã cáháⁿ-gã te núú nása quidé-yu, te ñiu-ni mee-gã cada te cundáá-yu cundecú-yu núú-gã.

⁵ Te na càchí tnúhu tucu-í xii-ndo sã íó ñáyiú càchí sã íó

dava nduu ío càhnu cuu-xi, te íó tucu dava ñáyiú càchí-yu sã ìnⁿ-ni cuu-xi nchaa-ni nduu, te xìni ñuhu-xi sã cùtnuní ndáá iní-yu sã ndáá cúú-xí nàcuáa càháⁿ-yu ìnⁿ ìnⁿ-yu. ⁶ Te ñáyiú cánehe íí dava nduu quidé-yu sã néhẽ-yu sã yíñùhu núú Yã Ndiöxí, te ñáyiú càchí sã ìnⁿ-ní cùu-xi nchaa-ni nduu quidé-yu sã néhẽ-yu sã yíñùhu núú Yã Ndiöxí tnáhá-yu. Te ñiu-ni ducaⁿ sãtnahá-xi cùu nchaa ñáyiú xèxi nchaa nâni nihí-yu, chi quidé-yu sã néhẽ-yu sã yíñùhu núú Yã Ndiöxí, chi ndácáⁿ táhũ-yu núú-gã cuendá nchaa sã nihí-yu. Te ñiu-ni ducaⁿ sãtnahá-xi cùu nchaa ñáyiú ñá túú xèxi nchaa núú sã nchító-ó chi quidé-yu sã néhẽ-yu sã yíñùhu núú Yã Ndiöxí, te ndácáⁿ táhũ-yu núú-gã cuendá nchaa sã nihí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá ñíú cuendá méé-ó cùú-ó. ⁸ Chi vitna ndècu vívú-ó te ndècu-o sã cúú-xí Xítohó Jesucristú àdi cuèi na cùú-ó dico cuú-ó ñiu-ni sã cúú-xí-gã, núú xiãⁿ cuèi vitna ndècu vívú-ó àdi cuèi na cùú-ó dico ñiu-ni Xítohó Jesucristú cúú cuendá ñáhá-gã xii-o. ⁹ Chi Xítohó Jesucristú ní xíhí-gã te ní ndoto-gã, te vitna cùu-gã Xítohó nchaa ñáyiú, cuèi ñáyiú xíndecu vívú te cuèi ñáyiú ní xíhí.

¹⁰ Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítohó Jesucristú, te ní ñà túú ndùu váha-xi daquèe tíhú

tnáhá-ndó, chi nchaa-o sǎá nduu cùndecu-o núú Xítóhó Jesucristú, te mee-gǎ cachi-gǎ te núu ní quide ndáá-ó àdi ñá túú ní quide ndáá-ó. ¹¹ Te Yá Ndiǒxí cǎchí-gǎ núú tütú-gǎ:

Yúhú Yǎ Ndiǒxí ndécú-í cǎchí tnúhu ndáá-í xii-ndo sǎ nchàa ñáyiu ngüíñí xití-yu núu-í,

te nchaa-yu cǎháⁿ-yu sǎ yúhú cúu-í Ndiǒxí.

Duha cǎchí Yǎ Ndiǒxí núú tütú-gǎ. ¹² Núu xiǎⁿ nchaa-o ndí dǎⁿ nàcani tnúhu-o núú Yǎ Ndiǒxí nchaa sǎ ní quide-o.

Vá dácuíta nihnu tnàha-o

¹³ Núu xiǎⁿ vá cuátnùhu tnaha-gǎ-ndó, te cada yica-ndo càda-ndo mee-ni sǎ vǎha, te vá cǎdá-ndó ñⁿ sǎ ñà túú tàú-ndó càda-ndo cuendá sǎ vǎ cuíta nihnu dava ñáyiu ndècu ndíhi-ndo ichi Xítóhó Jesucristú. ¹⁴ Te yúhú ndécú ndíhi-í Xítóhó Jesucristú te cùtnuní ndáá iní-í sǎ ncháá núú sǎ cúú cǎxi-o cuu-ni caxi-o te vá cúú cuèchi. Te ñáyiu sàni iní sǎ vǎ cúú cǎxi-yu te núu na cǎxi-yu te cuu cuèchi xií-yu. ¹⁵ Te nchòhó, te núu cuendá sǎ xéxi-ndó nchàa núú sǎ cúú cǎxi-ndo, cuendá xiǎⁿ ñá túú-gǎ cúú vǎha iní nchaa ñáyiu ndècu ndíhi-ndo ichi Xítóhó Jesucristú, te ñá túú-gǎ quidé-ndó sǎ cúú iní ndisa-ndó-yu te núu ducaⁿ na càda-ndo, te núu ñⁿ sǎ sání iní-ndó cǎxi-ndo te cùtnuní iní-ndó sǎ xiǎⁿ cada-xi cuíta nihnu ñáyiu ndècu ndíhi-ndo ichi Xítóhó Jesucristú te vá cǎxi-ndó xiǎⁿ te núu ducaⁿ, chi Xítóhó Jesucristú ní

xíhi-gǎ cuendá-yu. ¹⁶ Te núu ñⁿ sǎ quidé-ndó sàni iní-ndó sǎ cúú-xi ñⁿ sǎ vǎha, te ñáyiu cǎchí-yu sǎ ñà túú vǎha te vá cǎdá-ndó cuendá sǎ vǎ cǎháⁿ cuèhé-yu cuendá-ndó. ¹⁷ Te sǎ yíndàha ñaha Yá Ndiǒxí xii-o xiǎⁿ ío xini ñuhu-xi cada ndáá-ó cùndecu-o, te cundecu váha ndíhi tnàha-o, te cudíí iní-ó cùndecu-o chi Espíritú-gǎ ndécú ndíhi ñaha-xi xii-o, te nchaa xéhé ío-gǎ cúnùu dacúúxí sǎ cóhó sǎ cǎxi-ó. ¹⁸ Te nchaa ñáyiu ducaⁿ quide nchaa sǎ ío-gǎ xíní ñuhu-xi, xinu cuechí-yu núú Xítóhó Jesucristú, te sǎ dúcáⁿ quidé-yu te ndùu vétú iní Yǎ Ndiǒxí, te cùdiú-yu núú ñáyiu.

¹⁹ Te nchoo chí ná ndùcu-o nacuaá cada-o cùndecu ndíhi váha tnàha-o, te nducu tùcu-o nacuaá cada-o chìndee tnúhu tnàha-o nacuaá cuíta cundáá-gǎ-ó núú Xítóhó Jesucristú quíhíⁿ. ²⁰ Te ñá díú sǎ cuendá ñⁿ núú sǎ xéxi-ó, te dàquee tíhú-ó sǎ vǎha ní quide ñaha Yǎ Ndiǒxí xii tnàha ñáyiu-o. Te na cǎchí tnúhu ndáá-í xii-ndo sǎ ncháá-ní núú sǎ cúú cǎxi-o, te dícó-ni sǎ ñà túú ndùu váha-xi núu sǎ cuendá-ni sǎ cǎxi-ó ñⁿ núú sǎ cúú cǎxi-o cuíta nihnu ñⁿ tnàha ñáyiu-o. ²¹ Te váha-gǎ sǎ vǎ cǎxi-ó cùñú te vá cóhó ndidí, te ní ñà túú nǎgǎ cada-o te núu xito-o sǎ xiǎⁿ cada te ngüíta tnàha ñáyiu-o cǎdá-yu sǎ ñà túú vǎha, àdi xito-o sǎ xiǎⁿ cada te ngüíta-yu caní ñⁿ caní úú iní-yu cundecú-yu ichi Xítóhó Jesucristú, te vá cundáá-gǎ-yu núú-gǎ te núu ducaⁿ na càda-o. ²² Te núu

ɨ̃n sá ṽaha s̃ani iní-ó càda-o, te ṽa dátũu-o nũũ ñ̃ayiu chi mee-ni nũũ Yã Ndiõxí dátũu-o. Te nchoo cùu-o ñ̃ayiu ío ṽaha táhú-xi te núu cùtnuní ndáá iní-ó sá quidé ndáá-ó nũũ nándi cùu sá quidé-ó, te cùtnuní iní-ó sá ñ̃a díú ɨ̃n cuéchi cùu-xi sá quidé-ó. ²³ Te núu nchoo s̃ani iní-ó sá quidé ṽaha-o àdi ñ̃a túú quide ṽaha-o òré xéxí-ó ɨ̃n núú sá xéxí-ó, te cuu cuéchi xii-o te núu ducaⁿ na càda-o. Te ducaⁿ cùu cuéchi xii-o chi ñ̃a túú ɨ̃n-ni sá sání iní-ó, chi nchaa núú sá quidé-ó s̃ani ɨ̃n sani úú iní-ó núu ṽaha-ni àdi ñ̃a túú ṽaha-ni, te cuu cuéchi xii-o sá dúcáⁿ quide-o.

15

Cada-o sã vãha sã cúu-xí tnãha ñãyiu-o

¹ Te nchoo ñ̃ayiu ío ṽaha s̃andáá iní ñ̃áhá xii Xítohó Jesucristú, xini ñ̃uhu-xi cuañaha-o tnũhu ndee iní xii ñ̃ayiu ñ̃a túú ñihí ndéé cùndecu ichi-gá, te ṽa cádá-ó m̃e-ni sá cúu-xí m̃e-o. ² Te cada-o sã ṽaha ñ̃acuáa cuu ṽaha iní tnãha ñ̃ayiu-o cuendá cuu-xi sá ṽaha sá cúu-xí-yu, te ducaⁿ cuita ñihí ndéé-gã-yu quindáá iní-yu Xítohó Jesucristú. ³ Te Xítohó Jesucristú ñ̃a túú ní quide-gá mee-ni sá cúu ṽaha iní m̃e-gã, te ní quee ndáá-xi ñ̃acuáa càháⁿ-xi núú tütú Yã Ndiõxí ñ̃acuáa ní xáhaⁿ Xítohó Jesucristú xii-gá, te càchí-xi: “Nchaa ñ̃ayiu cùu úhú iní ñ̃áhá xii-n ní xicuèhé ní xíduha ñ̃áhá-yu xii-í”, duha càháⁿ-xi núú tütú Yã Ndiõxí ñ̃acuáa ní xáhaⁿ Xítohó Jesucristú

xii-gá. ⁴ Te ndéé sanaha ñ̃i ngúndeé nchaa tnũhu Yã Ndiõxí núú tütú-gá, te ducaⁿ ñ̃i ngúndeé cuendá dacuàha-o, te tnũhu-án dánèhé ñ̃áhá-xí cùnduu cahnu iní-ó cuéi nándi nã yãha-o cùndecu-o ichi-gá, te sá xii tnũhu-án te ṽa ndihú-gá iní-ó cùndecu-o, te diu-ni sá xii tnũhu-án cùndecu ndihí-o tnũhu ndee iní. ⁵ Te Yã Ndiõxí quidé-gã ndécú ndihí-o tnũhu càhnu iní, te diu-ni-gá quidé-gã ñ̃a túú ndihú iní-ó ndécú-o. Te xicáⁿ táhú-í núú-gã sá díú-gã ná cádá te cuu ɨ̃nⁿuu-ndo cùndecu-ndo datná ní quide mee Xítohó Jesucristú cùtnãhá ní xíndecu-gá ñ̃uyíú-a. ⁶ Te ducaⁿ nchãa-ndo cuu ɨ̃nⁿuu-ndo, te danihí tnãhá-ndó yõcò tãchí-ndó te cachí-ndó sã ío càhnu cuu Yã Ndiõxí Yaa cúu Tãtã Xítohó Jesucristú.

*Ñayiu ñã túú cùu ñãyiu is-
raël ní ñih-yu tnũhu Xítohó Je-
sucristú*

⁷ Te núu xíãⁿ chí quéhéⁿ cuendá tnãhá datná ní quide Xítohó Jesucristú ní queheⁿ cuendá ñ̃áhá-gã xii-o, te núu ducaⁿ na càda-ndo te ío cuu càhnu Yã Ndiõxí. ⁸ Te na càchí tnũhu-í xii-ndo sã Xítohó Jesucristú ní quixi-gá ní quide-gá sá ṽaha sá cúu-xí ñ̃ayiu israël, te sá dúcáⁿ ñ̃i quide-gá xíãⁿ cùtnuní ndáá iní-ó sã Yã Ndiõxí quidé-gã ɨ̃n sá càháⁿ-gá, chí Xítohó Jesucristú ní quide-gá nchaa ñ̃acuáa ní xáhaⁿ Yã Ndiõxí xii cue ñ̃ani tnãhá-ó ñ̃i xíndecu ndéé sanaha. ⁹ Te ducaⁿ ñ̃i quide Xítohó Jesucristú sã ṽaha sá cúu-xí ñ̃ayiu israël

cuendá nchaa ñáyiú ñá túú
 cùu ñáyiú isràél cachí-yu sá ïo
 càhnu cuu Yá Ndiöxí, te ducaⁿ
 quèsahá-yu chi ío cùndahú
 iní ñáhá-gă chîndèe ñaha-gă
 xií-yu, te quee ndáá-xi nàcuáa
 càháⁿ-xi núú tûtú Yă Ndiöxí
 núú cächí-xi:

Yúhú cächí-í sá ïo càhnu cuu-n
 núú nchaa ñáyiú ñá túú
 cùu ñáyiú isràél,

te cata-í ndudú chiñuhu ñaha-í
 xii-n.

Duha cächí-xi núú tûtú-gă
 10 Te cächí tucu-xi núú
 tûtú-gă:

Te nchòhó ñáyiú ñá túú cùu
 ñáyiú isràél ío chí cúdĩ
 iní ndihí ñáyiú isràél
 ñáyiú ndècu ndihí-í.

Duha cächí-xi núú tûtú-gă.
 11 Te cächí tucu-xi ingá xichi
 núú tûtú-gă:

Nchaa nchòhó ñáyiú ñá túú
 cùu ñáyiú isràél chí
 càháⁿ sá ïo càhnu cuu
 Yá Ndiöxí,

te nchaa ñáyiú na càháⁿ-yu sá
 ïo càhnu cuu-gă.

Duha cächí-xi núú tûtú-gă.
 12 Te ndí Chàíá cächí tucu ndí
 núú tûtú Yă Ndiöxí:

Coo ïⁿ ñaní tnáhá ndí Isàí
 téé ní xîndecu ndéé
 sanaha,

te téé-áⁿ taxi tnùní-dé cue
 ñáyiú ñá túú cùu ñáyiú
 isràél,

te ñáyiú-áⁿ cundee cùu cahnu
 iní ñáhă-yu xii-dé.

Duha ní cáháⁿ ndí Chàíá
 cächí-xi núú tûtú-gă.

13 Te xîcáⁿ tãhù-í núú Yă
 Ndiöxí Yaá ní taxi tnúhu
 ndee iní ndécú ndihí-o sá
 mée-gă ná càda ío cudĩ
 iní-ndó cùndecu-ndo, te ducaⁿ
 ïo váha cundecu iní-ndó

núú-gă chi sàndáá iní-ndó-gă,
 te ducaⁿ Espiritú-gă ná càda te
 uuⁿ-gă uuⁿ-gă cuita ngúndecu
 ndihí-ndo tnúhu ndee iní
 quíhíⁿ sá cáda váha ñaha-gă
 xii-ndo.

14 Te nchòhó ñáyiú ndècu
 ndihí-í ichi Xítohó Jesucristú
 cùtnuní ndáá iní-í sá nchòhó
 ío váha iní-ndó, te ducaⁿ ïo
 váha cùtnuní iní-ndó nchaa
 tnúhu váha, te ducaⁿ ïo
 dásahú tnáhá-ndó nàcuáa
 cundecu-ndo. 15 Te daya
 tnúhu ní chídó tnùní-í núú
 tûtú-a cùu-xi tnúhu sá ïo
 càháⁿ-í dóho-ndo, te ducaⁿ
 nĩ tee-í cuendá sá nchòhó
 dandacu iní-ndó tnúhu-áⁿ,
 te ní tee-í chí Yá Ndiöxí
 ní cundahú iní ñáhá-gă
 xii-í ní taxi-gă chiúⁿ quide-í
 16 xínú cuèchi-í núú Xítohó
 Jesucristú càháⁿ-í tnúhu-gă
 núú ñáyiú ñá túú cùu ñáyiú
 isràél. Te tnúhu-áⁿ cúú-xí
 tnúhu sá sánú ichi ñaha xii-o
 nacuáa naníhí tãhú-ó, te
 ducaⁿ dânehé-í ñáyiú ñá
 túú cùu ñáyiú isràél tnúhu
 Yá Ndiöxí cuendá cuú-yu
 dàtná ïⁿ sá ndúú tãhú-gă, te
 Espiritú-gă quidé-xí cuú-yu
 ñáyiú cùdiu núú-gă, te cùu
 váha iní ñáhá-gă xií-yu.

17 Te ío váha cùu iní-í
 cuendá nchaa chiúⁿ quide-í
 sá cúú-xí Yă Ndiöxí, chi
 Xítohó Jesucristú ndécú ndihí
 ñaha-gă xii-í. 18 Te mee-ni
 nàcuáa quide Xítohó Jesu-
 cristú chîndèe ñaha-gă xii-í
 xiăⁿ-ni càháⁿ-í, te sá dúcáⁿ
 quide-gă xiăⁿ ní sàndáá iní
 cue ñáyiú ñá túú cùu ñáyiú
 isràél tnúhu-gă. Te ducaⁿ chi
 ní chindee ñaha-gă xii-í ní
 cáháⁿ-í tnúhu-gă te ducaⁿ-ni

nĩ chindee ñàha-gá xii-í ní quide-í titní núú sã ní quide-í núú-yu ní xiní-yu. ¹⁹ Te Espíritú Yá Ndiõxí ní quide-xi ní quide-í titní núú sã vã yõ tnahí ndàcu cada ní xiní-yu te ío ní cuñúhu-yu. Te nchaa ñúú ní sáháⁿ-í ní cáháⁿ-í tnúhu Xítohó Jesucristú núú ñáiyu cuèi ndéé ñúú Jerusalén, te cuèi ndéé distritú Ilíricú, núu nchaa ñúú-áⁿ ní sáháⁿ-í ní cáháⁿ-í núú-yu tnúhu sã càháⁿ nàcuáa naníhí tãhú-ó. ²⁰ Te ducaⁿ ío ndècu ndee-í cáháⁿ-í tnúhu sã càháⁿ nàcuáa naníhí tãhú-ó núú vátá nihí-gá-yu tnúhu cuendá Xítohó Jesucristú, te ducaⁿ quide-í chí ñá túú cuiní-í quíhíⁿ-í cáháⁿ-í tnúhu-gá núú sã xíndecu ñáiyu cáháⁿ tnúhu-gá. ²¹ Te quide-í nàcuáa cáháⁿ-xi núú tütú Yá Ndiõxí núú càchí-xi: Ñáiyu vátá nihí-gá tnúhu cuendá Yaá quixi ñuyú te nihí-yu, te ducaⁿ tècú tnùní-yu tnúhu-gá. Duha càchí-xi núú tütú-gá.

Té Pãblú cuiní-dé quíhíⁿ-dé ñúú Rómá

²² Te sã dúcáⁿ cáháⁿ-í tnúhu-gá núu xíáⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í. ²³ Te ní cuu titní cuía ducaⁿ-ni sàni iní-í quixi coto ñaha-í xii-ndo, te vitna ní ndihí-í nchaa iha ní cáháⁿ-í tnúhu Xítohó Jesucristú núú nchaa ñáiyu. ²⁴ Núu xíáⁿ sání iní-í sã ndùu na quíhíⁿ-í nacióⁿ Èspaña te yáha cáháⁿ-í quini-í nása ndècu-ndo, te dàvá-áⁿ

ío cudíí iní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee iní-ndó chindee ñaha-ndo xii-í. ²⁵ Te vitna quíhíⁿ-í ñúú Jerusalén quínehe-í sã ndúú tãhú ñáiyu ndècu ichi Xítohó Jesucristú xíndecu yàcáⁿ. ²⁶ Te ñáiyu xíndecu ichi Xítohó Jesucristú ndécú distritú Macèdoniá, ndihí distritú Acáyá ní cuu ñúú-yu ní sacáⁿ tñahá-yu sã ndúú tãhú ñáiyu ndàhú xíndecu ichi-gá ndécú ñúú Jerusalén. ²⁷ Te ducaⁿ tnahí ní cudíí iní-yu cadá-yu, te ducaⁿ tnahí tàú-yu cadá-yu chindéé-yu ñáiyu xíndecu ñúú Jerusalén. Te ñáiyu Macèdoniá ndihí ñáiyu Acáyá-áⁿ ñà túú cùú-yu ñáiyu israél. Te ñáiyu xíndecu ñúú Jerusalén cúú-yu mee-ni ñáiyu israél, te ducaⁿ tàú-yu cadá-yu chí sã cuendá ñáiyu israél-áⁿ ní nihí-yu tnúhu sã cáháⁿ nàcuáa naníhí tãhú-yu, núu xíáⁿ tàú-yu chindee ñahá-yu ndihí nchaa sã nihí-yu. ²⁸ Te sátá ná yãha quínguáha cuendá-í-yu sã ndúú tãhú-yu, te ducaⁿ te dàtnuní quee-í quíhíⁿ-í nacióⁿ Èspaña, te ichi yáha-í yáha cáháⁿ-í núú ndécú-ndó. ²⁹ Te cùtnuní ndáá iní-í sã òré ná quèxio-í núú ndécú-ndó, te Xítohó Jesucristú ío chindee ñaha-gá xii-í cáháⁿ-í tnúhu-gá núú-ndó nàcuáa ío váha cundecu-ndo ichi-gá.

³⁰ Te nchòhó ñáiyu ndècu ndihí-í ichi Xítohó Jesucristú cáháⁿ ndàhú-í núú-ndó sã ío chindee ñaha-ndo xii-í cáháⁿ ndihí-o Yá Ndiõxí cuendá-í,

te ducaⁿ càda-ndo chi ndècu ndi^{hi}-ndo Xítóhó Jesucristú. Te Espiritú Yá Ndióxi quidé-xí cùu iní tnáhá-ó ìⁿ ìⁿ-o. ³¹ Te ío chí càcáⁿ táhú núú Yá Ndióxi sá ná còto ñaha-gá xii-í, te ñá túú nã cada ñaha nchaa ñáyiú ñá túú sándáá iní ñáhá xii-gá xíndecu distritú Júdeá. Te cacáⁿ táhú tucu-ndo núú-gã sá ncháá sã cánèhe-í quíhíⁿ nduu táhú ñáyiú ndècu ichi-gá ndécú ñúú Jerusálén ío váha cuu iní-yu queheⁿ cuendá-yu. ³² Te ducaⁿ càda-ndo cuendá sá núú Yá Ndióxi ná càchí-gá te ío cudíí iní-í òré quexio-í núú ndécú-ndó, te ío váha cuu iní-í cundecu ndi^{hi} ñaha tnài xii-ndo. ³³ Te vitna xicáⁿ táhú-í núú Yá Ndióxi Yaá quidé ío váha cùu iní-ó ndècu-o sá ná chindee chitúu ñaha-gã xii-ndo nchaa-ndo. Te ducaⁿ na cünduu.

16

Té Páblú quidé ndèe iní-dé ñáyiú ndècu ñúú Ròmá

¹ Te yúhú tendaha-í tá Fèbé quixi-xi núú ndécú-ndó, te tnáhá-xi ndècu-xi ichi Xítóhó Jesucristú, te quíde-xi chiúⁿ Yá Ndióxi sá cúú-xí ñáyiú ndècu ichi Xítóhó Jesucristú xíndecu ñúú Cèncreá. ² Te cuíni-í sá ío váha cuu iní-ndó quèheⁿ cuendá-ndó-xí, chí ndècu ndi^{hi}-xi Xítóhó Jesucristú, te cada-ndo nacuáa tàú-xi cunduu dàtná tàú-xi cada ñáyiú ndècu ichi-gá, te ío chindee-ndo-xi te núu ná cúú sã xíní ñùhu-xi, chí tnáhá-xi ío chindee-xi cue ñáyiú ndècu ichi Xítóhó Jesucristú, te tnáhá yúhú ducaⁿ ío chindee-xi.

³ Te cúñaha-ndo ío na càda ndee iní té Àquilú ndi^{hi} ñadi^{hi}-dé tá Priscilá, chí ñáyiú-áⁿ nĩ quíde chiúⁿ-í ndi^{hi}-yu ní quíde-ndí chiúⁿ Xítóhó Jesucristú. ⁴ Chí mèe-yu ní cácu cuú-yu sá cuendá sá nĩ dácácu ñáhá-yu xii-í sá nĩ yáha-í, núu xíáⁿ ío ndacáⁿ táhú-í núú-yu, te ñá díú-ní yúhú ducaⁿ ío ndacáⁿ táhú-í núú-yu chí tnáhá nchaa ñáyiú ñá túú cùu ñáyiú isráél xíndecu ichi-gá xíndecu nchaa xichi ducaⁿ ío ndacáⁿ táhú-yu núú tẽ Àquilú ndi^{hi} núú ñadi^{hi}-dé tá Priscilá. ⁵ Te cúñaha tucu-ndo sá ío na càda ndee iní nchaa ñáyiú xíndecu ichi Xítóhó Jesucristú tàcá vehe té Àquilú ndi^{hi} tá Priscilá dácuahá-yu tnúhu-gá, te cúñaha tucu-ndo sá ío na càda ndee iní té Epènetú chí tnáhá-dé ío ñùhu iní-í-dé, chí tée-áⁿ cúú-dè tée díhna nuu nĩ sándáá iní tnúhu Xítóhó Jesucristú distritú Acáyá. ⁶ Te cúñaha tucu-ndo sá ío na càda ndee iní tá Mariá xíchí ndécú ndi^{hi}-ndo, xíchí ío nducu ndee xinu cuechi núú Xítóhó Jesucristú. ⁷ Te cúñaha tucu-ndo sá ío na càda ndee iní cue tée cùu ndi mee-í té Andrónicú ndi^{hi} té Jùnias, chí tnáhá-güedé ní xíhi ndi^{hi} ñaha-güedé xii-í vecaá, te ío cùdiu-güedé núú nchaa cue tée ní táuchíúⁿ Jèsús cáháⁿ tnúhu-gá. Te díhna-gá-güedé ní sándáá iní-güedé tnúhu Xítóhó Jesucristú dàcúúxí yúhú.

⁸ Te cúñaha-ndo sã ná càda ndee iní té Ampliás chí

tnàhá-dé ío ñùhu iní-í-dé, te ndècu-dé tnàhá-dé ichi Xítóhó Jesucristú. ⁹ Te cúñaha tùcu-ndo xii té Bănú té cundihí ñaha xii-o quide-o chiuⁿ Xítóhó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ío ñùhu iní-í-dé. ¹⁰ Te cúñaha tùcu-ndo xii té Àpelés sá ío na càda ndee iní-dé, chi téé-áⁿ ío váha cundáá-dé núú Xítóhó Jesucristú, te cúñaha tùcu-ndo xii ñáyiú xĩndecu vehe té Arístóbulú sá ío na càda ndee iní-yu. ¹¹ Te cúñaha-ndo xii té Herodión té cùu ndi mee-í sá ío na càda ndee iní-dé, te cúñaha-ndo xii ñáyiú ndècu ichi Xítóhó Jesucristú xĩndecu vehe té Nàrcisú sá ío na càda ndee iní-yu. ¹² Te cúñaha-ndo xii tnàhá tá Trifená ndihí tá Trifosá sá ío na càda ndee iní-yu, chi tnàhá-yu quidé-yu chiúⁿ Xítóhó Jesucristú. Te tnàhá tá Pèrsidá xíchí ndécú ndihí-o ichi Xítóhó Jesucristú cúñaha-ndo xii-xi sá ío na càda ndee iní-xi, chi tnàhá-xi ío ndùcu ndee-xi quide-xi chiuⁿ Xítóhó Jesucristú. ¹³ Te cúñaha-ndo tnàhá té Rűfú téé ío váha sàndáá iní tnùhu Xítóhó Jesucristú sá ío na càda ndee iní-dé ndihí năná-dě, chi ñaha-áⁿ quidé iní-í sá cúú-áⁿ dàtná nănà-í. ¹⁴ Te cúñaha-ndo sá ío na càda ndee iní té Ásíncritú, ndihí té Flègonté, ndihí té Hèrmás, ndihí té Pàtrobás, ndihí té Hèrmés, ndihí nchaa dava-gá cue ñáyiú ndècu ndihí-o ichi Xítóhó Jesucristú xĩndecu ndihí-güedé. ¹⁵ Te cúñaha tùcu-ndo sá ío na càda ndee iní té Filológó, ndihí tá Jülüá,

ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáyiú sàndáá iní tnùhu Xítóhó Jesucristú xĩndecu ndihí-yu.

¹⁶ Te ío yiñùhu cada ndee iní tnàhá-ndó ìⁿ ìⁿ-ndo. Te nchaa ñáyiú tàcá nchaa iha dàcuaha tnùhu Xítóhó Jesucristú quidé ndèe iní ñáhă-yu xii-ndo.

¹⁷ Te nchòhó ñáyiú ndècu ndihí-í ichi Xítóhó Jesucristú càháⁿ-í dóho-ndo sá càdá cuendá-ndo núu ío ñáyiú quide nacúaa vá cúú ìⁿnuu-ndo cundecu-ndo, chi ñáyiú-áⁿ sánú ichi ñahá-yu ìⁿ ichi ñá túú vâha, chi ñá túú ìⁿ-ni cuu-xi tnùhu càháⁿ-yu ndihí tnùhu sá ní níhí-ndó ndècu ndihí-ndo, te ñáyiú ducaⁿ xĩquide vá nihí tnàhá-gă-ndó ndihí-yu. ¹⁸ Chi ñáyiú-áⁿ ñà túú quidé-yu chiúⁿ sá cúú-xí Xítóhó Jesucristú, chi mee-ni sá cúú-xí mèe-yu quidé-yu, te mee-ni nchaa tnùhu sá ío vii ío váha cuáháⁿ càháⁿ-yu òré cuáháⁿ-yu dandahú-yu nchaa ñáyiú ío yáchí sàndáá iní-xi ìⁿ tnùhu. ¹⁹ Te nchaa ñáyiú nihí-yu tnùhu sá nchòhó sàndáá iní-ndó tnùhu Xítóhó Jesucristú, núu xiáⁿ ío cùdii iní-í. Te cuini-í sá nchòhó ío váha cutnùní iní-ndó nacúaa cada-ndo mèe-ni sá vâha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha. ²⁰ Te Yá Ndióxi Yáá quidé ío váha cùu iní-ó ndècu-o ío ndihí cada-gá cuendá sá sàculhná ñà túú-gă ná cada ñaha-xi xii-ndo, te xicáⁿ táhù-í

núú Xítohó Jesucristú sá ïo na chindee chitúu ñaha-gã xii-ndo.

²¹ Te té Timùteú tée quide ndihi-í chùuⁿ Xítohó Jesucristú iha quide ndee iní ñáhá-dě xii-ndo, te tnàhá té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhá-güedě xii-ndo.

²² Te tnàhá yúhú té Tèrciú tée càdúha tutú-a cuèndá té Páblú quidé ndèe iní ñáhá-í xii-ndo, chi ìⁿ-ni cùu-o ndihi Xítohó Jesucristú.

²³ Te tnàhá té Gãyú tée dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiu dàcuahá-yu tnúhu Xítohó Jesucristú. Te tnàhá té Èrastú tée yìndaha díhúⁿ ñùú quidé ndèe iní ñáhá-dě xii-ndo, te tnàhá té Cuártú tée ndècu ndihi-o ichi Xítohó Jesucristú quidé ndèe iní ñáhá-dě xii-ndo.

²⁴ Te xìcáⁿ táhù-í núú Xítohó Jesucristú sá ïo na chindee chitúu ñaha-gã xii-ndo nchàa-ndo. Te ducaⁿ na cùnduu.

Cáháⁿ-ó sã ïo càhnu cuu Yá Ndiõxí

²⁵ Te vitna chí ná càchí-ó sã ïo càhnu cuu Yá Ndiõxí, chi mee-gã cada te ío-gã cuita níhí ndéé-gã-ndó cùndecu-ndo ichi Xítohó Jesucristú dàtná càchí tnúhu sá càháⁿ nàcuáa naníhí tàhú-ó, tnúhu sá dánèhé-í ñáyiu cuèndá Xítohó Jesucristú, te nchaa tnúhu-a ìⁿ-ni cùu-xi ndihi nchaa tnúhu sá ñí cachí Yá Ndiõxí cuu yuhu ndéé cùtnàhá ní ngáva ñuyíú, te

vitna ní quee túu-xi, ²⁶ chi mee Yá Ndiõxí ní dátúu-gã núú-ó vitna, te càháⁿ-ndí nàcuáa ní chídó tnùnì cue tée ní xóo càháⁿ tnúhu Yá Ndiõxí ndéé sanaha. Te ducaⁿ tnúhu sá ndúú yùhu ní cuu ta xíté nuu-xi níhí ñuyíú cuáháⁿ, chi ducaⁿ ñí cachí Yá Ndiõxí Yaá ndécú nchaa nduu nchaa quíú cunduu cuèndá sá quìndáá iní ñáhá ñáyiu xii-gá, te tníⁿ-yu nchaa tnúhu càháⁿ-gá.

²⁷ ¡Te ìⁿ-ni Yá Ndiõxí cúu-gã Yaá ío sàá sá xìnì tnùnì-xi! ¡Te nchaa-o chí ná càchí-ó sã ïo càhnu cuu-gá, chi ndècu ndihi-o Xítohó Jesucristú, te ducaⁿ-ni càda-o ni caa ni quíhíⁿ! Te ducaⁿ na cùnduu. Te ío chí cadá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA ÑÁYIU ÑUÚ CÒRINTÚ

*Té Pāblú cadúha-dé tutú
quíhĪⁿ ndaha ñáyiū xĩndecu ichi
Xítohó Jesucristú ndécú ñúú
Còrintú*

¹ Yúhú té Pāblú ní cáháⁿ ñáhá Yá Ndiöxí xii-í cuendá sá cáháⁿ-í tnúhu Xítohó Jesucristú núú ñáyiū, chi ducaⁿ ñí cachí Yá Ndiöxí cunduu. Te cadúha-í tutú-a ndihi té Sōstenés té ndécū ndihi-o ichi Xítohó Jesucristú ²cuendá daquixi-í ndaha nchòhó ñáyiū xĩndecu ichi Yá Ndiöxí ndécú ñúú Còrintú, chi nchòhó cúú-ndó ñáyiū cūu cuendá Yá Ndiöxí cuendá sá ndécú ndihi-ndo Xítohó Jesucristú. Te diu-ni-ndo cūu-ndo ñáyiū ní cáháⁿ ñáhá Yá Ndiöxí cuendá cundecu yĩñuhu-ndo núú-gă, ndihi nchaā dava-gă ñáyiū ndécū nchaā xichi, ñáyiū cāchí sá ĩo cāhnu cuu Xítohó Jesucristú. Te Yaá-áⁿ cúú-gă Xítohó-yu, te diu-ni-gă cúú-gă Xítohó nchoo tūcu. ³ Te xicáⁿ táhù-í núú Tātá-ó Dütú Ndiöxí ndihi núú Xítohó Jesucristú sá ndi nduú-gă ĩo na chĩndee chitúū ñaha-gă xii-ndo, te ĩo váha cuu iní-ndó cūndecu-ndo.

*Yá Ndiöxí ĩo chĩndee ñaha-gă
xii-o cuendá sá ndécú-ó ndihi
Xítohó Jesucristú*

⁴ Te ducaⁿ-ni ĩo ndacáⁿ táhù-í núú Yá Ndiöxí cuendá-ndó, chi mee-gă ĩo chĩndee chitúū ñaha-gă xii-ndo sá cuendá Xítohó Jesucristú. ⁵ Te cuendá sá ndécú-ndó ndihi Xítohó Jesucristú, núú xiáⁿ Yá Ndiöxí ĩo chĩndee ñaha-gă xii-ndo sáá díquí-ndó nācuāa cáháⁿ-ndó, ndihi nācuāa cūtnuní iní-ndó, ⁶ chi tnúhu sá ni ñihí-ndó cuendá Xítohó Jesucristú ní quēe-xi iní-ndó. ⁷ Te xiáⁿ núū nchaā sá váha ñá túú tnāhí cūmānĪ xii-ndo chi Yá Ndiöxí ĩo chĩndee ñaha-gă. Te ducaⁿ quide-gă nini nchòhó ni yūhu ni iní-ndó ndètu-ndo sáá nduu quixi tucu Xítohó Jesucristú. ⁸ Te Yá Ndiöxí ducaⁿ-ni ĩo chĩndee ñaha-gă xii-ndo cuendá sá vā yōo teñaha cuēchi nduu na quixi tucu Xítohó Jesucristú. ⁹ Te nchaā sá cáháⁿ Yá Ndiöxí daçutí quide-gă, te diu-gă cúú-gă Yaá ní cáháⁿ ñáhá xii-ndo cuendá cuu ĩⁿnuu-ndo ndihi Déhe-gă Xítohó Jesucristú Yaá cúú Xítohó-ó.

*Ñá túú cūu ĩⁿnuu ñáyiū
ndécū ichi Xítohó Jesucristú*

¹⁰ Te nchòhó ñáyiū ndécū ndihi-í ichi Xítohó Jesucristú cáháⁿ-í dóho-ndo sá vā ndi díⁿ cāni iní-ndó, te ĩo cuu ĩⁿnuu-ndo cūndecu-ndo, te ĩⁿ-ni cāni iní-ndó, te ĩⁿ-ni cáda-ndo chi ducaⁿ cuñí-gă cunduu. ¹¹ Te duha cáháⁿ-í dóho nchòhó ñáyiū ndécū ndihi-í ichi Xítohó Jesucristú, chi cue ñáyiū vehe té Clóé ní cachí tnúhu-yu xii-í sá ñá túú cūu ĩⁿnuu-ndo ndecu-ndo. ¹² Te

duha ndũu tnũhu ní níhì-í nàcuáa cùu ndecu-ndo, chi dava-ndo càchì-ndó: “Yúhú cùu-í cuèndá té Pàblú.” Te dava-ndo càchì-ndó: “Yúhú cùu-í cuèndá té Àpolós.” Te dava-ndo càchì-ndó: “Yúhú cùu-í cuèndá té Pèlú.” Te dava tuçu-ndo càchì-ndó: “Yúhú cùu-í cuèndá Xítohó Jesucristú”, duha càchì-ndó. ¹³ Te vá dúcáⁿ càháⁿ-ndó chi ñá túú ná daha Xítohó Jesucristú ndécú chi ñⁿdi-ni-gá. Te ñá díú yúhú té Pàblú ní xíhì-í núú cùrúxí sá cuèndá-ndó, te ní ñá túú ní sàndute-ndo cuèndá sá yúhú cuu cuèndá ñáhà-í xii-ndo. ¹⁴ Te táxãhu xii Yá Ndiõxí chi ñá díú nchàa-ndo ni dacuandute-í, chi té Crìspú-ni ndihì té Gãyú-ni ní dácúándute-í-güedé. ¹⁵ Te xĩãⁿ nõu vá cùú tnahí càháⁿ-ndó sá ní sandute-ndo sá cùú cuèndá ñáhà-í xii-ndo. ¹⁶ Te ní ndacu tucu iní-í sá tnahá tucu ñáyiu cùu ndi mee té Èstefánás ní dácúándute-í, te diu-ná ñáyiu-áⁿ te sànuu sá ñá túú-gã nágá ñáyiu ni dácúandute-í. ¹⁷ Te Xítohó Jesucristú ñá túú ní tendaha ñaha-gá xii-í sá dácúandute-í ñáyiu, chi ní tendaha ñaha-gá xii-í sá càháⁿ-í tnũhu-gá nõu-yu, tnũhu sá càháⁿ nàcuáa naníhí tãhú-ó. Te ñá túú càháⁿ-í dàtná càháⁿ ñáyiu túha. Te ducaⁿ quide-í cuèndá sá nchòhó quíndáá váha iní-ndó tnũhu sá càháⁿ nàcuáa ní xíhí Xítohó Jesucristú núú cùrúxí. Chi núu na càháⁿ-í dàtná càháⁿ ñáyiu túha te nchòhó vá quíndáá iní-ndó tnũhu-áⁿ nàcuáa tàù-xi cunduu.

Sá cuèndá Xítohó Jesucristú

cútnùní iní-ó sã ïo càhnu cuu Yá Ndiõxí

¹⁸ Te nchaa ñáyiu ta xĩta nihnu cuáháⁿ càchì-yu sá ñà túú nàndíhì tnũhu sá càháⁿ nàcuáa ní xíhí Xítohó Jesucristú núú cùrúxí, dico sá cùú-xí nchòo ñáyiu sa ní naníhí tãhú, chi tnũhu-áⁿ cùú-xí ñⁿ tnũhu sá ní taxi Yá Ndiõxí ndécú ndihì-o cuèndá ndacu-gá cada-gá nchaa nàcuáa cuiní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchì-xi:

Yúhú cada-í te nchaa ñáyiu túha vá nándíhì-gá nchaa sá xini tnùnì-yu,

te nchaa ñáyiu ío váha sàà díquí-xi vá nándíhì-gá nchaa nàcuáa sàni iní-yu.

Duha càchì Yá Ndiõxí núú tütú-gá.

²⁰ Te xĩãⁿ cútnùní iní-ó sã ncháá ñáyiu sàni iní-xi sá ïo túha ndècu ñuyúú-a, ndihì nchaa cue tée dàcuaha ñaha xii-yu nchaa tnũhu ní chídó tnùnì ndíi Moisés, ndihì nchaa ñáyiu ío váha sàà díquí-xi càháⁿ cuèndá nchaa sá ío ñuyúú-a, te nchaa ñáyiu-áⁿ càchì Yá Ndiõxí sá ñà túú nàndíhì nchaa sá xini tnùnì-yu sá cùú-xí-gá. ²¹ Te Yá Ndiõxí ío váha cùtnuní iní-gá nàcuáa quide-gá, chi ñá túú dàña-gá cundecu ndihì ñahá-yu xii-gá sá cuèndá nchaa sá ní sáá díquí mée-yu, te ducaⁿ quide-gá chi cuiní-gá sá cùndèdóho-yu tnũhu sá sàni iní-yu ñá túú nàndíhì. Te sá cuèndá tnũhu-áⁿ te naníhí

tàhú-yu te núu na quindáá iní ñáhã-yu xii-gá.

22 Te cue ñáyiu isràél cuiní-yu quini-yu sá vã yõo tnàhí ndàcu cada, te cue ñáyiu griégú nchicúⁿ nihnú-yu nchaa sá dácua^ha ñáyiu ío túha. 23 Dico nchoo yìhi-o cáhãⁿ-ó núú ñáyiu sá Xítoho Jesucristú ní xihí-gá núú cùrúxí. Te cue ñáyiu isràél ñá túú tnàhí tnàhá iní-yu cundedóho-yu tnúhu-áⁿ. Te cue ñáyiu ñá túú cùu ñáyiu isràél càchí-yu sá ñà túú vèdana nàndíhi tnúhu-áⁿ. 24 Dico sá cúú-xí nchaa ñáyiu ní cáhãⁿ ñáhã Yã Ndiõxí chi cuèi cùú-yu ñáyiu isràél àdi ñá túú cùú-yu, dico ñáyiu-áⁿ càchí-yu sá sã cuèndá Xítoho Jesucristú cutnùní iní-yu sá ío càhnu cuu Yã Ndiõxí te ndècu ndihi-gá nchaa sá xìní tnùní-gá. 25 Te sá quidé Yã Ndiõxí càchí ñáyiu ñuyúú-a sá ñà túú nàndíhi, dico xíãⁿ ío-gá nàndíhi dácúúxí sã sání iní mée-yu. Te sá ní xihí Xítoho Jesucristú núú cùrúxí, xíãⁿ càchí ñáyiu sá ñà túú ní nihí ndéé Yã Ndiõxí cada-gá sá ní sani iní-gá cada-gá. Dico sá dúcãⁿ ní quide Yã Ndiõxí, xíãⁿ cúú-xí sã ío-gá ní nihí ndéé-gã ní quide-gá ìⁿ sá ní sani iní-gá dácúúxí sã sání iní mée ñáyiu ñuyúú-a. 26 Te nchòhó ñáyiu ndècu ndihi-í ichi Xítoho Jesucristú, chí dándàcu iní nàcuáa ndècu-ndo cútnàhá ní cáhãⁿ ñáhã Yã Ndiõxí xii-ndo, chí sacú-ni-ndo túha dácúúxí ñáyiu ñá túú ndècu ichi-gá. Te ducaⁿ sàcú-ni-ndo tàxi tnùní-ndó, te ñu-ni

ducaⁿ sàcú-ndó nèhe ñáyiu sá yíñuhu núú-ndó. 27 Te ñáyiu ñá túú ndècu ichi Yã Ndiõxí càchí-yu sá ñà túú tnàhí túha dava-gá tnàha ñáyiu-yu, dico dava ñáyiu ñá túú túha-áⁿ cáhãⁿ ñáhã Yã Ndiõxí xii-yu cundecú-yu ichi-gá, te cundecu ndihi ñaha-gã xii-yu, te ducaⁿ dándóo canúú-yu nchaa ñáyiu càchí sá ío túha. Te cáhãⁿ tucu-gá ñáyiu càchí dava-gá ñáyiu sá ñà túú tnàhí tàú cunuu cundecú-yu ichi-gá, te ducaⁿ cundecu ndihi ñaha-gá xii-yu, te dándóo canúú-yu nchaa ñáyiu càchí sá táxi tnùní. 28 Te ducaⁿ Yã Ndiõxí cáhãⁿ-gá ñáyiu ñá túú tnàhí cunuu cundecu ndihi-gá, ndihi ñáyiu quèe tíhú núú dava-gá tnàha ñáyiu-xi, ndihi ñáyiu càchí-yu sá ñà túú vèdana nàndíhi, nchaa ñáyiu-áⁿ cáhãⁿ-gá cundecu ndihi-gá, te ducaⁿ quide-gá cuèndá dándóo canúú-yu nchaa ñáyiu càchí sá ío cunuu. 29 Te núú xíãⁿ ní ìⁿ ñáyiu vá cúú càchí-yu sá ío càhnu cuú-yu núú Yã Ndiõxí. 30 Dico nchòhó chí mee Yã Ndiõxí ní quide-gá ndécú-ndó ndihi Xítoho Jesucristú, te Xítoho Jesucristú ní quide-gá ní cutnùní iní-ó sã Yã Ndiõxí cúú-gã Yaá ndécú ndihi nchaa sá xìní tnùní-gá. Te ñu-ni Xítoho Jesucristú ní quide-gá cuèndá sá nchóó vã cundècu-gá cuèchi-o núú Yã Ndiõxí, te ducaⁿ cundecu yíñuhu-o núú-gã, te nduu táhú-ó cundecu-o ndihi-gá ní caa ní quíhíⁿ. 31 Te sá dúcãⁿ

quide-gá nõu xĩⁿ xĩnĩ ñũhu-xi cada-o nacuáa càháⁿ-xi núu tütú Yá Ndiõxĩ núu cächĩ-xi: “Vá cächĩ-ndó sá mée-ndó ïo càhnu cuu-ndo, chi cächĩ-ndó sá Yáa cúu Xĩtohó-ndó ïo càhnu cuu-gá”, duha cächĩ-xi núu tütú-gá.

2

Tnúhu sá càháⁿ nàcuáa ní cuu ní xĩhĩ Xĩtohó Jesucristú núu cùrúxĩ

¹ Te nchòhó ñáyiu ndècu ndihĩ-ĩ ichi Xĩtohó Jesucristú sa nàha-ndo sá cùtnàhá ní quixi-ĩ ní càháⁿ-ĩ tnúhu Yá Ndiõxĩ núu-ndó, te ñá túu ní càháⁿ-ĩ dàtná càháⁿ ìⁿ ñáyiu ío váha sàá díquí-xi, àdi datná càháⁿ ìⁿ ñáyiu ío túha. ² Chi cùtnàhá ní xĩndecu ndihĩ ñaha-ĩ xii-ndo chi ní sani iní-ĩ sá mée-ní cuendá Xĩtohó Jesucristú càháⁿ-ĩ núu-ndó ndihĩ nacuáa ní cuu ní xĩhĩ-gá, te diu ducaⁿ ñĩ quide-ĩ. ³ Te cùtnàhá ní quexio-ĩ núu ndécú-ndó te ni ñá cùtnunĩ iní-ĩ nása cada-ĩ ní cùu, te ío ní quiyùhú iní-ĩ ní càháⁿ-ĩ tnúhu-gá núu-ndó. ⁴ Te cùtnàhá ní càháⁿ-ĩ nàcuáa ndùu tnúhu Xĩtohó Jesucristú núu-ndó, te nàha-ndo sá Espiritú Yá Ndiõxĩ ní chindee ñaha-xi xii-ĩ ní càháⁿ-ĩ tnúhu-gá núu-ndó, te tnúhu-áⁿ ñĩ quée-xi iní-ndó. Te ñá túu ní càháⁿ-ĩ ìⁿ tnúhu càhnu núu-ndó tnúhu sá càháⁿ cue ñáyiu ío váha sàá díquí-xi. ⁵ Te ducaⁿ ñĩ cuu cuendá sá nchòhó quíndáá iní-ndó tnúhu Yá Ndiõxĩ chi ní quide-gá sá váha sá cúu-xĩ iní-ndó, te ñá díú sá cuendá tnúhu sá càháⁿ ñáyiu cächĩ

sá ïo túha ducaⁿ ñĩ sándáá iní-ndó tnúhu-gá.

Espiritú Yá Ndiõxĩ quidé-xĩ cùtnunĩ iní-ó nàcuáa sani iní-gá

⁶ Te nchoo càháⁿ-ó tnúhu càhnu núu ñáyiu sa ní nihĩ ndée ndècu ichi Xĩtohó Jesucristú. Te tnúhu-áⁿ ñá túu càháⁿ ñáyiu ñá túu ndècu ichi-gá, te ni cuè téé yĩndaha ñaha xii-yu ñá túu càháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúu-xĩ tnúhu Yá Ndiõxĩ, te mee-gá ní cächĩ-gá ndée cùtnàhá vátá ngáva-gá ñuyíú sá ncháá ñáyiu na quíndáá iní tnúhu-áⁿ te nduu táhũ-yu cundecú-yu ndihĩ-gá núu ío váha càa ndecu-gá ni caa ni quíhĩ. Te tnúhu-áⁿ ndúu yùhu-xi ni cuu. ⁸ Te ni ìⁿ cue téé yĩndaha cue ñáyiu ñuyíú-a ñá túu tècú tnùnĩ-güedé tnúhu-áⁿ, chi núu dicó tècú tnùnĩ-güedé tnúhu-áⁿ te vá cátá càa-güedé Xĩtohó Jesucristú núu cùrúxĩ cahni ñaha-güedé xii-gá ní cùu. Te diu-ni Yaá-áⁿ ío càhnu cuu-gá. ⁹ Dico ducaⁿ ñĩ cuu chi ní quee ndáá-xi nàcuáa càháⁿ-xi núu tütú Yá Ndiõxĩ núu cächĩ-xi:

Yá Ndiõxĩ sa ní sani iní-gá nchaa nàcuáa cada-gá sá cúu-xĩ cuendá nchaa ñáyiu cùu iní ñáhá xii-gá.

Te sá ñĩ sani iní-gá cada-gá cúu-xĩ sá vátá quínĩ-gá ñáyiu te ni vátá cùndedóho-gá-yu, te ni ñá túu tnàhĩ cùtnunĩ iní-yu nása cada-gá.

Duha cächí-xi núú tütú-gá.
 10 Te mee Yă Ndiöxí ní cachí-gá sá Espiritú-gá cada-xi te nchoo cùtnuní iní-ó nchàa nacuáa sàni iní-gá cada-gá, núu xiǎⁿ ducaⁿ tècú tnùnì-ó vitna, chi Espiritú-gá xìnì-xi nchaandi túhú nacuáa sàni iní-gá cada-gá.

11 Te ñá ìⁿ ñáyiu xìnì ndáá-yu nacuáa sàni iní ingá ñáyiu, chi mee ñáyiu-áⁿ xìnì ndáá-yu nchaa nacuáa sàni iní-yu. Te ducaⁿ sätnahá-xi cùu Yá Ndiöxí chi medii-ni Espiritú-gá xìnì-xi nchaa nacuáa sàni iní-gá. 12 Te nchoo chi Yá Ndiöxí ní taxi-gá Espiritú-gá ndécú ndìhi-o, te ñá díú ñùyú-a ducaⁿ ni quèe espíritú ní ngúndecu ndìhi-o. Te ducaⁿ ñí taxi-gá Espiritú-gá ndécú ndìhi-o cuendá ducaⁿ cùtnuní iní-ó nacuáa ndùu nchaa sá vâha sá dicó ducaⁿ ñí taxi-gá ndécú ndìhi-o. 13 Te cuendá nchaa sá vâha-áⁿ cáháⁿ-ndí, te cáháⁿ-ndí nacuáa dàcahu iní ñáhá Espiritú Yă Ndiöxí xii-ndí, te ñá túú cáháⁿ-ndí nacuáa càhu iní ñáyiu ñuyú-a cáháⁿ-yu, te diu-ni nchaa tnúhu dàcahu iní ñáhá Espiritú-gá xii-ndí cáháⁿ-ndí, diu-ni nchaa xiǎⁿ dánèhé-ndí nchaa ñáyiu ndècu ndìhi tucu Espiritú-gá.

14 Te ñáyiu ñá túú ndècu ndìhi Espiritú Yă Ndiöxí ñá túú tnàhá iní-yu nacuáa ndùu tnúhu dàtecú tnúhu ñaha Espiritú-gá xii-yu, te ni ñà túú tècú tnùnì-yu, te cächí-yu sá ñà túú nàndìhi-xi. Te ducaⁿ chi mee-ni nchàa ñáyiu ndècu ndìhi Espiritú-gá

tècú tnùnì-yu nacuáa ndùu tnúhu-áⁿ. 15 Te cue ñáyiu ducaⁿ ndècu ndìhi Espiritú Yă Ndiöxí cùtnuní ndáá iní-yu ná cúú nchàa sá vâha, te vá yõ ìⁿ xìnì nchaa nacuáa sàni iní-yu. 16 Te núú tütú Yă Ndiöxí cächí-xi: “Vá yõ ìⁿ xìnì nacuáa sàni iní Yă Ndiöxí, núu xiǎⁿ vá yõ ìⁿ ndacu ná danèhé ñáhá xii-gá”, duha cächí-xi núú tütú-gá. Te nchoo chi ìⁿ-ni sàni iní-ó ndìhi Xítóhó Jesucrístú.

3

Cue tée xíquide chiùn Yá Ndiöxí

1 Te nchòhó ñáyiu ndècu ndìhi-í ichi Xítóhó Jesucrístú cächí tnúhu-í xii-ndo sã ñá ní ñìhi-í nacuáa cada-í cáháⁿ-í tnúhu-gá núú-ndó dàtná cáháⁿ-í núú nchàa ñáyiu quide nchaa nacuáa cáháⁿ Espiritú Yă Ndiöxí, chi ní cáháⁿ-í núú-ndó dàtná cáháⁿ-í núú nchàa ñáyiu cùnnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiu íchí ñí sándáá iní tnúhu Xítóhó Jesucrístú, núu xiǎⁿ ducaⁿ ñí cáháⁿ-í núú-ndó. 2 Te ní quide ñaha-í xii-ndo dàtná ìⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ìⁿ sá ñà túú tnàhí úhú tecú tnùnì-ndó, te ñá túú ní dànèhé ñáhà-í xii-ndo ìⁿ sá xitò-í sá vâ tècú tnùnì-ndó. Te quide cuendá-í sá díú-ní dùcaⁿ vá tècú tnùnì-ndó ndèé vitna te núu na dànèhé ñáhà-í xii-ndo nchàa dava-gá tnúhu. 3 Te ducaⁿ chi quide-ni-ndo

nacuáa sàni iní mée-ndó, chi ndècu-ni-ndo ichi cuédú ínì, te nàa ndìhi tnàha-ni-ndo, te ñá túú tnàhì cùu ìⁿnuu-ndo ndecu-ndo. Te xiáⁿ cùtnùnì sá mée-ní nchàa nacuáa sàni iní mée-ndó quide-ndo, te xiquide-ndo dàtná quidé nchàa ñáiyu ñá túú ndècu ichi Xítohó Jesucristú. ⁴ Te dava-ndo càchí-ndó: “Yúhú cùu-í cuendá té Páblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xiáⁿ cùtnùnì sá quidé-ní-ndó mée-ni nchaa nacuáa sàni iní mée-ndó.

⁵ Te yúhú té Páblú càchí tnúhu-í xii-ndo sã ñá túú cùnuu-í, te ní té Àpolós ñá túú cùnuu-dé chi dicó cue téé xínu cuechi núú Yá Ndiöxí cùu-ndí, te ní càháⁿ-ndí tnúhu-gá núú-ndó, núú xiáⁿ ní sándáá iní-ndó. Te ndí d^híⁿ ndí d^híⁿ ndùu chiuⁿ ní táhú Yá Ndiöxí cada-ndí. ⁶ Te yúhú cùu-í dàtná ìⁿ téé chìhi tatá chi dàcáháⁿ ñáhà-í xii-ndo tùha-ndo ichi Yá Ndiöxí. Te té Àpolós cùu-dě dàtná ìⁿ téé nàcuhñu chi téé-ánⁿ ndécú-dě dánèhé ñáhá-dě xii-ndo tnúhu-gá. Te Yá Ndiöxí cùu-gã Yaá quidé sàhnu tatá ní chihì-í-ánⁿ, te duha càháⁿ-í chi diu-gá quidé-gã tá nihí ndée-ndó ndècu-ndo ichi-gá. ⁷ Te núú xiáⁿ ní téé chìhi tatá te ní téé nàcuhñu ñá túú cùnuu-güedé, dico Yá Ndiöxí ío cùnuu-gá chi diu-gá quidé-gã xínu tatá-ánⁿ te sàhnu-xi. ⁸ Te ìⁿ-ni cùu téé chìhi tatá ndìhi téé nàcuhñu. Te ducaⁿ sãtnahá-xi cùu nchúhú cue téé xiquide chiúⁿ Yá Ndiöxí, te nàcuáa ndùu

chiuⁿ ní quide-ndí te ducaⁿ cùnduu táhú taxi Yá Ndiöxí nduu táhú-ndí. ⁹ Te nchòhó cùu-ndó dàtná ìⁿ xichi núú ní quée tatá, te nchúhú cùu ìⁿnuu-ndí quidé chiúⁿ-ndí xiáⁿ. Te ducaⁿ sãtnahá-xi cùu-ndo chi cùu cuendá ñáhá Yá Ndiöxí xii-ndo, te nchúhú cùu ìⁿnuu-ndí quidé-ndí chiúⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáháⁿ. ¹⁰ Te yúhú cùu-í dàtná ìⁿ téé cùnuu dacaa vehe te ní tava-í cimièntú-xi, te d^híⁿ cue téé véxi dàcaa-güedé ndóho, te ìⁿ ìⁿ cue téé-ánⁿ ïo xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yá Ndiöxí ní taxi-gá chiúⁿ quide-í te chindee ñaha-gá, chi díhna-gá-í ní quixi-í ní càháⁿ-í tnúhu Xítohó Jesucristú núú-ndó, te d^híⁿ cue téé véxi dàcuaha ñaha-ná xii-ndo tnúhu-gá, te ìⁿ ìⁿ cue téé-ánⁿ ïo xini ñuhu-xi cada cuendá-güedé nàcuáa dacuàha ñaha-güedé xii-ndo tnúhu-gá. ¹¹ Te cimièntú vehe-ánⁿ cada iní-ó sã cùu-xí mée Xítohó Jesucristú, te ducaⁿ chi yúhú ní dánèhé ñáhà-í xii-ndo ní ngündecu ndìhi-ndo Xítohó Jesucristú, te vá yõo-gá cundecu ndìhi-ndo chi ìⁿdií díí-ni-gã ndécú. ¹² Te dava cue téé dàcaa-güedé vehe váha te chihì-güedé díhúⁿ cuááⁿ, ndìhi díhúⁿ cuixíⁿ, ndìhi yúú sã ïo vii càa.

Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-áⁿ ndihì vehe ité-áⁿ ndihì vehe tnuvixi^{n-áⁿ} ndoo ndoo càyú, te nchaa vehe váha-áⁿ vǎ càyú-xi cuèi na yáha ñuhú. Te nchaa cue téé ní dácáá vèhe váha-áⁿ cada iní-ó sǎ cúu-güedé ñáyiú ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndihì cue téé ní dácáá vèhe ité, ndihì cue téé ní dácáá vèhe tnuvixiⁿ cada iní-ó sǎ cúu-güedé ñáyiú ñá túú cuíní cada chiúⁿ Yá Ndiöxí nàcuáa tàú-xi cunduu. Te sáá nduu te cutnùnì nàcuáa ndùu chiuⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiú ní quide chiúⁿ-gá. ¹⁴ Te cue ñáyiú ío váha xǐquide chiúⁿ Yá Ndiöxí te cùdí chiúⁿ quidé-yu, te ñáyiú-áⁿ nihí-yu sǎ ndúú tǎhǔ-yu. ¹⁵ Te cue ñáyiú ñá túú quide chiuⁿ Yá Ndiöxí nàcuáa tàú-xi cunduu, te vǎ cùdí chiúⁿ ní quidé-yu chi cuíta te ndóo-ná-yu duha, dico mèé-yu chi naníhí tǎhú-yu.

¹⁶ Te yúhú càháⁿ-í dóho-ndo dándacu-í iní-ndó sǎ cúu-ndó dàtná vehe Yá Ndiöxí, chi Espiritú-gá ndécú ndihì ñaha-xi xii-ndo. ¹⁷ Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-áⁿ, te ducaⁿ càda-gá chi nchòhó cúu-ndó ñáyiú cùu cuendá-gá.

¹⁸ Te vǎ dándàhú-ndó

mèe-ndo sǎ ío túha-ndo. Te núu ío dava-ndo sàni iní-ndó sǎ túha-ndo dàtná sàni iní cue ñáyiú ñá túú ndècu ichi Yá Ndiöxí, te cada-ndo sǎ cúu-ndó dàtná ñáyiú ñá túú tǎhí túha, te ducaⁿ te cuu ndisa-ndo ñáyiú túha sǎ cúu-xí Yá Ndiöxí. ¹⁹ Te nchaa sǎ xínì tǔnì nchaa ñáyiú càchí sǎ ío túha ñá túú ndècu ichi Yá Ndiöxí ñá túú nàndíhi-xi sǎ cúu-xí-gǎ. Te càchí-xi núú tütú-gá: “Nchaa ñáyiú càchí sǎ ío túha te Yá Ndiöxí dandöo canúú ñáhá-gǎ xii-yu núú nchàa sǎ quidé-yu”, duha càchí-xi núú tütú-gá. ²⁰ Te càchí tucu-xi ingá xichi: “Yá Ndiöxí cùtnùnì iní-gá nchaa nàcuáa sàni iní ñáyiú càchí sǎ ío túha. Te nchaa nàcuáa sàni iní-yu-áⁿ càchí-gá sǎ ñá túú vèdana nàndíhi-xi”, duha càchí-xi núú tütú-gá. ²¹ Núu xǎⁿ càháⁿ-í dóho-ndo sǎ vǎ càchí-ndó sǎ nchùhú cue téé dǎnehé ñáhá xii-ndo tñuhu-gá ío càhnu cuu-ndí. Te nchaa sǎ ío ñuyúú-a cùu-xi sǎ váha sǎ cúu-xí-ndó. ²² Te cuèi yúhú ndihì té Àpolós ndihì té Pèlú ndécú-ndí sǎ cúu-xí-ndó, te cuèi nchaa sǎ ío ñuyúú-a te cuèi nchaa nduu ndècu-ndo te cuèi sǎ cúu-ndó dico nchaa cùu-xi sǎ váha sǎ cúu-xí-ndó. Te cuèi nchaa sǎ ndécú tǎvíí, te cuèi nchaa sǎ cóó ndèé cuèé-gá nchaa cùu-xi sǎ váha sǎ cúu-xí-ndó. ²³ Te mee-ndo ndècu-ndo sǎ cúu-xí Xitohó Jesucristú, te mee Xitohó Jesucristú ndécú-gǎ sǎ cúu-xí Yá Ndiöxí.

Nàcuáa ndùu chiuⁿ quide cue téé ní táuchíúⁿ Xítóhó Jesucristú cáháⁿ tnúhu-gá

1 Te cada cuendá-ndó sá nchúhú dicó-ni cue téé xínu cuechi núú Xítóhó Jesucristú cúu-ndí, te chiuⁿ-án ní taxi Yá Ndiöxí quidé-ndí cáháⁿ-ndí tnúhu sá ní cachí-gá yíyùhu ni cuu. 2 Te xini ñuhu-xi sá ncháá ñáyiú ducaⁿ ní sáñaha Yá Ndiöxí chiuⁿ quidé-yu cada ndáá-yu cadá-yu chiuⁿ-án. 3 Te yúhú ñá túú quide cuendá-í nùu nása ndùu tnúhu cáháⁿ-ndó cuendá-í nùu cùu-í téé váha àdi ñá túú cùu-í. Te diu-ni ducaⁿ ñá túú quide cuendá-í nùu nása-gá cáháⁿ nchaa dava-gá ñáyiú cuendá-í. Te ní mèe-í ñá túú cáháⁿ-í nùu cùu-í téé váha àdi ñá túú cùu-í. 4 Te sànuu iní-í sá ñá túú nã cúmãní-í núú Yá Ndiöxí, dico ñá díú sá xĩãⁿ te cachí-í sá ñá túú cuèchi-í ndécú nùú-gá, chi mee-gá náhá ndáá-gá te núu nása quide-í ndécú-í. 5 Te nchòhó vá cáháⁿ-gá-ndó sá ñá túú cundáá ñáyiú núú Yá Ndiöxí, chi vátá sáá-gá nduu cundáá cuèchi-yu. Te na sáá nduu quixi tucu Xítóhó Jesucristú te dàvá-áⁿ dàtúu-gá nchaa sá quidè-yu, nchaa sá ñá túú xini-ó quidé-yu vitna, te ducaⁿ dàtúu-gá nchaa nácuáa sàni iní-yu. Te Yá Ndiöxí cáháⁿ váha-gá cuendá nchaa ñáyiú ní quide váha.

6 Te nchòhó ñáyiú ndècu ndihi-í ichi Xítóhó Jesucristú, càcunehe-í té Àpolós ndihi yúhú núú-ndó dànehé ñáhà-í xii-ndo nácuáa cada-ndo cuendá ducaⁿ cùu-xi ìⁿ sá

váha sá cúu-xi-ndó, ndihi cuendá sá nchòhó canchicúⁿ nihnu-ndo càda-ndo mee-ni nchaa nacúaa yòdo tnuni núú tütú Yá Ndiöxí. Te ducaⁿ te vá cachí-ndó sá ìⁿ téé cáháⁿ tnúhu Yá Ndiöxí ío-gá càhnu cuu-dé dàcúúxí ìngá-dé. 7 Te nchòhó vá cachí-ndó sá ío-gá cùnùu-ndo dàcúúxí dàva-gá ñáyiú chi Yá Ndiöxí ní quide-gá ní ngúndecu ndihi-ndo ncháa sá xini tnùní-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá méé-ndó ní quide-ndo dùcaⁿ ní ngúndecu ndihi-ndo ncháa sá xini tnùní-ndó.

8 Te nchòhó quidé-ndó sá ñá túú tnàhí-gá ná cúmãní-ndó nùú Yá Ndiöxí, te quide-ndo sá ní nihí-ndó ncháa sá cuini-ndó nùú-gá ndécú ndihi-ndo, te sànuu sá cúu-nã-ndó dàtná cue téé yindaha ñáyiú, te nchúhú ñá túú cùu ìⁿnuu ndihi ñaha-ndí xii-ndo quindaha ndihi ñaha-ndí xii-ndo ñáyiú, ¿te váha-ni te núu dicó ndisa sá yindaha-ndo ñáyiú chi tnàhá nchúhú ní tnàhá ndihi ñaha-ndí xii-ndo quindaha-ó-yu te núu dicó cúu-xí ìⁿ sá ndáá dico ñáhá! 9 Te yúhú quidé cuendá-í sá nchúhú cue téé ní táuchíúⁿ Xítóhó Jesucristú cáháⁿ tnúhu-gá núú ñáyiú ní cachí Yá Ndiöxí sá cúu-ndí cue téé ñá túú nàndíhi sá cúu-xí dàva-gá ñáyiú. Te ní cachí tucu-gá sá cúu-ndí dàtná cue

ñáyiú sa ní tnahá òré cuú-xi quíhíⁿ nacháhu cuéchi-xi, te nchaa ñáyiú cùñúhu ñáhá-yu xii-ndí sá dúcáⁿ ndòho-ndí, te tnahá nchaa espíritú cùñúhu ñaha-xi xii-ndí. ¹⁰ Te cuèndá sá xínú cuèchi-ndí núú Xítohó Jesucristú, xíáⁿ cúú-ndí dàtná cue téé ñá túú vèdana nàndíhi sá cúú-xi ñáyiú. Te nchòhó quidé-ndó sá cúú-ndó ñáyiú ío túha ndècu ndíhi Xítohó Jesucristú. Te ñáyiú càchí-yu sá nchùhú cúú-ndí cue téé ñá túú ndàcu cada ìⁿ sá cáda sá cúú-xi Yá Ndiòxí. Te nchòhó quidé-ndó sá cúú-ndó ñáyiú ío váha ndàcu quide ìⁿ sá sání ìní-ndó sá cúú-xi-gã. Te cue ñáyiú dàquee tihú ñáhã-yu xii-ndí, te nchòhó néhè-yu sá yíñúhu núú-ndó. ¹¹ Te nchùhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dòó-ndí, te nchaa ñáyiú quide úhú ñáhã-yu xii-ndí, te ni vèhe-ndí ñá túú ndèé cáá cùndècu-ndí. ¹² Te ío ndòho-ndí quidé chiuⁿ-ndí nihí-ndí sá xexí-ndí. Te cue ñáyiú xicuéhé ñáhã-yu xii-ndí dico xicáⁿ táhú-ndí núú Yá Ndiòxí cuèndá-yu, te ñá cúú tnahí quiní ndeé ñáhã-yu xii-ndí dico quide cahnu ìní-ndí nchaa sá quidé ñáhã-yu. ¹³ Te mee-ni tnúhu cuèhé tnúhu duha càháⁿ-yu cuèndá-ndí dico sàcahnu ìní-ndí te dàsahú-ndí-yu mee-ni tnúhu váha. Te càchí-yu sá cúú-ndí dàtná ìⁿ sá ñà túú-gã vèdana nàndíhi, te nchaa-ni nduu ducaⁿ

càháⁿ-yu xáhãⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñáhà-í xii-ndo, dico ñá díú tnúhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide ìní-í sá sùúni dàtná déhe mee-í cúú-ndó chi ío cùu ìní ñáhã-í xii-ndo. ¹⁵ Te nchaa-o ndècu-o ichi Xítohó Jesucristú vitna, dico yúhú cúú-í téé díhna nuu nì dánèhé ñáhã xii-ndo nacuaá nduu tnúhu sá càháⁿ nacuaá nanihí tàhú-ó, núu xíáⁿ cúú-í dàtná tãtã-ndó. Te cuèi vèi vihi cue téé na quixi-güedé danèhé ñáhã-güedé xii-ndo tnúhu-gá dico ìⁿ dìi-ni yúhú cúú-í téé díhna nuu-gã ní dánèhé ñáhã xii-ndo tnúhu-gá. ¹⁶ Núu xíáⁿ càháⁿ-í dóho-ndo sã cáncñícúⁿ nihnu-ndo càda-ndo nchaa nacuaá quide-í.

¹⁷ Te xíáⁿ núu sa ní tenda-í té Timùteú véxi coto ñaha-dé xii-ndo, te téé-áⁿ ío cùu ìní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítohó Jesucristú, te téé-áⁿ cachí tnúhu-dé xii-ndo nchaa nacuaá quide-í ndécù-í ichi-gá. Te diu-ni nacuaá na càchí tnúhu-dé-áⁿ diu-ni ducaⁿ quide-í nchaa xichi núú tàcã ñáyiú dàcuaha tnúhu Xítohó Jesucristú. ¹⁸ Te dava nchòhó ío quide cahnu-ndo mee-ndo chi sàni ìní-ndó sã vã quixí-gã-í quixi coto ñaha-í xii-ndo. ¹⁹ Dico núu mee Yá Ndiòxí ná càchí-gã te ío ndíhi quixi coto ñaha-í xii-ndo, te dàvã-áⁿ quiní-í te núu nása quide nchaa ñáyiú ducaⁿ ío xiquide cahnu mee-xi-áⁿ ndécù-yu ichi Xítohó Jesucristú. Te vá cáda

cuëndá-í tnúhu càháⁿ-yu chi chiùⁿ quidé-yu cada cuëndá-í. 20 Te vitna yìndaha ñaha Yá Ndiòxí xii-o, te chindee ñaha-gá xii-o quide-o nchaa sá vâha sâni iní-ó quide-o te ñá díú mèe-ni sá càháⁿ-ó. 21 Te ío chí cání iní nûu ndédacâa sá vâha-gá cada-í òré ná quéxio-í núú ndécú-ndó, núu sá ténàá ñáhà-í xii-ndo àdi sá càháⁿ ndihí ñaha-í xii-ndo ndihí tnúhu vii tnúhu váha nâcuâa cutnùní iní-ndó sá cúú iní ñáhà-í xii-ndo.

5

Íⁿ cuéchi càhnu vihi

1 Te yúhú sa ní níhí ndáá-í tnúhu nâcuâa cùu ndecu-ndo, chi ìⁿ téé ndècu ndihí-ndo ndeca-dé nâná chàhá-dé. Te xíáⁿ cúú-xí ìⁿ cuéchi càhnu vihi, chi ndéé nchaa ñâyiu ñá túú ndècu ichi Yá Ndiòxí càchí-yu sá vâ cúú tnàhí ducaⁿ càda-o. 2 ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sá cùndiyí-ndó ndixi cuéchi iní-ndó sá dúcáⁿ cùu ndecu-ndo ni cuu! Te téé ducaⁿ quide-áⁿ xíní ñùhu-xi sá vâ dáñá-gã-ndó nihí tnáhá ndihí ñaha-dé xii-ndo ni cùu dico ñá túú dùcaⁿ quide-ndo. 3 Te yúhú ñá túú ndècu ndihí ñaha-í xii-ndo dico datná tnúhu sá ndécú ndihí ñaha-í xii-ndo chí ducaⁿ-ni ío ñùhu iní ñáhà-í xii-ndo. Te yúhú càchí-í sá nâcháhu téé-áⁿ cuéchi-dé sá dúcáⁿ quide-dé, te díu-ni ducaⁿ càháⁿ-í núú-ndó te núu dicó ndécú ndihí ñaha-í xii-ndo. 4 Te òré nátacá-ndó càháⁿ ndihí-ndo Yá Ndiòxí te díu-ni Xítohó Jesucristú ñá túú

dàña ndéé-gá chíndèe ñaha-gá xii-ndo, te òré-áⁿ cada-ndo nâcuâa cuíní Xítohó Jesucristú cada-ndo, te cada iní-ndó sá tnáhá-í ndécú ndihí ñaha-í xii-ndo. 5 Chí tàú-xi sá téé ducaⁿ quide-áⁿ daquèe tíhú-ndó-dě, te ducaⁿ te sâcuíhná dandòho ñaha-xi xii-dé cuèi na cùú-dé, dico na sáá nduu te nduu táhú-dě cundecu-dé ndihí Xítohó Jesucristú.

6 Te nchòhó ñá túú ndùu váha-xi sá càchí-ndó sá ío càhnu cuu-ndo. Te xíní-ndó sá cuèi luha-ni levadùrá ná quíhu yuchi cuáha pàá dándàa-xi cuèi luha-ni nâ quíhu te nihí-ni yuchi sàháⁿ ndoho-xi. Te ducaⁿ sãtnahá-xi cùu nchohó chí núu ndècu ndihí-ndo ìⁿ ñâyiu quide sá ñá túú vâha te nchaa-ndo ñá túú-gá cúú vâha iní-ndó ndècu-ndo. 7 Te xini ñùhu-xi sá cáda-ndó datná quidé cuè ñâyiu quide vico pascuá, chí ñá túú chìhí-yu levadùrá yuchi cuáha pàá xéxí-yu nduu quidé-yu vico-áⁿ. Te sá quíhu pàá-áⁿ cada iní-ó sá cúú-xí nchàa sá cuèhé sá dúhá ní xóo cada-ndo. Te vá cáda-gã-ndó ni ìⁿ sá cuèhé sá dúhá, te ducaⁿ te cuu-ndo ñâyiu váha chí sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sá cúú-güedi datná Xítohó Jesucristú nâcuâa ní xíhí-gá núú cùrúxí. 8 Te núu xíáⁿ xíní ñùhu-xi sá vâ cáda-gã-ndó ni ìⁿ sá cuèhé sá dúhá sá ní xóo cada-ndo, te ni vá cúhúⁿ-gá iní-ndó te ni vâ cáda-gã-ndó, te ni yùhu ni

iní-ná-ndó càda-ndo mee-ni sá vâha.

9 Te tutú sá sà ní dáquixì-í ndaha-ndo nĩ cachí-í sá vâ nihí tnáhá-ndó ndìhi cue ñáyi ndècu ichi díí ínì. 10 Te sá dúcáⁿ càháⁿ-í núú tütú ní dáquixì-í ndaha-ndo te vâ cánì ínì-ndó sá yǔhú càchí-í sá vâ cúú-gǎ tnahá tnúhu-ndo ndìhi cue ñáyi ndècu ichi cuehé ichi duha, ndìhi ñáyi ndècu ichi díí ínì, ndìhi ñáyi xihò nchaa sá íò ñuyú, ndìhi ñáyi dùhu sá ndécú ndìhi tnaha ñáyi-xi, ndìhi ñáyi quide cahnu sá càchí-yu cù ndiòxí te ñá ndàá sá ndiòxí cúú-xí chi dícó cue téé ñuyú-a ní cadúha nchaa xiǎⁿ, chi núu ducaⁿ na càda-ndo vâ tnáhá tnúhu-gá-ndó ndìhí-yu te xini ñuhu-xi sá vâ cùndècu-gá-ndó núú ndécú-yu. 11 Te ñá túú dùcaⁿ quee-xi nacuáa càháⁿ-í núú tütú-í, chi yúhú càchí-í sá vâ cúú tnáhá tnúhu-ndo ndìhi ñáyi càchí sá ndécú ichi Xítóhó Jesucristú te ñá ndàá sá ndécú-yu ichi-gá. Te núu cùú-yu ñáyi ndècu ichi díí ínì, àdi cuú-yu ñáyi xihò nchaa sá íò ñuyú-a, àdi cuú-yu ñáyi quide cahnu nchaa sá càchí-yu cù ndiòxí te ñá ndàá chi dícó cue téé ñuyú-a ní cadúha nchaa xiǎⁿ, àdi cuú-yu ñáyi yiti yùhu-xi, àdi cuú-yu ñáyi quihu, àdi cuú-yu ñáyi dùhu sá ndécú ndìhi tnaha ñáyi-xi, te nchaa ñáyi ducaⁿ càchí sá ndécú ichi-gá te ñá ndàá te ducaⁿ xiquidé-yu, te ni vâ cúú nihí tnáhá-ndó ndìhí-yu caxi-ndo

ndìhí-yu. 12-13 Te ñá díú yǔhú cúú-í téé càháⁿ cuendá nchaa ñáyi ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yǎ Ndiòxí càháⁿ-gá te núu nása quidé-yu ndécú-yu. Dico nchòhó chi taú-ndó càda cuendá-ndó núu nása quide cue ñáyi ndècu ndìhi-ndo ichi Xítóhó Jesucristú. Núu xiǎⁿ xini ñuhu-xi daquee tihú-ndó téé ducaⁿ ñá túú quide vâha ndècu ndìhi-ndo-áⁿ, te vâ dáñá-gǎ-ndó nihí tnáhá ndìhi ñaha-dé xii-ndo.

6

Nacuáa taú-xi cada ñáyi ndècu ichi Xítóhó Jesucristú te núu ñá túú ndècu ndìhi vâha tnáhá-yu

1 Te dava nchòhó òré ñá túú ndècu ndìhi vâha tnaha-ndo te cùyii-ndo cuháⁿ-ndó núú cuè téé cùchiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ taú-ndó quihíⁿ-ndó càcáⁿ cuéchi-ndo. 2 Te nchòhó sa naha-ndo sá ncháá ñáyi cùu cuendá Yǎ Ndiòxí sáá nduu càháⁿ-yu te núu ní quide ndáá nchaa dava-gá ñáyi àdi ñá túú ní quide ndáá-yu, te nchòhó tnáhá-ndó cùu-ndo ñáyi ducaⁿ càháⁿ, te núu ducaⁿ te cutnùní ínì-ndó sá ndácú-ndó càda ndáá-ndó ncháa cuéchi sá ñá túú ùhú cundáá vitna ndècu-ndo ñuyú-a. 3 Te nchòhó sa naha-ndo sá ncháá ndéé cue espíritu xínú cuéchi núú Yǎ Ndiòxí sáá nduu

cáhán-ó te núu nása quide-xi ndecu-xi. ¡Núu xiáⁿ cútnùní iní-ó sã úuⁿ-gã ndacu-o càda ndáá-ó ncháa cuéchi sá ió ñuyú-a! ⁴ Te núu ió dava-ndo ió nása cùu ndecu-ndo te xináa-ndó, te vá quihíⁿ-ndó càcáⁿ cuéchi-ndo núu cuè téé ndèhe-ndo sá ñã túú ndècu-güedé ichi Yá Ndiöxí, dico nchòhó chi da núu cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha càháⁿ-í cuendá cuahaⁿ núu-ndó chi ñã túú quide váha-ndo sã dúcáⁿ quide-ndo. ¿Te náa dicó-nã ñã túú tnàhí ìⁿ téé cùtnuní iní-xi nàcuáa cada ndáa cuéchi-ndo ndècu ndihí-ndo ichi Xítohó Jesucristú-ãⁿ? ⁶ Te nchòhó, ñã túú quide váha-ndo, chi dava-ndo cuáháⁿ-ndó núu cuè téé ñã túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáyiu ndècu ndihí-ndo ichi-gá.

⁷ Te ñã túú quide váha-ndo sã dúcáⁿ nàá ndihí tnàha-ndo te cuáháⁿ-ndó sàcáⁿ cuéchi-ndo, te váha-gá sã cádá càhnu iní-ndó cuéi nándi na càda ñaha tnaha ñáyiu-ndo xii-ndo cuéi dùhú-yu sá ndécú ndihí-ndo dico cada càhnu-ni iní-ndó. ⁸ Dico nchòhó chi ñã túú quide càhnu iní-ndó chi da uuⁿ-gá ñã túú quide váha-ndo sàcúu-xí tnàha ñáyiu-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyiu ndècu ichi cuehé ichi duha vá ndúú tãhü-yu cundecú-yu núu ndécú Yá

Ndiöxí táxí tnùnì-gá, núu xiáⁿ vá cánì ìní-ndó sã ñáyiu-áⁿ nduu tãhü-yu cundecú-yu ndihí-gá. Te ni cuè ñáyiu ndècu ichi díí ìní, te ni cuè ñáyiu quide càhnu ncháa sá càchí-yu cùu ndiöxí te ñã ndáa chi dicó cue téé ñuyú-a ní cadúha ncháa xiáⁿ, te ni cuè téé càháⁿ ndihí ñadìhí te ñã díú ñadìhí-güedé cúu-yu, te ni cuè ñáyiu dìhí càháⁿ ndihí téé te ñã díú yíⁿ-yu cùu-güedé, te ni cuè téé càháⁿ ndihí tnàha téé-xi, ¹⁰ te ni cuè ñáyiu dùhu, te ni cuè ñáyiu xìho sá ndécú ndihí tnaha ñáyiu-xi, te ni cuè ñáyiu quihu, te ni cuè ñáyiu càháⁿ úhú, te ni cuè ñáyiu dánícuèhé tnàha ñáyiu-xi te dùhu ñahá-yu, te ni ìⁿ cue ñáyiu duha xiquide vá ndúú tãhü-yu cundecú-yu núu ndécú Yá Ndiöxí táxí tnùnì-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáyiu sa ní nduu ndoo ní nduu nine iní-xi, te ní cuu-ndo ñáyiu cùu cuendá Yá Ndiöxí, te ní cuu tucu-ndo ñáyiu ñã túú-gã cuéchi-xi ndècu núu-gã. Te ducaⁿ ní quide ñaha Yá Ndiöxí xii-ndo sã váha sá cuendá Xítohó Jesucristú, te ní ngúndecu ndihí-ndo Espíritú Yá Ndiöxí.

Nàcuáa ndiùu cuendá yiqui cùñú-ó

¹² Te càchí ñáyiu sá ncháá sá sání ìní-ó cuu cada-o, te ndáa càháⁿ-yu dicó-ni sá ñã ncháá cùu-xi sá váha sá cúu-xí-ó, Te núu cuínì ncháa sá sání ìní-ó-ãⁿ taxí tnùnì ñáhá-xí te vá cádá-ó. ¹³ Te nchòhó sa xìnì-ndó sã ncháá sã xéxí-ó

cuãnguee-xi xití-ó, te xití-ó nĩ cuáha tnàhí-xi sá cùhúⁿ nchàa sá cáxí-ó, dico xití-ó ndìhi nchaa sá xéxí-ó chi naa-xi. Te Xítohó Jesucristú néhé cuendá-gá yìqui cùñú-ó, te ducaⁿ yìqui cuñú-ó cùu-xi cuendá-gá, te ñá túú ní cuáha yìqui cùñú-ó sã cùndècu-xi ichi díí ìní. ¹⁴ Te dàtná ní quide Yá Ndiöxí ní dándótó-gã Xítohó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o nũu na cùú-ó, chi ndàcu-gá quidé-gã nchaa sá vãha.

¹⁵ Te nchòhó sa nàha-ndo sá yìqui cuñú-ó cùu-xi cuendá Xítohó Jesucristú chi ìⁿ-ni cùu-o ndìhi-gá, núu xíãⁿ ñá túú tnàhí ndùu váha-xi cáháⁿ ndìhi-o ñáyiu ndècu ichi díí ìní, chi yìqui cùñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sã cuendá-nã ñáyiu-áⁿ cúu yìqui cuñú-ó, núu xíãⁿ ñá túú tnàhí ndùu váha-xi ducaⁿ càda-o. ¹⁶ Te sa xíní-ndó sã núu ìⁿ tée na càháⁿ ndìhi-dé ìⁿ ñadìhí ndécú ichi díí ìní te cada iní-ó sã ìⁿ-nã yìqui cùñú cúu-yu. Te ducaⁿ càháⁿ-xi núu tütú Yá Ndiöxí núu càchí-xi: “Ìⁿ tée na càháⁿ ndìhi-dé ìⁿ ñadìhí te ìⁿ-nã yìqui cùñú cúu-yu”, duha càchí-xi. ¹⁷ Te ducaⁿ sãtnahá-xi cùu nchaa ñáyiu tnàhá tnúhu ndìhi Xítohó Jesucristú, chi ìⁿ-nã cúu-yu ndìhi-gá.

¹⁸ Te núu xíãⁿ càháⁿ-í dóho-ndo sã vã cùndècu-ndo ichi díí ìní, chi núu ducaⁿ na càda-ndo te ñá túú tnàhí sá vãha cùu-xi sá cúu-xí yìqui cuñú-ndó chi ío dàcuíta

nihnu-xi yìqui cùñú-ndó. Te nchaa dava-gá sá cuèhé sá dúhá ñà túú quide-xi yìqui cuñú-ndó dàtná quidé xíãⁿ. ¹⁹ Te nchòhó sa cùtnuní iní-ndó sã yìqui cuñú-ndó cùu-xi dàtná ìⁿ vehe núu ndécú Espíritú Yá Ndiöxí. Te ducaⁿ sãtnahá-xi cùu yìqui cuñú-ndó chi ndècu-ndo ndìhi Espíritú-gá. Te mee-gã ní taxi-gá Espíritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiöxí cúu cuendá ñáhá-gã xii-ndo. ²⁰ Te ducaⁿ cùu-ndo ñáyiu cùu cuendá Yá Ndiöxí chi Xítohó Jesucristú ní nacháhu-gá nchaa yíca cuèchi-ndo. Te núu xíãⁿ xíní ñùhu-xi sá ñihí ní ndúú-ndó càda-ndo nacuaa cuu càhnu Yá Ndiöxí, te ducaⁿ tàu-xi cada-ndo chi espíritú-ndó ndìhi yìqui cuñú-ndó cùu-xi cuendá-gá.

7

Sáhú sã cúu-xí ñáyiu ní tnándaha

¹ Te ní quexìo tutú sá nĩ dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núu tütú-ndó. Te váha cada-xi te núu vá cándèca tée ñadìhí, te ducaⁿ-ni vãha cada-xi te núu ñáyiu dìhí vá cándècá-yu tée. ² Te dìcò-ni sá núu ducaⁿ na càda-ndo te dava-ndo càni iní-ndó cùndecu-ndo ichi díí ìní. Núu xíãⁿ xíní ñùhu-xi sá ncháá cuè tée ndi dííⁿ cùndecu ñadìhí-güedé, te ducaⁿ-ni tùcu nchaa cue ñáyiu dìhí ndi dííⁿ cùndecu yíⁿ-yu. ³ Te càchí tnúhu-í xii-ndo sã ncháá cuè tée vá cúu

càchí-güedé sá vǎ cúú cǎháⁿ ndihí-güedé ñadihí-güedé, te diu-ni ducaⁿ cuè ñáiyu dihí tucu, vǎ cúú càchí-yu sá vǎ cúú cǎháⁿ ndihí-yu yíi-yu. ⁴ Te nchaa cue ñáiyu dihí chi ñá díú mèe-ní-yu cùu cuendá-yu yiqui cùnú-yu chi tnàhá cúú cuendá yíi-yu, te ducaⁿ-ni nchaa cue té tucu chi ñá díú-ní mèe-güedé cúú cuendá-güedé yiqui cùnú-güedé chi tnàhá cúú cuendá cue ñadihí-güedé. ⁵ Te cue té vǎ cúú càchí-güedé sá vǎ cúú cǎháⁿ ndihí-güedé ñadihí-güedé. Te ni cuè ñáiyu dihí vǎ cúú càchí-yu sá vǎ cúú cǎháⁿ ndihí-yu yíi-yu. Àdi te núu ní ndatnúhu-yu sá vǎ dúcáⁿ càdá-yu ñⁿ úú nduu cuendá sá cuení-yu ío cǎháⁿ ndihí-yu Yá Ndiõxí, dico nà yáha núu ná daha nduu ducaⁿ ñí ndatnúhu-yu sá vǎ dúcáⁿ càdá-yu te nanihí tnàhá tucú-yu, chi núu ñáhá te cudana te vǎ cuacàhnu iní-yu te sácuihná dacàháⁿ ñáhá-xí xii-yu cadá-yu sá ña túú tàú-yu cadá-yu.

⁶ Te tnúhu càháⁿ-í-a quèe-xi sá tée ndihí ñadihí cuu candeca tnàhá-yu dico ñá túú quide yica-í sá dúcáⁿ càdá-yu. ⁷ Te yúhú sání iní-í sá nñu dícó sá cúú te nchaa-ndo cundecu-ndo datná ndécú-í, dico ñáhá chi mee Yá Ndiõxí ní cachí-gá nàcuáa nduu táhú-ó ñⁿ ñⁿ-o cundecu-o, chi dava-o ñí cutáhú-ó nñú-gǎ sá cündecu ñadihí-ó te dava-o ñáhá. ⁸ Te càchí tnúhu-í xii

nchòhó cue té vátá ñihí-gǎ ñadihí-xi sá vǎha-gǎ sá nñu vǎ cündecu ñadihí-ndó datná yúhú. Te ducaⁿ-ni nchòhó cue ñáiyu dihí ñáiyu vátá ñihí-gǎ yíi-xi sá vǎha-gǎ sá nñu vǎ cündecu yíi-ndo. Te diu-ni duha càháⁿ-í sá cúú-xí nchaa nchòhó ñáiyu dihí ní quendóo quèe sá vǎha-gǎ sá nñu vǎ cándeca-gǎ-ndó tée. ⁹ Te càchí tnúhu-í xii nchaa-ndo sǎ nñu xito-ndo sá vǎ cündèe iní-ndó cundecu mee-ndo te vǎha-gǎ sá nñu tnándaha-ndo, te ñá díú sǎ mée-ní càni cuehé cani duha iní-ndó cundecu-ndo.

¹⁰ Te nchaa nchòhó ñáiyu sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xitohó Jesucristú ducaⁿ dàcahu iní ñáhá-gǎ xii-í, chi mee-gǎ cuení-gǎ cada-ndo nàcuáa na càháⁿ-í-a. Te nchaa nchòhó cue ñáiyu dihí càháⁿ-í dóho-ndo sǎ vǎ dáñá-ndó yíi-ndo. ¹¹ Te núu ió dava-ndo sǎ ní dáñá-ndó yíi-ndo, te xini ñuhu-xi sá vǎ cándeca-gǎ-ndó tée, chi cundecu mee-ñá-ndó àdi núu ñáhá te naqueheⁿ tucu-ndo tée ní cuu yíi-ndo. Te nchaa nchòhó cue té ndècu ñadihí-xi càháⁿ-í dóho-ndo sǎ vǎ dáñá-ndó ñáiyu cùu ñadihí-ndó.

¹² Te tnúhu na càháⁿ-í-a cùu-xi sá ñí sani iní mée-í te ñá díú tnúhu sá ñí cachí Xitohó Jesucristú càháⁿ-í cúú-xí. Te núu dava nchòhó cue té ndècu ichi Xitohó Jesucristú ndécá-ndó ñáiyu dihí ñáiyu ñá túú ndècu ichi-gǎ, te vǎ dáñá-ndó-yu

xìni ñuhu-xi sá cùndècu-ni-o datná ndécú-ó cùtnàhá ní cáháⁿ ñáhá Yá Ndiòxí xii-o ní ngúndecu-o ìchi-gá. ²¹ Te núu cùu-ndo ñáyiu ñá túú tnàhí dàñá quee núú chíúⁿ pàtróóⁿ-xi cùtnàhá ní cáháⁿ ñáhá Yá Ndiòxí xii-ndo, te ñá túú nã cani iní-ndó, dico núu dàña ñaha patróóⁿ-ndó quèe-ndo núú chíúⁿ-ndó te váha-ni quee-ndo núú chíúⁿ-ndó. ²² Te sátá ní cáháⁿ ñáhá Xítóhó Jesucristú xii nchòhó ñáyiu ducaⁿ ñà túú tnàhí dàñá quee núú chíúⁿ pàtróóⁿ-xi-áⁿ, te ní cuu-ndo datná ñáyiu dàñá quèé núú chíúⁿ pàtróóⁿ-xi sá cúu-xí-gã, te ducaⁿ chi ñá túú-gã ndécú-ndó ìchi cuehé ichi duha. Te nchòhó ñáyiu dàñá quèé núú chíúⁿ pàtróóⁿ-xi cùu-ndo datná ñáyiu ñá túú tnàhí dàñá quee núú chíúⁿ pàtróóⁿ-xi sá cúu-xí Xítóhó Jesucristú, te ducaⁿ chi xìnu cuechi-ná-ndó núú-gã. ²³ Te Yá Ndiòxí ní nduu cuendá ñáhá-gã xii-o chi Xítóhó Jesucristú ní nacháhu-gá nchaa yíca cuèchi-o sã ndécú núú Yá Ndiòxí ní cùu, te vá dàñá-ndó sã tnàha ñáyiu-ndo nàdatuhú iní ñáhã-yu xii-ndo vã cúnú cuèchi-ndo núú Xítóhó Jesucristú nàcuáa tàù-xi cunduu. ²⁴ Te núu xiãⁿ càchí tnúhu-í xii nchaa nchòhó ñáyiu ndècu ndihí-í ichi Xítóhó Jesucristú sá cùndècu-ni-ndo datná-ni ndècu-ndo ndéé cùtnàhá ní cáháⁿ ñáhá-gã xii-ndo, te ñu-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sã Xítóhó Jesucristú

ñá túú càchí tnúhu-gá xii-í núu nása cáháⁿ-í cuendá nchaa ñáyiu vátá tnàndaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu cáháⁿ-í chi Xítóhó Jesucristú chindèe chitúu ñaha-gã xii-í. ²⁶ Te yúhú càchí-í sá sã cuendá nchaa tnúndòho tnúhu ndàhú ió ñuyúu-a vitna, te váha-gá sá ncháá ñáyiu te núu nása xíndecú-yu te ducaⁿ-ni na cùndecú-yu. ²⁷ Te nchaa cue téé ndècu ñadihí-xi te ducaⁿ-ni na cùndecu-güedé ndihí-yu, te nchaa cue téé ñá túú ñadihí-xi te ducaⁿ-ni na cùnduu-güedé vá ndúcú-güedé ñadihí-güedé. ²⁸ Dico nchaa cue téé na ndècu ñadihí-xi te ñá díú ñⁿ cuèchi cùu-xi sá dúcáⁿ ná ndècu-güedé ñadihí-güedé, te ñu-ni ducaⁿ cùu tucu cue ñáyiu ñihí te núu na ñihí-yu yí-yu chi ñá díú ñⁿ cuèchi cùu-xi sá dúcáⁿ ñihí-yu yí-yu. Te núu cue téé na ñihí-güedé ñadihí-güedé te nándi ndohó-yu cùndecú-yu ñuyúu-a, te núu xiãⁿ duha cáháⁿ-í cuendá sá vã ndúcú-güedé ñadihí-güedé cuendá sá vã ndóhõ-yu.

²⁹ Te nchaa nchòhó ñáyiu ndècu ndihí-í ichi Xítóhó Jesucristú na càchí tnúhu-í xii-ndo sã ñá túú-gã vãi nduu cumání te quixi tucu Xítóhó Jesucristú, núu xiãⁿ xíní ñuhu-xi sá ndéé vitna ngúita nchaa cue téé ndècu ñadihí-xi cada-güedé chiúⁿ Xítóhó Jesucristú, te cada-güedé datná sá ñà túú ñadihí-güedé.

30 Te nchaa ñáyi ndihú iní-xi te na càda-ní-yu sá ñà túú ndihú iní-yu cadá-yu chiùn Yá Ndiöxí. Te nchaa ñáyi cùdí iní-xi te na càda-ní-yu sá ñà túú cùdí iní-yu cadá-yu chiùn-gá, te nchaa ñáyi ndècu ndihí nándi sá ndécú ndihí te na càda-ní-yu sá ñà túú nã ndécú ndihí-yu cadá-yu chiùn-gá. 31 Te

nchaa ñáyi nèhe chiùn nchaa sá ío ñuyíú-a te na càda-ní-yu cuèndá sá ñà túú nã néhé chiùn-yu cadá-yu chiùn Yá Ndiöxí, chi nchaa sá ío ñuyíú-a sa ñuhu-xi ichi cuáháⁿ-xi núú ndihí ñihu-xi.

32 Te cuíní-í sá vã cùhúⁿ iní-ndó nándi sá ío ñuyíú-a, te ni ñà túú tnhí ná caní iní-ndó cùndecu-ndo, chi nchaa cue té ndècu ichi Xítohó Jesucristú xíndecu mee ío ñuhu iní-güedé cada-güedé chiùn-gá nacuáa cudiù-güedé núú-gá. 33 Te nchaa cue té sa ndècu ñadihí-xi cue té ndècu ichi-gá ñuhu iní-güedé nacuáa cada-güedé cùndecu-güedé ñuyíú-a cuèndá ducaⁿ cudiù-güedé núú ñadihí-güedé. 34 Te diu-ni

ducaⁿ cùu tucu cue ñáyi dihi chi ñà túú ñni cuu ñáyi sa ndècu yí-xi ndihí ñáyi vátá cùndecu-gá yí-xi, chi ñáyi ndècu ichi Xítohó Jesucristú ñà túú ndèca té ío ñuhu iní-yu cadá-yu chiùn-gá nacuáa nihí ní ndúú-yu cùndecu yíñuhú-yu núú Yá Ndiöxí, dico cue ñáyi dihi ndéca tée ndècu ichi-gá ío ñuhu iní-yu nacuáa

cundecú-yu ñuyíú-a cuèndá cudiù-yu núú yí-yu.

35 Te duha càháⁿ-í cuèndá cúu-xí ñni sá vaha xii-ndo, te cudiù núú tnhá-ndó, te cuu-ndo ñáyi cada ndáa núú Xítohó Jesucristú, te mee-ni-gã cuhuⁿ iní-ndó. Te ñà díú sá dúhá càháⁿ-í te quide yica-í sá cadá-ndó nacuáa càháⁿ-í.

36 Te núu ío dava-ndo sàni iní-ndó sá ñà túú ndùu vaha-xi sá ío cuu sacuéhé déhe yoco-ndo cùndecú-yu ña, te núu sàni iní-ndó sá vaha-gá candecá-yu té te cada-ndo nacuáa sàni iní-ndó, chi ñà díú ñni cuéchi cùu-xi.

37 Te núu dava-ndo ndècu déhe yoco-ndo, te vá yoo ñni cada yica ñaha xii-ndo sá cándecá-yu té. Te núu mee-ndo sàni vaha iní-ndó nacuáa cada-ndo, te núu vá dásáⁿ-ndó déhe yoco-ndo càneca ñaha té te quide vaha-ndo sá dúcáⁿ quide-ndo.

38 Te nchaa ñáyi dàsaⁿ déhe yoco-xi càneca ñaha té te vaha-ni quidé-yu, te nchaa ñáyi ñà túú dàsaⁿ déhe yoco-xi càneca ñaha té te vaha-gá tucu quidé-yu sá dúcáⁿ quidé-yu.

39 Te nchaa ñáyi dihi ndécú yí-xi xini ñuhu-xi sá cùndecu-ní-yu ndihí yí-yu ñni ndècu vívú-güedé chi ducaⁿ càháⁿ tñuhu sá dñehé ñáhá xii-o nacuáa cada-o cùndecu-o, dico núu na cùú-güedé te cuu naquehéⁿ-yu ingá té can-decá-yu dicó-ni sá diu-ni té ndècu ichi Xítohó Jesu-

crístú. ⁴⁰ Te yúhú sání iní-í sá ïo-gá váha cundecú-yu te núu vá nánducú-yu ingá tée candecá-yu, te duha càháⁿ-í chi Espíritú Yá Ndiòxí ducaⁿ dàcahu iní ñáhá-xí xii-í càháⁿ-í.

8

Cuendá nchaa sá nchító-ó sãñaha ñayiu ndùu táhú nchaa sá càchí-yu cùu ndiòxí

¹ Te vitna na càháⁿ-í cuendá nchaa sá nchító-ó sãñaha ñayiu ndùu táhú nchaa sá càchí-yu cùu ndiòxí te ñá ndàá chi dicó ndaha cue tee ñuyú-a ní cuáha nchaa xiãⁿ. Te nchoo sa cùtnuní váha iní-ó cuendá nchaa xiãⁿ, dicó-ni sá cuendá nchaa sá cùtnuní váha iní-ó xiãⁿ quidé càhnu-o mee-o, dico núu cùu iní-ó tnàha ñayiu-o te canu ichi-ò-yu ichi váha. ² Te núu dava-ndo sàni iní-ndó sã túha-ndo dico cùu-ndo ñayiu vátá cútúha-gá nàcuáa tàú-xi cunduu. ³ Te núu nchòhó cúú iní-ndó Yá Ndiòxí te mee-gã càháⁿ-gá sá cúu-ndó ñayiu cùu cuendá-gá.

⁴ Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñayiu ndùu táhú nchaa sá càchí-yu cùu ndiòxí te ñá ndàá chi dicó ndaha cue tée ñuyú-a ní cuáha nchaa xiãⁿ. Te nchoo cùtnuní iní-ó sã ncháá sá càchí ñayiu cùu ndiòxí cadúha-yu ñuyú-a ñá túú cùu-xi ndiòxí, chi ñⁿdii díi-ni Yá Ndiòxí ndécú. ⁵ Te cue ñayiu ñuyú-a càchí-yu sá cuèi andiu te cuèi ñuyú-a ndècu titní ndiòxí. Te ndáá sá ndèni ní cuu ndècu espíritú

sá càchí ñayiu cùu ndiòxí te ñá ndàá sá ndiòxí cúu-xí, te nchaa xiãⁿ táxi tnùní ñáhá-xí xii-yu. ⁶ Te nchoo cùtnuní ndáá iní-ó sã ñⁿdii díi-ni Yá Ndiòxí ndécú te diu-gá cúu-gã Tátá-ó, te nchoo cùu-o ñayiu cùu cuendá-gá. Te diu-ni mee-gã ní táúchiúⁿ-gã ní cuáha nchaa sá ió ñuyú-a, te cùtnuní tucu iní-ó sã ñⁿdii díi-ni Xitohó Jesucristú ndécú, te Yaa-áⁿ ñí quide-gá nchaa chiúⁿ ní táhú Dütú Ndiòxí ní cadúha-gá nchaandi túhú sá ió ñuyú. Te diu-ni mee Xitohó Jesucristú quidé ndècu-o ichi-gá vitna.

⁷ Te ñá ncháá nchòhó ñayiu ndècu ichi Xitohó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndiòxí ní cùu. Te cuendá xiãⁿ nùu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndiòxí-áⁿ xéxi-ndó, te sàni-ni iní-ndó sã quidé càhnu-ndo nchaa sá càchí-yu cùu ndiòxí-áⁿ te ñá ndàá sá ndiòxí cúu-xí. Te núu sàni iní-ndó sã ñá túú váha caxi-ndo sã dúcáⁿ ndùu táhú-xi-áⁿ te xèxi-ndo te xiãⁿ ñá túú cùu váha iní-ndó cuendá sá dúcáⁿ quide-ndo. ⁸ Te ñá díú ncháa sá xéxi-ó quide-xi cudiu-o núú Yá Ndiòxí, chi ñⁿ-ni quide-xi cuèi na càxi-o àdi vá cáxi-ó chi ni ñⁿ sá cáxi-ó vã chindèe ñaha-xi cudiu-o núú Yá Ndiòxí. Te cuèi vá cáxi-ó dico ñá díú xiãⁿ cada sá vã cúdiu-o núú-gã. ⁹ Te cuu-ni caxi-ndo ncháa nání nihí-ndó. Te dicó-ni sá càda

cuendá-ndó sã ñà díú cuendá sã xéxi-ndó-ãⁿ cuíta nihnu dava ñáyiú ndècu ndihi-ndo ichi Xítohó Jesucristú cadá-yu nándi sã cadá-yu nàcuáa vá cúú vãha iní Yã Ndiõxí chi ñáyiú-ãⁿ ñà túú cùtnuní iní-yu. ¹⁰ Te nchòhó ñáyiú xiní vãha cuendá nchaa sã càchí-yu cùu ndiõxí, te núu na quihíⁿ-ndó núú ndécú nchaa xiáⁿ te ngóo-ndo càxi-ndo nchaa sã ñi cutáhú-xi, te quiní ñáyiú ndècu ndihi-ndo ichi Xítohó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sã dúcáⁿ càchí-yu cùu ndiõxí-ãⁿ, te cuèi sàni iní-yu sã ñà túú quide váha-ndo sã dúcáⁿ quide-ndo te cudana te cada yicá-yu caxí-yu tnàhá-yu nchaa sã dúcáⁿ ñi nduu táhú nchaa sã càchí-yu cùu ndiõxí-ãⁿ te ñà ndáá sã ndiõxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xiáⁿ te ducaⁿ quide-ndo, te sã dúcáⁿ quide-ndo-ãⁿ te dàcuíta nihnu-ndo dáva-gá ñáyiú ndècu ndihi-ndo ichi Xítohó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xiáⁿ, te díu cuendá tnàhá ñáyiú-ãⁿ ñi xihí Xítohó Jesucristú. ¹² Te sã dúcáⁿ quide-ndo-ãⁿ cúú-xí ñi cuèchi núú Xítohó Jesucristú, chi quide-ndo nacuáa xínu iní-yu cadá-yu ñi sã sání iní-yu ñà túú vãha, núu xiáⁿ ñà túú quide váha-ndo sã cúú-xí-yu. ¹³ Te núu yúhú cùtnuní iní-í sã sã cuendá ñi sã càxi-í te ngóo ñi ñáyiú ndècu ndihi-í ichi Xítohó Jesucristú cadá-yu ñi sã vá cúú vãha

iní Yã Ndiõxí, te váha-gá sã vá càxi-gã-í xiáⁿ cuendá sã vá cadá-yu ñi sã vá cúú vãha iní-gá.

9

Nchaa sã cúú cada cue téé ní táuchíúⁿ Xítohó Jesucristú cáháⁿ tnúhu-gá

¹ Te yúhú chi cuu cada-í nchaa sã sání iní-í, chi tnàhá-í ní táuchíúⁿ Xítohó Jesucristú cáháⁿ-í tnúhu-gá núú ñáyiú. Te yúhú ní xiní núú-í Xítohó Jesucristú Yaá cúú Xítohó-ó te nchòhó cúú-ndó ñáyiú ní sándáá iní tnúhu-gá sã cáháⁿ-í te ducaⁿ chi ndècu ndihi-í-gá. ² Te ió dava ñáyiú ñà túú sándáá iní-yu sã Xítohó Jesucristú ní táuchíúⁿ-gã cáháⁿ-í tnúhu-gá, dico nchòhó chi cùtnuní ndáá iní-ndó sã díú-gã ní tendaha ñàha-gá xii-í xicá cùu-í cáháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gã te xiáⁿ cùtnuní sã díú-gã ní tendaha ñàha-gá xii-í xicá cùu-í cáháⁿ-í tnúhu-gá núú ñáyiú.

³ Te duha ndùu tnúhu cáháⁿ-í cuendá cundedóho nchaa ñáyiú sàtnuhu ñaha xii-í. ⁴ Chi yúhú cuu-ni caxi-í nchaa núú sã cúú càxi-o na taxi ñáyiú. ⁵ Te cuu-ni cundecu ñadìhí-í te caca ndeca-í-yu nchaa núú xicá cùu-í cáháⁿ-í tnúhu Yá Ndiõxí dàtná quidé dáva-gá cue téé cáháⁿ tnúhu-gá, ndihi cue téé cùu ñani Xítohó Jesucristú, ndihi té Pèlú. ⁶ Te tnàhá yúhú ndihi té Bèé cuu dañá-ndí chiúⁿ quide-ndí te cada-ndí

dàtná xĩquide dava-gá-güedé cãháⁿ-güedé tnúhu Xítohó Jesucristú. ⁷ Te nchoo xini-ó sã ncháá cuè sandadú dacuitíí sã ñúhú yãhu-güedé xínú cuèchi-güedé, te ñá túú dícó ducaⁿ xinu cuechi-güedé. Te ducaⁿ sãtnahá-xi cùu tucu ñáyiu xitu ñⁿ sá xítú chi dacuitíí nihí-yu ñⁿ sá xítú-yu xexí-yu, te ñá díú dícó ducaⁿ xítú-yu. Te ducaⁿ cùu tucu cue téé cùu toli chi quìhni-güedé dícu quití xito-güedé xìhi-güedé te ñá túú dícó ducaⁿ xito-güedé-di. ⁸ Te vá cání ñni-ndó sã sã dúhá cãháⁿ-í te cãhu ñni-méé-í duha cãháⁿ-í, chi tnúhu cãháⁿ-í-a ñⁿ-ni quèe-xi ndihi tnúhu ní cãháⁿ ndíi Moisés. ⁹ Chi ndíi-áⁿ ñi chídó tnùní ndíi núú tütú ndíi ñacuáa ní xãháⁿ Yã Ndiõxí xii ndíi, te cãchí-xi: “Vá chíhí-ndó ññu yuhu ndicutu oré dãnchihí-di triú”, duha cãchí-xi núú tütú ndíi. Te ñá díú sã dúcãⁿ ñi cãháⁿ Yã Ndiõxí te cãháⁿ-gá mee-ni cuendá ndicutu-áⁿ. ¹⁰ Chi ní cãháⁿ-gá cuendá nchoo cuè ñáyiu ndècu ichi-gá, te ndáá sá díú cuendá-ó dùcãⁿ ní cãháⁿ-gá. Te nchaa cue téé xitu chihi tatá sãni ñni-güedé sá díú tátá chíhí-güedé-áⁿ cuu sá cáxí-güedé, te ñni-ducaⁿ cùu tucu cue téé xĩcãni triú chi cãni-güedé cuendá quee caxi-güedé. ¹¹ Te ducaⁿ sãtnahá-xi cùu nchúhú cue téé cãháⁿ tnúhu Xítohó Jesucristú, chi dãnehé ñãhá-ndí xii-ndo cuendá nchaa sã vãha quide ñaha Yã Ndiõxí xii-o, núu xãⁿ dai tàú-xi sã nchòhó chindee ñaha-ndo xii-ndí ññu ná cúú

sã xini ññu-ndí. ¹² Te núu dava cue téé cãháⁿ tnúhu Yã Ndiõxí chindee-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sã chindèe ñaha-ndo xii-ndí dico ñá túú dùcãⁿ cãháⁿ-ndí núú-ndó càda-ndo, te quide cãhu ñni-ndí cuèi ñandi sã tá yãhá-ndí véxi. Te ducaⁿ quide-ndí cuendá sã ñá túú ñã caní ñni-ndí cuendá-ndí te ducaⁿ cuita cutènuu-gá tnúhu sã cãháⁿ ñacuáa ñanihí tàhú-ó quìhíⁿ. ¹³ Te nchòhó xini-ndó sã ncháá cuè téé xinu cuechi veñúhu ñni-xiáⁿ nihí-güedé xexí-güedé, te ñni-cue téé-áⁿ xínú cuèchi-güedé núú xihí quití ndùu tàhú Yã Ndiõxí, te ñni-xiáⁿ nihí tucu-güedé sã xexí-güedé. ¹⁴ Te ñni-ducaⁿ sãtnahá-xi cùu nchúhú cue téé cãháⁿ tnúhu sã cãháⁿ ñacuáa ñanihí tàhú-ó, chi Xítohó Jesucristú ní cachí-gá sã díú-ní cuendá chiúⁿ quide-ndí nihí-ndí caxi-ndí. ¹⁵ Te ñá ññu ndùu cãháⁿ-í núú-ndó càda-ndo ñacuáa tàú-xi cunduu sã cúú-xi-í, te vá cání ñni-ndó sã sã dúhá cãháⁿ-í te ññu sã xicãⁿ-í núú-ndó. ¡Chi cuèi na cùú-í sã ndòhò-í te ñá díú sã cãháⁿ ñáyiu sã sã cuendá sã cãháⁿ-í tnúhu Xítohó Jesucristú nihí-í xexí-í!

¹⁶ Te yúhú ñá túú quide cãhú-í mèé-í sã cãháⁿ-í tnúhu sã cãháⁿ ñacuáa ñanihí tàhú-ó, chi tàú tnãhá-í sã càdã-í chi ducaⁿ ñi cachí Yã Ndiõxí càdã-í. ¡Te ndãhú ní cuu yúhú te núu vá cãháⁿ-í

tnúhu-áⁿ! ¹⁷ Te ñá túú càháⁿ-í tnúhu-gá sá cúú iní mée-í chi mee-gã ní táuchíúⁿ-gã càháⁿ-í tnúhu-gá. Te núu càháⁿ-í tnúhu-gá sá cúú iní mée-í te tau-í níhí-í sá ndúú tãhú-í ní cùu. ¹⁸ Dico sá sã ní nduu tãhú-í cúú-xí sã ío cùdíí iní-í sá dicó ducaⁿ càháⁿ-í tnúhu sá càháⁿ nãcuáa naníhí tãhú-ó. Te cuèi tau-í queheⁿ-í sá táxi-ndó ndúu tãhú-í sá cuèndá sá càháⁿ-í tnúhu Xítohó Jesucristú, dico ñá túú dùcaⁿ quide-í. ¹⁹ Te sá dúcáⁿ dicó ducaⁿ càháⁿ-í tnúhu sá càháⁿ nãcuáa naníhí tãhú-ó, xiãⁿ ni ìⁿ ñáyiu ñuyíú-a vá cúú càchí-yu sá táxi tnùní ñãhã-yu xii-í, te cuèi ducaⁿ dico mee-í ní sani iní-í sá cúú-í dàtná ìⁿ tée xínu cuechi núu nchaa ñáyiu cuèndá ducaⁿ cuíta cuu vai-yu tuhá-yu ichi Xítohó Jesucristú quíhíⁿ. ²⁰ Te òré ñúhú tnàhí tnuú cue ñáyiu isràél te quide-í sá ìⁿ-ní cùu-í ndihí-yu cuèi ñá túú nchìcúⁿ nihnu-í tnúhu ní càháⁿ ndíi Moisés, te ducaⁿ quide-í cuèndá sá ñáyiu-áⁿ quíndáá iní-yu tnúhu càháⁿ-í te tuhá-yu ichi Xítohó Jesucristú. ²¹ Te òré ñúhú tnàhí tnuú nchaa ñáyiu ñá túú nchìcúⁿ nihnu tnúhu ní càháⁿ ndíi Moisés, te quide-ní-í sá quidè-í dàtná quidé mée-yu cuèndá quíndáá iní-yu tnúhu càháⁿ-í, te tuhá-yu ichi Xítohó Jesucristú. Te cuèi ducaⁿ quide-í dico ñá túú dàña ndeé-í quidè-í nchaa nãcuáa cuíni Yã Ndióxi cada-o, te ducaⁿ chi nchìcúⁿ nihnu-í quidè-í nchaa nãcuáa càháⁿ Xítohó Jesucristú. ²² Te òré ndécù-í ndihí nchaa ñáyiu

ñá túú cùtnuní váha iní-xi nãcuáa cundecu ichi Xítohó Jesucristú, te tnàhá-í quidè-í dàtná quidè-yu cuèndá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nãcuáa cundecú-yu ichi-gá. Te nchaandi túhú ñáyiu quide-í sá ìⁿ-ni cuu-í ndihí-yu cuèndá ducaⁿ níhí-í nãcuáa cada-í te cund-edóho-yu tnúhu càháⁿ-í te tníⁿ-yu ichi Xítohó Jesucristú te naníhí tãhú-yu. ²³ Te duha quide-í cuèndá sá cuíta quíndáá iní-yu tnúhu sá càháⁿ nãcuáa naníhí tãhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

²⁴ Te nchòhó sa xíní-ndó sã nchaa cuè tée xínu quíhu màrcúhyú nchaa-güedé xínú-güedé, dico ìⁿ-ni-dé cúú tée ndàcu ngodó núú te tée-áⁿ cúú tée nihí sá ndúú tãhú-xi, te ducaⁿ xini ñuhu-xi cada nchohó tucu chi cada-ndo nchaa nãcuáa cuíni Yã Ndióxi cada-ndo cuèndá ducaⁿ níhí-ndó sã ndúú tãhú-ndó. ²⁵ Te nchaa cue tée xíní dadiqui te váha váha quide cuèndá-güedé núu ná cúú sã cáda tneñu te xòcani-güedé cuèndá sá ñá díú xiãⁿ cada te cuíta-güedé òré dadiqui-güedé. Te ducaⁿ quide-güedé cuèndá cuíni-güedé níhí-güedé sá ndúú tãhú-güedé, te sá ndúú tãhú-güedé-áⁿ cúú-xí ìⁿ sá ndihí nihnu ñuyíú-a. Dico nchoo nducu ndee-o quide-o nãcuáa níhí-ó sã ndúú tãhú-ó, te xiãⁿ cudíi-xi cundecu

ndihi-o nì caa ni quíhíⁿ. ²⁶ Te yúhú quidè-í dàtná quidé cuè téé xìnu, chi cue téé-áⁿ xìní-güedé núú quéxìo-güedé, te quide tucu-í dàtná xíquide cue téé sa ní cutúha nàá, te ñá túú quide-í dàtná quidé cuè téé vitna dâcuaha naá. Te ducaⁿ chi yúhú quidè-í nchaa nâcuáa cuíní Yă Ndiöxí cunduu. ²⁷ Te yúhú ñá túú dàña-í taxi tnùní ñáhá nì ìⁿ sá cuèhé sá dúhá xii-í chi yòtnii-í mée-í. Te ducaⁿ quide-í chi yúhú càháⁿ-í tnúhu Xítóhó Jesucristú núú ñáyiu, te cuíní-í sá vă cuíta sá ñí cachí Yă Ndiöxí nduu táhù-í.

10

Cuendá nchaa sá ñí cadúha cue téé ñuyú-a quide cahnu ñáyiu

¹ Te nchòhó ñáyiu ndècu ndihi-í ichi Xítóhó Jesucristú na càhí tnúhu-í xii-ndo cuendá nchaa ñaní tnáhá-ndí ñáyiu israhél ní xindecu ndéé sanaha, chi vitna tnáhá nchòhó cúu-ndó dàtná cue ñaní tnáhá nchaa ñáyiu-áⁿ chi ndècu-ndo ichi-gá. Te nchaa ñáyiu-áⁿ ñí taxi ndecu Yă Ndiöxí ìⁿ vícò ñí dánèhé ñáhá-xí xii-yu ichi quíhíⁿ-yu, te ní quée dava ndute lâmár nání Măr Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ìⁿ-ná ní cuú-yu ndihi ndii Moisés, te ní xíhi ndaha ñàha ndii xii-yu. ³ Te nchaá-yu ní xexí-yu sá ñí sáñaha Yă Ndiöxí xii-yu. ⁴ Te ducaⁿ nchaa tucu-yu ní xihí-yu ndute sá ñí sáñaha-gă xii-yu, ndute sá ñí quée yiqui nàha cava. Te cava-áⁿ cada

iní-ó să cúu-xí dàtná Xítóhó Jesucristú te ducaⁿ chi ndihi ñaha-gă xii-yu ichi cuáháⁿ-yu dâvá-áⁿ. ⁵ Dico ío vâi-yu ñá túú ní quidé-yu nâcuáa càháⁿ Yă Ndiöxí, te xíãⁿ ñá túú ní cùu váha iní ñáhá-gă xii-yu. Te sá dúcáⁿ ñí quidé-yu núu xíãⁿ òré ñúhù-yu ichi cuáháⁿ-yu xití yucu ío vâi-yu ní xíhí.

⁶ Te ducaⁿ ñí cuu cuendá nchoo vă cãhçícúⁿ nihnu-o càda-o nâcuáa ní quidé-yu, chi ñáyiu-áⁿ mee-ni nchaa sá cuèhé sá dúhá ñí sani iní-yu ní quidé-yu. Te nchoo xini ñuhu-xí sá vă dúcáⁿ càda-o. ⁷ Te yúhú càháⁿ-í dóho-ndo să vă quindáá iní-ndó te ni vă cadá càhnu-ndo ni ìⁿ sá càhí-yu cùu ndiöxí ní cadúha cue téé ñuyú-a dàtná ní quide cue ñaní tnáhá-ndí ní xindecu ndéé sanaha. Chi ñáyiu-áⁿ ñí quidé-yu dàtná càháⁿ-xi núú tütú Yă Ndiöxí núú càhí-xi; “Nchaa ñáyiu ní xexí-yu ní xihí-yu ní quidé-yu vico, ní quide càhnú-yu sá càhí-yu cùu ndiöxí ní cadúha-yu te ñá ndáá sá ndiöxí cúu-xí”, duha càhí-xi núú tütú-gá. ⁸ Te ni vă cündècu-ndo ichi díí ìní dàtná ní quide dava ñáyiu-áⁿ, chi sá dúcáⁿ ñí quidé-yu te ní xíhí ócò úní mîl-yu ìⁿ-ni nduu. ⁹ Te vă cání ìní-ndó să sá càhnú ìní Yă Ndiöxí te nândí sá cuèhé sá dúhá càda-ndo cuendá cuíní-ndó quíní-ndó nũu nása cada ñaha-gă xii-ndo, chi ñáyiu ní xindecu ndéé sanaha-ãⁿ ducaⁿ ñí xóo cadá-yu, te ní xihí-yu ní xexihaⁿ cõó. ¹⁰ Te ni vă càháⁿ cuèhé-ndó cuendá Yă Ndiöxí, chi dava ñáyiu ní

xíndecu ndéé sanaha-ǎn ducaⁿ nǐ quidé-yu ní cáháⁿ cuèhé-yu cuèndá-gá te ní quixi espíritú xínú cuèchi núú-gǎ ní sahni ñaha-xi xii-yu.

¹¹ Te ducaⁿ nǐ cuu te ducaⁿ nǐ ngúndee núú tütú Yǎ Ndiöxí cuèndá dacuàha-o vitna ta cuyatni nduu naa ñuyíu-a. Te nchaa tnúhu sá nǐ ngódó tnùn-áⁿ càháⁿ dóho ñaha-xi xii-o cuendá sá vǎ cádá-ó dàtná ní quide ñáyi-u-áⁿ.

¹² Te xiǎⁿ núu nchaa nchòhó ñáyi-u sàni iní sá ïo váha cùndáá ndécú ìchi Xítóhó Jesucristú cada cuèndá-ndó sǎ dúcáⁿ-ní cùndáá-ndó núú-gǎ, te vǎ dáná cuèndá-ndó càda-ndo sá ñá túú cùu váha iní Yǎ Ndiöxí.

¹³ Te ñu-ni dàtná quidé sàcúíhná dácàháⁿ-xi iní nchaa dava-gá ñáyi-u nándi quidé-yu, te ñu-ni ducaⁿ quide ñaha-xi xii-ndo. Dico mee Yǎ Ndiöxí cúu-gǎ Yaá quidé ndáá chi quide-gá nchaa sá càháⁿ-gá, te ñá dáñá-gǎ sá sùúni cuidó sàcúíhná coto ndeé ñáhá-xí xii-ndo, chi neni-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ñu-ni-gá chindee ñaha-gá xii-ndo cùndee iní-ndó vǎ cádá-ndó cuèi nándi sá ná dàcahu iní ñáhá-xí xii-ndo.

¹⁴ Te xiǎⁿ núu càháⁿ-í dóho nchòhó ñáyi-u ïo cùu iní-í sá vǎ quíndáá iní-ndó nǐ ñⁿ sá càchí-yu cùu ndióxí te ñá ndáá chi dicó ndaha cue téé ñuyíu-a ní cuáha nchaa xiǎⁿ, te ni vǎ cádá càhnu-ndo. ¹⁵ Te ñu-ni càháⁿ-í chí cùu-ndo ñáyi-u tècú tnùn-í, te mee-ndo ïo váha cuáha-ndo cuèndá te núu váha-ni càháⁿ-í àdi ñá túú váha-ni. ¹⁶ Te nchoo

ndàcáⁿ táhú-ó núú Yǎ Ndiöxí cuèndá ndudí ndéhé yoho yàha stilé sá xihí-ó, te sá dúcáⁿ xihí-ó ndudí ndéhé yoho yàha stilé-áⁿ, te xiǎⁿ ndácú ìní-ó sǎ ñⁿ-ní cùu-o ndihí Xítóhó Jesucristú cuèndá sá nǐ sati ñíñ-í-gǎ ní xihí-gá núú cùrúxí, te ñu-ni ducaⁿ sǎtnahá tucu-xi cùu paá sá xéxí-ó òré xihí-ó ndudí ndéhé yoho yàha stilé-áⁿ, chí sá dúcáⁿ xéxi-o paá-áⁿ xiǎⁿ ndácú ìní-ó sǎ ñⁿ-ní cùu-o ndihí Xítóhó Jesucristú sá cuèndá yiqui cùñú-gá. ¹⁷ Te cuèi vǎi vihi-o dico ñⁿ-ni paá xéxí-ó, te sá dúcáⁿ ñⁿ-ni paá xéxí-ó xiǎⁿ ndácú ìní-ó sǎ ñⁿ-ní cùu-o ndihí Xítóhó Jesucristú.

¹⁸ Te cada cuèndá-ndó nàcuáa quide ñáyi-u isràél, chí ñáyi-u-áⁿ xéxí-yu sá ndúú táhú Yǎ Ndiöxí. Te sá dúcáⁿ quidé-yu-áⁿ cùtnùn-í iní-ó sǎ tnàhá tnúhu-yu ndihí-gá. ¹⁹ Te vǎ cání ìní-ndó sǎ sá dúhá càháⁿ-í te cachí-ndó sǎ cùnuu nchaa sá càchí-yu cùu ndióxí ní cadúha cue téé ñuyíu-a chí ñá túú nǎ cúu nǐ ñⁿ nchaa xiǎⁿ. Te ñu-ni ducaⁿ cùu tucu nchaa sá sǎñaha ñáyi-u ndúu táhú-xi chí ñá túú cùnuu-xi, chí ñⁿ-ni cùu-xi ndihí nchaa dava-gá sá xéxí-ó. ²⁰ Te yúhú càchí-í sá sǎ dúcáⁿ quide nchaa ñáyi-u ñá túú tnàhá tnúhu ndihí Yǎ Ndiöxí, te dicó nchaa espíritú cùndihí yucu ñávàha sǎñahá-yu sá ndúú táhú-xi sá dúcáⁿ quidé-yu. Te ñá díú Yǎ Ndiöxí sǎñahá-yu sá ndúú táhú-gǎ. Te yúhú cùní-í sá vǎ tnàhá tnúhu-ndo ndihí cue espíritú cùndihí yucu

ñávãha. ²¹ Te ducaⁿ chi vá cúú tnàhá tnúhu-o ndihí cue espíritú cúndihí yucu ñávãha te tnahá tnúhu-o ndihí Xítohó Jesucristú, te ñá túú ndùu váha-xi ngóo càxi-o coho-o sá ndúú tãhú cue espíritú cúndihí yucu ñávãha-áⁿ, te ngóo càda-o nacuáa ní dándõ tnúhu Xítohó Jesucristú coho-o ndùdí ndéhé yoho yàha stilé, te caxi-o pàá cada-o sã ndácú iní-ó sã ñí xihí-gá núú cùrúxí. ²² Te vá cání iní-ó dùcaⁿ cada-o cuendá sá vã cúdeéⁿ Yã Ndióxi, chi ñá túú ñã càhnu cuu-o núu cada-o ñãni véxi iní mée-ó, chi mee-gã ío càhnu cuu-gã.

Cada-o nchàa nacuáa cuu càhnu Yã Ndióxi

²³ Te ndáá sá ncháá sã cuiní-ó càda-o te cuu cada-o dico ñá ncháá cùu-xi sá vãha sá cúú-xí-ó, te ni ñã ncháá-xí chĩndee ñaha-xi nacuáa ñihí ndéé-gã-ó cùndecu-o ichi Xítohó Jesucristú. ²⁴ Te xini ñuhu-xi sá cádá-ó sã vãha sá cúú-xí tnàha ñáyiu-o te ñá díú mèe-ni sá cúú-xí mèe-o cada-o.

²⁵ Te nchòhó cuu caxi-ndo nchàa cuñú sá cùyãhu cuñú sá xini caxi-ndo, te vá ndúcú tnúhu-ndo te núu cùu-xi cuñú sá ñí nduu tãhú sã càchí-yu cùu ndióxí. Te ñá túú ñã caní iní-ndó càxi-ndo, ²⁶ chi ñuyú-a ndihí nchaa sá ío cúú-xí cuendá Yã Ndióxi.

²⁷ Te núu ñã ñáyiu ñá túú ndècu ichi Xítohó Jesucristú càháⁿ ñãhã-yu xii-ndo quíhíⁿ-ndó càxi-ndo dítá vehé-yu, te núu sàni iní-ndó sã quíhíⁿ-ndó te cuu quíhíⁿ-ndó te caxi-ndo cuéi

nái cùu sá táxi-yu dico vá càcáⁿ tnúhú-ndó nũ-yu núu ndéé ní ñihí-yu, te ducaⁿ te cuu váha iní-ndó càxi-ndo. ²⁸ Te núu ñã ñáyiu càchí-yu sá xĩãⁿ cúú-xí sã ñí nduu tãhú sã càchí-yu cùu ndióxí te vá cáxi-ndó cuendá sá ñáyiu ducaⁿ càháⁿ-áⁿ cuu váha iní-yu te ñá túú tnàhí ná caní iní-yu. ²⁹ Te yúhú càháⁿ-í cuendá nacuáa sàni iní mée ñáyiu ducaⁿ càháⁿ-áⁿ te ñá díú sã nacuáa sàni iní mée-ndó quide-ndo.

Te dava-ndo càchí-ndó: “Cuu-ni cada-o nchàa nacuáa sàni iní mée-ó cuéi dava-gã ñáyiu sàni iní-yu sá ñã túú ndùu váha-xi sá dúcáⁿ càda-o”, duha càchí-ndó. ³⁰ Te càchí tucu-ndo: “Ñá túú tãu-xi càháⁿ cuéhé ñáyiu cuendá-ó sã cuendá nchaa sá xéxi-ó chi ndácáⁿ tãhú-ó nũ Yã Ndióxi òré xéxi-ó”, duha càchí-ndó. ³¹ Te cuéi nãndi sá xini caxi-ndo ñihí-ndó xèxi-ndo àdi quide-ndo, te cada-ndo nacuáa càháⁿ váha ñáyiu cuendá Yã Ndióxi. ³² Te vá cádá-ndó sã ñã túú tãu-ndó càda-ndo cuendá sá vã cádá ñáyiu ñã sã ñá túú cùu váha iní Yã Ndióxi. Te ni sã cúú-xí cué ñáyiu isràél, te ni sã cúú-xí cué ñáyiu ñã túú cùu ñáyiu isràél, te ni sã cúú-xí cué ñáyiu ndècu ichi-gá vá dúcáⁿ càda-ndo sá cúú-xí-yu. ³³ Te yúhú ío ndècu ndee-í quidè-í nacuáa cudíu-í núu nchàa ñáyiu, te quide-í sá vãha sá cúú-xí-yu, te ñá túú quide-í mee-ni sã cúú-xí mèe-í. Te ducaⁿ quide-í cuendá quindáá iní-yu tnúhu Xítohó Jesucristú te naníhí tãhú-yu.

11

1 Te chí cánchezúⁿ nihnu cada-ndo nchàa nacuáa quide-ínchicúⁿ nihnu-ínchaa nàcuáa quide Xítoho Jesucristú.

Nàcuáa tàu-xi cada nchaa ñáyiú dìhí núú tàcá-yu dàcuahá-yu tnúhu Yá Ndiöxí

2 Te nchòhó ñáyiú ndècu ndihi-í ichi Xítoho Jesucristú cächí tnúhu-í xii-ndo sã ïo cùdii iní-í, chí ndàcu iní ñáhá-ndó xii-í, te quide-ndo nchaa nacuáa ní dánèhé ñáhà-í xii-ndo. 3 Te cuini-í sã nchòhó cutnuni iní-ndó sã ïⁿdii-ni Yá Ndiöxí cúú-gã Yaá cúnùu taxi tnuni ñáhá xii Xítoho Jesucristú, te ducaⁿ Xítoho Jesucristú ïⁿdii-ni-gã cúnùu taxi tnuni-gã nchaa cue téé, te nchaa cue téé diu-ni mee-güedé cúnùu-güedé taxi tnuni-güedé ñadihí-güedé.

4 Te núu nchoo cuè téé na dàdàhu-o díqui-ó òré cãháⁿ-ó núú ñáyiú tnúhu sã dácàhu iní ñáhá Yá Ndiöxí xii-o àdi oré cãháⁿ ndihi-o-gã, te ïⁿ sácáⁿnúú cúú-xí te núu ducaⁿ na càda-o dadàhu-o díqui-ó.

5 Dico núu ñáyiú dìhí vá dàdàhu-yu díqui-yu òré cãháⁿ ndihí-yu Yá Ndiöxí, àdi oré cãháⁿ-yu tnúhu sã dácàhu iní ñáhá-gã xii-yu núú tnàhá ñáyiú-yu, te sácáⁿnúú cúú-xí te núu vá dàdàhu-yu díqui-yu, chí ïⁿ-ni cùu-xi te núu na dèté ndii-yu díqui-yu. 6 Te núu ñá túú cuini cue ñáyiú dìhí dàdàhu-yu díqui-yu te váha-gã sã ná dèté ndii-yu díqui-yu. Te núu cùcahaⁿ

núu-yu sã dèté díqui-yu te váha-gã sã ná dàdàhu-yu díqui-yu. 7 Te nchoo cuè téé vá cúú dàdàhu-o díqui-ó òré cãháⁿ ndihi-o Yá Ndiöxí ni òré cãháⁿ-ó tnúhu sã dácàhu iní ñáhá-gã xii-o núú ñáyiú chí díchna-gã-ó ñí cadúha ñaha Yá Ndiöxí xii-o, te ní taxi ndecu-gã nchaa sã xini tnuni-ó dàtná ndécú nchàa sã xini tnuni mée-gã. Te ducaⁿ ñí quide-gã chí cuini-gã sã nchòó càda-o nacuáa cãháⁿ nchaa dava-gã ñáyiú sã ïo càhnu cuu-gã, te cue ñáyiú dìhí quidè-yu nàcuáa cunuu nchòo cue téé. 8 Te Yá Ndiöxí ní cadúha-gã téé, dico ñá díú yiqui naha ñadihí ní quenehe-gã ní cadúha-gã téé chí yiqui naha téé ní quenehe-gã ní cadúha-gã ñadihí. 9 Te sã cuendá téé ducaⁿ ñí cadúha-gã ñadihí-áⁿ te ñá díú sã cuendá ñadihí ní cadúha-gã téé. 10 Núu xiãⁿ tàu-xi sã ncháá ñáyiú dìhí dàdàhu-yu díqui-yu cuendá ducaⁿ cùtnuni sã ñà túú cùnuú-yu dàtná cúnùu nchoo cue téé. Te ducaⁿ xini ñuhu-xi cadá-yu sã cuendá nchaa espíritú xínú cuèchi núú Yá Ndiöxí. 11 Te vitna nchoo ñáyiú ndècu ichi Xítoho Jesucristú, vá cächí-ó sã cuè téé ñá túú xini ñuhu-güedé cue ñáyiú dìhí chindee ñáhá-yu, te ní vã cächí-ó sã cuè ñáyiú dìhí ñá túú xini ñuhú-yu cue téé chindee ñàha-güedé xii-yu. 12 Te ïⁿ yiqui naha téé ní queñuhu Yá Ndiöxí ní cadúha-gã ñadihí, dico vitna

chi ñáyiú ðíhí dácàcú-yu téé. Te téé, ñadihí ní cadúha Yá Ndiòxí, te ðiu-ni ducaⁿ ñí cadúha-gá nchaa dava-gá sá íó.

13 Te mee-ndo càda cuendá-ndó te núu ndùu váha-xí sá vǎ dádǎhu cue ñáyiú ðíhí díquí-yu òré càháⁿ ndihí-yu Yá Ndiòxí àdi ñáhá.

14 Te nchaa ñáyiú càháⁿ-yu sá ñà túú ndùu váha-xí sá cuè téé cunduu nàni idi díquí-güedě, chi ñⁿ sácáⁿ-núú cúú-xí càchí-yu.

15 Te nchaa ñáyiú ðíhí ñáyiú nàni idi díquí-xí càchí ñáyiú sá ñⁿ sá vǎha cùu-xí sá cúú-xí-yu sá dúcáⁿ nàni idi díquí-yu. Te ducaⁿ chi Yá Ndiòxí ní cachí-gá sá dúcáⁿ cunduú-yu cuendá quidáhu-xí díquí-yu.

16 Te núu íó ñáyiú cuení dacàá cuendú cuendá sá ñí càháⁿ-í-a, te na cùnahá-yu sá ncháá nchùhú cue téé càháⁿ tnùhu Xítohó Jesucristú ðiu-ni ducaⁿ sàni iní-ndí cada nchaa ñáyiú ðíhí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítohó Jesucristú cùtnáhá ní cudìni-gá ndihí cue téé ní xica cuu ndihí-gá

17 Te nchòhó ñá túú quide váha-ndo ndècu-ndo núu xíáⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo. 18 Te díhna-gá na càchí tnùhu-í xii-ndo sǎ ñihí-í tnùhu sá òré tàcá-ndó quide-ndo nacuáa ní

cáháⁿ Xítohó Jesucristú, te ñá túú cùu ñⁿnuu-ndo òré ducaⁿ quide-ndo nacuáa ní càháⁿ-gá. Te dava sá càháⁿ ñáyiú sàndáá iní-í te dava ñáhá.

19 ¡Te ndáá sá dúcáⁿ tnáhí cada-xí vǎ cúú ñⁿnuu-ndo cuendá ducaⁿ cùtnuní núu ndédacàa-ndo sandáá ndisa iní-ndó tnùhu Xítohó Jesucristú te ndédacàa-ndo ñáhá!

20 Te ndí tnahá òré tàcá-ndó quide-ndo datná ní quide Xítohó Jesucristú cùtnáhá ní cudìni-gá ndihí cue téé ní xica cuu ndihí-gá, te ñá túú quide-ndo nacuáa tǎu-xí cunduu chi cùtexínu-ni quide-ndo.

21 Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sǎ cùndetu tnaha-ndo,

te ñá túú càháⁿ tnáhá-ndó núu xíáⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xǎni-ndo.

22 Te vǎ dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee

tíhú-ndó nchàa dava-gá ñáyiú ndècu ndihí-ndo ichi Yá Ndiòxí, te dándóo canúú-ndó nchàa ñáyiú ndàhú sá dúcáⁿ quide-ndo.

¡Núu xíáⁿ vǎ cúú càchí-í sá cúú-ndó ñáyiú quide váha chi ñá túú quide váha-ndo sǎ dúcáⁿ quide-ndo ndecu-ndo!

Xítohó Jesucristú ní dándóo tnùhu-gá sǎ còhó-ó nduidí ndéhé yoho yàha stilé te caxi-o pàa cuendá ndacu iní-ó sǎ ñí

xíhí-gá

(Mt. 26:26-29; Mr. 14:22-25; Lc. 22:14-20)

23 Te dàtná-ni ní dánèhé ñáhá Xítohó Jesucristú xii-í te ñu-ni ducaⁿ ní dánèhé ñáhà-í xii-ndo, chi ñu-ni niú cùtnàhá ní sáha cuendá ñáhá ndíi Jüdás Iscarioté xii-gá núú cuè téé cùu úhú iní ñáhá ní queheⁿ-gá pàá, 24 te ní ndacáⁿ táhú-gá núú Yă Ndiöxí, te ní táhú cuèchi-gá, te ní xáhaⁿ-gá xii cue téé xica cuu ndíhi-gá: “Chí quéhéⁿ pàá-a caxi-ndo te cada iní-ndó sã cúú-xí dàtná yiqui cuñú-í, chi yúhú cuú-í sácùendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, cächí-gá xáhaⁿ-gá xii-güedé. 25 Te sátá ní yáha ní xexi-güedé pàá sã ní sãñaha-gá, te ní queheⁿ-gá tàsáⁿ ñúhú ndudí ndéhé yoho yàha stilé, te ní ndacáⁿ táhú tucu-gá núú Yă Ndiöxí. Te ní xáhaⁿ-gá xii cue téé xica cuu ndíhi-gá: “Chí cóhó ndudí ndéhé yoho yàha stilé-a, te cada iní-ndó sã cúú-xí dàtná níñi-í, te cuendá níñi-í sã cáti òré cuú-í cutnùnì ndáá sã Yă Ndiöxí cada-gá ingá núú sã vâha sã cúú-xí ñâyiu. Te ndi tnahá òré coho-ndo ndudí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xáhaⁿ-gá xii-güedé. 26 Te ndi tnahá òré xéxi-ndó pàá te xihí-ndo ndudí ndéhé yoho yàha stilé, te xíáⁿ dátüu-ndo núú ñâyiu sã Xítohó Jesucristú ní xíhí-gá cuendá-yu, te ducaⁿ-ni càda-ndo cundecu-ndo ndéé ná sãá nduu quixi tucu Xítohó

Jesucristú.

Nàcuáa cada-o òré caxi-o pàá ndíhi òré coho-o ndudí ndéhé yoho yàha stilé dàtná ní cachí Xítohó Jesucristú

27 Te dava-ndo ñà túú quide-ndo nacúáa cuení Yă Ndiöxí cada-ndo òré xéxi-ndó pàá ndíhi òré xíhí-ndó ndudí ndéhé yoho yàha stilé, te sã dúcáⁿ quide-ndo-áⁿ te cucuéchi xii-ndo chi ñà túú nèhe-ndo sã yíñuhu sã cúú-xí yiqui cuñú Xítohó Jesucristú, te ni ñà túú nèhe-ndo sã yíñuhu sã cúú-xí níñi-gá. 28 Te ío váha cada cuendá-ndó te núú ndècu váha iní-ndó núú Xítohó Jesucristú òré cúmãní-gá caxi-ndo pàá ndíhi òré cúmãní-gá coho-ndo ndudí ndéhé yoho yàha stilé. Te núú ndècu váha iní-ndó núú-gá te caxi-ndo te coho-ndo. 29 Te dava nchòhó ñà túú sàni váha iní-ndó cuendá yiqui cuñú Xítohó Jesucristú te xéxi-ndo pàá te xihí-ndo ndudí ndéhé yoho yàha stilé, te nacháhu-ndo sã dúcáⁿ ñà túú sàni váha iní-ndó. 30 Te ñu sã dúcáⁿ quide-ndo núú xíáⁿ vâi-ndo kuhú, te ío ndàhú ndécú-ndó, te dava ñâyiu ndècu ndíhi-ndo sa ní xíhí-yu. 31 Dico núú ío váha sáha-o cuendá nàcuáa ndècu-o núú Yă Ndiöxí, te vá dúcáⁿ dândoho ñaha-gá xii-o. 32 Te òré ndéhé Yă Ndiöxí sã ñà túú quide ndáá-ó ndècu-o te dândoho ñaha-gá xii-o. Te ducaⁿ quide-gá cuendá sã vâ cuíta nihnu-o, chi núú ñáhá te cuíta nihnu-o ndíhi nchaa ñâyiu ndècu ichi cuehé ichi duha.

33 Te núu xiǎⁿ càháⁿ-í dóho nchaa nchòhó ñáyi ndècu ndihi-í ichi Xítohó Jesucristú sá òré tacá-ndó càda-ndo nacuaá ní guide Xítohó Jesucristú cútnàhá ní cudini-gá ndihi cue téé ní xica cuu ndihi-gá, te cundetú tnàha-ndo nduu nchaa-ndo te dàtnùní ducaⁿ càda-ndo. 34 Te núu dava-ndo xihí-ndó dòcò te caxi duuⁿ-ndo vèhe-ndo te dàtnùní natacá-ndó, cuendá òré natacá-ndó te vá cáda-ndó ìⁿ sá ñà túú tãú-ndó càda-ndo cuendá sá vã dándòho ñaha Yá Ndiöxí xii-ndo. Te òré quixi coto ñaha-í xii-ndo te dàvã-án cachí tnúhu-í xii-ndo nchaa dava-gá sá cúmãní.

12

Nacuáa chindee ñaha Espiritú Yá Ndiöxí cada-o ìⁿ ìⁿ-o

1 Te nchòhó ñáyi ndècu ndihi-í ichi Xítohó Jesucristú cuini-í cachí tnúhu-í xii-ndo nacuaá chindee ñaha Espiritú Yá Ndiöxí xii-o ìⁿ ìⁿ-o cuendá cutnùní iní-ndó.

2 Te nchòhó sá nàha-ndo sá cútnàhá vátá cundècu-gá-ndó ichi Xítohó Jesucristú ní xóo dandàhú ñáhá yùcu ñávãha xii-ndo, te ní xóo quíndáá iní-ndó nchaa sá ñí cadúha cue ñáyi ñuyú-a nchaa sá càchí-yu cùu ndiöxí te ñá ndáá sá ndiöxí cúu-xí, te nchaa xiǎⁿ ñá túú càháⁿ-xi. 3 Te cuini-í sá nchòhó cutnùní iní-ndó sá Espiritú Yá Ndiöxí ñá túú chindee-xi ni ìⁿ ñáyi cuendá sá càháⁿ úhú-yu Xítohó Jesucristú. Te ni ìⁿ ñáyi ñá túú càhu iní-yu càháⁿ-yu sá Xítohó Jesucristú

cúu-gã Xítohó-yu te núu ñá túú Espiritú Yá Ndiöxí dácàhu iní ñáhá-xí xi-yu.

4 Te ndi dííⁿ ndi dííⁿ ndùu chiuⁿ ní cachí Espiritú Yá Ndiöxí cada-o, te diu-ni ìⁿdi-ni Espiritú-gá ndécú.

5 Te ndi dííⁿ ndùu chiuⁿ guide-o xinu cuechi-o núu ìⁿdi-ni Xítohó Jesucristú.

6 Te ndi dííⁿ ndi dííⁿ chindee ñaha Yá Ndiöxí xii-o nacuaá cada-o chiuⁿ-gá, te diu-ni ìⁿ di-gá ndécú chindee-gá nchaa ñáyi. 7 Te Espiritú Yá Ndiöxí quidé-xí sã nchóó càda-o sá vãha, te ducaⁿ chindee-o cue ñáyi ndècu ndihi-o ichi Xítohó Jesucristú. 8 Te dava-o ñí nduu táhú-ó núu Yá Ndiöxí sá Espiritú-gá cada te ndacu-o

cáhãⁿ-ó tnúhu sá ìo càhu cuu diu-ni tnúhu mee Yá Ndiöxí, te dava tucu-o ñí nduu táhú-ó cutnùní iní-ó nacuaá càháⁿ tnúhu-gá te càháⁿ-ó nacuaá cuini Espiritú-gá. 9 Te dava tucu-o ñí nduu táhú-ó sã ìo quíndáá iní-ó Xítohó Jesucristú cuendá cada-gá ìⁿ sá cuini-ó, te ducaⁿ chi Espiritú Yá Ndiöxí chindèe ñaha-xi xii-o. Te dava tucu-o ñí nduu táhú-ó sã càcãⁿ táhú-ni-ó núu Xítohó Jesucristú cuendá ñáyi cùhú te ndúha-yu. 10 Te dava tucu-o ñí nduu táhú-ó sã ndácú-ó càda-o nchaa sá vã yóo tnàhí ndacu cada, te dava tucu-o ñí nduu táhú-ó núu Yá Ndiöxí sá càháⁿ-ó tnúhu sá dácàhu iní ñáhã-gã xii-o, te dava tucu-o ñí nduu táhú-ó sá cutnùní iní-ó núu diu Espiritú Yá Ndiöxí chindèe ñaha-xi xii ñáyi òré càháⁿ-yu tnúhu-gá àdi cue espíritú cundèhi yucu ñávãha. Te dava tucu-o ñí

nduu táhú-ó cǎháⁿ-ó tnǎhu sǎ dácǎhu iní ñáhá Espíritú Yǎ Ndiǒxí xii-o tnǎhu sǎ ñà túú xini-ó, te dava tucu-o ní nduu táhú-ó cǎháⁿ-ó nàcuáa quèe-xi nchaa tnúhu-áⁿ. ¹¹ Te ìⁿdì díí-ni Espíritú Yǎ Ndiǒxí ducaⁿ chindee ñaha-xi, te diu-ni Espíritú-gá dácǎhñu ñaha-xi xii-o ndi dííⁿ núú chiuⁿ sǎ cuiní mée-xi cǎda-o.

Nchaa-o ìⁿ-ni cuu-o ndihi Xítóhó Jesucristú

¹² Te nchoo ñǎyiu ndècu ñuyú-a titní xichi cùu yiqui cuñú-ó dico ìⁿ-ni cùu-xi, te diu-ni ducaⁿ sǎtnahá-xi cùu-o vitna ndecu-o ichi Xítóhó Jesucristú chi ìⁿ-ni cùu-o ndihi-gá. ¹³ Te dava-o cùu-o ñáyiu isràél, te dava-o ñà túú cùu-o ñáyiu isràél, te dava-o cùu-o ñáyiu ñà túú tnàhí dañá quee núú chíúⁿ pàtróóⁿ-xi, te dava-o cùu-o ñáyiu dañá quée núú chíúⁿ pàtróóⁿ-xi. Te mee Espíritú Yǎ Ndiǒxí ní quide-xi sǎ ncháá-ó ìⁿ-ná cúú-ó ndècu-o ndihi Xítóhó Jesucristú. Te Yǎ Ndiǒxí ní cachí-gá sǎ ncháá-ó cùndecu ndihi-o Espíritú-gá.

¹⁴ Te nchòhó xini-ndó sǎ titní xichi cùu yiqui cuñú-ó te ñà díú ìⁿ-ni xichi cuu-xi. ¹⁵ Te cuèi sáhá-ó ndihi ndaha-o ñà túú ìⁿ-ni cuu-xi dico vǎ cúú cǎchí-ó sǎ sáhá-ó ñà túú cùu-xi yiqui cuñú-ó. ¹⁶ Te cuèi lóho-o ndihi tinuu-o ñà túú ìⁿ-ni cuu-xi dico vǎ cǎchí-ó sǎ lóho-o ñà túú cùu-xi yiqui cuñú-ó. ¹⁷ Te núu nihíí ní ndúú yiqui cuñú-ó ní xindee mee-ni tinuu-o, te ñà túú ndèe cundee lóho-o cùndedóho ni cùu te núu

ducaⁿ, àdi núu nihíí yiqui cuñú-ó ní xindee mee-ni lóho-o te ñà túú ndèe cundee dítní-ó ní cùu te núu ducaⁿ. ¹⁸ Dico mee Yǎ Ndiǒxí ní taxi ndecu-gá ìⁿ ìⁿ xichi yiqui cuñú-ó nàcuáa ní cachí iní mée-gá. ¹⁹ Te núu ìⁿ-ni sǎ ní xindecu nihíí yiqui cuñú-ó, te vǎ cùndùu-xi nacuáa táu-xi cunduu ni cùu te núu ducaⁿ. ²⁰ Dico titní xichi cùu yiqui cuñú-ó, te ìⁿ-ni cùu-xi nihíí-xi.

²¹ Te sa naha-o sǎ vǎ cúú cǎchí-ó sǎ tinuu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. ²² Te nchoo sǎ naha-o sǎ dává xichi yiqui cuñú-ó sǎ cǎchí-ó sǎ ñà túú cùnuu ío-gá xini ñuhu-xi. ²³ Te dava xichi yiqui cuñú-ó sǎ ñà túú quide cuendá cǎvíhí-ó nchaa xiǎⁿ sǎ quidáhu dóó sácuihnu-o, te dava xichi yiqui cuñú-ó ñà cúú cùtúu chi dacuitíí sǎ quidáhu. ²⁴ Te nchaa xichi yiqui cuñú-ó sǎ cúú cùtúu ñà túú xini ñuhu-xi quidáhu. Te Yǎ Ndiǒxí ní taxi ndecu-gá nchaa xichi yiqui cuñú-ó nàcuáa tàú-xi cunduu. Te ní cachí-gá sǎ dává-gǎ xichi yiqui cuñú-ó núú vǎ cúú cùtúu quidáhu. ²⁵ Te ducaⁿ ní quide-gá cuendá sǎ ìⁿ-ní cùu yiqui cuñú-ó. Te ducaⁿ ndi tnahá ìⁿ ìⁿ xichi yiqui cuñú-ó chindee tnaha-xi. Te ducaⁿ sǎtnahá-xi cùu nchoo vitna ndecu-o ichi Xítóhó Jesucristú chi chindee tnaha-o. ²⁶ Te núu ìⁿ xichi yiqui cuñú-ó ná tnàhúhú te nihíí-ó quide úhú-xi, te núu ìⁿ xichi yiqui cuñú-ó ío váha ndècu-xi te ducaⁿ nihíí yiqui cuñú-ó cúú

vãha-xi. Te ducaⁿ sãtnahã-xi cùu-o vitna ndecu-o ichi Xitohó Jesucristú.

27 Te nchoo ndècu ndi^{hi}-o Xitohó Jesucristú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá. 28 Te ducaⁿ sãtnahã-xi cùu-o chi Yá Ndiöxí ní taxi-gá ndí díⁿ ndí díⁿ chiⁿ quide-o sá cúú-xí nchãa ñáyi^u ndècu ichi-gá. Te díhna-gá cue téé caca cuu cáháⁿ tnúhu-gá núú ñáyi^u ní taxi ndecu-gá, te dãtnùní ní taxi ndecu-gá cue téé cáháⁿ tnúhu-gá nãcuãa dãcahu iní ñáhã mèe-gá, te dãtnùní ní taxi ndecu-gá cue téé dãnehé ñáhã xii ñáyi^u tnúhu-gá núú tàcã-yu, te dãtnùní ní taxi ndecu tucu-gá cue téé ndãcu quide sã vã yõo tnãhí ndãcu cada. Te ní taxi ndecu tucu-gá cue téé xicãⁿ táhú-ní núú Xitohó Jesucristú cuendã ñáyi^u cùhú te ndúha-yu. Te ní taxi ndecu tucu-gá cue téé chindee cue ñáyi^u ndècu ichi-gá. Te ní taxi ndecu tucu-gá cue téé yindaha ñaha xii ñáyi^u ndècu ichi-gá, te ní taxi ndecu tucu-gá cue téé càháⁿ tnúhu sã dãcãhu iní ñáhã Espiritú-gá tnúhu sã ñã túú xini-güedé. 29 Te ñã nchãã-ó cùu-o cue téé ní táuchíúⁿ Xitohó Jesucristú cáháⁿ tnúhu-gá núú ñáyi^u, te ñã nchãã-ó cùu-o cue téé càháⁿ tnúhu sã dãcãhu iní ñáhã Yã Ndiöxí xii-o. Te ñã nchãã-ó cùu-o cue téé dãcãha ñaha xii-yu. Te ñã nchãã-ó cùu-o cue téé quide sã vã yõo tnãhí ndãcu cada. 30 Te ñã nchãã-ó cùu-o cue téé dicó-ni cácãⁿ táhú núú Xitohó

Jesucristú cuendã ñáyi^u cùhú te ndúha-yu. Te ñã nchãã-ó cùu-o cue téé càháⁿ tnúhu sã dãcãhu iní ñaha Espiritú Yã Ndiöxí tnúhu sã ñã túú xini-ó, te ñã nchãã-ó cùu-o cue téé cùtnuní ini-xi cáháⁿ nãcuãa ndùu tnúhu-ãⁿ. 31 Te ío nducu ndèe-ndo cada-ndo nãcuãa nduu táhú-ndó núú Yã Ndiöxí nchãa sã ío-gã cùnùu cada-ndo. Te vitna na dãnehé ñáhã tucu-í xii-ndo nãcuãa cada-ndo, dico sã dãnehé ñáhã-í-a ío-gã cùnùu-xi.

13

Cuu ini-ó tnãha ñáyi^u-o

1 Te núu nchoo xini-ó cáháⁿ-ó tnúhu sã ío vii ío vãha cuáhãⁿ càháⁿ ñáyi^u ñuyíú-a, àdi xini-ó cáháⁿ-ó tnúhu sã ío vii ío vãha cuáhãⁿ càháⁿ cue espíritú xínú cuèchi núú Yã Ndiöxí, te núu xini-ó cáháⁿ-ó nchãa tnúhu-ãⁿ te ñã túú cùu ini-ó cuè tnãha ñáyi^u-o ñã, te ñã túú nãndíhi-xi sã xini-ó cáháⁿ-ó tnúhu-ãⁿ te cùu-o datná dava caã sã ío dusaⁿ quide. 2 Te núu cùu-o ñáyi^u càháⁿ tnúhu sã dãcãhu iní ñáhã Yã Ndiöxí, àdi cuu-o ñáyi^u cùtnuní ini-xi nãcuãa cuáhãⁿ nchãa tnúhu ndùu yuhu ni cuu, àdi cuu-o ñáyi^u ío vãha cùtnuní ini-xi nchãa nãcuãa quide Yã Ndiöxí, àdi cuu-o ñáyi^u ío vãha sãndãá iní ñáhã xii Yã Ndiöxí nãcuãa ndacu-o cùu-o ìⁿ yucu xocuiñi-xi núú ndécú-xí, te núu nchãa xiãⁿ xini-ó càda-o te ñã túú cùu ini-ó cuè tnãha ñáyi^u-o ñã, te ñã túú vèdana nãndíhi-xi te núu yã cúú ini-ó tnãha ñáyi^u-o cuèi na càda-o nchãa xiãⁿ. 3 Te cuèi nchãa sã ndécú ndi^{hi}-o na dãcãhũ-o,

te cuêi na cuãha cuendá-ó mée-o cáyú-ó sã cúú-xí Yã Ndiõxí, dico ñá túú vèdana chindee ñaha-xí xii-o sã dúcáⁿ càda-o te núu ñá túú cùu iní-ó cuè tnaha ñáyiu-o.

4 Dico núu cùu iní-ó cuè tnaha ñáyiu-o, te cànnu iní-ó, te quide váha-o, te ñá túú cùu-o ñáyiu cuédú íní, te ni ñà túú càháⁿ-ó nõu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñũhu cuehé iní-ó, te ni ñà túú ndùcu-o mee-ni sã cúú-xí mée-o, te ni ñà túú-gã cúdééⁿ-ó cuendá ñⁿ sã cúú, te ni ñà túú-gã sácũhuⁿ iní-ó sã quidé ñaha tnaha ñáyiu-o xii-o. ⁶ Te ni ñà túú-gã cúdí^ñ iní-ó nchàa sã ñà túú vãha quide ñáyiu, chi mee-ñã cuendá nchaa sã vãha cùdí^ñ iní-ó. ⁷ Te nchaa sã yãha-o sãcahnu iní-ó, te sàni váha iní-ó cuendá nchaa ñáyiu, te sàni iní-ó sã díú-ní nchàa sã vãha cuu xii nchaa tnaha ñáyiu-o ndèé cuèé-gá, te ío quide cahnu iní-ó cuèi nãndi sã yãha-o, te nchaa xiãⁿ quidé-ó te núu cùu iní-ó cuè tnaha ñáyiu-o.

⁸ Te ni caa ni quihíⁿ duha-ni cuu iní-ó cuè tnaha ñáyiu-o. Dico sáá nduu te vá cóó-gã ñáyiu cáháⁿ tnúhu sã dácàhu iní ñáhá Yã Ndiõxí, te ni vã cóó-gã ñáyiu cáháⁿ tnúhu sã dácàhu iní ñáhá Espíritú Yã Ndiõxí tnúhu sã ñà túú xini-yu, te ni vã cóó-gã ñáyiu túha dàtná túha ñáyiu vitna.

⁹ Te vitna ñá túú cùtnuní iní-ó nchàa nacuáa sàni iní Yã Ndiõxí chi sacú-ni cùtnuní iní-ó, te ducaⁿ sàcú-ni càháⁿ-ó nacuáa ndùu tnúhu-gá, dico

càháⁿ-ó tnũhu-gá nàcuáa dácàhu iní ñáhá-gã xii-o. ¹⁰ Te na sáá nduu càda Yã Ndiõxí nchaa nacuáa tàú-xi cunduu, te dàvá-án te nchaa sã càchí-gá ñá túú ndècu-xi nacuáa tàú-xi cunduu vá dúcáⁿ-gã cundecu-xi.

¹¹ Te yúhú cùtnahá ní cuu landú-í ní xóo cada-í sã cùu-í landú, ní xóo cáháⁿ-í, ní xóo cani iní-í, te ní xóo tecú tnùn-í dàtná quidé cuè landú xĩndecu vitna, dico sátá ñi cuu-í ñⁿ tée cùu sacuéhé te ñá túú-gã quidé-í dàtná ní xóo cada-í cùtnahá ní cuu landú-í.

¹² Te ducaⁿ sãtnahá-xi cùu-o vitna ndecu-o ichi Xitohó Jesucristú, chi ñá túú cùtnuní váha iní-ó nàcuáa cùu cuendá Yã Ndiõxí, te cùu-o datná ñáyiu ndèhe ñⁿ núu yütátá sã ñà túú tũu váha núu-xi, te ducaⁿ sãtnahá-xi cùu-o chi ñá túú cùtnuní váha iní-ó ñasa cùu cuendá-gã, dico sáá nduu quini núu-ó-gã. Te nchoo sàcú-ni cùtnuní iní-ó nacuáa ndùu-gá vitna dico na sáá nduu te quini ndáá-ó nacuáa càa nacuáa ndùu-gá dàtná xini ñáhá mée-gã xii-o.

¹³ Te ni caa ni quihíⁿ ducaⁿ-ni quindáá iní-ó Yã Ndiõxí, te ducaⁿ-ni cùndecu ndihi-o tnúhu ndee iní cundecu-o ndihi-gã, te ducaⁿ-ni ío cuu iní-ó-gã ndihi tnaha ñáyiu-o. Te sã cúú iní-ó Yã Ndiõxí ndihi sã cúú iní-ó tnaha ñáyiu-o xiãⁿ ío-gã cùnùu-xi dacúúxí dàva-gã.

14

Ñáyiu càháⁿ tnúhu sã dácàhu iní ñáhá Espíritú Yã Ndiõxí

1 Te vá dáñá ndèé-ndó cùu iní-ndó tnàha ñáyiu-ndo, te cuhuⁿ iní-ndó sã ndùu táhú-ndó nũú Yã Ndiõxí tĩtní nũú chiũⁿ cada-ndo nacuaa chindee ñàha Espiritú-gá xii-ndo, te ío cuhuⁿ iní-ndó sã ndúú táhú-ndó cãháⁿ-ndó tnũhu sã dácàhu iní ñáhá Yã Ndiõxí xii-ndo. 2 Te cue ñáyiu cãháⁿ tnúhu sã dácàhu iní ñáhá Espiritú Yã Ndiõxí tnúhu sã ñà túú xiní-yu, te tnúhu cãháⁿ-yu-áⁿ cúú-xí sã cúú-xí Yã Ndiõxí te ñá díú sã cúú-xí ñáyiu chi ñá túú tècú tnùní-yu, te mee Espiritú Yã Ndiõxí quidé-xí dùcaⁿ caháⁿ-yu tnúhu yiyuhu. 3 Te cue ñáyiu ní nduu táhú nũú Yã Ndiõxí cãháⁿ tnúhu sã dácàhu iní ñáhá-gã xii-yu, te ñáyiu-áⁿ dácàháⁿ-yu ñáyiu nàcuáa cuita níhí ndéé-gã-yu cundecú-yu ichi-gá, te ducaⁿ cuãñáhá-yu tnúhu ndee iní xii-yu òré ndihú iní-yu. 4 Te ñáyiu cãháⁿ tnúhu sã dácàhu iní ñáhá Espiritú Yã Ndiõxí xii-yu tnúhu sã ñà túú xiní-yu-áⁿ, ñáyiu-áⁿ mee-nĩ-yu níhí ndéé-yu ndècú-yu ichi-gá. Dico ñáyiu cãháⁿ tnúhu sã dácàhu iní ñáhá-gã xii-yu, cãháⁿ-yu tnúhu-áⁿ nàcuáa níhí ndéé dáva-gá ñáyiu nchìcúⁿ nihnu ichi-gá.

5 Te yúhú ío cudíí iní-í te núu nchaa-ndo cãháⁿ-ndó tnũhu sã dácàhu iní ñáhá Espiritú Yã Ndiõxí xii-ndo tnũhu sã ñà túú xiní-ndó. Dico ío-gá cudíí iní-í te núu nchaa-ndo cãháⁿ-ndó tnũhu sã dácàhu iní ñáhá-gã, chi ío-gá xiní ñũhu-xi sã cãháⁿ-ndó tnũhu-áⁿ

dàcúúxí sã cãháⁿ-ndó tnũhu sã dácàhu iní ñáhá Espiritú-gá cãháⁿ-ndó tnũhu sã ñà túú xiní-ndó. Dico ìⁿ-ni nũtnahá-xi quide-ndo te núu nchòhó ñáyiu cãháⁿ tnúhu sã dácàhu iní ñáhá Espiritú-gá cãháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiu ndècu ichi Yã Ndiõxí cuita níhí ndéé-gã-yu quíhíⁿ cundecú-yu ichi-gá. 6 Te núu yúhú quexio-í núú ndécú nchòhó ñáyiu ndècu ndihi-í ichi Xítohó Jesucristú, te ngúíta-í cãháⁿ-í mee-ni tnũhu sã dácàhu iní ñáhá Espiritú Yã Ndiõxí xii-í tnúhu sã ñà túú xiní-í, te ñà túú ñã sã vãha cuu-xi sã cúú-xí-ndó. Dico cuu-xi sã vãha xii-ndo te núu na cãháⁿ-í núú-ndó nchàa tnúhu sã dánèhé ñáhá Yã Ndiõxí xii-í tnúhu sã vátá dácuaá-gá-í, ndihi nchaa tnúhu sã sã xiní-í, ndihi nchaa tnúhu sã dácàhu iní ñáhá-gã xii-í cãháⁿ-í, ndihi nchaa dáva-gá tnúhu-gá.

7 Te na càda-o cuendá sã nũú ìⁿ téé tiú-dé vílu àdi caní-dé àrpá te núu ñà túú sàhnú-dé ndihi-xi ìⁿ yaá, te ñà cútùní iní-ó ñã yaá caní-dé àdi ná yaá tiú-dé te núu ducaⁿ na càda-dé. 8 Te díu-ni ducaⁿ sãtnahá-xi cùu tucu téé cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dáva-gá cue sandadú te núu ducaⁿ na càda-dé vá tiú váha-dé. 9 Te ducaⁿ sãtnahá-xi cùu nchòhó te núu vá cãháⁿ-ndó ìⁿ tnúhu nàcuáa tàú-xi cunduu núú ñáyiu te vá tècú tnùní-yu

tnúhu cãháⁿ-ndó. ¡Chi àúⁿ nã cuu cãháⁿ-ndó te núu ducaⁿ na càda-ndo! ¹⁰ Te ío titní núú tnúhu ío ñuyíú, te ñⁿ ñⁿ núú tnúhu-áⁿ cútñuní iní ñáyíu nãcuáa quèe-xi. ¹¹ Te núu nchoo ñã tècú tnùnì-ó ñⁿ tnúhu cãháⁿ ñⁿ ñáyíu, te quíde-ó-yu ñáyíu ñúú xícá chí ñã túú cãháⁿ-yu tnúhu cãháⁿ-ó, te ñíu-ni ducaⁿ quíde ñahá-yu xii nchoo tùcu. ¹² Te xíãⁿ núu cãchí tnúhu-í xii nchaa nchòhó ñáyíu ío cuíní nduu táhú núú Yã Ndiõxí sá Espíritú-gá chindee ñaha-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ñí nduu táhú-ndó nãcuáa cuita níhí ndéé-gã ñáyíu ndècu ichi-gá quíhíⁿ.

¹³ Te núu cãháⁿ-ndó tnúhu sá ñã túú xìnì-ndó, tnúhu sá dácàhu iní ñáhá Espíritú Yã Ndiõxí xii-ndo, te xìnì ñuhu-xi sá cãcáⁿ táhú-ndó núú Yã Ndiõxí cuendá sá ná chindee ñaha-gá xii-ndo cãháⁿ-ndó núú ñáyíu núu nása quèe-xi tnúhu-áⁿ. ¹⁴ Chi núu nchoo na cãháⁿ ndíhi-o Yã Ndiõxí ndíhi tnúhu sá ñã túú xìnì-ó, te ñí yùhu ñí iní-ó cãháⁿ ndíhi-o-gã dicó-ni sá ñã tècú tnùnì-ó nãcuáa ndùu tnúhu cãháⁿ-ó. ¹⁵ Te xíãⁿ núu xìnì ñuhu-xi cãháⁿ ndíhi-o Yã Ndiõxí ñí yùhu ñí iní-ó nãcuáa chindee ñaha Espíritú-gá xii-o te cãháⁿ-ó nãcuáa tecú tnùnì-ó, te ñíu-ni ducaⁿ càda-o oré xítá yùhu-o chiñuhu-o Yã Ndiõxí, chí ñí yùhu ñí iní-ó dùcaⁿ cada-o nãcuáa chindee ñaha Espíritú-gá xii-o, te cútñuní iní-ó nãcuáa cuáháⁿ nchaa tnúhu cãháⁿ-ó xíta-o. ¹⁶ Chi núu nchoo na ndácáⁿ táhú-ó núú Yã Ndiõxí ndíhi

mee-ni tnúhu sá ñã túú xìnì-ó tnúhu sá dácàhu iní ñáhá Espíritú-gá xii-o, te ñáyíu ñã túú ñí ndùu táhú cãháⁿ tnúhu cãháⁿ-ó ndèdóho ñahá-yu xii-o, te ñáyíu-áⁿ vã ndácú-yu cãháⁿ-yu tnúhu cãháⁿ-ó ndácáⁿ táhú-ó ndíhí-yu núú Yã Ndiõxí chí ñã túú tècú tnùnì-yu tnúhu cãháⁿ-ó. ¹⁷ Te váha-ni quíde-o sá dúcáⁿ cãháⁿ-ó ndácáⁿ táhú-ó núú Yã Ndiõxí, te dicó-ni sá tnúhu-áⁿ ñã túú chindee-xi ñáyíu nãcuáa cuita níhí ndéé-gã-yu cundecú-yu ichi-gá. ¹⁸ Te yúhú ío ndácáⁿ táhú-í núú Yã Ndiõxí chí cãháⁿ-í tnúhu sá ñã túú xìnì-í tnúhu sá dácàhu iní ñáhá Espíritú-gá xii-í, te cãháⁿ-gá-í dácúúxí nchaa nchòhó. ¹⁹ Te òré tàcá ñáyíu ndècu ichi Yã Ndiõxí dácuahá-yu tnúhu-gá, te cãháⁿ-í tnúhu-gá núú-yu sá sà ñí cútñuní iní mée-í nãcuáa ducaⁿ cútñuní iní-yu nãcuáa ndùu tnúhu cãháⁿ-í. Te tnàhá-gá iní-í cãháⁿ-í úhúⁿ-ni tnúhu-áⁿ núú-yu dácúúxí sã cãháⁿ-í úxí mĩl tnúhu sá ñã túú xìnì-í, tnúhu sá dácàhu iní ñáhá Espíritú Yã Ndiõxí xii-í cãháⁿ-í.

²⁰ Te nchòhó ñáyíu ndècu ndíhi-í ichi Xítohó Jesucristú, vá caní iní-ndó dàtná sání iní cue landú, chí caní iní-ndó dàtná tàú-xi cunduu chí sa sacuéhé-ndó. Dico cuu-ndo dàtná cue landú lihli vá cundècu-ndo ichi cuehé ichi duha, chí cue landú-áⁿ ñã túú ndècu-güexi ichi-áⁿ. ²¹ Te núú tütú Yã Ndiõxí cãháⁿ-xi nãcuáa ñí cãháⁿ-gá, te cãchí-xi: “Cue tée ñúú xícá cãháⁿ ndí dñⁿ núú tnúhu quíhíⁿ-güedé cãháⁿ-güedé

tnúhu-í núú ñáiyu isràèl cada-güedé núù-í, te cuèi ducaⁿ dico vá quindáá iní-yu tnúhu-í", duha ní cachí Yá Ndiòxí te ducaⁿ ní ngúndeé núú tütú-gá. ²² Te tnúhu sá dácàhu iní ñáhá Espíritú Yá Ndiòxí xii-o tnúhu sá ñà túú xìní-ó, xiáⁿ cúú-xí cuendá sá cútñuní iní cue ñáiyu ñá túú sàndáá iní tnúhu Yá Ndiòxí sá ñà túú cùu váha iní ñáhá-gá xii-yu. Dico sá cúú-xí cuè ñáiyu sàndáá iní tnúhu-gá ñá túú nã quidé-xí sã cúú-xí-yu. Te tnúhu sá dácàhu iní ñáhá Yá Ndiòxí xii-o, xiáⁿ cúú-xí cuendá sá cútñuní iní cue ñáiyu sàndáá iní tnúhu-gá sá ndécú ndihi ñaha-gá xii-yu, dico ñá túú dùcaⁿ sani iní cue ñáiyu ñá túú sàndáá iní tnúhu-gá. ²³ Te núu ní tacá nchaa nchòhó ñáiyu ndècu ichi Yá Ndiòxí, te nchaa-ndo ní ngüíta-ndo càháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te mei òré-áⁿ quexìo cue ñáiyu ñá túú sàndáá iní tnúhu-gá, ndihi cue ñáiyu vátá quini dana-gá tnúhu-gá núú ndécú-ndó, te ñáiyu-áⁿ quesàhá-yu sá lùcú-ndó te núu ducaⁿ càháⁿ-ndó tnúhu sá dácàhu iní ñáhá Espíritú-gá xii-ndo òré quexìo-yu. ²⁴ Dico núu nchaa-ndo càháⁿ-ndó tnúhu sá dácàhu iní ñáhá Yá Ndiòxí xii-ndo, te mei òré-áⁿ quexìo cue ñáiyu ducaⁿ ñà túú sàndáá iní-xi tnúhu-gá, ndihi cue ñáiyu ducaⁿ ñà túú xìní dana tnúhu-gá-áⁿ, te ñáiyu-áⁿ cutñuní iní-yu sá ndécú cuèchi-yu núú-gã,

te ngüíta-yu cuáha-yu cuendá sá ñà túú quide váha-yu ndécú-yu cuendá sá càháⁿ-ndó tnúhu-gá ndèdòho-yu. ²⁵ Te nchaa sá cuèhé sá dúhá ní quidé-yu sàni iní-yu yiyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yá Ndiòxí, te cachí-yu sá ìo càhnu cuu-gá, te cachí tucú-yu sá ndàá ndécú ndihi-ndo-gá.

Cada-o nàcuáa tàù-xi cundu

²⁶ Te vitna nchòhó ñáiyu ndècu ndihi-í ichi Xítóhó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiòxí, te dava-ndo dàsahú-ndó ñáiyu tnúhu-gá, te dava-ndo càháⁿ-ndó nàcuáa dàquixi túu Yá Ndiòxí iní-ndó, te dava-ndo càháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te dava-ndo càháⁿ-ndó nàcuáa quèe-xi tnúhu-áⁿ. Te nchaa sá quidé-ndó ná cùu-xi nacuáa chindee-xi ñáiyu nàcuáa cuita níhí ndéé-gã-yu cundécú-yu ichi-gá. ²⁷ Te òré càháⁿ-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te úú-ni-ndo àdi úní-ni tnàhá-ndó càháⁿ-ndó tnúhu-áⁿ te vá úúⁿ ní càháⁿ-ndó chi ndéé ndihi ìⁿ-ndo te dàtnuní ngüíta ingá-ndó càháⁿ-ndó. Te xini ñuhu-xi sá ìⁿ ñáiyu càháⁿ-yu nàcuáa quèe-xi tnúhu càháⁿ-ndó-áⁿ. ²⁸ Te núu

ñá túú ñáiyu tècú tnùní nàcuáa quèe-xi tnúhu càháⁿ-ndó-ǎⁿ, te núú méé núú ìⁿ-ní-ndó càháⁿ-ndó tnúhu-áⁿ càháⁿ ndihí-ndo Yá Ndiòxí te vǎ càháⁿ-ndó núú ñáiyu. ²⁹ Te òré càháⁿ-ndó tnúhu sǎ dácàhu iní ñáhá Yá Ndiòxí xii-ndo te úú-ni-ndo àdi úní-ni tucu-ndo càháⁿ, te dava-gá-ndó cùndedóho-ndo tnúhu-áⁿ te càháⁿ-ndó núú váha-ni càháⁿ-güedé àdi ñá túú váha-ni. ³⁰ Te núú ìⁿ-ndo ní dácáhú iní ñáhá Yá Ndiòxí xii-ndo ìⁿ tnúhu càháⁿ-ndó, te núú ìⁿ-ndo sǎ càháⁿ-ndó te ngüíñí-ndó te quíhu tucu ingá-ndó càháⁿ-ndó nàcuáa ní dácáhú iní ñáhá Yá Ndiòxí xii-ndo. ³¹ Te nchaa nchòhó ñáiyu ní nduu táhú càháⁿ tnúhu sǎ dácàhu iní ñáhá Yá Ndiòxí, te vǎ úú-ní càháⁿ-ndó chí díhna-gá ìⁿ-ndo càháⁿ te dàtnùní càháⁿ tucu ingá-ndó. Te ducaⁿ cada-ndo cuendá nchaa-ndo tècú tnùní-ndó nàcuáa ndùu tnúhu càháⁿ ìⁿ ìⁿ-ndo, te ducaⁿ te cudíí-gǎ iní-ndó cànchicúⁿ nihnu-ndo ichi-gá. ³² Te nchaa ñáiyu càháⁿ tnúhu Yá Ndiòxí sa nàha-ná méé-yu nàcuáa quidé-yu càháⁿ-yu tnúhu-gá nàcuáa ñá túú quide cutexínu-yu. ³³ Te Yá Ndiòxí cúú-gǎ Yaá quidé ío váha cùu ìⁿ-nuu-ndo ndecu-ndo, te ñá túú dàticá nuu ñaha-gǎ xii-ndo.

Te na càchí tnúhu-í xii-ndo nàcuáa càháⁿ-í nchaa núú tàcá cue ñáiyu ndècu ndihí-o ichi Xítohó Jesucristú. ³⁴ Te yúhú càchí-í sǎ vǎ cúú càháⁿ cue ñáiyu díhí òré tàcá-ndó dàcuaha-ndo tnúhu-gá, chí ñá

túú dùcaⁿ cuiní-gá cadá-yu, te quíndáá-ni iní-yu cadá-yu nàcuáa tàú-xi cunduu. ³⁵ Te núú ìⁿ sǎ cuiní-yu nducu tnúhu-yu te ndéé òré nasáá-yu vehé-yu te nducu tnúhu-yu núú yíí-yu, chí ñá túú ndùu váha-xi sǎ càháⁿ-yu núú tàcá nchaa ñáiyu dàcuáha ndihí-yu tnúhu-gá.

³⁶ Te chí dándàcu iní sǎ ñà díú nchòhó cúú-ndó ñáiyu ní ngúndecu ndihí tnúhu Yá Ndiòxí díhna nuu nàcuáa datècú tnúhu-ndo dàva-gá ñáiyu, te ní ñà díú mèe-ni nchohó sa ní ngúndecu ndihí-ndo tnúhu Yá Ndiòxí vitna, núú xíáⁿ vǎ càchí-ndó sǎ ío cùnuu-ndo. ³⁷ Te núú dava nchòhó sání iní-ndó sǎ càháⁿ-ndó nàcuáa dàcahu iní ñáhá Yá Ndiòxí xii-ndo àdi sání iní-ndó sǎ quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sǎ ncháá tnúhu càháⁿ-í-a cùu-xi tnúhu sǎ ní cachí tnúhu mee Xítohó Jesucristú cada-o. ³⁸ Te ndéda-ni càa ñáiyu ndècu ndihí-ndo te núú ñá túú sàndáá iní-yu tnúhu càháⁿ-í, te vǎ cadá cuendá-ndó tnúhu càháⁿ-yu.

³⁹ Te vitna nchòhó ñáiyu ndècu ndihí-í ichi Xítohó Jesucristú, ío caní iní-ndó càháⁿ-ndó tnúhu sǎ dácàhu iní ñáhá Yá Ndiòxí núú ñáiyu, te dañá-ndo na càháⁿ cue ñáiyu ní nduu táhú núú Yá Ndiòxí sǎ càháⁿ-yu tnúhu sǎ dácàhu iní ñáhá Espíritú-gá xií-yu tnúhu sǎ ñà túú xíní-yu. ⁴⁰ Te cada-ndo nchaa nàcuáa tàú-xi cunduu nàcuáa ñá túú nǎ cuu cundecu-ndo.

15

Ní ndoto Xítohá Jesucristú

1 Te vitna nchòhó ñáyiú ndècu ndihí-í ichi Xítohá Jesucristú cuíní-í sá dándàcu iní-ndó nàcuáa ní dánèhé ñáhà-í xii-ndo tnúhu sá càháⁿ nàcuáa naníhí tǎhú-ó, chi ðiu tnúhu-áⁿ ní sándáá iní-ndó te nchìcúⁿ nihnu-ndo. ² Te sá xii tnúhu-áⁿ níhnú-ndó ichi cuáháⁿ-ndó núú ndúú tǎhú-ndó cùndecu-ndo ndihí Yá Ndióxi ní caa ní quíhíⁿ, te ducaⁿ ndúu tǎhú-ndó núú cùndècu-ndo ní caa ní quíhíⁿ ndihí Yá Ndióxi te núu nchìcúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchìcúⁿ nihnu-ndo te ñá túú ní sándáá iní-ndó nàcuáa tǎu-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ío cùnuu ní níhí-í, chi ní cachí tnúhu-í xii-ndo sǎ Xítohá Jesucristú ní xihí-gá cuendá nchaa yíca cuèhi-o, te ducaⁿ ní cuu chi ducaⁿ càháⁿ-xi núú tǔtú Yá Ndióxi sá dúcáⁿ yáha-gá. ⁴ Te ní chindúxi ñaha-güedé xii-gá te nduu úní ní dándótó ñaha Yá Ndióxi xii-gá, te ducaⁿ ní cuu chi ducaⁿ càháⁿ-xi núú tǔtú Yá Ndióxi. ⁵ Te sátá ní ndoto-gá te ní quee túu-gá núú tǔ Pèlú, te dàtnùní ní quee túu-gá núú dǎva-gá cue téé ní táuchíúⁿ-gǎ càháⁿ tnúhu-gá. ⁶ Te sátá dúcáⁿ te dàtnùní ní quee túu-gá núú úhúⁿ ciendú cue ñáyiú ndècu ichi-gá, te vǎi-yu xǎndecu-ní-yu vitna chi sacú-ni-yu ní xihí. ⁷ Te dàtnùní ní quee túu-gá núú tǔ Jàcobó, te sátá dúcáⁿ te dàtnùní ní quee túu-gá núú

nchaa cue téé ní táuchíúⁿ-gǎ càháⁿ tnúhu-gá.

⁸ Te ndéé núú ní ndihí-ná te ní quee túu-gá núú mée-í, te òré ní quee túu-gá núu-í te cùu-í dàtná ìⁿ déhe yiquíⁿ vǎtá sǎa-gá nduu càcu chi cùu-í ìⁿ téé ñá túú sàni váha iní-xi cuendá-gá ní cùu. ⁹ Te yúhú ñá túú cùnuu-í dàtná cùnuu cue téé ní táuchíúⁿ Xítohá Jesucristú càháⁿ tnúhu-gá. Te cùu-í ìⁿ téé ní táuchíúⁿ-gǎ càháⁿ tnúhu-gá, cuèi ñá túú tǎu-í sá càháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndióxi. ¹⁰ Dico Yá Ndióxi ío váha iní-gá chi ní quide ñaha-gǎ xii-í ìⁿ téé váha, chi ñá túú-gǎ quidè-í dàtná ní xóo cada-í. Te ío cùndahú iní ñáhá-gǎ chindèe ñaha-gá xii-í dico ñá túú áúⁿ nǎ cuu chindèe ñaha-gá, chi ío-gá vǎi chiuⁿ-gá ní cuu sa ta quide-í cuáháⁿ dàcúúxí dǎva-gá cue téé ní táuchíúⁿ-gǎ càháⁿ tnúhu-gá te ñá díú mée-í ducaⁿ quide-í chi mee Yá Ndióxi ío cùndahú iní ñáhá-gǎ chindèe ñaha-gá xii-í quidè-í chiúⁿ-gá. ¹¹ Te ñá túú nǎ cada-xi cuèi dǎva-gá-güedé sa ní cuu vǎi-gá chiuⁿ-gá quidè-güedé àdi yúhú, chi ìⁿ-ní tnúhu càháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xihí ndotó-yu

¹² Te nchúhú cue téé càháⁿ tnúhu Xítohá Jesucristú càháⁿ-ndí sá ní xihí-gá te ní ndoto-gá, ¿te ná cuendá dǎva nchòhó càchí-ndó sǎ vǎ ndótó cuè ñáyiú ní xihí? ¹³ Te núu ducaⁿ sàni iní-ndó sǎ vǎ ndótó cuè ñáyiú ní xihí te ní Xítohá

Jesucristú ñá túú ní ndòto-gá te núu ducaⁿ. ¹⁴ Te núu dícó Xítohó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñà túú nàndíhi-xi te núu ducaⁿ, te àúⁿ nã cuu sàndáá iní-ndó-gã te núu ducaⁿ.

¹⁵ Te núu dícó cúú-xí ìⁿ sá ndáá tnúhu sàni iní dava-ndo ña, te dàcuandehnde-ndí sá càháⁿ-ndí tnúhu Yá Ndiòxí núú-ndó te núu ducaⁿ, te ñá túú càháⁿ ndáá-ndí núú-ndó sã Yá Ndiòxí ní dándótó-gã Xítohó Jesucristú, te núu ndáá nàcuáa sàni iní dava-ndo sã vã ndótó cuè ñáyíu ní xíhí, dícó ñá ndáá nàcuáa sàni iní-ndó. ¹⁶ Te núu vã ndótó cuè ñáyíu ní xíhí te ní Xítohó Jesucristú ñá túú ní ndòto-gá.

¹⁷ Te núu Xítohó Jesucristú ñá túú ní ndòto-gá ñá, te àúⁿ nã cuu sàndáá iní-ndó-gã te núu ducaⁿ, te ndècu-ni cuèchi-ndo núú Yá Ndiòxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyíu ní sàndáá iní ñáhá xii Xítohó Jesucristú ñáyíu ní xíhí ní xíta nihnú-yu te núu ducaⁿ. ¹⁹ Te núu nchoo ndècu ndíhi-o tnúhu ndee iní núú Xítohó Jesucristú cuèndá-ni sá cùndècu-o ñuyíú-a ña, te cùu-o ñáyíu ío-gá duuⁿ duuⁿ ndàhú sá cúú-xí dàva-gá ñáyíu te núu ducaⁿ.

²⁰ Dico ndáá sá Xítohó Jesucristú ní xíhí-gá te ní ndoto-gá núu xíáⁿ cùtnùní iní dava-o sã ndótó cuè ñáyíu ní xíhí ñáyíu ní sàndáá iní tnúhu-gá. ²¹ Te sá cuèchi ìⁿndi-ni téé ní xíndecu ñuyíú-a xíáⁿ xíhí ñáyíu, te sá cuèndá ìⁿndi-ni tucu ingá téé te ndoto

cue ñáyíu ní xíhí. ²² Te nchaa ñáyíu xíhí-yu sá cuèchi ìⁿ téé, te téé-áⁿ cúú-dě ndíi Adán téé díhna nuu nĩ cuu ñani tnáhá cuè ñáyíu ñuyíú. Te ðiu-ni ducaⁿ sã cuèndá ìⁿndi-ni téé te ndoto cue ñáyíu ní xíhí, te téé-áⁿ cúú-dě Xítohó Jesucristú chi nchaa ñáyíu ndècu ndíhi-gá ndotó-yu. ²³ Te

díhna-gá Xítohó Jesucristú ní ndoto-gá xíáⁿ cùtnùní iní dava-o sã ndùu na quixi tucu-gá ñuyíú-a te dàvã-áⁿ ndoto nchaa ñáyíu ní xíhí ñáyíu ní sàndáá iní tnúhu-gá.

²⁴ Te dãtnùní ducaⁿ te sáá nduu nãa nchaa sá ío ñuyíú, te Xítohó Jesucristú danãa-gá nchaa ndi túhú sá cùnùu ío ñuyíú-a, chi danãa-gá nchaa ñáyíu ío cùnùu, ndíhi yucu ñávãha, ndíhi nchaa espíritú xínú cuèchi núú-xi. Te ducaⁿ te cùñaha-gã xii Tãtã-ó Dútú Ndiòxí taxi tnùní-gá. ²⁵ Chi

Xítohó Jesucristú dacuítí taxi tnuní-gá ndéé ná sàá nduu dànaa-gá nchaa sá cúú ùhú iní ñáhá xii-gá. ²⁶ Te ndéé núú nĩ ndíhi-ná te danãa-gá sá quidé xíhí ñáyíu. ²⁷ Te ducaⁿ chi càháⁿ-xí núú tütú Yá Ndiòxí sá mée-gã ní nachíhi-gá

nchaa sá ío ndaha Xítohó Jesucristú cuèndá sá mée Xítohó Jesucristú taxi tnuní-gá, te vã yõo ìⁿ taxi tnuní ñáhá xii Yá Ndiòxí, chi mee Yá Ndiòxí cúú-gã Yaá ní nachíhi-gá nchaa sá ío ndaha Xítohó Jesucristú. ²⁸ Te díhna-gá ní xáhaⁿ Yá Ndiòxí xii Xítohó Jesucristú Yaá cúú Dèhe-gá

sá quíndàha-gá nchaa sá ío, te òré ná quíndaha Xítohó

Jesucristú nchaa sá ió, te cúñaha-gã xii Yá Ndiõxí taxi tnùní ñáhá-gã xii-gá, te ducaⁿ te mee-nã Yã Ndiõxí taxi tnùní-gá nchaandi túhú sá ió.

²⁹ Te núu ñá túú ndáá càháⁿ-í, ¿te ná cuendá dava ñáyiú sànduté-yu cuendá ñáyiú ní xíhí nõu ñá túú ndáá sá ndótó ñáyiú ní xíhí?

³⁰ Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xíhí te àúⁿ nã cuu ducaⁿ quide cahnu iní-ndí ducaⁿ cuiní-yu cahni ñáhá-yu xii-ndí te núu ducaⁿ. ³¹ Te nchòhó ñáyiú ndècu ndihi-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na cãchí tnúhu ndáá-í xii-ndo sã ñⁿ nduu ñⁿ nduu ndeé iní ñáhá ñáyiú cahni ñáhá-yu xii-í.

³² Te núu dícó ndáá sá vã ndótó ñáyiú ní xíhí dàtná cãchí dava ñáyiú, te àúⁿ nã cuu ní xíndecu-í ñuú Éfesú ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ ñí quidé-yu dàtná quidé ñⁿ quiti dééⁿ sã cúú-xi-í. Te núu ndáá sá vã ndótó ñáyiú ní xíhí ñá, te váha-gá nõu cachí-ó dàtná cãchí ñáyiú: “Vitna na còho-o te na cãxi-o chi tneé idá cuú-ó”, duha cãchí-yu.

³³ Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te ngüíta-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyiú, chi cãchí-yu sá nõu ñáyiú quide váha na ñihí tnáhá-yu ndihi ñáyiú ndècu ichi cuehé ichi duha, te ngüíta

ñáyiú quide váha-áⁿ cadá-yu tnáhá-yu nchaa sá cuèhé sá dúhá dàtná quidé ñáyiú-áⁿ.

³⁴ Te ío váha cuáha-ndo cuendá nàcuáa cundecu-ndo, te vá cadá-gã-ndó dàtná quidé cue ñáyiú ndècu ichi cuehé ichi duha. Te dava-ndo quide-ndo datná quidé cue ñáyiú ndècu ichi cuehé ichi duha chi ñá túú sàndáá iní-ndó Yã Ndiõxí. Te duha càháⁿ-í cuendá sá cúcãhaⁿ núú-ndó cuendá nchaa sá ñá túú váha quide-ndo.

Nàcuáa ndoto ñáyiú ní xíhí

³⁵ Te cudana dava-ndo ndècu tnúhu-ndo nõu nása ndoto ñáyiú ní xíhí, te nása cunduu yiqui cuñú-yu òré ndotó-yu. ³⁶ Te nchòhó ñáyiú ducaⁿ càháⁿ cúú-ndó ñáyiú ñá túú tnáhí cùtnuní iní-xi, te duha na càháⁿ-í nàcuáa tecú tnùní-ndó. Te núu ñⁿ tatá ná chíhí-ó te tèhyú mée-xí te xínu déhe-xi. ³⁷ Dico ñá díú sã sá ní xínu ta sàhnu cuáháⁿ ní cùxi-o, te diu-ni ducaⁿ quide-o cueí tríu ndihi nchaa dava-gá tatá xítú-ó.

³⁸ Te Yá Ndiõxí quidé-gã sácũnduu tatá xínu-áⁿ dàtná cuiní mée-gã cunduu. Te ndèda-ni càa tatá te diu-ni-gá quidé-gã sácũnduu-xi nàcuáa taú-xi cunduu. ³⁹ Te ndi dííⁿ ndáa nchaa yiqui cuñú, chi tucu càa yiqui cuñú nchoo cue ñáyiú, te tucu càa yiqui cuñú nchaa quiti xica núú ñúhú, te tucu càa yiqui cuñú nchaa quiti ndáva, te tucu càa yiqui cuñú nchaa chácá. ⁴⁰ Te ducaⁿ ñá túú ñⁿ-ni caa nchaa yiqui cuñú sá ió andiú ndihi nchaa yiqui cuñú ñáyiú ió

ñuyíu-a, te ducaⁿ ñà túú ñⁿ-ni ndáa vii nchaá sá ió andiú ndihi ñuyíu-a. ⁴¹ Te ducaⁿ cùu tucu-xi nchícanhii chi tuçu òdayehé-xi, te tucu òdayehé yóó, te tucu òdayehé nchaá chódíní, te ducaⁿ ñà túú ñⁿ-ni dayehé nchaá chódíní. ⁴² Te ducaⁿ sàtnahá-xi cùu ñáyiú ní xihí te ndoto, chi tucu càa yiqui cuñú-yu sá nguñdũxi te tucu cunduu yiqui cuñú-yu òré ndotó-yu, te yiqui cuñú sá ndótó ndihí-yu-áⁿ vǎ ndihí nihnu-gá-xi. ⁴³ Te yiqui cuñú ñáyiú xihí ñà túú nàndihí-xi, dico yiqui cuñú sá ndótó ndihí-yu te ió váha cunduu. Te nchaá yiqui cuñú ñáyiú xihí ñà túú tnàhí-gá ndee-xi, dico yiqui cuñú ndoto ndihí-yu xíáⁿ ió cunduu ndee-xi. ⁴⁴ Te yiqui cuñú nchaá ñáyiú xihí cúu-xí cuendá ñuyíu-a, dico yiqui cuñú sá ndótó ndihí-yu xíáⁿ cundecu-ná-xi cuendá Espíritú Yǎ Ndiòxí. Te dàtná ió yiqui cuñú sá cúu-xí cuendá ñuyíu-a, te ducaⁿ ió yiqui cuñú sá cúu-xí cuendá mee-nǎ Espíritú Yǎ Ndiòxí.

⁴⁵ Te núú tùtú Yǎ Ndiòxí càchí-xi: “Ndií Àdán ndíi ní xindecu ndéé díhna ní chihí Yǎ Ndiòxí iní ndíi”, duha càchí-xi núú tùtú-gá. Te ingá tucu téé cùu-dé dàtná ndíi Àdán te téé-áⁿ cúu-dé Xítohó Jesucristú, te Yaá-áⁿ quidé-gǎ sá mée-ná Espíritú Yǎ Ndiòxí quidé-xí ndècu-o ichi-gá vitna. ⁴⁶ Te díhna-gá yiqui cuñú cuendá ñuyíu-a ní nguñdecu, te dàtnúni nguñdecu yiqui cuñú cundecu

ndihi mee-nǎ Espíritú Yǎ Ndiòxí. ⁴⁷ Te téé díhna nuu ní xindecu ñuyíu-a chi ñuhu ní cadúha ñaha Yǎ Ndiòxí xii-dé, te téé-áⁿ cúu-dé ndíi Àdán, te ingá tucu téé ní cuuⁿ-dé andiú te téé-áⁿ cúu-dé Xítohó Jesucristú. ⁴⁸ Te nchaá ñáyiú càa yiqui cuñú-yu dàtná cáa yiqui cuñú téé Àdán téé ducaⁿ ní cuáha ñuhu-áⁿ, te nchaá ñáyiú ní nduu táhú cundecu ndihi téé ducaⁿ vèxi cuuⁿ andiú-áⁿ, ñáyiú-áⁿ nduu yiqui cuñú-yu dàtná cáa yiqui cuñú ní nduu táhú-dé ndécú ndihí-dé vitna, te téé-áⁿ cúu-dé Xítohó Jesucristú. ⁴⁹ Te nchaá ñáyiú ñuyíu-a càa-yu dàtná-ni càa datná-ni ndùu téé ducaⁿ ní cuáha ñuhu-áⁿ. Te nchaá nchoo ñáyiú ní nduu táhú cundecu ndihi téé ducaⁿ vèxi cuuⁿ andiú-áⁿ nduu-o dàtná-ni càa datná-ni ndùu téé-áⁿ tucu.

⁵⁰ Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sǎ ncháá nàcuáa càa yiqui cuñú ñáyiú xindecu vitna vá sǎá-xi cundecu-xi núú ndécú Yǎ Ndiòxí táxi tnùní-gá, chi ñuyíu-a ndihi nihnu-xi. Dico sá tàu-xi sǎá núú ndécú-gǎ táxi tnùní-gá ximi ñuhu-xi cuu-xi sá cúdĩ cundecu. ⁵¹ Te na càchí tnúhu-í xii-ndo ñⁿ tnúhu sá yiyùhu ni cuu: Dava-o cùu-ó te dava-o cundecu-ni-o, dico nchaá-o nàdáma yiqui cuñú-ó. ⁵² Te uuⁿ-ni ducaⁿ nàdáma yiqui cuñú-ó òré cáháⁿ ñⁿ cútú, te cútú-áⁿ cáháⁿ-xi òré sa ta cùyatni naa ñuyíu. Te òré cáháⁿ cútú-áⁿ te ndoto nchaá ñáyiú ní xihí ñáyiú ní xindecu ichi Xítohó Jesucristú,

te ducaⁿ te vá ñⁿ ndùu ñⁿ quíú-gã cuú-yu. Te nchaa ñáyiu ndècu vívú te nàdáma yiqui cuñú-yu tnáhá-yu. ⁵³ Te nchaa yiqui cùñú ndécú ndìhi nchaa ñáyiu ndècu ñuyúú-a vitna ñá túú cùdí-xi chí xihí-xi, dico yiqui cùñú nduu táhú nchoo ñáyiu ndècu ichi Xítohó Jesucristú chí cudí-xi ní caa ní quíhíⁿ chí vá cuú-gá-xi. ⁵⁴ Te òré ná ndùu táhú-ó yiqui cuñú sá dúcáⁿ cùdí ní caa ní quíhíⁿ-án, te vá cùndècu ndìhi-gá-ó yiqui cuñú sá ñá túú cùdí. Te dàvá-áⁿ te quee ndáá-xi nàcuáa càháⁿ-xi núú tütú Yá Ndiõxí núú càchí-xi: “Vitna ñá túú-gã xihí ñáyiu chí mee-nã Yá Ndiõxí cùnù-gá táxí tnùnì ñáhá-gã xii-yu. ⁵⁵ Te ñá túú tnáhí-gá ná ndoho ñáyiu sá cuendá tnúhu xihí, chí vá cóo-gã tnúhu xihí”, duha càchí-xi núú tütú Yá Ndiõxí. ⁵⁶ Te cue ñáyiu ndècu ndìhí-yu tnúhu sá sánú ichi ñaha xii-yu nàcuáa cadá-yu cundecú-yu dico uuⁿ-gá quidè-yu nchaa sá cuèhé sá dúhá. Te sá cuendá nchaa sá cuèhé sá dúhá quidè-yu-áⁿ, te xíáⁿ ní ngúndecu tnúhu xihí dándòho ñaha-xi xii-yu. ⁵⁷ Dico táxáhu xii Yá Ndiõxí chí ní taxi-gá tnúhu ndee iní ndécú ndìhi-o sá sàá nduu te vá quìnì-gá-ó tnúhu xihí, te ducaⁿ chí ndècu ndìhi-o Xítohó Jesucristú.

⁵⁸ Te xíáⁿ nũ càháⁿ-í dóho nchòhó cue ñáyiu ndècu ndìhi-í ichi Xítohó Jesucristú chí ío cùu iní ñáhà-í xii-ndo, te càháⁿ-í dóho-ndo sã cáncícúⁿ nihnu-ni-ndo ichi Xítohó Jesu-

cristú cuèi nándi na càda ñaha ñáyiu xii-ndo sã cuendá-gá, te ío nducu ndèe-ni-ndo cada-ndo chiuⁿ-gá, chí sa nàha-ndo sá ncháá chiuⁿ quide-o cuendá-gá ñá túú àúⁿ nã cuu quide-o.

16

Nàcuáa sàcáⁿ tnáhá ñáyiu díhúⁿ

¹ Te na càchí tnúhu-í xii-ndo cuendá díhúⁿ sã sàcáⁿ tnáhá-ndó sã cúu-xí ñáyiu ñuú Jerusalén, chí diu-ni duha ní dánèhé-í cue ñáyiu xíndecu ichi Xítohó Jesucristú ndécú ñⁿ ñⁿ xichi distritú Gàlaciá. ² Te duha cada-ndo ndì tnáhá nduu ndumíngú, te ñⁿ ñⁿ-ndo dàquee diⁿ-ndo sacú díhúⁿ nàcuáa chindee ñaha Yá Ndiõxí xii-ndo nihí-ndó cuendá òré quexìo-í te sa cundecu túha díhúⁿ-ãⁿ. ³ Te òré quexìo-í te mee-ndo cãxi-ndõ-yu núu ndèdacáa-yu sàni iní-ndó càda ndáá canehé díhúⁿ-ãⁿ quíhíⁿ ndaha ñáyiu xíndecu ichi Xítohó Jesucristú ndécú ñuú Jerusalén. Te cadúha-í ñⁿ úú tutú canehé-yu quíhíⁿ cuendá cutnùnì iní ñáyiu ñuú Jerusalén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Páblú sání iní-dé quíngoto-dé cue ñáyiu ndècu ichi Xítohó Jesucristú

⁵ Te yúhú sání iní-í yáha-í ñⁿ úú ñuú cáá distritú Macèdoniá, te dàtnùnì ducaⁿ te sáá-í núú ndécú-ndó. ⁶ Te òré quexìo-í te cudana cundecu ndìhi ñaha-í xii-ndo vai nduu, àdi cudana te

cundecu ndihi ñaha-ĩ xii-ndo ndèé yáha nchaa yóó quidé v̄ixiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nucúhuⁿ ichi-í te núu ndèé ichi na quihíⁿ-í. ⁷ Te duha càháⁿ-í chi núu Yá Ndiõxí ná càchí-gá te cundecu ndihi ñaha tñaa-í xii-ndo òré quexio-í te ñá díú dìcò-ni ichi yáha-í. ⁸ Te cundecu-ni-í ñuú Éfesú-a ndéé tnahá vico Pentecostés. ⁹ Te ducaⁿ chi iha ío tédóho ñáyiu tnúhu Xítoho Jesucristú sá càháⁿ-í núu-yu. Núu xiãⁿ ío váha quèe cuendá cada-í chiuⁿ-gá cuèi ío vai ñáyiu ñá túú tnahá iní-yu sá càháⁿ-í tnúhu-gá.

¹⁰ Te núu na quixi coto ñaha té Timùteú xii-ndo, te ío váha cuu iní-ndó càháⁿ ndihi-ndo-dé cuendá ducaⁿ ñá túú nã cani iní-dé cundecu ndihi ñaha-dé xii-ndo, chi tnahá-dé cúú-dé té quide chiuⁿ Xítoho Jesucristú dàtná quidè-í. ¹¹ Te cuiní-í sá nì ñⁿ-ndo vá cáni cuèhé iní-ndó cuendá-dé, te chindee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihi dava-gá ñáyiu ndècu ichi Xítoho Jesucristú ndétú-ndí-dé quexio-dé.

¹² Te ío ní càháⁿ ndàhú-í núú tẽ Àpolós té ndècu ndihi-o ichi Xítoho Jesucristú cuendá quixi-dé ndihi dava-gá cue té ndècu ndihi-o ichi-gá quixi coto ñaha-güedé xii-ndo dico ñá túú ní cuiní-dé quixi-dé vitna, dico quixi-dé ndéé cuèé-gá.

Tnúhu ndéé núú nĩ ndihi-ná

¹³ Te ío quihí iní-ndó cundecu-ndo ichi Xítoho Jesucristú, te vá dáña ndèé-ndó quindáa iní-ndó-gã, te ío yii cunduú iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá. ¹⁴ Te ío váha cuu iní tnahá-ndó, te ducaⁿ ío váha cada tñaha-ndo te núu nãndi cùu sá váha sãni iní-ndó cada-ndo.

¹⁵ Te nchòhó ñáyiu ndècu ndihi-í ichi Xítoho Jesucristú sa ñaha-ndo sá ñhnanuu cuè ñáyiu cùu ndi mee té Èstefanás ndécú òstítú Acáyá ní sãndáa iní-yu tnúhu Xítoho Jesucristú. Te vitna ñá túú dáña ndéé-yu quidé-yu sá váha sá cúú-xí dàva-gá ñáyiu sãndáa iní tnúhu-gá.

¹⁶ Te càháⁿ ndàhú-í núú-ndó sã quindáa iní-ndó nchaa ñáyiu ducaⁿ xĩquide, ndihi nchaa dava-gá ñáyiu ío ndècu ndee quide chiuⁿ ndihi-ndo cuendá Xítoho Jesucristú.

¹⁷ Te ío cùdí iní-í sá nĩ quexio té Èstefanás, ndihi té Fortunatú, ndihi té Acàicú, chi cue téé-áⁿ nĩ quide-güedé núú-ndó nĩ quide-güedé nchaa sá ñá túú ndàcu-ndo cada-ndo cuendá-í ní cùu.

¹⁸ Te ío tàxi-güedé tnúhu ndee iní xii-í, te ñiu-ni ducaⁿ tàxi-güedé tnúhu ndee iní xii nchòhó tucu, te núu xiãⁿ xíní ñhhu-xi sá cãnehe-ndo sá yíñhhu núú nchaa cue té duha xĩquide váha.

¹⁹ Te nchaa ñáyiu xĩndecu ichi Xítoho Jesucristú ndécú òstítú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú

ndihi ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuàha tnúhu Yá Ndiǒxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihi-o ichi Xítohó Jesucristú. Te ni yùhu ni iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Pàblú tée-í tnúhu-a quide ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chí ná càchí-ó sá Xítohó Jesucristú quixi tucu-gá.

²³ Te xicáⁿ táhù-í núú Xítohó Jesucristú sá ná chindee chitúu ñaha-gă xii-ndo. ²⁴ Te ío cùu iní ñáhà-í xii-ndo nàcuáa ndècu-o ichi Xítohó Jesucristú, te ducaⁿ na cùnduu, te ío chí cádá ndèe iní-nă vitna.

TUTÚ CÚÚ ÒÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

Té Pāblú cādúha-dé tutú quihiⁿ ndaha ñáyiu xĩndecu ichi Xítóhó Jesucristú ndécú ñuú Còrintú

¹ Yúhú té Pāblú cāhán-í tnúhu Xítóhó Jesucristú chí ducaⁿ ñí cachí Yă Ndiõxí cunduu. Te cādúha-í tutú-a ndihi té Timùteú téé ndècu ndihi-o ichi-gá cuendá daquixi-í ndaha nchòhó ñáyiu xĩndecu ichi Yă Ndiõxí ndécú ñuú Còrintú, te tutú-a cuu-xi tnàhá cuendá nchaa ñáyiu cùu cuendá Yă Ndiõxí xĩndecu nchaa ñuú yĩndèhu distritú Acáyá. ² Te xicáⁿ tǎhù-í núú Tǎtá-ó Dútú Ndiõxí ndihi núú Xítóhó Jesucristú sá ïo na chĩndee chitúu ñaha-gă xii-ndo, te ñiu-ni ndi nduú-gá ná càda te ïo váha cuu iní-ndó cundecu-ndo.

Té Pāblú cāhán-dé nchaa nàcuáa ndòho-dé

³ Te chí ná cǎchí-ó sǎ ïo váha iní Dútú Ndiõxí Yaá cúú Tǎtá Xítóhó Jesucristú, te ñiu-ni Dútú Ndiõxí cúú-gă Yaá ïo cundahú iní ñáhá xii-o, te ñiu-ni-gá cúú-gă Yaá táxi tnúhu ndee iní. ⁴ Te cuèi nándi ndòho-o ndecu-o dico ñiu-ni Dútú Ndiõxí táxi-gă tnúhu ndee iní xii-o, te ducaⁿ quide-gá cuendá sá nchóo cuǎñaha-o tnúhu ndee iní xii nchaa ñáyiu nándi ndòho

ndecu, te ñiu-ni nchaa tnúhu ndee iní táxi-gă xii-o ñiu-ni nchaa tnúhu ndee iní-áⁿ cuǎñaha-o xii-yu. ⁵ Te Xítóhó Jesucristú ïo ní ndoho-gá, te ducaⁿ nchòo tucu ïo ndòho-o, te ducaⁿ ïo vǎi tnúhu ndee iní ñihí-ó ndècu ndihi-o chí ndècu-o ndihi Xítóhó Jesucristú. ⁶ Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tǎhú-ndó. Te Yă Ndiõxí táxi-gă tnúhu ndee iní xii-ndí, te ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú ïo váha sǎni ndáa iní-ndí cuendá-ndó chí ndòho-ndo datná ndóhó-ndí, te ducaⁿ tàxi Yă Ndiõxí tnúhu ndee iní xii-ndo datná táxi-gă xii-ndí.

⁸ Te nchòhó ñáyiu ndècu ndihi-ndí ichi Xítóhó Jesucristú cuiní-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Àsiá chí dàvá-áⁿ ïo ní ndoho-ndí, te luha-ná te vá cúndèe iní-ndí yáha-ndí nchaa tnúndòho-áⁿ ní cùu chí ní xehndé iní-ndí sá vǎ cǎcu-ndí. ⁹ Chí ní sǎni iní-ndí sá ndiyi-ná cuu-ndí ní cùu, te ducaⁿ ñí yáha-ndí cuendá sá ïo-gá quĩndáa iní-ndí Yă Ndiõxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí méé-ndí, te ñiu-gá cúú-gă Yaá dándòto cuèi ñáyiu sa ní xíhí. ¹⁰ Te ñiu-ni-gá ní

taunihnu ñaha-gã ñã túú ní sàhni ñaha ñáyiu xii-ndí, te diu-ni-gá táúnihnu ñaha-gá xii-ndí cuëi vitna, te cùtnuní ndáá iní-ndí sá díú-ní-gã taunihnu ñaha-gã xii-ndí núú cuàháⁿ núú vëxi te vá cáhni ñaha ñáyiu. ¹¹ Te nchòhò tnhá-ndó chindee ñaha-ndo xii-ndí chi càháⁿ ndihí-ndo Yã Ndiòxí cuendá-ndí, te ío vai ñáyiu càháⁿ ndihí ñahá-yu xii-gá cuendá-ndí, te ducaⁿ ío vai ñáyiu ndàcáⁿ táhũ-yu núú-gã cuendá nchaa sá vaha quide ñaha-gá xii-ndí.

Té Páblú càháⁿ-dé ná cuendá ñã túú ní nayáha-dé ñuú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuení Yã Ndiòxí cunduu ndècu-ndí ñuyíú-a, te diu-ni ducaⁿ quide-ndí sá cúú-xí-ndó chi mee-gã cùndàhú iní ñahá-gã xii-ndí chindèe ñaha-gá, te ñã túú quide-ndí dàtná sání iní cue ñáyiu ñuyíú-a. ¹³⁻¹⁴ Nchaa nacuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñã túú úhú tecú tnùní-ndó. Te nchòhò sa cùtnuní luha iní-ndó nacuáa quide-ndí ndécú-ndí, te cuení-ndí sá ío-gá váha tecú tnùní-ndó cuendá sá òré ná quixi tucu Xítohó Jesucristú, te dàvá-áⁿ ío cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xiáⁿ núú ní sani iní-í yáha cáháⁿ-í úú xito núú ndécú-ndó cuendá ío

cudíí iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sã cúú ichi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñã túú ní quixi coto ñaha-í xii-ndo te cudana sàni iní-ndó sã yúhú ñã túú ní sãha váha-í cuendá nacuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-áⁿ tnaa càchí-yu sá cúú cadá-yu ¹⁸ sá sání iní-yu cadá-yu te tnaa càchí-yu sá ñhã. ¹⁸ Dico Yã Ndiòxí Yaá ío váha quide ndáa ñaha ndáa ñahá càxi-gá sá nchùhú ñã túú dàma-ndí sá càháⁿ-ndí. ¹⁹ Te yúhú ndihí té Silvanú ndihí té Timùteú dánèhé ñahá-ndí xii-ndo cuendá Xítohó Jesucristú Yaá cúú Dèhe Yã Ndiòxí, te Xítohó Jesucristú cúú-gã Yaá ñã túú dàma-gá tnúhu càháⁿ-gá, chi cùu-gá Yaá càháⁿ mee-ni tnúhu ndáa tnúhu cuiti. ²⁰ Te diu-ni Xítohó Jesucristú cúú-gã Yaá quidé nchàa nacuáa ní cachí Yã Ndiòxí. Te sá cuendá sá dúcáⁿ quide Xítohó Jesucristú xiáⁿ càchí-ó sã ío cãhnu cuu Yã Ndiòxí. Te nchaa-o na càchí-ó sã díú-ní dùcaⁿ na cada-gá. ²¹ Te mee Yã Ndiòxí quidé-gã ndécú-ní-ó ichi Xítohó Jesucristú. Te diu-ni mee-gã ní cáháⁿ ñahá-gã xii-o cuendá cunu cuechi-o núú-gã. ²² Te Yã Ndiòxí ní quide-gá sá nchóó cùu-o ñáyiu cùu cuendá-gá, te ní taxi-gá Espiritú-gá ní

ngúndecu ndihi-o cuèndá cutnùní iní-ó sã ndàá cada ñaha-gã xii-o nàcuáa ní cachí-gá cada-gá.

²³ Te Yá Ndiöxí nánhá-gã sá yùhú càháⁿ ndáá-í ná cuèndá vátá quíxí-gã-í quixi coto ñaha-í xii-ndo, te vátá quíxí-gã-í chi ñá túú cuíní-í dandihú-í iní-ndó. ²⁴ Te nchúhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiöxí, chi sa sàndáá váha iní-ndó-gã, chi nchúhú cuíní-ndí chindee tnùhu ñaha-ndí xii-ndo nàcuáa ío-gá cudíí iní-ndó cùndecu-ndo.

2

¹ Te ní sani ndáá iní-í sá vã quíxí ndíhi-ni-í quixi coto ñaha-í xii-ndo cuèndá sá vã dándihú-í iní-ndó. ² Te nchòhó cúú-ndó ñãyiú tàxi tnùhu ndee iní xii-í cudíí iní-í ndécù-í, te xiãⁿ nùu ñá túú cuíní-í dandihú-í iní-ndó, chi núu ducaⁿ na càda-í te vá cùndècu váha-gá iní-ndó nàcuáa taxi-ndo tnùhu ndee iní xii-í. ³ Te xiãⁿ nùu ní tendaha-í tutú véxi ndaha-ndo cuèndá sá òré quixi coto ñaha-í xii-ndo, te ðavá-áⁿ quíní-í sá quidé-ndó nàcuáa cudíí iní-í te ñá díú dà dandihú-ndó iní-í òré quexio-í, chi nchòhó tàú-ndó càda-ndo sá yùhú cudíí iní-í. Te cùtnuní ndáá iní-í sá nùu yúhú cudíí iní-í te tnàhá nchòhó cudíí iní-ndó cuèndá sá dúcáⁿ cudíí iní-í. ⁴ Te ndàhyú-í sá ndihú iní-í òré ní cadúha-í tutú ní dáquixí-í ndaha-ndo, chi ío cuéhé sã

sání iní-í, te ñá túú ní dàquixí-í tutú-áⁿ ndaha-ndo cuèndá sá dándihú iní ñàhá-í xii-ndo, chi ní dáquixí-í cuèndá sá nchòhó cutnùní iní-ndó sã ìo cùu iní ñàhá-í xii-ndo.

Nàcuáa tàú ñãyiú ñuú Còrintú cada-yu cuèndá ìⁿ ñãyiú ñá túú quide ndáá

⁵ Te na càchí tnùhu-í xii-ndo cuèndá ìⁿ téé ní quide ìⁿ sá ñá túú tàú-dé cada-dé ndécú ndíhi-ndo, te ní quide ndàhú-xi luha iní-í cuèndá sá ñí quide-dé-áⁿ dico nchòhó tnàhá-ndó ñí dándihú-dé luha iní-ndó, te duha càchí-í sá lúhá-ní ñí dándihú-dé iní-ndó cuèndá sá vã cuidó-gá-í ná tnùhu càháⁿ-í.

⁶ Te nàcuáa ní ndatnùhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dé. ⁷ Te vitna tàú-ndó càda cahnu iní-ndó sã ñí quide-dé, te cuáñaha-ndo tnùhu ndee iní xii-dé chi núu ñàhá te vá ñihí ndéé-gã-dé cada-dé sá váha cuèndá sá ndihú iní-dé. ⁸ Te xiãⁿ nùu càháⁿ ndàhú-í nùú-ndó sã cadá tùcu-ndo sá cúú iní-ndó-dé. ⁹ Te ðiu-ni cuèndá iha càháⁿ-í ìⁿ nùú tütú sá sã ní dáquixí-í ndaha-ndo, te ducaⁿ ñí quide-í xító ndèé ñàhá-í xii-ndo nùu ndisa cuíní-ndó càda-ndo nchaa nacuáa càháⁿ-í. ¹⁰ Te ndèda-ni càa ñãyiú na càda cahnu iní-ndó ìⁿ sá quidè-yu, te tnàhá yúhú cada cahnu iní-í sá quidè-yu tucu. Te núu ìó ìⁿ sá xíní ñùhu-xi cada cahnu iní-í te quide cahnu iní-í, te mee Xìtohó Jesucristú nánhá-gã sá dúcáⁿ quide-í, te ducaⁿ quide-í cuèndá sá nchòhó cuu-xi sá

vãha xii-ndo. ¹¹ Te ducaⁿ te sácuihnã vã nihí-xi ná cada ñaha-xi xii-o, chi nchoo sã xiní-ó nãcuáa quíde-xi.

Té Pãblú ndihú iní-dé ndécú-dé ñuu Tróás

¹² Te ní xica-í cuáhã-í ñuu Tróás cuendã yacãⁿ cãháⁿ-í tnúhu sã cãháⁿ nãcuáa naníhí tãhú-ó tnúhu Xítohó Jesucristú, te órè ní quexio-í te ní nihí-í ìⁿ ichi càhnu cãháⁿ-í tnúhu-gã. ¹³ Dico ñã túú ní cùu vãha iní-í chi ñã túú ní naníhí-í té Titú tée ndècu ndihí-o ichi Xítohó Jesucristú, núu xiãⁿ ní quíde ndee iní tnãhã-í ndihí cue ñãyiú ñuu-áⁿ, te ní xica-í cuáhã-í distritú Macèdoniã.

Dãquetihú-ó yucu ñãvãha chi ndècu ndihí-o Xítohó Jesucristú

¹⁴ Te táxãhu xii Yã Ndiõxí chi ducaⁿ-ni sãnu ichi ñaha-gã xii-ndí nãcuáa cunuu-ndí núu yucu ñãvãha chi ndècu ndihí-ndí Xítohó Jesucristú, te mee Yã Ndiõxí sãchìuⁿ ñaha-gã xii-ndí cãháⁿ-ndí tnúhu-gã. Te cada iní-ó sã tnúhu-gã-áⁿ cúu-xí dàtnã ìⁿ yúcú sã ïo vãha sãháⁿ te ta xítenuu dicó-xi ndèni ní cuu cuáhãⁿ. Te ducaⁿ sãtnahã-xi cùu tnúhu-gã chi nchúhú quíde-ndí nãcuáa ta xítenuu ndèni ní cuu cuáhãⁿ. ¹⁵ Te cùu-ndí dàtnã dicó ìⁿ yúcú sã ïo vãha sãháⁿ, te nãcãni cuendã Xítohó Jesucristú núu Yã Ndiõxí, te dicó yúcú-ãⁿ nchítã cuèi núu xíndecu cue ñãyiú sa ní naníhí tãhú, te cuèi núu xíndecu cue ñãyiú ta xíta nihnu cuáhãⁿ. ¹⁶ Te sã cúu-xí cuè ñãyiú ta xíta nihnu cuáhãⁿ-áⁿ, dicó yúcú-ãⁿ

cúu-xí dàtnã ìⁿ sã sãhní ñãha xii-yu, dico sã cúu-xí cuè ñãyiú sa ní naníhí tãhú, dicó yúcú-ãⁿ cúu-xí dàtnã ìⁿ sã ndécã iní-yu, ducaⁿ sãtnahã-xi cùu nchúhú. Te vitna chí cuãha cuendã núu ná cúu ñãyiú sãni iní-ndó ndacu cada nãcuáa nduu tnúhu cãháⁿ-í-a. ¹⁷ Chi nchúhú cãháⁿ-ndí tnúhu Yã Ndiõxí dico ñã túú ndãhú quíde-ndí ndihí tnúhu-gã dàtnã xíquide dava-gã-güedé, chi quíde ndãã-ndí cãháⁿ-ndí tnúhu-gã, te mee-gã ní cachí-gã sã dúcãⁿ càda-ndí te ndèhe-gã sã nchúhú quíde-ndí nãcuáa ní cachí-gã, chi ndècu ndihí-ndí Xítohó Jesucristú.

3

Cuendã ingã núu sã vãha ní cachí Yã Ndiõxí cada-gã ñãyiú

¹ Te cuèi duha cãháⁿ-ndí núu-ndó dico ñã túú xiní ñuhu-xi sã cũñaha-ndí xii-ndo sã cúu-ndí cue tée quíde vãha, te ni ñã túú xiní ñuhu-xi cacanehe-ndí ìⁿ tutú núu cãháⁿ-xi sã cúu-ndí cue tée vãha danèhé ñãhá xii-ndo datná xíquide dava-gã-güedé, te ni ñã túú xiní ñuhu-xi sã nchòhó taxi-ndo ìⁿ tutú núu cãháⁿ-ndó sã nchúhú cúu-ndí cue tée quíde vãha. ² Te ñã túú xiní ñuhu-xi ducaⁿ cada-ndí. Te cùtnuní ndãã iní-ndí sã nchòhó cúu-ndó dàtnã ìⁿ tutú sã ïo vãha cãháⁿ cuendã-ndí. Te ducaⁿ sãtnahã-xi cùu-ndo chi nchãa ñãyiú nihí-yu tnúhu nãcuáa quíde-ndo ndecu-ndo, te xiãⁿ cùtnuní iní-yu sã nchúhú cúu-ndí cue tée quíde vãha. ³ Te nchòhó cúu-ndó

cuendá Xítohá Jesucristú, te cùu-ndo datná tutú-gá te tutú-áⁿ ní táúchíuⁿ-gã xii-ndí ní cadúha-ndí, te mee-ni ndíhi Espíritú Yá Ndiöxí ní ngúndeé tnúhu-áⁿ te ñá díú ndíhi tindá ní ngúndeé. Te ñá díú ìⁿ núú yúú ní ngúndeé chi iní-ndó cùu-xi núú dúcáⁿ ní ngúndeé tnúhu-áⁿ te ducaⁿ sãtnahá-xi cùu-ndo.

4 Te duha cãháⁿ-ndí chi cùtnuní ndáá iní-ndí sá Yá Ndiöxí quidé vãha ñaha-gã xii-ndí, chi ndècu ndíhi-ndí Xítohá Jesucristú. 5 Te nchúhú chi ndàcu-ndí quidé-ndí sá vãha dico ñá díú mèe-ndí ducaⁿ ndàcu-ndí quidé-ndí, chi mee Yá Ndiöxí chindèe ñaha-gã xii-ndí nõu ndàcu-ndí quidé-ndí sá vãha. 6 Te mee Yá Ndiöxí ní quide-gá sá nchúhú ndacu-ndí cunu cuechi-ndí núú-gã cãháⁿ-ndí núú ñáyiu cuendá ingá núú sã vãha ní cachí-gá cada ñaha-gã xií-yu. Te sá vãha ní cachí-gá cada ñaha-gã xií-yu-áⁿ ñã túú ìⁿ-ni cuu-xi ndíhi nchaa tnúhu sá ní xáhaⁿ-gã xii ndí Moisés ní chídó tnùní ndí, te ducaⁿ chi espíritú Yá Ndiöxí néhé chiuⁿ-xi nchaa tnúhu sá cãháⁿ cuendá nchaa sã vãha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiu ndècu ndíhi tnúhu-áⁿ sã cuíta nihnú-yu cuendá nchaa cuéchi-yu, dico cue ñáyiu ndècu ndíhi Espíritú Yá Ndiöxí ñáyiu-áⁿ ndécú ndíhi-yu tnúhu ndee iní sá cãcu nihnú-yu.

7 Te tnúhu sá ní cãháⁿ Yá Ndiöxí ndéé díhna nãcuáa

cada ñáyiu ní ngúndeé-xi ìⁿ núú yúú quèhéⁿ. Te òré ní dátũu ndí Moisés nãcuáa cãháⁿ tnúhu sá ní cãháⁿ Yá Ndiöxí ndéé núú yúú-áⁿ núú cue ñáyiu isràél, te súuní ní tãsaⁿ núú ndí te ñá túú-gã ní cùu cundehé-yu núú ndí, te ducaⁿ-gã ducaⁿ-gã quidé-xi dátãsaⁿ-xi núú ndí ni cùu ñá túú-gã ducaⁿ ni quide-xi. Te tnúhu ndéé núú yúú-áⁿ dándixi túu-xi iní cue ñáyiu sá cuíta nihnú-yu sá cuendá nchaa cuéchi-yu, te ío vãha ní quide-xi cùtnahá ní ngúndecu ndíhi cue ñáyiu isràél tnúhu-áⁿ. 8 Te sá dúcáⁿ ní quide-xi xiáⁿ cùtnùní sá tnúhu cãháⁿ Espíritú Yá Ndiöxí vitna uuⁿ-gã ducaⁿ ïo-gã vãha quide-xi. 9 Te núu ducaⁿ ïo vãha ní quide-xi cùtnahá ní ngúndecu ndíhi cue ñáyiu isràél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uuⁿ-gã ducaⁿ vãha quide-xi vitna ní ngúndecu ndíhi-o tnúhu sá cãháⁿ nãcuáa quide Yá Ndiöxí cuendá sã vã cùndècu-gã cuéchi ñáyiu núú-gã. 10 Te vá cãchí-ó sã cùtnahá ní ngúndecu ndíhi cue ñáyiu isràél tnúhu ndéé núú yúú-áⁿ ïo-gã vãha ní quide-xi, te ñáhá chi uuⁿ-gã vãha quide-xi vitna cuendá tnúhu sá cãháⁿ nãcuáa quide Yá Ndiöxí. 11 Te núu ducaⁿ ïo vãha ní quide-xi cùtnahá ní ngúndecu ndíhi ñáyiu isràél tnúhu sá ñã túú ní cùdí, te uuⁿ-gã ducaⁿ ïo vãha quide-xi vitna ní ngúndecu ndíhi-o tnúhu sá vã ndíhi nihnu

tnahí-gá.

12 Te cùtnuní iní-ndí sá vǎ ndíhí nihnu sá dúcáⁿ ío váha quíde-xi, núu xǎⁿ ío vii ío váha cùu iní-ndí càháⁿ-ndí tnúhu sá nǐ ngúndecu ndíhi-o.

13 Te ñá túú quíde-ndí dàtná ní xóo cada ndíi Moisés, chi ndíi-áⁿ nǐ xóo dàdáhu ndíi núú ndíi òré dátásaⁿ-xi núú ndíi cuèndá sá vǎ quíni cue ñáiyu isràél òré ñá túú-gǎ dátásaⁿ-xi núú ndíi. 14 Te cue ñáiyu isràél ñá túú ní tècú tnùní váha-yu nàcuáa ní xóo danèhé ñáhá ndíi Moisés xií-yu, te cuèi ndéé vitna ñá túú tècú tnùní-yu òré dácuahá-yu tnúhu sá nǐ cáháⁿ Yǎ Ndiòxí ndéé díhna nàcuáa cada-gá, te cada iní-ó sǎ dàtná sá nǐ xídáhu núú ndíi Moisés yídáhu núú-yu cuèndá sá vǎ cùtnùní núú-yu cundèhé-yu te tecú tnùní-yu, dico núu tnahá tnúhu-yu ndíhi Xítohó Jesucristú te tecú tnùní-yu.

15 Te cuèi ndéé vitna òré dácuahá-yu nchaa tnúhu sá nǐ chídó tnùní ndíi Moisés nchaa núú tütú ndíi, te cada iní-ó sǎ dàtná sá nǐ xídáhu núú ndíi yídáhu núú-yu chi ñá túú tècú tnùní-yu. 16 Dico cue ñáiyu na tùha ñaha xii Xítohó Jesucristú te tècú tnùní-yu tnúhu-gá.

17 Te Xítohó Jesucristú ìⁿ-ni cùu-gá ndíhi Espiritú Yǎ Ndiòxí, te nchaa ñáiyu ndècu ndíhi Espiritú-gá ñá túú-gǎ táxí tnùní ñáhá nǐ ìⁿ sá ñá túú váha xií-yu. 18 Te dàtná cúú ìⁿ yutátá sǎ dánèhé núú ñáhá-xí xii ñáiyu ìⁿ sá váha, ducaⁿ sǎtnahá-xí cùu-o chi quíde-o nacuáa cáháⁿ ñáiyu sá ío càhnu cuu Xítohó

Jesucristú, te ducaⁿ ùuⁿ-gá uuⁿ-gá tá cundáá-ó ndècu-o ichi-gá dàtná quíde mèe-gá quíde ndáá-gá. Te Espiritú-gá quíde-xí dùcaⁿ ta cundáá-ó nùú-gǎ cuáháⁿ.

4

1 Te mee Yǎ Ndiòxí ní cundáhú iní ñáhá-gǎ xii-ndí ní taxi-gá chiuⁿ quíde-ndí càháⁿ-ndí tnúhu-gá, núu xǎⁿ ñá túú tnahí nàtúhú iní-ndí càháⁿ-ndí tnúhu-gá.

2 Te nchúhú dàquee tíhú-ndí nchaandi túhú sá ñá túú váha quíde dayuhu ñáiyu, chi nchaa xǎⁿ cúú-xí ìⁿ sácáⁿ-núú sǎ cúú-xí-yu, te nchúhú ñá túú sàni iní-ndí dandáhú-ndí ñáiyu te ni ñá túú sàni iní-ndí dama-ndí nàcuáa càháⁿ tnúhu Yǎ Ndiòxí, chi càháⁿ ndáá-ndí nàcuáa tàú-xi cáháⁿ-ndí, te mee Yǎ Ndiòxí náhá-gǎ nàcuáa ndùu tnúhu càháⁿ-ndí núú ñáiyu, te ñáiyu-áⁿ cùtnùní iní-yu sá nchúhú càháⁿ váha-ndí.

3 Te cue ñáiyu ñá túú tècú tnùní nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núú-yu, ñáiyu-áⁿ cúú-yu ñáiyu ta xíta nihnu cuáháⁿ.

4 Te cue ñáiyu-áⁿ cúú-yu ñáiyu ío sàá iní-xi chi ñá túú cuíni-yu quíndáá iní-yu tnúhu Xítohó Jesucristú, te xǎⁿ nùu sácuíhná cúnùu-xi núú-yu te nihí-xi nàcuáa quíde-xi dadáhu ndodo iní ñáhá-xí xii-yu cuèndá sá vǎ tècú tnùní-yu tnúhu sá càháⁿ nàcuáa naníhí tàhú-yu, te tnúhu-áⁿ cúú-xí tnúhu sá ío váha chi càháⁿ-xi

sá ïo càhnu cuu Xítohá Jesucristú, te cùu-gá dàtná mée Tātá-gã Dútú Ndiõxí. ⁵ Te nchúhú ñá túú càháⁿ-ndí cuendá sá cúú-xí mée-ndí núú-ndó chi càháⁿ-ndí cuendá Xítohá Jesucristú, te càchí-ndí xii-ndo sã díú-gã cúú-gã Yaá ío cùnuu, te càchí-ndí xii-ndo sã mée-ndí cúú-ndí òcò-ni cue tée xínu cuechi sá cúú-xí-ndó, te ducaⁿ quide-ndí nàcuáa cuu vii cuu váha iní Xítohá Jesucristú. ⁶ Te Yá Ndiõxí Yaá ní dáyèhé ndéé cútñahá nee ñuyíú ní cùu, Yaá-áⁿ ñí cachí-gá sá Xítohá Jesucristú cada-gá nàcuáa tecú tnùní-ó sã ïo càhnu cuu mee Yá Ndiõxí. Te sá dúcáⁿ ñí quide-gá te cada iní-ó sã dàtná tnúhu sá ñí dáyèhé-gá iní-ó.

Ío quindáa iní-ó Yá Ndiõxí

⁷ Te nchúhú ndécú ndíhi-ndí tnúhu Xítohá Jesucristú, te tnúhu-gá cúú-xí dàtná ñⁿ sá ïo váha ñúhu ñⁿ xití quidi ñuhu, te nchúhú cúú-ndí dàtná quidi-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñahá, te ducaⁿ cùu nàcuáa cutnùní sá mée Yá Ndiõxí quide-gá nchaa sá váha te ñá díú mée-ndí. ⁸ Te cuèi ío ndòho-ndí ndécú-ndí dico ñíhi-ndí nàcuáa quide-ndí tá yãha-ndí nchaa tnúndòho-áⁿ cuáháⁿ, cuèi áma sa ndètu vii-nã quehdé iní-ndí sá vã ndácú-ndí yãha-ndí nchaa tnúndòho-áⁿ, dico ndàcu-ndí yãha-ndí. ⁹ Te cuèi nànducu

ñaha ñáyiu cuení-yu ná cada ñahá-yu xii-ndí dico ñá túú dàña ñaha Yá Ndiõxí xii-ndí, te cuèi cànihá-yu xii-ndí dico cãcu-ndí ñá túú sãhni ñahá-yu. ¹⁰ Te ndèni ní cuu cuáháⁿ-ndí xícá cùu-ndí, te cãcu cãcu cahni ñahá-yu xii-ndí dàtná ní quidé-yu Xítohá Jesucristú, te ducaⁿ yãha-ndí cuendá cutnùní sá ndécú tũu Xítohá Jesucristú andíu te chĩndee ñaha-gá xii-ndí. ¹¹ Te nchúhú nini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuendá Xítohá Jesucristú, te ducaⁿ yãha-ndí ndécú-ndí cuendá cutnùní sá Xítohá Jesucristú ndécú ndíhi ñaha-gá xii-ndí cuèi vá cúdíi yiqui cùñú-ndí cundecu-xi. ¹² Te sá dúcáⁿ cãcu cãcu cahni ñaha ñáyiu xii-ndí xiãⁿ nchòhó uuⁿ-gá tá ñíhi ndéé-ndó cuáháⁿ ndécú-ndó ìchi Xítohá Jesucristú. ¹³ Te ñⁿ tée ní xĩndecu ndéé sanaha ñí chídó tnùní-dé núú tütú Yá Ndiõxí núú càchí-xi: “Yúhú ní sãndáá iní-í Yá Ndiõxí ñuu xiãⁿ ní càháⁿ-í”, duha ní cachí téé-áⁿ. Te dàtná-ni ní sani iní téé-áⁿ ñí càháⁿ-dé te diu-ni ducaⁿ sãni iní nchúhú tucu núú xiãⁿ càchí-ndí: “Sãndáá iní-ndí Yá Ndiõxí ñuu xiãⁿ càháⁿ-ndí”, duha càchí-ndí. ¹⁴ Te cùtnuní iní-ndí sá ñuu na cùu-ndí te Yá Ndiõxí dandòto ñaha-gá xii-ndí dàtná ní dándótó-gã Xítohá Jesucristú, te tnàhá nchòhó ducaⁿ càda ñaha-gá xii-ndo, te dàvã-áⁿ candeca ñaha-gá xii-o quíhíⁿ

nucúndecu-o núú-gă. ¹⁵ Te nchúhú nándi cùu sá tá yăha-ndí véxi cuendá nchòhó ngúndecu váha-ndo, te ducaⁿ cùta cáyá-gá ñáyiú ngúndecu váha sá xíí Yă Ndiôxí, te diu-ni ducaⁿ cùta cuu vai-gá ñáyiú ndacáⁿ táhũ-yu núú-gă te cachí-yu sá ïo cãhnu cuu-gá.

¹⁶ Te xíăⁿ núu nchúhú ñá túú tnàhí nàtúhú iní-ndí ndécú-ndí ichi Xítohó Jesu-crístú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xí cuáháⁿ. ¹⁷ Te nchaa sá ndóhó-ndí ñuyíú-a ñá túú cãchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yă Ndiôxí ïo váha cada ñaha-gă xii-ndí nduu na sáa-ndí núú ndécú-gă, te diu-ni ducaⁿ càda ñaha-gá xii-ndí ni caa ni quíhíⁿ. ¹⁸ Te nchúhú ñá túú nchícúⁿ nihnu-ndí sá túu ndèhe-ndí ïó ñuyíú-a, chi nchícúⁿ nihnu-ndí sá vátá quíní-gá-ndí ndécú àndiú, te ducaⁿ quide-ndí chi nchaa sá túu ndèhe-ndí ïó ñuyíú-a vá cúdĩ-xi cundecu-xi, te nchaa sá ñà túú túu ndècu andiú xíăⁿ cudĩ-xi cundecu-xi ni caa ni quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñà túú cúdĩ-xi, te ducaⁿ sãtnahá-xi cùu yiqui cùñú-ó chi vá cúdĩ-xi, te na sáa nduu vã cùndècu-gá-ó ndihi

yiqui cùñú-ó, te Yă Ndiôxí taxi-gá ìⁿ yiqui cùñú sáa sã cúú-xí-ó, te xíăⁿ cúú-xí dàtná ìⁿ vehe sá ñà túú ní càdúha cue ñáyiú ñuyíú-a, chi mee Yă Ndiôxí ní cadúha-gá vehe-áⁿ te vehe-áⁿ cudĩ-xi cundecu-xi ni caa ni quíhíⁿ andiú. Te ducaⁿ sãtnahá-xi cùu yiqui cùñú sá táxí Yă Ndiôxí xii-o chi cudĩ-xi cundecu-xi ni caa ni quíhíⁿ. ² Te nchúhú ndècu ndihi-gá-ndí yiqui cùñú-ndí sá ndécú ndihi-ndí vitna te sama cuíní-ndí sá ïo ndihi taxi Yă Ndiôxí yiqui cùñú sáa cùndecu ndihi-ndí. ³ Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáa-áⁿ xii-ndí. ⁴ Te nini ndècu-ndí ndihi yiqui cùñú-ndí vitna ïo sàni iní-ndí te ndihú iní-ndí, dico ñá díú sã dúhá quide-ndí te ñá túú-gă tnàhá iní-ndí cundecu-ndí ndihi yiqui cùñú-ndí, chi cuíní-ndí sá Yă Ndiôxí ïo ndihi taxi-gá yiqui cùñú sáa nduu táhú-ndí, chi xíăⁿ cudĩ-xi ni caa ni quíhíⁿ te yiqui cùñú-ndí sá tá ndihi nihnu cuáháⁿ-a vá cúdĩ-xi cundecu-xi. ⁵ Te ducaⁿ tnàhí ní cachí Yă Ndiôxí cunduu sá dúcáⁿ nduu táhú-ó yiqui cùñú sáa-áⁿ, te ní taxi-gá Espíritú-gá ní ngúndecu ndihi-o cuendá cutnùní iní-ó sã ndáá taxi-gá yiqui cùñú sáa-áⁿ nduu táhú-ó.

⁶ Te xíăⁿ núu nchúhú nihí ndéé-ndí ndécú-ndí, te cùtnuní iní-ndí sá nini ndècu-ndí ndihi yiqui cùñú-ndí sá ndécú ndihi-ndí vitna te vátá sáa-gá-ndí

cundecu-ndí mei nũú ndécú Xítohó Jesucristú. ⁷ Te ducaⁿ cùtnuní iní-ndí chi sàndáá iní-ndí Yă Ndiõxí ndécú-ndí ñuyíu-a cuèi ñá túú xìní-ndí-gá. ⁸ Te ío váha cùu iní-ndí ndécú-ndí, te sàni iní-ndí sá vâha-gá sá nũu vá cùndècu-gá-ndí ndihi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei nũú ndécú Xítohó Jesucristú. ⁹ Te ío ndùcu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíu-a, te diu-ni ducaⁿ càda-ndí cuèi òré vá cùndècu-gá-ndí. ¹⁰ Te dacuitíi sã ncháá-ó cùndecu-o núú Xítohó Jesucristú ìⁿ nduu, te dàvá-áⁿ mee-gă cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gă nduu táhú-ó.

Nàcuáa ní cuu ní ngúndecu váha-o ndìhi Yă Ndiõxí

¹¹ Te nchúhú quíyùhú iní-ndí nàcuáa cada Xítohó Jesucristú, núu xiăⁿ càháⁿ-ndí tnúhu-gá núú ñăyiu cuendá xínu iní-yu tuha ñàhá-yu xii-gá. Te mee Yă Ndiõxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. ¹² Te sá dúhá càháⁿ-ndí te vá cání iní-ndó sã nchúhú càháⁿ váha-ndí cuendá-ndí

nàcuáa nchòhó cuu váha iní ñàhá-gă-ndó xii-ndí te ñàhá, chi duha càháⁿ-ndí cuendá sá nchòhó níhí-ndó tnúhu cáháⁿ váha-gă-ndó cuendá-ndí núú ñăyiu. Te ducaⁿ ñíhí-ndó tnúhu cúñaha-ndo xii cue ñăyiu quide nínu mee-xi, chi cue ñăyiu-áⁿ ñá túú quide cuendá-yu nása ndècu iní-yu. ¹³ Te núu nchòhó sání iní-ndó sã lùcú-ndí cuendá nàcuáa quide-ndí ndécú-ndí te cùu-xi cuendá Yă Ndiõxí, àdi núu sàni iní-ndó sã ñá túú lùcú-ndí cuendá nàcuáa quide-ndí ndécú-ndí te cùu-xi sá vâha sá cúú-xí-ndó. ¹⁴ Te quide-ndí nàcuáa cuiní Xítohó Jesucristú chi cùtnuní iní-ndí sá ìo cùu iní-gá nchaa ñăyiu, te ducaⁿ xìní ndáá-ndí sá ñí xíhí-gá cuendá nchaa-yu, te xiăⁿ núu cada iní-ó sã dàtná tnúhu sá ncháá ñăyiu ní xíhí-yu ndihi-gá. ¹⁵ Te ducaⁿ ñí xíhí Xítohó Jesucristú cuendá nchaa ñăyiu chi cuiní-gá sá ncháá-yu cundecú-yu cadá-yu nàcuáa cuiní mée-gă te vá cadă-yu nàcuáa cuiní mée-yu, chi mee-gă ní xíhí-gá te ní ndoto-gá cuendá cuu-xi sá vâha sá cúú-xí-yu. ¹⁶ Te xiăⁿ núu nchúhú ñá túú-gă ná sání iní-ndí cuendá tnàha ñăyiu-ndí núu nàndíhi-yu àdi ñá túú nàndíhi-yu dàtná ní xóo cani iní-ndí cútnàhá ní xindecu-ndí ichi cuèhé ichi duha, te dàvá-áⁿ ñí xóo cani iní-ndí cuendá Xítohó Jesucristú dàtná sání iní cue ñăyiu ndècu ichi cuèhé ichi duha vitna. ¹⁷ Te nchaa

nchoo ñáyiú ní tnahá tnúhu ndihí Xítohó Jesucristú ní nduu-o dàtná ìⁿ ñáyiú saa, te ducaⁿ chi ñá túú-gã quidé-ó dàtná ní xóo cada-o cùtnàhá ní xíndecu-o ìchi cuehé ìchi duha, chi ní ngüíta-o quide-o mee-ná sá vãha te nchaa xiãⁿ cúú-xí sá sáá sá cúú-xí-ó chí vátá quíní-gá-ó càda-o.

18 Te ducaⁿ quide-o ndecu-o chi mee Yã Ndiöxí quidé-gã sá dúcáⁿ càda-o cundecu-o. Te Xítohó Jesucristú ní quide-gá ní ngúndecu váha-o ndihí Yã Ndiöxí vitna, te ducaⁿ chi mee Yã Ndiöxí ducaⁿ tnàhí ní cachí-gá cunduu, te ñu-ní mee Yã Ndiöxí ní taxi-gá chiúⁿ quide-ndí càháⁿ-ndí tnúhu-gá nàcuáa ngúndecu váha cue ñáyiú ndihí-gá. 19 Te ducaⁿ chí mee-gã ní cachí-gá sá Xítohó Jesucristú cada-gá nàcuáa nucúndecu váha nchaa nchoo cue ñáyiú ndecu ñuyíú-a ndihí Yã Ndiöxí. Te nchaa ñáyiú ní tuha ñaha xii-gá ñá túú-gã sání ìní-gá sá ñáyiú-áⁿ nacháhu-yu cuéchi-yu núú-gã. Te mee Yã Ndiöxí ní taxi-gá chiúⁿ quide-ndí càháⁿ-ndí tnúhu-gá núú ñáyiú nàcuáa ngúndecu ndihí ñaha váha-yu xii-gá. 20 Te Xítohó Jesucristú ní cachí-gá sá nchùhú cáháⁿ-ndí tnúhu-gá núú nchàa ñáyiú, te sá dúhá quide-ndí càháⁿ-ndí tnúhu-gá te quide-ndí núú Yã Ndiöxí càháⁿ-ndí yuhu-gá, te xiãⁿ nũy càháⁿ ndàhú-ndí núú-ndó sá tnàhá tnúhu-ndo ndihí Yã Ndiöxí cuendá cundecu váha-ndo ndihí-gá,

te duha càháⁿ-ndí chi ducaⁿ càchí Xítohó Jesucristú cada-ndí. 21 Te Xítohó Jesucristú cúú-gã Yaá ñá túú tnàhí cuéchi-xi, dico Yã Ndiöxí ní quide ñaha-gã xii-gá dàtná ìⁿ ñáyiú ndecu cuéchi-xi, te ducaⁿ chi Xítohó Jesucristú ní xido-gá cuéchi nchaa nchoo ñáyiú ñuyíú-a, te ducaⁿ ní xido Xítohó Jesucristú nchaa cuéchi-o cuendá sá nũu na tnàhá tnúhu-o ndihí-gá te cudíu-o núú Yã Ndiöxí, te ducaⁿ ní cuu chi mee Yã Ndiöxí ducaⁿ ní cachí-gá cunduu.

6

1 Te nchoo ìⁿ-ni cùu-o quide chiúⁿ-o cuendá Yã Ndiöxí nũu xiãⁿ càháⁿ ndàhú-ndí núú-ndó sá vã dícó-ni ducaⁿ cùndedóho-ndo tnúhu Yã Ndiöxí, chi cada-ndo nàcuáa na chindee ñaha-ni-gá. 2 Chi mee-gã càchí-gá ìⁿ xichi núú tütú-gá núú cachí-xi:

Sáá nduu te cundàhú ìní ñáhà-í xii-ndo chindee ñaha-í cuendá naníhí tãhú-ndó,

te ní sáá nduu tàú-xi sá cundàhú ìní ñáhà-í xii-ndo chindee ñaha-í cuendá naníhí tãhú-ndó, núú xiãⁿ ní xíndedóho-í tnúhu ní cáháⁿ-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundàhú ìní ñáhà Yã Ndiöxí chindee ñaha-gá, te cùu-xi nduu naníhí tãhú-ó.

3 Te nchúhú ñá túú quide-ndí ìⁿ sá ñá túú tàú-ndí cada-ndí sá cúú-xí

ñáyiú, chi cuèni-ndí sá vǎ cǎháⁿ cuèhé-yu cuèndá chiúⁿ quide-ndí. ⁴ Te nchaá sá quidé-ndí cúú-xí nǎcuáa cutnùní iní cue ñáyiú sá nchúhú xínú cuèchi-ndí núú Yǎ Ndiǒxí, te ío quide cahnu iní-ndí cuèndá nchaá sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaá sá tá yǎha-ndí véxi. ⁵ Te duha ta yǎha-ndí véxi, núú cánha ñáyiú xii-ndí, núú chíhí ñáhá-yu vecaá, núú cuáá ndeé ñáhá ñáyiú xii-ndí xícuèhé ñáhǎ-yu, te ío ndòho-ndí quidé-ndí chiúⁿ Yǎ Ndiǒxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí. ⁶ Te quide ndáá-ndí ndécú-ndí, te cutnùní váha iní-ndí nǎcuáa cǎháⁿ tnúhu Yǎ Ndiǒxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaá sá váha nǎcuáa chindee ñaha Espíritú Yǎ Ndiǒxí xii-ndí, te ío ndisa iní-ndí cúú iní-ndí cue tnàha ñáyiú-ndí. ⁷ Te dànehé-ndí ñáyiú mee-ni tnúhu ndáá, te nchaá chiúⁿ quide-ndí te quide-ndí nǎcuáa chindee ñaha Yǎ Ndiǒxí xii-ndí, te cuèndá sá quidé ndáá-ndí ndécú-ndí núú xǎⁿ ñihí ndeé-ndí dáquèe tíhú-ndí nchaá sá cuèhé sá dúhá. ⁸ Te dava ñáyiú quide nínu ñáhá-yu xii-ndí, te davá-yu

tnúhu cuèhé tnúhu duha cǎháⁿ-yu xǎhǎⁿ-yu xii-ndí, te davá-yu xǎcǎháⁿ váha-yu cuèndá-ndí te davá-yu xǎcǎháⁿ cuèhé-yu, te davá-yu cǎchí-yu sá dándàhú-ndí ñáyiú dico ñá ndáá chi cǎháⁿ ndáá-ndí. ⁹ Te davá-yu cǎchí-yu sá ñà túú xini-yu ná ñáyiú cùu-ndí, te davá-yu cǎchí-yu sá xini-yu yoo cùu-ndí, te davá-yu cuèni-yu cahni ñáhá-yu xii-ndí dico vátá cǎhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yǎ Ndiǒxí, te cuèi ndòho-ndí dico ñá túú cùu-xi sá cùu-ndí. ¹⁰ Te cuèi ndíhú iní-ndí dico ñá túú dàña ndeé-ndí sá cúdí iní-ndí, te cùu-ndí cue téé ndàhú dico sànu ichi-ndí vǎi ñáyiú ichi Yǎ Ndiǒxí cuèndá ngúndecu váha-yu sá cuèndá-gá, te cuèi ñá túú ñá ndécú ndíhi-ndí dico ñá túú ñá cúmání xii-ndí. ¹¹ Te nchòhó ñáyiú ndècu ndíhi-í ichi Xítóhó Jesucristú ndécú ñúú Còrintú ío cùu iní ñáhá-ndí xii-ndo, te ñi yùhu ñi iní-ndí cǎháⁿ-ndí nchaá tnúhu cǎháⁿ-ndí sá cúú-xí-ndó. ¹² Te nchúhú chi ñi yùhu ñi iní-ndí cúú iní ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. ¹³ Te yúhú cǎháⁿ ndàhú-í núú-ndó dàtná quidé ñⁿ téé cùu tátá òré cǎháⁿ ndíhi-dé cue déhe-dé sá ñi yuhu ñi iní-ndó cùu iní ñáhá-ndó xii-ndí dàtná quidé mèe-ndí cúú iní ñáhá-ndí xii-ndo.

Nchoo cùu-o datná ñⁿ vehe

Yá Ndiõxí

14 Te cue ñáyiu ñá túú sàndáá iní tnúhu Xítóhó Jesucristú, te vá cúú ìⁿnuu-ndo ndihí-yu cada-ndo dàtná xíquidé-yu, chi ìⁿ cuu nchaa sá vǎha te ìⁿ cuu nchaa sá cuèhé sá dúhá, te ñúmí nchĩanchii ndihí niú chi ñá túú ìⁿ-ni cuu-xi. Te ducaⁿ sǎtnahá-xi cùu nchaa sá vǎha ndihí nchaa sá cuèhé sá dúhá chi ñá túú ìⁿ-ni cuu-xi. 15 Te ìⁿ-ni ducaⁿ ñá túú ìⁿ-ni cuu Xítóhó Jesucristú ndihí sácuíhná, te ìⁿ-ni ducaⁿ ñá túú ìⁿ-ni cuu ñáyiu sàndáá iní ñáhá xii Xítóhó Jesucristú ndihí ñáyiu ñá túú sàndáá iní ñáhá xii-gá. 16 Te ìⁿ-ni ducaⁿ sǎtnahá tucu-xi cùu vehe Yá Ndiõxí ndihí nchaa sá cǎchí ñáyiu cùu ndiõxí ní cadúha cue téé ñuyú-a, chi vá cúú quĩhi ni ìⁿ xiǎⁿ xití vehe-gá. Te nchoo cùu-o datná vehe Yá Ndiõxí Yaá ndécú tũu andiu, chi mee-gá cǎchí-gá núú tütú-gá núú cǎchí-xi:

Yúhú vá cǔmǎní cundecu-í ndihí-yu nděni ní cuu na cùndecú-yu, te ìⁿ-ni yúhú cuu-í Ndiõxí-yu,

te mèé-yu cuú-yu ñáyiu cùu cuendá-í.

Duha cǎchí-gá núú tütú-gá. 17 Te xiǎⁿ nũu cǎchí tucu-gá ingá xichi núú tütú-gá núú cǎchí-xi:

Chí tá quèe tnuú nchaa ñáyiu ñá túú sàndáá iní ñáhá xii-í,

te vá cǎní ìⁿ-ndó càda-ndo ni ìⁿ sá cuèhé sá dúhá,

te ducaⁿ te queheⁿ cuendá ñáhà-í xii-ndo,

18 te yúhú cuu-í Tǎtá-ndó, te nchòhó cuu-ndo cuè déhe ducuⁿ-í, ndihí cue déhe yoco-í,

duha cǎháⁿ yúhú Yaá ío cǎhnu cuu.

Duha cǎchí-gá núú tütú-gá.

7

1 Te sá dúcáⁿ ío vǎha cǎháⁿ Yá Ndiõxí sá cúú-xi-ó nũu xiǎⁿ cǎháⁿ-í dóho nchòhó ñáyiu ío cùu iní-í sá dùuⁿ duuⁿ dañà-o nchaa sá cuèhé sá dúhá, chi nchaa xiǎⁿ ñá túú cùu-xi sá vǎha sá cúú-xi ìⁿ-ó ndihí yiqui cuñú-ó, te cada-o nǎcuáa tǎu-xi cunduú nǎcuáa cundáá-ó nũu Yá Ndiõxí, te cada-o sǎ néhé-ó sǎ yíñũhu núú-gá.

Cue ñáyiu ñuú Còrintú quidé vǎha-yu

2 Te ni yũhu ni iní-ndó chì cúú ìⁿ ñáhá xii-ndí, chi nchúhú vá yõo ìⁿ quide úhú iní-ndí, te ni vǎ yõo ìⁿ dàcuíta nihnu-ndí, te ni vǎ yõo ìⁿ dǎndahú-ndí. 3 Te sá dúhá cǎháⁿ-í te vá cǎní ìⁿ-ndó sǎ ìⁿ cuéchi dàcaa-í díquí-ndó, chi dàtná sa ní cǎchí-í xii-ndo sǎ yúhú ío cùu iní ñáhà-í xii-ndo, te cuèi vitna ndècu-gá-ó ñuyú-a àdi cuèi na cùú-ó dico ìⁿ-ni ducaⁿ cùu iní ñáhà-í xii-ndo. 4 Te yúhú ío vǎha sǎni iní-í cuendá-ndó, te ducaⁿ ío vǎha cǎháⁿ-í cuendá-ndó, te ío ndècu ndihí-í tnúhu ndee ìⁿ cuendá-ndó, te ío cùdíí ìⁿ-í sá cuendá-ndó cuèi nǎndi ndòho-í ndihí dava-gá-güedé ndécú-ndí.

5 Te nchúhú cǔtnahá ní sáhàⁿ-ndí distritú Macèdoniá, te ñá túú tnàhí ni ndètátú-ndí

cuendá nchaa sá nǐ yáhandi chi ío ní ndoho-ndí cuendá nchaa sá nǐ quidé-yu, chi ío ní cuándéé ñáhã-yu xii-ndí, te ío ní sani iní-ndí nǔu nása-gá yáha-ndí ní cùu. ⁶ Dico Yá Ndiõxí ní taxi-gá tnúhu ndee iní xii-ndí òré ní quexìo té Titú núú ndécú-ndí, te ñá dǐú-ní sǎ cuendá ní quexìo-dé chi ní níhí tucu-ndí tnúhu ndee iní cuendá ní caní-dé cuendú núú-ndí sá nchòhó ní sãñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuíní-ndó cǎháⁿ-í ndihí ñaha-ndo xii-ndí, te ní cachí tnúhu tucu-dé xii-ndí sá nchòhó ío ndihú iní-ndó cuendá nàcuáa cùu ndecu-ndo ní cuu, ndihí cuendá sá ïo sàni iní-ndó cuendá-í, te sá dúcáⁿ ndùu cuendú ní caní-dé núú-ndí nǔu xiǎⁿ ío ní cudíí iní-í.

⁸ Te nchòhó ní ndihú iní-ndó cuendá tnúhu cǎháⁿ-í núú tutú sá ní dáquixì-í ndaha-ndo, te òré ní níhí-í tnúhu sá ndihú iní-ndó te tnaa-ní ní ndixi cuéchi iní-í sá dúcáⁿ nǐ quide-í te dǎtnùnì ñá túú-gǎ ní ndixi cuéchi iní-í. ⁹ Te vitna ní ndihú iní-ndó, te xiǎⁿ ní quide-xi ní ndixi cuéchi iní-ndó sǎ ñá túú quide váha-ndo ndècu-ndo ní cuu, te ní cudíí iní-í dico ñá dǐú cuendá sá ní ndihú iní-ndó nǐ cudíí iní-í chi cuendá sá ní ndixi cuéchi iní-ndó, te ní

ndihú iní-ndó nàcuáa ní cuu váha iní Yá Ndiõxí, te xiǎⁿ nǔu ní cuu-xi ïⁿ sá váha sá cúu-xí-ndó cuendá tnúhu ní cǎháⁿ-í te ñá túú ní cùu-xi ïⁿ sá cuéhé sá cúu-xí-ndó. ¹⁰ Te nchoo nǔu na ndihú iní-ó nàcuáa cuu váha iní Yá Ndiõxí, te ndixi cuéchi iní-ó te núu ñá túú quide váha-o ndècu-o, te sá dúcáⁿ quide-o te nàníhí tàhú-ó, te vá ndihú iní-ó sǎ dúcáⁿ nǐ quide-o, te dava ñáiyu xĩndecu ichi cuéhé ichi duha ndihú iní-yu dico ñá túú ndixi cuéchi iní-yu cuendá nchaa sá ñá túú váha quidé-yu, te sá dúcáⁿ quidé-yu te cuíta nihnú-yu. ¹¹ Te sá dúcáⁿ ní ndihú iní-ndó nàcuáa ní cuu váha iní Yá Ndiõxí, te xiǎⁿ nǔu ndècu ndee-ndo quide-ndo nchaa nacuáa tàú-xi cundu, te vitna ní yùhu ní iní-ndó cǎháⁿ-ndó sǎ quidé váha-ndo, te ío cùdèéⁿ-ndó núú méé-ndó sǎ ñá túú quide váha-ndo ndècu-ndo ní cuu, te yùhú-ndó ndècu-ndo cuendá sá ñá túú quide váha-ndo ní cùu, te ío ní xúhuⁿ iní ñáhá-ndó xii-í, te ní ndúcú ndéé-ndó ní quide ndáá-ndó cuendá té ndècuéchi ndècu ndihí-ndo, te sá dúcáⁿ nǐ quide-ndo te xiǎⁿ ní cutnùnì sá méé-ndó ñá túú cuéchi-ndo. ¹² Te ní cadúha-í tutú ní dáquixì-í ndaha-ndo, te ní quide-ndo nàcuáa ní cǎháⁿ-í, te sá dúcáⁿ nǐ quide-ndo xiǎⁿ ní cutnùnì iní-ndó sǎ ïo cùu iní ñáhá-ndó xii-í. Te Yá Ndiõxí náhá-gǎ sá dǐú cuendá xiǎⁿ ní dáquixì-í tutú ndaha-ndo, te ñá dǐú-ní cuendá sá sání iní-í cuendá té

ndècuéchi ndècu ndihi-ndo, te ni ñà díú-ní cuendá ñáyiú ní dándihú té ndècuéchi-áⁿ iní-xí ní càdúha-í tutú ní dáquíxí-í ndaha-ndo. ¹³ Te cuendá sá quidé vâha-ndo ndècu-ndo xiãⁿ cúu-xí tnúhu ndee iní ndécú ndihi-ndí.

Dico ñá díú-ní xiãⁿ chi tnàhá ío cùdúú iní-ndí cuendá sá ío cùdúú iní té Titú, te ducaⁿ cùdúú iní-dé chi nchòhó ní sáñaha-ndo tnúhu ndee iní xii-dé. ¹⁴ Te yúhú ñá túú cùcahaⁿ núu-í sá ní cáháⁿ vâha-í cuendá-ndó núú tē Titú cùtnàhá vátá quíxí-gã-dé núú ndécú-ndó, chi ní cutnùní iní-dé sá ndàá cáháⁿ vâha-í nàcuáa quide-ndo datná cúu-xí sã ndàá nchaa tnúhu dàcuaha ñaha-í xii-ndo. ¹⁵ Te vitna ío-gá vâha cùu iní té Titú cuendá-ndó, chi ndàcu iní-dé sá ncháá-ndó ío vâha ní tnú-ndo ncháa tnúhu ní cáháⁿ-dé núú-ndó, te ndàcu tucu iní-dé sá ní queheⁿ cuendá vâha-ndo-dé, te ní dátúu-ndo núú-dé sá ío ní quiyùhú iní-ndó sã vã ndácú-ndó càda-ndo nchaa nacuáa tàú-xi cunduu. ¹⁶ Te ío cùdúú iní-í cuendá-ndó chi cùtnùní ndáá iní-í sá ñà túú dàña ndeé-ndó quide-ndo nchaa nacuáa tàú-xi cunduu.

8

Ío vâha cuu iní-ó chindee tnaha-o

¹ Te nchòhó ñáyiú ndècu ndihi-ndí ichi Xítohó Jesucristú càchí tnúhu-ndí xii-ndo nàcuáa quide ñaha Yã Ndiõxí xii cue ñáyiú xíndecu ichi-gá ndécú distritú Macèdoniá, chi ío chindee ñaha-gá xií-yu cuendá sá quidé vâha-yu

ndécú-yu. ² Te cuéi ndòho vihi-yu ndécú-yu dico ío-ni cùdúú iní-yu, te cuendá xiãⁿ núu ní yùhu ní iní-yu ní sacáⁿ tnáhã-yu díhúⁿ sã cúu-xí tnàha ñáyiú-yu, te ñá túú tnàhí ní xínduu dí-yu cuéi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yica iní-yu ní sacáⁿ tnáhã-gã-yu, te yúhú càchí tnúhu ndáá-í xii-ndo sã ní yuhu ní iní-yu ducaⁿ ní quidé-yu. ⁴ Te ío ní cáháⁿ ndàhú-yu núú-ndí cuendá sá cuãha-ndí tnúhu sá tnàhá-yu chindéé-yu dava-gá cue ñáyiú cùu cuendá Yã Ndiõxí. ⁵ Te ñá díú-ní nàcuáa ní sani iní-ndí ní quidé-yu, chi ní xidó-gã-yu ní quide vâha-yu, te ducaⁿ chi mèé-yu ní sani iní-yu sá cáda-yu nchaa nàcuáa cuení Yã Ndiõxí, te dàtnùní ducaⁿ te ní cachí-yu sá cúu càda-yu nchaa nàcuáa na cùñaha-ndí xií-yu. Te ducaⁿ ní quidé-yu chi ducaⁿ ní cuení mèé Yã Ndiõxí cunduu. ⁶ Te sá dúcáⁿ ní quide ñáyiú-áⁿ núu xiãⁿ cáháⁿ ndàhú-ndí núú tē Titú sá quíxí tucu-dé núú ndécú-ndó cuendá dàxínu cava-dé chiúⁿ sá sã ní ngúita-dé quidé-dé dátacá-dé díhúⁿ sã sã ní ngúita-ndo sàcáⁿ tnáhã-ndó, te ducaⁿ quide-ndo chi cùndahú iní-ndó tnàha ñáyiú-ndo. ⁷ Te nchòhó cúu-ndó ñáyiú ío ngòdónúú quide nchaa sã vâha, te ío vâha sàndáá iní-ndó Xítohó Jesucristú, te ío vâha cùtnùní iní-ndó nàcuáa cáháⁿ tnúhu-gá,

te ío váha dàcuaha-ndo ñáyiú tnúhu-gá, te ío ndècu ndee-ndo quide-ndo mee-ni sá váha, te ducaⁿ ío cùu iní ñáhá-ndó xii-ndí, te sá dúcáⁿ quide-ndo núu xiáⁿ càháⁿ ndàhú-í núú-ndó sá ngòdó núú-gá-ndó càda-ndo sá cúú-xí tñaha ñáyiú-ndo.

8 Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyiú ndècu ichi Xítóhó Jesucristú, chi cue ñáyiú-án ni yúhu ni iní-yu quidé-yu sá váha sá cúú-xí tñaha ñáyiú-yu, te càchí tnúhu-í xii-ndo nàcuáa quidé-yu cuendá cutnùní núu nása cada-ndo núu ndisa sá cúú iní-ndó cuè tñaha ñáyiú-ndo.

9 Te nchòhó sa xini-ndó sá Xítóhó Jesucristú ío cùndahú iní ñáhá-gá xii-o, te ío váha ndècu-gá ní cùu te ní quixi-gá ñuyúú-a ní quide váha ñaha-gá xii-o, te ñuyúú-a ñá túú ní xíndecu váha-gá, te ducaⁿ ní quixi-gá ñuyúú-a cuè ñá túú ní xíndecu váha-gá cuendá sá nchóo ngúndecu váha-o núu ndécú-gá.

10 Te na càchí tnúhu-í xii-ndo nàcuáa sàni iní-í. Chiuⁿ sá ni yuhu ni iní-ndó ní ngúita-ndo quide-ndo cuíá ni yáha chi cùu-xi sá váha sá cúú-xí-ndó núu na dàxínu cava-ndo.

11 Te dàtná-ni ni yúhu ni iní-ndó ní tausaha-ndo chiúⁿ-án te ducaⁿ-ni ni yuhu ni iní-ndó dàxínu cava-ndo, te cacáⁿ tñáhá-ndó sá ndécú ndihi-ndo nacuáa xító mee-ndo ndacu-ndo.

12 Te núu nchòhó ní yúhu ni iní-ndó

cacáⁿ tñáhá-ndó sá xító mee-ndo ndacu-ndo ña, te cùu váha iní Yá Ndiöxí, chi mee-gá sa nàha-gá nása ndècu-o te ndùu vétú-ni iní-gá.

13 Te sá dúcáⁿ ndùu tnúhu càháⁿ-í te vá caní iní-ndó sá yúhú cuini-í sá nchòhó ndoho-ndo cùndecu-ndo te dava-gá-yu ngúndecu váha-yu sá cuendá-ndó.

14 Te vitna ndècu ndee iní-ndó nàcuáa ndacu-ndo chindee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-án chindee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú ñá cumání xii-ndo te ni cuè ñáyiú-án ñá túú ñá cumání xii-yu.

15 Te ducaⁿ te quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Cue ñáyiú ío vai sá ni níhí ñá túú ní cùu sobrá xii-yu, te cue ñáyiú sacú ní níhí ñá túú ní cumání xii-yu”, duha càchí-xi núú tütú-gá.

Té Titú ndihi cue té cùndihi-dé

16 Te ndacáⁿ táhú-í núú Yá Ndiöxí chi mee-gá ní quide sá té Titú ío ñuhu iní ñáhá-dé xii-ndo dàtná ñuhú iní ñáhá-í xii-ndo.

17 Te yúhú ní xáhaⁿ-í xii-dé sá quixí coto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ní xáhaⁿ-í xii-dé quixi coto ñaha-dé xii-ndo, chi mee-dé cúdí tñahí iní-dé quixi coto ñaha-dé xii-ndo.

18 Te tendaha-ndí ñá té ndècu ndihi-o ichi Xítóhó Jesucristú quixi-dé ndihi té Titú, te té quixi ndihi té Titú-án cúú-dé ñá té ío váha càháⁿ cue ñáyiú xíndecu ichi Xítóhó Jesucristú

cuendá-dé cuendá sá ïo váha quide-dé chiúⁿ Xítóhó Jesucristú cãháⁿ-dé tnúhu-gá tnúhu sá cãháⁿ nãcuáa naníhí tãhú-ó. ¹⁹ Te cue ñáyiú xĩndecu ichi Xítóhó Jesucristú ñá díú-ní sã cãháⁿ váha-yu cuendá-dé, chi tnãhá ní cáxi ñãhá-yu xii-dé cuendá sá cáca cùu ndihí ñãhá-dé xii-ndí chindee ñãhá-dé tacá sá cúú-xí ñáyiú ndàhú, te quide-ndí chiúⁿ-a cuendá ïo cuu càhnu Yá Ndiõxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá vãha sá cúú-xí cuè tnaha ñáyiú-ndo. ²⁰ Te cuiní-ndí sá vã cãháⁿ cuèhé ñáyiú cuendá nãcuáa quide-ndí ndihí sá ngãutnãha sá cúú-xí cuè tnaha ñáyiú-o, te ïo vai cuu-xi. ²¹ Chi ndùcu ndee-ndí quidé-ndí nãcuáa cáháⁿ váha Xítóhó Jesucristú cuendá-ndí, te quide tucu-ndí nãcuáa cáháⁿ váha ñáyiú sá quidé vãha-ndí.

²² Te tendaha tucu-ndí ingá tucu téé ndècu ndihí-o ichi Xítóhó Jesucristú quixi-dé ndihí cue téé úú quixi coto ñãhá xii-ndo, te téé quixi ndihí-güedé-áⁿ ñí cuu vai xito quide-dé nãcuáa cutnùní iní-ndí sá ïo ndùcu ndee-dé quidé-dé sá vãha, te vitna ïo-gá cuiní-dé cada-dé sá vãha vitna quixi-dé núú ndécú-ndó, chi cùtnuní ndáá iní-dé sá cúú-ndó cuè ñáyiú quide váha. ²³ Te cãchí tnúhu-í xii-ndo sã tẽ Titú cúú-dé ïⁿ téé cùndihí-í quidé-ndí chiúⁿ Xítóhó Jesucristú, te tnãhá-dé cúú-dé ïⁿ téé xinu

cuechi núú-ndó cãháⁿ-dé tnúhu-gá. Te cãchí tnúhu tucu-í xii-ndo cuendá cue téé úú quixi ndihí-dé, chi cue téé-áⁿ cúú-güedé cue téé tendaha cuè ñáyiú xĩndecu ichi Xítóhó Jesucristú quixi coto ñãhá xii-ndo. Te cue téé-áⁿ quidé-güedé nãcuáa cãchí ñáyiú sá ïo càhnu cuu Xítóhó Jesucristú. ²⁴ Te chí cáda sã cúú ïní ndisa-ndo-güedé cuendá ducaⁿ na cùtnuní ïní nchaa dava-gá ñáyiú xĩndecu ichi Xítóhó Jesucristú sá ndáá ndisa ducaⁿ quide-ndo, te ducaⁿ cùtnuní ïní-yu sá ndáá ndisa quide váha-ndo dàtná cãháⁿ-ndí cuendá-ndó sã quidé vãha-ndo.

9

Cuendá sá ngãutnãha sá cúú-xí cuè ñáyiú xĩndecu ichi Xítóhó Jesucristú

¹ Te cuendá sá ngãutnãha sá cúú-xí cuè ñáyiú ndècu ichi Xítóhó Jesucristú ñá túú-gã xíní ñùhu-xi cãchí tnúhu-í xii-ndo núú tütú-a nãcuáa cada-ndo, ² chi sa cùtnuní ïní-í sá ïo cuiní-ndó chindee-ndó-yu. Te ducaⁿ-ni ïo váha cãháⁿ-í cuendá-ndó núú ñáyiú xĩndecu ichi Xítóhó Jesucristú ndécú dìstrítú Macèdoniá, te xãháⁿ-í xii-yu sá nchòhó ñáyiú xĩndecu ichi Xítóhó Jesucristú ndécú dìstrítú Acãyá sa ní cuu ïⁿ cuiá ducaⁿ cuiní-ndó cácaⁿ tnãhá-ndó sã cúú-xí cuè ñáyiú ndàhú ndécú ïchi-gá. Te vai cue ñáyiú dìstrítú Macèdoniá cuiní-yu cacáⁿ tnãhá-yu sá cúú-xí cuè ñáyiú ndàhú ndécú ïchi Xítóhó Jesucristú

cuendá sá ñí níhí-yu tnúhu sá nchòhó ío cuení-ndó dùcaⁿ cada-ndo. ³ Te cuendá sá sání iní-ndó càda-ndo xiáⁿ tendaha-í cue téé ndècu ndihí-o ichi Xítóhó Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sá vǎ quéé ndèhnde-í núú ñáiyu sá ñí cáháⁿ váha-í cuendá-ndó, te ducaⁿ cùndecu túha ndisa-ndo dàtná sa ñí cáháⁿ-í núú-yu. ⁴ Chi na cuáháⁿ ndéé quixi-í ndihí ìⁿ úú cue ñáiyu distrítú Macèdoniá núú ndécú-ndó te quini-yu sá ñà túú ndècu túha-ndo, te cucahaⁿ núú-í núú-yu sá ñí cáháⁿ váha-í cuendá-ndó te núú ñá túú ndècu túha-ndo, te tnáhá-ndó cùcahaⁿ núú-ndó. ⁵ Te xiáⁿ núú ñí sání iní-í sá vǎha-gá codonuu cue téé ndècu ndihí-o ichi Xítóhó Jesucristú quixi coto ñaha-güedé xii-ndo cuendá chindee ñaha-güedé tacá sá ñí sání iní-ndó càcáⁿ tnáhá-ndó cuendá sá cùndecu túha-xi, te cuu-xi dàtná ìⁿ táhú sǎ ñí quene cuu iní méé-ndó càcáⁿ tnáhá-ndó sǎ cúú-xí cuè tnaha ñáiyu-ndo. Te ducaⁿ te vá yǎo caní iní-xi quesàhá-yu sá nchǔhú ñí quide yica-ndǐ ducaⁿ ñí sacáⁿ tnáhá-ndó.

⁶ Te nchòhó sa xini-ndó sǎ ñáiyu na chihí vai tatá te vai ñíñí-yu cùu, te cue ñáiyu na chihí sacú tatá te sacú ñíñí-yu cùu. Ducaⁿ sǎtnahá-xi cùu ñáiyu sàcáⁿ tnáhá sǎ cúú-xí tnàha ñáiyú-yu. ⁷ Te ìⁿ ìⁿ-ndo càcáⁿ tnáhá-ndó nàcuáa quène cuu iní méé-ndó, te ío váha cuu iní-ndó dùcaⁿ cada-ndo te vá cádá-ndó

cuendá-ñí sá quidé yica ñaha ñáiyu xii-ndo, chi Yá Ndiòxí cúú vǎha iní-gá núú nchàa ñáiyu cùdíí iní sàcáⁿ tnáhá sǎ cúú-xí cuè tnaha ñáiyu-xi. ⁸ Te Yá Ndiòxí ndacu-gá chindee ñaha-gá xii-ndo nàcuáa cundecu váha-ndo, chi diu-gá cada te níhí-ndó nchàa núú sǎ xini ñùhu-ndo cundecu ndihí-ndo, te ñá túú tnáhí-gá ná cumání xii-ndo, te mee-gǎ chindee ñaha-gá xii-ndo níhí-ndó ío vai cundecu ndihí-ndo cuendá ducaⁿ chindee-ndo cue tnaha ñáiyu-ndo. ⁹ Te núú tütú Yá Ndiòxí càchí-xi ìⁿ xichi:

ìⁿ ñáiyu ío vai sá ñí sǎñahá-yu xii ñáiyu ndàhú, te sá ñí quide ñáiyu-áⁿ ñí cuu-xi sá vǎha sá vǎ yǎo cùnaa.

Duha càchí-xi núú tütú-gá. ¹⁰ Te mee Yá Ndiòxí táxi-gǎ nchaa sá cúú tàtá nchaa nchòhó ñáiyu xitu nándí sá xítú cuendá cuu sá cúú nchìto-ndo, te diu-gá cada te ío vai sá níhí-ndó cùndecu ndihí-ndo, te ducaⁿ ío-gá vai sá vǎha cada-ndo sǎ cúú-xí cuè tnaha ñáiyu-ndo. ¹¹ Te Yá Ndiòxí taxi-gá vai núú sǎ cùndècu ndihí-ndo cuendá ducaⁿ ñí yuhu ñí iní-ndó vai cuáñaha-ndo sǎ cúú-xí tnàha ñáiyu-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii tnàha ñáiyu-ndo, te cue ñáiyu-áⁿ ío ndacáⁿ táhǔ-yu núú Yá Ndiòxí cuendá sá dúcáⁿ sàcáⁿ tnáhá-ndó sǎ cúú-xí-yu. ¹² Te sá dúcáⁿ quide-ndo sacáⁿ tnáhá-ndó sǎ cúú-xí cuè ñáiyu cùu cuendá

Yă Ndiöxí, te ñáyiu-áⁿ ñà túu-gă ná cumání xii-yu, te ío ndacáⁿ táhũ-yu núú Yă Ndiöxí sá dúcáⁿ quide-ndo. ¹³ Te ñáyiu-áⁿ cutnùní iní-yu sá nchòhó quidé-ndó sã sàndáá ndisa iní-ndó tnũhu Xítohó Jesucristú, te cuendá xláⁿ te ñáyiu-áⁿ chiñũhú-yu Yá Ndiöxí, te cuendá sá dúcáⁿ nì yuhu nì iní-ndó sàcáⁿ tnáhá-ndó sã cúu-xí-yu ndihí sá cúu-xí nchàa dava-gá ñáyiu, te cachí-yu sá ío càhnu cuu Yá Ndiöxí. ¹⁴ Te ñáyiu-áⁿ cãháⁿ ndihí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yă Ndiöxí chíndèe ñaha-gá xii-ndo quide-ndo sá vãha sá cúu-xí-yu ndihí dava-gá ñáyiu. ¹⁵ Te ío ndacáⁿ táhú-ó núú Yă Ndiöxí cuendá sá nì taxi-gá sá ío váha ndècu ndihí-o, te ni ñă cùnùní iní-ó nãsa cunduú tnũhu cãháⁿ-ó cuendá sá vãha ní taxi-gá.

10

Té Păblú ndécú ndihí-dé tnũhu ndee iní sá cãháⁿ-dé tnũhu Xítohó Jesucristú

¹ Te Xítohó Jesucristú ío càhnu iní-gá, te cùndahú iní ñáhá-gă xii-o chíndee ñaha-gá, núu xíãⁿ yúhú té Păblú ducaⁿ quide-í cãháⁿ ndàhú-í núú-ndó nàcuáa cada-ndo. Te dava-ndo cãchí-ndó sã yũhú ío ndàhú iní-í òré ndécú ndihí ñaha-í xii-ndo, te òré ñá túú ndècu ndihí ñaha-í xii-ndo te ío ñíi cãà-í. ² Te cãháⁿ ndàhú-í núú-ndó sã cãdá-ndó nàcuáa vá cãháⁿ ñíi-í núú-ndó òré quixi-í quixi coto ñaha-í xii-ndo. Te cuiní-í

sá ndihí tnũhu ñíi iní-xi cãháⁿ ndihí-í cue ñáyiu cãchí sá ñíi-ni cuu-í ndihí cue ñáyiu ñá túú sàndáá iní tnũhu Xítohó Jesucristú. ³ Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mée-ndí ducaⁿ ndàcu-ndí quidé-ndí, ⁴ te ni ñíi sá ío ñuyú-a ñá túú chíndee ñaha-xi, chi mee Yă Ndiöxí chíndèe ñaha-gá xii-ndí dáquèe tíhú duuⁿ-ndí nchaa núú sã cuèhé sá dúhá. ⁵ Te xíãⁿ núu ñihí-ndí tnũhu cãháⁿ-ndí sàdí-ndí yuhu cue ñáyiu cãháⁿ tnũhu sá ñà túú cùu váha iní Yă Ndiöxí, ñáyiu xíquide nínu mee-xi cãchí sá ñà túú nàndihí tnũhu-gá. Te quide-ndí sá ñáyiu-áⁿ quindáá iní-yu tnũhu Xítohó Jesucristú. ⁶ Te nchúhú sa ndècu túha-ndí sá dáquètíhú-ndí cue ñáyiu ñá túú cuiní cada nàcuáa cuiní Xítohó Jesucristú, dico díhna-gá xíní ñũhu-xi sá ncháá nchòhó ñáyiu cuiní cada nàcuáa cuiní-gá cundáá-ndó.

⁷ Te nchòhó nàcuáa ndèu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuendá-ndí. Chi núu cùnùní ndáá iní-ndó sã cúu-ndó cuendá Xítohó Jesucristú, te díu-ni ducaⁿ tau-ndó càni iní-ndó cuendá-ndí tucu. ⁸ Te Xítohó Jesucristú ní taxi-gá tnũhu ndee iní ndécú ndihí-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá

quihíⁿ, te ñá díú sã dánèhé ñáhá-ndí xii-ndo nàcuáa cuíta nihnu-ndo, te cuéi na chido-gá-í cáháⁿ-í cada nínu-í mée-í cuendá tnúhu ndee iní ní taxi Xítohó Jesucristú ndécú ndíhi-ndí, dico vá cúcàhàⁿ núù-í chi càháⁿ ndáá-í. ⁹ Te ñá túú cuìní-í sã nchòhó cani iní-ndó sã yúhú dáyùhú ñáhà-í xii-ndo nàcuáa ndùu tnúhu càháⁿ-í núú tütú-í. ¹⁰ Te dava-ndo càchí-ndó sã ténáá ñáhà-í xii-ndo núú tütú-í, te mee-ni tnúhu càhnu sã ìo cùnuu cuu-xi, te càchí tucu-ndo sã òré ndécú ndíhi ñaha-í xii-ndo te ñá túú càa-í sã cúú-í ìⁿ téé cùu váha cùu dico iní-ndó, te càchí tucu-ndo sã ñá túú tnàhá iní-ndó nàcuáa quide-í òré dácùàha ñaha-í xii-ndo. ¹¹ Te nchòhó ñáyiú ducaⁿ càháⁿ cada cuendá váha-ndo sã dàtná-ni càháⁿ-ndí núú tütú-ndí diu-ni ducaⁿ quide-ndí òré ndécú ndíhi ñaha-ndí xii-ndo.

¹² Te nchúhú, vá cúú tnàhí càháⁿ-ndí sã ìⁿ-ni cuu-ndí ndíhi cue ñáyiú càháⁿ váha cuendá mée-xí, chi ñáyiú-áⁿ sání iní-yu ná cúú sã vãha te quidé-yu te xíãⁿ càchí-yu sã ìo váha quidé-yu, te càchí-yu sã quidé vãha-gá-yu dàcúúxí tnàha ñáyiú-yu, te sã dúcáⁿ càháⁿ-yu te quidé-yu dàtná quidé cuè ñáyiú ñá túú tnàhí cùtnuní iní-xi. ¹³ Te dico nchúhú ñá túú xidó-ndí cáháⁿ váha-ndí cuendá-ndí, chi càháⁿ váha-ndí cuendá-ndí dico nàcuáa ndùu chiúⁿ ní taxi Yá Ndiòxí càháⁿ-ndí, chi mee-gã ní cachí-gá ndèé není sáá-ndí cáháⁿ-ndí

tnúhu-gá, te ní sáá-ndí ndéé ñuú-ndó càháⁿ-ndí tnúhu-gá. ¹⁴ Te vitna ndècu ndíhi-ndí tnúhu ndee iní sã tnàhá nchòhó cuu cáháⁿ ndíhi ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñuú-ndó, tnúhu sã càháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí mée-ndí cuendá chiúⁿ quide dava-gá-güedé quesaha-ndí sã chíúⁿ mée-ndí cúú-xí. Te cuìní-ndí sã nchòhó cuíta quindáá-gá iní-ndó Xítohó Jesucristú, te ducaⁿ te níhí-gã-ndí nàcuáa cada-ndí chiúⁿ-gá nchaa dava-gá xichi núú ní cachí-gá cada-ndí chiúⁿ-gá. ¹⁶ Chi càháⁿ-ndí tnúhu-gá tnúhu sã càháⁿ nàcuáa naníhí tàhú-ó, te yáha-gá-ndí ñuú-ndó quihíⁿ-ndí nchaa dava-gá xichi cáháⁿ-ndí, te vá cádá càhnu-ndí mée-ndí cuendá chiúⁿ sã sã ní quide dava-gá-güedé.

¹⁷ Te cue ñáyiú cuìní cada càhnu mee-xi te vá dúcáⁿ càdá-yu, chi mee Xítohó Jesucristú ná càda cahnú-yu-gá. ¹⁸ Te nchaa ñáyiú na càháⁿ váha Xítohó Jesucristú cuendá-yu, ñáyiú-áⁿ cúdiú-yu núú-gã, te ñá túú cúdiú-yu núú-gã cuendá sã càháⁿ váha-yu cuendá mée-yu.

11

Cuendá té Pãblú ndíhi cuendá cue téé càchí sã càháⁿ tnúhu Yá Ndiòxí te ñá ndáá

1 Te cuiní-í sá nchòhó cada ndee iní-ndó cùndedóho-ndo tnúhu na cáháⁿ-í, chí cáháⁿ-í dàtná cáháⁿ cue ñáyiú ñá túú cùtnuní iní-xi, te cuèi nása-gá ná cùnduu tnúhu cáháⁿ-í dico chí cadá ndèe iní cùndedóho-ndo. 2 Chi yúhú ío ñùhu iní ñáhà-í xii-ndo dàtná ñúhú iní ñáhá mèe Yá Ndiöxí xii-o, te ní cáháⁿ-í tnúhu Xítóhó Jesucristú núú-ndó núu xíãⁿ ní tnahá tnúhu-ndo ndíhi-gá vitna, te sá dúcáⁿ ní quide-í te cada iní-ndó sá yúhú cúú-í dàtná ìⁿ tée xica ndáhú te nchòhó cúú-ndó dàtná ìⁿ xíchí cuéchi, te Xítóhó Jesucristú cúú-gá dàtná ìⁿ tée tnándaha ndíhi xíchí cuéchi-ãⁿ. Te ducaⁿ càda iní-ndó chí na sáa nduu te yúhú na càni cuendá ñáhà-í xii-ndo núú Xítóhó Jesucristú, te cuu-ndo ñáyiú vá cùndècu tnahí-gá cuéchi-xi. 3 Te yúhú-í sá sàcuíhná dandàhú ñáhá-xí xii-ndo vá cáni-gá iní-ndó cànchicúⁿ nihnu-ndo ní yuhu ní iní-ndó ìchi Xítóhó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chí sàcuíhná ní nduu-xi cóo ní dándàhú ñáhá-xí xii-xi, chí sàcuíhná-ãⁿ ío váha ní xito-xi nàcuáa ní quide-xi ní dándàhú-xi tá Èvá-áⁿ. 4 Te nchòhó, quidé ndèe iní-ndó sàcùndedóho-ndo nchàa tnúhu cáháⁿ cue tée cáháⁿ ingá núú tnúhu cuendá Jèsús tnúhu sá ñá túú dānehé ñáhá-ndí xii-ndo, te quide ndee tucu iní-ndó ndèdóho-ndo dānehé ñáhá-güedé xii-ndo cuendá ingá espíritú, te ñá díú cuendá Espíritú

Yá Ndiöxí sá ní ngúndecu ndíhi-ndo dānehé ñáhá-güedé xii-ndo, te quide ndee tucu iní-ndó ndèdóho-ndo dānehé ñáhá-güedé xii-ndo ingá núú tnúhu sá cāchí-güedé cāhāⁿ nācuāa naníhí tāhú-ndó, te ñá díú nācuāa ndūu tnúhu sá ní sāndāá iní-ndó cuendá naníhí tāhú-ndó cāhāⁿ-güedé. 5 Te cue tée ducaⁿ cāhāⁿ-áⁿ cāchí-güedé sá Yá Ndiöxí ní tendaha ñāha-gá xii-güedé xicá cūu-güedé cāhāⁿ-güedé tnúhu-gá te ío cūnuu-güedé, dico ñā ndāá sá cāhāⁿ-güedé tnúhu-gá. Te yúhú cūtnuní iní-í sá cuè tée-ãⁿ ñá túú cūnuu-güedé dàtná cūnūu yúhú. 6 Te cuèi ñá túú cāhāⁿ-í dàtná cāhāⁿ cue tée ío váha sáa díquí-xi dico ío váha cūtnuní iní-í cuendá nchaa sá dācuāha-í, te yúhú sa quide-í nācuāa cutnūnī iní-ndó sá ío váha cūtnunī iní-í nācuāa ndūu nchaa tnúhu cāhāⁿ-í.

7 Te cudana te sàni iní-ndó sá yúhú ñá túú ní quide váha-í sá ní quide-í mèe-í dàtná ìⁿ tée ío ndàhú iní-xi, chí ñá túú ní xicáⁿ-í yáhu-í núú-ndó cuendá sá ní cāhāⁿ-í tnúhu Yá Ndiöxí tnúhu sá cāhāⁿ nācuāa naníhí tāhú-ó núú-ndó. 8 Te ní queheⁿ-í díhúⁿ ní taxi dava-gá cue ñáyiú ndècu ichi Xítóhó Jesucristú, te díhúⁿ-ãⁿ ní dāndóñùhu-í ní saaⁿ-í nchaa sá ní xini ñùhu-í cūtnāhá ní cāhāⁿ-í tnúhu Xítóhó Jesucristú núú-ndó. 9 Te cūtnāhá ní xīndecu ndíhi ñāha-í xii-ndo te áma ní xóo cumání sá xini ñùhu-í, te ñá túú ná ní xicáⁿ-í núú ní ìⁿ-ndo. Chí cue ñáyiú xīndecu ichi Xítóhó Jesucristú ndécú dīstritú Macèdoniá ní quixí-yu

ní taxí-yu sá cúmăní xii-í, te ñá túú tnàhí ni dāsatu ínì ñàhà-í xii-ndo cǎcǎⁿ-í núú-ndó núu ná cúú sá xínì ñùhu-í, te diu-ni ducaⁿ càda-í. ¹⁰ Te diu-ni duha cǎhǎⁿ váha-í cuendá-í te ni ìⁿ cue ñáyiú distrítú Acǎyá vá nihí-yu tnúhu cúñàhǎ-yu xii-í cuendá cadí-yu yuhu-í. Te mee Xítohó Jesucristú nǎhǎ-gǎ sá ndǎá cǎhǎⁿ-í dàtnǎ cǎhǎⁿ ndǎá mée-gǎ. ¹¹ Te cudana te sàni ínì-ndó sǎ sǎ dúhǎ cǎhǎⁿ-í te ñá túú cùu ínì ñàhà-í xii-ndo, dico ñǎhǎ chi mee Yǎ Ndiòxí nǎhǎ-gǎ sá yùhú ío cùu ínì ñàhà-í xii-ndo.

¹² Te nàcuáa-ni ta quide-í véxi te diu-ni ducaⁿ càda-í cuendá sá cuè téé cuínì cada nínu mee-xi cǎchí sá ìⁿ-ni cuu ndihi ñaha-güedé xii-í vá nihí-güedé tnúhu cǎhǎⁿ-güedé cachí-güedé sá ìⁿ-ni chiuⁿ quide ndihi ñaha-güedé xii-í. ¹³ Te cue téé-áⁿ cǎchí-güedé sá Yǎ Ndiòxí ní tendaha ñàhǎ-gǎ xii-güedé xícǎ cùu-güedé cǎhǎⁿ-güedé tnúhu-gǎ dico ñá ndǎá, chi mee-ni dǎndahú-güedé ñáyiú ndihi tnúhu cǎhǎⁿ-güedé, te quide-güedé dàtnǎ quidé cuè téé cǎhǎⁿ tnúhu Xítohó Jesucristú dico ñá ndǎá sá cúú-güedé cue téé cǎhǎⁿ tnúhu-gǎ. ¹⁴ Te vá cúñùhu-o sǎ dúcǎⁿ quide cue téé-áⁿ, chi mee sǎcuíhnǎ quidé-xí sǎ cúú-xí dàtnǎ ìⁿ espíritú xínú cuèchi núú ío váha cǎa ndecu Yǎ Ndiòxí dico ñá ndǎá sá xínú cuèchi-xi xiǎⁿ. ¹⁵ Te xiǎⁿ vá cúñùhu-o sǎ cuè téé xínu cuechi núú-xi quide-güedé sá cúú-güedé cue téé quide váha chi ñá

ndǎá sá quidé váha-güedé chi dǎndahú-güedé ñáyiú. Te nàcuáa ndùu nchaa sá quidé-güedé te ducaⁿ nǎchǎhu-güedé núú Yǎ Ndiòxí.

Té Pǎblú ío ndòho-dé cuendá sá cúú-dé téé cǎhǎⁿ tnúhu Xítohó Jesucristú

¹⁶ Te yùhú cǎhǎⁿ tucu-í dóho-ndo sǎ vá cánì ínì-ndó sǎ yùhú cúú-í ìⁿ téé cǎhǎⁿ lúcú cǎhǎⁿ duha, te núu dava-ndo dùcǎⁿ sani ínì-ndó dico chí cǎdǎ ndée ínì cundédóho-ndo tnúhu na cǎhǎⁿ-í cuendá ducaⁿ tnàhǎ-í cada nínu-í mée-í. ¹⁷ Te vitna na cǎhǎⁿ-í dàtnǎ cǎhǎⁿ ìⁿ téé ñá túú cùtnunì ínì-xi, chi tnúhu cǎhǎⁿ-í ñá túú ìⁿ-ni cuu-xi ndihi tnúhu Xítohó Jesucristú, chi vitna cǎhǎⁿ-í nàcuáa cada nínu-í mée-í. ¹⁸ Te ío cuéhé ñáyiú quide nínu mee-xi cuendá nchaa sá ío ñuyú-a te xiǎⁿ núu tnàhǎ-í cuínì-í cada nínu-í mée-í. ¹⁹ Chi cùtnunì sǎ nchòhó quidé ndée ínì-ndó sǎcúndédóho-ndo nchǎa tnúhu cǎhǎⁿ cue téé cǎhǎⁿ lúcú cǎhǎⁿ duha, te ducaⁿ quide ndee ínì-ndó sǎcúndédóho-ndo tnúhu cǎhǎⁿ-güedé chi cǎchí-ndó sǎ ío túha-ndo. ²⁰ Te nchòhó, quide ndee ínì-ndó tnì-ndo nchaa tnúhu cǎhǎⁿ cue téé quide yica ñaha xii-ndo sá cúnú cuèchi-ndo núú-güedé, te xícǎⁿ-güedé nǎndi sǎ xícǎⁿ-güedé núú-ndó, te tàxi tnunì ñàhǎ-güedé xii-ndo, te quide-güedé sǎ ío cùnuu-güedé ndécú ndihi ñaha-güedé xii-ndo, te cǎniha-güedé xii-ndo, te cuèi nchaa xiǎⁿ quidé ñàhǎ-güedé xii-ndo dico

quide ndee-ni iní-ndó. ²¹ Te nchòhó càchí-ndó sã cúú-ndí cue téé ñá túú ní cùyí cada nándi sá cádá, te ndáá chi ñá túú ñi-ni cuu-ndí ndihí cue téé ducaⁿ xíquide.

Dico núu cue téé-án cùyí-güedé quidé ñinu-güedé méé-güedé, te tnàhá-í cùyí-í ducaⁿ càda-í. Te sá dúhá càháⁿ-í te càháⁿ-í dàtná ñi téé ñá túú cùtnuní iní-xi. ²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñiu-ni téé càháⁿ tnúhu hèbreú cùu-í, àdi quide cahnu-güedé méé-güedé cuendá sá cúú-güedé cue téé isràél, te yúhú tucu tnàhá-í cùu-í téé isràél, àdi quide cahnu-güedé méé-güedé cuendá sá cúú-güedé ñani tnàhá ndíi Àbrahám, te tnàhá yúhú cùu-í ñani tnàhá ndíi Àbrahám tucu. ²³ Àdi quide cahnu-güedé méé-güedé cuendá sá sání iní-güedé sá díú nùú Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núú-gã. Te sá dúhá quide cahnu-í méé-í te càháⁿ-í dàtná ñi téé ñá túú cùtnuní iní-xi, te yúhú cùu-í ñi téé ío-gá quidé chiuⁿ-gá dàcúúxí cuè téé-án, te vai xito ní cuu càniha ñáyiú xii-í, te vai xito ní cuu chihí ñahá-yu vecaá xii-í, te vai xito ní cuu cãcu cãcu cahni ñaha ñáyiú xii-í. ²⁴ Te cue ñáyiú isràél ní canihá-yu xii-í úhúⁿ xito, te ndí tnahá ñi ñi xito ní canihá-yu ní dáquèe-yu ócò sáhúⁿ cúmí ñi sátá-í. ²⁵ Te úní xito ní caniha tucu ñáyiú

xii-í ndihí carrutí, te ñi xito ní sáha yúú ñáhã-yu xii-í, te ní cuu úní xito quèe naa bàrcú xití ndute òré sácúhuⁿ-í, te ñi xito ío ní ndoho-í ní xíndecu-í ñi nduu ñi níú núú ndute làmár. ²⁶ Te ío titní xichi ní cuu xica cuu-í, te dava xichi ní cácu cuido ñaha ndute ñuhu xii-í, te dava xichi ní cácu duhu ñàdúhú nchaa ndachiuⁿ-í, te dava xichi ní cácu cada ñaha cuè ñáyiú cùu ndí mee-í ñi sá cádá ñahá-yu xii-í, te ñiu-ni ducaⁿ ñi cácu cada ñaha tucu cue ñáyiú ñá túú cùu ndí mee-í ñi sá cádá ñahá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiú xii-í ñi sá cádá ñahá-yu, te ñiu-ni ducaⁿ cãcu cãcu quini-í tnúndòho oré ñúhù-í bàrcú cuáháⁿ núú ndute làmár. Te cue ñáyiú càchí sá ndécú ichi Xítóhó Jesucristú te ñá ndáá cãcu cãcu cada ñahá-yu xii-í ñi sá cádá ñahá-yu. ²⁷ Te ío ndòho-í cuendá chiuⁿ quide-í chi ío xàú-í, te ní cuu vai xito ñá túú xidí-í, te titní xito ní cuu xihí víhi-í docó, te titní xito ní cuu yichí-í ndute, te titní xito ní cuu ñá túú tnàhí ná xèxì-í cuendá chiuⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú nihí-í dóó cuihnu-í.

²⁸ Te ñá díú-ní xǎⁿ chi ñi nduu ñi nduu ío sání iní-í cuendá nchaa ñáyiú ndècu ichi Xítóhó Jesucristú xíndecu nchaa xichi. ²⁹ Te ndèda-ni càa ñáyiú ñá túú nihí ndéé cùndecu ichi Xítóhó Jesucristú, te ío cùndahú iní-í chi sànuu sá tnàhá-í ñá túú nihí ndéé-í cùndecu-í

ichi-gá sá dúcáⁿ quidé-yu. Te núu ñⁿ ñáyiú quidé-yu sá ñⁿ nchohó ñáyiú ndècu ichi Xítohó Jesucristú quidé-ndó ñⁿ sá ñá túú tàú-ndó càda-ndo te vâ cúú vâha iní-í chi cudèèⁿ-í. ³⁰ Te núu xini ñuhu-xi sá cáda càhnu-í mée-í, te cuu ducaⁿ càda-í te cáháⁿ-í mee-ni cuèndá nchaa sá quidé nàcuáa ñá túú ñihí ndéé yiqui cuñú-í. ³¹ Te Dútú Ndiöxí Yáa cúú Tátá Xítohó Jesucristú náhá-gã sá yúhú cáháⁿ ndáá-í núú-ndó, te diu-gá tàú-gá cachí-ó sã ïo càhnu cuu-gá ñi caa ñi quíhíⁿ. ³² Te cútnàhá ní xíndecu-í ñúú Dàmascú te téé cùu gobiernú téé cùndihí téé yìndaha ñáyiú nàni Aretás ní taxi ndecu-dé cue téé ní xíndedí yuyèhe sá ñúhú dòco ñúú cuèndá òré quee-í te tñi ñaha-güedè xii-í ní cùu. ³³ Dico yúhú ní queè-í ñⁿ xití tídihi, te cue ñáyiú cùndihí ñaha xii-í ní queñuhu ñàhá-yu ndàa ventaná nchí yiqui naha sã ñúhú dòco ñúú-án, te ducaⁿ te ní cácu-í ñá túú ní ndàcu-güedé tñi ñaha-güedè xii-í.

12

Té Pãblú càháⁿ-dé sá ïo vii càa sá ñí dánèhé núú ñàhá Xítohó Jesucristú xii-dé

¹ Te ñá túú ndéé nándihí-xi sá cáháⁿ váha-o cuèndá mée-ó, dico vitna xini ñuhu-xi ducaⁿ cada-í chi cáháⁿ-í nàcuáa ní quide ñaha Xítohó Jesucristú xii-í, chi ní quide-gá sá ñi cutnùni iní-í nàcuáa ndùu tñuhu-gá, te vai núú sã ñí dánèhé núú ñàhá-gã xii-í. ² Te yúhú xini-í ñⁿ téé sàndáá iní

ñàhá xii Xítohó Jesucristú, te sa ní cuu úxícúmí cuá sã téé-án ñí sáá-dé ndéé andiú cùu uní, te ñá túú xini-í te núu ndihí yiqui cuñú-dé ní sáá-dé àdi ñàhá, chi ñⁿ dii díi-ni Yá Ndiöxí náhá-gã te núu nása càa-dé ní sáá-dé. ³ Te yúhú càháⁿ ndáá-í cuèndá téé-án, dico dàtná ní cachí-í sá ñá túú xini-í te núu ndihí yiqui cuñú-dé ní sáá-dé andiú àdi ñàhá, chi mee Yá Ndiöxí náhá-gã te núu nása càa-dé ní sáá-dé. ⁴ Te téé-án ñí sáá-dé ñⁿ xichi núú ïo váha càa andiú, te yàcáⁿ ní xíndedóho-dé tñuhu mee-ni sã cúú-xi cuèndá mée-dé, te tñuhu-án vã cúú tñahí cáháⁿ-dé núú ñi ñⁿ ñáyiú. ⁵ Te yúhú quidé ñinu-í téé-án, dico mee-í ñá túú càháⁿ váha-í cuèndá-í cuèndá cada ñinu-í mée-í, chi càháⁿ-ni mee-ni cuèndá nchaa sá quidé nàcuáa ñá túú ñihí ndéé yiqui cuñú-í. ⁶ Te núu dicó yúhú cuini-í te cuu cáháⁿ váha-í cuèndá-í cuèndá cada ñinu-í mée-í, te núu ducaⁿ na cáháⁿ-í te ñá túú cùu-xi ñⁿ tñuhu neñúú cáháⁿ-í, chi cùu-xi ñⁿ sá càháⁿ ndáá-í te núu na càháⁿ-í. Dico vá dúcáⁿ càda-í chi cuini-í sá nchòhó cada cuèndá-ndó nàcuáa ndùu tñuhu càháⁿ-í ndihí nàcuáa quide-í, te ducaⁿ mée-ndo cáháⁿ-ndó te núu ná téé cùu-í, te ñá díú sã yúhú cáháⁿ váha-í cuèndá mée-í cuèndá nchòhó cachí-ndó sã ïo cùnuu-í.

⁷ Te sá ñí dánèhé núú ñàhá Xítohó Jesucristú xii-í cúú-xi sã xidó ïo váha, te cuèndá sã vã cáda càhnu-í mée-í núu xíáⁿ Xítohó Jesucristú ní quide-gá duha ndòho yiqui cuñú-í vitna. Te sá

dúcáⁿ quide ñaha-gá xii-í te xíáⁿ sácuihná nĩ níhi-xi ichi cãhnu dandoho ñaha-xi xii-í.
 8 Te ní cuu únĩ xito cãháⁿ ndàhú-í nũú Xítohó Jesucristú sá ná cáda-gã nãcuáa vá ndóhó-gã yiqui cuñú-í. 9 Dico mee-gã cãchĩ-gá xii-í: “Yúhú ío cundahú iní ñáhà-í xii-n chindee ñaha-í, te ñá túú nã cúmãní xii-n, te cùnuni sá ío-gá chindèe-í cue ñáyiú ñá túú níhi ndéé cùndecu”, duha ní cachĩ-gá xii-í. Te xíáⁿ nũu yúhú ío cùdíí iní-í sá ñá túú níhi ndéè-í ndécù-í, chi diu cuendá xíáⁿ Xítohó Jesucristú ñá túú dãña nihnu ñaha-gá xii-í chindèe ñaha-gá. 10 Te xíáⁿ nũu cùdíí iní-í sá dúhá ñã túú níhi ndéè-í ndécù-í, te cùdíí tucu iní-í cuendá nchaa tñuhu cuèhé tñuhu duha cãháⁿ ñáyiú cuendá-í, te cùdíí iní-í cuendá nchaa sá ndóhò-í, te cùdíí tucu iní-í cuendá sá quide ñaha ñáyiú xii-í, te cùdíí tucu iní-í cuendá nchaa dava-gá sá ndóhò-í cuendá Xítohó Jesucristú. Te òrè ñá túú níhi ndéè-í te Xítohó Jesucristú chindèe ñaha-gá xii-í níhi ndéè-í.

Té Pãblú ío sãni iní-dé cuendá cue ñáyiú xĩndecu ichi Xítohó Jesucristú ndécú ñiú Còrintú

11 Te cùu-í dàtná ìⁿ tée ñá túú cùnuni iní-xi sá dúhá cãháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ cãháⁿ-í, dico mee-ndo tàú-ndó cãháⁿ váha-ndo cuendá-í ní cùu. Te dava cue tée ío quide cahnu-güedé mée-güedé, te cãchĩ-güedé sá Xítohó

Jesucristú ní táuchíuⁿ-gã sá cãháⁿ-güedé tñuhu-gá, dico yúhú cùnũu-gá-í dàcúúxí cuè tée-áⁿ cuèi ñá túú vèdana ná cùu-í ndécù-í ñuyíú-a. 12 Te cùtnhá ní xĩndecu ndihĩ ñaha-í xii-ndo ío ní quide cãhnu iní-í nãndi sá ní yáha-í ní quide-í chiúⁿ Xítohó Jesucristú sá cúu-xi-ndó. Te ní chindee ñaha-gá xii-í ní quide-í titní nũú sã vã yõ tnahĩ ndàcu cada te ní cuñúhu-ndo, te sá dúcáⁿ nĩ chindee ñaha-gá xii-í ní cutnuni iní-ndó sá yúhú cúu ndisa-í ìⁿ tée ní cachĩ Xítohó Jesucristú sá cãháⁿ-í tñuhu-gá. 13 Te yúhú ìⁿ-ni quide ndihĩ ñaha-í xii-ndo ndihĩ nchaa dava-gá cue ñáyiú ndècu ichi Xítohó Jesucristú, te dicó-ni sá yúhú ñá túú ní cuini-í taxi-ndo sã xini ñũhu-í dàtná ní quide-í dava-gá-yu. Te nũu ñá túú ní quide váha-í sá dúcáⁿ nĩ quide-í ñá túú ní cuini-í chindee ñaha-ndo te chí cáda cãhnu iní ñáhá xii-í.

14 Te vitna sa ndècu túha-í sá quixi-í nũú ndécù-ndó, te sá quixi còto ñaha tucu-í xii-ndo cùu-xi xito cuu únĩ sá quixi-í, te cuini-í sá vã dándihú-ndó iní-ndó ndècu-ndo sá táxi-ndó cùu xii-í, chi ñá díú xíáⁿ ndéé iní-í chi mee-ndo ndéé iní-í quixi-í. Te duha cãháⁿ-í chi nchòhó xini-ndó sã cuè tée cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mée-güedé. 15 Te yúhú ío váha cùu iní-í dandõñuhu-í sá ndécú ndihĩ-í nãcuáa

ndacu-í chindee ñaha-í xii-ndo cundecu váha-ndo sá cúu-xí Yă Ndiöxí chi ío cùdíí ìní-í, te cuéi na cùu-í sá cuendá-ndó, chi ío cùu ìní ñáhà-í xii-ndo, te sá dúcáⁿ cùu ìní ñáhà-í xii-ndo, te sànuu sá nchòhó ñá túú cùu ìní ñáhá càvihi-ndo xii-í.

¹⁶ Te nàha-ndo sá ñà túú ní dándihú-í ìní-ndó nă taxi-ndo cùu xii-í, dico dava-ndo càchí-ndó să ío váha ní xito-í nàcuáa ní quide-í nàcuáa ní dándàhú ñáhà-í xii-ndo. ¹⁷ Te chí càháⁿ te núu yúhú ní dándàhú ñáhà-í xii-ndo ndìhi cue téé ní tendaha-í ní quixi coto ñaha xii-ndo. ¹⁸ Te ní càháⁿ ndàhú-í núú tē Titú ndìhi núú ìngá tucu téé ndècu ndìhi-o ichi Xítohó Jesucristú ní quixi coto ñaha-güedě xii-ndo. Te nchòhó cùtnùní ìní-ndó să tē Titú ñá túú ní dándàhú ñáhá-dě xii-ndo, te ducaⁿ chi ñⁿ-ní sàni ìní-ndí te ñⁿ-ní quide-ndí.

¹⁹ Te cudana te sàni ìní-ndó să sá dúhá càháⁿ-ndí te tàunihnu-ndí méé-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi càháⁿ-ndí chi ndècu ndìhi-ndí Xítohó Jesucristú, te mee Yă Ndiöxí náhá ndăá-gá nàcuáa ndùu tnúhu càháⁿ-ndí, te nchaa sá càháⁿ-ndí cúu-xí cuendá nchòhó cue ñáyiú ío cùu ìní-ndí, te càháⁿ-ndí nàcuáa cundecu váha-ndo ìchi Xítohó Jesucristú. ²⁰ Te ío sàni ìní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha ìní-í, te sá dúcáⁿ te yúhú càháⁿ-í

nàcuáa vá cúu vâha ìní-ndó, te ducaⁿ ío sàni ìní-í cuendá-ndó chi na cuáháⁿ òré quexiò-í te nàa-ndó, àdi ndecu-ndo ichi cuédú ìní, àdi cudééⁿ núú tnáhá-ndó, àdi ñá túú cùu ñⁿ-nuu-ndo ndecu-ndo, àdi càháⁿ cuèhé-ndó cuendá tnàha ñáyiú-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹ Te ío sàni ìní-í cuendá-ndó chi na cuáháⁿ òré quixi-í, te Yă Ndiöxí cada-gá te cucahaⁿ núu-í sá cuendá-ndó, te ío ndìhú ìní-í cuendá-ndó te núu vátá dáñá-gă-ndó nchàa sá cuèhé sá dúhá ñí ngúíta-ndo quide-ndo ndéé sanduu, te vâi-ndo ní ngúíta-ndo dùcaⁿ quide-ndo, chi ndècu-ndo ichi díí ìní te nândi-gá nchaa sá cuèhé sá dúhá quide-ndo, te ducaⁿ ío ndìhú ìní-í te núu vátá dáñá-gă-ndó nchàa xíáⁿ.

13

Tnúhu ndéé núú ñí ndìhi-ná

¹ Te sá quixi-í vitna núú ndécú-ndó cùu-xi xito cuu úní sá quixí coto ñaha-í xii-ndo. Te càchí tnúhu-í xii-ndo să òré cundáa cuéchi-ndo te canehe núú úú àdi úní ñáyiú càháⁿ ndáá nàcuáa ndùu cuéchi-ndo. ² Te yúhú sa ní càháⁿ-í dóho-ndo cùtnáhá ní quixi-í ní quixi coto ñaha-í xii-ndo xito cuu úú, te ñⁿ-ni ducaⁿ càháⁿ tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáyiú ní cunduu ní ngúíta quide nchaa sá cuèhé sá dúhá, tenàa ñáhà-í xii-ndo òré quexiò-í te núu vátá

dáñá-gã-ndó nchàa sá cuèhé sá dúhá quide-ndo te tnàhá nchaa dava-gã-ndó tènàá ñáhà-í xii-ndo. ³ Te nchòhó cuìní-ndó quìní-ndó nùu ndáá sá quidè-í núú Xítohó Jesucristú càháⁿ-í yuhu-gá, dico dàvá-áⁿ cutnùní ndáá iní-ndó. Te Xítohó Jesucristú quidé-gã nàcuáa cutnùní iní-ndó sã ïo càhnu cuu-gá te ñá túú quide-gá dàtná quidé ìⁿ ñáyiu ñá túú nihí ndéé cùndecu. ⁴ Te Xítohó Jesucristú ní ndoho-gá dàtná ìⁿ ñáyiu ñá túú nihí ndéé cùndecu, chi ní sahani ñaha-güedë xii-gá núú cùrúxí dico mee Yã Ndiöxí ní quide-gá ní nihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñá túú nihí ndéé-ndí cundecu-ndí, dico mee Yã Ndiöxí chíndèe ñaha-gá xii-ndí nihí ndéé-ndí ndécú-ndí cuèndá sá ndécú ndíhi-ndí Xítohó Jesucristú, te xiãⁿ nùu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuèndá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ichi-gá te cùtnuní iní-ndó sã ndécú-ndó ndíhi-gá. ⁶ Te cuìní-ndí sá nchòhó cutnùní ndáá iní-ndó sã nchúhú ndécú ndíhi ndisa-ndí Xítohó Jesucristú.

⁷ Te nchúhú càháⁿ ndíhi-ndí Yã Ndiöxí cuèndá-ndó cuèndá sá vã cádá-ndó ñi ìⁿ sá cuèhé sá dúhá, te vã cání iní-ndó sã sà dúcáⁿ càháⁿ ndíhi-ndí-gá cuèndá-ndó, te cuìní-ndí sá nchòhó cutnùní iní-ndó sã

nchúhú ío ndècu yiñuhu-ndí núú-gã, te ñáhá chi càháⁿ ndíhi-ndí-gá cuèndá-ndó chi cuìní-ndí sá nchòhó cada váha-ndo cùndecu-ndo cuèí sàni iní-ndó sã nchúhú cúú-ndí cue tée ñá túú ndècu yiñuhu núú-gã. ⁸ Te nchúhú mee-ni càháⁿ váha-ndí cuèndá tnúhu ndáá tnúhu Yã Ndiöxí, te ñá túú càháⁿ-ndí ìⁿ tnúhu sá ñà túú tàú-xi càháⁿ-ndí cuèndá tnúhu-án. ⁹ Te cùdí iní-ndí sá ñà túú-gã xíní ñùhu-xi cada-ndí nàcuáa nihí ndéé-ndí tenàá ñáhá-ndí xii-ndo càháⁿ-ndí dóho-ndo, chi nchòhó sa ní nihí ndéé-ndó ndècu-ndo ichi-gá.

Te nchúhú càháⁿ ndíhi-ndí Yã Ndiöxí cuèndá-ndó cuèndá sá nchòhó cundáá-ndó cùndecu-ndo ñá túú-gã ná cumání-ndó nùú-gã. ¹⁰ Te xiãⁿ nùu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndíhi ñaha-í xii-ndo, cuèndá sá òrè ná cùndecu ndíhi ñaha-í xii-ndo te vã ïo níhi càháⁿ-í dóho-ndo nàcuáa ndùu tnúhu ndee iní ní taxi Xítohó Jesucristú ndécú ndíhi-í, chi ní taxi-gá tnúhu ndee iní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuèndá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndíhi-ndí ichi Xítohó Jesucristú ío quide ndee iní ñáhá-ndí xii-ndo, te ío chí ndúcú nàcuáa cada-ndo cundáá-ndó nùú Yã Ndiöxí cuèndá sá ñà túú tnàhi-gá ná cumání-ndó nùú-gã, te

ndee ndèe cada iní-ndó
 cùndecu-ndo, te chí cúú ìⁿnuu
 cundecu ndìhì tñaha, te ducaⁿ
 te Yá Ndiöxí cundecu ndìhì
 ñaha-gã xii-ndo chí ío cùu
 iní ñáhá-gã xii-o, te ðiu-gá
 quidé-gã ío váha cùu iní-ó
 ndècu-o. ¹² Te ndìhì tñúhu
 yíñùhu chí cádá ndèe iní
 tñáhá. ¹³ Te nchaa ñáyiú
 cùu cuendá Yá Ndiöxí ndécú
 ìha quide ndee iní ñáhá-yu
 xii-ndo.

¹⁴ Te xicáⁿ táhú-ndí núú
 Xítohó Jesucristú sá ìo
 na chìndee chitúu ñaha-gã
 xii-ndo. Te mee Yá Ndiöxí
 ná cádá-gã nàcuáa cutnùní
 iní-ndó sá ìo cùu iní ñáhá-gã
 xii-ndo, te Espiritú-gá
 cundee cùu cahnu iní-ndó
 cùndecu-ndo. Te ducaⁿ na
 cùnduyú. Te ío chí cádá ndèe
 iní-ná vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU DISTRITÚ GÁLACIÁ

*Té Päblú cádüha-dé tutú
quíhiⁿ ndaha nchaá ñáyi
sàndáá iní ñáhá xii Xítoho Jesu-
cristú ndécú distritú Gàlaciá*

¹ Te yúhú té Päblú ní tendaha ñaha Xítoho Jesucristú, ndihi Dútú Ndiöxí véxi-í càháⁿ-í tnúhu-gá. Te ñu Yá Ndiöxí ní dándótó-gã Xítoho Jesucristú Yaá ní xihí ní cùu. Te càchí tnúhu-í xii-ndo sã ñà díú ñáyi ñuyíú-a ní tendaha ñaha xii-í véxi-í, te ní Yá Ndiöxí te ní Xítoho Jesucristú ñá túú ní xãhaⁿ-gã xii ñⁿ ñáyi quixí-yu cachí tnúhu-yu nãcuáa cada-í. ² Te yúhú té Päblú cádüha-í tutú-a ndihi nchaá dava-gã ñáyi ndécú ichi Yá Ndiöxí ndécú ndihi-í iha cuendá daquixi-í ndaha nchòhó ñáyi sàndáá iní ñáhá xii Xítoho Jesucristú ndécú distritú Gàlaciá. ³ Te xicáⁿ tãhú-í núú Dútú Ndiöxí, ndihi núú Xítoho Jesucristú sã ño na chindee chitúu ñaha-gã xii-ndo, te ducaⁿ ndi nduú-gã ná cádá te ío váha cuu iní-ndó cùndecu-ndo. ⁴ Te Xítoho Jesucristú ní xihí-gã sã cuendá nchaá cuéchi nchoo cué ñáyi ndécú ñuyíú-a. Te ducaⁿ ní quide-gã, chi cuiní-gã sã vã cùndecu-o ichi cuehé ichi duha. Te ducaⁿ ní cuu, chi Dútú Ndiöxí ducaⁿ ní cuiní-gã

cunduu. ⁵ Te ío chí ná ndácáⁿ tãhú-ó núú Yá Ndiöxí cuendá sã ño càhnu cuu-gã, te ñu-ni ducaⁿ càda-o ní caa ní quíhiⁿ! Te ducaⁿ na cùnduu.

*Mee-ni tnúhu Xítoho Jesu-
cristú cúu-xi tnúhu sã càháⁿ
nãcuáa naníhi tãhú-ó*

⁶ Te ío cùñúhu-í cúu chi ío ndihi ní dáñá-ndó ichi Yá Ndiöxí. Te Yaá-áⁿ ní càháⁿ ñáhá-gã xii-ndo, chi Xítoho Jesucristú ío ní cundáhu iní ñáhá-gã ní quide váha ñaha-gã xii-ndo, te vitna dàcuaha tucu-ndo ingá tnúhu, te càchí-ndó sã xĩãⁿ dàcãcu nihnu ñaha-xi xii-ndo núú ùhú núú ndáhú. ⁷ Dico ñáhá, chi ñá túú-gã tnúhu sã dácãcu nihnu ñaha xii-o núú ùhú núú ndáhú. Te dicó-ni sã ío ñáyi véxi dàticá nuu ñahá-yu xii-ndo dãnèhé ñáhã-yu tnúhu sã dácũta nihnu ñaha xii-ndo, chi tnúhu-áⁿ ñá túú cùu-xi tnúhu Xítoho Jesucristú. ⁸ Te yúhú càháⁿ-í tnúhu Xítoho Jesucristú, dico núú ío ñáyi véxi dãnèhé ñáhá xii-ndo ingá tnúhu sã ñá túú ní dãnèhé ñáhà-í xii-ndo, te nchòhó cachí-ndó sã ñáyi-áⁿ nacháhu-yu núú Yá Ndiöxí sã dúcáⁿ quidé-yu. Te cuéi yúhú, te núu na dàma-í tnúhu dãnèhé ñáhà-í xii-ndo, te ñu-ni ducaⁿ càháⁿ-ndó sã nãchãhu-í núú-gã te núu ducaⁿ na càda-í. Àdi te núu ñⁿ espíritú xínú cuèchi núú-gã véxi-xi càháⁿ-xi ingá tnúhu sã ñá túú ní dãnèhé ñáhà-í xii-ndo nãcuáa naníhi tãhú-ndó ñá, te ñu-ni ducaⁿ càháⁿ-ndó sã nãchãhu-xi núú Yá Ndiöxí te núu ducaⁿ na càda-xi. ⁹ Te ñu-ni duha sa ní dãnèhé ñáhà-í xii-ndo sã núu

véxi ñáyiú dànehé ñáhá ìngá tnúhu sá ñà túú ní dànehé ñáhà-í xii-ndo nàcuáa naníhí tǎhú-ndó ñá, te cachí-ndó sá ñáyiú-án nacháhu-yu núú Yá Ndiòxí sá dúcáⁿ quidé-yu, duha ní cachí-í xii-ndo.

¹⁰ Te duha ndùu tnúhu càháⁿ-í chi nchòhó sa xìní-ndó sá yùhú cuiní-í sá Yá Ndiòxí càháⁿ-gá sá quidé vǎha-í ndécù-í, te ñá díú sá ñáyiú ñuyíú-a cachí-yu sá quidé vǎha-í, àdi sá ìo cùdíí ìní-yu nchaa nàcuáa quide-í ndécù-í. Te núu na càni ìní-í cudíu-í núú ñáyiú ñuyíú-a, te ñá túú cùu-í tée xìnu cuechi núú Xìtohó Jesucristú te núu ducaⁿ na càda-í.

Nàcuáa ní cuu ní ngúita té Pǎblú càháⁿ-dé tnúhu Yá Ndiòxí
¹¹⁻¹² Te nchòhó ñáyiú ndècu ndíhi-í ichi Xìtohó Jesucristú càhí tnúhu-í xii-ndo sǎ tñuhu sá dǎnehé ñáhà-í xii-ndo nàcuáa naníhí tǎhú-ndó cùu-xi tnúhu sá ní cachí tnúhu mee Xìtohó Jesucristú xii-í, te ñá díú ìⁿ ñáyiú ñuyíú-a ní càhu ìní-yu tnúhu-án, àdi danehé ñáhǎ-yu xii-í, chi mee Xìtohó Jesucristú ní dǎnehé ñáhá-gǎ.

¹³ Te nchòhó sa nihí-ndó tñuhu nàcuáa ní xóo cada-í cùtnàhá nchìcúⁿ nihnu-í nchaa nàcuáa dàcuaha ñáyiú cùu ndi mee-í ñáyiú isràèl ní cùu. Te dàvá-án ìo ní xóo cuu úhú ìní-í nchaa ñáyiú ndècu ichi Yá Ndiòxí, te nǎndi sá ní xóo cada-í-yu, te ní cuiní-í danàa-í-yu ní cùu. ¹⁴ Te yùhú ío-gá ní xóo quene cáva-í ní xóo dacuàha-í nchaa sá dacuàha ñáyiú cùu ndi mee-í dàcúxí ñáyiú ìⁿ-ni cuìa-í ndíhi-yu ní cùu, te ío-gá ní xóo

cuiní-í cada ndáa-í canchicúⁿ nihnu-í nchaa nàcuáa ní dǎnehé ñáhá cuè ñani tñáhà-í ní xíndecu ndéé sanaha ní cùu. ¹⁵ Te ndéé cùtnàhá vátá cǎcú-gǎ-í Yá Ndiòxí sa nèhe váha ñaha-gǎ xii-í cuendá sá càháⁿ-í tnúhu-gá, núu xǎⁿ ní càháⁿ ñáhá-gǎ xii-í quidé-í chiuⁿ-gá vitna, te sá dúcáⁿ ní quide-gá te ío váha ní quide ñaha-gǎ xii-í. ¹⁶ Te òré ní càháⁿ ñáhá Yá Ndiòxí xii-í te ní cachí tnúhu-gá cuendá Déhe-gá Xìtohó Jesucristú. Te ducaⁿ ní quide Yá Ndiòxí cuendá sá cuiní-gá sá cùñaha-í xii ñáyiú ñá túú cùu ñáyiú isràèl cuendá Yaá cúu Déhe-gá. Te cùtnàhá ní càháⁿ ñáhá Yá Ndiòxí xii-í, te vá yòo ìⁿ dìi núu-xi ní ndècu tnúhu-í nàcuáa cada-í. ¹⁷ Te ní ñà túú ní sáháⁿ-í ñuú Jerusálén nducu tñuhu-í núú cuè tée díhna nuu ní tendaha Xìtohó Jesucristú càháⁿ tnúhu-gá nùu nása cada-í, chi ndíhi-ni ní sáháⁿ-í distritú Àrabíá ní xíndecu tnaa-í te dàtnùní cuánuhú tucu-í ñuú Dàmascú.

¹⁸ Te núú ùní cuía sǎ ní càháⁿ ñáhá Yá Ndiòxí xii-í, te ní sáháⁿ tucu-í ñuú Jerusálén ní càháⁿ ndíhi-í té Pèlú, te ní xíndecu-í ndíhi-dé sáhúⁿ nduu. ¹⁹ Te tñáhá té Jàcobó ñani Xìtohó Jesucristú ní càháⁿ ndíhi-í. Te ñá túú ní xìní-í dava-gá cue tée ní tendaha Xìtohó Jesucristú càháⁿ tnúhu-gá. ²⁰ Te Yá Ndiòxí ndéhe ndíi ndehe caxi-gá sá ncháá tñuhu tèe-í núú tütú-a sá cúu-xí-ndó cùu-xi ìⁿ sá ndáa.

²¹ Te sátá ní sáháⁿ-í ñuú Jerusálén, te dàtnùní ní sáháⁿ-í distritú Síríá, ndíhi

distritú Ciliciá. ²² Te nchaa ñáyiú xĩndecu ichi Xítohó Jesucristú ndécú distritú Jùdeá ñá túú xini ñáhã-yu xii-í ní cùu. ²³ Dico ní xóo níhĩ-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiú ndècu ichi Xítohó Jesucristú càháⁿ-dé tnúhu-gá núú ñáyiú cuèndá quĩndáa iní ñáhã-yu xii-gá, te diu-dé nándi sá quidé ñaha-dé, te cuini-dé danàa ñaha-dé cuèndá sá vã cóo-gã ñáyiú quĩndáa iní ñáhá xii-gá ní cùu”, duha ní cachí-yu cuèndá-í. ²⁴ Te ní ngüita-yu ní cachí-yu sá ïo càhnu cuu Yá Ndiõxí cuèndá sá ñã túú-gã quidè-í dàtná ní xóo cada-í.

2

Té Páblú ní níhí tnáhã-dẽ ndihí dava-gã cue tée càháⁿ tnúhu Yá Ndiõxí

¹ Te ní nútahã úxícúmí cuĩá sã ní sáhãⁿ-í ñuú Jerusálén ní càháⁿ ndihí-í té Pèlú, te dàtnúni ndècã-í té Bèé ní sáhãⁿ, te tnáhã té Títú ní sáhãⁿ ndihí-ndí-dé. ² Te ní sáhãⁿ-í chi mee Yã Ndiõxí ní cachí-gá sá quihíⁿ-í. Te yacáⁿ ní tacá mee-ni cue tée cùnuu. Te ní xáhaⁿ-ĩ xii-güedé nàcuáa ndùu tnúhu dانهé-í ñáyiú ñã túú cùu ñáyiú isràél cuèndá naníhí tãhú-yu. Te ducaⁿ ñĩ quide-í cuèndá cuini-í quini-güedé nàcuáa ndùu chiunⁿ quide-í, chi nacuahãⁿ cachí-güedé sã ñã túú nandíhí-xi. ³ Te té Títú tée ndècu ndihí-í chi ñã díú tée isràél cúu-dẽ, dico ñã túú ní quide yica-güedé cuãha-güedé señã ñi-dé. ⁴ Te

ñáyiú càchí sá ndécú ichi Xítohó Jesucristú te ñã ndàá sá ndécũ-yu ichi-gã, ñáyiú-ãⁿ ñĩ chitnahã ñáhã-yu xii-ndí cuèndá cuini-yu quini-yu nása quide-ndí ndécú-ndí ichi Xítohó Jesucristú. Te ducaⁿ ñĩ quide-yu cuèndá sá nchúhú sa ní cácu nihnu-ndí ñã túú-gã quide-ndí nchaa nàcuáa ní càháⁿ ndíi Moisés. Te cuini-yu sá núcuĩta saa tucu-ndí cada-ndí nchaa nàcuáa ní càháⁿ ndíi nucúndecu-ndí dàtná ní xĩndecu-ndí cútñahã vátã cãcu nihnu-gã-ndí núú tnúhu-ãⁿ ni cùu. ⁵ Te nchúhú ñã túú tnàhí ni dàña-ndí méé-ndí dandàhú ñáhã-yu xii-ndí. Te ducaⁿ ñĩ quide-ndí, chi cuini-ndí sã ñã túú ñãgã tnúhu dácãnuu ndihí tnúhu sã càháⁿ nàcuáa naníhí tãhú-ó ndècu ndihí-ndo.

⁶ Te ní ñⁿ tnúhu sã vátã quini-gã-í ñã túú ní càchí tnúhu cue tée cùnuu núú ñáyiú cada-í. Dico yúhú chi ñã túú ní quide cuèndá-í nõu cùnuu-güedé àdi ñã túú cùnuu-güedé, chi núú Yã Ndiõxí ñⁿ-ni cùu-o nchaa-o. ⁷ Te ní cutnùni iní-güedé sã Yã Ndiõxí ní cachí-gá xii-í sã càháⁿ-í tnúhu-gã núú ñáyiú ñã túú cùu ñáyiú isràél dàtná ní quide-gã té Pèlú ní xáhaⁿ-gã càháⁿ-dé tnúhu-gã núú ñáyiú isràél. ⁸ Te ducaⁿ ñĩ cutnùni iní-güedé, chi diu-ni Yá Ndiõxí Yã chĩndèe ñaha xii té Pèlú càháⁿ-dé tnúhu-gã núú ñáyiú isràél, diu-ni Yã-ãⁿ chĩndèe ñaha-gã xii-í càháⁿ-í tnúhu-gã núú ñáyiú ñã túú cùu ñáyiú isràél.

⁹ Te té Jãcobó, ndihí té

Pèlú, ndihi té Juàá, cue tée ío cùnnu-gá ní cutnùní iní-güedé sá Yá Ndiöxí ío chìndee ñaha-gá xii-í quidè-í chiuⁿ-gá. Te ío váha ní cáháⁿ ndihi ñaha-güedé xii-í, ndihi té Bèé, te ní cuu ìⁿnuu-ndí sá nchùhú quíhíⁿ-ndí cáháⁿ-ndí tnúhu Yá Ndiöxí núú nchàa ñáyíu ñá túú cùu ñáyíu isràél, te mee-güedé cáháⁿ-güedé tnúhu-gá núú ñáyíu isràél. ¹⁰ Te ìⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chíndèe-ndí cue ñáyíu ndàhú, te sa ducaⁿ tnàhí sàni iní-ndí cada-ndí.

Té Páblú càháⁿ-dé dóho té Pèlú ñuú Antiòquia

¹¹ Te cùtnàhá ní sáháⁿ té Pèlú ñuú Antiòquia yàcáⁿ ní cáháⁿ-í dóho-dé, chi quide-dé ìⁿ sá ñà túú tàú-dé cada-dé ní cùu. ¹² Te quide váha-dé ní cùu chi xèxi-dé ndihi ñáyíu ñá túú cùu ñáyíu isràél, dico òré ní sáá ìⁿ úú ñáyíu cùndihi té Jàcobó, te òré-áⁿ ñà túú-gá ní cuíní-dé caxi-dé ndihi ñáyíu-áⁿ. Te ducaⁿ ní quide-dé chi ní yùhú-dé cue ñáyíu nchìcúⁿ nihnu quide nchaa nacuáa ní cáháⁿ ndíi Moisés sá vā càháⁿ váha-yu cuèndá-dé. ¹³ Te tnàhá dāva-gá ñáyíu isràél xìndecu ichi Yá Ndiöxí ñá túú quide váha-yu, chi quidé-yu dàtná quidé tē Pèlú ní cùu, te ndéé tnàhá té Bèé ní nguíta-dé ducaⁿ quide-dé ní cùu. ¹⁴ Te òré ní xiní-í sá ñà túú quide-güedé ndihí-yu nācuāa cáháⁿ tnúhu Yá Ndiöxí, te núú nchàa ñáyíu ndècu ichi Yá Ndiöxí ní xáhaⁿ-í xii té

Pèlú: “Yòhó cúú-n tēe isràél, te ñá túú quide-n nchaa nacuāa quide ñáyíu isràél, chi quide-ni-n datná quidé nchàa ñáyíu ñá túú cùu ñáyíu isràél. Te núu ducaⁿ quide-n, ¿te ná cuèndá dānèhé-n ñáyíu ñá túú cùu ñáyíu isràél sá cādā-yu nchaa nācuāa quide ñáyíu isràél?”; duha ní xáhaⁿ-í xii té Pèlú.

Íⁿ-ni nānīhí tàhú-ó ndihí ñáyíu isràél nūu na quèndāá iní-ó Xítóhó Jesucristú ndihí-yu

¹⁵ Te yúhú ndihi té Pèlú cúú-ndí ñāni tnàhá ñáyíu isràél, te ñá túú ndècu-ndí ichi cuèhé ichi duha dàtná ndécú nchàa ñáyíu ñá túú cùu ñáyíu isràél. ¹⁶ Te xiní-ó sá vā cùndècu-gá cuéchi-o nūú Yá Ndiöxí te núu na quèndāá iní-ó Xítóhó Jesucristú, te ñá díú sá cānchìcúⁿ nihnu-o càda-o nchaa nacuāa ní cáháⁿ ndíi Moisés. Te tnàhá dāva nchùhú ñáyíu isràél sàndāá iní-ndí Xítóhó Jesucristú, te xiāⁿ cùtnùní iní-ndí sá ñà túú-gā cuéchi-ndí ndécú nūú-gā, dico ñá díú sá nī cānchìcúⁿ nihnu-ndí ní quide-ndí nācuāa ní cáháⁿ ndíi Moisés, chi cuèndá sá sàndāá iní-ndí Xítóhó Jesucristú. Te vā yōo ìⁿ cachí-ó sá ñà túú ndècu cuéchi-xi núú Yá Ndiöxí cuèndá sá nchìcúⁿ nihnú-yu nchaa nācuāa ní cáháⁿ ndíi Moisés.

¹⁷ Te núu cuíní-ó sá vā cùndècu cuéchi-o nūú Yá Ndiöxí cuèndá sá sàndāá iní-ó Xítóhó Jesucristú, te xiāⁿ cùtnùní iní-ó sá ñà túú quide váha-o. ¿Te vā cúú tnàhí

cani iní-ó sǎ Xítóhó Jesucristú dánèhé ñáhá-gǎ xii-o sǎ vǎ cádá vǎha-o cùndecu-o! ¹⁸ Te yúhú càchí-í sǎ vǎ cǎnchícúⁿ nihnu-gǎ-ó nchàa nacuáa ní cáháⁿ ndíi Moisés, dico núu vitna càchí-í sǎ xíní ñùhu-xi cada-o nchaa nacuáa ní cáháⁿ ndíi ña, te ñá túú quide vǎha-í núú Yǎ Ndióxi te núu ducaⁿ na càda-í. ¹⁹ Te yúhú duuⁿ duuⁿ ní cutnùní iní-í sǎ vǎ ndácù-í cada-í nchaa nàcuáa ní cáháⁿ ndíi Moisés núu xiǎⁿ ní dáñà-í ñá túú-gǎ nchícúⁿ nihnu-í nchaa nàcuáa ní cáháⁿ ndíi cuèndá sǎ cuìní-í cundecu-í sǎ cúu-xí Yǎ Ndióxi. ²⁰ Te Xítóhó Jesucristú ní xihí-gǎ cuèndá-í, dico dàtná tnúhu sǎ tnàhá-í ní xihí ndíhi-gǎ, chi ñá cúu-gǎ cada-í nchaa nàcuáa sàni iní mée-í, chi Xítóhó Jesucristú-nǎ ndécú ndíhi ñaha-gǎ xii-í táxi tnùnì ñáhá-gǎ. Te vitna ndècu-í ñuyíu-a, te ío sàndáá iní-í Xítóhó Jesucristú Déhe Yǎ Ndióxi, te chindee ñaha-gǎ xii-í. Te ñiu-ni Xítóhó Jesucristú ío cùu iní ñáhá-gǎ xii-í núu ní xihí-gǎ núú cùrúxí sǎ cuèndá-í. ²¹ Te vitna ñá túú dàquee tìhù-í sǎ vǎha ní quide ñaha Yǎ Ndióxi xii-í, chi núu ni ndàcu-o vǎ cùndècu cuéchi-o núú Yǎ Ndióxi cuèndá sǎ nchícúⁿ nihnu-o quide-o nchaa nacuáa ní cáháⁿ ndíi Moisés ní cùu ña, te àuⁿ nǎ cuu ní xihí Xítóhó Jesucristú ní cùu te núu ducaⁿ.

3

Vǎ dáñá ndèé-ó quèndáá iní-ó tnúhu Xítóhó Jesucristú

¹ Te nchòhó ñáyiú distritú Gàlaciá, ñáyiú sa xíndecu ichi Xítóhó Jesucristú, ¿ná

cuèndá ío ñí iní-ndó ñǎ cuìní-ndó tní-ndo nchaa tnúhu càháⁿ-gǎ?, ¿te yoo ní dádáhu ndodo iní ñáhá xii-ndo núu ducaⁿ quide-ndo? Te ñaha-ndo sǎ ío vǎha ní dánèhé ñáhá-ndí xii-ndo nàcuáa ní cuu ní xihí Xítóhó Jesucristú. ² Te vitna cáháⁿ-ndó núu sǎ nchícúⁿ nihnu-ndo nchaa nacuáa ní cáháⁿ ndíi Moisés ní níhi-ndó Espíritú Yǎ Ndióxi ndécú ndíhi-ndo, àdi sǎ ní sàndáá iní-ndó tnúhu Xítóhó Jesucristú sǎ ní dánèhé ñáhá-ndí xii-ndo ní níhi-ndó Espíritú-gǎ ndécú ndíhi-ndo. ³ Te nchòhó ío ñí díquí-ndó chi Espíritú Yǎ Ndióxi tá quide vǎha ñaha-xi xii-ndo cuáháⁿ ní cùu, ¿te nǎa vitna mee-nǎ-ndó cuìní-ndó càda-ndo nacuáa ta quide ñaha Espíritú-gǎ cuáháⁿ xii-ndo ní cùu-áⁿ? ⁴ Te sàni ñⁿ sàni úú iní-í cuèndá-ndó sǎ àuⁿ nǎ cuu nándi yáha-ndo ndècu-ndo ichi Yǎ Ndióxi. ⁵ Te xíní-ndó sǎ Yǎ Ndióxi ní taxi-gǎ Espíritú-gǎ ní ngúndecu ndíhi-ndo, te ní quide-gǎ sǎ vǎ yòo tnàhí ndàcu cada núú-ndó ní xíní-ndó. Te ducaⁿ ní quide-gǎ, chi ní sàndáá iní-ndó-gǎ, dico ñá díú cuèndá nchaa nàcuáa ní cachí ndíi Moisés cada ñáyiú ducaⁿ ní quide-gǎ.

⁶ Te ndíi Àbrahám ducaⁿ ío ní sàndáá iní ndíi Yǎ Ndióxi, núu xiǎⁿ ní cachí-gǎ sǎ ní cudíu ndíi núú-gǎ sǎ dúcáⁿ ní quide ndíi. ⁷ Te càchí tnúhu ndáá-í xii-ndo sǎ ncháá ñáyiú sàndáá iní ñáhá xii Yǎ Ndióxi dàtná ní sàndáá iní ñáhá ndíi Àbrahám xii-gǎ, ñáyiú-áⁿ ñⁿ-ni cúu-yu

ndihi ndii núú-gă. ⁸ Te núú tûtú Yă Ndiöxí ní ngódó tnùní tnúhu váha, tnúhu sá ní xáhaⁿ Yă Ndiöxí xii ndii Àbrahám, te duha ní xáhaⁿ-gă xii ndii: “Nchaa ñáyiú nihii ñuyíú cada váha-i-yu sá cuendá-n”, duha ní xáhaⁿ-gă xii ndii. Te sá dúcáⁿ ní ngódó tnùní núú tûtú Yă Ndiöxí ndéé dává-án, te xiăⁿ cùtnùní sá sàá nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gă te núu na quindáá iní ñáhă-yu xii-gă. ⁹ Te xiăⁿ núu nchaa ñáyiú sàndáá iní ñáhá xii Yă Ndiöxí cada váha ñaha-gă xii-yu dàtná ní quide váha-gá ndii Àbrahám, chi ndii-ánⁿ ducaⁿ ní sàndáá iní ñáhá ndii xii-gă.

¹⁰ Te nchaa ñáyiú cuini cada nchaa nàcuáa ní cáháⁿ ndii Moisés cuendá sá cuini-yu sá vă cùndècu-gá cuéchi-yu núú Yă Ndiöxí, ñáyiú-ánⁿ dañà nihnu ñaha-gá xii-yu, chi vá ndácũ-yu cadá-yu nàcuáa sàni iní-yu, te ducaⁿ cada-gá chi quèe ndáá-xi nàcuáa cáháⁿ-xi núú tûtú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndii Moisés te dañà nihnu ñaha-gá xii-yu. ¹¹ Te núu na cànchicúⁿ nihnu-ni-o cada-o nàcuáa ní cáháⁿ ndii Moisés, te ñá túú vèdana chìndee ñaha-xi xii-o nàcuáa vá cùndècu-gá cuéchi-o núú Yă Ndiöxí. Te ndáá chi núú tûtú-gá càchí-xi sá ncháá ñáyiú sàndáá iní ñáhá xii-gă, ñáyiú ñá túú-gă cuéchi-xi ndècu ío váha ndécú-yu núú-gă. ¹² Te núu dicó ío ñáyiú quide nchaandi túhú

nàcuáa ní cáháⁿ ndii Moisés ñá, te ñá túú xini ñuhu-xi quindáá iní-yu tnúhu Xítóhó Jesucristú, chi núú tûtú Yă Ndiöxí càchí-xi sá núu dicó ío ñáyiú ndacu cada nchaa nàcuáa ní cáháⁿ ndii Moisés ñá, te cundecu váha-yu núú Yă Ndiöxí.

¹³ Te tnúhu ní chídó tnùní ndii Moisés càchí-xi sá ío ndècu cuéchi-o núú Yă Ndiöxí cuendá sá ñă ndácú-ó cada-o nchaa nàcuáa ní cáháⁿ ndii, te cuendá xiăⁿ tá dañà nihnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuéchi-o cuendá sá vă dañà nihnu ñaha-gá Yă Ndiöxí xii-o. Te càchí-xi núú tûtú Yă Ndiöxí: “Íⁿ tée na càta caa-güedé íⁿ yutnu, te tée-ánⁿ cúú-dě tée dañà nihnu ñaha Yă Ndiöxí”, duha càchí-xi núú tûtú-gă. ¹⁴ Te ducaⁿ ní yáha Xítóhó Jesucristú, chi cuini Yă Ndiöxí sá ndùu táhú nchaa ñáyiú ñá túú cùu ñáyiú isràél cundecu váha-yu dàtná ní nduu táhú ndii Àbrahám ndécú vâha ndii. Te ducaⁿ ní yáha-gá cuendá nchaa nchoo ñáyiú sàndáá iní ñáhá xii-gă ngúndecu ndihi-o Espiritú Yă Ndiöxí sá ní cachí méé-gă taxi-gă.

Nàcuáa ní cachí Yă Ndiöxí cada-gă

¹⁵ Te nchòhó cue ñáyiú ndècu ndihi-í ichi Yă Ndiöxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùní-gă-ndó nàcuáa quide Yă Ndiöxí. Chi ñáyiú-ánⁿ òré cuini-yu cadá-yu íⁿ sá cadă-yu, te díhna-gă ndátnúhu-yu te òré cúú

ñⁿnuú-yu, te sáha fîrmá-yu ñⁿ tutú te tutú-áⁿ vǎ yǎo ñⁿ ndacu cáháⁿ sá vǎ nándîhi-gá-xi, te ni vǎ yǎo-gá ndacu nágá tnúhu chido tnùnî núú-xí. 16 Te ducaⁿ nî quide Yá Ndiǒxí ndîhi ndîi Àbrahám, chi ní xáhaⁿ-gǎ xii ndîi nàcuáa cada-gá, te tnúhu-áⁿ cúu-xí cuendá méé ndîi ndîhi cuendá ñⁿ ñanî tnáhá ndîi cundecu ñuyíú-a ndéé cuéé-gá. Te núu tûtú-gá càchî-xi sá tnúhu-áⁿ cúu-xí cuendá ñⁿ-ni ñanî tnáhá ndîi te ñá díú cuendá nchaá-yu. Te ñanî tnáhá ndîi téé cùu cuendá tnúhu-áⁿ cúu Xîtohó Jesucrîstú. 17 Te na càchî tnúhu-í xii-ndo sǎ Yá Ndiǒxí ní quide ndáa duuⁿ-gá ndîhi ndîi Àbrahám nàcuáa cada-gá. Te sa ní cuu cúmî ciendú ócò úxí cuíá sǎ dúcáⁿ nî xáhaⁿ Yá Ndiǒxí xii ndîi Àbrahám, te dǎtnùnî ní xáhaⁿ-gǎ xii ndîi Moisés chido tnùnî ndîi nàcuáa cada ñáiyu, te nchaa tnúhu ní chídó tnùnî ndîi Moisés ñá túú dàquee tíhú-xi tnúhu sá nî xáhaⁿ Yá Ndiǒxí xii ndîi Àbrahám nàcuáa cada-gá. 18 Te núu dícò cuendá nchaa tnúhu sá nî chídó tnùnî ndîi Moisés ní nanîhî tǎhú-ó ñá, te ñá túú-gǎ xínî ñúhu-xi cada cuendá-ó tnúhu ní xáhaⁿ Yá Ndiǒxí xii ndîi Àbrahám cada-gá ní cùu te núu ducaⁿ. Te ndîi-áⁿ nî nanîhî tǎhú ndîi chi ducaⁿ nî cachî Yá Ndiǒxí cada ñaha-gǎ xii ndîi.

19 Te nchaa tnúhu ní cáháⁿ ndîi Moisés ní ngódó núu-xí nchícúⁿ nihnu ñáiyu cuendá ducaⁿ cùtnunî inî-yu sá ndécú cuéchi-yu, te nchícúⁿ nihnu-nî-yu ndéé ní sáa nduu

nî quexìo Yaá cúu ñanî tnáhá ndîi Àbrahám, chi Yaá-áⁿ ducaⁿ nî xáhaⁿ Yá Ndiǒxí quixi-gá cada váha-gá nchaa ñáiyu. Te nchaa tnúhu ní chídó tnùnî ndîi Moisés, chi Yá Ndiǒxí ní tendaha-gǎ cue espíritú xínú cuèchi núu-gǎ ní sáháⁿ-xi ní xítnúhu ñaha-xi xii ndîi nàcuáa danèhé ndîi ñáiyu. 20 Te Yá Ndiǒxí ñá túú ní cáháⁿ-gá núu méé ñáiyu, chi ndîi Moisés ní cáháⁿ ndîi yuhu-gá núu-yu, dico cùtnáhá ní cáháⁿ ndîhi-gá ndîi Àbrahám chi núu méé núu ñⁿ ndîi ndîhi-gá ní xáhaⁿ-gǎ xii ndîi nàcuáa cada-gá.

Nàcuáa ndîu nchaa tnúhu ní chídó tnùnî ndîi Moisés

21 Te nchaa nàcuáa ní chídó tnùnî ndîi Moisés, ndîhi nchaa nàcuáa ní xáhaⁿ Yá Ndiǒxí xii ndîi Àbrahám cada-gá, ñá túú dàquee tíhú tnáhá-xí. Te núu dícò nanîhî tǎhú ñáiyu nchícúⁿ nihnu nchaa nàcuáa ní cáháⁿ ndîi Moisés ñá te cudíú-yu núu-gǎ cuendá-ni sá nchícúⁿ nihnú-yu nchaa nàcuáa ní cáháⁿ ndîi ni cùu, 22 Te núu tûtú Yá Ndiǒxí càchî-xi: “Nchaa nchòhó ñáiyu ndècu ñuyíú ndécú cuéchi-ndo”, duha càchî-xi. Te ducaⁿ cáháⁿ-xi cuendá quíndáa inî-ó Xîtohó Jesucrîstú, te nanîhî tǎhú-ó chi ducaⁿ nî cachî Yá Ndiǒxí cada-gá.

23 Te cùtnáhá vátá cùndècu ndîhi-gá-ó tnúhu Xîtohó Jesucrîstú, te nchícúⁿ nihnu-o nchàa nàcuáa ní cáháⁿ ndîi Moisés, te ní cutnùnî inî-ó sǎ ño ndècu cuéchi-o ni cùu. Te ducaⁿ-ni nchícúⁿ nihnu-o ndéé ní sáa nduu ní quexìo Xîtohó Jesucrîstú ñuyíú-a,

te ní sándáá iní-ó-gã. ²⁴ Te nchaa tnúhu sá nĩ chídó tnùnĩ ndíi Moisés ní sanu ichi ñaha-xi xii-o nacuaa cada-o cundecu-o, te ducaⁿ-ni sànu ichi ñaha-xi xii-o ndéé ní sáá nduu ní quexio Xítoho Jesucristú ñuyiú-a. Te ducaⁿ nĩ cuu cuendá quíndáá iní-ó-gã, te vá cundecu-gá cuéchi-o nũú Yã Ndiõxí. ²⁵ Te vitna ní ngúndecu ndihi-o tnúhu Xítoho Jesucristú, te ñá túú-gã xíní ñuhu-xi canu ichi ñaha nchaa tnúhu ní chídó tnùnĩ ndíi Moisés.

²⁶ Te vitna tnàhá nchaa nchòhó cúú-ndó dèhe Yá Ndiõxí, chi ní sándáá iní-ndó Xítoho Jesucristú. ²⁷ Te nchòhó ní sandute-ndo dàtná càchí-gá, te ndècu-ndo ndihi-gá, te quide-ndo nchaa nacuaa ní cáháⁿ-gá ndécú-ndó, te ío ndècu yiñuhu-ndo núú Yã Ndiõxí dàtná ndécú yiñuhu mee Xítoho Jesucristú. ²⁸ Te vitna ìⁿ-ni cùu-o nchaa-o ndecu-o ndihi Xítoho Jesucristú cuèi cùu-o ñáyiú isràèl àdi ñá túú cùu-o, te cuèi cùu-o ñáyiú ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiú dàñá queé nũú chíúⁿ pàtróóⁿ-xi, te cuèi téé te cuèi ñadihí ìⁿ-ni cùu-o nchaa-o ndecu-o ndihi Xítoho Jesucristú. ²⁹ Te nchòhó ndécú ndihi-ndo Xítoho Jesucristú, te cùu-ndo datná cue ñaní tnàhá ndíi Àbrahám, chi ní nduu táhú-ndó cundecu váha-ndo nũú Yã Ndiõxí dàtná ní nduu táhú ndíi-áⁿ ndécú váha ndíi núú-gá, te ducaⁿ chi mee-gã ducaⁿ nĩ cachí-gá cunduu.

4

¹ Te nchòhó xíní-ndó sã ìⁿ té lĩhli chi vátá nãgá cuãñaha tãtã-dě cuu cuendá-dé chi lĩhli-dé, te ìⁿ-ni cùu-dé ndihi téé xinu cuechi, dico na sáá nduu cuèhu-dé, te nduu táhú-dě nchaa sá ndécú ndihi tãtã-dě. ² Te xitò-yu té lĩhli-áⁿ sáhnú-dě ndéé sáá nduu nĩ cachí tãtã-dě sã cuãñaha-dě sá ndúú táhú-dě. ³ Te ducaⁿ sãtnahá-xi cùu nchoo, chi nchicúⁿ nihnu-o nchaa nacuaa ní cáháⁿ cue téé ní xíndecu ndéé sanaha ní cùu. ⁴ Te ní sáá nduu nĩ quide Yá Ndiõxí dàtná ní cachí-gá, te ní tendaha-gã Déhe-gá Xítoho Jesucristú ní quixi-gá ñuyiú-a, ní dácácú ñaha ìⁿ ñadihí te ní cuu-gá ñáyiú, te ní quide-gá nchaa nacuaa ní cáháⁿ ndíi Moisés. ⁵ Te ducaⁿ nĩ tendaha Yá Ndiõxí Déhe-gá cuendá sá vã cáncicúⁿ nihnu-gá-ó nchaa nacuaa ní chídó tnùnĩ ndíi Moisés cuendá ducaⁿ te cuu-o dèhe Yá Ndiõxí. ⁶ Te Yá Ndiõxí ní taxi-gá Espiritú Déhe-gá Xítoho Jesucristú ndécú ndihi-ndo chi cùu-ndo déhe-gá, te Espiritú-áⁿ chindèe ñaha-xi xii-ndo te càchí-ndó: “Yòhó Dútú Ndiõxí cúú-n Tãtã méé-ndí”, duha càchí-ndó. ⁷ Te xiãⁿ cúttnùnĩ iní-ndó sã cúú-ndó dèhe Yá Ndiõxí vitna, te ñá túú-gã cúú-ndó dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo déhe-gá, te Xítoho Jesucristú taxi-gá nchaa sá váha ní cachí Yã Ndiõxí nduu táhú-ndó.

Té Pãblú ío sàni iní-dé cuendá nchaa ñáyiú ndècu ichi Xítoho Jesucristú

⁸ Te cútnàhá vátá quíndáá-gá iní-ndó tnùhu Yá Ndiòxí ní xinu cuechi-ndo núu nchàa sá cächí-yu cùu ndiòxí te ñá ndáá sá ndiòxí cúu-xí.

⁹ Te vitna nchòhó càháⁿ ndihi-ndo Yá Ndiòxí, te mee-gã xìní ñáhá-gã xii-ndo, te ñá túú ndùu váha-xi nanchòcáva iní-ndó càda tucu-ndo nacuáa ní xóo cada-ndo díhna, chi nchaa xíãⁿ ñá túú vèdana nàndíhi-xi.

¹⁰ Te nchòhó cãnehe íi-ni-ndo ndùu cachi-ndó íi, te ñi-u-ni ducaⁿ quide-ndo dava yoó ndihi dava cuiá, te ndi tnahá nduu sácóo vico ñi-u-ni ducaⁿ quide-ndo cãnehe íi-ndó ndùu-áⁿ. ¹¹ Te ío sàni iní-í cuendá-ndó, chi na cuáháⁿ àúⁿ nã cuu ní dánèhè ñáhà-í xii-ndo tnùhu Yá Ndiòxí.

¹² Te cãháⁿ ndàhú-í núu nchòhó ñáyíu ndècu ndihi-í ichi Xítohó Jesucristú sá cadá-ndó dàtná quidè-í ñá túú nchicúⁿ nihnu-í nchaa tnùhu ní cãháⁿ ndíi Moisés, chi yúhú quidè-í vitna dàtná ní quide nchòhó ñá túú ní cãchicúⁿ nihnu-ndo nàcuáa ní cãháⁿ ndíi. Te cútnàhá ní xíndecu ndihi ñaha-í xii-ndo ní quide váha ñaha-ndo xii-í.

¹³ Te sa nàha-ndo sá cútnàhá ní cãháⁿ-í tnùhu Xítohó Jesucristú núu-ndó ndèé díhna ní cuhú-í, núu xíãⁿ ní xíndecu ndihi ñaha-í xii-ndo ní cãháⁿ-í tnùhu-gá núu-ndó. ¹⁴ Te cuéhé sã ñi tnahá-í-án cúu-xí ñiⁿ cuéhé sã vã yóo tnahí cundee iní-xi cundecu ndihi ñaha xii-í ní cùu, dico nchòhó chi ío váha ní cãháⁿ ndihi ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní cãháⁿ ndihi ñaha-ndo xii-í dàtná tnùhu sá yúhú

cúu-í ñiⁿ espíritú xínú cuèchi núu Yá Ndiòxí àdi datná méé Xítohó Jesucristú. ¹⁵ ;Te ná ní tnahá-ndó núu ñá túu-gã sání vãha iní-ndó cuendá-í dàtná ní xóo cada-ndo ndèé díhna ío váha ní xóo cani iní-ndó cuendá-í? Te na cächí tnùhu ndáá-í xii-ndo sã ío ní cuu iní ñáhá-ndó xii-í cútnàhá ní xíndecu ndihi ñaha-í xii-ndo, te nándi sá ndécú ndihi-ndo taxi-ndo xii-í ní cùu, te núu dicó sá cúu te ndéé tinùu-ndo tava-ndo te taxi-ndo xii-í ní cùu. ¹⁶ ;Te nãa cùu úhú iní ñáhá-ndó xii-í vitna cuendá sá cãháⁿ-í tnùhu ndáá tnùhu Yá Ndiòxí núu-ndó-ãⁿ?

¹⁷ Te ío ñáyíu ío váha cãháⁿ ndihi ñaha xii-ndo, dico ñáyíu-án ñúhú cuéhé iní-yu, chi cuiní-yu sá vã cúu-gã cãháⁿ ndihi tnahá-o, chi mee-nã-yu cundecu ndihi-ndo cuiní-yu. ¹⁸ Te váha quide ñáyíu cãháⁿ ndihi ñaha xii-ndo ndihi tnùhu yíñùhu, te núu cuiní-yu cadá-yu ñiⁿ sá vãha sá cúu-xí-ndó. Te ducaⁿ-ni na cadá-yu cuéi òré ñá túú ndècu ndihi ñaha-í xii-ndo. ¹⁹ Te nchòhó ñáyíu ní sanu ichi-í ichi Xítohó Jesucristú cächí tnùhu-í xii-ndo sá quidè-xí iní-í dàtná quidè-xí iní ñiⁿ ñadìhi ñaha sa ní tnahá òré cacu déhe-xi, te ducaⁿ quide-xi iní-í, chi ío vãi sani iní-í cuendá-ndó dàtná ní xóo cada-í ndéé díhna, te ducaⁿ-ni càda-í ndéé ná sàá nduu càda-ndo nchaa nacuáa cãháⁿ Xítohó Jesucristú. ²⁰ ;Te ío váha cada-xi te núu dicó tnavíi sa ndècu ndihi ñaha-í xii-ndo cuendá cãháⁿ-í núu-ndó nàcuáa cada-ndo, te ñá cútnùní iní-í nása cada-í cuendá-ndó!

Cuèndá ndíi Àgár ndíhi ndíi Sǎrá

21 Te nchòhó ñáiyu cùní canchicúⁿ nihnu nchaa tnúhu ní cáháⁿ ndíi Moisés, ¿náa ñá túú tècú tnùnì-ndó nàcuáa càháⁿ-xi tnúhu ní chídó tnùnì ndíi? 22 Chi càchí tnúhu ní chídó tnùnì ndíi-áⁿ sǎ ndíi Àbrahám ní xíndecu úú déhe ducuⁿ ndíi, te ìⁿ-dé ní cuu déhe ndíi ndíhi ñadihí méé ndíi ndíi Sǎrá, te ingá-dé ní cuu-dé déhe ndíi ndíhi ìⁿ ndíi ní xinu cuechi nũ-yu ní xínani Àgár. 23 Te sá dúcáⁿ nǐ cacu déhe ndíi Sǎrá, chi mee Yǎ Ndiõxí ní cundàhú iní ñáhá-gǎ xii-aⁿ, chi ducaⁿ nǐ cachí-gá cada-gá. Dico ndíi ní xinu cuechi-ǎⁿ chi ducaⁿ tnàhí ní nduu táhú ndíi-áⁿ sǎ cóo déhe ndíi. 24 Te na càchí tnúhu-í xii-ndo ná cúú sǎ nánèhé ndíi ndúú cue ndíi dǐhí-áⁿ. Te úú xito ní cáháⁿ Yǎ Ndiõxí nàcuáa cada-gá, te ìⁿ ndíi-áⁿ nánèhé ndíi nàcuáa ní cáháⁿ Yǎ Ndiõxí xito díhna nuu, te ingá tucu ndíi-áⁿ nánèhé ndíi nàcuáa ní cáháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yǎ Ndiõxí xii ndíi Moisés yucu Sinàí cada ñáiyu, te nchaa ñáiyu nchìcúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ ñà túú tnàhí ní dàñá-dé quee-dé núú chíúⁿ pàtróón-dě, te ducaⁿ sǎtnahá-xi cùu-yu chi nchìcúⁿ nihnú-yu nchaa nàcuáa ní xáhaⁿ Yǎ Ndiõxí xii ndíi Moisés. 25 Te tnúhu Àgár queé-xi: Yucu Sinàí, te yucu-áⁿ yíndèhu-xi nacióⁿ Àrabíá. Te ndíi Àgár-áⁿ nánèhé

tucu ndíi cue ñáiyu ndècu ñuu Jerusàlén, chi ñáiyu-áⁿ ndécú-nǐ-yu dàtná ní xíndecu ndíi Àgár ndíhi déhe ndíi, chi cue ndíi-áⁿ nǐ cuu cue ndíi ñáiyu ñà túú tnàhí ní dàñá quee núú chíúⁿ pàtróón-xi, te ducaⁿ sǎtnahá-xi cùu ñáiyu-áⁿ chi nchìcúⁿ nihnu-ní-yu nchaa nàcuáa ní cáháⁿ ndíi Moisés. 26 Dico nchoo nǐ nduu táhú-ó cùndecu-o ñuu Jerusàlén sáa núú ndécú Yǎ Ndiõxí, te vitna chi ñà túú-gǎ nchìcúⁿ nihnu-o nchàa nàcuáa ní cáháⁿ ndíi Moisés. 27 Te duha càháⁿ-í, chi núú tütú Yǎ Ndiõxí càchí-xi:

Yòhó ñaha ní nduu táhú vǎ cóo dèhe-xi ní cùu, vitna cana saa-n sǎ cúdíi iní-n cuèi vátá quíní-gá-n nǎsa càcu ìⁿ landú.

Te cuèi ní cuu táhú-n sǎ vǎ cóo dèhe-n ní cùu dico ío-gá tǐtní dèhe-n cóo dacúúxí xǐchí ní cuu táhú tnàhí sǎ cóo dèhe-xi.

Duha càchí-xi núú tütú-gá. 28 Te nchoo cuè ñáiyu ndècu ichi Xítohó Jesucristú vitna cùu-o datná ndíi Isàác, chi ndíi-áⁿ nǐ cacu ndíi, chi mee Yǎ Ndiõxí ní cachí-gá sǎ cacú ndíi. Te ducaⁿ sǎtnahá-xi cùu nchoo chi ní nduu-o dèhe-gá vitna chi ducaⁿ nǐ cachí tucu-gá cunduu. 29 Te déhe ndíi Àgár ní nduu táhú tnàhí ndíi sǎ cacú ndíi ñuyíú-a, te ndíi-áⁿ nǐ cuu úhú iní ndíi ndíi Isàác, te ndíi Isàác-áⁿ chi Espíritú Yǎ Ndiõxí ní guide ní cacu ndíi. Te ducaⁿ sǎtnahá-xi cùu vitna, chi nchaa nchoo ñáiyu ndècu ndíhi Espíritú Yǎ Ndiõxí cúú úhú iní ñáhá ñáiyu

xii-o, ³⁰ Te núú tütú Yă Ndiöxí cächí-xi: “Chí năcuícúⁿ xíchí xínú cuèchi ndíhi déhe-xi na nùhú-yu, chí déhe xíchí xínú cuèchi-áⁿ ñà túú nă níhí-dě nduu táhú-dě, chí mee-ni déhe ñaha ndècu vehe-xi nduu táhú-dě sá cuăñaha tătá-dě”, duha cächí-xi núú tütú-gá. ³¹ Te nchoo cuè ñáyiú ndècu ichi Xítohó Jesucristú ñá túú-gá cúú-ó dàtná cúú déhe ndíi ní xínu cuechi-ăⁿ, chí ní cuu-o vitna datná cúú ndíi ní nduu táhú nchaa sá ní sãñaha tătá-xi-áⁿ. Te ducaⁿ ní cuu, chí Yă Ndiöxí ní dácăcu ñaha-gă xii-o cuendá sá vă cãnhicúⁿ nihnu-gá-ó nchàa nacuáa ní cáháⁿ ndíi Moisés.

5

Cãnhicúⁿ nihnu-ni-o ichi Xítohó Jesucristú

¹ Te Xítohó Jesucristú ní quide-gá năcuáa vá cáni iní-ó sã nánihí tãhú-ó te núú na cãnhicúⁿ nihnu-o năcuáa ní cáháⁿ ndíi Moisés, te diu-ni ducaⁿ cáni iní-ó cundecu-o te vá ngõo cáni iní-ó sã nánihí tãhú-ó te núú na cãnhicúⁿ nihnu-o càda-o nacuáa ní cáháⁿ ndíi, chí núú ducaⁿ na càda-o te ío dandõho-o mee-o datná ní xõo ndõho-o cùtnáhá vátá cundècu-gá-ó ichi-a.

² Te yúhú té Păblú cuiní-í sá cundedõho-ndo ñⁿ tnúhu na cáháⁿ-í-a. Te núú nchõhó cuáha-ndo sěñá ññ-ndo cuendá sá sãndáá iní-ndó năcuáa ní cachí ndíi Moisés cada-ndo, te núú ducaⁿ na càda-ndo ña, te àúⁿ nă cuu ndècu-ndo ichi Xítohó Jesucristú te núú ducaⁿ. ³ Te dàtná ní cachí-í xii-ndo, te diu-ni ducaⁿ cáháⁿ tucu-í vitna sá nõu ndèda-ni càa ñⁿ

tée na cuáha-dé sěñá ññ-dé, te xini ñuhu-xi sá dàcuítí tãú-dé cada-dé nchaa năcuáa ní cáháⁿ ndíi Moisés. ⁴ Te nchaa nchõhó ñáyiú sàni iní sá ñà túú-gă cuèchi-xi ndècu núú Yă Ndiöxí cuendá sá nchicúⁿ nihnu-ndo nchàa nacuáa ní cáháⁿ ndíi Moisés, ñá túú-gă ndécú-ndó ndíhi Xítohó Jesucristú, te ni Yă Ndiöxí ñá túú-gă cundáhú iní ñáhá-gă xii-ndo càda váha ñaha-gă. ⁵ Dico nchaa nchoo ñáyiú sãndáá iní ñáhá xii-gá cùdiu-o núú-gă, chí chindee ñaha Espiritú-gá xii-o, te ndètu cahnu-ná-ó sàá nduu cùñaha nõú Yă Ndiöxí xii-o sá cùdiu-o núú-gă. ⁶ Te nchoo cuè ñáyiú ndècu ndíhi Xítohó Jesucristú ññ-ni quide-xi cuéi na cuáha-o sěñá ññ-o àdi vá cuáha-o, chí ñá túú chindee ñaha-xi xii-o nacuáa cundecu váha-o ndíhi-gá. Te ññ-dií ní sá xini ñuhu-xi quindáá iní-ó Xítohó Jesucristú, te núú ducaⁿ na càda-o te cuu iní-ó cuè tnaha ñáyiú-o.

⁷ Te nchõhó ío váha quide-ndo ndecu-ndo ichi Yă Ndiöxí ní cùu, te vitna cùnúhu-í sá ñà túú-gă sãndáá váha iní-ndó tnúhu-gá, te ducaⁿ quide-ndo chí ndècu ñáyiú sãnu ichi ñaha xii-ndo ingá ichi. ⁸ Te ñá díú Yă Ndiöxí Yaá ní cáháⁿ ñáhá xii-ndo ducaⁿ ní cachí-gá cada-ndo sã vă quindáá-gá iní-ndó tnúhu-gá. ⁹ Te nchõhó xini-ndó sã nõu luha levadurá ná quíhu yuchi te dãndaa-xi. Ducaⁿ sãtnahá-xi cùu ñáyiú dãndahú ñáhá xii-ndo, chí cuiní-yu dàcuíta nihnu

ñàhá-yu xii-ndo nchàa-ndo.
 10 Te yúhú cútñuní ndáá iní-í sá Xítóhó Jesucristú chindee ñàha-gá xii-ndo cuendá sá ñá túú nǎgá tnúhu quindáá iní-ndó, dico nchaa ñáyiú ducaⁿ dándahú ñáhá xii-ndo nacháhu-yu núú Yá Ndióxi nchaa sá quidě-yu cuěi náí-gá ñáyiú cùú-yu.

11 Te cǎchí tnúhu-í xii nchòhó ñáyiú ndècu ndihi-í ichi Yá Ndióxi sá nǔú dicó dǎnehé-ni-í ñáyiú sá cuǎha-yu seǎná ñii-yu dàtná ní cachí ndíi Moisés ñá, te vá yóo cuu úhú iní ñáhá xi-í ní cùu, te ni vǎ túu úhú iní-yu cuendá sá nǐ xíhí Xítóhó Jesucristú núú cùrúxí ní cùu. 12 Te nchaa ñáyiú dǎsatú iní ñáhá xii-ndo sá cuǎha-ndo seǎná ñii-ndo, te váha-gá sá ná cǎdǎ-yu mée-yu ñⁿ tnúndòho, te ñá díú sá dúcáⁿ cǎnuichi ñahá-yu xii-ndo cùndecu-ndo.

13 Te nchòhó ñáyiú ndècu ndihi-í ichi Xítóhó Jesucristú diu-gá ní taunihnu ñaha-gǎ xii-ndo cuendá sá vǎ cǎnchicúⁿ nihnu-gǎ-ndó nchàa nacuáa ní cǎháⁿ ndíi Moisés, dico vá cǎní iní-ndó sǎ sǎ dúcáⁿ nǐ taunihnu ñaha-gǎ xii-ndo, te cuu-ni cada-ndo nǎndi sá cuèhé sá dúhá véxi iní-ndó, dico cuu iní tnáhá-ndó ñⁿ ñⁿ-ndo te chindee tnàha-ndo. 14 Chi ducaⁿ cǎháⁿ Yá Ndióxi sá cúú iní-ó cuè tnaha ñáyiú dàtná cúú iní-ó mée-o. Te núú ducaⁿ na cǎda-o, te quide-o nchaa nacuáa táú-xi cada-o dàtná cǎháⁿ nchaa tnúhu ní chídó tnùní ndíi Moisés. 15 Te núú nchòhó cúú úhú iní tnáhá-ndó

ndècu-ndo, te ñá túú quide váha-ndo te núú ducaⁿ quide-ndo, dico yúhú cǎchí-í sá vǎ dúcáⁿ-gǎ cada-ndo cùndecu-ndo cuendá sá vǎ dǎcuíta nihnu tnàha-ndo.

Nacuáa sàni iní ñáyiú ndècu ichi cuehé ichi duha ndihi nacuáa sàni iní ñáyiú ndècu ndihi Espiritú Yá Ndióxi

16 Te na cǎchí tnúhu-í xii-ndo sǎ cǎdá-ndó nchàa nacuáa cuini mée Espiritú Yá Ndióxi cada-ndo, te ducaⁿ te vá cǎní-gǎ iní-ndó cǎda-ndo nǎndi nchaa sá cuèhé sá dúhá sàni iní mée-ndó. 17 Chi nchaa xǎⁿ ñá túú tnáhá tnúhu-xi ndihi Espiritú Yá Ndióxi. Te diu-ni ducaⁿ quide Espiritú Yá Ndióxi, chi ñá túú tnàhá iní-xi nchaa sá cuèhé sá dúhá sàni iní-ndó. Te sá dúcáⁿ ñá túú tnáhá tnúhu tnàha-xi xǎⁿ ñá túú ñihí ndéé-ndó cǎda-ndo ñⁿ sá váha sàni iní-ndó cǎda-ndo. 18 Te núú quide-ndo nchaa nacuáa sànu ichi ñaha Espiritú Yá Ndióxi, te ñá túú-gǎ táxi tnùní ñáhá nchàa tnúhu ní chídó tnùní ndíi Moisés xii-ndo.

19 Te nchaa ñáyiú xini-yu nchaa nacuáa quide ñáyiú quide cuehé quidé duha. Te duha quidé-yu: Cue tée cǎháⁿ ndihi-güedé ñáyiú dihi te ñá díú ñàdihí-güedé cúú-yu, te diu-ni ducaⁿ xǐquide cue ñáyiú dihi, te nǎndi-gǎ nchaa sá cuèhé sá dúhá cuǎháⁿ véxi-yu quidé-yu. 20 Te quide cǎhnú-yu nchaa sá cǎchí-yu cùu ndióxí te ñá ndáá sá ndióxí cúú-xí, te quide nduu tnahá-yu, te cùu úhú iní tnáhá-yu, te nǎá-yu, te cùu cuiñú tnáhá-yu, te ío

yáchí cúde^ñ-yu, te ndúcú-yu mee-ni sã cúú-xí mée-yu, te ñá túú cùu ìⁿnuú-yu cundecú-yu, te quide díⁿ tnahá-yu. ²¹ Te cùu cuedú ìⁿ-yu nchaa sá ndécú ndìhi dava-gá-yu, te sàhni tnahá-yu, te ío quihú-yu, te ndì cuu ndi cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa càchí tnúhu-í xii-ndo sã ncháá ñáyiú ducaⁿ xiquide vá ndúú tãhú-yu cundecú-yu núú ndécú Yã Ndiõxí táxí tnùní-gá.

²² Dico Espíritú Yã Ndiõxí chindèe ñaha-xi xii-o cuu iní tnahá-ó, te cudíⁿ iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnahá-ó, te quide ndáá-ó ndècu-o. ²³ Te ndàhú iní-ó, te quide-o nchaa nacuaá tàú-ó càda-o, te nchaa xiãⁿ chindèe ñaha Espíritú Yã Ndiõxí quidé-ó, te núu ducaⁿ quide-o, te vá yõo ìⁿ-gá cáháⁿ sá ñà túú quide váha-o ndècu-o. ²⁴ Te nchoo cuè ñáyiú ndècu ndìhi Xítohó Jesucristú, sa nàha-o sá ñi xihí-gá núú cùrúxí sá cuendá-ó, núu xiãⁿ duuⁿ duuⁿ ní dãñá-ó nchaa ichi cuehé ichi duha, te ñá túú-gã táxí tnùnì ñáhá ñi ìⁿ sá cuèhé sá dúhá sã ñi xóo caní iní-ó ní cùu. ²⁵ Te vitna ní ngúndecu ndìhi-o Espíritú Yã Ndiõxí chindèe ñaha-xi, te xini ñuhu-xi sá cádá-ó nãcuáa sãnu ichi ñaha Espíritú-gá cada-o.

²⁶ Te vá cádá càhnu-o mee-o, te vá ndúcú-ó plètú, te ñi vá cúú cuedú iní-ó sã ndécú ndìhi tnahá ñáyiú-o.

6

Chindee tnàha-o ìⁿ ìⁿ-o

¹ Te nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sã ñúu ìⁿ ñáyiú ndècu ndìhi-ndo ichi-gá ní quidé-yu ìⁿ sá ñà túú tàú-yu cadá-yu núú-gã, te nchòhó ñáyiú quide váha ndècu ndìhi Espíritú Yã Ndiõxí cáháⁿ-ndó dôho cue ñáyiú ducaⁿ xiquide-ãⁿ cuendá nucúnu ichi-yu, te vii vii cáháⁿ ndìhi-ndó-yu, te ío coto-ndo mée-ndo cuendá sá vã cádá-ndó ìⁿ sá ñà túú tàú-ndó càda-ndo núú-gã.

² Te ío chindee tnàha-ndo, te cuáha tnàha-ndo tnúhu ndee ìⁿ cundecu-ndo cuendá nchaa sá yãha-ndo. Te núu ducaⁿ na càda-ndo, te quide-ndo nchaa nacuaá ní cáháⁿ Xítohó Jesucristú cada-o.

³ Te núu ío ìⁿ-ndo càchí-ndó sã ío váha quide-ndo ndecu-ndo ichi Yã Ndiõxí te ñá ndáá ñá, te dicó dándahú-ndó mée-ndo sá dúcáⁿ quide-ndo. ⁴ Te ndì díⁿ ndì díⁿ càda cuendá-ndó ñúu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíⁿ ìⁿ-ndó sã cúú-xí mée-ndo, te vá caní ìⁿ-ndó sã quidé váha-gá-ndó dàcúxí dãva-gá-yu. ⁵ Chi tàú-ó sã ndì díⁿ ndì díⁿ càda cuendá-ó nãcuáa ndècu-o.

⁶ Te nchaa nchòhó ñáyiú dàcuaha tnúhu Yã Ndiõxí chindee-ndo cuè téè dàcuaha ñaha xii-ndo tnúhu-gá cuãñaha-ndo nãndi sá xini ñuhu-güedé.

7 Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yă Ndiôxí, chi nchòhó xìní-ndó sã nũu na càda váha-o cundecu-o, te cùu-xi ìⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. ⁸Te núu quide-o nchaa sá cuèhé sá dúhá sàni iní-ó, te diu-ni xí^ã dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yă Ndiôxí xii-o, te cundecu ndihi-o Yă Ndiôxí ni caa ni quíhíⁿ. ⁹Te xìní ñuhu-xi vá dáñá ndeé-ó càda váha-o cundecu-o, te ducaⁿ te sáá nduu càda váha ñaha Yă Ndiôxí xii-o, te núu vá ná túhú iní-ó càda váha-o cundecu-o. ¹⁰Te cada-o sã váha sá cúú-xí nchaa tñaha ñáyiu-o vitna ndecu-o ñuyíú-a, te ío-gá tàú-ó chindee-o cue ñáyiu ndècu ndihi-o ichi Xítóhó Jesucristú.

Tnúhu ndeé núu ñí ndihi-ná

¹¹Te cundehe-ndo sã ndãa ndãa lètrá tèè-í núú tütú-a sá cúú-xí-ndó. ¹²Te nchaa ñáyiu quide yicá sá cuãha-ndo seña ñí-ndo dàtná ní cachí ndíi Moisés, ñáyiu-áⁿ cúú-yu ñáyiu cuiní cudíu núú tñaha ñáyiu-xi. Te ducaⁿ quidé-yu cuendá sá vã ndóhõ-yu cuendá nchaa tñuhu sá dánèhé ñáhá sã ñí xíhí Xítóhó Jesucristú núú cùrúxí. ¹³Te ni ñáyiu sa ní ngúndecu ndihi seña ñí-xi ñá túú quidé-yu nchaa nàcuáa ní cáháⁿ ndíi Moisés, dico mèe-yu cuiní-yu sá cuãha-ndo seña ñí-ndo. Te ducaⁿ quidé-yu chì quide cahnú-yu mèe-yu núú nchaa dava-gá ñáyiu. ¹⁴Te yúhú chì ñá túú quide cahnu-í mèe-í

cuendá nchaa sá quidè-í, chi mee-ni sã ío cùu váha iní-í sá Xítóhó Jesucristú ní xíhí-gá núú cùrúxí cuendá-ó. Te diu cuendá sã ñí xíhí-gá ñá túú-gã ndècù-í ichi cuèhé ichi duha, te ni ñá túú-gã táxí tñuní ñáhá ñí ìⁿ sá cuèhé sá dúhá xii-í. ¹⁵Te ñá túú-nã chindèe ñaha-xi xii-o cuéi na cuãha-o seña ñí-ó àdi vá cuãha-o, chi ndècu ndihi-o Xítóhó Jesucristú, te ní nduu-o dàtná ìⁿ ñáyiu saa, te xí^ã cúú-xí sã ío-gá xíní ñuhu-xi. ¹⁶Te xicáⁿ táhù-í núú Yă Ndiôxí sá ncháá nchòhó ñáyiu quide nchaa nacuáa càháⁿ-í-a cundecu nahi-ndo, nchòhó ñáyiu cùu cuendá Yă Ndiôxí dàtná ñáyiu israhél chi ñáyiu-áⁿ ñí cachí-gá sá cúú cuendá-gá. Te mee-gã ío cundàhú iní ñáhá-gã xii-ndo chindee ñaha-gã.

¹⁷Te není vitna cuiní-í sá vã yõo ìⁿ-gá chidácá nihnu ñaha xii-í cuendá chiúⁿ quide-í, chi yayàcáⁿ sa ní nduu tílòhó ñí-í cuendá sá ndóhò-í cuendá Xítóhó Jesucristú.

¹⁸Te nchòhó ñáyiu ndècu ndihi-í ichi Xítóhó Jesucristú xicáⁿ táhù-í núú-gã sá ío na chindee ñaha-gã xii-ndo nchaa-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

*Té Päblú cadúha-dé tutú
quíhiⁿ ndaha ñáyiú xĩndecu ichi
Xítohó Jesucristú ndécú ñuú
Éfesú*

¹ Yúhú té Päblú ní tendaha ñaha Yá Ndióxi càháⁿ-í tnúhu Xítohó Jesucristú núú ñáyiú, chi ducaⁿ ñí cachí Yá Ndióxi cunduu, te vitna cadúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndióxi xĩndecu ñuú Éfesú, te diu-ni nchòhó cúu-ndó ñáyiú sàndáá iní ñáhá xii Xítohó Jesucristú.

² Te xicáⁿ táhù-í núú Dütú Ndióxi Yaá cúú Tátá-ó, ndihi núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndì nduú-gá ná cadá te ío váha cuu iní-ndó cùndecu-ndo.

Espíritú Yá Ndióxi chĩndèe ñaha-xi xii-o chi ndècu ndihi-o Xítohó Jesucristú

³ Te cachí-ó sá ío càhnu cuu Yá Ndióxi Yaá cúú Tátá Xítohó Jesucristú, te ndéé andiú quide Yá Ndióxi nchaa sá váha sá cúu-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítohó Jesucristú. ⁴ Te ndéé cùtnàhá vátá ngáva-gá ñuyúú ñí cachí Yá Ndióxi sá nchóó cùu-o ñáyiú cùu cuendá-gá, te ducaⁿ ñí cachí-gá sá cuendá Xítohó Jesucristú cuendá sá

nchóó cùu-o ñáyiú ñá túú tnàhí ná cumání cundecu núu-gá, te ducaⁿ te vá cùndècu cuèchi-o. ⁵ Te Yá Ndióxi ío cùu iní ñáhá-gá xii-o núu xiáⁿ ducaⁿ ñí cachí-gá ndéé cùtnàhá vátá ngáva-gá ñuyúú sá nchóó nduú-o déhe-gá. Te sá cuendá nchaa sá cadá Xítohó Jesucristú sá cúu-xi-ó, xiáⁿ ducaⁿ ñí cachí Yá Ndióxi, te ducaⁿ ñí cachí-gá chi ducaⁿ tnàhí ní sani iní-gá cunduu. ⁶ Te xiáⁿ núu xìni ñuhu-xi sá nchóó càchí-ó sá ío càhnu cuu Yá Ndióxi, chi ío cùndahú iní ñáhá-gá chĩndèe ñaha-gá xii-o. Te ducaⁿ quide-gá chi ndècu ndihi-o Xítohó Jesucristú Yaá ío cùu iní-gá. ⁷ Te Yá Ndióxi ío cùu iní ñáhá-gá xii-o núu xiáⁿ Xítohó Jesucristú ní sati ñíñi-gá te ní xihí-gá cuendá dacacu nihnu ñaha-gá xii-o núu ùhú núú ndàhú, te ducaⁿ càda cahnu iní-gá nchaa yicá cuèchi-o. ⁸ Te Yá Ndióxi ío cùndahú iní ñáhá-gá chĩndèe ñaha-gá xii-o, nàcuáa ngùndecu ndihi-o nchàa sá xìni tnùní-ó te ducaⁿ te cuu-o ñáyiú tècú tnùní. ⁹ Te Yá Ndióxi ní dánèhé ñáhá-gá xii-o nchàa sá ndúú yùhu, nchaa sá ñí sani iní-gá cada-gá. Te ducaⁿ ñí quide-gá chi ducaⁿ ñí sani iní-gá cunduu. ¹⁰ Te sá ñí sani iní-gá cada-gá te dacutíí sá cadá-gá ná sàá nduu, te na sàá nduu-áⁿ te mee-gá cada sá Xítohó Jesucristú quindaha-gá nchaa sá ío andiú, ndihi nchaa sá ío ñuyúú-a.

¹¹ Te nchoo ñí nduu táhú-ó ñí nduu-o ñáyiú cùu cuendá

Yă Ndiöxí chi ndècu ndihi-o Xítohó Jesucristú. Te ducaⁿ ní cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gă năcuăa sàni iní mée-gă cunduu. ¹² Te ducaⁿ ní cuu cuendá sá nchũhú ñáyiú díhna nuu ní sándáá iní tnúhu Xítohó Jesucristú cáháⁿ-ndí sá ío cànhu cuu mee Yă Ndiöxí cuendá nchaa sá vâha quide-gă. ¹³ Te nchòhó tucu cùtnàhá ní xíndedóho-ndo tnúhu ndáá tnúhu sá cáháⁿ năcuăa naníhí tãhú-ó ní cuu ìⁿnuu-ndo ndihi Xítohó Jesucristú chi ní sándáá iní-ndó-gă. Te xíãⁿ cùtnùní sá nchòhó ní nduu-ndo ñáyiú cùu cuendá Yă Ndiöxí, chi ní ngúndecu ndihi-ndo Espíritú-gă sá ní cachí-gă taxi-gă. ¹⁴ Te sá ndécú ndihi-o Espíritú Yă Ndiöxí xíãⁿ cùtnùní sá ndáá nduu tãhú-ó cùndecu-o ndihi-gă ná sáá nduu năcuaca ñaha-gă xii nchaa nchoo ñáyiú cùu cuendá-gă, te sá dúcáⁿ càda-gă nũu xíãⁿ tãu-ó càchí-ó sá ío cànhu cuu-gă.

Té Păblú xicáⁿ tãhú-dě núú Yă Ndiöxí cuendá cue ñáyiú ndècu ichi-gă

¹⁵ Te yúhú ñihí-í tnúhu sá nchòhó ío vâha sándáá iní-ndó Xítohó Jesucristú, te nchaa ñáyiú cùu cuendá Yă Ndiöxí ío cùu iní-ndó-yu. ¹⁶ Te xíãⁿ nũu ñá túú dàña ndeé-í ndacáⁿ tãhú-í núú-gă cuendá-ndó, te ío xicáⁿ tãhú-í ¹⁷ núú Yă Ndiöxí Yaá cúú Tãtá Xítohó Jesucristú cuendá-ndó. Te ðiⁿ-ni Yă Ndiöxí cúú-gă Yaá ío cànhu cuu. Te xicáⁿ tãhú-í núú Yă

Ndiöxí sá mée-gă ná cáda sã Espíritú-gă chindee ñàha-xi xii-ndo cuendá cuu-ndo ñáyiú təcú tnùní, te na càda-xi sá cùtnùní iní-ndó năcuăa sàni iní Yă Ndiöxí. ¹⁸ Te ducaⁿ xicáⁿ tãhú-í núú Yă Ndiöxí cuendá-ndó, cuendá sá nchòhó tecú tnùní-ndó năcuăa nduu tnúhu ndee iní ní taxi-gă ní ngúndecu ndihi-ndo cùtnàhá ní cáháⁿ ñáhá-gă xii-ndo. Te ducaⁿ cùtnùní tucu iní-ndó sã ncháá sã ní cachí-gă taxi-gă nduu tãhú nchoo cuè ñáyiú cùu cuendá-gă cúú-xí mèe cuií-ni sá ío-gă vâha. ¹⁹ Te cùtnùní tucu iní-ndó sã Yă Ndiöxí ío cànhu cuu-gă quide-gă nchaa núú sã vâha sá cúú-xí nchò ñáyiú sándáá iní ñáhá xii-gă, chi quide-gă sá vã yòo tnàhí ndàcu cada sá cúú-xí-ó dàtná ní quide-gă ²⁰ ní dándótó-gă Xítohó Jesucristú cùtnàhá ní xíhí-gă. Te ní taxinucóo-gă Xítohó Jesucristú xio cùha-gă táxí tnùní-gă. ²¹ Te Xítohó Jesucristú ío-gă cùnũu-gă dàcúúxí nchaa núú cuè espíritú, ndihi dàcúúxí nchaa cue tée yíndaha ñáyiú, ndihi dàcúúxí nchaa dava-gă cue tée cùnũu. Te cuèi vitna te cuèi ndeé núú cuaháⁿ núú vèxi ducaⁿ-ni ío cunuu-gă taxi tnùní-gă. ²² Te mee Yă Ndiöxí ní quide-gă sá Xítohó Jesucristú taxi tnùní-gă nchaandi túhú sá ío, te ðiⁿ-ni mee Yă Ndiöxí ní cachí-gă sá ncháá ñáyiú cùu cuendá-gă quíndaha ñàha Xítohó Jesucristú. ²³ Te cada iní-ó sã ncháá ñáyiú cùu cuendá Yă Ndiöxí cúú-yu yiqui cùñú Xítohó Jesucristú, chi ìⁿ-ni

cùu-yu ndihi-gá, te mee-gã táxí tnùnì-gá nchaandi túhú sá íó.

2

Yá Ndiöxí ío cùndahú iní ñáhá-gã xii-o núu xíáⁿ ní dácácu nihnu ñaha-gã

¹ Te nchòhó cúu-ndó dàtná ñáyiú ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ní caa ní quíhíⁿ.

² Te ducaⁿ ñí xíndecu-ndo ìchi cuehé ìchi duha, chi ní cáncicúⁿ nihnu-ndo nchaa sá cuèhé sá dúhá íó ñuyúú-a, te ní xóo cada-ndo nchaa nacuaá càháⁿ sácuihná, te ñiu-ni sácuihná-ãⁿ táxí tnùnì-xi nchaa dava-gã espíritú cùndìhi-xi, te ñiu-ni-xi ndècu ndihi-xi nchaa ñáyiú ñá túú cuiní tñi tnúhu càháⁿ Yá Ndiöxí, te dàcaháⁿ ñáhá-xí xii-yu cuendá cundecu-ni-yu ìchi cuehé ìchi duha. ³ Te nchaa-o ñucaⁿ ní xóo cada-o dàtná quidé cuè ñáyiú-áⁿ, chi ní xóo cada-o nchaa sá cuèhé sá dúhá ñí xóo cani iní-ó, te nándi-gã nchaa sá cuèhé sá dúhá ñí xóo cahu iní-ó ñí xóo cada-o, núu xíáⁿ tàú-ó sã dándòho ñaha Yá Ndiöxí xii-o ní cùu datná tàú-xi dandòho-gã nchaa ñáyiú ducaⁿ ndècu ìchi cuehé ìchi duha-áⁿ. ⁴ Te Yá Ndiöxí ío cùu iní ñáhá-gã xii-o núu xíáⁿ ní cundahú iní ñáhá-gã xii-o ⁵ cuèí cùu-o datná ñáyiú ní xíhí sá cuendá nchaa sá cuèhé sá dúhá quide-o ni cuu. Te ducaⁿ ñí quide-gã ní cundahú iní ñáhá-gã xii-o

cuendá cundecu-o ndihi Xítóhó Jesucristú vitna, te cuu ñⁿnuu-o ndihi-gã. Te sá cuendá-ni sá cùndahú iní ñáhá Yá Ndiöxí xii-o xíáⁿ ní quide-gã nacuaá nchoo naníhí tàhú-ó. ⁶ Te cada iní-ó sã dàtná ní quide Yá Ndiöxí cùtnáhá ní dándótó-gã Xítóhó Jesucristú cùtnáhá ní xíhí-gã ducaⁿ ñí quide ñaha-gã xii-o chi ndècu-o ndihi-gã vitna. Te Xítóhó Jesucristú sa ndècu-gã andiú núú ndécú Yá Ndiöxí. Te cada iní-ó sã Yá Ndiöxí sa ní quide-gã sá nchóo ñí ngúndecu túu-o ndihi Xítóhó Jesucristú, chi ío váha ndècu-o vitna. ⁷ Te Yá Ndiöxí quidé vâha ñaha-gã xii-o vitna cuendá sá ná sáá nduu, te ñiu-ni mee-gã cada te cutnùnì iní nchaa ñáyiú sá ío cùu iní ñáhá-gã xii-o, te ducaⁿ ío chindee chitúu ñaha-gã xii-o cuendá sá ndécú ndihi-o Xítóhó Jesucristú. ⁸ Te Yá Ndiöxí ío cùndahú iní ñáhá-gã xii-ndo núu xíáⁿ ní quide-gã sá nchòhó naníhí tàhú-ndó, Te ducaⁿ ñí quide-gã chi ní sándáá iní-ndó-gã. Te ñá ñíú sã cuendá ñⁿ chiuⁿ ní quide-ndo ducaⁿ ní naníhí tàhú-ndó, chi mee Yá Ndiöxí ní cuiní-gã sá ñicó-ni ducaⁿ naníhí tàhú-ndó. ⁹ Te mee Yá Ndiöxí ní cachí-gã sá ñà ñíú cuendá ñⁿ chiuⁿ quide-o naníhí tàhú-ó, te ducaⁿ ñí cachí-gã cuendá sá vã cádá càhñu-o mee-o. ¹⁰ Te Yá Ndiöxí ní quide ñaha-gã xii-o dàtná ñⁿ ñáyiú saa cuendá sá ñí tnahá tnúhu-o ndihi Xítóhó Jesucristú, te ducaⁿ ñí quide-gã cuendá sá cádá-ó

mèe-ni sá vǎha. Te Yá Ndiöxí ducaⁿ tnàhí ní sani iní-gá cunduu sá nchóó cùu-o ñáyiú cada mee-ni sǎ vǎha.

Xítohó Jesucristú quidé-gǎ ío váha cùu iní-ó ndècu-o

11 Te nchòhó chí dándàcu iní nàcuáa ní xíndecu-ndo ní cùu, chí ñá túú cùu-ndo ñáyiú isràél, te ni ñà túú quíde-ndo datná quidé ñáyiú-án, chí ñáyiú-án sǎha-yu sèñá ñí-yu, te dàquee tíhũ-yu nchaa ñáyiú ñá túú ndècu seña ñí-xi.

12 Te chí dándàcu iní nàcuáa ní xíndecu-ndo, chí dàvá-án ñà túú ní xíndecu-ndo ndíhi Xítohó Jesucristú, te ni ñà túú ní xǒo cuu tnahá tnúhu-ndo ndíhi ñáyiú isràél, te ni ñà túú ní xini tnùní-ndó nàcuáa ndùu tnúhu sá ñí cáháⁿ ndáá Yá Ndiöxí nàcuáa cada váha-gá ñáyiú, te ni ñà túú ní cùu-ndo ñáyiú quíndaha-gǎ, te ni ñà túú ní xǒo níhi-ndó tnúhu ndee iní sá cundècu-ndo ndíhi-gá. 13 Te cuèi ní cuu-ndo ñáyiú ñá túú tnàhá tnúhu ndíhi Yá Ndiöxí ní cùu, dico vitna ní tnahá tnúhu-ndo ndíhi-gá chí cùu ñínuu-ndo ndíhi Xítohó Jesucristú, cuendá sá ñí sati níñí-gǎ te ní xíhi-gá te xǎⁿ ducaⁿ tnàhá tnúhu-ndo ndíhi Yá Ndiöxí vitna. 14 Te Xítohó Jesucristú ní quíde-gá sá nchóó ío váha cuu iní-ó cundècu-o, te diu-ni-gá ní quíde cuendá sá vǎ dáquèe tíhú ñáhá ñáyiú isràél xii ñáyiú ñá túú cùu ñáyiú isràél, te ducaⁿ ñí-ná cuú-yu cundecú-yu. 15 Te sá ñí xíhi Xítohó Jesucristú, xǎⁿ ñá túú-gǎ cúnúu nchaa tnúhu sá sánú ìchi ñaha xii ñáyiú

nàcuáa cadá-yu cundecú-yu ní cùu. Te ducaⁿ ñí xíhi Xítohó Jesucristú cuendá sá cuè ñáyiú isràél ndíhi cue ñáyiú ñá túú cùu ñáyiú isràél ñí-ná cuú-yu cundecú-yu ichi-gá, te ducaⁿ te vǎ dáquèe tíhú tnàhá-gǎ-yu, te ío váha cundecu ndíhi tnàhá-yu. 16 Te ducaⁿ ñí quíde Xítohó Jesucristú ní xíhi-gá núú cùrúxí cuendá sá cuè ñáyiú cùu ñáyiú isràél ndíhi cue ñáyiú ñá túú cùu ñáyiú isràél vǎ dáquèe tíhú tnàhá-gǎ-yu. Te ducaⁿ ñí xíhi-gá cuendá ñí-ná cuú-yu tnahá tnúhu-yu ndíhi Yá Ndiöxí nàcuáa cuu váha iní ñáhá-gǎ xii-yu.

17 Te cuèi cùu-ndo ñáyiú ñá túú tnàhí xini ndáá cuendá Yá Ndiöxí ní cùu, dico Xítohó Jesucristú ní quixi-gá ñuyú-a ní cáháⁿ-gá tnúhu váha nàcuáa ío váha cuu iní-ndó cundècu-ndo ndíhi Yá Ndiöxí. Te diu-ni ducaⁿ ñí quíde-gá sá cúu-xí nchàa ñáyiú sa xini cuendá Yá Ndiöxí, diu-ni ñáyiú isràél. 18 Te cuèi cùu-o ñáyiú isràél àdi ñá túú cùu-o dico diu-ni mee Xítohó Jesucristú ní quíde-gá sá ncháá-ó tnàhá tnúhu-o ndíhi Dútú Ndiöxí Yaá cúu Tátá-ó. Te ducaⁿ ñí tnahá tnúhu-o ndíhi Yá Ndiöxí chí ní ngúndecu ndíhi-o Espíritú-gá. 19 Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndíhi Yá Ndiöxí ní cùu, dico vitna chí ñí-ná ní cuu-ndo ndíhi nchaa dava-gá ñáyiú cùu cuendá-gá chí cùu-ndo déhe-gá. 20 Te cada iní-ó sǎ cuè téé ní táuchíuⁿ Xítohó Jesucristú

cáháⁿ tnúhu-gá, ndihi cue téé ní xóo cáháⁿ tnúhu Yá Ndiöxí ndéé sanaha cùu-güedé dàtná cimientú ìⁿ vehe, te nchòhó cùu-ndó dàtná ndóho sá sàá vehe-áⁿ, te cada tucu iní-ó sá Xítohó Jesucristú cùu-gá ìⁿ yúú cúnùu cuu cimientú vehe-áⁿ. ²¹ Te ducaⁿ ìo váha cùu ìⁿnuu nchaa ndóho-áⁿ ndihi yúú cúnùu-áⁿ, te ducaⁿ tucu ìo váha ta quëe tnàha nchaa ndóho-áⁿ cuáⁿsaá. Te xiáⁿ cada iní-ó sá cùu-xí vehe Yá Ndiöxí, vehe sá ìo ní cuu íí. Te ducaⁿ sãtnahá-xí cùu nchaa ñáyiu ndëcu ichi Xítohó Jesucristú chi ní tnahá tnúhu-yu ndihi-gá, te ìⁿ nduu ìⁿ nduu ta cùu vii cuu váha-gá-yu núú Yá Ndiöxí cuáháⁿ. ²² Te tnàhá nchòhó ducaⁿ sãtnahá-xí cùu-ndo chi ní ngúndecu ndihi-ndo Xítohó Jesucristú, te ducaⁿ ta cùu vii cuu váha tucu-ndo núú Yá Ndiöxí cuáháⁿ, te cùu-ndo datná vehe Yá Ndiöxí chi ndëcu ndihi-ndo Espiritú-gá.

3

Té Páblú yíhí díquí-dě cáháⁿ-dé tnúhu Xítohó Jesucristú núú ñáyiu ñá túú cùu ñáyiu isráél

¹ Te yúhú té Páblú yíhí-í ve-caá sá cuendá sá cáháⁿ-í tnúhu Xítohó Jesucristú núú nchòhó ñáyiu ñá túú cùu ñáyiu isráél, núú xiáⁿ díu cuendá-gá duha yíhí-í ve-caá vitna. ² Te nchòhó sa nàha-ndo sá Yá Ndiöxí ní cundàhú iní ñáhá-gá xii-í, te ní cachí-gá sá yúhú quíhi díquí-í cáháⁿ-í tnúhu Xítohó Jesucristú núú-ndó, te cuendá sá cáháⁿ-í tnúhu-gá

núú-ndó te cuu-xí sá vãha sá cùu-xí-ndó. ³ Te yúhú sa ní cachí tnúhu-í xii-ndo lùha nacuaa ndùu tnúhu ndùu yuhu ní cuu, sá ní cachí tnúhu Yá Ndiöxí xii-í. ⁴ Te òré dàcuaha-ndo tnúhu ndùu yuhu-áⁿ ní cùu te quini-ndó sá yúhú tècú tnùn-í-í nàcuáa ndùu tnúhu-áⁿ, te tnúhu-áⁿ cáháⁿ-xi cuendá Xítohó Jesucristú. ⁵ Te tnúhu-áⁿ cùu-xí tnúhu sá vã yòo tnàhí xini ní cùu, dico cue téé ní táuchíúⁿ Xítohó Jesucristú cáháⁿ tnúhu-gá, ndihi cue téé cáháⁿ nàcuáa dàcahu iní ñáhá Yá Ndiöxí ní níhí-güedé tnúhu ndùu yuhu-áⁿ, chi Espiritú Yá Ndiöxí ní xáhaⁿ-xi xii-güedé. ⁶ Te duha cáháⁿ tnúhu ndùu yuhu-áⁿ ní cùu: “Cuëi ñáyiu ñá túú cùu ñáyiu isráél te cuëi ñáyiu cùu ñáyiu isráél dico ìⁿ-ni ndùu táhü-yu sá vãha núú Yá Ndiöxí, te núu na quindáá iní-yu tnúhu sá cáháⁿ nàcuáa naníhí tàhü-yu, te ìⁿ-ná cùu-yu cundecú-yu, te ducaⁿ ìⁿ-ni cada váha ñaha Yá Ndiöxí xii-yu te núu na cundecu ndihí-yu Xítohó Jesucristú”, duha ndùu tnúhu ndùu yuhu-áⁿ ní cùu.

⁷ Te Yá Ndiöxí ní cundàhú iní ñáhá-gá xii-í ní taxi-gá chiuⁿ quide-í cáháⁿ-í tnúhu-gá, te mee-gá quidé-gá sá yúhú ndacu-í cáháⁿ-í tnúhu-gá. ⁸ Te nchaa ñáyiu cùu cuendá Yá Ndiöxí cùu-yu ñáyiu ìo-gá cúnùu cadá-yu chiuⁿ-gá dàcúxí yúhú, te cuëi ducaⁿ dico Yá Ndiöxí ní cundàhú iní ñáhá-gá xii-í ní taxi-gá chiuⁿ quide-í cáháⁿ-í tnúhu-gá núú cuë ñáyiu ñá

túu cùu ñáyiú isràèl. Te tnúhu-gá-áⁿ càháⁿ-xi sá sũúni ïo váha cada ñaha Xítóhó Jesucristú xii-o. ⁹Te ducaⁿ ñí cachí Yá Ndiõxí sá càháⁿ-í tnúhu-gá cuendá danèhé-í nchaá ñáyiú. Te sá dánèhé-í-yu-áⁿ cúu-xí tnúhu ndùu yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-áⁿ ñí quesaha ndùu yuhu tnúhu-áⁿ ní cùu. Te ñíu-ni-gá cúu-gã Yaá ní cadúha nchaandi túhú sá ïó. ¹⁰Te ducaⁿ ndùu yuhu tnúhu-áⁿ ní cùu cuendá sá ncháá espíritú cùnùu ndecu andiú quini-xi vitna nàcuáa quide nchaá ñáyiú ní tuha ñaha xii Yá Ndiõxí cuendá ducaⁿ cùtnuní iní-xi sá ïo váha cùtnuní iní-gá nàcuáa cada-gá. ¹¹Te Yá Ndiõxí ní sani iní-gá ndéé sanaha nàcuáa ní cuini-gá cada Xítóhó Jesucristú, te ní sáá nduu ñí quide Xítóhó Jesucristú nàcuáa ní cuini Yá Ndiõxí cada-gá. ¹²Te vitna cùy#-o cáháⁿ ndi#-o Yá Ndiõxí cuendá sá ndécú ndi#-o Xítóhó Jesucristú, te sàndáá iní-ó-gã. ¹³Te núu xiáⁿ càháⁿ-í dóho-ndo sá cuèi duha ndòho-í vitna dico vá ná túhú iní-ndó càncicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá vâha sá cúu-xí-ndó, chi cuu-ndo ñáyiú cùu cahnu núu Yá Ndiõxí.

Xítóhó Jesucristú ïo cùu iní ñáhá-gã xii-o

¹⁴Te sá cuendá nchaá sá ñí sani iní Dútú Ndiõxí quidé-gã xiáⁿ yúhú ngüiñi xiti-í núu-gã càháⁿ ndi#-í-gá,

te ñíu-ni-gá cúu Yáá cúu Tátá Xítóhó Jesucristú. ¹⁵Te mee Yá Ndiõxí ní cachí-gá sá ncháá espíritú ndécú àndiú cunduu-xi datná ní cachí mée-gã cunduu-xi. Te ní cachí tucu-gá sá nchóó cùu-o ñáyiú, te cunduu-o dàtná cuini mée-gã cunduu-o. ¹⁶Te xicáⁿ táhú-í núu Dútú Ndiõxí sá Espíritú-gá ná cáda nàcuáa cuita níhi ndéé-gã-ndó quihíⁿ cundecu-ndo ìchi-gá, te ducaⁿ xicáⁿ táhú-í núu-gã cada Espíritú-gá chi ïo càhnu cuu-gá. ¹⁷Te xicáⁿ táhú tucu-í núu Yá Ndiõxí sá Xítóhó Jesucristú ná cundecu ndi# ñaha-ni-gá xii-ndo chi sàndáá iní-ndó-gã, te ducaⁿ te vá dáña ndéé-ndó ïo cuu iní tnáhá-ndó. ¹⁸Te xicáⁿ táhú tucu-í núu Yá Ndiõxí cuendá-ndó ndi# cuendá dava-gá ñáyiú cùu cuendá-gá, cuendá sá cùtnuní iní-ndó sá sũúni cùu iní ñáhá Xítóhó Jesucristú xii-o. ¹⁹Te duha xicáⁿ táhú-í núu Yá Ndiõxí chi cuini-í sá ncháá-ndó təcú tnuní-ndó sá ïo cùu iní ñáhá Xítóhó Jesucristú xii-o cuèi vá ndácú càva-o quini-ó nàcuáa cùu iní ñáhá-gã xii-o. Te xicáⁿ táhú tucu-í núu Yá Ndiõxí sá ïo na cundecu ndi# ñaha-gá xii-ndo, te ducaⁿ càncicúⁿ nihnu-ndo càda-ndo nchaá nàcuáa quide mee-gá.

²⁰Te Yá Ndiõxí ïo-gá vai sá ndácú-gã táxi-gã dàcúúxi sá xicáⁿ-ó núu-gã, te cuèi ndéé nchaá sá ñà túu sàni iní-ó ñíhi-ó te tàxi-gá, te ducaⁿ chi mee-gã ndécú ndi# ñaha-gá xii-o, te ndàcu-gá quidé-gã nándi sá vâha sá cúu-xí-ó. ²¹Te vitna nchaá nchoo ñáyiú

ndècu ichi Xítohó Jesucristú chí ná càchí-ó sǎ ìo càhnu cuu Yá Ndiòxí, te ducaⁿ-ni càháⁿ-ó sǎ ìo càhnu cuu-gá ni caa ni quíhíⁿ chi ndècu ndihi-o Xítohó Jesucristú. Te ducaⁿ na cùnduu.

4

Espiritú Yá Ndiòxí quidé-xí cùu ìⁿnuu-o ndecu-o

1 Te yúhú té Páblú yíhí-í vecaá sá cuendá Xítohó Jesucristú, te càháⁿ ndáhú-í núú-ndó sǎ cáda váha-ndo cùndecu-ndo datná tàú-xí cada cue ñáyiu ní càháⁿ Yá Ndiòxí cundecu ndihi-gá. Te nchòhó tnhá-ndó cùu-ndo ñáyiu ní càháⁿ ñáhá Yá Ndiòxí cundecu ndihi-gá. 2 Te vá cáda càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnhá-ndó nàcuáa ducaⁿ cùndee iní-ndó núu ná cúú sǎ cúmání núú tnhá-ndó. 3 Te ìo nducu ndèe-ndo cuu ìⁿnuu-ndo cundecu-ndo, chi Espiritú Yá Ndiòxí chindee ñaha-xi xii-ndo, te ducaⁿ ìo váha cuu iní-ndó cundecu-ndo chí cùu ìⁿnuu-ndo. 4 Te nchoo ñáyiu ndècu ichi Xítohó Jesucristú ìⁿ-ni cùu-o, te ducaⁿ ìⁿ-ni Espiritú Yá Ndiòxí ndécú, te diu-ni ducaⁿ ìⁿ-ni tnúhu ndee iní ní ngúndecu ndihi-o cùtnáhá ní càháⁿ ñáhá Yá Ndiòxí xii-o. 5 Te ìⁿ-ni Xítohó Jesucristú ndécú tàxi tñuní ñáhá-gǎ xii-o, te ìⁿ-ni cùu-o sandáa iní-ó tñuhu-gǎ, te ìⁿ-ni ní sandute-o. 6 Te ìⁿ-ni Dütú Ndiòxí cúú Yáa cúú Tátá-ó nchàa-o, te diu-gǎ cùnùu-gǎ yíndàha ñaha-gǎ xii-o nchàa-o. Te Yá Ndiòxí

dácàháⁿ-gǎ iní-ó quíde-o chiuⁿ-gǎ, te ducaⁿ ndècu ndihi ñaha-gǎ xii-o nchàa-o.

7 Te nchoo ndì dííⁿ ndì dííⁿ chindee ñaha Yá Ndiòxí xii-o quíde-o nacuáa ndùu chiuⁿ ní cachí Xítohó Jesucristú cada-o. 8 Te quèe ndáa-xi nàcuáa càháⁿ-xi núú tütú Yá Ndiòxí núú càchí-xi:

Xítohó Jesucristú cuándaa-gǎ andiu te ìo cùnuu-gǎ, chi nchaa cue espíritú cúú ùhú iní ñáhá xii-gǎ ñá túú ní ndàcu-xi naá ndihi ñaha-xi xii-gǎ, te mee-gǎ ní cachí-gǎ nàcuáa ndùu chiuⁿ nduu táhú ìⁿ ìⁿ ñáyiu cadá-yu.

Duha càchí-xi núú tütú-gǎ.

9 Te sá dúcáⁿ càháⁿ-xi sá cuándaa-gǎ andiu xǎⁿ cùtnùní iní-ó sǎ ní cuuⁿ-gǎ ñuyú-a. 10 Te Xítohó Jesucristú ní cuuⁿ-gǎ ñuyú-a, te diu-ni-gǎ cuándaa-gǎ andiu cuendá ìo cunuu-gǎ taxi tñuní-gǎ nchaandi túhú sǎ ìó. 11 Te ní dácàhñu-gǎ cue téé xínu cuechi núú-gǎ ìⁿ ìⁿ núú chiùⁿ cada-güedé. Te ní cachí-gǎ sǎ dàva-güedé càháⁿ-güedé tnúhu-gǎ, te dava-güedé ní cachí-gǎ sǎ càháⁿ-güedé nàcuáa dàcahu iní ñáhá Yá Ndiòxí xii-güedé. Te dava-güedé ní cachí-gǎ sǎ cúú-güedé cue téé datécú tnúhu cue ñáyiu nàcuáa cadá-yu naníhí tàhú-yu. Te dava-güedé ní cachí-gǎ sǎ cúú-güedé cue téé quíndaha ñaha xii ñáyiu dacuàha ñaha-güedé xii-yu tnúhu-gǎ. 12 Te ducaⁿ ní cachí-gǎ cada cue téé-áⁿ cuendá canu ichi-güedé

cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu nàcuáa cadá-yu chiúⁿ-gá, te ducaⁿ cuita ñihí ndéé-gá-yu cundecú-yu ichi Xítohó Jesucristú. ¹³ Te ducaⁿ ñi cachí Xítohó Jesucristú cunduu ndéé sáá nduu cùu ñⁿnuu-o quindáá iní-ó tnúhu-gá, te ducaⁿ cùu ñⁿnuu-o tecú tnúni-ó nàcuáa nduu cuendá-gá chi diu-gá cúu-gá Déhe Yá Ndiöxí, te cuu-o ñáyiú ío quide ndáá dàtná quidé mée Xítohó Jesucristú. Te ducaⁿ te ñá túú tnàhí-gá ná cùmání-ó núú Yá Ndiöxí. ¹⁴ Te ducaⁿ te vá cúu-gá-ó dàtná cue landú vátá cùnùní váha-gá iní-xi, te ñi vá cáda-gá-ó dàtná quidé ndüte lamár, chi ndute-áⁿ òré quéné tächí te cuáháⁿ-xi duha cuáháⁿ-xi dàcáⁿ, te ducaⁿ chi vá quindáá-gá iní-ó tnúhu càháⁿ nchaa ñáyiú dandahú ñáhá xii-o, chi ñáyiú-áⁿ ío váha xitó-yu nàcuáa dandahú ñáhá-yu xii-o chi càchí-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ío cuu iní tnáhá-ó, te vá dandahú tnáhá-ó, chi cáháⁿ-ó mée-ñi sá ndáá. Te xini ñuhu-xi sá ñⁿ nduu ñⁿ nduu cuita cada ndáá-gá-ó quíhíⁿ dàtná quidé ndáá mée-gá, te diu-ni-gá cúu-gá Yaá cùnùu cuu díhna tàxi tnuní ñáhá-gá xii-o. ¹⁶ Te diu-ni Xítohó Jesucristú quidé ñàha-gá xii nchaa nchoo ñáyiú ndècu ichi-gá dàtná yiqui cùnú mée-gá, chi ñⁿ yiqui cùnú ío váha ní quée tnàha ñⁿ ñⁿ xichi, te ducaⁿ yìhí túchi yiqui cùnú-áⁿ yótnì-xi nchaa

nacuáa ní quée tnàha. Te ducaⁿ sàtnahá-xi cùu nchoo chi ñⁿ-ni cùu-o ndecu-o ichi Xítohó Jesucristú táxi tnùní ñáhá-gá xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta ñihí ndéé-gá-ó cuáháⁿ ndécú-ó ichi-gá.

Vá cáda-gá-ó dàtná ní xóo cada-o cùnàhá ní xíndecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítohó Jesucristú sá vá cundècu-gá-ndó dàtná xíndecu ñáyiú ñá túú sándáá iní ñáhá xii Yá Ndiöxí, chi nchaa ñáyiú-áⁿ ñà túú vèdana nandíhi nchaa sá sání iní-yu. ¹⁸ Te ñi ñà túú vèdana cùnùní iní-yu nàcuáa nduu tnúhu ndáá tnúhu Yá Ndiöxí. Te ñáyiú-áⁿ ñà túú nduu táhü-yu cundecú-yu nàcuáa cuini Yá Ndiöxí, chi ñá túú vèdana tècú tnùní-yu te ducaⁿ chi ío sáá iní-yu. ¹⁹ Te ñá túú tnàhí-gá ná sání iní-yu ndècú-yu ichi cuehé ichi duha, te ío cùdí^í iní-yu ndècú-yu ichi dí^í iní, te ñá díú-ni xíãⁿ chi nándi-gá nchaa sá cuehé sá dúhá quidé-yu ndècú-yu. ²⁰ Dico tnúhu Xítohó Jesucristú sá ñi sándáá iní-ndó chi ñá túú dùcaⁿ sanu ichi ñàha-xi xii-ndo cada-ndo. ²¹ Te nchòhó ní cutnùní iní-ndó nàcuáa nduu cuendá Xítohó Jesucristú, te dàcuaha-ndo tnúhu ndáá diu-ni tnúhu-gá nàcuáa ndècu-ndo ichi-gá. ²² Te vitna vá cáni-gá iní-ndó càda-ndo dàtná ní xóo cada-ndo cùnàhá ní xíndecu-ndo ichi

cuehé ichi duha, chi núu nchaa-ni sá cuehé sá dúhá-ǎⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xì-ndo quíhíⁿ, chi núu nchaa-ni sá cuehé sá dúhá-ǎⁿ ná cùhuⁿ-ni iní-ndó te dàticá nuu ñaha-xi xì-ndo. ²³ Te nchòhó, xìni ñuhu-xi sá vǎ dúcáⁿ-gǎ cani iní-ndó càda-ndo te tàú-ndó ndùu-ndo datná ìⁿ ñáyiu ní cacu túu saa. ²⁴ Te nduu iní-ndó dàtná cuiní méé Yǎ Ndiòxí cunduu, chi nduu-xi nàcuáa càa iní méé-gǎ, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumání cundecu núú-gǎ.

²⁵ Te cuendá xǎⁿ núu càháⁿ-í dóho-ndo sǎ nchòhó vǎ dácuaⁿndehnde-gǎ-ndó dàtná ní xóo cada-ndo, te mee-nǎ sá ndáá cáháⁿ ndihi tnàha-ndo, chi ìⁿ-ni cùu-o ndecu-o ichi Xítohó Jesucristú.

²⁶ Te núu cùdéeⁿ-ndó te cada cuendá-ndó sǎ vǎ cadá-ndó ìⁿ cuéchi sá dúcáⁿ cùdéeⁿ-ndó, te vǎ dúcáⁿ-ní cùhuⁿ iní-ndó tnùhu sàtú iní-áⁿ. ²⁷ Te vǎ dáñá-ndó mèe-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñaduhú te vǎ dúcáⁿ-gǎ cada-ndo, chi nducu-nǎ-ndó ìⁿ chiuⁿ váha cada-ndo nàcuáa ducaⁿ ñihí-ndó sǎ chíndèe-ndo cue ñáyiu ndàhú ñáyiu ñá túú nǎ ndécú ndihi.

²⁹ Te vǎ càháⁿ-gǎ-ndó nì ìⁿ tnúhu cuehé, chi mee-nǎ tnúhu vii tnúhu váha cáháⁿ-ndó nàcuáa ducaⁿ ngũnu ichi cue ñáyiu ndédóho ñaha xì-ndo, te núu ducaⁿ na càda-ndo te cuu-xi sá váha sá cúú-xí ñáyiu ducaⁿ

ndédóho ñaha xì-ndo-áⁿ. ³⁰ Te vǎ cadá-gǎ-ndó nì ìⁿ sá ñà túú tàú-ndó càda-ndo cuendá sá vǎ dándihú-ndó iní Espíritú Yǎ Ndiòxí, chi diu Espíritú-gǎ ndécú ndihi-ndo, te xǎⁿ cùtnuní iní-ndó sǎ sàá nduu nàcuaca ñaha-gǎ xii-ndo cùndecu-ndo ndihi-gǎ nì caa nì quíhíⁿ.

³¹ Te vǎ dásatú-gǎ-ndó iní tnàha ñáyiu-ndo, te nì vǎ cúhúⁿ iní-ndó tnùhu sàtú iní, te nì vǎ cùdéeⁿ-gǎ-ndó, te cuéi núú chítú núú tàcá vǎ càháⁿ cana-ndo cùcuehé-ndó tnàha ñáyiu-ndo, te nì vǎ cuátnùhu-ndo tnaha ñáyiu-ndo, te nì vǎ caní cuehé cani duha iní-ndó cuendá tnàha ñáyiu-ndo. ³² Te cundàhú iní tnáhá-ndó, te cada tnàha-ndo sá váha, te cada càhnu iní tnáhá-ndó núu ná cúú sǎ cúmání núú tnáhá-ndó dàtná ní quide Yǎ Ndiòxí ní quide càhnu iní-gǎ nchaa yícá cuéchi-ndo sǎ cuendá Xítohó Jesucristú.

5

Nàcuáa tàú-xi cundecu nchaa ñáyiu cùu déhe Yǎ Ndiòxí

¹ Te nchòhó cúú-ndó ñáyiu ío cùu iní ñáhá Yǎ Ndiòxí, te diu déhe-gǎ cúú-ndó núu xǎⁿ xíní ñuhu-xi canchicúⁿ nihnu-ndo càda-ndo datná quidé mèe-gǎ. ² Te ío cuu iní tnáhá-ndó cùndecu-ndo datná cúú iní ñáhá Xítohó Jesucristú xii-ndo, chi diu-gǎ ní cachí-gǎ sá cúú-gǎ cuendá nchaa cuéchi-o te ní xíhí-gǎ, te sá dúcáⁿ nì xíhí-gǎ te ní cuu-gǎ dàtná ìⁿ táhú sǎ cúú-xí Yǎ Ndiòxí, te ío váha ní cuu

iní Yă Ndiǒxí sá dúcáⁿ nǐ quide-gá.

³ Te sá cuendá sá nchòhó cúú-ndó ñăyiu cùu cuendá Yă Ndiǒxí nũu xǎⁿ nchaa nchòhó cue tée vǎ càháⁿ ndihì-ndo ñăyiu dìhí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñăyiu dìhí tucu vǎ càháⁿ ndihì-ndo cuè tée te núu ñá díú yǐ-ndo cuu-güedé, te ni vǎ cání tnàhí iní-ndó cùndecu-ndo ichi díí iní, te ni vǎ xíhó-ndó nǐ ñⁿ sá ndécú ndihì tnaha ñăyiu-ndo, te ni ñⁿ nchaa xǎⁿ vǎ cání iní-ndó càda-ndo, te ni vǎ cǎcú nèhe-ndo. ⁴ Te ni vǎ càháⁿ-ndó ñⁿ tnúhu sá ni vǎ cúú cùndedòho ñăyiu, te ni vǎ càháⁿ-ndó ñⁿ tnúhu cùtèxínu, te ni dàva-gá nchaa tnúhu sá ñà túú vǎdana nàndíhì vǎ càháⁿ-ndó, chi nchaa tnúhu-án ñà túú tàú-xì càháⁿ-ndó, te xìni ñuhu-xì sá vǎha-gá sá ndàcáⁿ tǎhú-ndó nũu Yă Ndiǒxí cuendá nchaa sá vǎha quide-gá. ⁵ Te nchòhó sa xìní ndáá-ndó sǎ ncháá cuè tée càháⁿ ndihì ñăyiu dìhí te ñá díú ñàdihí-güedé cúú-yu, ndihì cue ñăyiu dìhí càháⁿ ndihì cue tée te ñá díú yǐ-yu cùu-güedé, nchaa ñăyiu-án vǎ ndúú tǎhũ-yu cundecú-yu núú ndécú Yă Ndiǒxí ndihì Xítóhó Jesucristú táxí tnùnì-gá. Te ni cuè ñăyiu xǐndecu ichi díí iní, te ni cuè ñăyiu xìho nchaa sá ndécú ndihì tnaha ñăyiu-xì vǎ ndúú tǎhũ-yu cundecú-yu ndihì-gá núú ndécú-gǎ táxí tnùnì-gá. Te tnúhu sá càchí-ó xìho-o nchaa sá ndécú ndihì tnaha

ñăyiu-o, ñⁿ-ni cùu-xì ndihì tnúhu sá càchí ñăyiu quide cahnú-yu nchaa sá càchí-yu cùu ndiǒxí te ñá ndáá sá ndiǒxí cúú-xì. ⁶ Te vǎ quindáá iní-ndó nǐ ñⁿ tnúhu sá ñà túú nàndíhì càháⁿ ñăyiu, chi ñăyiu-án ïo dandòho ñaha Yă Ndiǒxí xii-yu cuendá nchaa sá cuèhé sá dúhá quidé-yu chi ñá túú sàndáá iní ñáhǎ-yu xii-gá. ⁷ Núu xǎⁿ càháⁿ-í dóho-ndo sǎ vǎ ñihí tnáhá-ndó ndihì cue ñăyiu-án.

⁸ Te nchòhó ní cuu-ndo dàtná cue ñăyiu ní xǐndecu núú néé chi ní xǐndecu-ndo ichi cuehé ichi duha, dico vitna ní ngùndecu-ndo ichi Xítóhó Jesucristú, te ñá túú-gǎ ndécú-ndó nũú néé dàtná ní xǐndecu-ndo ni cùu. Te vitna cada-ndo nchàa nacuáa tàú-xì cunduu chi ndècu-ndo ichi-gá. ⁹ Te sá cuendá sá ndécú-ndó ichi-gá nũu xǎⁿ cúú-ndó ñăyiu vǎha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mée-ni sá ndáá. ¹⁰ Te ïo vǎha cada cuendá-ndó nchàa sá cúú vǎha iní Xítóhó Jesucristú, te xǎⁿ cada-ndo. ¹¹ Te vǎ cǎnchícúⁿ nihnu-ndo tnáhá-ndó càda-ndo datná quidé cuè ñăyiu ndècu ichi cuehé ichi duha, chi nchòhó tàú-ndó càháⁿ-ndó dǎho nchaa ñăyiu ducaⁿ ndècu ichi cuehé ichi duha-án cuendá nchaa sá quidé-yu. ¹² Te cucahaⁿ núú-ndó vǎ càháⁿ-ndó cuendá ni ñⁿ sá cuèhé sá dúhá quidé dayuhu nchaa ñăyiu-án. ¹³ Dico òré dándixi túu tnúhu Yă Ndiǒxí iní-yu nàcuáa quidé-yu te cùtnunì iní-yu sá ñá túú quide vǎha-yu, te ducaⁿ ndixi cuéchi

iní-yu cuendá nchaa sá cuèhé sá dúhá quidé-yu. ¹⁴ Te núú tütú Yă Ndiöxí càchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xihí, te vitna ndoto-ndo,

te Xítohó Jesucristú chindee ñàha-gá xii-ndo nàcuáa vá cùndecu-gá-ndó ichi cuehé ichi duha.

Duha càháⁿ-xi núú tütú-gá.

¹⁵ Te ío váha cada cuendá-ndó nàcuáa cada-ndo cùndecu-ndo, te vá cáda-ndó dàtná xiquide cue ñáyiú ñá túú tècú tnùní, chi cada-ndo dàtná xiquide ñáyiú ío váha sáa díquí-xi. ¹⁶ Te ìⁿ nduu ìⁿ nduu cani iní-ndó càda-ndo nchaa nàcuáa tàú-xi cunduu, chi vitna ío cùnuu nchaa sá cuèhé sá dúhá. ¹⁷ Te cuu-ndo ñáyiú tècú tnùní cuendá ducaⁿ cùtnuní iní-ndó nàcuáa cuìní Yă Ndiöxí cada-ndo, te vá cáda-ndó dàtná xiquide cue ñáyiú ñá túú tnàhí cùtnuní iní-xi nàcuáa cuìní Yă Ndiöxí cadá-yu. ¹⁸ Te

vá cúú-ndó ñáyiú quihu chi núú ducaⁿ na càda-ndo te dàcuíta nihnu-ndo mèe-ndo, te dañà-ndo mèe-ndo sá Espiritú Yă Ndiöxí ná tàxi tnuní ñàhá-xí xii-ndo. ¹⁹ Te cáháⁿ-ndó nàcuáa-ni cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhú-yu Yă Ndiöxí. Te cáháⁿ-ndó nàcuáa cuáháⁿ ndudú sá chiñuhu-ndo Yă Ndiöxí, te cata-ndo. Te cuèi nchaa dava-gá ndudú ñu-ni ducaⁿ càháⁿ-ndó te cata-ndo. Te ní yùhu ní iní-ndó càta-ndo nchaa ndudú-áⁿ chiñuhu-ndo

Yă Ndiöxí. ²⁰ Te vá dañá ndèe-ndó ndàcáⁿ táhú-ndó núú Tàtá-ó Dütú Ndiöxí cuèi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihi-ndo Xítohó Jesucristú.

Tàú-xi sá quindáá iní tnàhá cue ñáyiú ndècu ichi Xítohó Jesucristú

²¹ Te nchòhó ñáyiú ndècu ichi Xítohó Jesucristú tàú-xi sá quindáá iní tnàhá-ndó, te ducaⁿ càda-ndo chi nèhe-ndo sá yíñuhu núú Yă Ndiöxí.

²² Te nchaa nchòhó ñáyiú ñihí ndécú yì-xi, xìni ñuhu-xi sá quindáá iní-ndó yì-ndo datná sàndáá iní-ndó Xítohó Jesucristú. ²³ Chi yì-ndo tàxi tnuní ñàhá-güedé xii-ndo dàtná quidé Xítohó Jesucristú táxi tnùní ñàhá-gă xii nchoo cue ñáyiú ndècu ichi-gá. Te ñu-gá cúú-gă Yaá ní dácăcu nihnu ñaha xii-o núú ùhú núú ndàhú, te cùu-o datná yiqui cùñú-gá. ²⁴ Te dàtná quidé nchò ñáyiú ndècu ichi Xítohó Jesucristú sàndáá iní-ó tnè-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú ñihí quindáá iní-ndó tnè-ndo nchaa tnúhu càháⁿ yì-ndo.

²⁵ Te tnàhá nchaa nchòhó cue tée tucu tàú-xi sá ío cuu iní-ndó ñàdihí-ndó dàtná quidé Xítohó Jesucristú cúú iní ñàhá-gă xii nchaa nchoo ñáyiú ndècu ichi-gá, chi mee-gă ní xihí-gá sá cuendá-ó sá cúú iní ñàhá-gă xii-o. ²⁶ Te ducaⁿ ní quide-gá cuendá sá ncháá ñáyiú vitna ngùndecu ichi-gá cuu yíñuhú-yu núú

Yă Ndiöxí, te ducaⁿ ndàda ndoo ndada nine-gá iní-yu sá cuendá sá quíndáá iní-yu tnúhu Yá Ndiöxí, te cuanduté-yu. ²⁷ Te ducaⁿ nĩ quide-gá cuendá sá ncháá ñáiyu na ngúndecu ichi-gá ío váha cundecú-yu núú-gá, te ducaⁿ vǎ cúndecu-gá ni ìⁿ cuéchi-yu núú-gá, te ni ìⁿ-gá sá ñà túú-gá ná cumáni-yu núú-gá chi ío cundecu yíñùhú-yu. ²⁸ Te sá dúcáⁿ quide Xítohó Jesucristú sá cúú-xí cuè ñáiyu ndècu ichi-gá, xǎⁿ tàú-xi sá nchòhó cue téé xǎndecu ñadihí-xi cuu iní-ndó ñadihí-ndó, te coto-ndó-yu dátá ná xító-ndó yiqui cuñú méé-ndó, te cada iní-ndó sǎ ncháá cuè téé ío cùu iní ñadihí-xi cùu iní-güedé méé-güedé chi ìⁿ-ná cúú-yu. ²⁹ Te nchoo sà naha-o sá nĩ ìⁿ ñáiyu ñà túú dàquee tíhú-yu yiqui cùñú-yu, chi da uuⁿ-gá chíndèé-yu te xító-yu. Te ñu-ni ducaⁿ quide Xítohó Jesucristú ndihí nchaa ñáiyu ndècu ichi-gá, ³⁰ chi cùu-o dátá ná yiqui cùñú méé-gá, te ducaⁿ chi ìⁿ-ni cùu-o ndihí-gá. ³¹ Te tnúhu Yá Ndiöxí cǎchí-xi: “Sá cuendá xǎⁿ nũu nchaa cue téé na ñihí ñadihí-xi te ñiⁿ-ná cada-güedé tǎtá-güedé ndihí nǎná-güedé, te ñadihí-nǎ-güedé cuu cuu ndihí-güedé, te ducaⁿ ìⁿ-ná cuu-güedé ndihí-yu”, duha cǎchí-xi. ³² Te tnúhu-a cùu-xi ìⁿ tnúhu cǎhnu vihi, te ducaⁿ sǎ ñàhá-xi cùu Xítohó Jesucristú ndihí cue ñáiyu ndècu ichi-gá. ³³ Te cǎháⁿ-ni

tucu-í dóho nchaa nchòhó cue téé xǎndecu ñadihí-xi sá ío cuu iní-ndó ñadihí-ndó te coto-ndó-yu dátá ná xító-ndó mèe-ndo, te ducaⁿ-ni ncháa nchohó ñáiyu ñihí tucu canehe-ndo sǎ yíñùhu núú yíi-ndo.

6

¹ Te nchaa nchòhó cue landú, quíndáá iní-ndó tǎtá-ndó ndihí nǎná-ndó chi ducaⁿ cuíni Yă Ndiöxí cunduu, te ñu ducaⁿ ñàhá táú-xi cada-ndo. ² Te Yá Ndiöxí ní cǎchí-gá sá cǎnèhe-ndo sá yíñùhu núú tǎtá-ndó ndihí núú nǎná-ndó. Te tnúhu-áⁿ cúú-xí tnúhu cùnuu ní cǎháⁿ-gá cada cue ñáiyu cuendá cada váha ñaha-gǎ xií-yu. ³ Te ní cǎchí-gá sá nũu ducaⁿ na cǎda-ndo te ío váha cundecu-ndo, te ducaⁿ ío naha cùdii-ndo cundecu-ndo ñuyíú-a.

⁴ Te nchaa nchòhó cue téé cùu tǎtá, vá dásátú-ndó iní cue déhe-ndo chi canu ichi-ndo-güexi nacuáa táú-xi cunduu, te dacuáha-ndo-güexi nchaa tnúhu váha nǎcuáa cuíni Yă Ndiöxí cunduu.

⁵ Te nchaa nchòhó cue ñáiyu xǎnu cuechi, quíndáá iní-ndó cuè ñáiyu ñiⁿ-xi quide-ndo, te canehe-ndo sǎ yíñùhu núú-yu, te ío váha cuu iní-ndó cǎda-ndo chíúⁿ-yu, te ducaⁿ ñiⁿ yuhu ñi iní-ndó cǎda-ndo. Te cada iní-ndó sǎ dátá ná tnúhu sá chíúⁿ Xítohó Jesucristú quidé-ndó. ⁶ Te dava ñáiyu xǎnu cuechi, mee-ni òré ndéhé ñáiyu ñiⁿ-xi quidé-yu ío

ndücu ndeé-yu quide chiuⁿ váha-yu cuendá cuini-yu cudiü-yu. Dico nchòhó vá dúcáⁿ cada-ndo, chi cuéi ndècu ñáiyu dii chiüⁿ-xi quide-ndo àdi ñá túü-yu dico cada chiuⁿ váha-ni-ndo, te cada iní-ndó sã dàtná tnúhu sã chiúⁿ Xìtohó Jesucristú quidé-ndó, te cada-ndo ñi yuhu ñi iní-ndó nàcuáa cuini Yã Ndióxi cunduu. ⁷ Te ío váha cuu iní-ndó cada-ndo chiuⁿ-áⁿ, chi cada iní-ndó sã dàtná tnúhu sã chiúⁿ Xìtohó Jesucristú quidé-ndó te ñá díú chiüⁿ cue ñáiyu ñuyíú-a. ⁸ Te nchòhó sa cùnuni iní-ndó sã nàcuáa ndüu chiuⁿ váha ní quide-ndo ñiⁿ ñiⁿ-ndo, te ducaⁿ cunduu sã táxi Xìtohó Jesucristú nduu táhú-ndó cuéi cùu-ndo ñáiyu dañá quéé núú chiúⁿ pàtróoⁿ-xi àdi cuu-ndo ñáiyu ñá túú tnàhí dañá quee núú chiúⁿ pàtróoⁿ-xi.

⁹ Te nchaa nchòhó ñáiyu xíndecu ndihi ñáiyu xínu cuechi, tnàhá-ndó tàú-ndó càda váha-ndo sã cúú-xí cuè ñáiyu xínu cuechi núú-ndó, te vá cùndüu nínu iní-ndó núú-yu, te chí cuáha cuendá sã díú-ní Xìtohó Jesucristú Yaá ndécú àndüu taxi tnuni ñáhá-gã xii-ndo ndihí-yu, te sã cúú-xí mèe-gã chi ñiⁿ-ni cùu-ndo núú-gã, te ñiⁿ-ni càda ñaha-gã xii-ndo.

Yã Ndióxi chindèe-gã cue ñáiyu ndècu ichi-gã cuendá sã vá ndácú sàcuíhná nàá ndihi ñaha-xi xii-yu

¹⁰ Te vitna nchaa nchòhó ñáiyu ndècu ndihí-í ichi Xìtohó

Jesucristú càchí tnúhu-í xii-ndo sã ío nducu-ndo nàcuáa cada-ndo ñihí ndéé-ndó cùu ñiⁿ-nuu-ndo ndihi Xìtohó Jesucristú, chi mee-gã ío càhnu cuu-gã, te chindee ñaha-gã xii-ndo. ¹¹ Te diu-ni nchaa sã ñi nduu táhú-ndó núú Yã Ndióxi diu-ni nchaa xiãⁿ cuhuⁿ iní-ndó, chi xiãⁿ chindee ñaha-xi xii-ndo ñihí ndéé-ndó cùndecu-ndo cuendá sã vá dándahú ñáhá sàcuíhná xii-ndo. ¹² Chi nchoo ñá díú cuè ñáiyu ñuyíú-a nàá ndihi-o, chi ndihi cue espíritú cùndihi yucu ñávãha, te diu-ni nchaa espíritú-áⁿ cùnüu-xi cuéi núú ñiⁿ quide-xi nchaa sã cuèhé sã dúhá, te diu-ni-xi cùnüu-xi ñuyíú-a sànu ichi-xi cue ñáiyu quidé-yu nchaa sã cuèhé sã dúhá. ¹³ Te ío cuhuⁿ iní-ndó nchaa sã ñi nduu táhú-ndó núú Yã Ndióxi cuendá ducaⁿ ñihí ndéé-ndó cùndecu-ndo, te vá ndácú yùcu ñávãha ná cada ñaha-xi xii-ndo oré cuini-xi coto ndeé ñáhá-xí. Te sátá ná dàquee tíhú-ndó yùcu ñávãha te ñiⁿ-ni cunduu-ndo cùndecu-ndo ichi Yã Ndióxi. ¹⁴ Te ducaⁿ cùndecu-ni-ndo ichi Yã Ndióxi cada-ndo dàtná xiquide cue sandádú, chi cue téé-áⁿ ío ñiⁿ xíndáa-güedé. Te cáháⁿ-ndó mèe-ni tnúhu ndáá tnúhu Yã Ndióxi, te cuu-ndo dàtná cue sandádú cue téé ndàda tíi xití-xi oré quíhíⁿ-güedé nàá-güedé. Te ducaⁿ sãtnahá-xi cuu-ndo te núu na cáháⁿ-ndó mèe-ni tnúhu ndáá tnúhu Yã Ndióxi. Te cada ndáá-ndó cùndecu-ndo ichi-gã, te cuu-ndo dàtná cue sandádú cue téé xixíhnu

sá yídähu ñaha xì-güedé òré nää-güedé cuendá sá vǎ nǐcuèhé-güedé. Te ducaⁿ sǎtnahá-xi cuu-ndo te núu na càda ndáá-ndó cùndecu-ndo ichi-gá. ¹⁵ Te cundecu túha-ndo cǎháⁿ-ndó tnúhu Xítohó Jesucristú, tnúhu sá cǎháⁿ nàcuáa cuu váha iní ñáyiú cundecú-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nää-güedé. Te ducaⁿ sǎtnahá-xi cuu-ndo te núu na cùndecu túha-ndo cǎháⁿ-ndó tnúhu Xítohó Jesucristú núu ñáyiú. ¹⁶ Te cǎchí tnúhu tucu-í xii-ndo sǎ ío quindáá iní-ndó Yǎ Ndiòxí cuendá sá vǎ ndácú sàcúhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chinèe-güedé sáquídáhu ñaha-xi xì-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nää ndíhi-güedé. Te ducaⁿ sǎtnahá-xi cuu-ndo te núu na quindáá iní-ndó Yǎ Ndiòxí. ¹⁷ Te ío cuhuⁿ iní-ndó sǎ nǐ naníhí tǎhú-ndó, te cuu-ndo dàtná cue sandàdú cue téé ñúhu mbelú cáxíⁿ. Te ducaⁿ sǎtnahá-xi cuu-ndo te núu na cùhuⁿ iní-ndó sǎ nǐ naníhí tǎhú-ndó. Te ío cuhuⁿ iní-ndó tnúhu Yǎ Ndiòxí, chí tnúhu-áⁿ nǐ taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáháⁿ-güedé nää-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnúhu Yǎ Ndiòxí. ¹⁸ Te vǎ dáñá ndèé-ndó cǎháⁿ ndíhi-ndo Yǎ Ndiòxí nàcuáa chindee ñaha Espíritú-gá xii-ndo, te

cácáⁿ tǎhú-ndó núu-gǎ núu ná cuiní-ndó, te ío cundecu túha-ndo cǎháⁿ ndíhi-ndo-gǎ, te vǎ nǎtùhú iní-ndó cǎcáⁿ tǎhú-ndó núu-gǎ cuendá nchaa dava-gá cue ñáyiú cùu cuendá-gá. ¹⁹ Te tnáhá cuendá-í cǎcáⁿ tǎhú-ndó núu Yǎ Ndiòxí cuendá sá ná chindee ñaha-gá xii-í nǐhí-í tnúhu cǎháⁿ-í òré cǎháⁿ-í tnúhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tǎhú-ó núu ñáyiú tnúhu sá vǎtá cùndèdóho-gá-yu. ²⁰ Te Yǎ Ndiòxí nǐ cachí-gá sá yùhú cuu-í ìⁿ téé cada-í núu-gǎ cǎháⁿ-í tnúhu-gá núu ñáyiú, te ñiú cuendá tnúhu-áⁿ yíhí-í vecaá vǐtna. Te ío cǎcáⁿ tǎhú-ndó núu Yǎ Ndiòxí cuendá-í cuendá sá yùhú cuyí-í nǐ yùhu nǐ iní-í cǎháⁿ-í tnúhu-gá núu ñáyiú nàcuáa tàu-xi cunduu.

Tnúhu ndéé núu nǐ ndíhi-ná

²¹ Te té Tiquicú téé ío cùu iní-í ndécú ndíhi-o ichi Xítohó Jesucristú cúu-dé ìⁿ téé ío váha quide ndáá xínú cuèchi-dé núu Xítohó Jesucristú, téé-áⁿ cachí tnúhu-dé xii-ndo nàcuáa cùu ndecu-í ndíhi nchaa nàcuáa quide-í cuendá ducaⁿ cùtnuní iní-ndó. ²² Te cuendá xiáⁿ núu cuiní-í tendaha-í-dé quixi-dé núu ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gá-dé tnúhu ndee iní cundecu ndíhi-ndo.

²³ Te xicáⁿ tǎhú-í núu Tǎtá-ó Dütú Ndiòxí ndíhi núu Xítohó Jesucristú sá ncháá nchòhó ñáyiú ndècu ndíhi-í ichi-gá sá ñiú-gá ná cáda te ío váha cuu

iní-ndó cùndecu-ndo, te ducaⁿ
ío cuu iní tnáhá-ndó, te ío
quindáá iní-ndó-gă. ²⁴ Te
nchòhó ío cùu iní-ndó Xìtohó
Jesucristú, te ñá túú dăña
ndeé-ndó cùu iní-ndó-gă. Te
mee Yă Ndiõxí ío na chìndee
chitúu ñaha-gă xii-ndo. Te
ducaⁿ na cùnduu. Te ío chí
cádá ndèe iní-nă vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ FÌLIPÚ

Té Păblú cádũha-dé tutú quíhíⁿ ndaha ñáyiú quide ndáá xĩndecu ichi Xítohó Jesucristú ndécú ñuú Filipú

¹ Yúhú té Păblú ndihí té Timúteú cúú-ndí cue téé xĩnu cuechí núú Xítohó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítohó Jesucristú, ndihí cue téé chĩndee ñaha xii-ndo, ndihí nchaa dava-gá ñáyiú xĩquide ndáá ndécú ìchi-gá ñuú Filipú. ² Te xìcáⁿ táhù-í núú Tătá-ó Dütú Ndiöxí ndihí núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Té Păblú càháⁿ ndihí-dé Yă Ndiöxí cuendá nchaa ñáyiú ndècu ichi-gá

³ Te ndi tnahá òré ndácú iní ñáhà-í xii-ndo, te ndàcáⁿ táhù-í núú Tătá-ó Dütú Ndiöxí sá ndécú-ndó ìchi-gá. ⁴ Te ndi tnahá òré ducaⁿ quide-í te ío cùdí iní-í càháⁿ ndihí-í-gá cuendá-ndó. ⁵ Chi ndéé cùtnahá ní sándáá iní-ndó-gá ní ngüíta-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítohó Jesucristú. ⁶ Te yúhú sàni ndáá iní-í sá Yă Ndiöxí

Yaá ní quesaha chĩndee ñaha xii-ndo quide váha-ndo ndècu-ndo, te diu-ni-gá chĩndee ñaha-gá xii-ndo càda váha-ndo cùndecu-ndo ndéé ná sáá nduu quixi tucu Xítohó Jesucristú. ⁷ Te ducaⁿ tnàhí tàù-xi cani iní-í sá cúú-xí-ndó, chi ío cùu iní ñáhà-í xii-ndo. Te tnàhá-ndó ío chĩndee chitúu ñaha Yă Ndiöxí xii-ndo ndècu-ndo, te diu-ni ducaⁿ chĩndee ñaha-gá xii-ndo tnàhá-ndó cuèi vitna yihí-í vecaá, te diu-ni ducaⁿ chĩndee ñaha-gá xii-í cuèi òré cuáháⁿ-í núú cuè ñáyiú ñá túú tnàhá iní tnúhu-gá, chi nihí-í tnúhu nàdanchocáva-í nũu ná tnúhu càháⁿ-yu cuendá-gá, te nchaa ñáyiú xăháⁿ-í xii-yu sá tnúhu-gá cúú-xí tnúhu ndáá cuiti. ⁸ Te mee Yă Ndiöxí náhá ndáá-gá sá yúhú ío cùu iní ñáhà-í xii-ndo dàtná cúú iní ñáhá mèe Xítohó Jesucristú xii-o. ⁹ Te xìcáⁿ táhù-í núú Yă Ndiöxí sá díú-gă ná chĩndee ñaha-gá xii-ndo te uuⁿ-gá cuita cuu iní tnàhá-gă-ndó quíhíⁿ, te ducaⁿ ío váha cuita cutnùní iní-ndó nchàa nacuaá sàni iní-gá cada-ndo, te ducaⁿ ío váha cuita cutnùní tucu iní-ndó nàcuáa cundecu-ndo. ¹⁰ Te ducaⁿ cutnùní tucu iní-ndó nchàa sá ío-gá váha xini ñuhu-xi cada-ndo, te ducaⁿ te cuu-ndo ñăyiú cada mee-ni sá văha, te ducaⁿ ñà túú tnàhí ná cùmání-ndó nũú Yă Ndiöxí ndéé ná sáá nduu quixi tucu Xítohó Jesucristú. ¹¹ Te diu-ni Xítohó Jesucristú chĩndee ñaha-gá xii-ndo càda-ni-ndo nchaa núú sá váha nàcuáa cuní Yă Ndiöxí. Te sá dúcáⁿ ná càda-ndo te ío

cada càhnu-ndo-gá, te nchaa dava-gá ñáyiú cáháⁿ váha-yu cuèndá-gá.

Xítohó Jesucristú ío cùnuu-gá ndécú ndìhi-gá té Páblú

¹² Te nchaa nchòhó ñáyiú ndècu ndìhi-í ichi Xítohó Jesucristú na càchí tnúhu-í xii-ndo sá úúⁿ-gá tá xíté nuu tnúhu-gá vitna yìhi-í vecaá. ¹³ Te nchaa cue tée cùu sandadú xindecu vechiúⁿ núú ndécú tée cùnuu xiní-güedé sá sá cuèndá sá càháⁿ-í tnúhu Xítohó Jesucristú duha yìhi-í vecaá, te diu-ni ducaⁿ sà xiní nchaa dava-gá ñáyiú sá sá càháⁿ-í tnúhu-gá duha yìhi-í vecaá. ¹⁴ Te cuèndá sá dúhá yìhi-í vecaá xiáⁿ ío-gá vài ñáyiú ndècu ichi Yá Ndiòxí ta cùtnuní-gá iní-yu sá cúú-gá ìⁿ Yaá ío quide ndáá, te uuⁿ-gá tá cùyíⁿ-yu càháⁿ-yu tnúhu-gá, te ñá túú tnàhí-gá yùhú-yu càháⁿ-yu.

¹⁵ Te na càchí-í tnúhu ndáá-í xii-ndo sá dáva ñáyiú càháⁿ-yu tnúhu Xítohó Jesucristú cuèndá-ni sá cúú cuèdú iní ñáhá-yu xii-í sá ío chindee ñaha-gá xii-í càháⁿ-í tnúhu-gá. Te ducaⁿ quidé-yu chi cuíní-yu nàá ndìhi ñáhá-yu xii-í, dico davá-yu chi ío váha sàni iní-yu càháⁿ-yu tnúhu-gá. ¹⁶⁻¹⁷ Te ñáyiú-áⁿ càháⁿ-yu tnúhu-gá chi cùu iní ñáhá-yu xii-í, te sa nàhá-yu sá sá cuèndá sá càháⁿ váha-í cuèndá tnúhu-gá núú ñáyiú ñá túú tnàhá iní tnúhu-gá, cuèndá xiáⁿ yìhi-í vecaá. Te dava-gá-yu càháⁿ-yu tnúhu Xítohó Jesucristú cuèndá-ni

sá cuíní-yu cuu sá vâha xii mèe-yu, te ñá díú sá càháⁿ-yu cuèndá sá sání vâha iní-yu. Te ducaⁿ quidé-yu chi cuèndá cuíní-yu sá nãndi-gá cada ñaha-güedé xii-í. ¹⁸ Dico ío cùdíⁿ iní-í sá càháⁿ-yu tnúhu Xítohó Jesucristú cuèi cùu váha iní-yu àdi ñá túú cùu váha iní-yu càháⁿ-yu.

Te diu-ni ducaⁿ cùdíⁿ iní-í núú cuáháⁿ núú vèxi. ¹⁹ Te cùtnuní iní-í sá sá cuèndá nchaa sá quidé ñaha-güedé xii-í, cuèndá xiáⁿ cada váha ñaha Yá Ndiòxí xii-í, chi nchòhó ío càháⁿ ndìhi-ndo-gá cuèndá-í, te Espiritú ní taxi Xítohó Jesucristú ndécú ndìhi-o ío chindee ñaha-xi xii-í. ²⁰ Te cuíní-í sá ñá túú tnàhí ná cumáni-í núú Yá Ndiòxí cuèndá sá vâ cúú càháⁿ núú-í, te cùtnuní iní-í sá díú-gá chindee ñaha-gá xii-í. Te cuíní tucu-í sá ío cuyíⁿ-í càháⁿ-í tnúhu-gá vitna dàtná tá quide-í véxi, te ducaⁿ ío cada nínu-í Xítohó Jesucristú cuèi vitna nini ndècu-í ñuyíú-a te cuèi na cùú-í ducaⁿ-ni càda nínu-í-gá. ²¹ Te nini ndècu-í ñuyíú-a te Xítohó Jesucristú ío cùnuu-gá ndécú ndìhi ñaha-gá xii-í, te na sàá nduu cùú-í te ío-gá váha tnahá-í chi nucúndecu-í ndìhi-gá. ²² Te núu na cùndecu-gá-í ñuyíú-a te cada-gá-í chiúⁿ sá cúú-xí Yá Ndiòxí, te ñá cùtnuní iní-í nása cada-í núu sá cùndecu-í àdi sá cùú-í. ²³ Te ío vài saní iní-í te cuíní-í cuú-í chi ío-gá váha cundecu-í núú ndécú Xítohó Jesucristú. ²⁴ Dico sá cúú-xí nchòhó chi ío xini ñuhu-xi cundecu-í. ²⁵ Te cùtnuní

ndáá iní-í sá ìⁿ tnúhu ndáá cãháⁿ-í, te cùtnuní tucu iní-í sá cùndecu-ni-í cundecu ndìhi ñaha-í xii-ndo nchãa-ndo cuendá chindee ñaha-í xii-ndo cuíta quindáá-gá iní-ndó Xítohó Jesucristú quíhíⁿ, te ducaⁿ ïo cudíí iní-ndó cùndecu-ndo. ²⁶ Te ducaⁿ te uuⁿ-gá cachí-ndó sã ïo cãhnu cuu Xítohó Jesucristú cuendá sá ñí dáçcu ñaha-gã xii-í ndécú ndìhi ñaha-í xii-ndo.

²⁷ Te xini ñuhu-xi cada-ndo nchaa nacuaa cãháⁿ tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvá-áⁿ quini ndáá-í sá ndécú-ni-ndó ìchi Xítohó Jesucristú. Dico núu ñá túú ní ndacu-í quixi coto ñaha-í xii-ndo ña, te diu-ni níhi-í tnúhu sá ndécú-ni-ndó ìchi-gá, te níhi tucu-í tnúhu sá ìⁿ-ní cùu-ndo ndecu-ndo, te níhi tucu-í tnúhu sá ìⁿnuu nducu ndee-ndo caháⁿ-ndó tnúhu Yá Ndióxi núu ñáyiu, tnúhu sá sãndáá iní-ndó. ²⁸ Te ñá túú yuhú-ndó nchãa sá quidé ñaha ñáyiu cùu úhú iní ñáhá xii-ndo, te sá ducáⁿ quide-ndo ñá túú yuhú-ndó nchãa sá quidé ñahá-yu xii-ndo, te ndìxi túu iní-yu sá nchòhó ndécú-ndó ìⁿ ìchi núu nánihí tàhú-ndó, te ñáyiu-áⁿ cuíta nihnú-yu, chi ducaⁿ ñí cachí Yá Ndióxi cunduu. ²⁹ Te mee Yá Ndióxi ní taxi-gá tnúhu ndee iní sá quindáá iní-ó Xítohó Jesucristú, te ñá diú-ní sã quindáá iní-ó-gã chi tnàhá ndoho-o cuendá-gá. ³⁰ Te tnàhá nchòhó ndóhó-ndó cuendá-gá vitna, te nchòhó

ní xiní núu-ndó nãcuáa ní ndoho-í, te vitna nihí-ndó tnúhu nchaa nãcuáa ndòho tucu-í.

2

Xítohó Jesucristú ñá túú ní quide nínu-gá méé-gã dico Yá Ndióxi ní quide nínu ñaha xii-gá

¹ Te Xítohó Jesucristú dáçahu iní ñáhá-gã xii-ndo nãcuáa cundecu-ndo, te cùu iní ñáhá-gã xii-ndo nãcuáa cuu váha iní-ndó cùndecu-ndo, te ndècu ndìhi-ndo Espiritú Yá Ndióxi, te ïo cùndahú iní tnáhá-ndó. ² Te xiáⁿ núu cãháⁿ-í dóho-ndo sã ïo cuu ìⁿnuu-ni-ndó cùndecu-ndo nacuaa ïo-gá cudíí iní-í, te ìⁿ-ni cùu iní tnáhá-ndó, te ìⁿ-ni cãni iní-ndó, te ìⁿ-ni càda-ndo. ³ Te vá cáda ñnu-ndo mée-ndo nducu-ndo mee-ni sá cúu-xí mée-ndo, chi cunduu ndàhú iní-ndó, te cani iní-ndó sã tnàha ñáyiu-ndo ïo-gá cùnùu-yu dàcúúxi mée-ndo. ⁴ Te ni vã cáni iní-ndó nducu-ndo mee-ni sá váha sá cúu-xí mée-ndo, chi nducu-ndo sã cúu-xí tnàhá cuendá tnàha ñáyiu-ndo.

⁵ Te ïo váha cani iní-ndó nãcuáa cundecu-ndo dàtná quidé mée Xítohó Jesucristú. ⁶ Te ìⁿ-ni cùu Xítohó Jesucristú ndìhi Yá Ndióxi. Te cuèi ducaⁿ dico mee Xítohó Jesucristú ní sani iní-gá sã ña túú cùyica cundecu-gá taxi tnùnigá ndìhi Yá Ndióxi. ⁷ Te ní dáñá-gã sã cùnùu-gá andiù te ní quixi-gá ñuyú-a ní cuu-gá ìⁿ ñáyiu, te ní quide-gá dàtná quidé ìⁿ téé xinu cuechi. ⁸ Te ní cuu-gá ìⁿ téé dàtná ndãa

cue tée xĩndecu ñuyíú-a, te ní cuu-gá ñⁿ tée ío ndàhú iní-xi chí ñá túú ní quide nínu-gá mée-gã, te ní sándáá iní-gá ní quide-gá nchaa nàcuáa ní xáhaⁿ Yã Ndiöxí xii-gá cútñahá ní quixi-gá ñuyíú-a. Te sá dúcáⁿ ní sándáá iní-gá xíáⁿ ní xihí-gá núú cùrúxí. ⁹Te xíáⁿ ío ní quide nínu ñaha Yã Ndiöxí xii Xítohó Jesucristú cuendá ío cunuu-gã. Te ní xáhaⁿ Yã Ndiöxí xii Xítohó Jesucristú sá cúú-gã Xítohó nchaa ñáyiu ndècu ñuyíú-a. ¹⁰Te ducaⁿ ní quide Yã Ndiöxí cuendá nchaa Espíritú ndécú àndiu, ndihi nchaa ñáyiu ndècu ñuyíú-a, ndihi nchaa ñáyiu ní xihí ngüñí xítí-yu ndihi nchaa espíritú-áⁿ te cachí-yu ndihi-xi sá ío càhnu cuu Xítohó Jesucristú. ¹¹Te nchaá-yu cachí-yu sá Xítohó Jesucristú cúú-gã Yaá táxí tnùní. Te sá dúcáⁿ càdá-yu, te quide cahnú-yu Dútú Ndiöxí.

Ñáyiu ndècu ichi Xítohó Jesucristú cúú-yu dàtná ñⁿ ñuhú

¹²Te xíáⁿ nñu nchaa nchòhó ñáyiu ío cùu iní-í cuení-í sá quindáá iní ñáhá-ndó xii-í dàtná ní quide-ndo cútñahá ní xĩndecu ndihi ñaha-í xii-ndo, chí dàvá-áⁿ ñà túú tnàhí ní dàña ndeé-ndó nì sándáá iní ñáhá-ndó xii-í. Te cuení-í sá úúⁿ-gã quindáá iní ñáhá-ndó xii-í vitna ñá túú ndècu ndihi ñaha-í xii-ndo. Te ío nducu ndèe-ndo cada-ndo nchaa nacuáa taú-xi cunduu ndéé ná sàá nduu nduu táhú-ndó cùndecu-ndo ndihi Xítohó Jesucristú, te ío canehe-ndo sã yíñuhu

núú-gã. ¹³Te Yã Ndiöxí ío váha dàcahu iní ñáhá-gã xii-ndo càda-ndo nchaa nacuáa cuení mée-gã, te diu-ni mee-gã chíndèe ñaha-gã xii-ndo dùcaⁿ quide-ndo.

¹⁴Te vá cání iní-ndó ñá tnúhu càháⁿ-ndó cuendá ñáyiu, te ni ñà túú nãndi tnúhu cútñaha-ndo ndihí-yu, ¹⁵te ducaⁿ te cuu-ndo ñáyiu ñá túú cuèchi-xi núú Yã Ndiöxí. Te nchòhó ñáyiu cùu déhe Yã Ndiöxí, ñá túú tnàhí-gá ná cumání-ndó nñú-gã nini ndècu-ndo tnuú nchaa ñáyiu ndècu ichi cuehé ichi duha ñuyíú-a, ñáyiu cuihna iní-xi. Te cuu-ndo dàtná chódíní sã dáyèhé niú nee, ¹⁶te ducaⁿ chí dàcuaha-ndo ñáyiu tnúhu Yã Ndiöxí tnúhu sá càháⁿ nacuáa naníhí tàhú-yu. Te núu ducaⁿ-ni na càda-ndo te òré ná sàá nduu càda ndáá Xítohó Jesucristú nchaa yíca cuèchi ñáyiu, te dàvá-áⁿ vã cúú càháⁿ núú-í, chí ñá túú dió ducaⁿ ní sàhni iní-í cada-í nchaa chiúⁿ ní táhú-gã. ¹⁷Te nchòhó ío váha quide-ndo ndecu-ndo ichi Yã Ndiöxí chí sándáá iní-ndó-gã, te yúhú cahni ñaha-güedé xii-í cuendá nchaa sá vãha quide-ó. Te xíáⁿ ío cùdíí iní-í te cùdíí tucu iní-í dàtná cùdíí iní-ndó cuendá nchaa sá vãha quide-ndo. ¹⁸Te diu-ni ducaⁿ ío chí cùdíí iní dàtná cùdíí iní mée-í cuendá nchaa sá yãha-í ndécù-í.

Té Timùteú ndihi té Epafrodítú

¹⁹Te núu Xítohó Jesucristú ná càchí-gá te ndihi-ni ten-daha-í té Timùteú quixi-dé

quixi coto ñaha-dě xii-ndo ñacuáa cudíí iní-ndó. Te òré ndixi-dé canaha-dě tnúhu ndixi núu nása cùu ndecu-ndo, te tnàhá yúhú ío cudíí iní-í tucu. ²⁰ Te núu ncháa cuè téé ndècu ndihi-í te ñⁿdii-ni té Timùteú-a cùu-dé téé ío váha sàni iní-xi dàtná sání iní-í, chi diu tnàhí-ni-dé ío sàni iní-dé núu nása ndècu-ndo. ²¹ Chi dava-gá-güedé mee-ni sá cúu-xi mèe-güedé ío sàni iní-güedé, te ñá túú sàni iní-güedé cada-güedé chi^un tahu Xítohó Jesucristú. ²² Te nchòhó sa xíní-ndó sã tẽ Timùteú-a cùu-dé ñⁿ téé quide váha chi nándi sá tá yáha-dé véxi te quide ndee iní-dé. Te cùu-dé dàtná ñⁿ déhe-í ndécú ndihi ñaha-dé xii-í xínú cuèchi-ndí núú Xítohó Jesucristú càháⁿ-ndí tnúhu-gá núú ñáyi^u. ²³ Te òré ná cùtnuní núu nása cada ñaha-güedé xii-í te ndihi-ni tendaha-í-dé quixi coto ñaha-dě xii-ndo. ²⁴ Te sàni iní-í sá Xítohó Jesucristú cada-gá te tnàhá mée-í ío ndihi quixi coto ñaha-í xii-ndo.

²⁵ Te tnàhá sání iní-í sá ío xíní ñuhu-xi tendaha-í té Epafròditú téé ndècu ndihi-o ichi Xítohó Jesucristú ndixi coto ñaha-dě xii-ndo, chi tnàhá-dé quidé-dě chi^un-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo ñi tendaha-ndo-dě véxi-dé cuendá coto ñaha-dě xii-í. ²⁶ Te ducaⁿ cuini-í tendaha-í-dé ndixi-dé chi mee-dě ío sàni iní-dé ndixi càháⁿ ndihi ñaha-dě xii-ndo, te ío ndihú iní-dé sá ni ñhí-ndó tnúhu sá cùhú-dé

ní cùu. ²⁷ Te ndáá sá ñi cùhú-dé chi luha ndiquiⁿ-ná cuú-dé ní cùu, dico Yá Ndiòxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñá díú-ní mèe-dé ducaⁿ ñi cundahú iní ñáhá-gã xii-dé chi tnàhá yúhú ío ní cundàhú iní ñáhá-gã xii-í, chi núu ni xíhí-dé te ío-gá ndihú iní-í ní cùu. ²⁸ Te xiáⁿ ío ndihi cuini-í tendaha-í-dé ndixi-dé cuendá òré nasáá-dé núu-ndó te ío cudíí iní-ndó, te ducaⁿ yúhú ñá túú-gã ná cani iní-í. ²⁹ Te òré nasáá-dé te ío cudíí iní-ndó ñaqueheⁿ cuendá-ndó-dě, te ducaⁿ ío ndacáⁿ táhú-ndó núú Xítohó Jesucristú cuendá-dé. Te ío canehe-ndo sã yíñuhu núu nchàa cue téé quide datná quidé-dě. ³⁰ Chi téé-a sa luha ndiquiⁿ-ná cuú-dé ní cùu sá xínú cuèchi-dé núú Xítohó Jesucristú, te ní sani iní-dé sá ñá túú ñá cada-xi cuèi na cùu-dé ní quide-dé nchaa chi^un sá cùmání cada-ndo cuendá-í ní cùu.

3

Ñáyi^u cundáá núú Yã Ndiòxí

¹ Te vitna nchaa nchòhó ñáyi^u ndècu ndihi-í ichi Xítohó Jesucristú càháⁿ ndàhú-í núu-ndó sã ío cudíí iní-ndó sã yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sá ní dánèhé ñáhá-í xii-ndo, chi cùu-xi tnúhu sá ío chindee ñaha-xi xii-ndo. ² Te ío quihí iní-ndó yã cadá cuendá-ndó ñi ñⁿ tnúhu càháⁿ cue téé ío cuihna iní-xi ñá túú tnàhí cuini cada sá váha, chi cue

tée-áⁿ néhé-güedë iní iná chi cächí-güedé sá ncháá cuè tée xini ñuhu-xi cuáha-güedé seña ñii-güedé cuendá ducaⁿ cùdiu-güedé núú Yá Ndiöxí. ³ Dico nchoo chi cùdiu-o núú Yá Ndiöxí cuèi dava-o sà ní ngündecu seña ñii-o te dava-o ñhá, chi Espiritú-gá chindèe ñaha-xi xii-o quide-o nchaa nacuaá tau-xi cunduu cuendá cuu cànnu-gá. Te ío cùdíí iní-ó cächí-ó sã ïo cànnu cuu Xitohó Jesucristú, te ñã túú sàni iní-ó sã sã cuendá nchaa sã vaha quide-o cudíu-o núú Yá Ndiöxí. ⁴ Te núú dicó cuendá nchaa sã vaha quide-o cudíu-o núú Yá Ndiöxí, te yúhú sa ama-gá cudíu-í núú-gã cuendá nchaa sã ñi quide-í ní cùu te núú dicó ducaⁿ. Te ío cue tée cächí-güedé sá cùdiu-güedé núú Yá Ndiöxí cuendá nchaa sã vaha quide-güedé. Te yúhú uuⁿ-gá ducaⁿ cãháⁿ-í núú dicó sá cúú chi yúhú ní xidó-gã-í ní quide-í dàcúúxí dàva-gã-güedé. ⁵ Te núú ùná-ni nduu sã ñi cacu-í te ní sãha-güedé seña ñii-í, te yúhú cúú-í tée israél, te mei ñani tnahá ndii Benjamín tée ní xíndecu ndéé sanaha cùu-í. Te cãháⁿ-í tñúhu hëbreú tñúhu cãháⁿ tãtà-í ndihi nãná-í, te ní cundíhi-í nchaa cue tée cùu fariséú, te ní cãchicúⁿ nihnu-í nchaa nacuaá ní cãháⁿ ndii Moisés dàtná xíquide mee-güedé. ⁶ Te yúhú ní sani iní-í sã ñi ichi ndáá ndécù-í ní cùu, te ío ní cuini-í cunu cuechi-í núú Yá Ndiöxí, núú xiãⁿ nãndi sã ñi quide-í nchaa ñáyiú ndècu ichi Xitohó Jesucristú, te vá

yõ ñi ní xóo cúñaha ñi tñúhu xii-í cächí-yu sã ñã túú quide-í nacuaá ní cãháⁿ ndii Moisés ní cùu. ⁷ Te nchaa sã sãni iní-í sã ïo nãndíhi nchicúⁿ nihnu-í ní cùu, ní cutnùní iní-í sã ñã túú tnahí chindèe ñaha-xi nacuaá cundáá-í núú Yá Ndiöxí, núú xiãⁿ duuⁿ duuⁿ ní xehndé iní-í sã vã chindèe ñaha-xi cuendá sã ñi cuini-í cundecu ndíhi-í Xitohó Jesucristú. ⁸ Te nchaa sã cächí ñáyiú chindèe ñaha cundáá-ó núú Yá Ndiöxí ní cutnùní iní-í sã ñã túú chindèe ñaha-xi, Te yúhú ní cutnùní iní-í sã ïo-gã vaha tnahá tñúhu-o ndíhi Xitohó Jesucristú. Te nchaa sã sãni iní-í chindèe ñaha xii-í ní cùu, ñã túú-gã sãndáá iní-í sã chindèe ñaha-xi vitna chi ní cutnùní iní-í sã ñã túú nãndíhi-xi. Te ducaⁿ quide-í ñã túú-gã sãndáá iní-í nchaa xiãⁿ sã chindèe ñaha-xi, chi cuini-í sã úúⁿ-gã cuita tnahá tñúhu-í ndíhi Xitohó Jesucristú quíhiⁿ, ⁹ te cuu ñi nuu-í ndíhi-gã, te ducaⁿ-ni cundáá-í núú Yá Ndiöxí dàtná cundáá-í vitna, dico ñã díú cuendá sã nchicúⁿ nihnu-í nacuaá ní cãháⁿ ndii Moisés ní cùu, chi cuendá sã sãndáá iní-í Xitohó Jesucristú. Te Yá Ndiöxí ní quide-gã cundáá-í núú-gã, te ducaⁿ chi ní sãndáá iní-í Xitohó Jesucristú. ¹⁰ Te cuini-í cutnùní iní-í nchaa nacuaá sãni iní Xitohó Jesucristú, te cuini-í sã ïo chindèe ñaha-gã, te diu-ni-gã cúú-gã Yaá ní xíhi te ní ndoto-gã, te ducaⁿ cuini-í cada-gã cuendá cada-í nchaa nacuaá cuini-gã. Te cuini-í tnahá-í ndoho-í dàtná ní ndoho-gã. Te yúhú cuini-í sã vã cadà-í ní ñi sã ñã

túu tnàhá iní Yă Ndiöxí, chi diu cuendá-án nĩ xíhí Xítohó Jesucristú. ¹¹ Te cuiní-í sá Yă Ndiöxí cachí-gá te tnàhá-í ndoto na sáa nduu ndòto nchaa ñáyiú sa ní xíhí ní xíndecu ichi-gá.

Cada-o nchaa nacuáa tãu-xi cunduu cuendá nihí-ó sã ndúú tãhú-ó

¹² Te cumání-gã cada-í nchaa nacuáa cãháⁿ-í-a, te cumání-gã cada-í nchaa nacuáa cãháⁿ Yă Ndiöxí cuendá sá ñà túú-gã ná cumání-í núú-gã. Te ío ndùcu ndee-í nchícúⁿ nihnu-í quidè-í nacuáa ducaⁿ ñà túú-gã ná cumání-í núú-gã, chi diu cuendá-án nĩ cãháⁿ ñáhá Xítohó Jesucristú xii-í. ¹³ Te nchaa nchòhó ñáyiú ndècu ndihí-í ichi Xítohó Jesucristú cachí tnúhu-í xii-ndo sã cùnùnì ndáá iní-í sá vítná cumání-gã cada-í nchaa nacuáa ñá túú-gã ná cumání-í núú-gã. Te ní níhí-í ìⁿ sá ío xini ñuhu-xi cada-í te xiãⁿ quidè-í, te ñá túú-gã quidé cuendá-í nchaa sá nĩ xóo cada-í, te ío ndùcu ndee-í quidè-í nchaa nacuáa cãháⁿ Yă Ndiöxí. ¹⁴ Te ndùcu ndee vihi-í nchícúⁿ nihnu-í quidè-í nchaa nacuáa cãháⁿ-gá, te diu-ni ducaⁿ càda-í ndéé ná sàá nduu sáá-í núú ndécú-gã taxi-gá sá ndúú tãhú-í. Te ducaⁿ tnàhí sa ní cãháⁿ ñáhá-gã xii-o cùndecu-o ndihí-gá, te ducaⁿ nĩ cãháⁿ ñáhá-gã xii-o sã cuendá Xítohó Jesucristú chi tnàhá tnúhu-o ndihí-gá.

¹⁵ Te nchaa nchòhó ñáyiú quide váha ndècu ichi Yá Ndiöxí xini ñuhu-xi cani

iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yă Ndiöxí candixi túu-gá iní-ndó te cùnùnì iní-ndó nacuáa cada-ndo. ¹⁶ Te xini ñuhu-ni-xi cada-o nchaa nacuáa ta quide-o véxi.

¹⁷ Te nchaa nchòhó ñáyiú ndècu ndihí-í ichi Xítohó Jesucristú cãháⁿ-í dóho-ndo sã cãncícúⁿ nihnu-ndo càda-ndo datná quidè-í. Te cundehe-ndo nacuáa quide nchaa ñáyiú sa nchícúⁿ nihnu nchaa nacuáa dànehé ñáhà-í xii-ndo cuendá ducaⁿ càda-ndo tnàhá-ndó. ¹⁸ Te sa ní cuu vãi xito cachí tnúhu-í xii-ndo sã ío ñáyiú ñá túú tnàhí cùu váha iní-xi sá nĩ xíhí Xítohó Jesucristú núú cùrúxí cuendá sá nánihí tãhú-ó. Te ndihí ndute núu-í dándacu iní ñáhà-í xii-ndo cuendá-yu. ¹⁹ Te sáa nduu te nchaa ñáyiú ducaⁿ xíquide-áⁿ cuíta nihnú-yu, chi mee-ni nchaa sá cuèhé sá dúhá ñuhu iní-yu te diu-ni nchaa xiãⁿ cùnùu quidé-yu, te cucahaⁿ núu-yu cuendá nchaa sá quidé-yu núu dícó sá cúú, dico ñáhá chi da quide cahnú-yu mèe-yu cuendá nchaa xiãⁿ. Te mee-ni nchaa sá ío ñuyú-a ñuhu iní-yu. ²⁰ Dico nchoo chi andiu ndècu núú cúú ñúú-ó, te ndètu cahnu-o sáá nduu quixi tucu Xítohó Jesucristú nacuaca ñaha-gã xii-o. Te diu-ni-gá cúú-gã Yáá ní dácãcu nihnu ñaha xii-o núú uhú núú ndàhú. ²¹ Te yiqui cùñú-ó chi vá cúdĩ-xi cundecu-xi dàtná cáá-xí vítna, dico mee Xítohó Jesucristú nadama-gá yiqui cùñú-ó te ndada-gá dàtná ní nduu

yiqui cùñú méé-gă cútnàhá ní ndoto-gá. Te ducaⁿ càda-gá chi ndàcu-gá quidé-gă nchaa sá vâha càchí iní-gá, te ducaⁿ tàxi tnuní-gá nchaandi túhú sá ío.

4

Ío cudíí iní-ó sã ndécú-ó ichi Xítohó Jesucristú

¹ Te nchaa nchòhó ñâyiu ío cùu iní-í ndécú ndihí-í ichi Xítohó Jesucristú ío cùiní-í cãháⁿ ndihí ñaha-í xii-ndo. Te ío cùdíí iní-í cuendá nchaa sá vâha quide-ndo chi ñá túú ní xíta chiúⁿ Yá Ndiöxí ní quide-í sá cúú-xí-ndó, te diu-ni nchòhó ñâyiu ío cùu iní-í cãháⁿ-í dóho-ndo sã cãncíicúⁿ nihnu-ni-ndo ichi Xítohó Jesucristú.

² Te yòhó tá Vòdiá ndihí yòhó tá Síntiqué cãháⁿ ndàhú-í núú-ndó sã cúú ìⁿnuu-ndo cundecu-ndo ichi Xítohó Jesucristú. ³ Te yòhó té cundihí-í quide ndáá quidé nchaa chiúⁿ quide-í, cãháⁿ ndàhú-í núú-n sã chindèe tnúhu-n úú ñâyiu dihí-áⁿ cuendá sá ná cùu ìⁿnuú-yu cundecú-yu, chi cútnàhá ní xindecu ndihí ñàhá-yu xii-í ío ní chindee ñàhá-yu xii-í, ndihí té Clémenté, ndihí nchaa dava-gá-yu ní quide-ndí chiúⁿ Xítohó Jesucristú, te nchaa ñâyiu-áⁿ sa yòdo tnuní-yu núú tütú Yá Ndiöxí sá ndúú tãhú-yu cundecú-yu ndihí-gá ni caa ni quíhíⁿ.

⁴ Te nchaa-ni nduu ío cudíí iní-ndó sã ndécú-ndó ichi Xítohó Jesucristú. ¡Te cãháⁿ-ni tucu-í dóho-ndo sã cúdíí ndisa iní-ndó! ⁵ Te ío vâha cuu

iní-ndó cãháⁿ ndihí-ndo ñâyiu cuendá ná cùtnuní iní-yu sá cúú-ndó ñâyiu vâha iní-xi, chi sa ta cùyatni nduu quixi tucu Xítohó Jesucristú.

⁶ Te ñá túú tnàhí ná caní iní-ndó te núu nãsa cùu ndecu-ndo, chi cãháⁿ ndihí-ndo Yá Ndiöxí cuendá sá ná chindee ñaha-gá xii-ndo. Te ío ndacáⁿ tãhú-ndó núú-gă. ⁷ Te núu ducaⁿ na càda-ndo te Yá Ndiöxí cada-gá te ío vâha cuu iní-ndó cùndecu-ndo. Te nchoo ñâyiu ñá túú cùtnuní iní-ó nãsa quide-gá ndéé ducaⁿ ío vâha cùu iní-ó, te ducaⁿ ío vâha cùu iní-ó chi cùu ìⁿnuu-o ndihí Xítohó Jesucristú.

Mee-ni sã vâha cuhuⁿ iní-ó

⁸ Te cãháⁿ ndàhú tucu-í núú nchaa nchòhó ñâyiu ndecu ndihí-í ichi Xítohó Jesucristú sá méé-ní sã vâha cuhuⁿ iní-ndó. Te xini ñuhu-xi cuhuⁿ iní-ndó mèe-ni nchaa tnúhu ndáá, ndihí nchaa tnúhu yiñùhu, ndihí nchaa tnúhu sá ío cudíí iní-ó, ndihí nchaa tnúhu sá ío vii ío vâha cuáháⁿ, ndihí nchaa tnúhu sá ñá túú ñùhu tnahá tnúhu cuèhé, ndihí nchaa tnúhu sá cãchí ñâyiu vâha, ndihí nchaa dava-gá tnúhu sá sání iní méé-ndó sã ío vâha te diu-ni nchaa xiãⁿ cuhuⁿ iní-ndó.

⁹ Te cútnàhá ní xindecu ndihí ñaha-í xii-ndo ní dánèhé ñàhá-í ñacuáa cada-ndo te ní sãndáá iní-ndó. Te xiãⁿ cãháⁿ-í dóho-ndo sã vã dãñá ndéé-ndó càda-ndo, te diu-ni ducaⁿ vã dãñá ndéé-ndó càda-ndo nchaa nacuáa ní quide-í ní xiní-ndó. Te núu ducaⁿ na càda-ndo te Yá Ndiöxí Yáá quidé ío vâha cùu

iní-ó ndècu-o cundecu ndihi ñaha-gá xii-ndo.

Ñáyiú ñuú Filipú ndécú ichi Xítohó Jesucristú sãñahá-yu sá ndúú tãhú tẽ Pãblú

10 Te cùdíí vîhí iní-í ndàcáⁿ tãhù-í núú Xítohó Jesucristú sá nĩ ndacu iní ñáhá-ndó xii-í, dico ñá díú sã ñà túú ñùhu iní ñáhá-ndó xii-í chí dícó sá ñã ñihí-ndó nàcuáa cada-ndo chindee ñaha-ndo xii-í ní cùu. 11 Te ñá díú sã dúhá càháⁿ-í te caní iní-ndó sã càchí tnúhu-í xii-ndo sã íó ìⁿ sá cùmãní xii-í, chí yúhú cùu váha-ni iní-í nõu íó xii-í àdi ñá túú íó. 12 Te xíní-í cunduu ndàhú-í, te xíní-í cunduu cuica-í, te xíní-í caxi-í ndahá xití-í, te xíní-í cuú-í docó, te xíní-í nàcuáa quide-xi oré ñá túú vèdana ná ndécú ndihi-o, te xíní-í nàcuáa quide-xi oré xidó ndécú ndihi-o. Te ducaⁿ nĩ cutúha-í quidè-í cuendá nchaa nàcuáa ta yãha-í véxi. 13 Te nchaa ndàcu-í quidè-í chí Xítohó Jesucristú chindèe ñaha-gá xii-í. 14 Te nchòhó ío váha ní quide-ndo nĩ cundàhú iní ñáhá-ndó xii-í ní chindee ñaha-ndo vitna ndecu ndihi-í tnúndòho.

15 Te nchòhó cue ñáyiú ñuú Filipú sa nàha-ndo nacuáa ní cuu cútnahá ní ngüita-í càháⁿ-í tnúhu Xítohó Jesucristú distritú Macèdoniá, te cútnahá ní ndee-í distritú-áⁿ te díu tnàhí-ni nchòhó ní taxi-ndo sã ndúú tãhù-í, te nchaa ñáyiú ndècu ichi Xítohó Jesucristú dava-gá xichi ñá túú tnàhí ni chindee ñahá-yu xii-í. 16 Te cuèi cútnahá ní xindecu-í ñuú Tesalónica titní xito ní tendaha-ndo sã

ndúú tãhù-í sá nĩ cutnùní iní mée-ndó nĩ xini ñùhu-í. 17 Te vá caní iní-ndó sã sã dúhá càháⁿ-í te cuíní-í nándi-gá taxi tãhù-ndó, te duha càháⁿ-í chí Yá Ndiòxí ío-gá vai sã váha cada ñaha-gã xii-ndo sã dúcáⁿ quide-ndo. 18 Te ní xidó vai nchaa sá xíní ñùhu-í ndécú ndihi-í vitna, te ducaⁿ ío vai sã ndécú ndihi-í ní cuu chí ní tendaha tùcu-ndo sã ndúú tãhù-í véxi ndihi té Epafrodítú. Te tãhú-a cùu-xi datná ìⁿ tãhú sã nĩ sáha-ndo mée Yá Ndiòxí, te cùu vii cuu váha iní-gá sã dúcáⁿ ní quide-ndo. 19 Te núu ná cúú sã xíní ñùhu-ndo, te mee Yá Ndiòxí ío vai taxi-gá chí ío vai sã ndécú ndihi-gá, te ducaⁿ càda-gá chí ndècu ndihi-o Xítohó Jesucristú. 20 Te vitna nchaa-o chí ná càchí-ó sã ío càhnu cuu Tátá-ó Dütú Ndiòxí ni caa ni quíhíⁿ. Te ducaⁿ na cùnduu.

Tnúhu ndéé núú nĩ ndihi-ná
21 Te cúñaha-ndo sã ío na càda ndee iní nchaa ñáyiú ndècu ichi Xítohó Jesucristú, ñáyiú cùu cuendá Yá Ndiòxí. Te tnàhá nchaa ñáyiú xindecu ichi Xítohó Jesucristú ndécú ndihi-í quidè ndèe iní ñahã-yu xii-ndo. 22 Te nchaa ñáyiú cùu cuendá Yá Ndiòxí xínú cuèchi vehe té Cèsár tée yìndaha cuéhé nacióⁿ quidè ndèe iní ñahã-yu xii-ndo, ndihi nchaa dava-gá ñáyiú cùu cuendá-gá. 23 Te Xítohó Jesucristú ío na chindee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒLOSÁ

Té Pāblú cādúha-dé tutú quihiⁿ ndaha ñáyiu xĩndecu ichi Xítohó Jesucristú ndécú ñuú Còlosá

¹ Yúhú té Pāblú ní tendaha ñaha Yá Ndiõxí càháⁿ-í tnúhu Xítohó Jesucristú núú ñáyiu chi ducaⁿ cuini méé Yá Ndiõxí cunduu, te cādúha-í tutú-a ndihi té Timùteú ² cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yá Ndiõxí, ñáyiu quide ndáá ndécú ichi Xítohó Jesucristú, te xicáⁿ táhù-í núú Tātá-ó Dütú Ndiõxí sá io na chindee chitúu ñaha-gá xii-ndo, te ducaⁿ ndi nduú-gá ná cáda te io váha cuu iní-ndó cundecu-ndo.

Té Pāblú càháⁿ ndihi-dé Yá Ndiõxí cuendá ñáyiu sàndáá iní ñáhá xii Xítohó Jesucristú

³ Te ducaⁿ-ni càháⁿ ndihi-ndí Yá Ndiõxí Yaá cúú Tātá Xítohó Jesucristú ndacáⁿ táhú-ndí núú-gá cuendá nchaa nacuáa quide-ndo ndecu-ndo, ⁴ chi nihí-ndí tnúhu sá io sàndáá iní-ndó Xítohó Jesucristú, te ducaⁿ io cùu iní-ndó nchaa ñáyiu cùu cuendá Yá Ndiõxí. ⁵ Te ducaⁿ quide-ndo chi sàndáá iní-ndó sá ndúú táhú-ndó cundecu-ndo núú ndécú Xítohó Jesucristú, te tnúhu-áⁿ ní nihí-ndó cùtnàhá ní xĩndedóho-ndo tnúhu ndáá

tnúhu Xítohó Jesucristú. ⁶ Te tnúhu Xítohó Jesucristú tá xitè nuu-xi nihí ñuyú cuáháⁿ. Te vai ñáyiu ta sàndáá iní-yu cuáháⁿ, te ta quidé-yu mee-ni sá váha cuáháⁿ ndécú-yu ichi-gá. Te nchòhó chi ndéé cùtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gá cuáháⁿ. Te dàvá-áⁿ ní cutnùní ndáá ndisa iní-ndó sá Yá Ndiõxí io chindee chitúu ñaha-gá xii-ndo. ⁷ Te ducaⁿ ní dánèhé ñáhá tè Èpafrás téé io cùu iní-ndí, chi tnàhá-dé io quide ndáá-dé xínú cuèchi-dé núú Xítohó Jesucristú quidé-dé núú-ndí dácuaⁿ ñaha-dé xii-ndo tnúhu-gá. ⁸ Te cāchí tnúhu-dé xii-ndí sá io cùu iní ñáhá-ndó xii-ndí, te ducaⁿ quide-ndo chi Espiritú Yá Ndiõxí chindèe ñaha-xi xii-ndo.

⁹ Te ndéé cùtnàhá ní nihí-ndí tnúhu nacuáa quide-ndo ndecu-ndo ndéé dàvá-áⁿ ní ngúita-ndí ñá túú dàña ndee-ndí xicáⁿ táhú-ndí núú Yá Ndiõxí cuendá-ndó sá Espiritú-gá ná tàxi-xi nchaa-gá sá cúmāní quini tnùní-ndó, te ducaⁿ te cutnùní váha-gá iní-ndó nacuáa cuini Yá Ndiõxí cada-ndo. ¹⁰ Te sá dúcáⁿ te ndacu-ndo càda-ndo mee-ni sá váha dàtná cuini Xítohó Jesucristú cada nchaa ñáyiu ndècu ichi-gá. Te ducaⁿ io nduu vétú iní-gá te núu na càda-ndo nchaa núú sá váha. Te ducaⁿ io-gá cuita cutnùní iní-ndó nchaa nacuáa cuini Yá Ndiõxí cada-ndo. ¹¹ Te mee-gá cúú-gá Yaá io cùnuu, te diu-gá io chindee ñaha-gá

xii-ndo, te cudíí iní-ndó cuéi nándi na càda ñaha ñayiu xii-ndo sã cuendá-gá, te ducaⁿ ïo cunduu càhnu iní-ndó. ¹² Te ndacáⁿ táhú-ó núú Dütú Ndiöxí chi ní quide túha ñaha-gã xii-o cuendá nduu táhú-ó cundecu-o ndihi nchaa dava-gá ñayiu yindaha-gá xindecu núú cándòo canine ñá túú tnàhí-gá ní ìⁿ cuéchi ïó. ¹³ Te ñu-gá ní quide ní dáñá-ó nchàa ichi cuehé ichi duha núú táxí tnùní yucu ñävãha, te ní nachihi ñaha-gã xii-o ndàha Déhe-gá Yaá ïo cùu iní-gá. ¹⁴ Te Déhe-gá ní xihí-gá cuendá sá nchóó cãcu nihnu-o núú ùhú núú ndàhú, te ní quide càhnu iní-gá nchaa sá cuéhé sá dúhá ní quide-o.

Ñayiu cùu ìⁿnuu ndihi Yá Ndiöxí cuendá sá ní xihí Xitohó Jesucristú

¹⁵ Te Yá Ndiöxí cúú-gã Yaá vá cúú quini-ó dico Xitohó Jesucristú chi ní quixi túu-gá ñuyíú-a, te ní quide-gá nchaa nãcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndècu-gá ndéé cùtnàhá vátá ngãva-gá ñuyíú. ¹⁶ Te Xitohó Jesucristú ní quide-gá núú Yá Ndiöxí ní cadúha-gá nchaa sá ïó andiù ndihi nchaa sá ïó ñuyíú-a, te ní cadúha-gá nchaa sá cúú quini núú-ó cundehe-o, ndihi nchaa sá vã quini tnàhí-o, ndihi nchaa espíritú cùnùu vihi xinu cuechi núú Yá Ndiöxí, ndihi nchaa dava-gá espíritú xínú cuéchi. Te nchaa ní cadúha Xitohó Jesucristú chi ducaⁿ

ní cachí Yá Ndiöxí cunduu. Te ducaⁿ ní cachí Yá Ndiöxí cunduu cuendá nchaa cuu-xi mee-ni sã vãha sá cúú-xi Xitohó Jesucristú. ¹⁷ Te Xitohó Jesucristú ducaⁿ-ni ndècu-gá ndéé cùtnàhá vátá ngãva-gá ñuyíú-a, te ñu núú ndàhá-gã cándòo ñuyíú-a, ndihi andiù, ndihi nchaandi túhú sá ïó. ¹⁸ Te ñu Xitohó Jesucristú cùnùu-gá yindàha ñaha-gá xii nchaa nchoo ñayiu ndècu ichi-gá, te ñu-gá quidé-gã ndécú vãha-o núú-gã. Te núú ncháá ñayiu ndoto ñu-gá cúú-gã Yaá ïo càhnu cuu sa ní ndoto, te sá dúcáⁿ ní ndoto-gá te xiãⁿ cúú-gã Yaá ïo tàxi tnuní nchaandi túhú sá ïó ñuyíú-a ndihi andiù. ¹⁹ Te ducaⁿ ïo cùnùu-gá táxí tnùní-gá chi ndáá sá ìⁿ-ni cuu-gá ndihi Yá Ndiöxí. ²⁰ Te Xitohó Jesucristú ní xihí-gá núú cùrúxí, chi ducaⁿ ní cuini Yá Ndiöxí cunduu cuendá sá vã yõo ìⁿ-gá cuu ùhú iní ñáhá xii-gá cuéi ñayiu xindecu ñuyíú-a, te cuéi cue espíritú ndécú andiù.

²¹ Te nchòhó cùtnàhá vátá cùndècu-gá-ndó ichi Xitohó Jesucristú ñá túú tnàhí ni xõo cáháⁿ ndihi-ndo-gã, chi mee-ni ní xõo cuu ùhú iní-ndó-gã, te mee-ni nchàa sá cuéhé sá dúhá ní xõo cunuu ní xõo cada-ndo ni cùu, dico Xitohó Jesucristú ní quide-gá ní tnàhá tnùhu-ndo ndihi Yá Ndiöxí vitna. ²² Chi ñu cuendá-áⁿ ní xihí Xitohó Jesucristú núú cùrúxí cuendá sá nchóó ndùu ndoo nduù nine iní-ó ngùndecu-o núú Yá Ndiöxí, te ducaⁿ te ñá túú tnàhí-gá ná cumání-ó núú-gã,

te vá yǎo ñⁿ-gá cachí sá nchóo ndècu cuéchi-o. ²³ Te núu vá dáñá ndèé-ndó quindáá iní-ndó Xítoho Jesucristú, te cundecu-ni-ndo ìchi-gá, te vá cáni iní-ndó dañá-ndo tnúhu ndee iní ní taxi-gá ndécú ndihí-o. Te nchaa tnúhu-gá-áⁿ tá xité nuu-xi nihíi ñuyíú cuáháⁿ, te diu-ni tnúhu-áⁿ cáháⁿ yúhú té Páblú dánèhé-í ñáiyu.

Té Páblú yíhí díquí-dé cáháⁿ-dé tnúhu Xítoho Jesucristú núu ñáiyu ndècu ichi-gá

²⁴ Te vitna ío cùdíí iní-í ndóhò-í cuendá-ndó, chí Xítoho Jesucristú ío ní ndoho-gá cuendá-ó, te tnàhá yúhú ndóhò-í cuendá nchaa ñáiyu ndècu ichi-gá, dico vitna cùmání-gã ndoho-í cuendá-yu. ²⁵ Te Yá Ndiöxí ní cachí-gá sá yúhú quíhí díquí ñáhà-í xii nchaa nchòhó ñáiyu ndècu ichi-gá cuendá danèhé ñáhá vâha-í xii-ndo tnúhu-gá cuendá cuu-xi sá vâha sá cúu-xí-ndó. ²⁶ Te nchaa tnúhu sá dánèhé ñáhà-í xii-ndo ña túú ní tècú dóho nchaa ñáiyu ní xindecu ndéé sanaha, te mee-gã ní cuiní-gá sá ncháá nchòo ñáiyu yíndaha-gá vitna cundecu ndihí-o tnúhu-áⁿ. ²⁷ Te mee-gã ní cachí-gá sá dátúu-gá nchaa tnúhu sá ío víi ío váha cuáháⁿ núu ncháa ñáiyu yíndaha-gá. Te tnúhu-áⁿ cúu-xí cuendá tnàhá nchaa nchòhó ñáiyu ña túú cùu ñáiyu isràél. Te tnúhu-áⁿ dánèhé ñáhá-xí xii-ndo sá Xítoho Jesucristú ndécú ndihí ñaha-gá xii-ndo. Te cuendá xíáⁿ ní ngúndecu ndihí-ndo

tnúhu ndee iní cundecu-ndo ndihí-gá ní caa ní quíhíⁿ.

²⁸ Te nchúhú mee-ni cuendá Xítoho Jesucristú cáháⁿ váha-ndí, te dàsahú-ndí ñáiyu nàcuáa cadá-yu. Te váha víhi danèhé-ndí nchaa ñáiyu nàcuáa tecú tnùní-yu tnúhu-gá, te ducaⁿ dānehé-ndí-yu nàcuáa cundáá-yu núu Yá Ndiöxí, te ducaⁿ chí tnàhá tnúhu-yu ndihí Xítoho Jesucristú. ²⁹ Te cuendá xíáⁿ ío ndècu ndee-í quídè-í chiuⁿ Xítoho Jesucristú, te mee-gã ío chindee ñaha-gá xii-í núu xíáⁿ ndácù-í quídè-í chiuⁿ-gá.

2

¹ Te cuiní-í sá nchòhó cutnùní iní-ndó sã ío sàni iní-í cuendá-ndó, ndihí cuendá nchaa ñáiyu ndècu ñuu Laodiceá, ñáiyu xindecu ichi Xítoho Jesucristú. Te ducaⁿ-ni ío sàni iní-í cuendá nchaa ñáiyu vátá quini ñáhá-gã xii-í. ² Te cuiní-í sá nchòhó ndihí nchaa ñáiyu-áⁿ ío nducu ndèe-ndo canchicúⁿ nihnu-ndo ìchi Xítoho Jesucristú, te ío cuu iní tnàhá-ndó, te ducaⁿ cùu ñⁿnuu-ndo cundecu-ndo. Te cuiní-í sá nchòhó ndihí dava-gá ñáiyu-áⁿ ío váha sáá sá xini tnùní-ndó cuendá tecú tnùní-ndó ncháa nàcuáa nduu cuendá Xítoho Jesucristú chí ío nduu yuhu ní cuu, dico vitna ní dátúu-gá núu-ó. ³ Te Xítoho Jesucristú néhé vâha-gá nchaa tnúhu sá ío xini ñuhu-xi tecú tnùní-ó. ⁴ Te duhá cáháⁿ-í chí cuiní-í sá vã quindáá iní-ndó ní ñⁿ tnúhu cáháⁿ nchaa ñáiyu cuiní

dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihí ñaha-í xii-ndo dico ducaⁿ-ni ío ñuhu iní ñáhà-í, te ío cùdíí iní-í chi nihí-í tnúhu sá ío cùu ìⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítohó Jesucristú.

⁶ Te dàtná-ni ní sàndáá iní-ndó Xítohó Jesucristú, te ducaⁿ-ni quìndáá iní-ndó-gã canchicúⁿ nihnu-ndo ìchi-gã. ⁷ Te ñi yùhu ñi iní-ndó cànchicúⁿ nihnu-ndo ìchi-gã, te ducaⁿ cuíta cutnuni-gã iní-ndó nchàa nacuáa càháⁿ-gã quíhíⁿ. Te vá dáña ndeé tnàhí-ndo quìndáá iní-ndó nchàa tnúhu sá ñí dánèhé ñáhá cué téé càháⁿ tnúhu-gã xii-ndo. Te xini ñuhu-xi ndacáⁿ táhú vihi-ndo núú Yá Ndiöxí cuèndá nchaa tnúhu-áⁿ.

Ñáyiú ío váha tnàhá tnúhu ndihí Xítohó Jesucristú

⁸ Te ío quíhi iní-ndó cùndecu-ndo chi xíça cuu ñáyiú cuìní dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ñí cahu iní nchaa cue téé ñuyúú-a, te nchaa tnúhu-áⁿ ñá túú vèdana nàndíhi-xi. Te ducaⁿ quidè-yu chi nchìcúⁿ nihnu-ní-yu nchaa nàcuáa ní xóo cada ñáyiú ní xíndecu ndeé sanaha. Te càháⁿ-yu nàcuáa sàni iní yucu ñávàha, te ñá túú càháⁿ-yu nàcuáa cuìní méé Xítohó Jesucristú.

⁹ Te Xítohó Jesucristú cúú-gã ìⁿ ñáyiú dico ìⁿ-ni cùu-gã ndihí Dútú Ndiöxí. ¹⁰ Te nchòhó chi ñá túú tnàhí-gã ná cùmàní-ndó

núú-gã chi ndècu ndihí-ndo Xítohó Jesucristú. Te ío cùnuu-gã te tàxi tnuni-gã nchaa núú cué espíritú cùnùu. ¹¹ Te mee-gã ní ndada ndoo ní ndada nine-gã iní-ndó chi ní ngúndecu ndihí-ndo-gã te ducaⁿ ñà túú-gã ndécú-ndó ìchi cuehé ichi duha, te cada iní-ndó sã ñí ngúndecu ndihí-ndo ìⁿ seña, chi ní ndada ndoo ní ndada nine-gã iní-ndó, dico ñá díú ìⁿ-ni cuu-xi ndihí seña sá sãha cue téé isràèl ñí-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ñí xihí-ndó ndihí Xítohó Jesucristú, te ní nguíndüxi-ndo ndihí-gã, te ní ndoto-ndo ndihí-gã, te ducaⁿ càda iní-ndó chi ñá túú-gã ndécú-ndó ìchi cuehé ichi duha. Te ducaⁿ chi sàndáá iní-ndó nchàa nacuáa quide Yá Ndiöxí, te diu-gã ní dándótó-gã Xítohó Jesucristú. ¹³ Te nchòhó cútnàhá ndécú-ndó ìchi cuehé ichi duha cùu-ndo datná ñáyiú ní xihí, chi ñá túú tnàhá tnúhu-ndo ndihí Yá Ndiöxí ní cùu, te ñi ñá díú ñáyiú isràèl cúú-ndó. Te Yá Ndiöxí ní cachí-gã sá nchóó ío váha tnàhá tnúhu-o ndihí Xítohó Jesucristú vitna. Te ducaⁿ ñí quide-gã chi sa ní quide càhnu iní-gã nchaa sá cuèhé sá dúhá ñí xóo cada-o. ¹⁴ Te vitna duuⁿ duuⁿ ñá túú-gã cuéchi-o ndècu núú-gã. Te nchoo ñà túú cuìní-ó càda-o nacuáa càháⁿ-gã, te cuèndá xíáⁿ ío ndècuéchi-o, te vài nacháhu-o núú-gã ní cùu. Te vitna ñá túú-gã ñi ìⁿ

cuèchi-o ndècu núú-gă, chi diu cuendá-áⁿ nǐ xíhí Xítohó Jesucristú núú cùrúxí. ¹⁵ Te sá dúcáⁿ nǐ xíhí Xítohó Jesucristú núú cùrúxí, te duuⁿ duuⁿ ní dáquéé tihú-gă sácuihná ndihi nchaa espíritú cùndihí-xi, te ní quendóo canúú-xi, te mee-gă ío cùnuu-gá táxí tnùní-gá.

Nanducu nihnu-o mee-ni sá vaha cächí Xítohó Jesucristú

¹⁶ Te núu dava ñáyiú xǐcuèhé ñáhă-yu xii-ndo cuendá sá ñà túú xèxi-ndo xihí-ndo datná quidé mée-yu te vâ cádá cuendá-ndó, te ni vâ cádá cuendá-ndó te núu xǐcuèhé ñáhă-yu xii-ndo cuendá sá ñà túú cãnehe íi-ndó vico quide meé-yu núú cuiá núú cuiá, ndihi vico quidé-yu ndi tnahá yóó, ndihi cuendá sá ñà túú cãnehe íi-ndó ndùu ndetatú-yu. ¹⁷ Te nàcuáa quidé-yu ndi tnahá òré quidě-yu nchaa vico-áⁿ, ndihi nàcuáa quidé-yu ndi tnahá nchaa nduu cãnehe íi-yu-áⁿ, te cada iní-ó sá sá quidě-yu-áⁿ dánèhé núú ñáhă-xí nàcuáa cada Xítohó Jesucristú núú cuáháⁿ núú vèxi. ¹⁸ Te vâ quindáá iní-ndó nǐ ìⁿ tnúhu cãháⁿ ñáyiú cächí sá cuíta nihnu-ndo cuendá sá ñă túú tnìi-ndo tnúhu cãháⁿ-yu, chi cächí-yu sá ío xini ñuhu-xi cada cahnu-o nchaa cue espíritú xínú cuèchi núú Yă Ndiöxí, te ni yùhu ni iní-ó cãnehe-o sá yíñùhu núú-xi. Te ñáyiú-áⁿ cächí-yu sá ndáá cãháⁿ-yu chi dàcoto ñaha saní-yu nàcuáa cãháⁿ-yu, te ío quide cahnú-yu mée-yu cuendá nchaa sá saní

iní mée-yu quidé-yu, te ñà túú vèdana nàndihí nchaa sá quidě-yu. ¹⁹ Te nchaa ñáyiú ducaⁿ xǐquide-áⁿ ñà túú tnáhá tnúhu-yu ndihi Xítohó Jesucristú. Te mee-gă cúú-gă Yaá cùnùu taxi tnuní ñáhă-gă xii nchaa nchoo ñáyiú ndècu ichi-gá, te chindee ñaha-gá xii-o ndècu-o ichi-gá, te mee-gă quidé-gă cúú ìⁿnuu-o ndècu-o, te ta quide-o nchaa nacuáa cuini Yă Ndiöxí cuáháⁿ.

²⁰ Te nchòhó cúú-ndó datná ñáyiú ní xíhí ndihi Xítohó Jesucristú cuendá sá vâ cãncicúⁿ nihnu-gá-ndó nàcuáa cãháⁿ ñáyiú ñà túú ndècu ichi-gá. Te núu ducaⁿ ña, ¿te ná cuendá tnìi-ní-ndó tnúhu cãháⁿ ñáyiú-áⁿ te quide-ni-ndo datná quidě-yu? ²¹ Chi ñáyiú-áⁿ cächí-yu sá ío sá ni vâ cúú tèe ndaha-o, te dava ni vâ cúú cãxi-o, te dava ni vâ cúú tnìi-o. ²² Te nchaa xiăⁿ, núú néhé chiúⁿ-ni-o ndihi nihnu-xi. Te nchaa sá dúcáⁿ cãháⁿ-yu-áⁿ cúú-xí mée-ni sá nǐ cahu iní mée nchaa ñáyiú ñuyúú-a nàcuáa cada-yu cundecú-yu. ²³ Te nchaa tnúhu cãháⁿ-yu-áⁿ sánùu sá cúú-xí ìⁿ tnúhu cãháⁿ ìⁿ téé ío váha sáá díqui-xi, chi cächí-yu sá cádá cãhnu-o Yă Ndiöxí nàcuáa véxi iní mée-ó, te cunduu ndàhú iní-ó dico ñà túú dãnèhé ñáhă-yu nàcuáa tàú-xi cunduu. Te cächí tucú-yu sá cádá ùhú-ó mée-o, chi ducaⁿ cuini Yă Ndiöxí cada-o cächí-yu. Te nchaa xiăⁿ ñà túú vèdana chindee ñaha-xi xii-o cuendá sá vâ táxí tnùní ñáhă nǐ ìⁿ sá

cuèhé sá dúhá sàni iní-ó.

3

1 Te nchòhó cada iní-ndó sã ní xíhí-ndó ndìhì Xítóhó Jesucristú te ní ndoto-ndo ndìhì-gá, núu xíáⁿ tàú-ndó càda-ndo nchaa sá vãha dàtná cuení mée-gã chi mee-gã núcõo-gá xio cùha Dútú Ndiõxí chi tnàhá-gá ío cùnuu-gá. 2 Te ío cuhuⁿ iní-ndó nchàa sá vãha càchí Xítóhó Jesucristú nduu tãhú-ndó cùndecu ndìhì-ndo, te vá cùhúⁿ iní-ndó mée-ni nchaa sá ío ñuyíú-a. 3 Te ducaⁿ càda-ndo chi cùu-ndo datná ñáyíu ní xíhí ndìhì Xítóhó Jesucristú, chi ñá túú-gã ndécú-ndó ìchi cuehé ìchi duha. Te Yá Ndiõxí néhé cuendá ñáhá-gã xii-ndo chi tnàhá tnúhu-ndo ndìhì Xítóhó Jesucristú. 4 Te Xítóhó Jesucristú cúú-gã Yaá ndécú ndìhì ñaha xii-o vitna, te sáá nduu quèe túu ndìhì ñaha-gã xii-o àndíu, te tnàhá-ó ío cunuu-o ndìhì-gá.

Duuⁿ duuⁿ dañá-o nchàa sá cuèhé sá dúhá ñúhu iní-ó te cada-o mée-ni sá vãha

5 Te duuⁿ duuⁿ dañá-ndo nchàa sá cuèhé sá dúhá ñúhu iní-ndó. Te nchaa nchòhó cue téé vá càháⁿ ndìhì-ndo ñáyíu ñíhì te núu ñá díú ñàdìhì-ndó cùú-yu, te ducaⁿ-ni nchàa nchohó cue ñáyíu ñíhì tucu vá càháⁿ ndìhì-ndo cuè téé te núu ñá díú yíi-ndo cuu-güedé, te nchaa-ndo vã cání-gã iní-ndó càda-ndo ni ñⁿ sá cuèhé sá dúhá ndìhì tnaha ñáyíu-ndo. Te vá cání cuèhé cani duha-gá iní-ndó sã

cúú-xí-ndó ndìhì-yu, te vá cání-gã iní-ndó ni ñⁿ sá cuèhé sá dúhá, te ni vã xíhó-ndó ñⁿ sá ndécú ndìhì tnaha ñáyíu-ndo, chi núu ducaⁿ na càda-ndo xiho-ndo sá ndécú ndìhì-yu te ñⁿ-ni cùu-ndo ndìhì ñáyíu chìnúhu nchaa sá càchí-yu cùu ndiõxí te ñá ndáá sá ndiõxí cúú nchàa xíáⁿ. 6 Te nchaa ñáyíu ducaⁿ xíquide ío dandòho ñaha Yá Ndiõxí xii-yu na sáá nduu tnúndòho tnúhu ndàhú, chi ñá túú sàndáá iní ñáhã-yu xii-gá. 7 Te nchòhó cùtnàhá ní xíndecu-ndo ìchi cuehé ìchi duha, te tnàhá-ndó ní xóo cada-ndo dàtná quidé nchàa ñáyíu-áⁿ. 8 Te vitna duuⁿ duuⁿ dañá-ndo nchàa sá ná càchí tnúhu-í-a: Vá cùdéeⁿ-gã-ndó, te ni vã cùndúu líhli-gá iní-ndó, te ni vã cúú ùhú-gá iní-ndó tnàha ñáyíu-ndo, te ni vã cùcuèhé-gã-ndó-yu, te ni ñⁿ-gá tnúhu cuèhé vá càháⁿ-ndó. 9 Te ni vã dácùandehnde-gã-ndó, chi nchòhó sa ní dáñá-ndó nchàa ìchi cuehé ìchi duha, te ñá túú-gã sání cuèhé sání duha iní-ndó nã cada-ndo vitna dàtná ní xóo cada-ndo. 10 Te vitna nchòhó ní nduu-ndo ñáyíu vãha, te uuⁿ-gá tá cùtnuní iní-ndó nchàa nacuáa cuení Yá Ndiõxí cada-ndo, te ducaⁿ ta ndúcu ndee-ndo quide-ndo mee-ni sá vãha dàtná quidé mée-gá. 11 Te vitna ní ngúndecu ndìhì-ndo Xítóhó Jesucristú, te vá cádá cuendá-gã-ndó núu cùu-ndo ñáyíu isràél àdi ñá túú cùu-ndo, te ni vã cádá cuendá-ndó núu cùu-ndo ñáyíu ní ngúndecu sèñá ñíi-xi

àdi ñáhá, te ni vǎ cáda cuendá-ndó nǔu cùu-ndo ñáyiu vèxi ñuú ícá, te ni vǎ cáda cuendá-ndó nǔu cùu-ndo ñáyiu cùu neñuú, te ni vǎ cáda cuendá-ndó nǔu cùu-ndo ñáyiu ñá túú tnàhí dàñá quee núú chíúⁿ pàtróóⁿ-xi, te ni vǎ cáda cuendá-ndó nǔu cùu-ndo ñáyiu dàñá quéé nǔú chíúⁿ pàtróóⁿ-xi, chi Xítohó Jesucristú cúnùu-gá ndécú ndìhi ñaha-gá xii-o nchàa-o.

12 Te Yá Ndióxi ní dáquéé dìⁿ ñaha-gá xii-ndo cuendá cundecu-ndo ndìhi-gá, te vitna cùu-ndo ñáyiu quide ndáá ndécú ichi-gá. Te mee-gǎ ío cùu iní ñáhá-gǎ xii-ndo nǔu xiǎn tàú-ndó cundahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiu ndàhú iní-xi, te ío vii ío váha cuu iní-ndó cundecu ndìhi tnaha-ndo, te ío càhnu cunduu iní-ndó cuendá nchaa sá quidé ñaha ñáyiu xii-ndo.

13 Te ducaⁿ cànehe-ndo tnúhu càhnu iní núú ndì mèe-ndo nacuáa ndècu-ndo ichi-gá, te cada càhnu tucu iní-ndó nǔu ná cúú sǎ cúmǎní nǔú tnáhá-ndó. Te dàtná ní quide càhnu iní Xítohó Jesucristú nchaa sá ñà túú vǎha ní xóo cada-ndo ducaⁿ càda-ndo cada cahnu iní-ndó nchàa sá cúmǎní nǔú tnáhá-ndó ndècu-ndo. 14 Te xini ñuhu vihi-xi sá ío cuu iní tnáhá-ndó cundecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmǎní-ndó. 15 Te dañá-ndo sǎ Yá Ndióxi ná chindee ñaha-gá nàcuáa ío váha cuu iní-ndó cundecu-ndo,

chi diu cuendá-áⁿ nǐ cáháⁿ ñáhá Yá Ndióxi xii-ndo cuendá cuu ñⁿnuu-ndo ndìhi nchaa dava-gá ñáyiu ndècu ichi-gá, te ducaⁿ-ni ío ndacáⁿ táhú-ndó nǔú-gǎ.

16 Te ío cuhuⁿ iní-ndó tnúhu Xítohó Jesucristú, te ío váha cuáha-ndo cuendá nàcuáa càháⁿ tnúhu-gá te ducaⁿ dànehé tnáhá-ndó. Te ío cáháⁿ dóho tnàha-ndo nacuáa cada-ndo càncicúⁿ nihnu-ndo càda-ndo nchaa nacuáa càháⁿ tnúhu-gá, te cata-ndo ndùdú ndèé núú tütú Yá Ndióxi, ndìhi nchaa dava-gá ndudú sá xini mée-ndó xita-ndo te nchaa xiǎⁿ cata-ndo chiñuhu-ndo Yá Ndióxi. Te òré xitá-ndó te ni yùhu ni iní-ndó ndàcáⁿ táhú-ndó nǔú-gǎ. 17 Te cuhuⁿ iní-ndó Xítohó Jesucristú òré sání iní-ndó càda-ndo ñⁿ chiuⁿ àdi ná tnúhu cuní-ndó càháⁿ-ndó, te diu-ni-gá cuhuⁿ iní-ndó. Te xini ñuhu-xi ndacáⁿ táhú-ndó nǔú Yá Ndióxi, te diu-ni Xítohó Jesucristú chindee ñaha-gá xii-ndo ndàcáⁿ táhú-ndó nǔú Tátá-ó Dütú Ndióxi.

Nàcuáa tàú ñáyiu ndècu ichi Xítohó Jesucristú cadá-yu sá cúu-xi ndì mee-yu

18 Te nchaa nchòhó ñáyiu dìhí ñáyiu ndècu yì-xi quindáa iní-ndó yì-ndo, chi ducaⁿ tàú-xi cada nchaa ñáyiu dìhí ndécú ichi Xítohó Jesucristú. 19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu. 20 Te nchaa nchòhó ñáyiu ndècu tátá-xi ndìhi nǎná-xi quindáa iní-ndó-yu, chi núu ducaⁿ

na càda-ndo te ndùu vétú iní Yă Ndiöxí. ²¹ Te nchaa nchòhó ñáyiú cùu tātá ndihi năná vá dásàtú-ndó iní cue déhe-ndo, chi núu ducaⁿ na càda-ndo te ni vǎ quíxí-gǎ iní-güexi cada-güexi sá vǎha. ²² Te nchaa nchòhó ñáyiú xínu cuechi quindáá iní-ndó nchàa ñáyiú cùu patróoⁿ-ndó, te ni yùhu ni iní-ndó càda-ndo nchaa chiuⁿ tahú-yu cuèi òré ndécũ-yu àdi oré ñá túũ-yu, te ñá díú òré-ni ndèhé-yu cada-ndo cuendá-ni sá cuiní-ndó cùdiu-ndo núũ-yu, chi cada-ndo sǎ néhé-ndó sǎ yíñùhu núú Xítóhó Jesucristú. ²³ Te nchaa chiúⁿ sani iní-ndó càda-ndo te cada-ndo ñi yuhu ni iní-ndó, te sá dúcáⁿ càda-ndo-áⁿ te cada-ndo cuendá sá xínú cuèchi-ndo núú Xítóhó Jesucristú te ñá díú núú ñáyiú ñuyíú-a xínu cuechi-ndo. ²⁴ Te nchòhó sa nàha-ndo sá Xítóhó Jesucristú taxi-gǎ sá ndúú tǎhú-ndó te núu ducaⁿ na càda-ndo, chi cùu-ndo ñáyiú xínu cuechi núú-gǎ. ²⁵ Te nchaa ñáyiú quide nchaa sá cuèhé sá dúhá nàcháhu-yu núú Yă Ndiöxí cuendá nchaa sá quidě-yu, te mee-gǎ vá cáda cuendá-gǎ cuèi náí ñáyiú cùú-yu, chi nchaá-yu nacháhu-yu nchaa sá ñà túú vǎha quidé-yu núú-gǎ.

4

¹ Te nchaa nchòhó ñáyiú cùu patróoⁿ cuu-ndo ñáyiú váha, te cada-ndo nchàa nacuáa tàú-xi cunduu ndihi nchaa ñáyiú xínu cuechi núú-ndó, te cunaha-ndo

sǎ àndiu ndecu Yaá cúú Xítóhó-ndó tàxi tnuní ñáhá-gǎ xii-ndo.

² Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cǎháⁿ ndihi-ndo Yă Ndiöxí, te ío cuhuⁿ iní-ndó-gǎ òré càháⁿ ndihi-ndo-gǎ, te òré-áⁿ ío ndacáⁿ tǎhú-ndó núú-gǎ.

³ Te cǎcáⁿ tǎhú-ndó tnàhá cuendá-ndí núú-gǎ cuendá sá díú-gǎ ná cáda te ndacu-ndí cǎháⁿ-ndí tnúhu-gǎ núú nchàa dava-gǎ ñáyiú, te ducaⁿ cǎháⁿ-ndí tnúhu Xítóhó Jesucristú sǎ ñá túú ní xindecu ndihi nchaa ñáyiú ní xindecu ndéé sanaha, te diu cuendá tnúhu-áⁿ yíhí-í vecaá vitna.

⁴ Te cǎháⁿ ndihi-ndo Yă Ndiöxí cuendá cǎháⁿ-í nàcuáa tàú-xi cunduu te tecú tnuní-yu.

⁵ Te cada-ndo nchàa nacuáa tàú-xi cunduu sá cúú-xí nchàa ñáyiú ñá túú ndècu ichi-gǎ, te ducaⁿ-ni ío nducu ndèe-ndo cada-ndo nchaa nacuáa tàú-xi cunduu. ⁶ Te cada cuendá-ndó sǎ ío vii ío váha cunduu tnúhu cǎháⁿ ndihi-ndó-yu, te cǎháⁿ-ndó ñⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ñⁿ ñⁿ-yu.

Tnúhu ndéé núú ñi ndihi-ná

⁷ Te té Tiquicú téé ío cùu iní-ó ndècu ndihi-o ichi Xítóhó Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. ⁸ Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee

ini cundecu ndihi-ndo. ⁹ Te tnahá tucu té Onésimú téé ío cùu iní-ó ndècu ndihi-o ichi Xítohá Jesucristú quixi ndihi-dé, te diu-ni téé ñúú-ndó cùu-dé te tnahá-dé ío váha quide ndáá-dé. Te ndi ndúú-güedé cachí tnúhu-güedé nchaá nacuáa cùu iha.

¹⁰ Te té Arístarcú téé yìhi ndihi-í vecaá quidé ndèe iní ñáhá-dě xii-ndo ndihi té Măcú ñani primú tē Bēé. Te sa naha-ndo nchaá nacuáa ní cáháⁿ-í cada-ndo quèheⁿ cuendá-ndó tē Măcú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnahá téé nani Jesús, àdi Bustú chi úú diu-dé, quidé ndèe iní ñáhá-dě xii-ndo. Te cue téé-a cùu-güedé cue téé israhél ní chitnahá ñáhá-güedě xii-í cáháⁿ-ndí núú ñáyiú nacuáa ndíhu ndaha ñaha Yá Ndióxi xii-yu, te ni ñⁿ-gá ñáyiú israhél ñá túú quide datná quidé-güedě. Te ío váha tàxi-güedé tnúhu ndee ini xii-í. ¹² Te tnahá téé ñúú-ndó tē Ēpafrás quidé ndèe iní ñáhá-dě xii-ndo, te cùu-dé tnahá-dé téé xinu cuechi núú Xítohá Jesucristú. Te ducaⁿ-ni nì yuhu ni iní-dé xicáⁿ táhú-dě núú Yá Ndióxi cuendá-ndó cuendá sá cāchicúⁿ nihnu-ni-ndo ichi-gá, te ducaⁿ te ío váha tecú tnùní-ndó nchāa nacuáa cuini Yá Ndióxi cada-ndo, te diu-ni ducaⁿ cāchicúⁿ nihnu-ndo càda-ndo. ¹³ Te yúhú cāchí tnúhu ndáá-í xii-ndo sã sũúni sàni iní-dé sá méé-ní sã váha cuu xii-ndo cundecu-ndo

ndihi nchaá ñáyiú xīndecu ichi Xítohá Jesucristú ndécú ñúú Laodiceá, ndihi nchaá ñáyiú xīndecu tucu ichi-gá ndécú ñúú Hiérápolis. ¹⁴ Te tnahá té Lúca téé xini nchaá núú yúcú sã quidé tātna quide ndee iní ñáhá-dě xii-ndo téé ío cùu iní-ó, te tnahá tucu té Dēmás quidé ndèe iní ñáhá-dě xii-ndo.

¹⁵ Te cūñaha-ndo na càda ndee iní nchaá ñáyiú ndècu ndihi-o ichi Xítohá Jesucristú ndécú ñúú Laodiceá, ndihi tá Mínfás, ndihi nchaá ñáyiú ndècu ichi-gá tàca vehe-xi dàcuahá-yu tnúhu-gá. ¹⁶ Te tutú cādūha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáyiú xīndecu ichi-gá ndécú ñúú Laodiceá cuendá dacuahá-yu tnahá-yu. Te diu-ni ducaⁿ dàcuaha-ndo tutú tendaha-í quíhíⁿ ndaha ñáyiú ñúú Laodiceá òré ná dāndixi-yu ndaha-ndo. ¹⁷ Te na cāchí tnúhu-í xii-ndo nacuáa cūñaha-ndo xii té Ārquipú, te duha cūñaha-ndo xii-dé: “Yá Ndióxi ní taxi-gá chiuⁿ quide-n, te ío váha cada cuendá-n càda-n nchaá nacuáa ní cachí-gá”, duha cūñaha-ndo xii-dé.

¹⁸ Te yúhú té Pāblú ndihi ndaha mee-í tēé-í ñⁿ ũú tnúhu-a quide ndee iní ñáhá-í xii-ndo, te cunaha-ndo sã yúhú yíhí-í vecaá. Te Yá Ndióxi ío na chīndee chitúu ñaha-gã xii-ndo. Te ducaⁿ na cūnduu. Te ío chí cādá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue té cùndihi-dé cadúha-güedé tutú quihĪⁿ ndaha ñáyiu xĩndecu ichi Xítohó Jesucristú ndécú ñuú Tesalónicá

¹ Yúhú té Pāblú cadúha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítohó Jesucristú ndécú ñuú Tesalónicá, chi cùu ìⁿnuu-ndo ndihi Tátá-ó Dütú Ndiöxí, ndihi Xítohó Jesucristú. Te xicáⁿ táhú-í núú Dütú Ndiöxí, ndihi núú Xítohó Jesucristú sá ïo na chĩndee chitúu ñaha-gã xii-ndo, te ducaⁿ ndĩ nduú-gá ná càda te ïo váha cuu iní-ndó cùndecu-ndo.

Ñáyiu ñuú Tesalónicá ïo váha sàndáá iní-yu Yá Ndiöxí

² Te ndi tnahá òré càháⁿ ndihi-ndí Yá Ndiöxí ndàcáⁿ táhú-ndĩ núú-gã sá ïo quide váha-ndo ndècu-ndo, te ducaⁿ xicáⁿ táhú-ndĩ núú-gã sá ná còto ñaha-gã xii-ndo.

³ Te ïo ndàcáⁿ táhú-ndĩ núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gã, te xĩnu cuechi-ndo núú-gã, te cùu iní tnahá-ndó nàcuáa ndècu-ndo ichi-gá ñuú xiáⁿ ïo xitò tnahá-ndo. Te cùtnuní ndáá iní-ndó sá quixí

tùcu Xítohó Jesucristú ñuú xiáⁿ ñá túú dàña ndeé-ndó ndètu-ndo-gã. ⁴ Te nchòhó ñáyiu ndècu ndihi-ndí ichi Xítohó Jesucristú sa nàha-ndí sá Yá Ndiöxí ïo cùu iní ñáhá-gã xii-ndo, te diu-gá ní cáháⁿ ñáhá-gã xii-ndo cuendá cundecu-ndo ichi-gã. ⁵ Te

cùtnahá ní dánèhé ñáhá-ndĩ xii-ndo tñuhu-gã, chi ñá díú sã cúú ìní méé-ndĩ ducaⁿ ñi dānehé ñáhá-ndĩ xii-ndo, chi mee Espiritú Yá Ndiöxí ní chĩndee ñaha-xi ní cáháⁿ-ndí ñi yuhu ñi iní-ndí tñuhu-gá núú-ndó. Te nàha-ndo sá cùtnahá ní xĩndecu ndihi ñaha-ndĩ xii-ndo ñi quide-ndí nàcuáa càháⁿ Yá Ndiöxí cuendá sá cúú-xí sã váha sá cúú-xí-ndó.

⁶ Te nchòhó nchicúⁿ ñi hnu-ndo quide-ndo vitna datná quidé-ndĩ, chi quide váha-ndo datná quidé mèe Xítohó Jesucristú, te díí ìní ní tñi-ndo ìchi-gã cuēi ní ndoho ní tnahá-ndó, chi mee Espiritú-gá ní chĩndee ñaha-xi xii-ndo. ⁷ Te sá dúcáⁿ quide váha-ndo núú Yá Ndiöxí,

xiáⁿ yĩnchicúⁿ ñi hnu ñáyiu distritú Macèdoniá, ndihi ñáyiu distritú Acáyá xĩquide váha-yu tñahá-yu, ñáyiu xĩndecu ichi-gã. ⁸ Te diu-ndo ñi sanu ichi-ndo ñáyiu distritú Macèdoniá, ndihi ñáyiu distritú Acáyá, te ñá díú-ñi ñáyiu nchaa ñuú-áⁿ chi nchaa ñáyiu dava-gã ñuú ñihí-yu tñuhu sá ïo sàndáá iní-ndó Yá Ndiöxí. Te ñá túú-gã ná tñuhu cáháⁿ-ndí cuendá-ndó, chi ncháá-yu sa ñihí-yu

tnúhu sá ïo váha quide-ndo ndecu-ndo. ⁹ Te mée-yu xícháⁿ váha-yu cuendá-ndó sá ïo váha ní queheⁿ cuendá ñáhá-ndó xii-ndí cútnàhá ní quixi-ndí díhna nuu. Te ní dáñá-ndó nchàa sá cächí-ndó cùu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yaá ndécú tũu andiu chi diu-gá cúú-gã Ndiöxí ndisa, te xinu cuechi-ndo núú-gã vitna, ¹⁰ te ndètu-ndo quixi tucu Xítohó Jesucristú Déhe Yá Ndiöxí Yaá ndécú àndiu, chi diu-ni-gá ní quixi-gá ñuyíú-a ní xihí-gá, te ní ndoto-gá ní dándótó ñaha Yá Ndiöxí xii-gá. Te diu-ni Xítohó Jesucristú dácäcu nihnu ñaha-gã xii-o núú ùhú núú ndàhú, chi sàndáá iní-ó-gã.

2

Nàcuáa ndùu chiurⁿ ní quide té Pãblú ñuú Tesalónica

¹ Te nchòhó ñáyiu ndècu ndihi-ndí ìchi Xítohó Jesucristú nàha-ndo sá ñà díú àúⁿ nã cuu ní quixi coto ñaha-ndí xii-ndo, chi ní sàndáá iní-ndó tnúhu Yá Ndiöxí. ² Te nàha-ndo sá cùtnàhá ní xindecu-ndí ñuú Filipú ïo ní xúhuⁿ tnúhu cuèhé tnúhu duha núú-ndí, te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiöxí núú-ndó, chi mee-gã ní chindee ñaha-gá xii-ndí cuèi ïo chitu ñáyiu ní cuu úhú iní ñáhá xii-ndí. ³ Te ñá túú ní dàndahú ñáhá-ndí

xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñⁿ tnúhu cuèhé ñúhú ìní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴ Te mee Yá Ndiöxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní mée-gã, chi sa nàha-gá nàcuáa càa iní-ndí, te ñá túú cáháⁿ-ndí nàcuáa cùu iní ñáyiu. ⁵ Te nàha-ndo sá ñà díú ñⁿ tnúhu cudíí ìní-ndó cùndecu-ndo ìchi ñuyíú ní cáháⁿ-ndí núú-ndó cuendá taxi-ndo díhúⁿ. Te Yá Ndiöxí sa nàha-gá sá cáháⁿ ndáá-ndí. ⁶ Te ñá ñⁿ ndùu ni quide-ndí ñⁿ sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyiu, te cuèi tàú ndisa-ndí sá cádá càhnu ñaha-ndo xii-ndí ní cùu, chi chiurⁿ Xítohó Jesucristú quidé-ndí, te dicó-ni sá nchùhú ñá túú ní cuiní-ndí sá dúcáⁿ càda-ndo. ⁷ Te ïo vii ïo váha ní cáháⁿ-ndí núú-ndó, dàtná quidé ñⁿ ñaha cuu náná vii vii cáháⁿ ndihi cue déhe-aⁿ dácuehnu ñaha-aⁿ xii-güexi. ⁸ Te ducaⁿ ïo cùu iní ñáhá-ndí xii-ndo, dico ñá díú-ní sã ñí cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dicó ní cùu-xi sá cúú, cuendá sá ïo cùu iní ñáhá-ndí xii-ndo. ⁹ Te nchòhó ñáyiu ndècu ndihi-ndí ìchi Xítohó Jesucristú nàha-ndo sá ïo ní quide chiurⁿ-ndí cuendá ní níhí-ndí sá ñí xexi-ndí. Te cuèi nduu cuèi niú ní quide

chìuⁿ-ndí ní níhí-ndí sá ní xexi-ndí ní cáháⁿ-ndí tnúhu Yá Ndiöxí núú-ndó cuendá sá ñà túú ní cuini-ndí chichìuⁿ ñaha-ndí xii-ndo.

10 Te nchòhó ñáyiú sàndáá iní tnúhu Yá Ndiöxí xini ndáá-ndó sá cúú-ndí cue téé váha te ducaⁿ sá naha Yá Ndiöxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yòo ìⁿ cáháⁿ sá ñà túú quide ndáá-ndí ndécú-ndí.

11 Te ñaha tucu-ndo sá ní dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo ncháa-ndo, te dàtná quidé ìⁿ tátá ndihi cue déhe-dé ní quide-ndí.

12 Te ní cachí-ndí xii-ndo sá cádá ndáá-ndó cùndecu-ndo nacuaa tàú-xi cada nchaa ñáyiú tnàhá tnúhu ndihi Yá Ndiöxí, chi mee-gã ní cáháⁿ ñáhá-gã xii-o cuendá nduu táhú-ó cùndecu-o ndihi-gá núú ò váha càa ndecu-gá táxi tnùnì-gá.

13 Te xiãⁿ ò ndácáⁿ táhú-ndí núú Yá Ndiöxí sá nchòhó òré ní tedòho-ndo tnúhu-gá ní cáháⁿ-ndí, te ní sàndáá iní-ndó chi ní cutnùnì iní-ndó sá díú tnúhu Yá Ndiöxí cúú-xí, te ñà díú tnúhu ñáyiú ñuyíú-a cùu-xi. Te ndáá sá cúú-xí ìⁿ sá ò váha sá cúú-xí nchòo cue ñáyiú ní sàndáá iní tnúhu-gá.

14 Te nchòhó ñáyiú ndècu ndihi-í ichi Xítóhó Jesucrìstú, ò ní ndoho ní tnàhá-ndó sá ní quide ñaha ñáyiú ñuú-ndó. Te nchòhó ní ndoho-ndo dàtná ní ndoho nchaa ñáyiú tàcá dácuaa tnúhu Xítóhó Jesu-

crìstú ndécú dìstrítú Jùdeá, chi tnàhá-yu ò ní dándóhó ñaha ñáyiú ñuú-yu. 15 Te ñu-ni ñáyiú dìstrítú Jùdeá-áⁿ ní sahní-yu cue téé ní xóo cáháⁿ tnúhu Yá Ndiöxí ndéé sanaha. Te ñu-ni ñani tnàhá-yu cùu cue ñáyiú ní sahnì ñaha xìi Xítóhó Jesucrìstú, te sá tá xiãⁿ te ní ngúita-yu ní cuu úhú iní ñáhá-yu xii-ndí, núu xiãⁿ ñà túú tnàhá iní Yá Ndiöxí nchaa sá quidé-yu, te ndéé nchaa dava-gá ñani tnàhá-yu cùu úhú iní-yu. 16 Te ò chidácá nihnu ñáhá-yu xii-ndí òré cáháⁿ-ndí tnúhu Yá Ndiöxí núú ñáyiú ñà túú cùu ñáyiú isràél, te ducaⁿ quide ñáyiú-áⁿ cuendá cuini-yu sá vã cáháⁿ-ndí tnúhu-gá, sá cádá cuendá naníhí tàhú ñáyiú ñà túú cùu ñáyiú isràél-áⁿ, te sá dúcáⁿ quidé-yu te ò ta cùu vai-gá cuéchi-yu cuáháⁿ. Te Yá Ndiöxí ò cùdééⁿ-gã núú-yu, te tendaha-gã ìⁿ tnùndòho quixi sá cúú-xí-yu te ò ndohó-yu.

Té Pãblú cuini-dé quíngoto-dé ñáyiú xíndecu ichi Xítóhó Jesu-crìstú ndécú ñuú Tesalónicá

17 Te nchòhó ñáyiú ndècu ndihi-ndí ichi Xítóhó Jesu-crìstú ní quee-ndí núú-ndó, te cuèi ní cuxica-ndí dico ducaⁿ-ni ñuhu iní ñáhá-ndí xii-ndo, te ò ñuhu iní-ndí sá quíxí còto ñaha tucu-ndí xii-ndo. 18 Te yúhú té Pãblú ducaⁿ-ni ñuhu iní-í sá cuèdicó mèe-í quixi-í, quixi coto ñaha-í xii-ndo, dico yucu ñávãha chidácá nihnu ñaha-xi xì-í. 19 Te nchoo ñáyiú ndècu ichi Xítóhó Jesucrìstú

ndètu-ni-gá-ó quèxio-gá can-deca ñaha-gã xii-o ndàa andi-u cundecu-o ndihi-gá. Te cùdíí víhí ìní-ndí sá cuèndá-gá chi ní chindee ñaha-gá ní sanu ichi ñaha-ndí xii-ndo ìchi-gá, te ío vài ñáyiu cáháⁿ váha-yu cuèndá-ndí ná sàà nduu quíxi tucu-gá. ²⁰ Te ducaⁿ ïo vài ñáyiu cáháⁿ váha-yu cuèndá-ndí cuèndá sá ñí sanu ichi ñaha-ndí xii-ndo ìchi-gá, te quide váha-ndo. Te xíãⁿ ío cùdíí ìní-ndí.

3

¹⁻² Te sa ní cunduu ñá túu-gã càháⁿ ndihi tnàha-o, núu xíãⁿ ñá ní cùndee-gá ìní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñúú Àtenás, chi tnàhá-dé xínú cuèchi-dé núú Yã Ndiòxí, ndihi núú Xítóhó Jesucristú càháⁿ-dé tnúhu-gá núú ñáyiu. Te ní quixi-dé ní taxi-dé tnúhu ndee ìní xii-ndo cuèndá sá ïo quindáa-ni ìní-ndó Xítóhó Jesucristú, te canchicúⁿ nihnu-ni-ndo ñí yuhu ñí ìní-ndó ìchi-gá. ³ Te vá nátùhú ìní-ndó càchicúⁿ nihnu-ndo ìchi-gá sá dúhá cùu úhú ìní ñáhá ñáyiu xii-o, te nchòhó sa nàha-ndo sá dàcuítíí sã ndóhó víhi-o cuèndá-gá. ⁴ Te ndéé cùtnàhá ndécú ndihi ñaha-gá-ndí xii-ndo ñí cachí tnúhu ndáá-ndí sá ïo ndoho-o, te ducaⁿ ndisa quide-xi. ⁵ Te xíãⁿ núu ñá ní cùu váha-gá ìní-í chi cuèndá ñá túu-gã ní ñhí-í tnúhu nàcuáa cùu ndecu-ndo núu ní tendaha-í

té Timùteú ní quixi-dé ní ndúcu tnúhu-dé núu-ndó núu ndècu-ni-ndo ichi Xítóhó Jesucristú, chi ní sani ìⁿ ní sani úú ìní-í sá cúu-xí-ndó, chi ná ndèé chidácá nihnu ñaha yùcu ñávãha xii-ndo te cuíta chiúⁿ ní quide-ndí sá cúu-xí-ndó ñí cáháⁿ-í.

⁶ Te ñáhá, chi ní ndexio té Timùteú sá ñí quixi-dé ñúu-ndó, te nàha-dé tnúhu ní nasáá sá ñí yuhu ñí ìní-ni-ndo sàndáá ìní-ndó Yã Ndiòxí, te cùu ìní-ndó cuè tnaha ñáyiu-ndo. Te càchí-dé sá ïo ñúhu ìní ñáhá-ndó xii-ndí, te ío cuíni-ndó cáháⁿ ndihi ñaha-ndo, te diu-ni ducaⁿ ïo cuíni nchúhú cáháⁿ ndihi ñaha-ndí xii-ndo tucu. ⁷ Te ío ndòho-ndí chi ío cùu úhú ìní ñáhá ñáyiu xii-ndí, dico sá ñí ñhí-ndí tnúhu sá nchòhó ñáyiu ndècu ndihi-ndí ichi Xítóhó Jesucristú ñá túu dàña ndéé-ndó sàndáá ìní-ndó Yã Ndiòxí, te xíãⁿ cúu-xí ìⁿ tnúhu càhnu ìní ní ñhí-ndí chi ní naníhí ndéé-ndí. ⁸ Te ní nduu vétú ìní-ndí sá ñí ñhí-ndí tnúhu ndècu-ni-ndo ìchi-gá. ⁹ Te òré càháⁿ ndihi-ndí Yã Ndiòxí, te ío ndàcáⁿ táhú-ndí núu-gã cuèndá sá ñá túu dàña nihnu-ndo ìchi-gá, núu xíãⁿ ío cùdíí ìní-ndí. ¹⁰ Te cuèi nduu cuèi niú xicáⁿ táhú-ndí núú Yã Ndiòxí sá mée-gã ná càda te sáá ìⁿ nduu naníhí tnàhá-ó cuèndá danèhé ñáhá váha-gá-ndí tnúhu-gá sá cúmãní-gã xii-ndo.

¹¹ Te mee Tãtá-ó Dútú Ndiòxí, ndihi Xítóhó Jesucristú chindee ñaha-gá xii-ndí te quixi-ndí quixi coto

ñaha-ndí xii-ndo. ¹² Te mee Xítoho Jesucristú ná chindee ñaha-gá xii-ndo, te ío-gá cuita cuu iní tnáhá-gã-ndó nàcuáa ndècu-ndo ichi-gá ndihi nchaa dava-gá ñáyiú dàtná cúú iní ñáhá-ndí xii-ndo. ¹³ Te xicáⁿ táhú tùcu-ndí núú Tátá-ó Dütú Ndiöxí sá ñi yuhu ñi iní-ndó càncicúⁿ nihnu-ni-ndo ichi-gá, te ducaⁿ te cundáá-ndó núú-gã, te ñá túú-gã ná cumání-ndó òré ná sáá nduu quixi tucu Xítoho Jesucristú ndihi nchaa ñáyiú sa ndècu ndihi-gá.

4

Nàcuáa cuini Yã Ndiöxí cada-o

¹ Te nchòhó ñáyiú ndècu ndihi-í ichi Xítoho Jesucristú càháⁿ ndàhú-í núú-ndó sã cùndèdóho-ndo na càháⁿ-í nàcuáa ndùu tnúhu càháⁿ Xítoho Jesucristú, chi mee-gã cuini-gá sá cáda-ndó nàcuáa ní dánèhé ñáhá-ndí xii-ndo cuèndá cuu váha iní Yã Ndiöxí núú-ndó, te ducaⁿ-ni càda-ndo ndéé núú cuaháⁿ núú vèxi.

² Te nchòhó sa nàha-ndo nacuáa ní càháⁿ-ndí núú-ndó, chi ní càháⁿ-ndí nàcuáa ní táuchíuⁿ Xítoho Jesucristú te ní cachí-gá sá ³ Yã Ndiöxí cuini-gá sá cáda ndáá-ó cùndecu-o ichi-gá. Te nchoo cuè téé vá càháⁿ ndihi-o ñáyiú dìhí te núú ñá díú ñàdihí-ó cùú-yu, te ñi cuè ñáyiú dìhí vá càháⁿ ndihi-yu téé núú ñá díú yí-yu cùu-güedé.

⁴ Te núú xíⁿ nchaa nchòhó tnàha téé-í ndi díⁿ cùndecu ñadihí-ndó, te diu-ni ducaⁿ

nchòhó cue ñáyiú dìhí tucu ndi díⁿ cùndecu yí-ndo, te mee-ni tnúhu yíñùhu càháⁿ ndihi tnàha-ndo. ⁵ Te vá cání cuèhé caní duha iní-ndó dàtná quidé cuè ñáyiú ñá túú sàndáá iní tnúhu Yã Ndiöxí. ⁶ Te ñi ñⁿ-ndo vá cání iní-ndó dandahú-ndó tnàha téé-ndo càháⁿ ndihi-ndo ñàdihí-güedé. Te ducaⁿ-ni nchòhó cue ñáyiú dìhí tucu vá cání iní-ndó dandahú-ndó tnàha dìhí-ndó càháⁿ ndihi-ndo yí-yu. Chi núú ducaⁿ na càda-ndo, te Yã Ndiöxí ío dandòho ñaha-gá xii-ndo dàtná ní cachí-ndí ndéé díhna. ⁷ Chi Yã Ndiöxí ní càháⁿ ñáhá-gã xii-o cuèndá sá cáda-ó mèe-ni sá váha, te ñá díú sã cuèhé sá dúhá. ⁸ Te nchaa ñáyiú na càda sáá iní-xi tnúhu càháⁿ-ndí, te quide sáá iní-yu núú Yã Ndiöxí, chi ñá díú tnúhu téé ñuyúú-a cùu-xi, chi tnúhu Yã Ndiöxí, Yaá ní taxi Espiritú-gá ndécú ndihi-o cuu-xi.

⁹ Te nchòhó ñáyiú ndècu ndihi-í ichi Xítoho Jesucristú, ñá túú-gã xini ñùhu-xi cachí tnúhu-í xii-ndo sã cúú iní tnáhá-ndó, chi Yã Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndihi nàcuáa cuu iní-ndó dàva-gá tnàha ñáyiú-ndo.

¹⁰ Te ducaⁿ xiquide-ndo ndihi nchaa ñáyiú ndècu ndihi-ndo ichi Xítoho Jesucristú ndécú dìstrítú Macèdoniá. Te càháⁿ ndàhú-ndí núú-ndó sã cáda ndáá-gã-ndó, te cuita cuu iní-gã-ndó cuè tnaha ñáyiú-ndo quíhíⁿ. ¹¹ Te cada ndee iní-ndó cùndecu ñucaxi iní-ndó, te cuhuⁿ

iní-ndó chiúⁿ mee-ndo, te xiǎⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaa ñáyiu ñá túú sàndáá iní tnúhu Yá Ndiöxí cáháⁿ váha-yu cuendá-ndó, te ducaⁿ te ñá túú tnàhí-gá ná cúmání xii-ndo.

Nacuáa cada-xi òré quixi tucu Xítohó Jesucristú

¹³ Te vitna na càchí tnúhu-ndí xii nchòhó ñáyiu ndècu ndihí-ndí ichi Xítohó Jesucristú cuendá nchaa ñáyiu sa ní xihí, ñáyiu ní sàndáá iní tnúhu Yá Ndiöxí cuendá sá vǎ ndihú iní-ndó cuendá-yu dàtná xíquide nchaa ñáyiu ñá túú yihí iní-xi sá quixí tucu Xítohó Jesucristú ñuyúú-a. ¹⁴ Te nchoo sàndáá iní-ó sǎ ní xihí Xítohó Jesucristú te ní ndoto-gá ní dándótó ñaha Yá Ndiöxí, te sàndáá tucu iní-ó sǎ dàtná ní dándótó Yá Ndiöxí Xítohó Jesucristú, ducaⁿ dándoto-gá nchaa ñáyiu ní xihí ñáyiu ní sàndáá iní ñáhá xii-gá.

¹⁵ Te na càchí tnúhu tucu-ndí ingá tnúhu nacuáa ní cáháⁿ Xítohó Jesucristú, chi ní cachí-gá sá ná sàá nduu quixi tucu-gá te nchaa ñáyiu sàndáá iní tnúhu-gá ndécú vǐvú ñuyúú-a vá códó núu-yu núú ñáyiu ní xihí ndaa andiu, chi jùndú candeca ñaha-gǎ xii-yu ndaa. ¹⁶ Chi Xítohó Jesucristú quee túu-gá andiu, te cana-gá nchaa ñáyiu ní sàndáá iní tnúhu-gá, te òré-áⁿ Yá Ndiöxí cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaa ñáyiu ní xihí, ñáyiu ní sàndáá iní tnúhu-gá.

¹⁷ Te dǎtnùní nchaa nchoo ñáyiu xindecu vǐvú ñuyúú-a naníhí tnáhá-ó ndihí-yu, te ndanchita-o ndihu-o xití vico naníhí tnáhá-ó ndihí Xítohó Jesucristú, te candeca ñaha-gǎ xii-o ndàa andiu cundecu ndihí-o-gá ni caa ni quihíⁿ.

¹⁸ Núu xiǎⁿ chí cuǎha tnàha tnúhu ndee iní, te vá ndihú iní-ndó chi naníhí tǎhú-ndó núú-gǎ.

5

¹ Te nchòhó ñáyiu ndècu ndihí-í ichi Xítohó Jesucristú ñá túú-gǎ xini ñuhu-xi sá càchí tnúhu-í xii-ndo sǎ quixí tucu-gá, te ni ñá túú-gǎ xini ñuhu-xi sá càchí tnúhu-í xii-ndo nǎsa cada-xi òré quixi-gǎ. ² Chi nchòhó sa naha ndáá-ndó sǎ Xítohó Jesucristú quixi-gá nduu ñá túú yihí iní-ó, chi dàtná quidé ìⁿ ñaduhú cada-gá òré quixi-gá, chi nduu ñá túú nǎ yihí iní-ó quixi tucu-gá. ³ Te sáá nduu te cachí nchaa ñáyiu ndècu ichi cuehé ichi duha: “Vitna ío váha cùu iní-ó ndècu-o, te ñá túú-gǎ ná cúmání xii-o”, duha quesàhá-yu. Te ñáyiu-áⁿ òré ñá túú nǎ yihí iní-yu, te quèxio tnúndòho tnúhu ndàhú sá cúu-xi-yu. Chi cada-xi dàtná quidé-xi ìⁿ ñáyiu dihi ní tnahá òré cacu déhe-xi, chi na iní-yu ní dátñuhú ñáhá-xi te vá cǎcu-yu núú tnúndòhó-yu, te ducaⁿ sǎ tnàhá-xi yáha nchaa ñáyiu ñá túú ndècu ichi-gá, chi na iní-yu quexio tnúndòho sá cúu-xi-yu te vá cǎcu-yu núú tnúndòho-áⁿ. ⁴ Te nchòhó ñáyiu ndècu ndihí-í

ichi Xítóhó Jesucristú, ñá túú-gã ndécú-ndó ichi cuehé ichi duha, núu xiãⁿ sa yíhi-ná iní-ndó ndùu quixi-gá te vá yáha-ndo dàtná yáha nchaa ñáyiu ñá túú ndècu ichi-gá, chi ñáyiu-áⁿ ñà túú nã yíhi iní-yu sá quixí-gã. Te na iní-yu quexio-gá dàtná quidé ñàdúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá. ⁵ Te nchoo ñà túú-gã ndécú-ó ichi cuehé ichi duha, te ichi-áⁿ cúu-xí dàtná ìⁿ ichi nee ndècu-o ni cuu, te vitna sa ní ngündecu-o ichi váha, te ducaⁿ chi Yá Ndiòxí ní dándixí túu-gá iní-ó cuendá cutnùní iní-ó nàcuáa ndùu cuendá-gá. ⁶ Te xini ñuhu-xi dandixi túu-o iní-ó, te cada váha-o cündecu-o ichi-gá, te vá cáda-ó dàtná quidé nchaa ñáyiu ñá túú sándáá iní ñáhá xii-gá, chi ñáyiu-áⁿ ñà túú-gã quidé cuendá-yu te núu quide váha-yu àdi ñá túú quide váha-yu ndécú-yu. ⁷ Te nchaa ñáyiu quide cuehé quidé dùha cuú-yu dàtná ìⁿ ñáyiu xidí àdi xini, chi ñá túú quide cuendá-yu nàcuáa cada-yu ìⁿ sá váha dàtná cuiní Yá Ndiòxí. ⁸ Te nchòhó ñáyiu sa ní cutnùní iní-xi nàcuáa ndùu ichi váha, dandixi túu-ndo iní-ndó cündecu-ndo, te quindáá ndisa iní-ndó Yá Ndiòxí, te cuu iní-ndó cuè tnaha ñáyiu-ndo te ducaⁿ te vá táxi tnùní ñáhá nì ìⁿ sá cuèhé sá dúhá xii-ndo. Te ío cuhuⁿ iní-ndó sá cündècu-ndo ndihi-gá ni caa ni quíhíⁿ. ⁹ Chi Yá Ndiòxí ní cachí-gá sá vã

quíhíⁿ-ó núú ùhú núú ndàhú, chi mee-gã nacuaca ñaha-gã xii-o cündecu-o ndihi-gá, chi ní sándáá iní-ó Xítóhó Jesucristú. ¹⁰ Te mee Xítóhó Jesucristú ní xíhí-gá sá cuendá nchaa yíca cuèchi-o, te ní ndoto-gá cuendá nduu táhú-ó cündecu-o ndihi-gá andiu na sáa nduu cuèi sa ní xíhí-ó, àdi vátá cùu-gá-ó. ¹¹ Núu xiãⁿ chí cuáha tnàha tnúhu ndee iní, te chindee tnàha-ndo cündecu-ndo ichi-gá dàtná tá quide-ndo véxi.

Té Páblú dáquini sàhú-dé ñáyiu ndècu ichi Xítóhó Jesucristú

¹² Te nchòhó ñáyiu ndècu ndihi-ndí ichi Xítóhó Jesucristú, càháⁿ ndàhú-ndí núú-ndó sã cánèhe-ndo sá yíñuhu núú cuè téé cùnno xinu cuechi núú Yá Ndiòxí, cue téé dānehé ñáhá xii-ndo nacuáa cündecu-ndo ichi-gá. ¹³ Te

cáháⁿ váha-ndo ndihi-güedé, te cuu iní-ndó-güedé, chi nàha-ndo sá chíuⁿ Yá Ndiòxí quidé-güedé. Te cündecu ndihi váha tnàha-ndo nchaa-ndo.

¹⁴ Te càháⁿ ndàhú tucu-ndí núú-ndó sã càháⁿ-ndó dōho nchaa ñáyiu ñá túú cuiní cada chìuⁿ, te ducaⁿ cuñaha-ndo tnúhu ndee iní xii nchaa ñáyiu quíyuhu iní-xi canchicúⁿ nihnu ichi-gá, te chindee tucu-ndo nchaa ñáyiu vátá ngũnu ichi váha-gá, te cündeu càhnu iní-ndó núu-yu nchaá-yu.

¹⁵ Te cada ndee iní-ndó te núu ndècu tnaha ñáyiu-ndo cùu ùhú iní ñáhã-yu xii-ndo,

te vá tnàhá-ni-ndo cùu úhú iní-ndõ-yu. Te mee-ni sã vâha cada-ndo sã cúú-xí nchàa tnaha ñáyi-ndo.

16 Te nchaa nduu ío cudíí iní-ndó cùndecu-ndo. 17 Te ñⁿ nduu ñⁿ nduu cáháⁿ ndihí-ndo Yã Ndiõxí. 18 Te ndacáⁿ táhú-ndó núú-gã te núu nándi cùu sã yâha-ndo ndècu-ndo, chi ducaⁿ cuíní-gá cada-o, te diu ducaⁿ nduu tnúhu cáháⁿ Xítohó Jesucristú.

19 Te vá quèhndé nihnu-ndo chiúⁿ quide Espíritú Yã Ndiõxí iní-ndó. 20 Te vá cádá sãá iní-ndó núú cuè téé cáháⁿ tnúhu Yã Ndiõxí nàcuáa dàcahu iní ñáhá-gã xii-güedé. 21 Te cada cuèndá váha-ndo nàcuáa cáháⁿ-güedé, te tñi-ndo nchàa tnúhu váha cáháⁿ-güedé. 22 Te dañá-ndo nchàa ichi cuehé ichi duha.

23 Te mee Yã Ndiõxí quidé-gã ío váha cùu iní-ó ndècu-o ichi-gá. Te xicáⁿ táhú-í núú-gã sã ná càda íí ñáhá-gã xii-ndo, te na còto ñaha-gá xii-ndo ndihí iní-ndó cuèndá sã vã cádá-gã-ndó nì ñⁿ sã cuèhé sã dúhá, te diu-ni ducaⁿ na càda-gá sã cúú-xí-ndó ndèé ná sãá nduu quixi tucu Xítohó Jesucristú ñuyíú-a. 24 Chi Yã Ndiõxí Yaá ní cáháⁿ ñáhá xii-o cada-gá nàcuáa ní cáháⁿ-gá, te chindee ñàha-gá xii-ndo.

Té Pãblú quidé ndèe iní-dé ñáyi-ndo xñdecu ichi Xítohó Jesucristú ndécú ñúú Tesalónica

25 Te nchòhó ñáyi-ndo ndècu ndihí-í ichi Xítohó Jesucristú, cácáⁿ táhú-ndó núú Yã Ndiõxí sã ná chindee ñaha-gá xii-ndí.

26 Te cúñaha-ndo xii nchaa ñáyi-ndo ndècu ndihí-o ichi Xítohó Jesucristú sã nì yuhu nì iní-ndí quidé ndèe iní ñáhá-ndí xii-ndo ndihí-yu.

27 Te vitna mee Yã Ndiõxí ndéhé-gã sã cáháⁿ ndàhú-í núú-ndó sã dácuàha-ndo tutú-a núú nchàa ñáyi-ndo ndècu ndihí-o ichi-gá.

28 Te Xítohó Jesucristú ío na chindee chitúu ñaha-gã xii-ndo núú cuáháⁿ núú vëxi, Te ducaⁿ na cùnduu. Te ío chí cádá ndèe iní-nã vitna.

TUTÚ CÚÚ ÒÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue té cùndihi-dé cādūha-güedé tutú quihiⁿ ndaha ñáyiu xñdecu ichi Xítohó Jesucristú ndécú ñúú Tesàlónicá

¹ Yúhú té Pāblú cādūha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiu ndècu ndihi-ndí ichi Xítohó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítohó Jesucristú. ² Te xicáⁿ táhú-ndí núú Dütú Ndiöxí, ndihi núú Xítohó Jesucristú sá ná chìndee chítúu ñaha-gá xii-ndo, te ducaⁿ ndì nduú-gá ná cáda te ío váha cuu iní-ndó cùndecu-ndo.

Yá Ndiöxí cada ndáá-gá cuèchi nchaa ñáyiu ndècu ichi cuehé ichi duha na sàá nduu quixi tucu Xítohó Jesucristú

³ Te nchòhó ñáyiu ndècu ndihi-ndí ichi Xítohó Jesucristú, càhí tnúhu-í xii-ndo sá cùnàha-ndo sá ñà túú dàña ndee-ndí ndàcáⁿ táhú-ndí núú Yá Ndiöxí cuendá-ndó, chi dacuítí dūcaⁿ taú-xi cunduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cùu iní tnàhá-ndó nàcuáa ndècu-ndo ichi Yá Ndiöxí. ⁴ Núu xiáⁿ nchúhú

ío váha càháⁿ-ndí cuendá-ndó núu nchaa ñáyiu sàndáá iní tnúhu Yá Ndiöxí nchaa núu tàcá-yu dācuahá-yu tnúhu-gá, chi ío sàndáá iní-ndó-gá, te ñá túú dàña ndeé-ndó nchicúⁿ nihnu-ndo ichi-gá, te quide cahnu-ni iní-ndó cuèi nándi sá yáha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xiáⁿ cùtnùni nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxi tnùni-gá, te ducaⁿ càda-gá chi cùu-gá Yaá quidé ndáá cuiti. Te vītna ndòho-ndo nacuáa ndihu ndaha-gá dava-gá ñáyiu.

⁶ Te Yá Ndiöxí ío váha ndáá quidé-gá, chi mee-gá nachinaa-gá nchaa sá quidé ñaha ñáyiu cùu úhú iní ñáhá xii-ndo, ⁷ te nchoo ñáyiu ndòho cuendá Xítohó Jesucristú nucùndecu váha-o na sàá nduu núu túu-gá andiu, te tnàhá cue espíritú xínú cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xi nchaa núu chiúⁿ tahu-gá. Te òré nuu túu-gá andiu ndihi cue espíritú-áⁿ, te ío dātásaⁿ-xi andiu. ⁸ Te dandòho-gá nchaa ñáyiu ñá túú tnàhá tnúhu ndihi Yá Ndiöxí, ñáyiu ñá túú sàndáá iní tnúhu Xítohó Jesucristú tnúhu sá càháⁿ nàcuáa naníhí táhú-yu. ⁹ Te nchaa ñáyiu-áⁿ ïo dandòho ñaha-gá xií-yu, chi ndohó-yu ni caa ni quihiⁿ, te vá cùndécú-yu núú ïo váha càa ndecu-gá táxi tnùni-gá. ¹⁰ Te ducaⁿ càda ñaha-gá xií-yu na sàá nduu, te dàvá-áⁿ ïo

cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ïo cuñúhu-o-gã dává-áⁿ.

¹¹ Te cuendá xíáⁿ núu ïo xicáⁿ táhú-ndí núú Dütú Ndiöxí sá ná chindee ñaha-gá xii-ndo cùndecu váha-ndo ìchi-gá dàtná cuiní méé-gã cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tucu-ndí núú-gã sá ïo na chindee ñaha-gá xii-ndo càda-ndo nchaa sá vâha sàni iní-ndó, ndihi cuendá chiuⁿ quide-ndo cuendá-gá, te ducaⁿ chi sàndáá iní-ndó-gã. ¹² Te núu ducaⁿ na càda-ndo, te cáháⁿ váha ñáyiú cuendá Xítohó Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiöxí ndihi Xítohó Jesucristú cúndáhú iní ñáhá-gã chindèe ñaha-gá xii-ndo.

2

Té quixi dandàhú ñáyiú

¹ Te nchòhó ñáyiú ndècu ndihi-ndí ìchi Xítohó Jesucristú càchí tnúhu-ndí xii-ndo nàcuáa cada-xi nduu na quixí tucu-gá, chi quixi-gá nacuaca ñaha-gã xii-o, núu xíáⁿ cáháⁿ-ndí dóho-ndo. ² Te ñá díú sã ñáⁿ tnúhu tecú dóho-ndo te ngüíta-ndo càni ñáⁿ caní úú iní-ndó, te ni vã yùhú-ndó te núu véxi ñáⁿ téé càchí-dé sã cáháⁿ-dé tnúhu Yá Ndiöxí, te càchí-dé sã sã véxi Xítohó Jesucristú, te vá quindáá iní-ndó tnúhu cáháⁿ-dé chi ñá ndáá, àdi

véxi ñáⁿ téé nèhe ñáⁿ tutú núu-ndó te càchí-dé sã yùhú ní tendaha-í véxi, te núu tutú-áⁿ cáháⁿ-xi sã sã véxi Xítohó Jesucristú, te diu-ni vá quindáá iní-ndó nàcuáa cáháⁿ-xi, te ndèda-ni càa ñáyiú cáháⁿ-yu dává-áⁿ sã sã véxi-gá dico vá quindáá tnàhí iní-ndó. ³ Núu xíáⁿ dátüha ñaha-í xii-ndo cuendá sã vã dáñá tnàhí-ndo mèe-ndo dandahú ñáhá ñáyiú. Chi cùmání-gã sáá nduu quixi tucu Xítohó Jesucristú, te ngüíta nchaa ñáyiú cuu úhú iní-yu Yá Ndiöxí, te dává-áⁿ quini-yu ñáⁿ téé xidó quidé nchàa sã cuèhé sã dúhá, te téé-áⁿ quihíⁿ-dé núu ùhú núu ndàhú ni caa ni quihíⁿ. ⁴ Te diu-ni téé-áⁿ vã ndèe iní-dé nchaa sã càchí ñáyiú cùu ndiöxí-yu ndihi nchaa dava-gá sã quidé càhnú-yu, te cachí-dé sã ïo cùnuu-dé, te quihu-dé ndéé xití veñúhu núu ndécú cuè ñáyiú chihnuhu ñaha xii Yá Ndiöxí coo-dé, te cúñaha-dé xii-yu sã cúú-dé Yá Ndiöxí.

⁵ Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xindecu ndihi ñaha-í. ⁶ Te nchòhó sa cùtnuní iní-ndó nã cúú sã ngání ñaha xii téé-áⁿ núu ñá túú-dé vitna, dico na sáá nduu tàú-xi quee-dé caca cuu-dé te dává-áⁿ quini ñáhá nchàa ñáyiú. ⁷ Te ïo titní núu sã cuèhé sã dúhá quide yucu ñávâha dicó-ni sã vátá quini-gá ñáyiú, dico ndècu ñáⁿ sã ñá dáñá càda-xi nchaandi túhú nàcuáa càchí iní-xi, dico sáá nduu xòcuñí sã ñá dáñá-áⁿ te dává-áⁿ

cada-xi nchaa nàcuáa càchí iní-xi. ⁸ Te sáá nduu quíní-yu téé quide nchaa sá cuèhé sá dúhá-ǎⁿ ñuyíú-a. Te òré ná quíxi túu Xítóhó Jesucristú, te mee-ni sǎ dátásaⁿ-xi, ndihi yócó yuhu-gá cuú téé-ǎⁿ. ⁹ Te sácúíhná tendaha-xi téé-ǎⁿ quixi-dé, te cuǎñaha-xi tnúhu ndee iní cada-dé nándí sá cáda-dé. Te cada-dé sá ñà túú tnàhí ndàcu ni ìⁿ ñáyiu ñuyíú-a cada-yu, dico mee-ni dándahú ñáhá-dé xii-yu caca cuu-dé. ¹⁰ Te nchaa núú sá cuèhé sá dúhá càda-dé dandáhú-dé nchaa ñáyiu sa ñùhu ichi cuáháⁿ núú ùhú núú ndàhú, chi ñá túú ní cuíní-yu quíndáá iní-yu tnúhu ndáá tnúhu Yá Ndióxi cuéndá naníhí tǎhú-yu. ¹¹ Te sá dúcáⁿ ñà túú ní cuíní-yu quíndáá iní-yu tnúhu ndáá, núú xiǎⁿ daña Yǎ Ndióxi dacáháⁿ yucu ñáváha iní-yu quíndáá iní-yu nchaa tnúhu ndehnde ¹² cuéndá cuíta nihnú-yu, te ducaⁿ yǎha-yu chi ñá túú sándáá iní-yu tnúhu ndáá càháⁿ Yǎ Ndióxi, chi mee-ni nchaa sá cuèhé sá dúhá cùdíí iní-yu quidé-yu, te cuíta nihnú-yu chi ducaⁿ ñí cachí Yǎ Ndióxi cunduu.

Ñáyiu ní cachí Yǎ Ndióxi naníhí tǎhú

¹³ Te nchòhó ñáyiu ndècu ndihi-ndí ichi Xítóhó Jesucristú, ñáyiu ío cùu iní-gá càchí tnúhu-ndí xii-ndo sǎ ñà túú dàña ndee-ndí ndàcáⁿ tǎhú-ndí núú Yǎ Ndióxi cuéndá-ndó, chi ducaⁿ tǎu-xi cunduu, chi Yá Ndióxi ní cachí-gá ndéé cùtnáhá vátá ngáva-gá ñuyíú sǎ naníhí

tǎhú-ndó, te diu Espíritú-gá dacáháⁿ-xi iní-ndó ndècu yiñuhu-ndo núú-gǎ, te sándáá iní-ndó tnúhu ndáá càháⁿ-gá núú xiǎⁿ ní naníhí tǎhú-ndó. ¹⁴ Chi cuéndá tnàhí-a ní càháⁿ ñáhá Yǎ Ndióxi xii-ndo, te ducaⁿ ñí naníhí tǎhú-ndó chi ní sándáá iní-ndó tnúhu Xítóhó Jesucristú ní càháⁿ-ndí núú-ndó, te sáá nduu te cundecu-ndo tnàhá-ndó núú ío váha caa ní nduu tǎhú Xítóhó Jesucristú ndécú-gǎ.

¹⁵ Núú xiǎⁿ nchòhó ñáyiu ndècu ndihi-ndí ichi Xítóhó Jesucristú ío càháⁿ-ndí dóho-ndo sǎ vǎ dáña nihnu-ndo ichi-gǎ, te ni vǎ nácuaⁿnaa-ndo nchaa tnúhu ní càháⁿ-ndí núú-ndó cùtnáhá ní xíndecu ndihi ñaha-ndí xii-ndo, te diu-ni ducaⁿ càda-ndo nchaa tnúhu tendaha-ndí véxi. ¹⁶⁻¹⁷ Te xicáⁿ tǎhú-ndí núú-gǎ sǎ ná dàcaháⁿ-gá iní-ndó cundecu-ni-ndo ichi-gǎ, te ducaⁿ ío na chindee ñaha-gá xii-ndo càháⁿ-ndó mèe-ni tnúhu váha, te cada váha-ndo cundecu-ndo nacúáa cuu váha iní-gǎ, chi mee Dütú Ndióxi ío cùu iní ñáhá-gǎ xii-o, te diu-gǎ ní taxi-gǎ tnúhu ndee iní cundecu ndihi-o ní caa ní quíhíⁿ, te ní cachí tnúhu tucu-gǎ ingá tnúhu váha sǎ cùndètu-o Xítóhó Jesucristú.

3

Cáháⁿ ndihi-ndo Yǎ Ndióxi cuéndá-ndí

¹ Te nchòhó ñáyiu ndècu ndihi-ndí ichi Xítóhó Jesucristú, ndéé núú ndíhí-nǎ càchí tnúhu-í xii-ndo sǎ càháⁿ ndihi-ndo Yǎ Ndióxi

cuèndá-ndí cuèndá sá ná chindee ñaha-gá xii-ndí, te ducaⁿ ndíhi-ni cuténuu tnúhu Xítohó Jesucristú nchaa xichi, te cudíí iní-yu tnúhu-gá dàtná quidé nchòhó. ² Te cáháⁿ ndíhi tucu-ndo Yá Ndiöxí cuèndá sá ná còto ñaha-gá xii-ndí, te ñá túú nã cada ñaha ñáyiú cuihna iní-xi ndècu ichi cuehé ichi duha xii-ndí, chi ñá ncháá-yu sàndáá iní-yu tnúhu-gá. ³ Dico Xítohó Jesucristú quidé-gã nchaa sá càháⁿ-gá, te ñu-gá cada te nchòhó cundecu-ni-ndo ìchi-gá, te coto ñaha-gã xii-ndo cuèndá sá ñà túú nã cada ñaha yùcu ñávãha. ⁴ Te Xítohó Jesucristú quidé-gã cútñuní iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te ñu-ni ducaⁿ càda-ndo cundecu-ndo. ⁵ Te xicáⁿ táhú-ndí núú Yá Ndiöxí sá ná chindee ñaha-gá xii-ndo cùu iní-ndó-gã, te ñu-ni-gá ná chindee ñaha-gá xii-ndo cùnduu cahnu iní-ndó, chi Xítohó Jesucristú ducaⁿ ño càhnu iní-gá.

Tàú-ó càda chiúⁿ-o

⁶ Te nchòhó ñáyiú ndècu ndíhi-í ichi Xítohó Jesucristú, càháⁿ-í dóho-ndo sã mée-gã cuíní-gá sá vã ñíhí tnáhá-gã-ndó ndíhi ndéda-ni càa ñáyiú càchí sá sàndáá iní tnúhu-gá, ñáyiú ñá túú cuíní cada chiúⁿ, chi ñáyiú ducaⁿ xíquide ñá túú cuíní-yu tníí-yu tnúhu sá ñí dánèhé ñáhá-ndí xii-ndo. ⁷ Te nchòhó sa xini-ndó nacuaá

cada-ndo cùndecu-ndo canchicúⁿ nihnu-ndo nacuaá quide-ndí. Te cútñhá ní xíndecu ndíhi ñaha-ndí xii-ndo chi ní ñíⁿ nduu ñá túú ní tühío-ndí. ⁸ Te ní ñà túú dícó ducaⁿ ní quèheⁿ-ndí sá ndécú ndíhi ñáyiú caxi-ndí àdi canehe-ndí, chi cuéi nduu cuéi niú ío ní quide chiúⁿ-ndí ní ñíhí-ndí díhúⁿ ñí saaⁿ-ndí nchaa sá ñí nandíhi-ndí cuèndá sá ñà túú ní cuíní-ndí chichiuⁿ ñaha-ndí xii-ndo. ⁹ Te cuéi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiúⁿ-ndí cuèndá ní cuíní-ndí danèhé ñáhá-ndí xii-ndo nacuaá càda-ndo cundecu-ndo. ¹⁰ Te cútñhá ní xíndecu ndíhi ñaha-ndí xii-ndo ñí cachí-ndí sá ncháá ñáyiú ñá túú cuíní cada chiúⁿ te vã cuãha-ndö-yu sá cáxi-yu. ¹¹ Te vitna ñíhí-ndí tnúhu sá ío dava nchòhó ñá túú tnàhí quide chiúⁿ-ndo, chi àúⁿ nã cuu ndí cuu ndí cuu-ni-ndo núú ndécú dàva-gã tnàha ñáyiú-ndo. ¹² Te yúhú càháⁿ-í dóho nchaa nchòhó ñáyiú ducaⁿ ñà túú cuíní cada chiúⁿ sá càdá chiúⁿ-ndo cuendá ñíhí-ndó nchàa sá cóhó sã cáxi-ndó, te duha càháⁿ-í dóho-ndo, chi ducaⁿ cuíní Xítohó Jesucristú Yaá táxí tnùní ñáhá xii-o cada-ndo, te òré cada chiúⁿ-ndo te vã ño cada dusaⁿ-ndo.

¹³ Te nchòhó ñáyiú ndècu ndíhi-í ichi Xítohó Jesucristú, vã dáñá ndèé-ndó càda-ndo mee-ni sá vãha. ¹⁴ Te núu ñíⁿ ñáyiú ndècu ndíhi-ndo ñá túú cuíní-yu

tní-yu tnúhu càháⁿ-ndí núú
 tütú-a, te cundehe-ni-ndo
 nũu nděda càá-yu, te vá
 nihí tnáhá-gă-ndó ndihí-yu
 cuëndá sá ná cùcahaⁿ núũ-yu,
 15 dico vá cúú ũhú iní-ndô-yu,
 chi cáháⁿ-ndó dôho-yu
 cada-ndo sã ndécú-ndó ìchi
 Xítóhó Jesucristú ndihí-yu.

Tnúhu ndéé núú nĩ ndihí-ná

16 Te mee Xítóhó Jesucristú
 ío váha cùu iní-gá ndécú-gă, te
 xicáⁿ táhù-í núú-gă sá méé-gă
 ná cádá te ío váha cuu iní-ndó
 tnáhá-ndó cùndecu-ndo cuéi
 nása-gă ná cùndecu-ndo. Te
 mee-gă ná cùndecu ndihí
 ñaha-gă xii-ndo nchàa-ndo.

17 Te vitna yúhú té Păblú
 téè-í tnúhu-a quide ndee iní
 ñáhà-í xii-ndo, te ðiu-ni duha
 càa nchaa letrá-í nchaa núú
 tütú cáđũha-í. 18 Te xicáⁿ
 táhù-í núú Xítóhó Jesucristú
 sá ïo na chìndee chitúu
 ñaha-gă xii-ndo nchàa-ndo.
 Te ducaⁿ na cùnduu. Te ío chí
 cádá ndèe iní-nã vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMŪTEÚ

*Té Pāblú cadúha-dé tutú
quihĪⁿ ndaha té Timùteú*

¹ Yúhú té Pāblú ní tendaha ñaha Yá Ndiõxí cāháⁿ-í tnúhu Xítohó Jesucristú núú ñáyiú chi ducaⁿ nĭ cachí Yá Ndiõxí cunduu, te ñu-gá cúú-gă Yaá ní dácăcu ñihnu ñaha xii-o núú ùhú núú ndáhú. Te tnàhá Xítohó Jesucristú ducaⁿ nĭ cachí-gá sá cāháⁿ-í tnúhu-gă, te ñu-gá ní taxi-gă tnúhu ndee iní xii-o sã cùndecu-o ndihĭ-gă nĭ caa nĭ quihĪⁿ.

² Te yòhó té Timùteú cúú-n ĩⁿ tée ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te càdúha-í ĩⁿ tutú daquixi-í ndaha-n. Te xicáⁿ táhù-í núú Tātá-ó Dütú Ndiõxí ndihĭ núú Xítohó Jesucristú sá ío na chindee chitúu ñaha-gă xii-n, te ducaⁿ ndĭ nduú-gă ná cádá te ío váha cuu iní-n cùndecu-n.

*Cuendá nchaa ñáyiú
dàndahú tnàha ñáyiú-xi*

³ Te nàha-n nacuáa ní cāháⁿ-í cùtnàhá ní quee-í ñuu Éfesú véxi-í distritú Macèdoniá, chi ní cachí-í sá quéndoo-n ñuu-áⁿ cāháⁿ-n dõho nchaa ñáyiú dàndahú ñáhá cāhĭ sá cāháⁿ tnúhu Yá Ndiõxí te ñá ndáá sá cāháⁿ-yu tnúhu-gă, te ñu-ni ducaⁿ cāháⁿ-í vitna cada-n

cùndecu-n. ⁴ Te cūñaha-n xii-yu sá vã cádá cuendá-yu nchaa cuendú ñihĭ-yu năcuáa ní xóo cada ñáyiú ní xindecu ndéé sanaha, te nchaa cuendú-áⁿ dĭcó chináa ñáhá-xĭ chi ñá túú vĕdana nàndĭhi-xi, te ni ñá túú chindee ñaha-xĭ cada-o nacuáa cuinĭ Yá Ndiõxí, chi mee-ni sã quindáá iní-ó-gă quidĕ-xĭ quide-o nchaa nacuáa cuinĭ-gă.

⁵ Te duha cāháⁿ-í cūñaha-n xii-yu cuendá sá ná cùu inĭ-yu tnàha ñáyiú-yu, te xini ñuhu-xi nduu ndoo nduu nine inĭ-yu, te cunduu váha inĭ-yu, te quindáá inĭ-yu Yá Ndiõxí, te vá cánĭ ĩⁿ cani úú inĭ-yu, te núu ducaⁿ na càdá-yu te cuu inĭ ndisá-yu nchaa tnàha ñáyiú-yu. ⁶ Chi dava ñáyiú ñá túú-gă quidĕ-yu nchaa năcuáa cāháⁿ-í-a, chi mee-nă nchaa cuendá sá ñá túú vĕdana nàndĭhi xĭcāháⁿ-yu. ⁷ Te cuinĭ-yu cāháⁿ-yu nchaa tnúhu ní cāháⁿ ndĭ Moisés dĭcú ñá ndácú-yu, chi cuĕi ni yùhu nĭ inĭ-yu cāháⁿ-yu dĭcú ñá tècú tnùnĭ-yu năcuáa ní cāháⁿ ndĭ, te ni tnúhu cāháⁿ méĕ-yu ñá cùtnùnĭ inĭ-yu năcuáa nduu-xi.

⁸ Te sa nàha-o sá ncháá tnúhu ní cāháⁿ ndĭ Moisés váha, te núu na tècú tnùnĭ-ó nă cuendá ducaⁿ nĭ ngúndecu nchaa tnúhu-áⁿ. ⁹ Te cùtnunĭ inĭ-ó sã ñá dĭú sã cúú-xĭ nchaa ñáyiú quide váha ndĕcu ñuyúú-a ni ngúndecu nchaa tnúhu-áⁿ, chi ní ngúndecu-xi sá cúú-xĭ nchaa ñáyiú ñá túú quide váha, ndihĭ cuendá nchaa ñáyiú ío sáá inĭ-xi, ndihĭ cuendá nchaa ñáyiú

quide cuehé quidé dùha, ndihi cuendá nchaa ñáyiú ío ndècu cuéchi-xi, ndihi cuendá nchaa ñáyiú ñá túú nèhe védana sá yíñùhu núú Yá Ndiöxí, ndihi cuendá nchaa ñáyiú ñá túú càháⁿ váha cuendá ichi Yá Ndiöxí, ndihi cuendá nchaa ñáyiú sàhni tátá-xi ndihi náná-xi, ndihi cuendá nchaa dava-gá ñáyiú sàhni tnaha, ¹⁰ ndihi cuendá nchaa cue téé càháⁿ ndihi ñáyiú dihí te ñá díú ñàdihí-güedé cúü-yu, ndihi cuendá tucu nchaa ñáyiú dihí càháⁿ ndihi cue téé te ñá díú yí-yu cùu-güedé, ndihi cuendá nchaa cue téé càháⁿ ndihi tnàha ndi mee téé-xi, ndihi cuendá nchaa ñáyiú chiváha tnàha ñáyiú-xi cuendá sá cuení-yu níhí-yu díhúⁿ, ndihi cuendá nchaa ñáyiú ndehnde, ndihi cuendá nchaa ñáyiú càcunehe ndéé Yá Ndiöxí cuendá cuení-yu cutnùní iní tnàha ñáyiú-yu sá càháⁿ ndáá-yu, te ñá ndáá sá càháⁿ ndáá-yu, ndihi cuendá nchaa ñáyiú quide nchaa dava-gá sá ñá túú tàuchiuⁿ Yá Ndiöxí cadá-yu. Cuendá nchaa ñáyiú ducaⁿ xíquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ñⁿ-ní cùu-xi ndihi nchaa tnúhu sá ní cachí Yá Ndiöxí càháⁿ-í, te tnúhu-áⁿ cúú-xí tnúhu váha vñhi, chi mee-gá ío váha iní-gá.

Té Páblú ndàcáⁿ táhú-dé núú Yá Ndiöxí sá ní cundàhú iní ñáhá-gá xii-dé

¹² Te Xítohá Jesucristú ní cutnùní iní-gá sá cadá ndáá-í cada-í nchaa chiúⁿ tahu-gá. Te ndàcáⁿ táhú-í núú-gá sá

ní taxi-gá chiúⁿ-gá quidé-í, te ío chìndee ñaha-gá xii-í. ¹³ Te ní taxi-gá chiúⁿ-gá quidé-í cuéi ní xóo càháⁿ cuèhé-í cuendá-gá, te cuéi ní xóo cúú cuèhé cúú duha-í nchaa ñáyiú ndècu ichi-gá, te cuéi nándi-gá sá ní xóo cada-í-yu dico ní cundàhú iní ñáhá Yá Ndiöxí xii-í, chi vátá quíndáá-gá iní-í Xítohá Jesucristú cútnàhá ducaⁿ ní xóo cada-í, te ní ñá cútnùní iní-í nchaa sá quidé-í ní cùu, te cuéi ducaⁿ ní xóo cada-í, ¹⁴ dico Yá Ndiöxí ío ní cundàhú iní ñáhá-gá xii-í te chìndee ñaha-gá. Te mee Xítohá Jesucristú chìndèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

¹⁵ Te nìhí-ó tnúhu sá Xítohá Jesucristú ní quixi-gá ñuyíú-a cuendá sá dácäcu nihnu-gá nchaa ñáyiú ndècu ichi cuehé ichi duha. Te tnúhu-áⁿ cúú-xí ñⁿ tnúhu ndáá, te xini ñuhu-xi quíndáá iní nchaa nchoo ñáyiú ndècu ñuyíú-a. Te yúhú cúú-í téé ío-gá ndécú cuéchi-xi núú Yá Ndiöxí ní cùu. ¹⁶ Te Yá Ndiöxí ní cundàhú iní ñáhá-gá ní dácäcu nihnu ñaha-gá xii yúhú téé xidó ndécú cuéchi-xi ní cùu, cuendá cutnùní iní nchaa ñáyiú sá Xítohá Jesucristú ío càhnu iní-gá. Te sá dúcáⁿ ní quide ñaha-gá xii-í, te xíáⁿ cutnùní iní-yu sá núu na quíndáá iní ñáhá-yu xii-gá te cundecú-yu ndihi-gá ní caa ní quíhíⁿ. ¹⁷ Te nchaa-o chí ná càchí-ó sá ío càhnu cuu Yá Ndiöxí, te canehe-o sá yíñùhu núú-gá ní caa ní quíhíⁿ, chi mee-gá cúú-gá Yaá táxí tnùní

nchaa nduu nchaa quíú. Te cùu-gá ìⁿ Yaá ñá túú xìní núú-ó, te ìⁿdii díí-ni-gã ío ndècu ndihi-gá nchaa sá xìní tnùní-gá.

18 Te yòhó té Timùteú té cùu datná ìⁿ déhe mee-í sa ñaha-n nacuaá ní cáháⁿ dava-gá cue té cãháⁿ tnúhu Yá Ndiöxí cuendá-n, te ñu-ni ducaⁿ cãháⁿ-ú tucu, te cada-n nchãa nacuaá cãháⁿ tnúhu-áⁿ chi ñu nchaa tnúhu-áⁿ canu ichi ñaha-xi xii-n cada-n nchaa nacuaá cuiní Yá Ndiöxí. 19 Te ío quindáá iní-n Xítohó Jesucristú, te cada váha-n cundecu-n nacuaá cundecu váha iní-n, chi dava ñáyiú ñá túú-gã ducaⁿ quidé-yu núu xiãⁿ ñá túú-gã sãndáá iní-yu nãcuáa cãháⁿ tnúhu-gá. 20 Te ñu-ni ducaⁿ ñi quide té Himèneú ndihi té Lijandru ní dáñá ndèé-güedé ñá túú-gã sãndáá iní-güedé nãcuáa cãháⁿ tnúhu Xítohó Jesucristú, te ní xáhaⁿ-í xii-güedé sá ná cundoho-nã-güedé núu nása cada ñaha sãcuíhná xii-güedé, te ducaⁿ ñi xáhaⁿ-í cuendá sá vã cãháⁿ cuèhé-gã-güedé cuendá Yá Ndiöxí.

2

Nãcuáa cáháⁿ ndihi-o Yá Ndiöxí

1 Te na cãchí tnúhu-í xii-n nchãa nacuaá cada-n. Te díhna-gã cãchí tnúhu-í sá cãháⁿ ndihi-n Yá Ndiöxí cuendá nchaa ñáyiú te núu nása cùu xindecú-yu, te cácaⁿ táhú-n núú-gã cuendá-yu, te ducaⁿ ío ndacáⁿ táhú-n núú-gã cuendá nchaa sá váha quide ñaha-gá xii-yu. 2 Te ducaⁿ cãháⁿ ndihi-n Yá Ndiöxí

cuendá nchaa cue té cùnuu ndihi cuendá nchaa dava-gá cue té cùchiuⁿ cuendá cada váha-güedé, te ducaⁿ nchõo ñá túú ñá cuu cundecu-o, te ñá túú tnãhí ná cani iní-ó cundecu-o, te ío cundecu yíñuhu-o núu Yá Ndiöxí, te cada-o nchãa nacuaá tàú-xi cunduu. 3 Te núu ducaⁿ na cada-o cáháⁿ ndihi-o Yá Ndiöxí cuendá nchaa ñáyiú te quide váha-o, te nduu vétú iní Yá Ndiöxí Yaá ní dácãcu nihnu ñaha xii-o núú ùhú núú ndàhú. 4 Te mee-gã cuiní-gá sá ncháá ñáyiú tecú tnùní-yu nchaa tnúhu cãháⁿ-gã, chi cuiní-gá sá nãnihí táhú-yu. 5 Te ìⁿ-ni Dútú Ndiöxí ndécú, te ìⁿ-ni Xítohó Jesucristú, te medi-ni Xítohó Jesucristú quidé-gã tnãhá tnúhu-o ndihi Yá Ndiöxí. 6 Te Xítohó Jesucristú ní dáñá-gã meé-gã ní sahní ñaha-güedé xii-gã cuendá sá cuiní-gá sá cãcu nihnu nchaa ñáyiú ndècu ñuyíú núú ùhú núú ndàhú. Te Yá Ndiöxí cuiní-gá sá ncháá ñáyiú ñuyíú ndécú vïtna níhí-yu tnúhu nãcuáa ní cuu ní xihí Xítohó Jesucristú. 7 Te Yá Ndiöxí ní cachí-gã sá cãháⁿ-í tnúhu-áⁿ ndëni ní cuu núú xindecu ñáyiú ñá túú cùu ñáyiú israhél, te mee-ni tnúhu ndáá dãnèhé-í-yu nãcuáa quindáá iní ñãhá-yu xii-gã, te yúhú cãháⁿ ndáá-í sá Yá Ndiöxí ní cachí-gã sá cãháⁿ-í tnúhu-gã chi ndècu ndihi-í Xítohó Jesucristú, te ñá túú dãndahú ñãhá-í xii-n.

8 Te yúhú cuiní-í sá ncháá xichí cáháⁿ ndihi cue té Yá Ndiöxí, te na cunduu ndoo cunduu nine iní-güedé òre

ndonehe-güedé ndaha-güedé cáháⁿ ndihí ñaha-güedé xii-gá, chi vá cúú cüdeéⁿ-güedé cuendá nchaa sá quidé ñaha ñáyu xii-güedé, te ni vă cání iní-güedé cúcuèhé tnáhá-güedé ndihí-yu. ⁹ Te cächí tnúhu-í xii-n sá ncháá ñáyu dihí ná cunduú dío-yu nacuáa tàú-xi cunduú, te vá cündüu cüehé cunduú duha dätná cáá dío nchaa ñáyu ndècu ichi cüehé ichi duha, te na ndadá-yu díquí-yu nacuáa tàú-xi cunduú, te vá ndadá cüehé ndada duhá-yu, te vá cání iní-yu cunduú vií-yu ndihí sá ïo ndèyáhu, te ni vă cání iní-yu cuihnú-yu dóó sá ïo ndèyáhu. ¹⁰ Te mee-ni sá văha cadá-yu, chi ducaⁿ tàú-xi cada nchaa ñáyu dihí ndécú ichi Yá Ndiöxí. ¹¹ Te òré tàcá-yu núú dácuahá-yu tnúhu Yá Ndiöxí, te cue ñáyu dihí-áⁿ na nàhi dacuahá-yu tnúhu-gá, te cadá-yu nchaa nacuáa cáháⁿ cue téé dácuaaha ñaha xii-yu tnúhu-gá. ¹² Te yúhú cächí-í sá vă cúú dácuaaha ñáyu dihí cue téé, te ni vă cúú tàxi tnuní ñáhă-yu xii-güedé chi cunduú tnàví-ni yuhú-yu cundedóho-yu. ¹³ Te ducaⁿ xini ñuhu-xi cadá-yu, chi Yá Ndiöxí ní cadúha-gá díhna-gá té Àdán te dätñuní ní cadúha-gá tá Èvá. ¹⁴ Te ñá díú mèe té Àdán ní dándahú ñáhá sácuihná xii-dé, chi tá Èvá ní dándahú-xi, te ñá túú ní quide váha-xi núú Yá Ndiöxí sá dúcáⁿ ñí sándáá iní-xi tnúhu ní cáháⁿ sácuihná-áⁿ. ¹⁵ Dico ñáyu dihí ní nduu

táhŭ-yu sá cóó dēhe-yu, te naníhí tǎhú-yu te núu vá dáñá ndèe-yu canchicúⁿ nihnú-yu ichi Yá Ndiöxí, te cundecu yiñuhú-yu núú-gǎ, te cuu iní-yu nchaa tnàha ñáyu-yu, te cadá-yu nchaa nacuáa tàú-xi cunduú cundecú-yu.

3

Nacuáa tàú cue téé yindaha ñaha xii ñáyu ndècu ichi Yá Ndiöxí cada-güedé

¹ Te òo ñⁿ tnúhu cáháⁿ ñáyu sá núu ñⁿ téé cuiní quindaha ñaha xii ñáyu ndècu ichi Yá Ndiöxí, te ñⁿ sá văha cuiní-dé cada-dé cächí-yu, te ndáá quée-xí tnúhu cáháⁿ-yu. ² Te yúhú cächí-í sá cuè téé ducaⁿ na quindaha ñaha xii ñáyu te xini ñuhu-xi cuu-güedé cue téé quide ndáá cuendá sá vă cáháⁿ ñáyu cuendá-güedé sá ñà túú quide ndáá-güedé. Te na cùu-güedé cue téé ndèca ñⁿ caa-ni ñadihí, te na cùu-güedé cue téé ñá túú quide cutexínu ndècu, te na cùu-güedé cue téé quide nchaa nacuáa tàú-xi cunduú, te na cùu-güedé cue téé sáñaha núu vehe ndetatú nchaa ñáyu ñuhu ichi, te na cùu-güedé cue téé dānehé ñáhá văha xii ñáyu tnúhu Yá Ndiöxí. ³ Te vá cúú-güedé cue téé quihu, te ni vă cúú-güedé cue téé ndücu pletú, te ni vă cúú-güedé cue téé dicó-ni ducaⁿ nihí díhúⁿ, te ni vă cúú-güedé cue téé sàni iní nàá, te ni vă cúú-güedé cue téé ñuhu iní mee-ni díhúⁿ. Chi na cùu-güedé cue téé váha iní-xi te cunduú cáhnu

iní-güedé. ⁴ Te na cùu-güedé cue tée ío váha sànu ichi ñadihí-xi ndihí landú-xi, te na cùu-güedé cue tée quide nacuáa sàndáá iní ñáhá landú-xi cuendá canehe-güexi sá yíñuhu núu-güedé. ⁵ Chi núu cùu-güedé cue tée ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiu ndècu ichi Yá Ndiöxí. ⁶ Te vá cúú-güedé cue tée íchí ní sàndáá iní-xi tnúhu Yá Ndiöxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácúihná. ⁷ Te xìni ñuhu-xi cuu-güedé cue tée càháⁿ váha ñáyiu cuendá-xi, cuéi ñá díú ñáyiu ndècu ichi Yá Ndiöxí cuendá sá vǎ cuátnùhu ñaha ñáyiu xii-güedé, chi núu ñáhá te cudana te sácúihná quesaha-xi tàxi tnuní ñáhá-xí xii-güedé.

Cue tée chindee ñaha xii cue tée yindaha ñaha xii ñáyiu ndècu ichi Yá Ndiöxí

⁸ Te tnàhá cue tée chindee ñaha xii cue tée yindaha ñaha xii ñáyiu ndècu ichi Yá Ndiöxí xíni ñuhu-xi cuu-güedé cue tée quide nchaa nacuáa tàú-xi cunduu, te vá cúú-güedé cue tée càchí sá càháⁿ ndáá te ñá ndáá, te ní vǎ cúú-güedé cue tée quihu, te ní vǎ cúú-güedé cue tée sàni iní-xi dicó-ni ducaⁿ níhí dǐhúⁿ. ⁹ Te xìni ñuhu-xi cuu-güedé cue tée ñá túú dàña ndeé sàndáá iní tnúhu Yá Ndiöxí, te na cùu-güedé cue tée ío váha cùu iní-xi cuendá nchaa sá váha quide-güedé. ¹⁰ Te xìni ñuhu-xi coto ndeé ñáhá

xii-güedé te núu cùu-güedé cue tée quide váha, te núu cùu-güedé cue tée quide váha ña te cuu chindee-güedé cue tée yindaha ñaha xii ñáyiu ndècu ichi Yá Ndiöxí. ¹¹ Te tnàhá tucu nchaa ñáyiu dǐhí ná càdá-yu nchaa nacuáa tàú-xi cunduu, te vá cùndùu yiti yuhú-yu, te ní vǎ cúú-yu ñáyiu quide cutexínu ndècu, te na cùu-yu ñáyiu ío váha quide ndáá. ¹² Te nchaa cue tée chindee ñaha xii cue tée yindaha ñaha xii ñáyiu ndècu ichi Yá Ndiöxí, xìni ñuhu-xi cuu-güedé cue tée ndècu ìⁿ caa-ni ñadihí-xi, te na cùu-güedé cue tée sànu ichi váha ñadihí-xi ndihí landú-xi. ¹³ Te núu na càdá ndáá-güedé chindee-güedé cue tée yindaha ñaha xii ñáyiu ndècu ichi Yá Ndiöxí, te canehé-yu sá yíñuhu núu-güedé, te ducaⁿ te vá cúú càháⁿ núu-güedé càháⁿ-güedé núu ñáyiu tnúhu Xitohó Jesu-ristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuèní-í ndǐhi-ni quixi coto ñaha-í xii-n dico dǐhna-gá cǎdǔha-í tutú-a daquixi-í ndaha-n ¹⁵ chi na cuáháⁿ cuyaa-í. Te xíaⁿ núu càdúha-í tutú-a daquixi-í ndaha-n cuendá cutnùní iní-n ñasa cada-n cùndecu-n ndihí nchaa ñáyiu ndècu ichi Yá Ndiöxí. Te ñáyiu-áⁿ cúú-yu dàtná ìⁿ vehe cùu cuendá Yá Ndiöxí Yáá ndécú nchaa nduu nchaa quíú, chi ndècu ndihí ñaha-gá xii-yu, te cùu-yu ñáyiu càháⁿ váha cuendá tnúhu-gá. ¹⁶ Te

cùtnuní ndáá iní-ó sǎ ío cǎhnu cuu tnúhu cǎháⁿ Xítóhó Jesucristú, tnúhu sǎ cǎháⁿ nǎcuáa ndúu ichi ndecu-o, te duha cǎháⁿ tnúhu-áⁿ:

Te ní quixi Yá cúu Ndiöxí ñuyú-a ní cuu-gá ñⁿ ñáyiu,

te Espíritú Yǎ Ndiöxí ní cǎháⁿ ndáá-xi sǎ cúu-gǎ ñⁿ Yaá ío váha quide ndáá,

te cue espíritú xínú cuèchi núú Yǎ Ndiöxí ní xiní ndáá-xi nchaa nǎcuáa ní quide Yaá ní quixi ñuyú-a.

Te ní xité nuu tnúhu-gǎ ñihí ñuyú-a,

te ndèni ní cuu ní ngüíta-yu sǎndáá iní ñáhǎ-yu xii-gǎ,

te mee-gǎ cuándaa-gǎ andiu. Duha cǎchí tnúhu-áⁿ.

4

Ñáyiu daña ñihnu vá quíndáa-gǎ iní-yu Yá Ndiöxí

¹ Te Espíritú Yǎ Ndiöxí cǎháⁿ ndáá-xi sǎ sǎá nduu dáña ñihnu dava ñáyiu ndècu ichi-gǎ vá quíndáá iní ñáhǎ-gǎ-yu xii-gǎ, te ducaⁿ chi cue espíritú cúndihí yucu ñávǎha dandáhú ñáhǎ-xí xii-yu, te mee-nǎ nchaa tnúhu cǎháⁿ nchaa ñáyiu cúndihí nchaa espíritú-áⁿ cuhuⁿ iní-yu. ² Te nchaa ñáyiu ducaⁿ cúndihí cue espíritú cúndihí yucu ñávǎha-áⁿ cúu-yu ñáyiu ío dándahú méé-xí chi cǎchí-yu sǎ cǎháⁿ ndáá-yu te ñá ndáá, te ñá túú tnáhí-gǎ ná quidé-xí iní-yu cuéndá nchaa sǎ cuéhé sǎ dúhá quidé-yu. ³ Te ñáyiu-áⁿ

quesáhǎ-yu sǎ vǎ cúu cǎndeca tnaha ñáyiu, te ní vǎ cúu cǎxí-yu dava núú sǎ xíní-yu caxí-yu, dico Yá Ndiöxí ní cadúha-gǎ nchaa sǎ nchító-ó cuéndá caxi-o, te cuíní-gǎ sǎ ncháá nchòo ñáyiu sǎndáá iní tnúhu-gǎ ndacáⁿ táhú-ó núú-gǎ òré caxi-o. ⁴ Te nchaa sǎ ní cadúha Yá Ndiöxí cúu-xí sǎ vǎha te vá dáquèe tǎhú-ó, te xíní ñuhú-xi ndacáⁿ táhú-ó núú-gǎ cuéndá nchaa xǎⁿ. ⁵ Te Yá Ndiöxí cǎchí-gǎ sǎ méé-gǎ quidé-gǎ cúu-xí sǎ vǎha sǎ cúu-xí-ó te núu na ndácáⁿ táhú-ó núú-gǎ.

Tée quide ndáá xínú cuèchi núú Xítóhó Jesucristú

⁶ Te núu na dàcuaha-n ñáyiu ndècu ndihí-o ichi Xítóhó Jesucristú nchaa nǎcuáa cǎháⁿ-í-a ña, te cuu-n ñⁿ téé quide ndáá xínú cuèchi núú-gǎ, te nducu ndè-ni-n dacuaha-n tnúhu Yá Ndiöxí sǎ sǎndáá iní-n, te canchicúⁿ ñihnu-ni-n cǎda-n nchaa nacuáa cǎháⁿ-gǎ, te núu ducaⁿ nǎ cada-n, te níhí ndéé-n cùndecu-n ichi-gǎ. ⁷ Te vá cǎdá cuéndá-n nchaa cuéndú cuéhé cuéndú duha cǎháⁿ ñáyiu, ndihí nchaa dava-gǎ cuéndú sǎ ñà túú nándihí cuéndá sǎ ñà túú nǎ cumáni-n cùndecu-n núú Yá Ndiöxí. ⁸ Te núu ñⁿ chùⁿ cada-o te nǎcaá luha yiqui-o te nándihí-xi luha, dico ío-gǎ nándihí-xi te núu cada-o sǎ cùndècu yíñuhu-o núú Yá Ndiöxí. Te núu ducaⁿ na cǎda-o te cùu-xi ñⁿ sǎ vǎha sǎ cúu-xí-ó vǐtna, te ní caa ní quíhíⁿ ducaⁿ cùu-xi ñⁿ sǎ vǎha sǎ cúu-xí-ó. ⁹ Te xíní ñuhú-xi sǎ

ncháá-ndó quíndáá iní-ndó ncháa tnúhu cáháⁿ-í-a chi cùu-xi tnúhu ndáá. ¹⁰ Te vitna ío ndúcu ndee-o quide-o chiúⁿ Yá Ndiöxí Yaá ndécú ncháa nduu ncháa quiú te quide ndee iní-ó cuendá ncháa sá quidé ñaha ñáyiú xii-o, chi sándáá iní-ó sá díú-gǎ chindèe ñaha-gǎ xii-o. Te ncháa ñáyiú cùndahú iní ñáhá-gǎ te chindee ñaha-gǎ xii-yu, dico ñáyiú sándáá iní ñáhá xii-gǎ ío-gǎ cùnùú-yu chindee ñaha-gǎ xii-yu, chi dàcácu nihnu ñaha-gǎ núú ùhú núú ndáhú.

¹¹ Te ncháa tnúhu-án cùñaha-n xii-yu, te cáháⁿ-n dõho-yu sá ná càdá-yu ncháa nàcuáa cáháⁿ-xi. ¹² Te ío cada váha-n cùndecu-n cuendá sá vǎ yõ daquèe tíhú ñáhá xii-n cuendá sá cúú-n tée cuechi, te ío váha cada-n ncháa sá tǎu-n càda-n cuendá ducaⁿ cànchicúⁿ nihnu ncháa ñáyiú ndècu ichi Yá Ndiöxí, te vii vii cáháⁿ ndihí-n-yu, te cuu iní-n-yu, te ío quíndáá iní-n Yá Ndiöxí, te mee-ni sǎ vǎha caní iní-n, te ducaⁿ càda-n cuendá canchicúⁿ nihnú-yu. ¹³ Te nini cùyaa-í quixi-í, te ío ndúcu ndèe-n cáháⁿ ndodo-n tnúhu Yá Ndiöxí núú-yu, te dacuàhá-n-yu nàcuáa cáháⁿ tnúhu-gǎ, te cáháⁿ-n dõho-yu nàcuáa cuu vii cuu váha iní-yu cundecú-yu ichi Yá Ndiöxí. ¹⁴ Te vǎ dáñá ndèe-n càda-n nàcuáa ndúu táhú ní taxi Yá Ndiöxí ní ngúndecu ndihí-n cùtnáhá ní sacáⁿ ndodo cue tée yìndaha ñaha xii ñáyiú ndècu ichi Yá Ndiöxí ndaha-güedé díquí-n, te ní

cachí tnúhu-güedé sá dúcáⁿ ní cuiní Yá Ndiöxí cunduu.

¹⁵ Te ní yùhu ní iní-n càda-n ncháa nàcuáa cáháⁿ-í-a cuendá sá ná quini ñáyiú sá ío-gǎ váha ta quide-n cuáháⁿ. ¹⁶ Te ío váha cundehe-n ncháa nàcuáa quide-n, ndihí ncháa nàcuáa dānehé-n-yu, te vǎ dáñá ndèe-n dùcaⁿ cada-n. Te núu ducaⁿ na càda-n te nduu táhú-n cùndecu váha-n núú Yá Ndiöxí ní caa ní quihíⁿ ndihí ncháa ñáyiú na tédóho ncháa tnúhu cáháⁿ-n.

5

Nàcuáa tàú-xi cada-o cùndecu-o ndihí ñáyiú sándáá iní tnúhu Yá Ndiöxí

¹ Te vǎ ténáa-n ncháa cue tée cùu sacuéhé chí vii vii cáháⁿ-n dõho-güedé, te cada iní-n sǎ dàtná tǎtá-n cùu-güedé, te díu-ni ducaⁿ vii vii cáháⁿ-n dõho ncháa cue tée cuechi, te cada iní-n sǎ dàtná cue ñani-n cùu-güedé. ² Te díu-ni ducaⁿ vii vii cáháⁿ tucu-n dõho ncháa ñáyiú dihí ñáyiú cùu sacuéhé, te cada iní-n sǎ dàtná nǎná-n cùú-yu, te díu-ni ducaⁿ vii vii cáháⁿ tucu-n dõho ncháa ñáyiú dihí ñáyiú cuechi, te cada iní-n sǎ dàtná cue cúha-n cùú-yu, te ío cuu váha iní-n òré ducaⁿ cáháⁿ-n dõho ncháa ñáyiú cuechi-ǎⁿ.

³ Te canehe-n sǎ yíñùhu núú ñáyiú dihí ní quendóo quèé, te chindèe-n-yu núu ndáhú-yu. ⁴ Te núu ñⁿ ñaha quèé ndécú cuè déhe-aⁿ àdi cue déhe ñani-aⁿ, te ío xìni ñuhu-xi cada-güexi ncháa nàcuáa tàú-xi cunduu núú-aⁿ chí ducaⁿ cuiní

Yă Ndiõxí cada-güexi. Te núu ducaⁿ na càda-güexi te nànchocáva-güexi quìde-güexi sá vâha sá cúú-xí ñăyiu ní dâcuéhnú ñàha xii-güexi. Te núu ducaⁿ na càda-güexi te quìde váha-güexi te ío nduu vétú iní Yă Ndiõxí. ⁵ Te ñăyiu quèé ñăyiu ndàhú ndécú ìchi Yá Ndiõxí sàndáá iní-yu sá díú-gă chindèe ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihi ñàhá-yu xii-gá. ⁶ Te nchaa ñăyiu quèé cúdí iní quidé nchaa sá cuèhé sá dúhá cúú-yu dàtná ñăyiu ní xíhí cuèi ndècu vívũ-yu. ⁷ Te cúñaha-n xii nchaa ñăyiu sá ná cádá-yu nchaa tnúhu càháⁿ-í-a cuendá sá ñà túú nâ cumáni-yu cundecú-yu, te ducaⁿ vâ yõ cáháⁿ cuèhé cuendá-yu. ⁸ Te ío xini ñuhu-xi chindeé-yu cue tnàha ñăyiu-yu, dico ío-gá xini ñuhu-xi chindeé-yu cue ñăyiu cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gă sàndáá iní-yu cadá-yu nàcuáa càháⁿ Yă Ndiõxí. Te sá dúcáⁿ ná càdá-yu te vihi-gá quidè-yu dâcúúxí ñăyiu ndècu ìchi cuehé ìchi duha.

⁹ Te chido tnùnì-n mèe-ni ñăyiu quèé ñăyiu sa ndècu únídico cuíá-xi àdi vihi-gá cuendá ñăyiu-áⁿ cadá-yu nchaa nàcuáa cuíní Yă Ndiõxí núu nchaa ñăyiu ndècu ìchi-gá, te ñăyiu-áⁿ xini ñuhu-xi cuú-yu mee-ni ñăyiu ní quide ndáá ní xíndecu ndihi yii-xi. ¹⁰ Te na cúú-yu ñăyiu quèé quidé vâha cùdiu núu

nchaa ñăyiu, te na cúú-yu ñăyiu quèé xini canu ìchi váha cue landú-xi, te na cúú-yu ñăyiu sãñaha nùu vehe ndetatú cue ñăyiu ñùhu ìchi, te na cúú-yu ñăyiu ndècu túha quide nani chiúⁿ cuendá cue ñăyiu ndècu ìchi Yá Ndiõxí, te na cúú-yu ñăyiu chindee nchaa ñăyiu ndècu ndihi tnúndòho tnúhu ndàhú, te na cúú-yu ñăyiu ñá túú dàña ndeé quidé nchaa núu sã vâha.

¹¹ Te vá chídó tnùnì-n ñăyiu quèé ñăyiu ñá túú ndècu únídico cuíá-xi cada chiúⁿ Yá Ndiõxí, chi núu cuechi-gă-yu ña, te vá cundáá-yu cadá-yu chiúⁿ-gá, chi quesàhá-yu natnándaha tucú-yu. ¹² Te sá cuendá xíáⁿ te nacháhu-yu núu Yă Ndiõxí, chi vá cádá-gă-yu nàcuáa ní cuu tnúhu cadá-yu ni cùu. ¹³ Te ngúita-yu cani iní-yu quíhíⁿ-yu ndi vehe ndi vehe caca nihní-yu, te nchaa ñăyiu ducaⁿ quide ío cùu cuhdú-yu, te cùyiti yuhú-yu, te ndèni ní cuu cuáháⁿ-yu chinee díquí-yu vehe tnàha ñăyiu-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñà túú nàndíhi. ¹⁴ Núu xíáⁿ cuíní-í sá ncháá ñăyiu quèé ñăyiu cuechi na nàtnándaha tucú-yu cuendá cuú-yu náná, te ducaⁿ càdá-yu nchaa sá xini ñuhu-xi cadá-yu vehé-yu, te núu ducaⁿ na càdá-yu, te nchaa ñăyiu cùu úhú iní ñàhá xii-o vá nihí-gă-yu tnúhu cáháⁿ cuèhé-yu cuendá tnúhu Yá

Ndiöxí. ¹⁵ Te dava ñáyiú quèé ndécú ìchi Yá Ndiöxí ní cùu ní dǎñǎ-yu te ní tñi-yu tñuhu càháⁿ sácúihná.

¹⁶ Te núu dava ñáyiú ndècu ìchi Yá Ndiöxí ndécú ndìhí-yu ìⁿ ñaha quèé cúú ndì meé-yu ña, te tàú-yu chindee ñáhá-yu xii-aⁿ cuèndá sá vǎ ïo chi chiúⁿ-aⁿ nchaa ñáyiú ndècu ìchi Yá Ndiöxí, te ducaⁿ te nchaa ñáyiú ndècu ìchi-gá-áⁿ ñhí ndéé-gǎ-yu chindéé-yu dava-gá ñáyiú quèé ñá túú vèdana ndècu ndìhi.

¹⁷ Te nchaa cue téé ïo váha quide yindaha ñaha xii ñáyiú ndècu ìchi Yá Ndiöxí ïo xini ñuhu-xi canehé sá yíhí ñuhu núú-güedé, te chindee ñaha xii-güedé. Te uuⁿ-gá tàú ñáyiú ducaⁿ càdá-yu sá cúú-xí nchàa cue téé ñi yùhu ñi ìní càháⁿ tñuhu-gá. ¹⁸ Te núú tütú Yǎ Ndiöxí càchí-xi: “Vá chíhí-ndó ñunu yuhu ndicutu oré dǎnchíhí-dí triú”, duha càchí-xi. Te càchí tucu-xi ìngá xichi: “Ìⁿ téé quide chiuⁿ dacuití tàú-xi sá cúhúⁿ yǎhu-dé”, duha càchí-xi núú tütú-gá.

¹⁹ Te núú ïo ñáyiú véxi sàcáⁿ cuèchi núú-n cuèndá ìⁿ téé yindaha ñaha xii ñáyiú ndècu ìchi Yá Ndiöxí ñá, te cada cuèndá-n tñuhu càháⁿ-yu te núú véxi-yu ndìhi úú àdi úní ñáyiú càháⁿ ndáá nàcuáa ní cuu, áⁿ núu ñáhá te vá càdá cuèndá-n tñuhu càháⁿ-yu. ²⁰ Te núú cue téé yindaha ñaha xii ñáyiú-áⁿ ndécú cuèchi-güedé, te càháⁿ-n dǎho-güedé núú nchàa ñáyiú ndècu ìchi-gá cuèndá sá dává-gǎ-yu vá

cúyíⁿ-yu ducaⁿ càdá-yu. ²¹ Te Yá Ndiöxí ndìhi Xítóhó Jesucristú ñáhá-gǎ ndìhi cue espíritú xínú cuèchi núú-gǎ sá yǎhú càháⁿ-í dǎho-n sǎ càdá-n nchàa nacuáa càháⁿ-í-a, te ìⁿ-ní càháⁿ ndìhi-n cuè téé xini tñáhá ndìhi-n, ndìhi cue téé ñá túú xini tñáhá ndìhi-n. ²² Te vá ïo cundihí ìni-n tàxi ndecu-n ìⁿ téé quindaha ñaha xii ñáyiú, chi díhna-gá cada cuèndá-n te núú cùu-dé ìⁿ téé quide ndáá, chi núú cuèndá-ni na tàxi ndecu-n-dé te vá càdá ndáá-dé, te yòhó ndaa díquí-n cuèndá nchaa sá cuèhé sá dúhá càda-dé, te ïo coto-n mèe-n vá càdá-n ñi ìⁿ sá cuèhé sá dúhá.

²³ Te ducaⁿ ïo mee-ni cùhú xiti-n te vá cóhó-n mèe-ni ndute, chi tñàhà luha vinú ndéhé yoho yàha stilé coho-n cuèndá cada tátna-xi.

²⁴ Te dava ñáyiú cùtnuní nchaa sá cuèhé sá dúhá quidé-yu, te cùtnuní tucu sá náchǎhu-yu na sàá nduu, te dava tucu-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuèchi-yu te dàvá-áⁿ cutnùní. ²⁵ Te ducaⁿ sǎtnahá-xi cùu nchaa sá váha quide dává-yu chi cùtnuní, te cuèi ñá túú cùtnuní òré-ni dico dacuití sǎ sàá nduu cùtnuní.

6

¹ Te nchaa ñáyiú ndècu tnuú quidé chiúⁿ ndìhi ìⁿ patróoⁿ xini ñuhu-xi ïo canehé-yu sá yíñuhu núú-dé cuèndá sá vǎ càháⁿ cuèhé ñáyiú cuèndá Yǎ Ndiöxí, te ñi vǎ càháⁿ cuèhé-yu cuèndá tñuhu-gá.

2 Te núu pàtróónⁿ cue ñáyiú xínu cuechi-án sàndáá iní-dé Yá Ndiöxí, te ñá díú sá dúcáⁿ sàndáá iní-dé Yá Ndiöxí te vá cánèhé-yu sá yíñùhu núú-dě, chi uuⁿ-gá tàú-yu cada váha-yu cunu cuèchí-yu núú-dě, te ducaⁿ na càdá-yu chi xínu cuechí-yu núú tē sàndáá iní ndihí-yu tnúhu Yá Ndiöxí. Te vá dáñá ndèé-n dānehé-n-yu nchaa nācuáa càháⁿ-í-a, te cúñaha-n xí-yu sá ná càdá-yu.

Nduu vétú iní-ó cùndecu-o

3 Te ío cue tēe ñá túú tñi-güedé nācuáa càháⁿ tnúhu Xítohó Jesucristú, te cue tēe-án cāchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nācuáa cuáháⁿ tnúhu-gá. Te nchaa tnúhu Xítohó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. 4 Te nchaa cue tēe ducaⁿ xíquide quide cahnu-güedé mēe-güedé dico ñá túú vèdana xini-güedé, te cue tēe-án ñà túú ndècu váha iní-güedé chi nāndi tnúhu sá ñà túú nāndihí cuiní-güedé cútnaha-güedé. Te ngüita-güedé cúu cuèdú iní tnáhá-güedé, te nā ndihí tnáhá-güedé, te xicuèhé tnáhá-güedé, te ñá túú-gá cúu váha iní núu tnáhá-güedé. 5 Te cue tēe-án mee-ni nāá-güedé chi ñá túú sàni váha iní-güedé, te ni ñà túú xini-güedé nācuáa cuáháⁿ tnúhu ndáá tnúhu Yá Ndiöxí, te cāchí-güedé sá ío váha cundecu-güedé ichi-gá chi sàni iní-güedé sá ío vāi díhúⁿ ñihí-güedé cundecu

ndihí-güedé. Te yúhú càháⁿ-í dóho-n sá vā ñihí tnáhá-n ndihí nchaa cue tēe ducaⁿ xíquide. 6 Te ndáá sá ichi Yá Ndiöxí cúu-xíⁿ ichi sá ío váha cundecu-o, dico xini ñuhu-xi nduu vétú iní-ó nācuáa ndècu-o ñuyíú-a. 7 Te nchoo cuè ñáyiú chi ñá túú vèdana nèhe-o ní quexío ñuyíú-a, te díu-ni ducaⁿ ñà túú vèdana canehe-o quñiⁿ òré ná cúu-ó. 8 Te ío xini ñuhu-xi nduu vétú iní-ó te núu ndècu-ni sá cūnchìto-o ndihí dóo cuihnu-o. 9 Te ío ñáyiú ío cuiní-yu cuu cuicá-yu, te ñáyiú-án dácàhu iní ñáhá yùcu ñávāha xii-yu cadá-yu nāndi sá cuèhé sá dúhá, te nāndi-gá nchaa sá cuèhé sá dúhá càhu iní-yu quidé-yu, te nchaa sá quidé-yu-án ñà túú vèdana nāndihí-xi chi uuⁿ-gá ndádá ndàhú ñáhá-xí xii-yu, te dàcuíta ñihnu ñaha-xi. 10 Chi nchaa ñáyiú ñuhu iní mee-ni díhúⁿ, te xíáⁿ quidé-xí ngüita-yu sàni iní-yu cadá-yu nāndi sá cuèhé sá dúhá. Te ío ñáyiú ndècu ichi Yá Ndiöxí te sá tnúhu ducaⁿ ñuhu iní mee-ni díhúⁿ ñi dáñá-yu ñá túú-gá sàndáá iní ñáhā-yu xii-gá, te vitna ñá túú tnáhí-gá ndécú váha iní-yu.

Cahni iní-ó càda-o nchaa nācuáa càháⁿ Yá Ndiöxí chi sàndáá iní-ó-gá

11 Te yòhó tēe quide chiuⁿ Yá Ndiöxí xini ñuhu-xi vá cadá-n dàtná quidé nchaa ñáyiú ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nācuáa nduu vétú iní Yá Ndiöxí, te ío quindáá

iní-n-gã, te cuu iní-n nchàa tnahà ñáyi-u-n, te cada càhnu iní-n nchàa sá ná yãha-n cùndecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuíní Yã Ndiöxí chi sàndáá iní-n-gã, te ío cuhuⁿ iní-n sá cùndecu-n ndihí Yá Ndiöxí ni caa ni quíhíⁿ, chi ñu cuendá tnahí-áⁿ ni cáháⁿ ñáhá-gã xii-n, te ní cáháⁿ ndáá-n núú vãi ñáyi-u sá ío váha sàndáá iní-n-gã. ¹³ Te Yá Ndiöxí Yaá quidé nchìto nchaandi túhú sá ío ñuyúú nàha-gá sá càháⁿ-í dóho-n vítna, te ñu-ni ducaⁿ nàha tucu Xítohó Jesucristú Yaá ní cáháⁿ tnúhu ndáá núú tẽ Pilatú ¹⁴ sá quindáá iní-n càda-n nchaa nacuáa càháⁿ Yã Ndiöxí, te nchaa tnúhu càháⁿ-gã cada-n nàcuáa vá dáquèe tihú ñáhá ñáyi-u xii-n, te ducaⁿ-ni càda-n ndéé ná sáá nduu quixi tucu Xítohó Jesucristú. ¹⁵ Te quixi tucu-gá chi ducaⁿ ní cachí Yã Ndiöxí cunduu, te mee Yã Ndiöxí náhá-gã ná nduu quixi tucu Xítohó Jesucristú. Te Yá Ndiöxí ío váha cùu iní-gá te ñⁿdì díí-ni-gã ío-gá cùnùu-gá dàcúúxí cuè téé tàxi tnuní ñⁿ ñⁿ nàcióⁿ ndihí nchaa dava-gá cue téé cùnùu, chi tàxi tnuní ñáhá-gã xii-güedé, te nchaa ñáyi-u ndècu ñuyúú-a tàxi tnuní-gá. ¹⁶ Te ñu-gá cúú-gã Yaá ndécú nchàa nduu nchaa quíú, te ío càhnu cuu-gá chi dàtná dáyehé nchícanhii dáyehé-xi núú ndécú-gã, te vá yõo ñⁿ cùyí dayatni núú ndécú-gã, te ni ñã túú ni ñⁿ ñáyi-u xíní ñáhá xii-gá te ni vá ndácü-yu quíní ñáhã-yu

xii-gã. Te ío na cànehe nchaa ñáyi-u sá yíñùhu núú-gã ni caa ni quíhíⁿ, te ducaⁿ ío na tàxi tnuní-gá ni caa ni quíhíⁿ. Te ducaⁿ na cùnduu.

¹⁷ Te cáháⁿ-n dóho nchaa ñáyi-u cuica ndècu ndihí nchaa sá ío ñuyúú-a cuendá sá vã cadá càhnú-yu mèé-yu, te duuⁿ duuⁿ vá cùndéé iní-yu ni ñⁿ sá ndécú ndihí-yu chi vá cúdĩ-xi, te cáháⁿ-n dóho-yu sá ná cùndéé iní-yu Yá Ndiöxí chi ñu-gá cúú-gã Yaá ndécú nchàa nduu nchaa quíú, te chitu núú ndáhá tàxi-gá nchaa sá xíní ñùhu-o, chi cuíní-gá sá ío cuu váha iní-ó cùndecu-o. ¹⁸ Te cáháⁿ tucu-n dóho-yu sá ná cadá-yu mee-ni sã váha, te cuendá nchaa sá váha cadá-yu-áⁿ te cuú-yu ñⁿ ñáyi-u cuica sã cúú-xí Yã Ndiöxí, te na cùndecu túha-yu chindéé-yu cue ñáyi-u ndàhú cuañáhã-yu sá xíní ñùhú-yu. ¹⁹ Te núú ducaⁿ na cadá-yu te Yá Ndiöxí cuañaha-gã sá ndúú tãhü-yu na sáá nduu, te ngùndecu váha-yu ndihí-gá ni caa ni quíhíⁿ.

Tnúhu ndéé núú ní ndihí-ná

²⁰ Te yòhó té Timùteú càháⁿ-í dóho-n sã ío cada cuendá-n vã dáma tnúhu ní taxi Yá Ndiöxí danèhé-n ñáyi-u, te vá cadá cuendá-n nchàa cuendú cuèhé cuendú duha ío ñuyúú-a chi ñã túú nàndíhi-xi, te ni vã cadá cuendá-n nchàa tnúhu xitnàha ñáyi-u càchí sá xicá nàha tnúhu cue téé túha chi ñã díú ñⁿ tnúhu ndáá cúú-xí. ²¹ Te ío ñáyi-u ñã túú-gã sàndáá iní-yu tnúhu Yá Ndiöxí, chi ní quide

cuendá-yu nchaa tnúhu xìca
naha ñáyi-áⁿ.

Te Yá Ndiǒxí ná chìndee
chítúu ñaha-gǎ xii-n. Te ducaⁿ
na cùnduu. Te ío cada ndee
ìní-nǎ vitna.

TUTÚ CÚÚ ÛÚ NÍ CADÚHA TÉ PĀBLÚ QUIHIⁿ NDAHÁ TÉ TIMŪTEÚ

*Té Pāblú cáduha-dé tutú
quíhiⁿ ndaha té Timūteú*

¹ Yúhú té Pāblú ní tendaha ñaha Yá Ndiòxí cáháⁿ-í tnúhu Xítohó Jesucrístú núú ñáyiú, chi ducaⁿ ní cachí Yá Ndiòxí cunduu. Te cáháⁿ-í dàtná ní cachí Yá Ndiòxí sá ncháá nchòò ñáyiú ndècu ndihi Xítohó Jesucrístú naníhí tǎhú-ó. ² Te yúhú té Pāblú cáduha-í tutú-a daquixi-í ndaha yòhó té Timūteú chi ío cùu iní ñàhà-í xii-n, te ðiu-í ní sanu ichi ñaha-í xii-n ichi Xítohó Jesucrístú, te xicáⁿ tǎhú-í núú Dütú Ndiòxí ndihi núú Xítohó Jesucrístú sá ío na chindee chitúu ñaha-gǎ xii-n, te cundàhú iní ñáhá-gǎ, te ducaⁿ ndì nduú-gǎ ná cádá te ío váha cuu iní-n cùndecu-n.

*Cáháⁿ váha-o cuèndá Xítohó
Jesucrístú*

³ Te cuèi nduu cuèi niú ducaⁿ-ni cáháⁿ ndihi-í Yá Ndiòxí cuèndá-n, te ndacáⁿ tǎhú-í núú-gǎ, te xìnu cuechi-í núú-gǎ dàtná ní quide cue ñani tǎhà-í ní xíndecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. ⁴ Te ío sàni iní-í naníhí tǎhà-ó cuèndá ío cudíi iní-í, chi ndàcu iní-í sá ío ní ndáhyú-n sǎ ndihú iní-n cùtnàhá ní quide ndee iní-í

tnáhá-ó. ⁵ Te nàha-í sá sàndáá ndisa iní-n Yá Ndiòxí dàtná ní ngúita díhna-gǎ xitná-n tǎ Lòidá ndihí nǎná-n tǎ Èunicé quidé-yu, te cùtnuní ndáá iní-í sá díú tǎhà-n ío váha sàndáá iní-n-gǎ.

⁶ Te xǎáⁿ dándàcu iní ñàhà-í xii-n cuèndá sá ío-gǎ nducu ndèe-n cada-n chiuⁿ ní nduu tǎhú-n núú Yá Ndiòxí cada-n, chi ní taxi-gǎ tnúhu ndee iní ní ngúndecu ndihi-n cùtnàhá ní sacáⁿ ndodo-í ndaha-í díquí-n sǎ díú chiuⁿ-gǎ cada-n. ⁷ Te Espíritú sá ní taxi Yá Ndiòxí ndécú ndihi-o ñá túú cùu-xi ñⁿ Espíritú sá cádá nàcuáa yùhú-ó, chi cùu-xi ñⁿ Espíritú sá táxí tnúhu ndee iní cada-o chiuⁿ-gǎ, te ðiu-xi quide cuu iní tǎhà-ó ñⁿ ñⁿ-o, te ðiu-ni tucu-xi quide cùtnuní iní-ó nàcuáa cada-o cùndecu-o. ⁸ Te xǎáⁿ núú vá cúcàháⁿ núú-n cáháⁿ váha-n cuèndá Xítohó Jesucrístú, te nì vǎ cúcàháⁿ núú-n sǎ dúhá yìhi-í vecaá sá cuèndá-gǎ, te xìni ñuhu-xi sá tǎhà-n ndòho-n sá cuèndá tnúhu-gǎ, te cundee iní-n ndòho-n, chi Yá Ndiòxí chindee ñaha-gǎ xii-n. ⁹ Te Yá Ndiòxí ní dácàcu nihnu ñaha-gǎ xii-o núú ùhú núú ndàhú, te ní cachí-gǎ sá cádá-ó ncháa nacuáa cuení méé-gǎ cunduu, te ducaⁿ ní quide-gǎ chi ducaⁿ ní sani iní méé-gǎ cunduu sá cádá váha ñaha-gǎ xii-o, te ñá díú sǎ ío váha quide-o ndecu-o ducaⁿ ni quide-gǎ. Te ndéé cùtnàhá vátá ngáva-gǎ ñuyíú ní cachí-gǎ sá cádá váha ñaha-gǎ xii nchaa nchoo ñáyiú ní ngúndecu ndihi Xítohó

Jesucristú vitna. ¹⁰ Te vitna cùtnuní iní-ó sã ïo váha quide ñaha-gá xii-o, chi ní quixi Xítohó Jesucristú ñuyíu-a ní dácacu nihnu ñaha-gã xii-o núú ùhú núú ndàhú, te Yaá-áⁿ ñí quide-gá cuendá sá vã cùú-gá-ó cùú dúcáⁿ-ó, chi ní cachí-gá sá cùndècu-o ñi caa ñi quíhíⁿ te núu na quindáá iní-ó tnúhu-gá.

¹¹ Te ní cachí-gá sá càháⁿ-í tnúhu-gá núú ñáyiú ñá túú cùu ñáyiú isràel te dacuàha váha-í-yu tnúhu-gá, te cuèi ndèni ní cuu ndècú-yu te quíhíⁿ-í càháⁿ-í tnúhu-gá núú-yu chi ducaⁿ ñí cachí-gá cunduu.

¹² Te cuendá xiáⁿ nãndi sá ndóhò-í vitna cuendá-gá, dico ñá túú cùcahaⁿ núú-í chi cùtnuní váha iní-í nàcuáa sãni iní Xítohó Jesucristú Yaá sãndáá iní-í, te yúhú ní dáñà-í mée-í núú ndáhá-gã, te cùtnuní ndáá iní-í sá cóto ñaha-gá xii-í ndéé ná sàá nduu nàcuaca ñaha-gá.

¹³ Te vá dáñá ndèé-n càda-n nchaa nacuáa càháⁿ tnúhu váha ní dánèhé ñáhà-í xii-n, te ío quindáá iní-n Yã Ndióxi, te nchaa-o nàcuáa ndècu-o ndihí Xítohó Jesucristú ío cuu iní tnáhá-ó ñíⁿ ñíⁿ-o. ¹⁴ Te cada cuendá váha-n sã vã dãma tnúhu Yã Ndióxi sá ñí taxi-gá ndécú ndihí-n, te Espíritú-gá sá ñí taxi-gá ndécú ndihí-o chindee ñaha-xi xii-n.

¹⁵ Te yòhó sa xini-n sã nchàa ñáyiú ndècu distritú Àsiá, ñáyiú ní sãndáá iní tnúhu Xítohó Jesucristú ní dáñá ñáhá-yu xii-í, te tnáhá té Fígeló ndihí té Hèrmógenés

ní dáñá ñàha-güedé xii-í. ¹⁶ Te xicáⁿ táhù-í núú Xítohó Jesucristú sá ná chindee-gá cue ñáyiú cùu ndi mee té Onésiforó, chi diu-dé ío vai xito ní quixi-dé ní quide cuendá ñáhá-dè xii-í, te ní taxi-dé tnúhu ndee iní, te ñá túú ní cùcahaⁿ núú-dè sá yíhí-í vecaá. ¹⁷ Te cùtnáhá ní xíndecu-dé ñúú Rómá ducaⁿ-ni ñí xóo nanducu ñàha-dé xii-í ndéé ndéé nanihí ñáhá-dè. ¹⁸ Te xicáⁿ táhú tùcu-í núú Xítohó Jesucristú sá ná cùndahú iní ñáhá-gã xii-dé nduu na sàá cundáá cuèchi nchaa ñáyiú. Te yòhó sa xini ndáá-n sã ïo ní chindee ñàha-dé xii-o cùtnáhá ní xíndecu-o ñúú Èfesú.

2

Tée quide ndáá xínú cuèchi núú Xítohó Jesucristú

¹ Te yòhó té cùu datná ñíⁿ déhe mee-í ío nducu ndèe-n cada-n nacuáa níhí ndéé-gã-n cùndecu-n ichi Xítohó Jesucristú chi diu-gá chindee ñàha-gá xii-n. ² Te nchaa tnúhu sá ñí dánèhé ñáhà-í xii-n ndihí nchaa dava-gá ñáyiú, xiáⁿ danèhé-n dàva-gá cue té quide ndáá cuendá danèhé-güedé dava-gá ñáyiú.

³ Te cahni iní-n ndòho-n cunu cuechi-n núú Xítohó Jesucristú datná cuini-n ndòho ñíⁿ sandadú sãhni iní-dé xínú cuèchi-dé. ⁴ Chi ñí ñíⁿ sandadú ñá túú ñágá sání iní-dé cada-dé òré xínú cuèchi-dé cuendá cudíu-dé núú tée tàxi tnuní ñáhá. ⁵ Te diu-ni ducaⁿ sãtnáhá-xi cùu tucu ñíⁿ tée dàdiquí, chi núu vá dàdiquí-dé nàcuáa tàu-xi

cunduu te vá ñihí-dé sá ndúú tãhú-dě. ⁶ Te núu ñⁿ tée xínu cuechi ío ndúcu ndee-dé quidé chiuⁿ-dé chíhí-dě tatá, te diu-dé tau-dé díhna-gá-dé níhí-dě sá cúhúⁿ yãhu-dé.

⁷ Te cani iní-n nchàa tnúhu cãháⁿ-í-a, te Xítohó Jesucristú chindee ñaha-gá xii-n te tecu tnùní-n nchàa.

⁸ Te ndacu iní-n sã Xítohó Jesucristú ní cuu-gá ñani tnáhá ndi Dàvií, te ní xihí-gá te ní ndoto-gá, te diu ducaⁿ ndúu tnúhu dãnehé-í ñáyiu.

⁹ Te ío dãndoho ñaha ñáyiu xii-í cuendá sá cãháⁿ-í tnúhu-gá, te quide ñahá-yu xii-í dàtná quidě-yu ñⁿ tée ní quide ñⁿ cuéchi cãhnu, chi ní chihi ñahá-yu vecaá xii-í, dico tnúhu Yá Ndiõxí chi vá ndácú-yu nganí-yu. ¹⁰ Te xíãⁿ núu cuëi nãndi cùu nchaa sá quidé ñahá-yu xii-í, dico quide cãhnu iní-í cuendá sá nãnhí tãhú tnáhá nchaa dava-gá ñáyiu cuini Yá Ndiõxí cundecu ndihi-gá, chi nchaa ñáyiu na tnáhá tnúhu ndihi Xítohó Jesucristú nduu tãhú-yu cundecú-yu ndihi-gá núú ío váha cãa ndecu-gá ni caa ni quíhíⁿ.

¹¹ Te xéhé cúú-xí ñⁿ tnúhu ndáá cuiti:

Nchoo cùu-o datná ñáyiu ní xihí ndihi Xítohó Jesucristú chi ñã túú-gã ndécú-ó ìchi cuehé ìchi duha,

te xíãⁿ núu cuëi na sãa nduu cùú-ó ñùyíú-a, dico diu-ni cundecu-o ndihi-gá.

¹² Te núu na cùndee iní-ó ndòho-o nãndi sá ndóhó-ó sã cuendá-gá,

te sãa nduu te cunuu-o ndihi-gá.

Te núu na cãháⁿ-ó sã ñã túú xini-ó-gã, te diu-ni ducaⁿ cũñaha-gã xii-o sã ñã túú xini ñãhá-gã ná sãa nduu cãda ndáá-gá cuéchi nchaa ñáyiu.

¹³ Te núu nchoo ñã túú quide ndáá-ó ndecu-o núú-gã ñã, dico mee-gã chi ío ndáá quidé-gã, chi Yá Ndiõxí nchaa sá sání iní-gá quidé-gã.

Tée quide nacuáa ndiúu vétú iní Yá Ndiõxí

¹⁴ Te dãndacu iní-n nchàa ñáyiu ndecu ndihi-o ìchi Xítohó Jesucristú nchaa tnúhu cãháⁿ-í-a, te cũñaha-n xii-yu sá Xítohó Jesucristú cuini-gá sã ñã túú-gã nãndi tnúhu cútnáhá-yu, chi nchaa tnúhu cãháⁿ-yu-áⁿ dácuíta nihnu-xi ñáyiu ndèdóho ñaha xii-yu, chi ñã túú vèdana nãndíhi nchaa tnúhu-áⁿ.

¹⁵ Te ío nducu ndèe-n cada ndáá-n cundecu-n núú Yá Ndiõxí, te cada-n chiuⁿ-gá nãcuáa nduu vétú iní-gá, te cãháⁿ ndáá-n tnúhu-gá, cuendá sá vã cúcãhaⁿ núú-n núú-gã.

¹⁶ Te vá cãdá cuendá-n nchàa tnúhu sã ñã túú vèdana nãndíhi cãháⁿ ñáyiu cuendá Yá Ndiõxí, chi nchaa ñáyiu cãháⁿ tnúhu-áⁿ ndihi nchaa ñáyiu sãcúndedóho ñaha xii-yu uuⁿ-gá quidé-yu nchaa sã cuèhé sã dúhá. ¹⁷ Te nchaa tnúhu-áⁿ cútenuu-xi dàtná quidé ñⁿ cuéhé sã ñãni ñaha xii ñáyiu xité nuu-xi nihí yiqui cũnú-yu. Te tnáhá té Himènéú ndihi té

Filetú càháⁿ-güedé tnúhu-áⁿ quidé-güedé dàtná quidé ñáiyu-áⁿ. ¹⁸ Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiöxí, chi càchí-güedé sá ncháá nchò ñáiyu ndècu ichi Yá Ndiöxí cúú-ó dàtná cue ñáiyu sa ní ndoto, dico na cùú ndisa-o te vá ndótó-gã-ó càchí-güedé. Te dava ñáiyu ní dáñ-á-yu sá sàndáá iní-yu tnúhu Yá Ndiöxí sá dúcáⁿ càháⁿ-güedé. ¹⁹ Te cuéi ducaⁿ quide davá-yu, dico Yá Ndiöxí ní taxi ndecu-gá cue ñáiyu ni yùhu ni iní ndécú ichi-gá, te cùtnuní sá ndécú ndìhi ñaha-gá xí-yu, chi ìⁿ xichi núú tütú-gá càchí-xi sá méé-gã xíní-gá cue ñáiyu cùu cuendá-gá. Te ingá tucu xichi núú tütú-gá càchí-xi sá ncháá ñáiyu sàndáá iní ñáhá xì Xítohó Jesucristú xíní ñùhu-xi sá vã cùndècu-gá-yu ichi cuèhé ichi duha.

²⁰ Te ñáiyu cuica chi ndècu ndìhi-yu vehé-yu cóhó sã ñí cuáha mee-ni dñhúⁿ cuááⁿ, ndìhi cóhó sã ñí cuáha mee-ni dñhúⁿ cuixíⁿ, te nchaa cóhó-áⁿ cúú-xí dàtná cue ñáiyu ñá túú nã cúmání núú Yá Ndiöxí. Te ndècu ndìhi tucú-yu cóhó sã ñí cuáha mee-ni ñùhu, ndìhi cóhó sã ñí cuáha mee-ni yùtnu, te nchaa cóhó-áⁿ cúú-xí dàtná cue ñáiyu ñá túú quide ndáá núú Yá Ndiöxí. ²¹ Te nchaa ñáiyu ío ndècu yiñuhu núú Yá Ndiöxí cúú-yu ñáiyu ñá túú ñìhi tñáhá ndìhi cue ñáiyu ñá túú quide ndáá núú-gã, te cue ñáiyu ndècu yiñuhu núú-gã-áⁿ ñà túú tñáhí

quée cáva-yu quidé-yu nchaa chiúⁿ tahu-gá.

²² Te ío cada cuendá-n vã cáda-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gã, te cuu iní-n ncháa tñaha ñáiyu-n, te cundecu nahi-n, chi ducaⁿ tàú-xi cada-n ndìhi nchaa dava-gã ñáiyu sa ní nduu ndoo ní nduu nine iní-xi ñáiyu càháⁿ ndìhi ñaha xì Yá Ndiöxí. ²³ Te vá cáda cuendá-n ñí ìⁿ tnúhu xítñaha ñáiyu chi ñá túú vèdana nàndìhi-xi, chi núu na càda cuendá-ó te dicó dánáá ñáhá-xí. ²⁴ Chi nchaa cue téé xínu cuechi núú Yá Ndiöxí xíní ñùhu-xi càháⁿ váha-güedé ndìhi nchaa ñáiyu, te danèhé ñáhá váha-güedé tnúhu-gá, te cunduu càhmu iní-güedé te vá nãá-güedé. ²⁵ Te vii cáháⁿ-güedé dóho nchaa ñáiyu sàá iní-xi, ñáiyu ñá túú tñáhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. ²⁶ Te ducaⁿ te cutnùní iní-yu sá sàcúihná cùnùu-xi taxi tnuní ñáhá-xí xí-yu, chi dàcahu iní ñáhá-xí xí-yu quidé-yu nchaa nàcuáa cùu iní-xi ni cùu.

3

Nàcuáa cada ñáiyu òré sa ta cùyatni sáá nduu quixi tucu Xítohó Jesucristú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítohó

Jesucristú, chi dàvá-áⁿ ïo cada úhú-xi. ² Chi ngúita ñáyiú cuhuⁿ iní-yu mee-ni sá cúú-xí mèe-yu, te cuhuⁿ iní-yu mee-ni dìhúⁿ, te ío cada càhnú-yu mèe-yu, te cunduu yíchí iní-yu, te cáháⁿ cuèhé-yu cuèndá Yá Ndiöxí, te vá quìndáá-gá iní-yu ni tãtä-yu ni nãnä-yu, te ni vã ndàcáⁿ táhú núú tnáhã-yu cuèndá nchaa sá vãha cada tnàhá-yu, te cadá-yu mee-ni sã ñà túú tnàhá iní Yá Ndiöxí. ³ Te vá cúú ìní tnáhá ndì meé-yu, te nàá-yu te vá cuánàá-yu, te tee tnàhá-yu cuéchi neñúú, te vá cuánàá-yu cadá-yu nchaa sá cuèhé sá dúhá sàni iní-yu, te ío cunduu cuihna ìní-yu, te vá tnàhá iní-yu nchaa sá vãha. ⁴ Te dayuhu cuãha cuèndá tnáhã-yu núú cuè téè cùchiuⁿ, te ío cunduu yìi iní-yu cadá-yu nãndi sá ñà túú vãha, te ío cada nínu-yu mèe-yu, te mee-ni nchàa sá cúdí^í iní-yu cadá-yu, te vá cúdí^í iní-yu nanducu ñihnú-yu Yá Ndiöxí. ⁵ Te quesàhá-yu sá tnàhá-yu ndècú-yu ichi Yá Ndiöxí dico vá cadã-yu nchaa nãcuáa càháⁿ-gá.

Te yúhú càchí tnúhu-í xii-n sã vã ñihí tnáhã-n ndihí nchaa ñáyiú ducaⁿ quide. ⁶ Te dava ñáyiú-áⁿ quíhíⁿ-yu dava vehe núú xíndecu ñáyiú, te ngúita-yu dandàhú-yu ñáyiú dìhí ñà túú xìní dana cuèndá Yá Ndiöxí, te ñáyiú dìhí-áⁿ cúú-yu ñáyiú ndècu vihi cuéchi-xi, chi ío cùdí^í ìní-yu quidé-yu nchaa nãni

sá cuèhé sá dúhá sàni iní-yu. ⁷ Te cuèi ío dàcuahá-yu, dico ñà túú cùtnuní iní-yu nãsa cuáháⁿ tnúhu ndáá tnúhu Yá Ndiöxí. ⁸ Te ñáyiú ducaⁿ dandàhú ñáhã xii cue ñáyiú dìhí-áⁿ ñà túú càháⁿ vãha-yu cuèndá tnúhu Yá Ndiöxí, chi quidé-yu dàtná ní quide ndíi Jãnés ndihí ndíi Jãmbrés chi cue ndíi-áⁿ ñà túú ní cùu vãha iní cue ndíi núú ndíi Moisés cuèndá tnúhu ní cáháⁿ ndíi. Te ñáyiú-áⁿ cúú-yu ñáyiú sàni iní mee ñine-ni nchaa sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñà ndáá sá sàndáá iní ñáhã-yu xii-gá. ⁹ Dico vá ndácú-gã-yu dandàhú-yu vãi ñáyiú, chi nchaa ñáyiú cutnùní iní-yu sá ïo ñi díquí-yu, te ñà túú càháⁿ ndáá-yu dàtná ní quide cue téè úú ñà túú ní tnàhá iní tnúhu ní cáháⁿ ndíi Moisés.

Té Pãblú dásàhú-dé té Timúteú

¹⁰ Te yòhó quidé-n nchàa nacuáa ní dánèhé ñáhã-í xii-n, te ní xìní-n nchàa nacuáa quide-í ndècú-í, te cùtnuní iní-n nãcuáa sàni iní-í ndècú-í ñuyíú-a, te xìní-n sã ïo sàndáá iní-í Yá Ndiöxí, te ío càhnu iní-í, te cùu iní-í nchaa ñáyiú, te xìní tucu-n sã ïo quide càhnu iní-í cuèi nãndi sá yãha-í ndècú-í dico ñà túú dàña ndeé-í ichi-gá. ¹¹ Te ío vãi sá quidé ñàha ñáyiú xii-í dándòho ñáhã-yu sá ndècú-í ichi Xítóhó Jesucristú, te sa ñàha tucu-n datná ní quide ñáhã-yu xii-í cútnàhá ní xíndecu-í ñuú Antiòquiá, ndihí ñuú Ìconiú, ndihí ñuú Lìstrá, chi ío ní dándóhó ñáhã-yu

xii-í sá cuëndá-gá. Dico Xítohó Jesucrístú ío ní xito ñaha-gă xii-í te ní chindee ñaha-gă cuëi nándi cùu sá ñi yáha-í. ¹² Te na cächí tnúhu ndáá-í xii-n sã ío vâi sá ñà túú vâha cada ñaha ñâyiu xii nchaa ñâyiu cuení sá ñà túú nã cumání núú Yã Ndiöxí cuëndá sá ndécú ndihí-yu Xítohó Jesucrístú. ¹³ Dico dava ñâyiu cächí-yu sá cãháⁿ-yu tnúhu Yá Ndiöxí te ñà ndáá sá cãháⁿ-yu tnúhu-gá, ñâyiu-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ío dandähú tnáhã-yu.

¹⁴ Te yòhó chi ío váha ní sándáá iní-n tnúhu Yá Ndiöxí sá dâcuâha-n, te vitna cãháⁿ-í dóho-n sã vã dáñá ndèé-n quíndáá iní-n tnúhu-áⁿ, te yòhó sa nâha-n ná cúú ñâyiu ní dánèhé ñáhá xii-n tnúhu-gá. ¹⁵ Te yòhó chi ndéé cútnáhá cúú lândú-n ní ngúita-n dâcuaha-n tnúhu ndèé núú tütú Yã Ndiöxí, te ñiu-ni nchaa tnúhu-gá canu ichi ñaha-xi xii-n te naníhí tãhú-n, chi sándáá iní-n Xítohó Jesucrístú. ¹⁶ Te nchaa cue téé ní tee tnúhu Yá Ndiöxí, chi ñiu-ni mee-gă ní dácáhu iní ñáhá-gă xii-güedé nâcuáa tee-güedé, te tnúhu-gá ío váha dâcuâha-o nchaa dava-gá ñâyiu, te cãháⁿ-xi dóho-o sã vã cündecu-gá-ó ichi cuehé ichi duha, te núú ñà túú quide ndáá-ó ndècu-o te nâcanu ichi ñaha-xi, te dânehé ñáhá-xí nâcuáa cada-o cündáá-ó núú Yã Ndiöxí. ¹⁷ Te ñiu-ni tnúhu-gá dátúha ñaha vâha-xi xii nchoo cuè ñâyiu ndècu ndihí-gá cuëndá cada-o

nchaa núú sã vâha.

4

¹ Te Xítohó Jesucrístú quixi-gá taxi tnúni-gá ñuyíú-a, te cada ndáá-gá cuéchi nchaa ñâyiu sa ní xíhí, ndihí cuéchi nchaa ñâyiu xíndecu vívú. Te mee-gă ndihí Yá Ndiöxí nánhá-gă sá ío cãháⁿ-í dóho-n vitna ² sá ío dâcuâha-n ñâyiu tnúhu-gá, te vá dáñá ndèé-n dâcuahá-n-yu ndèda-ni cãa oré cuëi ñà túú cuení-yu cundedóho-yu, te nchaa ñâyiu ñà túú cuení cada ndáá cúñaha ndáá-n nchaa nacuáa quidé-yu. Te cúñaha tûcu-n xii-yu sá vã dúcãⁿ-gă cadá-yu, te cãháⁿ-n dôho-yu cuëndá cada ndáá-yu cundecú-yu. Te ío cunduu cãhnu iní-n òré cãháⁿ-n dôho-yu, te ío dâcuâhá-n-yu tnúhu-gá. ³ Chi sáá nduu te vá cächí-gá-yu cundedóho-yu nchaa tnúhu sá sánú ichi ñaha cundecu váha-o núú Yã Ndiöxí, chi mee-nã nchaa sá cúdíí iní méè-yu cundedóho-yu, te ndúcú-yu cue téé danèhé ñáhá xii-yu nchaa tnúhu cùu iní-yu-áⁿ. ⁴ Te vá cadá cuëndá tnáhí-gá-yu tnúhu ndáá tnúhu Yá Ndiöxí, chi mee-nã tnúhu sá ñà túú nândihí cada cuëndá-yu. ⁵ Dico yòhó ío quíhi iní-n cündecu-n, te cahni iní-n cuëi nándi na ndôho-n, te dâcuâha-ni-n ñâyiu tnúhu Yá Ndiöxí, ñâyiu vátá quíndáá iní ñáhá-gă xii-gá, te cada-ni-n nchaa chiuⁿ ní táhú-gă cada-n.

⁶ Te yúhú sa ñùhu ichi-ná-í quíhí-í núú ndécú Yã Ndiöxí

cundecu-í, chi sa ní cuyatni cahni ñaha-güedë xii-í cuendá sá xínú cuèchi-í núú-gã. ⁷ Te ní quide-í nchaa chiúⁿ ní táhú Yã Ndiöxí cada-í te vitna ní xínu cava nchaa chiúⁿ ní táhú-gã-áⁿ ñi quide-í, te ñá túú ní ðaña ndeé-í ní sándáá iní-í-gã, te ducaⁿ-ni sándáá iní-í-gã ndeé vitna. ⁸ Te vitna sã ndëcu túha-ná sá ndúú táhù-í cuendá sá quidé ndáá-í núú Yã Ndiöxí, te Xítohó Jesucristú taxi-gã táhú-ãⁿ nduu táhù-í ná sáá nduu, chi cùu-gã ìⁿ Yaá quidé ndáá cuiti, te ñá díú-ní yùhú taxi-gã táhú-ãⁿ cuu cuendá-í, chi tnàhá nchaa ñáyiú ndëtu cahnu-ná sáá nduu quixi tucu-gã ñuyíú-a cuáñaha-gã táhú-ãⁿ nduu táhú-yu.

Chiúⁿ tahu té Pãblú cada té Timùteú

⁹ Te cuiní-í sá ïo ndìhi quixi-n quixi coto ñaha-n xii-í. ¹⁰ Chi té Dëmás ñá túú-gã quidé cuendá ñáhá-dë xii-í, chi mee-nã nchaa sá ïo ñuyíú-a ïo cùdí iní-dé. Te ní dándõo ñaha-dë cuáháⁿ-dé ñuú Tesalónica, te té Crëscenté cuáháⁿ-dé cundecu-dé distritú Gàlaciá, te té Titú cuáháⁿ-dé cundecu-dé distritú Dalmaciá. ¹¹ Te ìⁿndii-ná té Lúca ndécú ndìhi ñaha-dé xii-í, te cùñaha-n xii té Mácú quixi-n ndìhi-dé, chi téé-áⁿ ndacu-dé cada-dé ìⁿ chiúⁿ-í. ¹² Te té Tlquicú ní tendaha-í-dé cuáháⁿ-dé ñuú Éfesú. ¹³ Te òré quixi-n te yáha-n vèhe té Càrpú cáá ñuú Tróás canehe-n ìⁿ dóó ticachi ní dándõo-í vehe-dé quixi, ndìhi nchaa librú-í, te tnàhá nchaa dava-gã tutú-í ndécú

vèhe-dé canehe-n quixi chi xiãⁿ ïo-gã xíní ñùhu-í. ¹⁴ Te té Lijandrú téé cùu rerú ïo vài sá ñá túú vãha ní cuu quide ñaha-dé xii-í, dico mee Yã Ndiöxí náhá-gã nása cada ñaha-gã xii-dé cuendá sá dúcáⁿ quide-dé. ¹⁵ Te vá ñihí tnáhá-n ndìhi-dé chi ïo càháⁿ cuèhé-dé cuendá nchaa tnùhu càháⁿ-ó.

¹⁶ Te cùtnàhá ndécá ñaha-güedë xii-í ní sáháⁿ núú cuè téé cùchiuⁿ xito díhna nuu, chi mee dii ní sáháⁿ te ñá túú ní sáháⁿ ni ìⁿ cue téé cùndìhi-í, chi nchaa-güedé ní dándõo ñaha-güedë xii-í, te yùhú xìcáⁿ táhù-í núú Yã Ndiöxí sá vã cádá cuendá-gã sá dúcáⁿ ñi quide-güedé. ¹⁷ Dico Xítohó Jesucristú ní chindee ñaha-gã xii-í, chi ní taxi-gã tnùhu ndee ñi ní càháⁿ-í tnùhu-gã nàcuáa tàú-xi cunduu núú cuè téé-áⁿ ndìhi núú nchaa ñáyiú, dico ñá díú ñáyiú isràel cùú-yu, te diu-gã ní dácãcu nihnu ñaha-gã xii-í ñá túú ní sàhni ñaha-güedé. ¹⁸ Te mee Xítohó Jesucristú coto ñaha-gã xii-í te ñá túú nã cuu cuèi nãndi sá ná cádá ñaha ñáyiú xii-í te diu-ni-gã coto ñaha-gã xii-í ndeé ná sáá nduu sáá-í andiú núú ndécú-gã taxi tnùnigã. Te nchaa-o chí ná càchí-ó sá ïo càhnu cuu-gã ni caa ni quíhíⁿ. Te ducaⁿ na cùnduu.

Tnúhu ndeé núú ñi ndìhi-ná

¹⁹ Te ïo cùñaha-n na càda ndee ñi tá Priscá, ndìhi té Àquilú, ndìhi cue ñáyiú cùu ndi mee té Onèsiforó. ²⁰ Te té Èrastú ní quendõo-dé ñuú Còrintú, te té Trófimú ní dándõo-í-dé ñuú Miletú chi

cùhú-dé. ²¹ Te ío cundihí iní-n quìxi-n oré vátá sàá-gá yóó quidé v̄xiⁿ-xi. Te ío cada ndee ìní-n càchí té Èúbulú, ndihí té Pùdenté, ndihí té Lĩnú, ndihí tá Clàudiá, ndihí nchaa dava-gá ñáyu sàndáá iní tnúhu Xítóhó Jesucrìstú.

²² Te xìcáⁿ táhù-í núú Xítóhó Jesucrìstú sá ná cùndecu ndihí ñaha-gá xii-n ndihí nchaa dava-gá-yu. Te ducaⁿ ïo na chìndee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.

TUTÚ NÍ CADÚHA TÉ PĀBLÚ QUIHⁿ NDAHA TÉ TÌTÚ

*Té Pāblú cādūha-dé tutú
quíhⁿ ndaha té Títú*

¹ Yúhú té Pāblú xínú cuèchi-í núú Yă Ndiõxí, te diu-gá ní tendaha ñaha-gá xii-í cāháⁿ-í tnúhu Xítohó Jesucristú núú ñáyiú cuèndá quíndáá iní nchaa ñáyiú ní cachí Yă Ndiõxí naníhí tǎhú, ndihí cuèndá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. ² Te yúhú dácuaⁿ-í-yu tnúhu-gá cuèndá cundecu ndihí-yu tnúhu ndee iní sá cúndècu ndihí-yu Yă Ndiõxí ní caa ní quíhⁿ, chi ndéé cútnàhá vátá ngăva-gá ñuyíú-a ní cachí-gá sá cúndècu ndihí ñaha-gá xii-yu, te ñá túú dándahú ñáhá-gă, chi quíde-gá ìⁿ sá cāháⁿ-gá. ³ Te ní sáá nduu ní cachí-gá sá nihí-yu tnúhu nàcuáa cuáháⁿ tnúhu-gá, te diu-ni tnúhu-áⁿ ní cachí Yă Ndiõxí Yaá dácăcu nihnu ñaha xii-o núú ùhú núú ndàhú sá dácuaⁿ-í ñáyiú. ⁴ Te tutú-a cādúha-í cuèndá daquixi-í ndaha yòhó té Títú, téé ní sanu ichi ndisa-í ichi Xítohó Jesucristú, chi ìⁿ-ni tnúhu sàndáá iní-ó. Te xicáⁿ táhù-í núú Tátá-ó Dǔtú Ndiõxí sá ìo na chindee chítúú ñaha-gă xii-n, te diu-ni-gá ná cāda te ìo váha cuu iní-n cundecu-n. Te xicáⁿ táhú tucu-í núú Xítohó Jesucristú

Yaá dácăcu nihnu ñaha xii-o núú ùhú núú ndàhú sá díú-ní dūcaⁿ na cada ñaha-gă xii-n.

*Chiuⁿ quíde té Títú distritú
Crétá*

⁵ Te yúhú ní dándõo ñaha-í xii-n distritú Crétá, chi cuíní-í cada-n nchaa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yă Ndiõxí xíndecu ìⁿ ìⁿ ñuú yíndèhu distritú-áⁿ, te cada-n nàcuáa ní cachí-í cada-n. ⁶ Te cue téé cada chiuⁿ-áⁿ xíní ñùhu-xi cuu-güedé mee-ni cuè téé ìo váha quíde ndáá nàcuáa vá yõo cāháⁿ dóho-güedé, te na cùu-güedé cue téé ndècu ìⁿ dii-ni ñadihí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yă Ndiõxí cuèndá sá vǎ yõo cuatnuñaha xii-güexi quesahá-yu sá ìo sáá iní-güexi te quíde-güexi nándi sá ñà túú tàú-güexi cada-güexi. ⁷ Chi xini ñuhu-xi sá ncháá cuè téé quíndaha ñaha xii ñáyiú sàndáá iní tnúhu Yă Ndiõxí ìo cundecu yíñùhu-güedé, chi ducaⁿ tàú-xi cada nchaa cue téé quíde chiuⁿ Yă Ndiõxí, te xini ñuhu tucu-xi sá vǎ cúú-güedé cue téé ñì iní-xi, te ní vǎ cúú-güedé cue téé líhli iní-xi, te ní vǎ cúú-güedé cue téé quíhu, te ní vǎ cúú-güedé cue téé plètú, te ní vǎ cúú-güedé cue téé dicó-ni ducaⁿ níhí dǐhúⁿ. ⁸ Te xini ñuhu-xi cuu-güedé cue téé sǎñaha nùu vehe ndetatú cue ñáyiú ñùhu ichi, cue téé quíde váha sá cúú-xi tnàha ñáyiú-xi, cue téé ìo váha cùtnuní iní-xi nàcuáa cada cundecu ñuyíú-a,

cue tée quide ndáá xĩndecu, cue tée quide nchaa nacuáa ndũu vétú iní Yá Ndiõxí, cue tée xito mee-xi ñá túú quide cutexínu. ⁹ Te na cùu-güedé cue tée ío váha sàndáá iní tnúhu váha tnúhu Yá Ndiõxí sá nĩ dánèhé ñáhà-í xii-ndo cuendá ducaⁿ te cue téé-áⁿ ndacu-güedé cáháⁿ-güedé dóho ñáyiú cuendá cáda-yu nchaa nàcuáa cáháⁿ Yá Ndiõxí, te nĩhí-güedé tnúhu cáháⁿ váha-güedé núú nchàa ñáyiú dàquee tíhú tnúhu Yá Ndiõxí, te mee-ni cuè téé ducaⁿ quide váha taxi ndecu-n quindaha-güedé ñáyiú sàndáá iní tnúhu-gá.

¹⁰ Te na cächí tnúhu-í xii-n sá vái ñáyiú sáá iní-xi ío, te cáháⁿ-yu mee-ni tnúhu sá ñá túú nàndíhi, te dándahú-yu tnàhá ñáyiú-yu, te ñáyiú isràél ío-gá vái-yu ducaⁿ xĩquide. ¹¹ Te nchaa ñáyiú ducaⁿ xĩquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dānehé-yu dava-gá ñáyiú ñⁿ sá ñá túú tàú-yu dacuàhá-yu, te ducaⁿ quidé-yu cuendá-ni sá nĩhí-yu díhúⁿ, te ío titní xichi ní cuu dándahú-yu nchaa ñáyiú xĩndecu ñⁿ-ni vèhe.

¹² Te ní cachí ñⁿ téé ío váha sáá díquí-xi ndècu mei ñuú distritú Crètá sá ncháá ñáyiú ñuú-dé-áⁿ ío ndèhndé-yu, te ío cuihna iní-yu, te ío vái xexí-yu, te cùhndú-yu. ¹³ Te ndáá ní cáháⁿ-dé chi ducaⁿ quidé-yu, te xĩáⁿ ío cáháⁿ-n dõho-yu cuendá sá ná quindáá váha iní-yu tnúhu Yá Ndiõxí. ¹⁴ Te cúñaha-n xii-yu

sá vǎ cáda cuendá-yu nchaa tnúhu ndehnde cáháⁿ ñáyiú isràél, te ni vǎ cáda cuendá-yu nchaa tnúhu cáháⁿ ñáyiú ñá túú cuini quindáá iní tnúhu Yá Ndiõxí.

¹⁵ Te nchaa sá nĩ cadúha Yá Ndiõxí ío ñuyíú-a cùu-xi mee nine-ni sá váha sá cúú-xí nchàa ñáyiú sa ní nduu ndoo ní nduu nine iní-xi ndècu ichi Yá Ndiõxí. Dico nchaa sá nĩ cadúha-gá ñá túú cùu-xi sá váha sá cúú-xí nchàa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuehé sá dúhá ñuhu iní-yu, te ñá túú quide cuendá-yu núú quide váha-yu àdi ñá túú quide váha-yu ndécú-yu. ¹⁶ Te cächí-yu sá sàndáá iní-yu Yá Ndiõxí, dico nchaa sá quidè-yu-áⁿ cächí tnùn-í-xi sá ñá ndáá. Te Yá Ndiõxí chi duuⁿ duuⁿ ñá túú tnàhá iní-gá nchaa nàcuáa quidé-yu, chi ío sáá iní-yu, te ñá túú quidé-yu ni ñⁿ sá váha.

2

Tnúhu váha tnúhu Yá Ndiõxí

¹ Te yòhó òré dánèhé-n ñáyiú, te danèhé-n-yu mee-ni nàcuáa cáháⁿ tnúhu váha tnúhu Yá Ndiõxí. ² Te nchaa cue téé cùu sacuéhé ná cáda cuendá-güedé vá cáda cùtexínu-güedé cundecu-güedé, te na cùndecu yĩñuhu-güedé, te na cuáha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndiõxí, te na cùu iní-güedé tnàha ñáyiú-güedé, te na cùnduu cahnu iní-güedé cuèi

nándi sá ná yǎha-güedé.
 3 Te vitna cǎháⁿ tucu-í sá cúu-xí nchàa ñáyiú dìhí ñáyiú cùu sacuéhé sǎ ná cùndecu yíñuhú-yu, te vá cúu-yu ñáyiú yiti yùhu-xi, te ni vǎ cúu-yu ñáyiú quihu, te na dànehé-yu nchaa dava-gá ñáyiú cada váha-yu. 4 Te na dàsahú-yu nchaa ñáyiú dìhí ñáyiú cuechi cuendá ná cùu iní-yu yí-yu, ndihi cue landú-yu, 5 ndihi cuendá sá ná cǎni váha iní-yu nàcuáa cundecú-yu, ndihi cuendá sá vǎ cǎní iní-yu cadá-yu ni ñⁿ sá cuèhé sá dúhá, ndihi cuendá sá ná cadá-yu nchaa chiúⁿ ñuhu vehé-yu, ndihi cuendá sá cadá vǎha-yu nchaa tnàha ñáyiú-yu, ndihi cuendá sá ná cadá-yu nchaa nàcuáa cǎháⁿ yí-yu, te ducaⁿ xini ñuhu-xi cadá-yu cuendá sá vǎ yǒo cǎháⁿ cuèhé cuendá tnúhu Yá Ndióxi. Duha cúñaha-n xii cue ñáyiú dìhí ñáyiú cùu sacuéhé cuendá ducaⁿ dàsahú-yu nchaa ñáyiú dìhí ñáyiú cuechi.

6 Te yòhó cǎháⁿ-n dǒho nchaa cue téé cuechi cuendá sá ná cǎni váha iní-güedé nàcuáa cundecu-güedé, 7 te cada-n mèe-ni sá vǎha cuendá ducaⁿ cǎnchicúⁿ ni-hnu-güedé cada-güedé, te òré danèhé-n-güedé te ío váha cuu iní-n dànehé-n-güedé, te ndihi tnúhu yíñuhu cǎháⁿ ndihi-n-güedé. 8 Te cǎháⁿ-n mèe-ni tnúhu váha, te ducaⁿ te vá yǒo ñⁿ cǎháⁿ cuèhé cuendá tnúhu cǎháⁿ-n, te nchaa ñáyiú cùu ùhú iní ñáhá xii-o cucahaⁿ núu-yu, te vá nihí-yu tnúhu cǎháⁿ cuèhé-yu cuendá-ó.

9 Te ío cǎháⁿ-n dǒho nchaa cue téé xinu cuechi sá ná quíndáá iní-güedé cada-güedé nchaa chiúⁿ tahu patróoⁿ-güedé nàcuáa cudíu-güedé núu cuè téé-áⁿ, te vá cǎháⁿ sáá iní-güedé. 10 Te vá cǎní iní-güedé duhu-güedé, te cada ndáá-güedé cuendá sá ñà túú nǎ cǎni iní ñáhá cuè patróoⁿ-güedé, te ducaⁿ te cutnùní iní ñáyiú sá tnúhu Yá Ndióxi ío váha dànehé ñáhá-xí nàcuáa cada-o cùndecu-o, te diu-gá cúu-gǎ Yáá dácǎcu nihnu ñaha xii-o núu ùhú núu ndáhú.

11 Te nchoo ñi cutnùní iní-ó sá Yá Ndióxi ío cùndahú iní-gá nchaa nchoo ñáyiú ndècu ñuyíú-a, te ní taxi-gá tnúhu ndee iní sá nánihí tahú nchaandi túhú ñáyiú te núu na quíndáá iní ñáhá-yu xii-gá.

12 Te ní cachí-gá sá dáñá-ó nchaa ichi cuehé ichi duha chi ñà tnàhá iní-gá cundecu-o ìchi-áⁿ, te vá ío cuhuⁿ iní-ó nchaa sá ío ñuyíú-a, te ní cachí tucu-gá sá ío cǎni iní-ó nàcuáa cundecu-o vitna ndecu-o ñuyíú-a te cada ndáá-ó cùndecu-o cuendá nduu vétú iní-gá. 13 Te

cundetú-o sáá nduu cǎhnu vihi, nduu quíxi tucu Xítohó Jesucristú Yáá cúu Ndióxi-ó, te diu-gá ní dácǎcu nihnu ñaha-gǎ xii-o núu ùhú núu ndáhú. Te nduu-ǎⁿ ío cudíí iní-ó. 14 Te mee-gá ní xíhí-gá chi ducaⁿ ñi cuiní-gá cunduu, te ducaⁿ ñi quide-gá cuendá nchoo vǎ cùndecu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiú quíndaha-gǎ, te ní yùhu ñi

iní-ó càda-o mee-ni sá vǎha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cǎháⁿ-n dǒho-yu te núu ñá túú quide ndáá-yu. Te cada-n sǎ cúú-n ìⁿ téé xínu cuechi núú Yǎ Ndiǒxí, te vá dáñá-n mèe-n daquee tíhú ñáhá ñǎyiu xii-n.

3

Nchaa sá tàù ñáyiu ndècu ichi Yá Ndiǒxí cadá-yu

¹ Te cúñaha-n xii-yu sá ná quìndáá iní-yu cadá-yu nchaa nàcuáa cǎháⁿ nchaa cue téé cùchiuⁿ, te tàù-yu chindee ñáhá-yu xii-güedé nchaa chùⁿ váha quide-güedé. ² Te vá cǎháⁿ cuèhé-yu cuèndá ñáyiu, te vá cùndùu pletú-yu, te na cùú-yu ñáyiu ndàhú iní-xi, te na cùndahú iní-yu nchaa tnàha ñáyíú-yu.

³ Te tnàhá-ó ñì xóo cada-o dàtná quidé ñáyiu-áⁿ vitna, chi ío ñì díquí-ó chi ñá tècú tnùnì-ó nàcuáa cǎháⁿ tnúhu Yá Ndiǒxí ní cùu, te ío ní xínduu sǎá iní-ó núú-gǎ, te ní xíndecu-o ìⁿ ichi sá ñà túú tàù-ó cùndecu-o ñì cuu, te nándì sá cuèhé sá dúhá ío ñuyíú-a ní xóo cudíⁿ iní-ó ñì xóo cada-o chi ní xóo taxi tnùnì ñáhá-xí xii-o, te ní xóo cada cuèhé ñì xóo cada duha-o ñì cùu, te ní xíndecu-o ìchi cuedú iní, te cuèndá nchaa sá ñì xóo cada-o-ǎⁿ xǎⁿ ío ní xóo cuu úhú iní ñáhá ñáyiu xii-o, te ducaⁿ-ñì nchòo tucu ní xóo cuu úhú iní-ò-yu. ⁴ Te Yá Ndiǒxí Yáá ní dǎcǎcu nihnu ñaha xii-o núú úhú núú ndàhú ní dándíxí tǔu-gǎ iní-ó nàcuáa cutnùnì

iní-ó sǎ ío váha iní-gǎ, te cùu iní ñáhá-gǎ xii nchaa nchoo ñáyiu ndècu ñuyíú-a. ⁵ Te Yá Ndiǒxí ní dǎcǎcu nihnu ñaha-gǎ xii-o núú úhú núú ndàhú, dico ñá díú cuèndá ìⁿ sá vǎha quide-o ndecu-o ñuyíú-a ducaⁿ ñì quide-gǎ, chi mee-gǎ ducaⁿ tnàhí ní cundàhú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyiu saa, chi Espíritú Yá Ndiǒxí ducaⁿ ñì quide ñaha-xi xii-o. ⁶ Te Espíritú-gǎ ní taxi-gǎ ñì yùhu ñì iní-gǎ ndécú ndìhi-o, te ducaⁿ ñì quide-gǎ chi ní sándáá iní-ó Xítóhó Jesucristú Yáá ní dǎcǎcu nihnu ñaha xii-o núú úhú núú ndàhú. ⁷ Te ío cùndahú iní ñáhá-gǎ xii-o núu sa ní quide ndáá-gǎ cuéchi-o te ní cuu-o dèhe-gǎ, núu xǎⁿ vitna ndètu-ná-ó sǎá nduu ndùu táhú-ó cùndecu-o ndìhi-gǎ ñì caa ñì quíhíⁿ.

⁸ Te tnúhu ní cǎháⁿ-í-a cùu-xi tnúhu ndáá cuiti, te cuínì-í sá ñì yuhu ñì iní-n cǎháⁿ-n tnúhu-gǎ núú-yu cuèndá sá ncháá ñáyiu sándáá iní ñáhá xii Yá Ndiǒxí nducu ndèe-yu cadá-yu mee-ni sǎ vǎha, te tnúhu-áⁿ cúú-xí mèe-ni tnúhu váha, te ío váha sá cúú-xí-yu. ⁹ Te vá cadá cuèndá-n nchàa tnúhu sá ñà túú nàndìhi xitnàha ñáyiu, te vá cadá cuèndá-n ñáyiu nándì cǎháⁿ cuèndá nchaa sá ñì xóo cada cue ñáyiu ní xíndecu ndéé sanaha, te vá cadá cuèndá-n nchàa tnúhu xitnàha ñáyiu xicuèhé tnàhá cuèndá tnúhu ní chídó tnùnì ndí Moisés, chi nchaa tnúhu

xítñàhá-yu-áⁿ ñà túú tnàhí nandíhi-xi, te dàcuíta ñaha-xi xì-o.

¹⁰ Te núu ìó ñáyiú ní ngúíta-yu nándi tnúhu càháⁿ-yu cuèndá sá vǎ cúú ìⁿnuu cue ñáyiú ndècu ichi Yá Ndiöxí ñá, te ñáyiú-áⁿ cǎháⁿ sàhú-n dǒho-yu ìⁿ úú xito, te núu vá tñí^ñ-yu tnúhu càháⁿ-n ñá, te vá ñihí tnáhá-gǎ-n ndíhí-yu. ¹¹ Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuìní-yu cadá-yu sá vǎha, chi mee-nǎ sá cuèhé sá dúhá tnàhá iní-yu cadá-yu, te cùtnuní iní méé-yu sá ñà túú quíde ndáá-yu, te sáá nduu te nacháhu-yu nchaa sá quídě-yu.

Nàcuáa cada té Títú

¹² Te cuìní-í tendaha-í té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ìⁿ cue téa-núú ndécú-n, te ìó nducu ndèe-n quíhíⁿ-n ñùú Nicópolis núú quíhíⁿ-í cundecu-í, chi yàcáⁿ cuìní-í quíhíⁿ-í cundecu-í yóó quídé vǐxiⁿ-xi. ¹³ Te ìó cuáñaha-n nchàa sá xíní ñùhu té Zénás téa ìó váha xíní nchaa nàcuáa càháⁿ lèi, ndíhi té Àpolós cuèndá sá ñà túú nǎ cumání xii-güedé ichi. ¹⁴ Te cuìní-í sá ncháá ñáyiú ndècu ndíhi-o ichi Yá Ndiöxí cada váha-yu, te cuáñahá-yu ìⁿ sá xíní ñùhu ñáyiú, te ìó váha chùⁿ cadá-yu te núu ducaⁿ na càdá-yu.

Tnúhu ndéé núú ñí ndíhi-ná

¹⁵ Te vitna ìó cada ndee ìní-n càchí nchaa ñáyiú ndècu ndíhi-í iha, te cúñaha-n sǎ

ìo na càda ndee iní nchaa ñáyiú cùu iní ñáhá xì-o, ñáyiú sàndáá iní ñáhá xìi Yá Ndiöxí. Te Yá Ndiöxí ìo na chìndee chitúu ñaha-gǎ xii-ndo nchàa-ndo, Te ducaⁿ na cùnduu. Te ìo chí càdá ndèe iní-nǎ vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ FILÈMÓN

*Té Păblú cádŭha-dé tutú
quíhiⁿ ndaha té Filèmon*

1 Te yúhú té Păblú téé yìhi vecaá sá cuendá Xítohó Jesucristú cádŭha-í ìⁿ tutú ndihì té Timùteú cuendá daquixi-í ndaha yòhó té Filèmon, te ío cùu iní ñáhà-í xii-n chi tnàhá-n quide-n chiunⁿ Yá Ndiöxí. Te tutú-a tëndaha-í quixi ndaha-n ² ndihì ndaha ñaha nàni Apiá ñaha ndècu ndihì-o ichi Xítohó Jesucristú, ndihì ndaha té Àrquipú, chi tnàhá-dé quidé-dě chiunⁿ Yá Ndiöxí, ndihì ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tátá-ó Dütú Ndiöxí ndihì núú Xítohó Jesucristú sá ìo na chindee chitúu ñaha-gă xii-ndo, te ducaⁿ ndì nduú-gá ná cádá te ío váha cuu iní-ndó cundecu-ndo.

*Té Filèmon ío sàndáá iní-dé
Xítohó Jesucristú te cùu iní-dé
tnàha ñáyiú-dé*

4 Te ndì tnahá òré càháⁿ ndihì-í Yá Ndiöxí cuendá-n ndacáⁿ táhù-í núú-gă. ⁵ Chi ñihí-í tnúhu sá ìo sàndáá iní-n Xítohó Jesucristú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiöxí sá dàtná-ni sàndáá iní-n-gă ducaⁿ-ni dānehé-n ñáyiú cuendá ducaⁿ ngũnu ichí-yu tnàhá-yu, te cutnùnì

iní-yu nàcuáa ndùu nchaa sá vâha tàxi Xítohó Jesucristú xii-o, te tnàhá-yu nduu táhŭ-yu nchaa sá vâha-áⁿ. ⁷ Te yòhó té Filèmon cúú-n tēe ndècu ndihì-í ichi Xítohó Jesucristú cāchí tnúhu-í xii-n sã ìo cùdí ìní-í cuendá sá ìo váha quide-n ndecu-n, chi cùu iní-n nchàa ñáyiú ndècu ichi Yá Ndiöxí, te uuⁿ-gá ñihí ndéé-í sá dúcáⁿ quide-n, te diu-n ìo sáhă-n-yu tnúhu ndee iní ndécú ndihì-yu.

*Té Păblú chindèe tnúhu-dé té
Onésimú*

⁸ Te yúhú té Păblú ní taxi Xítohó Jesucristú tnúhu ndee iní ndécú ndihì-í sá táxí tnùnì ñáhà-í xii-n te tahu-ì chiunⁿ cada-n, dico vá táxí tnùnì ñáhà-í xii-n, ⁹ chi váha-gá sá càháⁿ ndàhú-í núú-n sã cādá-n nchàa nacuáa càháⁿ-í chi ío cùu iní ñáhà-í xii-n. Chi yúhú sa ta yì-í cuáháⁿ, te yìhi-í vecaá cuendá sá càháⁿ-í tnúhu Xítohó Jesucristú. ¹⁰ Te càháⁿ ndàhú-í núú-n sã ñà túú nã canì iní-n cuendá té Onésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiöxí ní xáhaⁿ-í xii-dé vitna yìhi-í vecaá.

¹¹ Te nàha-n sá cŭtnàhá ní xindecu ndihì-n-dě ñà túú ní quide ndáá-dé, dico vitna ío váha quide-dé ndécú ndihì-í-dé, te diu-ni ducaⁿ càda-dé òré cundecu ndihì tucu-n-dě. ¹² Te vitna tendaha-í-dé ndixi-dé cundecu tucu-n ndihì-dé, te òré queheⁿ cuendá-n-dě, te cada iní-n sã yùhú ní queheⁿ cuendá-n. ¹³ Te vitna yìhi-í vecaá sá

cuendá tnúhu Xítoho Jesucristú, te cuiní-í ngani-í-dé cunu cuechi-dé núú-í cuendá cada-dé núú-n ní cùu. ¹⁴ Dico ñá túú ní ngani-í-dé, chi vátá ndátnúhu ndihi ñaha-gã-í xii-n núu nása cachí-n cunduu. Te ñá cundèe iní-í cada yica-í cada-n ìⁿ sá vãha sá cúú-xì-í, chi cuiní-í sá méé-n càni iní-n núu cuu àdi sá vã cúú. ¹⁵ Te ní cunduu ní quee té Ònésimú vehe-n, te cudana te mee Yã Ndiõxí ducaⁿ ní cachí-gá cunduu cuendá dacuàha-dé cada váha-dé. Te ndixi tucu-dé cundecu ndihi ducaⁿ-nã-n-dé. ¹⁶ Te vá cúú-gã-dé dàtná ìⁿ téé xínu cuechi chi ní cuu-dé dàtná ìⁿ ñani-ó chi ní sãndáá iní-dé Yã Ndiõxí, te yúhú ío cùu iní-í-dé, dico yòhó uuⁿ-gá cuu iní-n-dé, chi cùu-dé ìⁿ tnàha ñãyiu-o, te ndècu-dé ichi Yã Ndiõxí.

¹⁷ Te ìⁿ-ni cùu-o ndecu-o ichi Yã Ndiõxí núu xiãⁿ càháⁿ ndàhú-í núú-n sá quéhéⁿ cuendá-n-dé dàtná quéhéⁿ cuendá-n yúhú òré quéxiò-í vehe-n. ¹⁸ Te núu ió ìⁿ sá ní cumání-dé núú-n ñá túú ní quide ndáá-dé cùtnàhá ní xíndecu-n ndihi-dé, àdi ío ìⁿ sá tàú-dé te vá ndacáⁿ cuendá-n núú-dé, chi yúhú ndacáⁿ cuendá-n núú-í. ¹⁹ Te ndaha mee yúhú té Pãblú cãdũha-í tutú-a càchí tnúhu-í xii-n sã ná chãhu-í nchaa sá ní quide-dé. Dico dandacu saú iní-n sã yúhú ní sanu ichi ñaha-í xii-n ichi Xítoho Jesucristú. ²⁰ Dico yòhó téé ndècu ndihi-í ichi Xítoho Jesucristú cada ndee iní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuáa cuu-xi dàtná ìⁿ tnúhu

ndee iní sá cúú-xì-í, chi ndi ndúú-ó ndècu-o ichi-gá.

²¹ Te cùtnuní iní-í sá cáda-n nchaa nacuáa càháⁿ-í, te cùtnuní tucu iní-í sá ío-gá vãi sá vãha cada-n dàcúúxí tnúhu ndàhú càháⁿ-í núú-n, núu xiãⁿ tëndaha-í tutú-a véxi ndaha-n. ²² Te vitna cuiní-í cada túha-n ìⁿ vehe cundecu-í, chi sãni iní-í sá quíxí còto ñaha-í xii-ndo, te ndètu-í sáá nduu-ãⁿ chi nchòhó xicáⁿ táhú-ndó núú Yã Ndiõxí cuendá-í.

Tnúhu ndéé núú ní ndihi-ná

²³ Te ío cada ndee iní-n càchí té Èpafrás téé yìhi ndihi-í vecaá sá cuendá tnúhu Xítoho Jesucristú. ²⁴ Te ío cada ndee iní tucu-n càchí té Măcú, ndihi té Arístarcú, ndihi té Dëmás, ndihi té Lùcá, chi tnàhá cue téé-ãⁿ quide-güedé chiúⁿ Xítoho Jesucristú.

²⁵ Te Xítoho Jesucristú ío na chíndee chítúu ñaha-gã xii-ndo nchaa-ndo. Te ducaⁿ na cunduu. Te ío chí cáda ndèe iní-nã vitna.

TUTÚ QUIHIⁿ NDAHÁ CUE, ÑÁYIU HĒBREŪ

*Dútú Ndiõxí ní cachí-gá sá
Dēhe-gá cada núú-gă*

¹ Te ndéé sanaha, Yá Ndiõxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñani tnáhá-ó ní xíndecu ndéé dàvá-áⁿ te diu ducaⁿ nĩ quide-güedé. Te titní xito ducaⁿ nĩ xáhaⁿ-gă xii-güedé ní cáháⁿ-güedé tnúhu-gá. Te ndi dííⁿ ndi dííⁿ nĩ xítñúhu ñaha-gă xii-güedé nàcuáa cáháⁿ-güedé tnúhu-gá núú-yu. ² Te sátá nĩ cuu vâi nduu ta yáha cuáháⁿ, te ní sáá nduu nĩ cachí Yá Ndiõxí sá Dēhe-gá cada núú-gă cáháⁿ tnúhu-gá núú-ó. Te diu-ni mee-gă ní táuchíúⁿ nĩ cadúha Dēhe-gá ñuyíú ndihí nchaa sá ió, te ní cachí-gá sá ncháá cùu-xi cuendá Dēhe-gá. ³ Te Dēhe Yá Ndiõxí ío càhnu cuu-gá dàtná càhnu cuu mee-gă, te dàtná-ni sàni iní méé-gă diu-ni ducaⁿ sàni iní Dēhe-gá chi tnáhá-gá cúú-gă Ndiõxí, te sá cuendá tnúhu càháⁿ Dēhe-gá xiáⁿ ndécú-ní nchàa sá ió ñuyíú, te ducaⁿ chi ío càhnu cuu Dēhe-gá, te diu-ni Dēhe-gá ní quide nàcuáa vá cündecu-gá cuèchi-o. Te sátá dúcáⁿ te ní ngóo-gá xio cùha Tátá-gă Dútú Ndiõxí Yáá ío cùnnu ndecu andíu.

*Dēhe Dútú Ndiõxí ío-gă
cúnnu-gă dàcúúxí cuè espíritú
xínú cuèchi núú-gă*

⁴ Te Dēhe Yá Ndiõxí ío-gă cúnnu-gă dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiõxí sá ío-gă cunuu-gă dàcúúxí cuè espíritú-áⁿ. ⁵ Chi Yá Ndiõxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ-gă:

Yòhó cúú-n Dēhe mee-í,
te ducaⁿ-ni cündecu-n núú
ndécú-í.

Duha ní xáhaⁿ-gă. Te ní cachí
tucu Yá Ndiõxí:

Yúhú cúú-í Tátá Yàá-áⁿ,
te mee-gă cúú-gă Dēhe-í.

Duha ní cachí-gá. ⁶ Te
cútnáhá ní tendaha-gă
Dēhe-gá Yáá ío cùnnu ní
quixi-gá ñuyíú-a, te ní
cachí-gá:

Tàú-xi sá ncháá cuè espíritú
xínú cuèchi núú-í
chiñuhu-xi Dēhe-í.

Duha ní cachí-gá. ⁷ Te Yá
Ndiõxí ní cáháⁿ-gá cuendá cue
espíritú xínú cuèchi núú-gă, te
ní cachí-gá:

Yúhú quidè-í sá ncháá cuè
espíritú xínú cuèchi
núú-í cúú-xí dàtná
táchí,

te diu-ni cue espíritú-áⁿ
quidè-í sá cúú-xí dàtná
itá ñuhú.

Duha càchí-gá. ⁸ Dico Dēhe-gá
chi ñá túú dùcaⁿ ní xáhaⁿ-gă,
chi duha ní xáhaⁿ-gă:

Yòhó tnáhá-n cùu-ñ Ndiõxí
dàtná cúú yúhú Yáá
cúú Tátá-n,

te ducaⁿ-ni tàxi tnuní-n nì caa ni quíhíⁿ,

te ío váha ndáá quidé-n tàxi tnuní-n.

9 Te dàquee tihú-n nchàa sá cuèhé sá dúhá, te cùu iní-n nchàa sá vâha,

núu xiáⁿ yúhú Yaá cúu Tâtá-n nĩ quide-í sá ïo-gá vii ïo-gá váha cuu iní-n,

dàcúúxí nchàa dâva-gá ñáyiú ndècu ndihí-n.

Duha ní xâhaⁿ-gã xii Déhe-gá.

10 Te ní xâhaⁿ tùcu Yá Ndiôxí xii Déhe-gá:

Yòhó cúú-n Yàá ío cùnuu, chi ndéé cútnàhá ñá túú vèdana ná ío te ní cadúha-n ñùyíú ndihí andíu.

11 Te andíu ndihí ñùyíú chi naa-xi, dico yòhó chi cundecu-ni-n nì caa ni quíhíⁿ.

Te andíu ndihí ñùyíú chi ndihí-xi dàtná ndihí ìⁿ dóó,

12 te dàtná cuiní-n quide ñáyiú ndihí ìⁿ dóó òré ndàcáⁿ tnáhnũ-yu tàxi ndecú-yu ìⁿ xio, ducaⁿ càda-n ñùyíú ndihí andíu,

te dàtná nádâma dóó ñáyiú ducaⁿ càda tucu-n ñùyíú ndihí andíu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n nì caa ni quíhíⁿ, chi vá yíi tnàhí-n.

Duha ní xâhaⁿ Yá Ndiôxí xii Déhe-gá. 13 Te Yá Ndiôxí ñá túú ní xâhaⁿ-gã xii ni ìⁿ cue espíritú xínú cuèchi núú-gã dàtná ní xâhaⁿ-gã xii Déhe-gá, te duha ní xâhaⁿ tùcu-gá:

Ngóo xio cùha-í taxi tnùní-n, te yúhú cada-í te nchaa sá cúú ùhú iní ñâhá xii-n canehe-xi sá yíñuhu núú-n.

Duha ní xâhaⁿ-gã xii Déhe-gá.

14 Te nchaa espíritú xínú cuèchi núú Yá Ndiôxí mee-ni chiúⁿ-gá quidé-xí, chi tëndaha-gá cue espíritú-áⁿ cuâháⁿ-xi nchaa núú ndécú cuè ñáyiú ní nduu táhú cundecu ndihí-gá chindee ñàha-xi xií-yu.

2

Vá dáñá ndèé-ó tnũhu sá càháⁿ nàcuáa naníhí tàhú-ó

1 Te sá cuendá sá ío cùnuu Xítohó Jesucristú, núu xiáⁿ ío xini ñuhu-xi cada cuendá-ó nchàa tnúhu càháⁿ-gá sá sá ní xíndedóho-o cuendá sá vâ dáñá nihnu-o. 2 Te cue espíritú xínú cuèchi núú Yá Ndiôxí ní càháⁿ-xi tnúhu-gá ndéé sanaha, te tnúhu ní càháⁿ cue espíritú-áⁿ cúú-xí sã ndàá cuíti. Te nchaa ñáyiú ñá túú ní cuiní tñi nchaa tnúhu ní càháⁿ cue espíritú-áⁿ, te ní ñà túú ní cuiní-yu cundedóho-yu, nchaa ñáyiú-áⁿ nì nacháhu-yu nàcuáa ndùu nchaa cuèchi ní quidé-yu ìⁿ ìⁿ-yu. 3 Te sá dúcáⁿ nĩ yáha cue ñáyiú-áⁿ, xiáⁿ cútnùní ndáá iní-ó sã vâ cãcu nihnu-o te núu na dáña nihnu-o tnúhu sá càháⁿ nàcuáa naníhí tàhú-ó, tnúhu sá ío cùnuu, chi nacháhu-o te núu ducaⁿ na càda-o. Te díhna-gã Xítohó Jesucristú ní càháⁿ-gá tnúhu-áⁿ te nchaa ñáyiú ní xíndedóho nchaa nàcuáa ndùu tnúhu-áⁿ nì càháⁿ ndáá-yu tnúhu-áⁿ

núú-ó. ⁴ Te tnàhá Yá Ndiöxí cundìhi-gá nchaa ñáyiu-áⁿ quidé-gá nàcuáa cutnùnì iní-ó sã tnùhu-áⁿ cúú-xí tnùhu ndáá, chi quide-gá titní núú sã vã yõ tnàhí ndàcu cada te ío cunùhu-o. Te Espiritú Yá Ndiöxí quidé-xí nàcuáa nduu táhú-ó ndì d^híⁿ núú chiúⁿ cada-o nàcuáa cuní mée-gã. Te sã dúcáⁿ quide Yá Ndiöxí nchaa xiãⁿ, xiãⁿ cútñuní iní-ó sã tnàhá-gá càháⁿ-gá sã tnùhu-áⁿ cúú-xí tnùhu ndáá.

Xítohó Jesucristú ní xínduu yiqui cunù-gá dàtná cáá yiqui cunú nchoo cuè ñáyiu ñuyúú-a

⁵ Te Yá Ndiöxí vá táxi ndècu-gá cue espíritú xínú cuèchi núú-gã taxi tnùnì-xi ñuyúú sáá sã vátá quínì-gá-ó, te dⁱu cuendá xiãⁿ càháⁿ-í. ⁶ Te núú tütú Yá Ndiöxí càchí-xi: Yòhó Dútú Ndiöxí ñá túú nã cúú cuè ñáyiu ñuyúú núu ndacu iní-n-yu, àdi chindeé-n-yu.

⁷ Te yòhó ní cachí-n sã nchàa ñáyiu ñuyúú-a vá cunúú-yu dàtná cunúu cue espíritú xínú cuèchi núú-n,

dico ní cachí-n sã sàá nduu te ío cunúú-yu tnàhá-yu, te mee-n càháⁿ-n sã ío càhnu cuú-yu,

te ní cachí tucu-n sã táxi tnùnì-yu nchaa sã ñí cadúha-n.

⁸ Te ducaⁿ nchàandi túhú sã ío quindàhá-yu.

Duha càchí-xi núú tütú-gá. Te sã dúcáⁿ ñí cachí Yá Ndiöxí sã quindàha ñáyiu ñuyúú nchaa sã ío, xiãⁿ cútñuní sã nchàandi túhú sã ío taxi tnùnì-yu,

dico vátá sàá-gá nduu dùcaⁿ quínì-ó càda-xi. ⁹ Te nchoo sa nàha-o sã tnàá-ní ñí quide Yá Ndiöxí cuendá sã vã cunúu Xítohó Jesucristú dàtná cunúu cue espíritú xínú cuèchi núú-gã. Te ducaⁿ ñí quide Yá Ndiöxí chi ní cundàhú iní-gá nchaa ñáyiu ñuyúú-a, chi ní cachí-gá sã Dèhe-gá cuú cuendá nchaa-yu, te Xítohó Jesucristú ío ní ndoho-gá òré ní xihí-gá, núu xiãⁿ ní nduu táhú-gã cunúu vihi-gá vitna. Te mee Yá Ndiöxí càchí-gá sã ío càhnu cuu Dèhe-gá.

¹⁰ Te Yá Ndiöxí ní cadúha-gá nchaandi túhú sã ío nàcuáa ní cachí iní mée-gã, te sã dúcáⁿ ñí quide-gá núu xiãⁿ váha-ni sã ñí cachí-gá sã Xítohó Jesucristú nándi ndoho-gá te cuú-gá cuendá ducaⁿ ñà túú tnàhí-gá ná cùmánì-gã núú Yá Ndiöxí. Te sã dúcáⁿ ñí cuu núu xiãⁿ ní níhí Yá Ndiöxí nàcuáa cada-gá càndeca-gá nchaa ñáyiu cunú déhe-gá quíhíⁿ núú ío váha càa cundecú-yu ndìhi-gá ñí caa ñí quíhíⁿ. Te Xítohó Jesucristú cúú-gã Yaá ní quide nàcuáa nduu táhú cue ñáyiu cundecú-yu ndìhi Yá Ndiöxí. ¹¹ Te Xítohó Jesucristú cúú-gã Yaá quidé ndècu yíñuhu ñáyiu núú Yá Ndiöxí ñáyiu sàndáá iní ñáhá xì-gá, te Xítohó Jesucristú ndìhi cue ñáyiu-áⁿ ñí-ni Yàá cúú Tãtã-yu ndìhi-gá, núu xiãⁿ Xítohó Jesucristú Yaá cúú Dèhe Dútú Ndiöxí ñá túú cùcahaⁿ núú-gã càháⁿ-gá sã ñàní-gá ndìhi cùha-gá cúú nchàa ñáyiu-áⁿ. ¹² Te quèe ndáá-xi nàcuáa càháⁿ-xi núú

tùtú Yă Ndiöxí núú cächí-xi năcuáa ní xáhaⁿ Xítóhó Jesucristú xii Tătá-gă Dútú Ndiöxí, te duha ní xáhaⁿ-gă:

Cáháⁿ vâha-í cuendá-n nŭú nchâa cue tée cùu datná ñaní-í ndihí núú nchâa cue ñâyiu dihí cúú datná cúha-í,

te cata-í ndudú chiñuhu ñaha-í xii-n núú tăcá-yu.

Duha yòdo tnuní núú tùtú-gá năcuáa ní xáhaⁿ Dêhe-gá xii-gá. ¹³ Te ingá tucu xichi núú tùtú Yă Ndiöxí cáháⁿ-xi năcuáa ní cáháⁿ Xítóhó Jesucristú cuendá-gá, te duha ní cachí-gá:

Yúhú nchaa-ni nduu quindáa iní-í Tătá-í Dútú Ndiöxí.

Duha cächí-xi núú tùtú Yă Ndiöxí năcuáa ní cáháⁿ Xítóhó Jesucristú. Te ingá tucu xichi núú tùtú Yă Ndiöxí cáháⁿ-xi năcuáa ní cáháⁿ tucu Xítóhó Jesucristú, te duha ní cachí-gá:

Iha ndècu ndihí-í nchaa ñâyiu cùu déhe Tătá-í Dútú Ndiöxí, te ñiu-ni ñâyiu-áⁿ ní taxi cuendá Tătá-í cuu cuendá-í.

Duha cächí-xi núú tùtú-gá năcuáa ní cáháⁿ Xítóhó Jesucristú.

¹⁴ Te sá cuendá nchaa ñâyiu cùu déhe Yă Ndiöxí cúŭ-yu yiqui cùñú, núú xiăⁿ ducaⁿ tnáhá Xítóhó Jesucristú ní cuu-gá yiqui cùñú, te ducaⁿ ní cuu-gá yiqui cùñú cuendá cuú-gá, te sá dúcáⁿ cùú-gá te ndacu-gá daquèe tihú-gă sácuihná, te ñiu sácuihná-áⁿ quidé-xí xihí ñâyiu. ¹⁵ Te ducaⁿ ní quide-gá cuendá sá cue ñâyiu ñuyíú-a vá

yúhú-gá-yu sá cùú-yu, chi nchaa-ni nduu yúhú-yu sá cùú-yu. ¹⁶ Te na cächí tnúhu ndáá-í sá Xítóhó Jesucristú ní quixi-gá cuendá chindee-gă cue ñâyiu cùu ñaní tnáhá ndii Àbrahám, te ñá díú cuendá sá chindèe-gá cue espíritú xínú cuèchi núú Yă Ndiöxí. ¹⁷ Te cuendá xiăⁿ núú dai ní xini ñuhu-xi sá cúú-gá ñâyiu cuendá yăha-gá nándi sá yăha-gá datná yăha cue ñâyiu cùu ndi mee-gá cuendá ducaⁿ cùu-gá dútú ïo cùnuu te cuu ndáá-gá núú Yă Ndiöxí, te cundáhú iní-gá nchaa ñâyiu te cuú-gá cuendá sá vă cundècu-gá cuèchi-yu núú Yă Ndiöxí. ¹⁸ Te mei òré ndóhó Xítóhó Jesucristú ní xito ndée ñáhá sàcuihná xii-gá te núu ndisa sá vă cadá-gă ni ñⁿ sá ñà túú tàú-gá cada-gá, te sá dúcáⁿ ní ndoho-gá xiăⁿ núu ndácú-gă chindèe-gá nchaa ñâyiu ducaⁿ yăha.

3

Xítóhó Jesucristú ïo-gá cúnitu-gá dàcúúxi ndii Moisés

¹ Te nchòhó cúú-ndó ñâyiu ndècu ndihí-í ichi Xítóhó Jesucristú ñâyiu cùu cuendá Yă Ndiöxí, te tnáhá-ndó cùu-ndo ñâyiu ní cáháⁿ ñáhá-gă cuendá cundecu-ndo ndihí-gá. Te yúhú cächí tnúhu-í xii-ndo să ïo vâha cada cuendá-ndó năcuáa nduu cuendá Xítóhó Jesucristú, chi ñiu-gá cúú-gá Yáá ní tendaha ñaha Dútú Ndiöxí ní quixi-gá ñuyíú-a, te ñiu-gá cúú-gá Dútú ïo cùnuu chi quide-gá núú Yă Ndiöxí. Te ñiu-ni cuendá

Xítohó Jesucristú cãháⁿ tnúhu sá ni sàndáá iní-ó. ² Te mee Yã Ndiõxí ní sãha chiuⁿ-gã Xítohó Jesucristú, te ío ndáá quidé-gã chiuⁿ-áⁿ sã cúu-xí Yã Ndiõxí, te ñiu-ni ducaⁿ nĩ quide ndíi Moisés ní quide ndíi chiuⁿ ní táhú Yã Ndiõxí, te ío ndáá ní quide ndíi chiuⁿ-gã sá cúu-xí nchãa ñáyiú cùu cuendá-gã, te cue ñáyiú-áⁿ cúu-yu dàtná vehe mee-gã. ³ Te ñⁿ téé dãcaa ñⁿ vehe váha ío cãhnu-gã cúu-dě dácúxí vèhe dacao-dé. Te ducaⁿ sãtnahá-xi cùu Xítohó Jesucristú chi ío-gã cãhnu cuu-gã dácúxí ndíi Moisés. ⁴ Te nchoo sà naha-o sá ncháá vèhe dacuití ndècu cue téé ní dácáá, dico sa nãha tucu-o sá Yã Ndiõxí quidé-gã ndécú nchãa sá ío ñuyíú-a. ⁵ Te ndíi Moisés-áⁿ ío ndáá ní quide ndíi chiuⁿ ní táhú Yã Ndiõxí ní quide ndíi sá cúu-xí nchãa ñáyiú cùu cuendá-gã. Te sá dúcáⁿ nĩ quide ndíi xiãⁿ ní cuu ndíi ñⁿ téé ní xinu cuechi núú Yã Ndiõxí. Te ní xáhaⁿ ndíi xii nchaa ñáyiú cùu cuendá-gã nãcuáa cãháⁿ-gã ndéé cuéé-gã. ⁶ Dico Xítohó Jesucristú cúu-gã Déhe mee Yã Ndiõxí, te cùu-gã Yaá ío quide ndáá yíndãha-gã nchaa ñáyiú cùu cuendá Yã Ndiõxí. Te tnãhá-ó cùu-o ñáyiú cùu cuendá-gã, te ñiu-ni ducaⁿ cùu cuendá ñãhá-gã xii-o te núu na cãnchicúⁿ nihnu-ni-o cãni ndáá iní-ó cuendá-gã ndéé ná sáá nduu ngũndecu-o ndíhi-gã.

Cue ñáyiú cùu cuendá Yã Ndiõxí ío váha cùu iní-yu ndécú-yu ndíhi-gã

⁷ Te núú tütú Yã Ndiõxí yódó tnúni nãcuáa ní cãháⁿ Espiritú-gã, te duha ní cachí-xi:

Te núu nchòhó ndèdòho-ndo nchãa tnúhu cãháⁿ Yã Ndiõxí vitna,

⁸ te vá cùndùu sáá iní-ndó dàtná ní xínduu sáá iní ñáyiú ní dáquéé tĩhú tnúhu Yã Ndiõxí, ñáyiú ní xíndecu xití yucu,

chi ñáyiú-áⁿ nĩ xito ndeé-yu Yã Ndiõxí núu nãsa cada ñaha-gã xii-yu.

Duha ní cachí Espiritú-gã. ⁹ Te cãchí tucu Espiritú Yã Ndiõxí nãcuáa ní cãháⁿ méé-gã, te duha ní cachí-gã:

Xití yucu ní xito ndéé ñãhá cué ñani tnãhá-ndó nĩ xíndecu ndéé sanaha xii-í,

te ducaⁿ nĩ quide ñãhá-yu cuéi ní xiní-yu nchaa sá nĩ quide-í ndi ùdico cuíá nĩ xíndecú-yu xití yucu-áⁿ.

¹⁰ Te sá dúcáⁿ nĩ quidé-yu núu xiãⁿ ní cudéèⁿ-í núú-yu, núu xiãⁿ ní cãháⁿ-í cuendá-yu, te ní cachí-í:

“Ñáyiú-a quide-ní-yu nchaa sá ñã túú tàú-yu cadá-yu te ni ñã túú cuini-yu cadá-yu nchaa nãcuáa sãni iní-í,

te ni ñã túú cuini-yu cadá-yu nãcuáa cãháⁿ-í”,

duha ní cãháⁿ-í cuendá-yu.

¹¹ Te xiãⁿ núu ní cudéèⁿ-í núú-yu te ní xáhaⁿ ndãá-í xii-yu sá vã ndúú tãhũ-yu cundecu váha-yu núú ndécú-í.

Duha ní cachí Yã Ndiõxí cãchí Espiritú-gã.

12 Te nchòhó ñáyiu ndècu ndihí-í ichi Xítohó Jesucristú, càháⁿ-í dóho-ndo sã ïo cada cuendá-ndó vã càni cuèhé iní-ndó te ngóo-ndo vã quìndáá-gá iní-ndó Yã Ndiöxí te dañá-ndo ìchi-gá, te diu-gá cúu-gã Yaá ndécú nchaa nduu nchaa quíu. 13 Te ìⁿ nduu ìⁿ nduu ío chí cuãha tnàha tnúhu ndee iní cundecu-ndo nini ndecu-ndo ñuyíú-a cuendá sã vã xínu iní-ndó càda-ndo nándi sã cuèhé sã dúhá, te ducaⁿ te vã cúu sàá iní-ndó nũu Yã Ndiöxí. 14 Te vã dañá ndeé-ó càni ndáá iní-ó nàcuáa cada ñaha Yã Ndiöxí xii-o, te dàtná-ni ní sani iní-ó ndeé cùtnàhá ní tuha-o ìchi Yã Ndiöxí, te diu-ni ducaⁿ càni iní-ó ndeé ná sàá nduu vã cùndecu-gá-ó ñùyíú-a, te núu ducaⁿ na càda-o te cùu ìⁿnuu-o ndihí Xítohó Jesucristú.

15 Te duha càháⁿ-xi ìⁿ xichi núu tùtú Yã Ndiöxí:

Te núu nchòhó ndedóho-ndo nàcuáa càháⁿ Yã Ndiöxí vitna,

te vã cùndùu sàá iní-ndó dàtná ní xínđuu sàá iní cue ñáyiu ní dáquée tñú tnúhu-gá ndeé sanaha.

Duha càchí-xi núu tùtú-gá.

16 Te cue ñáyiu ducaⁿ ní xínđuu sàá iní-xi cùu-yu ñáyiu ní ndeñuhu ndí Moisés nacióⁿ Ègíptú, te ñáyiu-áⁿ ní xíndedóho-yu tnúhu ní càháⁿ Yã Ndiöxí te ní quide sàá iní-yu ní dáquée tñú-yu tnúhu-gá. 17 Te ndi ùdico cuíá ní xúhuⁿ-yu ìchi ío ní cùdeéⁿ Yã Ndiöxí nũu-yu cuendá sã ní quidé-yu nándi

nchaa sã cuèhé sã dúhá, te ñáyiu-áⁿ ní xíhí-yu xítí yucu.

18 Te nchaa ñáyiu-áⁿ ñà túú ní cuiní-yu tñí-yu tnúhu ní càháⁿ Yã Ndiöxí nũu xiáⁿ ní càháⁿ ndáá-gá sã vã ndúú tãhú-yu cundecú-yu núú ïo váha càa ndecu-gá. 19 Te xiáⁿ nũu nchoo cùtnuní iní-ó sã nchaa ñáyiu-áⁿ ñà túú ní ndúu tãhú-yu cundecu váha-yu núú ndécú-gã, chi ñá túú ní sàndáá iní-yu tnúhu ní càháⁿ-gá.

4

1 Te vitna ndècu ndihí-gá-ó tnúhu Yã Ndiöxí tnúhu sã dãnèhé ñáhá xii-o sã cúu cùndecu váha-o nũú ndécú-gã, te tàú-xi quiyùhú iní-ó chi na cuáháⁿ te vã ndúú tãhú-ó cùndecu váha-o nũú ndécú-gã.

2 Te tnàhá nchoo ní ngùndecu ndihí-o tnúhu sã càháⁿ nàcuáa naníhí tãhú-ó dàtná ní xíndecu ndihí cue ñáyiu ndeé sanaha, dico ñáyiu-áⁿ chi ñá túú vèdana ní nàndíhi-xi cuèi ní xíndedóho-yu tnúhu-áⁿ chi ñá túú ní sàndáá iní ñãhã-yu xii-gá. 3 Dico nchoo cùu-o ñáyiu ní sàndáá iní tnúhu Yã Ndiöxí, núu xiáⁿ nduu tãhú-ó cùndecu váha-o nũú ndécú-gã, te ní quee ndáá-xi nàcuáa càháⁿ-gá núu tùtú-gá núu càchí-xi:

Yúhú ní cudéèⁿ-í núu-yu, te ní càháⁿ ndáá-í sã vã ndúú tãhú-yu cundecu váha-yu núú ndécú-í.

Duha ní cachí-gá. Te cuu nduu tãhú-yu cundecu váha-yu núú ndécú Yã Ndiöxí ní cùu, chi sa ní xínu cava nchaa chiúⁿ ní quide-gá sã

nĩ cadúha-gá ñuyíu. ⁴ Te núú tütú Yã Ndiõxí cãháⁿ-xi nãcuáa ní quide-gá nduu úsá, te duha cãchí-xi:

Yá Ndiõxí ní quide chi^uⁿ-gá iñú nduu ní quide-gá nchaa chi^uⁿ-gá te ní ndetatú-gá nduu úsá.

Duha cãchí-xi núú tütú-gá.

⁵ Te cãchí tucu-xi núú tütú Yã Ndiõxí nãcuáa ní cãháⁿ-gá cuendá cue ñáyiu ndée sanaha, te duha ní cachí-gá:

Cue ñáyiu-a vá ndúú tãhú-yu cundecu váha-yu núú ndécú-í ndétátú-í.

Duha ní cachí-gá. ⁶ Te

ñáyiu ní xíndedóho tnúhu sá cãháⁿ nãcuáa naníhí tãhú-ó ndée sanaha, ñá túú ní ndùu tãhú-yu cundecu váha-yu núú ndécú Yã Ndiõxí ndétátú-gá, te ducaⁿ chi ñá túú ní sãndáá iní ñãhá-yu xii-gá, dico ìó-gá ñáyiu nduu tãhú cundecu váha núú ndécú-gã ndétátú-gá. ⁷ Te

ní xica cuéhé nduu sá dúcáⁿ ñá túú ní sãndáá iní ñãhá ñáyiu-áⁿ xii-gá, te dàtnú ní cãháⁿ ndíi Dãvíi yuhu-gá nãcuáa cada-gá vitna, te diu-ni nãcuáa sa yòdo tnuní diu-ni ducaⁿ chido tnuní tucu-í nãcuáa ní cãháⁿ ndíi yuhu-gá, te duha ní cachí-gá:

Te núu nchòhó ndédóho-ndo tnúhu cãháⁿ-í te vá cáda sãá iní-ndó.

Duha ní cachí-gá. ⁸ Te

ndíi Jòsué ní sanu ichi ndíi ñáyiu núú quihíⁿ-yu cundecu váha-yu, dico ñá díú cuendá xíáⁿ ní cãháⁿ Yã Ndiõxí, chi cuendá nãcuáa cada-gá vitna ní cãháⁿ-gá. ⁹ Núu

xíáⁿ sáá nduu ndùu tãhú nchaa ñáyiu cùu cuendá Yã

Ndiõxí ngúndecu váha-yu núú ndécú-gã ndétátú-gá. ¹⁰ Te

nchaa ñáyiu ducaⁿ na ndùu tãhú cundecu váha núú ndécú Yã Ndiõxí ndétátú-gá, te tnãhá-yu ndetatú-yu cuendá nchaa sá váha ní quidé-yu dàtná ndétátú méé-gã. ¹¹ Te xini ñuhu-xi sá nchóó ìo nducu ndèe-o nducu-o nãcuáa cada-o cuendá nduu tãhú-ó ngúndecu váha-o núú ndécú Yã Ndiõxí ndétátú-gá, chi na cuáháⁿ dava-ndo cáda-ndo datná ní quide cue ñáyiu ñá túú ní sãndáá iní ñãhá xii-gá, te vá ndúú tãhú-ndó cundecu váha-ndo núú ndécú-gã te núu ducaⁿ na cáda-ndo.

¹² Te tnúhu Yá Ndiõxí cúu-xí dàtná ìⁿ sá nchító-ó chi quide-xi nãndi sá quidé-xí, te cùu-xi datná ìⁿ sá dèéⁿ víhí-gã dàcúúxí ìⁿ yuchí sá ndée úú xio núú-xi. Te ducaⁿ sãtnahá-xi cùu tnúhu-gá chi quée-xi iní-ó, te dàndixi túu-xi nchaandi túhú sá sãní ìní-ó te núu quide váha-o àdi ñá túú quide váha-o ndècu-o.

¹³ Te ni ìⁿ sá nĩ cadúha Yá Ndiõxí vá cãní ìní-ó sá ndácú-xí nguivãha-xi núú-gã, chi nchaandi túhú sá sãní ìní-ó ndècu túu-xi núú-gã, te diu núú Yáá-áⁿ na cãni cuendá-ó nchàa sá quidé-ó.

Xítóhó Jesucristú cúu-gã Dútú ìo cùnnuu

¹⁴ Te Xítóhó Jesucristú cúu-gã Dútú ìo cùnnuu ndecu ndihi-o, te diu-gá cúu-gã Déhe Dútú Ndiõxí, te Yáá-áⁿ cuãndaa-gá andiu nĩ nucúndecu-gá núú Yã Ndiõxí, núu xíáⁿ tàú-xi sá cãnchícúⁿ nihnu-ni-o quindáá

iní-ó-gã. ¹⁵ Te mee Yàá-áⁿ ìo cùnunu-gá cúú-gã dútú-ó ndècu ndihí-o, te ío na cùndahú iní ñáhá-gã xii-o cuèndá sá ñá nihí ndéé-ó cùndecu-o. Te ducaⁿ càda-gá chi ní yáha-gá dàtná yáha mee-o, chi nchaa sá ñí yáha-gá-áⁿ ñí cuu-xi sá cáda-gã nándi nchaa sá cuèhé sá dúhá ní cùu dico ni ìⁿ ñá túú ní quide-gá. ¹⁶ Núu xiáⁿ tàù-ó sã nchóó ñí yuhu ni iní-ó càháⁿ ndihí-o Yá Ndiòxí Yáá ío cùndahú iní ñáhá xii-o chindee ñaha-gá, te ducaⁿ càda-o te cundahú iní ñáhá-gã chindee ñaha-gá xii-o ndèda-ni càa oré xini ñuhu-o-gá.

5

¹ Te nchaa cue dútú cùnunu núú ñáyiú isràél diu-ni ñáyiú cùu-güedé, te ducaⁿ ñí ngùndecu-güedé cuèndá cada-güedé chiúⁿ sá cúú-xí Yá Ndiòxí cuèndá-yu, chi diu cue téé-áⁿ ñí xóo nacani cuèndá-güedé núú-gã quiti ní xóo cahni-güedé ní xóo nduu táhú-gã, te ducaⁿ ñí xóo cada-güedé cuèndá sá cáda càhnu iní Yá Ndiòxí cuéchi-yu, te ducaⁿ ñí xóo nacani cuèndá tucu-güedé núú-gã nchaa dava-gá sá ñí xóo nihí-güedé ní xóo nduu táhú-gã. ² Te nchaa cue dútú-áⁿ ñí xóo cundee iní-güedé nchaa sá ñí xóo cada nchaa ñáyiú ñá túú ní quide ndáá ñáyiú ñá túú cùtnuni iní-xi, te ducaⁿ ñí xóo cada cue dútú-áⁿ chi tnahá-güedé ñá túú ní xóo nihí ndéé-güedé cundecu-güedé cuèndá nchaa sá ñí xóo yáha-güedé. ³ Te

sá cuèndá sá dúcáⁿ ñá túú ní xóo nihí ndéé-güedé núu xiáⁿ dai ní xini ñuhu-xi sá tnahá-güedé cuáha-güedé Yá Ndiòxí sá ndúú táhú-gã cuèndá mée-güedé dàtná quidé-güedé cuèndá ñáyiú.

⁴ Te ni ìⁿ téé vá ndácú-dé cuu-dé dútú cùnunu cuèndá-ni sá cächí iní mée-dé te núu ñá diú mée Yá Ndiòxí ducaⁿ cuini-gá sá cúú-dé dútú cùnunu datná ní quide-gá ndí Àrón. ⁵ Te cuéi Xítohó Jesucristú chi ñá diú mée-gá ní quide-gá mée-gã ìⁿ dútú cùnunu nacúaa cada nínu-gá mée-gã, chi mee Tátá-gã Dútú Ndiòxí ducaⁿ ñí cachí-gá sá cúú-gã Dútú cùnunu, te ducaⁿ chi Yá Ndiòxí ní xáhaⁿ-gã:

Yòhó cúú-n Dèhe-í,
te cuini-í sá dúhá-ni cùndecu-n núú ndécù-í.
Duha ní xáhaⁿ-gã xii Xítohó Jesucristú. ⁶ Te núú tütú Yá Ndiòxí yódó tñuní nàcuáa ní xáhaⁿ tucu-gá xii Xítohó Jesucristú, te duha ní xáhaⁿ-gã:
Yòhó cúú-n dütú cundecu ni caa ni quíhíⁿ,
te cùu-n datná ní cuu ndí Melquisédéc.

Duha ní xáhaⁿ-gã xii Xítohó Jesucristú. ⁷ Te cùtnahá ní xíndecu Xítohó Jesucristú ñuyíú-a te nihí ní xóo cáháⁿ ndihí-gá Yá Ndiòxí te ní xóo cáháⁿ ndàhú-gá núú-gã, te ní xóo ndáhyú-gá òré ducaⁿ ñí xóo cáháⁿ ndihí-gá Yá Ndiòxí, te ducaⁿ ñí quide-gá chi nàha-gá sá Yá Ndiòxí cúú-gã Yáá ndacu dàcácu nihnu ñaha xii-gá cuèndá sá vá cùú dúcáⁿ-gã. Te Yá Ndiòxí ní xíndedóho-gá nchaa tñuhu

ní cáháⁿ Xítoho Jesucristú cuendá sá ñi quide-gá nchaa nàcuáa ní xáhaⁿ Yá Ndiöxí cada-gá. ⁸ Te sá cuendá nchaa sá ñi ndoho Xítoho Jesucristú xíáⁿ ní cutnùní iní-gá cada-gá nchaa dava-gá sá vâha nàcuáa cuení méé Yá Ndiöxí cada-gá. Te ducaⁿ ñi cuu cuéi cùu-gá Déhe Yá Ndiöxí. ⁹ Te sá dúcáⁿ ñi quide-gá nchaa nàcuáa cuení méé Yá Ndiöxí, xíáⁿ nûu vitna cùu-gá Yaá dácãcu nihnu nchaa ñáyiu sàndáá iní ñáhá xii-gá núú ùhú núú ndàhú. ¹⁰ Te mee Yá Ndiöxí ní cachí-gá sá Xítoho Jesucristú cúu-gá dútú cùnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuendá ñáyiu cuení daña nihnu ichi Yá Ndiöxí

¹¹ Te vâi-gá tnúhu ndècu cáháⁿ-í nàcuáa ndùu cuendá Xítoho Jesucristú, ndihí ndíi Melquisèdec, te dicó-ni sá nchòhó ío cuéé tècú tnùnì-ndó, te yúhú ío ùhú nihí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhé nduu ndècu-ndo ichi Xítoho Jesucristú, te tàu-ndó dânehé-ndó cué ñáyiu ndècu ichi-gá tnúhu-gá nûu dicó sá cúu, dico xìni ñuhu-ni-xi sá cùndècu ñáyiu danèhé ñáhá tnúhu-gá xii-ndo, tnúhu sá ñi dácúáhá-ndó ndéé díhna sá ñã túú ùhú tecú tnùnì-ndó. Te sá dúcáⁿ quide-ndo núu xíáⁿ cúu-ndó datná cue landú vitna sâdi camá, landú vátá cúu-gá caxi dítá. ¹³ Chi nchaa ñáyiu cùu datná landú vitna sâdi, ñáyiu-áⁿ cúu nêñuú-yu ñã túú cùtnuní iní-yu nàcuáa

cáháⁿ tnúhu sá cáháⁿ nàcuáa cada ndáa-yu cundecú-yu. ¹⁴ Te nchaa sá vátá cúu-gá caxi cue landú yíquíⁿ xíáⁿ cúu-xí cuendá cue ñáyiu sacuéhé, te xíáⁿ cúu-xí datná tnúhu sá dácúàha ñáyiu sa ní níhí ndéé ndècu ichi-gá, ñáyiu sa ní cutnùnì vâha iní-xi nândi cùu nchaa sá cuéhé sá dúhá, ndihí nândi cùu nchaa sá vâha.

6

¹ Te xíáⁿ nûu vitna xìni ñuhu-xi dacuaha-o dava-gá tnúhu Yá Ndiöxí cuendá ducaⁿ te cuu-o ñáyiu tècú tnùnì nchaa tnúhu-gá. Te xìni ñuhu-xi sá ncháá tnúhu Xítoho Jesucristú sá ñi dácúáhá-ó ndéé díhna vá dácúàha-gá-ó datná ní dácúáhá-ó chi sa tècú tnùnì-ó. Te ñã túú-gá xíni ñuhu-xi dacuaha-o datná ní dácúáhá-ó ndéé díhna nàcuáa cada-o ndixi cuéchi iní-ó cuendá nchaa sá cuéhé sá dúhá quide-o, sá tá dàcuíta nihnu ñaha xìi-o cuáháⁿ ní cùu. Te ducaⁿ vá dácúàha-gá tucu-o datná ní dácúáhá-ó ndéé díhna nàcuáa cada-o quindáá iní-ó Yá Ndiöxí, ² ndihí cuendá nàcuáa ní dácúáhá-ó nàcuáa cuandute-o, ndihí cuendá nàcuáa cada-o càcáⁿ ndodo-o ndàha-o díquí ñáyiu ní sándáá iní ñáhá xii-gá. Te ducaⁿ ñã túú-gá xíni ñuhu tucu-xi dacuaha-o datná ní dácúáhá-ó ndéé díhna cuendá nàcuáa ndoto cue ñáyiu ní xíhí, ndihí cuendá nàcuáa ní dácúáhá-ó sã Yá Ndiöxí daquihíⁿ-gá ñáyiu núú ùhú núú ndàhú ni caa ni quihíⁿ. ³ Te núu Yá Ndiöxí ná càchí-gá, te cuita dacuàha-gá-ó ncháa

dava-gá tnúhu sá cúmăní quihíⁿ.

4 Te cue ñáyiú sa təcú tnùnı́ tnúhu Yá Ndiöxı́, ñáyiú sa xını́ nchaa năcuáa ndùu nchaa sá vâha quide ñaha Yá Ndiöxı́ xii-o ndihı́-yu, ñáyiú sa chı̄ndee ñaha Espiritú Yă Ndiöxı́, ⁵ ñáyiú sa cùtnunı́ inı́-xı́ sá ı̄o vâha tnúhu Yá Ndiöxı́, ñáyiú sa xını́ năcuáa ta quide Yá Ndiöxı́ véxi nchaa sá vâ yõo tnăhı́ ndăcu cada, ⁶ te núu ñáyiú-áⁿ ná ngũita tucú-yu daquèe tı́hú duúⁿ-yu tnúhu Yá Ndiöxı́, te vâ ndácú-gă-ó nà canu ichi-ó-yu năcuáa ndixı́ cuéchi inı́-yu te núu ducaⁿ na cãdá-yu, te sá dúcáⁿ ná cãdá-yu te tnăhá-yu cùú-yu dătná cue tée ní sahnı́ ñaha xii Xı́tohó Jesucristú Déhe Yá Ndiöxı́ núú cùrúxı́. Te sá dúcáⁿ ná cãdá-yu te ngóo dava-gá ñáyiú cáháⁿ cuèhé-yu cuendá Xı́tohó Jesucristú. ⁷ Te nchaa ñáyiú cùú-yu dătná ñuhu, chi ñuhu-áⁿ ndı́ tnăhá òré cúúⁿ dăú te xı́hi-xı́ ndute, te dava ñuhu vâha cùu sá xı́tú ñáyiú, te sá cúú núú ñuhu-áⁿ ı̄o năndı́hi-xı́, te mee Yă Ndiöxı́ quidé-gă cúú sá vâha núú ñúhú-ăⁿ. ⁸ Dico núú da ı̄nu na ndăa núú ñuhu-áⁿ te ñá túú vėdana năndı́hi-xı́ te núu ducaⁿ, te Yá Ndiöxı́ vâ cúú vâha inı́-gá cuendá ñuhu-áⁿ sá dúcáⁿ dă ı̄nu ndaa núú-xı́, te ı̄nu-áⁿ ndihı́-xı́ cáyú. Te ducaⁿ sătnăhá-xı́ cùu ñáyiú dăquee tı́hú tnúhu Yá Ndiöxı́ chi ñá túú cùu vâha inı́-gá núú-yu.

Nı́hi-ó să ndétú-ó ndı̄u tăhú-ó

⁹ Te cuéi duha cáháⁿ-ı́ dico nchòhó cue ñáyiú ı̄o cùu inı́-ı́, chi cùtnunı́ ndáá inı́-ı́ sá vâ cãdá-ndó dătná xı́quide dava-gá ñáyiú, te mee-nı́ să vâha cuu xii-ndo chi cùu-ndo ñáyiú sa ní nanihı́ tăhú. ¹⁰ Te ducaⁿ chi Yá Ndiöxı́ cúú-gă Yaá ı̄o vâha quide ndáá, te vâ dăná ndòdo inı́-gá nchaa sá vâha quide-ndo, te ní vâ dăná ndòdo inı́-gá năcuáa quide-ndo cuu inı́-ndó-gă, te sá dúcáⁿ quide-ndo cuu inı́-ndó-gă xı́ⁿ chı̄ndèe-ndo cue ñáyiú ndècu ndihı́-ndo ichi Xı́tohó Jesucristú, te ducaⁿ-ni ta quide-ndo véxi ndéé vitna. ¹¹ Te cuını́-ı́ sá ı̄ıⁿ ı̄ıⁿ-ndo nducu ndee-ndo cada-ndo năcuáa cuını́ Yă Ndiöxı́ dătná tá quide-ndo véxi, te dı̄u-nı́ ducaⁿ cãda-ndo ndéé ná sáa nduu ndùu tăhú-ndó cùndecu-ndo ndihı́-gá núú ndécú-gă, te ducaⁿ te níhi-ndó nchăandı́ tı́hú sá ndétú-ndó ndùu tăhú-ndó cùndecu ndihı́-ndo ní caa ní quihı́ⁿ. ¹² Te yúhú cuını́-ı́ sá nchòhó vâ tı́hı́o-ndo cãda-ndo nchaa năcuáa cuını́ Yă Ndiöxı́, te cada-ndo dătná quidé ñáyiú sândáá inı́ tnúhu-gá, ñáyiú căhnı́ inı́-xı́. Te sá dúcáⁿ quidé-yu xı́ⁿ nihı́-yu nchaa sá ñı́ cachı́ Yă Ndiöxı́ nduu tăhú-yu.

¹³ Te cùtnăhá ní xáhaⁿ Yă Ndiöxı́ xii ndı́ Abrahám năcuáa cada-gá, te ní căcunehe-gá méé-gă năcuáa cutnùnı́ inı́ ndı́ sá ndăá cada-gá năcuáa ní xáhaⁿ-gă xii ndı́, te vâ yõo ı̄ıⁿ ní căcunehe-gá cuendá sá quındáá inı́ ndı́ tnúhu

ní cáháⁿ-gá. Te ducaⁿ nĩ quide-gá chi ñⁿdii díi-ni mee-gã ío cùnuu-gá. ¹⁴ Te duha ní xáhaⁿ-gã xii ndii Àbrahám; “Yòhó té Àbrahám na cãchí tnúhu ndáá-í xii-n sã ío chindee ñàha-í xii-n, te cáyá cuéhé víhí ñàni tnáhá-n”, duha ní xáhaⁿ-gã xii ndii. ¹⁵ Te ndii Àbrahám ío ní quide ndee ìní ndii ní xíndetu ndii, te ducaⁿ te Yá Ndiõxí ní quide-gá nãcuáa ní xáhaⁿ-gã cada-gá sá cúu-xí ndii. ¹⁶ Te núu ñⁿ ñáyiu cãháⁿ ñⁿ tnúhu ndáá cuiti te càcu nehé-yu Yá Ndiõxí cuendá quíndáá ìní tnàha ñáyíu-yu tnúhu cãháⁿ-yu, te òré ducaⁿ na cãháⁿ-yu te ñã túú-gã sá dácáa ñáyiu cãháⁿ ndihí-yu cuendú. ¹⁷ Te ducaⁿ nĩ quide Yá Ndiõxí ní cáháⁿ ndáá-gá sá cádá-gã nãcuáa ní cachí-gá, te ducaⁿ nĩ cáháⁿ-gã cuendá nchaa ñáyiu ní cachí-gá nduu táhú sã cádá-gã nãcuáa cutnùní ìní-yu sá quidé-gã ñⁿ sá cãháⁿ-gá, te ní ñà túú nãdáma-gã ñⁿ sá cãháⁿ-gã. ¹⁸ Te nchoo nĩ natuha-o Yá Ndiõxí cuendá dácacu ñihnu ñàha-gã xii-o núú ùhú núú ndàhú, te ní níhí-ó tnúhu ndee ìní ndécú ndihí-o cuendá sá vã dáña ndèé-ó cùndetu-o sáa nduu ndùu táhú-ó cùndecu-o ndihí-gá. Te ducaⁿ nĩ níhí-ó tnúhu ndee ìní chi Yá Ndiõxí ní cáháⁿ ndáá-gá sá cádá-gã nãcuáa ní cachí-gá, te ñã túú dándahú ñáhá-gã, te ní ñà túú nãdáma-gã ñⁿ sá ní cachí-gá cada-gá. ¹⁹ Te tnúhu ndee ìní ndécú ndihí-o xiãⁿ quidé-xí cutnuní ndáá ìní-ó sã

ndúú táhú-ó cùndecu-o ndihí Yá Ndiõxí núú ndécú-gã, te ducaⁿ cutnuní ndáá ndisa ìní-ó sã cuendá Xítóhó Jesucristú Yáa ndécú núú Yá Ndiõxí. ²⁰ Te ducaⁿ nĩ nucùndecu Xítóhó Jesucristú núú Yá Ndiõxí cuendá ducaⁿ cãchicúⁿ ñihnu-o càda-o, te ducaⁿ nĩ nucùndecu-gá núú Yá Ndiõxí chi cùu-gá dútú cùnùu datná ní cunuu ndii Melquisèdec ñuyíu-a, te ducaⁿ-ni cùu-gá dútú cùnùu ni caa ni quihíⁿ.

7

Xítóhó Jesucristú cúu-gã dútú datná ní cuu ndii Melquisèdec

¹ Te ndii Melquisèdec ní xíndaha ndii cue ñáyiu ñúú Sàlém, te ní cuu ndii dútú nĩ xinu cuechi ndii núú Dútú Ndiõxí Yáa ío cùnuu. Te ndii Melquisèdec-áⁿ ní xicáⁿ táhú ndii núú Yá Ndiõxí cuendá ndii Àbrahám cutnàhá ní sáháⁿ ndii Àbrahám-áⁿ ní nàá ndii ndihí cue dava-gá cue téé yíndaha ñáyiu. Te cue téé-áⁿ ñà túú ní ndàcu-güedé nàá-güedé ndihí ndii Àbrahám-áⁿ chi ní xíta-güedé. ² Te nchaa sá ní níhí ndii Àbrahám-áⁿ núú ní nàá ndii, te ní quide ndii úxí xichi te ñⁿ xichi núú ùxí-áⁿ ní sãñaha ndii xii ndii Melquisèdec. Te ñuu ndii Melquisèdec-áⁿ quée-xí: Téé ío váha quide ndáá yíndaha ñàha xii ñáyiu, duha quèe-xi. Te ní xóo danàni ñahá-yu xii ndii Téé yíndaha ñúú Sàlém, duha ní xóo danàni ñahá-yu. Te tnúhu Sàlém-áⁿ quée-xí:

Ñuú ndécú nàhi, duha quèe-xi tnúhu-án. Núu xiáⁿ quée tucu-xi nacuaa nàni ndíi Téeyindaha ñuú ndécú nàhi, duha quèe tucu-xi diu ndíi. ³Te ñá túú tnúhu núu yoo cùu tátá ndíi ndihí náná ndíi, te ni ñà túú tnúhu núu yoo cùu xíi ndíi ndihí xítná ndíi, te ni ñà túú tnúhu núu nándi cùu ñáiyu ní cuu ñaní tnáhá ndíi ní xíndecu ndée sanaha-gã, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xihí ndíi. Te ndíi-án ducaⁿ-ni ní cuu ndíi dútú ní xíndecu ndíi, te ducaⁿ sãtnahá-xi cùu Xítohó Jesucristú déhe Yá Ndiõxí chi cuu-gá dútú ni caa ni quihíⁿ.

⁴ Te vitna chí cuãha váha cuendá sá ndíi Melquisèdec ní cuu ndíi ñⁿ téé ío ní cuu càhnu ní xíndecu ñuyíu-a, chi ndíi Àbrahám téé ní cuu ñaní tnáhá-ó ní xíndecu ndée sanaha ní quide ndíi úxí xichi nchaa sá ní níhí ndíi núú ní nàá ndíi. Te ñⁿ xichi núú ùxí-án ní sãñaha ndíi xii ndíi Melquisèdec. ⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñaní tnáhá ndíi Lèví sá cuè téé-án queheⁿ-güedé ñⁿ xichi núú ùxí xichi sá níhí cue ñáiyu isràél ñáiyu cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndihí-yu ní cuu ndíi Àbrahám. ⁶ Te cuèi ñá díú ñaní tnáhá ndíi Melquisèdec cúu ndíi Àbrahám dico ní queheⁿ ndíi Melquisèdec-án ñⁿ xichi núú ùxí xichi nchaa sá ní níhí ndíi Àbrahám. Te ndíi Melquisèdec-án ní xicáⁿ táhú

ndíi núú Yá Ndiõxí cuendá ndíi Àbrahám. Te diu-ni ndíi Àbrahám-án ní xáhaⁿ Yá Ndiõxí xii ndíi sá cáda váha ñaha-gã xii ndíi. ⁷ Te sa cùtnuní iní-ó sá núu ñⁿ téé na cacáⁿ táhú-dé núú Yá Ndiõxí cuendá ñⁿ ñáiyu, te téé-án cúnùu-gá-dé. ⁸ Te cue dútú ñáiyu isràél quèheⁿ-güedé ñⁿ xichi núú ùxí xichi nchaa sá níhí-yu cùu cuendá-güedé, te cue téé-án cuú-güedé. Te núú tütú Yá Ndiõxí càchí-xi sá ndíi Melquisèdec ndécú-ní ndíi, te ducaⁿ càháⁿ-xi chí ñá túú tnúhu sá ní xihí ndíi. ⁹⁻¹⁰ Te sá dúcáⁿ ní sãñaha ndíi Àbrahám sá ní nduu táhú ndíi Melquisèdec, te xiáⁿ cada iní-ó sá sá ndecu ndihí ndíi Àbrahám cue ñaní tnáhá ndíi Lèví cue téé cùu dútú, cue téé quèheⁿ ñⁿ xichi núú ùxí xichi nchaa sá níhí ñáiyu isràél cuèi vátá cacú-gã-güedé. Te cada iní-ó sá tnáhá-güedé ní sáha-güedé ndíi Melquisèdec ñⁿ xichi núú ùxí xichi nchaa sá ní níhí ndíi Àbrahám núú ní nàá ndíi. Te ducaⁿ càda iní-ó chí cue téé-án cuú-güedé ñaní tnáhá ndíi Àbrahám cuèi vátá cacú-gã-güedé dàvá-án.

¹¹ Te sá cuendá cue dútú cue téé cùu ñaní tnáhá ndíi Lèví ní ngúndecu ndihí cue ñáiyu isràél tnúhu sá sánú ìchi ñaha xií-yu nàcuáa cada-yu cundecú-yu. Te ñaní tnáhá ndíi Àron cúu cuè dútú-ãⁿ. Te núu dicó cue dútú-ãⁿ ní ndàcu-güedé cada-güedé nàcuáa cudíu ñáiyu isràél núú Yá Ndiõxí, te ñá túú-gã xíní ñùhu-xi ngúndecu ingá dútú dàtná ndíi Melquisèdec ní cùu. Te dútú-ãⁿ ñà túú ní

cùu-dé dàtná ní cuu cue ñani tnáhá ndii Àrón. ¹² Te núú cuè dútú cue tée cùu ñani tnáhá ndii Lèví-áⁿ ní ngúndecu ingá dútú. Te sá dúcáⁿ ní ngúndecu ingá dútú xiáⁿ dacuítí ní xini ñuhu-xi sá dăma năcuăa ndùu tnúhu sá sánú ichi ñaha xii-yu năcuăa cadă-yu cundecú-yu. ¹³⁻¹⁴ Te ñu-ni cuendá dútú-ăⁿ sa nihí-ó tnúhu, te dútú-ăⁿ cúú Xítohó Jesucristú, te ñá díú ñani tnáhá ndii Àrón cúú-gă chi ñani tnáhá ndii Júdă cúú-gă. Te nchaa-o tà xini ndăá-ó să ñani tnáhá ndii Júdă cúú-gă, te ndii Moisés ñá túú tnáhí ná ní cachí ndii cuendá cue ñani tnáhá ndii Júdă sá cúú-güedé dútú, chi ni ñiⁿ-güedé ñá túú ní cùu-güedé dútú ní cùu.

¹⁵ Te vitna cùnuni ndăá ini-ó năcuăa ní cuu, chi Xítohó Jesucristú cúú-gă ingá dútú dàtná ní cuu ndii Melquisèdec. ¹⁶ Te ñá díú cuendá tnúhu sá sánú ichi ñaha xii ñayiu năcuăa cadă-yu cundecú-yu ducaⁿ ni cùu-gă dútú, chi ní cuu-gă dútú cuendá sá cúú-gă Yaá cundecu ni caa ni quíhíⁿ chi vá ñiⁿ ndùu te ndii nihnu-gă. ¹⁷ Te duha ní xáhaⁿ Yă Ndiöxí xii-gă:

Yòhó cúú-n dütú dàtná ní cuu ndii Melquisèdec,
te cundecu-n nchăa nduu nchaa quíú.

Duha ní xáhaⁿ Yă Ndiöxí xii-gă. ¹⁸ Te xiáⁿ núu nchaa tnúhu ndéé díhna, tnúhu sá ní xindecu ndii cue dútú ñà túú-gă cùnùu-xi vitna chi ñá túú-gă xini ñuhu-xi te ni ñà túú nă chindèe ñaha-xi. ¹⁹ Te ñu-ni tnúhu-áⁿ

cúú-xi tnúhu sá ní chídó tnuni ndii Moisés canu ichi ñaha xii ñayiu năcuăa cadă-yu cundecú-yu. Te tnúhu-áⁿ ñà túú vèdana ni quide-xi năcuăa chindee-xi ñayiu cudíu-yu núú Yă Ndiöxí. Dico vitna ní ngúndecu ndii-o tnúhu ndee ini sá ño-gă váha dăcúúxí tnúhu ndéé díhna, chi ndecu ndii-o Xítohó Jesucristú Yaá cúú dütú-ó. Te Yaá-áⁿ quidé-gă tnáhá tnúhu-o ndii Yă Ndiöxí vitna.

²⁰ Te Yă Ndiöxí ní cáháⁿ ndăá cuiti-gă sá Xítohó Jesucristú cuu-gă dútú. ²¹ Dico ñá túú dùcaⁿ ní cáháⁿ-gă cuendá cue ñani tnáhá ndii Lèví cue tée ní cuu dútú, cuèi mei òré ní chisaha-güedé ní cuu-güedé dútú. Te cùtnáhá ní chisaha Xítohó Jesucristú cúú-gă dútú, te Yă Ndiöxí ní xáhaⁿ ndăá cuiti-gă xii-gă, te duha ní xáhaⁿ-gă:

Yúhú Dütú Ndiöxí cáháⁿ ndăá cuiti-í te vá dămà-í tnúhu cáháⁿ-í:
“Yòhó cúú-n dütú dàtná ndii Melquisèdec,

te cundecu-n ni caa ni quíhíⁿ.”
Duha ní xáhaⁿ Yă Ndiöxí xii Xítohó Jesucristú. ²² Te Xítohó Jesucristú quidé-gă năcuăa cùnuni ndăá ini-ó să Yă Ndiöxí cada-gă ingá núú să váha sá cúú-xi-ó dàtná ní cachí-gă, te xiáⁿ cúú-xi să ño-gă váha dăcúúxí tnúhu ní cáháⁿ-gă ndéé díhna. ²³ Te ño cuéhé cue ñani tnáhá ndii Lèví ní cuu-güedé dútú, te ducaⁿ cuendá sá ñà túú ní cùdí-güedé cundecu-güedé chi ní ndii-güedé ní xihí. ²⁴ Dico Xítohó Jesucristú chi vá cùú-gă, chi cundecu-gă

ni caa ni quíhíⁿ nũu xiǎⁿ diu-ni-gá cuu-gá dútú, te vá yõo ìⁿ-gá cuu dútú cada núu-gã. ²⁵ Te núu xiǎⁿ Xítohó Jesucristú dácãcu nihnu ñaha-gã xii nchoo ñãyiú núu ùhú núu ndàhú, nchoo ñãyiú sàndáá iní ñáhá xii-gá, te diu-ni nchoo cùu-o ñãyiú tnàhá tnúhu ndíhi Yá Ndiõxí, te vá ìⁿ ndùu-gá te cuíta nihnu-o. Te ducaⁿ chi Xítohó Jesucristú ñá túú xòcuiñí-gá núu Yá Ndiõxí càháⁿ ndàhú-gá cuendá-ó.

²⁶ Te Xítohó Jesucristú cúu-gã Yaá cúu dútú cúnùu xini ñuhu-o cundecu ndíhi-o, te diu-gá cúu-gã Yaá chindèe chitúu ñaha xii-o, te cùu-gá Yaá ío quide ndáá núu Yá Ndiõxí, te cùu-gá Yaá cándòo canine chi ñá túú tnàhí cuèchi-gá. Te ñá túú tnàhí quide-gá dàtná quidé nchàa cue ñãyiú ndècu ichi cuehé ichi duha, te cùu-gá Yaá ní nucúndecu andíu nũú ndécú Yá Ndiõxí te yacáⁿ táxi tnùnigá. ²⁷ Te ñá túú quide-gá dàtná ní quide cue dútú ní cunuu ní xíndecu, chi cue dútú-ãⁿ ìⁿ nduu ìⁿ nduu ní xóo cahni-güedé quiti ní xóo nduu táhú Yá Ndiõxí, te díhna-gá cuendá nchaa cuèchi mee-güedé ducaⁿ ní xóo cada-güedé te dàtnùní ducaⁿ ní xóo cada tucu-güedé cuendá nchaa cuèchi ñãyiú. Dico Xítohó Jesucristú chi ìⁿ xito-ni ní xíhí-gá sá cúu-xí nchàa ñãyiú chi ducaⁿ ní sani iní-gá, te vá ìⁿ ndùu-gá ducaⁿ càda tucu-gá. ²⁸ Te sá cuendá nchaa tnúhu ní chídó tnùní

ndíi Moisés xiǎⁿ ní xíndecu cue tée ní cuu dútú cúnùu, te cue tée-ãⁿ ní cuu-güedé cue tée yíca cuèchi-xi. Te sáta dúcãⁿ ní chídó tnùní ndíi Moisés nàcuáa cada ñãyiú, te ní xica cuéhe víhí ndùu te dàtnùní ní cáháⁿ ndáá cuiti Yá Ndiõxí sá Dèhe-gá cuu-gá dútú cúnùu. Te Yaá cúu Dèhe-gá-ãⁿ ní quide-gá nchaa nàcuáa tàú-xi cunduu, te diu-ni ducaⁿ càda-gá ni caa ni quíhíⁿ.

8

Xítohó Jesucristú cúu-gã dútú cúnùu

¹ Te Xítohó Jesucristú Yaá cúu dútú cúnùu ndecu ndíhi-o cuánda-gá andíu, te ní ngóo-gá xio cùha Dútú Ndiõxí Yaá ío cúnuu, te tnàhá-gá cúnùu-gá. Te diu cuendá-a cùu-xi sá ío-gá cúnùu ta cáháⁿ-ndí véxi. ² Te núu ndécú Yá Ndiõxí cúu-xí nũú lí víhí. Te cada iní-ó sã cúu-xí ìⁿ vehe te xiǎⁿ ndécú Xítohó Jesucristú cúu-gã dútú, te vehe-ãⁿ ní dácáá mèe Yá Ndiõxí te ñá díú cuè tée ñuyíú-a. ³ Te sá cuendá nchaa tnúhu ní chídó tnùní ndíi Moisés xiǎⁿ ní xíndecu cue dútú cúnùu cuendá sá cáhni-güedé quiti nduu táhú Yá Ndiõxí, te nacani cuendá-güedé núu-gã nchaa dava-gá sá nihí-güedé nduu táhú-gã. Te xiǎⁿ nũu dai ní xini ñuhu-xi sá tnàhá Xítohó Jesucristú cuáñaha-gã ìⁿ sá ndúú táhú Yá Ndiõxí, te táhú-ãⁿ cúu-xí mèe-gá chi ní xíhí-gá ní cuu-gá dàtná ìⁿ táhú sã cúu-xí Yá Ndiõxí. ⁴ Te núu ní xíndecu-ni Xítohó Jesucristú ñuyíú-a te

vá cúu-gã dútú ní cùu, chi sa ndècu cue dútú sãñaha nchàa sá ndúú tãhú Yã Ndiõxí dàtná càháⁿ nchaa tnúhu ní chídó tnùní ndíi Moisés. ⁵ Te nchaa sá quidé cuè dútú ñáyiú isràél nũtnahá-xi luha nchaa sá quidé Xítohó Jesucristú Yaa cúu dútú cùnùu ndècu andiú. Te quèe ndáá-xi nàcuáa ní xáhaⁿ Yã Ndiõxí xii ndíi Moisés cùtnáhá tá cùyatni ngüita ndíi dacàa ndíi vehe-gá, te duha ní xáhaⁿ-gã: “Ío váha cada cuendá-n nàcuáa dacàa-n vehe-í dàtná cáá sã ní dánèhé ñáhà-í xii-n xití yucu”, duha ní xáhaⁿ-gã xii ndíi. ⁶ Dico vitna chi Xítohó Jesucristú cúu-gã dútú cùnùu, te ío-gá càhnu nduu chiuⁿ quide-gá dàcúúxí cuè dútú cue ñáyiú isràél. Te ñiú Xítohó Jesucristú cúu-gã Yaa quidé tnáhá tnúhu-o ndíi Yã Ndiõxí, te ducaⁿ chi Yã Ndiõxí ío-gá váha ndùu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ío váha ndùu tnúhu ní cáháⁿ-gá xito cùu uú chi ní cachí-gá sá ìngá núú sã ío-gá váha cada ñaha-gã xii-o vitna.

⁷ Te núu nàcuáa ní cachí Yã Ndiõxí cada ñaha-gã xii-o ndéé díhna ní quide-xi nchaa nacuáa tàú-xi cundecu nàcuáa nduu tãhú-ó cundecu váha-o núu-gã ñá, te ñá túú xini ñihu-xi cáháⁿ tucu-gá sá cadá-gã ìngá núú sã váha sá cúu-xi-ó vitna ní cuu. ⁸ Te Yã Ndiõxí ñá túú ní cùu váha iní-gá núú ñáyiú isràél núu xáⁿ ní cáháⁿ-gá cuendá-yu, te duha ní cachí-gá:

Yúhú cùu-í Dútú Ndiõxí, te duha ndùu tnúhu na

càháⁿ-í: Sáa nduu te cada-í ìngá núú sã váha sá cúu-xi cuè ñani tnáhá ñáyiú isràél, ndíi cue ñani tnáhá ndíi Jùdá ñiú-ni ñáyiú isràél.

⁹ Te tnúhu sá càháⁿ-í-a ñá túú ñiⁿ-ni cuu-xi ndíi tnúhu sá ní xáhaⁿ-í xii cue ñáyiú ní cuu ñani tnáhá-yu ní xindecu ndéé sanaha càda-í-yu, te ñiú-ni dàvá-áⁿ ní quide yica-í ní ndeñuhu-í-yu nacióⁿ Ègiptú,

te ñá túú ní cuini-yu tniⁿ-yu tnúhu ní xáhaⁿ-í xii-yu cuendá ducaⁿ càda váha-í-yu,

te xáⁿ núu ní dáñá nìhnu-í-yu ñá túú-gã ní quide cuendá-í-yu.

¹⁰ Te na sãa nduu te duha ndùu tucu ìngá núú sã váha cada-í cue ñáyiú isràél.

Te yúhú cada-í nàcuáa cutnùní váha iní-yu nàcuáa cuini-í cadá-yu, te ducaⁿ ñi yuhu ní iní-yu cadá-yu.

Te yúhú Yã Ndiõxí quindaha-í-yu, te mèe-yu cuú-yu ñáyiú cùu cuendá-í.

¹¹ Te dàvá-áⁿ chi ní ñáyiú cùu ndí meé-yu,

te ní cuè dava-gá ñáyiú vá cùtnúhu tnáhá-yu sá nátùha ñahá-yu xii-í,

chi dàvá-áⁿ nchaa ñáyiú cundecu ndíi ñahá-yu xii-í,

cuèi ñáyiú cùnmu te cuèi ñáyiú ñá túú cùnmu.

12 Te dàvá-án cada càhnu iní-í nchaa sá cuèhé sá dúhá quidé-yu,

te vá ñⁿ ndùu-gá ndacu iní-í nchaa sá quidé-yu.

Duha ní cachí Yá Ndiöxí cuendá ñáyiú isràél. 13 Te sá dúcáⁿ ñí cáháⁿ Yá Ndiöxí sá cádá-gã ingá núú sã vãha sá cúu-xí ñáyiú xiãⁿ cùtnùní sá tñùhu sá ñí cáháⁿ-gá díhna ñá túú-gã xíní ñùhu-xi. Te cada iní-ó sã tñùhu-án cúu-xí ñⁿ sá ñí cunaha ndècu te ñá túú-gã nándìhi-xi te cuíta-ná-xi, ducaⁿ sãtnahá-xi cùu tñùhu sá ñí cáháⁿ-gá ndéé díhna.

9

Cuendá vehe Yá Ndiöxí

1 Te tñùhu sá ñí cáháⁿ Yá Ndiöxí ndéé díhna cùu-xi cuendá nàcuáa cada ñáyiú isràél chiñuhu ñàhá-yu xii-gá, ndihi cuendá vehe-gá caa ñuyiú-a. 2 Te ñáyiú isràél ní dácáã-yu vehe Yá Ndiöxí, te vehe-án ñí cuu-xi vehe dóó te ní xúhuⁿ nehu xití-xi. Te cuártú díhna ní xínani-xi cuártú ní cuu íí, te xiãⁿ ñí xíndecu ñⁿ sá ndéé dité-xi sá ñí cándodó ñⁿ caa candíl núú dité-xi, te ní xínutñí ñⁿ mèsá ní xóo códó pàá ní xóo nduu táhú Yá Ndiöxí. 3 Te cuártú cúu úú ní xínani-xi cuártú ní cuu íí víhí-gã. 4 Te xití cuártú-án ñí xínutñí ñⁿ sá ñí cuáha mee-ni díhúⁿ cuááⁿ te núú xiãⁿ ní xóo cahmi-güedé dúsa sá sàháⁿ tnámí. Te diu-ni xiãⁿ ñí xíndecu tucu ñⁿ càjáⁿ ní cuu mee-ni díhúⁿ cuááⁿ te xití càjá-án ñí xúhuⁿ ñⁿ lítu ní cuáha mee-ni díhúⁿ cuááⁿ, te xití lítu-án ñí xúhuⁿ mànáá sá ñí xóo caxí-yu

dàvá-án. Te diu-ni xití càjá-án ñí xúhuⁿ tñudì ndíi Àrón sá ñí saa itá-xi, ndihi yúú sá ñí xíndéé tñùhu ní cáháⁿ Yá Ndiöxí nàcuáa cada ñáyiú. Te duha ní xínani càjá-án: Càjá sá ñùhú tñùhu ní cáháⁿ Yá Ndiöxí sá cúu-xí ñáyiú, duha ní xínani-xi. 5 Te núú càjá-án ñí cándodó úú tñàhá sá ñí cadúha-yu, te xiãⁿ cáá-xí dàtná cáá espíritú xínú cuèchi núú Yá Ndiöxí. Te cuendá úú xiãⁿ ní cutnùní iní-yu sá ío càhnu cuu Yá Ndiöxí, te sá ñí cadúha-yu-án ndéé ndíxíⁿ-xi, te ndíxíⁿ-xi-án dãhu-xi xio xio núú quidé càhnu iní Yá Ndiöxí nchaa yíca cuèchi ñáyiú, dico vá cúu-gã cáháⁿ-í cuendá nchaa dava-gá xiãⁿ vitna.

6 Te nchaa xiãⁿ ní xíndecu xití vehe Yá Ndiöxí, te cue dútú ñí xóo quíhu-güedé ñⁿ nduu ñⁿ nduu xití cuártú díhna ní xóo cada-güedé nàcuáa tàu-güedé cada-güedé sá cúu-xí Yá Ndiöxí. 7 Te cuártú cúu úú-án chi mee-ni dútú cùnùu ní xóo quíhu-dé ñⁿ xito-ni ndi tñahá cuíá. Te ndi tñahá òré ducaⁿ ñí xóo quíhu dútú cùnùu-án te ní xóo canehe-dé níñí ñí xóo quíhu ní xóo nduu táhú Yá Ndiöxí. Te ducaⁿ ñí xóo cada dútú-án cuendá sá Yá Ndiöxí cada càhnu iní-gá nchaa yíca cuèchi mee-dé, ndihi nchaa yíca cuèchi ñáyiú. 8 Te sá dúcáⁿ mée-ni dútú cùnùu ní xóo quíhu-dé xití cuártú ní cuu íí-gã-án, xiãⁿ Espíritú Yá Ndiöxí quidé-xí cùtnuní iní-ó sã ñèni ducaⁿ ní xíndecu vehe-án ñí xóo cadá-yu nàcuáa ní xóo cùñaha

Yă Ndiöxí cadá-yu. Te xiăⁿ cútñuní sá vătă sàa-gá nduu cǎháⁿ ndihí-yu Yá Ndiöxí nàcuáa tàú-xi cunduu. ⁹ Te sá dúcáⁿ ní xíndecu vehe-áⁿ, ndihí sá dúcáⁿ nǐ xóo cada nchaa cue dútú-ăⁿ, xiăⁿ cútñuní iní-ó nàcuáa quide Yá Ndiöxí vitna, chi nchaa quití ní xóo cahni cue dútú-ăⁿ nǐ xóo nduu táhú Yă Ndiöxí, ndihí nchaa dava-gá sá nǐ xóo nduu táhú-gă ñá túú ní quide-xi nacuáa nduu ndoo nduu nine iní cue ñáyiu nàcuáa cutñuní iní-yu sá ñà túú-gă cuéchi-yu ndècu núú Yă Ndiöxí. ¹⁰ Te sá dúcáⁿ nǐ xóo cada nchaa dútú-ăⁿ nǐ níhí tnáhá-xí ndihí nchaa tnúhu sá dánèhé ñáhá xii ñáyiu ná cúú sǎ cǎxí-yu ndihí ná cúú sǎ cúú còhó-yu ndihí nàcuáa ndàhá-yu. Te tnúhu-áⁿ nǐ cuu-xi mee-ni sǎ nǐ sanu ichi ñaha xii-yu nàcuáa cundecú-yu ñuyúú-a. Te tnúhu-áⁿ nǐ nàndíhi-xi ndéé ní sǎá nduu ní nadama Yá Ndiöxí tnúhu-áⁿ cuèndá sǎ vǎ dúcáⁿ-gǎ cadá-yu cundecú-yu.

¹¹ Te Xítóhó Jesucristú ní quixi-gǎ ñuyúú-a, te diu-gǎ cúú-gǎ Yaá cúú dútú cúnùu, te xiăⁿ nǔu quide-gǎ nchaa sǎ vǎha sǎ cúú-xí-ó. Te vitna ní nucúndecu-gǎ núú ïo vii ïo váha càa, te núú ndécú-gǎ-áⁿ ñà túú cùu-xi ïⁿ vehe sǎ nǐ dácáá cuè téé ñuyúú-a. ¹² Te cada iní-ó sǎ Xítóhó Jesucristú cuánguihu-gǎ xiti cuártú núú nǐ cuu íi víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gǎ núú ndécú Yă Ndiöxí. Dico ñá túú ní

quide-gǎ dàtná ní xóo cada dútú cúnùu ní xíndecu ndéé sanaha, chi dútú-ăⁿ òré ní xóo quihu-dé xiti cuártú ní cuu íi-gǎ-áⁿ, te ní xóo canehe-dé níñí chívá ndihí níñí chèhlu ní xóo quihu. Dico Xítóhó Jesucristú chi níñí mée-gǎ ní sati ní xihí-gǎ núú cùrúxí, te xiăⁿ duuⁿ duuⁿ cuáháⁿ-gǎ ní nucúndecu-gǎ núú ndécú Yă Ndiöxí. Te sá dúcáⁿ nǐ quide-gǎ xiăⁿ ní naníhí tàhú-ó. ¹³ Te nchaa ñáyiu ní xóo cada nàcuáa vá cúú-gǎ-yu ñáyiu ní cuu íi, ñáyiu-áⁿ nǐ xóo códó ñáhá cuè dútú níñí ndicutu, ndihí níñí chívá, ndihí yáá cùñú chèhlu quití sàhni-güedé cuèndá nduu íi tucú-yu. ¹⁴ ¡Dico níñí Xítóhó Jesucristú chi ío-gǎ nándíhi-xi sǎ cúú-xí nchò ñáyiu xíndecu vitna! Te cuèndá níñí-gǎ-áⁿ, chi Espíritú Yă Ndiöxí sǎ ndécú nchaa nduu nchaa quiú nǐ cuu ïⁿnuu-xi ndihí Xítóhó Jesucristú sǎ cúú cùu-gǎ cuèndá cuu-gǎ dàtná ïⁿ táhú sǎ cúú-xí Yă Ndiöxí cuèi cùu-gǎ Yaá ñá túú tnàhí cuéchi-xi, te ní sati níñí-gǎ te ní xihí-gǎ. Te cuèndá xiăⁿ ní cutñuní iní-ó sǎ Yă Ndiöxí ní quide cǎhnu iní-gǎ nchaa sǎ ñà túú vǎha ní quide-o, te ní nduu ndoo ní nduu nine iní-ó. Te ducaⁿ ní nduu ndoo ní nduu nine iní-ó cuèndá sǎ ndácú-ó cùnu cuechi-o núú Yă Ndiöxí Yaá ndécú nchaa nduu nchaa quiú.

¹⁵ Te Xítóhó Jesucristú ní quide ndáá-gǎ núú Yă Ndiöxí cuèndá cue ñáyiu ndècu ñuyúú-a. Te cuèndá

xíãⁿ Yã Ndiõxí cada-gá ingá núú sã vãha sá cúú-xí-yu dàtná ní cachí-gá, te ducaⁿ càda-gá sá cuèndá nchaa ñáyiu ní cáháⁿ-gá cundecu ndihi-gá, chi ñáyiu-áⁿ nduu támũ-yu cundecu ndihi vãha ñàhá-yu xii-gá ni caa ni quíhíⁿ chi ducaⁿ ñí cachí-gá, te ducaⁿ chi Xítohó Jesucristú ní xíhí-gá núú cùrúxí cuèndá sá Yã Ndiõxí cada càhnu iní-gá nchaa yícá cuèchi-yu, nchaa cuèchi sá ñí quidé-yu cùtnàhá ní cunuu tnúhu sá ñí cáháⁿ-gá díhna. ¹⁶ Te nchoo xini-ó sã nõu ñⁿ téé na càdúha ñⁿ tutú nàcuáa cada ñáyiu dàcáhñu-yu nchaa sá ndécú ndíhi-dé, te tutú-áⁿ xini ññuhu-xi ndéé ná yãha nduu cùú-dé. ¹⁷ Te ñá túú tàú-xi cada ñáyiu nàcuáa càháⁿ-xi núú tütú-áⁿ nini ndècu téé ní cadúha, dico sátá ná yãha cuú-dé te cadá-yu nàcuáa càháⁿ-xi. ¹⁸ Te cuèi tnúhu ní cáháⁿ Yã Ndiõxí ndéé díhna nàcuáa cada vãha-gá ñáyiu, te diu-ni ndihi ñíñí ñí cundáá-xi chi ní sahní-güedé quiti te ní sati ñíñí-güedi. ¹⁹ Te ndíi Moisés ní cáháⁿ ndodo ndíi núú nchaa ñáyiu nàcuáa ní cachí Yã Ndiõxí cadá-yu, te nàcuáa-ni nduu tnúhu ní chídó tnùní ndíi núú tütú ndíi ní cáháⁿ ndíi, te ní dácá ndíi ndute ñíñí chëhlu ndihi ñíñí chivá líhli, te ní queheⁿ ndíi ñⁿ dité yutnu nàni hisópó ndíhi luha idi ticuèhé, te ní chindóyo ndíi ñíñí-ãⁿ. Te ní sódo ndíi núú tütú ndéé tnúhu Yã Ndiõxí sá ñí chídó tnùní ndíi-áⁿ, te tnàhá cue ñáyiu xíndecu-áⁿ ñí chúcú ndíi.

²⁰ Te ní xáhaⁿ ndíi Moisés xii-yu: “Cuèndá ñíñí-a ní cundáá sá Yã Ndiõxí cada ñaha-gã xii-ndo sã vãha chi ducaⁿ ñí cachí-gá cada-gá sá cúú-xí-ndó”, duha ní xáhaⁿ ndíi xii-yu. ²¹ Te diu-ni ducaⁿ ñí quide tucu ndíi ní chúcú ndíi ñíñí vehe-gá ndíhi nchaa sá nándíhi-güedé òré chíññuhu-güedé Yã Ndiõxí ndécú xiti vehe-gá-áⁿ. ²² Te tnúhu ní chídó tnùní ndíi Moisés càchí-xi sá méé-ní ñíñí chucu-güedé nchaa sá cànehe chíuⁿ-güedé òré chíññuhu-güedé Yã Ndiõxí, te sacú-nã te ndíhi ndoo nchaa xíãⁿ chucu-güedé ñíñí ni cùu. Te dacuítíi ñí xini ññuhu-xi sá cáti ñíñí cuèndá ducaⁿ càda cahnu iní Yã Ndiõxí nchaa yícá cuèchi ñáyiu.

Xítohó Jesucristú ní xíhí-gá núú cùrúxí cuèndá sá vã cùndècu-gá cuèchi-o núú Yã Ndiõxí

²³ Te sá cuèndá sá ñí xíhí Xítohó Jesucristú núú cùrúxí, xíãⁿ ñá túú-gã cuèchi-o ndècu núú Yã Ndiõxí. Te cuèndá nchaa sá ñí xíhi xiti vehe-gá sá ñí dácáá ñáyiu isràél xíãⁿ cùtnùní iní-ó nàcuáa quide-xi núú ndécú-gã. Te dacuítíi ñí xini ññuhu-xi sã cáhni-güedé cue quiti ní cachí Yã Ndiõxí cuèndá nduu íi nchaa sá ñí xíhi xiti vehe-gá-áⁿ. Te cuèi ducaⁿ ñí sahní-güedé cue quiti-áⁿ dico ñá túú ní quide-xi nàcuáa ngúndecu vãha-o nõú Yã Ndiõxí. Dico Xítohó Jesucristú ní xíhí-gá, te sá ñí xíhí-gá xíãⁿ ní quide-gá nàcuáa ngúndecu vãha-o nõú

Yă Ndiöxí. ²⁴ Te Xítohó Jesucristú cuándaa-gá andiu núú ndécú Yă Ndiöxí càháⁿ ndàhú-gá cuendá-ó, te Xítohó Jesucristú chi ñá díú ìⁿ vehe ní dácáá cuè téé ñuyíú-a cuànguihu-gá. Te vehe Yá Ndiöxí sá nǐ dácáá cuè ñáyiu isràél ñuyíú-a ndéé sanaha, ndihi nchaa nàcuáa ní xóo cada-güedé xití vehe-gá-áⁿ xiáⁿ cútnùní iní-ó nàcuáa quide-xi núú ndécú-gá. ²⁵ Te dútu cúnùu núú ñáyiu isràél ní xóo quíhu-dé núú cuiá núú cuiá xití cuàrtú ní cuu íí vǐhí-gá-áⁿ, te ní xóo canehe-dé níñí nǐ xóo quíhu xití cuàrtú-áⁿ dico ñá díú níñí mée-dé. Dico Xítohó Jesucristú chi ñá túú ducaⁿ ni quide-gá chi ìⁿ xito-ni ní sati níñí-gá te ní xíhí-gá. ²⁶ Chi núu ni xíhí-gá nuu núu te ndéé cútnàhá ní ngáva ñuyíú ducaⁿ ngüita-gá cada-gá ní cùu, te vitna ta ndihi nduu cuáháⁿ ní quixi-gá ñuyíú-a ní xíhí-gá ìⁿ xito-ni cuendá cuu-gá dàtná ìⁿ táhú sá cúú-xí Yă Ndiöxí, te ducaⁿ nǐ quide-gá cuendá sá vǎ cündècu-gá cuéchi ñáyiu núú Yă Ndiöxí. ²⁷ Te nchoo cuè ñáyiu ñuyíú-a chi ìⁿ xito-ni cuú-ó te dàtnùní ducaⁿ te cada ndáá Yă Ndiöxí cuéchi-o. ²⁸ Te ducaⁿ sǎtnahá-xi cùu Xítohó Jesucristú chi ìⁿ xito-ni ní xíhí-gá cuendá sá vǎ cündècu-gá cuéchi ñáyiu núú Yă Ndiöxí, te ducaⁿ nǐ cuu ní xíhí-gá chi mee-gá ducaⁿ nǐ cachí-gá cunduu. Te quixi tucu Xítohó Jesucristú ñuyíú-a dico ñá díú-gá sá cáda-gá

cuendá sá vǎ cündècu-gá cuéchi ñáyiu núú Yă Ndiöxí, chi quixi-gá nacuaca-gá nchaa ñáyiu ndètu ñaha xii-gá cuendá cundecú-yu ndihi-gá ni caa ni quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiu isràél cadá-yu, nchaa tnúhu-áⁿ nǐ quide-xi ní cutnùní luha iní-yu nàcuáa cada Yá Ndiöxí cada váha ñaha-gá xii-o vitna. Dico ñá díú mèi nacuáa ní xáhaⁿ ndíi Moisés xii ñáyiu quide Yá Ndiöxí vitna chi dǎma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáa nchaa ñáyiu tǎha ñaha xii Yá Ndiöxí cuéi ní xóo cahni-güedé quiti ní xóo nduu táhú-gá núú cuiá núú cuiá. ² Te núu dicó sá nǐ xóo cahni-güedé quiti ní xóo nduu táhú Yă Ndiöxí ní quide-xi nacuáa nduu ndoo nduu nine iní cue ñáyiu, te vá cáhni-gá-güedé cue quiti-áⁿ nduu táhú-gá ní cùu, te ducaⁿ te cutnùní iní-yu sá ñà túú-gá cuéchi-yu ndècu núú Yă Ndiöxí ní cùu. ³ Te sá dúcáⁿ nǐ xóo cahni-güedé quiti ní xóo nduu táhú Yă Ndiöxí núú cuiá núú cuiá, xiáⁿ ní xóo ndacu iní cue ñáyiu nchaa sá cuéhé sá dúhá nǐ xóo cadá-yu. ⁴ Te ducaⁿ chi níñí ndicutu-áⁿ ndihi níñí chivá-áⁿ ñà túú ní xóo ndacu-xi cada-xi nàcuáa vǎ cündècu cuéchi-yu núú Yă Ndiöxí.

⁵ Te xiáⁿ núu cútnàhá ní quexio Xítohó Jesucristú ñuyíú-a ní xáhaⁿ-gá xii Yá Ndiöxí:

Yòhó Tǎtà-í, ñǎ túú ndùu vétú váha iní-n sǎ sǎhmi-güedé quiti ndùu tǎhú-n,

te ni ñǎ túú ndùu vétú váha tucu iní-n cuendá nchaa dava-gá sǎ táxi-güedé ndúú tǎhú-n,

núu xiǎⁿ ní quide túha-n yìqui cuñú-í cuendá yúhú cuú-í te nduu tǎhú ñáhá-n xii-í.

6 Te ni ñǎ túú ndùu vétú váha iní-n cuendá quiti sǎhmi-güedé ndúú tǎhú-n te ni ñǎ túú ndùu vétú váha iní-n cuendá nchaa dava-gá sǎ táxi-güedé ndúú tǎhú-n cuendá sǎ vǎ cündècu-gá cuéchi ñáyiú núú-n.

7 Núu xiǎⁿ yúhú ní cachí-í xii yòhó Tǎtà-í Dútú Ndiöxí sǎ yúhú véxi-í ñuyíú-a cada-í nchaa sǎ cuení-n cada-í dàtná yódó tnùn-í cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiöxí.

8 Te Xítóhó Jesucristú díhna-gá ní xii-gá Yǎ Ndiöxí Yaá cúú Tǎtà-gǎ: “Yòhó Tǎtà-í ñǎ túú ndùu vétú váha iní-n cuendá quiti sǎhmi-güedé ndúú tǎhú-n, ndihi cuendá quiti sǎhmi-güedé ndúú tǎhú tucu-n cuendá sǎ vǎ cündècu-gá cuéchi ñáyiú núú-n, ndihi cuendá nchaa dava-gá tǎhú sǎ táxi-güedé xii-n ñǎ túú ndùu vétú váha iní-n cuendá nchaa xiǎⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiöxí. Te ducaⁿ ñǎ xáhaⁿ-gǎ cuéi núú

tütú ndii Moisés yódó tnùn-í sǎ dúcáⁿ càda-güedé. ⁹ Te sǎtá dúcáⁿ te ní xáhaⁿ tucu-gá xii Tǎtà-gǎ Dútú Ndiöxí: “Yòhó Tǎtà-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuení-n”, duha ní xáhaⁿ-gǎ xii Tǎtà-gǎ. Te sǎ dúcáⁿ ñǎ cáháⁿ Xítóhó Jesucristú xiǎⁿ ní cutnùn-í sǎ ñǎ túú-gǎ xii ñúhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xiihí-gá ní cuu-gá dàtná ñⁿ tǎhú sǎ cúú-xi Yǎ Ndiöxí, te ducaⁿ ñǎ cuu chi ducaⁿ tnàhí ní cachí Yǎ Ndiöxí cunduu. ¹⁰ Te Xítóhó Jesucristú ní quide-gá nàcuáa ní cuení Yǎ Ndiöxí cada-gá, chi ní xiihí-gá núú cùrúxí chi ducaⁿ ñǎ cuení mée-gǎ cunduu, te ñⁿ xito-ni ní xiihí-gá sǎ cuendá nchaa ñáyiú, te cuendá xiǎⁿ núu ndècu yiñuhu-o núú-gǎ vitna.

¹¹ Te cue dútú ñáyiú isràel chi ñⁿ nduu ñⁿ nduu ní xóo cahni-güedé quiti ní xóo nduu tǎhú-gǎ, te ñǎ túú ní dàma-güedé nàcuáa ní xóo cada-güedé. Te nchaa sǎ ñǎ xóo cada-güedé-áⁿ ñǎ túú ní quide-xi nàcuáa vǎ cündècu-gá cuéchi ñáyiú núú Yǎ Ndiöxí. ¹² Dico Xítóhó Jesucristú ní cachí-gá sǎ cúú cuú-gá, te ní xiihí-gá núú cùrúxí cuendá nchaa yicá cuéchi nchaa nchoo ñáyiú ndècu ñuyíú-a. Te sǎtá dúcáⁿ te dàtnùn-í ní ngóo-gá xio cùha Dútú Ndiöxí táxi tnùn-í-gá, te vǎ ñⁿ ndùu ñⁿ quiú-gǎ te cuú-gá. ¹³ Te diu-ni xiǎⁿ cundecu-gá cundetu-gá ndéé

sáa nduu cànehe nchaa sá cúú ùhú iní ñáhá xii-gá sá yíñùhu núú-gã. ¹⁴ Te cuendá sá ñí xihí Xítóhó Jesucristú ñⁿ xito-ni xíãⁿ ní cuu-gá dàtná ñⁿ táhú sã cúú-xí Yã Ndiöxí, xíãⁿ ní quide-xi sá ncháá ñáyiú cùu cuendá-gá ñá túú-gã ná cumání-yu núú-gã ni caa ni quíhíⁿ. ¹⁵ Te mee Espiritú Yã Ndiöxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

¹⁶ Sáa nduu te cada-í nchaa ñáyiú nàcuáa na càháⁿ-í-a,
te cada-í nàcuáa cutnùní iní-yu tnúhu sá dánèhé-í-yu tnúhu sá cánùlchi ñaha xii-yu nàcuáa cadá-yu cundecú-yu,

te cada tucu-í sá tní-yu nchaa tnúhu-áⁿ.
Duha ní cachí-gá. ¹⁷ Te ní cachí tucu-gá:

Te vá ñⁿ ndùu ñⁿ quíú-gã ndacu iní-í sá quidé sàa iní-yu tnúhu-í,

te ni vã ñⁿ ndùu ñⁿ quíú-gã te ndacu iní-í nchaa sá cuèhé sá dúhá quidé-yu.

Duha ní cáháⁿ Yã Ndiöxí càchí Espiritú-gá. ¹⁸ Te sá dúcáⁿ quide cahnu iní Yã Ndiöxí nchaa cuèchi-o, núu xíãⁿ ñá túú-gã xini ñùhu-xi cuú quiti nduu táhú-gã cuendá nchaa sá cuèhé sá dúhá quide-o.

Tàú-ó sã tnàhá tnúhu-o ndìhi Yã Ndiöxí

¹⁹ Te cue dútú ñí xóo cunuu núú ñáyiú isràel cue téé-áⁿ ñí xóo quíhu-güedé xiti cuàrtú ní cuu íí víhí-gã. Dico nchoo

cuè ñáyiú ndècu ichi Xítóhó Jesucristú vitna tàú-ó sã ñí yuhu ñí iní-ó tnàhá tnúhu-o ndìhi Yã Ndiöxí. Te cuu tnahá tnúhu-o ndìhi-gá chi Xítóhó Jesucristú ní sati ñíñí-gã te ní xihí-gá núú cùrúxí. ²⁰ Te cada iní-ó sã dõó sã ñí xíndedí nàcuáa ní xóo quíhu-güedé xiti cuàrtú ní cuu íí víhí-gã-áⁿ ñí xócuñí, te ducaⁿ càda iní-ó chi Xítóhó Jesucristú ní xihí-gá cuendá nchoo ñíhí-ó nàcuáa cada-o ngündecu váha-o sã cúú-xí-gã. ²¹ Te diu-gá cúú-gã Yaá cúú dùtú-ó, te diu-gá cúú-gã Dútú cùnùu ndecu-gá núú ndécú Yã Ndiöxí. ²² Núu xíãⁿ xini ñùhu-xi sã ío tnahá tnúhu-o ndìhi Yã Ndiöxí, te vá cání ñⁿ cani úú iní-ó, te ío váha quindáa iní-ó-gã chi diu-gá ní ndada ndoo ní ndada nine-gá iní-ó cuendá nchoo cutnùní iní-ó sã ñá túú-gã cuèchi-o ndècu núú-gã. Te ní sandute-o cuendá sá dúcáⁿ ñí nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ndìhi-o tnúhu ndee iní sá ndúú táhú-ó cündecu ndìhi-o Yã Ndiöxí, te xini ñùhu-xi sã vã dáñá ndèé-ó càncicúⁿ nihnu-o tnúhu ndee iní-áⁿ chi Yã Ndiöxí cada-gá nàcuáa ní cachí-gá sá cúú-xí-ó. ²⁴ Te xini ñùhu-xi cuhuⁿ iní tnáhá-ó te chindee tnàha-o nàcuáa ducaⁿ cùu iní tnáhá-gã-ó, te cada-o mèe-ñí sã váha. ²⁵ Te nchoo vá dáñá ndèé-ó nàtacá-ó núú dácuaha-o tnúhu Yã Ndiöxí, te vá cadá-ó dàtná xiquide davá-yu ñá túú-gã cuiní-yu quixí-yu núú dácuaha-o tnúhu-gá. Chi xini ñùhu-xi sá cuáha tnàha-o

tnúhu ndee iní canchicúⁿ nihnu-o ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítohó Jesucristú ñuyíú-a.

26 Te cue ñáyiu sa ní tecú tnùní nàcuáa càháⁿ tnúhu Yá Ndiòxí te núu na ngüita-yu ñucùuⁿ cadá-yu nándi sá cuèhé sá dúhá, te àuⁿ nã cuu ní xihí Xítohó Jesucristú cuendá-yu, te ni vã yõ ñⁿ-gá cuú cuendá sá vã cundècu-gá cuèchi-yu núu Yá Ndiòxí.

27 Te núu ducaⁿ na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiòxí xií-yu. Chi nchaa ñáyiu cùu úhú iní ñáhá xì-gá daquihíⁿ ñáhá-gã xií-yu núu ñùhú núu càyú núu ïo ndohó-yu. 28 Te nchaa ñáyiu ní xóo daquèe tihú tnúhu ní cáháⁿ ndíi Moisés, te núu ndècu úú àdi úní ñáyiu càháⁿ ndáá sá dúcáⁿ nĩ dáquée tihú-yu tnúhu ní cáháⁿ ndíi, te vã yõ nĩ xóo cundàhú iní ñáhá xìi nchaa ñáyiu ducaⁿ nĩ xóo cada chi ní xóo cahni ñaha-güedè. 29 Te núu ducaⁿ nĩ ndoho cue ñáyiu ducaⁿ nĩ dáquée tihú tnúhu ní cáháⁿ ndíi Moisés-áⁿ, te uuⁿ-gá ndoho cue ñáyiu dàquee tihú ñáhá xìi Xítohó Jesucristú Yaá cúu Dèhe Yá Ndiòxí diu-ni ñáyiu càchí sá ñà túú nàndíhi níñí-gã. Te níñí-gã-áⁿ nĩ sati, te ní xihí-gá, te ducaⁿ nĩ cuu cuendá cada Yá Ndiòxí ingá núu sã vãha sá cúu-xí nchòo ñáyiu ndècu ñuyíú-a dàtná ní cachí-gá cada-gá. Te diu-ni cuendá níñí-gã-áⁿ nĩ nduu ndoo ní

nduu nine iní cue ñáyiu-áⁿ ní cùu, te diu-ni ñáyiu-áⁿ càháⁿ úhú-yu Espiritú Yá Ndiòxí sá chindèe chitúu ñaha xii-o. 30 Te nchoo sà naha-o sá Yá Ndiòxí càchí-gá ñⁿ xichi núu tütú-gá: “Yúhú cada-í te nacháhu ñáyiu nchaa sá quidè-yu, te duha càháⁿ-í chi nachinaa-í cuendá nchaa sá quidè-yu-áⁿ”, duha càchí-gá. Te sa naha tucu-o nacuáa càháⁿ-xí núu tütú-gá núu càchí-xi: “Yá Ndiòxí cada ndáá-gã cuendá nchaa sá quidè ñáyiu cùu cuendá-gá”, duha càchí-xi núu tütú-gá. 31 Te ío ndàhú ndoho cue ñáyiu na dândoho ñaha Yá Ndiòxí, te diu-gá cúu-gã Yaá cùnùu nchaa nduu nchaa quíú!

32 Te chí dándàcu iní nàcuáa ní quide-ndo cùtnàhá vitna cuu saa ní tecú tnùní-ndó tnúhu Yá Ndiòxí, chi dàvã-áⁿ nĩ quide càhnu iní-ndó cuèi nándi sá nĩ yáha-ndo cuendá-gá. 33 Te dava-ndo nĩ quide úhú ñáhá ñáyiu xii-ndo núu chítú núu tàcá, te nándi tnúhu cuèhé tnúhu duha ní xáhãⁿ-yu xii-ndo. Te dava-ndo nĩ cuyi-ni-ndo nĩ xíndecu ndíhi tnàha-ndo cuèi nándi ní ndoho dava-gá-ndó.

34 Te ní cundàhú iní-ndó cuè ñáyiu yíhi vecaá, te cuèi ní quendeé ñáyiu sá ndécú ndíhi-ndo dico ñà túú ní ndíhú iní-ndó chi ní cudíi-ni iní-ndó. Te ducaⁿ nĩ quide-ndo chi sa nàha-ndo sá ndúú tãhú-ndó sã ïo-gá vãha, te xíãⁿ cundecu ndíhi-ndo nĩ caa ni quíhíⁿ. 35 Te xíãⁿ vá dáñá ndèe-ndó quindáá

iní-ndó nàcuáa ní cachí Yá Ndiöxí cada ñaha-gã xii-ndo, chi sáa nduu te ío váha cada ñaha-gã xii-ndo. ³⁶ Te nchòhó xíní ñùhu-xi ío cada ndee iní-ndó càda-ndo nchaa nacuáa càháⁿ Yá Ndiöxí, te ducaⁿ te nduu táhú-ndó sã ní cachí-gã nduu táhú-ndó cùndecu ndìhi-ndo ni caa ni quíhíⁿ. ³⁷ Te Yá Ndiöxí càchí-gã núú tütú-gã:

Ta cùyatni vii-nã nduu quìxi
Yáa quixi ñuyíú-a, te vá
cúyaa-gã.

³⁸ Te nchaa ñáyiu cùndáa
núú-í ñá túú dàña
ndeé-yu sàndáa iní
ñáhã-yu xii-í,

te cuèndá xíãⁿ cundecu-ní-yu
ichi-í,

dico núu na dàñá-yu ichi-í
te vá cúú váha iní-í
núú-yu.

Duha càchí Yá Ndiöxí núú
tütú-gã.

³⁹ Dico nchoo chi ñá túú
cùu-o ñáyiu ducaⁿ xiquide
dàñá-ó ìchi Yá Ndiöxí, chi
cùu-o ñáyiu nchìcúⁿ nihnu-ni
sàndáa iní-ó-gã, te sá dúcáⁿ
te nduu táhú-ó cùndecu-o
ndìhi-gã ni caa ni quíhíⁿ, te ñá
túú cùu-o ñáyiu dàña nihnu
ichi-gã te xíta nihnú-yu.

11

*Ñáyiu sàndáa iní ñáhá xii Yá
Ndiöxí*

¹ Te núú sàndáa ndisa iní-ó
Yá Ndiöxí te ducaⁿ cùtnuní
ndáa iní-ó sã nihí-ó sã cuìní-ó
núú-gã. Te núú sàndáa
iní-ó-gã te ducaⁿ cùtnuní ndáa
tucu iní-ó sã càháⁿ ndáa-gã
cuèndá nchaa sã ñà túú xìní-ó,
² Te ducaⁿ ní quide ñáyiu ní
xíndecu ndéé sanaha ío ní

sàndáa iní-yu Yá Ndiöxí te xíãⁿ
núu ío váha ní cuu iní ñáhá-gã
xií-yu.

³ Te núú nchoo sàndáa
ndisa iní-ó Yá Ndiöxí te
cùtnuní ndáa iní-ó sã sã
cuèndá tnúhu ní càháⁿ-gã ní
cuáha andiu ndìhi ñuyíú-a.
Te cùtnuní iní-ó sã ñà díú sã
cuèndá ìⁿ sã túu ndèhe-o ío
ñuyíú-a ní cuáha andiu ndìhi
ñuyíú-a.

⁴ Te ndíi Àbél ío ní sàndáa iní
ndíi Yá Ndiöxí núu xíãⁿ ío-gã
ní cuu iní-gã sã ní sáñaha ndíi
ní nduu táhú-gã dàcúúxí sã
ní sáñaha ndíi Càin xii-gã ní
nduu táhú-gã. Te ndíi Àbél-áⁿ
ní cutnùní iní ndíi sã ní cudíu
ndíi núú Yá Ndiöxí cuèndá
sã ní queheⁿ cuèndá-gã
sã ní sáñaha ndíi ní nduu
táhú-gã. Te cuèi ñá túú-gã
ndíi ndècu ñuyíú-a dico yòdo
tnuní sã ní sàndáa iní ndíi Yá
Ndiöxí cuèndá ducaⁿ càda-o
canchicúⁿ nihnu-o.

⁵ Te té Ènóc téé ní xíndecu
ndéé sanaha ñà túú ní xíhí-dé
chi ní nacuaca ñaha túu Yá
Ndiöxí xii-dé cuèndá sã ní
sàndáa iní ñáhá-dé xii-gã.
Te vá yòo ni nànihí ñáhá
xii-dé chi mee-gã ní nacuaca
ñaha-gã xii-dé. Te núú
tütú Yá Ndiöxí càchí-xi sã
cùtnàhá vátá nàcuaca ñaha-gã
xii té Ènóc, te ní quide-dé
mee-ni nàcuáa ní cuu váha
iní ñáhá-gã xii-dé. ⁶ Te nchaa
ñáyiu ñá túú sàndáa iní ñáhá
xii Yá Ndiöxí ñá ndácü-yu
cadá-yu nàcuáa cudíu-yu
núú-gã, chi nchaa ñáyiu
cuìní tuha ñaha xii-gã xíní
ñùhu-xi sã quíndáa iní-yu sã
ndécú-gã, te quíndáa iní-yu

sá nõu na nànducu nihnu ñahá-yu xii-gá te cuañaha-gã xii-yu sá ndúú tãhũ-yu.

⁷ Te Yá Ndiõxí ní dátũha-gá ndíi Nõé nchaa nàcuáa cada-gá. Te ní quide ndíi nchaa nàcuáa ní xáhaⁿ Yá Ndiõxí cada ndíi, te ní cadúha ndíi ñⁿ bàrcú cuendá xití bàrcú-áⁿ queé ndíi ndíi nchaa ñáyiú vehe ndíi cuendá cácu nihnú-yu. Te ducaⁿ ñ quide ndíi chi ní sándáá iní ndíi Yá Ndiõxí. Te sá dúcáⁿ ñ sándáá iní ndíi-áⁿ Yá Ndiõxí xiáⁿ ní cutnùní sá ncháá ñáyiú ío ndècu cuéchi-yu, chi ñá túú ní cãchicúⁿ nihnú-yu cadá-yu nàcuáa ní quide ndíi. Te sá dúcáⁿ ñ quide ndíi ní sándáá iní ndíi Yá Ndiõxí xiáⁿ ío ní cundáá ndíi núú-gã.

⁸ Te Yá Ndiõxí ní xáhaⁿ-gã xii ndíi Àbrahám sá queé ndíi ñuú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nàcuáa ní xáhaⁿ Yá Ndiõxí chi ní quee ndíi cuáháⁿ ndíi núú cuañaha Yá Ndiõxí cundecu ndíi. Te òré ní quee ndíi núú ndécú ndíi te ñá túú ní cutnùní iní ndíi ndéé cúú nõú cuáháⁿ ndíi cundecu ndíi. Te ducaⁿ ñ quide ndíi chi ní sándáá iní ndíi Yá Ndiõxí. ⁹ Te sá dúcáⁿ ñ sándáá iní ndíi Yá Ndiõxí nõu xiáⁿ ní xíndecu ndíi núú ñ sãñaha-gã cundecu ndíi, te cuéi ducaⁿ dico ñá túú ní quide ñuú ndíi xiáⁿ. Te ní xóo cundecu ndíi vehe cùtexínu vehe dóó. Te ñuú-ñ ducaⁿ ñ quide ndíi Isàác ndíi ndíi Jàcób chi tñahá cue ndíi-áⁿ ñ cachí Yá Ndiõxí sá ndúú tãhú cue ndíi xiáⁿ cundecu cue ndíi. ¹⁰ Te ducaⁿ ñ quide ndíi Àbrahám chi ní

xíndetu ndíi ndéé ní sáá nduu nõúu tãhú ndíi cundecu ndíi núú ndécú Yá Ndiõxí. Te núú ndécú-gã-áⁿ cúú-xí ñuú ní cadúha mee-gã, te ñuú-áⁿ cudíi-xi ñ caa ñ quíhíⁿ.

¹¹ Te ndíi Sãrá, sa ní xídó cuíá ndíi sá cóo ðehe ndíi chi sa ní sahu vihi ndíi, dico Yá Ndiõxí ní quide-gá te ní xóo ñⁿ ðehe ndíi. Te ducaⁿ chi ní sándáá iní ndíi Yá Ndiõxí te ní cutnùní ndáá iní ndíi sá cadá-gã nàcuáa ní xáhaⁿ-gã xii ndíi. ¹² Te cuéi ío ní sahu ndíi Àbrahám ndíi ñadíhí ndíi, ndíi Sãrá dico dacuítí ñ nduu tãhũ-yu ní xóo ñⁿ ðehe-yu. Te xiáⁿ nõu ío cuéhé ndíi quíⁿ yává ndíi Àbrahám ní cáyá dàtná cuéhé chòdíní ndéé andíu, ndíi dàtná cuéhé ñuhu cúchí lámár, chi ñi vã yóo ñⁿ ndacu cahu ñaha xii-yu sá cuéhẽ-yu.

¹³ Te cue ndíi-áⁿ ducaⁿ-ñi ñ sándáá iní cue ndíi Yá Ndiõxí ndéé ní sáá nduu ñ xíhí cue ndíi. Te cue ndíi-áⁿ ñá túú ní ndúu tãhú cue ndíi quini cue ndíi nchaa nàcuáa ní cachí Yá Ndiõxí cada-gá, dico ní cutnùní ndáá iní cue ndíi-áⁿ nàcuáa cada-gá núú cuáháⁿ núú vëxi. Te ío ní cudíi iní cue ndíi, te ní cachí cue ndíi sá dicó-ñi ichi yáha cue ndíi ñuyíú-a, chi ñá díú ñuyíú-a cundecu ducaⁿ cuè ndíi. ¹⁴ Te sá dúcáⁿ ndúu tñuhu ní cáháⁿ cue ndíi-áⁿ, xiáⁿ ní cutnùní sá cuini cue ndíi ñngá xichi núú cundècu cue ndíi. ¹⁵ Te ñi ñá díú ñuú núú ñ quee cue ndíi ñ cuini cue ndíi núhú cue ndíi. Chi núu ducaⁿ ñ sãni iní cue ndíi te núhú cue ndíi ñi cùu. ¹⁶ Dico ñáhá chi cuini cue ndíi quíhíⁿ cue ndíi ñⁿ xichi núú vãha-gã cáá

cùndecu cue ndíi. Te núú dúcáⁿ ïo-gá váha càa-áⁿ cúu-xí ñúú núú ndécú Yá Ndiöxí, te sá dúcáⁿ ñí sani iní cue ndíi xiáⁿ núú ïo váha cùu iní Yá Ndiöxí càchí-gá sá ñà túú cùcahaⁿ núú-gá cúu-gá Ndiöxí cue ndíi-áⁿ, te cùtnuní iní-ó sá ndáá sá dúcáⁿ càháⁿ-gá chi ní quide túha-gá ìⁿ xichi núú cùndecu cue ndíi-áⁿ.

17 Te ndíi Àbrahám ní xíndecu ìⁿndíi-ní déhe ndíi ndíhi ñadíhí ndíi, te cùtnàhá ní xito ndéé ñáhá Yá Ndiöxí xii ndíi ní xícáⁿ-gá déhe ndíi, ndíi Isàác cuèndá nduu táhú ñáhá-gá xii ndíi. Te ní xáhaⁿ ndíi sá cúu ndùu táhú-gá déhe ndíi, te ducaⁿ ñí quide ndíi chi ní sándáá iní ñáhá ndíi xii-gá. Te sa ndècu túha ndíi sá cuañaha ndíi déhe ndíi xii-gá cuèi mee Yá Ndiöxí ní xáhaⁿ ndáá-gá xii ndíi 18 sá sá cuèndá ndíi Isàác te ngúndecu cue ñaní tnáhá ndíi. 19 Te ducaⁿ ñí quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gá dándòto-gá cuèi ñáyiu sa ní xíhí. Te sá dúcáⁿ ñí xáhaⁿ ndíi xii Yá Ndiöxí sá cúu ndùu táhú-gá déhe ndíi, te xiáⁿ cada iní-ó sá sá ní xíhí ndíi Isàác te ní ndoto tucu ndíi ní nucúndecu ndíi ndíhi tātá ndíi, ndíi Àbrahám.

20 Te ndíi Isàác ní xícáⁿ táhú ndíi núú Yá Ndiöxí cuèndá sá cadá vāha-gá cue déhe ndíi, ndíi Jàcób ndíhi ndíi Esàú núú cuaháⁿ núú vèxi. Te ducaⁿ ñí quide ndíi chi ní sándáá iní ndíi Yá Ndiöxí. 21 Te sa ta cùyatni-ná nduu cùú ndíi Jàcób, te ní xícáⁿ táhú ndíi núú Yá Ndiöxí cuèndá cue déhe ñaní ndíi déhe ndíi Chèé. Te

yítuu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñí quide ndíi chi ní sándáá iní ñáhá ndíi xii-gá. 22 Te cùtnàhá sa ta cùyatni vii-ná nduu cùú ndíi Chèé, te ní cachí ndíi sá cuè ñáyiu isràél sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sáá nduu quèé-yu núú ndécú-yu-áⁿ. Te ducaⁿ ñí quide ndíi chi ní sándáá iní ndíi Yá Ndiöxí.

23 Te cùtnàhá ní cacu ndíi Moisés te ní chiváha ñaha ñaná ndíi ndíhi tātá ndíi úní yóó. Te ducaⁿ ñí quide cue ndíi-áⁿ chi ní sándáá iní cue ndíi Yá Ndiöxí. Te ní quide cuèndá cue ndíi-áⁿ sá ïo váha càa ndíi Moisés déhe cue ndíi, te ñá túú ní yuhú cue ndíi nàcuáa ní cáháⁿ téé cùu Faraón sá cáhni-dé cue landú. 24 Te sátá ñí sahu ndíi Moisés te duuⁿ duuⁿ ní cachí ndíi sá vā càháⁿ ñáyiu sá déhe yoco téé cùu Faraón cúu ñaná ndíi. Te ducaⁿ ñí quide ndíi chi ní sándáá iní ndíi Yá Ndiöxí. 25 Te ducaⁿ ñí quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuèndá Yá Ndiöxí dàcúúxí sá cùd^h iní ndíi cundecu tnaa ndíi ichi cuèhé ichi duha. 26 Chi ní sani iní ndíi sá vāha-gá ndoho ndíi cúcuèhé ñáhá cuè ñáyiu xii ndíi sá cuèndá Yaá quixi ñuyíú-a dàcúúxí sá cùndecu ndíhi ndíi nchaa sá ïó Ègiptú. Te ducaⁿ ñí quide ndíi chi ní xúhuⁿ iní ndíi sá Yá Ndiöxí cuañaha-gá sá ndúú táhú ndíi. 27 Te ndíi Moisés ní quee ndíi nàcióⁿ Ègiptú te ñá túú ní

quide cuendá ndíi sá ïo cùdéeⁿ tée cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiöxí. Te ní quide cãhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíi ñaha túu-gá xii ndíi cuëi ñá túú ní xini núú ñáhá ndíi xii-gá. Te ducaⁿ ñi sani iní ndíi chi Yá Ndiöxí ndécú ndíi ñaha-gá xii ndíi.

28 Te ndíi Moisés cúu ndíi tée ní tausaha ñi quide vico pãscuá ndíi cue ñáyiu isràél, te dàvá-áⁿ ñi táuchíúⁿ ndíi ní sahní-yu mbéé te níñi quiti-áⁿ ñi dácánúu-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiöxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni dèhe tée dèhe díhna cue ñáyiu Ègiptú, te vá cãhni-xi ñi ñiⁿ dèhe cue ñáyiu isràél. 29 Te ndute làmár sá nání Mår Tícuèhé ní quée dava-xi ní natúu ñuhu yìchí ní níhí ñi yáha cue ñáyiu isràél. Te ducaⁿ ñi cuu chi ní sándáá iní-yu Yá Ndiöxí. Te cue tée Ègiptú tnhá-güedé nchicúⁿ-güedé cuáháⁿ dico ñá túú ní ndàcu-güedé yáha-güedé chi ní ndíi-güedé ní cáhá.

30 Te cue ñáyiu isràél ní dúcúⁿ ndèé-yu úsá nduu ñuú Jericó te ní ngoyo nchaa sá ñúdòco. Te ducaⁿ ñi cuu chi ní sándáá iní-yu Yá Ndiöxí. 31 Te ñi ñaha ní xindecu ichi díi iní ní xínani-aⁿ Ràháb, ñaha-áⁿ ñá túú ní xihí-aⁿ dàtná ní xihí nchaa ñáyiu ío ní cuu sáá iní-xi núú Yá Ndiöxí, chi ní

cuu váha iní-aⁿ núú cuè tée ní tendaha cuè ñáyiu isràél ní sãngoto dayuhu ñúú-aⁿ. Te ducaⁿ ñi quide-aⁿ chi ní sándáá iní-aⁿ Yá Ndiöxí.

32 Te núu dicó sá cúu te cáháⁿ-í cuendá ndíi Gedèón, ndíi cuendá ndíi Bàrác, ndíi cuendá ndíi Sãnsón, ndíi cuendá ndíi Jèfté, ndíi cuendá ndíi Dàvíi, ndíi cuendá ndíi Sãmuél, ndíi cuendá nchaa cue tée ní xóo cáháⁿ tnúhu Yá Ndiöxí ndéé sanaha, te nchaa cuendá cue tée-áⁿ cãháⁿ-í te núu dicó cùyächí-í dico ñá túú cùyächí-í. 33 Te nchaa cue ndíi-áⁿ ni sándáá iní cue ndíi Yá Ndiöxí núu xiáⁿ ní xóo ndacu cue ndíi ní xóo nàá cue ndíi ndíi nchaa ñáyiu dava-gá ñuú. Te nchaa ñáyiu-áⁿ ñá túú ní xóo ndacú-yu nàá-yu ndíi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gá xii cue ndíi. Te cuëi nchaa cue quiti dééⁿ ñá túú ní ndàcu-güedi ná cada ñaha-güedi xii cue ndíi. 34 Te ní xóo ndacu cue ndíi ní xóo ndahvá cue ndíi ñuhú sá vã yóo tnhí ndàcu ndahvá, te ní cácu cue ndíi vá yóo ni ndàcu cahni ñaha xii cue ndíi. Te cue ndíi-áⁿ ñá túú níhí ndéé cuè ndíi ni cùu, dico ní níhí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-áⁿ ío ní níhí ndéé cuè ndíi ní nàá cue ndíi ndíi nchaa ñáyiu ní cuu úhú iní ñáhá xii cue ndíi, te nchaa ñáyiu ducaⁿ ñi xóo nàá ndíi cue ndíi-áⁿ ñá túú ní xóo ndacú-yu nàá

ndihí ñàhá-yu xii cue ndíi chi ní xóo cunú-yu. Te ducaⁿ nĩ cuu chi ní sándáá iní cue ndíi Yá Ndiöxí. ³⁵ Te dava ñáyiú dñhí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tucú-yu.

Te dava ñáyiú ío ní dándóhó ñaha tñaha ñáyiú-yu te ní xíhí-yu, dico ñá túú ní dañá-yu ichi váha nàcuáa cácu nihnú-yu núú tñaha ñáyiú-yu, te ducaⁿ chi ní cuiní-yu sá ndótõ-yu ndéé cuèé-gá nàcuáa ngúndecu váha-yu núú ndécú Yá Ndiöxí. ³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihí ñáhá-yu xii cue ndíi veçaá. ³⁷ Te dava cue ndíi ní sahní ñáhá-yu ndihí yúú. Te dava cue ndíi ní chidava ndáá ñáhá-yu ní xehndé ñáhá-yu ndihí sierrá. Te dava cue ndíi ní xito ndéé ñáhá-yu te núu ndisa sá sándáá iní cue ndíi Yá Ndiöxí, te dava cue ndíi ní sahní ñáhá-yu ndihí machítí. Te mee-ni ññ mbéé ndihí ññ chivá, ní xóo çuú dóó cue ndíi. Te mee-ni ññ cue quiti-áⁿ nĩ xóo cuu dóó cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá nĩ xóo cada ñáhá-yu xii cue ndíi ní xóo dandòho ñáhá-yu. ³⁸ Te cue ndíi-áⁿ ío-gá ní xínduu váha iní cue ndíi dàcúúxí nchàa dava-gá ñáyiú. Te nchaa cue ndíi-áⁿ

nĩ xica cuu cue ndíi cuèi nchaa núú ñà túú vã yõo tñahí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núú Yá Ndiöxí cuendá sá ní sándáá iní ñáhá cuè ndíi xii-gá. Te cuèi ducaⁿ nĩ quide cue ndíi dico ñá túú ní xíní cue ndíi nchaa sá nĩ cachí Yá Ndiöxí cada-gá. ⁴⁰ Te ducaⁿ nĩ cuu chi ññ sá ío-gá váha ní cachí Yá Ndiöxí cada-gá. Te sá dúcáⁿ ío-gá váha ní cachí-gá cada-gá cúu-xí cuendá nchoo ndihí cuendá cue ndíi-áⁿ cuendá sá ñà díú mèe-ni cue ndíi-áⁿ cundáá cue ndíi núú-gã, chi tñahá nchoo cundáá-ó núú-gã.

12

Ío cuhuⁿ iní-ó Xitohó Jesucristú

¹ Te cue ñáyiú ní xíndecu ndéé sanaha nĩ quidé-yu nàcuáa ní cutnùní sá nĩ sándáá iní-yu Yá Ndiöxí. Te cada iní-ó sã ncháá ñáyiú-áⁿ xíndéhé ñáhá-yu xii-o vitna. Núu xiãⁿ xíní ññhu-xi sá vã cáda-ó nĩ ññ sá cuèhé sá dúhá chi ññ nchaa xiãⁿ quidé-xí ñà túú cundáá-ó núú Yá Ndiöxí. Te vá cáda cuendá-ó nchàa sá quidé tñèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càncicúⁿ nihnu-o càda-o nchaa nacuáa ní cachí-gá cada-o cundecu-o ñuyiú-a. ² Te ío cuhuⁿ iní-ó Xitohó Jesucristú, chi ññ-gá ní quide ní sándáá iní-ó Yá Ndiöxí, te ññ-ni ducaⁿ quide-gá cuèi

vitna te cuëi ndéé núú cuàháⁿ
núú vëxi ðiu-ni ducaⁿ càda-gá
sá quíndáá iní-ó Yă Ndiöxí. Te
Xítóhó Jesucristú ío ní quide
ndee iní-gá ní ndoho-gá te
ní xíhí-gá núú cùrúxí, te ñá
túú ní quide cuendá-gá cuëi
iⁿ sácáⁿnúú cúú-xí sá dúcáⁿ
ní ndoho-gá. Te ducaⁿ ní
quide-gá chi sa naha-gá sá ná
yăha sá dúcáⁿ ndòho-gá te ío
cudíí iní-gá. Te vitna núcóo-gá
xio cùha núú núcóo Yă Ndiöxí
te tàxi tnuní-gá.

³ Te xini ñuhu-xi sá ío cada
cuendá-ndó nàcuáa ní quide
Xítóhó Jesucristú chi Yaá-áⁿ ío
ní quide càhnu iní-gá nchaa
sá ní ndoho-gá ní quide ñaha
nchaa ñáyiu ndècu ichi cuehé
ichi duha xii-gá. Te ducaⁿ
càda cuendá-ndó nàcuáa ní
quide-gá cuendá sá vă túu
dusaⁿ-ndo, te ni vă nátùhú
iní-ndó càda-ndo nchaa
nacuáa càháⁿ-gá. ⁴ Te nchòhó
dáquèe tihú-ndó nchaa sá
cuèhé sá dúhá dico vátá cáhni
ñaha-gá-yu xii-ndo sá dúcáⁿ
quide-ndo. ⁵ Te ndacu iní-ndó
nàcuáa càháⁿ Tătá-ó Dütú
Ndiöxí dásàhú ñáhá-gá xii
nchoo cuè ñáyiu cùu déhe-gá.
Te duha càchí-gá núú tütú-gá:
Nchòhó cue déhe mee-í, vă
cání iní-ndó sá àúⁿ nă
cùu dândoho ñaha-í
xii-ndo,

te ni vă nátùhú iní-ndó
òré càháⁿ-í dóho-ndo
nàcuáa cada-ndo
cùndecu-ndo.

⁶ Chi mee-í dándòho-í nchaa
ñáyiu cùu iní-í cuendá
sá cùndáá-yu núu-í,
te quide úhú-í-yu, te ðiu-ní-yu
cùu-yu ñáyiu càchí-í
cúú dèhe-í.

Duha càchí-gá núú tütú-gá.
⁷ Te ío cada ndee iní-ndó
sá dúcáⁿ dândoho ñaha Yă
Ndiöxí xii-ndo, chi quide-gá
sá cúú-gá Tătá-ó. Te ñá
túú ní iⁿ tée cùu tátá te
cachí-ó sá ñá túú sanu ichi-dé
cue déhe-dé nàcuáa tàú-xi
cunduu. ⁸ Te núu Yă Ndiöxí ñá
túú dândoho ñaha-gá xii-ndo
datná dándòho-gá cue ñáyiu
càchí-gá cúú déhe-gá, te ñá
díú dèhe mee-gă cúú-ndó te
núu ducaⁿ, chi cùu-ndo datná
cue ñáyiu ñá túú cùtnuní yoo
cùu tátá-xi. ⁹ Te nchoo sá
naha-o sá cùtnàhá ní cuu
landú-ó ní sanu ichi ñaha
tátá-ó nàcuáa tàú-xi cunduu,
te ducaⁿ ní xóo canehe-o sá
yíñùhu núú-güedě te ðiu-ni
ducaⁿ nèhe-o sá yíñùhu
núú-güedě vitna. Te núu
ducaⁿ ní sándáá iní-ó tátá-ó,
te ío-gá xini ñuhu-xi quíndáá
iní-ó Tătá-ó Dütú Ndiöxí
cuendá ducaⁿ ndùu táhú-ó
cùndecu-o ndihí-gá ní caa ní
quíhíⁿ, chi ðiu-gá cúú-gă Yaá
ní chihi iní-ó. ¹⁰ Te cùtnàhá
ní cuu landú-ó, ñá túú titní
nduu ní càniha tátá-ó ní sanu
ichi ñaha-güedě xii-o nàcuáa
ní cuu iní mée-güedě. Te Yă
Ndiöxí ducaⁿ dândoho ñaha-gá
xii-o sanu ichi ñaha-gá cuendá
cúú-xí sá văha sá cúú-xí-ó,
te ducaⁿ quide-gá cuendá
nchoo càda ndáá-ó datná
quidé mée-gá. ¹¹ Te òré vëxi
iⁿ tnúndòho sá cúú-xí-ó te ñá
túú cùdíí iní-ó chi dândihú iní
ñáhá-xí xii-o. Te nchaa ñáyiu
ngúnu ichi sá cuendá nchaa
tnúndòho-áⁿ te ngüíta-yu
quide ndáá-yu, te ío váha cùu
iní-yu ndècú-yu.

Vá dáquèe tihú-ó tnũhu Yá Ndiõxí

12 Te núu xiãⁿ ío chí ndúcú ndèe-gá canchicúⁿ nihnu-ndo ichi Xítohó Jesu-ristú, te vá dícó yica cùu iní-ndó cànchicúⁿ nihnu-ndo ichi-gá. 13 Te cada váha-ndo cùndecu-ndo ichi-gá cuèndá nchaa ñáyiú sàni ìⁿ sàni úú iní-xi níhí ndéë-yu cundecú-yu ichi-gá te vá ná tũhú iní-yu canchicúⁿ nihnú-yu.

14 Te nducu-ndo nàcuáa cada-ndo cùndecu váha-ndo ndìhi cue tnaha ñáyiú-ndo, te ío cada váha-ndo cùndecu-ndo nacuáa cundáa-ndó núú Yá Ndiõxí chí núu vá dúcáⁿ càda-ndo te vá ndúú tãhú-ndó cùndecu-ndo ndìhi-gá. 15 Te ío váha cada cuèndá-ndó nàcuáa cada-ndo cùndecu-ndo, chí núu ñáhá te vá chindèe ñaha-gá Yá Ndiõxí xii-ndo. Te ío váha cada cuèndá tucu-ndo nàcuáa cundecu-ndo vã cáni cuèhé iní-ndó cuèndá Yá Ndiõxí, chí núu ducaⁿ na càda-ndo te dava-gá ñáyiú ndècu ndìhi-ndo ichi-gá tnàhá-yu ngũita-yu ducaⁿ càdá-yu, te vá cùndècu váha-gá-ndó ndìhi-yu ichi-gá. 16 Te cada cuèndá tucu-ndo sã vã cùndècu-ndo ichi dîi iní, te ní vã dáquèe tihú-ndó ní ìⁿ sá cúú cuèndá Yá Ndiõxí dàtná ní quide ndii Esàú, chí sá cuãñaha tãtá ndii-áⁿ nduu tãhú ndii ní cùu ní dama ndii ìⁿ cóho comidá. 17 Te nchòhó sa naha-ndo sá cùtnàhá ní cuini ndii Esàú cácaⁿ tãhú tãtá ndii núú Yá Ndiõxí cuèndá nchaa sá ndúú tãhú ndii ní cùu, te ñá túú ní xicáⁿ tãhú tãtá ndii núú Yá Ndiõxí nàcuáa cuini méé ndii ní cùu. Te ní ndáhyú víhí ndii,

te cuèi ducaⁿ ní quide ndii dico ñá túú ní ndàcu-gá ndii nàníhí ndii tãhú sã ní dama ndii comidá.

18 Te cue ñáyiú isràèl ní sãtuhá-yu ìⁿ yucu núú càyú ñuhú, te nchòhó ñá túú ndèe ducaⁿ sàháⁿ tuha-ndo ìⁿ yucu núú càyú ñuhú dàtná ní quide cue ñáyiú-áⁿ. Te cùtnàhá ducaⁿ ní sãtuhá-yu yucu-áⁿ te ní cunee víhi nihii yucu-áⁿ, te ní quene táchí níhi. 19 Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiõxí ní cáháⁿ ndìhi ñaha-gã xii-yu. Te nchaa ñáyiú ní tecú dóho-xi ní cáháⁿ-gá te ní cuini-yu sá vã càháⁿ-gá. 20 Te ducaⁿ ní quidé-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quiⁿti nà yáha xití yucu-a, te cahni-ndo-di ndìhi yúú àdi ndìhi ìⁿ yutnu puyá”, duha ní cachí-gá. 21 Te sá dúcáⁿ ní quide-xi ní xiní-yu xiãⁿ ío ní dáyùhú ñáhá-xí xii-yu. Te tnàhá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-áⁿ ní sàháⁿ tuhá-yu yucu-áⁿ, dico cada iní-ndó sã sã ní tuha-ndo yùcu Sión sá ndécú núú ndécú Yá Ndiõxí, ndìhi ñuú-gá ñuú Jerusalén sá cáá àndiú te diu-gá cúú-gã Yaá ndécú nchaa nduu nchaa quiú. Te diu-ni xiãⁿ xindecu cuèhé víhí cuè espíritú xínú cuèchi núú-gã 23 chíñũhu ñaha-xi

xii-gá. Te nchòhó cúú-ndó cuè ñáiyu cùu cuendá Yá Ndiòxí, te ní tnahá tnúhu-ndo ndìhi nchaa dava-gá ñáiyu cùu cuendá-gá, ñáiyu yòdo tnuní núú tütú-gá ndécú àndiu, te diu-ni ñáiyu-áⁿ cuañaha-gã xií-yu sá ndúú tãhũ-yu. Te nchòhó ní tuha-ndo Yá Ndiòxí Yaá cada ndáá yíca cuèchi nchaa ñáiyu. Te cada iní-ndó sã ní tnahá tnúhu-ndo ndìhi cue ñáiyu ní quide ndáá ní xíndecu ichi Yá Ndiòxí ñuyíú-a. Te ñáiyu-áⁿ ñà túú tnahí-gá ná cúmãñi-yu vitna ndécú-yu núú-gã. ²⁴ Te ní tnahá tnúhu-ndo ndìhi Xítohó Jesucristú Yaá ní quide nàcuáa cada Yá Ndiòxí ingá núú sã vãha sá cúú-xí nchaa nchoo ñáiyu ndècu ñuyíú-a, chi ní sati níñi-gã te ní xíhí-gá núú cùrúxí. Te níñi Xítohó Jesucristú ñà túú ñⁿ-ni cuu-xi ndìhi níñi ndii Àbél, chi diu cuendá níñi-gã-áⁿ ní quide càhnu iní Yá Ndiòxí nchaa cuèchi-o. ²⁵ Núú xíãⁿ ío cada cuendá-ndó vã dáquèe tihú-ndó tnũhu càháⁿ Yá Ndiòxí, chi nchaa ñáiyu ní xíndecu ndéé sanaha dùcaⁿ ní quidé-yu ní dáquèé tihũ-yu tnúhu ní cáháⁿ-gá ñuyíú-a sá cúú-xí-yu. Te ñà túú ní cãcu-yu chi ní nacháhu-yu sá dúcáⁿ ní quidé-yu. Te uuⁿ-gá tucu nchoo chi vã cãcu-o te núú ducaⁿ na dàquee tihú-ó tnũhu càháⁿ Yá Ndiòxí ndéé andiu sã cúú-xí-ó. ²⁶ Te cùtnáhá ní cáháⁿ Yá Ndiòxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito

ñuyíú, te ñà díú mèe-ni ñuyíú ducaⁿ quidi-í chi tnahá andiu quidi-í”, càchí-gá. ²⁷ Te sá dúcáⁿ càháⁿ-gá sá ingá xito tucu ducaⁿ càda-gá xíãⁿ cùtnuní sá ncháandi túhú sá túu ndèhe-o danaa-gá. Te nchaa sá ñà túú ndéé túu quini-ó ñuyíú-a xíãⁿ vã quidi-xí te ni vã náá-xí. ²⁸ Te núú ní cachí Yá Ndiòxí nduu tãhú-ó cùndecu-o chi mee-gã táxí tnuní-gá xíãⁿ, te ni vã quidi-xí te ni vã náá-xí. Te xíãⁿ ío xíni ñuhu-xi ndacáⁿ tãhú-ó núú-gã, te yíñũhu yíñũhu cunu cuechi-o núú-gã nàcuáa cuu vãha iní-gá, te ducaⁿ cùhuⁿ iní-ó sã ío càhnu cuu-gá. ²⁹ Te Tãtá-ó Dütú Ndiòxí cúú-gã dàtná ñⁿ ñuhú chi danàa-gá nchaa sá ñà túú quide nacuáa cuu vãha iní-gá.

13

Nàcuáa tàú-xi cada-o cuendá cuu vãha iní Yá Ndiòxí

¹ Te nchaa nchòhó ñáiyu ndècu ichi Xítohó Jesucristú, vã dáñá ndéé-ndó cùu iní tnahá-ndó nàcuáa ndècu-ndo ichi-gá. ² Te cunaha-ndo sã núu ío ñáiyu ñũhu ichi ní quexió-yu vehe-ndo te cuañaha-ndo vèhe nde-tatú-yu, te cuañaha-ndo sã cáxi-yu. Chi davá-yu ndéé espíritú xínú cuèchi núú Yá Ndiòxí ní sáháⁿ vehé-yu ní queheⁿ cuendá-yu te ñà túú ní cùtnuní iní-yu sá díú espíritú xínú cuèchi núú-gã cúú-xí.

³ Te ndacu tucu iní-ndó cuè ñáiyu xìxíhi vecaá, te cada iní-ndó sã tnahá-ndó yìhi-ndo vecaá ndihí-yu. Te ndacu

tucu iní-ndó nchaa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiú na càchí-yu sã ìⁿ sã vãha cùu-xi sã ìⁿ tée ndìhi ìⁿ ñadìhí ná nihí tnàhá-yu candeca tnàhá-yu. Te nchòhó cue tée vá cání iní-ndó cãháⁿ ndihí-ndo ñadìhí te núu ñá díú ñadìhí-ndó cùú-yu. Te ducaⁿ-ni nchòhó cue ñáyiú dìhí tucu vá cání iní-ndó cãháⁿ ndihí-ndo tée te núu ñá díú yìi-ndo cuu-güedé, chi Yá Ndiòxí dandòho-gá nchaa ñáyiú ndècu ichi díí iní.

5 Te vá cùhúⁿ iní-ndó mèe-ni díhúⁿ. Te núu nándi cùu nchaa sã ndécú ndihí-ndo te diu-ni nchaa xiãⁿ sa nduu vétú iní-ndó, chi Yá Ndiòxí ní cachí-gá: “Ni ìⁿ nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

6 Te xiãⁿ núu nchoo ñi yuhu ñi iní-ó cãháⁿ-ó ìⁿ ìⁿ-o, te cachí-ó:

Yá Ndiòxí cúú-gã Yaá chindèe ñaha xii-í,

núu xiãⁿ ñá túú yuhú-í cuèi nándi cãháⁿ ñáyiú cada ñàhá-yu xii-í.

Duha cachí-ó.

7 Chí ndácú iní cue tée ní sanu ichi ñaha xii-ndo ichi Xítohó Jesucristú cue tée ní cãháⁿ tnúhu Yá Ndiòxí núú-ndó, te ío váha chí nãcuãha cuendá nãcuãa ní quide nchaa cue tée-áⁿ ñi xíndecu-güedé ndéé ní sáa nduu ñi xihí-güedé. Te ío quindáá iní-ndó Yá Ndiòxí dàtná ní xóo cada cue tée-áⁿ.

8 Te dàtná-ni ní quide Xítohó Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núú cuaháⁿ núú vèxi. 9 Te vá dáñá-ndó mèe-ndo dandahú ñáhá ñáyiú dacaháⁿ ñáhá xii-ndo natuãha-ndo ingá ichi, ñáyiú dānehé tnàha ñáyiú-xi nándi sã ní cutúha-yu, te nchaa xiãⁿ ñá túú ìⁿ-ni caháⁿ-xi ndihí tnúhu sã ndécú ndihí-ndo. Te Yá Ndiòxí chindèe ñaha-gá xii-o nãcuãa nihí ndéé-ó cūndecu-o ichi-gá, te ducaⁿ te cuu-xi sã vãha sã cúú-xí-ó, te ñá díú cuendá ìⁿ sã xéxi-ó nihí ndéé-ó ndècu-o ichi-gá. Te dava ñáyiú càchí-yu sã dává núú comidá cuu caxi-o te dava ñáhá nãcuãa nihí ndéé-ó cūndecu-o ichi-gá, dico ñá ndàá sã sã dúcáⁿ vá caxí-ó nchaa núú comidá nihí ndéé-ó cūndecu-o ichi-gá.

10 Chi Xítohó Jesucristú ní xihí-gá cuendá-ó núú cùrúxí, te nchaa ñáyiú nchicúⁿ nihnu-ni quide nchaa nãcuãa ní quide nchaa dútú ñi xinu cuechi núú Yá Ndiòxí ndéé sanaha, ñáyiú-áⁿ vá cúú tnàhá tnúhu-yu ndihí Xítohó Jesucristú Yaá ní xihí núú cùrúxí sã dúcáⁿ quidè-yu. 11 Chi dútú cūnūu-gá ní xíndecu ndihí cue ñáyiú israhél, tée-áⁿ ñi xóo canehé-dé ñíñi nchaa quiti ní xóo cahni-dé ní xóo quihu ndéé xití cuartú ní cuu íi-gã. Te ducaⁿ ñi xóo cada dútú-áⁿ cuendá cada càhnu iní Yá Ndiòxí nchaa yicá cuèchi ñáyiú, te cuñú nchaa quiti-áⁿ ñi xóo cahmi-güedé ìⁿ xio yuhu ñiú. 12 Te ducaⁿ ñi yáha

Xítohó Jesucristú chi ndéé ìⁿ xio yuhu ñúú ní sahní ñaha-güedé xii-gá. Te cuendá níñí-gá sá ñí sati núú cùrúxí núú ñí xihí-gá, ní nduu ndoo ní nduu nine iní cue ñáyiú sàndáá iní ñáhá xii-gá. ¹³ Te vitna chí ná tùha-o Xítohó Jesucristú te cada ndee ìní-ó ndòho-o datná ní ndoho-gá. ¹⁴ Te ñuyíú-a ni ìⁿ xichi ñá túú ndéé cáá ìⁿ ñúú cudí ni caa ni quihiⁿ cuendá cundecu-o, dico ducaⁿ-ni ñúhu ìní-ó ìⁿ xichi núú ndúú tǎhú-ó cundecu-o ni caa ni quihiⁿ.

¹⁵ Te núú xíǎn xíní ñúhu-xi sá vǎ dáñá ndéé-ó chíñuhu-o Dútú Ndiöxí chi Xítohó Jesucristú ní quide-gá nàcuáa ndacu-o tnàhá tnúhu-o ndìhi Yá Ndiöxí, te òré càháⁿ ndìhi-o-gǎ te nuu núú ndacáⁿ tǎhú-ó nǔú-gǎ. Te nchaa tnúhu càháⁿ-ó òré càháⁿ ndìhi-o-gǎ cúú-xi dàtná ìⁿ tǎhú sǎ cúú-xi-gǎ. ¹⁶ Te vǎ dáñá ndéé-ndó càda-ndo mee-ni sá vǎha cundecu-ndo, te ducaⁿ chindee tnaha-ndo ìⁿ ìⁿ-ndo ndìhi sá ndécú ndìhi-ndo. Te núú ducaⁿ na càda-ndo te caní ìní-ndó sǎ cúú-xi dàtná ìⁿ tǎhú sǎ ìo vǎha cùu iní Yá Ndiöxí.

¹⁷ Te quindáá ìní-ndó càda-ndo nchaa nacuáa càháⁿ cue tée yíndaha ñaha xii-ndo nacuáa ndècu-ndo ichi Xítohó Jesucristú, chí ñiu cue tée-áⁿ quidé cuendá ñáhá-güedé xii-ndo nàcuáa cundecu vǎha-ndo nǔú-gǎ. Te sáá nduu nàcani tnúhu-güedé núú-gǎ nǔu ní quide vǎha-güedé àdi ñá túú ní quide vǎha-güedé ní xíndecu

ndìhi ñaha-güedé xii-ndo. Te núú ducaⁿ na càda-ndo quindáá ìní-ndó-güedé te cudí ìní-güedé cundecu ndìhi ñaha-güedé xii-ndo, te vǎ ndìhú ìní-güedé. Te núú vǎ dúcáⁿ càda-ndo te vǎ cúú-xí sǎ vǎha xii-ndo nchaa sǎ quidé-güedé sǎ cúú-xi-ndó.

¹⁸ Te càháⁿ ndàhú-í núú-ndó sǎ càháⁿ ndìhi-ndo Yá Ndiöxí cuendá-ndí. Te nchúhú cùtnùní ndáá ìní-ndí sǎ ñà túú nǎ cúmǎní-ndí núú Yá Ndiöxí, te ducaⁿ chí ndùcu-ndí nàcuáa quide-ndí cundáá-ndí núú-gǎ. ¹⁹ Te càháⁿ ndàhú tucu-í núú-ndó sǎ ìo càcáⁿ tǎhú-ndó nǔú Yá Ndiöxí cuendá sǎ méé-gǎ ná cádá te ìo ndìhi quixi coto ñaha tucu-í xii-ndo.

Tnúhu ndéé núú ñí ndìhi-ná

²⁰ Te Yá Ndiöxí Yaá quidé cùu vǎha ìní-ó ndècu-o, Yaá-áⁿ ñí dándótó-gǎ Xítohó Jesucristú. Te Xítohó Jesucristú-áⁿ cúú-gǎ dàtná ìⁿ toli ìo-gǎ quéné cǎva xito mbéé. Te ducaⁿ sǎtnahá-xi cùu-gǎ cuendá sǎ ñí sati níñí-gǎ te ní xihí-gǎ, te ducaⁿ ñí cuu cuendá sǎ ñí quide ndáá-gǎ ndìhi Yá Ndiöxí sǎ cádá-gǎ ingá núú sǎ vǎha sǎ cúú-xí nchòo cue ñáyiú ndècu ñuyíú-a. Te nàcuáa ní quide ndáá-gǎ ndìhi Yá Ndiöxí te ñiu-ni ducaⁿ càda-xi núú cuaháⁿ núú vèxi. ²¹ Te xìcáⁿ tǎhú-í núú Yá Ndiöxí sǎ méé-gǎ ná chindee ñaha-gǎ xii-ndo cuendá cada-ndo mèe-ni sǎ vǎha nàcuáa cùní méé-gǎ, te mee-gǎ ná cádá ñaha-gǎ xii-o nchaa sǎ vǎha sǎ sání ìní-gǎ. Te ñiu-ni ducaⁿ

na tàuchiuⁿ-gá cada Xítohó Jesucrístú sá cúú-xí-ó, duha xìcáⁿ táhù-í núú-gă. Te vitna nchaa-o chĩ ná cãhí-ó sã ïo cãhnu cuu Xítohó Jesucrístú ni caa ni quihíⁿ. Te ducaⁿ na cùnduu.

²² Te cãháⁿ ndàhú-í núú nchòhó ñáyiu ndècu ndihí-í ichi Xítohó Jesucrístú sá cãdá cãhnu iní-ndó nãcuáa ndùu nchaa tnúhu cãháⁿ-í dásàhú ñãhà-í xii-ndo, chi ñã túú vãi tnúhu chido tnuní-í núú tütú-a sá cúú-xí-ndó.

²³ Te cãhí tnúhu-í xii-ndo sã tẽ Timùteú tée ndècu ndihí-o ichi Xítohó Jesucrístú ní cácu-dé ñã túú-gă yihí-dě vecaá. Te núu na quèxio ndíhi-dé núú ndécù-í te quixi-í ndihí-dé núú ndécú-ndó quixi coto ñaha-ndí.

²⁴ Te cùñaha-ndo sã ïo na càda ndee iní nchaa cue tée yìndaha ñaha xii-ndo nacuáa ndècu-ndo ichi Yá Ndiõxí. Te ducaⁿ cùñaha tùcu-ndo xii nchaa dava-gá ñáyiu cùu cuendá-gá sã ïo na càda ndee iní-yu. Te cue ñáyiu nàcióⁿ Itàliá ñáyiu ndècu ndihí-o ichi-gá cãhí-yu sã ïo cada ndee iní-ndó. ²⁵ Te Yá Ndiõxí ïo na chìndee chitúu ñaha-gă xii-ndo nchàa-ndo. Te ducaⁿ na cùnduu. Te ïo chí cãdá ndèe iní-nã vitna.

TUTÚ NÍ CADÚHA TÉ SÀNTIAÚ

*Té Sàntiaú cadúha-dé tutú
quíhíⁿ ndaha ñáyiú isràél
nchítè nuu nihí ñuyúú*

1 Yúhú té Sàntiaú xínú
cuèchi-í núú Yá Ndiòxí ndihí
núú Xítóhó Jesucristú, te tèe-í
tnúhu-a quìde ndee iní ñáhà-í
xii nchòhó ñáyiú isràél nchítè
nuu nihí ñuyúú-a.

*Yá Ndiòxí táxi-gã sá xini
tnùní-ó*

2 Te nchòhó ñáyiú ndècu
ndihí-í ichi Xítóhó Jesucristú,
ío cudíí iní-ndó cùndecu-ndo
cuéi ná cùu sá ùhú véxi
cuèndá-ndó, ³ chi ducaⁿ te
cutnùní iní-ndó sã sàndáá
ndisa iní-ndó-gã, te cunduu
càhnu iní-ndó cuéi ná ná
yáha-ndo. ⁴ Te cunduu
càhnu-ni iní-ndó te ducaⁿ
te cuu-ndo ñáyiú váha, te
cundáá-ndó núú Yá Ndiòxí,
te ducaⁿ te ñá túú-gã ná
cumání-ndó núú-gã.

5 Te núu cùmání sã xini
tnùní-ó, te cãcáⁿ-ó núú Yá
Ndiòxí te mee-gã taxi-gã, chi
ío váha iní-gã, te ñá túú cùnini
iní-gã núú-ó. ⁶ Te ni yùhu
ni iní-ó cãcáⁿ-ó núú-gã, te
quìndáá ndisa iní-ó sã táxi-gã
sá cúmání quini tnùní-ó, te
vá cání ñⁿ caní úú iní-ó.
Chi nchaa ñáyiú sàni ñⁿ
sani úú iní-xi cùu-yu dàtná
ndute làmár cuáháⁿ-xi duha
cuáháⁿ-xi dàcáⁿ nàa-xi òré
quéné tãchí. ⁷ Te nchaa ñáyiú
ducaⁿ sàni iní-xi, te vá cání
iní-yu sá nihí-yu sá xicáⁿ-yu
núú-gã. ⁸ Chi nchaa ñáyiú sàni

ñⁿ sani úú iní-xi ñá cùtnùní
iní-yu ndèdacàa sá sání iní-yu
cadá-yu.

⁹ Te nchaa ñáyiú ndàhú
ñáyiú ndècu ichi-gã, xini
ñuhu-xi ñá túú-gã ná caní
iní-yu, mee-nã cudíí iní-yu,
chi Yá Ndiòxí chindèe ñaha-gã
xii-yu. ¹⁰ Te nchaa ñáyiú
cuica xini ñuhu-xi cundecu
váha iní-yu núú Yá Ndiòxí
cuéi ná ná yáha-yu. Chi
ñáyiú-áⁿ cùu-yu dàtná itá
nchaa cùhú sã ñá túú cudíí
naha. ¹¹ Chi òré ní cuu
nihí cahni nchícanhii, te ní
dádíí-ni-xi nchaa cùhú cuíí-ãⁿ
te ní cóyo-ni nchaa itá-xi, te
ñá túú-gã cáá vìi. Te ducaⁿ
sàtnahá-xi cùu ñáyiú cuica chi
núú chíúⁿ-ni-yu xihí-yu.

*Nchaa ñáyiú quìde cahnu
iní-xi nchaa sá yáha-yu*

¹² Te váha táhú nchaa ñáyiú
quìde cahnu-ni iní-xi cuéi
nándi sá yáha-yu ndècú-yu
ichi Yá Ndiòxí, chi òré ná
ndíhí nchaa xiãⁿ yáha-yu, te
cuáñaha Yá Ndiòxí ñⁿ coróná
váha vìhi cundecu ndihí-yu,
te ndáá chi ducaⁿ cãháⁿ Yá
Ndiòxí sá táxi-gã xii nchaa
nchoo ñáyiú ñuhu iní ñáhá
xii-gã. ¹³ Te nchaa ñáyiú sàni
iní-xi cada nándi sá cuèhé
sá dúhá, te vá cání iní-yu sá
Yá Ndiòxí táuchiuⁿ-gã ducaⁿ
cadá-yu, chi Yá Ndiòxí ñá
quíú te caní iní-gã cada-gã ñⁿ
sá cuèhé sá dúhá, te ni ñá túú
tàuchiuⁿ-gã sá dúcáⁿ cadá-yu.
¹⁴ Te cuíni-yu cadá-yu nchaa
sá cuèhé sá dúhá chi ducaⁿ
véxi iní-yu. ¹⁵ Te nchaa ñáyiú
ío ñuhu iní nchaa sá cuèhé sá

dúhá te quidé-yu, te núu na càda-ní-yu te cuíta nihnú-yu.

16 Te nchòhò ñáiyu ío cùu iní-í ndécú ndìhi-í ichi Xítohó Jesucristú, vá dáñá-ndó mèe-ndo dandahú ñáhá ñáiyu xii-ndo. 17 Chi nchaa sá váha véxi-xi núú Yá Ndiöxí Yaá ndécú àndiù, chi ðiù mee-gã ní cadúha-gá andiù ndìhi nchaa chódíní, ndìhi yóó, ndìhi nchícanchii. Te Yá Ndiöxí ñá túú ndì queheⁿ ndì queheⁿ-gá sá cání iní-gá, te ní ñà túú cùu-gá dàtná ìⁿ cuándahú cuäháⁿ-xi duha cuáháⁿ-xi dàcáⁿ, chi ìⁿ-ni sá sání iní-gá. 18 Te Yá Ndiöxí ní cuiní-gá sá cúú-ó dèhe-gá, te ndáá sá cúú-ó dèhe-gá chi sàndáá iní-ó tnùhu-gá. Te nchoo ñáiyu sàndáá iní-xi tnùhu-gá cúnùu-gá-ó chi ní nduu-o dèhe-gá.

Ichi ndáá cuiti

19 Te nchòhò ñáiyu ío cùu iní-í ndécú ndìhi-í ichi Xítohó Jesucristú, cundedóho-ndo ìⁿ tnùhu na càháⁿ-í-a. Te cuiní-í sá cùndecu túha-ndo cùndedóho-ndo tnùhu Yá Ndiöxí, te caní váha iní-ndó nàcuáa càháⁿ-ndó, te cunduù càhnu iní-ndó te vá cùdéeⁿ-ndó. 20 Chi núu na cùdéeⁿ-ó te ñá túú quide váha-o núú Yá Ndiöxí. 21 Te daña-ndo nchàa sá cuèhé sá dúhá ío ñuyíú-a. Te quindáá iní-ndó tnùhu Yá Ndiöxí ndécú ndìhi-ndo, te vá cùndùu sáá iní-ndó, te ducaⁿ te naníhí tàhú-ndó.

22 Te quindáá iní-ndó tnùhu-gá te vá cuèndá-ni cundedóho-ndo, chi núu na cùndedóho-ndo te vá

tní-ndó ñá, te ðicó-ni dandahú-ndó mèe-ndo te vá naníhí tàhú-ndó. 23 Chi nchaa ñáiyu ðicó-ni sàcùndedóho tnùhu-gá te ñá túú sàndáá iní-yu, ñáiyu-áⁿ cúú-yu dàtná ìⁿ ñáiyu sàcùndéhé-ni núú-xi núú yütátá. 24 Chi nini ndèhé-yu ní xiní-yu núú-yu, te ní xócání-yu te ní nacua-naa-ní-yu nàcuáa càa núú-yu. Te ducaⁿ sàtnahá-xi cùu ñáiyu sàcùndedóho tnùhu Yá Ndiöxí, te ñá túú tní-yu. 25 Te nchaa ñáiyu dàcuaha ndisa tnùhu ní dándóo Yá Ndiöxí nihnu-ní-yu ichi-gá, chi ñá díú ìⁿ sá vèe cùu-xi. Te ñáiyu-áⁿ ñà túú ðicó-ni sàcùndedóho-yu chi quide ndáá-yu núú-gã, te cùdíí iní-yu xíndecú-yu.

26 Te nchaa ñáiyu càchí sá ndécú ichi ndáá te cùtèxínu-ni càháⁿ-yu, te xiáⁿ ðicó-ni dandahú-yu mèe-yu sá ndécú-yu ichi ndáá. 27 Te núu ndècu-o ichi ndáá cuiti ichi Dútú Ndiöxí, te chindee-o nchàa ñáiyu ní ndóo ndàhú, ndìhi ñáiyu quèé ndécú ndìhi tnùndòho tnùhu ndàhú, te vá càdá-ó nãndi sá cuèhé sá dúhá ío ñuyíú-a.

2

Ìⁿnuu-ni cùu iní-ó nchàa tnaha ñáiyu-o

1 Te nchòhò ñáiyu ndècu ndìhi-í ichi Xítohó Jesucristú Yaá cúnùu, ìⁿnuu-ni càháⁿ ndìhi váha-ndo nchàa tnaha ñáiyu-ndo. 2 Te núu núú nàtàcá-ndó chiñuhu-ndo Yá Ndiöxí ní sáá ìⁿ téé ío váha càa dóó nihnú-dè, te ní sáá tucu ìⁿ téé nihnu dóó ndàhú, 3 te núu téé nihnu dóó váha-ni-áⁿ

néhé-ndó sǎ yíñùhu núú-dě, te taxinucóo-ndo-dě ìñ núú xilé váha, te téé ndàhú-án daxòcòo-ndo-dě ìñ xio àdi canucòo-ndo-dě núú ñùhú, ⁴ te núú ducaⁿ na càda-ndo te ñá túú quide váha-ndo. Chi ìñ-ni-dé cúú ìní-ndó, te ìñ-dé ñá túú cùu ìní-ndó.

⁵ Te nchòhó ñáyiu ío cùu ìní-í ndécú ndihi-í ichi Xítóhó Jesucristú, chí cùndèdóho tucu tnúhu na càháⁿ-í-a. Yá Ndiòxí càháⁿ-gá vài ñáyiu ndàhú cuendá tnahá tnúhu ndihi ñàhá-yu xii-gá, te ndècu váha-gá-yu dàcúúxí ñáyiu cuica ñáyiu ñá túú sàndáá ìní tnúhu-gá, chí ní cachí-gá sá ncháá ñáyiu na cùu ìní ñàhá xii-gá nduu táhù-yu cundecú-yu ndihi-gá ní caa ní quíhíⁿ. ⁶ Te nchòhó, ñá túú nèhe-ndo sá yíñùhu núú ñáyiu ndàhú, chí núú ñáyiu cuica-ni nèhe-ndo sá yíñùhu. ¿Te náa ñá cùtnùní ìní-ndó sǎ ñáyiu cuica dàndoho ñaha-gá-yu xii-ndo, te cǎndeca ñàhá-yu sàháⁿ núú cuè téé cùchiuⁿ-án? ⁷ Te diu-ní-yu ío càháⁿ cuèhé-yu cuendá Xítóhó Jesucristú, te nchòhó sa ní nduu-ndo dèhe-gá.

⁸ Te ìñ ndudú cùnùu-gá ní càháⁿ Yá Ndiòxí ní ngódó tnùnì núú tütú-gá càchí-xi sá cúú ìní-ó tnàha ñáyiu-o dàtná cúú ìní-ó mèe-o. Te núú ducaⁿ na càda-o te quide váha-o. ⁹ Dico núú ñá túú cùu ìní ìñnuu-o cuè tnaha ñáyiu-o, te cuu cuéchi xii-o chí ñá túú quide-o nacuaá càháⁿ Yá Ndiòxí. ¹⁰ Te núú ìñ ñáyiu ndàunihnu ìñ sá càháⁿ Yá Ndiòxí, te dava-ni

quidé-yu ña, te ñáyiu-án ñà túú quidé-yu nacuaá càháⁿ ndudú Yá Ndiòxí. ¹¹ Te Yá Ndiòxí ní cachí-gá sá téé ndècu ñadihí-xi vá càháⁿ ndihi-dé ingá ñadihí. Te diu-ni-gá ní cachí-gá sá vá càhñí-ó tnàha ñáyiu-o. Te cuéi ñá túú càháⁿ ndihi-o ingá ñadihí, te núú sàhni-o tnaha ñáyiu-o te ñá túú quide-o nacuaá càháⁿ ndudú Yá Ndiòxí. ¹² Te nchoo xini ñuhu-xi càháⁿ-ó tnúhu váha te cada ndáá-ó, chí ñá díú ìñ sá vèe cùu-xi sá ní cachí Yá Ndiòxí cada-o. Te mee-gǎ ní cachí-gá sá cadá ndáá-gá cuéchi-o na sàá nduu. ¹³ Te nchaa ñáyiu ñá túú cùndahú ìní tnàha ñáyiu-xi, te vá cùndàhú ìní ñàhá-gǎ xii-yu na sàá nduu càda ndáá-gá cuéchi-yu. Te nchaa ñáyiu cùndahú ìní tnàha ñáyiu-xi te Yá Ndiòxí cùndahú ìní ñàhá-gǎ xii-yu na sàá nduu-ǎⁿ.

Quindáá ìní-ó Yá Ndiòxí te cada váha-o

¹⁴ Te nchòhó ñáyiu ndècu ndihi-í ichi Xítóhó Jesucristú, te núú càchí-ó sǎ sàndáá ìní-ó Yá Ndiòxí te ñá túú quide-o sá váha, te ñá túú ndéé nándihi-xi, chí vá nánihí tǎhú-ó te núú ducaⁿ na càda-o. ¹⁵ Te núú ndèhe-o ìñ tnaha ñáyiu-o ñà túú dǎo-yu àdi ñá túú sǎ cùchitò-yu, ¹⁶ te xǎhaⁿ-o: “Núhú-n te nducu-n dǎo cuihnu-n te nducu-n sǎ cǎxí-n”, xǎhaⁿ-o, te ñá túú nǎ sǎñaha-o, te sá dúcáⁿ quide-o te ñá túú quide váha-o. ¹⁷ Te núú càchí-ó sǎ sàndáá ìní-ó Yá

Ndiõxí te ñá túú quide váha-o ndècu-o, te vèdana nàndíhi-xi.

18 Te ío ñáyiú cächí-yu sá sàndáá iní-yu Yá Ndiõxí, te ío ñáyiú cächí-yu sá méé-ní sá vâha quidé-yu. Te yúhú cächí-í sá núu ñá túú quide-o sá vâha, te ñá túú sàndáá iní-ó Yá Ndiõxí. Te nchoo quide-o sá vâha núu xiãⁿ cútnùní iní-ó sá sàndáá iní-ó-gã. 19 Te

íó ñáyiú cächí sá ñⁿdii-ni Yá Ndiõxí ndécú, te váha-ni càháⁿ-yu. Te tnàhá yucu ñávâha ndihi nchaa espíritú cùndíhi-xi xiní-xi sá ndécú ñⁿdii-ni Yá Ndiõxí, te yùhú-xi dico ñá túú tnè-xi tnúhu-gã.

20 Te ío ñè díquí-ó te núu na cächí-ó sá sàndáá iní-ó Yá Ndiõxí, te vá cádá-ó sá vâha. 21 Te ñaní tnàhá-ó ndíi Abrahám téé ní xindecu ndéé sanaha ñí ngúndecu váha ndíi núú Yá Ndiõxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te dàvá-áⁿ ñí cutnùní iní-gá sá ïo sàndáá iní ñáhá ndíi xii-gã, núu ñá ní dàña-gã cahni ndíi déhe ndíi. 22 Te nàha-o sá ndíi Abrahám ñá díú-ní sá méé-ní sá ñí sàndáá iní ñáhá ndíi xii-gã, chi ní tnè ndíi tnúhu-gã. 23 Te ducaⁿ ñí quee ndáá-xi nàcuáa càháⁿ-xi núú tûtú Yá Ndiõxí núú cächí-xi:

“Ndíi Abrahám ní sàndáá iní ndíi ní quide ndíi nchaa nàcuáa ní xáhaⁿ Yá Ndiõxí, te ní ngúndecu váha ndíi núú-gã, te ní cachí-gã sá cúú ndíi ñⁿ téé ío váha tnàhá tnúhu ndíhi-gã”, duha cächí-xi núú tûtú-gã.

24 Te xiãⁿ cútnùní iní-ó sá

ñà díú mèe-ni sá quindáá iní-ó Yá Ndiõxí, chi núu na càda-o nacuáa cuu váha iní-gã te ngúndecu váha-o núú-gã 25 dàtná ní quide-gã tá Ràháb ñⁿ ñadíhi ní xindecu ndéé sanaha, chi xíchí-ãⁿ ñí xindecu-xi ichi díi iní, dico ní tuha-xi ichi Yá Ndiõxí te ní ngúndecu váha-xi núú-gã, chi ní chindee-xi cuè téé israhél cue téé ní xica chiúⁿ-gã, te ní sanu ichi ñaha-xi xii-güedé ñⁿ ichi núú vâ náníhi ñáhá cuè téé cùu úhú iní ñáhá xii-güedé.

26 Te nchaa ñáyiú cächí sá sàndáá iní Yá Ndiõxí, te ñá túú quidé-yu nàcuáa càháⁿ-gã ñáyiú-áⁿ cúú-yu dàtná ñⁿ ñáyiú ní xíhi. Chi ñá túú-gã ndíxi tũu iní-yu nchaa sá cuèhé sá dúhá quidé-yu. Duha sàtnahá-xi cùu nchaa ñáyiú ñá túú cùní tnè tnúhu càháⁿ Yá Ndiõxí.

3

Nàcuáa quide yaa-o

1 Te nchòhó ñáyiú ndècu ndíhi-í ichi Xítohó Jesucristú, vá ncháá-ndó càni iní-ndó cùu-ndo mestnúu dacuàha-ndo ñáyiú tnúhu Yá Ndiõxí chi íi cáá-xi. Chi na quítnahá nduu nàcuáha-o cuèndá núú-gã, te núu ñá túú ní quide ndáá-ó ñá, te vá cúú vâha iní-gã núú-ó. 2 Te nchaa-o ïo cuèhé sá ñà túú vâha quide-o. Te nchaa ñáyiú ñá túú càháⁿ tnúhu cuèhé tnúhu duha cùú-yu ñáyiú ñá túú nã cúmání chi ío ndáá quidè-yu. Te xiní-yu cotnè-yu mèé-yu, te quide váha-yu núú Yá Ndiõxí. 3 Te dàtná cuíni-ndó cùu ñⁿ quiti te núu

na chihí-o frenú yuhu-di, te cotnii-o-di te ngúnu ichi-di, te ducaⁿ sãtnahá-xi cùu ñáyiú sãcótnei mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuiní-ndó cùu barcú cuèi ñàhnu vihi-xi, dico òré quéné ñhi táchí te tũndaha-xi ñⁿ xio, dico téé dàcaca ndacu-dé dáquihíⁿ-dé-xi ndihi ñⁿ yutnu sá dánãni-güedé tímú ndãa núú càchí iní-dé quihíⁿ-xi. ⁵ Te ducaⁿ cùu tucu yaa-o chi ío líhli-xi dico ío cuéhé tnúhu càháⁿ-ó ndihi-xi. Te ducaⁿ-ni sãtnahá-xi cùu tucu sá lúhá ñúhú chi sãhmi-xi ñⁿ yucu. ⁶ Te diu-ni ducaⁿ sãtnahá-xi cùu yaa-o chi ío cuéhé tnúhu cuèhé tnúhu duha càháⁿ-ó ndihi-xi, te dàcuíta ñhnu ñaha-xi xii-o. Te ío cuéhé cuèchi quide-o ndihi-xi cuendá sá ñuyíú-a ñúhu tnahá ñúhú tñi yucu ñávãha dàticá ñhnu ñaha-xi. ⁷ Te ndacu-o càda masú-ó nchãa núú quiti ío ñuyíú cuèi quiti dééⁿ quiti xica núú ñúhú, te cuèi quiti ndãva, te cuèi cóo, te cuèi quiti ñúhu xití ndute lámár, chi ducaⁿ quide dava cue téé ñuyíú-a. ⁸ Dico yaa-o chi vá yóo ñⁿ ndacu cada masú ñáhá xii-xi nacuãa càháⁿ-ó mée-ni tnúhu váha ndihi-xi, chi mee-ni tnúhu cuèhé tnúhu duha cunuu-gá càháⁿ-ó ndihi-xi. Te cùu-xi datná ñⁿ venènu chi dàti-u-xi iní-ó. ⁹ Te diu-ni ndihi yaa-o quide cahnu-o Dútú Ndiõxí Yáa cúú Tãtã-ó, te diu-ni ndihi yaa-o cahãⁿ úhú-ó cuè tnahã ñáyiú-o. Te xini ñuhu-xi vá dúcãⁿ càda-o, chi mee-gã ní

chihi-gá sá xini tnúni-ó ndihi iní-ó, dàtná cáã mée-gã ñúhú iní-gá. ¹⁰ Te diu-ni yuhu-o quèe tnúhu váha càháⁿ-ó, te diu-ni yuhu-o quèe tnúhu cuèhé tnúhu duha. Te nchòhó ñáyiú ndècu ndihi-í ichi Xitohó Jesucristú cunaha-ndo sã ñà túú ndùu váha-xi ducaⁿ càda-o. ¹¹ Te ñá túú xini-ndó sã ñⁿ núú quée ñhni ndute, te quèe ndute váha te quèe ndute úã-ãⁿ. ¹² Te nchòhó ñáyiú ndècu ndihi-í ichi Xitohó Jesucristú, te ñá túú xini-ndó sã ñⁿ yutnu ngúxí, te cùuⁿ aceitúnã, àdi xini-ndó sã ñⁿ yoho yaha stilé te cùuⁿ ngúxí. Te ducaⁿ cuèi ñⁿ núú quée ñhni ndute, vá cúú quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnúhu váha te càháⁿ-ó tnúhu cuèhé tnúhu duha.

Nchaa sã vãha xini tnúni-ó taxi Yã Ndiõxí

¹³ Te núú ndècu ñáyiú túha tnuú-ndó ñáyiú cutnuni iní-xi, te xini ñuhu-xi mee-ni sã vãha cadã-yu, ducaⁿ te cutnuni iní-ó sã túha ndisã-yu, te vá cadã càhnú-yu mée-yu. ¹⁴ Te núú nchoo cuèdú iní-ó te cuiní-ó cunuu-o núú tnahã ñáyiú-o, te vá càchí-ó sã túha-o, chi ñá túú quide ndãã-ó te núú ducaⁿ na càda-o. ¹⁵ Chi ñá díú xãⁿ ní dãnehé ñáhã Yã Ndiõxí, chi ñuyíú iha ní cacu ñhnu-xi cuendá sã yucu ñávãha dàcahu iní ñáhã-xí. ¹⁶ Te núú ndécú ñáyiú cuèdú iní ñáyiú cuiní cunuu, te yacãⁿ mee-ni ndãhú nãã xĩndecú-yu, te ñá túú quide váha-yu, chi

mee-ni nchàa sá cuèhé sá dúhá quidé-yu. ¹⁷ Te núu ní taxi Yá Ndiöxí sá xini tnùnì-ó, te cada váha-o, te cáháⁿ ndihi váha-o nchàa tnaha ñáyi-u-o, te tñi-o tnùhu váha càháⁿ-yu, te cundàhú iní-ó-güë-yu te chindee-ö-yu, te vá cáni ñⁿ cani úú iní-ó, te ío cunduu ndáá iní-ó. ¹⁸ Te núu cuiní-ó ñà túú nã cuu cundecu-o ñùyú-a, te cada váha-o sã cúu-xí tnàha ñáyi-u-o cuendá sá ñà túú nã cuu cundecu-o ndihí-yu. Te ducaⁿ te nguínchicúⁿ dava-gá tnàha ñáyi-u-o càda váha-yu.

4

Vá cúu cundecu-o ichi Yá Ndiöxí te cada-o nãndi sá cuèhé sá dúhá

¹ ¿Te xini-ndó nã cuendá nàá ñáyi-u te xisahni tnàhá-yu-ãⁿ? Te nàá-yu sá tnùhu cuédú iní, chi diu-ni xíãⁿ ñúhú iní-yu, te ñà túú ndècu váha iní-yu. ² Chi cuiní-yu cundecu ndihí-yu ñⁿ sá ñà túú ndècu ndihí-yu, te ñà túú nihí-yu núu xíãⁿ xícuu cuédú iní tnáhã-yu, te xícuèhé tnáhã-yu, te càni tnahá-yu, te xisahni tnàhá-yu. Te ñà túú nihí-yu sá cuiní-yu chi ñà túú xicáⁿ-yu núu Yá Ndiöxí. ³ Te cuëi xicáⁿ-yu ñⁿ sá cuiní-yu núu-gã te ñà túú sãñaha-gã, chi ñà túú xicáⁿ-yu ñⁿ sá cúu xii-yu sá váha, chi ñⁿ sá ná ndihí-yu núu cáda-yu nchaa sá cuèhé sá dúhá xicáⁿ-yu, núu xíãⁿ ñà nihí-yu. ⁴ Te nchaa ñáyi-u ducaⁿ xíquide ío cùu sáá iní-yu núu Yá Ndiöxí. Te nàha-ndo

sá ncháá ñáyi-u cùdí iní-xi cundecu ichi cuèhé ichi duha cùu úhú iní-yu Yá Ndiöxí, chi vá cúu cundecu-o ichi cuèhé ichi duha, te cundecu-o ìchi-gá. ⁵ Te ñà túú dió ducaⁿ càháⁿ-xi núu tütú Yá Ndiöxí núu càchí-xi: “Yá Ndiöxí ní taxi-gá Espiritú-gá ndécú ndihí-o. Te Espiritú-gá-áⁿ cuiní-xi sá méé-ní-gã cuhuⁿ iní-ó”, duha càchí-xi núu tütú-gá. ⁶ Te Yá Ndiöxí ío chindee ñaha-gá cuendá cada ndáá-ó núu-gã dàtná càchí tucu-xi núu tütú-gá núu càchí-xi: “Yá Ndiöxí ñà túú cùu váha iní-gá núu nchàa ñáyi-u quide cahnu mee-xi, dico chindee-gá cue ñáyi-u ndàhú iní-xi”, duha càháⁿ-xi núu tütú-gá. ⁷ Te cada-ndo nàcuáa càháⁿ Yá Ndiöxí. Te vá cáda-ndó nàcuáa cuiní yucu ñávaha, ducaⁿ te xóo cóo ndéé ñáhá-xí xii-ndo. ⁸ Te tñi-ndo tnùhu càháⁿ Yá Ndiöxí te cundecu ndihí ñaha-gã xii-ndo. Te nchaa nchòhó ñáyi-u ndècu ichi cuèhé ichi duha dañ-a-ndo ìchi-áⁿ te cada váha-ndo. Te nchaa nchòhó ñáyi-u sàni iní cunu cuechi núu Yá Ndiöxí te quide-ni-ndo nchaa sá cuèhé sá dúhá, te ñà túú quide váha-ndo núu ducaⁿ, chi xini ñuhu-xi sá càcáⁿ-ndó núu Yá Ndiöxí sá ná ndádá ndòo ndada nine-gá iní-ndó. ⁹ Te ndixi cuëchi iní-ndó nchàa sá quidé-ndó ndéé ndáhyú ndisa-ndo sã ndihú iní-ndó, te ñà díú dà cudí iní-ndó. ¹⁰ Te nãhmá-ndó núu Yá Ndiöxí nchaa sá ní quide-ndo, te ngúndecu váha-ndo núu-gã.

Vá càháⁿ-ó nchàa sá quidé

tnàha ñáyiu-o

11 Te nchòhó ñáyiu ndècu ndìhi-í ichi Xítohó Jesucristú, vá cuátnùhu tnaha-ndo, chi nchaa ñáyiu sàtnuhu tnaha dícó-ni ndàa nuú-yu ndèhe tnahá-yu, te ñá túú càháⁿ váha-yu cuendá tnúhu Yá Ndiòxí sá sánú ichi ñaha xii-yu nàcuáa cundecú-yu, chi dàquee tíhũ-yu tnúhu-áⁿ. Te núu càchí-ndó sã ñà túú càháⁿ váha tnúhu Yá Ndiòxí, te xiáⁿ queé-xí sã ñà túú sàndáá iní-ndó tnúhu càháⁿ-gá, te cuíní-ndó cùnuu tnúhu-ndo núú tnúhu-gá. 12 Te mee Yá Ndiòxí ní cachí-gá nàcuáa cada-o, te ñu-ni mee-gã càháⁿ-gá te núu ní quide váha-o, àdi ñá túú ní quide váha-o. Te ñu-ni mee-gã dàcácu nihnu ñaha-gã xii-o núú ùhú núú ndàhú, te ñu-ni-gá daquihíⁿ ñáhá-gã xii-o núú ùhú núú ndàhú-áⁿ te núu vá cádá váha-o. Te nchoo ñà túú nã cúú-ó, te núu mee-ni nchàa sá quidé tnàha ñáyiu-o cundehe-o.

Ñá túú cùnuni iní-ó nãsa túndaá-ó ñngá nduu

13 Te ñava nchòhó càchí-ndó sã vítná àdi tneé quihíⁿ-ndó ñⁿ ñuú, te yacáⁿ cundecu-ndo ñⁿ cuíá cada-ndo ñⁿ ndáhú te níhí-ndó díhúⁿ. 14 Te ní ñà xini-ndó nã cúú sã yáha-ndo vitna àdi tneé. Te nchoo cùu-o datná ñⁿ vícú núhú, chi vícú-ãⁿ tnávíí ndéhé-ó te tna tnaa-gá sa ní ndóñhú-xí. Ducaⁿ sãtnahá-xi cùu nchoo chi ñⁿ úú nduu duha vèxi-o ñuyú-a te ndoñuhu-o. 15 Te núu sàndáá iní-ó Yá Ndiòxí te

duha càháⁿ-ó; “Te núu Ndiòxí ná càchí-gá sá cùndecu tnaa-o ñuyú-a te cada chiⁿ-o”, duha cachí-ó. 16 Dico mee-ndo chi ío ñⁿ iní-ndó cuíní-ndó cùnuu tnúhu-ndo núú Yá Ndiòxí, te ñá túú nduu váha-xi sá dúcáⁿ quide-ndo. 17 Te núu xini-ó càda-o sá váha te ñá túú quide-o, te cùu-xi ñⁿ cuéchi núú-gá.

5

Tnúhu sá dátũha ñaha xii nchaa ñáyiu cuica ñà túú sàndáá iní tnúhu Yá Ndiòxí

1 Te nchòhó ñáyiu cuica ñáyiu cuihna iní-xi cund-edóho-ndo tnúhu na càháⁿ-í-a. Vitna ngúita-ndo ndíhú iní-ndó, te ndáhyú víhí-ndó, chi quixi ñⁿ tnúndòho cuendá-ndó te ndoho víhi-ndo. 2 Te nchaa sá ndécú ndìhi-ndo ndìhi cuita tiu quihíⁿ, te quee tíquidi dóó-ndó, 3 te díhúⁿ-ndó caxi cudi ñùhu. Te xiáⁿ cuita naquiní ndeé-ndó tnúndòho sã ñà túú quide váha-ndo. Te ndìhi-ndo ndìhi díhúⁿ-ndó sã ní taxúha-ndo, chi vitna sa ta cùyatni sáá nduu ndìhi ñuyú-a. 4 Te nchaa cue téé ní quide chiⁿ núú chíúⁿ-ndó ní ndatnúhu-ndo ndìhi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núu xiáⁿ ío ndécuéchi-ndo. Te Yá Ndiòxí Yaá ndécú àndiu ní tecú dóho-gá nàcuáa càháⁿ-güedé sá ní dándáhú-ndó-güedé. 5 Te nchòhó ñáyiu cuica, sá ndécú váha-ni-ndo cùndee iní-ndó,

núu quide-ni-ndo nchaa sá vëxi iní-ndó. Te cùu-ndo datná ìⁿ quiti nùcúihnu mee-ni xèxi-dí, te sáá nduu sàhni-güedé-dí. Te ducaⁿ sàtnahá-xi cùu nchohó chi ndècu váha-ndo vitna, te sáá ìⁿ nduu nàcháhu-ndo nchàa sá quidé-ndó núú Yá Ndiöxí te núu vá quindáá iní-ndó-gã. ⁶ Te quide úhú iní-ndó sàhni-ndo cue ñáiyu quide ndáá núú Yá Ndiöxí, te ñá túú nã quidé-yu.

Cunduu càhnu iní-ó te cáháⁿ ndihi-o Yá Ndiöxí

⁷ Te nchòhó ñáiyu ndècu ndihi-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyú-a, te cada-ndo dàtná quidé nchàa ñáiyu chìhi tatá chi sàcùndetú-yu ndéé cúúⁿ dáú te chìhí-yu. Te cùndee-ni iní-yu sàcùndetú-yu ndéé cúúⁿ-gã dáú te cùu itú-yu, te ndùdí iní-yu. ⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú. ⁹ Te duha ndùu tnúhu càháⁿ-í núú nchòhó ñáiyu ndècu ndihi-í ichi Xítohó Jesucristú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Crístú nacuaca ñaha-gã xii-o cùndecu-o núú Yá Ndiöxí, te mee-gã cada ndáá-gã cuéchi-o. ¹⁰ Te nchòhó ñáiyu ndècu ndihi-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndiöxí ndéé sanaha sá ío càhnu ní xínduu iní-güedé

cuéi nándi ní ndoho-güedé. ¹¹ Te cùtnuní iní-ó sã cúú-ó ñáiyu ío váha táhú-xi te núu na càda cahnu iní-ó nchàa sá ná yáha-o cuendá Yá Ndiöxí. Te nàha-ndo sá ndíi Jób ducaⁿ nĩ quide ndíi, chi nándi sá nĩ yáha ndíi te ní quide càhnu iní ndíi. Te sátá nĩ yáha ní ndoho ndíi, te ío cuéhé sã nĩ sáñaha Yá Ndiöxí xii ndíi. Chi ío váha iní-gá te ío cùndahú iní-gá nchaa ñáiyu ío càhnu iní-xi.

¹² Te nchòhó ñáiyu ndècu ndihi-í ichi Xítohó Jesucristú, chí cùndèdóho tucu tnúhu na càháⁿ-í-a, chí ío xìni ñuhu-xi. Vá cacú nèhe-ndo Yá Ndiöxí òré cùiní-ndó sã cùtnuní iní ñáiyu sá ndáa cada-ndo ìⁿ sá càháⁿ-ndó. Te nĩ vá cacú nèhe-ndo sá càchí-yu cùu ndiöxí cadúha cue téé ñuyú-a. Te núu ìⁿ sá xicáⁿ tnàha ñáiyu-ndo núú-ndó te cúñaha-ni-ndo te núu cuu àdi sá vã cúú. Te vá cacú nèhe-ndo Yá Ndiöxí, ducaⁿ te vá dándòho ñaha-gá xii-ndo.

¹³ Te núu ndòho-ndo te cáháⁿ ndihi-ndo Yá Ndiöxí, àdi te núu ndècu váha-ndo te cudíí iní-ndó te chíñuhu-ndo-gã, ¹⁴ àdi núu cùhú-ndó te cana-ndo cuè téé yìndaha ñaha xii-ndo nacuáa ndècu-ndo ichi Yá Ndiöxí cuendá tee-güedé acití díquí-ndó, te cacáⁿ táhú-güedé núú-gã cuendá-ndó dàtná ní cachí méé-gã cunduu. ¹⁵ Te núu quindáá ndisa iní-ndó sã ndúha-ndo, te ndúha-ndo chi Yá Ndiöxí cada tátna ñaha-gã xii-ndo, àdi núu ní quide-ndo ìⁿ sá ñà túú tàú-ndó càda-ndo núú-gã te cada càhnu iní-gá

cuéchi-ndo. ¹⁶ Te xini ñuhu-xi cútnühu tnàha-ndo oré ñá túú cundáá-ndó núú Yă Ndiöxí cuëndá chindee tnühu tnàha-ndo cáháⁿ ndihi-ndo-gă te xocàni-gá cuéhé-ndó, te cada càhnu iní-gá nchaa sá ñà túú vâha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yă Ndiöxí na cácaⁿ-yu iⁿ sá cuini-yu núú-gă te nihí-yu, chi sàá tnúhu-yu núú-gă. ¹⁷ Te té Èliás, téé ní xíndecu ndéé sanaha ñí cáá-dé dàtná cáá nchòo. Te ní cáháⁿ ndihi-dé Yă Ndiöxí ni yùhu ni iní-dé ní xáhaⁿ-dë xii-gá sá vă dâcùuⁿ-gá dáú, te ní tniⁿ-gá tnúhu ní cáháⁿ-dé, te ñá ní dàcuuⁿ-gá dáú ùní cuía dava. ¹⁸ Te dâtnùní ducaⁿ te ní cáháⁿ ndihi tucu té Èliás-áⁿ Yă Ndiöxí sá dâcùuⁿ-gá dáú te ní cuuⁿ, te ní cuu tucu nchaa sá ñí xitu-güedé.

¹⁹ Te nchòhó ñáyiú ndècu ndihi-í ichi Xítóhó Jesu-crìstú, te núu dava-ndo sà ndecu-ndo ichi Yă Ndiöxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó núcúndecu tucu-ndo ichi-gá, ²⁰ te núu ducaⁿ na càda-ndo te dâcácu nihnu tnàha-ndo núú ùhú núú ndâhú, te mee Yă Ndiöxí cada càhnu iní ñáhá-gă xii-ndo cuéi ío cuéhé cuéchi ní quide-ndo.

TUTÚ DÍHNA NUU NĪ CADŪHA TÉ PÈLÚ

Té Pèlú cādūha-dé tutú sá cúu-xí cuè ñáyiú sàndáá iní ñáhá xì Yá Ndiõxí

¹ Yúhú té Pèlú ní tendaha ñaha Xítohó Jesucristú xíca cùu-í càháⁿ-í tnúhu-gá, te cādúha-í tutú-a sá cúu-xí nchòhó ñáyiú xínchíté nuu ndècu distritú Pòntó, ndihi distritú Gàlaciá, ndihi distritú Capadociá, ndihi distritú Àsiá, ndihi distritú Bìtiniá. ² Chi Dútú Ndiõxí ní cachí-gá sá cúu-ndó dēhe-gá ndéé cútñahá vátá ngáva-gá ñuyú, te Espiritú-gá ní quide-xi ndècu yiñuhu-ndo núú-gã vitna. Te ní cachí-gá sá cúu-ndó dēhe-gá cuèndá tñi-ndo nchàa tnúhu càháⁿ Xítohó Jesucristú, ndihi cuèndá nduu ndoo nduu nine iní-ndó, chi diu cuèndá-áⁿ nĩ xihí Xítohó Jesucristú. Te xícaⁿ táhù-í núú Yá Ndiõxí sá ío na chindee chítuu ñaha-gã xii-ndo cuèi vitna te cuèi núú cuàháⁿ núú vèxi, te diu-ni-gá ná cáda te ío váha cuu iní-ndó cundecu-ndo.

Tnúhu ndee iní sá ndécú ndihi ñáyiú sàndáá iní ñáhá xì Yá Ndiõxí

³ Te vitna chí ná càchí-ó sã ío càhnu cuu Yá Ndiõxí Yaá cúu Tãtá Xítohó Jesucristú, chi diu-gá ío ní cundàhú iní ñáhá-gã xii-ndo núu xíáⁿ ní quide-gá sá nchóó nĩ nduu-o dàtná ñⁿ ñáyiú saa vitna. Te ducaⁿ nĩ quide ñaha-gã xii-o

cuèndá sá Xítohó Jesucristú ní xihí-gá te ní ndoto-gá. Te cuèndá sá nĩ nduu-o dàtná ñⁿ ñáyiú saa, xíáⁿ ní ngúndecu ndihi-o tnúhu ndee iní ⁴ sá cúndècu ndihi-o-gá ni caa ni quíhíⁿ, chi ducaⁿ nĩ cachí-gá cunduu. Te yàcáⁿ vá quini-gá-ó nĩ ñⁿ sá cuèhé sá dúhá, te ío cudíí iní-ó cundecu-o ndihi-gá ni caa ni quíhíⁿ. ⁵ Te sá sàndáá iní-ó Yá Ndiõxí, núu xíáⁿ coto ñaha-gã xii-o ndéé ná sàá nduu nàqueheⁿ cuèndá ñáhá-gã chi ío càhnu cuu-gá.

⁶ Te xíáⁿ ío cudíí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo. ⁷ Te òré ná cáda càhnu iní-ndó yáha-ndo nchàa sá ná cáda ñaha ñáyiú xii-ndo, te ducaⁿ te cutnùní sàndáá ndisa iní-ndó Yá Ndiõxí, te sá dúcáⁿ sàndáá iní-ndó Yá Ndiõxí ío-gá váha dàcúúxí dǐhúⁿ cuàáⁿ chi xíáⁿ ñá túú cùdí-xi. Te cuèi ducaⁿ dico xito ndéé náhí-ní-güedě núu ndisa cùu-xi dǐhúⁿ cuàáⁿ. Te ducaⁿ sãtnahá-xi cùu nchòhó cuèndá nchaa sá ndóhó-ndó, te na sàá nduu quixi tucu Xítohó Jesucristú te cúñaha-gã xii-ndo: “Ío váha ní quide-ndo, te vitna ío càhnu cuu-ndo, te tàú-ndó núcúndecu váha-ndo”, duha cúñaha-gã xii-ndo.

⁸ Te vitna ío cùu iní-ndó Xítohó Jesucristú cuèi vátá quini-gá-ndó-gã, te ducaⁿ ío sàndáá iní-ndó-gã, te ío cudíí iní-ndó te súúní nĩ ñá cútñùní iní-ndó nãsa cunduu tnúhu càháⁿ-ndó sã dúcáⁿ ío cudíí iní-ndó ⁹ cuèndá sá

nĩ naníhí tǎhú-ndó, chi ní sándáá iní-ndó-gǎ.

10 Te cue tée ní xóo cáhán tnúhu Yá Ndiöxí ndéé sanaha nĩ cachí-güedé nàcuáa cada-gá cundàhú iní ñáhá-gǎ xii-o vitna. Te cue tée-ánⁿ ío váha ní dácúáhá-güedé nàcuáa cada Yá Ndiöxí dácácu nihnu ñaha-gǎ xii-o vitna. 11 Te Espíritú Xítohó Jesucristú ní ngúndecu ndihí cue tée-ánⁿ nĩ xáhaⁿ-xi xì-güedé nàcuáa ndoho-gá, te ní xáhaⁿ tucu-xi xii-güedé sá sǎtá ná yáha ndoho-gá te ío cunuu-gǎ ndihí Yá Ndiöxí. Te ío ní saní iní-güedé nũu ná nduu sǎá ducaⁿ càda-xi, ndihí nchaa nándi-gǎ cúú sǎ cáda-xí. 12 Te Yá Ndiöxí ní xáhaⁿ-gǎ xii-güedé sá ncháá tñhu váha cáhán-güedé vá cúú-xí cuendá méé-güedé, chi cuendá nchoo cuè ñáyiú ndècu ñuyíú-a vitna cùu-xi. Te ñu-ni tnúhu-ánⁿ cúú tñhu cáhán nchúhú cue tée cáhán tnúhu Yá Ndiöxí núú-ndó. Te Espíritú sá nĩ taxi Yá Ndiöxí ndécú ndihí-o chindee ñaha-xi xii-ndí cáhán-ndí tnúhu-gá. Te cue espíritú xínú cuèchi núú Yá Ndiöxí ío cuíní-xi quíní ndáá-xi nchaa nàcuáa cuáhánⁿ tnúhu-ánⁿ.

Yá Ndiöxí cachí-gá sá cáda-ó mèe-ni sá váha

13 Te sá dúcánⁿ ío váha ní quide ñaha Yá Ndiöxí xii-ndo xǎⁿ xíní ñùhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ni ñⁿ sá cuèhé sá dúhá, te ío quíndáá iní-ndó sǎ Yá Ndiöxí cada váha ñaha-gǎ nduu na quixi tucu Xítohó Jesucristú. 14 Te

íó tñⁿ-ndo ncháa tnúhu cáhánⁿ Yá Ndiöxí, te vá cúhúⁿ-gǎ iní-ndó nándi sá cuèhé sá dúhá sǎ ní xúhuⁿ iní-ndó cùtnáhá vátá cùndecu-gá-ndó ìchi-gá te ni vǎ cáda-ndó. 15 Te cada-ndo mèe-ni sá váha cundecu-ndo dàtná quidé mèe Yá Ndiöxí Yáá ní cáhánⁿ ñáhá xii-o cundecu-ndihí-gá. 16 Te cachí-gá núú tütú-gá: “Cada-ndo mèe-ni sá váha cundecu-ndo, chi ducaⁿ quide yúhú”, duha cachí-gá núú tütú-gá.

17 Te Yá Ndiöxí cada ndáá-gá cuèchi nchaa ñáyiú, te vá cáda cuendá-gá cuèi náí ñáyiú cùú-yu, te nchòhó cachí-ndó sǎ ñíú Tǎtá-ndó cùu-gá te ndáá, núú xǎⁿ xíní ñùhu-xi canehe-ndo sá yíñùhu núú-gǎ ndi ncháa nduu cundecu-ndo ñuyíú-a.

18 Te ñu-gá ní dácácu nihnu ñaha-gǎ xii-ndo ñⁿ ìchi sá ñà túú nándihí ní sanu ìchi ñaha cuè ñaní tñáhá-ndó nĩ xíndecu ndéé sanaha ni cùu, te nchòhó sa náha-ndo sá sǎ dúcánⁿ nĩ quide ñaha Yá Ndiöxí ní dácácu nihnu ñaha-gǎ xii-ndo ìchi-ánⁿ ñà túú ní chǎhu-gá ni ñⁿ díhúⁿ cuáánⁿ, te ni ñⁿ díhúⁿ cuixínⁿ sá ndihí nihnu ñuyíú-a cuendá-ndó.

19 Chi Xítohó Jesucristú ní quixi-gá ní sati níñí-gǎ, te ní xíhí-gá núú cùrúxí cuendá sá nchóó naníhí tǎhú-ó, te cùu-gá dàtná ñⁿ mbéé quiti ío váha iní-xi, quiti cándoo canine. 20 Te ducaⁿ nĩ ndoho Xítohó Jesucristú, chi ducaⁿ tñáhí ndéé tñuní ndoho-gá ndéé cùtnáhá vátá ngǎva-gá ñuyíú. Te ducaⁿ nĩ yáha-gá

cútnàhá ní quixi-gá òré vitna cùmání sǎá nduu nàa ñuyíú-a cuèndá nchoo cùu-xi sá vǎha xii-o vitna. ²¹ Te nchòhó sa ñihí-ndó tnúhu nàcuáa ní yáha Xítóhó Jesucristú cútnàhá ní quixi-gá ñuyíú-a, núu xiǎⁿ sàndáá iní-ndó Yá Ndiǒxí. Te Yá Ndiǒxí ní dándótó-gǎ Xítóhó Jesucristú, te sátá ní dándótó ñàha-gá te ní cachí-gá sá ïo càhnu cuu Xítóhó Jesucristú. Te sá dúcáⁿ ní cuu, xiǎⁿ ïo sàndáá iní-ndó Yá Ndiǒxí, te ní taxi-gá tnúhu ndee ìní ndécú ndìhi-ndo sá sǎá nduu cùndecu-ndo ndìhi-gá ní caa ní quíhíⁿ.

²² Te Espíritú Yá Ndiǒxí ní quide-xi te ní sàndáá iní-ndó tnúhu-gá, te xiǎⁿ ní nduu ndoo ní nduu nine iní-ndó, te cùu iní tnáhá ndìsa-ndo nàcuáa ndècu-ndo ìchi Yá Ndiǒxí, te xini ñuhu ndisa-xi sá ïo ní yùhu ní iní-ndó cùu iní tnáhá-ndo ìhⁿ ìhⁿ-ndo. ²³ Te nchòhó ní nduu-ndo dàtná ìhⁿ ñáyiu saa sá cuèndá tnúhu Yá Ndiǒxí, te tnúhu-áⁿ candeca-xi iní-ndó ní caa ní quíhíⁿ, te vá ìhⁿ ndùu ndìhi nihnu-xi, te ñá díú cuèndá ñáyiu ñuyíú-a ní ndùu-ndo ìhⁿ ñáyiu saa chí cuèndá tnúhu-gá. ²⁴ Chi núu tütú Yá Ndiǒxí càchí-xi:

Nchaa ñáyiu ndècu ñuyíú-a cùu-yu dàtná cùhú, chí cùhú-ǎⁿ tnaa-ni cùdí-xi te xihí-xi, ducaⁿ sǎtnahá-xi cùu-yu.

Te nchaa sá ndécú ndìhí-yu cùu-xi datná ìhⁿ itá cùhú-ǎⁿ, chí itá-áⁿ tnaa-ni tucu cùdí-xi te ndàhvá-xi, ducaⁿ

sǎtnahá-xi cùu nchaa sá ndécú ndìhí-yu.

²⁵ Dico tnúhu Yá Ndiǒxí chí vá náá tnáhí-xi, chí duha-ni ndècu-xi, te ñu-ni duha cùndecu-xi ní caa ní quíhíⁿ.

Duha càchí-xi núu tütú-gá. Te ñu tnúhu-áⁿ ní dánèhé ñáhá nchùhú cue téè càháⁿ tnúhu Yá Ndiǒxí xii-ndo.

2

¹ Te xiǎⁿ xini ñuhu-xi dañà-ndo nchaa núu sá cuèhé sá dúhá, te dañà-ndo ìchi tnúhu ndehnde, te dañà-ndo vǎ dándàhú-gá-ndó mèe-ndo sá quidé vǎha-ndo, te dañà-ndo ìchi cuédú ìní, te dañà-ndo nchaa tnúhu yiti. ² Te cada-ndo cuèndá sá cúu-ndó dàtná cue landú yíquíⁿ vitna sadi camá, chí landú-áⁿ mee-ni sàdi-güexi te sàhnu-güexi. Te cada iní-ndó sǎ dúcáⁿ cada-ndo chí xini ñuhu-xi sá ïo cuhuⁿ iní-ndó dàcuaha-ndo tnúhu Yá Ndiǒxí, chí xiǎⁿ cúu-xi mèe-ni tnúhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sǎá nduu cùndecu-ndo núu ndécú-gǎ. ³ Te ducaⁿ xini ñuhu-xi cada-ndo, chí nchòhó sa ní cùtnùní ndisa iní-ndó sǎ Yá Ndiǒxí ïo váha iní-gá.

Xítóhó Jesucristú cúu-gǎ dàtná ìhⁿ yúú

⁴ Te ïo nanducu nihnu-ni-ndo Xítóhó Jesucristú Yáá quidé nàcuáa naníhí tǎhú-ó. Te ñu-gá ní cuu-gá dàtná ìhⁿ yúú sǎ ñà túú nàndìhi sá cúu-xi ñáyiu ñuyíú-a, chí ní dáquéé tihú ñáhà-yu xii-gá. Dico Yá Ndiǒxí ní cachí-gá sá Xítóhó Jesucristú

cúu-gǎ dàtná ìⁿ yúú sǎ
 ò-gá váha, chi ío cùnuu-gá.
 5 Te nchòhó sa ní naníhí
 tǎhú-ndó, te ío-gá chí nándücu
 nihnu Yá Ndiòxí cuèndá cuu
 ìⁿnuu-ndo cùndecu-ndo ndìhí
 Espiritú-gá. Te núu ducaⁿ na
 càda-ndo te cuu-ndo dàtná
 yúú vǎha dàcaa-güedé dava
 vehe, te cuu tucu-ndo dàtná
 cue dútú nǐ xinu cuechi
 núú Yá Ndiòxí ndéé sanaha,
 nàcuáa ñá túú nǎ cumání-ndó
 núú-gǎ, chi nchaa cue téé-áⁿ
 nǐ xóo cuáha ñaha-güedé sǎ nǐ
 xóo nduu tǎhú-gǎ. Te nchòhó
 vitna tǎu-ndó càda-ndo nchaa
 nacuáa càháⁿ-gá, te nduu vétú
 iní-gá. Te ducaⁿ càda-ndo
 chí ndècu-ndo ndìhí Xítóhó
 Jesucristú. 6 Te Yá Ndiòxí
 cǎchí-gá núú tütú-gá:

Yúhú taxi ndecu-í ìⁿ Yaá ñuú
 Sión,

te cuu-gá dàtná ìⁿ yúú vǎha
 sǎ sánútnǐ-güedé xiquí
 cimièntú ìⁿ vehe, chí
 yúhú ní cachí-í sǎ
 Yáá-áⁿ ò cunuu-gǎ.

Te nchaa ñáyiu quíndáá iní
 ñáhá xì-gá vá ìⁿ ndùu
 ndixi cuéchi iní-yu
 sǎ dúcáⁿ sàndáá iní
 ñáhá-yu xii-gá.

Duha cǎchí-gá núú tütú-gá.

7 Te nchòhó ñáyiu sàndáá iní
 ñáhá xì Xítóhó Jesucristú ío
 cùu iní-ndó-gǎ, te nchaa ñáyiu
 ñá túú sàndáá iní ñáhá xì-gá
 quídé-yu dàtná càháⁿ-xi núú
 tütú Yá Ndiòxí núú cǎchí-xi:

Yúú sǎ nǐ dáquéé tǐhú cue téé
 dàcaa vehe, xǐáⁿ cúu-xí
 yúú sǎ ò-gá nándìhí
 vitna.

Duha cǎchí-xi núú tütú-gá.
 Te yúú-áⁿ cada iní-ó sǎ

cúu-xí Xítóhó Jesucristú, chí
 ní dáquéé tǐhú ñáhá-güedé
 xii-gá. 8 Te cǎchí tucu-xi ingá
 xichi núú tütú Yá Ndiòxí:

Yúú-áⁿ nguñenu ñáyiu te
 ndúá-yu.

Duha cǎchí-xi núú tütú-gá. Te
 tnúhu-áⁿ quéé-xí sǎ ò quide
 sǎá iní ñáyiu núú-gǎ, chí ñá
 túú cuíní-yu tníⁿ-yu tnúhu
 càháⁿ-gá, te ducaⁿ tnàhí ndéé
 tnuní sǎ ncháá ñáyiu ñá túú
 cuíní tníⁿ tnúhu càháⁿ-gá, te ío
 cùu sǎá iní-yu núú-gǎ.

Ñáyiu ndècu ndìhí Yá Ndiòxí

9 Te nchoo cùu-o ñáyiu sa
 ní dáquéé dǐⁿ ñaha Yá Ndiòxí
 xii-o cuèndá cundecu-o
 ndìhí-gá, te cùu-o dútú xínú
 cuèchi-o núú-gǎ, te mee-gǎ
 cúu-gǎ Yaá ío cùnuu, te cùu-o
 ñáyiu quide ndáá xǐndecu
 ichi-gá te cùu tucu-o ñáyiu
 yǐndaha-gá. Te ducaⁿ nǐ
 quide ñaha-gǎ xii-o cuèndá
 sǎ cǔñaha-o xii nchaa ñáyiu
 sǎ ò càhnu cuu-gá, te ío vǎi
 núú sǎ vǎha quide-gá, te
 dǐu-gá ní quide ní dáñá-ó
 ncháa ichi cuehé ichi duha
 ndècu-o ní cuu, te ní sanu
 ichi ñaha-gǎ xii-o ìⁿ ichi vǎha,
 te vitna cùtnuní iní-ó sǎ ò
 càhnu cuu-gá. 10 Te nchoo
 cùu-o ñáyiu ñá túú ndècu
 ndìhí Yá Ndiòxí ní cùu, dico
 vitna ní ngúndecu ndìhí-o-gǎ,
 te dàvá-áⁿ vǎtá sǎá-gá nduu
 càda váha ñaha-gǎ xii-o, dico
 vitna sa ní sǎá nduu quide
 váha ñaha-gǎ xii-o, chí ío
 cùndahú iní ñáhá-gǎ.

*Cada váha-o cùndecu-o
 cunu cuechi-o núú Yá Ndiòxí*

11 Te nchòhó ío cùu iní ñáhà-í xii-ndo, te cächí tnùu-í xii-ndo sã nchóó cùu-o datná cue ñâyiu ndècu tnaduha ìⁿ ñuú, te ducaⁿ sãtnahá-xi cùu-o chi tnaa-ni ndècu-o ñuyíú-a, te sáá nduu ndùu táhú-ó cùndecu-o núú ndécú Yã Ndiõxí táxí tnùní-gá, te xíãⁿ cãháⁿ ndàhú-í núú-ndó sã vã cádá-ndó ñi ìⁿ sã cuèhé sã dúhá sãni iní-ndó, chi nchaa xíãⁿ ñã túú cùu-xi sã vãha sã cúú-xi-ndó. 12 Te cada váha-ndo cùndecu-ndo núú nchàa ñâyiu ñã túú ndècu ichi Yã Ndiõxí, te cuèi na cãháⁿ ñâyiu sã nchòhó nchìcúⁿ nihnu-ndo ichi cuehé ichi duha, dico quiní-yu nchaa sã vãha quide-ndo, dico na sãá nduu dândixi túu Yã Ndiõxí iní-yu sã ñã túú quide váha-yu ndécú-yu, te dàvá-áⁿ cachí-yu sã quidé váha-ndo ndècu-ndo, te cada càhnú-yu Yã Ndiõxí.

13 Te Xítohó Jesucrístú cuíní-gá sã nchòhó ío quindáá iní-ndó nchàa cue téé cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee téé cùnuu vihi-gá yíndaha ñaha xii ñâyiu. 14 Te ducaⁿ-ni quindáá iní-ndó nchàa dava-gá cue téé cùnuu, chi Yã Ndiõxí ducaⁿ ñi cachí-gá cunduu sã cuè téé-áⁿ cada ndáá-güedé nchaa cuèchi ñâyiu quide cuehé quidé dùha ndecu, te cãháⁿ váha-güedé cuendá nchaa ñâyiu xíquide váha ndècu. 15 Te Yã Ndiõxí cuíní-gá sã cádá váha-ndo cùndecu-ndo cuendá nchaa ñâyiu ío ñi dǐquí-xi cãháⁿ cuèhé cuendá-ndó sã ndécú-ndó ichi Yã Ndiõxí vá ñihí-gá-yu tnúhu

cãháⁿ-yu.

16 Te nchòhó, Yã Ndiõxí ní quide-gá sã cúú-ndó ñâyiu cuu cada nàcuáa véxi iní méé-xí, dico ñã díú sã dúcáⁿ ñi quide ñaha-gã xii-ndo, te ngóo-ndo càni iní-ndó càda-ndo nándi sã cuèhé sã dúhá, chi cada-ndo sã cúú-ndó ñâyiu xínu cuechi núú Yã Ndiõxí. 17 Te canehe-ndo sã yíñuhu núú nchàa ñâyiu, ndihi núú téé cùnuu vihi yíndaha ñaha xii-yu, te cuu iní tnáhá ndi mee-ndo nacuáa ndècu-ndo ichi Yã Ndiõxí, te ío canehe-ndo sã yíñuhu núú-gã.

Nchaa nàcuáa ndoho-o cùndecu-o ichi Xítohó Jesucrístú

18 Te nchaa nchòhó ñâyiu xínu cuechi canehe-ndo sã yíñuhu núú cuè patróóⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè téé váha iní-xi, ndihi núú cuè téé ío cuihna iní-xi. 19 Te núú nchòhó ná càda ndee iní-ndó ndòho-ndo nchaa sã ñã túú tãú-ndó ndòho-ndo cuendá sã cuíní-ndó cùndáá-ndó núú Yã Ndiõxí ñã, te ío nduu vétú iní-gá. 20 Te núú nchòhó ní quide-ndo ìⁿ cuèchi, te sãhni iní-ndó dândoho ñaha ñâyiu xii-ndo, ¿te ná sã vãha cùu xíãⁿ-i? Dico núú nchòhó ná cádá ndèe iní-ndó ndòho-ndo nchaa sã cádá ñaha ñâyiu xii-ndo sã cuendá sã quidé-ndó sã vãha ñã, te núú ducaⁿ na càda-ndo te cùu-xi ìⁿ sã vãha núú Yã Ndiõxí. 21 Te Yã Ndiõxí ní cachí-gá sã cádá ndèe iní-ó ndòho-o nándi ndoho-o sã

cuendá sá quidé-ó sã vãha, chi ío ní ndoho Xítóhó Jesucristú cuendá-ó, te ducaⁿ tàú-ó cànchicúⁿ nihnu-o càda ndee iní-ó ndòho-o nándi ndoho-o, chi ducaⁿ nĩ quide-gá. ²² Te mee-gã ñá túú quide-gá ni ìⁿ sá cuèhé sá dúhá, te ni ìⁿ tnúhu ndehnde ñà túú càháⁿ-gá. ²³ Te òré ní xóo cúcuèhé ñáhá-güedě xii-gá, te ñá túú ní xóo danchòcáva-gá tnúhu cuèhé, te òré ní xóo dandòho ñaha-güedě xii-gá, te ñá túú ní xãhaⁿ-gã xii-güedě sá ío ná cada ñaha-gã, chi núú ndáhá Yã Ndiòxí ní xóo nachihí-gá mée-gã, ndihí nchaa sá sání iní-güedě cada ñaha-güedě xii-gá. Te Yã Ndiòxí cúú-gã Yaá ío váha cada ndáá cuéchi nchaa ñáyiu na sáá nduu. ²⁴ Te Xítóhó Jesucristú cúú-gã Yaá ní xihí núú cùrúxí cuendá nchaa cuéchi nchoo ñáyiu ndècu ñuyíú-a. Te ducaⁿ nĩ xihí-gá cuendá nchoo dùuⁿ duuⁿ dañá-o nchaa ichi cuehé ichi duha, te cada ndáá-ó cundecu-o ichi-gá. Te ní dánícuehé ñáhá-güedě xii-gá, te sá dúcáⁿ nĩ ndoho-gá xiãⁿ ní ngúndecu váha nchoo vitna. ²⁵ Te nchoo cùu-o datná cue mbéé cue quití ní xíta ní cùu, dico vitna ní tuha-o Xítóhó Jesucristú, te Yaá-ánⁿ cúú-gã dàtná ìⁿ toli xito ñaha-gá xii-o vitna cuendá sá vã cuíta nihnu-o.

3

Nàcuáa tàú ñáyiu tnãndaha cadá-yu cundecú-yu

¹ Te nchaa nchòhó ñáyiu òhí ní tnandaha ío quindáá

iní-ndó yì-ndo cuendá sá núu ñá túú sãndáá iní-güedě tnúhu Yã Ndiòxí te quindáá iní-güedě cuendá sá ndéhé-güedě quidé ndáá-ndó ndècu-ndo, te ni ñà túú xini ñuhu-xi càháⁿ-ndó tnúhu-gá núú-güedě. ² Chi ndèhe mee-güedě sá nchòhó quidé ndáá-ndó ndècu-ndo, te nèhe-ndo sá yìñùhu núú Yã Ndiòxí. ³ Te vá cání iní-ndó mée-ni cunduu vii-ndo, te ndada-ndo ðiquí-ndó nàcuáa tàú-xi cunduu, te vá cání iní-ndó nándi canehe-ndo, te ni vã cání iní-ndó cuìhnu-ndo mee-ni dóó vãha sá ío vii ndáa. ⁴ Chi iní-ndó xini ñuhu-xi cunduu vii cunduu váha-xi núú Yã Ndiòxí cuéi vitna te cuéi núú cuáháⁿ núú vèxi, te cuu-ndo ñáyiu ío càhnu iní-xi, te núu ducaⁿ na càda-ndo te ío cuu váha iní Yã Ndiòxí. ⁵ Te ducaⁿ ío vii ío váha ní xinduu iní nchaa ñáyiu òhí ní xindecu ndéé sanaha, te ñáyiu-ánⁿ ío ní sãndáá iní-yu Yã Ndiòxí te ní cudíú-yu núú-gã, te ní tní-yu nchaa tnúhu ní càháⁿ yí-yu. ⁶ Te ducaⁿ nĩ xóo cada ndíi Sãrá ní xóo quindáá iní ndíi yì ndíi, ndíi Àbrahám, te ní cánehe ndíi òhí-ánⁿ sã yìñùhu núú yì ndíi. Te núu nchòhó quidé vãha-ndo ndècu-ndo te ñá túú yùhú-ndó ñà cada ñaha tnãha ñáyiu-ndo xii-ndo, te núu ducaⁿ quide váha-ndo ndècu-ndo te quide-ndo datná ní quide ndíi Sãrá.

⁷ Te nchòhó cue téé ndècu ñàòhí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii càháⁿ ndíhí-ndó-yu, chi

ñáyi-u-áⁿ ï-gă-yu dàcúúxí
nchòo cue tée, te ducaⁿ
càda-ndo chi ndi ndúú-ndó
ndúu táhú-ndó cundecu-ndo
ndihi Yá Ndiöxí, te núu ducaⁿ
na càda-ndo te òré cáháⁿ
ndihi-ndo Yá Ndiöxí te tedóho
ñaha-gă xii-ndo.

*Ñáyi-u quide sá vâha
ndòhó-yu*

8 Te cächí tnúhu tucu-í
xii-ndo sá ío cuu ïⁿnuu-ndo
cundecu-ndo, te cundàhú iní
tnáhá-ndó ïⁿ ïⁿ-ndo, te cuu
iní tnáhá tùcu-ndo nacuaá
ndècu-ndo ichi Yá Ndiöxí, te
cuu-ndo ñáyi-u ndàhú iní-xi.

9 Te núu ïⁿ sá ñà túú vâha
quide ñaha ñáyi-u xii-ndo, te ñà
díú-ní dùcaⁿ nanchocáva-ndo
càda-ndó-yu, àdi xícuèhé
ñáhă-yu xii-ndo, te vá ná
dànchocáva-ndo diu-ni tnúhu
cuèhé, chi cacăⁿ táhú-ndó núú
Yá Ndiöxí cuèndá sá ná cádá
vâha ñaha-gă xii-yu, te ducaⁿ
càda-ndo chi Yá Ndiöxí ní
cáháⁿ ñáhă-gă xii-ndo cuèndá
sá cádá vâha ñaha-gă xii-ndo
tnáhá-ndó. 10 Te núú tùtú Yá
Ndiöxí cächí-xi:

Nchaa ñáyi-u cuení cun-
decu váha ndi nchàa
nduu nini cundecú-yu
ñuyíú-a,

xìni ñuhu-xi sá vâ cáháⁿ-yu
tnúhu cùtexínu, te ni vâ
dácuañdehndé-yu.

11 Te xìni ñuhu-xi duuⁿ duuⁿ
dañá-yu nchaa ichi
cuèhé ichi duha, te
cadá-yu mee-ni sá
vâha,

te ío ndúcú-yu nàcuáa
cadá-yu cundecu
váha-yu ndihi tnàha
ñáyiú-yu te diu-ni

ducaⁿ cànchicúⁿ ni-
hnú-yu cadá-yu.

12 Te Yá Ndiöxí xító-gă nchaa
ñáyi-u quide ndáá
núú-gă

te tedóho-gă nchaa tnúhu
cáháⁿ-yu,

dico nchaa ñáyi-u ñà túú cuení
cada ndáá, ñáyi-u-áⁿ
ñà túú cùu vâha iní-gă
núú-yu.

Duha cächí-xi núú tùtú-gă.

13 Te vá yòo níhí ndéé càda
ñaha xii-o ïⁿ sá ñà túú vâha te
núu mee-ni sá vâha na càda-o
cundecu-o. 14 Àdi núu ná cúú
sá ná cádá ñaha ñáyi-u xii-o
sá cuèndá sá quidé vâha-o
ndècu-o ña, te sá dúcáⁿ ná
cáadá ñáhá-yu xii-o cùu-xi ïⁿ
sá vâha sá cúú-xí-ó núú Yá
Ndiöxí. Te na cächí tnúhu-í
xii-ndo sá vâ yùhú-ndó-yu,
te ni vâ cùndiyí-ndó cuèndá
nchaa sá ná càda ñáhá-yu
xii-ndo. 15 Te nèhe-ndo

sá yíñuhu núú Xítóhó Je-
sucristú. Te ío cundecu
túha-ndo dānehé-ndó ñáyi-u
véxi ndùcu tnúhu núú-ndó
nàcuáa ndúu tnúhu ndee iní ní
taxi Xítóhó Jesucristú ndécú
ndihi-ndo, te cuu vii cuu váha
iní-ndó cáháⁿ ndihi-ndó-yu,
te cáháⁿ-ndó núú-yu mee-ni
tnúhu yíñuhu nacuaá cùu
váha iní Yá Ndiöxí. 16 Te ío
cada vâha-ndo cundecu-ndo
cuèndá sá vâ cùndiyí-ndó,
te núu ducaⁿ na càda-ndo,
te nchaa ñáyi-u xícuèhé ñáhă
xii-ndo cuèndá sá quidé
vâha-ndo ndècu-ndo ichi
Xítóhó Jesucristú quendóo
canúú-yu ndihi nchaa tnúhu
cáháⁿ-yu, chi nchòhó quidé
vâha-ndo ndècu-ndo. 17 Te

váha-gá sá ndóhó-ó cuèndá sá quidé-ó sã vãha te núu mee Yã Ndiöxí ducaⁿ cuìní-gá cunduu, te ñá díú sã ndóhó-ó cuèndá sá ñà túú quide-o sã vãha.

18 Te Xítohó Jesucristú ní xíhí-gá sá cuèndá nchaa cuéchi nchaa nchoo ñãyiu ndècu ñuyíú-a, te ìⁿ xito-ni ducaⁿ ñí xíhí-gá te ducaⁿ te vá cùú tnahí-gá, te mee-gã cúú-gã Yaá ñá túú tnahí cuéchi-xi, te ducaⁿ ñí ndoho-gá cuèndá nchaa cuéchi ñãyiu ndècu ñuyíú-a ñãyiu ñá túú cuìní cada ndáá núú Yã Ndiöxí, te ducaⁿ ñí cuu cuèndá sá núcündecu váha-yu núú Yã Ndiöxí te núu na quèndáá iní ñáhã-yu xii-gá. Te mee-gã ní xíhí-gá dico Espíritú-gá chi ní xíndecu-ni-xi, ¹⁹ te Espíritú-gá ní sáháⁿ-xi ní cáháⁿ-xi tñúhu Yã Ndiöxí núú nchaa espíritú ñãyiu ndècu núú ùhú núú ndàhú. ²⁰ Te ñãyiu-áⁿ cúú ñãyiu ní xíndecu ndéé sanaha cùtnahá ní xíndecu ndíí Nöé, chi ñãyiu-áⁿ ìo ní quide sàá iní-yu núú Yã Ndiöxí. Te Yã Ndiöxí ìo váha iní-gá, chi ní dácácá-gã nduu ñí xíndecuu ndíí Nöé ní cadúha ndíí bàrcú cuèndá ndétú-gá ndixi cuéchi iní-yu sá ñà túú quide váha-yu ndècú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnahá ñãyiu, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ñí cácu ñãyiu úná-áⁿ ñà túú ní cãhá-yu ndute ní ndaa ñuyíú dàvá-áⁿ. Te xiãⁿ quée-xí sã cuándute ñãyiu

vitna, te naníhí tàhú-yu te núu na quèndáá iní-yu tñúhu ndáá tñúhu Yã Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xìni ñuhy-xi náhmá-ó ñúú Yã Ndiöxí nchaa yicá cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucristú ní xíhí-gá cuèndá-ó te ní ndoto-gá. ²² Te Yaá-áⁿ cuándaa-gá andiu, te ní ngóo-gá xio cùha Yã Ndiöxí, te tàxi tñuní-gá nchaa espíritú cúnùu ndihí nchaa dava-gá cue espíritú xínú cuéchi.

4

Cada-o nàcuáa cuìní mée Yã Ndiöxí

¹ Te Xítohó Jesucristú ní ndoho-gá cùtnahá ní xíndecu-gá ñuyíú-a, te vitna nchòhó cundecu túha-ndo ndòho-ndo cuèndá-gá, chi nchaa ñãyiu ndòho nándi sá ndóhó cuèndá-gá dàñá-yu nchaa sá cuèhé sá dúhá. ² Te ducaⁿ ñà túú-gá ndècú-yu ichi cuèhé ichi duha, chi mee-nã nàcuáa càháⁿ Yã Ndiöxí quidè-yu ndècú-yu ñuyíú-a. ³ Te nchòhó sa nàha-ndo sá ìo cuèhé ñúú sã cuèhé sá dúhá ñí xóo cada-o cùtnahá vátá cùndècu-gá-ó ichi Yã Ndiöxí, chi ní xóo cada-o nchaa sá cuèhé sá dúhá cùdíí ìní nchaa ñãyiu ñá túú sàndáá iní tñúhu-gá, te dàvá-áⁿ ñí xóo cada-o nchaa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñãyiu quihu, te ní xóo cundecu-o víco núú ñí xóo cada-o nchaa sá ñà túú váha, te ní xóo níhí tnahá-ó

ndìhi nchaa tnaaha quihu-o, te ní xóo chiñuhu-o nchàa sá cächí-yu cùu ndiòxí te ñá ndàá sá ndiòxí cúu nchàa xiǎⁿ, te nándi-gá nchaa sá cuèhé sá dúhá nǐ xóo cada-o dàvá-án. ⁴Te ñáyi-u-án cúñuhu-yu vitna sá ñà túú-gǎ nihí tnáhá-ó ndìhí-yu cada-o nchàa sá cuèhé sá dúhá quidè-yu, te xiǎⁿ cǎháⁿ cuèhé-yu cuèndá-ó vitna. ⁵Dico sáá nduu te ñáyi-u-án nǎhmá-yu nchaa sá quidè-yu núu Xítóhó Jesucristú, chi diu-gá sa ndècu túha-gá sá cáda ndáá-gá cuéchi nchaa ñáyi-u sa ní xíhí, ndìhi cuéchi nchaa ñáyi-u xíndecu vívú. ⁶Te cue ñáyi-u sa ní xíhí ní xíndedóho tnúhu Xítóhó Jesucristú, te cuèi ní xíhí-yu dàtná xíhí dava-gá ñáyi-u, dico espíritú-yu chi ní nduu táhú-xi ndècu váha-xi dàtná ndécú Yá Ndiòxí.

⁷Te vitna ta cùyatni danaa Yá Ndiòxí ñuyíú-a núu xiǎⁿ ío váha cuáha-ndo cuèndá nàcuáa cundecu-ndo, te cǎháⁿ ndìhi-ndo-gǎ. ⁸Te xìni ñuhu-xi sá ío cuu iní tnáhá-ndó ñⁿ ñⁿ-ndo, chi núu ducaⁿ na cùu iní tnáhá-ndó ñⁿ ñⁿ-ndo, te vá cǎní-gǎ iní-ndó càda cuèndá-ndó nchàa sá ñà túú váha quide ñaha ñáyi-u xii-ndo, ⁹te nchòhó ñáyi-u xíndecu vehe-xi cuáha nùu-ndo vehe xii cue ñáyi-u ñuhu ichi na ndetatú-yu, te ío váha cuu iní-ndó dùcaⁿ cada-ndo. ¹⁰Te Yá Ndiòxí ní taxi-gá ndí dííⁿ núú táhú ndécú ndìhi-ndo ñⁿ ñⁿ-ndo, te nàcuáa ndùu táhú nǐ nduu táhú-ndó ñⁿ ñⁿ-ndo te ducaⁿ chindee tnaaha-ndo, te vá dáñá ndéé-ndó càda-ndo

nchaa nacuáa tàuchiuⁿ Yá Ndiòxí cada-ndo, te chindee ñàha-gá xii-ndo. ¹¹Te dava nchòhó ñáyi-u cǎháⁿ tnúhu Yá Ndiòxí núu ñáyi-u, xìni ñuhu-xi cǎháⁿ-ndó nàcuáa ndùu tnúhu-gá núú-yu, te dava nchòhó ñáyi-u quide nchaa núu chiúⁿ chindee tnaaha ñáyi-u-xi, xìni ñuhu-xi cada-ndo sá Yá Ndiòxí chíndèe ñaha-gá xii-ndo, te ducaⁿ càda-ndo nchaa núu sǎ váha, chi Xítóhó Jesucristú tnáhá-gá chíndèe ñaha-gá xii-ndo, te ducaⁿ ío cuu cǎhnu Yá Ndiòxí. Te vitna tàú-ó cǎháⁿ-ó sǎ ío cǎhnu cuu Xítóhó Jesucristú, chi diu-gá cúnùu-gá nchaa nduu nchaa quíú, te ducaⁿ na cùnduu.

Ndoho tnáhá-ó cùndecu-o ichi Xítóhó Jesucristú

¹²Te nchòhó ñáyi-u ío cùu iní-í, vá cúñuhu-ndo sǎ ío ndòho-ndo ndecu-ndo ichi Xítóhó Jesucristú, chi sá dúcáⁿ ndòho-ndo-án cútnùní ndisa sá sàndáá iní-ndó-gǎ, te vá cǎní iní-ndó nǎ cuèndá ducaⁿ ndòho-ndo. ¹³Chi da cudíí iní-ndó te núu ndòho-ndo datná ní ndoho Xítóhó Jesucristú, te ducaⁿ sùúní cudíí iní-ndó òré ná quixi tucu-gá ñuyíú-a te dàvá-án quini-ndó sǎ ío cǎhnu cuu-gá. ¹⁴Te núu xícuèhé ñáhá ñáyi-u ndècu ichi cuehé ichi duha xii-ndo cuèndá sá ndécú-ndó ichi Xítóhó Jesucristú, te xiǎⁿ cúu-xi ñⁿ sá váha sá cúu-xi-ndó núú-gǎ, te ducaⁿ chi Espíritú Yá Ndiòxí sá ío cùnùu ndecu ndìhi ñaha-xi xii-ndo, te nchaa ñáyi-u ndècu ichi cuehé ichi duha-ǎⁿ cǎháⁿ cuèhé-yu

cuendá Xítohó Jesucristú, dico nchòhó càchí-ndó sã ïo càhnu cuu-gá. ¹⁵⁻¹⁶ Te núu nchòhó dándòho ñaha ñáyiú xii-ndo sã cuendá sá ndécú-ndó ìchi Xítohó Jesucristú ñá, te vá cúú càháⁿ núú-ndó, chi ndacáⁿ táhú-ndó núú Yã Ndiõxí cuendá sá ndécú-ndó ìchi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ¹⁷ sã ñà túú tàú-ndó càda-ndo.

¹⁷ Te vitna sa quèsaha Yã Ndiõxí cada ndáá-gá nchaa sá quidé nchò ñáyiú ndècu ndihi-gá, te núu ducaⁿ te ndèé-gá cada-gá nchaa ñáyiú ñá túú sàndáá iní ñáhá xii-gá òré ná sáá nduu ducaⁿ cada ñaha-gá xii-yu. ¹⁸ Te nchòhó xiní-ndó sã ñáyiú quide váha ndècu ìchi Xítohó Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndihi-gá. Te núu ducaⁿ ndòho nchaa ñáyiú quide váha ña, çte nása-gá yáha nchaa ñáyiú ndècu ìchi cuehé ìchi duha na sáá nduu càda ndáá Yã Ndiõxí cuèchi-yu-í? ¹⁹ Te nchaa nchòhó ñáyiú ndòho nacuaá cuiní Yã Ndiõxí xiní ñuhu-xi sá vá dàñá ndèé-ndó càda váha-ndo cundecu-ndo, te ïo quindáá iní-ndó sã xító ñàha-gá xii-ndo. Te ñu-gá cúú-gã Yaá ní cadúha ñaha xii-o, te quide-gá ²⁰ sã càháⁿ-gá.

5

Nacuáa tàú-xi cada ñáyiú ndècu ìchi Xítohó Jesucristú

¹ Te yúhú càháⁿ-í dóho nchaa nchòhó cue téé yindaha nchaa dava-gá ñáyiú ndècu ìchi Xítohó Jesucristú, chi tnàhá yúhú yindàha-í ñáyiú ndècu ìchi-gá, te sàndáá iní-í tnúhu-gá, te ní xiní-í nchaa nacuáa ní ndòho-gá, te sáá nduu te tnàhá-í cunuu-í ndihi-gá. ² Te ïo canehe cuendá-ndó nchaa ñáyiú ndècu ìchi Yã Ndiõxí yindàha-ndo te cada-ndo dàtná quidé cuè toli, chi cue téé-áⁿ ïo váha xito-güedé mbéé-güedé. Te canehe cuendá-ndó-yu sá cúú iní mée-ndó te ñá ñúú sã ïó ³ ñáyiú cada yica ñaha xii-ndo, te ni ñà ñúú sã cuiní-ndó cùhuⁿ yáhu-ndo, chi ni yúhu ni iní-ndó còto-ndó-yu, chi ducaⁿ cuiní Yã Ndiõxí cunduu. ⁴ Te vá cadá-ndó sã ïo cunuu-ndo núú-yu, chi cada-ndo mée-ni sá váha cuendá ducaⁿ càncicúⁿ ni-hnú-yu cadá-yu tnàhá-yu. ⁵ Te òré ná quixí tùcu Xítohó Jesucristú Yaá néhé cuendá ñáhá xii-o nchaa-o ñuyúú-a, te taxi-gá sã ïo váha nduu táhú-ó, te cunuu-o ndihi-gá ni caa ni quíhíⁿ.

⁶ Te nchòhó ñáyiú ndècu ìchi Xítohó Jesucristú càháⁿ-í dóho-ndo sã ïo quindáá iní-ndó cuè téé yindaha ñaha xii-ndo nacuaá ndècu-ndo ìchi-gá, te nchaa-ndo tàú-ndó quindáá iní tnàhá-ndó ⁷ ñáyiú-ndo, chi núú tùtú Yã Ndiõxí càchí-xi ⁸ xichi:

Nchaa ñáyiú quide cahnu
mee-xi ñá túú cùu váha
iní Yá Ndiöxí núú-yu,
dico nchaa ñáyiú ndàhú iní-xi
te chindee ñaha-gá
xii-yu.

Duha càchí-xi núú tütú-gá.
6 Te daña-ndo mée-ndo núú
ndáhá Yá Ndiöxí, chi mee-gá
ío cùnuu-gá. Te núu ducaⁿ
na càda-ndo, te sáá nduu te
cada nínu ñaha-gá xii-ndo.
7 Te nchaa sá yáha-ndo
ndècu-ndo te nachihi-ndo
ndàha Yá Ndiöxí, chi mee-gá
xító ñaha-gá xii-ndo.

8 Te ío váha cuáha-ndo
cuëndá cundecu-ndo, te quihi
iní-ndó chi sácuihná xicá
cùu-xi cuiní-xi dacuita nihnu
ñaha-xi xii-o, chi ío cùu úhú
iní ñáhá-xí, te cùu-xi datná
ìⁿ qui^ti dééⁿ xicá ndùcu sá
cáxí-xí. 9 Te ío quindáá
iní-ndó Xitohó Jesucristú, te
vá dáñá-ndó mée-ndo dan-
dahú ñáhá sácuihná xii-ndo
càda-ndo nacuáa cumí-xi,
chi ñaha-ndo sá ncháá ñáyiú
ndècu ichi Xitohó Jesucristú
xíndecu nihíi ñuyíú ndóhó-yu
dátná ndóhó nchòo ndecu-o
ichi-gá. 10 Dico sacú-ni nduu
duha cundoho-o te dätñùní
ñá túú-gá ná cumání-ó
cùndecu-o núú Yá Ndiöxí, te
dává-án vǎ cání ìⁿ caní úú
iní-ó cùndecu-o ichi-gá. Te
ío-gá ngúndecu ndihi-o tnùhu
ndee ìní cada-o ncháa nacuáa
cáháⁿ-gá, te ducaⁿ càda-o chi
mee Yá Ndiöxí ío chindee
ñaha-gá xii-o, te ñiu-ni Yaá-áⁿ
ío cùu iní ñáhá-gá xii-o, chi ní
cáháⁿ ñáhá-gá xii-o cùndecu-o
núú ío váha càa ndecu-gá
cundecu-o nì caa nì quihíⁿ,
te ducaⁿ nì quide-gá chi ní

sándáá iní-ó Xitohó Jesucristú.
11 Te ío ndacáⁿ táhú-ó núú Yá
Ndiöxí chi ío cahnu cuu-gá, te
cùnuu-gá nchaa nduu nchaa
quiú. Te ducaⁿ na cùnduu.

Tnúhu ndéé núú nǎndihi-ná
12 Te té Silvanú xini-í sá
cúu-dě ìⁿ téé quide ndáá
ndécú ichi Xitohó Jesucristú,
te ñiu-dé ní cáháⁿ ndàhú-í
núú-dě ní tee-dé ìⁿ úú tnúhu
sá nǎxáhaⁿ-í xii-dé núú tütú-a
cuëndá daquixi-í ndaha-ndo,
te núú tütú-a càchí tnúhu
ndáá-í xii-ndo sá Yá Ndiöxí
ío cùu iní ñáhá-gá, te chindee
ñaha-gá xii-ndo ndècu-ndo, te
càchí tnúhu tuçu-í xii-ndo sá
ío quindáá iní-ndó sá ndáá
ducaⁿ quide ñaha-gá xii-ndo.

13 Te cue ñáyiú ndècu ñuú
Babiloniá, ñáyiú ndècu ichi
Yá Ndiöxí, ñiu-ni ñáyiú ní
cachí Yá Ndiöxí sá nánihí táhú
dátná cúu nchòhó, ío quide
ndee iní ñáhá-yu xii-ndo,
te tnáhá té Mácú téé cùu
datná ìⁿ déhe-í quidè ndèe
iní ñáhá-dě xii-ndo. 14 Te
ndihi tnúhu yinùhu cada ndee
iní tnáhá-ndó ìⁿ ìⁿ-ndo, te
xicáⁿ táhú-í núú Yá Ndiöxí
sá ío na cùndecu nahi nchaa
nchohó ñáyiú ndècu ndihi
Xitohó Jesucristú. Te ducaⁿ
na cùnduu. Te ío chí cádá ndèe
iní-nǎ vitna.

TUTÚ CÚÚ ÛÚ NÍ CADÚHA TÉ PÈLÚ

Té Pèlú cádũha-dé tutú quíhíⁿ ndaha ñáyiú sàndáá iní tnúhu Yá Ndiõxí

¹ Yúhú té Xímú, àdi Pelú chi úú òu-í, xínú cuèchi núú Xítóhó Jesucristú, chi mee-gã ní tendaha ñaha-gã xii-í xicá cùu-í càháⁿ-í tnúhu-gã. Te càdũha-í tutú-a sá cúú-xí nchàa nchohó ñáyiú sàndáá iní ñáhá xii-gã dàtná sàndáá iní-ndí-gã, te ducaⁿ chi Tátá-ó Dútú Ndiõxí ní dácàháⁿ-gã iní-ó ní sàndáá iní-ó-gã, chi cùu-gã Yaá ío váha quide ndáá ndihí Xítóhó Jesucristú Yaá dácãcu nihnu ñaha xii-o núú ùhú núú ndàhú. ² Te xicáⁿ táhú-í núú Yá Ndiõxí sá ùuⁿ-gã uuⁿ-gã ná cuita chindee chitúu ñaha-gã xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gã chi ta cùtnuní-gã iní-ndó nàcuáa ndùu cuendá-gã, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucristú Yaá cúú Xítóhó-ó.

Nàcuáa quide ñáyiú ndècu ichi Xítóhó Jesucristú

³ Te Yá Ndiõxí ío càhnu cuu-gã chi chindee ñaha-gã xii-o quide ndáá-ó ndècu-o datná cuíní mée-gã, te ducaⁿ chi cùtnuní iní-ó nàcuáa sàni iní Xítóhó Jesucristú Yaá ní càháⁿ ñáhá xii-o. Te òré ní càháⁿ ñáhá-gã xii-o te ní cutnùní iní-ó sã ío càhnu cuu-gã te ío váha quide-gã.

⁴ Te ducaⁿ ní cutnùní tucu iní-ó nàcuáa ní càháⁿ-gã cada ñaha-gã xii-o, te tnúhu ní càháⁿ-gã-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xíáⁿ ñá túú-gã ndècú-ó ichi cuehé ichi duha te ní ñá túú-gã sání iní-ó càda-o nándi sá cuehé sá dũhá, te ní cuu vii ní cuu váha iní-ó vítua. ⁵ Te sá dúcáⁿ quide-gã te xíáⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gã dico ñá díú mèe-ni xíáⁿ chi tnàhá xíní ñùhu-xi cada ndáá-ndó cùndecu-ndo, Te núu quide ndáá-ndó ndècu-ndo te xini ñùhu-xi tecú tnùní-ndó tnúhu-gã. ⁶ Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcòo tñii mee-xi te xini ñùhu-xi cunduu cahnu iní-ndó cuèi nándi sá ná yáha-ndo cùndecu-ndo, te núu càhnu iní-ndó te xini ñùhu-xi cada ndáá-ndó cùndecu-ndo datná cuíní mée Yá Ndiõxí cada-ndo. ⁷ Te núu quide ndáá-ndó ndècu-ndo, te xini ñùhu-xi ío cuu iní tnáhá ndì mee-ndo nacuáa ndècu-ndo ichi-gã, te núu cùu iní tnáhá ndì mee-ndo te xini ñùhu-xi cuu iní-ndó nchàa dava-gã tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gã cuita ducaⁿ càda-ndo quíhíⁿ núu cuaháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xĩndecu, te cuita cutnùní-gã iní-ndó nchàa nacuáa sàni iní Xítóhó Jesucristú quíhíⁿ. ⁹ Te nchaa ñáyiú ñá túú cuíní ducaⁿ càda cuú-yu ñáyiú ñá túú tnàhí ndìxi túu iní-xi sá

Yã Ndiõxí sa ní ndada ndoo ní ndada nine-gá iní-yu cuendá nchaa sá cuéhé sá dúhá ní xóo cada-yu, te ñáyiu-áⁿ cúu-yu dàtná ìⁿ ñáyiu cuáá àdi datná ìⁿ ñáyiu ñá túú cùtnuní váha núú-xi, te ducaⁿ sãtnahá-xi cúu-yu cuendá sá dúcáⁿ quidé-yu. ¹⁰ Te xǎⁿ núu yúhú càháⁿ-í dóho nchaa nchòhó ñáyiu ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùnì ndáá iní-ndó sã Yã Ndiõxí ní càháⁿ ñáhá-gã xii-ndo, te ducaⁿ ñí quide-gá chí ducaⁿ ñí cachí-gá cada-gá. Te vá ìⁿ ndùu cani iní-ndó dàña-ndo ichi-gá, te núu vá dàña ndèe-ndó càda-ndo nchaa nacuaá càháⁿ-í-a. ¹¹ Te núu ducaⁿ na càda-ndo cundecu-ndo, te ío víi ío váha cada Yá Ndiõxí queheⁿ cuendá ñáhá-gã xii-ndo òré ná sàá-ndó núú ndécú Xítóhó Jesucristú táxi tnùnì-gá nchaa nduu nchaa quíú, te ñiu-ni Yaá-ãⁿ cúú Xítóhó-ó te ní dácãcu nihnu ñaha-gã xii-o núú ùhú núú ndàhú.

¹² Te ducaⁿ-ni quíhi-í dandãcu iní ñáhà-í xii-ndo nchàa tnúhu càháⁿ-í-a cuèi sa xìnì-ndó tnúhu-áⁿ, te cuèi sàndáá váha iní-ndó nchàa tnúhu ndáá dácuaaha-ndo. ¹³ Te yúhú quidé cuendá-í sá ío tàú-xi càháⁿ-í dóho-ndo ñìni ndecu-í ñuyíú-a cuendá sá vã nacuaana-ndo nacuaá cada-ndo cùndecu-ndo. ¹⁴ Chi Xítóhó Jesucristú ní cachí-gá sá ñà túú-gã vai nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nacuaá cada-í cuendá quendóo ndihi-ndo

nchàa tnúhu càháⁿ-í-a, te cuèi na yãha cuú-í dico vá nacuaana-ndo cada-ndo nchaa nacuaá càháⁿ tnúhu sá dánhé ñáhà-í xii-ndo vitna.

Cue téé ní xìnì núú sã ío càhnu cuu Xítóhó Jesucristú

¹⁶ Te sa ní dánhé ñáhá-ndí xii-ndo sã ío càhnu cuu Xítóhó Jesucristú. Te ní cachí tnúhu tucu-ndí nacuaá cada-gá òré quixi tucu-gá, te tnúhu-áⁿ cúú-xí tnúhu ndáá cuíi te ñá díú tnúhu sá ñí sani iní cue ñáyiu ñuyíú-a cúu-xí, chí nchúhú ní xìnì núú-ndí nacuaá ní quide-xi cùtnahá ní cutnùnì iní-ndí sá ío càhnu cuu Xítóhó Jesucristú. ¹⁷ Chi dàvá-áⁿ ío váha ní quide Tátá-ó Dútú Ndiõxí ní quide càhnu-gá Xítóhó Jesucristú, te ñiu-ni dàvá-áⁿ ñí càháⁿ Dútú Ndiõxí ndéé andíu ní xáha-gã xii Xítóhó Jesucristú: “Yòhó cúú-n Dèhe-í téé ío cúu iní-í, te ío cùdíí iní ñáhà-í xii-n”, duha ní xáhaⁿ Yã Ndiõxí xii Xítóhó Jesucristú. ¹⁸ Te nchúhú ní tecú dóho-ndí ní càháⁿ Yã Ndiõxí ndéé andíu cùtnahá ducaⁿ ñí xáha-gã xii Xítóhó Jesucristú, chí tnàhá-ndí ndécú-ndí ndihi-gá yucu núú dúcáⁿ ñí quide càhnu ñaha Yá Ndiõxí xii-gá.

¹⁹ Te ndècu ndihi-o nchaa tnúhu ní càháⁿ cue téé ní xóo càháⁿ tnúhu Yá Ndiõxí ndéé sanaha te nchaa tnúhu-áⁿ càháⁿ-xi nchaa nacuaá cada-xi vitna, te cùtnuní iní-ó sã tnúhu ndáá cúú-xí, te xìnì ñuhu-xi cada cuendá váha-ndo nchàa nacuaá càháⁿ tnúhu-áⁿ, chí tnúhu-áⁿ cúú-xí dàtná ìⁿ ñuhú dáyèhé-xi ndéé òré véxi túndaá quéné chòdínì

cáhnú dâyehé-di. Te ducaⁿ sâtnahá-xi cùu tnúhu-áⁿ chi quide-xi nacuáa cutnùní iní-ó cuendá Xítóhó Jesucristú. 20 Te xìni ñuhu-xi sá ïo-gá cada cuendá-ndó sã ñà túú ñáyiú tecú tnùní ni ñⁿ tnúhu sá ñi chídó tnùní cue téé ní cáháⁿ tnúhu Yá Ndiöxí ndéé sanaha, te núu Yá Ndiöxí vá cádá-gã nacuáa cutnùní iní-yu nacuáa cáháⁿ nchaa tnúhu-áⁿ. 21 Te cue téé-áⁿ ïo ní xíndecu yiñuhu-güedé núú Yá Ndiöxí, te nchaa tnúhu sá ñi cáháⁿ-güedé-áⁿ ñà túú cùu-xi tnúhu sá ñi cahu iní méé-güedé, chi Espiritú Yá Ndiöxí ní dácáhu iní ñáhá-xí xì-güedé nacuáa cunduu tnúhu cáháⁿ-güedé.

2

Cue téé càchí sá cáháⁿ tnúhu Yá Ndiöxí te ñà ndáá

1 Te ndéé sanduu chi ní xíndecu cue téé ní xóo dandáhú ñáhá xì ñáyiú israhél càchí sá cáháⁿ tnúhu Yá Ndiöxí te ñà ndáá sá cáháⁿ-güedé tnúhu-gá, te ñu-ni ducaⁿ tucu cundecu cue téé dandáhú ñáhá xì-ndo vitna, chi cachí-güedé sá cáháⁿ-güedé tnúhu Yá Ndiöxí te ñà ndáá. Te cue téé-áⁿ ïo yidáhu cáháⁿ-güedé, te nchaa tnúhu cáháⁿ-güedé-áⁿ dacuíta nihnu ñaha-xi xì-ndo te núu na tédóho-ndo, chi cue téé-áⁿ vã ñunuu-güedé sá Xítóhó Jesucristú ní xihí-gá cuendá-güedé. Te sá dúcáⁿ càda-güedé ïo-gá ndíhi dacuíta nihnu-güedé méé-güedé. 2 Te vai ñáyiú xínu iní-yu cadá-yu nándi sá cuéhé sá dúhá cuendá sá dúcáⁿ càda cue

tée-áⁿ, te cuendá xíãⁿ ngóo ñáyiú cáháⁿ úhú-yu cuendá ichi Yá Ndiöxí. 3 Te mee-ni tnúhu sá ñi cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúu-xí tnúhu ndáá te ñà ndáá cuendá-ni sá cuãñaha-ndo ñíhúⁿ xii-güedé, chi ñu-ni xíãⁿ tnáhí cuhuⁿ iní-güedé, dico Yá Ndiöxí sa ní cunaha ndéu túha-gá cuendá cada ndáá-gá cuéchi-güedé, te na sáá nduu te cuíta nihnu duuⁿ-güedé, chi Yá Ndiöxí vá nacuánaa-gá ñⁿ sá ñi cachí-gá cada-gá.

4 Te Yá Ndiöxí ñà túú ní quide cahnu iní-gá sá ñi quide cue espíritu ñà túú ní cuíní cada ndáá xínú cuéchi núu-gã ní cùu, chi ní dáquihíⁿ ñáhá-gã xii-xi ñⁿ xichi núú ïo ndóho-xi ndecu-xi, te xíaⁿ cundedí nihnu-xi ndéé sáá nduu cuíta nihnu duuⁿ-ná-xi. 5 Te Yá Ndiöxí ñà túú ní quide cahnu tucu iní-gá nchaa sá ñi quide ñáyiú ñuyíú ñíhna, chi dàvá-áⁿ ñi dándáá-gã ndute ñuyíú ñi cáhá nchaa ñáyiú ndéu ichi cuehé ichi duha te ñⁿ ñí-ni té Nöé ndíhi úsá-gá tucu cue ñáyiú cùu ndí mee-dé ní dácácu nihnu-gá. Te té Nöé-ãⁿ cúu-dé téé ní cáháⁿ dóho-yu nacuáa cada váha-yu cundecú-yu ni cùu te ñà túú ní cuíní-yu. 6 Te Yá Ndiöxí ní dánhá-gã ñíhú ní dánáá-gã ñáyiú ñuú Sodomá ndíhi ñáyiú ñuú Gómorrá te mee-ñá yáá ñi nduu ñuú-áⁿ. Te sá dúcáⁿ ñi cuu xíãⁿ cútnùní iní-ó nacuáa cada ñaha Yá Ndiöxí xii nchaa ñáyiú ñà túú quide váha. 7 Dico té Löt téé ní quide ndáá ní xíndecu ñⁿ

ñuú-án dává-án chi ní dácăcu nihnu ñaha-gă xii-dé. Te nchaa ñăyiu ñuú núú nĩ xindecu-dé-án io ní xinduu cuihna iní-yu, te mee-ni ichi díí iní ní xindecú-yu, te sá dúcáⁿ nĩ xóo cadă-yu xiăⁿ io ní ndihú iní té Löt. ⁸ Te ïⁿ nduu ïⁿ nduu ní xóo cada ndăhú-xi iní té Löt-án cuendă nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndihi cuendă nchaa sá cuèhé sá dúhá nĩ xóo cadă-yu ní xóo quini-dé, te mee-dé ní cuu-dé ïⁿ téé ní xinduu vii ní xinduu váha iní-xi núú Yă Ndiöxí. ⁹ Te sá dúcáⁿ nĩ yáha té Nöé ndihi té Löt, xiăⁿ cútnùni iní-ó să Yă Ndiöxí io chindee-gă cue ñăyiu quide ndăá ndécú ichi-gă cuendă sá vă cadă-yu nândi sá cuèhé sá dúhá cuèi nândi na ndòhó-yu cundecú-yu. Te Yă Ndiöxí cächí-gă sá ncháá ñăyiu ndècu ichi cuèhé ichi duha sa ndècu túha-yu sá quihíⁿ-yu núú ùhú núú ndăhú nduu nà yáha cundăá cuèchi-yu.

¹⁰ Te uuⁿ-gă cada ñaha Yă Ndiöxí xii nchaa cue téé ndècu ichi díí iní, te dàquee tihú-güedé nchaa tnúhu sá sánú ichi ñaha xii-o nacuăa cada-o cundecu-o, te cùu-güedé cue téé ñí iní-xi, te yí iní-güedé, te ñá túú yuhú-güedé cáháⁿ úhú-güedé cuendă nchaa espíritú cùnù. ¹¹ Te cue espíritú xínú cuèchi núú Yă Ndiöxí io cùnuu-xi dacúúxi cuè téé-án, dico ñá túú cùyí-xi cáháⁿ-xi dàtná cáháⁿ cue téé-án òré ndăcáⁿ cuèchi-xi núú Yă Ndiöxí cuendă nchaa sá quidé cue espíritú cündihí yucu ñávăha.

¹² Te nchaa cue téé dandăhú ñáhá xii-ndo-án cúú-güedé dàtná cue quiti, chi cue quiti-án ñă túú ndècu sá xini tnùni-güedi, chi cue quiti-án nĩ cacu-güedi sá tníí-ó-güedi te cahni-o-güedi. Te ducaⁿ sătnahá-xi cùu nchaa cue téé-án, chi căháⁿ cuèhé-güedé cuendă ndédani căa espíritú cuèi ñá túú xini-güedé ná espíritú cúú-xi, te diu-ni mee-güedé dăcuita nihnu-güedé mée-güedé sá dúcáⁿ quide-güedé, ¹³ te sáá nduu te nachăhu-güedé nchaa sá quidé-güedé-án, te cuèi nduu cuèi niú cúdí iní-güedé quidé-güedé nchaa núú să cuèhé sá dúhá sàni iní-güedé. Te òré nătacă-ndó căda-ndo ïⁿ vico chiñuhu-ndo Yă Ndiöxí te chitnahá ñáhá-güedé xii-ndo, te cada dusaⁿ-güedé sá cúdí iní-güedé sá dandăhú ñáhá-güedé xii-ndo, te dicó sácáⁿ-núú cuăha ñaha-güedé xii-ndo dùcaⁿ na cada-güedé.

¹⁴ Te nchaa cue téé-án òré xini-güedé ïⁿ ñăyiu dihi te ndihí-ni sàni iní-güedé cáháⁿ ndihi ñaha-güedé xii-yu, te ñá túú ndùu vétú iní-güedé cuendă nchaa sá cuèhé sá dúhá quide-güedé chi uuⁿ-gă uuⁿ-gă sání iní-güedé cada-güedé. Te cuáhă-güedé dandăhú-güedé nchaa ñăyiu ñá túú nihí ndéé căda ndăá cuendă canchicúⁿ nihnú-yu nchaa tnúhu căháⁿ-güedé. Te mee-ni nchăa sá ndécú ndihi tnaha ñăyiu-güedé cúú iní-güedé, te cue téé-án cúú-güedé cue téé duuⁿ duuⁿ sa ní xíta nihnu núú Yă

Ndiõxí. ¹⁵ Chi cùu-güedé cue téé vá cání-gã iní-xi cada ndáá, te nchìcúⁿ ni-hnu-ná-güedé quidé-güedé nàcuáa ní xóo cada ndíi Balaám déhe ndíi Beór, chi ndíi Balaám-áⁿ ní xóo tnahá iní ndíi cada ndíi chiúⁿ cuehé nàcuáa ní xóo níhí ndíi díhúⁿ. ¹⁶ Te Yá Ndiõxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá vá cáda ndíi ñⁿ cuèchi sàni iní ndíi cada ndíi ní cùu. Te sá dúcáⁿ ní cuu xiáⁿ ní nguítuu ndíi ñá túú ní quide ndíi ñⁿ sá ñà túú nàndíhi sàni iní ndíi ní cùu.

¹⁷ Te nchaa cue téé ducaⁿ xiquide cùu-güedé dàtná ñⁿ doco yìchí, te cùu tucu-güedé dàtná ñⁿ vícò sá xídó tǎchí te ñá túú dǎú nchídó-xí, te sa ndècu túha ñⁿ xichi núú ìo nee quíhíⁿ-güedé cundecu-güedé ní caa ní quíhíⁿ. ¹⁸ Te cue téé-áⁿ càháⁿ-güedé dàtná càháⁿ ñⁿ téé ío cùu cahnu dico ñá túú védana nàndíhi nchaa tnúhu càháⁿ-güedé, te cue téé-áⁿ dándàhú-güedé nchaa ñáyiu íchí ní dǎñá ichi cuehé ichi duha, te xǎhaⁿ-güedé xií-yu sá cúú-ní càdá-yu nchaa sá cuèhé sá dúhá quide nchaa ñáyiu ndècu ichi díí ìní, ¹⁹ te xǎhaⁿ tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sá cuèhé sá dúhá cùnuu quide-güedé. Te nchaa ñáyiu ñá ndácú dàña nándi sá cuèhé sá dúhá cùu-yu dàtná ñⁿ ñáyiu xìnu cuechi ñá túú tnàhí dǎñá quee núú chíúⁿ pàtróóⁿ-xi. Te ducaⁿ sǎtnahá-xi cùu-yu chi

ñá ndácú-yu dàñá-yu nándi sá cuèhé sá dúhá quidé-yu. ²⁰ Te núu ñáyiu sa ní dǎñá nchàa ichi cuehé ichi duha cuendá sá ní cutnùnì iní-yu nàcuáa ndùu tnúhu Xítóhó Jesucristú, Yá ní dácacu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gá tucu cadá-yu dàcúúxí dàtná ní xóo cadá-yu cùtnàhá vátá cùtnùnì-gá iní-yu nàcuáa ndùu tnúhu-gá. ²¹ Te váha-gá sá vǎ ngũmu íchí-yu ichi ndáá ní cùu te ñá díú sǎ sà ní ngũnu íchí-yu te ní dǎñá-yu nchaa tnúhu-gá sá sà ní níhí-yu ndècu ndíhí-yu sànu ichi ñaha-xi nacuáa cundecú-yu ní cùu. ²² Te ñáyiu ducaⁿ xiquide quèe ndáá-xi nàcuáa cuáháⁿ ñⁿ cuèndú sá càchí-xi: “Iná ní nacaxi-dí sá ní ndusaⁿ-dí, te cùchí quiti íchí ní xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-áⁿ.

3

Xítóhó Jesucristú quixi tucu-gá

¹ Te nchaa nchòhó ñáyiu ío cùu iní-í cùtnunì iní-í sá ìo váha sàni iní-ndó, te xéhe cúú-xí tütú cúú úú cǎdúha-í sá cúú-xí-ndó, te ñⁿ-ní càháⁿ-í dándacu iní ñáhà-í xii-ndo nchàa tnúhu sá sà ní xíndedóho-ndo. ² Chi cuínì-í sá vǎ nàcuànaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndiõxí ndéé sanaha, te ní vǎ nàcuànaa-ndo nchaa

tnúhu ní cáháⁿ cue téé ní cáháⁿ tnúhu Xítóhó Jesucristú Yáá ní dácácu nihnu ñaha xii-o núú úhú núú ndáhú, chí diu nchaa tnúhu-áⁿ sánú ichi ñaha-xi xii-o nacúaá cada-o cùndecu-o.

3 Te ío-gá xíní ñùhu-xi cutnuni ínì-ndó nàcuáa cada-xi òrè vátá sàá-gá nduu quixi tucu Xítóhó Jesucristú ñuyíú-a, te cächí tnúhu-í xii-ndo sã cùndecu ñáyiu cuhuⁿ ínì mee-ni nchaa sá cuèhé sá dúhá te mee-ni xiãⁿ cadá-yu, te cáháⁿ cuèhé cáháⁿ duhá-yu cuendá tnúhu Yá Ndiöxí. 4 Te cachí-yu: “Ñá ndàá sá quíxí Xítóhó Jesucristú ñuyíú-a, chí núu quixi-gá te sá ndéé ama-gá sa ní quexìo-gá ní cùu. Te dàtná-ni quíde-xi vitna diu-ni duha ní quesaha-xi quíde-xi ndéé cùtnàhá ní ngáva ñuyíú, te diu-ni duha quíde-xi ndéé cùtnàhá ní xíndecu cue ñaní tnáhá-ó ndéé sanaha, te diu-ni duha quíde-xi ndéé ní sáá nduu ní xíhí-güedé, te diu-ni duha quíde-xi ndéé vitna”, duha cáháⁿ-yu. 5 Te ñucùuⁿ cadá-yu vá cadá cuendá-yu sá Yá Ndiöxí ní cáháⁿ-gá te ní ngúndecu andiu ndíhi ñuyíú-a, te diu-gá ní quíde ní quene ñuhu yìchí xití ndute ní ngúndecu-xi ñⁿ xio. 6 Te ñⁿ xito ní dándáá Yá Ndiöxí ndute ñuyíú-a ní dánáá-gã nchaa sá ío. 7 Te Yá Ndiöxí ní cachí-gá sá cùndecu-ni ñuyíú-a ndíhi andiu ndéé ná sáá nduu càda-gá nchaa nàcuáa ní cáháⁿ-gá sá cúu-xí nchaa ñáyiu ndècu ichi cuèhé ichi

duha, te dàvá-áⁿ danàa-gá nchaa ñáyiu-áⁿ chí cáyú andiu ndíhi ñuyíú-a.

8 Te nchaa nchòhó ñáyiu ío cùu ínì-í, ío cuhuⁿ ínì-ndó tnúhu na càháⁿ-í-a, chí Yá Ndiöxí ñá túú sàni ínì-gá dàtná sání ìní méé-ó, te ñⁿ nduu cùu-xi datná úxí ciendú cuíá, te úxí ciendú cuíá-áⁿ cúu-xí dàtná ñⁿ nduu sá cúu-xí-gá. 9 Te Yá Ndiöxí ñá túú dàna ndodo ínì-gá vá cadá-gá ñⁿ sá càháⁿ-gá dàtná cächí cue ñáyiu sá dáná ndòdo ínì-gá cada-gá ñⁿ sá càháⁿ-gá, chí ñucùuⁿ tnahí dàcaca-gá nduu cuendá sá ío cùndahú ínì ñáhá-gã xii-o, te cuíni-gá sá ncháá ñáyiu ndixi túu ínì-yu sá ñà túú quíde váha-yu ndècú-yu te tuhá-yu ichi-gá, te ducaⁿ quíde-gá chí cuíni-gá sá vã cuíta nihnu ni ñⁿ-yu.

10 Te dàtná quíde cuè ñadúhú quíhu-güedé ñⁿ vehe dùhu-güedé òrè ñá túú yìhi ínì xítóhó vehe-áⁿ, te ducaⁿ càda Xítóhó Jesucristú chí nduu ñà túú yìhi ínì ñáyiu ñuyíú-a quixi tucu-gá, te dàvá-áⁿ cada-xi andiu dàtná quíde-xi òrè níhi vìhi caháⁿ ñúhu, te diu-ni òrè-áⁿ ndoñuhu àndiu, te cáyú nchaa chódíní, te cáyú tucu tnàhá ñuyíú-a ndíhi nchaa sá ío.

11 Te vitna nchòhó sa xínì-ndó sã náá ñuyíú-a te xiãⁿ ío xìni ñuhu-xi cada váha-ndo cùndecu-ndo, te cada-ndo nàcuáa cuíni méé Yá Ndiöxí cunduu. 12 Te ío nducu ndèe-ndo ducaⁿ cada-ndo cuendá ducaⁿ ndíhi-ni sáá nduu càda-gá nchaa nàcuáa càháⁿ-gá,

te ducaⁿ nchòhó cundecu túha-ndo sáá nduu-áⁿ. Te diu-ni nduu-áⁿ ndoñuhu àndiu chi cáyú-xi, te diu-ni ducaⁿ ndoñuhu tucu nchaa chódíní chi ndihi-di cáyú. ¹³ Te nchoo ndètu-o sáá nduu cundecu-o ìⁿ ñuyíú sáá, te quini-ó ìⁿ andiu saa datná ní cachí Yă Ndiòxí, te yàcáⁿ chi mee-nă cue ñáyíu quide váha cundecu.

¹⁴ Te nchòhó ñáyíu ío cùu iní-í, nini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ìchi Yă Ndiòxí, te cundecu nahi-ndo, te cada-ndo nchàa nacuáa vá cundècu cuéchi-ndo núú-gă. ¹⁵ Te ío cada cuendá-ndó să dăcaca-gă nduu dùcaⁿ cada-gă chi cuní-gă sá ncháá ñáyíu naníhí tǎhú-yu. Te té Păblú téé ío cùu iní-ó ndècu ndihi-o ìchi Xítóhó Jesucristú diu-ni nacuáa cǎháⁿ-í-a diu-ni ducaⁿ nǐ tee-dé ìⁿ núú tütú ní dăquíxí-dé ndaha-ndo, te ní tee-dé nacuáa ní dăcǎhú iní ñáhá Yă Ndiòxí xii-dé. ¹⁶ Te diu-ni ducaⁿ cǎháⁿ-dé nchaa dava-gă núú tütú cǎdǔha-dé, te dava tnúhu cǎháⁿ-dé ío úhú tecú tnùní-ó, núú xǎⁿ ñáyíu ñá túú cǔtnuní váha iní-xi, ñáyíu ío yáchí sǎndáá iní-xi ìⁿ tnúhu, ñáyíu-áⁿ təcú tnùní dátñí-yu nchaa tnúhu ní chídó tnùní-dé, ndihi nchaa dava-gă tnúhu yòdo tnuní núú tütú Yă Ndiòxí, te sá dúcáⁿ quidé-yu te dacuíta nihnú-yu mée-yu.

¹⁷ Te nchòhó ñáyíu ío cùu iní-í, sa cǔtnuní iní-ndó nacuáa quide dava ñáyíu, núú xǎⁿ ío xini ñihu-xi quihi iní-ndó cundecu-ndo cuendá

ducaⁿ cundecu-ni-ndo ichi-gă, te vá dǎñá-ndó mée-ndo dandahú ñáhá nchàa cue téé ndècu ìchi cuehé ìchi duha, chi cue téé-áⁿ ñà túú sàni váha iní-güedé cuendá tnúhu Yă Ndiòxí. Te núu na dǎña-ndo mee-ndo dandahú ñáhá-güedé xii-ndo te vá cundècu váha-gă-ndó ìchi-gă dátñá ndécú-ndó vitna. ¹⁸ Te nchòhó uuⁿ-gă uuⁿ-gă cuita cutnùní-gă iní-ndó quihiⁿ nchaa nacuáa ta chindee ñaha Xítóhó Jesucristú xii-ndo cuǎháⁿ. Te ducaⁿ ìo-gă cuita cutnùní iní-ndó nchàa nacuáa sàni iní-gă, te diu-gă cúú-gă Yá ní dăcǎcu nihnu ñaha xii-o núú úhú núú ndǎhú. Te chí ná cǎchí-ó sǎ ìo cǎhnu cuu-gă cuéi vitna té cuéi ndée núú cuǎháⁿ núú vǎxi. Te ducaⁿ na cunduu. Te ío chí cǎdá ndèe iní-nă vitna.

TUTÚ DÍHNA NÍ CADÚHA TÊ JUÁÁ

Tnúhu sá cãháⁿ nãcuáa naníhí tãhú-ó

1 Te yúhú té Juáá cãchí tnúhu-í xii-ndo cuëndá Cristú Yaá cãháⁿ nãcuáa cundecu ndihí-o Yã Ndiõxí. Te Cristú-áⁿ sa ndëcu-gá ndéé cútñahá ní ngáva ñuyúú. Te yúhú ní xiní núù-í ndihí cue téé ní xica cuu ndihí-í nãcuáa càa nãcuáa ndùu-gá. Te ní xíndedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gã. 2 Te ní quixi túu-gá ñuyúú-a, te ní xiní-ndí-gá, te xíãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndihí Tãtã-gã Dútú Ndiõxí ní cùu, te ní quixi-gá ñuyúú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tãhú-ó cundecu ndihí-o Yã Ndiõxí ní caa ní quíhíⁿ te núu na quíndáá iní-ó-gã. 3 Te xíãⁿ dátúu-ndí núu-ndó nchàa sá ní xiní-ndí, ndihí nchaa sá ní xíndedóho-ndí cuëndá cuu ñⁿnuu-o nchàa-o datná nchúhú cúú ñⁿnuu-ndí ndihí Tãtã-ó Dútú Ndiõxí, ndihí Déhe-gá Xítohó Jesucristú. 4 Te xíãⁿ núu tõe-í nchaa tnúhu-a cuëndá cudíí iní-ó nchàa-o.

Yã Ndiõxí cúu-gã datná ñⁿ ñuhú

5 Te nchaa tnúhu ní dánèhé ñáhá Xítohó Jesucristú xii-ndí, xíãⁿ dánèhé ñáhà-í xii-ndo. Te ní cachí-gá sá Yã Ndiõxí cúu-gã datná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túú quide-gá ní ñⁿ sá cuèhé sá dúhá. 6 Te núu cãchí-ó sã ndécú-ó ìchi Yã Ndiõxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núu-gã. 7 Te núu na càda váha-o datná quidé mèe-gá, te cuu ñⁿnuu-o nchàa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi ñiu cuëndá-áⁿ ní xíhí Déhe-gá Xítohó Jesucristú núu cùrúxí.

8 Te núu cãchí-ó sã ñà túú quide-o ní ñⁿ sá cuèhé sá dúhá, te dàndahú-ó mèe-o, te ñá túú quide ndáá-ó núu Yã Ndiõxí. 9 Te núu na nãhmá-ó nchàa yíca cuèchi-o núu-gã, te mee-gã cada càhnu iní-gá, te ndada ndoo-gá iní-ó, cuëndá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, ducaⁿ ní cãháⁿ-gá te ducaⁿ quide-gá. 10 Te núu na cãchí-ó sã ñà túú quide-o ní ñⁿ sá cuèhé sá dúhá, te quide-o Yã Ndiõxí ñⁿ ñándéhdé, dico ñá túú ndèhnde-gá. Te ñá túú ndëcu tnúhu-gá iní-ó te núu ducaⁿ na càda-o.

2

Xítohó Jesucristú cãháⁿ ndãhú-gá cuëndá-ó

1 Te nchõhó ñáyiu cùu datná déhe-í, chido tnuní-í

nchaa tnúhu-a cuendá sá vǎ cáda-ndó nǐ ìⁿ sá cuèhé sá dúhá. Dico núu ìⁿ-ndo quide-ni-ndo nándi sá cuèhé sá dúhá, te ndècu ìⁿ Yaa càháⁿ ndàhú cuendá-ó núú Yǎ Ndiòxí. Te Yaa-án cúu-gǎ Xítóhó Jesucristú Yaa quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o núú-gǎ te núu na quíndáá iní-ó-gǎ. Te ñá díu-ní sǎ cuendá yíca cuèchi nchoo nǐ xíhí-gá, chi tnàhá cuendá nchaa yíca cuèchi ñáyiu ni càa xico ñuyíu.

³ Te núu cada-o nchaa nacuaa càháⁿ Yǎ Ndiòxí, te cutnùnǐ iní-ó sǎ ndécú-ó ìchi-gá. ⁴ Te núu càchí-ó sǎ ndécú-ó ìchi-gá te ñá túu quide-o nacuaa càháⁿ-gá, te dàcuandehnde-o, te ñá túu quide ndáá-ó núú-gǎ. ⁵ Te núu sàndáá ndisa iní-ó tnúhu-gá, te quide-o nchaa nacuaa càháⁿ-gá, te ducaⁿ te cùu iní ndisa-o-gǎ, te cùtnunǐ ndáá iní-ó sǎ ndécú-ó ìchi-gá. ⁶ Te núu càchí-ó sǎ ndécú-ó ìchi Yǎ Ndiòxí, te xǐni ñuhu-xi cada ndáá-ó cùndecu-o ñuyíu-a dàtná ní quide ndáá Xítóhó Jesucristú cútnàhá ní xíndecu-gá ñuyíu-a.

Ndudú sáá

⁷ Te nchòhó ñáyiu ndècu ndihi-í ichi Xítóhó Jesucristú, ñá túu chido tnuní-í ìⁿ tnúhu saa sá cúu-xí-ndó, chi diu-ni tnúhu sá nǐ ngúndecu ndihi-ndo ndéé díhna, tnúhu ní xíndedóho-ndo ndéé cútnàhá ní sàndáá iní-ndó-gǎ, xǐáⁿ chídó tnùnǐ-í. ⁸ Te tnúhu-a cùu-xi datná ìⁿ tnúhu saa tèe-í dándacu

iní ñáhà-í xii-ndo nàcuáa ní quide Xítóhó Jesucristú cútnàhá ní quixi-gá ñuyíu-a ní quide váha-gá, te tnàhá nchòhó ní tnii-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiu ta dàña nchaa sá cuèhé sá dúhá cuáháⁿ, chi Xítóhó Jesucristú tá dándixi túu-gá iní-yu cuendá cutnùnǐ iní-yu nàcuáa ndùu cuendá Yǎ Ndiòxí.

⁹ Te núu càchí-ó sǎ quidé vǎha-o, te cùu úhú iní-ó tnàhá ñáyiu-o, te xǐáⁿ ñá túu quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰ Te núu na cùu iní-ó tnàhá ñáyiu-o dàtná cúu iní ñáhá mèe Yǎ Ndiòxí xii-o ña, te quide ndáá-ó núú-gǎ, te vá cànùchi-o tnaha ñáyiu-o ìⁿ ichi cuehé ichi duha. ¹¹ Te núu cùu úhú iní-ó tnàhá ñáyiu-o, te ñá túu quide váha-o núú Yǎ Ndiòxí, chi ndècu-ni-o ichi cuehé ichi duha, te ñá túu cùtnunǐ iní-ó sǎ quidé-ó. Chi cùu-o datná ìⁿ tèe ndècu núu néé chi ñá cútnùnǐ núu-dé ndéé ichi quíhíⁿ-dé. Ducaⁿ sǎtnahá-xi cùu nchoo chi ñá cútnùnǐ iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàhá ñáyiu-o.

¹² Te nchòhó ñáyiu cùu datná déhe-í, yúhú chídó tnùnǐ-í tnúhu-a ìⁿ núu tütú càchí tnúhu-í xii-ndo sǎ nǐ quide càhnu iní Yǎ Ndiòxí nchaa cuèchi-ndo, chi diu cuendá-án nǐ xíhí Xítóhó Jesucristú. ¹³ Te nchòhó ñáyiu sacuéhé, yúhú tèe-í tnúhu-a sá cúu-xí-ndó chi càháⁿ ndihi-ndo Jèsus, te Yaa-án sa

ndècu-gá ndéé cútnàhá ní ngáva ñuyíú. Te nchòhó ñáyíu nchicúⁿ-gá téé tùcu-í tnúhu-a sá cúú-xí-ndó chi ñá túú sàndáá iní-ndó tnúhu càháⁿ yucu ñávàha.

Te nchaa nchòhó ñáyíu cùu datná déhe-í, tèe tucu-í tnúhu-a sá cúú-xí-ndó, chi sa càháⁿ ndihí-ndo Tátá-ó Dütú Ndiòxí. ¹⁴ Te nchòhó ñáyíu ni sàhnu, yúhú chídó tnùn-í tnúhu-a ñⁿ núú túú chi càháⁿ ndihí-ndo Jèsús, te Yaá-áⁿ sa ndècu-gá ndéé cútnàhá ní ngáva ñuyíú. Te nchòhó ñáyíu nchicúⁿ-gá, yúhú chídó tnùn-í tnúhu-a chi ío nihí ndéé-ndó ndècu-ndo, chi tnèi-ndo tnúhu càháⁿ Yá Ndiòxí. Te ñá túú sàndáá iní-ndó tnúhu càháⁿ yucu ñávàha.

¹⁵ Te vá cúhúⁿ iní-ndó ni ñⁿ sá cuèhé sá dúhá ío ñuyíú-a, te ni vǎ cání iní-ndó càda-ndo. Chi núu na cùhuⁿ iní-ó nchàa sá cuèhé sá dúhá ío ñuyíú-a ña, te ñá túú Tátá-ó Dütú Ndiòxí ñúhú iní-ó te núu ducaⁿ na càni iní-ó. ¹⁶ Te nchaa ñáyíu ñuyíú-a quidè-yu nchaa sá cuèhé sá dúhá, chi ñu nchaa xíáⁿ cúú ñⁿ iní-yu cadá-yu. Te nchaa sá cuèhé sá dúhá sàni iní-yu, ndihí nchaa sá xíní-yu quidè-yu. Te xíquide nínu-yu mèé-yu cuèndá nchaa sá ndécú ndihí-yu. Te nchaa sá ñà túú vǎha ní cacu nihnu-xi ñuyíú-a. ¹⁷ Te nchaa sá ñà túú vǎha ío ñuyíú-a, ndihí nchaa sá sání cuèhé sání dùha iní-yu cuita ndihí nihnu-xi quíhíⁿ. Te nchaa ñáyíu tnèi tnúhu càháⁿ Yá Ndiòxí cundecú-yu ndihí-gá ni caa ni quíhíⁿ.

Tnúhu ndáá tnúhu Yá Ndiòxí ndihí tnúhu ndehnde

¹⁸ Te nchòhó ñáyíu cùu datná déhe-í, sa nihí-ndó tnúhu sá quíxí ñⁿ téé cunuu-gǎ-dé cuu úhú iní-dé Crìstú. Te sa xǐndecu-gá ñáyíu cùu úhú iní ñáhá xii-gá, núu xíáⁿ cútnùn-í iní-ó sǎ sà ta cuyatni nduu naa ñuyíú-a. ¹⁹ Te ñáyíu-áⁿ ni xǐndecu ndihí ñáhá-yu xii-o, te ní queé-yu cuáháⁿ-yu chi ñá túú ní cùu ñⁿnuu-o ndihí-yu. Chi núu dícó ní cùu ñⁿnuu-o ndihí-yu te cundecu ndihí ñáhá-yu xii-o ni cùu. Te duha ní cuu cuèndá cutnùn-í ndáá iní-ó nchàa-o sá ñà túú cùu ñⁿnuu-o ndihí-yu, chi ñá túú sàndáá iní-yu Yá Ndiòxí.

²⁰ Te Xítohó Jesucristú ní taxi-gá Espiritú Yá Ndiòxí ndécú ndihí-o, núu xíáⁿ tècú tnùn-í-ó tnúhu-gá. ²¹ Te cuèndá sá xíní-ndó tnúhu ndáá tnúhu Yá Ndiòxí núu xíáⁿ téé-í tnúhu-a, te ñá díú ñⁿ sá ñà cútnùn-í iní-ndó cùu-xi. Te sa nàha-ndo sá ni ñⁿ tnúhu ndehnde ñà túú ñutnahá-xi núú tnúhu Yá Ndiòxí, chi mee ñène-ni tnúhu ndáá cúú-xí.

²² Te nchaa ñáyíu càchí sá ñà díú Jèsús cúú Crìstú Yaá ní tendaha Yá Ndiòxí ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ní-yu càchí-yu sá ñà díú Dèhe Yá Ndiòxí cúú Jèsús, te sá dúcáⁿ quidè-yu te cùu úhú iní-yu Yá Ndiòxí ndihí Dèhe-gá Jèsús. ²³ Te nchaa ñáyíu ñá túú sàndáá iní sá Dèhe Yá Ndiòxí cúú Jèsús, ñáyíu-áⁿ ñà túú ndécú-yu ichi Tátá-ó Dütú Ndiòxí. Te nchaa

ñáyiú càháⁿ sá Dēhe Yá Ndiöxí cúú Jèsús, ñáyiú-án ndécü-yu ichi Tātá-ó Dütú Ndiöxí.

²⁴ Te nchaa tnúhu Yá Ndiöxí ní tecú dóho-ndo ndéé díhna, tnúhu-án cuhuⁿ iní-ndó. Te núu nchaa tnúhu-án ná cùhuⁿ-ni iní-ndó, te cundecu ndihí-ndo Yá Ndiöxí ndihí Déhe-gá cuèi vá cündecu túu-ndo ndihí-gá ñuyíú-a.

²⁵ Te Jèsús ní cachí-gá sá ndúú tǎhú-ó cündecu ndihí-o-gá ni caa ni quíhíⁿ andíu.

²⁶ Te cuendá nchaa ñáyiú dándahú ñáhá xii-ndo ní chídó tnúmí-í tnúhu-a, ²⁷ dico nchòhó chi ndècu ndihí-ndo Espiritú Yá Ndiöxí sá ní taxi Xítohó Jesucristú. Núu xǎⁿ ñá túú xini ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchaa sá vǎha. Te nchaa sá dánèhé ñáhá-xí xii-ndo cuu-xi sá ndáá, te ñá díú ìⁿ tnúhu ndehnde. Te vitna chí cǎnchícúⁿ nihnu-ni ichi Yá Ndiöxí dátá ní sanu ichi ñaha mée Espiritú-gá xii-ndo.

²⁸ Te nchòhó ñáyiú cùu datná déhe-í, chí cǎnchícúⁿ nihnu-ni ichi Xítohó Jesucristú, chi cuendá òré ná quíxí tucu-gá ñuyíú-a te vá yùhú-ndó te ní vá cúú càhaⁿ núú-ndó núú-gǎ.

²⁹ Te nchòhó sa nàha-ndo sá mée-gǎ quidé ndáá-gá, te sa xini-ndó sǎ ncháá ñáyiú quide ndáá cúú-yu déhe Yá Ndiöxí.

3

Ñáyiú cùu déhe Yá Ndiöxí

¹ Te chí cuǎha cuendá sá ío cùu iní ñáhá Tātá-ó Dütú Ndiöxí xii-o cuendá sá cúú-ó déhe-gá, chi ducaⁿ ní cachí-gá,

te déhe ndisa-gá cúú-ó. Te núu xǎⁿ ñáyiú ndècu ichi cuehé ichi duha ñá cúú quini ñáhá-yu xii-o, chi ñá túú xini-yu nàcuáa ndùu cuendá Yá Ndiöxí. ² Te nchòhó ñáyiú ío cùu iní-í, vitna cùu-o déhe Yá Ndiöxí, te vátá cùtnúni váha-gá iní-ó nása cunduu-o ndéé núú cuáháⁿ núú vǎxi. Dico sa cùtnúni iní-ó sǎ òré ná quíxi tucu Xítohó Jesucristú te nduu-o dátá cáá mée-gá, chi quini-ó-gǎ nàcuáa-ni càa nacuáa-ni ndùu-gá. ³ Te nchaa ñáyiú sa ndètu ñaha xii-gá sa ta ngündecu túha-yu cuáháⁿ, chi ta ndùu ndoo nduu nine iní-yu cuáháⁿ dátá cáá ndòo caa nine mee-gá.

⁴ Te nchaa ñáyiú quide nándi sá cuèhé sá dúhá ñá túú quide váha-yu núú Yá Ndiöxí, chí ní cachí-gá sá vǎ dúcáⁿ càda-o. ⁵ Te sa nàha-ndo sá ní quíxi túu Xítohó Jesucristú ñuyíú-a cuendá cada càhnu iní-gá nchaa sá cuèhé sá dúhá quide-o, chi mee-gǎ ñá túú quide-gá ni ìⁿ sá cuèhé sá dúhá. ⁶ Te nchaa ñáyiú ndècu ichi Yá Ndiöxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xini-yu nàcuáa ndùu cuendá Xítohó Jesucristú te ní ñá túú xini-yu nása càa-gá. ⁷ Te nchòhó ñáyiú cùu datná déhe-í, vá dáñá-ndó mée-ndo dándahú ñáhá ñáyiú ndècu ichi cuehé ichi duha, chí cǎchí-yu sá cúú cündecu-o ichi Yá Ndiöxí te cada-o nándi sá cuèhé sá dúhá dico ñá ndáá. Te nchaa ñáyiú quide váha quide ndáá-yu

dàtná quidé mèe Jesús. ⁸ Te nchaa ñáyiú ndècu ichi cuehé ichi duha ndècu ndihí-yu yucu ñávàha, chi ducaⁿ quide mee-xi ndéé cùtnàhá vátá ngáva-gá ñuyíú. Te xiáⁿ ní quixi Jesús Déhe Yá Ndiöxí ní dáquée tíhú-gã nchaa sá quidé yùcu ñávàha.

⁹ Te nchaa ñáyiú ní natuha ichi Yá Ndiöxí ní nduú-yu déhe-gá, te ñá túú-gã quidè-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xiáⁿ ñá túú-gã quidè-yu nándi sá cuèhé sá dúhá, chi ní ngúndecu ndihi ñaha-gã xií-yu. ¹⁰ Te cùtnuní iní-ó nándi cùu ñáyiú cùu déhe Yá Ndiöxí, te cùtnuní iní-ó nándi cùu ñáyiú cùu déhe yucu ñávàha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-áⁿ ñà díú dèhe Yá Ndiöxí cùú-yu.

Cuu iní tnáhá-ó ìⁿ ìⁿ-o

¹¹ Te ndéé òré ní natuha-o ichi Yá Ndiöxí ní tecú dóho-o sá cùú iní-ó tnàha ñáyiú-o. ¹² Te vá cùndùu úhú iní-ó dàtná ní quide ndíi Cãin, chi ndíi-áⁿ ní xíndecu ndíi ndihi yucu ñávàha núu xiáⁿ ní sahani ndíi ñani ndíi. Te ducaⁿ ñá quide ndíi chi ní xíndecu ndíi ichi cuehé ichi duha, te ñani ndíi ní xíndecu-dé ichi váha.

¹³ Te nchòhó ñáyiú ndècu ndihi-í ichi Xítohó Jesucristú, vá cádá cuèndá-ndó sá cùú úhú iní ñáhá nchaa ñáyiú ndècu ichi cuehé ichi duha xii-ndo. ¹⁴ Te cunaha-ndo na càchí tnúhu-í xii-ndo sá núu na cùu iní-ó tnàha ñáyiú-o, te cùtnuní iní-ó sá sá ní dáñá-ó ichi sá tá dàcuíta

nihnu ñaha xii-o cuáháⁿ ní cùu, te vitna ní tñi-o ichi váha. Te nchaa ñáyiú ñá túú cùu iní tnàha ñáyiú-xi ñuhu-ní-yu ichi cuáháⁿ-yu núu úhú núu ndàhú. ¹⁵ Te nchaa ñáyiú ñá cùú quini ndéé tnàha ñáyiú-xi cùú-yu dàtná ìⁿ ñáyiú sàhani ndíyi. Te nchòhó sa nàha-ndo sá nì ìⁿ ñáyiú sàhani ndíyi ñá túú ndècu ndihí-yu tnúhu ndee ìní sá nánihí tãhú-yu. ¹⁶ Te Xítohó Jesucristú ní xihí-gá cuèndá nchaa yicá cuèchi-o, núu xiáⁿ cùtnuní iní-ó sá ìo cùu iní ñáhá-gã xii-o. Te xiáⁿ cùtnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuèndá sá cùú-xí ìⁿ-yu, cuèndá-nã sá ná dàcácu nihnu-ò-yu núu tnúndòho ndecú-yu. ¹⁷ Te núu ndècu ndihi-o sá cóhó sã cáxi-ó ndihi nchaa sá nándihi-o, te ndècu ñáyiú ndàhú ñá túú vèdana ná ndécú ndihi, te ñá túú chindee-ó-yu, te ñá túú cùu iní-ó Yá Ndiöxí te núu ducaⁿ na càda-o. ¹⁸ Te nchòhó ñáyiú cùu datná déhe-í vá cuèndá-ni cùnàha cáháⁿ-ndó sá cùú ìní tnáhá-ndó, chi cuu iní tnáhá ndisa-ndo te coto tnàha-ndo.

Vá yùhú-ó núú Yá Ndiöxí

¹⁹ Te núu ducaⁿ na càda-o, te cutnuni iní-ó sá ndécú-ó ichi ndáá ichi Yá Ndiöxí, te ñá túú-gã ná quihí iní-ó núú-gã. ²⁰ Te núu ndihú iní-ó cuèndá ìⁿ sá ñá quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó. ²¹ Te nchòhó ñáyiú ìo cùu iní-í, na càchí tnúhu-í xii-ndo, te núu ñá

túu nã sání ìní-ó te ñá túu nã quidé-ó, te vá yùhú-ó nũú Yã Ndiõxí. ²² Te nchaa sã vãha na càcáⁿ-ó nũú Yã Ndiõxí, te mee-gã taxi-gã chi tñi-o tnúhu càháⁿ-gã, te quide-o nchaa nacuaa cùu iní-gã. ²³ Te ní cachí Yã Ndiõxí sã quindáá iní-ó Dêhe-gã Xitohó Jesucristú, te cuu iní-ó tnàha ñáyiu-o dàtná ní cachí-gã. ²⁴ Te nchaa ñáyiu tñi tnúhu-gã ndécũ-yu ichi-gã, te ndècu ndihi ñaha-gã xii-yu. Te cùtnuní iní-ó sã ndécú-ó ndihi-gã chi ní taxi-gã Espiritú-gã ndécú ndihi-o.

4

Ñáyiu ndècu ndihi Espiritú Yã Ndiõxí ndihi ñáyiu cùu úhú iní ñáhá xii Xitohó Jesucristú

¹ Te nchòhó ñáyiu ío cùu iní-í, vá cùtexínu quindáá iní-ndó tnúhu càháⁿ nchaa ñáyiu càchí sã ndécú ndihi Espiritú Yã Ndiõxí. Chi díhna-gã cada cuendá váha-ndo te núu càháⁿ ndáá-yu nàcuáa càháⁿ tnúhu Yã Ndiõxí, chi ío vãi ñáyiu ñuyíú-a cachí-yu sã càháⁿ-yu tnúhu-gã dico ñá ndáá. ² Te duha cutnùní iní-ó nãndi cùu ñáyiu ndècu ndihi Espiritú Yã Ndiõxí. Nchaa ñáyiu càháⁿ ndáá sã Xitohó Jesucristú ní quixi-gã ñuyíú-a te ní cuu-gã ñiⁿ yiqui cùñú, ñáyiu-áⁿ cùú-yu ñáyiu cùu cuendá Yã Ndiõxí. ³ Te nchaa ñáyiu ñá túú càháⁿ nàcuáa càa Jesús cùtnàhá ní quixi-gã ñuyíú-a ñáyiu-áⁿ dándahú ñáhã-yu, chi ñá túú

cùu-yu ñáyiu cùu cuendá Yã Ndiõxí. Te ñu-ní-yu cùu úhú iní-yu Jèsús. Te nchòhó sa nàha-ndo sã cùndècu ñáyiu cuu úhú iní ñáhá xii-gã, dico yúhú càchí tnúhu-í xii-ndo sã sà ndecú-yu.

⁴ Te nchòhó ñáyiu cùu datná déhe-í, ndècu ndihi-ndo Yã Ndiõxí, te ñá dáñá-ndó dándahú ñáhá nchaa ñáyiu càchí sã càháⁿ tnúhu-gã te ñá ndáá. Te ñá túú sàndáá iní-ndó chi Yã Ndiõxí Yá ndécú ndihi-ndo taxi tñuní víhi-gã dàcúúxí yùcu ñávãha ndècu ndihi nchaa ñáyiu ñuhu ichi cuehé ichi duha. ⁵ Te nchaa ñáyiu dándahú ñáhá sã càháⁿ tnúhu Yã Ndiõxí ndécú-yu ichi cuehé ichi duha, te mee-ni cuendá nchaa sã ío ñuyíú-a càháⁿ-yu. Te tédóho ñaha nchaa dava-gã ñáyiu ndècu ñu-ni ichi cuehé ichi duha. ⁶ Te nchoo cùu-o ñáyiu cùu cuendá Yã Ndiõxí. Te nchaa ñáyiu xíndecu ichi-gã tñi-yu tnúhu càháⁿ-ó, te nchaa ñáyiu ñá túú ndècu ichi-gã ñá túú tñi-yu tnúhu càháⁿ-ó. Te duha te cùtnuní iní-ó nãndi cùu ñáyiu càháⁿ ndáá, te cùtnuní tucu iní-ó nãndi cùu ñáyiu dándahú ñáhá.

Cuu iní-ó tnàha ñáyiu-o dàtná cùú iní ñáhá mée Yã Ndiõxí xii-o

⁷ Te nchòhó ñáyiu ío cùu iní-í, xìni ñuhu-xi cuu iní tnáhá-ó dàtná cùú iní ñáhá mée Yã Ndiõxí xii-o, chi mee-gã táxi-gã sã xìni tñuní-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe

Yá Ndiöxí, te cùtnuní ndáá iní-yu sá ndécú ndìhi ñaha-gá xii-yu. ⁸ Te nchaa ñáyiú ñá túú cùu iní tnàha ñáyiú-xi ñá túú ndècu ndìhí-yu Yá Ndiöxí. Te nchaa ñáyiú ndècu ndìhi Yá Ndiöxí, ñáyiú-áⁿ sãñaha-gã sá xìní tnùní-yu cuèndá cuu iní-yu tnàha ñáyiú-yu. ⁹ Te cùtnuní iní-ó sã cúú iní ñáhá Yá Ndiöxí xii-o nchàa-o, chi ní tendaha-gã ìⁿndì dúi-ni Déhe-gá Xítóhó Jesucrìstú ní quixi-gá ñuyúú-a cuèndá sá díú-gã cada te naníhí tãhú-ó, te núu na quìndáá iní-ó tnùhu-gá. ¹⁰ Te ío cùu iní ñáhá Yá Ndiöxí xii-o nchàa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnàhí-gá xii-o, núu xíáⁿ ní tendaha-gã Déhe-gá ní quixi-gá ñuyúú-a ní xíhí-gá sá cuèndá nchaa yíca cuèchi-o.

¹¹ Te nchòhó ñáyiú ío cùu iní-í, xìní ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. ¹² Te ni ìⁿ nchoo ñáyiú ndècu ñuyúú-a ñá túú xìní-ó nàcuáa càa Yá Ndiöxí, dico nchoo ñáyiú ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíáⁿ cúú iní tnáhá-ó ìⁿ ìⁿ-o, te cùtnuní iní-ó sã cúú iní ndisa-o-gã. ¹³ Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o. ¹⁴ Te yúhú ndìhi dava-gá cue téé ní xica cuu ndìhi-gá càháⁿ-ndí sá nĩ xìní-ndí Jèsús Déhe Yá Ndiöxí ní quixi-gá ñuyúú-a, chi Tátá-ó Dütú Ndiöxí ní tendaha ñaha

xii-gá ní quixi-gá cuèndá dàcácu nihnu-gá nchaa nchoo ñáyiú ndècu ñuyúú-a núú ùhú núú ndàhú. ¹⁵ Te nchaa ñáyiú càháⁿ ni yùhu ni iní-xi sá Dèhe Yá Ndiöxí cúú Jèsús, ñáyiú-áⁿ ndécú-yu ichi-gá te ndècu ndìhi ñaha-gá xii-yu.

¹⁶ Te sàndáá iní-ó ni yuhu ni iní-ó sã Yá Ndiöxí cúú iní ñáhá-gã xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiöxí ndécú ndìhi ñaha-gá xii-yu. ¹⁷ Te núu ndisa cùu iní-ó Yá Ndiöxí te vá yùhú-ó òré ná sàá nduu tàudìⁿ ñaha-gá xii-o tnùú nchaa ñáyiú ndècu ichi cuehé ichi duha, chi quide ndáá-ó ndècu-o núú-gã ñuyúú-a dàtná ní quide mee Jèsús. ¹⁸ Chi nchaa ñáyiú cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xíáⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gã ndéé cùtnàhá vátá quìndáá-gá iní-ó tnùhu-gá sa cùu iní ñáhá-gã xii-o. ²⁰ Te nchaa ñáyiú càchí sá cúú iní-yu Yá Ndiöxí, te cùu ùhú iní-yu tnàha ñáyiú-yu, ñáyiú-áⁿ dácuaⁿndehndé-yu. Te núu ñá túú cùu iní-yu tnàha ñáyiú-yu ndècu ñuyúú-a ña, te uuⁿ-gá quidè-yu Yá Ndiöxí Yaá ñá túú xìní núú-yu. ²¹ Te càchí-gá núú tnùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu

tnàha ñáyíu-yu.

5

Nchaa ñáyíu ní ndacu ní dáñá ichi cuehé ichi duha

¹ Te nchaa ñáyíu sàndáá iní sá Jèsús cúú-gã Crìstú Yaá ní quixi ñuyíú-a, ñáyíu-áⁿ cúú-yu déhe Yá Ndiöxí. Te cùu iní-yu Tátá-ó Dütú Ndiöxí, te cùu iní-yu Déhe-gá. ² Te núu cùu iní-ó Yá Ndiöxí te quide-o nacuaá càháⁿ-gá, te cùtnuní iní-ó sã cúú iní tnáhá ndìsa-o nacuaá ndècu-o ichi-gá. ³ Te núu cùu iní-ó Yá Ndiöxí te tñi-o tnúhu càháⁿ-gá, chi cùtnuní iní-ó sã ñà díú ìⁿ sá ùhú cúú-xí dàtná càchí ñáyíu. ⁴ Te nchaa nchoo ñáyíu cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xiáⁿ ní ndacu-o ñí dáñá-ó ichi-áⁿ. ⁵ Te nchaa ñáyíu sàndáá iní sá Déhe Yá Ndiöxí cúú Jèsús ní ndacú-yu ní queé-yu ichi cuèhé ichi duha.

Nàcuáa ní cáháⁿ Yá Ndiöxí cuèndá Jèsús

⁶ Te Xítoho Jesucristú ní quixi-gá ñuyíú-a, te ní sandute-gá. Te ñá díú-ní xiáⁿ, chi ní xihí-gá sá cuèndá nchaa yíca cuèchi-o. Te Espiritú Yá Ndiöxí càháⁿ-xi mee-ni sã ndáá, chi càháⁿ Espiritú-gá-áⁿ sã Jèsús cúú-gã Crìstú Yaá ní quixi ñuyíú-a. ⁷ Te úní testiú ndécú àndiú, Tátá-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ìⁿ-ni tnúhu càháⁿ ndì nùnì testiú-áⁿ. ⁸ Te ducaⁿ cùu-xí ñuyíú-a tucu, chi càháⁿ Espiritú Yá Ndiöxí sá Jèsús cúú-gã Crìstú. Te ní

sandute-gá, te ní xihí-gá sá cuèndá nchaa yíca cuèchi-o. Te xiáⁿ cùtnuní ndáá iní-ó sã díú Jèsús cúú-gã Crìstú. ⁹ Te núu tñi-o tnúhu váha càháⁿ ñáyíu, te váha-gá tñi-o tnúhu càháⁿ Yá Ndiöxí, chi càháⁿ ndáá-gá sá Déhe-gá cúú Jèsús. ¹⁰ Te nchaa ñáyíu sàndáá iní sá Jèsús cúú-gã Déhe Yá Ndiöxí, ñáyíu-áⁿ cùtnuní iní-yu sá cúú-xí ìⁿ sá ndáá. Te nchaa ñáyíu ñá túú sàndáá iní tnúhu càháⁿ Yá Ndiöxí quidé-yu-gá ìⁿ ñándéhdé, dico ñá túú ndèhnde-gá, chi mèe-yu ñá túú sàndáá iní-yu sá Déhe-gá cúú Jèsús dàtná càchí mèe-gá. ¹¹ Te Yá Ndiöxí càchí tnúhu ndáá-gá sá cùndècu-o ndihi-gá ñi caa ñi quíhíⁿ. Te duha càháⁿ-gá chi sàndáá iní-ó Déhe-gá. ¹² Te nchaa ñáyíu na quèndáá iní ñáhá xii Déhe-gá cundecú-yu ndihi-gá ñi caa ñi quíhíⁿ. Te nchaa ñáyíu ñá túú sàndáá iní ñáhá xii Déhe-gá vá cùndècú-yu ndihi-gá.

Sáhu ndèé núu ñí ndihi-ná

¹³ Te cuèndá sá sàndáá iní-ndó Déhe Yá Ndiöxí núu xiáⁿ chidó tñuní-í tnúhu-a cuèndá cùtnuní iní-ndó sá cùndècu ndihi-o-gá ñi caa ñi quíhíⁿ.

¹⁴ Te ñá túú tnúhu yùhú càháⁿ ndihi-o Yá Ndiöxí, chi tedóho ñaha-gá xii-o núu ìⁿ-ná sá ná càcáⁿ-ó núú-gá dàtná cuìní mèe-gá. ¹⁵ Te cùtnuní iní-ó sã táxi-gá sá xicáⁿ-ó núú-gá, chi nàha-o sá tedóho ñaha-gá xii-o núu na càcáⁿ-ó nàcuáa cùu iní-gá.

16 Te núu xìní-ó ñăyiu ndècu ichi Yá Ndiǒxí te quidé-yu sá ñà túú vâha núú-gă, te ndèhe-o sá ñà túú ní xíta nihnu duúⁿ-yu, te cáháⁿ ndihi-o Yă Ndiǒxí cuendá-yu, te dàcácu nihnu ñaha-gă xií-yu te núu na núcúnu ichi váha-yu. Chi íó ñăyiu xidó quidé năndi sá ñà túú vâha te xíta nihnu duúⁿ-yu, te vá cáháⁿ ndihi-gá-ó Yă Ndiǒxí cuendá-yu. 17 Te nchaa sá cuèhé sá dúhá cùu-xi yícá cuěchi, dico ñá ncháá-xí cùu-xi sá dácuíta nihnu ñaha dùuⁿ.

18 Te nàha-o sá nchóó ñăyiu cùu déhe Yá Ndiǒxí ñá túú-gă sání ìní-ó càda-o năndi sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñaha-gá xii-o, núu xiăⁿ ñá ndácú-gă yucu ñăvâha dàxínu ìní ñáhá-xí xii-o cada-o sá ñà túú vâha.

19 Te nchoo nàha-o sá ndécú ndihi-o Yá Ndiǒxí. Te nchaa ñăyiu ndècu ichi cuèhé ichi duha tàxi tnuní ñáhá-ñă yucu ñăvâha xií-yu.

20 Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xìní tnùní-ó cuendá cutnùní ìní-ó să mée-gă cúú-gă Ndiǒxí-ó. Te ndècu ndihi-o mee-gá ndihi Déhe-gá Jèsús, te ìⁿdì díí-ni mee-gă cúú-gă Yă Ndiǒxí, te ndècu dava-gá sá nácuàca ñaha-gá xii-o cùndecu-o ndihi-gá ni caa ni quíhíⁿ. 21 Te nchòhó ñăyiu cùu datná déhe-í, vá quíndáá ìní-ndó nchàa sá càchí-yu cùu ndióxí, chi dicó ndaha cue téé ñuyíú-a ní cuáha nchaa xiăⁿ.

Te ducaⁿ na cùnduu. Te ío chí cádá ndèe ìní-ñă vitna.

TUTÚ CÚÚ ÛÚ NÍ CADÚHA TÉ JUÁÁ

Tnúhu Yá Ndiöxí ndihi nàcuáa cuu iní tnàhá-ó

¹ Te yúhú té Juáá té yìndaha ñaha xii ñáyiú sàndáá iní tnúhu Jèsús, tè-e í tnúhu-a ìⁿ núú tütú daquixi-í ndaha yòhó ñaha ní cáháⁿ ñáhá Yá Ndiöxí, te nchaa tnúhu-a cùu-xi tnahá cuendá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhà-ndí xii-ndo. ² Te cùu iní ñáhà-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te ducaⁿ-ní cùndecu-o ndihi tnúhu-áⁿ ni caa ni quíhíⁿ. ³ Te xìcáⁿ táhù-í núú Tátá-ó Dütú Ndiöxí, ndihi núú Dèhe-gá Xítohó Jesucrìstú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xìcáⁿ táhù-í núú-gá chi ndècu ndihi-o tnúhu ndáá tnúhu Yá Ndiöxí, te cùu iní-ó-gá.

⁴ Te ío cùdíí iní-í, chi ní naníhí-í ìⁿ ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiöxí. ⁵ Te vitna yòhó ñaha ní cáháⁿ ñáhá Yá Ndiöxí, cächí tnúhu-í xii-n sá xíní ñúhu-xi cuu iní-ó tnàha ñáyiú-o. Te ñá díú ìⁿ tnúhu saa cùu-xi, chi díu-ni tnúhu sá ñí ngúndecu ndihi-o ndèe cùtnàhá ní tuha-o ichi Yá Ndiöxí. ⁶ Te núu

cùu iní-ó Yá Ndiöxí, te cùu iní-ó tnàha ñáyiú-o dàtná ní cachí méé-gá, te tñi-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cùtnàhá ní tuha-o ichi-gá.

Cue té dándahú tnàha ñáyiú-xi

⁷ Te ío vài ñáyiú dándahú ñáhá xica cuú-yu ñuyíú-a, te cächí-yu sá ñă ndàá sá Xítohó Jesucrìstú ní cuu-gá ìⁿ ñáyiú ndisa. Te nchaa ñáyiú duha càháⁿ dácuàndehndé-yu, te cùu úhú iní-yu Jèsús. ⁸ Te quíhi iní-ndó sá vâ dándahú ñáhá ñáyiú-áⁿ xii-ndo cuendá sá vâ cuíta chiúⁿ Yá Ndiöxí ní quide-o. Te òré ná quíxí tucu Jèsús ñuyíú-a te taxi-gá nchaa sá vâha cùu iní méé-gá cundecu ndihi-o.

⁹ Te nchaa ñáyiú dàña tnúhu Xítohó Jesucrìstú, te nàtníí-yu ingá ichi, ñáyiú-áⁿ ñà túú ndècu ndihí-yu Yá Ndiöxí. Te nchaa ñáyiú ñà túú dàña tnúhu Xítohó Jesucrìstú ndècu ndihí-yu Yá Ndiöxí ndihi Déhe-gá Xítohó Jesucrìstú. ¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiöxí te ñá ndàá, te vâ cuàha-ndo tnúhu danèhé ñáhà-yu xii-ndo, te ní vâ cuàha-ndó-yu tnúhu ndee iní cuendá chiúⁿ quidé-yu. ¹¹ Chi núu na càháⁿ ndihi váha-ndó-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

Tnúhu ndéé núú ñí ndihi-ná

¹² Te ío vâi-gá tnúhu cuìní-í cachí tnúhu-í xii-ndo, dico vá téé-gă-í chi cuìní-í quixi-í núú ndécú-ndó ndàtnúhu-o cuèndá cudíí víhí ìní-ó nchàa-o.

¹³ Te nchaa cue déhe cùhú-n, ñáyiú ní cáháⁿ ñáhá Yă Ndiöxí quidé ndèe iní ñáhă-yu xii-n.

TUTÚ CÚÚ ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

1 Te yúhú té Juáá téé yíndaha ñaha xii ñáiyu sàndáá iní tnúhu Jèsús, chìdo tnuní-í tnúhu-a ìⁿ núú tùtú sá cúú-xí yòhó té Gǎyú téé ío cùu iní-í, chi ndècu ndihí-n tnúhu ndáá tnúhu Yá Ndiòxí.

2 Te yòhó téé ío cùu iní-í, xícáⁿ táhù-í núú Yá Ndiòxí sá cùndècu váha-n ñá túú nǎ cumání xii-n, te vá cùhú-n, chi sa nàha-í sá ndécú váha-n núú Yá Ndiòxí. 3 Te ío ní cudíí iní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ñu-ni tnúhu-gá te tñi-n nchaa nacuaá càháⁿ tnúhu-áⁿ. 4 Te ío cùdíí iní-í ní níhí-í tnúhu sá nchaa-ní ñáiyu ní sanu ichi-í ichi Yá Ndiòxí ndécú-ní-yu ichi-gá, te quíde-ní-yu nchaa nàcuáa càháⁿ-gá.

5 Te yòhó téé ío cùu iní-í, ío váha quíde-n núú Yá Ndiòxí, chi chindee-n nchaa ñáiyu véxi dava-gá ñuú xícá, ñáiyu sàndáá iní tnúhu Yá Ndiòxí. 6 Te nchaa ñáiyu-áⁿ càháⁿ-yu núú tàcá ñáiyu càháⁿ ndihí Yá Ndiòxí iha sá ío cùu iní-n nchaa tnaha ñáiyu-n dàtná càháⁿ Yá Ndiòxí. Te yúhú càháⁿ ndàhú-í núú-n sá cáda ndè-ni iní-n chindee-n nchaa ñáiyu-áⁿ nchaa sá xíní ñuhú-yu ichi. Te núu ducaⁿ na càda-n te quíde-n nacuaá cùu iní Yá Ndiòxí, te xínu

cuechi-n tnahá-n núú-gǎ. 7 Chi nchaa ñáiyu-áⁿ ní tñi-yu ichi cuáháⁿ-yu càháⁿ-yu tnúhu Jèsús. Te ñá túú tñi-yu ní ìⁿ sá sǎnaha ñáiyu ñá túú ndècu ichi Yá Ndiòxí. 8 Te núu xǎⁿ nchoo xini ñuhu-xi chindee-o nchaa ñáiyu xínu cuechi núú-gǎ ñáiyu càháⁿ tnúhu-gá, te ducaⁿ te cutnùni iní-ó sǎ tnahá-ó xínu cuechi-o ndihí-yu núú-gǎ.

Ñá túú quíde váha té Diótrefés

9 Te yúhú ní tendaha-í tutú cuáháⁿ núú tàcá ñáiyu chihuhú-yu Yá Ndiòxí, dico ìⁿ téé ndècu-áⁿ nání-dé Diótrefés, te ñá sàndáá iní-dé nchaa tnúhu càháⁿ-í, chi cuini-dé cunuu-dé núú-yu. 10 Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñá diú-ní xǎⁿ quíde-dé, chi nchaa ñáiyu véxi ingá ñuú càháⁿ tnúhu Yá Ndiòxí ñá túú càháⁿ ñáhá-dé vehe-dé, te ní ñá dáñá-dé càháⁿ ndihí ñaha dàva-gá ñáiyu xii-yu. Te nchaa ñáiyu cuini càháⁿ ndihí ñaha xii-yu, te quèñuhu ñaha duuⁿ-ni-dé ñá dáñá-gǎ-dé níhí tnáhá-yu ndihí nchaa ñáiyu tàcá dácuàha tnúhu Yá Ndiòxí.

11 Te yòhó téé ío cùu iní-í, vá cùndècu-n ichi cuehé ichi duha dàtná quíde nchaa dava-gá ñáiyu, cada-n mée-ni sá váha. Chi nchaa ñáiyu quíde váha ndécú-yu ichi Yá Ndiòxí. Te nchaa ñáiyu quíde nchaa sá cuèhé sá dúhá ñá túú ndécú-yu ichi Yá Ndiòxí.

*Nchaa ñáyiú càháⁿ váha-yu
cuèndá té Demètriú*

¹² Te nchaa ñáyiú càháⁿ
váha-yu cuèndá té Demètriú,
chi quide ndáá-dé dàtná
càháⁿ Yă Ndiǒxí. Te tnàhá
yúhú càháⁿ-í cuèndá-dé sá
ío váha quide-dé, te nchòhó
sa nàha-ndo sá yúhú càháⁿ
ndáá-í.

Tnúhu ndéé núú nǐ ndìhì-ná

¹³ Te vâi-gá tnúhu cuìní-í
cachí tnúhu-í xii-n ni cùu, dico
ñá ní tèe-gá-í, ¹⁴ chi cuìní-í
quixi ndìhì-í, te cáháⁿ-ó núú
núú-ó.

¹⁵ Te ío cada ndee ìní, te
xìcáⁿ táhù-í núú Yă Ndiǒxí
sá ná cùndecu váha-n ñà
túú nă cuu cundecu-n. Te
nchaa cue ñáyiú xìní tnàhá
ndìhì-o ndecu iha quide ndee
ìní ñáhă-yu xii-n. Te yòhó
cúñaha-n nchàa ñáyiú xìní
tnàhá ndìhì-í ndécú xǎⁿ ná
càda ndee ìní-yu. Te ío cada
ndee ìní-nă vitna.

TUTÚ NÍ CADÚHA TÉ JUDÁS

*Té Jùdás càdùha-dé tutú
quíhíⁿ ndaha ñáyiú ní cachí Yá
Ndiòxí nduu cuendá-gá*

1 Yúhú té Jùdás ñaní té Jàcobó xínú cuèchi-í nùú Xítóhó Jesucristú, te càdúha-í tutú-a sá cúú-xí nchòhó ñáyiú ní cachí Yá Ndiòxí Yaá cúú Tàtá-ó ndùu cuendá-gá, ñáyiú ío cùu iní-gá. Te dàtná-ni xító ñaha-gá xii-ndo vitna ñu-ni ducaⁿ còto ñaha-gá xii-ndo ndèé ná sàá nduu quíxi tucu Xítóhó Jesucristú ñuyíú-a. ² Te xicáⁿ táhù-í nùú Yá Ndiòxí sá ío-gá ná chindee chitúu ñaha-gá xii-ndo, te na cùtnuní-gá iní-ndó sã ío cùu iní ñáhá-gã xii-ndo, te ducaⁿ ío váha cuu iní-ndó cùndecu-ndo.

*Ñáyiú ñá túú càháⁿ tnúhu
ndáá tnúhu Yá Ndiòxí
(2 Pedro 2:1-17)*

³ Te nchòhó ñáyiú ío cùu iní-í, ducaⁿ-ni ío sàni iní-í cadúha-í ñⁿ tutú sá cúú-xí-ndó cuendá danèhé ñáhá-í xii-ndo nàcuáa ní cuu ní naníhí táhù-ó dco ñá túú càdúha-í, dco vitna quide cuendá-í sá xíní ñùhu-gá-xi càháⁿ-í nùú tütú-í sá nchòhó ío cundehe-ndo tnúhu càháⁿ-ndó ndíhi ñáyiú, te càháⁿ-ndó nàcuáa ndùu tnúhu sàndáá iní mée-ndó, chi ñu-ni tnúhu-áⁿ ñí càháⁿ Yá Ndiòxí sá cúú-xí nchàa ñáyiú ndècu ichi-gá. Te vitna ñá túú-gã ná tnúhu càháⁿ-gá sá cúú-xí-yu, chi sa ní càháⁿ

duuⁿ-gá. ⁴ Te duha càháⁿ-í nùú tütú-a sá cúú-xí-ndó, chi ñíhí-í tnúhu sá xicá cùu ñáyiú chitnahá ñáhá xii-ndo, te ni ñà túú xíní-ndó ñá ñáyiú cùú-yu, te ñáyiú-áⁿ cúú-yu ñáyiú cùu úhú iní ñáhá xii Yá Ndiòxí. Te ñⁿ xichi nùú tütú Yá Ndiòxí càchí-xi sá ñáyiú-áⁿ quíhíⁿ-yu nùú ùhú nùú ndàhú, te ñu-ni ñáyiú-áⁿ càchí-yu sá ío váha iní Yá Ndiòxí nùu xiáⁿ cuu-ni cadá-yu nchaa sá cuèhé sá dúhá. Te dàquee tíhù-yu Yá Ndiòxí Yaá ío cùnuu, ndíhi Xítóhó Jesucristú.

⁵ Te nchòhó sa xíní váha-ndo nàcuáa ní quide Yá Ndiòxí ndèé sanaha dco dándacu iní ñáhá-í xii-ndo, chi dàvá-áⁿ ñí queñuhu-gá ñáyiú isràèl nàcióⁿ Ègíptú, te dava ñáyiú-áⁿ ñà túú ní sàndáá iní ñáhá-yu xii-gá te ní dánáá ñaha-gá xií-yu. ⁶ Te nchaa espíritú ñá túú ní cùní cada ndáá cunu cuechi nùú Yá Ndiòxí ní quee-xi nùú ndécú-xí, te mee-gã ní sadí nihnu ñaha-gã xii-xi ñⁿ xichi nùú née te vá cãcu-xi, chi sáá nduu te nayáha-xi cundecu-xi nùú ùhú nùú ndàhú ñí caa ñí quíhíⁿ. ⁷ Te dándacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndíhi ñáyiú ñuú Gòmorrá, ndíhi nchaa ñáyiú ñuú ní cáa yatni xiáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhi tnàha ndí mee-güedé, te ñu-ni ducaⁿ ñí xóo cada cue ñáyiú ñíhí tucu. Te sá dúcáⁿ ñí quidé-yu nùu ní dányóyó Yá Ndiòxí ñuhú

ñuú-yu ní dánáá ñàha-gá xii-yu. Te xiáⁿ cútnùní iní-ó sã nchàa ñáyiu ñã túú cuìní cada váha núú-gã quíhíⁿ-yu núú ùhú núú ndàhú ni caa ni quíhíⁿ.

8 Te diu-ni ducaⁿ quide ñáyiu chìtnahá ñáhá xii-ndo cuìní-yu dandàhú ñáhã-yu, chi càchí-yu sã dácòto ñaha saní-yu nàcuáa cadá-yu, núu xiáⁿ nándi nchaa sã cuèhé sã dúhá quidé-yu sã cúú-xí yiqui cuñú-yu, te dàquee tíhũ-yu nchaa nàcuáa càháⁿ Yã Ndiöxí cada-o, te càháⁿ úhú-yu cuendá nchaa espíritú cùnùu.

9 Te mee espíritú cùnùu-gá xínú cuèchi núú Yã Ndiöxí nání Miguél ní nàá-xi ndihí sácuihná cuendá yiqui cùñú ndíi Moisés. Te espíritú-án ñã túú ní cùyi-xi càháⁿ úhú-xi sácuihná-ãⁿ, chi ní xáhaⁿ-ni-xi: “Mee Yã Ndiöxí nánhá-gã te núu nása cada ñaha-gã xii-n”, duha ní xáhaⁿ-xi. 10 Te nchaa ñáyiu ducaⁿ dandahú ñáhá xii-ndo-án càháⁿ cuèhé-yu cuendá nchaa sã vátá cútnùní-gá iní-yu nása ndùu, te quidé-yu dàtná quidé cuè quiti chi cue quiti-án quidé-güedi nání véxi iní-güedi, te ni ñã túú cùtnuní iní-güedi nchaa sã quidé-güedi. Te ducaⁿ sã tnahá-xi cùú-yu, chi nchaa sã cuèhé sã dúhá véxi iní-yu quidé-yu, te sã dúcáⁿ quidé-yu xiáⁿ tá xíta nihnú-yu cuáháⁿ.

11 Te ndàhú ní cuú-yu chi ío ndohó-yu!, chi quidé-yu dàtná ní quide ndíi Cãín. Te nándi sã quidé-yu cuendá sã cuìní-yu díhúⁿ dàtná ní xóo

cada ndíi Bàlaám. Te ío cùu sáá iní-yu núú Yã Ndiöxí dàtná ní xóo cada ndíi Còrè, núu xiáⁿ tá xíta nihnú-yu cuáháⁿ. 12 Te dicó sácáⁿ-núú sãha ñáhá-yu xii-ndo òrè nátacá-ndó quide-ndo vico chiñuhu-ndo Yã Ndiöxí. Te òrè xéxi ndihí ñahá-yu xii-ndo te mee-ni sã cúú-xí mèe-yu quide cuendá-yu, te ñã túú nèhé-yu sã yíñuhu núú Yã Ndiöxí. Te cùú-yu dàtná ñⁿ vícò sã cuáháⁿ-xi duha cuáháⁿ-xi dàcáⁿ te ñã túú dàú nchídó-xí, ducaⁿ sã tnahá-xi cùú-yu. Te cùu tucú-yu dàtná ñⁿ yutnu vídí sã ñã túú tnahí cùuⁿ sávídí-xi, te nchaa yutnu ducaⁿ ñã túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sãtnahá-xi cùú-yu, chi ñã túú quide váha-yu. 13 Te cùu tucú-yu dàtná ndute lámár, chi ndute-án òrè càndá-xi te quecòo tíñú-xi ñⁿ xio. Te cùu tucú-yu dàtná ñⁿ chódíní cuáháⁿ-di duha cuáháⁿ-di dàcáⁿ. Te ducaⁿ sãtnahá-xi cùú-yu, chi ñã túú cuìní-yu cada váha-yu. Te ñáyiu-án daquihíⁿ ñáhá Yã Ndiöxí xii-yu ñⁿ xichi núú nées núú sã ndecu túha cundecú-yu ni caa ni quíhíⁿ.

14 Te ndíquín yává ndíi Ádán tée cùu usá ní xínani Ènóc ní dàcáhú iní ñáhá Yã Ndiöxí xii-dé ní càháⁿ-dé diu-ni cuendá nchaa ñáyiu-án. Te ní cachí-dé: “Na càchí tñuhu-í xii-ndo sã Yã Ndiöxí quixi-gá ndihí cuèhé víhí espíritú xínú cuèchi núú-gã. 15 Te dàvá-án cada ndáá-gá cuèchi nchaa ñáyiu te daquihíⁿ-gá

nchaa ñáyiú ndècu ichi cuehé ichi duha núú ùhú núú ndàhú, te ducaⁿ càda ñaha-gá xii-yu, chi mee-ni sã cuèhé sã dúhá quidè-yu, te càháⁿ ùhú ñáhã-yu xii-gá”, duha ní cachí te Ènóc. ¹⁶ Te ñáyiú-áⁿ ïo yica ìní-yu chi ñã túú ndùu vétú ìní-yu nàcuáa ndècú-yu ñuyiú-a, te sàtnuhú-yu tnàha ñáyiú-yu te mee-ni sã cuèhé sã dúhá sàni ìní-yu quidè-yu, te quide cahnú-yu mèe-yu, te mee-ni càháⁿ váha-yu núú tnàha ñáyiú-yu cuendá cuìní-yu sã cáda váha ñaha ñáyiú-áⁿ xii-yu.

Té Judás càháⁿ-dé dóho ñáyiú ndècu ichi Yá Ndiöxí

¹⁷ Te nchòhó ñáyiú ïo cùu ìní-í, càháⁿ ndàhú-í núú-ndó sã ïo cuhuⁿ ìní-ndó tnùhu sã sã ní dánèhé ñáhã cuè téé ní tendaha Xítohó Jesucristú càháⁿ tnùhu-gá núú ñáyiú. ¹⁸ Te sa nàha-ndo sã ní cachí-güedé sã cùmání-gã quixi tucu Xítohó Jesucristú ñuyiú-a, te coo ñáyiú cáháⁿ cuèhé cáháⁿ duha cuendá tnùhu-gá. Te ñáyiú-áⁿ cadá-yu mee-ni sã cuèhé sã dúhá vëxi ìní mèe-yu. ¹⁹ Te ñáyiú-áⁿ cúu-yu ñáyiú càháⁿ nándi tnùhu sã ñã túú nàndíhi cuendá sã vã cúú ìⁿnuu-ndo cundecu-ndo, te mee-ni sã cuèhé sã dúhá ñùhu ìní-yu, te ñã túú ndècu ndihí-yu Espíritú Yá Ndiöxí.

²⁰ Te nchòhó ñáyiú ïo cùu ìní-í, ïo dacuàha-ndo tnùhu Yá Ndiöxí sã ní sándáá ìní-ndó cuendá ducaⁿ cuita cuehnu nihnu-ndo ichi-gá quíhíⁿ, te cáháⁿ ndihí-ndo Yá Ndiöxí nàcuáa dàcahu

ìní ñáhã Espíritú-gá xii-ndo. ²¹ Te ïo coto-ndo mèe-ndo cundecu-ndo cuendá cuu váha ìní ñáhã Yá Ndiöxí xii-ndo, te cundetu-ndo sáá nduu quixi Xítohó Jesucristú ñuyiú-a nacuaca ñaha-gã xii-ndo cundecu-ndo ndihí-gá ní caa ní quíhíⁿ, chi Yaá-áⁿ ïo cundahú ìní ñáhã-gã xii-o.

²² Te ñáyiú sàni ìⁿ sani úú ìní-xi cúñaha-ndo xii-yu nàcuáa cadá-yu cundecú-yu ichi Yá Ndiöxí. ²³ Te nchaa ñáyiú ta xíta nihnu ñùhu ichi cuáhãⁿ núú ùhú núú ndàhú, ïo cundihí ìní-ndó cúñaha-ndo xii-yu tnùhu Yá Ndiöxí cuendá sã ná cãcu nihnú-yu, te cundàhú ìní-ndó-yu, te quíhi ìní-ndó vã cáda-ndó tnàhá-ndó nàcuáa quidè-yu, chi daquèe tíhú-ndó nchaa sã cuèhé sã dúhá quidè-yu-áⁿ.

Nàcuáa ndacáⁿ táhú-ó núú Yá Ndiöxí

²⁴ Te Yá Ndiöxí chindee ñaha-gã xii-ndo cuendá sã vã cundecu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gã xii-ndo quíhíⁿ cundecu-ndo núú ïo váha càa ndecu-gá, te ïo cudíi ìní-ndó. ²⁵ Te Yá Ndiöxí ïo ndècu ndihí-gá nchaa sã xini tnùní-gá te diu-gá ní dácãcu nihnu ñaha-gã xii-o núú ùhú núú ndàhú, te ducaⁿ ní quide ñaha-gã xii-o chi ndècu ndihí-o Xítohó Jesucristú. Te ïo ndacáⁿ táhú-ó núú Yá Ndiöxí, chi ïo càhnu cuu-gã ndécú-gã táxi tnùní-gá, te súúni váha ìní-gá, te ndàcu-gá quidè-gã nchaa sã váha, te ducaⁿ-ni ïo càhnu cuu-gã ndéé

cútnàhá vátá ngăva-gá ñuyíú,
 te ducaⁿ-ni ïo cànnu cuu-gá
 ndéé vitna, te diu-ni ducaⁿ ïo
 cànnu cuu-gá ni caa ni quíhíⁿ,
 duha xìni ñuhu-xi ndacáⁿ
 táhú-ó nǔú-gă. Te ducaⁿ na
 cùnduu. Te ío chí cádá ndèe
 iní-nă vitna.

NCHAA SÁ NĪ XINÍ TÉ JUÁÁ NDĪHI NCHAA SÁ NĪ TECÚ DÓHO-DE

Xítohó Jesucristú xáhaⁿ-gǎ xii té Juáá nchaa nàcuáa cada-xi ñuyú

¹ Te Yá Ndiǒxí ní xáhaⁿ-gǎ xii Xítohó Jesucristú nchaa sá tá cùyatni vii-nǎ cada-xi ñuyú-a cuèndá sá cǔñaha-gǎ xii cue tée xínu cuechi núú-gǎ, te Xítohó Jesucristú ní tendaha-gǎ ñⁿ espíritú xínú cuèchi núú-gǎ ní quixi-xi ní cachí tnúhu-xi nchaa tnúhu-áⁿ xii yúhú té Juáá té xínu cuechi núú-gǎ, te nchaa tnúhu-áⁿ ndèé núú tütú-a. ² Te yúhú cǎchí tnúhu ndáá-í xii-ndo nàcuáa ní cǎháⁿ Yá Ndiǒxí, te cǎháⁿ ndáá tucu-í cuèndá Xítohó Jesucristú, ndihí cuèndá nchaa sá nĪ xiní-í.

³ Te váha táhú ñáyiú dàcuaha nchaa tnúhu ndèé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tnĪ nacuáa cǎháⁿ-xi, chí sa ta cùyatni vii-nǎ nduu cǎda-xi nchaa nacuáa cǎháⁿ-xi.

Té Juáá cǎdũha-dé tutú quíhíⁿ ndaha ndi ùsá xichi cue ñáyiú ndècu ichi Yá Ndiǒxí

⁴ Te yúhú té Juáá cǎdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiǒxí ndécú dīstritú Ásiá. Te mee-gǎ ná chĭndee chitúu ñaha-gǎ

xii-ndo, te ío váha cuu iní-ndó cūndecu-ndo. Te cuèi ndéé sanaha ñiu-ni-gǎ ndécú, te ñiu-ni-gǎ ndécú cuèi vitna, te ducaⁿ-ni cūndecu-gǎ cuèi ndéé núú cuáháⁿ núú vèxi, te ñiu-ni ducaⁿ ío na chĭndee chitúu ñaha ndĪ usá cue espíritú ndécú núú-gǎ xii-ndo, te ío váha cuu iní-ndó cūndecu-ndo. ⁵ Te ñiu-ni ducaⁿ na cǎda tucu Xítohó Jesucristú, te ñiu-gǎ cúu-gǎ Yá cǎháⁿ ndáá, te ñiu-ni-gǎ ní xíhí-gǎ te dĭhna-gǎ ní ndoto, te dàtnùní ndéé cuèé-gǎ te ndoto cue ñáyiú ní xíhí, te ñiu-ni-gǎ táxí tnùní-gǎ nchaa cue tée yĭndaha ñaha xii ñáyiú ndècu ñuyú-a. Te ío cūu iní ñáhá-gǎ xii-o, te mee-gǎ ní sati ñíñi-gǎ te ní xíhí-gǎ núú cūrúxí sǎ cuèndá nchaa sǎ cuèhé sǎ dúhá quide-o, te ní ndada ndoo ní ndada nine-gǎ iní-ó, ⁶ te vitna ní quide ñaha-gǎ xii-o dàtná cue tée yĭndaha ñáyiú, te ní quide ñaha tūcu-gǎ xii-o dàtná cue dūtú xínu cuèchi-o núú Tátá-gǎ Dūtú Ndiǒxí. Te vitna nchaa-o chí ná cǎchí-ó sǎ ío cǎhnu cuu Xítohó Jesucristú, te ío cūnuu-gǎ, te ducaⁿ-ni na cūnuu-gǎ ni caa ni quíhíⁿ. Te ducaⁿ na cūnduu.

⁷ ¡Te cundehe-ndo àndiu! Chi ichi xití vícú quixi Xítohó Jesucristú, te nchaa ñáyiú ndècu ñuyú-a quini ñáhǎ-yu xii-gǎ, te tnàhá nchaa ñáyiú ñⁿ-ni cūu ndihí ñáyiú ní dánicuèhé ñáhá xii-gǎ quini ñáhǎ-yu, te nchaa ñáyiú xĭndecu ñihí ñuyú, ñáyiú ñá túú cūu váha iní ñáhá xii-gǎ ndihú iní-yu òré quini

ñáhă-yu xii-gá, te ndáá sá dúcáⁿ càda-xi.

8 Te Yá Ndiöxí cächí-gá: “Yúhú ío cùnū-í chi ðiu-í sa ndècu ndéé cútñáhá ní ngáva ñuyíú, te ðiu-ni-í cundecu ndéé ná sáá nduu nàa-xi ndihì nchaa sá ío, chi yúhú cundecu-í ni caa ni quíhíⁿ”, duha cächí Yá Ndiöxí Yaá ndácú quide nchaandi túhú sá vâha. Chi ðiu-ni-gá sa ndècu ndéé cútñáhá ní ngáva ñuyíú, te ðiu-ni-gá ndécú-gă vitna, te ducaⁿ-ni cundecu-gá ni caa ni quíhíⁿ.

Té Juàá ní xini-dé Xítohó Jesucristú Yaá ío cùnū

9 Te yúhú té Juàá té ndècu ndihì-ndo ichi Xítohó Jesucristú, tñáhá-í ndóhò-í cuendá-gá dàtná ndóhó-ndó, te tñáhá-í nduu táhú-í cundecu ndihì ñaha-í xii-ndo núú ndécú Yá Ndiöxí táxi tñùní-gá. Te ío quide cahnu iní-ó cuèi nándi yáha-o ndècu-o sá cuendá Xítohó Jesucristú. Te yúhú ní ngava-í vecaá ìⁿ ñuú nání Pătmós, te ñuú-áⁿ cáá xití ndute lámár. Te ducaⁿ ní cuu cuendá sá càháⁿ-í tñúhu Yá Ndiöxí, te càháⁿ váha-í cuendá Xítohó Jesucristú. 10 Te ìⁿ nduu ndumìngú nduu nàtacá-ó chìñuhu-o Yá Ndiöxí ní quide ñaha Espiritú-gá xii-í nàcuáa cächí iní-xi, te ní tecú dóhò-í níhi ní càháⁿ ìⁿ sá ní càháⁿ ndàa sàtà-í te dàtná níhi càháⁿ ìⁿ cútú ducaⁿ níhi ní càháⁿ-xi. 11 Te cächí sá càháⁿ-áⁿ:

—Yúhú sa ndècu-í ndéé cútñáhá ní ngáva ñuyíú, te ðiu-ni-í cundecu-í ndéé ná sáá nduu nàa-xi ndihì nchaa sá ío, te chido tñùní-n ìⁿ núú

tútú sá ná dānehé núú ñáhà-í xii-n, te daquihíⁿ-n tútú-áⁿ ndi úsá xichi núú xĩndecu cue ñáyiu ndècu ichi Yá Ndiöxí xĩndecu distritú Àsiá, ndaha ñáyiu ñuú Èfesú, ndaha ñáyiu ñuú Èsmirná, ndaha ñáyiu ñuú Përgamú, ndaha ñáyiu ñuú Tiàtirá, ndaha ñáyiu ñuú Sărdís, ndaha ñáyiu ñuú Filàdelfiá, ndaha ñáyiu ñuú Laodiceá, nchaa ñáyiu ñuú-áⁿ daquihíⁿ-n tútú-áⁿ ndahá-yu —cächí sá càháⁿ-áⁿ.

12 Te ní nchócuĩhnu-í ndéhè-í núu ná cúú sá càháⁿ-áⁿ, te ní xini-í xĩnutnii úsá tñáhá sá ní cuáha mee-ni ðihúⁿ cuàáⁿ sá ndéé dité-xi, te núú dité-xi-áⁿ yĩndòdo ìⁿ caa candíl. 13 Te cuádava tnuú nchaa xiáⁿ ní xini-í nùtnii Yaá cáá dàtná cáá nchàa nchoo ñáyiu ndècu ñuyíú-a, te ñihnu-gá ìⁿ dóó cání càa-xi ndéé núú sàhá-gá, te yidúcúⁿnuu ìⁿ sìnychú ní cuáha mee-ni ðihúⁿ cuàáⁿ pèchú-gá.

14 Te idi díquí-gă cuixíⁿ quiyí dàtná cuixíⁿ idi dava mbéé, àdi yúhá să quéé òré quidé vixiⁿ-xi, te tinūu-gá quidé-xí dàtná quidé-xí òré sáá itá ñuhú. 15 Te sáhá-gă súúní dàtásaⁿ-xi dàtná dàtásaⁿ sá nání bróncé òré càyú-xi ducaⁿ dàtásaⁿ-xi sáhá-gă, te dónaha tñúhu càháⁿ-gá quidé-xí dàtná quidé-xí dōndaha titní víhí yũte. 16 Te xio ndaha cùha-gá núndàha-gá úsá tñáhá chódíní, te mei yùhu-gá quéné ìⁿ yuchí cáhnú ndéé úú xio núú-xi, te núú-gă quidé-xí dàtná quidé-xí núú nchĩcanchii òré súúní ngòyo

cahni.

¹⁷ Te sá dúcáⁿ càa Yaá-áⁿ ní xini-í nõu xiáⁿ ní yùhú-í ní nduá-í núú-gá, te ní cuu-í dàtná ìⁿ tée ní xihí sá dúcáⁿ ìo ní yùhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cùtnàhá ní ngáva ñuyúú, te ñiu-ni yùhú cundecu-í ndéé ná sàá nduu nàa-xi ndihí nchaa sá ìo.
¹⁸ Te yùhú cùu-í Yaá ní xihí te ní ndoto-í, te vitna ndècu vívù-í, te ducaⁿ-ni cùndecu-í ni caa ni quíhíⁿ. Te yùhú cùnùu-í núú nchàa ñáyiu ní xihí te ñiu-ni-í cùnùu-í núú ndécù-yu. ¹⁹ Te chido tnùnín-n chàa sá ñi xini-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá càdá-xí ndéé núú cuàháⁿ núú véxi-gá. ²⁰ Te na cachí tnúhu-í xii-n nàcuáa quèe-xi ndi usá chódíní ñi xini-n yòtni-í xio ndaha cùha-í, ndihí nàcuáa quèe-xi ndi usá sá ñi cuáha mee-ni ñihúⁿ cuááⁿ, sá ndéé dité-xi te yìndodo ìⁿ caa candíl núú dité-xi-áⁿ. Te ndi usá chódíní-áⁿ, xiáⁿ cùu-xí sá cùtnùní iní-ó sá ndécú usá cue tée xinu cuechi núú Yá Ndiõxí, te ndi usá cue tée-áⁿ ndécú-güedé ndi usá xichi núú ndécú ñáyiu ndècu ichi Yá Ndiõxí. Te cuendá ndi usá sá ndéé dité-xi-áⁿ, xiáⁿ cùu-xí sá cùtnùní iní-ó sá ndécú usá xichi ñáyiu ndècu ichi Yá Ndiõxí —duha càchí Yaá càháⁿ-áⁿ.

2

Tnúhu sá cùu-xí ñáyiu

xñdecu ichi Yá Ndiõxí ndécú ñùú Éfesú

¹ Te ní cachí tucu Yaá càháⁿ-áⁿ xii-í sá chidó tnùnín-í nchaa tnúhu sá vitná càháⁿ-gá ìⁿ núú tütú, te tendaha-í quíhíⁿ ndaha tée xinu cuechi núú Yá Ndiõxí ndécú ñùú Éfesú sá cùu-xí cuè ñáyiu xñdecu ichi-gá ndécú ñùú-áⁿ, te duha ní cachí-gá: “Yùhú cùu-í Yaá nùndàha usá chódíní xio ndaha cùha-í, te xica cuu-í núú ndécú ndi usá sá ñi cuáha mee-ni ñihúⁿ cuááⁿ, sá ndéé dité-xi te yìndodo ìⁿ caa candíl núú dité-xi.
² Te yùhú xini-í nchaa nàcuáa quide nchohó ñáyiu xñdecu ichi Yá Ndiõxí ndécú ñùú Éfesú, te xini-í sá ìo ndècu ndee-ndo quide chiuⁿ-ndo cuendá-gá, te ìo quide cahnu iní-ndó ndècu-ndo quide-ndo chiuⁿ-gá. Te xini-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xini tucu-í sá xitó ndéé-ndó cuè tée càchí sá ñi tendaha-í véxi càháⁿ tnúhu-í te ñà ndáá sá càháⁿ-güedé tnúhu-í, te ducaⁿ te cùtnuní iní-ndó sá ñà ndáá sá càháⁿ-güedé tnúhu-í.
³ Te xini tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quide cahnu iní-ndó cuèi nándi yàha-ndo, te ñà túú cùu dusaⁿ-ndo quide-ndo chiuⁿ-áⁿ.
⁴ Dico ñà túú cùu váha iní-í chi nchòhó ñà túú-gá quidé-ndó dàtná ní xóo cada-ndo cùtnàhá vitna cùu vii-ni ní sándáá iní ñáhá-ndó xii-í, chi vitna ñà túú-gá cùu ñi ñáhá vihi-ndo datná ní xóo cada-ndo dàv-áⁿ.
⁵ Te chí dándàcu iní nàcuáa ní xóo cada-ndo cùtnàhá vitna cùu

saa ní sándáá iní ñáhá-ndó xii-í, te ndixi cuéchi iní-ndó sá ñà túú-gá quidé váha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndíhi-ndo ìⁿ sá ñí cuáha mee-ni díhúⁿ cuááⁿ, sá ndéé dité-xi te yíndodo ìⁿ caa candíl núú dité-xi. Te núú vá ndixi cuéchi iní-ndó nàcuáa quide-ndo ndecu-ndo ña, te quixi-í xocàni-í xiáⁿ, te ducaⁿ sàtnahá-xi cada ñaha-í xii-ndo te núú vá ndixi cuéchi iní-ndó nàcuáa quide-ndo ndecu-ndo, te ducaⁿ te vá yóo-gá nàtacá chiñuhu ñaha xii-í ñuú-ndó. ⁶ Dico quide váha-ndo ìⁿ xichi chi dàquee tíhú-ndó nchaa sá quidé cué ñáyiu cùu nicolaitás, te yúhú tnàhá-í dáquèe tíhú-í nchaa sá quidé ñáyiu-án. ⁷ Te nchòhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñáyiu ndècu ichi-gá xíndecu nchaa xichi. Te duha ndùu tnúhu xáhaⁿ-í xii Espíritú-gá xáhaⁿ-xi xii-yu: Cúñaha-n xii nchaa ñáyiu sá núu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núú ndécú Yá Ndióxi, duha xáhaⁿ-í xii Espíritú-gá cùu-xi ñáyiu”, duha càchí Yaa càháⁿ-án. Te nchaa tnúhu-án ñí chídó tnùní-í sá cùú-xí ñáyiu xíndecu ichi Yá Ndióxi ndécú ñuú Éfesú.

Tnúhu sá cùú-xí ñáyiu xíndecu ichi Yá Ndióxi ndécú ñuú Èsmirná

⁸ Te ní cachí tucu Yaa càháⁿ-án xii-í sá chídó tnùní-í nchaa tnúhu sá vitná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yá Ndióxi ndécú ñuú Èsmirná sá cùú-xí cué ñáyiu xíndecu ichi-gá ndécú ñuú-án, te duha càchí-gá: “Yúhú ndécú-í ndéé cútnàhá ní ngáva ñuyú, te diu-ni-í cundecu-í ndéé ná sàá nduu nàa-xi ndíhi nchaa sá ío, te diu-ni-í ní xíhí te ní ndoto-í ndécú-í vitna. ⁹ Te yúhú xini-í nchaa nàcuáa quide nchohó ñáyiu ndècu ichi Yá Ndióxi ndécú ñuú Èsmirná. Te xini-í sá ío ndòho-ndo ndecu-ndo sá cuendá-í, te xini tucu-í sá ío ndàhú-ndó dico cùu-ndo ñáyiu xíndecu váha núú Yá Ndióxi. Te xini tucu-í sá ío càháⁿ cuéhé ñáyiu isràél cuendá-ndó, dico ñá túú quidé-yu nàcuáa tàú-yu cada-yu sá cùú-yu ñáyiu isràél, chi cùú-yu ñáyiu xínu cuechi mee-ni núú sàcuíhna. ¹⁰ Dico nchòhó vá yúhú-ndó cuéi nándi cùu nchaa sá ná ndòho-ndo cuendá-í, chi sàcuíhna cada-xi te ngava dava-ndo vècaá, te ducaⁿ càda-xi chi cuíni-xi coto ndéé ñáhá-xí xii-ndo núu ndisa sá vá ná túhú iní-ndó sá nchicúⁿ nihnu-ndo ichi Yá Ndióxi. Te ndòho-ndo ùxí nduu dico vá dáña ndéé-ndó càncicúⁿ nihnu-ni-ndo ichi-gá cuéi na cùú-ndó sá cuendá-gá, te yúhú cada-í te nduu táhú-ndó cundecu-ndo ndíhi-gá ñí caa ñí quíhíⁿ. ¹¹ Te nchaa nchòhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñáyiu ndècu ichi-gá xíndecu nchaa xichi,

te duha ndùu tnúhu xǎhaⁿ-ĩ xii Espíritú-gá xǎhaⁿ-xi xii-yu: Cúñaha-n xii nchaa ñáyiú sá núu na cùndee iní-yu yáha-yu nándi sá ná yáha-yu sá cuendá-í te vá cuíta nihnú-yu na sáa nduu cuíta nihnu nchaa dava-gá ñáyiú, duha xǎhaⁿ-ĩ xii Espíritú-gá cúu-xi ñáyiú”, duha ní cachí Yaa càháⁿ-áⁿ. Te nchaa tnúhu-áⁿ ní chídó tnùn-í sá cúu-xi ñáyiú xĩndecu ichi Yá Ndiõxí ndécú ñùú Èsmirná.

Tnúhu sá cúu-xi ñáyiú xĩndecu ichi Yá Ndiõxí ndécú ñùú Pèrgamú

12 Te ní cachí tucu Yaa càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ìⁿ núú tütú, te tendaha-ĩ quíhⁱ ndaha tée xĩnu cuechi núú Yá Ndiõxí ndécú ñùú Pèrgamú sá cúu-xi cué ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Yaa néhé ìⁿ yuchí cání te ndèé úú xio núú-xi. 13 Te yúhú xìn-í nchaa nàcuáa quide nchohó cue ñáyiú xĩndecu ichi Yá Ndiõxí ndécú ñùú Pèrgamú, te xìní tucu-í sá ndécú-ndó núú ïo cùnuu yucu ñávaha, te ñá túú dañá ndeé-ndó nchícúⁿ nihnu-ndo ìchi-í, te ducaⁿ ïo sàndáá iní ñáhá-ní-ndó xii-í, te ñu-ni ducaⁿ ní quide-ndo cǔtnàhá ní sahani-güedé té Àntipás núú ndécú-ndó ñu-ni núú dúcáⁿ ïo cùnuu yucu ñávaha. Te ndí-áⁿ ní quide ndáá ndí ní xĩndecu ndí ichi-í chi ní cáháⁿ váha ndí cuendá-í. 14 Dico ñá túú cùu váha iní-í cuendá ìⁿ úú sá quidé-ndó, chi ndècu ndíhi-ndo ñáyiú nchícúⁿ

nihnu-ni nchaa nàcuáa ní cáháⁿ ndí Balaám. Chi ndí-áⁿ ñá túú ní quide váha ndí chi ní dácáhú iní ndí ingá téé ní xínani Balác nàcuáa cada-dé canu ichi-dé cue ñáyiú isràél ingá ichi sá ñá túú váha, chi ní xáhaⁿ tè Balác-áⁿ xii-yu sá caxí-yu nchaa sá ndúú tǎhú nchaa sá ní cadúha cue téé ñuyú-a ñanani ñáyiú ndiõxí te ñá ndáá sá ndiõxí cúu-xi, te ní dácáhú iní ñáhá-dé xii-yu sá cùndécú-yu ichi díⁱ iní. 15 Te ndècu ndíhi tucu-ndo ñáyiú nchícúⁿ nihnu sá dácuàha cue ñáyiú cùu nicolaitás. Te nchaa sá dácuàha ñáyiú-áⁿ dáquèe tǎhú-í, 16 te nchòhó chí dándixi cuéchi iní sá ñá túú quide váha-ndo ndècu-ndo, chi núu ñáhá te quixi-í nàá-í ndíhi cue ñáyiú-áⁿ ndíhi yuchí cání sǎ quéné yùhu-í. 17 Te nchaa nchòhó cada cuendá váha-ndo nàcuáa xǎhaⁿ-ĩ xii Espíritú Yá Ndiõxí xǎhaⁿ-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xǎhaⁿ-ĩ xii Espíritú-gá xǎhaⁿ-xi xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuendá-í, te yúhú cuáñaha-ĩ sá ndúú yùhu xii-yu caxí-yu ìⁿ sá vátá quíní-gá-yu caxí-yu. Te xǎⁿ cúu-xi mànáá sá ní xóo caxi cue ñáyiú ní xĩndecu ndéé sanaha, te cuáñaha tucu-í ìⁿ caa yúú cuixíⁿ xii-yu, te núú yúú-áⁿ cundeé ìⁿ ñu saa. Te ñu-áⁿ vǎ yóo tnàhí xìní chi ìⁿ ñu dí-í ní ñáyiú na quèheⁿ cuendá ñu-áⁿ quíní-yu, duha xǎhaⁿ-ĩ xii Espíritú-gá cúu-xi ñáyiú”, duha càchí Yaa

càháⁿ-áⁿ. Te nchaa tnúhu-áⁿ ní chídó tnùní-í sá cúú-xí ñáyiú xĩndecu ichi Yá Ndiõxí ndécú ñúú Përgamú.

Tnúhu sá cúú-xí cuè ñáyiú xĩndecu ichi Yá Ndiõxí ndécú ñúú Tiàtirá

18 Te ní cachí tucu Yaá càháⁿ-áⁿ xii-í sá chídó tnùní-í nchaa tnúhu sá vitná càháⁿ-gá ñⁿ núú tütú, te tendaha-í quíhíⁿ ndaha tēe xĩnu cuechi núú Yá Ndiõxí ndécú ñúú Tiàtirá sá cúú-xí cuè ñáyiú xĩndecu ichi-gá ndécú ñúú-áⁿ, te duha cächí-gá: “Yúhú cúú-í Déhe Yá Ndiõxí, te càa tinuu-í dàtná cáá itá ñuhú, te sáhà-í cáá dàtná cáá sã nání brõncé òré ñúhú-xí núú ñuhú càyú-xi. 19 Te yúhú xini-í nchaa nàcuáa quide nchóhó ñáyiú xĩndecu ichi Yá Ndiõxí ndécú ñúú Tiàtirá. Te xini tucu-í sá ïo cùu iní-ndó Yá Ndiõxí te sàndáá iní-ndó-gã. Te xini tucu-í nàcuáa ndùu chiuⁿ quide-ndo sá cúú-xí-gã. Te xini tucu-í sá ïo quide cahnu iní-ndó cuèi nándi cùu sá yáha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúxí cùtnàhá yitna cùu saa ní sàndáá iní-ndó Yá Ndiõxí. 20 Dico ñá túú cùu váha iní-í cuèndá ñⁿ sá quidé-ndó, chi ñá túú tnàhí ná sání iní-ndó ndècu ndihí-ni-ndo ñáyiú nchicúⁿ nihnu nchaa nàcuáa dānehé ñáhá ñaha nani Jezabél. Te ñaha-áⁿ cächí-aⁿ sá càháⁿ-aⁿ tnúhu Yá Ndiõxí dico ñá ndáá sá càháⁿ-aⁿ tnúhu-gá, te cuáháⁿ-aⁿ dāndahú-aⁿ nchaa ñáyiú xĩnu cuechi núú-í ndihí nchaa sá dānehé ñáhá-áⁿ cuèndá cundecú-yu ichi díí

iní, te caxí-yu nchaa sá ndúú tǎhú nchaa sá ñi cadúha cue tēe ñuyíú-a dānani ñáyiú ndiõxí te ñá ndáá sá ndiõxí cúú nchaa xiáⁿ. 21 Te ní cuu vǎi nduu ta dacaca-í ndécú-áⁿ cuèndá ndixi cuèchi iní-aⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ dañ-aⁿ ñi ñⁿ sá cuèhé sá dúhá quide-aⁿ. 22 Te vitna yúhú ïo dandòho-í-aⁿ chi tñi ñaha cuèhé xii-aⁿ, te diu-ni ducaⁿ ïo dandòho-í nchaa ñáyiú quide datná quidé-áⁿ te núu vá ndixí cuèchi iní-yu sá ñá túú quide váha-yu ndécú-yu, te dāñá-yu nchaa sá cuèhé sá dúhá quidé-yu. 23 Te nchaa ñáyiú cùndihí ñaha xii ñaha-áⁿ cahni-í-yu, te ducaⁿ te nchòhó ndihí dava-gá nchaa ñáyiú xĩndecu ichi Yá Ndiõxí ndécú nchaa xichi cutnuni iní-ndó ndihí-yu sá yúhú cúú-í Yaá xini ndáá nchaa nàcuáa sání iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sá quidé-ndó ñⁿ ñⁿ-ndo te ducaⁿ cùnduu sá táxi-í nduu tǎhú-ndó. 24 Te dava nchòhó ñáyiú ndècu ñúú Tiàtirá, ñáyiú ñá túú nchicúⁿ nihnu nàcuáa dānehé ñáhá ñaha nani Jezabél-áⁿ ñá túú xini-ndó ñá cúú sã cächí ñáyiú ndùu yuhu dacahu iní ñáhá yùcu ñávaha. Te nchòhó, ñá túú nǎgá cachí tnúhu-í xii-ndo càda-ndo 25 diu-ná sá ïo nducu ndèe-ndo cada-ndo nchaa nàcuáa càháⁿ tnúhu sá ndécú ndihí-ndo, te ducaⁿ-ni càda-ndo ndéé òré quixi tucu-í. 26 Te nchaa nchòhó ñáyiú na càda ndee iní yáha nándi sá ná yáha sá cuèndá-í,

te núu na càda-ni-ndo nchaa nacuáa cuini-í cada-ndo ndée nduu vã cùndecu-gá-ndó ñùyíú-a, te yúhú taxi-í tnúhu ndee iní xii-ndo sã táxí tnùn-í-ndó nchaa ñáyíu ñuyíú²⁷ dàtná ní quide mee Tãtà-í Dútú Ndiöxí ní taxi-gá tnúhu ndee iní ndécú ndihi-í, te ducaⁿ càda ñaha-í xii-ndo táxi-í tnúhu ndee iní xii-ndo cuendá ío taxi tnùn-í-ndó, te cada iní-ndó sã cáda-ndó cue ñáyíu dàtná quidé-xí ñⁿ quidi òré tãhú-xi càchi duuⁿ-xi, te ducaⁿ chi nchòhó cada-ndo sã ncháá ñáyíu ñá túú quide váha cuíta nihnú-yu.²⁸ Te cada iní-ndó sã dàtná dáyèhé chódíní quiti quène oré sa ta tũndaá-nã cuaháⁿ ducaⁿ càda-xi oré ná sãá nduu ngũita-xi cada váha-xi, te ducaⁿ chi yúhú cada-í nacuáa nduu táhú-ndó cùndecu ndihi ñaha-ndo xii-í núú ío váha càa ndecu-í.²⁹ Te nchaa nchòhó cada cuendá váha-ndo nacuáa xãhaⁿ-í xii Espiritú Yã Ndiöxí xãhaⁿ-xi xii cue ñáyíu ndècu ichi-gá xĩndecu nchaa xichi”, duha càchí Yaá càháⁿ-án. Te nchaa tnúhu-án ñí chídó tnùn-í-í sã cúú-xí ñáyíu xĩndecu ichi Yã Ndiöxí ndécú ñúú Tiàtirá.

3

Tnúhu sã cúú-xí ñáyíu xĩndecu ichi Yã Ndiöxí ndécú ñúú Sãrdís

¹ Te ní cachí tucu Yaá càháⁿ-án xii-í sã chídó tnùn-í nchaa tnúhu sã vítná càháⁿ-gá ñⁿ núú tütú, te tendaha-í quíhíⁿ ndaha téé xĩnu cuechi núú Yã Ndiöxí ndécú ñúú Sãrdís sã cúú-xí cue ñáyíu xĩndecu ichi-gá ndécú ñúú-án

te duha càchí-gá: “Yúhú cúú-í Yaá ndécú ndihi ndi usá espíritú cúú cuendá Yã Ndiöxí, te diu-ni-í cúú-í Yaá ndécú ndihi ndi usá chódíní. Te yúhú xini-í nchaa nacuáa quide nchòhó ñáyíu xĩndecu ichi Yã Ndiöxí ndécú ñúú Sãrdís, te xini-í sã cúú-ndó dàtná ñáyíu ní xihí cuèi càchí ñáyíu sã ñãhá.² Te chí cuãha cuendá nacuáa quide-ndo ndecu-ndo vitna, te nducu ndèe-ndo cada-ndo ñⁿ úú-gá nchaa sã vãha nchicúⁿ nihnu-ndo vitna, chi sa ndètu vii-nã dañã-ndo nchaa-ndi túhú sã vãha quide-ndo ni cuu, te quide cuendá-í sã ñã túú quide-ndo nchaa nacuáa cuini Yã Ndiöxí cada-ndo.³ Te chí dándacu iní nacuáa càháⁿ tnúhu sã ñí xĩndedóho-ndo cũtnãhá ní tuha-ndo ichi Yã Ndiöxí, te canchicúⁿ nihnu-ndo càda-ndo nacuáa càháⁿ tnúhu-án, te ndixi cuèchi iní-ndó sã ñã túú quide váha-ndo ndècu-ndo, te núu vá nacuãha-ndo cuendá nacuáa quide-ndo ndecu-ndo ñã, te cada-í dàtná quidé ñadúhú, chi òré ñã túú ñã yihí iní-ndó quèxio-í núú ndécú-ndó.⁴ Dico ndècu ndihi-ndo ñⁿ úú ñáyíu càndoo caa nine iní-xi, chi ñáyíu-án ñí nduu táhũ-yu cuihnú-yu dóo cuixíⁿ cuendá cundecu ndihi-í-yu, te ducaⁿ chi cùdiú-yu núú-í.⁵ Te nchaa ñáyíu na càda ndee iní-xi yãha nãndi sã ná yãha sã cuendá-í, te ñáyíu-án nduu táhũ-yu cuihnú-yu dóo cuixíⁿ, te vá náquète-í diú-yu núú tütú núú yódó tnùn-í cue ñáyíu ní nduu táhú cundecu ndihi-í

ni caa ni quíhíⁿ, te cúñaha-í xii Tàtá-í Dútú Ndiöxí ndihí cue espíritu xínú cuèchi núu-í sá ñáyiú-áⁿ cúu-yu ñáyiú cùu cuendá-í. ⁶ Te nchaa nchòhó cada cuendá váha-ndo nàcuáa xáhaⁿ-í xii Espíritu Yá Ndiöxí xáhaⁿ-xi xii cue ñáyiú ndècu ichi-gá xíndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùn-í sá cúu-xí ñáyiú xíndecu ichi Yá Ndiöxí ndécú ñùú Sárdís.

Tnúhu sá cúu-xí cuè ñáyiú xíndecu ichi Yá Ndiöxí ndécú ñùú Filadelfiá

⁷ Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yá Ndiöxí ndécú ñùú Filadelfiá sá cúu-xí cuè ñáyiú xíndecu ichi-gá ndécú ñùú-áⁿ, te duha càchí-gá: “Yúhú cúu-í Yaá ío váha quide ndáá te ñá túú tnàhí cuèchi-í. Te díhna-gá ndíi Dávíí ní taxi tnùn-í ndíi ñáyiú, te vítna yúhú táxi tnùn-í-yu, te yúhú càháⁿ-í te núu ndëndida càa ñáyiú ndíhu ndaha-í te ndëndida càa ñáyiú vá ndíhu ndaha-í. ⁸ Te yúhú xìn-í nchaa nàcuáa quide nchóhó ñáyiú xíndecu ichi Yá Ndiöxí ndécú ñùú Filadelfiá, te yúhú ní quide-í nàcuáa ní níhí-ndó ìⁿ ichi cahnu quide-ndo chiúⁿ-í, te vá yóo ìⁿ cada nàcuáa vá níhí-gá-ndó nàcuáa cada-ndo chiúⁿ-í. Te cuèi ñá túú ío níhí ndéé-ndó cùndecu-ndo ichi Yá Ndiöxí dico tnìⁿ-ndo nchaa tnúhu càháⁿ-í, te ní ìⁿ xito ñá túú càháⁿ-ndó sá ñà túú ndècu ndihí ñaha-ndo

xii-í. ⁹ Te nchaa ñáyiú quide nchaa nacuáa cuení yucu ñáváha, ñáyiú-áⁿ cúu-yu ñáyiú isràél, te cuèi cúu-yu ñáyiú isràél dico ñá túú quidé-yu nàcuáa tàú-yu cadá-yu, te yúhú cada-í sá ncháá ñáyiú-áⁿ canehé-yu sá yíñùhu núu-ndó, te cutnùn-í iní-yu sá yúhú ío cùu iní ñàhá-í xii-ndo. ¹⁰ Te ío quide ndee-ni iní-ndó nchìcúⁿ nihnu-ndo quide-ndo nchaa nacuáa ní càháⁿ-í, te xiáⁿ coto ñaha-í xii-ndo ñà túú nã tnahá-ndó ndùu na quixi nchaa tnúndòho tnúhu ndàhú ñuyíú-a. Te òré quexio nchaa tnúndòho-áⁿ ñuyíú-a te dàvá-áⁿ cutnùn-í nàcuáa ndùu sá quidé ìⁿ ìⁿ ñáyiú. ¹¹ Te ío ndíhi quixi tucu-í. Te vá dáñá ndéé-ndó càda-ndo nchaa sá váha nchìcúⁿ nihnu-ndo quide-ndo cuendá sá vã cuíta sá ní cachí Yá Ndiöxí nduu táhú-ndó. ¹² Te nchaa nchòhó ñáyiú na càda ndee iní yáha nándi sá ná yáha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tàtá-í Dútú Ndiöxí, te vá ìⁿ ndùu-gá xocuiñí-ndó núú ndécú-gá. Te cada iní-ndó sã dàtná sá chídó tnùn-í diu Tàtá-í Dútú Ndiöxí ñìⁿ-ndo chi ducaⁿ-ni cùndecu-ndo ndihí-gá, te cada tucu iní-ndó sã dàtná sá chídó tnùn-í nàcuáa nàni ñuu-gá ñìⁿ-ndo, chi diu ñuu-gá-áⁿ cundecu-ndo, te ñuu-áⁿ nán-í-xí Jèrusalén Sáá, duha nàni ñuu-gá. Te ñuu-áⁿ quee-xi andíu núú ndécú Yá Ndiöxí Yaá cúu Tàtá-í quee-xi ñuyíú. Te cada tucu iní-ndó sã dàtná sá chídó tnùn-í diu

mee-í ñii-ndo, te xiãⁿ cúú-xí ñⁿ diu saa, te ducaⁿ càda iní-ndó chi cundecu ndihi ñaha-ndo xii-í. ¹³ Te nchaa nchòhó cada cuendá váha-ndo nàcuáa xáhaⁿ-í xii Espiritú Yá Ndiõxí xáhaⁿ-xi xii cue ñáyiú ndècu ichi-gá xíndecu nchaa xichi”, duha càchí Yaá càháⁿ-án, Te nchaa tnúhu-án nì chídó tnùnì-í sá cúú-xí ñáyiú xíndecu ichi Yá Ndiõxí ndécú ñúú Filadelfiá.

Tnúhu sá cúú-xí ñáyiú xíndecu ichi Yá Ndiõxí ndécú ñúú Laodiceá

¹⁴ Te càchí tucu Yaá càháⁿ-án xii-í sá chídó tnùnì-í nchaa tnúhu sá vítiná cãháⁿ-gá ñⁿ núú tütú, te tendaha-í quíhíⁿ ndaha téé xinu cuechi núú Yá Ndiõxí ndécú ñúú Laodiceá sá cúú-xí cue ñáyiú xíndecu ichi-gá ndécú ñúú-án, te duha càchí-gá: “Yúhú cúú-í Yaá quidé núú Yá Ndiõxí, te cùu-í Yaá quidé ndáá chi càháⁿ ndáá cuiti-í nàcuáa càháⁿ Yá Ndiõxí. Te yúhú cúú-í Yaá ní quide ní ngúndecu nchaa sá ñí cadúha Yá Ndiõxí.

¹⁵ Te yúhú xini-í nchaa nàcuáa quide nchòhó ñáyiú xíndecu ichi Yá Ndiõxí ndécú ñúú Laodiceá, te xini-í sá ñà túú cuini-ndó cànchicúⁿ nihnu-ndo nchaa nàcuáa càháⁿ-í, te ni ñà túú cuini-ndó dàña duuⁿ-ndo. Te váha-gá sá dúúⁿ dùuⁿ cada-ndo nchaa nàcuáa càháⁿ-í àdi núú ñáhá te duuⁿ duuⁿ dañá-ndo.

¹⁶ Te sá dúcáⁿ quide-ndo ñà túú cuini-ndó dùuⁿ duuⁿ-ni cada-ndo nàcuáa càháⁿ-í, te ni ñà túú cuini-ndó dùuⁿ duuⁿ-ni dañá-ndo te sáá nduu vã cundèe-gá iní-í cuendá nchaa sá quidé-ndó-án, te daquèe

tíhú ñáhà-í xii-ndo. ¹⁷ Te càchí-ndó sã cuicá-ndó, te ío váha ta yáha-ndo nchaa nduu cuáháⁿ, te ñà túú tnàhí ná cúmãní xii-ndo, te ñà túú cùtnuní iní-ndó sã cúú-ndó dàtná cue ñáyiú ío ndàhú yáha, te cùu-ndo datná ñáyiú ndàhú, ñáyiú ío cùndahú iní ñáhá tnàha ñáyiú-xi, te cùu-ndo datná cue ñáyiú cuáá, te cùu tucu-ndo datná cue ñáyiú ndàhú ñà túú tnàhí dóó-xi. ¹⁸ Te na càchí tnúhu-í xii-ndo sã cadá-ndó dàtná xíquide cue ñáyiú sàaⁿ ñⁿ sá ñí cuáha mee-ni dñhúⁿ cuáaⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xíquide cue ñáyiú sàaⁿ dóó cuixíⁿ sácuiñhu-yu cuendá sá vã cúú-yu dàtná ñáyiú ndàhú ñà túú dóó-xi, te cada tucu-ndo dàtná quidé cue ñáyiú sàaⁿ yúcu quèe núú-xi nàcuáa cutnùnì váha núu-yu, te duha càháⁿ-í xáhaⁿ-í xii-ndo chi cuini-í sá nàtuha ñaha-ndo xii-í, te ío váha cundecu-ndo sã cúú-xí Yá Ndiõxí. ¹⁹ Te càháⁿ-í dóho nchaa ñáyiú cùu iní-í òré ñà túú quide ndáá-yu, te dàndoho-í-yu, núu xiãⁿ cuini-í sá nchòhó ndixi cuèchi iní-ndó sã ñà túú quide váha-ndo ndècu-ndo. ²⁰ Te na càchí tnúhu-í xii-ndo sã yúhú cúú-í dàtná ñⁿ téé nùtníi yuyèhe ndaa quehé te càháⁿ-í ñáyiú yíhi xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihí-yu, te duha càháⁿ-í chi cuini-í cundecu ndihi ñaha-í xii-ndo. ²¹ Te nchaa nchòhó ñáyiú na

càda ndee iní-xi yáha nándi sá ná yáha sá cuendá-í, te yúhú taxi-í xii-ndo ìⁿ xichi núú ndécù-í cundecu-ndo te cunuu-ndo tnàhá-ndó dàtná cúnùu-í, chi yúhú ducaⁿ nǐ quide ndee iní-í ní yáha-í nándi sá nǐ yáha-í te vitna ní nduu táhù-í ndécù-í núú ndécù Tàtá-í Dútú Ndiöxí cúnùu-í. ²² Te nchaa nchòhó cada cuendá váha-ndo nàcuáa càháⁿ Espiritú Yá Ndiöxí xáhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-áⁿ, Te nchaa tnúhu-áⁿ nǐ chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Laodiceá.

4

Nàcuáa chiñuhu ñáyiú Yá Ndiöxí andiú

¹ Te sátá nǐ yáha ducaⁿ nǐ cuu te ní xiní-í nchii andiú, te ní càháⁿ tucu Yaá ní càháⁿ ndihí ñaha xii-í díhna, te Yaá-áⁿ nǐ càháⁿ níhi-gá dàtná càháⁿ níhi ìⁿ cútú, te ní cachí-gá xii-í:

—Taquène iha te na dànehé ñáhà-í xii-n nchàa nacuáa cada-xi ndéé núú cuaháⁿ núú vèxi —càchí-gá.

² Te òré-ni-áⁿ nǐ quide ñaha tùcu Espiritú Yá Ndiöxí xii-í nàcuáa càchí iní-xi, te diu-ni òré-áⁿ nǐ xiní-í nútñí ìⁿ xilé váha andiú te càa datná cáá xilé sácóo nchihi cue ñáyiú ío cúnuu, te núú xilé váha-áⁿ núcõo Yaá táxí tnùn-í. ³ Te Yaá-áⁿ cáá-gá dàtná cáá yúú chàhnchí yúú vâha sá nání jâspé, te càa tucu-gá dàtná cáá yúú vâha sá nání còrnalíná, te ñùhu doco ñaha ìⁿ cóo yáhnchí xii-gá, te tãsaⁿ-dí

dàtná tãsaⁿ ìⁿ yúú vâha sá nání èsmeraldá. ⁴ Te ní xiní tucu-í nútñí ócó cúmí xilé váha nǐ càndéé núú núcõo-gá, te núú xilé-áⁿ xĩnucóo ócó cúmí cue tée cùu sacuéhé te xixĩhnu-güedé mee-ni dõó cuixíⁿ, te ìⁿ caa coróná sá nǐ cuáha mee-ni díhúⁿ cuááⁿ xixúhuⁿ díqui-güedé. ⁵ Te núú núcõo Yaá táxí tnùn-í-áⁿ sàá ndúté, te càháⁿ ñùhu te xica chihí-xi dónaha, te càyú úsá iti núú núcõo-gá, te sá úsá iti-áⁿ xĩáⁿ cútñuní sá ndécú úsá espíritú cúu cuendá-gá. ⁶ Te ndècu ìⁿ sá ndécú ndàa núú-gá te xĩáⁿ cáá dàtná cáá làmár, te dàtná cáá vidiú cáá ñihí.

Te nǐ càndéé díñi Yaá núcõo-áⁿ xĩnutñí cúmí quiti te titní víhí tinuu-güedi ndeé ndàa sátá-güedi ndihí ndàa núú-güedi. ⁷ Te quiti díhna nuu càa-dí datná cáá ndicaha, te quiti cùu uú cáá-dí dàtná cáá ndicutu, te quiti cùu uní néhé-dí núú tée, te quiti cùu cumí cáá-dí dàtná cáá yàcolo oré cuaháⁿ-di núú tàchí. ⁸ Te ndí cùmí quiti-áⁿ ndéé íñú ndíxíⁿ-güedi ìⁿ ìⁿ-güedi, te ñihí xití ndíxíⁿ-güedi ndihí ndàa sátá ndíxíⁿ-güedi ndéé tinuu-güedi, te nduu niú chíñùhu-güedi Yá Ndiöxí, te xáhaⁿ-güedi xii-gá:

Yòhó Dútú Ndiöxí ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te diu-ni ducaⁿ càda ndáá-n núú cuaháⁿ núú vèxi,

te cùu-n Yaá quidé nchàa-ndi túhú sá vâha,

te diu-ni-n sà ndecu-n ndéé
 cútñahá ní cuáha ñuyíú,
 te diu-ni-n ndècu-n cuéi vitna,
 te diu-ni-n cùndecu-n
 cuéi ndéé núú cuáháⁿ
 núú vèxi.

Duha xáhaⁿ cuè quiti-áⁿ xii
 Yaá núcõo núú xilé váha-áⁿ
 chíñùhu ñaha-güedi.

⁹ Te cue quiti-áⁿ ïo ndácáⁿ
 táhú-güedi núú Yaá núcõo
 núú xilé váha-áⁿ cuèndá
 nchaa sá quidé-gã. Te Yaá-áⁿ
 cúú-gã Yaá ndécú nchàa
 nduu nchaa quiú. Te cue
 quiti-áⁿ càchí-güedi sá ïo
 càhnu cuu-gá te nèhe-güedi
 sá yíñùhu núú-gã. Te ndi
 tnahá òré ducaⁿ càháⁿ-güedi,
¹⁰ te ndi òcõ cùmí cue
 téé cùu sacuéhé xínucóo-áⁿ
 ngüñí xítí-güedë núú Yaá
 núcõo-áⁿ, chí diu-gá cúú-gã
 Yaá ndécú nchàa nduu nchaa
 quiú te chíñùhu ñaha-güedé
 xii-gá, te tàva-güedé coróná
 ñúhú díqui-güedë te tàxi
 ndecu-güedé núú-gã, te
 xáhaⁿ-güedë xii-gá:

¹¹ Yòhõ cúú-n Dütú Ndiõxí
 Yaá cúú cuèndá ñáhá
 xii-ndí,
 te ío càhnu cuu-n, te ío váha
 quíde-n,
 te nèhe-ndí sá yíñùhu núú-n,
 chí ducaⁿ tàù-xi
 cada-ndí,
 chí yòhõ cúú-n Yaá ní cadúha
 nchaandi túhú sá ío,
 te ducaⁿ ñí ngúndecu nchaa
 xíã chí mee-n dùcaⁿ ní
 sani iní-n càda-n.

5

*Cuèndá Yaá cáá dàtná
 cáá ñⁿ mbéé quiti ní*

*dánicuehé-güedé ndihi cuèndá
 ñⁿ tutú*

¹ Te ní xini tucu-í sá
 Yáá núcõo núú xilé váha-áⁿ
 núndàha-gá ñⁿ tutú ní
 nacaúnuu xio ndaha cùha-gá,
 te ndéé lètrá ndàa sátá-xi
 ndihi ndàa xití-xi, te úsá tñahá
 tutú lĩhli ñùhu seyú ndéé sátá
 tütú-áⁿ cuèndá sá vã dáñá-xí
 nàcaá. ² Te ní xini-í ñⁿ espíritú
 xínú cuèchi núú Yã Ndiõxí, te
 ndee vñhi-xi te níhi càháⁿ-xi,
 te càchí-xi:

—¿Yoo tàù-xi xocàni nchaa
 tutú lĩhli ñùhu seyú ndéé sátá
 tütú-a te nadacàá-xi? —càchí
 espíritú-áⁿ.

³ Dico ni àndiu, te ni
 núú ñùyíú-a, te ni ndàa
 xití ñuhu ñá túú ñⁿ ñáyiu
 tàù-xi nadacàá tutú-áⁿ te
 cundehé-yu. ⁴ Te yúhú ní
 ngüíta-í ndàhyú víhì-í cuèndá
 sá ñá túú ñí ñⁿ ñáyiu tàù-xi
 nadacàá tutú-áⁿ cundehé-yu.
⁵ Te ñⁿ cue téé cùu sacuéhé
 xínucóo xíãⁿ ñí cachi-güedé
 xii-í:

—Vá ndàhyú-gá-n, te cada
 cuèndá-n chí Yaá ío cùnuu cuu
 ndi mee cue ñáyiu cùu ñani
 tñahá ndíi Jùdá, diu-ni Yaá
 cúú ñani tñahá ndíi Dáví,
 Yaá-áⁿ cúú-gã Yaá ní ndacu
 ní yáha nchaa nándi sá ñí
 yáha, núu xíãⁿ diu-gá tàù-gá
 xocàni-gá nchaa tutú lĩhli
 ñùhu seyú ndéé sátá tütú-áⁿ
 te nadacàá-gá —duha càchí
 téé cùu sacuéhé-ãⁿ.

⁶ Te tnuú ndi òcõ cùmí cue
 téé cùu sacuéhé xínucóo-áⁿ,
 ndihi tnuú ndi cùmí quiti
 xĩnutñí-áⁿ, ndihi núú núcõo
 Yaá táxí tñuní-áⁿ ñí xini-í
 nútñí ñⁿ Yaá cáá dàtná
 cáá ñⁿ mbéé quiti ní

dánĩcuèhé-güedé te ní xíhí-di
ni cùu te ní ndoto-di, te ndèé
úsá ndiqui-di, te ndèé úsá
tinùu-di, te sá úsá tinùu-di-án
cútnùní sá ndécú úsá espíritú
cúu cuèndá Yá Ndiòxí, ducaⁿ
càa Yaá-án ñĩ xini-í. Te cue
espíritú-án ñĩ tendaha-gã xicá
cùu-xi ni caa xico ñuyíú. ⁷ Te
Yaá cáá dàtná cáá ñĩ mbéé
quiti ní dánĩcuèhé-güedé-án
ñĩ sáhán-gá núú Yáá núcõ
núú xilé váha-án. ⁸ Te òré
ní queheⁿ-gá tutú-án te ndi
cùmí quiti xĩnutnĩ xíaⁿ ñĩ
ngüĩñĩ xitĩ-güedĩ núú-gã, te
ducaⁿ ñĩ ngüĩñĩ xitĩ tucu
ndi ócò cùmí cue téé cùu
sacuéhé xĩnucóo-án, te ndi
díⁿ nũú-güedé xĩnehe-güedé
yaá sá nání àrpá, te xĩnehe
tucu-güedé ndí díⁿ nũú-güedé
ñĩ caa tìcùú ní cuáha mee-ni
dĩhúⁿ cuááⁿ, te chitu dũsa sá
sáhán tnámí. Te ñũhmá dũsa
sá sáhán tnámí-án cúu-xi dàtná
nchaa tnúhu càháⁿ nchaa
ñáyiu ndècu ichi Yá Ndiòxí
òré càháⁿ ndihi ñàhá-yu
xii-gá. ⁹ Te xità-güedé ñĩ
ndudú sáá ndihi cue quiti-án
chĩñùhu ñaha-güedé xii-gá, te
càchí-güedé ndihi cue quiti-án:

Yòhó tàú-n quèheⁿ-n tutú-a
te xocàni-n nchaa tutú
lĩhli ñùhu seyú ndèé
sátá-xi,

chi yòhó ní sati ñĩñĩ-n te ní
xíhí-n,

te cuèndá xíaⁿ ní nduu cuèndá
Yá Ndiòxí cue ñáyiu ñĩ
ñĩ nacióⁿ, ndihi ñáyiu
xĩndecu ñĩ ñĩ ñuú, ndihi
ñáyiu càháⁿ ndí díⁿ ndi
díⁿ nũú tnúhu, ndihi

ñáyiu xĩndecu ñĩ ñĩ xi-
chi.

¹⁰ Te ní quidé-n-yu dàtná cue
téé yĩndaha ñáyiu, te ní
quide tucú-n-yu dàtná
cue dútú sá cúu-xi Yá
Ndiòxí.

Te sáá nduu te taxi tnùní-yu
ñuyíú-a.

Duha càháⁿ cue téé-án ndihi
cue quiti-án chĩñùhu-güedé
ndihi-güedi Yaá-án.

¹¹ Te sátá dúcáⁿ te ní
tecú dóho-í ní càháⁿ cuéhé
víhí espíritú xínú cuèchi ni
candéé núú núcõ Yaá táxi
tnùní-án, ndihi núú xĩnutnĩ
ndi cùmí cue quiti-án, ndihi
núú xĩnucóo cue téé cùu
sacuéhé-án, te ní xini-í sá
sũúni cuéhé víhí espíritú-án
xĩndecu xíaⁿ, ¹² te níhi ní càháⁿ
cue espíritú-án, te càchí-xi:

Yòhó Yaá cáá dàtná cáá
ñĩ mbéé quiti ní
dánĩcuèhé-güedé te ní
xíhí ní cùu te ní ndoto,
te yòhó ío càhnu cuu-n,
te ndècu ndihi-n
nchaandi túhú,

te ío ndècu ndihi-n sá xini
tnùní-n,

te ndàcu-n quide-n nchaa sá
cuini-n,

te nèhe-ndí sá yĩñùhu núú-n,
te ío váha quide-n,

te chĩñùhu ñaha-ndí xii-n, chi
ducaⁿ tàú-ndí cada-ndí
chi ío càhnu cuu-n.

Duha càchí nchaa cue
espíritú-án xáhaⁿ-xi xii-gá
chĩñùhu ñaha-xi.

¹³ Te ní tecú dóho-í ní càháⁿ
nchaandi túhú sá ní cadúha
Yá Ndiòxí ndécú àndiu, ndihi
nchaa sá ndécú ñuyíú, ndihi
nchaa sá ndécú xitĩ ñuhu,

ndihi nchaa sá ñúhú xítí
ndute lâmar, te xîcachí-xi:

Yòhó Yaá núcòo núú xilé váha,
ndihi yòhó Yaá cáá
dàtná cáá ìⁿ mbéé quiti
ní dánîcuèhé-güedé táxí
tnùní-ndó, te nèhe-ndí
sá yîñùhu núú-ndó,

te ducaⁿ ìo ndàcáⁿ táhú-ndí
núú-ndó, chí ío
váha quide-ndo te ío
cùnûu-ndo,

te diu-ni duha cáháⁿ váha-ndí
cuèndá-ndó nî caa ni
quíhíⁿ.

Duha càchí nchaa sá nî
cadúha Yá Ndióxi.

¹⁴ Te ndi cùmí cue quiti
xînutní-áⁿ càchí-güedi:

—¡Ducaⁿ na cunduú! —
cachí-güedi.

Te ndi òcò cùmí cue tée cùu
sacuéhé xîndecu-áⁿ nî ngüíñí
xítí-güedé chíñùhu-güedé Yaá
ndécú nchàa nduu nchaa
quíú.

6

*Cuèndá úsá tutú lîhli ñùhu
seyú*

¹ Te sátá dúcáⁿ te ní xiní-í
sá Yàá cáá dàtná cáá ìⁿ mbéé
quiti ní dánîcuèhé-güedé-áⁿ nî
xócání-gă ìⁿ tutú lîhli ñùhu
seyú ndèé sátá tutú sá nî
nadúcúⁿ nuu-áⁿ, te ní tecú
dóho-í ní cáháⁿ ìⁿ quiti cùmí
xînutní-áⁿ, te níhi ní cáháⁿ-di
dàtná càháⁿ ñùhu, te càchí-di:

—¡Taquixi cundehe-n! —
cachí-di.

² Te òré-ni-áⁿ nî xiní-í ìⁿ
cuàyú cuixíⁿ yódó ñàha ìⁿ
sá yódó ñàha xii-di, te sá
yódó ñàha xii-di-áⁿ néhé-xí
ìⁿ arcú sá cúú tnùxií-xi, te

ní nduu táhú-xi ìⁿ coróná,
te ní ndacu-xi ní cunuú-xi te
ducaⁿ-ní ta cunuú-xi cuáháⁿ.

³ Te òré ní xócání-gă tutú
lîhli cùu uú ñúhú sèyú ndèé
sátá tutú sá nî nadúcúⁿ
nuu-áⁿ, te ní tecú dóho-í ní
cáháⁿ tucu ingá quiti cùu uú
xînutní-áⁿ, te càchí-di:

—¡Taquixi cundehe-n! —
cachí-di.

⁴ Te òré-ni-áⁿ nî xiní tucu-í
ìⁿ cuàyú tícuèhé ní quee-di
cuáháⁿ-di, te yòdo ñàha ìⁿ
sá yódó ñàha xii-di, te sá
yódó ñàha xii-di-áⁿ nî níhí-xi
tnúhu ndee ìní sá dátîcánuu-xi
ñáyíu vá cùndècu ndihi tnaha
váha-gá-yu, te ngüíta ñáyíu
cahni tnàhá-yu, te ní nduu
táhú-xi ìⁿ yuchí cáhnú vîhi.

⁵ Te òré ní xócání tucu
Yaá-áⁿ ingá tutú lîhli cùu uní
ñúhú sèyú ndèé sátá tutú sá
nî nadúcúⁿ nuu-áⁿ, te ní tecú
dóho-í ní cáháⁿ quiti cùu uní
xînutní xíáⁿ, te càchí-di:

—¡Taquixi cundehe-n! —
cachí-di.

Te òré-ni-áⁿ nî xiní tucu-í
ìⁿ cuàyú tnúú te yòdo ñàha
tucu ìⁿ sá yódó ñàha xii-di,
te sá yódó ñàha-áⁿ núndàha-xi
úú yaxiⁿ libre. ⁶ Te ní tecú
dóho-í ní cáháⁿ ìⁿ sá nî cáháⁿ
tnúú cue quiti xînutní-áⁿ, te
càchí-xi:

—Ìⁿ cuàrtú-nă triú
níhí-ndó sá ìⁿ dîhúⁿ denàriú,
te uní cuàrtú-nă cebadá
níhí-ndó sá ìⁿ tucu dîhúⁿ
denàriú, dico acití ndihi
ndudí ndéhé yoho yàha stilé
chí vá ndíhí nihnu —duha
càchí sá càháⁿ-áⁿ.

⁷ Te òré ní xócání tucu
Yaá-áⁿ tutú lîhli cùu cùmí
ñúhú sèyú ndèé sátá tutú sá

nĩ nadúcúⁿ nuu-áⁿ, te ní tecú tucu dóho-í ní cáháⁿ tucu ingá quiti cùu cumí xĩnutnĩ-áⁿ, te càchí-dì:

—¡Taquixi cundehe-n! — cachí-dì.

⁸ Te òré-ni-áⁿ nĩ xiní tucu-í ìⁿ cuáyú yàhá, te yòdo ñaha tucu ìⁿ sá yódó ñaha xii-dì, te sá yódó ñaha xii-dì-áⁿ nání-xí Sã xihí, te xiãⁿ sáhní-xí ñáyiu, te sá tá tá xiãⁿ nchícúⁿ sá nèhé núú ndécú ñáyiu ní xihí. Te cúmí xichi cùu ñuyíú, te sá sáhní ñaha xii ñáyiu-áⁿ nĩ níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndihí yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quiti dééⁿ cahni-dì ñáyiu.

⁹ Te òré ní xócání tucu Yaá-áⁿ tutú lĩhli cùu uhúⁿ ñúhú sèyú ndéé sá tá tütú sá nĩ nadúcúⁿ nuu-áⁿ, te òré-áⁿ nĩ xiní-í nũtnĩ ìⁿ núú sácòdó sã ndúú tãhú Yã Ndiõxí, te ndàa caha xiãⁿ ní xiní-í xĩndecu nchaa àlmá ñáyiu ní sahní-güedé núú ñuyíú sã cuendá tnúhu Yá Ndiõxí, ndihí sá cuendá sá nĩ cáháⁿ váha-yu cuendá-gá. ¹⁰ Te nchaa àlmá-áⁿ nĩhí xicáháⁿ-xi, te xãhaⁿ-xi xii Yá Ndiõxí:

—Yòhó Dútú Ndiõxí cúu-n Yáá ñá túú tnàhí cuèchi-xi, te ñá túú tnàhí quée cáva-n quide-n ìⁿ sá cáháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá nĩ quide ñahá-yu xii-ndí-í? —càchí cue àlmá-áⁿ xãhaⁿ-xi xii-gá.

¹¹ Te sá tá dúcáⁿ te nchaa cue àlmá ñáyiu-áⁿ nĩ níhí-xi dóo cuixíⁿ ní quée cuĩhnu-xi, te ní xĩtnúhu ñaha xii-xi sá ná ndétatú-xi te cundetú tnaa-xi ndéé ná xĩnu cava cuú ñáyiu nàcuáa ndèé tnuní dàtná ní xihí cue ñáyiu dii àlmá-xi cùu-xi. Te ñáyiu sa ní xihí-áⁿ ìⁿ-ni cùú-yu ndihí ñáyiu vitna cuú-áⁿ chi mee-ni chiúⁿ Xitohó Jesucristú quidè-yu, te diu-ni ichi-gá ndécú-yu.

¹² Te òré ní xócání tucu Yaá-áⁿ tutú lĩhli cùu iñú ñúhú sèyú ndéé sá tá tütú sá nĩ nadúcúⁿ nuu-áⁿ, te ní xiní-í súní nĩhí ní quidi-xi ñuyíú, te ní cutnuu nĩhí núú nchícanhii dàtná ìⁿ dóo tnúú, te ní cuu tìcuèhé nĩhí nĩhí núú yóo. ¹³ Te ní xiní-í ní ngoyo chódíní ñuyíú-a dàtná ngóyó ngũxí yihí òré quéné tãchí nĩhí. ¹⁴ Te ní xiní-í ní nadúcúⁿ nuu andiu dàtná nádúcúⁿ nuu ìⁿ tutú te ní ndóñúhú-xi, te nchaa tĩndúú nĩ xica ndehe-xi núú ndécú-xi, te ducaⁿ nĩ xica ndehe tucu nchaa tĩndúú yìchí ndécú xití ndute lámár. ¹⁵ Te nchaa cue téé yĩndaha ñáyiu ní nguívãha-güedé, ndihí nchaa dava-gá cue téé ío tàxi tnuní, ndihí nchaa ñáyiu cuica, ndihí nchaa cue téé tàxi tnuní sandàdú, ndihí cue sandàdú cue téé ío váha sàá díquí-xi nàcuáa cada-güedé nàa-güedé, ndihí nchaa ñáyiu ñá túú tnàhí dàñá quée núú chíúⁿ patróóⁿ-xi, ndihí nchaa ñáyiu dàñá quée núú chiúⁿ patróóⁿ-xi. Te dava ñáyiu-áⁿ nĩ nguívãha-yu xití yaú, te davá-yu ní nguívãha-yu

nchaa tnuú cava. ¹⁶ Te xäháⁿ-yu nchaa tindúú ndihi nchaa cava:

—Chí tácuuⁿ chiváha ñaha-ndo xii-ndí cuendá sá vǎ quini ñáhá Yáá ío tàxi tnuú núcõo núú xilé váha, ndihi cuendá sá vǎ dándòho ñaha Yáá cáá dàtná cáá ñⁿ mbéé quití ní dánicuèhé-güedé, chí Yáá-áⁿ ío cùdééⁿ-gǎ núú-ndí —duha càchí nchaa ñáyi-áⁿ xäháⁿ-yu xii nchaa tindúú-ǎⁿ ndihi nchaa cava-áⁿ.

¹⁷ Te vitna ní sǎa nduu ío cùu cahnu nduu tnúndòho tnúhu ndáhú, te vǎ yõo ñⁿ cundee iní-xi yáha nchaa tnúndòho-a.

7

Ñáyi israhél ñáyi naníhi tǎhú

¹ Te sátá xǎⁿ te ní xiní-í cùmí tnáhá espíritú xínú cuèchi núú Yǎ Ndiõxí xínutnǎi-xi ndi cùmí xio ñuyíú, te cue espíritú-áⁿ ní ngani-xi táchí cuendá sá vǎ cuícó-gǎ-xi ni lámár, te ni díquí yutnu, te ni ñⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndihi-xi tnúhu ndee iní danàa-xi sá ío lámár ndihi sá ío ñuhu yichí, te ní xiní tucu-í ingá espíritú xínú cuèchi núú Yǎ Ndiõxí ní quee nchita-xi ndàa nacuáa quène nchícanhii, te nùndaha-xi seyú Yǎ Ndiõxí Yáá ndécú nchaa nduu nchaa quíú, te níhi ní cáháⁿ-xi xäháⁿ-xi xii ndi cùmí cue espíritú-áⁿ:

³ —Vǎ dánàa-ndo sá ío lámár, te ní vǎ dánàa-ndo yutnu, te ni ñⁿ sá ío ñuyíú vǎ dánàa-ndo, chí cundet-ndo

ndéé ná tàxi ndecu-ndí ñⁿ seña tneé nchaa ñáyi xínu cuechi núú Tǎtá-ó Dútú Ndiõxí —duha càchí espíritú-áⁿ xäháⁿ-xi xii ndi cùmí espíritú xínutnǎi ndi cùmí xichi ñuyíú.

⁴ Te ní tecú dóho-í ní cáháⁿ ñⁿ sá ní cáháⁿ, te ní cachí-xi sá núú ndí úxúú xichi cue ñáyi israhél te ní xínu ñⁿ ciendú údico cùmí mǎl-yu ní ngúndecu seña tneé-yu. ⁵ Te núú ñⁿ ciendú údico cùmí mǎl ñáyi-áⁿ, te ní xínu úxúú mǎl cue ñaní tnáhá ndii Jüdá ní ngúndecu seña tneé-yu, te úxúú mǎl cue ñaní tnáhá ndii Rübén, te úxúú mǎl cue ñaní tnáhá ndii Gäd, ⁶ te úxúú mǎl cue ñaní tnáhá ndii Àser, te úxúú mǎl cue ñaní tnáhá ndii Neftálí, te úxúú mǎl cue ñaní tnáhá ndii Manàsés, ⁷ te úxúú mǎl cue ñaní tnáhá ndii Mió, te úxúú mǎl cue ñaní tnáhá ndii Lèví, te úxúú mǎl cue ñaní tnáhá ndii Isàcár, ⁸ te úxúú mǎl cue ñaní tnáhá ndii Zabùlón, te úxúú mǎl cue ñaní tnáhá ndii Chèé, te úxúú mǎl cue ñaní tnáhá ndii Benjàmín, nchaandi túhú ñáyi-áⁿ ní ngúndecu seña tneé-yu.

Cuéhé víhi ñáyi nihnu dóo cuixíⁿ

⁹ Te sátá xǎⁿ te ní xiní-í cuéhé víhi ñáyi, ñáyi ñⁿ ñⁿ nàcióⁿ, ndihi ñáyi ñⁿ ñⁿ ñuú, ndihi ñáyi càháⁿ ndi dííⁿ ndi dííⁿ núú tnúhu, ndihi ñáyi ní xíndecu ñⁿ ñⁿ xichi, te nchaa ñáyi-áⁿ xínutnǎi-yu ndàa núú Yáá táxi tnúni núcõo núú xilé váha, ndihi núú Yáá cáá dàtná cáá ñⁿ mbéé quití ní dánicuèhé-güedé, te vǎ yõo ñⁿ ndàcu cahu ñaha xií-yu chí

cuéhé víhī-yu, te nchaá-yu
xǐxǐhnu-yu mee-ni dǒo cuìxíⁿ,
te nùndahá-yu nchaá-yu ìⁿ
caa ndàha yutnu ñúú. ¹⁰ Te
nchaá-yu níhi xǐcáháⁿ-yu, te
càchí-yu:

Yaá táxí tnùní núcǒo núú xilé
váha cùu-gá Ndiǒxí-ó,

te òu-gá ndihī Yaá cáá dàtná
cáá ìⁿ mbéé quiti ní
dánicuèhé-güedé ní
dácacu nihnu ñaha-gǎ
xii-o núú ùhú núú
ndàhú.

Duha càchí nchaa ñáyiū-áⁿ.
¹¹ Te nchaa espíritú xínú
cuèchi núú Yǎ Ndiǒxí ní
nadúcúⁿndéé-xi xǐnutnǐ-xi
ní cǎndéé núú núcǒo Yaá
núcǒo núú xilé váha, ndihī
núú xǐnucóo cue téé cùu
sacuéhé, ndihī cue ndi cùmí
quiti xǐnutnǐ-áⁿ, te nchaa-xi
ní ngüñí xítí-xí te ní ngúnu
ndeyi-xi núú Yáá núcǒo núú
xilé váha-áⁿ, te nchaa-xi ní
ngüíta-xi chĩñuhu ñaha-xi
xii-gá, ¹² te càchí-xi:

Na cǎháⁿ ndáá-ndí núú yòhó
Tǎtá-ndǐ Dútú Ndiǒxí
sá ío cǎhnu cuu-n, te
ndàcu-n quide-n nchaa
sá vǎha cuñí-n, te ío
váha quide-n, te ndècu
ndihī-n nchaa sá xìní
tnùní-n,

te chĩñuhu ñaha-ndí xii-n, te
ducaⁿ ndàcáⁿ táhú-ndǐ
núú-n cuèndá nchaa sá
quidé-n, te nèhe-ndí sá
yĩñuhu núú-n,

te tnúhu cǎháⁿ-ndí-a cùu-xi
tnúhu ndáá, te òu-ni
duha cǎháⁿ-ndí ndéé
núú cuáháⁿ núú véxi.

Duha càchí nchaa cue
espíritú-áⁿ xǎhaⁿ-xi xii Yaá
núcǒo núú xilé váha-áⁿ.

¹³ Te ìⁿ cué téé cùu sacuéhé
xǐndecu-áⁿ ní xícáⁿ tnúhú-dé
núú-í, te càchí-dé:

—¿Yóndi cùu ñáyiū dácáⁿ
xǐxǐhnu dǒo cuìxíⁿ-ǎⁿ, te
ndéé véxi-yu núú dácáⁿ
xǐndáǎ-yu-í? —càchí-dé.

¹⁴ Te yúhú ní xáhaⁿ-í:

—Tǎtá, ñá túú xìní-í, dico
mee-n xìní-n —duha ní
xáhaⁿ-í xii-dé.

Te dǎtnùní ní cachí
tnúhu-dé xii-í ná cúú ñáyiū-áⁿ,
te càchí-dé:

—Nchaa ñáyiū-a cùu-yu
ñáyiū ní quee núú ío víhí
tnúhu ndòho tnúhu ndàhú sá
vǎ cùndèe iní-ó te véxi-yu iha,
te cùu-yu ñáyiū sa ní nduu
ndoo ní nduu nine iní-xi
cuèndá sá ñí sati ñíñí Yáá
cáá dàtná cáá ìⁿ mbéé quiti
ní dánicuèhé-güedé, cuèndá
xǐǎⁿ vitna ní ndihī-yu ní
nduu cuìxíⁿ dǒo xǐxǐhnu-yu.

¹⁵ Te núú xǐǎⁿ vitna ní nduu
táhū-yu ndécú-yu núú ndécú
Yǎ Ndiǒxí Yaá táxí tnùní
núcǒo núú xilé váha, te cuéi
nduu cuéi niú xínú cuèchí-yu
núú-gǎ vitna, te òu-gá xító
ñàha-gá xii-yu. ¹⁶ Te vitna ní
sáá-yu núú-gǎ cundecú-yu
te vá ndóhó-gǎ-yu docó, te
ni vǎ quíní-gá-yu ndohó-yu
yíchí-yu ndute, te ni vǎ
quíní-gá-yu ndohó-yu cahni
nchíanchii, te ñá túú-gǎ ná
cahni ndohó-yu. ¹⁷ Te ducaⁿ
chi Yaá cáá dàtná cáá ìⁿ mbéé
quiti ní dánicuèhé-güedé
ndécú-gǎ núú nùtnǐ xilé váha
núcóo Yá Ndiǒxí Yaá táxí
tnùní, Yaá-áⁿ coto ñaha-gǎ

xií-yu dàtná quidé ìⁿ toli oré xító-dě mběé-dě, te candeca ñaha-gã xií-yu quíhíⁿ núú tǒ ndute, te ndute-áⁿ cúú-xí ndùte candeca iní-yu, te Yá Ndiǒxí cada-gá sá vã quíní-gá-yu tnúhu ndàhyú — duha ní cachí tnúhu téè cùu sacuéhé-áⁿ xií-í.

8

Cuèndá tícùú sá nǐ cuáha mee-ni dǐhúⁿ cuàáⁿ

¹ Te sáta dúcáⁿ te Yaá cáá dàtná cáá ìⁿ mbéé quiti ní dánícuèhé-güedé ní xócání-gã tutú líhli cùu usá ñúhú sèyú ndéé sáta tutú sá nǐ nadúcúⁿnuu-áⁿ, te òré-áⁿ nǐ cunahi sùúní nàvíí-ná ní cuu andiú dàtná cuádava òré. ² Te ní xiní-í úsá tnàhá espíritú xínú cuèchi núú Yá Ndiǒxí xǐnutnǐ-xi núú núcǒo-gá, te ní níhí-xi ìⁿ caa cǔtú xǐnehe-xi. ³ Te dàtnùní ní xiní tucu-í ìngá espíritú xínú cuèchi núú-gã ní quexìo-xi nehe-xi ìⁿ tícùú ní cuáha mee-ni dǐhúⁿ cuàáⁿ te ñùhu vai dúsa sá sàháⁿ tnámí, te ní ngúnutnǐ espíritú-áⁿ núú ndécú sã nǐ cuáha mee-ni dǐhúⁿ cuàáⁿ núú sácódó sã ndúú tǎhú Yá Ndiǒxí, te xǐáⁿ nútñǐ-xi ndàa núú-gã, te dúsa sá sàháⁿ tnámí-áⁿ cahmi espíritú-áⁿ núú sácódó sã ndúú tǎhú-gã-áⁿ cuèndá ñúhmá dǔsa-áⁿ cundǐhi-xi nchaa tnúhu càháⁿ ñáyíu càháⁿ ndihí ñaha xii-gá, nchaa ñáyíu cùu cuendá-gá. ⁴ Te nùndaha espíritú-áⁿ tícùú ñúhú dǔsa sá sàháⁿ tnámí càyú, te quène ñúhmá nútñǐ-xi núú Yá Ndiǒxí, te ñúhmá-áⁿ cundǐhi-xi nchaa

tnúhu càháⁿ ñáyíu càháⁿ ndihí ñaha xii-gá, nchaa ñáyíu cùu cuendá-gá. ⁵ Te ní queheⁿ espíritú-áⁿ tícùú te ní dáchítú-xi ñuhú yódó núú sácódó sã ndúú tǎhú Yá Ndiǒxí, te ní xítenuu-xi ñuyíú, te òré ducaⁿ nǐ quide-xi te ní càháⁿ víhí ñùhu, te ío dusaⁿ nǐ quide-xi ñuyíú, te ní sáá nduté, te níhi víhi ní tnáa.

Ndi úsá espíritú ní tíú-xi ìⁿ caa cǔtú xǐnehe-xi

⁶ Te ndi úsá cue espíritú xǐnehe ìⁿ caa cǔtú-áⁿ nǐ ngúndecu túha-xi cuèndá tíú-xi.

⁷ Te espíritú díhna nuu nǐ tíú-xi cǔtú néhé-xí, te ñuyíú-a ní ngoyo ñíñi dàcánuu-xi ndihí ñuhú ndihí níñí, te luha-ná te cuu dava ñuyíú nǐ càyú, te luha-ná te cuu dava tucu nchaa yutnu ío ñuyíú nǐ càyú, te luha-ná te cuu dava tucu nchaa cùhú ío ñuyíú nǐ càyú.

⁸ Te espíritú cúú úú ní tíú-xi cǔtú néhé-xí, te dàtná cáá ìⁿ tǐndúú cáá ìⁿ sá nǐ ngava xítí làmár te nchícúⁿ ñuhú, te luha-ná te cuu dava ndute làmár-áⁿ nǐ nduu-xi níñí. ⁹ Te luha-ná te cuu dava nchaa quiti xǐxúhuⁿ xítí làmár-áⁿ nǐ xíhí-güedi, te luha-ná te cuu dava nchaa bàrcú ní quée naa-xi xítí ndute.

¹⁰ Te espíritú cúú ùní ní tíú-xi cǔtú néhé-xí, te ní ngava ìⁿ chódíní cáhnú ndéé andiú ñuyíú te nchícúⁿ ñuhú-di, te ñuhú-áⁿ cáá dàtná cáá ñùhú iti. Te luha-ná te cuu dava nchaa yúte ní ngava chódíní-áⁿ, te luha-ná

te cuu dava tucu nchaa núú quènihni ndute ní ngava-di.
 11 Te chódíní-ǎⁿ nání-dí: Yúcú Úá. Te ndute xica nchaa yúte-áⁿ ndihi nchaa ndute quènihni-áⁿ ní cuu úá-xi dàtná yúcú úá, te ío cuéhé ñáyiú ní xihí sá dúcáⁿ ní cuu úá ndute-áⁿ.

12 Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóó ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñà túú ní dàyehé yóó ndihi nchaa chódíní.

13 Te sátá dúcáⁿ te ní xiní-í xícó ìⁿ espíritú xínú cuèchi núú Yǎ Ndióxi núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiú xíndecu ñuyíú òré ná dàcaháⁿ úní-gá cue espíritú cùmání cútú xínehe-xi, chí sa xíndecu túha-ná-xi sá dácàháⁿ-xi! — duha càchí espíritú-áⁿ.

9

1 Te espíritú cúú ùhúⁿ ní tiú-xi cútú néhé-xí, te òré-áⁿ ní xiní-í ní quee ìⁿ espíritú andiú te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuèndá nacaáⁿ-xi yuyèhe yaú cùnú víhí. 2 Te ní nacaáⁿ-xi yaú-áⁿ te ní ngúita-xi ní quene ñúhmá dàtná quéné ñúhmá ìⁿ xítnú cáhnú vîhi, te ní quene táchí ní xítenuu-xi

ñúhmá-ǎⁿ te ní sadí-xi núú nchíanchii, te ní cunee ñuyíú. 3 Te xití ñúhmá-ǎⁿ ní quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua. 4 Te ní ngúndecu ndihi-güedi tnúhu ndee ìní cuèndá sá dándòho-güedi mee-ni ñáyiú ñà túú ndèe seña Yǎ Ndióxi tneé-xi, te ñà túú ñà cada-di nchaa yutnu ndihi nchaa cúhú. 5 Te ñà túú tnúhu ndee ìní ndécú ndihi-güedi sá cáhní-güedi ñáyiú, chí mee-ni sá dándòho ñaha-güedi xií-yu úhúⁿ yóó. Te òré ní ngúita-güedi dándòho ñaha-güedi xií-yu te tàhú tnúhú núú dáquèe-güedi iñu-güedi dàtná quidé-xí núú dáquèe nchacua iñu-güedi. 6 Te ñáyiú-áⁿ xicáⁿ táhü-yu sá ndihi cuú-yu cuèndá sá ío ndòhó-yu dàquèe ñaha nchàa quiti-áⁿ iñu-di xií-yu te ñà cuíní-xi cuú-yu, te ìⁿ nduu ìⁿ nduu sàni ìní-yu cuú-yu te ñà túú cuíní-xi cuú-yu chí ñà túú tnúhu xihí sá cúú-xí-yu.

7 Te nchaa tíca làngóstá-áⁿ xíndaa-güedi dàtná ndaa nchaa cuàyu cue téé cuáháⁿ nàá, te díquí-güedi ñúhu ìⁿ sá cáá dàtná cáá còroná ní cuáha mee-ni díhúⁿ cuàáⁿ, te núú-güedi càa datná cáá núú cuè téé. 8 Te idi díquí-güedi càa datná cáá idi díquí ñáyiú dihí, te núhu-güedi càa datná cáá núhu ndicaha. 9 Te yidúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xí núú vèxi cuéhé

víhí càrretá sá táñùhu cuayú
 cuáháⁿ-güedé ndihi-güedi
 núú nää-güedé. 10 Te
 ndéé iñu núú lùhmá-güedi
 dàtná ndéé iñu núú lùhmá
 nchacua, te iñu núú
 lùhmá-güedi-án dáquée-güedi
 ñáiyu dándoho ñaha-güedi
 xií-yu, te ducaⁿ-ni càda-güedi
 dándoho ñaha-güedi xií-yu
 ndéé xínu úhúⁿ yóó. 11 Te
 nchaa tíca làngóstá-án táxí
 tnùní ñáhá espíritú sá táxí
 tnùní yaú cúnú víhí, te
 espíritú-án nání-xí Àbadón
 tnúhu hèbreú, te tnúhu griégú
 nání-xí Àpolión, te ndi ndúú
 tnúhu-án queé-xí: Sá dánàa
 ñáiyu.

12 Te tnúndòho-a cuu-xi
 tnúndòho díhna nuu, te vitna
 cùmání úú-gá.

13 Te espíritú cúú iñú ní
 tiú-xi cútú néhé-xí. Te núú
 Yá Ndióxi nútñi ñⁿ sá ñi
 cuáha mee-ni díhúⁿ cuááⁿ núú
 sácódó sá ndúú tãhú-gá, te ndi
 cùmí xiquí-xi xíndecu ñⁿ caa
 ndiqui, te ní tecú dóho-í ní
 cáháⁿ ñⁿ sá ñi cáháⁿ nihnu ndi
 cùmí ndiqui-án. 14 Te sá càháⁿ
 nihnu ndiqui-án xãhaⁿ-xi xì
 espíritú cúú iñú sá ñi tiú
 cútú-ãⁿ:

—Cuáháⁿ nandaxi-n ndi
 cumí espíritú ndútú ndècu
 yúte càhnu nani Eúfratés —
 càhí sá càháⁿ-án xãhaⁿ-xi xì
 espíritú-án.

15 Te sátá dúcáⁿ te ní
 nandáxí ndi cùmí cue
 espíritú-án cuendá cahni-xi
 cuéhé víhí ñáiyu, te sa yatni
 dàtná cuádava ñáiyu xíndecu
 ñuyúú cahni-xi, te ducaⁿ
 chi sa ndècu túha tnàhí
 cue espíritú-án ndétú-xí sáa

òré, àdi nduu, àdi yóó, àdi
 cuiá ducaⁿ càda-xi cahni-xi
 ñáiyu. 16 Te ní xiní-í nchaa
 cue sandàdú cündihí-xi
 xixódó-güedé cuayú, te ní
 níhí-í tnúhu sá xínu úú cièndú
 millón-güedé.

17 Te duha xíndáa cue
 cuayú-án ndihi cue téé yòdo
 ñaha-án ñi xiní-í: Te cue téé-án
 yídúcúⁿ nuu ñⁿ sá yídúcúⁿ nuu
 pèchú-güedé, te luha ticuèhé
 te luha cui datná cui andiu,
 te luha cuááⁿ, te nchaa
 cuayú-án cáá díquí-güedi
 dàtná cáá díquí ndicaha, te
 yuhu-güedi quène ñuhú ndihi
 ñúhmá, ndihi àzufré nchicúⁿ
 ñuhú. 18 Te ío cuéhé ñáiyu
 ñuyúú ñi xihí chi luha-ná te
 cudavá-yu ní xihí sá cuendá
 ñuhú-án ndihi ñúhmá-ãⁿ ndihi
 àzufré-án. 19 Te ndihi núú
 lùhmá-güedi ndihi yuhu-güedi
 dándoho-güedi ñáiyu, te núú
 lùhmá-güedi nèhe-xi díquí
 còó, te diu-ni dàtná cáá còó
 cáá ñihí lùhmá-güedi.

20 Te nchaa dava-gá ñáiyu
 ní cácu ñá túú ñi xihí núú
 nchaa tnúndòho-án ñà túú ní
 cuíni-yu dañá-yu ichi cuéhé
 ichi duha ndécú-yu, chi quide
 cahnu-ni-yu nchaa espíritú
 cündihí yucu ñávãha, ndihi
 nchaa sá càhí-yu cùu ndióxí
 ní cadúha cue téé ñuyúú-a,
 te dava xíãⁿ ní cuáha mee-ni
 díhúⁿ cuááⁿ, te dava ní cuáha
 mee-ni díhúⁿ cuíxíⁿ, te dava
 ní cuáha sá nání bróncé, te
 dava ní cuáha mee-ni yúú, te
 dava ní cuáha mee-ni yùtnu,
 te nchaa xíãⁿ ñà túú cùtnuní
 núú-xi, te ní ñà túú tècú
 dóho-xi, te ní ñã ndácú-xí
 càca-xi. 21 Te ní sá sãhí

tnàhá-yu, te ni sǎ sǎhni ndùu
tnahá-yu, te ni sǎ ndécũ-yu
ichi díí iní, te ni sà dúhú
ndàchiuⁿ tnahá-yu ñá túú ní
cuíní-yu dañá-yu.

10

Ïⁿ espíritú xínú cuèchi núú

Yǎ Ndiõxí néhé-xí ïⁿ librú

¹ Te sǎtá dúcáⁿ te ní xiní
tucu-í ïⁿ espíritú cúnúu xinu
cuechi núú Yǎ Ndiõxí ní
quee-xi andiu, te yíhi-xi
xití vícò cuǎnguee-xi ñuyúú
te ndàa díquí-xi ndècu ïⁿ
cóo yáhnchí, te núú-xi súúní
chàhnchí dàtná chàhnchí
núú nchicanchii, te ndi ndùu
díhíⁿ-xi càa datná cáá itá
ñuhú. ² Te nùndaha-xi ïⁿ
librú líhli ní nandicá, te
sáhá cùha-xi ní sani-xi núú
ndute làmár, te sáhá dàtni-xi
ní sani-xi núú ñuhu yìchí.
³ Te espíritú-áⁿ ñíhi vîhi
ní cáháⁿ-xi, te ní quide-xi
dàtná quidé ïⁿ ndicaha oré
cánásàa-di, te òré ducaⁿ ñíhi
vîhi ní cáháⁿ-xi te úsá xito
ní cáháⁿ ñúhu. ⁴ Te sǎtá ñí
yáha ní cáháⁿ ñúhu-áⁿ úsá xito,
te chido tñuní-í ïⁿ núú tütú
nàcuáa ní cáháⁿ-xi ní cùu, te
mei òré-áⁿ ñí tecú dóho-í ní
cáháⁿ ïⁿ sá ñí cáháⁿ andiu te
càchí-xi:

—Vá chídó tñuní-n nàcuáa
ní cáháⁿ ñúhu-áⁿ, iní méé-ní-n
ná cùhuⁿ —duha càchí sá ñí
cáháⁿ-áⁿ.

⁵ Te espíritú sá nútñí ïⁿ xio
sáhá-xi núú ndute làmár-áⁿ
ndíhi ingá xio sáhá-xi núú
ñuhu yìchí-áⁿ ñí xiní-í ní
ndonehe-xi ndaha cùha-xi,
⁶ te càchí-xi:

—Yá Ndiõxí Yáá ndécú
nchàa nduu nchaa quíú Yáá

ní cadúha ñuyúú, ndíhi andiu,
ndíhi làmár, ndíhi nchaa sá
ió, Yáá-áⁿ náhá ndáá-gá sá
yùhú càháⁿ ndáá-í, te vá cùyàa
vîhi ⁷ te cada-xi nchaa nàcuáa
ndùu tñuhu ndùu yuhu ní
cáháⁿ-gá, tñuhu ní xáhaⁿ-gǎ
xii cue téé ní xinu cuechi
núú-gǎ, cue téé ní xóo cáháⁿ
tñuhu-gá ndéé sanaha, chi
òré ná tìú espíritú cúú úsá
cútú néhé-xí, te òré-áⁿ cada-xi
nchaa nàcuáa ndùu tñuhu
ndùu yuhu sá ñí xáhaⁿ-gǎ xii
nchaa cue téé-áⁿ —duha càchí
espíritú-áⁿ.

⁸ Te sǎtá dúcáⁿ te ní tecú
tucu dóho-í ní cáháⁿ tucu sá
ñí cáháⁿ andiu-áⁿ, te càchí-xi
xii-í:

—Cuaháⁿ te queheⁿ-n librú
líhli sá ñí nandicá nùndaha
espíritú-áⁿ, espíritú sá nútñí
ïⁿ xio sáhá-xi núú ndute
làmár, te ïⁿ xio sáhá-xi núú
ñuhu yìchí —duha càchí sá ñí
cáháⁿ-áⁿ.

⁹ Te yúhú ní sáháⁿ-í núú
ndécú espíritú-áⁿ xicáⁿ-í librú
líhli nèhe-xi-áⁿ, te ní cachí-xi:

—Iha te caxi-n, te cuvídí
yuhu-n dàtná cuvídí òré xíhí-n
ndudí ñúñú, dico xití-n chi
cada úa-xi —càchí-xi.

¹⁰ Te ní queheⁿ-í librú líhli
nùndaha espíritú-áⁿ ñí xexi-í,
te yuhu-í ní quide vídí-xi
dàtná vídí ndudí ñúñú, dico
sǎtá ñí ngava-xi xití-í te ní
quide úa-xi. ¹¹ Te ní cachí
tucu espíritú-áⁿ xii-í:

—Dacuití cáháⁿ tucu-n
nàcuáa càchí Yǎ Ndiõxí
cuèndá ñáyiu titní víhí nàción,
ndíhi cuèndá ñáyiu titní víhí
ñúú, ndíhi cuèndá ñáyiu càháⁿ
ndí dííⁿ ndí dííⁿ núú tñuhu,

ndihi cuendá cue tée yíndaha ñáiyu.

11

Cuendá úú cue tée cãháⁿ nãcuáa cãchí Yã Ndiõxí

¹ Te ní níhi-í ñⁿ tnuyoo nãcuáa chicùhá-í ñⁿ sã chicùhá-í, te ní cãháⁿ ñⁿ sã ní cãháⁿ, te cãchí-xi:

—Ndacuñí te chicùhá-n vehe Yã Ndiõxí, te chicùhá tucu-n núú sácõdó sã ndúú tãhú-gã, te cahu-n nã daha tnàhá ñáiyu chiñuhu ñaha xii-gã xĩndecu. ² Dico

vá chicùhá-n ndaa quehé vehe-gã, chi xíaⁿ ñí nduu cuendá cue ñáiyu ñá túú cùu ñáiyu isràél, te ñáiyu-áⁿ nduu nuu-nã-yu núú ñí cuu ñuú-gã, te cadá-yu dàtná cãchí iní méè-yu, te údico úú yóo ducaⁿ cadá-yu. ³ Te yúhú tendaha-í úú tnàhá cue tée cãháⁿ yuhu-í nãcuáa cãchí Yã Ndiõxí, te úxúú ciendú únídico nduu ducaⁿ cãháⁿ-güedé yuhu-í cada-güedé núú-í, te cuihnu-güedé dóo tnúú sã sãcuñhu cue ñáiyu ndihú iní-xi —duha cãchí sã cãháⁿ-áⁿ.

⁴ Te ndi ndúú cue tée-áⁿ cúu-güedé dàtná úú yutnu òlívú sã xĩnutnñí núú Yã Ndiõxí, ndihi dàtná úú sã ndéé dité-xi, sã yíndòdo ñⁿ caa candíl núú dité-xi ndècu tucu núú-gã, te ñu-gã cúu-gã Yaá yíndaha ñuyúú. ⁵ Te

ñáiyu na càni iní-xi ná cada ñaha xì-güedé te yuhu-güedé quene ñuhú cahmí ñaha-xi xìi-yu, te ducaⁿ cada-güedé cahni-güedé nchaa ñáiyu na cùu úhú iní ñáhá

xì-güedé. ⁶ Te ndi ndúú-güedé ndécú ndihi-güedé tnúhu ndee iní cada-güedé sã vã cúuⁿ dãú, te ducaⁿ cada-güedé ñini cãháⁿ-güedé nãcuáa cãchí Yã Ndiõxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáiyu titní núú tnúhu ndòho, te ducaⁿ cada-güedé ná daha xito cãchí iní méé-güedé.

⁷ Te nã yáha sã cãháⁿ-güedé nãcuáa ní cachí Yã Ndiõxí, te dàvá-áⁿ quene ñⁿ quiti dééⁿ yàú cùnú víhí sã ño nèhé cáá, te quiti-áⁿ ngüita-di nãá-di ndihi ndi ndúú cue tée-áⁿ te cahni ñaha-di xì-güedé.

⁸ Te yiqui cunú cue tée-áⁿ cautùu-xi ñⁿ tnuú ñuú cáhnú núu ní sahani-güedé Xitohó Jesucristú núú cùrúxí, te ñu Yaá-áⁿ cúú Xitohó-ó ndihi-güedé, te cãchí ñáiyu sã ñuú-áⁿ cúu-xí dàtná ñuú Sòdomá ndihi nacióⁿ Ègíptú.

⁹ Te úní nduu dava cautùu yiqui cunú-güedé xíaⁿ, te ñáiyu nchaa nacióⁿ, ndihi ñáiyu nchaa ñuú, ndihi ñáiyu cãháⁿ ndí ñíⁿ ndí ñíⁿ núú tnúhu, ndihi ñáiyu xĩndecu nchaa xichi quini-yu yiqui cunú-güedé, te vá dàñã-yu nguíndüxi. ¹⁰ Te nchaa ñáiyu-áⁿ nduu vétú iní-yu sã dúcáⁿ cùú cue tée cãháⁿ nãcuáa cãchí Yã Ndiõxí-áⁿ, te ío cudí^í iní-yu, te nándi sã cuãha tãhú tnãhã-yu sã cúdí^í iní-yu sã dúcáⁿ ñí xihí-güedé, te ducaⁿ chi ñu-güedé ní quide ío ní ndohó-yu. ¹¹ Te

sátá ná yãhá úní nduu dava sã

dúcáⁿ cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyi na quení sá ndótó-güedé te yùhú víhí-yu. ¹² Te ndi ndùú cue téé-áⁿ tecú dóho-güedé cáháⁿ ìⁿ sá cáháⁿ ndéé andi, te cúñaha-xi xii-güedé:

—Chí táquène iha —duha cúñaha sá cáháⁿ-áⁿ xii-güedé.

Te cue téé-áⁿ quíhu-güedé ìⁿ xití vícò caa-güedé andi, te nchaa ñáyi cùú úhú iní ñáhá xii-güedé quini ñáhá-yu xii-güedé caa-güedé andi. ¹³ Te òré-áⁿ ñihí víhi tnáa ñuyú, te úxí xichí cùú-xi ñúú núú cùndecu-güedé-áⁿ te ìⁿ xichí ñúú-áⁿ naa, te cuú úsá mìl ñáyi, te nchaa dava-gá ñáyi cácu vá cùú yùhú víhí-yu, te cachí-yu sá ò cànnyu cuu Yá Ndiöxí Yaá ndécú andi.

¹⁴ Te tnúndòho-a cuu-xi tnúndòho cuu úú yáha, te vitna sa ndètu vii-ná tucu sáá tnúndòho cuu uní.

Espiritú cúú ùsá tíú-xi cútú néhé-xí

¹⁵ Te espíritu cúú ùsá ní tíú-xi cútú néhé-xí, te òré-áⁿ ñi tecú ñihí ní cáháⁿ titní sá ñi cáháⁿ andi, te cächí-xi:

Nchaa sá cúú cuendá nchaa ñáyi ñuyú táxi tnùnnyu ní cùú ní nduu cuendá Tátá-ó Dútú Ndiöxí táxi tnùnny-gá,

Te tnáhá Yaá ní tendaha-gá ní sáháⁿ ñuyú táxi tnùnny-gá nchaa xíáⁿ, te diu-gá taxi tnùnny-gá ñi caa ñi quíhíⁿ.

Duha ní cáháⁿ nchaa sá ñi cáháⁿ-áⁿ. ¹⁶ Te ndi òcò

cúmí cue téé sacuéhé xñucóo núú xilé váha ní ngüíñí xití-güedé núú Yá Ndiöxí, te ní nuu núú-güedé ndàa núú ñúhú te ní ngüíta-güedé chíñuhu ñaha-güedé xii-gá, ¹⁷ te cächí-güedé:

Ío ndacáⁿ táhú-ndí núú yòhó Dútú Ndiöxí,

Yaá ndacú quide nchaandi túhú sá váha,

te diu-ni-n ndècu-n ndéé cùtnáhá ní ngáva ñuyú, te diu-ni-n ndècu-n vitna, te diu-ni-n cùndecu-n ndéé núú cuaháⁿ núú vèxi,

te ío cànnyu cuu-n te ní ngüíta-n ò-gá táxi tnùnny-n.

¹⁸ Te nchaa ñáyi xñdecu ñuyú xicudèⁿ-yu núú-n,

te vitna ní sáá nduu dàndohó-n-yu chí ñá túú cùú váha iní-n núú-yu,

te cada ndáá-n cuèchi nchaa ñáyi sa ní xihí,

te ní sáá tucu nduu cuañaha-n sá ndúú táhú nchaa ñáyi ní xinu cuechi núú-n ñi cáháⁿ-yu tnúhu-n, ndihí nchaa dava-gá ñáyi cùú cuendá-n, chí ñáyi-áⁿ néhè-yu sá yíñuhu núú-n,

te cuèi ñáyi cùnuu ndihí ñáyi ñá túú cùnuu cuañaha-n sá ndúú táhú-yu,

te ní sáá tucu nduu dànaa-n nchaa ñáyi sàhni tnaha ñáyi-xi.

Duha cächí ndi òcò cúmí cue téé sacuéhé-áⁿ xáhaⁿ-güedé xii Yá Ndiöxí.

19 Te ní xiní-í ní nacaáⁿ yuyèhe vehe Yá Ndiöxí andiü, te xití vehe-gá-áⁿ nĩ xiní-í ndécú cajú ñúhú sã yódó tnùnì nàcuáa ní cundáa cada-gá sá cúú-xí ñäyiu, te òré-áⁿ nĩ xiní-í ní sáá nduté, te ní cáháⁿ ñúhu te ío dusaⁿ nĩ quide-xi, te níhi vñhi ní tnáa, te súúni càhnu dáú ññí nĩ cuuⁿ.

12

Cuèndá ññ ñadìhí ndihì cuèndá ññ quiti dééⁿ nánì dràgón

1 Te ío vñhi ní quide-xi ññ sá nĩ quide-xi andiü, te ní xiní-í ññ ñadìhí te dóó níhnú-áⁿ quide-xi datná quidé-xí nũú nchĩcanchii, te ndàa núú sàhá-aⁿ quide-xi datná quidé-xí nũú yóó, te ñúhu ññ coroná díquí-aⁿ te ndèé úxúú chódínì. 2 Te ñúhu déhe-aⁿ te càna saa-aⁿ sá quidé ùhú ñáhá-xí xii-aⁿ chi sa ndètu vii-nã cacu déhe-aⁿ. 3 Te dátñùnì ní quide tucu-xi sá nĩ quide-xi andiü, te ní xiní-í ññ quiti càhnu quiti ticuehé, quiti dééⁿ nánì dràgón, te ndèé úsá díquí-di ndihì úxí ndiqui-di, te ññ caa coróná ñúhú ññ caa díquí-di-áⁿ. 4 Te quiti-áⁿ luha-ná te cuu dava nchaa chódínì dängöyo-di ñuyú ndihì lúhmá-di, te quiti-áⁿ nì ngúnu tnñ-di núú ñaha ndètu vii-nã cacu déhe-xi-áⁿ cuèndá caxi-di déhe-aⁿ òré cacu nì cùu. 5 Te ñaha-áⁿ nĩ cacu déhe-aⁿ te téé cùu-dé, te té lñhli-áⁿ ío cunuü-dé taxi tnùnì-dé nchaa ñäyiu ñuyú, te mee Yá Ndiöxí ní nacuaca ñaha-gã xii té lñhli-áⁿ cuèndá cundecu ndihì ñaha-dé xii-gá núú ndécú-gã

táxi tnùnì-gá. 6 Te ñadìhí-áⁿ nĩ xinü-aⁿ cuáhá-aⁿ xití yucu núú nĩ quide túha Yá Ndiöxí cundecu-aⁿ cuèndá xiáⁿ nñhí-aⁿ caxi-aⁿ, te ducaⁿ nñhí-aⁿ sá caxí-áⁿ ùxúú cièndú únídico nduu chi ducaⁿ nduu cundecu-aⁿ xiáⁿ.

7 Te sátá dúcáⁿ te andiü nĩ xiní-í espíritú cúnüu xinü cuechi núú Yá Ndiöxí nánì Mìguél, ndihì nchaa dava-gá espíritú cundìhì-xi, te nchaa espíritú-áⁿ nàa-xi ndihì quiti dééⁿ nánì dràgón ndihì nchaa espíritú cundìhì-di. 8 Te quiti-áⁿ ñà túú ní ndàcu-di ndihì nchaa espíritú cundìhì-di, te ñà túú ní nñhí-gã-di núú cundècu-di andiü ndihì nchaa espíritú cundìhì-di-áⁿ. 9 Te cue espíritú xínú cuèchi núú Yá Ndiöxí-áⁿ nĩ dängává-xi quiti dééⁿ nánì dràgón-áⁿ ndihì nchaa espíritú cundìhì-di ñuyú, te quiti-áⁿ cúú-dí mèi sácúhná àdi sá càchí-ó cùu yucu ñávaha, te diu xiáⁿ ní dándàhú-xi ñäyiu nñhì ñuyú, te diu-ni xiáⁿ ní nduu-xi cóó nĩ dándàhú-xi ñäyiu ndéé sanaha.

10 Te ní tecú dóho-í níhi ní cáháⁿ tucu ññ sá nĩ cáháⁿ andiü, te càchí-xi:

—Vitña te Yá Ndiöxí ní quide-gá ní ngúndecu ñäyiu ndihì-gá, te ío càhnu cuu-gá, te ío tàxi tnùnì-gá, te tnáhá Crìstú Yaá ní tendaha Yá Ndiöxí ní quixi ñuyú-a ío tàxi tnùnì-gá, te ducaⁿ chi sa ní xócúñí sácúhná sã súúni nùnüu sacáⁿ cuèchi núú Tãtá-ó Dütú Ndiöxí cuèndá nchaa ñäyiu ndècu

ndihi-o ichi-gá, te nduu niú ducaⁿ sàcáⁿ cuéchi-xi núú-gá cuendá-yu ni cùu. ¹¹ Dico ní ndacú-yu ní cunúu-yu núú sàcuíhná sã dúcáⁿ sàcáⁿ cuéchi cuendá-yu-áⁿ ní cùu, te ducaⁿ nĩ cunúu-yu sá cuendá Yaá cáá datná cáá ìⁿ mbéé quiti ní dānicuèhé-güedé, chi Yaá-áⁿ nĩ sati níñi-gã te ní xihí-gá sá cuendá-yu, te ducaⁿ nĩ cunuu tucú-yu sá cuendá sá sàndáá iní ñãhã-yu xii Yaá-áⁿ, te ñã túú ní yuhú-yu cuú-yu sá cuendá-gá. ¹² Te vitna ío chí cúdí ìní nchaa nchòhó espíritu xínú cuéchi núú Yã Ndiòxí, ndihi nchaa nchòhó ñáyiú ndècu andiú, dico ìndàhú ní cuu nchaa ñáyiú xĩndecu nihí ñuyíú! Chi súuní cùdééⁿ sàcuíhná nĩ ngava-xi te nāndi cada ñaha-xi xii-yu, te ducaⁿ chi cùnuní iní-xi sá sàcú duha-ná nduu cudí-xi cundecu-xi —duha càchí sá nĩ càháⁿ andiú.

¹³ Te sátá nĩ quee quiti dééⁿ nání dràgón-áⁿ andiú nĩ ngava-di ñuyíú quiti cùu mei sàcuíhná-áⁿ, te quiti-áⁿ nĩ chinchícúⁿ-di ñadìhí ñaha ní cacu déhe téé-xi-áⁿ. ¹⁴ Te ñadìhí-áⁿ nĩ nduu táhú-aⁿ ní quene úú ndíxi-aⁿ, te càa datná cáá ndíxiⁿ ìⁿ yacòlo cahũ vihi cuendá ndava-aⁿ núhú-aⁿ yucu núú nĩ cachí Yã Ndiòxí cundecu-aⁿ, te yàcáⁿ cundecu-aⁿ úní cuía daya cuendá sá vã nihí ñáhã quiti dééⁿ quiti nāni dràgón-áⁿ te xiáⁿ nihí-aⁿ sá caxí-áⁿ, te quiti-áⁿ cúú tucú-di datná ìⁿ cóo dééⁿ. ¹⁵ Te quiti-áⁿ nĩ quene cuéhé ndute yuhu-di, te ndute ní quene yuhu-di-áⁿ

nĩ cuu-xi ìⁿ yúte, te ducaⁿ nĩ quide-di cuendá ndute-áⁿ cuido-xi ñadìhí-áⁿ ní cùu. ¹⁶ Te ñuhu yichí ní chindee-xi ñadìhí-áⁿ, chi ní ndátá te ní quée naa-ni ndute ní quene yuhu quiti-áⁿ. ¹⁷ Te sá dúcáⁿ nĩ quide-xi xiáⁿ ní cudééⁿ víhí quiti-áⁿ núú ñadìhí-áⁿ, te ní xica-di cuáhã-di núú xĩndecu nchaa dava-gá cue déhe ñadìhí-áⁿ cuendá nàá ndihi ñaha-di, te ñáyiú-áⁿ cúu-yu ñáyiú tñi nchaa tnúhu càháⁿ Yã Ndiòxí, te nchicúⁿ nihnú-yu nchaa tnúhu sá càháⁿ váha cuendá Xitohó Jesucristú.

13

Cuendá úú quiti

¹ Te yuhú ní ngũnu tñi-í yuhu làmár, te ní xiní-í ní quene ìⁿ quiti te ndèé úsá díquí-di te úxí ndiqui-di, te núú ìⁿ ìⁿ ndiqui-di-áⁿ ndécú ìⁿ caa coroná. Te ìⁿ ìⁿ díquí-di-áⁿ ndèé tnúhu sá càháⁿ úhú-xi cuendá Yã Ndiòxí. ² Te quiti-áⁿ cáá-dí datná cáá cuíñí, te sáhã-di càa datná cáá sãhá òso, te yuhu-di càa datná cáá yuhu ndicaha. Te quiti dééⁿ nání dràgón ní sãñaha-di tnúhu ndee ìní xii quiti-áⁿ cuendá taxi tñuní víhí-dí, te dràgón-áⁿ nĩ sãñaha-di núú ndécú-dí taxi tñuní-di xii quiti ní quene xití làmár-áⁿ, te ducaⁿ nĩ quide-di cuendá sá nihí ndèé quiti-áⁿ cunuu-di. ³ Te ìⁿ díquí quiti ní quene xití làmár-áⁿ càhú víhí càa ní nícuèhé, te sa ndètu

vii-nã cuú-di sànuu dico ní ndúha-di, te nihí ñuyú ní níhí ñáyu tnúhu sá dúcáⁿ ní cuu, te ío ní cuñúhu-yu te ní tuhá-yu quiti-áⁿ. ⁴ Te nchaa ñáyu-áⁿ ní cachí-yu sá ío càhnu cuu quiti déeⁿ quiti nàni dragón-áⁿ cuendá sá ní sãhaha-di tnúhu ndee ìní sá táxí tnùní quiti ní quene xití làmár-áⁿ, te ní ngúita-yu ní chiñuhú-yu quiti ní quene xití làmár-áⁿ, te càhí-yu:

—Vá yõo ñⁿ nũtnahá ñáhá xii quiti-a, te ní vã yõo ñⁿ ndacu nã ndihí ñaha xii-di — cachí-yu.

⁵ Te ní níhí-di tnúhu ndee ìní sá càháⁿ úhú-di Yá Ndiõxí, te cada càhnu-di mee-di, te údico úú yóo ducaⁿ ní níhí-di tnúhu ndee ìní-áⁿ cunuu-di. ⁶ Te ducaⁿ ní quide-di ní càháⁿ úhú-di Yá Ndiõxí ndihí cuendá nchaa sá quidé-gã, te ñu-ni ducaⁿ ní càháⁿ úhú-di núú ndécú-gã, te ní càháⁿ úhú tucu-di nchaa ñáyu ndecu ndihí-gá andiu. ⁷ Te ducaⁿ ní níhí-di tnúhu ndee ìní sá nãá-di ndihí nchaa ñáyu cùu cuendá Yá Ndiõxí, te ducaⁿ nã ndihí ñaha-di xii-yu ndéé òré vá ndácú-gã-yu nã ndihí ñáhá-yu xii-di, te tnàhá ní ngúndecu ndihí-di tnúhu ndee ìní sá táxí tnùní-di ñáyu nchaa nacióⁿ, ndihí ñáyu nchaa ñuú, ndihí nchaa ñáyu càháⁿ ndí dííⁿ ndí dííⁿ núú tnúhu, ndihí ñáyu xndecu nchaa xichi. ⁸ Te cue ñáyu nihí ñuyú ní cachí-yu sá ío càhnu cuu quiti-áⁿ, te ñáyu-áⁿ cúu-yu ñáyu ñá túú yòdo tnuní núú tütú Yá

cáa dàtná cáa ñⁿ mbéé quiti ní dancuèhé-güedé Yá ní xihí ní cùu te ní ndoto. Te ndéé cùtnahá ní ngáva ñuyú sa yòdo tnuní ñáyu nanihí tàhú, dico ñáyu càhí sá ío càhnu cuu quiti-áⁿ ñá túú yòdo tnuní-yu núú tütú-gá.

⁹ Te nchaa nchòhó ñáyu xñdedóho chí cùndedóho váha nchaa nãcuáa cuáháⁿ tnúhu-áⁿ. ¹⁰ Te nchaa ñáyu na chìhí tnaha ñáyu-xi vecaá te sáá nduu te quihíⁿ-yu tnàhá-yu vecaá, te nchaa ñáyu sàhni tnaha ñáyu-xi ndihí yuchí te ñu-ni ndihí yuchí cuú-yu tnàhá-yu, te xiãⁿ núú ío xini ñuhu-xi sá ncháá ñáyu cùu cuendá Yá Ndiõxí cunduu càhnu ìní-yu, te quindáá ìní ñáhã-yu xii-gá.

¹¹ Te ní xiní tucu-í ingá quiti ní quene-di núú ñuhu yìhí, te ndéé úú ndiqui-di te càa datná cáa ndiqui canerú, te càháⁿ-di dàtná càháⁿ quiti déeⁿ nání dragón. ¹² Te dàtná ndécú ndihí quiti ní quene xití làmár-áⁿ tnúhu ndee ìní sá táxí tnùní-di ducaⁿ ndecu ndihí quiti ní quene ñuhu yìhí-áⁿ tnúhu ndee ìní taxi tnùní-di cada-di núú quiti ní quene xití làmár-áⁿ, te quiti ní quene ñuhu yìhí-áⁿ ní quide yica-di sã ncháá ñáyu xndecu nihí ñuyú chiñuhú-yu quiti ní quene xití làmár-áⁿ, quiti càhú víhí ní tnahá ní nícuèhé te ní ndúha-di. ¹³ Te quiti ní quene xití ñuhu yìhí-áⁿ ní quide-di titní núú sã vã yõo tnàhí ndacu cada, te nchaa ñáyu ní xiní-yu sá

ndèé andiu nĩ dǎngóyó-dĩ ñùhú ñuyíú. ¹⁴ Te sá dúcáⁿ nĩ ngúndecu ndihí-di tnúhu ndee ìní ní quide-di nchaa xǎⁿ ní quide-di núú quiti ní quene xití làmár-áⁿ, te sá dúcáⁿ nĩ quide-di te xǎⁿ ní dándàhú-di nchaa ñáyíu xǎndecu nihí ñuyíú, te ní xáhaⁿ-di xii-yu sá ndúcũ-yu ìⁿ sá cádüha-yu nàcuáa-ni càa nacuáa-ni ndùu quiti ní quene xití làmár-áⁿ, quiti càhú víhí nĩ tnahá ní nícuèhé díquí-xi-áⁿ nĩ quée machití te ñá túú ní xǎhí-di chí ní xǎndecu-ni-di. ¹⁵ Te quiti ní quene xití ñuhu yìchí ní ngúndecu ndihí tucu-di tnúhu ndee ìní sá chíhí-dĩ ìní sá nĩ cadúha-yu-áⁿ, sá nĩ natavá-yu dàtná cáá quiti ní quene xití làmár-áⁿ, te ducaⁿ nĩ quide quiti-áⁿ cuèndá cáháⁿ sá nĩ cadúha-yu-áⁿ, te xǎⁿ cada-xi cuú nchaa ñáyíu ñá túú ní cuìní chiñuhu ñaha xii-di. ¹⁶ Te quiti ní quene xití ñuhu-áⁿ quidé-dĩ sǎ ncháá ñáyíu ngúndéé ìⁿ tñuní ndaha cùhá-yu àdi tneé-yu, te ducaⁿ nĩ quide-di cuèi ñáyíu cùnuu te cuèi ñáyíu ñá túú cùnuu, te cuèi ñáyíu cuica te cuèi ñáyíu ndàhú, te cuèi ñáyíu ñá túú dàñá quee núú chíúⁿ pàtróóⁿ-xi, te cuèi nchaa ñáyíu dàñá quée núú chíúⁿ pàtróóⁿ-xi ncháá-yu ducaⁿ nĩ ngúndéé tñuní ñíⁿ-yu. ¹⁷ Te ní quide-di sá ncháá ñáyíu ñá túú ndèé tñuní ñíⁿ-xi vá cúú cuàáⁿ-yu sá càchí ìní-yu te ni vǎ cúú dicó-yu ìⁿ sá cuìní-yu dicó-yu, te tñuní-áⁿ cúú-xí dìu quiti ní quene

xití làmár-áⁿ àdi númerú-di. ¹⁸ Te xini ñuhu-xi sǎ ncháá ñáyíu ío váha cùtnuní ìní-xi ío váha cuáha-yu cuèndá nàcuáa quèe-xi númerú quiti-áⁿ, te númerú-áⁿ cúú-xí ìñú cièndú únídico ìñú, te cùu-xi cuèndá ìⁿ ñáyíu ñuyíú.

14

Cuèndá ìⁿ cièndú údico cúmí mǐl ñáyíu

¹ Te sáta dúcáⁿ te ní xiní-í Yáá cáá dàtná cáá ìⁿ mbéé quiti ní dǎnicuèhé-güedé nútní-gá ìⁿ yucu ñúú nání Sión ndécú andiu, te nutní-gá ndihí ìⁿ cièndú údico cúmí mǐl ñáyíu, te tneé-yu ndèé dìu-gá ndihí dìu tátá-gǎ Dútú Ndióxi. ² Te ní tecú dóho-í ní quide-xi andiu dàtná quidé-xi núú xicá cuèhé víhí ndüte, te quide tucu-xi datná quidé-xi òré níhi vìhi caháⁿ ñúhu, te quide tucu-xi datná quidé-xi òré cuèhé víhí ñáyíu cǎní-yu àrpá. ³ Te ní tecú dóho-í xixita yuhu sǎ xítá yùhu núú Yáá núcõo núú xilé váha, ndihí núú ndi cùmí cue quiti xǎnutní-áⁿ, ndihí núú ncháa cue téé cùu sacuéhé xǎnucóo-áⁿ, te xixita-xi ìⁿ ndudú sáá. Te mee-ni cuè ñáyíu ìⁿ cièndú údico cúmí mǐl-áⁿ quée díquí-yu ndudú-áⁿ, te ñáyíu-áⁿ cúú-yu ñáyíu ní dácǎcu nihnu ñaha Yáá cáá dàtná cáá ìⁿ mbéé quiti ní dǎnicuèhé-güedé núú ñáyíu ndècu ichi cuehé ichi duha xǎndecu ñuyíú, te vá yõo ìⁿ-gá quée díquí-xi ndudú sáá-áⁿ chí mee-ni ñáyíu ní cácu nihnu-áⁿ quée

díquǐ-yu. ⁴ Te ñáyiú ní cácu nihnu-áⁿ cúǔ-yu ñáyiú ñá túú ní xĩndecu ichi díí ínì, te cúú-yu ñáyiú càndoo canine iní-xi, te nděni ní cuu cuáháⁿ Yaá cáá dàtná cáá ìⁿ mbéé quiti ní nícuèhé-áⁿ, te ducaⁿ-ní nděndaha ñàhá-yu xii-gá cuáháⁿ, te ñáyiú-áⁿ ní cácu nihnú-yu núú nchàa ñáyiú ñuyíú, ñáyiú ndècu ichi cuèhé ichi duha, te ñáyiú ní cácu nihnu-áⁿ cúǔ-yu ñáyiú díhna nuu ní nduu táhú Yá Ndiòxí cuu cuèndá-gá ndihì Yaá cáá dàtná cáá ìⁿ mbéé quiti ní dánìcuèhé-güedé. ⁵ Te cúú-yu ñáyiú ñá túú càháⁿ ní ìⁿ tnúhu ndehnde, te càndoo canine iní-yu ndècú-yu núú núcõo Yá Ndiòxí táxi tnùnì-gá.

Cuèndá únì cue espíritú xínú cuèchi núú Yá Ndiòxí

⁶ Te sátá dúcáⁿ te ní xini-í ìⁿ espíritú xínú cuèchi núú Yá Ndiòxí xícó-xi cuádava andiu, te ndècu ndihì-xi tnúhu sá càháⁿ nàcuáa naníhì tãhú-ó, tnúhu sá ñà túú tnàhì ndihì nihnu te tnúhu-áⁿ danèhé espíritú-aⁿ nchaa ñáyiú ndècu ñuyíú, ñáyiú nchaa nacióⁿ, ndihì ñáyiú nchaa ñuú, ndihì nchaa ñáyiú càháⁿ ndí dííⁿ ndí dííⁿ núú tnúhu, ndihì ñáyiú xĩndecu nchaa xichì. ⁷ Te níhi ní càháⁿ-xi te càchì-xi:

—Nchaa nchòhó ñáyiú ndècu ñuyíú canehe-ndo sã yíñùhu núú Yá Ndiòxí, te cachì-ndó sã ìo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gá chi diu-gá ní cadúha-gá andiu, ndihì ñuhu yìchì, ndihì làmár, ndihì

nchaa ndóhyo —duha càchì espíritú-áⁿ.

⁸ Te nchìcúⁿ tucu ingá espíritú xínú cuèchi núú Yá Ndiòxí, te càchì-xi:

—Vitna ní naa ñuú Babiloniá ñuú ìo cùnunu, te ducaⁿ ní naa chi cue ñáyiú ñuú-áⁿ ní quidé-yu ní xíta nihnu nchaa ñáyiú nihì ñuyíú, chi ní sanu ichi ñàhá-yu ichi cuèhé ichi duha —duha càchì espíritú-áⁿ.

⁹ Te nchìcúⁿ tucu ingá espíritú xínú cuèchi núú Yá Ndiòxí te níhi càháⁿ-xi, te càchì-xi:

—Nchaa ñáyiú chiñuhu ñaha xii quiti ní quene xití làmár, ndihì sá ní natava ñàhá-yu nàcuáa cà-di-áⁿ, ñáyiú ní dáñá mèe-xi ní ngúndéé tnunì ndahá-yu àdi tneé-yu, ¹⁰ ñáyiú-áⁿ sùúni dàndoho ñaha Yá Ndiòxí xii-yu chi ìo cùdéeⁿ-gã, te ducaⁿ ìo dandòho ñaha-gá xii-yu chi daquihìⁿ ñàhá-gã xii-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã ducaⁿ dàndoho ñaha-gá xii-yu, ndihì núú Yá cáá dàtná cáá ìⁿ mbéé quiti ní dánìcuèhé-güedé. ¹¹ Te ni caa ni quihìⁿ quene ñùhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyiú chiñuhu ñaha xii quiti ní quene xití làmár, ndihì sá ní natava ñàhá-yu nàcuáa cà-di-áⁿ, te diu-ni ñáyiú-áⁿ cúǔ-yu ñáyiú ní ngúndéé

tnuní ndaha-xi àdi tneé-xi — duha càchí espíritú-áⁿ.

12 Te xí^án xíní ñùhu-xi sá ncháá ñáyiú cùu cuendá Yá Ndiöxí cunduu càhnu iní-yu, chi diu-ní-yu cùú-yu ñáyiú tñi nchaa tnúhu càháⁿ-gá, te ni yùhu ni iní-yu sàndáá iní-yu Xítohó Jesucristú.

13 Te sátá dúcáⁿ te ní tecú dóho-í ní cáháⁿ ñⁿ sá ní cáháⁿ andiu, te càchí-xi:

—Chido tnùnì-n ñⁿ núú tùtù nàcuáa na càháⁿ-í-a. “Není vitna ío váha táhú nchaa ñáyiú sàndáá iní tnúhu Xítohó Jesucristú te xihí-yu” —duha càchí sá ní cáháⁿ-áⁿ.

Te Espíritú Yá Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gã nágá chiuⁿ ndohó-yu cadá-yu, te Yá Ndiöxí sa nàha-gá nchaa nàcuáa ndùu chiuⁿ ní quidé-yu —duha càchí Espíritú-gá.

Nchaa sá cúú núú ñúhú

14 Te sátá dúcáⁿ te dàtnùnì ní xíní-í ñⁿ vícò cuixíⁿ, te núú vícò-áⁿ ñí xíní-í núcòo ñⁿ Yaá, te càa-gá dàtná cáá ñⁿ téé ñuyíú, te díquí-gã ñúhú ñⁿ coroná ní cuáha mee-ni dñhúⁿ cuááⁿ, te nùndaha-gá ñⁿ yuchí ndíquí te súúnì dēéⁿ. 15 Te ní xíní-í ñⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní cáháⁿ-xi xáhaⁿ-xi xì Yáá núcòo núú vícò-áⁿ:

—Sa ní cuu nàquehndé-n ncháa sá ñí cuu ñuyíú ndihi yuchí ndíquí-n, chi sa ní cuu nucóo tnàha-xi —duha càchí espíritú-áⁿ xáhaⁿ-xi xì Yáá-áⁿ.

16 Te Yaá núcòo núú vícò-áⁿ ñí dáyáha ndodo-gá yuchí ndíquí-gã núú ñuyíú ñí nataxi tnàha-gá nchaa sá ñí cuu.

17 Te ní xíní tucu-í ingá espíritú xínú cuèchi núú Yá Ndiöxí ní quee-xi xití vehe-gá sá cáá àndiu, te nùndaha-xi tnahá-xi ñⁿ yuchí ndíquí dēéⁿ. 18 Te ní xíní tucu-í ní quee tucu ingá espíritú xínú cuèchi núú Yá Ndiöxí núú nùtnñi núú sácòdó sã ndúú táhú-gã, te ndècu ndihi-xi tnúhu ndee iní táxí tnùnì-xi ñuhú, te espíritú-áⁿ níhi ní cáháⁿ-xi xáhaⁿ-xi xì espíritú néhé yùchí ndíquí dēéⁿ-áⁿ:

—Ngúita naquehndé-n ndihi yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí espíritú-áⁿ xáhaⁿ-xi xì espíritú néhé yùchí ndíquí-áⁿ.

19 Te espíritú néhé yùchí ndíquí-áⁿ ñí dáyáha ndodo-xi yuchí ndíquí-xí núú ñuyíú ñí nàquehndé-xi nchaa ndéhé yoho yàha stilé, te ní chihi-xi ñⁿ xichi núú ñí chihi-xi cuendá xíáⁿ quihni-xi quee ndudí-xi, te sá dúcáⁿ ñí quide-xi xíáⁿ cùtnùnì iní-ó sã ío cùdēéⁿ Yá Ndiöxí núú ñáyiú ñuyíú. 20 Te ndéhé yoho yàha stilé-áⁿ ñí quihni-xi ñⁿ xio yuhu ñúú, te ndudí ndéhé yoho yàha stilé-áⁿ ñí nduu-xi níñí te ní quee-xi núú quíhni ñihnu espíritú-áⁿ. Te únì ciendú mìl mètrú ní xica níñí-áⁿ, te dàtná ñⁿ mètrú dava ní sáá cuehnu níñí-áⁿ ñí xica-xi.

15

Úsá tnúndòho

1 Te ío vìhi ní quide-xi ìⁿ sá nǐ quide-xi andi^u te ní cuñúhu vìhi-í, te ní xiní-í úsá tnàhá espíritú xínú cuèchi núú Yǎ Ndiǒxí, te ìⁿ ìⁿ cue espíritú-áⁿ ndécú ndìhi-xi tnúhu ndee ìní dandòho-xi ñáyiu ñuyíú, te nà yáha nchaa tnúndòho-áⁿ, te vǎ cúdèéⁿ-gǎ Yǎ Ndiǒxí núú-yu dándoho ñaha-gǎ xií-yu.

2 Te ní xiní-í ìⁿ làmár te ndute làmár-áⁿ cáá dàtná cáá vìdriú, te dàcánuu-xi ndìhi ñuhú, te yuhu làmár-áⁿ xĩnutnǐ nchaa ñáyiu ní ndacu ní dáquéé tǐhú ñáhá xìi quiti ní queene xití làmár-áⁿ, te ducaⁿ nǐ ndacú-yu ní dáquéé tǐhú-yu sá nǐ natava ñàhá-yu nàcuáa càa-di-áⁿ, te ducaⁿ nǐ ndacu tucú-yu ní dáquéé tǐhú tucú-yu númerú-di sá cúú dàtná diu-di, te nchaa ñáyiu-áⁿ nǐ nduu táhú-yu núú Yǎ Ndiǒxí àrpá xĩnehé-yu cuèndá caní-yu. 3 Te xixitá-yu ndudú sá nǐ xita ndíi Moisés ndíi ní xinu cuechi núú Yǎ Ndiǒxí ndéé sanaha, te xita tucú-yu ndudú Yaá cáá dàtná cáá ìⁿ mbéé quiti ní dánicuèhé-güedé, te càchí-yu:

Yòhó Dútú Ndiǒxí ío càhnu cuu-n, chí quide-n nchaa sá vǎ yòo tnàhi ndàcu cada,

te cùu-n Yaá ndácú quide nchaandi túhú sá vǎha, te ío ndáá quidé-n te ío ndáá càháⁿ-n, te yìndaha-n nchaa ñáyiu nihíi ñuyíú.

4 Te nchaa ñáyiu nèhé-yu sá yíñùhu núú-n,

te nchaá-yu càchí-yu sá ío càhnu cuu-n,

chí ìⁿndìi díi-ni yòhó cúú-n Yàá ío vǎha quide ndáá,

te nchaa ñáyiu nihíi ñuyíú natacá-yu chíñuhu ñàhá-yu xii-n,

te ducaⁿ càdá-yu chí ndèhé-yu nchaa sá vǎha quide-n.

Duha càchí ñáyiu-áⁿ xixitá-yu.

5 Te sátá dúcáⁿ te ní xiní-í ní nacaáⁿ yuyèhe vehe Yǎ Ndiǒxí andi^u, te xití vehe-gá-áⁿ ndécú sǎ ndèé tnúhu-gá. 6 Te xití vehe-gá-áⁿ nǐ quee úsá tnàhá espíritú xínú cuèchi núú-gǎ, te ìⁿ ìⁿ-xì ndècu ndìhi-xi tnúhu ndee ìní dandòho-xi ñáyiu, te xixihnu-xi mee-ni dǒó vǎha, te súúní vǎha càndoo, te chàhnhí, te yidúcúⁿnuu cìnchú ní cuáha mee-ni dǐhúⁿ cuááⁿ pèchú ndi úsá cue espíritú-áⁿ. 7 Te ìⁿ quiti cúmí xĩnutnǐ núú núnǐ xilé vǎha ní sǎñaha-di ìⁿ caa sá nàhá tícúú ní cuáha mee-ni dǐhúⁿ cuááⁿ xii ìⁿ ìⁿ espíritú-áⁿ, te xití nchaa tícúú-áⁿ ñuhú ìⁿ sá ñuhú te xiáⁿ cutnúní sá Yǎ Ndiǒxí dandòho-gǎ ñáyiu ñuyíú, te diu-gǎ cúú-gǎ Yàá ndécú nchaa nduu nchaa quíú. 8 Te xití vehe-gá-áⁿ nǐ chítú ñǐhmá, te ducaⁿ nǐ quide-gǎ cuèndá cutnúní ìní ñáyiu sá ío càhnu cuu-gǎ táxí tnúní-gǎ, te vǎ yòo ìⁿ cuu quíhu xití vehe-gá-áⁿ ndèé ndìhi ndi úsá tnúndòho cada ndi úsá cue espíritú-áⁿ ñuyíú.

16

Tnündòho cada-xi ñuyúú

1 Te sátá dúcáⁿ te ní tecú dóho-í níhi ní cáháⁿ ìⁿ sá ní cáháⁿ xítí vehe Yá Ndiöxí, te xáhaⁿ-xi xii ndi usá cue espíritú-áⁿ:

—Chí cuàháⁿ coyo-ndo sã ñúhú xítí nchaa tícúú néhé-ndó-áⁿ núú ñuyúú, chí sá ñúhú-áⁿ cúú-xí tnündòho tendaha Yá Ndiöxí sá cúú-xí nchaa ñáyiú ñuyúú —duha càchí sá càháⁿ-áⁿ.

2 Te espíritú díhna ní sáháⁿ-xi ní coyo-xi sá ñúhú xítí tícúú néhé-xí-áⁿ ñuyúú, te nchaa ñáyiú ñuhu tnuní quití ní quene xítí lámár ñáyiú ní chiñuhu sá ní natava ñàhá-yu xii-di, nchaa ñáyiú-áⁿ ní quené-yu ndíhyi tèhyú te súúni dàndoho ñaha-xi xii-yu.

3 Te espíritú cúú úú ní coyo-xi sá ñúhú xítí tícúú néhé-xí núú lámár, te ndute lámár-áⁿ ní nduu-xi níhi te càa-xi datná cáá níhi ñáyiú sa ní xíhí, te nchaa quití ñuhu xítí lámár-áⁿ ní xíhí-güedi.

4 Te espíritú cúú ùní ní coyo-xi sá ñúhú xítí tícúú néhé-xí nchaa yúte ndíhi nchaa núú quènihni ndute, te ndute nchaa yúte-áⁿ ndíhi nchaa ndute quènihni-áⁿ ní nduu-xi níhi. ⁵ Te sátá dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiöxí, espíritú yíndaha ndute, te xáhaⁿ-xi xii Yá Ndiöxí:

—Yòhó Dútú Ndiöxí cúú-n Yáá quidé ndáá cuítí núu duha quide-n tendaha-n tnündòho-a, te diu-ni-n cùu-n

Yaá ndécú ndèé cúnàhá ní ngáva ñuyúú, te diu-ni-n cùu-n Yaá ndécú vitna te ñá túú tnàhí cuèchi-n. ⁶ Chí cue ñáyiú ñuyúú ní dácácã-yu níhi nchaa ñáyiú ní cáháⁿ tnúhu-n ndíhi nchaa dava-gá ñáyiú cùu cuendá-n, te ní sahní-yu nchaa ñáyiú-áⁿ, te vitna ní dátíú-n ndùte ní nduu-xi níhi te ducaⁿ-ni càa ndute-áⁿ xíhi-yu, te ducaⁿ taú-xi ndohó-yu cuendá sá ní sahní-yu cue ñáyiú cùu cuendá-n —duha càchí espíritú-áⁿ xáhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ní cáháⁿ núú nútñi núú sácódó sá ndúú táhú Yá Ndiöxí, te xáhaⁿ-xi xii-gá:

—Ndáá sá yòhó Dútú Ndiöxí Yaá ndácú quide nchaandi túhú sá vãha dàndoho-n ñáyiú nàcuáa taú-xi cunduo —duha càchí sá càháⁿ-áⁿ xáhaⁿ-xi xii-gá.

⁸ Te espíritú cúú cümü ní coyo-xi sá ñúhú xítí tícúú néhé-xí núú nchícanhii cuendá nchícanhii-áⁿ cahmi-xi nchaa ñáyiú ñuyúú. ⁹ Te ncháá-yu ní ndoho vñi-yu ní cáyú-yu, te cuèi ducaⁿ ní ndohó-yu dico ñá túú ní cuíni-yu ndixi cuèchi iní-yu cuendá nchaa sá ñà túú vãha quidé-yu, te ní ñà túú ní càchí-yu sá ïo càhnu cuu Yá Ndiöxí chí da ní cáháⁿ úhú-yu cuendá-gá, te diu-gá cúú-gã Yaá ducaⁿ ní tendaha tnündòho-áⁿ sã cúú-xi-yu.

¹⁰ Te espíritú cúú ùhúⁿ ní coyo-xi sá ñúhú xítí tícúú néhé-xí núú ndécú quití ní quene xítí lámár-áⁿ táxí tnúni-di, te nchaa núú táxí

tnùní-di ní cuu nee, te nchaa ñáyiú ñuyú ndéé yàá-ná-yu nàcaxi nihnú-yu sá ndóhó-yu. 11 Dico ni dùcaⁿ ñá túú ní cuíní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuendá Yá Ndióxi Yáá ndécú àndiú sá cuendá sá dándòho ñaha ndíhyi tèhyú ndèe-yu-áⁿ ndihi nchaa dava-gá sá yáha-yu.

12 Te espíritú cúú ìñú ní coyo-xi sá ñúhú xítí tícùú néhé-xí xítí yúte càhnu nani Eúfratés, te ndute yúte-áⁿ ñí yíchí cuendá yáha cue téé yìndaha ñáyiú xíndecu ndàa xio nacuaá quène nchíanchii.

13 Te ní xiní-í ní quee ìⁿ espíritú cúndìhi yucu ñávàha yuhu quiti dééⁿ nání dràgón, te ní xiní tucu-í ní quee tucu ingá espíritú cúndìhi yucu ñávàha yuhu quiti ní quene xítí làmár, te ní xiní tucu-í ní quee tucu ingá espíritú cúndìhi yucu ñávàha yuhu téé dándahú ñáyiú càchí sá càháⁿ tnúhu Yá Ndióxi te ñá ndàá, te ndi nùní espíritú-áⁿ xíndáa-xi dàtná cáá làhvá. 14 Te ndi nùní espíritú-áⁿ quidé-xí sá vǎ yóo tnàhí ndàcu cada, te xica datacá-xi nchaa cue téé yìndaha ñaha xii ñáyiú xíndecu nihí ñuyú cuendá nàá-güedé mei nduu cachí Yá Ndióxi coo tnúndòho cahnu vihi-gá, te diu mee Yá Ndióxi cúú-gǎ Yáá ío càhnu cuu. 15 Te Yáá cúú Xítohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú

nchaa nchòhó ñáyiú xíndecu túha, chi cùu-ndo datná cue ñáyiú xíndecu túha xíxíhnu-ni dóó-xi cuendá sá vǎ cúcàhaⁿ núú-yu dàtná cúcàhaⁿ núú cué ñáyiú ñá túú nihnu dóó-xi, te duha càháⁿ-í cuendá sá nchòhó cundecu túha-ndo òrè quexio-í”, duha càchí-gá. 16 Te ndi nùní cue espíritú cúndìhi yucu ñávàha-áⁿ ñí dátacá-xi nchaa cue téé yìndaha ñaha xii ñáyiú, te ní taxi ndecu ñaha-xi ìⁿ xichi núú nání Àrmagedón, duha nani xíáⁿ tnúhu hèbreú.

17 Te espíritú cúú ùsá ní coyo-xi sá ñúhú xítí tícùú néhé-xí núú tàchí, te ní tecú dóho-í níhi ní cáháⁿ Yáá núcòo núú xilé váha xítí vehe-gá, te càchí-gá:

—Xéhé-nǎ cúmǎní te xínu cava nchaa tnúndòho tnúhu ndàhú—duha càchí-gá.

18 Te sátá dúcáⁿ te ní sáá ndúté te ní cáháⁿ ñúhu, te súúní dùsaⁿ ní quide-xi, te níhi vihi ní tnáa ñuyú, te ndéé cútnàhá ní ngúndecu ñáyiú ñuyú te vátá ìⁿ xito-gá níhi tnáa dàtná ní quide-xi.

19 Te ñuú càhnú ío cùnnu nani Babiloniá ní quee dava-xi ní cuu-xi úní xichi, te nchaa ñuú cáá nihí ñuyú ñí ngoyo nchaa vehe, chi Yá Ndióxi ní ndacu iní-gá nchaa sá cuèhé sá dúhá quide nchaa ñáyiú ñuú Babiloniá-áⁿ, te ducaⁿ ñí quide ñaha-gǎ xií-yu chi ío cùdééⁿ-gǎ núú-yu. 20 Te nchaa tìndúú ñí ndóñhú-xí cuéi nchaa tìndúú ñuhu yìchí ndécú xítí làmár. 21 Te ní xiní-í ní cuuⁿ ñíñi nàhnu vihi ní ngaundodo-xi cue

ñáyu ñuyú, te nchaa ññi-án vëe-xi dàtná údico kílú, te cue ñáyu ñuyú ñí cáháⁿ úhú-yu cuendá Yá Ndiöxí sá dúcáⁿ ñí dácúúⁿ-gã ññi nàhnu vihi-án, chi ní cuu-xi ñí tñúndòho cahnu vihi sá cúu-xí-yu.

17

Ñadìhí ndécú ichi díí ìní

¹ Te núú úsá espíritú néhé tícúú-án, te ñí-xi ní quixi-xi núú ndécú-í, te càchí-xi xii-í:

—Néhé ná quihíⁿ-ó dànehé ñáhà-í xii-n nchaa tñúndòho sá ndóhó ñadìhí ñaha ndècu ichi díí ìní, te ñaha-án cúnúu-aⁿ nucóo-aⁿ núú ñúhú vihi ndute. ² Te ñaha-án ndécú díí ìní-aⁿ ndihí nchaa cue téé yíndaha ñaha xii ñáyu xíndecu ñihí ñuyú, te nchaa dava-gá ñáyu ñuyú òó ìní-yu nchicúⁿ ñihnú-yu quidé-yu nchaa nàcuáa quide ñaha-án —duha càchí espíritú-án.

³ Te òré ducaⁿ quide ñaha Espíritú Yá Ndiöxí xii-í nàcuáa càchí ìní-xi, te ñí espíritú xínú cuèchi núú-gã ndécá ñaha-xi xii-í cuáháⁿ ñí xití yucu, te xití yucu-án ñí xiní-í ñí ñadìhí yódó-án ñí quiti ticuehé, te ndéé úsá díquí-dí te úxí ndiqui-dí, te ñihí-dí ndéé tñuní-dí mee-ni tñuhu sá cáháⁿ úhú cuendá Yá Ndiöxí.

⁴ Te ñadìhí-án ñihnú-án dóo murádú ndihí dóo tícuèhé, te mee-ni sá ñí cuáha díhúⁿ cuááⁿ, ndihí yúú vaha sá nání pèrlá, ndihí nchaa dava-gá núú yúú vaha, mee-ni nchaa xíáⁿ ní cuáha sá yíhí lõho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-án, te

nùndaha-aⁿ ñí tícúú ní cuáha mee-ni díhúⁿ cuááⁿ te ñuhu mee-ni sá cuèhé sá dúhá, te xíáⁿ cúnúni ìní-ó sá cúu-án ñí ñadìhí ñaha ndècu ichi cuèhé ichi duha. ⁵ Te tneé-aⁿ ndéé tñuní ñí tñuhu, te càchí-xi: “Ñúú Babiloniá ñuú òó cùnúu, cada ìní-ndó sá cúu-xí mèi ñadìhí-a, te díu ñadìhí-a cùu-aⁿ ñaha sanu ichi ñaha xii nchaa ñáyu ñihí ñáyu ndècu ichi díí ìní, te nándi-gá nchaa sá cuèhé sá dúhá sanu ichi-aⁿ nchaa ñáyu cadá-yu”, duha cáháⁿ tñuhu ndéé tñuní tneé ñadìhí-án. Te vá yóo tècú tñuní ná cuendá ducaⁿ cáháⁿ tñuhu-án. ⁶ Te ní cutnùni ìní-í sá díú ñaha-án ñí dácáca-án ñí ñáyu cùu cuendá Yá Ndiöxí ní sahani ñaha-aⁿ xii-yu, te ñáyu ní xihí-án cúu-yu ñáyu ní cáháⁿ váha cuendá Xítóhó Jesucristú, te sá dúcáⁿ ñí quide-aⁿ te ní nduu-aⁿ dàtná ñí ñáyu quihu. Te òó ní cuñúhu-í sá dúcáⁿ ñí cuu ní xiní-í. ⁷ Te sátá dúcáⁿ te espíritú xínú cuèchi núú Yá Ndiöxí-án càchí tucu-xi xii-í:

—Vá ndéé dúcáⁿ cùñúhu-n, chi vitna na càchí tñuhu-í xii-n nàcuáa quèe-xi cuendá quiti ndéé úsá díquí-xi ndihí úxí ndiqui-xi-án, ndihí nàcuáa quèe-xi cuendá ñadìhí ñaha yòdo ñaha xii-dí-án. ⁸ Te quiti ní xiní-n-án cúu-dí ñí quiti sa ní xíndecu te vitna ñá túu-gã-dí ndècu, te sáá nduu te quene-dí yaú cùnú vihí sá òó nèhé cáá, te dàtnùni sáá nduu te quihíⁿ-dí núú ùhú núú ndáhú ñí caa ñí quihíⁿ, te cue ñáyu xíndecu ñuyú cuñúhu vihí-yu quiti-án chi cùu-dí ñí

quiti sa ní xíndecu ni cùu te sáá nduu cùndecu tucu-di, te ñáyiú ducaⁿ cùñúhu ñaha xì-di-áⁿ ñà túú yòdo tnuní-yu núú tütú núú yódó tnùnì cue ñáyiú naníhí tàhú, chi ndéé cùtnàhá vátá ngáva-gá ñuyíú ducaⁿ sa yòdo tnuní cue ñáyiú naníhí tàhú.

9^a Te nchaa ñáyiú tècú tnùnì xìnì ñuhu-xi canì váha iní-yu cuèndá tnúhu-a. Te ndì ùsá díquí quiti-áⁿ cada iní-ó sá cúú-xí ùsá tìndúú núú núcõõ ñadìhí-áⁿ. 10 Te ndì ùsá díquí quiti-áⁿ cada iní-ó sá cúú-xí ùsá tnàhá cue téé yìndaha ñaha xii ñáyiú, te úhúⁿ cue téé-áⁿ ñà túú-gã cùnùu-güedé vitna, te ìⁿ téé-áⁿ cùnùu-dé vitna te ìngá-dé vátá sáá-gá nduu cùnùu-dé, te na sáá nduu dùcaⁿ cunuu-dé te sacú-ni nduu cunuu-dé. 11 Te quiti ní xíndecu ni cùu te ñà túú-gã-di ndècu vitna, cùu-di datná téé cùu uná yìndaha ñaha xii ñáyiú, te ìⁿ-ni cùu-di ndihi cue téé ùsá yìndaha ñáyiú-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ni caa ni quíhíⁿ.

12^a Te ndì ùxí ndìquì quiti-áⁿ cada iní-n sá cúú-xí ùxí tnàhá cue téé quìndaha ñaha xii ñáyiú, dico vátá sáá-gá nduu cùnùu-güedé quìndaha ñaha-güedé xii-yu. Te cue téé-áⁿ ñíhí-güedé tnúhu ndee ìní taxi tnùnì-güedé ndihi quiti-áⁿ, dico tnaa-ni taxi tnùnì-güedé ndihi quiti-áⁿ. 13 Te ndì ùxí cue téé-áⁿ cuu ìⁿnuu-güedé taxi tnùnì-güedé, te chindee-güedé

quiti-áⁿ cuèndá cuu ìⁿnuu-güedé ndihi-di cuèndá taxi tnùnì-gá-di.

14 Te cue téé-áⁿ nàá-güedé ndihi Yaá cáá dàtná cáá ìⁿ mbéé quiti ní dánìcuèhé-güedé dico vá ndácú-güedé nàá-güedé ndihi-gá chi cuíta-güedé. Te ñu-gá cúú-gã Yaá ío cùnùu taxi tnuní cuèi nchaa téé yìndaha ñaha xii ñáyiú, te ducaⁿ-ni tàxi tnuní-gá cuèi nchaa dava-gá-yu. Te mee Yá Ndiõxí ní cachí-gá nándì cùu nchaa ñáyiú cundecu ndihi Yaá cáá dàtná cáá ìⁿ mbéé quiti ní dánìcuèhé-güedé-áⁿ, te ñu-ni ñáyiú-áⁿ cúú-yu ñáyiú ní cáháⁿ-gá te cùu-yu ñáyiú quide ndáá ndécú ìchi-gá —duha càchí espíritú xínú cuèchi núú-gã.

15 Te ní cachí tucu espíritú-áⁿ xii-í:

—Ndute ñuhu núú núcõõ ñadìhí ñaha ndècu ìchi díí ìní-áⁿ, ndute-áⁿ cada iní-n sá cúú-xí ñáyiú nchaa nàciónⁿ, ndihi ñáyiú nchaa ñuú, ndihi ñáyiú xíndecu nchaa xichi, ndihi ñáyiú càháⁿ ndí dííⁿ ndí dííⁿ núú tnúhu. 16 Te dàtná ní cachí-í sá ndì uxí ndìquì quiti ní xínì-n-áⁿ cúú-xí ùxí tnàhá cue téé quìndaha ñaha xii ñáyiú, te cue téé-áⁿ cuu úhú iní-güedé ñadìhí ñaha ndècu ìchi díí ìní-áⁿ, te ni vã cádá cuèndá ñáhá-gã-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. 17 Te mee Yá Ndiõxí ducaⁿ dàcaháⁿ-gá ìní cue téé-áⁿ cuèndá cada-güedé

nàcuáa cuíní mée-gã, te xiãⁿ nõu cuu ìⁿnuu-güedë cuendá cùñaha-güedë xii quiti-áⁿ cada-di núú-güedë taxi tnùní-di, te ducaⁿ-ni càda-di núú-güedë taxi tnùní-di ndéé ná sáá nduu càda Yá Ndiõxí nàcuáa ní cachí-gá. ¹⁸ Te ñadihí ñaha ní xiní-n-ãⁿ cada iní-n sá cúú-áⁿ ñuú cahnú ñuú ío cùnuu, te ñuú-áⁿ ndécú tée ío-gá cùnùu taxi tuní nchaa cue tée yindaha ñaha xii ñáyiu xĩndecu ñuyú —duha ní cachí espíritú xinú cuèchi núú Yá Ndiõxí xii-í.

18

Ní naa ñuú Babiloniá

¹ Te ducaⁿ te dàtnúní ní xiní tucu-í ingá espíritú xinú cuèchi núú Yá Ndiõxí, te ndéé andiu nì dátãsaⁿ-xi te ní dáyèhé-xi ñuyú, te espíritú-áⁿ ío cùnuu-xi. ² Te níhi ní cáháⁿ-xi, te càchí-xi:

—Ní sáá nduu nàa ñuú cahnú ñuú cùnùu nani Babiloniá, te xiãⁿ-nã nataká nchaa núú espíritú cundihí yucu ñávãha cundecu-xi, te vá queé-gã-xi xiãⁿ, te ñuú-ni xiãⁿ nataká nchaa quiti ndáva núú tàchí nchaa quiti ndehe quide, quiti ñá túú tnàhá iní ñáyiu te xiãⁿ-nã cundecu-güedë. ³ Te ducaⁿ chi ñáyiu ñuú-áⁿ sánú ìchí-yu nchaa ñáyiu nihí ñuyú ichi cuèhé ichi duha, te ducaⁿ-ni xĩnchícúⁿ nihnu nchaa ñáyiu ñuyú xiquidé-yu, te nchaa cue tée cùnuu yindaha ñaha xii ñáyiu, cue tée-áⁿ cúú ìⁿnuu-güedë ndihí nchaa ñáyiu ñuú-áⁿ quidé-güedë ndihí-yu nándi sá cuèhé sá

dúhá. Te nchaa ñáyiu dícó nándi sá dícó quèheⁿ ñáyiu ñuú-áⁿ ío cùu cuicá-yu, te ducaⁿ quèheⁿ nchaa ñáyiu ñuú Babiloniá-áⁿ nchaa sá dícó ñáyiu-áⁿ cuendá xiãⁿ cãnehé-yu ndécú-yu ichi cuèhé ichi duha —duha càchí espíritú-áⁿ.

⁴ Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ andiu, te càchí-xi:

—Nchaa nchòhó ñáyiu cùu cuendá-í quee-ndo ñuú Babiloniá cuendá sá vã cundècu-ndo tnàhá-ndó ichi cuèhé ichi duha dàtná ndécú ñáyiu ñuú-áⁿ, te ducaⁿ te vá quíní-ndó tnũndòho tnúhu ndàhú sá quíxí cùu xii ñáyiu-áⁿ. ⁵ Chi ío cuèhé cuèchi-yu ní cuu ndècu núú Yá Ndiõxí, te mee-gã nàhá-gã nàcuáa nduu nchaa sá quidé-yu. ⁶ Te nchòhó ñáyiu cùu cuendá-í, chí nãnchòcáva dandòho-ndo ñáyiu-áⁿ dàtná quidé mèe-yu dandohó-yu cue ñáyiu, te úú xito nanchòcáva-ndo dandohò-ndó-yu, te ducaⁿ càda-ndo cuendá ío-gá ndohó-yu. ⁷ Te ío quide cahnú-yu mèe-yu, te ío cùdí iní-yu quidé-yu nchaa núú sá cuèhé sá dúhá, te sá dúcáⁿ xidó-yu quidé-yu nchaa sá cuèhé sá dúhá nõu xiãⁿ nchòhó ío dandòho-ndó-yu, te ducaⁿ chi ñáyiu ñuú-áⁿ sání iní-yu, te càchí-yu: “Nchúhú cúú-ndí dàtná ìⁿ ñadihí ñá túú quèé, ñaha ío cùnuu yindaha ñaha xii ñáyiu. Te ducaⁿ sãtnahá-xi cùu-ndí chi nchaa-ni nduu ío váha cùu iní-ndí ndécú-ndí, te ní

vã sàá ìⁿ nduu te ndìhú iní-ndí”, duha càchí ñáyiú ñúú-án. ⁸ Te sá cuèndá nchaa sá quidě-yu-án nùú xiáⁿ ìⁿ-ni ndùu sáá tnúndòho sá cúú-xí-yu, te ío ndohó-yu chí ñúú-yu coo tnamá, te coo cuéhé cahni ñaha-xi xii-yu, te ío ndìhú iní-yu, te cáyú ñúú-yu, te ducaⁿ ndòhó-yu chí Dútú Ndióxi ío cùnuu-gá, te diu-gá ducaⁿ dándohò ñaha-gá xii-yu —duha càchí sá ñí cáháⁿ àndiú-án.

⁹ Te nchaa cue téé cùnuu yindaha ñaha xii ñáyiú ío ndáhyú-güedé sá ndìhú iní-güedé òré ná quini-güedé quene ñúhmá cáyú ñúú cue ñáyiú Babiloniá, chí diu cue téé-án cúú-güedé cue téé cùu ìⁿnuu ndihí-yu quide-güedé nchaa núú sá cuéhé sá dúhá ndihí-yu, te ducaⁿ chí ío tnàhá iní-güedé cundecu-güedé ndihí-yu ichi díí iní. ¹⁰ Te cue téé-án xica-ñá cundecu-güedé cundehe-güedé nàcuáa ndoho nchaa ñáyiú ñúú-án sá yùhú-güedé nchaa tnúndòho-án, te cachí-güedé:

—jNdàhú nchòhó ñáyiú ñúú cáhnú ñúú cùnùu nani Babiloniá! Chí uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹ Te nchaa ñáyiú diko nchaa sá nándihí ñáyiú ñúú Babiloniá tnàhá-yu ío ndáhyú-yu sá ndìhú iní-yu chí vá yòo-gá cuaaⁿ nchaa sá dícò-yu. ¹² Te dicó-yu nchaa sá ñí cuáha mee-ni díhúⁿ cuááⁿ, ndihí nchaa sá ñí cuáha mee-ni díhúⁿ cuixíⁿ,

te diko tucú-yu sá ñí cuáha mee-ni yúú vãha yúú nání pèrlá, ndihí nchaa dava-gá sá ñí cuáha dava-gá yúú vãha, te dicó-yu tnàhá dóó sèdá, ndihí ingá núú dǒó vãha sá nání línú, ndihí dóó murádú, ndihí dóó tícuéhé te mee-ni dǒó vãha cùu-xi, te diko tucú-yu tnàhá yutnu sá sàháⁿ tnámí, te diko tucú-yu sá ñí cuáha sá nání màrfil, te diko tucú-yu sá ñí cuáha mee-ni yutnu vãha sá ío ndèyáhu, te diko tucú-yu sá ñí cuáha mee-ni càá, ndihí sá ñí cuáha mee-ni sá nání bròncé, ndihí sá ñí cuáha mee-ni yúú vãha yúú nání màrmól. ¹³ Te diko tucú-yu canelá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mǐrrá, te diko tucú-yu ingá núú dúsa sá sàháⁿ tnámí nàni olivánú, te diko tucú-yu ndudí ndéhé yoho yàha stilé, ndihí acití yutnu nàni olívú, ndihí yuchi triú vãha, te diko tucú-yu nchaa dava-gá núú triú, te dicó-yu tnàhá mbéé, ndihí cuàyú, ndihí nchaa dava-gá quiti tatá, te diko tucú-yu tnàhá carrètá, te diko tucú-yu tnàhá ñáyiú xìnu cuechi, ñáyiú ñá túú tnàhí dàñá quee núú chíúⁿ pàtróóⁿ-xi. ¹⁴ Te nchaa ñáyiú diko-án cùñàhá-yu xii ñáyiú ñúú Babiloniá:

—jNchaa sá ío cùdíí iní-ndó cundecu ndihí-ndo ní cuu vá ndácú-gá-ndó ñihí-ndó vitna, te nchaa sá sání iní-ndó sá ío vãha càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi

vitna, te ni ìⁿ nduu-gá vá nihí-ndó ni ìⁿ xiáⁿ cundecu ndihi-ndo! —duha cúñaha ñáiyu-áⁿ xii-yu.

15 Te nchaa ñáiyu ní cuu cuica ñí xóo dico náandi nchaa sá ñí xóo dico ñí queheⁿ cue ñáiyu ñuú Babiloniá, nchaa ñáiyu-áⁿ xica-nã cundecú-yu cundehé-yu sá yùhú-yu cuendá nchaa tnúndòho sá yãha cue ñáiyu ñuú-áⁿ, te ío ndáhyú-yu sá ndihú iní-yu sá dúcáⁿ ndòho ñáiyu-áⁿ. 16 Te cúñaha tucú-yu:

—¡Ndàhú nchòhó ñáiyu xíndecu ñuú cáhnú ñuú nání Babiloniá! Chì nchòhó cùú-ndó dàtná ìⁿ ñadihi ñaha ñihnu dóo vãha dóo murádú, ndihi dóo tícuèhé, te mee-ni sã ñí cuáha díhúⁿ cuàáⁿ, ndihi mee-ni sã ñí cuáha yúú vãha yúú nání pèrlá, ndihi sá ñí cuáha dava-gá yúú vãha sá ío vii ndãa mee-ni nchaa xiáⁿ ní cuáha sá yíhí lóho-aⁿ, ndihi sá ñúhú dúcúⁿ-aⁿ, ndihi sá ñúhú dúcúⁿ ndáhá-áⁿ. 17 ¡Te uuⁿni ní ndihi ñihnu nchaandi túhú sá ndécú ndihi ñadihi-áⁿ, te ducaⁿ sátnahá-xi cùu nchohó ní cùu! —duha cúñahá-yu xii cue ñáiyu ñuú Babiloniá.

Te nchaa cue téé dàcaca barcú ndihi nchaa cue téé tàxi tnuní bàrcú-áⁿ, ndihi nchaa ñáiyu ñuhu xití bàrcú-áⁿ, ndihi nchaa dava-gá cue téé náandi chiúⁿ quide ndecu lamár, nchaa ñáiyu-áⁿ xica cundecú-yu 18 te quiní-yu òré quene ñúhmá cãyú ñuú cue ñáiyu Babiloniá, te níhi cáháⁿ-yu, te cachí-yu:

—Ni ìⁿ ñuú ñá túú

nútnahá-xi ñuú Babiloniá — duha cáháⁿ-yu.

19 Te nchaa ñáiyu-áⁿ chidó-yu ñuhu díqui-yu, te ngúíta-yu ndáhí-yu sá ndihú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáiyu xíndecu ñuú cáhnú ñuú nání Babiloniá! Chì ío cuica-ndo ní cùu, te diu-ndo ñí quide ní cuu cuica nchaa ñáiyu ndècu ndihi barcú, te vitna uuⁿni ní naa-ndo ndihi ñuú-ndó — duha cachí-yu.

20 Te nchaa nchòhó ñáiyu ndècu andiu ío chí cúdǐ iní sá dúcáⁿ dàndoho Yá Ndióxi nchaa ñáiyu ñuú Babiloniá-áⁿ, te diu-ni ducaⁿ chí cúdǐ iní nchaa nchòhó cue téé ní cachí Xitohó Jesucristú cáháⁿ tnúhu-gá, te diu-ni ducaⁿ chí cúdǐ iní nchaa nchòhó cue téé cáháⁿ tnúhu Yá Ndióxi nàcuáa dàcahu iní ñáhá-gã xii-ndo, te diu-ni ducaⁿ chí cúdǐ iní nchaa dava-gá nchòhó ñáiyu cùu cuendá-gá cuendá sá dúcáⁿ dàndoho-gá nchaa ñáiyu ñuú-áⁿ. Te ducaⁿ càda ñaha-gá xii cue ñáiyu-áⁿ cuendá nchaa sá quidé ñahá-yu xii-ndo.

21 Te sátá dúcáⁿ te ní xiní-í ìⁿ espíritú xínú cuèchi núú Yá Ndióxi, te espíritú-áⁿ ío ndee-xi te ní queheⁿ-xi ìⁿ yúú cáhnú dàtná cáhnu yódó te ní dáquèe-xi xití ndute làmár, te càchí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cáhnú ñuú Babiloniá, chí ñáiyu ñuú-áⁿ ío ndihi naá-yu ndihi ñuú-yu, te

vá ìíⁿ ndùu ìíⁿ quíú-gă quini ñáhá ñăyiu xíi-yu. ²² Te ni ìíⁿ-gá ñăyiu càni arpá, te ni ìíⁿ-gá ñăyiu tiú vîlu, te ni ìíⁿ-gá ñăyiu tiú cútú, te ni ìíⁿ-gá yaá vá cóo ñùú-áⁿ, te ni ìíⁿ-gá cue ñăyiu xìní cada ìíⁿ núú chùⁿ vá cóo-gă, te ni vă yôo-gá canehe chùⁿ yúú cúú yôdó mulínú. ²³ Te ni ìíⁿ-gá ñuhú vá cùndècu ñuú-áⁿ, te ni ìíⁿ nduu-gá vá cóo víco tnándaha, te ñăyiu ñuú-áⁿ ñăyiu quide ndáhú cúú-yu ñăyiu ío-gá cuicá-yu dàcúúxí ñăyiu quide ndáhú xîndecu nihí ñuyíú, dico nchaá-yu naá-yu chi quide nduú-yu te ío dândahú-yu cue ñăyiu ñuyíú sã dúcáⁿ quidé-yu.

²⁴ 'Te diu-ni ñuú-áⁿ nĩ dácácă-yu nĩnĩ cue téé ní cáháⁿ tnúhu Yá Ndiôxí, te diu-ni ducaⁿ nĩ quidé-yu nchaá dava-gá cue ñăyiu cùu cuendá-gá, te diu-ní-yu quide xísahni tnàha ñăyiu ñuyíú — duha càchí espíritú-áⁿ.

19

¹ Te sátá dúcáⁿ te ní tecú dóho-í níhí ní cáháⁿ cuéhé víhí ñăyiu andiu, te càchí-yu:

¡Ío càhnu cuu Yá Ndiôxí!, chi diu-gá cúú-gă Yaá ní dácăcu nihnu ñaha xîi-o núú ùhú núú ndáhú, te ío cùnuu-gá, te mee-ni sã vâha quide-gá,

² te mee-gă ío váha ndáá quidé-gă quidé ndáá-gá cuéchi nchaá ñăyiu,

chi diu-gá ní dáquihíⁿ-gá ñadihí ñaha ndècu ichi

díí ìní núú ùhú núú ndáhú,

chi diu-aⁿ ní sanu ichi-aⁿ ñăyiu ñuyíú ichi cuéhé ichi duha,

te ducaⁿ ní dáquihíⁿ ñáhá-gă xii-aⁿ núú ùhú núú ndáhú chi nàchinaa-gá sá ní sahani-aⁿ cue ñăyiu ní xinu cuechi núú-gă.

Duha càchí-yu.

³ Te càchí tucú-yu:

—Ío càhnu cuu Yá Ndiôxí!, chi nchaá nduu nchaá quíú ducaⁿ-ni quène ñúhmá núú ñúhú ñàha-áⁿ càyú-aⁿ —duha càchí-yu.

⁴ Te ndi òcó cúmí cue téé cùu sacuéhé xîndecu-áⁿ ní ngüíñí xítí-güedě núú Yá Ndiôxí núú núcôo-gá táxí tnùní-gá, te tnàhá cue quiti cúmí xînutnî-áⁿ ní ngüíñí xítí-güèdi núú-gă, te cue téé-áⁿ càchí-güedé ndihi cue quiti-áⁿ:

—Sá ndáá sá ío càhnu cuu Yá Ndiôxí —duha càchí-güedé ndihi cue quiti-áⁿ.

⁵ Te sátá dúcáⁿ te ní tecú dóho-í ní cáháⁿ ìíⁿ sá ní cáháⁿ mei núú nútñî xilé váha núcóo Yá Ndiôxí, te càchí sá cáháⁿ-áⁿ:

Nchaá nchòhó ñăyiu xînu cuechi núú Yá Ndiôxí, diu-ni nchòhó ñăyiu nèhe sá yíñùhu núú-gă, cáháⁿ-ndó sã ío càhnu cuu-gá cuéi cùnuu-ndo àdi ñá túú cùnuu-ndo, Duha càchí sá cáháⁿ-áⁿ.

Ííⁿ vico cùu datná vico tnándaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñăyiu andiu, te òré ducaⁿ ní cáháⁿ-yu te ní quide-xi dàtná

quidé-xí nũú xícá cuèhé víhi ndũte, te ní quide tucu-xi dàtná quidé-xí òré càháⁿ níhi víhi ñũhu, te càchí-yu:

Ío càhnu cuu Dútú Ndiõxí Yaá cúú Tàtá-ó! Te ío cùnũu-gá táxi tnùní-gá, te quide-gá nchaandi túhú sá vâha.

7 Te ío chí ná cùdíí Ìní-ó, te chí ná càchí-ó sã ïo càhnu cuu Yá Ndiõxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánicuehé-güedé ìⁿ vico, te cùu-xi datná vico tnãndaha.

Te nchaa ñáyiũ cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada iní-ó sã ñáyiũ-áⁿ cúũ-yu dàtná ìⁿ ñadìhí xíchí tnãndaha ndihí-gá,

8 te ñáyiũ-áⁿ ñĩ nduu táhũ-yu cuihnú-yu dóó vâha dóó chàhnchí sá ïo vâha càndoo.

Duha càchí-yu.

Te sá dúcáⁿ ñĩ nduu táhũ ñáyiũ cùu cuendá Yá Ndiõxí dóó vâha ñihnú-yu, xiãⁿ cútnùní iní-ó sã cúũ-yu ñáyiũ quide ndáá núú-gã.

9 Te ìⁿ espíritú xínú cuèchi núú Yá Ndiõxí ní cachí tnúhu-xi xii-í, te càchí-xi:

—Chido tnùní-n ìⁿ núú tütú nàcuáa na càháⁿ-í-a: “Vâha táhũ nchaa ñáyiũ ní càháⁿ ñáhá Yá cáá dàtná cáá ìⁿ mbéé quiti ní dánicuehé-güedé cundecú-yu vico, te vico-áⁿ cúú-xí dàtná vico tnãndaha cada-gá”, te duha chido tnùní-n chí tnúhu-a cùu-xi tnúhu ndáá

tnúhu Yá Ndiõxí —duha càchí espíritú-áⁿ.

10 Te ní ngüíñí xítí-í núú espíritú-áⁿ cuendá chiñuhu-í-xi ní cùu, te ní cachí-xi:

—Vá dúcáⁿ càda-n, chi tnàhá-í dícó xínú cuèchi-í núú Yá Ndiõxí dàtná quidé-n xínu cuechi-n núú-gã ndihi nchaa dava-gá ñáyiũ ndècu ndihi-n ichi-gá, ñáyiũ nchícúⁿ nihnu quide ní yuhu ní iní nchaa nàcuáa càháⁿ Xítohó Jesucristú, te núu xiãⁿ càchí-í sá vã dúcáⁿ càda-n, chi mee Yá Ndiõxí chiñuhu-n —duha càchí espíritú-áⁿ.

Te nchaa cue tée càháⁿ tnúhu Yá Ndiõxí càháⁿ-güedé nàcuáa ndũu tnúhu càháⁿ Xítohó Jesucristú.

Cuendá Yaá yódó ìⁿ cuayú cuixíⁿ

11 Te ní xini-í nchíí andiu, te ní xini-í ní quee ìⁿ Yaá yódó-gã ìⁿ cuayú cuixíⁿ. Te Yaá-áⁿ nání-gã Yaá quidé ndáá cuiti, duha nani-gá. Te quide-gá nchaa sá càháⁿ-gá, te ío vâha quide ndáá-gá cuèchi nchaa ñáyiũ, te nchaa ñáyiũ nãá ndihi ñaha xì-gá ío vâha xìní-gá nàcuáa cada ñaha-gã xií-yu chí ío ndáá quidé-gã.

12 Te tinũu-gá dáyèhé-xi dàtná dáyèhé ñuhú, te titní coróná ñuhú díquí-gã, te nèhe-gá ìⁿ sá ndèè diũ-gá, te vá yóo ìⁿ cùtnuní iní-xi nása cuháⁿ tnúhu-áⁿ, chí ìⁿ dií ní mee-gã nãhá-gã nàcuáa càháⁿ-xi.

13 Te Yaá-áⁿ ñihnú-gã ìⁿ dóó ní cuu mee-ni ñĩñí, te Yaá-áⁿ càchí tnúhu-gá nchaa nàcuáa

sàni iní Yă Ndiõxí, núu xiǎⁿ nání-gă Tnúhu Yá Ndiõxí. 14 Te sátá-gă nchìcúⁿ nchaa espíritú xínú cuèchi núú Yă Ndiõxí, te cue espíritú-áⁿ cúu-xí dàtná sandàdú, te xìxihnu-xi dóó cuìxíⁿ dóó vǎha sá cándòo, te xìxódó-xi cuàyú cuìxíⁿ. 15 Te yuhu Yaá yódónùu-áⁿ quéné ìⁿ yuchí cáhnú, te ndihì yuchí-áⁿ dānícuehé-gá nchaa ñáyiú xĩndecu ñuyíú, te ío dandòho ñaha-gá xii-yu, te dàtná quidé tée quihni ndéhé yoho yàha stilé ducaⁿ sǎtnahá-xi cada ñaha-gá xii-yu, chí ío dandòho ñaha-gá xii-yu cuèndá sá ío cùdéeⁿ-gă. Te mee-gă ío cùnuu-gá táxi tñuní-gá, te quide-gá nchaandi túhú sá vǎha. 16 Te sátá dǒó níhnú Yáa-áⁿ ndihì núú ticácáⁿ-gă yódó tñuní nàcuáa nàni-gá, te duha càháⁿ-xi: “Tée ío cùnuu taxi tñuní ñáhá xii nchaa cue tée yĩndaha ñaha xii ñáyiú ndihì nchaa dava-gá ñáyiú”, duha ndèé tñuní sátá dǒó-gă-áⁿ ndihì ticácáⁿ-gă-áⁿ.

17 Te dǎtnùnì ní xiní-í ìⁿ espíritú xínú cuèchi núú Yă Ndiõxí nùtnì-xi núú nchìcanchii, te níhi ní cáháⁿ-xi, te xǎhaⁿ-xi xii nchaa quiti ndava núú tàchí:

—Nchaa nchòhó quiti ndàva, chí táquixi chí caxi-ndo nchàa sá ñí quide túha Yá Ndiõxí, 18 chí caxi-ndo cùñú nchaa cue tée yĩndaha ñaha xii ñáyiú, ndihì cuñú nchaa cue tée tàxi tñuní ñáhá xii cue sandadú, ndihì cuñú nchaa cue tée ío ñí xĩndáa, ndihì cuñú nchaa cuàyú, ndihì

cuñú nchaa cue tée ní xódó ñaha xii-güedi, ndihì cuñú nchaa dava-gá ñáyiú, ñáyiú ñá túú tñahí ní dàñá quee núú chíúⁿ pàtróoⁿ-xi, ndihì cuñú nchaa ñáyiú ní dàñá ñí quee núú chíúⁿ pàtróoⁿ-xi, ndihì cuñú nchaa ñáyiú cùnuu, ndihì cuñú nchaa ñáyiú ñá túú cùnuu, te nchaa cuñú-áⁿ caxi-ndo —càchí espíritú-áⁿ xǎhaⁿ-xi xii nchaa quiti-áⁿ.

19 Te sátá dúcáⁿ te ní xiní tucu-í quiti ní quene xití làmár, ndihì nchaa cue tée yĩndaha ñaha xii ñáyiú, ndihì nchaa cue tée cùu sandadú-güedé ní naníhí tñahá-güedé ndihì quiti-áⁿ cuèndá cuu ìⁿnuu-güedé ndihì-di nàa-güedé ndihì Yaá yódó cuàyú-áⁿ, ndihì nchaa cue espíritú cúu sandadú ndihì-gá. 20 Te cue espíritú cúu sandadú ndihì Yaá-áⁿ ñí tñii-xi quiti-áⁿ, ndihì tée ío dándahú ñáhá xii ñáyiú càchí sá càháⁿ tñúhu Yá Ndiõxí te ñá ndáa sá càháⁿ-dé tñúhu-gá, te diu-ni tée-áⁿ ñí quide-dé titní núú sǎ vǎ yòo tñahí ndàcu cada núú quiti-áⁿ. Te sátá dúcáⁿ ñí quide tée-áⁿ xiǎⁿ ní dándahú-dé ñáyiú ní sandáa iní-yu ní quéè-yu tñuní quiti-áⁿ, te ní chiñùhú-yu sá ñí dándacú ñáhá-yu xii-di, te cue espíritú-áⁿ ñí dáquèe-xi quiti-áⁿ núú ñùhú núú ñùhú àzufré càyú-xi, ndihì tée ducaⁿ dándahú ñáhá xii ñáyiú-áⁿ, te xiáⁿ cuhuⁿ tée-áⁿ ndihì quiti-áⁿ, te ío ndoho-dé ndihì-di. 21 Te ndihì yuchí cáhnú sǎ quéné yùhu Yaá yódó cuàyú-áⁿ ñí sahni-gá

nchaa dava-gá cue tée cùndihi quitì-áⁿ, te nchaa cue quitì ndàva ní chítú xitì-güedi ní xexi-güedi cuñú nchaa cue tée-áⁿ.

20

Úxí cièndú cuiá

¹ Te sátá dúcáⁿ te ní xiní-í ìⁿ espíritú xínú cuèchi núú Yă Ndiôxí ní quee-xi andiu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sácúíhná, te nùndaha tucu-xi ìⁿ cadená cáhnú. ² Te espíritú-áⁿ nĩ tñi-xi quitì dééⁿ nání dràgón, te diu-ni quitì-áⁿ cúú-dí mèi yucu ñávãha sá nání sácúíhná, te diu xíáⁿ ní nduu-xi cóo ndéé sanaha. Te espíritú-áⁿ nĩ dácútú ñàha-xi xii-di, te ducaⁿ-ni cùndutu-di ndéé xínu úxí cièndú cuiá. ³ Te sátá nĩ dácútú ñàha espíritú-áⁿ xii-di te ní dáquèe ñaha-xi xii-di yaú-áⁿ chí diu yaú-áⁿ tàú-di quéè-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá và quéné-gã-di dandàhú-di cue ñáyiu ñuyíú, te xíáⁿ cundedí nihnu-di ndéé xínu úxí cièndú cuiá. Te sátá ná yãha úxí cièndú cuiá-áⁿ te nandáxi-di te quene-di yaú núú ñúhú-dí-áⁿ caca cuu tnaa-di ìⁿ úú nduu.

⁴ Te dàtnùní ní xiní-í xĩnutnii titni xilè váha, te xíáⁿ xĩnucóo nchaa ñáyiu ní ngúndecu ndihí tnúhu ndee ìⁿ cada ndáá cuèchi nchaa ñáyiu, te ní xiní-í xĩndecu tnhá cue ñáyiu ní xehndé-güedé dúcúⁿ-xi cuèndá sá ní cáháⁿ-yu tnúhu Yá Ndiôxí, ndihí cuèndá sá

nĩ cáháⁿ váha-yu cuèndá Xítoho Jesucristú. Te diu-ni ñáyiu-áⁿ cúú-yu ñáyiu ñá túú ní chĩñuhú-yu quitì ní quene xitì lámár-áⁿ, te ni ñà túú ní chĩñuhú-yu sá nĩ dándácú ñáyiu ní natava ñàhá-yu xii-di, te ni ñà túú ní dàñá-yu mèè-yu quéè-yu tnuní quitì-áⁿ chi ni tnéè-yu te ni ndàhá-yu ñá túú ní dàñá-yu quéè tnuní-di. Te ní xiní-í ní ndoto cue ñáyiu-áⁿ cuèndá tnhá-yu cunúú-yu taxi tnuní-yu ndihí Xítoho Jesucristú úxí cièndú cuiá. ⁵ Te dava ñáyiu ní xihí ñá túú ní ndotó-yu, chi ndéé yãha úxí cièndú cuiá te dàtnùní ndotó-yu. Te ñáyiu ní xiní-í ní ndoto-áⁿ cúú-yu ñáyiu ní ndoto díhna nuu. ⁶ Te ío váha ní tnhá nchaa ñáyiu ní nduu táhú nĩ ndoto díhna nuu!, chi cue ñáyiu-áⁿ ío cùdiú-yu núú Yă Ndiôxí, te nchaa ñáyiu-áⁿ vã quihíⁿ-yu núú ùhú núú ndàhú, te ñáyiu-áⁿ cúú-yu dútú ndécü-yu núú Yă Ndiôxí ndihí núú Xítoho Jesucristú, te ñáyiu-áⁿ cúnúú-yu dàtná cúnúú Xítoho Jesucristú, te cunuu ndihí ñàhá-yu xii-gá úxí cièndú cuiá.

⁷ Te sátá ná yãha úxí cièndú cuiá-áⁿ te sácúíhná quee-xi núú yĩndèdí nihnu-xi-áⁿ, ⁸ te ngúíta tucu-xi dandàhú-xi nchaa ñáyiu xĩndecu nihí ñuyíú, te cuèi ñáyiu ñuu Gõg, te cuèi ñáyiu ñuu Mágóg ducaⁿ quihíⁿ-xi dandàhú ñàhá-xí xii-yu, te datácá-xi nchaa ñáyiu cuèndá nàá-yu, te cuéhé víhí-yu dàtná cuéhé

ñuhu cúchí làmár. ⁹ Te nchaa ñáyi-u-áⁿ tñí-yu ichi quíhíⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáa-yu núú xíndecu ñáyi-u cùu cuendá Yá Ndiòxí, te ñáyi-u-áⁿ chidòcò-yu cue ñáyi-u cùu cuendá-gá-áⁿ ndihi ñuú-yu, te ñuú-áⁿ ìo cùu iní-gá, dico mee Yá Ndiòxí dangòyo-gá ñuhú cahmi-gá nchaa ñáyi-u ducaⁿ chidoco ñaha xii ñáyi-u cùu cuendá-gá-áⁿ, te nchaa ñáyi-u-áⁿ cuú. ¹⁰ Te sácuihná sá dúcáⁿ dàndahú ñáhá xii ñáyi-u chidoco ñaha xii ñáyi-u cùu cuendá Yá Ndiòxí-áⁿ dàquée ñaha-gá xii-xi núú ñùhú núú ñùhú àzufré càyú-xi, te òu-ni xíaⁿ sa ñùhu quiti ní quene xítí làmár, ndihi téé ní dàndahú ñáyi-u ní xáhaⁿ-dè xii-yu sá càháⁿ-dè tñúhu Yá Ndiòxí te ñá ndáá sá càháⁿ-dè tñúhu-gá, te xíaⁿ cuhuⁿ-xi ndoho-xi ni caa ni quíhíⁿ ndihi quiti ní quene xítí làmár, ndihi téé càchí sá càháⁿ tñúhu Yá Ndiòxí te ñá ndáá sá càháⁿ-dè tñúhu-gá.

Cùndáá cuéchi ñáyi-u

¹¹ Te ní xiní-í nútní ìⁿ xilé váha xilé cuixíⁿ, te núú xilé-áⁿ núcòo ìⁿ Yaá. Te ndèhe Yaá-áⁿ nì ndóñuhú àndiu ndihi ñuyíú-a, te ducaⁿ nì ndóñuhú-xí chi vá cùndècu-gá-xi. ¹² Te sáta dúcáⁿ te ní xiní-í nchaa ñáyi-u ní xihí ní cùu, ñáyi-u cùnuu ndihi ñáyi-u ñá túú cùnuu xínutnì-yu núú Yàá núcòo núú xilé váha-áⁿ, te Yaá-áⁿ cúú-gá Yá Ndiòxí, te òrè-áⁿ nì nandicá nchaa tutú núú yódó tñuní nchaa

nàcuáa ndùu sá nì quide ìⁿ ìⁿ ñáyi-u-áⁿ, te ní nandicá tucu ingá tutú núú yódó tñuní nchaa ñáyi-u ní naníhí tàhú, te nchaa ñáyi-u ní xihí ní cùu xínutnì-yu núú Yá Ndiòxí cundáá cuéchi-yu, te nchaa nàcuáa ndùu nchaa cuéchi-yu yòdo tñuní núú nchaa tutú-áⁿ ducaⁿ cùndáá. ¹³ Te nchaa ñáyi-u ní xihí xítí ndute làmár, ndihi nchaa ñáyi-u ní xihí núú ñuhu yìchí nchaa ñáyi-u-áⁿ cundáá cuéchi-yu nàcuáa ní quidé-yu ìⁿ ìⁿ-yu. ¹⁴ Te vitna te vá cùú-gá ñáyi-u chi ñá túú-gá tñúhu xihí, te nchaa ñáyi-u ñùhu núú ñùhú núú càyú ñáyi-u-áⁿ cúú-yu ñáyi-u ní xíta nihnu ni caa ni quíhíⁿ. ¹⁵ Te ducaⁿ chi nchaa ñáyi-u ñá túú yòdo tñuní núú tütú núú yódó tñuní nchaa ñáyi-u naníhí tàhú ní dáquée ñaha Yá Ndiòxí xii-yu núú ñùhú núú càyú.

21

Andiu sàa ndihi ñuyíú sáa

¹ Te sáta dúcáⁿ te ní xiní-í andiu sàa ndihi ñuyíú sáa, te andiu sá ndécú òhna ndihi ñuyíú sá ndécú òhna ní ndóñuhú-xí, te tñhá làmár ní ndóñuhú-xí. ² Te yúhú té Juáa ní xiní-í ñuú Jerusàlén sáa nì quee-xi núú ndécú Yá Ndiòxí, te ñuú-áⁿ cúú-xí ñuú mée-gá, te ìo vii càa chi càa datná cáá ìⁿ ñadihí xíchí tñandaha. ³ Te ní tecú dòho-í níhi ní càháⁿ ìⁿ sá nì càháⁿ andiu, te càchí-xi:

—Chí cùndèdòho ìⁿ tñúhu na càháⁿ-í-a: Yá Ndiòxí ndécú ndihi-gá cue ñáyi-u vitna, te ducaⁿ-ná cundecu ndihi

ñaha-gã xii-yu, te diú-yu cùu-yu ñáyiu cùu cuendá-gá, te vá ñⁿ ndùu ñⁿ quíú-gã te dañá ñàha-gá xii-yu. ⁴ Te mee Yá Ndióxi cada-gá sá ñà túú tnàhí-gá ná cani iní-yu cundecú-yu, te ni vã quìní-gá-yu tnúhu xihí, te ni vã quìní-gá-yu tnúhu ndàhyú, te ni vã quìní-gá-yu tnúhu ndihú iní-xi, te ni vã quìní-gá-yu tnúhu cùhú, chi nchaa sá ñi xiní-yu ñuyúú díhna vá quìní-gá-yu vitna — duha càchí sá ñi cáhán-án.

⁵ Te Yaá núcõo núú xilè váha-án ñi cachí tnúhu-gá xii-í, te càchí-gá:

—Yúhú quidè-í nàcuáa nduu saa nchaa sá cundècu vitna. Te vitna chido tnùnín ñⁿ núú tùtú nchaa tnúhu sá ñi cáhán-í-a, chi nchaa tnúhu-a cùu-xi tnúhu ndáá cuiti — duha càchí-gá.

⁶ Te dàtnùníní ní cachí tnúhu tucu-gá xii-í:

—Sa ní xínu cava nchaa chiúⁿ ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyúú, te diu-ni-í cundecu-í ni caa ni quíhíⁿ. Te nchaa ñáyiu cuìní tuha ñaha xii-í te cada iní-yu sá dàtná ndute cùu-xi sá cuãñaha tãhù-í xii-yu candeca-xi iní-yu ni caa ni quíhíⁿ. ⁷ Te nchaa ñáyiu na cùndee iní yáha nándi sá ná yáha-yu sá cuendá-í, te ñáyiu-án nduu táhù-yu cundecu váha-yu, te yúhú cuu-í Ndióxi-yu, te ducaⁿ mée-yu cuú-yu déhe-í. ⁸ Te nchaa ñáyiu na yùhú ndoho cuendá-í quíhíⁿ-yu núú ñùhú núú càyú

ndihí ñáyiu ñá túú sàndáá iní ñáhá xii-í, ndihí ñáyiu quide nándi nchaa sá cuèhé sá dúhá, ndihí ñáyiu sàhni tnaha, ndihí ñáyiu ndècu ichi díí iní, ndihí ñáyiu quide nduu, ndihí ñáyiu chìnùhu nchaa sá càchí-yu cùu ndióxí ní cadúha cue téé ñuyúú-a, ndihí ñáyiu dàcuandehnde, nchaa ñáyiu ducaⁿ xíquide-án cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáhán Yá Ndióxi ní cachí tnúhu-gá xii-í.

Ñuú Jerusalén sáá

⁹ Te núú ùsá espíritú xínehe tícùú ñùhú tnúhu ndòho, te ñⁿ-xi ní quixi-xi te càchí-xi:

—Taquixi, te na dànehé ñáhà-í xii-n nchaa ñáyiu cùu cuendá Yaá cáá dàtná cáá ñⁿ mbéé quiti ní dánícuèhé-güedé, ñáyiu-án cada iní-n sã cùu-yu dàtná ñⁿ xíchí cuéchí vitna tnándaha, te ducaⁿ càda iní-n sã cùu-yu chi cundecú-yu ndihí-gá —duha ní cachí tnúhu espíritú-án xii-í.

¹⁰ Te òré quidé ñàha espíritú Yá Ndióxi xii-í nàcuáa càchí iní-xi, te espíritú néhé tícùú-án ndécá ñàha-xi xii-í cuásaá ñⁿ tindúú dùcúⁿ, te xián ñi dánhé núú ñáhá-xi xii-í ñuú Jerusalén te ñuú-án ñi quee-xi núú ndécú Yá Ndióxi, te ñuú-án cùu-xi ñuú mée-gã. ¹¹ Te ñuú-án ño càhnu cuu-xi chi ducaⁿ ño càhnu cuu mee-gá, te dàtásaⁿ-xi dàtná dàtásaⁿ yúú váha sá nání jãspé yúú cáá dàtná cáá vidriú sá tũu ingá xio ndàa sátá-xi. ¹² Te ni càndéé yuhu ñuú-án sũúni

dùcúⁿ nchaa sá ñúhú dòco, te nchií úxúú yuyèhe-xi, te ndi tnahá ìⁿ ìⁿ yuyèhe-áⁿ xĩndecu ìⁿ caa espíritú xínú cuèchi núú Yá Ndiöxí. Te ndi tnahá ìⁿ ìⁿ yuyèhe-áⁿ yódó tnùnì diu ìⁿ caa xichi cue ñáyiú isràél. ¹³ Te únì yuyèhe-xi nchií ndàa xio nacuáa quène nchíanchii, te únì tucu yuyèhe-xi nchií ndàa nacuáa quée nchíanchii, te únì tucu yuyèhe-xi nchií ndàa xio cuha nacuáa quène nchíanchii, te únì tucu yuyèhe-xi nchií ndàa xio datni nacuáa quène tucu nchíanchii. ¹⁴ Te sá ñúhú dòco-áⁿ chí úxúú tnahá yúú cúú cìmentú-xi, te ndi tnahá ìⁿ ìⁿ yúú-áⁿ ndèé ìⁿ caa diu cue téé ní cáháⁿ tnúhu Yaá cáá dàtná cáá ìⁿ mbéé quitì ní dánicuehé-güedé, te diu mee-gã ní táuchíúⁿ-gã ní cáháⁿ-güedé tnúhu-gá.

¹⁵ Te espíritú sá càháⁿ ndihì ñaha xì-í-áⁿ néhé-xí ìⁿ sá cánì ní cuáha mee-ni díhúⁿ cuááⁿ, te ndihì xiáⁿ chícùhá-xi ñuú-áⁿ, ndihì sá ñúhú dòco ñuú-áⁿ, ndihì nchaa yuyèhe-xi. ¹⁶ Te ñuú-áⁿ ìⁿ-ni nèhe-xi cuendá quèhéⁿ-xi ndihì cuendá càni-xi, te espíritú-áⁿ ní chícùhá-xi ndihì sá néhé-xí-áⁿ ñuú-áⁿ, te nèhe-xi ócó úú cièndú mìl mètrú sá cánì te diu-ni ducaⁿ nèhe-xi cuendá quèhéⁿ-xi, te diu-ni ducaⁿ nèhe-xi sá dùcúⁿ nchaa vehe càa ñuú-áⁿ. ¹⁷ Te dàtnùnì ní chícùhá-xi sá ñúhú dòco ñuú-áⁿ, te xiáⁿ néhé-xí únídico cùmí mètrú sá dùcúⁿ, te ní chícùhá-xi dàtná chícùhá cue ñáyiú ñuyíú-a.

¹⁸ Te sá ñúhú dòco-áⁿ nĩ

cuáha mee-ni yúú vãha yúú sã nánì jãspé, te ñihì ñuú-áⁿ cúú-xí mèe-ni díhúⁿ cuááⁿ, te càa datná cáá vidiúú sá ïo vãha càndoo te túu ndàa ingá xio. ¹⁹ Te ndi úxúú yúú cúú cìmentú sá ñúhú dòco-áⁿ ndèé ndí díⁿ núú yúú vii càa sátá-xi, te yúú díhna ndèé mee-ni yúú vãha sá nánì jãspé sátá-xi, te yúú cúú úú ndèé tucu ingá núú yúú vãha sá nánì zãfirú sátá-xi, te yúú cúú ùní ndèé tucu ingá núú yúú vãha sá nánì ägatá sátá-xi, te yúú cúú cùmí ndèé ingá núú yúú vãha sá nánì èsmeraldá sátá-xi. ²⁰ Te yúú cúú ùhúⁿ ndèé tucu ingá núú yúú vãha sá nánì ònicé sátá-xi, te yúú cúú ìñú ndèé tucu ingá núú yúú vãha sá nánì còrnalíná sátá-xi, te yúú cúú ùsá ndèé tucu ingá núú yúú vãha sá nánì crìsólitú sátá-xi, te yúú cúú ùná ndèé tucu ingá núú yúú vãha sá nánì bèrilú sátá-xi, te yúú cúú ìⁿ ndèé tucu ingá núú yúú vãha sá nánì tòpacíú sátá-xi, te yúú cúú ùxí ndèé tucu ingá núú yúú vãha sá nánì crìsopásá sátá-xi, te yúú cúú ùxí ìⁿ ndèé tucu ingá núú yúú vãha sá nánì jàcintú sátá-xi, te yúú cúú úxúú ndèé tucu ingá núú yúú vãha sá nánì àmatístá sátá-xi. ²¹ Te ndi úxúú yuyèhe sá ñúhú dòco-áⁿ cúú-xí mèe-ni yúú vãha sá nánì pèrlá, te ndùu nĩ yúú cúú ìⁿ ìⁿ yuyehe-áⁿ. Te tnuú cáhnú ndècu xitì ñuú-áⁿ cúú-xí mèe-ni díhúⁿ cuááⁿ, te càa-xi datná cáá vidiúú sá túu ndàa ingá xio.

22 Te ní xini-í sá ñà túú vèhe núú chíñùhu ñáyiu Dútú Ndiòxí cáá ñúú-án, chi mee-ná Dútú Ndiòxí Yaá quidé nchàa-ndi túhú sá vâha ndècu ñúú-án, ndihí Yaá cáá dàtná cáá ìⁿ mbéé quiti ní dánìcuèhé-güedé. 23 Te ñúú-án ñà túú-gã xini ñùhu-xi nchìcanchii dayèhé-xi, te ni yóó ñà túú-gã xini ñùhu-xi, chi mee-ná Yã Ndiòxí dáyèhé-gá ñúú-án ndihí Yaá cáá dàtná cáá ìⁿ mbéé quiti ní dánìcuèhé-güedé. 24 Te cue ñáyiu nchaa ñúú cáá ñùyíú, ñáyiu ní naníhí tàhú xìndecu ñúú-án dáyèhé-gá núú-yu, te nchaa cue téé yìndaha ñaha xii-yu nèhe-güedé sá yíñùhu sá cúú-xí ñúú-án, te quide cahnu ñaha-güedé xii-gá. 25 Te yuyèhe ñúú-án ñà túú tnhí nàndedí, te ñúú-án ñà túú tnhí cùndiquíⁿ. 26 Te nchaa ñáyiu nèhé-yu sá yíñùhu sá cúú-xí ñúú-án te quide cahnú-yu Yá Ndiòxí. 27 Te ñúú-án vã cúú cùndecu ni ìⁿ ñáyiu ndècu ichi cuehé ichi duha, te ni ìⁿ ñáyiu ndehnde, te ni ìⁿ ñáyiu quide sá ñà túú cùu vâha iní Yã Ndiòxí vã cúú cùndecú-yu ñúú-án, chi mee-ni ñáyiu naníhí tàhú ñáyiu yòdo tñuní núú tütú Yaá cáá dàtná cáá ìⁿ mbéé quiti ní dánìcuèhé-güedé, mee-ni ñáyiu-án cundecú-yu ñúú-án.

22

1 Te sátá dúcáⁿ te diu-ni espíritú-án ní dánèhé núú ñáhá-xí xii-í yúte núú ñùhú ndüte candoo canine, te

ndüte-án candeca-xi iní ñáyiu ni caa ni quíhíⁿ, te ndüte-án quée-xí mèi núú núcõo Yá Ndiòxí ndihí Yaá cáá dàtná cáá ìⁿ mbéé quiti ní dánìcuèhé-güedé. 2 Te cuádava tnuú cáhnú yâha xití ñúú-án cáá yúte-án, te xio xio yuhu yúte-án níhnú yùtnu cuuⁿ sávídí-xi, te sávídí nchaa yutnu-án cúú tucu-xi sá cándèca iní ñáyiu ni caa ni quíhíⁿ, te nchaa yutnu-án cúúⁿ sávídí-xi úxúú xito ìⁿ cuiá chi ndi tnahá yóó cúúⁿ sávídí-xi, te nchaa ndaha-xi cùu-xi tãtna sá cúú-xí nchaa ñáyiu. 3 Te vã yóo ìⁿ-gá cada ìⁿ sá ñà túú cùu vâha iní Yã Ndiòxí ñúú-án. Chi ñúú-án núcõo mee Yã Ndiòxí ndihí Yaá cáá dàtná cáá ìⁿ mbéé quiti ní dánìcuèhé-güedé xítaxi tñuní-gá, te nchaa ñáyiu xìnu cuechi núú-gã cada cahnu ñahá-yu xii-gá. 4 Te nchaa ñáyiu-án cundehe núú-yu Dútú Ndiòxí, te tneé-yu cundeé diu-gá. 5 Te ñúú-án vã quíní-gá-yu niú, te ni vã cánèhe chiuⁿ-gá-yu ñuhú cutnùní núú-yu, te ni nchìcanchii ñá túú-gã xini ñùhu-xi dayèhé ñúú-án chi mee Dútú Ndiòxí dáyèhé-gá, te ni caa ni quíhíⁿ cunúú-yu cundecú-yu ñúú-án.

Sa ta cùyatni nduu quixi tucu Xítóhó Jesucrístú

6 Te sátá dúcáⁿ te ní cachí tnúhu espíritú xínú cuèchi núú Yã Ndiòxí-án xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yá Ndiòxí Yaá dáçàhu iní nchaa cue téé càháⁿ

tnúhu-gá nàcuáa cáháⁿ-güedé ní tendaha-gã ñⁿ espíritú xínú cuèchi núú-gã ní quixi-xi ní dánèhé-xi nchaa ñáyiu xínu cuechi núú-gã nchaa nàcuáa cada-gá, te vá cùyàa-gá ducaⁿ càda-gá —duha càchí espíritú-áⁿ.

⁷ Te ní cáháⁿ Xítóhó Jesu-ristú, te càchí-gá:

—¡Ío ndíhi quixi tucu-í!

¡Te ío váha tnahá nchaa ñáyiu tñi nchaa tnúhu cáháⁿ Yá Ndióxi yódó tnùní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xiní núú-í nchaa nàcuáa cada-xi ndéé cuéé-gá. Te sátá dúcáⁿ ñi cuu te ní ngüññi xítí-í núú espíritú sá ñi dánèhé núú ñáhá nchaa xiáⁿ cuèndá chiñuhu-í-xi ni cùu. ⁹ Te ní cachí-xi:

—Vá dúcáⁿ càda-n, chi yúhú dicó xínú cuèchi-í núú Yá Ndióxi dátáa cúu yòhó ndíhi nchaa dava-gá ñáyiu ndècu ndíhi-n ichi-gá cáháⁿ-ndó tnúhu-gá, ndíhi nchaa ñáyiu tñi nchaa tnúhu ndéé núú tütú-a, te xiáⁿ càchí-í sá vá dúcáⁿ càda-n, chi mee Yá Ndióxi ducaⁿ chiñuhu-n-gá —càchí espíritú-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chidáhu-n ñi ñⁿ tnúhu Yá Ndióxi ndéé núú tütú-a, chi sa ní cuyatni cada-xi nchaa nàcuáa ndéé tnuní. ¹¹ Te dañá sã ncháá ñáyiu ndècu ichi cuehé ichi duha na cundecu-ní-yu ichi-áⁿ, te ducaⁿ-ni dañá-n nchaa ñáyiu quide nándi-gá nchaa

sá cuèhé sá dúhá ná càda nahi-ní-yu nchaa sá cuèhé sá dúhá sãni iní-yu, te nchaa ñáyiu quide váha te ducaⁿ-ni na càda váha-yu cundecu-yu, te nchaa ñáyiu quide nchaa nacuáa cùu váha iní Yá Ndióxi te ñi-yu ducaⁿ na càdá-yu cundecu-yu —duha càchí espíritú-áⁿ.

¹² Te ní cachí Xítóhó Jesu-ristú:

—Cundedóho-n tnúhu na cáháⁿ-í-a. Ío ndíhi quixi tucu-í, te canehe-í nchaa sá ndúú tãhú ñáyiu quixi, te nàcuáa ndùu chiuⁿ ní quidé-yu ñⁿ ñⁿ-yu te ducaⁿ cùnduu sá cuññaha-í nduu tãhú-yu. ¹³ Te yúhú cùu-í Yáa sa ndècu ndéé cútnahá ní ngáva ñuyú, te ñi-yu-í cundecu-í ñi caa ñi quíhiⁿ —duha càchí-gá.

¹⁴ Te váha tãhú nchaa ñáyiu sa ní nduu ndoo ní nduu nine iní-xi, chi ñáyiu-áⁿ ñi nduu tãhú-yu quíhu-yu xiti ñuú-áⁿ, te caxi-yu sávidí yutnu nùtni-áⁿ te xiáⁿ candeca-xi iní-yu ñi caa ñi quíhiⁿ. ¹⁵ Te ñuú-áⁿ vá cúu quíhu ñi ñⁿ ñáyiu ndècu ichi cuehé ichi duha, ñi cué ñáyiu quide nduu, te ñi cué ñáyiu ndècu ichi díi iní, te ñi cué ñáyiu sãhni tnaha ñáyiu-xi, te ñi cué ñáyiu chiñuhu nchaa sá ñi cadúha cue téa ñuyú-a càchí-yu cùu ndióxí, te ñi cué ñáyiu tnahá iní dacuàndehnde, te ñi ñⁿ ñáyiu ducaⁿ xíquide vá ndúú tãhú-yu quíhu-yu xiti ñuú-áⁿ.

¹⁶ Te ní cáháⁿ tucu Xítóhó Jesu-ristú, te càchí-gá:

—Yúhú Xítóhó Jesucristú ní tendaha-í espíritú xínú cuèchi núù-í cuendá cachí tnúhu-xi xii-n nàcuáa ndúu tnúhu cúñaha-n xii nchaa ñáyiú ndècu ndihi-n ichi-í dácuàha tnúhu-í ìⁿ ìⁿ ñuú. Te yúhú cúù-í mei ñàní tnáhá ndi Dàvíí, te cada iní-n sã cúù-í dàtná ìⁿ chódíní quiti quène datneé —duha càchí-gá.

17 Te nchaa ñáyiú cùu cuendá Xítóhó Jesucristú Yaa cáá dàtná cáá ìⁿ mbéé quiti ní dánicuèhé-güedé, diu-ni ñáyiú-áⁿ cúù-yu ñáyiú cada iní-ó sã cúù-yu ìⁿ ñadìhí xíchí tnándaha ndihi ñaha xì-gá, te ñáyiú-áⁿ ìⁿ-ni càháⁿ-yu ndihi Espíritú Yã Ndiõxí, te xãhãⁿ-yu ndihi Espíritú-gá xii nchaa dava-gá ñáyiú:

—Chí táquixi —cachí-yu xãhãⁿ-yu ndihi Espíritú Yã Ndiõxí.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnáhá-yu cúñáhá-yu xii nchaa dava-gá ñáyiú-áⁿ, te nchaa ñáyiú cuíní tuha ichi-gá te na quixí-yu, te dicó ducaⁿ cùu táhũ-yu sã cándèca iní-yu

ni caa ni quíhíⁿ.

18 Te nchaa nchòhó ñáyiú ndèdóho nchaa nàcuáa càháⁿ tnúhu Yá Ndiõxí ndèé núú tütú-a càháⁿ-í dóho-ndo. Te núu ìⁿ ñáyiú na còdo-gá tnúhu chido tnùní-yu núú tütú-a, te Yá Ndiõxí ío dandòho ñaha-gá xii-yu chi yáha-yu nchaa tnúndòho yodo tnuní núú tütú-a te núu ducaⁿ na càdá-yu. 19 Te núu ìⁿ ñáyiú na chidáhu dava tnúhu Yá Ndiõxí ndèé núú tütú-a te ñáyiú-áⁿ vã ndúú táhũ-yu cundecú-yu ñuú-gá, te ni vã ndúú táhũ-yu sã cándèca iní-yu ni caa ni quíhíⁿ dàtná yódó tnùní núú tütú-a.

20 Te Xítóhó Jesucristú Yaa càháⁿ sã ncháá tnúhu-a cùu-xi tnúhu ndáá ní càháⁿ-gá ní tecú dóho-í, te càchí-gá:

—Ndáá sã ío ndihi quixi tucu-í —duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítóhó Jesucristú — duha ní xáhaⁿ-í xii-gá.

21 Te Xítóhó Jesucristú ío na chìndee chitúu ñaha-gá xii-ndo nchàa-ndo. Te ducaⁿ na cùnduu. Te ío chí cádá ndèe iní-nã vitna.